


Verikariano Vou Na Baki



The New Testament in the Baki language of Epi, Vanuatu

Verikariano Vou Na Baki
The New Testament in the Baki language of Epi,
Vanuatu
Le Nouveau Testament en Baki langue de l'île d'Épi
au Vanuatu — Niutestamen long Baki lanwis, blong
Epi Aelan, Vanuatu

copyright © 2016 Wycliffe Bible Translators, Inc.

Language: Baki

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files dated 22 Nov 2019

f1528695-aae7-544e-aadd-9084a3830ae4

Contents

Mataiu	1
Mak	107
Luka	174
Jone	294
Imāuano Nalo	382
Romo	496
1 Korin	552
2 Korin	600
Kalesia	634
Eveso	652
Vilipae	668
Kolosia	682
1 Tesalonaika	694
2 Tesalonaika	704
1 Timoti	710
2 Timoti	725
Taitas	735
Vailimon	742
Abe Kulo Ju	746
Yemesi	787
1 Pitere	799
2 Pitere	815
1 Jone	824
2 Jone	836
3 Jone	838
Jut	841
Navisiṽeiano	846

Yesu Kristo Kiano Ioluanu Vou Napano MATAIU Bivitauiaio Verialiano Moti

Tukunu bulati na niosi nei

Niosi nei Yesu Kristo Kiano Ioluanu Vou napano Mataiu jirio, naio berial ioluanu vou ber Yesu naio be toro napano Atua berkario ban kiano tomu nalo nua, ber mia rimei rilarrur kiano tomu nalo. A ea Yesu, verikariano nalo napano Atua mila ban kiano tomu nalo nei ea Naverikariano, moruo nalo amoluo.

Yesu moluo ea kulo Israel kialo yati, naio be nalo tai jo bijalo, mia ioluanu vou nei maka ve nalo nei ga kanalo, be tomu nalo na yetemerba kanalo.

Mataiu midu vatitig torogio nalo na niosi nei ju jibe nei. Beamu, naio berii napano Yesu kiano moluoiano, mia jokia ban berii tukunu na napano Jone baruei ea naio, bija napano Simaro milavon naio. A iorou, naio berii napano Yesu jikar kiano imauano ea tanobuku nei Kalele, ana jo berii ioluanu vou ban tomu nalo, a jo berlogloglo, a jo milarur tomu nalo kialo mieano. Mia iorou bereio, naio berii napano Yesu jaluvo den Kalele miel ba Yerusalemo, a naio berii vite nalo napano Yesu mila ea sude maaro na

kiano imauano. Mia maariano, naio berii napano Yesu m̃aro, a naio meul bereio.

Mataiu berii napano Yesu be Naveriloglogiano novo tai napano mije moroano ka verial nioti na Atua kiano Tuboiano, a berii bajago napano Atua binimei be Parinio Tubo ka kiano tomu nalo. Vite nalo telabo napano Yesu berloglog ka tomu nalo, Mataiu jankanio ea yati jimo.

Yesu berloglog kiano tomu nalo mave ea suku. Ea kiano verloglogiano nene, naio berial bajago napano tomu nalo monoka alaio, ka amei napano Atua ve Parinio Tubo kalo. A naio berial kialo imauano, a kialo moroano nalo, a vite nalo napano mia avokar ea juluvati na kialo meuliano ea yetemerba vou na napano mia Atua rive Parinio Tubo kanio kiano Verloglogiano nalo nei ajua mirano jimo [5] ban bokar mirano aluo [7]

Yesu berloglog kiano tomu duelimo ba juo [12], a jian moroano banlo ka ava averial kiano Ioluanu vou van tomu dolu nalo. Verloglogiano nalo nei ajua mirano duelimo [10]

Jamerjiano nalo napano Yesu ber ka verii tomu nalo napano Atua be Parinio Tubo kalo, a Yetemeriba vou na napano mia ava atuaio. Jamerjiano nalo nene ajua mi-

rano duelimo ba tolu
[13]

Yesu berloglog kiano tomu
nalo ka bajago napano
toro monoka rila ka tak-
isor naio. Verloglogiano
nalo nei ajua mirano du-
elimo ba arolu [18]

Yesu berloglog kiano tomu
nalo, ber vite nalo
napano mia rimaluvo
ea bogo na maaro, bija
yetemeriba vou napano
Atua rive Parinio Tubo
kanio, mia rimaluvo.
Verloglogiano nalo nei
ajua mirano duelimo
valuo ba veri [24] a
mirano duelimo valuo
ba jimo [25]

Torogio nalo na niosi nei

Yesu korobinio nalo a Yesu
kiano moluoiano 1:1—
2:23

Jone Baruei kiano
iñauano 3:1-12

Jone baruei ea Yesu, a
Siñaro milavon naio
3:13—4:11

Yesu mila kiano iñauano
ea tanobuku nei Kalele
4:12—18:35

Yesu jaluvo den Kalele ban
yako Yerusalemo 19:1—
20:34

Yesu kiano sude maaro
napano mila kiano
iñauano yako Yerusalemo
bija vio nalo vaataro
kean Yerusalemo 21:1—
27:66

Yesu meul bereio a kiano
tomu nalo amial naio
28:1-20

Yesu korobinio nalo

Luka 3:23-38

¹ Yesu Kristo naio miy-
otuba ea bajulukuti na
tormoruo juo na tortoru

na kulo Ju nalo korobilo,
nina be Epraamo naio
beamu, bija Teviti naio iorou
kanio. Yesu korobinio nalo
nonovio, sialo ajibe nei:

² Epraamo naio kenerinio
napano Aisak.

Aisak naio kenerinio na-
pano Yakovo.

Yakovo naio kenerinio na-
pano Yuta, naliko kuruanu
dolu nalo.

³ Yuta naio kenerinio juo
Beresi naljuo kuruanu
Jera, naljuo abe savoro,
napano kenielo Temar.

Beresi naio kenerinio na-
pano Esrono.

Esrono naio kenerinio na-
pano Remo.

⁴ Remo naio kenerinio na-
pano Aminatapo.

Aminatapo naio kenerinio
napano Nesono.

Nesono naio kenerinio na-
pano Solomon.

⁵ Solomon naio kenerinio
napano Boasa, ana Boasa
nene napano kenieno na-
pano Reavo.

Boasa naio kenerinio na-
pano Ovete, ana Ovete
nene na kenieno Ruta.

Ovete nene kenerinio na
Jese.

⁶ Jese naio kenerinio na-
pano Teviti, ana Teviti
nene napano be parinio
tubo na vio Israel.

Teviti naio kenerinio
napano Solomon, ana
Solomon nene na kenieno
tira na Uraia koano
jukamu.

⁷ Solomon naio kenerinio
napano Reopoam.

Reopoam naio kenerinio
napano Apia.

Apia naio kenerinio napano Asa.

⁸ Asa naio kenerinio napano Jeosevata.

Jeosevata naio kenerinio napano Joramo.

Joramo naio kenerinio napano Usaia.

⁹ Usaia naio kenerinio napano Jotamo.

Jotamo naio kenerinio napano Easa.

Easa naio kenerinio napano Esekaia.

¹⁰ Esekaia naio kenerinio napano Manasa.

Manasa naio kenerinio napano Amon.

Amon naio kenerinio napano Josaia.

¹¹ Josaia naio kenerinio napano Jekonaia naliko kurano nalo. Naruei ea kialo bogo nei, kulo buru-venuo dolu napano Bapilon nalo abano aburu bulag kulo Israel nalo ka ava aimāu kurano ga tibe na yako Bapilon.

¹² Ka bogo napano amimāu kurano ga yako Bapilon kia ga vo, Jekonaia naio kenerinio napano Sieltiel.

Sieltiel naio kenerinio napano Serupapele.

¹³ Serupapele naio kenerinio napano Aviyuti.

Aviyuti naio kenerinio napano Eliakim.

Eliakim naio kenerinio napano Aso.

¹⁴ Aso naio kenerinio napano Setoko.

Setoko naio kenerinio napano Akimi.

Akimi naio kenerinio napano Eliuti.

¹⁵ Eliuti naio kenerinio napano Eliesa.

Eliesa naio kenerinio napano Matano.

Matano naio kenerinio napano Yakovo.

¹⁶ Yakovo naio kenerinio napano Yoseve, napano koano Mere. Mere nei, naio be Yesu kenieno, namā aberii naio ka be Naverikariano.

¹⁷ Naruei jikar ea Epraamo binimei bokar Teviti, be taara duelimo ba veri [14]. A jikario ea Teviti binimei bokar bogo napano kulo Bapilon aburu bulag kulo Israel nalo ka ava aimāu kurano ealo, be bunu taara duelimo ba veri [14]. A mia jikario ea bogo na nalo ajua vio Bapilon binimei bokar bogo napano Kristo kiano yotubaiano, be bereio taara duelimo ba veri [14].

Abar Yesu

Luka 2:1-7

¹⁸ Ninei be tukunu napano abar Yesu Kristo eaio, mārabo nene ninei: kenieno tira napano Mere, na beamu aberkakario ka mia naio soro ka toro tai, siano Yoseve. Ana bogo na maka asoro vo, mia Mere mijoglubar ka be mābono, napano mābono nei binimei ea Niununo Lu. ¹⁹ Ana Yoseve napano aberkar ka mia naio rivuru Mere nei ve koano, naio be toro novo tai, a naio maka tomā river Mere naio mila vite na bova tenia. Mia naio mial ka mia nalo ve juo monoka ala korov kialo

verikariano nei, mia naio jidomii ka mia rimaukanio ea bajago novo tai napano melumu ga, bior naio maka sidom rila Mere rimou mēle rivor vite nei. ²⁰ Mia

bogo napano naio jidomii ka mia rila tibena, Atua kiano nailiano tai miyotuba kanio ea monovovano tai bogiano, naruei nailiano nei berii kanio, berinavo “Yoseve, jau Teviti kiano bajulukuti, jau kojog re rivova ka mia kovuru tira na Mere ka ve koamo, bior tete na joa mabono, binimei ea Niu-nuno Lu. ²¹ Mia Mere naio rivar tete sumano tai, mia monoka jau kesisia siano ka Yesu Naioruriano, bior mia naio rilakon nonovio kiano tomu nalo kialo kari-ano nalo.”

²² Naruei vite nalo nei miyotuba jibe na ka rila iliano tai rimei rive riano tavukia na Atua naio berial nua ea niono Naverialiano Aisea, ²³ napano naio berenio, berinavo

“Mia merevono tai na maka rijikia sumano vo, mia naio ve mābono, mia naio rivarlar kenerinio sumano tai, mia nalo asisia siano aver ‘Emanuela.’” Ais 7:14

Sio nei “Emanuela,” berenio “Atua to kiteaku.”

²⁴ Naruei Yoseve naio je-vijo bereio, ana naio mila jibe ka napano Atua kiano nailiano berkanio, ana joro ka Mere, buru be koano. ²⁵ Mia maka nalo atubiju vo bano-o bokar bogo napano

Mere naio barlar kenerinio nene karina. Ana bogo napano Mere bar kiritete nene, ana mo Yoseve jisia tete nene ka Yesu.

2

Tomu nalo namā amijikia batitig bajago na m̄arivitano nalo abinimei ka aial Yesu

¹ Yesu kiano yotubaiano ea komeli tai na siano Betleem, ea tanobuku na vio Yutea, ka bogo na Erot naio be parinio tubo ka kulo Israel nalo. Mia maka vesiou ga ka bogo nene, ana tomu tai namā amijikia batitig bajago na m̄arivitano nalo, abinimei ea vio Yerusalemo. Nalo nei ajumolu ea kialo buruvenuo ea vio namā m̄erenio mijivi eaio abinimei. ² Naruei nalo abika den tomu nalo, aberenio “?Tete na miyotuba voniganei, na aber mia naio ve kulo Israel kialo parinio tubo, naio jo be? Kumemi numial kiano m̄arivitano nene ruei, miyotuba ea vio napano m̄erenio mijivi eaio, ana kumemi nubinimei ka nuvilivu ka siano.”

³ Bogo na iliano nei binimei bokar Parinio tubo Erot naliko kulo Yerusalemo nalo tealō, amijogio, mia nalo maka asaaro kanio. ⁴ Naruei Parinio tubo Erot naio bio tomu na tortoru na kulo lu nalo naliko naverloglogiano na tuboiano nalo abinimei amial naio, ana naio bika denlo, berinavo “? Mia Naverikariano namā aju aberiio vurua na, mia naio rimei riyotuba to be?”

⁵ Nalo nei aberdoŋe, aberinavo “Mia Naverikariano naio riyotuba ea tanobuku na vio Yutea, ea komeli na vio Betleem.” ⁶ Nina bior beamu naverialiano tai naio bivitauiakar iliano nalo nei, berenio

‘Atua naio ber jibe nei, berinavo

“Kamiu na vio Betleem, maka kuvijikia kuver kulo dolu na tortoru nalo na ga ea vio Yutea, nalo ga abe to-moruo loa kamiu, ana kamiu kumitutano, makanio,

bior mia navurim̃araboiano na toru tai riyotuba ea kamiu rimemedu,

naio rivitikar vatitig kiaku.””” kulo Israel nalo.””” Maika 5:2

⁷ Karina Parinio Tubo Erot naio bio bena ga tomu napano amijikia bajago na m̃arivitano nalo, abokar vioriano tai naliko naio ga, ka naio jidom rijogio vatitig denlo ka m̃arivitano nene naio miyotuba memedu ka bogo vaio. ⁸ Bisi na naio ber kalo, berinavo “Monoka kamiu kuva kuvisirag tete nene, ver kuvilealio, ana mo mia kumei kuverialio va kiniou bereio, ka mia kiniou bunu nava nolotu ka siano,” bisi na naio miilalo aba Betleem. Mia kanano iliano nei be sibiano ga, naio jidom rileal tete domudomu nei ka mia naio riva ruebinio ga.

⁹⁻¹⁰ Ana tomu nalo nei amiagago ka Parinio Tubo Erot kiano iliano nalo bisi, ana nalo aban ea kialo m̃arabo, ana amial bereio

m̃arivitano nei nua amialio naio jo merera ea vio na m̃erenio mijivi eaio. Mia bogo na nalo amial bereio m̃arivitano nene, nalo amijog bo toru laka, ana m̃arivitano nei naio buru m̃arabo kalo abano-o aboru ea vio na kiritete nei naio mon eaio. ¹¹ Naruei nalo aba joomo ea yimo, amial kiritete bija kenieno Mere. Naruei nalo aminie kamu kean naio, amilivu ka siano. Karina nalo abetavo ea kialo basaro nalo, ana abar kanano jidomiano nalo banio, niogo tai, bija bonotanunu na siano vrakenses, bija pomat, na puruveru nene bavin laka, siano mer.

¹² Naruei bogiano, ana Atua mil banlo ea monovovuano tai, berburelo ka mia avan re bunu aial Erot. Naruei nalo ajumolu, ajel ea m̃arabo dolu aban bereio ea kialo vio.

Amidu Yesu sesa nene, aburo aba Ijivi

¹³ Bogo na tomu nalo nei ajuvan vio nei ruei abano, ana Atua kiano nailiano tai miyotuba ka Yoseve ea monovovuano tai, naio berkanio, berinavo “Yoseve, jau kotumolu, kodu kiritete domudomu naljuo keniene, kuva kuvitu bilig ea vio Ijivi, bior Tubo Erot naio jom̃a jidomii kakar ka mia riila kiano tomu na mira nalo asirag kiritete domudomu na ka mia auebinio. Kamiu monoka kuva kuvitua vio na rivano-o ver kiniou never kamiu kumei, ana mo kumei

bereio.” ¹⁴ Ana Yoseve jumolu, midu kiritete domu-domu naljuo keniene, ka bogiano nene ga ajumolu amiel ka avan ea vio Ijivi. ¹⁵ Nalo ajua vio na jiou kija, bano-o bokar bogo na Parinio Tubo Erot naio m̃aro.

Tena maluvo jel jibe nei ka mia rimemedu ka Atua kiano iliano tai na naio beriio ban Naverialiano Osea nanua ruei, berinavo

“Keneriku joa vio Ijivi,
mia kiniou nobio naio ka
rimei bereio.” Osea
11:1

*Tomu na mira amue
tañaria tete nalo*

¹⁶ Mo bogo na Parinio Tubo Erot naio mijikia ka tomu napano amijikia batitigio m̃arivitano amiyotel ea naio, maka bunu amei eaio, naio tinienmimi toru, ana naio ber ka kiano tomu na mira nalo, ka ava asirag kiritete sum̃ano nalo napano ajua vio Betleem bija komeli nalo napano aju jouro ea tanobuku nei, nalo nonovio na kialo yuka maka rivokar yuka ve juo vo, ka mia nalo auebinvinlo añarm̃aro. A naio buluku bogo nei memedu jibe nei, bior iliano napano naio mijogio den tomu nalo nei nua, aberial memedu ban naio ka bogo napano m̃arivitano nene naio miyotuba garuei be moti eaio.

¹⁷ Ea m̃arabo nei, vaio napano Naverialiano Jeremaia ber nua bini-mei miyotuba be riano, na naio berinavo

¹⁸ “Jooa na tegiano tai amijogio ea vio Rama,
tegiano na tinie
jaleleiano.

*Rejel naio joñã jegi kumabinio nalo, naio miilkue ka aioliṗiliṗi naio,
bior kumabinio nalo añarm̃aro liki.” Jere-
maia 31:15*

Yoseve midu Yesu sesa ajuvan vio Ijivi, abinimei bereio ea vio Nasarete

¹⁹ Mia bogo na Parinio Tubo Erot naio m̃aro, Yoseve nalo aju kia ga Ijivi vo, naruei naio monovovu, m̃ial bereio Atua kiano nailiano tai, napano naio binimei berkanio, ²⁰ berinavo “Yoseve, jau kotumolu, kodu tete na vija keniene, kami u kuan bereio ea kenemiu venuo napano Israel, bior Parinio Tubo Erot nanua m̃a jidom ruei kiritete na, naio m̃aro ruei.” ²¹ Naruei Yoseve naio jumolu, midu tete bija keniene, ana nalo aban bereio ea kialo venuo napano Israel.

²² Mia bogo napano Yoseve mijogial ka Akaleasi jo jeleig karam̃ano Erot, ka naio be parinio tubo ea vio Yutea, Yoseve naio merou ka rivan bereio ea vio Yutea. Ana Atua m̃il bereio ban Yoseve ea monovovuano tai, berbure naio ka mia naio rivan re bunu ea vio Yutea bereio, naruei Yoseve naio ban ea vio dolu, vio nene siano Kalele. ²³ Ana nalo

aba ajua komeli tai napano ea tanobuku na, siano Nasarete.

Vite na maluvo jibe na ka rila naverialiano nalo kanalo iliano nalo ave riano, napano m̃a aberii Verikariano nei nanua ruei, aberinavo

“Mia averenio naio be toro re Nasarete tai.”

3

Jone Baruei joa vio yauo, naio jõma mioliolu ka navili-giano

Mak 1:1-8; Luka 3:1-18; Jone 1:19-28

¹ Yesu naio miluo binime toru, nina ea vio Nasarete kia ga vo, mia ka bogo na, Jone Baruei miyotuba binime ea vio yauo na Yutea, naio mioliolu berinavo. ² “Kamii monoka kuvilig kamii bior Atua kanano navenatuboiano jo binime.” ³ Mia ninei be toro napano Naverialiano Aisea naio jõma berial nua ruei, berinavo

“Toro tai bio jouo ea vio yauo, berinavo

‘Kamii kuvila Atua kiano m̃arabo rimemedu, ka mia naio

riyotuba ea kenemiu meuliano nalo.’” Ais 40:3

⁴ Jone Baruei nene naio javukia Naverialiano Elaija re nua, jibe ka napano naio maka m̃ano kulum̃arauo novo nalo, mia m̃ano kulukoti amim̃aukanio ea vijinio kamele ga a naio mior m̃ano kulukoti ka niati

kulubue marauo tai ga. Sano sinaniano na yeturu nene naio be surubu nalo ga bija vite sesei napano sukabak nalo amim̃aukanio. ⁵ Mia tomu na vio Yerusalemo bija komeli dolu nalo na vio Yutea, bija komeli nalo napano m̃a aju vaataro ka m̃arau ei na vio Yortano, abinime ka naio. ⁶ Ana aber bulag kialo kariano nalo banio, naruei naio baruei ealo ea m̃arau ei na vio Yortano.

⁷ Be bogo tai, Jone mial ka napano be tiniobi na terati juo na nalotuano na kulo Ju nalo kialo, nina be Varisis bija Satusis nalo, abinime ka naio rivaruei ealo, mia naio mil jikili banlo, naio berinavo “? Kamii kumitavukia maro nalo ga napano amerou ka sebi tai naruei nalo aburo, mia kamii kuberiam̃a mia kumijikia kuvuro ka sebi napano mia Atua riila rime, napano kamii maka kuvilig vatitigio kamii rivu vo?

⁸ A ver kamii kube riano ka kubilig tiniemiu bior kenemiu kariano nalo, mia kuvila titai medave ea kenemiu meuliano nalo ka mia ajikia ka kube riano. ⁹ Mia maka rivu kam̃a kuvarvar ka kamii, tibe kanio nam̃a kumilaio, kuberinavo ‘Kito robo ruei, robe Epraamo kiano bajulukuti nalo.’ Mia kiniau neber ka kamii, neber vite na maka ve tite-nia, bior Atua naio mijikia rivar puruveru nalo nei riviliglo amei ave Epraamo

kiano bajulukuti nalo, ka adu jelemiu. ¹⁰ Neber

ka kamiu, yekesi tai jua burupati iesi ruei, ju rorea ka mia ate bulag buruiesi nalo napano maka avar m̃arati nalo na bo, mia ate bulaglo avukulo avan ea sebi sisenlo. ¹¹ Kiniou nojukamu nebinime, nojor̃na nabaruei ea kamiu ka uei ga, ka rila rimeravo ka kamiu kuvilig kamiu ruei, mia be toro dolu tai napano jo binime iorou ka kiniou. Naio jo loa kiniou, a kiniou maka navare ka neive kar kiano kulubue, p̃elina nala kiano im̃auano dolu tai. Mia naio naruei mia rivaruei ea kamiu ka Niununo Lu vija kiano sebi ka sisen kon bulag iorosoro nalo den kenemiu meuliano nalo. ¹² Naio midukar titai jibe ka m̃arteja joa jum̃ano, ka mia naio rilakon vatitig kanano uiti nalo. Mia naio rivar uiti napano be nioti uiti na bo, ava joomo ea kunuano, mia nalo na abe vinikiti ga, mia naio risebilo ka sebi tai napano maka rijikia rim̃aro bogo tai leleio.”

Jone naio baruei ea Yesu

Mak 1:9-11; Luka 3:21-22

¹³ Mia Yesu naio juvan vio Kalele, binime, ea m̃arauei Yortano, ka Jone naio rivaruei eaio. ¹⁴ Mia Jone naio jidom riverbure be deio, ana naio ber “?Jum̃abe ana jau kobinime, ka navaruei easo? Kejiio, memedu ga ka jau kavaruie ea kiniou.”

¹⁵ Mia Yesu naio berdope, berinavo “Peli ga koig, mia tibena re. Jau kala ninei beamu vo, bior bo laka ka mia kito ve juo monoka rotum̃a rataki vite nalo napano Atua jidom ka kito roim̃aukanio.”

Naruei Jone mijamo ka Yesu binime, ana naio baruei eaio.

¹⁶ Mia bogo napano Jone baruei eaio bisi, ana Yesu nene jaluvo den uei, ana vaarakurano naio mial vio mave betavo ka naio, ana naio mial Atua kiano Niununo Lu batove javukia vaama tai, binime bujo jua Yesu. ¹⁷ Naruei Atua mil batove, naio ber “Nina be keneriku napano kiniou nejidom m̃elea naio. Kiaku jidomiano joa naio, kiniou najaaro toru m̃ele ka naio.”

4

Sim̃aro nalo kanalo parinio tubo, naio mila von Yesu

Mak 1:12-13; Luka 4:1-13

¹ Iorou ka bogo napano Jone Baruei naio baruei ea Yesu bisi, ana Niununo Lu buru Yesu ban ea vio yauo tai ka sim̃aro nalo kanalo parinio tubo rila von naio.

² Naruei Yesu naio mondulu ka bogoti duelimo va veri [40] a bogiano duelimo va veri [40], ka bolkouo, mia iorou ka bogoti nalo nei ana jijer taneaio. ³ Ana mo Sim̃aro, toro nam̃a milavonvon tomu nalo, naio ber ka Yesu, berinavo “Verenio jau

kobe Atua kenerinio riano, ana mo kover ka puruveru nalo na aju na, ka amei ave joko, ka kesen tai.”

⁴ Ana Yesu naio berdoŝeio, berinavo “Makanio, bior Niosi Lu naio berenio ruei, berinavo

‘Maka toro rijikia rimeul ea ga sinaniano, mia toro mijikia rimeul ea iliano nonovio napano Atua naio berenio.’” Tiut 8:3

⁵ Mia Siĉaro naio milavon Yesu kiano jidomiano bereio, naio jiloglog Yerusalem, naio buru kiano jidomiano bavin mave ea Atua Kunuano Lu.

⁶ Naruei Siĉaro ber ka Yesu, berinavo “Verenio jau kobe Atua kenerinio, ana mo jau koviako kavatove ea borotano. Mia jau kovu ga na, bior Iliano Lu naio berii Atua, berinavo

‘Mia naio mijikia riila kiano nailiano nalo, ka amei atu avitikariso.

Mia nalo adukarso ga ka ĵumalo mave, ka mia kavan re jaamo ea puruveru.’” Iouano 91:11,12

⁷ Ana Yesu berdoŝe Siĉaro, berinavo “Makanio, bior Niosi Lu ber bunu ruei, berinavo

‘Maka rivu ka kalavon kanamo Tubo Atua, jau katadua re naio ka riila kiamo vite tai.’” Tiut 6:16

⁸ Naruei Siĉaro naio milavon Yesu bereio, ka jidom rivuru Yesu kiano

jidomiano rivavin ea burusuku na toru laka tai, ka mia naio rijikia siloglog buruvenuo nonovio na vio yetemeriba nei ka Yesu, rivija vite maraiu nene nalo. ⁹ Naruei Siĉaro milavon Yesu bereio va rolu nene, berinavo “Saba nalo na komial na mia kiniou najamo kalo vanso, verenio jau keinietano, jau kolotu ka kiniou.”

¹⁰ Mia Yesu naio mil ban Siĉaro, berdoŝe kiano iliano, berinavo “Jau kovuro den kiniou, Siĉaro. Niosi Lu naio berenio ruei, berinavo ‘Mia jau kolotu ka ga Tubo kiamo Atua, naio ga takurano, mia naio ga kala kanano iĉauano.’”

¹¹ Naruei Siĉaro buro den Yesu, ana nailiano nalo abinimej, aju naliko amiyoluĵiluĵi naio.

Yesu jikar kiano iĉauano ea tanobuku na Kalele

Mak 1:14-15; Luka 4:14-15

¹² Mia ka bogo nei, parinio tubo Erot kiano tomu na mira nalo tai aba abokar Jone Baruei, ana aburu naio ban ea yimo na tetavokoiano. Mia ka legiano nene ga Yesu naio mijogial liliano nei, naruei naio ĵumolu den vio na, ana ban bereio ea tanobuku na vio Kalele.

¹³ Mia naio maka riva toa vio Nasarete, mia naio mijaka batove ea mĉarkomeli na vio Kapeneam, napano naio jo vaataro ka ueiyabo na

toru na vio Kalele. Vio nalo nei napano jikar Kalele batove boru koyou ea tei, beamu borotano nei naio be Sebulano kiano bajulukuti nalo bija Naptali kiano bajulukuti nalo kialo nua.

¹⁴ Tenei miyotuba jel jibe nei ka mia rila iliano nalo napano Naverialiano Aisea berialio nanua ruei, rime rive riano tibe ka napano naio berenio, berinavo

¹⁵ *"Kamiiu tomu nalo na Sebulano bija Naptali kialo vio nalo,*

napano kamiiu kumitu iviso ka m̃arauei na vio Yortano bija tei na toru,

kamiiu na vio Kalele, vio na tomu na maka ajikia Atua, kamiiu kuvijog iliano nei:

¹⁶ *Tomu nalo napano m̃a aju nunu ga, mia nalo aial burum̃ara yulu tai.*

Nalo na aju nunu dam̃ariga, ka mia m̃a am̃arm̃aro ga,

mia burum̃ara yulu tai naio rimereralilo."
Ais 9:1,2

¹⁷ Mia jikar ea bogo nei, ana Yesu naio joṃa mioliolu, naio berinavo "Kamiiu monoka kuvilig kenemiu jidomiano nalo ka kenemiu kariano nalo, bior navenatuboiano na vio mave naio binime vaataro ruei."

Yesu bio kiano naia-gagoano veri

Mak 1:16-20; Luka 5:1-11

¹⁸ Yesu naio joṃa mieliel kiki jakii baramudou na

ueiyabo napano toru na vio Kalele, ana naio mial tomu juo, Saimon Pitere naio kuruano Adru. Naljuo ajum̃a ajuvan suṣede, bior naljuo amijikia bajago nam̃a aburu niado. ¹⁹ Mia naio ber kalo, berinavo "Kamjuo kuvitakisoriu, mia kiniou nala kami kuve navagadeano na tomu nalo." ²⁰ Mia vaarakurano, naljuo ajuvan kialo suṣede nalo ajubo, ana nalo ajakisori Yesu.

²¹ Karina Yesu naio miel ban lie kija ga bereio, ana naio mial tomjuo dolu bereio, Yemesi naio kuruano Jone, nalo abe Sepeti kenerinio nalo. Nalo ajua kialo buluku uako naliko karam̃alo, nalo ajum̃a amila batitig kialo suṣede. Naruei Yesu biolo ka atakisorio, ²² mia vaarakurano ga, nalo ajumolu soṣeli, ajuvan karam̃alo jobo ea kialo uako, ana nalo ajakisori Yesu abano.

Yesu naio mioliolu, berloglog tomu nalo, a naio mieliel ka mieiano nalo

Luka 6:17-19

²³ Naruei Yesu naio joṃa mieliel ea vio nalo napano Kalele, naio joṃa berloglog kulo Ju nalo ea kialo yimo na lotuano nalo. Naio joṃa berial ioluano novo nei na Atua kiano navenatuboiano, mia naio mieliel ka tomu napano nam̃a amie, naio milarur tomu nam̃a mieiano dedade nalo milalo, abo bereio. ²⁴ Naruei ajukunu ka Yesu siano banbano barko

reraio bunu burum̃ara tanobuku na vio Kalele tivelinio batove, napano ajisia ka Siria. Naruei tomu nalo na vio na bunu abarvar kialo namieiano nalo abinimei amial Yesu. Nalo nene tealo amie, tealo amijog niabele mijalele, tealo niadu jualo, tealo ajum̃a amiabulu m̃arm̃aro, mia nalo tealo napano niabele nalo am̃arm̃aro, mia Yesu naio milarurlo abo bereio. ²⁵ Mia tiniobi toru na tomu nalo ajakisor Yesu ka bogo na. Nalo nei amolmoluo ea vio Kalele, ea vio napano ajisia ka Komeli Duelimo, mia ea vio Yerusalemo a ea vio dolu nalo na vio Yutea, a ea vio nalo napano jua m̃arauai na vio Yortano tivelinio bano. Nalo na vio nalo nei naruei nalo ajakisor Yesu ea bogo na.

5

*Yesu berloglog tomu nalo
Luka 6:20-23*

¹ Mia be bogoti tai, ana Yesu naio mial tiniobi toru abinimei aju naliko, naruei naio bavin ea suku tai. Jibe ka kialo naverloglogiano tai, naio jotano, ana na kiano tomu nalo abinimei ajutano jeliviv eaio, ² ana na naio berlogloglo.

³ Mia Yesu kanano iliverloglogiano nalo na tortoru tai ajibe nei. Naio berinavo “Nalo napano abitilubar ka maka aleal Atua ea kialo meuliano nalo vo,

mia ilivuiano rimei toalo,
bior mia Atua naio rive Parinio Tubo ka tomu nalo na ajibe na.

⁴ Nalo napano amijog bova ka jaleleano nalo, ana ajum̃a ajegi,
mia ilivuiano rimei toalo,
bior mia nalo avokar lupilupiano, ka mia nalo ajog rivu bereio.

⁵ Nalo napano tinielo melumu bo, mia ilivuiano rimei toalo, bior napano Atua berkario ruei
ka mia rije tonovo na yetemeriba nei vanlo.

⁶ Nalo napano ajidom m̃lea bajago napano memedu javukia napano m̃a Atua naio jidomio,

mia ilivuiano rimei toalo, ana na mia nalo aial bajago na memedu nalo nei amei avujo lou vatitig ea kialo meuliano nalo.

⁷ Nalo ga napano ajum̃a tinielmiia tomu dolu nalo, mia ilivuiano rimei toalo,
ka mia Atua naio mijikia tinienriialo ve toru.

⁸ Nalo ga napano kialo iviso meravo bo, ilivuiano rimei toalo,
ka mia aial Atua.

⁹ Nalo ga napano abe tomu nam̃a amila tum̃aro, mia ilivuiano rimei toalo, ka mia Atua naio riviolo ave kenerinio nalo.

10 Nalo ga napano amonea
 Atua, napano mia mña
 tomu dolu nalo amila
 baravo kalo bior kialo
 moneano nene,
 mia ilivuiano rimei
 toalo, bior mia
 Atua rivurlo ava
 jouro ea kiano nave-
 natuboiano.

11 “Kamui napano verenio
 tomu nalo amila lelan
 kamui ajumña amijil kamui,
 a ajumña amila sibi ea
 kamui, napano ajumña aber
 niegeniege kamui, nina bior
 kube kanaku tomu nalo, mia
 ilivuiano rimei toa kamui
 bunu. 12 Kamui kuvisidom
 bijovijon re, kuvisaaro ga,
 bior amila kiki kamui ea
 bajago na ga amila ka
 naverialiano nalo re nua.
 Mia kamui kuvar kenemiu
 burumñara ijaiano ea vio
 mave.”

Vaatei bija yulu

Mak 9:50; Luka 14:34-35

13 Ana Yesu ber bunu, beri-
 navo “Kamui kube vaatei
 na tomu nalo na yetemeriba
 nei, napano kenemiu ba-
 jago novo naio bakar vio
 yetemeriba nei maka riva
 rivova laka. Ana verenio
 vaatei nei rijeja re bunu
 rivu, maka bunu rijikia rila
 kanano imñauano, a maka
 bunu titai rijikia rila rivu,
 mia naio bo ka ga avukuio
 rivano.

14 “Kamui kumitavukia
 yulu na yetemeriba nei.
 Mia verenio mñarkomeli tai
 toa suku levlevi mave, mia
 bogiano tomu nalo napano

aju koalabo amijikia aial
 yulu na mñarkomeli nene,
 tomu nalo napano ajuaio
 maka ajikia aduvan kanalo
 mñarkomeli nei. 15 Mia bogo
 napano verenio rejelan yulu,
 kito maka rejikia reivekoio
 ka baja bereio, mia kito
 rejelan ka reive takilele
 mave ka vio reraio amerera.
 16 Ana ea bajago nene ga,
 kamui monoka kuvijamo
 ka kenemiu yulu nalo na
 kenemiu meuliano amerera
 rivokar tomu nalo, ka ajikia
 aial vatitig imñauano novo
 nalo napano mña kamui
 kumimñaukanio. A bogo
 napano nalo aial kenemiu
 imñauano novo nalo, mia
 avamenea Karamemiu na-
 pano joa vio mave riviorio.”

*Yesu naio berii Mosis
 kiano tuboiano nalo*

17 Ana Yesu berii bunu,
 berinavo “Mia maka rivu ka
 kamui kuvitumña kuver kin-
 iou nebinimej ka nala lelan
 Mosis kiano tuboiano nalo
 vija naverialiano nalo kialo
 iliano nalo, pñeli ga, maka lele
 tibena. Kiniou nebinimej
 ka mia natakii masosoua
 nonovio, ka nevisi vatitig
 nioti nene nalo. 18 Kamui
 kuvisidomiikar vatitig iliano
 nei, mia tuboiano nalo nei
 maka ajikia ava kovio bogo
 tai-o-a ka vio mave vija
 borotano ave juo avakovio.
 Tuboiano nei be ilisesa
 nene nalo telabo, mia maka
 lele kiri mñariliano na tai
 tertelisu nalo nei rijikia
 rivakovio, riva rivokar

bogo na kiano im̃auano nalo amalmaluvo nonovio. ¹⁹ Tenene na, verenio toro tai rilakorov kiri tuboiano nalo nei tertelisu nei tai, mia naio toṃa riverloglog toro dolu ka mia nalo atavukia naio, mia toro nene naio toa vio tai napano jotano maaro ea Atua kiano navenatuboiano. Mia verenio toro na naio bakar batitig tuboiano nalo nei, a naio joṃa berloglog tomu dolu nalo ka mia ala tavukia naio, mia naio ve toro na toru tai ea Atua kiano navenatuboiano. ²⁰ Kamiu kumitum̃a kumisidomii kuberenio naverloglogiano na tuboiano nalo a Varisis nalo abe tomu na memedu nalo laka ruei, a kamiu monoka kuvila bajago nalo na memedu lie vo tuvululo, ver p̃eli, mia kamiu kuvijikia re kuva jouro ea Atua kiano navenatuboiano.”

*Yesu berii natiniemimiano
Luka 12:57-59*

²¹ Ana Yesu berii bunu, berinavo “Kamiu kumijog ruei ka napano aberloglog kiado tormoruo nalo re nua beamu, aber ‘Kouebini re toro,’ mia bunu ‘Toro na riuebin toro rim̃aro, mia memedu ka avuru naio riva komeli ka mia ail vanio.’ ²² Mia kiniou nei, neber ka kamiu: verenio toro na tinienjer kuruano, mia memedu ka avuru naio riva komeli labo, toro napano mil bova toru ka kuruano, naio berenio ‘!Jau kobo ka ga iakurano!,’ memedu ka avuru naio ea kiado tomu na tortoru nalo kialo vioriano. Mia verenio toro

tai napano naio mil m̃ele ban kuruano, naio berenio ‘Pariparimo miavovu’ mia memedu ka mia avuku naio rivan ea sebi ea vio na jogvaiano. ²³ Ka tena, verenio bogo tai jau komei ea Atua kiano vio na sida ka mia kodu kanamo ijaiano van naio, mia tiniem rim̃aio ka napano kanamo vite tai joa jau kamjuo kuruamo, ²⁴ jau monoka kodu batitig kanamo ijaiano tobo ea vio na sida nei beamu vo, ana monoka kavan bereio kala merevuiano kam ve juo beamu vo, avona iorou kanio ana mo jau komijikia komei bereio ka kodu kanamo ijaiano rivan Atua.

²⁵ “Verenio jau bogo tai kovilvil ea toro tai ka titai, karina naio jidom rivurso kava komeli kario, mia bo ka jau kavan soṃeli keial naio ka keil vatitig vija naio tukamu, ka bogo napano maka avuruso kava komeli vo. Verenio makanio, p̃eli mia naio ruduso kotoa toro na toru jum̃ano ka naio tibureso, a mia naio naruei ruduso kotoa toro nam̃a bokakar toro jum̃ano, ka toro nene naio ruduso kotoa yimo na tetavokoiano. ²⁶ Kiniou neber kaso, verenio tibena mia jau maka kejikia kataluvo den yimo na tetavokoiano rivan rivokar bogo na mia jau kovulu nonovio kanamo mauo beamu, avona bisi ana jau komijikia kataluvo.”

Yesu berii siakaiano

²⁷ Ana Yesu berii bunu, berinavo “A kamiu kumijog

bunu ruei ka napano aber-loglogio ruei, aber 'Mia kala re siakaiano.' ²⁸ Mia kin-iou neber ka kami, verenio toro na biti va ea tira tai ka naio jidom rivurio, mia naio mila siakaiano ban tira nene ruei ea kiano iviso. ²⁹⁻³⁰ Verenio miramo tivelinio rilaso kala kariano, bo ka jau ketelario, kovuku rivano. A verenio junāmo tinene rilaso kala kariano, bo ka jau ketelario, kovuku rivano. Bo kanio jau kalavenio niabemo togio tibena, ver pēli, mia mokotenamo reraio rivakovio ea vio na jogvaiano."

Yesu berii titigiano

Mataiu 19:9; Mak 10:11-12; Luka 16:18

³¹ Ana Yesu berii bunu, berinavo "Bereio, aber bunu nua, aberinavo 'Toro napano jitiglar koano, mia naio monoka rudu mēsi na silubariano tai vanio, napano naio berii meravo ka naio jitiglar naio ruei, tira na maka bunu ve koano.' ³² Mia kin-iou neber ka kami, ver toro na ver jitiglar koano, ka iakurano ga maka tira nei naio rive kodovo van koano neibano jukamu, mia ver tira neibano naio rila siakaiano, mia koano moruo naio be burupati nene. Mia toro na ver soro ka tira na jibe nei mia naio mila siakaiano."

Yesu berii junābe ka toro na mila verikariano ea Atua

³³ Ana Yesu berii bunu, berinavo "Kami kumijog

bunu ruei ka nalo aberii ka kiado tormoru nalo nua bogobe, aberver jau kover Atua siano ka mia rila kanamo verikariano to sikili, mia maka jau kalakorov bereio kanamo iliano nene. A vaio napano jau koberkar ban Atua, monoka jau kalaiio.

³⁴ "Mia kin-iou neber ka kami, neber jau maka kejikia kover titai siano leleio ka rila kanamo verikariano to sikili. Maka kejikia kover 'Riano mave' ver pēlina jau kojomā kamila bulag tolu na vio mave napano be vio na Atua kiano. ³⁵ A maka kejikia kover 'Riano, vio yetemeriba novo na,' ver pēli, mia jau kala bulag tolu na vio yetemeriba na jotano ka Atua kiano moroano. Maka kejikia koverenio 'Riano, komeli lu yako Yerusalemō niako vo' ver pēli, jau kojomā komila bulag tolu na vio na kanado Parinio Tubo Lu kanano. ³⁶ A maka kejikia koverenio 'Riano, paripariku nei' kanio rila kanamo verikariano to sikili, ver pēlina jau kojomā komila bulag Atua kiano tolu napano naio ga takurano mijikia rila viju parido tai ve takurano rimei riuvu pēlina rimei ribobogio. ³⁷ Ea kenemiu verikariano nalo, monoka kami kuver ga 'Nao,' pēlina kami kuver ga 'Makanio,' nina ga barei na. Iliano dolu nalo napano mā kumitumā kuverenio, nalo abinimei den

Sim̃aro.”

Yesu berii ka ala meran re vite na bova bereio

Luka 6:29-30

³⁸ Ana Yesu berii bunu, berinavo “Mia kamiu kumijog naverloglogiano nalo aberii nua ruei, aberinavo ‘Verenio toro tai rila lelan toro dolu mirano tinene, monoka ala lelan mirano bunu. Mia verenio toro tai tukular toro dolu m̃arjuvono tai, monoka atukular m̃arjuvono bunu.’ ³⁹ Mia kiniou nei naruei neber ka kamiu, Mia koviolua re toro napano mila bova banso. Verenio toro rijuba yaba miramo tivelinio, monoka jau kovilig yaba miramo tivelinio rivan kean naio, ka naio rijuba bunu. ⁴⁰ A verenio toro tai rivur̃so ea komeli ka tutuas̃o ka m̃amo kulusoto, mo mia jau kajamo ka vanio vija m̃amo kulukoti bunu. ⁴¹ A verenio toro na toru tai ritutuas̃o ka kaṽar kiano basaro keiel ka aura ve takurano, tibe ka napano naio mijikia berenio, monoka kasaaro ga ka kavario keiel ka aura ve takurano bereio vo. ⁴² Verenio toro tai rivika vite tai denso, mia monoka jau kodu vite nene vanio, a verenio toro tai sidom rudu kija vite na be kanamo, mia monoka kajamo ka vanio mia koverbureio re.”

Yesu berii ka tum̃abe mia rosidom kiado uolu nalo

Luka 6:27-28,32-36

⁴³ Ana Yesu berii bunu, berinavo “Mia kamiu kumijog naverloglogiano nalo

aberii nua ruei, aberinavo ‘Monoka jau kosidom nalo napano aju vaataro kaso, mia jau kovijuku die kanamo uolu nalo.’ ⁴⁴ Mia kiniou nei naruei, neber ka kamiu, neber monoka kamiu kuvisidom kenemiu uolu nalo, a kubolkouo ka nalo napano amila lelan kamiu, ⁴⁵ ka mia kamiu kuvitakii vatitigio bajago na Karamemiu na ea vio mave, napano naio jidom nalo beverare ga. Tenene na naio mila kanano inio merera a kanano yuo bovo ea tomu nonovio, toro napano bo, a toro napano bova. ⁴⁶ Verenio kamiu kuvitum̃a tiniemiu riia tomu nalo na ga tiniel miia kamiu, Atua maka rijikia rijeiv ijaiano van kamiu riviorio. Tomu nalo nam̃a abarbijii takis, napano kulo dolu nalo aberinavo nalo abe kulo va, mia nalo abare ka ala tibe na. ⁴⁷ Verenio kamiu kuvitum̃a kuvan jumemiu kamlika ga kenemiu tomu nalo, nina maka tovulu bajago na kulo va nalo. Tomu nalo napano maka amonea Atua, ajum̃a ajidom bunu kanalo m̃aratavo nalo. ⁴⁸ Mia kenemiu meuliano nalo monoka tibe ka na Karamemiu napano joa vio mave kiano bajago, napano memedu, a bo laka ban tomu nonovio.”

6

Yesu berii bajago na ijaiano nalo

¹ Ana Yesu naio mil banlo, berinavo “Vite nalo napano kiado nalotuano naio bere-nio bo ka alaio, kamiu kuvila re tavukia napano kamiu kumilaio ka mia tomu ve telabo ajikia avitilubarío ka napano kamiu kumila tonovo. Vere-nio kamiu kuviturná kuvila tibe na, mia Karamemiu napano joa vio mave, naio maka rijikia rije ijaiano van kamiu rivior vite na.

² “Tibe na, ea bogo nalo napano jau kesian ijaiano van talimása nalo, jau keil vevavin re kanio, tavukia nailikuleiano nalo. Nalo ajurná aber bulag kanalo imáauano novo nalo joomo ea yimo na volkouano, a tavio bunu ea vio medave, ka rila ana tomu nalo avame-nealo kanio. Mia kiniou neber ka kamiu, vameneano na kulo dolu na, nina ga be kialo ijaiano, mia maka bunu ajikia avokar vite dolu bereio. ³ Mia ver bogo na jau kodu ijaiano tai van talimása nalo, monoka jau kala ea bajago na tai napano mia jau ga ve takurano kejikia kanamo imáauano novo na, a napano kanamo jidomiano rivarvar re naio kanio. ⁴ Ver jau kalavan kiamo imáauano vu tibe na, mia Karamámo napano mijikia mial vite nalo napano kulo dolu maka ajikia aialio, naio mia sian ijaiano vanso riviorio.”

*Yesu berii ilivolkouano
Luka 11:2-4*

⁵ Ana na Yesu berii bunu, berinavo “Verenio bogo napano kamiu kubolkouo,

mia maka rivu ka jau kala takii bajago napano nailikuleiano nalo kialo. Nalo ajidom mēlea ka atumolu ka abolkouo joomo ea yimo na volkouano, a tavio ea vio medave nalo, ka tomu nalo amijikia aialo. Vameneano na kulo dolu na, nina ga be mauo, mia maka bunu ajikia avokar vite dolu bereio. ⁶ Mia ver bogo napano jau kobolkouo, mia bo ka jau kala ka mia jau ga ve takurano kava joomo ea kunuamo yesobi, ea vio na tomu nalo ajikia re ka aialso, mia jau ketetavoko kiamo mārátavo, ana mo jau kobolkouo van Karamámo napano naio jo, mia maka toro tai rijikia rial naio. Ana mia Karamámo nene naio ga mijikia rial vite nonovio nalo napano tomu nalo maka ajikia aialio, mia naio rije v mauo nene vanso riviorio.

⁷ “Mia ver bogo napano kamiu kubolkouo, maka rivu ka kamiu kuver iliano ve telabo tibe ka tomu dolu nalo na maka amonea Karamádo riano vo. Nalo ajidomii aber mia avokar vaio napano ajurná abolkouo kanio, bior naloaju aber iliano telabo telabo ea kanalo volkouano nalo, mia be deio ga. ⁸ Mia kamiu kuvila re takii kialo bajago, bior Karamemiu, naio mijikia ruei vite nalo na kumisidomio, bogo napano kamiu maka kuvika vite nalo nei denio vo.

⁹ “Bior vite na, memedu ka mia kamiu kubolkouo tibe

ka volkouano nei, napano
naio berenio, berinavo

‘Karamememi napano jau
kojoa vio mave,

memedu ga ka tomu
nalo atu avatove ka
siamu lu.

10 Kumemi nubolkouo
ka kanamo nave-
natuboiانو rimei
tumolu tu sikili ea vio
yetemeriba nei,

ka mia tomu nalo alaio
tavukia ga napano jau
kojidoimio,

tibe ka napano nalo na
vio mave ajumã ami-
laio.

11 Aiou, jau kesian van
kumemi sememi sina-
niano, banei a ea
legiano nonovio.

12 A jau koviekokoa kumemi
rivior kenememi kari-
ano nalo,

tibe ka kumemi nu-
mitumã nubiekokoa
tomu dolu nalo
napano amila vite
jorokor ban kumemi.

13 A jau kajamo ka re vite
va nalo na ajukujuku
kumemi mñele,

a kovuru bulag kumemi
den simãaro napano
jidom rila lelan
kumemi.’

14 “Bior ver kami-
u kuviekokoa tomu nalo na abi-
juku jorokor ban kami-
u, mia Karamemiu na joa vio
mave naio riviekokoa ken-
emiu vijukuano torokorian-
o nalo bunu. 15 Mia ver kami-
u kuvisaaro re ka kuviekokoa
nalo napano abijuku jorokor
ban kami-
u, mia Karamemiu
naio maka rijikia riviekokoa

kamiu ka kenemiu torokori-
ano nalo bunu.”

Yesu berii monduluanu

16 Ana Yesu berii bunu,
berinavo “A bereio, ver bogo
napano kami-
u kumituvan
semiu sinaniano, kuvel
ga ka tiniemiu rimaio ka
Atua a kuvolkouo vanio,
maka kami-
u kuvijikia kuvila
tibe ka maka kuvisekon
miremiu, pelina kami-
u kuvila miremiu tibe ka
jijer tanea kami-
u, ka tomu
nalo avitilubar tena kami-
u kumitumã kumilaio. Nina
be imãuano na bova ga
na nailikuleiano nalo kialo.
Ana verenio nalo ala tibe na,
a tomu tai tiniel riialo, nina
be kialo vuluiano napano
amijikia ajevio rivior kanalo
monduluanu, mia Atua
maka rijikia sian titai vanlo
bereio.

17 “Mia jau, bogo napano
ver kotuvan samo sinani-
ano to tibe na, bo ka jau
koyovovua vatitig miramo,
tavukia namã jau kojomã
komilaio julaka ga, 18 ka
mia tomu nalo ajikia re
vaio napano jau komilaio.
Karamãmo ga napano jo,
maka tomu nalo aialio, mia
naio ga rivitilubarior bior
naio rial vite nalo napano
tomu dolu nalo maka ajikia
aialio, ana na mia naio rije-
v mauo nene vanso kanio.”

Yesu berii puruveru

Luka 12:33-34

19 Ana Yesu berii bunu,
berinavo “Maka rivu ka
kami-
u kuvitumã kuvila bijii
kenemiu saba novo nalo ea

vio yetemeriba nei ka mia kuve tomu na sanibaiano. Bior vio yetemeriba nei be vio na sivinia nalo, a tauo bunu napano mijikia rila bulag kenemiu saba novo nalo, a toro na vinauano bunu napano mijikia rimeirivar bulag saba nalo napano kamiu kumiñauka bijon kanio. ²⁰ Mia kamiu monoka kuvila bijii kenemiu saba novo nalo tu mave, ea vio napano sivinia a tauo a tomu na vinauano nalo ajikia re ka amei ala bulag kenemiu saba novo nalo napano kubar batitiglo aju.

²¹ “Bo ka kamiu ve kenemiu saba novo nalo vetelabo atua vio mave, bior mia kenemiu iviso rivujo tulaka ea jidomiano nalo na vio napano ga kenemiu saba novo nalo ajuao.”

Yesu berii lie ka tomu nalo monoka ave viti re

Luka 11:34-36

²² Ana Yesu berii bunu, berinavo “Toro mirano be vio tai napano yulu binimeijoomo ea mokotenano. Verver miramo rimeravovivu, mia komijikia kovitilubar vatitig toro dolu, ka kojia naio. Verver kala tibe na, kiamo iviso bujolou ka yulu. ²³ Mia verver miramo rimeravo re rivu, mia maka kojikia kovitilubar vatitig toro dolu, mia koto kovitii kiamo saba nalo ga, ana koto kove viti kalo. Verver kala tibe na, kiamo iviso bujolou ka melijokouo, a ver melijokouo ritoa vio napano memedu ka yulu toaio, nina jau kojoa melijokouo na

bobogio mia kiri bobogio laka.”

Maka toro tai rijikia sel tano ka tubo ve juo

Luka 16:13

²⁴ Mo Yesu berii bunu, berinavo “Verenio toro ve takurano, naio maka rijikia rimau buron ea tubo ve juo ve vaarakurano. Verenio tibe na, mia naio tinientii tinene, mia naio rilikue ka tinene, ðelina mia naio rudu niono tinene, mia tuvan tinene. Kamiu maka kuvijikia kuvila ka kuve Atua kiano tomu nalo a kamiu kuve tomu na puruveru bunu ka bogo nene ga.”

Tuñabe ka toro napano jidom laka ka kiano meuliano

Luka 12:22-31

²⁵ Ana Yesu berii bunu, berinavo “Ka tenene, kin-iou neber ka kamiu, maka rivu ka tiniemiu rivujo ñele ka kenemiu inauano na kuvitikar kamiu nalo, ka mia kuvivika, kuver ? Mia releal sado sinaniano vija ñado uei tuñabe, a mia releal ñado kuluniabedo na mia reyaio toko mokotenado tuñabe? Mia jidomiano nalo na biniu kiri torokor laka, bior kenemiu meuliano nalo, naio bo loa sinaniano, mia mokotenemiu nalo, abo loa kuluniabelo. ²⁶ Kamiu kuvial von menu nalo napano ña aju amier janea vio. Mia nalo maka ala tiniavio, a nalo maka avarbijii sinaniano rimeivonuo, a nalo maka avar batitig sinaniano tu joomo ea yimo. Mia Karamemiu na vio mave naio baganlo, mia kamu ea

mirano, naio mial kamiu kumitu mave loa menu nalo, mia naio monoka rivotikar kamiu rivu lie vo loalo. ²⁷ ? Kamiu kuberiamā toro tai mijikia rila kiano meuliano na bulati rimei ve tebievi kija bereio, bior jonā jidom mēlea kiano meuliano? Peli ga, maka tibe na, ana bo ka kamiu kuvisidom mēlea re kenemiu meuliano.

²⁸ “? A bior vaio ana kamiu kumitunā kumisidom bereverei ea kuluniabemiu? Kuvisidomii von burunieginiēgi nalo napano aju amiluo janea vio ga. Nalo maka aimāu a maka atul mālō kuluniabelo nalo. ²⁹ Mia kiniou neber ka kamiu, Parinio Tubo Solomon re nua, napano naio be toro na sanibaiāno tai, jumāno bujo ka saba nonovio, mia māno kuluniabene maka tavukia burunieginiēgi nalo nei mālō. ³⁰ Burunieginiēg nalo na abe tena bogoti takurano ga, mia beni ana mia aisebilo ea sebi, mia Atua naio jo miyovovua batitiglo bo laka. ?Ana na kamiu kuberiamā naio maka rijikia rivar kenemiu kuluniabemiu van kamiu? !Aa, maka lele garuei kuviekouo ea Atua sikili leleio!

³¹ “Bior vite nalo na, mia maka rivu ka kenemiu iviso nalo avujo ka jidomiano nalo na, ka kuvika kuver ‘?Jumābe, mia resen venia, romunu venia, a releal kiado kuluniabedo nalo tumābe?’ ³² Nao, bogo nonovio ga tomu na maka amonea Atua nalo ajunā ajidomii mēle

vite nalo na jibe na julaka, mia kamiu, Karamemiu napano jo mave, naio mijikia ruei ka monoka kamiu kumisidom ka kuvar vite nalo na. ³³ Vite na be moti ka mia kuvisidomii ve toru laka ea kenemiu meuliano, naio be Atua kiano navenatuboiano, vija kiano namemeduano nene nalo. Verenio tibe na, mia naio rivar bunu vite dolu nalo na rivan kamiu.”

³⁴ “Tibe na maka rivu ka banei, kamiu kuvitunā kuvisidomii mēlea rivior tena legiano na beni. Beni ga, ana mo kamiu kumijikia kuvisidomii tena vio beni, bior legiano na banei, naio be kiano jaleleano nalo telabo ruei.”

7

Yesu berii tibure niege-niegeiano toro dolu

Luka 6:37-38,41-42

¹ Naruei Yesu mil kia ga vo banlo, berinavo “Mia monoka kamiu kuvitibure niegeniege mēlea re toro dolu. Tibe na, mia Atua naio tibure re kamiu sikili, ² bior jidomiano napano joa kamiu ka bogo napano mā kamiu kumitibure toro dolu, mia jidomiano na ga jibe na joa Atua ea bogo napano mia naio tibure kamiu. Mia kamiu kuvar tibureiano rive verare ga ka tibureiano napano kamiu kumisianio. ³ Maka rivu ka jau kotomā koververii soro napano telisu ga joa kuruamo mirano, mia jau maka keial kar ka be burumāra bulapati

iesi tai napano joa miramo.
⁴ ?Jumabe ana na jau kober komijikia keil van kuruamo na, koberinavo ‘Peli nelelar soro na telisu na monea miramo beamu?’
⁵ !Jibe na, jau maka kotoña kovitilubar kiamo kariano, ana na jau kojoña kojiibure kulo dolu nalo kialo kariano nalo! Mia jau kobe toro na ilikuleiano ga. Jau kodular bulapati iesi na den miramo beamu vo, karina mo jau kovitii batitig rivu ea niati soro na telisu na ea toro dolu mirano.

⁶ “Maka rivu ka kuvila von ka kuverial Atua kiano Iliano Lu van tomu nalo napano maka asaaro ka ajevio. Nina jibe ka napano kamiu kumitumña kubagan kuli deden ka sinaniano novo nalo, naruei bogo napano ajenio bisi, ana mia avilig pariparilo mia nalo aser kamiu bereio. Jibe ga na bunu verenio kamiu kuvisian ijaiano novo nalo van kiribue nalo, mia nalo avie dodomlo ea bulukinia.”

Yesu berii vikadeniano na vite den Atua

Luka 11:9-13

⁷⁻⁸ Mia Yesu berinavo “Toro na ver joña bika vite, julaka mia naio mijikia rijeio, mia verenio toro na joña jirag vite, julaka mia naio mijikia rilealio, mia ver toro na naio joña minia m̃aratavo, julaka mia m̃aratavo nene mijikia rivetavo ka naio. Tibe na, mia kamiu kumijikia kuvar vite nalo nam̃a kumitu kubika den Atua, mia kamiu

kumijikia kuvileal vaio nam̃a kamiu kumitumña kumisirag denio, mia m̃aratavo nam̃a kumitumña kuminia, mia Atua rivetavo ka van kamiu.
⁹ Verenio kenerimo tai siserio, rivika kiri joko napano jo, mia jau maka kejikia kesian puruveru van naio,
¹⁰ pelina ver naio rivika batitig ga niado na jo ruei, maka kejikia kodu maro tai van naio ka senio.
¹¹ Riano ka kamiu kube kulo va ga nalo, mia maka kamiu tai rijikia rila tibe na, kamiu kumitumña kumisaaro dam̃ariga ka kuvisian vite novo nalo van kenerimiu nalo. Jibe na ga, ver bogo napano kamiu kubika vite tai den Karamemiu na vio mave, mia naio jaaro ga ka sian vite novo nene nalo rivan kamiu kenerinio vevinio nalo rivavin ve toru laka vo.

¹² “Bo ka kamiu kuvila rivu van tomu dolu nalo dam̃ariga ea vite na bo nalo, tibe ka ga na kamiu kumisidom tomu dolu nalo monoka ala rivu van kamiu. Iliano nei naruei naio be burupati na iliano nalo na jua tuboiano napano Mosis jirio, bija bunu vaio napano naverialiano re nua nalo aberiio.”

Marabo juo ga

Luka 13:24

¹³⁻¹⁴ Ana na Yesu berii bunu, berinavo “Be burum̃ara bulumorouo tai napano betavo laka jo, mia m̃arabo nene jagati toru laka be vodobi bo. Mia tomu telabo ajum̃a ajakii m̃arabo nene, mia m̃arabo nei naio

ban ea vio na avokar viro-
niano. Mia kamiu monoka
kuvisel ea bulumorouu dolu
napano naio kiritavaso.
Marabo nene naio jikili,
mia maka tomu nalo ve
telabo napano ajeliaio, mia
m̃arabo nei naio be m̃arabo
na meuliano.”

Buruiesi bija m̃arati nene
Luka 6:43-44

¹⁵ Ana na Yesu berii
bunu, berinavo “Bo ka
kamiu kuvitikar vatitig ka
tomu nalo nam̃a aju aber
nalo abe naverialiano, mia
nalo ajum̃a aberloglog vite
na be sibiano ga. Bogo
napano ajidom averloglog
kamiu, abinimei ajibe ka
kenemiu bilbilu novo kam-
liko, napano ea kuluniabelo
amom̃avo novo ga, jibe ka
nunu nalo, mia ea kialo iviso
nalo ajavukia kuli deden
nalo ga, napano m̃a jijerlo ka
vite nonovio. ¹⁶ Mia kamiu
kuvitilubarbarlo ea m̃arati
na kialo meuliano nalo.
Soro napano be niononoti,
bija teli nalo napano abe
niononoti, maka atum̃a avar
sinaniano novo p̃eli m̃arati
napano jesei bo. ¹⁷ Buruiesi
napano jo miluo bo, naio
monoka rivar m̃arati na bo,
mia buruiesi napano maka
riluo rivu, naio monoka
rivar m̃arati na bova ga.
¹⁸ Buruiesi napano jo miluo
bo, maka rijikia rivar m̃arati
na bova, a buruiesi napano
maka riluo rivu, maka
rijikia rivar m̃arati novo
nalo. ¹⁹ Jibe na naruei, ana
buruiesi va nalo nei napano

maka avar m̃arati novo nalo,
mia monoka ate bulaglo
ga ana mo avukulo van
ea sebi. ²⁰ Jibe na naruei,
m̃arati napano miyotuba ea
toro kiano meuliano, mila
meravo ka toro na naio be
toro na jum̃abe, mia kamiu
kumijikia kuvitilubar nave-
rialiano va nalo na ea m̃arati
va nalo napano amiyotuba
ea kialo meuliano nalo.”

*“Kiniou maka nejikia
kamiu leleio”*

Luka 13:25-27

²¹ Ana Yesu mil berinavo
“Tiniobi toru ajum̃a abio
kiniou, aber ‘!Kiaku Tubo,
kiaku Tubo o!’ mia nalo
aviniu re napano mia
amijikia ava jouro ea Atua
kiano navenatuboiano ea
vio mave. Toro napano
mijikia riva jouro, naio be
toro ga napano jom̃a mila
vite nalo napano Karam̃aku
naio jidomio. ²² Mia ka
bogo napano mia Atua
tibure tomu nalo, mia tomu
ve miroano avio kiniou,
tibe ka kiniou nebe kialo
Tubo. Mia averinavo ‘?
Tubo, jum̃abe ka kumemi?
Kumemi numim̃auka vite
telabo na bo ea siamo, a
kumemi nuber bulavulag
kiamo iliano, a kumemi
numijil bulag sim̃aro nalo,
a numila vremesiano nalo
telabo bunu. ?Mia jau maka
bunu kosidomial kenememi
im̃auano novo nalo nene
a?’ ²³ Mia kiniou neverial
kalo rimemedu ga ea miralo,
neverinavo ‘Kiniou maka
leleio nejikia kamiu bogo tai,
napano kamiu kube kiaku.

Kamiu tomu na kariano ga. !Kamiu kuvitaluvo den kiniou vonganei! ”

Yimo juo

Luka 6:47-49

²⁴ Ana Yesu naio mil berinavo “Tibe na, nalo napano atakii vatitigio tibe ka napano kiniou neberloglog kamiu rui, mia nalo atavukia toro tai na be masou, napano miñauka kunuano, napano mebiia kiano m̃artea nene batove bokar tabaṗilio na jikili.

²⁵ Iorou kanio, ana yuo bovo toru binimei, mia ueimia buru vio toru, mia jegi miuvuvu biloulo, midon yimo nei, mia yimo nene maka rijoru, bior toro na yimo nei naio milakar kunuano jo mave ea tabaṗilio. ²⁶ Mia nalo napano maka atakii vatitigio rivu tibe ka nañia kiniou neberloglog kamiu rui, nalo ajavukia toro tai napano kiano jidomiano kirivova, telikiti napano naio miñauka kunuano, naio bitiri bulag m̃artea nene nalo mave ea bayono ga. ²⁷ Iorou kanio, mia yuo bovo batove, ueimia buru vio toru, mia jegi miuvuvu biloulo midon yimo nei, mia yimo nei mijoru. Mia bogo na naio mijoru, toro nei kiano iñauano binimei bova kitkitio garuei.”

Amiilo manenea ka Yesu kiano iliano

²⁸ Iorou ka napano Yesu mila nonovio kiano iliano bisi, mia tomu nalo aju

amiilo manenea kanio, ²⁹ bior abitii kiano iliano maka tavukia kialo tomu na verloglogiano na tuboiano nalo kialo, mia kiano iliano tomi laka, a jo julu kialo jidomiano nalo, a naio ber bulavulag iliano nalo javukia na moroano joa naio.

8

Yesu mila toro na bar burumieni tai meravo bo bereio
Mak 1:40-45; Luka 15:12-16

¹ Mia Yesu naio jumolu den suku, napano naio jom̃a berloglog tomu nalo eaio, naio batove, ana tomu telabo ajakisor naio. ² Naruei toro tai napano naio bar burumieni binimei vaataro keanio, naio minie kamu kanio, ana balea, berinavo “!Tubo! Kiniou namoneaso ka jau komijikia kalarur kiniou bereio, ana ver jau kajaaro, nejidom nevika denso ka jau kala tibe na van kiniou.”

³ Ana Yesu maka rimerou ka tokol toro nei rivior kiano mieiano, mia naio jian jum̃ano, jokolio, ana naio berinavo “Kiniou nejidom jibe na. Neberinavo, mo, niabemo rivu.” Mia vaarakurano ga niabene meravo, mia burumieni nei naio bisi denio. ⁴ Ana na Yesu berkanio, berinavo “Jau komijog, jau kava koverii re tenei van tomu nalo vo, mia vonganei jau kava koverloglog niabemo ka toro lu, ka naio ria veve niabemo. Karina, jau kava

kolotu van Atua, keisebi sida namā Mosis naio berenio monoka toro rilaio bior vite na jibe na, mo iorou kanio nina, mia toro lu naio mijikia riverialio river burumieni nei naio bisi.”

Yesu mila toro tai na ni-abene togio m̃aro bo bereio

Luka 7:1-10

⁵ Mia bogo na Yesu naio ba jouro ea bulukomeli na Kapeneam, boru na mira tai na vio Romo binimeimialio, naio jegi banio, ⁶ naio berinavo “Tubo, kiaku naimāuano tai naio mijoru mon kea ea m̃ano jogu ea kunuaku. Niabene togio m̃aro, a naio mijog bova toru laka.”

⁷ Ana Yesu naio berkanio, berinavo “Mo, kito ve juo ravano. Mia kiniou nala naio rijog rivu bereio.”

⁸ Mia boru na toro na mira nei naio berdoŋeio, berinavo “Tubo, kiniou maka neve verare ka jau komei joomo ea kunuaku, jibe kanio kiniou maka neve toro Ju, mia ver jau kover iliano tai ga, mia kiniou nemijikia ka mia kiaku toro nene naio mijikia rijog rivu bereio. ⁹ Mia kiniou nemijikia ka monoka tibe na, bior kiniou nemijikia ka kiamo iliano ami je moroano toru. Naio jibe kanio tomu na mira nalo napanoaju yetano ka kiniou, napano mia monoka ajogkar kiaku iliano. Ver never ka tai ‘Kavano’ mia monoka rivano, ŋelina never ‘Komei’ monoka rime, ŋelina never

‘Kala tibe na,’ mia monoka naio rilaio. Mia kiniou bunu monoka nala tena kiaku boru na toru naio berii ka kiniou. Jibe na naruei, ana kiniou nomoneaŋo ka ver kover ga titai, mia monoka tibe na.”

¹⁰ Mia bogo na Yesu mijogial iliano nei, mila naio miilo toru a naio jaaro toru laka kanio. Naruei naio ber ka tiniobi nalo napanoaju naliko, berinavo “Riano ga kiniou neber ka kamiu memedu, kiniou maka leleio neal toro tai na vio Israel naio riviekar kiniou sikili tibe ka toro nei. ¹¹ Mia kiniou neber ka kamiu neber, maka kulo Ju nalo ga ajikia amei jouro ea jokoluolu na toru ea legiano na maaro. Makanio, mia tomu dolu nalo bunu ve telabo tibe ka toro nei, ea vio dolu nalo ea yetemeriba nei, napano mia amei ka atutano vio takurano ka asinan naliko Epraamo, Aisak, a Yakovo. Mia nalo na atu rivu bogo nonovio tibe na jouro ea Atua kiano navenatuboiano ea vio mave. ¹² Mia kulo Ju nalo napano Atua biolo jukamu ka ava jouro, voniganei maka bunu amonmonea kiniou, ana mia Atua rivuku bulaglo ava atu tavio ea melijokouo, ea vio napano tomu ajum̃a ajegi ajer m̃arjuvolo eaio.”

¹³ Naruei Yesu ber ka boru na mira nei, naio berinavo “Mo, bo ga, jau komijikia kava vonuo. Mia rimaluvo kaso tibe ka na jau

komoneaio.” Mia memedu ka bogo nene garuei, toro na iñauano nei niabene binimeĩ bo bereio.

Yesu mieliel ka Pitere koano kenieno

Mak 1:29-34; Luka 4:38-41

¹⁴ Ana Yesu naio jo kia ga Kapeneam, ana naio ban ea Pitere kunuano, mia naio mial Pitere koano kenieno mieyulu, naio jo mon ea ñano jogu. ¹⁵ Naruei Yesu mijiou jokol tira nene jumano, ana kiano mieyulano nei jaluvo denio, ana naio mijog bo jumolu, naruei naio jian sinaniano ban Yesu.

¹⁶ Ea niogoravo na legiano nei, tomu nalo aburu tomu telabo abinimeĩ ea Yesu, napano siñaro nalo ajualo. Naruei naio mijil bulag siñaro nalo nei ea ga kiano iliano, ana naio mila tomu na mieiano nalo bunu amijog bo bereio. ¹⁷ Vite nalo nei amaluvo jibe nei ka mia rila Naverialiano Aisea kiano iliano rimeĩ rimaluvo, tibe ka napano naio berenio, berinavo

“Naio bar bulag kiado mieiano nalo, a naio bar kiado niabe jaleleano nalo bunu.” Ais 53:4

Tomu juo ajidom atakisor Yesu

Luka 9:57-62

¹⁸ Ea bogoti dolu bereio, ana Yesu jo naliko tomu telabo napanoaju jelviv ea naio, ana naio jidom taluvo denlo, naruei naio ber ka kiano naiagagoano

nalo, berinavo “Kito ña, ravan ea ueiyabo tivelinio.”

¹⁹ Mo nalo abarvio ka mia avano, ana naverloglogiano na tuboiano tai binimeĩ ea naio, berkar ban Yesu, berinavo “Naverloglogiano, mia kiniou natakisorso navan ea vio vabe na jau kavan eaio.”

²⁰ Ana na Yesu naio berdoŕe banio, berinavo “Kuli deden nalo abe ñalo ãili na amon eaio, a menu nalo abe ñalo niuku. Mia kiniou, Kulorinio Kenerinio, kiniou maka ve kiaku vio tai, ka nava nomonmel eaio. Mia verenio jau kajaaro ka meuliano na jibe nei mia jau komijikia komei.”

²¹ Ea bogo nene ga, Yesu kiano naiagagoano dolu bereio berkanio, berinavo “Tubo, jau kajamo ka kiniou nava nevitikar kiaku tormoruo beamu vo, mia verenio bogo tai naio rimaro ana mia kiniou nemeĩ bereio natakisorso.”

²² Ana Yesu naio berkanio, berinavo “Komei katakisor kiniou ga. Kotuvan tomu napano niunulo amaro ruei ka ativin kialo tomu nalo napano amarmaro.”

Yesu berbure burumara jegi

Mak 4:35-41; Luka 8:22-25

²³ Mia Yesu naliko kiano naiaga-goano nalo abinimeĩ aboru ea ueiyabo nei bisi, ana nalo abavin ea uako tai ea vio na. ²⁴ Naloaju abano, mia burumara jegi tai binimeĩ miuvuvu mila ueiyabo nei bieveluo ñele, mila uako nei jikar ka jidom rimadudu. Mia Yesu naio joa uako,

mia naio mon ea selailugu monmelio, ²⁵ mia nalo aba amila bonio, nalo aberinavo “!Tubo, keialio! Vaataro ka ramadudu naruei, jau monoka kalarur kito.”

²⁶ Naruei Yesu naio mil banlo, naio berinavo “!Mm! ?Kamui kumerou ka venia? Kamui maka kuvitu sikili ea kiaku moroano leleio.” Karina naio jumolu ju, ana naio mil berbure jegi ber riuvuvu re, naio mil berbure tei, ber rivatove. Ana vio binime melumu bo.

²⁷ Bogo napano naia-gagoano nalo amial ka vio jubabinio bo jibe na, nalo amiilo toru, nalo aberenio “!Tomu nalo! Toro nei maka garuei, mil ga jibe nei, mia jegi naio tei naljuo amiduio. !Toro na naio maka tibe ka toro na!”

Yesu mijil bulag siñaro nalo den tomu juo

Mak 5:1-20; Luka 8:26-39

²⁸ Mo bogo napano Yesu naio boru ea yaba ueiyabo tivelinio, ana naio ban ea kulo Katara nalo kialo vio. Ea vio na, tomu juo amiyotuba ea buluvae nalo na tomu na m̄ariano nalo, ana naljuo amileal Yesu. Tomu juo nei niadu ban ealo, mia nalo abe deden m̄ele, ana mila tomu nalo amerou m̄ele ka m̄a asel ea m̄arabo na.

²⁹ Mia bogo napano nalo amial Yesu, naljuo amiaga jouo, aberinavo “?Jau Atua Kenerinio, kiamo vaio joa kumemi? ?Jau kobinime ka koje vironiano van kumemi napano maka ve kenememi bogo nene vo, a?”

³⁰ Ana ea vio na taara na kiribue nalo ajum̄a ami-uoiuo ea borotano, ³¹ ana niadu nalo nei ajegi, abika jikili den Yesu, aberinavo “A verenio jau keji bulag kumemi, nuberibo kaso jau keiila kumemi nuva joomo ea kiribue nalo na.”

³² Naruei Yesu naio ber kalo, berinavo “Kuvano.” Naruei nalo ajaluvo den tomu juo nei, ana aba joomo ea kiribue nalo neibano. Mia vaarakurano ga, kiribue nalo nei ajikiti, aban ea yabalili tai, ana na ajibirbil abavatove ea ueiyabo nei, abava kovio eaio.

³³ Naruei tomu nalo nam̄a abitikar kiribue nalo nene aburo, aban ea kialo komeli, ana na nalo aberial vite nalo napano maluvo, a aberii bunu vaio napano bokar tomu juo nei napano beamu niadu jualo.

³⁴ Naruei vaarakurano ga, tomu nalo na komeli nene abinime ka aial Yesu, mia bogo na amialio, nalo amil jikili ban naio ka naio taluvo den kialo vio.

9

Yesu mijikia biekokoa kariano

Mak 2:1-12; Luka 5:17-26

¹ Ana Yesu naio ban bereio naliko kiano naiagagoano nalo, abavin ea uako nei bereio, nalo abarkor ueiyabo na toru nei bereio, naruei nalo abinime ea kiano komeli nei Kapeneam.

² Mia tomu tai aḡier toro na mieiano tai binime ea naio napano niabene togio m̄aro, naio mon ea m̄ano

jogu. Ana bogo napano Yesu mialio ka nalo amonea jikili ka mia Atua rilarur toro na mieiano nei, naio ber ka naio, berinavo “Keneriku, jau komerou re. Kiniou nebiekokoa kiamo vijuku vovaiano ruei.”

³ Ana ka bogo nene tomu tai na verloglogiano na tuboiano nalo bunu aju, mia amijog Yesu kiano iliano nalo nei. Soĝeli ga nalo aberii naio banlo, aberinavo “Toro na mil mila bulag tolu na Atua siano. Naio jo mil jibe na jibe ka naio be Atua ruei.”

⁴ Mia Yesu bitilubar kialo jidomiano nalo, naruei naio berinavo “? Ka vaio ana kenemiu jidomiano bujo ka sidom vovaiano jibe na?

⁵ Ver kiniou never tibe na ka toro na, never ‘Kiniou nebiekokoa kiamo vijuku vovaiano nalo,’ ĝeli na never kanio, never ‘Jau kotumolu keiel,’ mia iliano juo nei, tinene jikili ka averenio, a tinene naio monmaio ka averenio. Nina iliano na napano naio berinavo ‘Jau kotumolu, jau keiel,’ naio jikili laka, bior tomu nalo amijikia avitilubar ka toro nene jumolu ĝelina maka tumolu. ⁶ Mia kiniou neiĝauka titai napano mia kamiu kuvisidomii kuver Atua naio ga takurano mijikia rilaio, bior kiniou nejidom nala rimeravo van kamiu ka Kulorinio Kenerinio naio bare ka riviekokoa kariano ea yetemeriba nei.” Naruei Yesu mil ber ka toro

na mieiano nene, naio berinavo “Jau kotumolu, jau kotumolu ĝamo jogu, jau keiel kava vonuo.” ⁷ Ana toro nei naio jumolu jibe na, ana naio ba vonuo.

⁸ Telikiti na tiniobi nalo nei amialio vite nei nalo amerou, a nalo abamenea Atua, bior naio mijamo ka moroano ban toro tai ka naio mijikia rila tibe na.

Yesu bio Mataiu binimej jakisor naio

Mak 2:13-17; Luka 5:27-32

⁹ Mia Yesu naio juvan vio na, naio miel kija ga ba lie bano. Naio jo miel bano, ana naio mial kiniou noĝma noĝotano ea kanaku vio na iĝauano. Mia kanaku iĝauano ea bogo na, noĝma nabarbiji puruveru na takis. Naruei Yesu bio kiniou, naio berinavo “Mataiu, jau komei katakisor kiniou.” Mia kiniou nojumolu soĝeli, najakisor Yesu.

¹⁰ Karina Yesu binimej jinan ea kunuaku, ana ea bogo na noburu tomu telabo na abarbiji takis, bija kulo va dolu nalo telabo bunu abinimej, ka amijikia atutano asinan burukuti naliko Yesu naliko kiano naiagagoano nalo.

¹¹ Ana na Varisis nalo tai amial ka napano Yesu jo vio takurano naliko tomu nalo nei, ana abika den kiano naiagagoano nalo, aberinavo “? Ka venia ana kenemiu naverloglogiano naio joĝma jinan burukuti vio

takurano jibe na naliko tom na bova na?"

¹² Mia Yesu naio mijog kialo iliano nei, ana na naio berdoŝe banlo, berinavo "Tomu na niabelo jikili bo, nalo maka asidom toro na kulekuleiano, mia tomu na abar mieiano, nalo ajidom naio. ¹³ Bo ka kami kuvisidomii nioti na iliano tai napano joa Iliano Lu, napano Atua naio berenio, berinavo

'Kiniou maka nesidom kene-miu sida nalo

mia kiniou nejidom tinievuiano toa kenemiu meuliano nalo.'

Kiniou maka nemei ka novio nalo napano ajidomii aber nalo abe tomu na amemedu ruei, ŝeli ga, mia kiniou nebinimei ka novio tomu na bova nalo ka atakisori kiniou."

Vikadeniano tai tivelinio ka mondulano

Mak 2:18-22; Luka 5:33-35

¹⁴ Iorou ka vite na, naiagagoano nalo na Jone Baruei kiano abinimei ea Yesu, nalo abika denio, aberinavo "Kumemi numisidom jau koverial vite na ka kumemi. ?Kumemi numondulu damariga ka nubolkouo, mia Varisis nalo bunu amila jibe na, mia bior vaio ana kiamo naiagagoano nalo maka alaio?"

¹⁵ Ana Yesu naio berdoŝe banlo, berii naio naliko naiagagoano nalo, jibe kanio napano nalo ajaaro toru laka bogo napano naio jo naliko, mia monoka nalo ajog

rivova iorou ka bogo napano mia naio taluvo denlo, ana naio berinavo "? Bogo napano toro napano naio joro jo kia ga vo ea jokoluolu naliko kiano bilbilu nalo, kami kuberiarŝa amijikia ateg rivior naio? Ŝeli ga. Mia bogo tai, verenio toro nei kiano uolu tai amei avurular naio den kiano bilbilu nalo, ka bogo na naruei mia nalo amijikia amondulu ka sinaniano bior nalo amijog bova toru."

Vite vou a vite moruo

¹⁶ Bajago na mondulano, naio be bajago moruo tai na nalotuno na kulo Ju nalo kialo, mia Yesu naio jidom rila rimeravo vanlo ka bajago moruo na jibe na, maka ajikia aviran rivija vite vou nalo napano naio jomŝa jiloglog kalo, ana naio jii jamerijiano tai tivelinio banlo, naio berinavo "Jau maka kejkia kodu niati kulumŝarauo napano be terivou, ka jau kotuluko ka kulumŝarauo moruo tai ka toko vio na buruŝe. Bior niati kulumŝarauo vou nei, naio mijikia rila korov kulumŝarauo moruo na togio, ana na mia bulujeleigio rime ve toru lie vo. ¹⁷ Ana na jau maka kejkia koison mŝarjumlŝelu vou napano naio jomŝa jarabujo kia ga vo ea kulukuti nani napano be terimoruo napano amison mŝarjumlŝelu ea va telabo ruei. Verenio jau kala tibe na, mia mŝarjumlŝelu nene

riyukuio, rila kulukuti nani nene rivuruṣeio, naruei ana m̃arjuṃelṃelu nene riou bulagio, ana kulunani nene rimeṃ rivova bunu. Mia m̃arjuṃelṃelu vou, jau monokanio koisonio rivan ea kulukuti nani napano be terivou, jikili bo, ana na jau komijikia kodu vatitig m̃amo m̃arjuṃelṃelu toaio.”

Yesu mieliel ka tiramoruo tai bija tira sesa tai

Mak 5:21-43; Luka 8:40-56

¹⁸ Bogo napano Yesu naio joṃa mil jibe na ban Jone kiano naiagagoano nalo, toro na toru tai na nalotuano na kulo Ju nalo kialo naio binimeṃ vaataro keanio, naio minie tano ka Yesu, jegi banio, berinavo “Aue koṃg keneriku vevinio naio m̃aro vonganei ga, mia kiniou nebikaso ka nejidom komei, kodu juṃamo toaio, ka mia naio rimeul bereio.”

¹⁹ Naruei Yesu jumolu jakisor toro nei, naio naliko kiano naiagagoano nalo abano.

²⁰⁻²¹ Mo bogo napano Yesu naio jo miel ban jibe na, naruei tira tai naio jo napano mieiano na jada joa naio mila ka legiano nonovio ga, bokar yuka duelimo ba juo [12] ruei. Naruei naio mial Yesu jo binimeṃ, naio jo ber ea kiano iviso, naio berinavo “Ver kiniou notokol ga kiano kulukoti, mia kiaku mieiano taluvo den kiniou.” Naruei tira nei binimeṃ iorou ka Yesu taakano, ana naio

jokol juluvati na kiano kulukoti.

²² Soṣeli ga Yesu bariṣiligio, mial tira nei, ana naio berkanio, berinavo “Nena, jau komerou re. Kiamo viekouoiano ea kin-iou burumeuliaso bereio.” Naruei memedu ka bogo na, mieiano nei naio jaluvo den tira nene.

²³ Telikiti napano Yesu naio boru ea toro na toru nei kunuano, naio mial tomu naloaju tiniel miia tira sesa nei, ajuṃa ajegio, amiou ka iou na m̃ariano nalo. ²⁴ Naruei naio mil banlo, berinavo “Kamiu kuvatavio kuviel dedade bereio. Tira sesa na naio maka riṃaro na, mia naio monmelio ga.” Mia nalo na amiyotel ea naio, abital ea ga.

²⁵ Naruei nalo amiila bulag tomu nalo nei abatavio, ana Yesu naio ba joomo ea yimo. Naio ba bokar tira sesa nei juṃano, ana naio jumolu, meul vatitigio bereio. ²⁶ Naruei lilianiano na tenei buro janea vio ninio, bokar vio reraio jeliuiv ea vio nei.

Yesu milarur merebono juo

²⁷ Mia Yesu naio jaluvo den toro na toru neibano kunuano, mia bogo napano naio jo miel bano, mia merebono juo ajakisorio, nalo ajuṃa abio naio, aberinavo “!Jau tormoruo Teviti kiano bajulukuti, jau kobe Naverikariano, aui koṃg, tiniem riia kumemi juo liki!”

28 Ana Yesu ba joomo ea yimo tai, naruei merebono juo nei abinimei ea naio. Naruei Yesu naio bika denlo, berinavo “? Kamjuo kumonea ka mia nemijikia nalarur kamiu tibe na?”

Ana tomjuo nei aberdoŕe, aberinavo “Nao Tubo, kumemi numoneaio.”

29 Ana Yesu mije juŕano monea tomjuo nei miralo, ana naio berinavo “Mia rimei tibe ka na kamjuo kumoneaio.” 30 Ana na tomjuo nei miralo binimei bo bereio ea aura nene. Naruei Yesu berburelo jikili, naio berinavo “Mia kamiu kuverial re tenei van tomu dolu nalo.” 31 Mia abe juo abatavio, ana aberial liliani-ano nei ka vaio napano Yesu milaio banbano-o bokar nonovio vio reraio nei biniu.

Yesu mijil bulag niadu den buru tai

32 Telikiti na naljuo nei abatavio, mia tomu dolu nalo aburu toro tai binimei ban Yesu. Toro nene niadu ban ea naio, mila na naio be buru maka rijikia ril. 33 Mia Yesu jan ka niadu nei jaluvo den naio, ana toro nei naio mijikia mil bo naruei, mia tiniobi nalo nei amiilo toru kanio, aberenio aberinavo “Uerei, maka leleio reial titai tibe nei kija ea kito kulo Israel-o, mia banei ga.”

34 Mia Varisis nalo aju aberenio, aberinavo “Tete na naio joŕna jan ka niadu nalo jibe na ea ga moroano napano siŕaro nalo kialo

parinio tubo ga mijamo ka ban naio.”

Yesu tinien miia tomu nalo

35 Ana Yesu naio jo miel jeliviv ea komeli nalo a naio joŕna berloglog tomu nalo ea kialo yimo na volkouano nalo. Naio joŕna berial lilianiano vou na Atua kiano navenatuboiano, mia naio milarur tomu na mieiano nalo a tomu na niabele nalo bova bunu. 36 Mia bogo napano naio joŕna miel jeliviv jibe na, naio jo mial tiniobi nalo, naio mialo jibe ka kialo jidomiano nalo bujo laka a nalo abokar jaleleano telabo laka ea kialo meuliano nalo, naruei naio tinien miialo toru laka, bior ajavukia nunu nalo na maka ve kialo toro na vitikariano tai, maka ajikia bunu ka mia atuŕabe naruei. 37 Naruei naio ber ka kiano naiagagoano nalo, berinavo “Riano ga, ŕarimeuano toru meruo jua tiniavio, mia maka tomu ve telabo na aju ka ŕna abarvario binimei vonuo. 38 Kamiu monoka kuvalea sikili ea tubo na tiniavio nei, ka mia riila bulag tomu tabunu avan ka avar kiano sinaniano nalo rimei.”

10

Yesu kiano naiagagoano nalo

Mak 3:13-19; Luka 6:12-16

1 Naruei Yesu bio kiano naiagagoano duelimo ba

juo [12] ka amei aialio. Nalo abinimei, ana naio mil batitig banlo, bisi na mije moroano banlo ka mia amijikia atitig bulag niununo va den tomu nalo, a ka amijikia aieliel ka tomu nalo napano mā amie ka mieiano dedade nalo bunu.

² Atevi nalo sialo nalo nei:

nana jukamu, Saimon,
napano abio ka Pitere,
napano naio be kialo
toro na toru,
a Atru, napano Pitere
kuruano;

Yemesi naio kuruano
Jone, napano Sepeti
kenerinio nalo;

³ Vilip;

Bartolomio;

Tomas;

kiniou Mataiu, napano
nebe toro na var bijii
takis;

Yemesi napano Alveas
kenerinio;

Tateas;

⁴ Saimon, napano naio
mila poletik mēle laka
ka jidom rijil bulagio
kulo Romo nalo;

a Jutas na vio Kariot, na-
pano mia iorou kanio
ana naio jiveluku ka
Yesu ban kulo va nalo.

*Yesu miila bulag kiano at-
evi nalo*

Mak 6:7-13; Luka 9:1-6

⁵ Mia Yesu naio mil batitig
ban nalo duelimo ba juo
[12] nei, karina naio miila
bulaglo abano. Ilivatitigiano
napano naio berii kalo,
nainei, naio berinavo “Mia
kamiu kuvan ea re nalo

napano maka ave kulo Ju
nalo, a kamiu kuvan ea
re m̃arkomeli nalo na vio
Sameria vo. ⁶ Kamiu kuvan
rivior ga nunu nalo na
vio Israel napano amilaluv
m̃arabo. ⁷ Mia ver bogo na-
pano kamiu kuvan ka nalo
na, mia kamiu monokanio
kuviololu, kuverinavo “!
Vonganei be bogo na mia
Atua kiano navenatuboiano
naio jo binimei ea kito!”

⁸ Mia monokanio kamiu
kuvieliel ka namieiano nalo,
a kamiu kuvurumeulia tomu
nalo napano am̃arm̃aro
ameul bereio. Kamiu
kuvilarur nalo napano
burumieni milalo, niabelo
ameravo bereio, a kamiu
monokanio kuvititig bulag
niadu nalo ea tomu nalo.
Im̃auano nalo na, mia kamiu
kuvim̃au kanio ea moroano
tai napano kamiu kumijev
kurano ka ga, ana mo mia
kamiu monokanio kuvisian
kurano ka ga bereio van
tomu nalo. ⁹ Mia kamiu
kuvar re kenemiu puruveru
tai vija kamiu ea kenemiu
siveu nalo, ¹⁰ kamiu kuvar
re kenemiu basaro tai na-
pano mā kumison kenemiu
kuluniabemiu dolu nalo vija
kulubue na jaamiu dolu
bunu ban eaio, a kuvar re
kenemiu iesi na abanio vija
kamiu kuvano. Tomu nalo
napano mā amila im̃auano
novo jibe ka kamiu, mia
tomu nalo napano nalo nei
amim̃au kanalo, monokanio
mia nalo avitikar vatitiglo.”

¹¹ Ana Yesu berii bunu,
berinavo “Bogo napano

verenio kamiu kuva kuvoru ea m̃arkomeli tai, mia monokanio kamiu kuvisirag toro tai napano naio jaaro ka rivurukar kamiu ka kuvitua kunuano, ana mo kuvitu vija naio rivano-o rivokar bogo napano mia kamiu kuvituvan m̃arkomeli nene bereio. ¹² Avena verenio bogo na kamiu kuvan kuvitu vija m̃aratavo na toro nei kiano, monokanio kamiu kuvan jumemiu kamliko, kuver kalo, kuver ‘Tuñaro to vija kamiu.’ ¹³ Avena verenio m̃aratavo nei avijuku rivu ka kamiu, mia kenemiu tuñaro napano kamiu kuber kanio mia naio to vijalo, mia ver avijuku rivu re van kamiu, mia tuñaro nei rimei bereio vija kamiu. ¹⁴ Mia ver tomu tai ailkue ka avurukar kamiu ea kunualo, mia ver ailkue ka aiagago ka kamiu, mia kamiu kuvituvan m̃aratavo nene p̃elina m̃arkomeli nene to. Mia bogo na kamiu kuvituvan vio nene, ana mo kuvijuba kon yeve ea jaamiu, tibe ka kenemiu iliano na jikili tai banlo ka mia avokar vironiano tai napano memedu ga ka kialo bajago va nalo. ¹⁵ Riano kiniou neber batitig ban kamiu, mia sikili lie vo van nalo na ea bogo na tibureiano, tovulu bogo napano Atua naio jiibure kulo Sotomo bija kulo Komora nalo nanua beamu.”

Mia tomu nalo ajil Yesu

kiano naiagagoano nalo

Mak 13:9-13; Luka 21:12-17

¹⁶ Mia Yesu naio berii kalo, berinavo “Kamiu kuvisidomii vatitig rivu. Kiniou nemiila bulag kamiu ka kuvano, mia kamiu kuvano jumemiu yauo ga tibe na, napano kuvitibe ka nunu nalo napano aju iviso ka kuli deden nalo. Tibe na, monokanio kamiu kuve masou rivu, a monokanio kamiu kumelumu vatitig rivu. ¹⁷ Bo ka mia kamiu kuvitigar vatitig kamiu rivu, bior mia tomu nalo avuru kamiu kuvan ea komeli a ea kialo yimo na volkouano ka ail van kamiu, ana na mia atibure kamiu a mia avitiv kamiu. ¹⁸ Mia avuru kamiu kuva kuvitumolu kuvitu kamu ea tomu na tortoru nalo na buruvenuo miralo, kar ga kamiu kube kiaku naiagagoano nalo, mia ka bogo nene mia kamiu kumijikia kuverial kenemiu moneano na ea kiniou kamu ea nalo na miralo, a kamu ka nalo na maka amonea Atua miralo. ¹⁹ Mia ka bogo na nalo amei avuru kamiu, bo ka mia niukniuku rivie re kamiu m̃ele, kuver ‘?Mia neil tum̃abe, a never venia vanlo?’ bior mia Niununo Lu naio sian iliano van kamiu ka mia kuverialio, rimemedu ka bogo na iliano. ²⁰ Ana bogo napano kamiu kuvil, mia ve re kenemiu iliano, mia ve Karamemiu kiano Niununo na naio mil ea kamiu.

21 “Ea bogokouo na, mia toro mijikia rijamo ka kulo va dolu nalo amei avurular kuruano kar garuei, pelina kenerinio kar garuei, ka mia auebinvinlo amarmaro, nina bior ka napano nalo amonmonea kiniou. Mia kiritete nalo bunu amijikia atumolu, ka averial karamalo kenielo nalo napano amonmonea kiniou, ka mia amarmaro tibe na bunu. 22 Naruei mia tomu nalo tinie tii re kami, mia atupe kenemiu iliano ka kami napano siaku jua kami, mia ver toro napano riviekouo damariga rivano-o rivokar bogokouo nei ribisi, mia Atua rilarr naio. 23 Bogo na ver tomu nalo ala baravo ka kami ea komeli tai, mia kami kuvuro kuvan ea nana lie kanio, mia verenio nalo ala baravo ka kami ea vio na, monokanio kami kuvuro bereio. Riano kiniou neber ka kami, mia kenemiu imauano riviniu re vo ea markomeli nalo nonovio na vio Israel nei vo, mia kiniou Kulorinio Kenerinio, nemei bereio.”

24 Mia Yesu berenio “Naiagagoano, naio maka rijikia to loa kiano naverloglogiano, mia toro na imauano, naio maka rijikia to loa kiano tubo. Tibe na, mia kami monokanio kuvisidomii re kuver mia sikili re van kito bogo tai, 25 bior bajago na jikili napano mia ala ka naverloglogiano, mia

ala ka naiagagoano bunu, a vite kouo napano ma tubo rivokario, mia kiano toro monokanio rivokario bunu. Jibe ka tomu nalo abio niegeniege kiniou, napano kiniou nabe tobu ka kiaku maratavo, aberinavo kiniou nebe Belsabel, napano nina be sio na tubo na simaro nalo kialo, mia amijikia avio niegeniege kami rivova lie vo, kami napano kube kiaku maratavo nalo.”

Yesu kiano naiagagoano nalo maka ajikia amerou ka tomu

Luka 12:2-7

26 Ana Yesu berinavo “Bior mia ail rivova ka kami tibe ka ga na amil bova ka kiniou, mia kami kumerou re kalo. Vite va nonovio na tomu nalo ajuma amila luklukuaio, pelina aber vavania, mia amalmaluvo amei medave navo, ka tomu nonovio amijikia ajikiaio. 27 A kami bunu, vite novo nalo napano nojuma neber ka kami ea burumelijo, kami monoka kuverialio bereio ea miamoiano, a vite nalo nama kiniou nojuma nomijuvaluva kanio ea burutiniemiu ga, monokanio kami kumadu ka bereio ea tomu nalo miralo, ka tomu nalo aviniu amijikia ajogio.

28 “Kami kumerou re ka nalo na amijikia auetamaria mokotenemiu, bior napano nalo maka ajikia auetamaria niunumiu, mia monokanio kami kumerou ka ga

Atua, napano naio mijikia rila lelan mokotenemiu vija niunumiua ea vio na jogvaiano. ²⁹ Kuvialio, menu nalo napano sialo kirijako, nalo miroano laka, aju janea vio, mia ařiliřili kanio puruveru telisu ga ka juo, mia ver nalo tai rijoru ea borotano, Karamemiu naio rijikiaio. ³⁰ A vijumiu nalo na pariparimiu nalo, nalo miroano laka bunu, mia Atua bulukuio nonovio abeve terakurano, naio mijikialo. ³¹ Naruei, kamiua maka kuvijikia kumerou řeie, bior naio mial kamiu kubo loa kirijako nalo nei, mia naio rivitikar vatitig kamiu ka vite nonovio nalo ea kenemiu meuliano nalo.”

Toro napano berial ka naio be Yesu kiano

Luka 12:8-9

³² Ana Yesu berinavo “Toro napano riverial ea tomu nalo miralo, riverinavo naio be kiaku toro tai, toro na, mia kiniou bunu neverial ea Teta na joa vio mave mirano never toro na naio be kiaku. ³³ Mia toro napano naio riverial naio ea tomu nalo miralo riverinavo naio maka ve kanaku, mia kiniou bunu neverial naio kamu ea Teta na joa vio mave neverinavo naio maka ve kanaku.”

Yesu be burupati ka tuřeiano

Luka 12:51-53

³⁴ Ana Yesu berinavo “Kamiu kuvisidomii re kuver kiniou nebinimeia ka nala burumara tumaro ve

toru toa vio yetemeriba nei. Makanio, mia kiniou maka nemeia ka nodu tumaro toaio, mia kiniou nebinimeia bija iobogu na mira tai, napano mia tomu nalo ala baravo a ala mira rivior kiniou. ³⁵ Mia kiniou nebinimeia ka nala řeaku nalo atuře karamalo nalo, a merevono nalo atuře kenielo nalo, a tira řeaku nalo napano ajoro vonga, mia atuře kenielo simemia nalo. ³⁶ Mia nalo namia tiniei mimi toru julaka ka kiaku naiagagoano nalo, nina maka ve kulo dolu nalo, mia nalo na abe kialo řaratavo ga nalo.”

Yesu jo jukamu garueia ea kiano naiagagoano nalo kialo meuliano

Luka 14:26-27

³⁷ Ana na Yesu naio berinavo “Verenio toro tai na naio jidom kenieno toru laka, řelina karamano, řelina kenerinio, tuvulu napano naio jidom kiniou, toro na naio maka rijikia rimeia rive kiaku naiagagoano. ³⁸ Mo verenio toro tai rudu re kiano mākolkolo, ka takisor kiniou, tibe ka napano naio maka rijamo ka naio ka rijog rivova kar kiniou, toro na maka rijikia rimeia rive kanaku naiagagoano. ³⁹ Verenio toro tai tořa sidom řeielea kiano meuliano, toro na mia rilaluvu kiano meuliano. Mia verenio kiaku naiagagoano tai rilaluvu kiano meuliano bior naio be kiaku, mia naio

mijikia rivokar meuliano napano maka rijikia ribisi.”

Nalo napano avitikir vatitig naiagagoano nalo, mia ajev kialo mauo nene

Mak 9:41

⁴⁰ Ana na Yesu berenio, berinavo “Verenio toro tai rivuru kamiū kuva joomo ea kunuano, nina jibe ka ga napano naio buru kiniou ga naba joomo ea kunuano. A verenio toro tai rivuru kiniou nava joomo ea kunuano, nina jibe ka ga napano buru naio napano miila kiniou nebinimeī, naio ba joomo ea kunuano. ⁴¹ A verenio toro tai rivuru naverialiano tai p̄elina toro na memedu tai tibe na rivan ea kunuano, bior naio mijikia ka toro nei naio be toro lu tai na Atua kiano iñauano, mia naio rivokar mauo na ga napano mia Atua rivar van kiano tomu na tortoru nalo nei. ⁴² Kiniou neber vatitig ban kamiū, ka verenio toro tai rije baja na uei menini ga van kanaku naiagagoano tai, napano naio maka sidomii river naiagagoano na naio be toro na toru tai, p̄elina naio be toro kurano ga, mia toro nene rije v kiano mauo tai rivior vite novo napano naio milaio ban kanaku toro neibano.”

11

¹ Naruei bogo na Yesu mil batitig ban kiano naiagagoano nalo duelimo ba juo [12] nei bisi, ana naio jumolu den vio nei, naruei

naio ban ka riverlogloglo a rioliolu vanlo ea komeli nalo na vio Kalele.

Jone Baruei kiano naia-gagoano nalo abinimeī

Luka 7:18-23

² Kanio bogo nei, Jone Baruei joa yimo na teta-vokoiano, a naio mijog lil-ianiano na iñauano nalo napano Kristo jomā mīmāu kalo, naruei naio miila kiano naiagagoano tealō, ³ abano abika den Yesu, aberinavo “? Jumābe? ? Jau kobe toro na ajumā aberiio na nanua ruei aberinavo mia toro na toru tai naio rimeī ka rivuriñarabo ka kito, p̄elina jau maka kove toro nene kiana navo, ana monoka kumemi nuviturorea toro dolu bereio vo ka mia naio rimeī?”

⁴ Naruei Yesu berdoṗe banlo, berinavo “Kamiū kuvan bereio, kuvial Jone, ana kamiū kuverial vanio vite nalo napano kamiū kumial napano kiniou nomimāukalo ea vio nei, a vite nalo na kumijog aberiī ban kamiū ea kiniou, jibe ka vite nalo napano Naverialiano Aisea beriio na nanua ruei, napano naio berinavo:

⁵ *‘Merebono nalo, ajirarag bereio ruei,*

a nalo napano abe jaba milalo a abe javuluku milalo, vonganei amiel bereio ruei,

a nalo napano burumieni milalo, vonganei nia-bele binimeī meravo bo nonovio bereio ruei,

*a nalo napano abe bulubau
nalo, vonganei amijog
vite bereio ruei,
a nalo napano amãrãaro,
vonganei nalo
amemeul bereio ruei,
a nalo napano abe taliãasa,
vonganei kiniou no-
jomã neberial Liliani-
ano Vou banlo ruei.'*
Ais 35:5,6

⁶ "A kamiú kuva kuver ka Jone bunu, kuver "Toro napano maka leleio kiano jido-miano riveve juo ea kiniou bogo tai, mia ilivuiano rimei van naio.' "

Yesu jukunu ka Jone Baruei

Luka 7:24-30

⁷ Bogo napano Jone Baruei kanano naiagagoano nalo ajumolu ka avan bereio, Yesu berii Jone nene ban tomu nalo, berinavo "Bogo napano kamiú kubatavio ea vio yauo na beamu, kamiú kuban ka kuvial venia? !Maka ve tinieku ka kamiú kuban ka kuvial javiniu nalo napano jegi jomã buku biliviliglo janea vio julaka ga! ⁸ A kiniou maka ve tinieku bunu ka kamiú kuban ka kuvial toro na toru tai napano naio miya kuluniabele maraiu, bior tomu na jibe na nalo maka ajikia atua vio na miagiago jibe ka vio yauo kurano ga na, mia nalo bogo nonovio ajua yimo novo na tubo na toru kunuano. ⁹ ? Makanio, mia kiniou neber peli kamiú kuban ka kuvial naverialiano tai, a? Mo nina

bo ga, mia kiniou neber ka kamiú, neberinavo toro napano kamiú kumitumolu ka kuva kuvial naio, naio toru lie, juvulu naverialiano re nua nalo, ¹⁰ bior Atua naio berii Jone nene ea kiano Iliano Lu ruei, naio berinavo 'Kiniou nemiila kanaku naverialiano jukamu kaso, ka naio rila vatitig kanamo mãrabo.' Malakai 3:1

¹¹ "Riano, kiniou neber ka kamiú, neberinavo ea vio yetemeriba nei, Jone Baruei naio jo mave loa tomu dolu nalo abiniu. Mia nalo aviniu napano mia amei joomo ea navenatuboiano na Atua kiano, riva rivokar toro na maariano kalo nana jotano laka garuei, nalo na naruei aviniu atu mave loa Jone, ka mia nalo avar ilivuiano na Atua kiano tuvulu Jone. ¹² Jikario ea bogo napano Jone Baruei jikar ka mã mioliolu, binimei bokar banei, tomu nalo ajumã amilidie navenatuboiano na Atua kiano, a uolu kouo na mira nalo bunu ajumolu mã amila vio ka atuvulio. ¹³ Be bogo binimei bokario bogo na Jone, naverialiano nalo a Mosis kiano tuboiano napano naio jirilo, aberial vite telabo napano mia amijikia ayotuba iorou. ¹⁴ A verenio kamiú kumisaaro ka kumonea vite nalo nei napano mia ayotuba iorou, mia kamiú kumijikia kuvitilubar ka kuver Jone Baruei naio be Elaija na nanua aberkario nua ruei ka mia naio rimei

bereio. ¹⁵ A verenio be tiliniemiu, bo ka kuviagago vatitig ka kiaku iliano nei.”

Yesu mil kilkil ban taara nalo na ea kiano bogo

Luka 7:31-35

¹⁶⁻¹⁹ Ana na Yesu mil lie vo, berinavo “? Mia kiniou nemijikia never iliano vaio ka mia rivokar bajago na tomu na vonganei? Ea m̃arabo nonovio napano Atua milαιο ka rila von ka mia rivu ka kamiu, mia kamiu maka lele kuvisidomio, kamiu kumitu bereio m̃a kumil niegeniege naio biorio. Bior bogo napano Jone naio jo, naio jom̃a mondulu ka sinaniano ka tom̃a rivolkouo, a naio jo bel bunu ka m̃arjum̃elm̃elu, ana tomu nalo amialio jibe na, ana nalo amiila naio, aber ‘Tete na niadu jua naio.’ Mia bogo napano Kulorinio Kenerinio naio binimei jo, naio jinan batitigio a naio munu batitigio, ana nalo amil ea naio, aber ‘Kuvialio vo, toro na naio be toro na jinan m̃ele, a miokovo ka sinaniano julaka, a naio be toro na munu m̃elea m̃arjum̃elm̃elu, a naio be toro tai napano kiano bilbilu nalo abe tomu na abarbijii takis a tomu na bova ga nalo.’

“Ka tenene, kiniou nemial kamiu tomu na vio banei, napano kamiu kuvitibe ka kiritete nalo napano ver ajum̃a ajerjere ea vio medave na komeli, mia nalo atu aviovio van kialo bilbilu sesa nalo, aver ‘!Oi, kamiu kubova ga! Verenio kumemi

numitu numue bulaiu, mia kamiu maka kuvisidom kuvolu vija kumemi, a verenio numiou ka iou na m̃ariano, mia kamiu maka kuvisidom kuviteg vija kumemi.’

“Mia vite nonovio napano amalmaluvo ea Atua kiano masouano, beamu tomu telabo amilikue keanio, mia iorou ana mia naio rila rimeravo ka masouano nei keano, naio memedu ga a beriano laka.”

Yesu berkakar vatitigio bo ban nalo napano maka amonea naio

Luka 10:13-15

²⁰ Naruei Yesu mil berkakar ban tomu nalo na ea komeli nalo napano naio mim̃auka burutomoluo telabo kalo, bior nalo amial kiano vite nalo nei, mia nalo maka leleio aviliglo. ²¹ Naio berenio “!Kulo Koresin nalo, naliko kulo Betsaeta nalo, kamiu kumila lelan kamiu toru laka! Verenio kulo Taia naliko kulo Saiton nanua aial burutomoluo nalo nei napano kamiu kumialio nei ruei, mia nalo aviliglo nua ruei. Nalo maka ave kulo Ju, mia aya kuluniabelo na be m̃adati a mia nalo avisivisii bulum̃aroro ea pariparilo ruei, ka tomu nalo avitilubario ka nalo amijog bova riano bior kialo kariano nalo. ²² Kiniou neber ka kamiu memedu, ea bogo na tibureiano, mia kenemiu vironiano tovulu nana ve kialo.

²³ “!A kamiu kulo Kape-neam, napano m̃a kumitum̃a kubarvar ka kamiu, a kumisidom kuvitu mave laka, mia kamiu kuvitkar

kamiu! Mia Atua naio rivuku kamiu kuvatove laka ea bulukusebi. A verenio kulo Sotomo nalo aial burutomoluo nalo napano kamiu kumialio nei, mia ħeli aviliglo ka mia burumara sebi na vio mave maka rijikia sisen kialo vio rivakovio. Mia kamiu kumial burutomoluo nalo nei ruei, mia kamiu maka kuvilig kamiu leleio vo. ²⁴ Tenene na kiniou neber ka kamiu, ka bogo na tibureiano, mia Atua tinien riialo tovulu kamiu.”

Yesu ber siva ban karamāno

Luka 10:21-22

²⁵ Mia ka bogo nei, Yesu bolkouo, ber “!Teta o, Tubo na vio mave, a Tubo na yetemeriba! Neber siva banso, bior jau koberloglog vite nalo napano ea kiniou, ban nalo napano kialo jidomiano jibe ka kiritete nalo ga, mia nalo napano ajidom ka abe masou laka, bija nalo napano ajidom aber amijikia vite, mia jau komilavan vite nalo nei kalo. ²⁶ Riano, Teta, ninei javukia ga nana jau kojidomio.”

²⁷ Karina Yesu ber bunu, berinavo “Karamāku juvan vite nonovio jua jumaku ruei. Mia Karamāku, naio ga takurano mijikia batitig kiniou, mia kiniou nei napano nebe kenerinio, kiniou ga takurano napano nemijikia batitig naio. Kiniou kumemlika nalo napano nebijaualo ka nesiloglog Karamāku kalo

ka avarkar tinielo ea naio, kumemi nene naruei numijikia batitig naio napano be karamememi.”

“Kamiu kumei ea kiniou ka kuvijilimebi”

²⁸ Ana Yesu berii bunu, berinavo “Kamiu nonovio napano tiniemiu maro mēle bior kamiu kumitumā kubar de kenemiu bagaro nalo na teremi ea kenemiu meuliano, bo ka kamiu kumei, kamiu kumei ea kiniou, ka mia kiniou nemijikia nejev jilimebiano van kamiu.

²⁹ Kamiu kuvudu kiaku iliano nalo tibe ka vuu tai na kenemiu meuliano, a kamiu kuvudu kanaku bajago nalo, bior kiniou nebe toro na momavo ga, kanaku jidomiano batove. Tibe na, mia kamiu kuvileal ka kenemiu jidomiano nalo ajilimebi, ³⁰ bior kanaku verloglogiano nalo, nalo amonmai ga a amelala ga, a vite nalo napano mia kiniou navar van kamiu ka mia kuvario, mia ve temi laka re ka kamiu.”

12

Yesu naio be tubo na Legiano Lu

Mak 2:23-28; Luka 6:1-5

¹ Naruei ka bogoti dolu bereio napano be Legiano Lu, Yesu naliko kiano naia-gagoano nalo amiel abano, mia kialo mārabo jel iviso bure tiniavio na mārauiti. Nalo ajumā amiel jibe na, naruei kiano naiagagoano nalo jijerlo, ana amikiti kokorov mārati uiti nalo

tealo ka asenio. ² Nalo ajumã amila jibe na, naruei Varisis nalo tai ajua vio na,aju amial Yesu nalo, naruei nalo amil ban Yesu, aberinavo “!Ei, jau keialio! Kiamo naiagagoano nalo ajumã abar sinaniano ea tiniavio jibe na, ajumã amila imãuano ea Legiano Lu, ana verenio amila jibe na, nalo ajumã amila korov kiado tuboiano.”

³ Ana Yesu berdoþelo, naio berinavo “? Jibe na kovio, þelina maka kamiu kuvuluku kovio ea Iliano Lu bogo tai, ea vite nalo napano Parinio Tubo Teviti re nua milaio, a? Naio nalikokiano tomu nalo jijerlotoru, ⁴ naruei naio ba joomo ea Atua kiano Tobobo Lu, naio midu joko lu na tuboiano berenio kulo lu nalo ga amijikia asenio, mia Teviti nalo bunu ajenio. ⁵ ? Jibe na kovio, þelina kamiu maka kuvuluku bunu ea Tuboiano na Mosis kiano, napano ea Legiano Lu nalo, kulo lu nalo monokanio ava joomo ea yimo lu na Atua kiano, ka nalo ala kialo imãuano eaio? Jibe na, nalo ajumã amila korov tuboiano na berbure ber toro maka rijikia rimãu ka Legiano Lu, mia Atua naio maka sidomialio tena river nina be tena bova tai. ⁶ Kiniou neber ka kamiu, neberinavo be navenatuboiano vou tai jo vonganei, napano naio jo mave laka jovulu tuboiano na Atua Kunuano Lu, ⁷ mia naio jibe ka napano ea Iliano

Lu, napano Atua naio berenio, berinavo

‘Kiniou maka nesidomii kenemiú sida nalo, mia kiniou nejidomii ga bájago na tinieiaiano.’
Osea 6:6

? Pelina kamiu maka kuvijikia nioti na iliano na navo? A verenio kamiu kumijikia ruei, mia kamiu kuvitu re kuvitibure searo ea kanaku naiagagoano nalo nei napano maka ala titai na bova. ⁸ Kulorinio Kenerinio, naio naruei naio be tubo na Legiano Lu.”

Yesu milarur toro tai jumãno

Mak 3:1-6; Luka 6:6-11

⁹ Naruei Yesu naio juvan vio na, naio miel bano, ana na naio ba joomo ea kialo yimo na volkouano tai. ¹⁰ Ea vio na, toro tai naio jo na, naio be jumekirikokouro, a tomu tai bunuaju ajidom aleal torokoriano tai ea Yesu verenio naio rila vite rimemedu re. Naruei tomu nalo nei abika Yesu, aberinavo “? Jumãbe, kiado tuboiano berbure imãuano ka ala batitig mokotenano toro ka Legiano Lu, þelina naio maka riverbureio? !Jau kover von vite na!”

¹¹ Naruei Yesu berdoþe, berinavo “?A verenio toro tai kiano nunu tai, mia nunu nene ga rijoru ea þili tai ea Legiano Lu, kuberianã mia toro nei maka rijikia riva rivuru lario bereio? ! Nao, mia kito nonovio monokanio rala tibe na van kiado temeul nalo! ¹² A

verenio memedu jibe na ea kiado tuboiano ka kito rajai nunu ea Legiano Lu, jibe na kito romijikia rala imauano ka rajai toro ea Legiano Lu bunu, bior toro naio bo loa nunu.”

¹³ Naruei Yesu ber ka toro na be jumekirikokouro, berinavo “Kovitirii jumamo rimemedu.” Naruei naio mila jibe ka napano Yesu naio berenio, ana na naio jumano binime bo bereio, javukia jumano tinene. ¹⁴ Ana na Varisis nalo napano aju ea bogo nei amijoku, naruei nalo abatavio, ka averii tumabe naruei ka mia amijikia auebin Yesu rimaro.

Yesu naio be toro na imauano na Atua kanano

¹⁵ Mia Yesu naio mijikia ka Varisis nalo ajidom aue naio, naruei naio juvan vio nei, naio naliko tomu telabo napano ajakisorio. Naruei naio jo milarur tomu nalo na amie, ¹⁶ mia naio mil jikili banlo, naio berburelo ka ava averii re naio van kulo dolu nalo. ¹⁷ Naio mila jibe na ka mia Atua kiano iliano tai mijikia rime rive riano, napano Naverialiano Aisea berialio nua, a iliano nei naio ber jibe nei, berinavo

¹⁸ “*Nina be toro napano mimau kanaku, napano kiniou nebi-jauialar naio.*

Kiniou nejidom melea naio bo laka, a kanaku jidomiano jaaro toru kanio.

Mia kiniou nodu Niunuku toa naio, ka mia naio riverial bajago nalo napano memedu van tomu nonovio nalo na yetemeriba nei.

¹⁹ *Mia naio maka rivukuju van toro, naio maka vijago mele, mia naio maka rijikia rivuku iliano ve telabo ea vio medave.*

²⁰ *Mia naio maka rijikia telar javiniu napano burukorovio jaklele ruei jo,*

a naio maka rijikia rijukon bin yulu na volvolkouo ka rimaro.

Mia naio rimau tibe na rivanvano-o rivokar napano bajago na memedu naio tumolu sikili tu tovulu bajago na bova.

²¹ *A mia tomu nalo nonovio na yetemeriba nei, mia nalo avarkar tinielo ea naio sikili ka mia naio rilarlurlo.” Ais 42:1-4*

Aberenio Yesu mimau ea moroano na Simaro kiano

Mak 3:20-30; Luka 11:14-23, 12:10

²² Naruei tomu nalo aburu toro tai napano niadu ban ea naio, naio binime ea Yesu. Niadu nene mila naio mirano bono, a naio be buru bunu, mia Yesu naio mila batitig mirano a tini-ajono abinime abo bereio.

²³ Naruei nalo napano amial vite nalo nei amiilo toru, amemebiju kanio, ana na aberinavo “!Uerei! ?Tete na naio be Teviti kenerinio namia roju rorea naio kovio, pelina makanio?”

²⁴ Mia bogo na Varisis nalo amijog tomu nalo kialo iliano nei, mia nalo amijoku toru, nalo aberenio “Toro na jitig bulag niadu nalo ea ga moroano napano siġaro nalo kialo tubo napano siano Belsabel, mijamo ka ban naio.”

²⁵ Mia Yesu naio mijikia kialo jidomiano, ana naio ber kalo, berinavo “A verenio tubo tai, kiano tomu nalo avuruburelo, napano togio nene ail die togio nene, mia tubo nene kanano iġauano nalo monoka mia atibirbili; a verenio komeli tai, ħelina mġaratavo tai, tomu nene nalo avuruburelo, ka togio ajidom ajil bulag togio nene, mia tomu nalo nei maka ajikia atu rivu bogo tai. ²⁶ ? A jibe na bunu, verenio Setano kanano tava nalo tealu atu ajil bulag nalo togio dolu, nina berial ka nalo aburuburelo ruei, ana na mia navenatuboiano na Setano kanano naio sikili tu tuġabe? ²⁷ ! Mia kamiu kumituġa kuberenio kuber jibe na naruei, kuberenio kiniou noġoġa nemijil bulag niadu dolu nalo ea moroano na buruġara siġaro napano Belsabel, mia maka rijikia tibe na leleio garuei! ? Mia verenio tibe ka napano kamiu kuberenio, juġabe naruei ana kamiu tealu bunu ajuġa amijil bulag niadu? ?Kei mijamo ka moroano na jibe na banlo, ħeli Setano bunu koviobo? Bo ka verenio kenemiu naia-

gagoano napano ajuġa amijil bulag niadu, ajog kenemiu iliano na. ²⁸ Ana makanio, kamiu kuber maka rimemedu ga. Kiniou noġoġa nejtitig bulag niadu ea moroano na Atua kiano Niununo ga, mia tenei berial ber Navenatuboiano na Atua kiano ju iviso bure kamiu ruei.

²⁹ “!Kuvijiio! Verenio toro tai sidom riva joomo ea toro kouo tai kunuano ka mia naio rivina ka kanano saba nalo, mia naio monokanio rivar teli riorkar toro nene sikili beamu vo, avona bisi, ana na mo naio mijikia riva joomo ka rivina ka nonovio saba nalo na kanano. Mia kiniou noġoġa nomila jibe na naruei ka toro kouo napano Setano.

³⁰ “Toro napano maka takisor kiniou, naio jo berbure kiniou, a toro napano maka riġau vija kiniou ka nuvuru kiaku tomu nalo amei vio takurano, naio joġa mijil dedade ealo abeve terakurano. ³¹⁻³² Jibe na naruei, kiniou neber ka kamiu, kariano nalo bija ilivovaiano nalo, a iliano napano mila bulag Kulorinio Kenerinio, mia Atua naio mijikia riviekokoa toro riviorio, mia toro napano naio ril rivova ka Niununo Lu, riverenio kiano iġauano nalo be Setano ga miġaukanio, toro na jibe na, Atua naio maka rijikia riviekokoa naio bogo tai, ea bogo nei a ea bogo dolu napano mia rimej.”

Buruiesi bija mārati nene nalo

Luka 6:43-45

³³ A Yesu naio ber bunu, berinavo “Kito romijikia rovitilubar buruiesi nalo ea salo mārati napano abarlo. Buruiesi napano miluo bo, bar mārati na bo, mia buruiesi napano miluo bova, naio bar mārati napano bova. ³⁴ Mia ea meuliano na toro kiano jibe na bunu, napano kiano iviso jibe kanio burupati tai, a iliano nalo napano amolmoluo ea kiano meuliano ajibe ka mārati nalo napano amolmoluo ea burupati nei. ?Mia kiniou nemial kenemiu burupati nalo amenunu ruei, mia tumābe ana mārati na bo tai mijikia rimoluo ea kenemiu iliano nalo? ! Kamiu kube bajulukuti na maro nalo ga! ³⁵ Toro napano bo, naio barbijii vite na bo nalo jua kiano iviso, naruei bogo nonovio kiano jidomiano na bo naio jo, napano naio mijikia sian bulagio, mia toro na bova, naio jo barbijii vite nalo na bova jua kiano iviso, naruei naio maka rijikia sian bulag jidomiano na bo bogo tai.

³⁶ “Mia kiniou nejidom kamiu kuvijikia ka ea bogo na tibureiano, mia tomu nalo nonovio monokanio ala kialo veriiano ea kialo ilivovaiano nonovio veve terakurano napano ajumā aberenjo ea kialo meuliano nalo, ³⁷ bior mia Atua naio

tibure kanamo meuliano rivior kanamo iliano nalo. Nina bior kanamo iliano nalo amijikia alaso komeul, ŗelina mia alaso kovokar vironiano.”

Tomu na tortoru tai ajidom aial vremesiano

Mak 8:11-12; Luka 11:29-32

³⁸ Ana tomu na verloglogiano na tuboiano, naliko Varisis nalo tai aber ka Yesu, aberinavo “Ei, jau napano abioso ka Naverloglogiano, kumemi numisidom ka jau kala vremesiano tai van kumemi ka mia nuviai kanamo moroano.”

³⁹ Mia Yesu naio berdoŗe banlo, berinavo “Tomu nalo napano ajidom aial ga vremesiano nalo, abe kulo va nalo, nalo amila kodovo ban Atua jibe ka nalo napano mā amila siakaiano. Makanio, mia kamiu kuvial re vremesiano tai, mia vremesiano na Naverialiano Jona ga nanua, nina ga mia kamiu kuvialio. ⁴⁰ Jona nene naio jo joomo ea burumāara keniene kelijumdumu na toru tai mabono ka legiano tolu a bogiano tolu, naruei mia tibe na bunu ea Kulorinio Kenerinio, napano mia naio toa bulumābono borotano ka legiano ve tolu a bogiano ve tolu. ⁴¹ Naruei nalo na vio Nineva re nua, amijog Jona kanano iliano, mia nalo abiliglo, a mia nalo na atumolu atu ea legiano na tibureiano, ka

12:33 Mat 7:20; Luk 6:44 **12:34** Mat 3:7, 23:33; Luk 3:7, Mat 15:18; Luk 6:45

12:38 Mat 16:1; Mak 8:11; Luk 11:16 **12:39** Mat 16:4; Mak 8:12

mia averilubarbar kenemiu torokoriano nalo, bior be toro tai napano naio loa ka Jona naio jo bija kamiu vonganei, mia kamiu maka kuvilig kamiu leleio vo.

42 “Nanua bunu be tira na toru tai napano naio be parinio tubo napano juvan kiano buruvenuo koalabo laka, naio batove binime i ka rijog tormoruo Parinio Tubo Solomon kiano ilimasosouano nalo. Naruei mia tira na toru nei bunu, mia naio tumolu tu ea legiano na tibureiano, naio riverlubarbar kenemiu torokoriano nalo, bior toro tai napano naio be masou loa ka Solomon naio jo bija kamiu vonganei, mia kamiu maka kuvisidom naio leleio.”

Niununo va mijikia binime bereio

Luka 11:24-26

43 Karina Yesu ber bunu, berinavo “Bogo tai, napano ver ajitiglar niadu ea toro, niadu nene naio mijikia riva yeturu, sirago ka buluvio na mia naio rijilmebi eaio. Mia ver naio maka rijikia rilealio, 44 mia naio river ‘Ee, bo ka mia kinioi naiadu ka bereio kunuaku moruo na beamu vo.’ Naruei, bogo napano naio rime i bereio mia naio rial yimo nei beteauo, a mila kon a meravo bo, a amila batitig saba nene nalo memedu ruei ju. 45 Naruei naio mijikia riva rivuru bereio niadu dolu nalo ve aluo napano abova laka loa naio, amei vija naio, ka mia amijikia

ava joomo bereio atua toro nei. Mia toro nei nua kiano meuliano bova, mia iorou kanio kiano meuliano rivova lie vo. A mia tibe na ga bunu ea meuliano na tomu na bova nalo ea bogo nei.”

Yesu, kenieno a kuruano nalo

Mak 3:31-35; Luka 8:19-21

46 Bogo na Yesu jomā mil kia ga vo bija tomu nalo nei, kenieno naliko kuruano nalo abinime i aboru ea vio nei, nalo ajikili aju tavio, ajidom ail vanio. 47 Mia nalo nei tai berial ka Yesu, berinavo “Oi, koniomo naliko kuruamo nalo ajikili aju tavio, amilavio ka ail vansom kija beamu vo.”

48 Mia Yesu naio miolu berdoŋelo, berinavo “?A konioku be kei, a kuruaku nalo abe kei?” 49 Ana naio jiloglog kiano naiagagoano nalo, naio berinavo “?Kumial nalo na aju na? Konio ku a kuruaku nalo, nalo nei aju nei! 50 Bior ver toro napano rila tavukia napano Teta na vio mave naio jidomio, toro na jibe na naio be kuruaku, ŋeli kuvivinio ku, ŋeli konioku.”

13

Jamerijiano na kurukuti uiti napano ajibirbil ea borotano kinkin veri

Mak 4:1-9; Luka 8:4-8

1 Ka legiano nene, Yesu jaluvo den vonuo, ba jotano koyou ea baramudou na

ueiyabo na toru ka to riverloglog tomu nalo. ² Mia tiniobi toru abinimei ka naio ka bogo na, mila ana naio bavin ea uako tai, jotano eaio, mia tiniobi toru nei nalo aju bin baramudou aju, ³ ana naio jo berloglog vite telabo kalo ea jamerijiano nalo.

Ana naio berii kalo, berenio “Kuvijiio toro tai napano ban ka rivisivisii kurukuti ea kiano tiniavio. ⁴ Telikiti napano naio joña bisivisii kurukuti nalo nei, tealo ajibiribil ea m̃arabo, ana iorou kanio, menu nalo abinimei amikiti bulagio nonovio. ⁵ A kurukuti tealo ajibiribil ea vio na be tabaṣilio yetano kanio, mia maka sano tano nene rimerorolu. Mia abitovtov soṑeli, bior salo tano menivinivi ga. ⁶ Ana bogo napano m̃erenio mijivi nieja jikili nieje salo toti nalo, vaarakurano ga amekekeu, bior maka ve salo baṭi ka avatove batitigio vo. ⁷ Mia kurukuti tealo ajibiribil ea vio napano beamu maka atekono vatitig teli va nalo eaio, mia iorou kanio, ana teli va nei naio miluo bereio toru, ana muevo miralo-o ana na nalo am̃arm̃aro. ⁸ Mia kurukuti dolu nalo bereio ajibiribil ea tano na bo tai, naruei nalo amiluo, ajakou abar m̃arati nalo, napano tealo abar duelimo toromomou [100], tealo abar duelimo va ari [60], a tealo abar duelimo va rolu [30].”

⁹ Ana na Yesu ber kalo,

berinavo “Toro napano be tiliniene monokanio naio riagago vatitig ka iliano nei.”

?Kar vaio ana Yesu joña mil jel ea jamerijiano?

Mak 4:10-12; Luka 8:9-10

¹⁰ Mia iorou kanio, ana na Yesu kiano naiagagoano nalo abinimei abika den naio, aberinavo “?Bior vaio ana jau kojoña koberloglog tomu nalo jel ea jamerijiano jibe na?”

¹¹ Naruei Yesu berdoṑe banlo, berinavo “Atua mila jibe na ka mia kamiu kuvijikia kuvileal m̃ajig na nave-natuboiano na kiano, mia naio maka jian jikiaiano nei van kulo dolu nalo nei. ¹² Kiniou neber jibe nei ka kamiu, ka toro napano verenio be kiano saba ruei, mia naio rijeve tabunu bere vo ka mia ve miroano, mia toro napano maka ve kanano saba tai, mia naio rila deven vite vaio na telisu napano be kiano ruei. ¹³ Tenene na kin-iou nojoña neberlogloglo ea jamerijiano, bior aju amial vite, mia maka lele avitilubario, a ajum̃a amiagago, mia maka lele ajoglubarbario. ¹⁴ Tomu nalo na jibe nei naruei, nalo nam̃a Atua beriilo nanua ruei, ea ilirianiano napano Naverialiano Aisea naio berialio, berinavo *‘Mia kamiu kuvijogio rivano-o, mia kamiu maka leleio kuvijikia kuvijoglubarbario bogo tai.*

Mia kamiu kuvialio rivano-o, mia maka leleio kuvijikia kuvitilubarbario bogo tai,

15 *bior kamiu kumitibe ka tomu nalo napano kialo jidomiano nalo amarmaro, jibe ka napano ajinioko tilin-ielo nalo, a ajetavoko miralo nalo ruei.*

Verenio nalo ala re tibe na, p̃eli mia miralo rivitii dulu vite, p̃elina tilin-ielo rijoglubarbar vite, a p̃eli kialo jidomiano rijoglubarbar vite, ana tibe na ana amijikia aviliglo amei ka kiniou ka mia kiniou noim̃au ka vatitiglo. Ais 6:9,10

16 “Kiniou neber ka kamiu, kanaku naiagagoano nalo, ilivuiano joa kamiu, bior miremiu nalo aju amial vite nalo napano kamiu kumialio, a tiliniemi nalo amijog vite nalo napano kiniou nojor̃na neberloglogio ka kamiu. 17 Naverialiano nalo telabo bija Atua kiano tomu nalo nanua, nalo ajidom toru ka aial vite nalo napano kamiu kumialio vonganei, mia maka lele aialio, mia nalo amila vio toru ka ajog venia na kamiu kumijogio vonganei, mia nalo maka ajog vite nalo nei tai leleio.”

Yesu ber bisivisii nioti na jamerijiano na kurukuti uiti

Mak 4:13-20; Luka 8:11-15

18 Mia Yesu mil banlo, berinavo “Mo, kamiu kuviagago

vatitig ka kuvijog nioti na jamerijiano na toro napano ban ka rivisivisii kurukuti ea kiano tiniavio.

19 “Vite na jukamu, be kurukuti na jibiribil ea m̃arabo, nina javukia napano tomu nalo na amijog Ioluano Vou na nave-natuboiano nei, mia nalo maka ajoglubario. Kurukuti novo nalo na ajibiribil ea kialo jidomiano nalo, mia toro va nei Sim̃aro naio binimei ana naio bar bulag Ioluano Vou nei bereio den kialo iviso.

20 “Kurukuti dolu tealó nalo, ajibiribil ea vio na be tabaṗilio yetano napano tano nene menivinivi ga, nina javukia napano tomu nalo na amijog Ioluano Vou nei, mia nalo ajaaro soṗeli ga kanio, 21 mia jibe ka maka ve salo pati tai. Amijikia atu ka bogo ve bulati ga, mia verenio bogo na jikili rimei, p̃elina tomu nalo ajilo kar amonea Atua kiano iliano, mia vaarakurano ga nalo ajoru bereio.

22 “Dolu bunu, nina be kurukuti na jibiribil ea vio na teli va juaio, mia nina jibe ka napano tomu nalo amijog Ioluano Vou nei, mia nalo ajidom m̃elea kialo meu-liano, a tinieljii saba nalo na yetemeriba nei toru laka. Bajago nalo na jibe nei jibe ka teli va, ana nalo abivibin Ioluano Vou nei ka mia naio rivar re m̃arati ea kialo meu-liano nalo.

23 “Mia na maariano nene, naio be kurukuti na jibiribil

ea borotano na bo, ninei javukia napano tomu nalo na amiagago ka Ioluano Vou nei, mia nalo amijoglubarbario, naruei ajakou abar m̃arati na Ioluano Vou nei ea kialo meuliano nalo, napano mia tai atakou avar m̃arati rivokar duelimo va rolu [30], mia tealo atakou avar m̃arati ve duelimo va ari [60], mia tealo atakou avar ve telabo, tibe ka m̃arati ve duelimo toromomou [100].”

Jamerijiano na soro va na miluo biju bija kurukuti uiti

²⁴ Naruei Yesu berii jamerijiano dolu banlo, berinavo “Bajago napano Atua buru tomu nalo abinimei jouro ea kiano navenatuboiano nene jibe nei. Toro na toru tai napano naio ba bisivisii kurukuti uiti na bo ea kanano tiniavio, ²⁵ mia bogo napano tomu nalo amonomel bogiano, ana kiano uolu tai binimei, bisivisii kurukuti soro na bova ea tiniavio nei bunu, karina naio buro ban bereio. ²⁶ Naruei kurukuti vite juo nei amiluo biju vaarakurano, abe verare ga, mia bogo na ga uiti nalo ajikar ka ajakou, mia tomu nalo na toro na toru nei kiano nalo abitilubar ka soro na bova bunu miluo biju bija uiti nalo. ²⁷ Ana na nalo abinimei amial naio, abika denio, aberinavo “?Boru, jum̃abe? Kurukuti nalo napano romebijalo ea kanamo tiniavio, nalo abe kurukuti na bo ga. ?Mia soro va nei naio binimei jum̃abe?”

²⁸ “Ana na naio berii kalo, berinavo ‘Makanio, nina kiaku uolu tai napano naio mila vite na jibe nei.’

“Naruei kiano tomu nalo abalea naio bereio, aberinavo “?Mo, ana mia tum̃abe, jau kojidom nuva nuvuru bulag soro va nalo nene?”

²⁹ “Mia naio berburelo, berinavo ‘Makanio, atubo beamu vo. ?Verenio kamiukuva kuvuru bulag soro va na, p̃eli mia kamiukuimikia kuvuru bulag belea uiti bunu, ve juo vaarakurano koviobo? ³⁰ Mia nalo amijikia ave juo ailuo biju vio takurano riva rivokar bogo napano avarbijii uiti m̃arati rimeijoomo. Ka bogo na, mia kiniou nemijikia never ka tomu nalo avan ka ate uiti nalo, mia ate bulag soro va nalo nene beamu, aiorkakarlo ve bagaro ka mia avukulo rivan ea sebi. Iorou kanio, ana mo amijikia ava ate uiti nalo ka avario rimeij vonuo.’”

Jamerijiano na kurukuti m̃arabako

Mak 4:30-32; Luka 13:18-19

³¹ Naruei Yesu naio berial jamerijiano dolu tai bereio banlo, berinavo “Navenatuboiano na vio mave naio javukia kurukuti m̃arabako napano naio mijoru balea buruiesi.

³² Mia kurukuti nene naio kiritavaso leleio ga, mia bogo napano naio pitov mia naio binimei be buruiesi na burutomoruo tai, juvulu buruiesi dolu nalo, naruei menu nalo amue m̃alo niuku

nalo ea sano jaati nene nalo.”

Jamerijiano na isi

Luka 13:20-21

³³ Mia Yesu berial jamerijiano dolu bereio kalo, berinavo “Navenatuboiano napano Atua kiano, naio javukia tira tai napano miñauka isi na telisu ga bija burumñara baju na yevi, mia isi na telisu neibano naio miyuku joko nalo nei biniu tortoru.”

Yesu mil ea ga jamerijiano nalo banlo

Mak 4:33-34

³⁴ Ea Yesu kanano iliano nalo nei, naio ber bulag vite nalo jibe na ban tomu nalo, mia va telabo napano naio mil ea jamerijiano banlo. ³⁵ Jibe na, ana mila naveri-aliano nanua kanano iliano be riano, napano Atua ber

“Mia kiniou neverial kanaku iliano nalo ea ga jamerijiano,

*mia kiniou neverial saba nalo napano ajuluku koal-
abo laka nua ruei aju
nunu kia ga vo,*

*jikar ka bogo na ne-
jii yetemeriba, binimei
bokar banei.” Iouano
78:2*

Yesu berial nioti na jamerijiano na soro va

³⁶ Karina Yesu juvan tin-iobi, ana naio ba joomo ea yimo, naruei kiano naia-gagoano nalo abinimei kean naio, abika denio, aberinavo “?Aiou koig, kumemi numisidom kovisi nioti na jamerijiano na soro va na

miluo ea tiniavio na uiti nei?”

³⁷ Ana Yesu naio berdoñelo, berinavo “Toro na toru napano bisivisii kurukuti na bo, naio be Kulorinio Kenerinio. ³⁸ Mia kanano tiniavio nene, naio be yetemeriba nei. A kurukuti na bo nalo nei, nalo abe tomu nalo napano aju jouro ea navenatuboiano na Atua kanano. Mia soro va nalo nei nalo abe Siñaro kanano tomu nalo. ³⁹ A uolu napano bisivisii kurukuti soro va nei, nina naio be Siñaro ga. A bogo na avarbijii mñarati uiti, nina naio be bogo na tagañiano. A tomu nalo na imñauano nei napano avan ka ate bijii mñarati uiti nalo nei, nina naio be nailiano nalo. ⁴⁰ A imñauano na ayobijii soro va karina aisebilo, nina bajago napano mia rimei ea bogo na maaro, ⁴¹ napano mia Kulorinio Kenerinio, naio riila kiano nailiano nalo ka avan ka avar bulag vite nalo napano amila toro mijoru ea kariano, vija tomu nalo na amila bijuku vovaiano nalo, ka mia nalo ajikia atu re bunu naliko tomu nalo na kiano navenatuboiano.

⁴² Mia nailiano nalo avukulo avan ea sebi na toru, ea vio napano tomu nalo ajumña ajegi eaio, a ajumña ajer mñarjuvolo nalo eaio.

⁴³ Mia iorou kanio, ana tomu na memedu nalo atu jouro ea Karamñalo kiano navenatuboiano, mia nalo nei amerera atavukia mñerenio. A toro napano be tiliniene, bo ka naio riagago

vatitig ka iliano nei.”

Jamerijiano na burumbara puruveru novo tai napano mña aburu veru ea

⁴⁴ Mia Yesu naio berinavo “Bajago na ver toro napano jidom riva jouro ea nave-natuboiano na Atua kiano, jibe ka jamerijiano nei: toro tai ba mial borotano tai, mia naio miilo ka burumbara puruveru novo tai napano jovorvoru ga eaio. Naruei naio jivin vanio lie ka puruveru nei bereio, mia naio ba pñiliñili bulag ka nonovio kanano saba nalo biniu, ka mia naio mijikia rivulular borotano nei, bior naio mijog bo toru laka ka tonovo napano naio milealio.”

Jamerijiano na basabebe

⁴⁵ Mia Yesu berii bunu, berinavo “Mia bereio, bajago na toro napano jidom riva jouro ea nave-natuboiano na Atua kiano, javukia bunu: toro tai, napano naio jomña bulu basabebe novo nalo den tomu nalo. ⁴⁶ Mia bogo tai ana naio mileal tai napano bo, ana naio berinavo ‘Riano ga na, kiniou tinieku jii vite nei toru laka. ! Verenio kiniou nemijikia nodu ve kiaku garuei! Mia monoka kiniou nava noñiliñili bulag ka kanaku saba dolu nalo nonovio, ka mia kiniou nemijikia nemei novulu vite novo nei.’ ”

Jamerijiano na levlevi

⁴⁷ Ana Yesu naio ber bereio, berinavo “Mia bereio, bajago na Atua

kiano ka rivuru tomu nalo ava jouro ea kiano nave-natuboiano, naio javukia bunu, napano bogo na tomu nalo ajuvarvan levlevi ea ueiyabo, ana amijikia avuru ko niado kinkin nalo ve telabo eaio. ⁴⁸ Ana bogo napano levlevi bujo vatitig bo, mia tomu nalo aburio bauro, naruei nalo ajaburuburu, abarburevure niado nene nalo. Ana niado nalo na bo, amisonlo aban ea kanalo basaro nalo, mia niado na bova nalo, nalo abuku lo abano. ⁴⁹ Mia nina rimeñi tibe na ea bogo na maaro, mia nailiano nalo ava alaburevure tomu nalo, avuru bulag tomu na bova nalo, ⁵⁰ avukulo avan ea sebi na toru, na tomu nalo ajumña ajegi eaio, ajumña ajer mñarjuvulo nalo eaio.”

Jamerijiano na terimoruo a terivou

⁵¹ Naruei Yesu bika den kiano naiagagoano nalo, ber “?Kamiu kumijoglubarbar iliano nalo nei?”

Ana nalo aberdoñe, aberinavo “Nao, kumemi numijikia koviobo.”

⁵² Ana naio ber kalo, berinavo “Saba nalo nei jibe ka toro tai napano beamu, naio be naverloglogiano na tuboiano nalo na Atua kiano Iliano Lu, mia iorou kanio, ana naio binimeñi be kanaku naiagagoano tai ea navenatuboiano na Atua kanano. Naio javukia toro na toru tai napano kiano saba novo na imauano nalo telabo ea kunuano. Ana bogo nonovio, naio mijikia

rivar bulag kiano vite na be terimoruo na bo kia ga vo, a naio mijikia rivar bulag bunu kiano tena be terivou, ka mia naio rila kiano iñauano nalo ealo.”

Kulo Nasarete amilidie ka Yesu

Mak 6:1-6; Luka 4:16-30

⁵³ Bogo napano Yesu berial jamerijiano nalo nei bisi, ana naio juvan vio nei, ⁵⁴ binimej bereio ea kiano vio. Naruei naio joña berloglog tomu nalo na vio nei, joomo ea kanalo yimo na volkouano, mia nalo amiilo toru ka kiano iliano nalo. Ana nalo ajumã aberverii kalo, aberinavo “!Tomnei! ?Tete na, naio bokar m̃asosoqano nei jumãbe, a naio joña mila vremesiano nalo na jumãbe? ⁵⁵ Romijikia tete nei ruei. Naio karamãno napano be toro namã mimãuka yimo ga napano Yoseve, a napano kenieno, tira napano Mere. A kuruano nalo, nina Yemesi, a Yoseve, a Saimon, a Jutas, nalo na abe kurualo ea naio. ⁵⁶ A kuvivinieno nalo, nalo nei gaaju kitoliko ga. ?Mia tete na naio jaluvo den kito, ba bar tenalo na be?” ⁵⁷ Naruei nalo tiniel jer naio, maka asidom naio leleio.

Mia Yesu naio ber kalo, berinavo “Toro napano be naverialiano, tomu dolu nalo amijikia ajovonio, mia tomu na kanano vio, naliko kanano m̃aratavo nalo, nalo na ga maka ajikia atovon

naio.” ⁵⁸ Naruei ea vio na, Yesu naio maka rila vremesiano ve telabo, bior nalo maka amonea naio.

14

Parinio Tubo Erot Antapas berii Yesu

Mak 6:14-16; Luka 9:7-9

¹ Ka bogo nei, aber Yesu ba bokar Parinio Tubo Erot, na naio be parinio tubo na tanobuku na vio Kalele. ² Ana Parinio Tubo Erot naio mijog iliano nalo nei, ana naio ber ka kiano tomu na tortoru nalo, berinavo “?Toro napano ajumã aberiio na, naio be Jone Baruei ga kovio, napano naio meul bereio den na m̃ariano bo? Tenene na naio mije mo-roano ka mimãuka vremesiano nalo na.”

? Jone Baruei kiano m̃ariano jumãbe?

Mak 6:17-29

³⁻⁴ Parinio Tubo Erot naio mil jibe na, bior naio naruei muetañaria Jone Baruei m̃aro ruei, ana naio jo merou m̃ele kanio. A tukunu na m̃ariano na Jone Baruei kiano jibe nei: Parinio Tubo Erot nei kuruano Vilip, napano naljuo karamãlo takurano mia keniele juo. Ana beamu, Vilip nene, naio joro ka tira tai siano Niarotias. Mia iorou kanio, ana Parinio Tubo Erot naio ba burular tira nene. Tenene na, Jone joña mil ban Parinio Tubo Erot kanio, berinavo “Tena jau komila na maka rimemedu ka, napano jau koburular tira

na, bior naio be kuruamo koano.” Mia Niarotias maka saaro leleio ka Jone kanano iliano, naruei naio mil ban Parinio Tubo Erot, ana Parinio Tubo Erot miila kanano tomu tai aba abokar Jone, amiorkario, ana amidu joa nalakoiano. ⁵ Mia Parinio Tubo Erot milavio ka ruebin Jone, mia naio merou kija kanio kulo Israel nalo, bior nalo amonea Jone aberinavo naio be kialo naverialiano tai.

⁶ Naruei Niarotias nei, naio be kenerinio vevinio tai, mia bogo napano nalo amila jokoluolu ka atekar bogo napano abar Parinio Tubo Erot eaio, ana niatira nene naio bolu kamu ka nalo na ajua jokoluolu nei miralo. Naruei Parinio Tubo Erot naio jaaro toru ka merevono nei kanano voluano, ⁷ naruei naio berkakario jikili banio, berenio vaio napano ver naio rivika denio, mia naio rudu vanio.

⁸ Naruei Niarotias naio mil bija kenerinio vevinio, bisi ana kenerinio vevinio nei naio ber ka Parinio Tubo Erot, berinavo “Vonganei, kiniou nejidom kodu van kiniou Jone Baruei pariparinio, toa baju tai, rimei ea vio nei.”

⁹ Mia iliano nei mila Parinio Tubo Erot mijog bova bior kiano verikariano na yokovoano nei, mia naio berenio ka ala bo ka tibe ka ga na merevono nei naio berenio, bior naio mila ilikakariano jikili jibe na ea kanano bilbilu nalo miralo ruei. ¹⁰ Ana nalo aban ea yimo na lakoiano,

ajekorov Jone burujono, ¹¹ ana amidu parinio joa baju tai, ana amidu binime ban merevono nene, ana merevono nene na midu ba ban kenieno. ¹² Iorou kanio ana Jone kiano naiagagoano nalo abinimei amidular mokotenano aba ajivinio, ana nalo aba aberial ka Yesu. Mo tukunu na Jone Baruei kiano m̃ariano biniu ea vio nei.

Yesu bagan sum̃analo menu jimo

Mak 6:30-44; Luka 9:10-17; Jone 6:1-14

¹³ Naruei bogo napano Yesu mijogial ka Parinio Tubo Erot naio jo berii naio, berinavo naio be Jone Baruei naio meul bereio den na m̃ariano, ana Yesu jumolu den vio na, ana naio bavin ea uako tai, ka naio rivan ea vio yauo tai napano be tum̃aro napano maka tomu nalo atuaio. Mia bogo napano tiniobi nalo amijikia ka naio ban jibe na, amolmoluo ea kialo m̃arkomeli nalo, ajakisorio, ajel uro. ¹⁴ Mia bogo napano Yesu bauro, mia naio mial ka tiniobi na tomu nalo aju ruei, mia naio tinien m̃ialo toru, ana naio mila kialo tomu na mieiano nalo abo bereio.

¹⁵ Mia bogo napano m̃erenio batove, ana Yesu kiano naiagagoano nalo abinimei kean naio, aberinavo “Tubo, vio nei maka rivu, a vaataro ka vio rimelijo bunu. Bo ka jau keiila tiniobi nalo na avanvan bereio ea komeli nalo, ka avulu salo sinaniano tai.”

16 Ana Yesu berdoŝe ber kalo, berinavo “Makanio, nalo amijikia atu tibe na rivu ga na. Bo ka kami u kuvar sinaniano tai vanlo.”

17 Ana nalo aber kanio, aberinavo “!Uerei ŝeli ga, kumemi nubokar joko sesa jumo ga, bija momaio bana juo ga!”

18 Ana Yesu berinavo “Kuvar rimej van kinio,” 19 ana naio ber ka tiniobi nei, berinavo “Kamio kuvitutano ea soro beamu vo.” Naruei naio bar joko sesa jumo bija momaio bana juo nei, naio jirarago bavin ea vio tiniabene, ana naio ber siva ban Atua ka sinaniano nei, karina naio burekokorovio joko sesa nei, naio jian ban kiano naiagagoano nalo ka nalo avar van tiniobi nalo nei. 20 Mia nalo ajinan bano-o, mabolo jouo bo, mia niati na sinaniano nalo napano maka asenio, nalo abe verare ka aisonlo rivan ea basaro solokobaro nalo napano tortoru ve duelimo ba juo [12]. 21 Mia tomu nalo napano ajinan, suŝanalo ga abokar kovio ea menu jumo [5,000], mia maka avuluku tire nalo vija kiritete nalo.

Yesu miel mave ea ni-unuku tei

Mak 6:45-52; Jone 6:15-21

22 Karina Yesu ber ka kiano naiagagoano nalo, berenio “Kinio nejidom ka kamio kuvidu kiado uako, kamio beamu kuva tivelinio ea ueiyabo na toru nei, mia kinio noto nei beamu vo ka mia neiila tiniobi nalo nei avanvan

bercio ea kialo, mŝarkomeli dedade nalo.” 23 Ana bogo napano naio miila dedade ea tiniobi nalo nei abanvan bisi, ana naio bavin ea suku tai, naio takurano, ka rivolkouo. Bogo napano vio melijo ruei, mia Yesu jo naio ga takurano, 24 mia ka bogo nei, uako neibano naio jo koalabo ruei, iviso ea tinia ueiyabo. Naruei niatuva toru laka, a nalo aju ajuŝe jegi, mila ana nalo amidu tei mia amidu tei. 25 Mia vaataro ka vio rivuruburevure ka viorijeni, ana Yesu binimej ka rialo, naio jo miel manono mave ea tei.

26 Mia bogo na kiano naiagagoano nalo amial naio jo miel binimej jibe na, mia nalo amerou, ana aber “!Uerei! ? Titaj yako, ŝeli siŝaro tai kovio, ŝeli venia jibe na?”

Mia nalo amiaga jouo, bior nalo amerou mŝele, 27 mia vaarakurano Yesu naio mil banlo, berinavo “!Ei, kamio kumerou re bunu, mia be kinio ga nei!”

28 Ana Pitere berdoŝe, berinavo “Tubo, a verenio be jau riano, mia kajamo ka kinio bunu neiel mave ea tei neviedu keanso.”

29 Ana Yesu berinavo “Jau, bo ga, komei.”

Ana Pitere batove den uako, naio jikar miel mave ea tei, naio ban vaataro ka Yesu, 30 mia bogo napano naio tinien maio bercio ka jegi napano jikili nei, naio merou. Mia bogo na naio merou jibe na, ana naio jikar

ka madudu, naruei naio bio ban Yesu, berinavo “!Tubo, jau kajai kiniou!”

³¹ Vaarakurano ga Yesu mijiou bokar Pitere jumano, ana naio berkanio, berinavo “? Jumabe ana niukniuku biešo? !Maka leleio koviekar kiniou sikili leleio kija vo!”

³² Mia bogo napano nalo abe juo abavin ea uako bereio, vaarakurano jegi juba bin, ³³ mia nalo napano ajua uako amiaia Yesu, aberenio “Riano ga, jau kobe Atua kenerinio riano.”

Tomu na mieiano nalo ajokol Yesu kiano ikiniono kulumñarauo

Mak 6:53-56

³⁴ Ana Yesu nalo aban ea kialo uako abarkorovio ueiyabo labo nei, aba tivelinio, naruei nalo abauro ea vio tai, siano Kenasarete. ³⁵ Mia bogo napano tomu na vio nei amijikia naio, ana nalo amiila toru janea vio nonovio jeliviv ea vio nei. Ana nalo aburu tomu na mieiano nalo abinimei ea naio, ³⁶ naruei nalo abalea naio ka rijamo ana nalo napano amie atokol ga kiano ikit kulumñarauo. A nalo na atokolio tibe na, mia kialo mieiano nalo ribisi, ana mia nalo avu bereio.

15

Yesu kiano naiagagoano nalo amiakurano ea bajago moruo na kulo Ju nalo kialo
Mak 7:1-13

¹ Ana bogo nene, Varisis nalo tai naliko naverloglogiano na tuboiano nalo tai ajuvan vio Yerusalemo, abinimei ka aial Yesu. ² Nalo abika denio, aberinavo “? Ka vaio ana kanamo naia-gagoano nalo ajumña amiakurano ea bajago moruo na kiado nalotuanio, na kiado navurimñaraboiano nalo na beamu ajumña aberloglog ka kito, aberinavo bogo nonovio ver toro sidom sinan, monokanio naio takii vatitig mñarabo na memedu nene, ka sekon jumano beamu vo, karina mo naio mijikia sinan?”

³ Ana Yesu berdoŝe banlo, berinavo “?Ana kamiu bunu, bior vaio ana kamiu kumisikili ka kumitakii kenemiu bajago moruo nalo nei, mia ea kenemiu bajago moruo kamiu kumituñña kumilakokorov Atua kanano tuboiano? ⁴ Mia Atua nene, naio ber ‘Jau komonmonea karamño a koniomo,’ mia naio ber bunu, berinavo ‘Ver toro tai naio ril rivova ka karamño a kenieno, kamiu kuvuebin naio rimño.’ ⁵ Mia vonganei, verenio toro tai berkar ber kiano saba nalo abe lu, mia naio rivar van Atua bogo tai, naio ber jibe na mia iorou kanio, ana naio maka rijikia rivitikar kiano tormoruo juo nei, ŝeli rijailo ka saba nalo nene, ⁶ ana kamiu kumitu kuber jibe na naio bo ga na, nina maka ve vite tenia. Mia ea bajago na, kamiu kumituñña kumila Atua kiano tuboiano binimei be iakurano, bior kamiu ku-

misidom kuvokar ga kene-
miu bajago moruo nalo. ⁷ !
Mia kamiu kumilasibi ga na,
kamiu kumitunã kumil ku-
rano ga! Naverialiano Aisea
naio berii kamiu nua ruei,
napano naio berial iliano na
Atua naio berenio, napano
ber

⁸ *‘Tomu nalo na amonmonea
kiniou ka kialo iliano
nalo ga,*

*mia kialo jidomiano nalo
aju koalabo den kiniou
kia ga vo.*

⁹ *Mia nalo aju amilotu ban
kiniou kurano ga,*

*bior bogo napano aber-
loglog toro, nalo aber
iliano na, naio be Atua
nene kanano,*

*mia iliano na be nalo ku-
lorinio ga kialo.’ ” Ais
29:13*

*Vite nalo napano mila
toro miagiago ea Atua mi-
rano*

Mak 7:14-23

¹⁰ Naruei Yesu naio bio
tomu nalo ka amei vio taku-
rano ea naio, ana naio
mil banlo, berinavo “Bo ka
kamiu kuviagago vatitigio,
monoka kamiu kuvijoglubar
kanaku iliano. ¹¹ Maka sina-
niano napano ba joomo ea
toro niono, naio mijikia rila
toro riagiago ea Atua mi-
rano, mia iliano nalo napano
mã moluo ea toro niono,
naina naruei napano mila
toro miagiago.”

¹² Ana karina, kiano naia-
gagoano nalo abinimei, aber
kanio, aberinavo “?Ai koig,
jau komijikia ka Varisis nalo

tiniei mimi toru ka iliano
nalo napano jau kojomã
koberenio?”

¹³⁻¹⁴ Ana Yesu berdoþe
ber kalo, berinavo “Kamiu
kuvisidomial re nalo na.
Venia napano nalo ajumã
amilaio, naio maka ve
Atua kiano imãuano na,
mia Teta napano joa vio
mave mia naio rivuru bulag
nonovio vite nalo napano
naio maka rimebijalo. ?
Tomu nalo na abe merebono
ga, mia ajidom avurimãarabo
ka toro dolu napano be
merebono, mia nalo ave juo
aiel tumãbe? ! Mia nalo
ave juo amijikia ajoru ea
bulukuþili tai na!”

¹⁵ Naruei Pitere bika den
Yesu, ber “Koig, jau kobi-
juku bo komijikia koverial
nioti na jamerijiano neibano
jau koberiio jukamu ban
kumemi.”

¹⁶ Mia Yesu berenio
“? Jumãbe, þeli parimiu
merorol bunu kia ga vo?

¹⁷ Pelina kamiu kumijikia
kija ruei, bior vaio napano
ba joomo ea toro niono,
jelea mabono ba tavio den
mokotenano bereio, ¹⁸ mia
vaio napano moluo ea toro
niono, naio moluo ea kiano
iviso jukamu, naruei naio
mijikia mila toro miagiago.

¹⁹ Mia nina bior kiano
jidomiano va nalo amoluo
ea tiniene toro, jibe ka amila
bin toro, amila siakaiano,
a m̃eaku naljuo niatira
amila siakiano, a vinauano,
a ilisibiano, a ilivovaiano.

²⁰ Mia nina be bajago nalo

napano amijikia amila toro miagiago kamu ea Atua mirano. Mia bajago napano ajinan, maka asekun juñalo tukamu, naio maka rijikia rila toro riagiago tibe na.”

Yesu jitiglar niadu tai ea merevono tai

Mak 7:24-30

²¹ Naruei Yesu juvan vio nei, ana naio batove ea bulukomeli juo na vio Taia bija Saiton. ²² Ana tira valauo tai na vio Kenano, naio joa tanobuku na vio nei ruei, ana naio binimei mial Yesu, naio bio banio, berinavo “Tubo, jau kobe Naverikariano napano komiyotuba ea Teviti kiano bajulukuti. Kin-iou neber bo kaso tiniem riia kiniau. Keneriku vivinio, niadu tai ban ea naio, a mila lelan naio jikili laka.” ²³ Naruei Yesu mijog tira nei kiano iliano, mia maka riolu riveriþe titai leleio van tira nei.

Iorou kanio, ana kiano naiagagoano nalo abinime, aber kanio aberinavo “Tubo, tira nei, naio joñña bio lili kito toru laka. Bo ka jau keiila naio rivabilig.”

²⁴ Ana Yesu maka riverdoþelo, mia naio mil ban tira nei, berinavo “Atua miila kiniau nebinime ka navan ea kulo Israel nalo ga, nalo napano ajavukia nunu nalo napano amilaluvu mñarabo.”

²⁵ Mia tira neibano naio binime, minie kamu kean Yesu jaano, ana naio berinavo “Tubo, neber bo kaso nejidom jau kajai kiniau.”

²⁶ Mo Yesu naio berdoþe, ber “Maka rivu ka navar bulag kiritete nalo salo sinaniano, novuku van kuli nalo.” Naio mil jibe na bior naio mijikia ka bogo na, kulo Ju dolu nalo aberiañña nalo ga abe Atua kenerinio nalo, bior ajuñña aberii searo ea tomu nalo napano maka ave kulo Ju, abiolo aber abe kuli ga liki.

²⁷ Mia tira neibano naio mil, berinavo “Jau kober riano, Tubo, mia kuli nalo amijikia asen ga iororoti sinaniano napano jibiribili jel tano ka boru na kuli nalo nei kiano barobaro na sinaniano.”

²⁸ Ana Yesu berdoþe vatitig ban naio naruei, berinavo “Tira, jau kobiekouo ea kiniau koju jikili laka. Mia vonganei jau keialio rime vanso tibe ka napano jau komoneaio.” Mia memedu ka bogo nene, ana tira neibano kenerinio vivinio neibano binime bo bereio.

Yesu milarur tomu na mieiano telabo

Mak 7:31-37

²⁹ Karina, Yesu jumolu den vio na bereio, naio ban bereio ea tanobuku na vio Kalele. Naio joñña miel barlaka, ban vaataro ka ueiyabo na tanobuku nei, naruei naio bavin ea suku tai, naio jotano. ³⁰ Naio jotano jibe na, naruei tiniobi na tomu nalo abinime ka naio, bija javuluku nalo, a nalo napano abe jamñaba kirikokouro, a merebono nalo, a buru nalo, a tomu na mieiano dedade nalo bunu.

Aburulo abinimei, ajuvanlo aju vaataro ka Yesu, naruei Yesu naio milarurlo abo bereio. ³¹ Ana tomu nalo amiilo toru ka bogo napano nalo amial buru nalo amil, jamaba kirikokouro nalo abo, javuluku nalo amiel, a merebono nalo ajirarago, naruei nalo amialio, ana amiaia kulo Israel nalo kialo Atua toru laka biorio.

Yesu bagan sumanalo menu veri [4,000], bija tire nalo a kiritete nalo bunu

Mak 8:1-10

³² Ana Yesu bio kiano naiagagoano nalo ka amei aialio, karina naio berinavo “Kiniou tinieku miia tiniobi na toru nei, bior nalo aju kitoliko bogoti tolu ruei, mia vonganei salo sinaniano nalo biniuviniu. Mia kiniou maka nejikia neiilalo avanvan vonuo ver maka sinaniano, bior ver kiniou nala tibe nei, ħeli mia tomu tai miralo ribobogio ea m̃arabo rivior vitu.”

³³ Naruei Yesu kiano naiagagoano nalo aber kanio, aberinavo “?Mia ravar salo sinaniano ea vio be? Bior vio nei be vio yauo kurano ga, a tiniobi toru laka.”

³⁴ Ana Yesu bika denlo, berinavo “? Kamiu kubar joko vio?”

Ana nalo aberinavo “Joko aluo [7] ga, bija momaio tealo.”

³⁵ Naruei Yesu ber ka tiniobi na toru nei, berinavo “Kamiu kuvitutano beamu vo.”

³⁶ Ana naio bar joko aluo [7] neibano, bija momaio nalo nei, ana naio

ber siva kanio ban Atua, karina naio burekokorovlo, ana bario ban kiano naia-gagoano nalo. Ana kiano naiagagoano nalo kija abario abiovio ka janea tiniobi nalo nei. ³⁷ Naruei nalo ajenio bano-o mia mabolo jouo bo. Mia iorou kanio, ana nalo amison niati sinaniano nalo napano aju, ban ea basaro sarobobotu nalo aluo, abujovujo vatitigio bo. ³⁸ Mia tomu nalo napano ajinan, sumano nalo ga abokar menu veri [4,000], mia maka avuluku tire nalo vija kiritete nalo.

³⁹ Karina Yesu miila dedade ea tiniobi nalo nei abanvan bereio vonuo, mia naio ban bereio ea kialo uako, ana naio juvan vio nei, naio binimei jo bogo bulati ga ea tanobuku na burum̃ara komeli na vio Makatano.

16

Tomu na tortoru tai ajidom aial vremesiano

Mak 8:11-13; Luka 12:54-56

¹ Bogo tai, ana Varisis nalo naliko Satusis nalo abinimei amial Yesu, ajidom ka alavon naio, ana nalo aberinavo “Kumemi numisidom jau kalavon vremesiano na toru tai van kumemi, napano mia jau koim̃aukanio ea moroano na vio mave.”

² Ana Yesu naio berdoĥe banlo, berinavo “Bogo napano m̃erenio jo batove, mia verenio kamiu kumial vio bilvili ea vio na m̃erenio jo batove eaio, ana kamiu

kumijikia kuverenio 'Mia nieta beni,' ³ a bogo napano mñerenio bavin, mia verenio kamiu kumial vio bilvili ana kumial melijo bobogio, ana kumijikia kuverenio 'Mia yuo rivovo banei.' ? Mia kamiu kumijikia kubitii vremesiano na ea tiniabene ruei, ka mia kuverenio mia bogo tumabe, mia jumabe ana kamiu maka kuvijikia kuvitilubar kiaku vremesiano nalo ea burumara bogo toru nei nojo bija kamiu nei?"

⁴ Mia Yesu berii bunu banlo, berinavo "Tomu nalo na ajidom aial ga vremesiano nalo, abe kulo va nalo, nalo namã amila kodovo ban Atua, abilig taakalo ban naio, jibe ka nalo napano amila siakaiano aburo den koualo nalo. Makanio, mia kamiu maka kuvijikia kuvial vremesiano tai, mia kamiu kuvial ga napano mia riyotuba ka kiniou tavukia vremesiano na Naverialiano Jona re nua, napano Atua mila naio meul bereio." Ana naio jumolu denlo juvanlo ajubo.

"Kuvitkar isi na Varisis a Satusis nalo kialo"

Mak 8:14-21

⁵ Mia bogo na Yesu naliko kiano naiagagoano nalo ajumolu abano, ana abarkorov ueiyabo na toru nei aba tivelinio, ana kiano naiagagoano nalo tiniel bobogia ka avarkar salo joko tai. Mia bogo na aboru tivelinio, ⁶ ana Yesu jian

iliano tai banlo, ana naio berinavo "Kamiu kuvitkar vatitig kamiu rivu ka isi na Varisis naliko Satusis nalo kialo."

⁷ Ana nalo amijog iliano nei, mia nalo ajumã aberiio ka nalo bereio, berinavo "? Naio mil jibe na bior maka ravarkar joko tai rimeia ea vio nei koviobo?"

⁸⁻⁹ Mia Yesu mijikia kanalo jidom-iano nalo nene, ana naio ber "? Bior vaio ana kamiu kumitumã kumisidomii mñlea mabomiu nalo, ka mia kito resen venia? ? Jumabe ana maka kuvijoglubar vite nei vo? ! Kenemiu moneano kiritavaso! ? Peli kamiu tiniemiu bobogia bunu joko jumo nanua na, nabar ban tiniobi menu jumo [5,000], bija basaro solokobaro nalo na kumisonlo abujovujo? ¹⁰ ? Peli kamiu tiniemiu bobogia bunu joko aluo nanua na, nabar ban tiniobi menu veri [4,000] nalo, a basaro sarobobotu vio napano kamiu kumisonlo abujovujo iorou kanio? ¹¹ ? Jumabe maka kuvijoglubar ka kiniou maka neil van kamiu ka joko? Mia neber ka kamiu bereio, kuvitkar vatitig isi na Varisis naliko Satusis nalo kanalo."

¹² Mia vonganei nalo amijikia ka naio maka riverii isi na joko miyuku, mia naio jo ber avitkar batitig Varisis naliko Satusis nalo kanalo ilisibiano nalo napano mia averlogloglo kanio, napano

mijikia rila toro parinio tur-
obi ve toru, mijikia riva rila
searo ea nono togio na kiano
meuliano, tavukia napano
isi mila ka joko.

*Pitere berial ber Yesu naio
be Naverikariano memedu*

*Mak 8:27-30; Luka 9:18-
21*

¹³ Naruei Yesu nalo aba-
tove ea tanobuku na bu-
lukomeli na toru nei Sisiria
Vilipai, mia ka bogo na
naio bika den kiano naia-
gagoano nalo, berinavo “?
Kamiu kumijog ka tomu nalo
ajuña aberverii aber Ku-
lorinio Kenerinio naio be
kei?”

¹⁴ Ana nalo aberinavo
“Tomu tealo aber jau kobe
Jone Baruei bereio, a tealo
aber jau kobe Elaija, a tealo
aber jau kobe Jeremaia,
p̃elina naverialiano dolu tai
re nua nua.”

¹⁵ Naruei naio bika denlo,
berinavo “? Ana kamiu,
kamiu na kuber kiniou nebe
kei?”

¹⁶ Ana Saimon Pitere naio
berdope, berinavo “Jau kobe
Naverikariano, jau kobe
Atua na meul kenerinio.”

¹⁷ Ana Yesu berdope banio,
berinavo “Saimon, Jone
kenerinio, mia ilivuiano
rimej vansom. Vite na jau
koberialio, maka kulorinio
riverial kaso, mia Teta
napano joa vio mave, naio
berial banso. ¹⁸ Mo jau na
siamo dolu nene napano
Pitere naio ber jibe nei
ber ‘Veru,’ a be riano laka,
ka kiniou nemialso jibe ka
veru tai napano jo, a mia

kiniou nevitirilar kanaku
taara na lotuano nalo ea
tabapilio tibe na naruei,
mia moroano na m̃ariano
maka rijikia tovulu taara
na. ¹⁹ Mia kiniou nodu
ki nalo na vetavoiano a
na tetavokoiano na nave-
natuboiano na Atua kanano
vanso, ka mia verenio vite
napano jau koverbure ea
yetemeriba nei, mia Atua
na vio mave bunu riverbure
kamiu ve juo, mia verenio
vite napano jau kajamo
kanio ea yetemeriba nei, mia
Atua na vio mave naio bunu
rijamo kanio kamiu ve juo.”

²⁰ Ana na Yesu ber jikili
ban kiano naiagagoano nalo,
berinavo “Mia kamiu kuve-
rial re van tomu nalo ka
kiniou nebe Naverikariano.”

*Yesu berial kiano m̃ariano
Mak 8:31-33; Luka 9:22*

²¹ Mia jikar ea bogo na,
Yesu milavon ka riverial
rimeravo van kiano na-
iagagoano nalo, ka mia
naio monoka rivavin ea
vio Yerusalemo, ana ea vio
na, mia tubo nalo na vio
Israel, a nalo napano abe
parinio kulo lu nalo, a naliko
naverloglogiano na tuboiano
nalo, nalo nei naruei nalo
avinu ala lelan searo ea
naio. Mia Yesu berial banlo
bunu ber mia nalo nei
auetamaria naio rimaro,
mia bogoti ve tolu [3] nene,
ana mia Atua naio rivurular
naio tumolu rimeul bereio.

²² Naruei Pitere biolar
Yesu denlo, ana naio jikar
mil jikili banio, berbureio,
berinavo “Yesu, monoka mia
Atua naio riverbure tena.

Vite nalo na maka rijikia rimaluvo kaso tibe na.”

²³ Mia Yesu barṣilig naio, ana mil jikili ban Pitere, berinavo “!Setano, kotu koalabo den kiniou! Jau kojoma komilavon kiniou ea kanamo jidomiano napano be toro ga kiano, mia maka ve Atua kanano jidomiano leleio.”

Yesu kiano naiagagoano nalo monoka asidom ve iakurano ga ea kialo tinietiiano nalo

Mak 8:34–9:1; Luka 9:22–27

²⁴ Naruei Yesu ber ka kiano naiagagoano nalo, naio berinavo “Toro napano ver jidom rimei tu iorou ka kiniou, monoka naio sidom ve iakurano ga ea kiano tinieiaiano nalo, mia monokanio naio rudu kanano mākolokolo, ana mo naio takisor kiniou. ²⁵ Toro napano jidom rilarur kiano meuliano, mia naio rilaluvuio, mia toro napano rilaluvu kiano meuliano rivior kiniou, mia naio mijikia rivokar meuliano na be riano. ²⁶ Naruei verenio toro tai napano na rivokar saba nalo nonovio na vio yetemeriba nei riviniu, mia naio milaluvu mārabo na meuliano, naio nei maka rijikia rivokar telerinio nabo tai leleio, mia iorou kanio, mia kiano saba novo nalo nei maka rijikia rivulu meran kanano meuliano bereio. ²⁷ Mia vaataro ka Kulorinio Kenerinio

rimei bereio naliko kanano nailiano nalo, mia naio rimei vija karamāno kanano miamoiano, naruei mia naio rivulu tomu nalo rive verare ka kialo imāuano nalo. ²⁸ Riano ga kiniou neber ka kamiū, be tomu tai nalo ajumolu ajua vio na, napano mia nalo maka ajikia añaro vo, rivano-o mia rivokar bogo napano mia aial Kulorinio Kenerinio naio rimaluvo rimei vija kiano navenatuboiāno, ka mia rimei rive tubo ka tomu nonovio.”

17

Yesu niabene binimei be dolu

Mak 9:2-10; Luka 9:28-36

¹ Mia iorou ka bogoti ari [6] barlaka, ana Yesu buru Pitere, a Yemesi, a kuruano Jone, ana nalo veri abavin ea burusuku tai. ² Bogo napano nalo aju jibe na, ana naiagagoano tolu nei amial Yesu niabene binimei be dolu, a mirano binimei merera toru jibe ka mērenio, a māno kulumārāuo nalo abinimei amiuvu novo mia amiuvu nonovio garuei. ³ Naruei nalo tolu nei amial Mosis naio Elaija amaluvo bunu, ana naljuo aju amil naliko Yesu. ⁴ Ana Pitere ber ka Yesu, berinavo “Tubo, ho ka kito rotua ga vio nei. Mia ver kajamo kanio, ana mo noimāuka tobobo ve tolu ea vio nei, tai ve kanamo, tai ve Mosis kanano, a tai ve Elaija kanano.”

⁵ Bogo napano Pitere naio jo mil kia ga vo, ana melijo tai napano merera binimej jovukolo, naruei nalo amijog iliano tai maluvo ea melijo nene, na berinavo “Nina be keneriku napano kiniou nejidom m̃lea na. Kiaku jidomiano joaio na, mia kiniou najaaro m̃lea kanio na. Mia monoka kami kumonmonea vatitig naio.”

⁶ Ana kiano naiagagoano nalo amijog iliano nei, naruei nalo amerou mia amerou, ana nalo amijoru ea tano ana amiduvan miralo.

⁷ Mia Yesu naio binimej ealo, ana naio mijubaluba taakalo abe tolu, ana naio ber kalo, berinavo “Kami kuvitumolu, kami kumerou re.” ⁸ Naruei bogo napano nalo abar bulag pariparilo ajirarag bavin bereio, mia maka bunu aial tomu juo nei, mia Yesu ga takurano ju.

⁹ Tilikiti napano nalo ajuvan burusuku nei, aju abatove bereio, ana Yesu berii kalo berburelo, berinavo “Vite napano Atua mila kami kumialio, mia kami kuverial re ka tomu tai rivano-o rivokar bogo napano Kulorinio Kenerinio rimeul bereio ea m̃ariano, ana ea bogo na naruei, ana mia kami kumijikia kuverial ka tomu nalo.”

Nalo aberii Elaija
Mak 9:11-13

¹⁰ Karina naiagagoano tolu nei abika den Yesu, aberinavo “?Jum̃abe ana naverloglogiano na tuboiano nalo ajum̃a aber jibe nei, aberinavo ‘Monoka mia Elaija naio rimej bereio tukamu vo, avona bisi ana mia Naverikariano nei naio mia riyotuba?’”

¹¹ Ana Yesu berdoḡe banlo, berinavo “Tena ajum̃a aberverii na jibe nei, tena be riano ga na, bior Naverialiano Malakaia naio berenio jibe na ea kanano niosi ruei. Elaija monoka mia naio rimej tukamu, ka mia naio rila batitig vite nalo nonovio atu batitig ka mia Naverikariano nene naio mijikia rimej, ¹² mia kiniou neber ka kami, neberinavo Elaija nene naio binimej ruei, mia tomu nalo maka avitilubar naio, a nalo maka asidomial naio. Mia ea ga bajago nene, mia ala lelan Kulorinio Kenerinio bunu tibe na.”

¹³ Ka bogo nei, kiano naiagagoano tolu nei miralo madulu ana nalo amijikia ka Elaija napano Yesu naio jom̃a beriio, naio be Jone Baruei ga.

Yesu jitiglar niadu ea tete m̃eaku tai

Mak 9:14-29; Luka 9:37-42

¹⁴ Mia Yesu naliko nalo tolu nei aban bereio, naruei nalo amiabure tiniobi nalo napano ajua bogo na, naruei toro tai binimej minie tano ea Yesu jaano, ana naio berinavo ¹⁵ “Koig, jau

kobijuku bo, kiniou nejidom jau tiniem riia keneriku m̃eaku, nejidom kajai naio, bior mieiano tai joa naio. Mieiano nene mila naio jom̃a miabulum̃arm̃aro va telabo, a mila lelan m̃eleia naio-o mia, mila naio jom̃a mijorutate ban ea sebi a ban ea uei nalo bunu. ¹⁶ Mia kiniou noburu naio binime i ban kanamo naiagagoano nalo ruei, amim̃aukanio bano-o, mia maka ajikia aim̃auka naio rivu.”

¹⁷ Ana Yesu naio mil ban kiano naiagagoano nalo, berinavo “?Kam iu na, jum̃abe jibe na? Kam iu maka kuvitu sikili ea Atua leleio, bogo nonovio ga m̃a kumiavovu. ?Mia kiniou monoka noto vija kam iu rivano-o mia rivokar nagi? Mia kiniou tinieku maro ruei ka kam iu. Mo, bo ga, kam iu kuvuru m̃eaku nene rime i van kiniou.”

¹⁸ Ana nalo aburu m̃eaku nene binime i, ana Yesu janka niadu napano joa naio, berinavo “!Komoluo den naio vonganei ga!,” ana vaarakurano ga m̃eaku nei naio binime i bo bereio.

¹⁹ Ana iorou ka bogo nene, bogo napano Yesu jo naio takurano, ana kiano naiagagoano nalo abinime i kean naio, abika denio aberinavo “?Jum̃abe ana kumemi maka nuvijikia nuvititiglar niadu napano joa m̃eaku na?”

²⁰ Ana Yesu ber kalo, berinavo “Nina bior kam iu maka kuviekouo ea kiniou sikili riva re vo. Riano, kiniou neber

ka kam iu, verenio kam iu kuviekouo ea kiniou ve kiritavaso leleio ga tavukia kurukuti burubako, mia verenio kenem iu viekouoiano na rive riano rivu, ana mia kam iu kumijikia kuver ka burum̃ara burusuku na, kuver ‘Kataluvo den vio na,’ mia naio taluvo. Mia maka titai ka mia kam iu kuvijikia re ka kam iu kuvilaio. ²¹ Mia ka natitiglariano na niadu nalo tibe nei, m̃arabo nene jibe nei: toro naio monoka rivolkouo, a naio rimodulu ka sano sinaniano. Ea bajago na ga, mia naio mijikia titiglar niadu ninio nalo na.”

Yesu berial bereio kiano m̃ariano

Mak 9:30-32; Luka 9:43-45

²² Bogo tai ana Yesu naliko kiano naiagagoano nalo abinime i vio takurano ea vio Kalele, ana naio ber kalo, berinavo “Vaataro ka mia adu Kulorinio Kenerinio toa tomu nalo jum̃alo, ²³ ka mia auetam̃aria naio rim̃aro, ana mia iorou kanio, bogoti ve tolu nene, ana mia Atua rila naio rimeul bereio.” Ana kiano naiagagoano nalo amijog iliano nei, nalo amijog bova toru laka.

Puruveru na takis na Atua kunuano lu na vio Yerusalemo

²⁴ Tilikiti napano Yesu naliko kanano naiagagoano nalo abinime i aboru Kape-neam, tomu nalo nam̃a abarbiji takis na Atua Kunuano Lu, nalo abinime i kean Pitere, abika

denio, aberinavo “?Jum̃abe, kanamo naverloglogiano na naio jom̃a bulu takis na bunu, þelina makanio?”

²⁵ Naruei Pitere berdoþe, berinavo “Nao, naio buluio.”

Naruei Pitere ban bereio ea yimo napano Yesu joaio, mia Pitere maka river iliano tai vo, ana Yesu naio mil jukamu banio, bika berinavo “Saimon, jau kosidomii von parinio tubo na yetemeriba nalo. ?Kulo be nalo napano m̃a ajum̃a abulu takis banlo? ?Nalo napano abe m̃aratavo, þelina kulo dolu nalo?”

²⁶ Naruei Pitere berinavo “Tomu dolu nalo ga monoka avuluio.”

Ana Yesu berenio “Nao, jibe na naruei, a nina berenio m̃aratavo nalo na parinio tubo nalo, maka ajikia avuluio. A kiniou naruei, nebe m̃aratavo na Parinio Tubo na Yimo Lu napano memedu, mia kiniou maka nejikia novulu takis na ajum̃a abika denso na.

²⁷ Mia bo ka kito juo rala bulag re tomu nalo na ajum̃a abarbiji takis, mia kito juo bunu rovuluio bo ka ga. Mo, jau kavatove ea ueiyabo, ana kosuvan taþig, mia niado nana mia kovuruio tukamu, mia keial puruveru tai ea niono, na bare ka kiado takis kito juo, mia kodu kava kovulu kanio.”

18

“?Toro kei napano naio jo

mave loa tomu dolu nalo?”

Mak 9:33-37; Luka 9:46-48

¹ Ana memedu ka bogo nene, naiagagoano dolu nalo abinimei memedu ka Yesu, abika denio, aberinavo “Kumemi numisidom nuvijikia: ?Toro kei na mia naio jo mave loa tomu dolu nalo jouro ea Atua kiano navenatuboiano?”

² Ana na Yesu bio kiritete tai ka rimei kean naio, naruei naio mila naio jumolu ju iviso kalo, ana naio ber ³ “Riano, kiniou neber ka kamiu memedu, verenio kamiu kuvilig re kamiu, ka kenemi bajago nalo amei atavukia bajago na kiritete nei kiano, mia kamiu maka lele kuvijikia kumei jouro ea navenatuboiano na Atua kanano bogo tai.

⁴ Mia verenio toro na rila kanano jidomiano totano tavukia kiritete na telisu nei, mia naio mijikia rimei to mave loa, tovulu tomu dolu nalo nam̃a aju jouro ea Atua kiano navenatuboiano.

⁵ Toro na kiano jidomiano rivatove ka kiniou, mia naio saaro ka rive merevu van kiritete nalo na tertelisu na tai jibe na, nina jibe ka ga napano naio jom̃a jaaro ka kiniou.”

Tiboliboiano nalo

Mak 9:42-48; Luka 17:1-2

⁶ Mia Yesu berii bunu, berinavo “Mia verenio toro tai rila kiritete nei tai ka mia naio tuvan kiniou, riviekouo ea re bunu kiniou, mia toro nene naio rivokar vironiano na jikili laka tai. Verenio

aiorikar puruveru na toru tai ea burujono, ana avukuio rivatove rimadudu ea bulu niogovu, nina naio be vironiano tai na monmaio ga, mia toro na naio rivokar rivan lie vo tovulu ninei. ⁷ !Banalo! Yetemeriba nei naio bova nonovio ruei, naio bujo ka saba nalo na ajumã amila lili tomu nalo ka mia mña nalo alaluvu kialo viekouoiano ea kiniou. Mia tiboliboiano nalo na mia atu iviso ka kamiu bogo nonovio, mia rivova laka van tomu nalo na abar tibol boiano va nalo na jibe na amei van kulo dolu nalo.

⁸⁻⁹ “A verenio jumãmo, ðelina jaamo, ðelina miramo, ðelina vite dolu venia bunu ea kiamo meuliano, verenio vite nalo nene tai rilaso koviekouo ea re bunu kiniou, bo ka jau ketelar vite nene denso, ana kovukuio rivano. A verenio jau ketelar bajago na kariano den kiamo meuliano tibe na, mia jau komijikia kava jouro ea meuliano, a verenio jau kava jouro ea meuliano napano jumãmo, ðelina jaamo, ðelina miramo, ðelina vite dolu venia bunu ea kiamo meuliano, verenio vite nalo nene tai rivakovio denso ruei, nina bo ga na. Mia bova laka ka verenio taniabemo momou vija kiamo bajago va momou atu rivu ga easo, mia karina avukuso kavan ea sebi na maka rijikia rivatove bogo tai ea vio na jogvaiano.”

Jamerijiano na nunu napano milaluvu m̃arabo

Luka 15:3-7

¹⁰ Ana Yesu berii bunu, berinavo “Kamiu monokanio kuvitkar batitig kamiu rivu ka mia kamiu kuviakurano re ea kanaku kiritete nalo nei tai bogo tai. A ver makanio, ana mia kamiu kuvitkar kamiu, bior tete nalo nei abe kanaku, ana nalo abe kanalo nailiano nalo napano ajua vio mave, napano ajumã abitkar batitiglo, a nailiano nalo nene, naloaju bogo nonovio ea Teta na joa vio mave mirano. ¹¹ Naruei Kulorinio Kenerinio, kiano imãauano jibe na ga: naio binimei ka rilarur nalo na amilaluvu m̃arabo.

¹² “Kamiu kuviagago batitig ka tukunuano nei: Be toro tai napano be kiano nunu toromomou [100], mia nalo tai mila pariparinio ba koalabo, ana naio milaluvu m̃arabo. ? Mia toro nei naio rila tumãbe naruei? Monokanio naio tuvan kiano nunu duelimo va koveri ba koveri [99] nalo nei, atu asinan ea vio na soro bo eaio, ana mia naio monokanio riva rila von ka sirag napano milaluvu m̃arabo a ba kovio tai. ¹³ Riano ga kiniou neber ka kamiu, bogo napano naio mileal bereio nunu nene, mia naio mijikia saaro m̃ele kanio, tovulu napano naio jaaro ka kanano nunu dolu nalo napano telaboaju bo ga, maka avarlaka m̃ele ka mia ava kovio tai.

14 “Mia karamemiu na vio mave, naio bunu jibe na, naio maka sidom ka kiritete nalo nei tai rilaluvu marabo riva kovio.”

*Ver kuruamo tai rila le-
leanso*

Luka 17:3

15 Ana Yesu berii bunu, berinavo “Avena kuruamo rila vite rimemedu re vanso, monoka jau kava keial naio, kam ve juo ga kuvitu, ana jau koverial kiano vijuku vovaiano nene ka naio. Avena naio saaro ka rijog kanamo iliano nalo, nina jibe ka kanamo iliano nalo amila merevuiano ban kamjuo bereio ruei. 16 Mia ver naio maka sidom ka riagago ka kanamo iliano nalo, monokanio jau kava kovuru bereio tomu dolo tai amei vijaso, ka aijaso ka kanamo iliano, tavukia napano Niosi Lu berenio, berinavo ‘Iliano nonovio monoka ve ilitusoliano na tomu ve juo pelina ve tolu, ka mia iliano nei tu sikili tu.’ 17 Mia ver kuruamo neibano naio to riilkue ka riagago vatitig rivu kaso, mia monokanio jau koverial kanano siniabu van taara na namoneano nalo, ka nalo tealó amijikia amei aial naio. Mia ver naio jikili kia ga vo, ka naio riagago vatitig re ka nalo bunu, mia kamiú kuvial naio tibe ka valauo ga tai, pelina naio tibe ka tomu nalo napano ajumña abarbijii takis, maka tomu nalo ala bilbilu nalikolo leleio.”

*Volkouano napano tomu
marati juolar ga abirakarło
eaio*

18 Ana Yesu berii bunu, berinavo “Riano, kiniou neberii ka kamiú, mia verenio vite napano kamiú kuverbure ea yetemeriba nei, mia Atua na mave naio riverbureio bunu vija kamiú, mia verenio vite na kamiú kuvijamo ka ea yetemeriba nei, mia Atua na mave naio rijamo kanio bunu kamliko. 19 A bereio, kiniou neber bunu ka kamiú, neber verenio tomu ve juo ea kamiú, naljuo ala ilivirakariano tai ea yetemeriba nei ka titai, ana verenio nalo abolkouo riviorio, mia Karamaku na mave mia naio rila tenene vanlo. 20 Bior ver tomu ve juo pelina ve tolu avior vio takurano ea siaku, mia kiniou bunu noto iviso kalo.”

*Jamerijiano na bajago na
viekokoano*

Luka 17:3-4

21 Naruei Pitere binimeí mial Yesu, ana bika denio, berinavo “? Tubo, verenio kuruaku rila rivova van kin-iou bogo nonovio, mia kin-iou neviekokoa naio ve va vio? ? Monokanio riya rivokar ve va aluo, pelina jumabe?”

22 Mia Yesu berdope banio, berinavo “Makanio, mia jau koviekokoa re naio rivokar ve va aluo ga, mia monokanio jau koviekokoa naio rivokar duelimo va aluo va aluo bereio [70 va 7]. 23 Bajago

na viekokoano jouro ea Atua kiano navenatuboiano, naio monokanio tibe ga na.

Kamiu kuviagago ka tukunuano tai napano berii bajago na viekokoano napano berenio, berinavo: Parinio tubo tai, na naio jidom rivitii veve jabue nalo napano kiano tomu na iñauano nalo amila jua naio. ²⁴ Mia naio mila jibe na bano-o, na aburu kiano toro na iñauano tai binimej ea naio, napano toro nei mila jabue na veru taamñaka [1,000,000] vio ea kiano toro na toru nei. ²⁵ Bogo napano abika veru den toro nei, ana naio berenio maka rijikia rivulu meran bereio jabue nene. Ana na toro na toru nei, naio ber ka kiano tomu nalo, berinavo 'Mo, bo kanio kamiu kuvilalar naio, a kuñiliñili lario, ka naio ve toro na toru dolu kanano, naio riva riñau kurano ga ea naio. A añiliñililar ka koano bunu, naliko kenerinio nalo, vija kialo saba nonovio, mo kuvar puruveru nene rimej ka avulu bulag ka kiano jabue nene togio.'

²⁶ "Naruei na toro nei naio mijoru kamu ea kiano parinio tubo nei jaano, ana naio jegi jouo banio, berinavo 'Jau kobe parinio tubo, koig, mia kiniou nabaleaso ka nejidom kodu bogo ve telisu bereio van kiniou beamu vo, ka mia nala von ka navulu nonovio jabue nei denso.' ²⁷ Naruei parinio tubo nei tinienmiia

toro nei, ana naio biekokoa nonovio kanano jabue nei, ka mia naio rivulu kean re bunu, ana naio juvan toro nene bano.

²⁸ "Mia bogo napano toro nene naio bano, ana naio mial kiano bilbilu tai, napano bilbilu nene naio kiano jabue tai telisu ga jua naio. Mia naio ba bokar toro dolu nei, ana naio mikiti burujono, naio berkanio, berinavo 'Monokanio jau kovulu bulag kanamo jabue na jua kiniou vonganei.' ²⁹ Naruei kiano bilbilu nei naio mijoru ea jaano, naio mila mirano melumu kanio, jegi banio, berinavo 'Koig, mia kiniou nabaleaso ka nejidom kodu bogo ve telisu bereio van kiniou beamu vo, ka mia nemijikia ka novulu nonovio jabue nei denso.' ³⁰ Mia toro nei naio maka sidom riviekokoa kiano bilbilu neibano, naruei naio ba mila aburu naio ban ea nalakioiano, ka naio to rivano-o mia naio rivulu bulag nonovio jabue nei, karina naio mijikia taluvo bereio.

³¹ "Mia bogo na parinio tubo nei kiano tomu teal amial bajago nei, nalo amijog bova toru kanio, ana na nalo aban ea kialo parinio tubo nei, aberial saba nalo nonovio ban naio. ³² Ana parinio tubo nene, naio bio kiano toro neibano ka naio rimej bereio ea naio, ana naio mil jikili banio, berkanio, berinavo '! Aa, jau kobe toro va kitkiti tai! Kiniou nebiekokoa nonovio kanamo buruñara jabue

nanua ruei, bior kejegi toru ban kiniou kanio, ana mila kiniou tinieku miiaso kanio.³³ ? Mia jumabe ana maka kejikia tiniem riia bunu kiamo bilbilu dolu, tibe ka napano kiniou tinieku miiaso jukamu ruei?"³⁴ Ana parinio tubo nene naio tinien mimi lie vo, ana naio berinavo monokanio avuku naio riva toa nalakoiano, a monokanio nalo atu avar vironiano vanio-o, rivokar bogo na naio rivulu bulag nonovio kanano jabue nene."

³⁵ Ana Yesu naio berinavo "A verenio kami u ku-viekokoa re kuruemiu nalo tulaka ve riano, ea iviso na tiniemiu momou nalo, mia karamaku na mave naio tinien ser kami u tibe na, mia naio sian vironiano tibe ga na van kami u."

19

Yesu berii jumabe ana toro mila titig koano

Mak 10:1-12

¹ Bogo na Yesu berenio iliano nalo nei bisi, ana naio juvan vio Kalele naio bavin tivelinio ea tanobuku na vio Yutea, ea marauei na Yortano tivelinio bano. ² Ana tiniobi toru ajakisorio ka bogo na, mia ea vio na naio mila batitig tomu na mieiano nalo telabo abo bereio.

³ Mia Varisis nalo tai bunu ajua vio na, nalo abinimei amial Yesu ka ajidom ala von naio bereio, ana abika vikadeniano tai denio, aberinavo "Kiado tuboiano berii vaio tivelinio ka bajago na

toro mijikia titiglar koano? ? Memedu ga ka toro mijikia rila tibe na kar vite ninio ga, pelina mijikia rila kar ga vite na tortoru ga tai?"

⁴ Ana Yesu berdoŝelo, berinavo "Peli kami u maka kuvi-jikia Atua kiano Iliano Lu na naio berenio, berinavo

'Tikariano, Atua naio jii vite nonovio, a naio jii bunu kulorinio juo, napano tinene be suŝano a tinene be tira.'

⁵ Tena kami u kumijikia ruei, bija bunu iliano dolu na napano berinavo

'Tibe na, toro tai rivuro den karamano naio kenieno, riva rivijurukar koano, mia naljuo ave takurano.' Jen 2:24

⁶ Nina mila ana maka bunu ave juo, mia nalo abinimei abe takurano ga. Naruei vite napano Atua naio birokario, maka rivu ka kulorinio rilakorovio bereio."

⁷ Ana Varisis nalo nei amijog iliano nei, ana nalo abika den Yesu bereio, aberinavo "?Bo ga, ana jumabe na Mosis naio berial tuboiano na jamoiano ka mia toro mijikia rudu mŝesi na silubariano tai rije van koano, ka mia naio mijikia titiglar naio rivano?"

⁸ Ana Yesu berdoŝelo, berinavo "Ee, ana mia beamu ka bogo na tiiano na yetemeriba naio maka tibe na, mia bior kami u pariparimiu nalo binimei kirisikili laka, tenene na mila ana Mosis mijamo kanio jikar ea korobimiu

nalo binimej, ka kamiu kumijikia kuvila titiglar kouemiu nalo tibe na. ⁹ Mia vonganei, kiniou neberii ka kamiu, ka verenio toro tai, koano naio rila siakaiano, mia toro nene mijikia rila titig koano nene. Mia verenio tira nene naio maka rila siakaiano, mia kiano sumano nene naio titiglaro, ana naio riva rivuru tira dolu, ver tibe na, Atua naio mial jibe ka toro nene naio mila siakaiano bija tira dolu nene ruei, naio milakiki tira nei napano be koano jukamu.”

¹⁰ Ana Yesu kiano naiagagoano nalo aber ka naio, aberinavo “Ver bajago na soriano jikili laka jibe na, bo laka ka kito rala re bunu soriano ka kito.”

¹¹⁻¹² Mia Yesu ber kalo, naio berinavo “Nao, be riano ka napano be tomu tealo napano mia asoro re bogo tai, jibe ka napano tealo amiyotuba mia niabele nalo abova, pelina tealo napano amila bulag niabele nalo, jibe ka napano ajivivi nalo, naruei nalo maka ajikia asoro. Mia tomu tealo maka asoro bior ka napano nalo ajuvan soriano ga ka aminau jikili ka Atua kiano navenatuboiano. Mia Iliano Lu naio berinavo bo kanio sumano a tira, ave juo asoro, a bo ka nalo ve juo atu rivu vija naljuo rivokar jukuti na kialo meuliano nalo ve juo. Mia jau napano jau kajaaro ka iliano nei, a napano jau

komial ka napano Atua naio mila jibe na banso ruei, mia bo ka kovokar sikili iliano na ea kiamo meuliano.”

Yesu milivu ka kiritete nalo

Mak 10:13-16; Luka 18:15-17

¹³ Naruei nalo tai aburu kenerilo nalo abinimej ea Yesu, ka naio rudu jumano toalo, a ka rivolkouo kalo. Mia kiano naiagagoano nalo amialio, ana nalo amel jikili ban tomu nalo nei, aberburelo, ¹⁴ ana Yesu berii kalo, berinavo “Kamiu kuverbure re kiritete nalo nei, kamiu kuvituvanlo amei ea kiniou, bior kiritete nalo na nalo ajavukia nalo napano aju jouro ea navenatuboiano na Atua kiano.”

¹⁵ Ana naio midu jumano joa kiritete nalo nei, iorou kanio, ana naio miel bano.

Toro meaku tai napano naio be sanibaiano

Mak 10:17-22; Luka 18:18-23

¹⁶ Ka bogoti dolu tai, meaku tai binimej mial Yesu, ana naio bika denio, berinavo “?Naverloglogiano, mja monokanio kiniou nala imauano novo na vabe, ka napano mia rila kiniou nemijikia nejev meuliano na jo jobo jo?”

¹⁷ Ana Yesu berkanio, berinavo “?Jumabe ana kobika den kiniou jibe na, ka never imauano na bo tai vanso? Atua ga takurano naio bo, a verenio jau komonmonea kiano tuboiano nalo, ana

mia jau komijikia kejev meuliano na bo nene.”

¹⁸ Ana na mēaku nei naio bika denio bereio, berinavo “? Ana jau kjoŋa koberii tuboiano nalo na vabe na?”

Naruei Yesu berii kanio, berinavo “Tuboiano nalo nene nei naruei, napano aberinavo: jau kouebin re toro, jau kesiaka re siakiano, jau kovina re, ¹⁹ jau kala sibi re, jau kotovon karamāmo naio koniomo, mia kosidom tomu nalo napano aju vaataro kaso, jau kovitkar vatitiglo, tibe kanio napano jau kobitkarso.”

²⁰ Ana mēaku nei naio ber ka Yesu, berinavo “Tuboiano nalo napano jau kjoŋa koberenio na, kiniou nojōŋa nobokario nonovio ruei. ? Mia vite venia bereio napano naio jo kiano vo, napano kiniou maka nalaio vo?”

²¹ Ana na Yesu berdoŋe banio, berinavo “Verenio jau kosidom ka komei komemedu rivu batitigio, rivare ka meuliano na jo jobo jo, mia jau kala tibe nei: jau kavano, koŋiliŋili bulagio ka kanamo saba nalo nonovio riviniu, ana mo jau kavaru puruveru nene, kava kovioa ka talimasa nalo. Verenio jau kala tibe na, mia ve kanamo togogo novo ve toru ea vio mave. Mo, jau, kava kalaiio, karina jau komei katakisor kiniou.”

²² Mia bogo napano mēaku nei naio mijog iliano nei, mia kiano iviso mijog bova toru, kiano jidomiano temi, bior naio kiano saba toru

laka. Ana naio jaluvo den Yesu.

Toro na be sanibaiano, kirisikili kija ka naio riva jouro ea navenatuboiano na Atua kanano

Mak 10:23-31; Luka 18:24-30

²³ Naruei Yesu ber ka kiano naiaga-goano nalo, berinavo “Riano, kiniou neber ka kamiū, verenio toro tai na kiano saba toru, mia naio sidom riva jouro ea navenatuboiano na Atua kiano, mia vite nene naio kirisikili kija na.

²⁴ Nao, kiniou neber ka kamiū, verenio kamele tai naio riovo dulu ea bulu mirano nitil, nina kirisikili kija, mia verenio toro tai napano kiano saba toru, naio jidom ka riva jouro ea navenatuboiano na Atua kiano, nina kirisikili laka lie vo.”

²⁵ Mo bogo napano naia-gagoano nalo amijog iliano nei, nalo amiilo toru kanio, ana nalo aberinavo “? Tomnei, verenio tibe na, ana mia kei naio mijikia rijev meuliano nei?”

²⁶ Mia Yesu jirarag bitikarlo, ana naio berinavo “Nao, riano ka kulorinio maka rijikia rila kulorinio rijev meuliano nei, mia Atua ga naio mijikia rila vite nalo nonovio.”

²⁷ Naruei Pitere berdoŋe, berinavo “? Mia juŋabe ka kumemi? Kumemi numituvan kenememi saba nalo nonovio ruei, ana kumemi nubinimei ka nuvitakisorso. ? Mia kumemi nuvijev kija

vite nalo na abo tai, ðelina makanio?”

²⁸ Ana Yesu ber kalo, berinavo “Riano ga kiniou neber ka kami, bogo napano verenio Kulorinio Kenerinio totano ea kiano burumara jobaro lu ea yetemeriba vou nene napano mia rimei, kami napano kami kumituma kumitakisori kiniou vonganai, mia kami kuvitutano ea burumara jobaro duelimo vaarakurano ba juo [12] ka kuve boru ka bajulukuti duelimo vaarakurano ba juo [12] na Israel, tibe ka kialo parinio tubo nalo.

²⁹ Mia toro na verenio tuvan kunuano, ðeli kuruano ðelina kuvivinieno, ðelina karamano ðelina kenieno, ðelina kenerinio, ðelina kiano borotano, mia verenio naio tuvan vite nalo nei rivior kiniou ga, mia naio mijikia rivar meran bereio ea yetemeriba nei, vite nalo napano juvanlo ruei, riva rivokar ve va duelimo toromomou, mia mave ka mia naio rijev meuliano na jo jobo jo.

³⁰ “Mia tomu nalo telabo na aju mave, mia nalo atu tano, a tomu nalo na ajutano, mia nalo atu mave.”

20

Jamerijiano na tomu na imauano nalo

¹ Ana Yesu naio jo mil dolu ka ga bano, ana naio berinavo “Vite na kiniou neber

vonganai, naio jibe ka bagago na Atua joma mila ban tomu nalo na aju jouro ea kiano navenatuboiano. Mia kiniou never vite nei van kami ea jamerijiano tai, napano jibe ka: Toro na toru tai, napano naio be boru ka jiotilikrevi na toru tai. Mia kavijo tai, viomijeni mermeravo vonga, ana naio ban ea markomeli tai ka naio rivuru tomu tai ka ava aimau ea kanano jiotilikrevi ka legiano nei. ² Naio mial tai, ana naio berkar banlo ka puruveru tai na naio bare ka imauano na legiano vodolu tai, ana naio mial bulaglo ka ava aimau ea kiano jiotilikrevi nei. ³ Mia ka merenio kover, ana naio ban bereio ea markomeli nei, ana naio mial tomu nalo dolu bereio, aju kurano ga, maka ve kialo imauano, ⁴ naruei naio ber kalo, berinavo ‘Bo ka kami bunu kumei kuvimau kija ea kanaku jiotilikrevi, mia kiniou novulu kami rimemedu ga.’

⁵ “Naruei nalo nei aba amimau, ana iorou ka bereio, napano leri, a ea merenio tolu kiev bunu, toro na toru nei naio ba buru tom tai ka aimau kanano tibe na. ⁶ Mia bogo tai bereio, ka merenio jumo kiev ruei, ana naio ban bereio ea markomeli nei, ana naio mial tomu tai aju kurano ga ea vio nei kia ga vo, naruei naio ber kalo, berinavo ‘? Ka venia ana kami kumitu kumilakule legiano momou nei ea vio

na, maka kuvimāu tai?

⁷ “Naruei nalo nei aberdoŕe, aberinavo ‘Ana maka toro tai rimei rivio kumemi ka nuva nuvimāu kanano tai.’

“Naruei toro na toru nei naio ber kalo, berinavo ‘Mo bo ga, ver tibe na kiniou novuru kamiu bunu. Kamiu, kumei kuvimāu kanaku.’

⁸ “Mia kijev laka, ana toro na toru nei naio ber ka kiano boru na imāuano, berinavo ‘Mo bo ga, jau kovio tomu na imāuano nalo na amei, ana mo jau kovululo. Mia jau kala tibe nei: ketikar ea nalo na ajikar amimāu iorou, rivano-o rivokar nalo na abinimei ajikar amimāu jukamu kavijo.’ ⁹ Mia bogo na nalo na ajikar amimāuka mērenio jumo abinimei, ana toro na naio bululo bare ka legiano takurano momou na imāuano. ¹⁰ Mia bogo na nalo napano amimāu jukamu abinimei ka avar kialo puruveru, aberiamā mia nalo avar rivavin tovulu nalo napano amimāu ka bogo bulati ga, mia boru nei bar kialo vuluano banlo beberare ga.

¹¹ “Mia bogo na nalo amial kialo puruveru jibe ga na, mia nalo aju abar lele kuluniolo, aju amil muñi die toro na toru nei.

¹² Ana nalo amiila nalo tai ba bika denio, berinavo ‘Nalo napano abinimei vonganei, amimāu ka aura takurano ga, mia kumemi numimāuka legiano momou ea burutinianio nei. Mia

kumemi numialio kobululo be verare ga ka kobulu kumemi. ?Vite na jumābe na?”

¹³ “Mia toro na toru nei naio berdoŕe banio, naio ber ‘Koig, kiniou maka nala lelanso. Kito juo robirokar jukamu ruei, roberenio mia jau koiimāu legiano momou ve takurano nei, mia kiniou novuluso rimemedu kanio. ¹⁴ Mo verenio tibe na, ana bo ka kodu puruveru na be kanamo ana kava vonuo ga. Nina be kiaku jidomiano tai jibe na naruei, ka puruveru na nemijev banso, kiniou nejidom nejev van nalo na abinimei maaro bunu tibe na. ¹⁵ ?Jau koberiamā mia kiniou maka nejikia nala tibe ka napano kiniou nejidom ka kanaku puruveru? ?Jumābe ana jau komijoku ka tomu nalo na kiniou tinieku miialo?” Ana jamerijiano nene maaro ea vio na.”

¹⁶ Ka Yesu rila nonovio kiano iliano nalo nei, naio berinavo “Ana tomu nalo napano nalo iorou, mia nalo atu kamu, a nalo napano aju kamu, mia nalo iorou.”

Yesu berial kiano m̃ariano varolu naruei

Mak 10:32-34; Luka 18:31-34

¹⁷ Ana Yesu naio jo bavin ea vio Yerusalemo naruei, ana bogo napano nalo aju amiel ea m̃arabo ka abano, ana naio bio kiano naiagagoano duelimo ba juo [12] nalo abinimei ea naio, naruei naio mil banlo,

berinavo ¹⁸ “Kamiau kuvia-gago vatitigio. Vonganei, kito roju rabavin ea vio Yerusalemo, ka mia vesiou re ga, ana adu Kulorinio Kenerinio toa parinio kulo lu nalo jumalo, a tomu na verloglogiano na tuboiano, ka mia atibure naio ka mia aver naio monoka rimaro. ¹⁹ Karina mia adu naio toa kulo Romo nalo jumalo, ka mia ayotel va ea naio, avitiv naio, mia atukukakar naio ea makolkolo ka mia naio rimaro. Mia bogo napano naio rimaro ribisi, bogoti ve tolu nene, ana mia Atua rila naio rimeul bereio.”

Yemesi naio Jone keniele bika titai den Yesu

Mak 10:35-40

²⁰ Naruei Sepeti koano, naio buru kenerilo abe juo Yemesi naio Jone, abinimei ea Yesu. Naio minie yetano kamu ka Yesu jaano, naio bika denio, berinavo “Kiniou nejidom kajamo ka titai van kiniou.”

²¹ Mia Yesu berdoŝe ban naio, bika denio “?Jau kojidom kovika vaio?”

Mia tira nei naio berinavo “Kiniou nejidom verenio bogo na mia jau kovitirilar kanamo navenatuboiano, mia kenerimemi juo nei amijikia atutano vijaso ea kanamo vio lu na jo mave laka, ka mia tinene totano tivelinio vameruo, a tinene totano tivelinio mal.”

²² Mia Yesu berdoŝe banlo, berinavo “Kamiau maka kuvijikia tena mia kuvituma

kuvikanio na. ?Jumabe, kamjuo kuber kubare ga ka romunu bitiran ea baja na jaleleano na mia kiniou monokanio nomunu eaio?”

Ana naljuo nei aberinavo “Ee, kumemi juo nubare.”

²³ Mia Yesu naio berii ka tomu juo nei, berinavo “Mm, be riano ka kamjuo bunu kumunu ea kanaku baja na jaleleiano nene, mia tena kamjuo kubikanio na, ka mia kamiau kuvitutano rivija kiniou ea jumaku ve juo, nina maka ve kanaku ka mia nesian van kamjuo. Vio nalo na jibe na, abe nalo na ga karamaku mila batitig ruei ajurorealo, kanio napano naio berkar ruei banlo berii mia nalo atutano eaio.”

Kulorinio Kenerinio binimej ka rimau tomu nalo kanalo

Mak 10:41-45

²⁴ Bogo napano naia-gagoano duelimo [10] dolu nene amijog vite na, mia nalo tiniel jer kurualo juo [2] nei. ²⁵ Naruei Yesu biolo ka amei ea naio ka naio ril vanlo, naruei naio berinavo “Kito romijikia ruei bajago na tomu nalo napano maka amonea Atua. Kito romial tubo nalo bija tomu na tortoru na yetemeriba nei, nalo ajidom avututua kulo dolu nalo ka atutano kalo tulaka ga. ²⁶⁻²⁷ Mia kamiau kiaku naiagagoano nalo, kenemiu bajago tibe na re. Verenio kamiau tai sidom ka naio rimei ve toro na toru pelina naio rive

kenemiu navurim̃araboiano, mia m̃arabo nene jibe nei: monokanio toro nene naio rimei tibe ka toro na rim̃au kenemiu tai. ²⁸ Kulorinio Kenerinio naio mila jibe naruei, ka naio maka rimei ka mia tomu nalo ala im̃auano na ka mia aija naio, mia naio binime i ka rila im̃auano na ka mia naio rijailo, a kanio rijamo ka kiano meuliano ka rivulu bulag tomu nalo ve telabo.”

Yesu milarur merebono juo

Mak 10:46-52; Luka 18:35-43

²⁹ Ka bogo nene Yesu naliko kiano naiagagoano nalo aju Jeriko, mia bogo napano nalo ajaluvo den komeli na, mia tomu nalo telabo laka ajakigsorlo. ³⁰ Naruei merebono juo, napano nalo ajutano ea iki m̃arabo. Mia bogo

napano naljuo amijog ka tomu nalo aju amiolu juva aberinavo Yesu jo miel ea m̃arabo binime i, ana na naljuo abio jouo, aberinavo “!Tubo o, jau Teviti kiano bajulukuti, kumemi juo numisidomso tiniem riia kumemi!”

³¹ Naruei tomu nalo amel jikili banlo, aberinavo “Kuvetuba re, tomjuo.”

Mia tomjuo nei abio dolu ka ga, nalo abio jouo mave aberinavo “!Tubo, jau Teviti kiano bajulukuti, tiniemriia kumemi juo!”

³² Ana na Yesu naio jikil ju m̃arabo, ana naio bio tomjuo nei, naio ber kalo, berinavo “?Tomjuo, kami kumisidom

ka kiniou nala tum̃abe ka kamjuo?”

³³ Ana naljuo nei aber kanio, aberinavo “Tubo, jau kobijuku bo, kumemi juo numisidom ka mirememi rivu, ka mia nuvijikia ka nuvisir-arago.”

³⁴ Ana na Yesu tinien mialo, ana naio jokol tomu juo nei miralo, vaarakurano nalo amial vite nalo ea bogo nei, ana nalo ajumolu ajakisor Yesu abano.

21

Yesu binime i boru Yerusalemo

Mak 11:1-11; Luka 19:28-40; Jone 12:12-19

¹ Vonganei, Yesu nalo aju abinime i vaataro ka Yerusalemo naruei, mia beamu kanio nalo amaluvo ea m̃arkomeli tai, siano Petevas, napano naio joa suku na aberii Suku Na Buruolivi. Naruei Yesu miila kiano naiagagoano naljuo nei, berinavo ² “Kamii kuvan ea m̃arkomeli yako, mia verenio bogo na kamii kuva jouro eaio, mia kamii kuvial togki tai amiadikario ju, naio ju bija kirikiti. Ana kamii kuvijubar lario, ana kuvurulo amei van kiniou ea vio nei. ³ Avena verenio toro tai ril van kamii kanio, mia kamii kumijikia kuverii kanio, kuverenio ‘Kiado tubo naio jidom temeul juo nei ka ala kiano im̃auano tai’ ana bogo napano kamii kuver iliano nei, mia ve vaarakurano ga naio mijikia tuvan temeul juo nene van kamii.”

4 Tena miyotuba jibe na ka rila iliano na naverialiano naio beriiio nua ruei rimeĩ rive riano, napano naio berenio, berinavo

5 “Kamiiu kuvio ka kulo Saion nalo, kuverinavo ‘Kuvialio, vonganei kene-miu parinio tubo naio jo binimeĩ ea kamiiu.

Naio be toro tai napano kiano jidomiano melumu batove ga, mila naio midu togki ga, togki tai napano telisu ga, napano naio be tete kia ga vo.’” Sek 9:9

6 Naruei kiano naia-gagoano juo nei abano, amila jibe ka napano Yesu berenio. 7 Ana bogo napano naljuo aburu togki nei bija kirikiti abinimeĩ, naruei nalo abisi kanalo kulukoti ea togki juo nei taakalo, mia Yesu naio ba jotano mave ea na telisu nene. 8 Mia tomu nalo telabo abisi kanalo kulukoti nalo ea m̃arabo labo, a nalo tealó aje kokorov m̃am̃ali abar abinimeĩ abue ka Yesu kiano togki mijikia riel ealo. Tibe na, jibe ka nalo amila ka nalo avatove ka Yesu, tibe kanio naio be parinio tubo na toru tai. 9 Ana nalo aju amiel ka ava jouro ea vio Yerusalemo, ana tiniobi toru aju kamu ka Yesu bija nalo na ajakisor naio, nalo aju abiovio jouo jibe nei, aberinavo

Aiou bo mia bo laka

“! Kito ravamenea naio napano be Teviti kiano bajulukuti nei!

Atua Soĩi, jau keilivu ka ninei napano naio binimeĩ ea siamo.

Kamiiu napano ea mave laka, kamiiu bunu kuvilivu ka naio.” Iouano 118:26

10 Mia bogo na Yesu naio ba jouro ea vio Yerusalemo, ana tomu nalo tinielo mudulo, amila iliano telabo, nalo aju abivika denlo aberinavo “?Toro na naio be kei?”

11 Mia nalo napano abinimeĩ bija Yesu aberdoĩelo jibe nei, aberinavo “Nina naio be naverialiano napano naio maluvo ea m̃arkomeli na Nasarete ea vio Kalele, na naio siano Yesu.”

Yesu mijil bulag tomu nalo na ajum̃a aĩilivili ka saba nalo ea Atua kunuano lu

Mak 11:15-19; Luka 19:45-48; Jone 2:13-22

12 Ana na Yesu bavin ea Atua kunuano Lu, ana bogo nene naio mial ka be tomu telabo napano ajua m̃arsupiki na yimo nene. Nalo na ajum̃a amila im̃auano na avuru veru, nina ea tivelinio ea ijaiano a sida nalo na ea Yimo Lu nei, mia nalo ajum̃a amijukubin tomu nalo toru. Mia bogo na Yesu mial vite nei, naruei naio maka saaro ka leleio. Naruei naio ba mijil bulaglo, a naio javu bulag kialo barobaro nalo napano ajum̃a abar berevereĩ ka puruveru eaio,

a naio buku bulag kanalo iesi nalo naña aṗiliṽili ka sibo. ¹³ Naruei naio berii kalo, berinavo “Atua naio berenio ea kiano Iliano Lu, naio berinavo ‘Mia averenio Kunuaku Lu naio ve yimo na volkouano,’ mia kamiu kubilig lario ruei binimeĩ be buluvae na tomu na vinauano nalo.”

¹⁴ Naruei bogo na Yesu naio joa kia ga Atua Kunuano Lu nei vo, ana tomu na miralo bono a tomu na jaalo be kiri kokouro a javuluku milalo nalo abinimeĩ ea Yesu, naruei naio milalo abo bereio. ¹⁵ Mia tomu na tortoru na kulo lu nalo kialo, naliko naverloglogiano na tuboiano nalo, amial Yesu kiano iṁauano novo nalo nei, a amijog bunu kiritete nalo ajuña abiovio kia ga vo, aberinavo “!Bo mia bo! ! Kito ravamenea naio napano be Teviti kiano bajulukuti tanie!,” naruei tomu nalo na tortoru nei tiniel mimi toru. ¹⁶ Nalo tiniel mimi jibe na, ana aber ka Yesu, aberinavo “? Ei juñabe, jau komijog iliano naña ajuña aberenio na?”

Naruei Yesu naio berdoṽe banlo, berinavo “Ee, kiniou nomijogio kiana. Ana kiniou nemialio jibe ka maka leleio kamiu kuvuluku Iliano Lu na Atua kiano napano naio berenio, berinavo

*‘Atua o, mia jau komi-
jikia kala kiritete
nalo, vija nalo na
amidomudomu kia*

*ga vo, avameneaso
rivu.’” Iouano 8:2*

¹⁷ Naruei Yesu juvan nalo na, ana naio ban ea ṁarkomeli na telisu na Betani, naio ba monmelio ea vio na.

*Buruiesi tai napano
makanio takou*

Mak 11:12-14,20-24

¹⁸ Mia Yesu monmelio ea vio na, mia viomijeni kavijo, ana naio jidom ka rivan bereio Yerusalem, mia naio jo miel ban jibe na, mia naio mijog jijerio. ¹⁹ Ana naio mial buruviki tai ju ikiṁarabo, ṁati telabo, mia maka ṁarati tai tuaio. Bior maka ve ṁarati tai tibe na, ana Yesu mil ban buruiesi nei, naio berinavo “Jau katakou re bunu bereio.” Mia bogo napano naio mil jibe na, vaarakurano ga buruviki nei naio mekekeu menoko nonovio.

²⁰ Ana kiano naiagagoano nalo amial buruviki nei naio menoko jibe nei, ana nalo amagmagodu toru, ana nalo abika den Yesu, aberinavo “? Vaio mila buruviki na menoko soṽeli jibe na?”

²¹ Naruei Yesu berdoṽe berii kalo, berinavo “Riano ga kiniou neberii ka kamiu, verenio kamiu kuvitu sik-ili ea kiniou, ka mia kene-miu jidomiano riveve juo re, mia kamiu bunu kumijikia kuvila tibe na, mia kamiu kumijikia kuvila bunu nana mave lie vo ka ninei. Vere-nio kamiu kuver ka bu-rumara suku na, ka naio tumolu tabujo rivan ea tei,

mia naio rila tibe na. ²² Mia verenio kamiu kuvitu sikili ea Atua, ka mia kamiu kumonea riano, mia kamiu kumijikia kuvijev vaio napano verenio kamiu kubolkouo, kuvikano.”

Navurim̃araboiano nalo na Israel ajidom averbure Yesu

Mak 11:27-33; Luka 20:1-8

²³ Mia bogo na Yesu ban bereio jouro ea burusio na Atua Kunuano Lu, naio ba jo berloglog tomu nalo bereio. Mia parinio tomu na tortoru na kulo lu nalo bija navurim̃araboiano na Israel abinimei ea naio abika denio, aberinavo “?Jau konom̃a komila saba nalo na ea kei siano? ?A kei naio mijamo ka banso ka jau kala tibe na?”

²⁴ Ana Yesu berdoŋe berii kalo, berinavo “Mo kiniou bunu nejidom nevika vikadeniano tai bunu den kamiu. Ver kamiu kuverdoŋe kanaku vikadeniano, ana mo mia kiniou neverialio ka kamiu ka kei napano naio mijamo ka kiniou ka nala saba nalo nei. ²⁵ Mo kanaku vikadeniano jibe nei: ?Varueiano na Jone naio mila ban tomu nalo nanua, naio be tena Atua jian ban Jone ka naio mijikia rila, ŋelina tomu nalo ga aber kanio?”

Yesu kiano vikadeniano mila nalo abilvilii ealo kanio, mia aberenio “? Mia kito rover tum̃abe ka naio? !Rovitikario! Verenio kito rover varueiano na Atua naio berii ka Jone,

monokanio mia toro nei naio rivika kito river jum̃abe ana maka romonea Jone. ²⁶ Mia maka rejikia rover varueiano na tomu nalo ga aberii ka Jone, ver tibe na ŋeli mia tomu nalo na mia nalo ala titai ka kito kovio na, bior nalo amonea Jone ruei ka aberenio naio be Atua kiano Naverialiano riano tai.”

²⁷ Kialo jidomiano nalo jibe nei mila na nalo amiolu aber ka Yesu jibe nei ga, aber “Kumemi maka nuvijikiaio.”

Naruei Yesu berenio “Mo bo ga, mia kiniou bunu maka nejikia neverial ka kamiu ka kei naio mijamo ka ban kiniou ka nala saba nalo nei.”

Jamerijiano na toro tai naliko kenerinio sum̃ano juo

²⁸ Ana Yesu berii bunu kalo, berinavo “Kamiu kuvisidomii von tukunuano nei. Toro tai kenerinio sum̃ano juo, naio berii ka motoru nene berenio ‘Keneriku, banei mia jau kava koiŋau ea kiado jiotilikrevi.’

²⁹ “Ana tete nene naio berdoŋe berenio ‘Eau. Kiniou maka nosidomio.’ Mia iorou kanio, kiano jidomiano biligio, ana naio ba miŋau jibe ka napano karam̃ano berkanio.

³⁰ “Mia karam̃alo nene naio jo jidomii berinavo mia kenerinio nei mia naio rivan re, naruei naio ba mial kenerinio maratoru nene, naio berenio iliano nei ban naio, naruei kiritete nei berdoŋe kirinovo ban naio berinavo ‘Bo ga, teta.’”

³¹ Ana Yesu bika denlo, berinavo “? Naljuo nei, na vabe nene naio mila jibe ka na karamālo jidomio?”

Nalo aberdoŭe aberinavo “Motoru.”

Ana Yesu berii kalo, berinavo “Tenene na. A riano kiniou neber ka kamiu, tomu na bova nalo jibe ka tomu na abarbiji takis, bija tire nalo na m̃arabo nalo, nalo naruei aju abinimei jouro ea Atua kiano nave-natuboiano, aju abiliglo ruei, mia kamiu kumitu iorou maaro kalo ga ruei. ³² Bogo na Jone Baruei naio binimei nei, berloglog kamiu ka bajago na m̃arabo na memedu, mia tomu na bova nalo nei amonea naio. Mia kamiu bunu, kamiu kumial vite nalo nei, mia maka leleio kuvilig kamiu ve riano, ka kumonea naio leleio.”

Jamerijiano na jiotilikrevi tai

Mak 12:1-12; Luka 20:9-19

³³ Mia Yesu mil kia ga vo, naio berenio berinavo “Kamiu kuviagago rivu ka jamerijiano dolu tai, napano berii toro na toru tai, bija kanano jiotilikrevi tai. Toro nei mila batitig kiano vio nei, mila siokoa tai jeriko nonovio jeliviv, a naio miñauka kanano vio tai ka rivie bulag vati m̃arkrevi, a naio miñauka bunu kanano burutili yimoliu tai ka avieii avavin atu mave ka asirarag kuku ka jiotilikrevi nei.

“Mia bogo tai, ana toro na toru nei naio jidom riel

kiki kija rivan ea buruvenuo dolu, ana naio juvan kanano jiotilikrevi ban kulo dolu nalo tealó, ka mia amei aiñau eaio, ka mia avulu van naio. ³⁴ Naruei toro na toru nei naio ba jo laka o-o, karina naio mial ka vonganei bogo na m̃arati krevi meruo naruei. Ana naio miila kiano tomu tealó ka avan bereio ea nalo napano ajua jiotilikrevi na kanano nei, ka avar puruveru na krevi nalo nei togio napano tomu dolu nei monokanio avulu vanio kanio. ³⁵ Mia bogo na kanano tomu nalo nei abinimei, tomu dolu nalo neibano amuelo, napano mia nalo tai abitivio, dolu nene ajukubin naio m̃aro, a dolu bereio ajubabinio ka puruveru m̃aro.

³⁶ “Mia toro na toru nei naio miila kiano tomu dolu nalo bereio nalo telabo kija, mia nalo nei amila bere ga bajago nei kalo bereio.

³⁷ Naruei toro na toru nei naio jo jidomii m̃elea kialo bajago nam̃a ajum̃a ami-laio, ana naio berenio, berinavo ‘Monoka kiniou neila keneriku garuei rimemedu ka naio rivano, monoka mia nalo avatove ka naio,’ ana naio miila kenerinio bano.

³⁸ “Mia bogo napano nalo amial naio, nalo aju aberverii kalo aberinavo ‘Nina naio be toro na toru kenerinio na kito rava roue bin naio rim̃aro, ka mia romijikia rodu jiotilikrevi na, mia rudu tibe ka karam̃ano kiano jajum̃ano

ve kanado.’ ³⁹ Naruei nalo abano aba kakario kirisikili ana aburio ba tavio ka jiotilikrevi nei ana nalo amuebinio m̃aro.”

⁴⁰ Naruei Yesu bika berinavo “?Bogo napano toro na toru na jiotilikrevi nei naio rimei bereio, mia naio rila tum̃abe ka nalo na ajum̃a amir̃au ea kanano jiotilikrevi nei?”

⁴¹ Nalo aberdoṑe banio, aberinavo “Kulo va nalo na, mia toro na toru nei naio ruebinvinlo, am̃arm̃aro sel ea bajago na jogdedeiano tai. Iorou kanio, ana mia naio rudu kiano jiotilikrevi toa kulo dolu nalo jum̃alo, ka mia amijikia avulu van naio rimemedu ka bogo nene.”

⁴² Naruei ana Yesu berii kalo berinavo “Ea Iliano Lu tai napano Atua kiano, be iliano tai jibe nei napano naio berenio

‘Puruveru na, tomu na amila yimo aberenio naio bova abukuio ban ruei,

mia vonganei puruveru nene naio binimeĩ be puruveru na bo tai ka bokar sudu na yimo ka rudukar yimo sikili rivu.

Tena Atua na jo mave laka naio milaio, mia kumemi numialio bo laka.’ Iouano 118:22

“? Mia kamiũ iliano nei kamiũ kubuluku bogo tai ruei ṑelina makanio vo?”

⁴³ “Mia kiniou neberii ka kamiũ, mia Atua rudular kiano navenatuboiano den kamiũ, ana mia naio rudu

van kulo dolu nalo na kialo meuliano nalo amijikia avar m̃arati novo nalo rivare ka mia amijikia atu jouro eaio.

⁴⁴ Mia verenio toro tai rijoru ea puruveru nei, mia puruveru nene tiviniegeniege niabene, rivurboṑeio, ṑelina verenio puruveru nei rijoru mave ea toro tai, mia puruveru nene tuba kitkiti toro nene mia rim̃akitkit vatitigio.”

⁴⁵ Mia bogo napano kulo lu nalo nei naliko Varisis nalo amijog Yesu kiano jamerijiano nalo nei, mia nalo amijikia ka naio jo beriilo ga.

⁴⁶ Mia bogo napano nalo ajidom ka avokar naio, mia nalo amerou ka tomu nalo, bior tomu nalo amonea naio ruei ka naio be Atua kiano Naverialiano tai.

22

Jamerijiano na jokoluolu na soriano

Luka 14:15-24

¹ Naruei, Yesu mil ka jamerijiano banlo bereio, naio berinavo ² “Atua kiano bajago na jom̃a bio tomu nalo ka amei jouro ea kiano navenatuboiano, naio jibe nei: Parinio tubo tai napano naio mila batitig sinaniano na toru tai ka rila jokoluolu na soriano ka kenerinio.

³ Naio miila toru ka tomu nalo telabo ruei ka atu rorea ka mia nalo amei ea jokoluolu nene, mia bogo napano naio miila kiano atevi nalo ka avuru tomu nalo nene amei, mia tomu nalo nei maka bunu asidom

ka amei. ⁴ Naruei parinio tubo nei ber ka kiano atevi dolu nalo, berinavo 'Kamui kija kuan bereio, kamui kuverii kanaku iliano nei vanlo, kuverenio romue buluku ruei bija temeul dolu nalo napano amijabojabo bo, mia saba nonovio na sinaniano nei biniu ju batitig bo ruei. Kuver kalo monokanio nalo amei aiasol kito ea jokoluolu nei.'

⁵ "Ana nalo abano aberii kalo jibe nei, mia nalo nei amiakurano ea ga parinio tubo nei kanano iliano,aju amila ga kialo jidomiano nalo. Tai bavenei ea kanano tiniavio, mia dolu jo bitikar kiano yimo na vilviliano, ⁶ a nalo teal abakakar parinio tubo nei kiano atevi nalo, amila lelanlo, amuebinvinlo amarnaro. ⁷ Naruei parinio tubo nei naio tinjen mimi toru, ana naio miila kiano tomu nalo na mira nalo abano, amuebinvin kulo va nalo napano amisebi kunualo a kialo komeli bunu.

⁸ "Naruei parinio tubo nei naio berii ka kiano atevi nalo, berinavo 'Sinaniano nei ju batitig bo ruei, mia nalo na kiniou nobiolo ruei ka amei avijurukario, nalo maka bunu avu ka amei, mia kito rotuvanlo. ⁹ Kiniou nejidom kamui kuvitakii marnabo sesa dolu nalo mia toro kei napano verenio kamui kuvilealio, mia kamui kuvikalo ka nalo amei ea jokoluolu nei.' ¹⁰ Naruei kiano atevi nalo nei abano, nalo amila jibe ka

napano naio berii kalo, ana aburu tomu nalo abinimej, bekurano ka tomu nalo na abo pelina nalo na abova, nalo amei tibe ga na, ka nalo aison vatitig vio na jokoluolu nei rivujo.

¹¹ "Mia bogo napano naloaju jouro ea vio nei ruei, mia parinio tubo nei naio binimej ka rivanjurnano nalikolo, mia ka bogo na naio mial toro tai napano naio maka riya kulumarnau na bo tai napano beberare ka jokoluolu nei, mia naio miya kulumarnau pilipili ga. ¹² Naruei parinio tubo nei naio bika den toro nei, naio berinavo '? Koig, jumabe ana jau kobinimej joomo nei, ana maka keya mam kulumarnau na bo na jokoluolu nei tai?' Mia naio niono buru maka bunu rijikia river titai. ¹³ Naruei parinio tubo nei naio ber ka kiano atevi nalo, berinavo 'Kamui kuviorakar jurnano ve juo a nalo ve juo, ana kuvuku naio riva tavio, ea vio na melijokouo, ea vio na mia naio to teg tulaka a naio ser marnjuvono eaio.' "

¹⁴ Ana na Yesu berenio, berinavo "Atua bio tomu nonovio, mia maka ve telabo napano naio bijauialo ka nalo ave kiano."

Vite na be Atua kanano a vite na be Sisa kanano
Mak 12:13-17; Luka 20:20-26

¹⁵ Naruei Varisis nalo abano ka alavon ka aleal vikadeniano nalo na jikirkili

tai ka alavon Yesu eaio, ka napano mia naio rijikia re ka riverdoþelo eaio. ¹⁶ Bogo na aberio-o bisi, ana amiila kialo naiagagoano tai, naliko kulo dolu nalo na taara na Erot kiano, abinimei ea Yesu. Ana nalo nei amijubolbolili ka ilisibiano novo nalo, aberinavo “Yesu, kumemi numijikia ka jau kobe naverloglogiano, jau kobe toro na memedu tai. Kiamo iliano nalo abiniu aberiano, a jau kojo koberloglog tomu nalo ka bajago nalo na Atua naio jidomio. Mia jau maka kejikia kovitii ga tomu tai, mia jau kobitii tomu nalo abiniu abe verare ga. ¹⁷ ?Tenene na, kumemi numisidom jau kover von ka kumemi, ka ea kiado tuboiano, naio berii jumabe? ?Memedu ka kito kulo Ju nalo rovulu takis van Sisa, napano parinio tubo na vio Romo, þelina maka rimemedu ka tibe na?”

¹⁸ Mia Yesu naio mijikia ka nalo ajidom ala kiki naio ga, ana naio berenio “Kene-miu iliano nalo kirinovo mia kirinovo, mia kenemiu iviso nalo kirivova joono ruei. ? Kamiu kumitu kumila von kiniau jibe na ka venia? ¹⁹ Mo bo ga, kamiu kuvudu puruveru na takis tai rimei van kiniau.”

Naruei nalo amidu tai binimei ban naio, ²⁰ ana na Yesu bika denlo, berinavo “? Kei mirano nei joa puruveru nei? ?A sio nei be kei siano?”

Ana nalo aberenio, aberinavo “Sisa mirano na a siano

na bunu.”

²¹ Naruei naio berii kalo, berenio “Mo, vite napano be Sisa kanano, kuvar van Sisa. Mia vite napano be Atua kiano, kuvar van Atua.”

²² Bogo na nalo amijog iliano nei, nalo amiilo toru kanio, ana nalo ajuvan Yesu ajaluvo den naio abano.

Tomu nalo na aňaro, mia ameul bereio

Mak 12:18-27; Luka 20:27-40

²³ Ea bogoti nene ga, kulo Satusis nalo tai abinimei ea Yesu, nalo ajidom avika naio ea tivelinio na vite napano nalo amonea jikili ea naio, napano nalo amonea aberinavo tomu nalo na aňarňaro maka bunu ajikia ameul bereio ea bogo na tagaňiano. Ka tenene,

nalo abika Yesu jibe nei, aberinavo ²⁴ “Yesu, jau kobe naverloglogiano, kumemi numisidom nuvika denso, ka jumabe ka iliano tai napano tormoruo Mosis naio berenio jukamu nua ruei. Naio berinavo ‘Verenio toro tai riňaro den koano, maka ve kenerilo tai vo, mo kuruano monokanio soro ka taanou nene. Ea bajago na, mia naljuo ve kenerilo ka mia rivokar toro na űaro ruei siano.’ ²⁵ Naruei ea kenememi űaratavo tai, tomu aluo napano abe kurualo. Motoru nene naio joro, karina naio űaro den koano napano maka ve kenerilo tai, ana kuruano maratoru naio buru tira nene. ²⁶ Naruei, kuruano

na toru naio bunu m̃aro den tira neibano, a nana lieie kaniao jibe na bunu, bano-o bokar kurualo aluo, nene abiniu amila bajago takurano ga. ²⁷ Mia iorou kalo abiniu am̃arm̃aro tira nei bunu m̃aro. ²⁸ Naruei kumemi numisidom jau koverial van kumemi vite nei: ea tagaṗiano, bogo napano aberii tomu nalo ameul bereio, mia tira nei ve kei koano, bior naio joro ruei ka kurualo aluo nei abiniu?"

²⁹ Naruei Yesu berenio "Peli ga, kenemiu jidomiano jokoro, bior kamiu maka kuvijikia vaio napano Atua kiano Iliano Lu naio berenio, a kamiu maka kuvijikia vaio napano kiano moroano na toru naio mijikia rilao. ³⁰ Bogo napano tomu nalo ameul bereio, mia atibe ka nailiano nalo na mave ga, mia bajago na soriano naio maka bunu. ³¹⁻³² Ana ea tivelinio na meuliano bereio nei, be Atua kanano Iliano Lu tai naio jo napano naio mijikia rijai kito ea vio nei, ṗeli kamiu maka kuvulukuio vo? Iliano na naio berenio jibe nei berinavo 'Kin-iou nebe Epraamo a Aisak a Yakovo kialo Atua.' ?Ana iliano na naio berenio venia? Nalo tolu nei am̃aro ea yetemeriba nei bogo be nua ruei, ana yuka telabo barlaka ana Atua berii vonga iliano nei, ka naio be kialo Atua. Jibe na, ana kanano iliano nei naio jiloglog ka nalo tolu nei am̃aro ea yetemeriba, mia naloaju ameul ea naio kia

ga vo. Atua maka sidom ka kanano tomu nalo ave tomu na am̃arm̃aro ga, mia naio jidom ka naio rive Atua na tomu nalo na ameul."

³³ Ana bogo napano tiniobi nalo amijog Yesu kiano iliano nei, nalo amiilo toru ka vite nalo nei napano naio joṃa berlogloglo kanio.

Tubeiano juo na tortoru

Mak 12:28-34; Luka 10:25-28

³⁴ Telikiti napano Varisis nalo amijog ka Yesu mila Satusis nalo maka bunu ajikia aver titai, ana nalo abior telisu beamu vo karina abinimei ea Yesu, nalo bunu ajidom ala vonio. ³⁵ Naruei nalo tai napano naio be masou ka Tubeiano, naio bika vikadeniano tai den Yesu, berinavo ³⁶ "?Naverloglogiano, kiniou nejidom ka jau koverial von, ka ea iliano nonovio napano ajua kiado Tubeiano, na vabe nene napano naio toru, jo mave jovulu dolu nalo?"

³⁷ Ana Yesu ber ka toro nei berinavo "Iliano Lu berenio jibe nei, berinavo 'Atua Soṗi napano be kanamo Atua, jau monokanio kosidom naio ka tiniemo momou, ka kiamo meuliano momou, ka kiamo jidomiano momou.'

³⁸ Nina naruei napano naio be tubeiano na be moti, a toru laka bunu. ³⁹ A tinene kanio, napano naio toru bunu jibe ka napano jukamu nene, na naio berenio, berinavo 'Mia jau monokanio kosidom tomu

nalo napano aju vaataro kaso, kala rivu vanlo, rivare ka napano jau kojidomiiso.’
⁴⁰ Tuboiano juo nei, nalo abe burupati na tuboiano dolu nalo nonovio napano Mosis kiano, bija Naverialiano nalo kialo iliano bunu, napano ajua kiado Niosi Lu nei.”

Naverikariano naio be tormoruo Teviti kiano Atua Mak 12:28-34; Luka 10:25-28

⁴¹ Naruei ka bogo nei mia Varisis nalo aju vio takurano naliko Yesu, ana naio bunu bika vikadeniano tai denlo, berinavo ⁴² “?Ea kenemiu jidomiano nalo aberenio mia Naverikariano rimaluvo ea kei kiano bajulukuti?”

Mia nalo aberii kanio, aberinavo “Naio ve tormoruo parinio tubo Teviti kiano bajulukuti tai.”

⁴³⁻⁴⁴ Naruei Yesu bika bereio denlo, berinavo “?Ee, kamiu kuber riano ga na, ana jumabe ana Niununo Lu joa Teviti, naruei Teviti mil, berenio

‘Atua Soŋi naio berkanio kiku Tubo, naio berinavo

“Jau koto tano tivelinio vameruo ka kiniou, rivano-o mia kiniou nala kiamo uolu nalo amei atibe kanio yebe sesa na kobijankon jaamo eaio.” Iouano 110:1

“Ea vio na naruei, kito romialio ka napano Teviti naio jo bio naveri-kariano nene

berinavo naverikariano naio be kiano Tubo ruei. ⁴⁵ ?
 Mia bior Teviti naio berii jibe na, jumabe ana kamiu kumituma kuber Naverikariano nei naio miyotuba ea Teviti, ana naio be kiano bajulukuti tai ga?”

⁴⁶ Naruei maka toro tai rijikia river iliano tai van Yesu. Mia jikario ea bogo na, mia maka bunu toro tai rijikia rila von Yesu ea navikadeniano nalo.

23

Yesu mil jikili ban navurim̃araboiano na nalo-tuano

Mak 12:38-39; Luka 11:43,46, 20:45-46

¹ Mia ka bogo na, ana Yesu mil ban tiniobi, naliko bunu kiano naiagagoano nalo, naio berinavo ² “Be riano ka vonganei, naverloglogiano na tuboiano a Varisis nalo, nalo amidu Mosis jeleigio kam̃a aberial nioti na tuboiano na Atua kanano. ³ Mo verenio tibe na, ana tenene na kamiu monokañio kamiu kumonmonealo, kamiu kuvila tibe ka napano nalo aberenio. Mia kamiu kuvitakii re kialo bajago, bior nalo maka atuma ala tenalo nam̃a aju aberiio ka tomu dolu nalo. ⁴ Nalo aju aburonkar bereio tuboiano sesa nalo telabo na nalo ga amilaio, amila jikili laka, mia nalo ajutua tomu nalo ka aiagago kalo. A nalo aju amila im̃auano na jibe na ka nalo ajuma amison vite nalo na kiri teremi nalo laka ban

tomu nalo, mia maka leleio asaaro ka aija tomu nalo ka avar bitiran vite nalo nene.

⁵ “Nalo abarvar kalo mēle ka kialo iṁauano nalo, napano nalo amila jibe na ka mia avuru ga tomu dolu nalo miralo. Kamiu kuvial kialo bulusiveu nalo na amison Atua kiano Vivitauiano Lu juaio, ka mia mā amiorkario jua merinialo a mokojuṁalo nalo. Nalo ajidom ka kanalo monokanio ve tortoru loa tomu dolu nalo kanalo. Mia kamiu kuvial bunu ka abili iki ṁalo kulukoti na volkouano nalo terebievi laka. A abavavin mēle ka vite nalo nei, a ajidom ga ka tomu nalo avamenealo riviorio. ⁶ Ana ea bogo na jokoluolu a joomo ea yimo na volkouano bunu, nalo ajidom ka mia bogo nonovio nalo atuṁano ea tomu na tortoru nalo jelelo, ⁷ a verenio nalo aiel ea vioruru, mia nalo ajidom tomu nalo avatove kalo, a avio batitiglo averinavo ‘! Nao, kiaku naverloglogiano novo, kavijo bo o!’

⁸ “Mia kamiu, kenemiu naver loglogiano takurano ga naruei, a kamiu kumitibe ka ṁaratavo takurano ga, mia verenio tibe na, kamiu kuvijamo ka re tomu nalo ka mia mā avio kamiu tai ka ‘Naverloglogiano.’ ⁹ Ana mia kamiu kuvio re toro na yetemeriba nei tai ka teta, bior kamiu be karamemiu takurano ga, napano naio jo mave. ¹⁰ A mia kamiu kuvijamo ka re tomu nalo avio kamiu tai aver

kube navuriṁaraboiano na kialo bior kamiu kenemiu navuriṁaraboiano takurano ga, naio napano be Naverikariano. ¹¹ Mia toro napano naio be kenemiu toro na toru laka, mia monokanio naio rime i ve kenemiu toro na iṁauano ga. ¹² Mia toro na naio ga bitirilar naio ka naio to mave, mia Atua rila naio to yetano. Mia verenio toro napano naio ga rila naio to yetano, mia Atua rivitirilar naio to mave.”

Yesu berial vijuku torokoriano na navuriṁaraboiano na lotuano

Mak 12:40; Luka 11:39-42,44,52, 20:47

¹³ Ana Yesu mil dolu ga banlo, berinavo “!Kamiu Varisis nalo kamliko naverloglogiano na tuboiano, o-o! Kamiu kumila lelan kamiu toru laka, mia ve kirivova laka van kamiu, kanio kenemiu iliano nalo kirinovo, mia tiniemiu nalo abova, ajoron ruei. Tomu nalo ajidom amei jouro ea Atua kiano navenatuboiano, mia kamiu kumitu kumitavoko morouo kalo ea miralo, ka mia nalo ajikia re ka amei jouro, mia mave kanio, kamiu bunu maka kuvitu kumei jouro. Kamiu kubova ruei. Kamiu kumituṁa kuburu kenemiu volkouano nalo terebievi laka, mia be sibiano ga, bior ka bogo nene ga mia kamiu kumituṁa kumijubolibo lili taanou nalo nei, kaṁa kubina ka kialo saba nalo.

Bior tena, mia kenemiu tibu-reiano sikili lie vo.

14-15 “!Kamui Varisis nalo kamliko naverloglogiano na tuboiano, o-o! Kamui kumimāu bova ga. Kamui kumisaaro ka kuviel ea uako, ka kuan ea buruvenuo dolu nalo ka kuvuru tomu nalo atakisor kamui, mia bogo napano kamui kubokar tai binime, mia maka vesiou, mia naio bokar nonovio kenemiu bajago va nalo ba bova laka, bova jovulu kamui bereio.

16 “!Kamui navurimāaraboiano nalo, kamui miremiu bono ga. Mia kumila lelan kamui laka, mia rivova laka van kamui. Ea bogo napano tomu nalo aber titai ka rila kialo verikariano tu sikili, mia ver averenio ‘Kinio neber riano, Atua kunuano Lu yako jo,’ a karina, ala korov verikariano nei bereio, ana kuberenio ‘Nina maka ve titenia.’ Mia verenio averinavo ‘Kinio neber riano, niogo nalo na ajua Atua kunuano Lu joomo, nalo naaju,’ mia kamui kuber iliano na naio jikili laka, maka ajikia ala korovio bereio. 17 Aire tomu nalo, kamui miremiu bono, a pariparimiu nalo amiavovu. ?Venia napano naio be lu laka: niogo nalo, pēlina Atua kunuano Lu napano naio mila niogo nalo abe lu? 18 Mia verenio toro tai riverenio ‘Neber riano, boda naio yako jo,’ kamui kuber iliano nei be kurano ga. Mia verenio naio riverenio ‘Kinio neberii

riano, sida na naio joa boda,’ mia kamui kuber iliano nei jikili laka, toro tai maka rijikia rilakorovio. 19 ! Jibe kanio napano neberiio ruei, kamui kube merebono riano! ?Venia naio be lu laka: sida napano joa boda pēlina boda na mila sida nei be lu? 20 Monokanio kamui na kuvitilubar vite nalo nei, bior verenio toro tai naio jo jiloglog boda ka rila kiano iliano nei tu sikili, mia naio jo jiloglog bunu bija sida napano joa boda nene. 21 A toro napano ver jomā jiloglog ban ea Atua kunuano Lu, naio jo jiloglog bunu bija nana naio be kanano yimo nene, 22 ana toro na jomā jiloglog mave, naio jomā jiloglog bunu bija jobaro lu na Parinio tubo lu na toru kanano, tenene naio jomā jiloglog Atua garuei memedu.

23 “! Kamui naverloglogiano na tuboiano kamliko bunu Varisis nalo, o-o! Kamui kumila lelan kamui toru laka, mia rivova laka rivan kamui. Kinio nemijikia napano kamui kumitumā kubitii bo julaka, ka verenio mia kuvar semiu sinaniano ve duelimo, mia ve takurano monokanio rivan ea Atua Kunuano, tibe ka napano tuboiano naio jomā berenio, a kamui kumitumā kumila jibe na ka kenemiu saba nonovio nalo, rivano-o rivokar bunu māmēsi na kiritavarvasu nalo a vite nalo bunu napano javukia māsili nalo. Mia vite

tomormoruo nalo napano tuboiano naio berenio, kamiu maka kuvisidomial leleio, tibe ka napano naio berenio berinavo kamiu kumemedu rivu, a kamiu monokanio tiniemiu riia kulo dolu nalo, monokanio kamiu kuvokar kenemiu verikariano. Verenio kamiu kuvisidom kuvokar sikili vite nalo na kiritavarvasu, naio bo ga, mia vite nalo na tomormoruo nei naruei bo ka kamiu kuvitumã kuvilaio garuei, ana makanio.

24 “!Aire tomu nalo, kamiu navurimãaraboiano nalo, kamiu miremiu bono ga! Kamiu kumitumã kumila jibe na kanio napano bogo na ana kamiu kumunu saba, mia kamiu tiniemiu maio jikili ka mia kuvilaluvu re ka kuviovolar nionono tai napano mijoru batove ea kenemiu baja nalo, mia kamiu maka kuvial kar ka kumdidiomo belia kamel napano joaio.

25 “! Kamiu naverloglogiano na tuboiano bija Varisis nalo bunu! Kamiu kumila lelan kamiu toru laka, mia rivova laka rivan kamiu. Kamiu kumitumã kumitakii vatitig tuboiano nalo napano kiritavarvasu nalo tivelinio ka sekonianio na kenemiu baju a baja nalo, naruei kamiu kuberiamã kenemiu vite nalo nonovio ameravo bo ruei. Mia kenemiu baju nalo nei abujo ka sinaniano na vinauano napano kamiu kubario ea bajago na yebekavoano.

26 Kamiu Varisis nalo, kamiu miremiu bono riano.

Verenio kamiu kuvisidomial ka kenemiu baju a baja nalo ameravo rivu bogo nonovio, mia kamiu kuvisonlo re bunu ka sinaniano nalo napano kenemiu kariano juaio.

27 “! Kamiu naverloglogiano na tuboiano bija Varisis nalo, o! Kamiu kumila lelan kamiu toru laka, mia rivova lie vo van kamiu. Kamiu kumitavukia mãartanbo napano amiovovua miuvu meravo kirinovo bo jel tavio, mia vajoomo nene naio bujo ka buriu na tomu nalo napano amãarmãro, bija mokotenalo napano ajorono.

28 Jibe na, bogo na tomu nalo aial tavio na kamiu, mia nalo amijikia averenio kamiu kumemedu bo, mia makanio, vajoomo na kamiu bujo ka juboluboiano a kariano nalo.

29 “! Kamiu naverloglogiano na tuboiano nalo bija Varisis nalo! Kamiu na bogo nonovio kumil ka kuluniomiu ga. Mia rivova lie vo van kamiu kenemiu jidomiano nalo beve juo. Kamiu kumitumã kubitikar vatitig mãartanbo na naverialiano nalo re nua, a kamiu, kumiovovua bo bunu puruveru na sidomkariano na tomu memedu nalo, ana jumãbe: ?Kamiu kuberiamã kumemedu kamliko nalo na a?

30 Mia kamiu kumitu kuberinavo verenio kamiu kumeul nua ruei ea bogo na korobimiu nalo, mia kamiu maka kuvijikia kuvijurukar

nalo na ka bogo napano nalo amuebinvin Atua kiano naverialiano nalo re nua. ³¹ Mia ea kenemiu ilisibiano nei, kamiu kumituña kumil lelan kamiu bereio ga, bior iliano napano berial ka kamiu kube bajulukuti memedu na korobimiu nalo na amuebinvin naverialiano nalo. ³² Mo bo ga, kamiu kuvimāu bo ka rivano-o, kamiu kuvila von ka kuvila nonovio imāuano na korobimiu nalo nei ajikario nanua bogobe ruei.”

naio maka rila titai napano tokor leleio, binime i bokar Sakaraia, na Parakaia kenerinio, naio napano korobimiu nalo amuebin naio jo vaataro ka boda, joomo ea Atua Kunuano Lu. ³⁶ Riano kiniou neberii ka kamiu, mia vironiano na m̄ariano na tomu nalo nei, mia rivokar kamiu, napano kumeul kia ga vo vonganei.”

Yesu tinien miia
Yerusalemo

Vironiano na navurim̄araboian *Luka 13:34-35*
nalo na lotuano
Luka 11:47-51

³³ Naruei Yesu mil jikili kia ga banlo, naio berinavo “Kamiu kumitibe ka maro nalo garuei memedu. ? Kamiu kuberiam̄a mia kumijikia kuvuro ka kenemiu vironiano na ea vio na jogvaiano? ! Maka leleio! ³⁴ Verenio mia kiniou neiila naverialiano nalo aviedu, vija tomu napano abe masou bo ka Atua kiano iliano nalo, a vija bunu naverloglogiano na tuboiano nalo, verenio aviedu ea kamiu, mia kamiu kuvuebinvin tealō am̄aro ea m̄akolkolo, a tealō mia kamiu kuvitivlo ea kenemiu yimo na volkouano nalo, a mia kuvijili bulaglo ea kenemiu m̄arkomeli nalo. ³⁵ Mia kamiu kuvila tibe na kalo dam̄ariga rivano-o, mia kamiu naruei kuvokar vironiano na m̄ariano na tomu na memedu nalo nei aviniu napano korobimiu nalo nanua amuebinvinlo. Tenei jikar ea Epel, na

³⁷ Ana Yesu jegi bior Yerusalemo, ana naio berinavo “! Yerusalemo-o, Yerusalemo-o! ? Bior vaio ana kojom̄a komuebinvin naverialiano nalo, a kojuba binvin nalo napano Atua miilalo abiedu easo? Va telabo kiniou nejidom nodu jum̄aku selvivko kiamo tomu nalo, tibe ka tu sabarou buru kirikiti nalo abinime i ajuluku ea sibiano, mia kiamo tomu nalo maka asaaro ka kiniou. ³⁸ Jau, komial na, Atua jo juvanso naruei, mia jau komei kove vio yauo kurano ga naruei. ³⁹ Tenene na neber ka jau, mia kiamo tomu nalo aial re bunu kiniou bereio, rivano-o rivokar bogo napano mia nalo averenio bereio tenei, averinavo

‘Atua Soṽi,
jau keilivu ka ninei

napano naio jo binime i ea siamo.”

24

Yesu berial ka mia aue bulag Atua kunuano lu

Mak 13:1-2; Luka 21:5-6

¹ Ana Yesu batavio den Atua Kunuano Lu, mia bogo na naio miel bano, kiano naiagagoano nalo abinimei ana nalo ajiloglog yimo to-mormoruo nalo napano aju jouro ea burusio na Atua Kunuano Lu, mia abo laka, ana aberii ka Yesu ka naio siraragdi rialo. ² Mia Yesu naio berii kalo, berinavo “?Kamui kumial yimo nalo na? Riano kiniou neber ka kamui, yimo nalo na, mia ve re bunu puruveru nene tai totano vatitig ea jeleigio, bior mia tomu tai amei aue bulagio nonovlo.”

Jaleleano na mia monokanio rime

Mak 13:3-13; Luka 21:7-19

³ Telikiti na nalo amiel jibe ga na, nalo abinimei ea Suku Na Buruolivi, naruei Yesu naio jotano ea vio na. Mia bogo na maka bunu tomu dolu nalo tai atu naliko, ana kiano naiagagoano nalo abinimei ea naio, abika denio, aberinavo “?Mia aue bulag Yimo Lu nene nagi, a kijokijo na vabe na kanamo liliuano, napano mia jau komei bereio ea bogo na maaro?”

⁴ Naruei Yesu berdoŋe banlo, naio berinavo “Bo ka mia kamui kuvitigar vatitig kamui rivu, ka mia ve re toro tai rime ka rijubolbolili kamui, ⁵ bior mia tomu

ve telabo napano mia adu siaku, naruei mia nalo amei averinavo ‘Kiniou nebe Naverikariano nene,’ naruei nalo avuru tomu ve telabo aiel vovu. ⁶ Ana ea bogo na bunu, mia kamui kuvijog m̄aduano na mira napano ju vaataro, a lilianiano na mira nalo na aju koalabo, mia kamui kumemebiju m̄ele re. Vite nalo na monokanio nalo amalmaluvo tukamu beamuvo, mia nina maka legiano na maaro nene navo. ⁷ Ana parinio tubo nalo ala mira ka parinio tubo dolu nalo, a venuo dolu nalo atumolu ka venuo dolu nalo. Mia ve bogo na vitu na toru, mia m̄ii rikulkulu ea vio yetemeriba reraio. ⁸ Mia vite nalo nei, maka ve bogo na maaro nene navo, mia tibe ka tira napano naio be m̄abono, naio jikar ka mijog be moti garuei ka taakano mijalele ka mia naio rivar kenerinio, mia buruñara jogvaiano naio maka navo.

⁹ “Mia ka bogo nene, kamui na napano siaku joa kamui, mia avokakar kamui, a adu vironiano va nalo van kamui, rivano-o mia auebinvin kamui kum̄arm̄aro. Ana mia tomu na buruvenuo dolu nalo nonovio asidom lele re kamui, mia ail die kamui. ¹⁰ Vite nalo na, mia rila tomu nalo ve telabo atu sikili re bunu ea kiniou, a nalo na amonmonea kiniou jukamu, mia nalo asidom re bunu nalo na amonea kiniou jikili kia ga ea bogo nene, mia nalo ativeluku kalo van

kialo uolu nalo nei jumalo.
¹¹ Mia naverialiano nalo na tuboluboiano ve telabo atumolu, mia avuru tomu ve telabo aiel tokoro. ¹² Mia vijuku vovaiano nonovio riluo ve toru lie vo rila ana tomu ve telabo kialo iviso rimeĩ rimenini, asidom re bunu Atua. ¹³ Mia verenio toro na tu sikili damariga ea kinioi riva rivokar bogokouo nei ribisi, mia Atua rilarur naio. ¹⁴ Mia ioluanu vou na navenatuboiano nei, mia aioliolu van taara kinkin nalo kanio ea vio yetemeriba reraio, jibe ka kijokijo tai napano berial ka legiano na iorou maaro jo binimeĩ.”

Jaleleano toru ea vio Yerusalemo

Mak 13:14-23; Luka 21:20-24

¹⁵ Naruei Yesu berii bunu iliano dolu tai, napano bo ka verenio toro na rivulukuio, bo ka naio rila von ka rijikia vatitig nioti nene. Iliano nene berii jibe nei, berinavo “Mia kamiũ kumijikia kuvial avitirilar tavoru tai napano kirivova mia kirivova laka, tumolu tu rila niegeniege vio Lu na Atua Kunuano Lu. Vite na Naverialiano Taniel naio berialio nanua ruei, ¹⁶ ana verenio bogo na kamiũ kuvial vite nene, kamiũ napano kumitua vio Yutea, monokanio kamiũ kuvuro kuva kuvituluku ea suku nalo. ¹⁷ Ka bogo na, verenio toro tai to rijilmebi tavio ea kunuano, mia naio maka bunu rijikia riva joomo ka rivar kanano saba

tai bereio, ¹⁸ pelina verenio toro tai toa kanano tiniavio, mia naio maka bunu rijikia riva vonuo bereio ka rivar kanano kuluniabeno. ¹⁹ Ana ka bogo nene kia ga vo, mia rivova laka van tire nalo na mabolo, a nalo na ajumã amiye yu ban kenerilo tete mudomudomu nalo. ²⁰ Verenio tibe na, monokanio kamiũ kubolkouo ka kamiũ, ka kenemiũ bogo na jaleleano nei, ka mia rimeĩ re rivokar kamiũ ea bogo na niavo, pelina ea legiano tava tai, ²¹ bior bogo na jikili nei, naio sikili lie todovulu bunu bogo tealu na jikili, jikar ea bogo napano Atua jii vio yetemeriba binimeĩ bokar baneĩ, ka mia ve re bunu jaleleano na burutomoruo tai tibe nei bogo tai bereio. ²² Mia Atua naio jidomii ruei ka mia naio tekrov ve bulati ga bogo na jikili nei, kanio tomu nalo napano naio bijauialo ka ave kanano, napano ajua bogo na. Ana verenio naio tekrov re ve bulati tibe na, mia maka toro tai rijikia rimeul to.

²³ “A ka bogo nene, verenio toro tai river ka kamiũ, riverinavo ‘Kamiũ kuvialio, nina naio be Naverikariano na,’ pelina naio riverinavo ‘Nina naio be Naverikariano naio yako,’ mia kamiũ kumonmonea re kiano iliano nalo na, ²⁴ bior naverikariano na tiboliboiano nalo ve telabo atumormolu, vija naverialiano na ti boliboiano ve

telabo mia nalo nene ala kijokijo na tortoru, vija tokokouro nalo na iloiano. Mia nalo ala tibe na, ka avuru tomu nalo aiavovu, rivano-o rivokar napano mia alavon ka avuru bunu tomu nalo napano Atua bijauialo ka ave kanano, mia vite nei maka ajikia alaio. ²⁵ Mia kamiu kuvitika kamiu, bior kiniou neberial vite nalo nei ban kamiu jukamu ruei, ka bogo na tenene nalo maka amal-maluvo vo.

²⁶ “Naruei ka tenene, verenio tomu nalo averii ka kamiu, averinavo ‘Kamiu kuvialio, Naverikariano naio joa vio yauo yako ruei,’ mia kamiu kuvan re ea vio nene, a verenio averii ka kamiu averinavo ‘Kamiu kumial na, naio jo joomo ea yimo yako ga,’ mia kamiu kumonealo re. ²⁷ Ana ea bogo napano Kulorinio Kenerinio naio rime bereio, mia naio rime rimeravo ka tomu nalo nonovio, tavukia vio bijano, naio merera rudul batitig vio tiniabene reraio tika is van ea ues. ²⁸ Ea bogo nene, mia tavukia bunu napano verenio tena m̃aro tai toa vio tai, mia bebekumo rinio nalo napano ajum̃a ajen temeul nalo nam̃a am̃arm̃aro, mia nalo amei kanio, monokanio aje buronlo ve telabo.”

Mia Kulorinio Kenerinio rime bereio

Mak 13:24-27; Luka 21:25-28

²⁹ Naruei Yesu naio berinavo

“Mia bogo na jaleleano nei naio ribisi, vaarakurano ga m̃erenio naio rime ribobogio, mia siberio rimerera re bunu.

Marivitano nalo na tiniabene mia nalo atibirbil, mia tenalo na jikirkili nalo na tiniabene, mia Atua rikulkulu kalo.” Ais 13:10, 34:4

³⁰ “Mia ka bogo nene mia kijokijo na Kulorinio Kenerinio riyotuba ea tiniabene, a mia m̃atatoko nalo na yetemeriba nei mia nalo ateg ve toru aviovio mia aial Kulorinio Kenerinio riyotuba ea melijo nalo vija kiano burum̃ara moroano a vija kiano burum̃ara mi-amoiانو. ³¹ Mia karina, sime duo na toru riolu, ana mia naio riila kiano nailiano nalo ava aseliviv ea vio yetemeriba reraio a vio mave bunu, ka avuru kiano tomu nalo napano naio bijauialo ruei, amei vio takurano ea naio.”

Maka toro tai rijikia bogo na legiano na maaro nene

Mak 13:28-32; Luka 21:29-33

³² Ana Yesu naio berinavo “Kamiu kuvisidomii von buruiesi napano aber buruviki. Naio mijikia riverloglog kamiu ka vite tai napano kamiu monokanio kuvitii vatitigio. Bogo napano kamiu kuvial ka jaati nalo amei amemeiaio, amelumu, tika ka mia rivarboveio,

kamiu kumijikia ka kuverenio bogo binimei vaataro ka bogo na mñerenio rivitunu ve toru. ³³ Ka tenene, bogo na kamiu kuvial kijokijo nalo na ea vio yetemeriba, tavukia na kiniou neberenio ka kamiu ruei, mia kamiu kuvijikia ka Kulorinio Kenerinio naio jumolu jikili jua mñaratavo ruei, vaataro ka naio rimaluvo naruei. ³⁴ Riano kiniou neberii ka kamiu, mia vite nalo na mia ayotuba tukamu vo, mia iorou, ana taara na tomu nalo napano mña ameul ka bogo na, mia mijikia ava kovio den vio yetemeriba nei. ³⁵ Mia tiniabene a yetemeriba ave juo bunu ava kovio, mia kanaku mñariliano nalo maka ajikia ava kovio bogo tai leleio. ³⁶ Mia maka toro tai rijikia legiano nene ðelina aura nene napano mia Kulorinio Kenerinio naio rimeiaio. Nailiano nalo na vio mave, naliko Atua Kenerinio, maka ajikiaio, mia Karamaku ga takurano naio mijikiaio.”

Monokanio kamiu kuvitu derevijo

Mak 13:33-37; Luka 17:26-30,34-36

³⁷ Ana Yesu naio berinavo “Rivano-o rivokar bogo na Kulorinio Kenerinio rimeiaio bereio, mia tomu nalo atu batitig re, tibe ka bogo na tormoruo Noa kiano nanua. ³⁸ Ea kiano bogo nene naruei, bogo na ueimia na toru nei naio maka rimeiaio vo, ana tomu nalo ajuña ajinan,

a ajuña amunu tenalo namña amunmunio, ajuña amila soriano jibe na ga, binimeiaio bokar bogo napano Noa naio ba joomo ea kiano uako na toru napano naio mñaukanio. ³⁹ Mia tomu nalo na aju damñariga jibe na, maka asidomial titai, narueiaio amial ga burumñara ueimia nei binimeiaio buru bulaglo. Mia kiniou neberka kamiu, mia bogo na Kulorinio Kenerinio naio riyotuba rimeiaio bereio, mia tomu nalo ave virare ga ka nalo nei nua beamu ea Noa kiano bogo. ⁴⁰ Mia verenio tomu ve juo atu aimñau ea tiniavio, mia nailiano nalo ameiaio avurular tinene, mia tinene atuvanio tobo, ⁴¹ mia verenio tira ve juo atuña ala sinaniano, mia avurular tinene, mia tinene atuvanio tobo.

⁴² “Tenene na, mia kamiu monokanio kuvitakar vatitigio, bior kamiu maka kuvijikia ea legiano na vabe napano mia kenemiu Tubo naio rimeiaio bereiaio. ⁴³ Mia monokanio kamiu kuvitilubar vite nei, ka verenio toro na toru tai, verenio naio mijikia memedu ka bogo na mia toro na vinauano tai rimeiaio ea kunuano, ka mia naio rivina ka kiano saba nalo, mia naio to derevijo rivu damñariga, ka mia toro na vinauano naio rimeiaio. ⁴⁴ Tenene na, mia monokanio kamiu kuvitu derevijo rivu damñariga, kanio mia Kulorinio Kenerinio naio riyotuba ea bogo tai napano mia kamiu

kuvisidomial re ka mia naio rimeĩ eaio.”

Jamerijiano na toro na iĩauano napano kiano boru naio binimeĩ bereio

Luka 12:41-48

⁴⁵ Narueĩ Yesu naio berinavo “?Verenio toro na iĩauano tai, napano naio be masou bo ka kiano iĩauano, a naio bokar vatitigio, mia naio riĩau tumĩabe? Naio riĩau tibe nei, napano verenio kiano toro na toru tuvan vio nei ka naio riel riva koalabo, ana toro na toru nei rudu naio to ka rivitikar vatitig rivu tomu na iĩauano dolu nalo, ana mia toro nei naio rivokar vatitig iĩauano nalo nei.

⁴⁶ Mia bogo napano toro na toru nei naio rimeĩ bereio, mia naio rijikia rileal kiano boru na iĩauano nei naio jo bokar vatitig iĩauano nalo nei bo. Ana mia boru na iĩauano nei naio rijikia rijog rivu ve toru, ⁴⁷ bior mia toro na toru nei naio tuvan kiano saba nalo nonovio tua toro na iĩauano nei jumano. Ierinio, mia Atua rila tibe ga na bunu.

⁴⁸ “Mia verenio boru na iĩauano nei naio rivova, mia bogo na toro na toru nei naio tuvan vio, ana naio riva koalabo, mia boru na iĩauano nei naio rijikia river “?Ee, toro na toru nei naio jo kirisiou laka, ĩeli mia naio rimeĩ re bunu koviobo, ĩelina jumĩabe?” ⁴⁹ Ana mia naio tumolu rila lelan tomu dolu na iĩauano nalo, mia naio rijikia riva rimunu uei naliko tomu na pariparilo

nalo mĩa amiavovu, mia nalo atu asen searo ea toro na toru neibano kanano puruveru nalo. ⁵⁰ Mia toro na toru neibano naio rimeĩ bereio ea legiano tai napano toro na iĩauano nei riilo kanio garueĩ, a ea bogo tai napano toro nei risidomial re ka mia naio rimeĩ eaio. ⁵¹ Narueĩ toro na toru nei naio rudu vironiano ve toru van boru nei, mia naio rila naio riva to vija tomu na tibolboiano dolu nalo ea vio napano tomu nalo ajumĩa ajegi, ajerkakar mĩarijuvolo nalo eaio.”

25

Jamerijiano na merevono duelimo

¹ Ana Yesu berenio, berinavo “Ka bogo napano mia Kulorinio, Kenerinio naio rimeĩ bereio, mia Atua kiano navenatuboiano naio tibe ka jamerijiano nei naio berenio. Jamerijiano nei berii jokoluolu na soriano tai, napano jakii kanalo bajago, nalo na tivelinio ka sumĩano aburu naio ban ea niatira kunuano ka avuru naio rimeĩ rivijaio. Narueĩ kuviviniene duelimo [10] nei nalo aju bo ga ea kunuano, ka aiomon vite nonovio tu rivu vatitigio. Ana vaataro ka melijo tarako mĩesi narueĩ kuviviniene nalo abar kanalo yulu nalo amielko mĩarabo kalo, ka aviniu amei bereio. ²⁻⁴ Kuviviniene nalo neibano, jumo nene abe masou bo, abe kialo jidomiano napano nalo abarkar kialo baueĩ na kanalo sunsunu

ka mia aison bereio kanalo yulu nalo, mia nalo jumo nene nalo abe taboso ga, maka kialo jidomiano rivu tibe na ka avarkar kanalo bauei na sunsunu tai ka verenio sunsunu tabo, ana mia amijikia aison bereio.
⁵ Ana nalo aju rorea toro na soriano jiuu jibe na bano-o, mia maka naio rila soĝeli, ana merevono nalo nei miralo temi toru ana nalo amonmelio.

⁶ “Mia kanio bogiano viovare sebisaro, toro tai bio, berinavo ‘Toro na soriano, naio jo binime naruei. Kamiu kumei kuviviuo naio.’
⁷ Ana na merevono duelimo nei nalo ajevijo, ana amiñaukanio kialo yulu nalo ka avilvil rivu bereio. Amilakon julu na kanalo yulu nalo, a abitii batitig kialo sunsunu nalo.
⁸ Naruei nalo na abe taboso abitilubar ka kialo yulu nalo, vaataro ka mia añaarmaro, naruei nalo abika den kuluelo jimo nene, aberinavo ‘Aiou banalo, kamiu kubo, kuviyon kija kenemiu sunsunu rivan kumemi, ver ĵeli mia kenememi yulu nalo añaarmaro koviobo.’

⁹ “Mia nalo na abe masou, aberinavo ‘Vedeio ga, sunsunu maka rivare ka kumemi a kamiu bunu. Bo ka kamiu kuan ea yimo na ĵilĵiliano ka kuvulu kene-miu tai.’

¹⁰ “Naruei nalo napano abe taboso aba ka avulu kanalo sunsunu, ana bogo napano nalo aju koalabo kia ga vo, mia toro na

soriano naio boru. Naio ba jouro ea kiano vonuo, naliko merevono jimo na aju rorea naio, naliko abijurukar ea sinaniano na soriano. Naruei bogo napano tomu nalo aba aju jouro ruei, ana nalo ajeta-voko mñaratavo bo batitigio.

¹¹ “Karina iorou kanio, ana merevono nalo na abe taboso abinime bereio, abio aberinavo ‘! Kumanememi, kumanememi, jau kobijuku bo kajamo ka kumemi nuviedu joomo!’

¹² “Mia toro na soriano naio riverinavo ‘! Ierinio, kiniou neberii ka kamiu, kiniou maka nejikia bunu kamiu kube kei!’ ”

¹³ Mia Yesu berii jamerijiano nei bisi, ana naio berinavo “Mo, kamiu monokanio kuvitikar batitig rivu, bior kamiu maka kuvijikia legiano na vite nei a aura nene.”

Jamerijiano na tomu tolu na abitikar puruveru

Luka 18:11-27

¹⁴ Ana na Yesu mil berinavo “Mo, mia bogo na Kulorinio Kenerinio rime bereio, mia tibe ka bunu napano jamerijiano nei berenio, napano toro na toru tai na naio miomon ka mia naio riel riva koalabo ea buruveno dolu. Ana toro na toru nei naio bio kanano atevi na iñauano nalo ka amei aialio, naruei naio mil banlo, naio bar kanano saba nalo jua juñalo ka avitikar vatitigio, ka aiñau rivijaio.

¹⁵ Naio bitii vatitig kialo

jikiaiano, naruei ea nalo tai jumano naio midu siveu na puruveru jimo, ea dolu jumano naio midu siveu na puruveru juo a ea dolu jumano naio midu siveu na puruveru takurano ga, karina naio juvanlo, ana na naio ba jo koalabo kirisiou kija.

¹⁶ Naruei toro na bar siveu na puruveru jimo, vaarakurano ga naio ba mila imauano telabo ka puruveru nalo nei, bano-o naio bokar bereio siveu na puruveru jimo dolu bereio.

¹⁷ Mia ea bajago nene kia ga, toro napano mijev siveu na puruveru juo, naio bokar bereio siveu na puruveru juo dolu bereio. ¹⁸ Mia toro napano naio mijev siveu na puruveru takurano ga, naio ba mikil pili ea borotano, ana naio jivin puruveru napano be kiano tubo kanano.

¹⁹ “Naruei bogo jiou barlaka ruei bano, karina toro na toru na tomu tolu nei kialo naio binime bereio. Naruei naio jidom rial kanano puruveru nalo napano naio bario ban tomu tolu nei. ²⁰ Naruei toro na bokar siveu na puruveru jimo jukamu, naio binime jumolu jikili jukamu ea toro na toru nei mirano, naio bar bereio siveu na puruveru jimo dolu bereio. Naruei naio berenio ‘Tubo, Beamu jau kabar siveu na puruveru jimo ban kiniou, siveu jimo nene ninei. Mia nana kiniou nemi mau nabokario tenene ninei, be siveu na puruveru jimo bereio, napano kiniou

namiladu kanio be kanamo.’

²¹ “Naruei toro na toru nei naio berkanio, berinavo ‘A siva toru. Jau kobe kanaku atevi na imauano novo, jau kobokar vatitig bo laka kanaku imauano telisu na nemije monea jumamo, mo mia kiniou nevitiri larso ka mia jau kovitkar kanaku imauano dolu nalo na tortoru. Maraiu novo, jau komei kovijurukar kiniou kiteaku ea kanaku jokoluolu na tiniesaariano nei.’

²² “Karina toro napano bar siveu na puruveru juo beamu, naio binime jumolu jikili jukamu ea toro na toru nei mirano, ana naio berenio ‘Tubo, beamu jau kabar siveu na puruveru juo ban kiniou. Siveu juo nene ninei, mia nana kiniou nemi mau nabokario bereio tenene ninei, be siveu na puruveru juo, napano kiniou namiladu kanio be kanamo.’ ²³ Ana toro na toru nei berkanio, berinavo ‘A siva toru. Jau kobe kanaku atevi na imauano novo, jau kobokar vatitig bo laka kanaku imauano na telisu napano nemije monea jumamo, mo mia kiniou nevitiri larso ka mia jau kovitkar kanaku imauano dolu nalo na tortoru. Jau komei, kovijurukar kiniou ea kanaku jokoluolu na tiniesaariano nei.’

²⁴ “Karina, toro napano mijev siveu na puruveru takurano ga naio binime, jumolu jikili jukamu ea toro na toru nei mirano na berkovio ga, berenio berinavo ‘Koig,

kinious nejidomii ka jau ko-bijuku mēte. Jau komijikia kokilkili ea tiniavio na maka jau komebijo eaio, a jau komijikia kabar m̄ariesi ea buruiesi napano maka jau komebijaio. ²⁵ Bior tena, kinious nemerou, ana nabano nomidu van kanamo puruveru, nejivin joa borotano. Keialio, ninei be kanamo puruveru na jo bo ga jo.'

²⁶ "Mia toro na toru nei naio berenio 'Aa jau, toro va tai, jau komiovo toru. Jau komil searo ea kinious ruei, ka kober kinious nebe toro p̄ilipili tai jibe na jibe na, naruei verenio jau komial ka kinious nebe toro kouo tai jibe na bior vaio ana jau komidu kanaku puruveru jo kurano ga jibe na. ²⁷ Verenio jau kava kodu toa yimo na puruveru mia kinious nemijikia navar bulagio vija kirikiti nene, ka bogo na kinious nebinime i bereio jibe nei.' ²⁸ Ana na toro na toru naio ber ka kiano navitikariano nalo, naio berinavo 'Mo, kami kuva kuvidu denio puruveru na ea jum̄ano, kami kuvidu van toro napano naio bokar siveu na puruveru duelimo ruei. ²⁹ Kinious neber jibe nei ka kami, neber toro napano verenio be kiano saba ruei, mia naio mijikia rivokar tabunu bereio vo ka mia ve miroano, mia toro napano maka ve kanano saba tai, mia naio rila deven vite na telisu napano

be kiano. ³⁰ Mia taboso nei, kami kuvuku naio riva tavio ea vio na melijokouo, ea vio na tomu nalo ajum̄a ajegi a ajum̄a ajer m̄arijuvolo eaio.' "

Legiano na tibureiano

³¹ Mia Yesu naio mil berinavo "Bogo napano mia Kulorinio Kenerinio naio rimei naliko kiano nailiano nalo, ea kiano mermerano ka rive Parinio Tubo, naruei mia naio rimei ka mia totano ea kiano jobaro lu. ³² Naruei mia nailiano nalo avan ka avuru matatoko nalo nonovio na yetemeriba nei amei, ka mia atumolu atu kamu ea mirano, mo ka bogo na mia naio tiburevure tomu nalo, ana avan ea taara ve juo, tavukia toro tai napano naio jo bitikar kiano temeul nalo jiburevure kanano nunu nalo ka nani nalo. ³³ Mia parinio tubo nei naio tiburevure nunu nalo ka ava atua jum̄ano meruo, mia nani nalo ava atua jum̄ano mal. ³⁴ Ana mia naio river ka nalo na ea jum̄ano meruo, riverenio 'Kami kumei naruei, kube tomu nalo napano karam̄aku milivu ka kami. Kami kumei kuvidu jelemiu jouro ea kiano navenatuboiano, napano naio mila batitigio jororea kami ruei, ka bogo napano naio jii yetemeriba nei eaio. ³⁵ Kami kumei, bior ka bogo napano m̄a jijer kinious, ana kami kumije sinaniano ban kinious, a bogo napano m̄a midoujer

kiniau, kumijev uei ban kiniau. A bogo napano nebe valauo, mia kamiu kuburu kiniau naba joomo ea kunuemi, ³⁶ a bogo napano kiniau niabeku yauo, kamiu kubar kulum̃arauo ban kiniau. Bogo na kiniau nemie, kamiu kubinimei kumiadu ka kiniau, a bogo napano kiniau nojoa yimo na tetavokoiano, kamiu kubinimei kumitukunu bija kiniau.'

³⁷⁻³⁹ "Mia tomu nalo na memedu nei napano ajua jum̃ano meruo, mia nalo avika denio, averenio '? Tubo, jum̃abe? Jau kojom̃a koberenio kumemi numitum̃a numiijaso ea kiamo bogokouo nalo na jibe na, mia kumemi maka bunu tiniememi rimaio ka kumemi numila jibe na banso leleio. ? Kumemi numila vite nalo na nagi?"

⁴⁰ "Ana na Parinio tubo nei mia naio river kalo riverinavo 'Riano kiniau neber ka kamiu, bogo nam̃a kamiu kumila jibe nei ban toro na kiaku m̃aratavo nalo nei tai, bekurano ka ver naio be toro na jum̃abe, mia jibe ka kamiu kumila ban kiniau ga na.'

⁴¹ "Mia iorou kanio, mia naio ril bunu van nalo na ea jum̃ano mal, mia naio river kalo, riverinavo 'Kamiu kuvuro den kiniau, Atua miobaŋe ka kamiu ruei. Kamiu kuvan ea sebi na maka rijikia rim̃aro bogo tai, napano naio jororea kia Setano ruei naliko kanano nailiano nalo ka avan eaio. ⁴² Kanio bogo napano jijer

kiniau, mia kamiu maka kuvar sinaniano van kiniau, a bogo napano midoujer kiniau, mia maka kuvijev uei van kiniau, ⁴³ a bogo napano kiniau nebe valauo, mia kamiu maka kuvuru kiniau neviedu joomo ea kunuemi a bogo napano niabeku yauo, mia kamiu maka kuvar kulum̃arauo van kiniau, a bogo napano kiniau nemie, ŋeli na nojoa yimo na tetavokoiano, mia kamiu maka kumei kuviadu ka kiniau.'

⁴⁴ "Ana mia nalo averdoŋe Parinio Tubo nei, averinavo '?Tubo! Ana kumemi numi-also nagi napano jau jijerso, ŋeli napano midoujerso, ŋeli napano kobe valauo, ŋeli na niabemo yauo, ŋeli napano komie, ŋeli napano kojoa yimo na tetavokoiano? ?Ana bogo jum̃abe napano jau ko-jibe na, ana maka kumemi nuviedu nuvijaiso?"

⁴⁵ "Mia naio ril vanlo, riverinavo 'Riano kiniau neberii ka kamiu, bogo napano maka kamiu ku-visidomial ka kamiu kuvila tibe na van kiaku toro tai napano naio be toro na jum̃abe, nina jibe ka kamiu maka kuvisidom ka kuvila van kiniau.'

⁴⁶ Naruei Yesu mila nonovio kiano iliano, ana naio berinavo "Nalo na mia avan ka ajev vironiano tai napano maka rijikia ribisi bogo tai. Mia tomu na memedu nene nalo ava ajev meuliano napano maka rijikia ribisi bogo tai."

26

Ajidom auebin Yesu riñaro

Mak 14:1-2; Luka 22:1-2; Jone 11:45-53

¹ Ana telikiti napano Yesu berloglog kiano tomu nalo ka iliano nalo nei avona bisi, ana naio berii kalo, naio berinavo ² “Kamiau kumijikia ruei ka veua ana Jokoluolu na Sidomkariano Na Ioruriano tikario. Mia ea bogo na jokoluolu nene, mia nalo adu Kulorinio Kenerinio toa tomu nalo jumalo ka mia atukukakario ea mākolkolo ka mia naio riñaro.”

³ Naruei kanio bogo nene, tomu na tortoru na kulo lu nalo, naliko navurimāaraboiano na kulo Israel nalo aju abior ea parinio toro lu kunuano, napano siano Kaivas. ⁴ Nalo amil kavulio ka mia avokar Yesu bena ga ka mia tomu nalo ajikia re, mia nalo adu vironiano na māriano vanio. ⁵ Mia nalo aberenio, aberinavo “Kito maka rejikia rala ea bogo na jokoluolu, bior mia tomu nalo tiniel ser kito ve toru, mia uetubaiano ve toru, bior nalo telabo napano tiniel jii tete neibano ruei.”

Mere miyon bonotanunu ea Yesu parinio

Mak 14:3-9; Jone 12:1-8

⁶ Mia iorou kanio, Yesu naio joa mārkomeli na Betani, naio joa toro tai kunuano napano abio ka Saimon Burumieni, kunuano bior mieiano na burumieni jua naio nua.

⁷ Mia ka bogo tai napano Yesu jo jinano ea yimo nei kia ga vo, mia tira tai binimeia naio, tira nene midu bauei tai napano amimāukanio ea puruveru novo tai, napano bujo ka bonotanunu napano puruveru nene burutomoruo laka. Ana tira nei miyon nonovio bonotanunu nei ea Yesu parinio.

⁸ Mia bogo napano Yesu kiano naiagagoano nalo amial vite nei, mia nalo tiniel mimi, ana nalo aberinavo “?Ka venia ana naio mila kule bonotanunu na jibe na? ⁹ Verenio naio riñilvili kanio ga, mia naio mijikia rivokar puruveru ve toru eaio, ka mia naio rivar van talimasa nalo.”

¹⁰ Mia Yesu mijikia ka ajumā amil jibe na, ana naio ber kalo, berinavo “?Jumabe ana kamiau kumila lelan tira nei jibe na? Naio mila tonovo tai ban kinio. ¹¹ Talimasa nalo na, mia nalo atu damariga iviso ka kamiau, ka mia kamiau kumijikia kuvijailo, mia kinio, kinio noto re kitoliko tulaka. ¹² Vite napano tira nei naio milao, napano naio miyon bonotanunu nei ea niabeku, nina jibe ka naio mila batitig kinio rorea kanaku tiviniano. ¹³ Riano kinio neber ka kamiau, ea vio yetemeriba nonovio na averial kanaku ioluano nei eaio, mia monokanio mia atukunu bunu ka vite napano tira nei naio milao, ka mia asidomkario damariga

bereio kiano burum̃ara tini-etiiāno, napano naio tinien miia kiniou toru riano.”

Jutas berkar ka mia tiveluku ka Yesu

Mak 14:10-11; Luka 22:3-6

¹⁴ Karina kiano naia-gagoano duelimo ba juo [12] nei tai, napano siano Jutas na vio Kariot, naio ban ea tomu na tortoru na kulo lu nalo, ¹⁵ ana naio berinavo “?Verenio kiniou netiveluku ka Yesu riviedu ea jumemiu, mia kamiū kuvar venia van kiniou?” Ana nalo abulu ka puruveru silva duelimo va rolu [30] banio, ¹⁶ ana mo jikario ea bogo na, Jutas jom̃a jirag m̃arabo ka mia naio tiveluku ka Yesu vanlo eaio.

Naiagagoano nalo amiomon sinaniano na jokoluolu nene

Mak 14:12-16; Luka 22:7-13

¹⁷ Ana binimeī bokar bogoti napano be moti ka jokoluolu nei, napano abio ka bunu Jokoluolu Na Asen Beskit Na Mioboba, ana kiano naiagagoano nalo abinimeī kean Yesu, ana abika aberinavo “? Jau kojidom kumemi nuva nuvila vatitig vite nalo nene ea vio na vabe, ka mia kito rala Sinaniano na Sidomkariano Na Ioruriano eaio?”

¹⁸ Ana Yesu naio berdoṽe banlo, berinavo “Kamiū kuva Yerusalemō, kamiū kuvial toro na, kuverii kanio, kuverinavo ‘Kene-memi naverloglogiano naio berii kiano bogo binimeī

vaataro na ruei. Mia naio jidom naio naliko kumemi kiano naiagagoano nalo, numei nuvila sinaniano nei ea kunuamo.”

¹⁹ Ana Yesu kiano na-iagagoano nalo aba amila javukia napano naio berii kalo, ana nalo amila batitig vite nalo na jokoluolu nene.

Yesu berial ka mia Jutas tiveluku ka naio

Mak 14:17-21; Luka 22:14,21-23; Jone 13:21-30

²⁰ Naruei iorou kanio ana Yesu nalo abinimeī ea vonuo nene, ana bogiano binimeī, naruei Yesu binimeī naliko kiano naiagagoano nalo ajutano, ana nalo aju ami-jev sinaniano nene, ²¹ ana Yesu berenio, berinavo “Ri-ano kiniou neberii ka kamiū, be kamiū tai napano mia naio tiveluku ka kiniou.”

²² Telikiti na kiano naia-gagoano nalo amijog naio mil berii jibe nei, mia nalo amijog bova toru, ana nalo abiniu abivika denio, aberinavo “? Tubo, be kiniou kovio, a?”

²³ Mia Yesu berdoṽelo, berinavo “Toro napano kumemi ve juo nuvititi ka joko ea baju ve takurano naio naruei be toro nene.

²⁴ Mia Kulorinio Kenerinio naio monokanio rimaro tibe ka na Vivitauiano Lu berenio, mia toro na naio ritiveluku ka naio, mia rivova laka van naio, bo laka ka ver naio rimoluo re.”

²⁵ Mia Jutas, toro napano karina naio jiveluku ka Yesu, bika berinavo “?Naverloglogiano, be kei? ?Kiniou bo, a?”

Ana Yesu berdoŝe naio, berenio berinavo “Tenene ga naruei na jau koberenio na.”

Sinaniano na maaro

Mak 14:22-26; Luka 22:15-20; 1 Korin 11:23-25

²⁶ Telikiti napano nalo aju ajinan kia ga vo, ana na Yesu midu joko tai, ber siva ban Atua kano, karina naio bure kokorovio ana naio bar jian ban kiano naiagagoano nalo, naio berenio berinavo “Kamui kuvijevio, kamui kuvisenio. Nina be mokotenaku.” ²⁷ Karina naio mijev baja na m̃arjuml̃elu, ana naio mil berenio siva ban Atua kano, karina naio jian banlo, ana naio berinavo “Kamui kuviniu kumunu bitirano ga ea baja nei, ²⁸ b̃ior ninei be kanaku burukija, napano mia rila Atua kiano verikariano tu sikili, napano mia naio rioukar viekokoano na vijuku vovajano na tomu ve telabo kialo. ²⁹ Kiniou neberkar ban kamui, mia kiniou nomunu re bunu m̃arjuml̃elu na bereio, rivano-o mia nomunu m̃arjuml̃elu vou na kitoliko, ea Teta kiano navenatuboiano.”

³⁰ Karina nalo amijev iou tai maariano ea Iouano Nalo bisi, ana nalo abatavio, abano maariano ea Suku na Buruolivi.

Yesu berial ka mia Pitere rivar bonbonua naio

Mak 14:27-31; Luka 22:31-34; Jone 13:36-38

³¹ Naruei Yesu berii kalo, berinavo “Ka bogiano nei, mia kenemiu moneano ea

kiniou ajoru, kar vite nalo napano mia amei avokar kiniou. Mia tavukia ga na Atua berenio ea kiano Viy-itauiano Lu, napano naio berenio, berinavo

‘Mia kiniou nouebin toro na bitikar nunu naio rĩmaro, ana mia kanano nunu nalo avuro dedade atan ea vio nonovio.’ Sek 13:7

³² “Mia bogo napano ne-meul bereio den nam̃ariano, mia kiniou notukamu nava Kalele, ana mia kamui bunu monokanio kumei iorou.”

³³ Naruei Pitere berial kano, berinavo “Yesu p̃eli mia nalo dolu na aviniu kialo moneano ajoru kaso, ana avuro, mia kiniou maka nejikia notuvanso bogo tai.”

³⁴ Mia Yesu berdoŝe, berkanio berinavo “Riano kiniou neber kaso, mia ka bogiano nei ga, bogo na tormanio tokokoreko re vo, mia jau kavarbonbonua kiniou ve varolu, koverenio maka kejikia kiniou.”

³⁵ Ana Pitere naio berial meravo ban Yesu, ea miralo abiniu, berinavo “Verenio nalo asidom auebin kiniou bunu kito ve juo, nina bo ga na, mia kiniou maka nejikia navar bonbonuasos, ka never kiniou maka nove kanamo.” Mia kiano naiagagoano dolu nalo bunu aberii jibe na.

Yesu ba bolkouo yako Ket-semani

Mak 14:32-42; Luka 22:39-46

³⁶ Karina Yesu naliko kiano naiagagoano nalo aban ea vio tai, siano

Ketsemani. Naruei naio ber kalo, berinavo “Kamui kuvitua vio nei beamu vo, mia kiniou nava lie kija bereio, ka nava novolkouo ve telisu yako.”

³⁷ Naruei naio buru Pitere naliko Sepeti kenerinio juo, Yemesi naio Jone, nalo tolu naliko aban lie kija telisu bereio, mia ka bogo nei Yesu mijog kiano iviso binimei temi laka, naio mijog bova toru laka. ³⁸ Ana naio mil ban nalo tolu nei, berinavo “Vonganei, nemijog ni-unuku burukokorov toru, mila vaataro ka namaro kario. Aiou bo ka kamui kuvitevijo vija kiniou ve telisu beamu ea vio nei vo.”

³⁹ Ana Yesu miel ba lie kija telisu bereio, ana naio mijoru minie, dabuko mirano ka rivolkouo. Ana naio bio, berinavo “Teta o-o, verenio jau komijikia kala vite nei, aiou kiniou nejidom ka jau kejelar baja na jogvaiano nei den kiniou ka mia kiniou nomunu ea re. Mia kala re tibe ka na kanaku jidomiano, mia kala ea ga kanamo.”

⁴⁰ Karina, naio binimei bereio kean naiagagoano tolu nei, naio mialo ajumã amonmelio ruei. Karina ajevijo, ana Yesu berii ka Pitere, ber “?Jumãabe ana kamui maka kuvijikia kuvitevijo rivija kiniou ka aura ve takurano ga nei? ⁴¹ Kamui monokanio kuvitikar vatitig rivu, a kamui monokanio kumolkouo bogo nonovio, ka mia natiboliboiano nalo ala re kamui kuvijoru ea

kariano. Riano ga, kenemiu jidomiano jikili bo, mia niabemiu melukluku toru laka.”

⁴² Karina valuo nene, naio ban bereio ea vio nabano, naio bolkouo bereio, berinavo “Teta o-o, verenio jau maka kejikia kodular baja na jogvaiano na kiaku nei, mia kiniou monokanio nomunu eaio, bior monokanio tibe kanio ga na jau kojidomio.” ⁴³ Karina, naio binimei bereio, mial nalo tolu nei ajumã amonmelio bereio, bior nalo miralo jouo ajevijo dedeio.

⁴⁴ Naruei naio juvan nalo tolu nei aju ga, ana naio ban bereio ea vio napano naio bolkouo ber bereio iliano takurano ga, mila varolu ka ninei. ⁴⁵ Naruei naio binimei bereio kean nalo tolu nei, ana berenio “?Ei, kamui kumijilimebi, kamui kumonmel kia ga vo? ! Kamui kuvitikario! Vaataro ka bogo na Kulorinio Kenerinio naio rivan ea tomu na bova nalo jumalo naruei. ⁴⁶ Kito, kuvitumolu, ravano. Kamui kumial na, toro na jiveluku ka kiniou nana ju binimei vaataro ga naruei.”

*Nalo abokakar Yesu jikili
Mak 14:43-50; Luka
22:47-53; Jone 18:3-12*

⁴⁷ Ana bogo na Yesu naio joũa ber iliano nene kia ga vo, Jutas neibano naio be naiagagoano duelimo ba juo [12] tai, naio binimei, naliko tomu telabo na mira nalo abar iobogu na mira bija kialo nia nalo. A tomu na tortoru nalo na kulo lu nalo

naliko navurim̃araboiano nalo na kulo Israel, nalo naruei amiilalo abinimei.

48 Mia beamu ka nalo amaluvo, toro na tiveluku Jutas naio berial kijokijo tai banlo, naio berinavo "Toro na verenio kiniou neviviuo naio tukamu, naio naruei kamiu kuvokakar naio sikili," 49 mia bogo napano nalo amiyotuba, Jutas miel memedu ka Yesu, biviuo naio ana naio berkanio, berinavo "¡Bogiano bo-o, Naverloglogiano! Tuñaro to vjaso."

50 Ana Yesu berkanio, berinavo "Koig, im̃auano napano kobinimei kanio, mia jau kalaiio ga." Naruei nalo abinimei, abokakar Yesu jikili. 51 Mia bogo napano abokar naio jibe na, ana Pitere burular kiano iobogu, ãiligio je titire ea Parinio toro Lu kiano toro tai ana jelar tilinieno tivelinio. 52 Naruei Yesu mil banio, berinavo "Kodu vatitig kanamo iobogu rivan ea sivi nene bereio. Toro na jo midu iobogu na mira, mia naio rim̃aro ea iobogu na mira. 53 ?Kamiu kuberiam̃a maka nejikia nevio van Teta ka naio rijai kiniou? Verenio nevio van naio, mia ve vaarakurano ga, naio riila kiano taara na nailiano nalo ve telabo ka mia amei avitakar kiniou. 54 Mia verenio kiniou nala tibe na, mia iliano nalo nanua jua Vivitauiano Lu, mia maka ajikia amei ve riano, tibe kanio napano aberkario nua

ruei."

55 Mia Yesu mil ban tomu nalo nei, naio berinavo "¿Ka vaio ana kamiu kubar kenemiu iobogu nalo bija kenemiu nia nalo? Kubokar bena kiniou jibe na? ¿Peli kamiu kuberiam̃a kiniou nebe toro kouo na vinauano, ãeli na napano m̃a mue toro? ¿Mia legiano nonovio kiniou nojom̃a noberloglog tomu nalo ea Atua Kunuano Lu, mia jum̃abe ana maka kamiu kumei kuvokakar kiniou ea bogo na? 56 Mia vite nalo nei bo ga na, bior vite nalo na kamiu kumitu kumilaio, jibe ka ga napano naverialiano nalo aberialio nanua ruei ea Vivitauiano Lu, ana kialo iliano nalo nene, aju abinimei abe riano naruei."

Ana ea ga aura nei, na-iagagoano nalo ajuvan Yesu, nalo aburo ka naio.

Aburu Yesu ban ea komeli labo na kulo Ju nalo kialo

Mak 14:53-65; Luka 22:54-55,63-71; Jone 18:13-14,19-24

57 Mia nalo napano abokar Yesu, aburu binimei ka ala naio tumolu tukamu kean Kaivas, Parinio toro lu, napano naverloglogiano na tuboiano nalo naliko navurim̃araboiano na kulo Ju nalo kialo abinimei vio takurano ea kiano komeli nene ruei. 58 Mia Pitere bunu jakisor Yesu ka bogo nene, mia naio maka rivan vaatara ka naio, mia bogo na abinimei jouro ea burusio na komeli labo nei, Pitere naio ba jotano naliko Kaivas

kiano tomu na imãauano nalo, ka mia rijog von ka mia ala tumãabe ka Yesu.

⁵⁹ Naruei tomu na tortoru na kulo lu nalo, bija tomu na tortoru dolu nalo na aju joomo ea vioriano nei, nalo ajirag tomu nalo tai ka mia ajubolbo ka Yesu, ka mia aver vite nalo tai ka napano aial ka amijikia auebin Yesu riviorio. ⁶⁰ Naruei nalo amil, ana tomu telabo ajumolu, amijubolbo bano-o, mia vioriano nei makarial vite tai ea kialo iliano nalo rivare ka mia ala tibe na ka Yesu. Kialo iliano nalo beve dolu ga jibe na bano-o bisi ana tomu juo ajumolu, ⁶¹ aber iliano takurano ga aberinavo "Toro na naio berenio mijikia rue bulag Atua kunuano Lu, karina naio rivon vavin bereio ka bogoti ve tolu ga."

⁶² Naruei Parinio toro lu nei naio jumolu, mil ban Yesu, berinavo "? Jumãabe, jau koverdoþelo, þeli na makanio? ?Jumãabe ka iliano nalo namãa aju aber bulagio na?"

⁶³ Mia Yesu maka ril, naio ju buru ga. Naruei Parinio toro lu nei berkanio bereio berinavo "? Kiniou neber kaso, jau monokanio kover Atua Meul siano kover riano ka jau kobe Naverikariano, napano Atua kenerinio, þeli na jau maka kove naio? ?Jau monokanio koverialio vatitig van kumemi vonganei!"

⁶⁴ Naruei Yesu mil banio, berinavo "Vite nene naruei,

jau kjoimãa koberenio kiana. Mia kiniou neber ka kamiu, iorou kanio vesiou re, kamiu kuvial Kulorinio Kenerinio napano mia naio totano tivelinio vameruo ea Atua na moroano, a mia kuvial naio riyotuba ea melijo nalo ea yetemeriba."

⁶⁵ Mia Parinio toro lu nei, naio tiniën mimi mñele, ana mijede mñano kulukoti, ana naio berinavo "! Barei naruei! Toro na naio ber niegeniege Atua siano lu ruei. ? Kamiu kumijogio? ? Jumãabe ana roju rejirag bereio toro tai ka mia river bereio titai ka naio? ⁶⁶ ? Vioriano jidomii jumabe? ? Mia roviron tumãabe?"

Nalo amil aberenio, aberinavo "Bo kanio auebin toro na naio rimãaro."

⁶⁷ Naruei nalo abule mirano, a ajuku naio, mia tealó amijuba bilivilig naio, ⁶⁸ ana nalo amiyotel ea naio, abika denio aberinavo "? Ei, Naverikariano, jau koverial vonio, kenia mijubaso vonga na?"

Pitere barbonbonua Yesu Mak 14:66-72; Luka 22:56-62; Jone 18:15-18,25-27

⁶⁹ Ana ka bogo nene Pitere naio jotano jouro ea burusio nei, ana niatira tai napano jomãa bitikar yimo naio binimei, berinavo "! Uerei, jau bunu kamliko Yesu na vio Kalele neibano!"

⁷⁰ Mia kamu ea miralo abiniu, Pitere barbonbonua tenei, naio berinavo "Kiniou maka nejikia tena jau kjoimãa koberenio na."

⁷¹ Naruei naio buro den

niatira nene, batavio jua morouo na toru na burusio na komeli nei.

Ana ea vio na, niatira dolu mialio, ana naio berii ka tomu nalo na aju vaataro, berinavo “Tete na, naio naruei naliko Yesu re Nasarete.”

⁷² Ana Pitere naio barbonbonua tena bereio, naio mila kiano iliano jikili, mia naio berinavo “Peli ga, kin-iou maka leleio nejikia toro na.”

⁷³ Ana maka vesiou, ana tomu nalo na aju vaataro ea morouo nene abinime i ea Pitere, aberii kanio aberinavo “Ninei be riano, jau kobe nalo tai, bior jooa na kojomā kabar ka kiamo iliano, jibe ka kulo Kalele nalo.”

⁷⁴ Mia Pitere naio mila iliano jikili lie vo, ana naio berinavo “!Maka leleio! !Riano ka tiniabene! !Kiniou neberenio ruei, maka nejikia tete na!”

Ana memedu ka bogo nene, tormano tai jokokoreko, ⁷⁵ ana mila Pitere tinien maio ka Yesu kiano iliano, napano naio berkanio berinavo “Riano kiniou neber kaso, mia ka bogiano nei ga, bogo na tormano tokokoreko re vo mia jau kavarbonbonua kiniou ve varolu, koverenio maka kejikia kiniou.” Naruei Pitere batavio, naio jegi mia jegi ka tinie na jogvaiano toru.

27

Abur Yesu ban ea parinio

27:3 Imāuo 1:18,19

tubo na Romo napano jomā bitikar Israel

Mak 15:1; Luka 23:1-2; Jone 18:28-32

¹ Naruei kavijo, binime i bogo na mērenio bavin, tomu na tortoru na parinio kulo lu nalo naliko navurimāraboiano na kulo Israel nalo, ajutano bereio ka alavon ka avirakar mārabo tai rivu, ka mia rila ana Yesu monokanio rimaro. ² Mia bogo napano amil bisi, ana amiorkar Yesu jumano, ana aburu naio ba ban Pailat, napano naio be Parinio tubo na vio Romo napano naio bitikar Israel ka bogo na, ana nalo amidu Yesu joa Pailat nene jumano, ka mia naio tibureio.

Jutas ga milabin naio bereio

Imāuano 1:18-19

³ Mia Jutas, napano naio jiveluku ka Yesu karina, naio bitilubar ka ajibure Yesu ruei ka monokanio mia naio rimaro, ana naio mijog bova toru ka vite na milaio. Ana naio bilig kiano jidomiano bereio ruei, ana naio bar bereio silva duelimo va rolu [30] nei, ba ban tomu na tortoru nalo nanua abar banio jukamu. ⁴ Naruei naio ber kalo, berinavo “Kiniou nabijuku bova bior nejiveluku ka toro na maka rila titai leleio tokoro, mia kanaku iliano ga mila ka mia ala bin naio rimaro.”

Ana nalo nei aberii kanio ga, aberinavo “? Ai koig, jumabe ana jau kobinime i

kejegi bereio ban kumemi?
Kumemi nubisi denso ruei.”

⁵ Naruei Jutas ĩilig m̃lelea ga puruveru nalo nei joomo ea Atua kunuano Lu, ana naio batavio, ba jelan burujono ka teli, ka naio riñaro.

⁶ Mia tomu na tortoru na kulo lu nalo nei aba abar puruveru nalo nene, naruei nalo aberenio “Puruveru nei, burukija na toru miou kario ruei, ana ea kiado tuboiano, maka rejikia rodu puruveru na jibe na toa basaro na Atua kunuano Lu.” ⁷ Ana nalo aberiio, karina nalo abar puruveru nene, aba abulu ka niatano tai, napano beamu, siano “Borotano Na Tanoĩili,” naruei nalo ajuvan niatano nei be pakeltavo na valauo nalo m̃alo. ⁸ Tenene na, binimeĩ bokar banei, tomu nalo ajuñña abio niatano nene, aberenio “Borotano na Burukija.”

⁹ Vite na jibe na, ana mila Naveri-aliano Jeremaia kiano iliano tai re nua naio binimeĩ be riano, napano berenio

*“Abar puruveru silva veru du-
elimo va rolu [30], bare
ka napano kulo Israel
aberenio naio bare ka
avulular ka toro,*

¹⁰ *ana nalo aba abulular
borotano nei den
toro nam̃a miñauka
tanoĩili, jibe ka na
Atua berii ka kiniou ka
noiñau kanio.” Sek
11:12-13*

*Yesu jumolu jukamu ea
Pailat mirano*

*Mak 15:2-5; Luka 23:3-5;
Jone 18:33-38*

¹¹ Ana nalo aburu Yesu binimeĩ jumolu jukamu ea Parinio Tubo Pailat, ana na bika den Yesu berinavo “?Jau kobe Parinio tubo ka kulo Israel nalo ĩeli na makanio?”

Ana Yesu mil berdoĩeio, berinavo “Tenene na, jau ko-joñña koberenio na.”

¹² Mia bogo napano tomu na tortoru na kulo lu nalo naliko navurim̃araboiano nalo aberii lualua vite nalo telabo kar Yesu, mia Yesu maka bunu riverdoĩe titai. ¹³ Mia Yesu naio juburu ga jibe na, naruei mila Pailat bika bereio, berinavo “?Jum̃abe, jau maka kosidomial ka ajuñña aberenio vite telabo na bova karso?”

¹⁴ Mia ea tiyelinio na vite nalo na ajuñña aberenio nei, mia Yesu maka leleio riveriĩe titai vanlo, naruei Parinio tubo nei miilo toru kanio.

*Pailat mijamo ka Yesu
naio monoka riñaro*

*Mak 15:6-15; Luka 23:13-
25; Jone 18:39-19:16*

¹⁵ Ka bogo nene, mia nalo aju kia ga vo ea Jokoluolu na Sidomkariano Na Ioruriano, mia ka yuka nonovio ea jokoluolu nei, Parinio tubo na Romo nei naio joñña mila vite tai ka kulo Israel nalo. Naio jibe ka napano verenio nalo tealó ajua tetavokoiano, ana nalo amijikia aver nalo tai kalo, ka mia parinio tubo

nei naio rijamo ka naio riva tavio. ¹⁶ Mia ka bogo nei, toro na poletik tai joa teta-vokoiano, napano mia tomu nalo amijikia batitig naio, siano Yesu Barabas.

¹⁷ Naruei bogo na tomu nalo abior vio takurano nalo telabo ea vio nei, Pailat bika denlo, berinavo “?Kamui kumisidom kiniou najamo ka kei taluvo riviedu bereio ea kamui? ?Yesu Barabas, ŗeli na Yesu na aju abio naio ka Naverikariano?” ¹⁸ Pailat bika jibe nei, bior naio mijikia ruei ka tomu nalo na tortoru na kulo Ju nalo, nalo ga aburu Yesu binime banio bior imauano na jokuano ga, bior kialo tomu nalo ajaaro toru ka Yesu.

¹⁹ Ana ea bogo na bunu napano naio jotano ea vio na tibureiano ka rila iliano nei, mia kouano miila toru binime banio berinavo “Jau kala re titai ka toro na. Naio maka rila titai, mia ka bogiano kiniou nomonbovui naio, mia vonganei kiniou nomijog bova toru kario.”

²⁰ Tenene na, Pailat jidom tuvan Yesu, mia tomu nalo na tortoru na kulo lu nalo naliko navurim̃araboiano na kulo Ju nalo, amila bulag tomu nalo kialo jidomiano nalo, ajikili laka kalo, aberinavo monoka averii ka Pailat naio tuvan Barabas, mia naio rila Yesu riva rimaro.

²¹ Naruei Parinio tubo nei naio bika denlo bereio, berenio berinavo “?Kamui kumisidom kiniou najamo ka tomu juo nei, na vabe nene naio taluvo rivano?”

Ana nalo abio jouo, aberenio aberinavo “Barabas.”

²² Naruei Pailat bika denlo, berinavo “?Mo, bo ga, ana mia kiniou nala tumabe ka Yesu napano ajuma abio naio ka Naverikariano?”

Mia nalo abiniu amiaga jouo, aberenio “!Kotukukar naio toa m̃akolkolo!”

²³ Ana naio berinavo “?Kar vaio? ?Venia bova napano naio milao?”

Mia nalo amiaga kilkil, aberinavo “Kotukukario, kotukukario toa m̃akol kolo.”

²⁴ Telikiti na Pailat mial ka maka rijikia riverburelo, bior uetubaiano jumolu m̃ele ruei, ana naio midu baju na uei tai, naruei kamu ka tiniobi nei, naio jekon jumano, ana naio berenio “Mia burukija na toro nei toa re kiniou. Kiano m̃ariano naio be kenemiu imauano ga.”

²⁵ Naruei tomu nalo amil aberdoŕe, aberenio “Bo ga na, jibe na garuei ana kumemi numisidom, napano kiano m̃ariano be kenememi imauano, a napano kiano burukija naio toa kumemi vija kenerimemi nalo.”

²⁶ Ana Pailat naio mijamo ka Barabas banlo, jibe ka na nalo ajidomio, ana naio midu Yesu joa kiano kulo na mira nalo jumalo ka avitivio, a ka avuruio rivan ka atukukario toa m̃akolkolo.

Kulo na mira nalo amiyotel ea Yesu

Mak 15:16-20; Jone 19:2-3

²⁷ Naruei Pailat kiano kulo na mira nalo aburu Yesu

abatavio ea vio medave na kanano komeli nene, mia nalo abio bunu kulo na mira taara dolu nalo ka amei aial Yesu. ²⁸ Naruei nalo amiya bulag kanano kuluni-abene, ana amiya kulukoti tai ea naio napano niabene be vabolo jibe kanio namã parinio tubo nalo amiyaio, ²⁹ naruei nalo abar tilikou abili vatitig bisi, ana amive joa parinio, jibe ka parinio tubo kanano batubatu tai, ana nalo amidu bunu iesi tai joa jumãno meruo ka naio rivokario. Naruei nalo aju aminie ka sudu jaalo kanio, ana nalo aju amiyotel eaio, aberinavo “! Kumemi nubameneaso, jau Parinio tubo novo na Kulo Israel kialo!” ³⁰ Ana nalo aju abule titia naio, a amidu burusub-avio nene, amue ka Yesu pariparinio. ³¹ Mia bogo napano amiyotel ea naio bisi, ana nalo amiyalar kulukoti vabolo nei denio, ana amiya mãno kuluniabene ea naio bereio, ana nalo aburu naio, abatavio ka atukukakario ea mñakolkolo.

Ajukukar Yesu ea mñakolkolo

Mak 15:21-32; Luka 23:26-43; Jone 19:17-27

³² Ana bogo na kulo na mira nalo aburu mñarabo ka Yesu aba tavio, ana nalo amileal toro na vio Saireni tai, siano Saimon, naruei nalo ajutua naio ka naio kija rudu Yesu kiano mñakolkolo rivano. ³³ Mia nalo aba abokar suku tai, napano siano Kolkota, napano nioti

nene berenio vio na jibe kanio bordada. ³⁴ Bogo napano nalo amijivi ea vodobi na suku nene, nalo ajidom adu mñarjumẽlmẽlu tai van Yesu ka rimunuio, mia mñarjumẽlmẽlu nei vati titai napano mijeia juaio, ka mia rila Yesu niabene je ka mia rijog re rijalele m̃ele, mia bogo napano Yesu miomo vonio, mia maka sidom rimunuio.

³⁵ Nalo aburu Yesu bano, ana ajukukakar naio ea mñakolkolo. Karina, nalo amila jibe ka na amiere mñabujo ka aleal ka mia kei rivar Yesu m̃ano kuluni-abene tai a kei rivar dolu nene, ³⁶ ana nalo ajutano ea vio nene ka aviti kuku ka naio. ³⁷ Ana nalo ajiri verialiano tai, ajukukario jo mave ka parinio, naio berial vite na mila amuebin naio biorio, napano naio berenio “Nina be Yesu, Parinio tubo na kulo Ju nalo.”

³⁸ Mia nalo amidu tomu juo na vinauano ajukukakarlo bunu ea mñakolkolo jibe ka Yesu, amidu tinene jo tivelinio vameruo, a tinene jo tivelinio vamãli.

³⁹ Naruei tomu nalo napano m̃a amiel abarlaka ea vio na, aḽiligṽilig pariparilo, aberii niegeniege Yesu liki, nalo aberinavo ⁴⁰ “!A! Jau m̃a na, nanua m̃a kober komijikia kala bulag Atua Kunuano Lu, ka mia bogoti ve tolu ana koivon kar vavin bereio, mia jum̃abe naruei? !Ee, mia bo ka

jau kalarur kanamo meu-
liano vonio! !A verenio jau
kobe Atua kenerinio riano,
kataluvo den m̃akolkolo na,
ana katabulu!”

⁴¹ Ea bajago nene ga bunu,
tomu na tortoru na kulo lu
nalo naliko naverloglogiano
na tuboiano nalo naliko
navurim̃araboiano nalo
aju abital eaio, ⁴² nalo
aju aberinavo “! Peli naio
milarur tomu dolu nalo
telabo ruei, mia vonganei,
naio maka rivare ka rilarur
naio! ?Naio be kito kulo
Ju nalo kiado Parinio Tubo
na, p̃eli na makanio? Bo ka
naio tabulu den m̃akolkolo
vonganei, ka mia kito
romonea naio. ⁴³ Toro na
naio berenio naio biekoou
ea Atua, naio berenio naio
be Atua Kenerinio. !Mo, kito
reial vonio, verenio Atua
jaaro kanio, mia naio rilarur
naio vonganei!”

⁴⁴ Mia tomu juo na vin-
auano napano ajukukakarlo
ea m̃akolkolo jibe ka Yesu,
naljuo bunu amil bova ka
Yesu, abironkar nalo nei
ka kialo ilivovaiano nalo
nalikolo.

Yesu m̃aro

Mak 15:33-41; Luka
23:44-49; Jone 19:28-30

⁴⁵ Ana ea legiano viovare,
ana melijokouo binime
miununuko vio reraio, mia
jo jibe na bano-o bokar
m̃erenio tolu niogoravo,
⁴⁶ mia vaatara ka bogo
na, Yesu miaga jouo ea
kiano iliano memedu, naio
berinavo “? Eli, Eli, lam̃a
sabatani?” napano berenio

“? Kiaku Atua, kiaku Atua,
ka vaio ana kojuvan lelan
kiniou nojo jibe nei?”

⁴⁷ Mia tomu nalo nei tai
ajua vio na, nalo aju abitii
vite nalo na malmaluvo,
nalo amijog belia Yesu miaga
jibe nei, nalo aberenio “Toro
na naio jo bio tormoruo
Elaija, ka rimeij rijai naio.”

⁴⁸ Mia soṽeli ga, nalo tai jik-
iti binime, midu burujumu
tai, miyon m̃arjuṽelṽelu na
mijea ban eaio, julu kario ka
iesi tai, ana jianio ban Yesu
ka rimunuio. ⁴⁹ Mia kulo
dolu nalo aberenio “!Ei, jau
koto vo! Reial vonio, p̃eli
mia tormoruo Elaija rimeij
rilarur naio bo, p̃eli na mia
rimeij re.”

⁵⁰ Karina Yesu miaga jouo
bereio, naio buru maaria
kanano jegi, ana juvan ni-
ununo bano, ana mo naio
m̃arodobi liki.

⁵¹ Monloglog ea bogo
nene ga, jagidago na ea
Atua Kunuano Lu, napano
joko vio lu na be vio lu
laka, naio buruṽe tivelinio
juo, jikario mave batove
boru yetano. Mia m̃ii
mukulkulu ka borotano, ana
puruveru nalo na tortoru
aburuboṽelo, ⁵² mia ea
pakeltavo, martanbo telabo
na tomu nalo na memedu
nua ajuvavo, mia tomu
nene nalo amemeul bereio.
⁵³ Ana amolmoluo den salo
m̃artanbo, mia iorou ka
bogo na Yesu bunu meul
bereio ea nam̃ariano, nalo
nei amiel aban ea bu-

lukomeli lu na Yerusalemo, naruei tomu telabo amialo.

⁵⁴ Naruei kulo na mira nalo, naliko kialo toro na toru, napano aju abitikaŕ Yesu, bogo na amijog mĩi mukulkulu, nalo amial vite nalo na amalmaluvo, nalo amerou toru, amemebiju, ana nalo aberenio “! Aue, tomu nalo, toro nei be Atua Kenerinio riano ga!”

⁵⁵ A tire nalo telabo ea vio na, nalo ajikili aju koalabo, aju abitivitii Yesu. Nalo na, nanua ajaluvo Kalele ruei, ajumã ajakisora Yesu bano-o, a nalo ajumã amiija naio. ⁵⁶ Ana iviso ka tire nalo nei, tolu nene tai be Mere tira re Maktala, a Mere napano Yemesi naio Yoseve kenielo, a tira napano Sepeti kouano.

Yoseve jivin Yesu

Mak 15:42-47; Luka 23:50-56; Jone 19:38-42

⁵⁷ Naruei toro tai na vio Arimatea naio jo, napano naio be Yesu kanano naia-gagoano, a naio be toro na sanibaiano, siano Yoseve. Naruei bogo napano vaataro ka mĩerenio rivatove, ⁵⁸ naio ba jikili jukamu ka Pailat mirano, ana naio bika Yesu mokotenano. Naruei Pailat berii ka kiano kulo na mira nalo ka adu Yesu mokotenano rivan naio. ⁵⁹ Ana Yoseve naio midu Yesu mokotenano, mijuvulukoio ka kulumãarauo tai na miuvu bo, ⁶⁰ ana naio midu ba joa mãano buluvae vou, napano aje batitigio vonga. Ana amilivlivi ka puruveru

na toru nene binimeŕ, ajubonkokar buluvae nei m̃aratavo nene, ana Yoseve nalo aban bereio. ⁶¹ Ana Mere juo nei, tinene tena vio Maktala, naliko naljuo dolu nene, abinimeŕ ajua vio nei, ajutano memedu ka m̃aratavo na buluvae nei napano Yesu mokotenano jo joomo eaio.

Kulo na mira nalo ajukuku ka buluvae

⁶² Vite nalo na amalmaluvo ea legiano na ka rila vite nonovio atu batitigio ea Legiano Lu. Mia bogoti dolu nene, napano naio be Legiano Lu nei naruei, tomu na tortoru na kulo lu nalo naliko Varisis nalo aba ajumolu aju kamu ea Pailat mirano, ⁶³ nalo aberinavo “O Pailat, kumemi numisidom nuverial titai kaso beamu vo, napano kumemi numitumã numisidomii kia ga toro na sibiano nei, ka bogo napano naio meul kia ga vo, ana naio jomã berkar berenio ‘lorou ka legiano ve tolu, mia kiniou nemeul bereio.’ ⁶⁴ Tenene na, kumemi numisidom nuvika denso, ka jau keila kanamo kulo na mira nalo tai avan ka atukuku ka buluvae na riva ribisi ea legiano tolu nene. Tibe m̃a na mia kiano naiagagoano nalo amei avinalar ka mokotenano, ana mia nalo ala sibi, averial ka tomu nalo averenio ‘Naio meul bereio ea namãariano.’ Verenio tibe na, mia kiano sibiano na

iorou nene mia naio rivova laka, tovulu nana jukamu.”

⁶⁵ Naruei Pailat berii kalo berinavo “Mo, bo ga, kamiu kuvuru kiaku na mira nalo tai avano, ka ala vite nonovio tibe ka na kamiu kumisidom, ka kuvitkar vio na.”

⁶⁶ Ana nalo aba amila vatitigio puruveru nei a abijuru ka bijuru tai, ka verenio toro tai rikulkulu ka veru nei, mia bijuru nene rivurikorovio, ka mia amijikia avitilubarario. Ana abar bunu kulo na mira nalo ajukuku ka vio nene.

28

Buluvae beteau jo

Mak 16:1-10; Luka 24:1-12; Jone 20:1-10

¹ Legiano Lu barlaka, ana legiano napano binime iorou, napano be legiano moti na sude, bogo napano mñerenio mijivi, ana Mere na vio Maktala, naljuo Mere dolu, abe juo aba ka aial buluvae nene. ² Naljuo aba aboru ea vio nei, soḡeli ga mñii mukulkulu toru, bior Atua kiano nailiano tai moluo den vio mave binime ea yetemeriba, melivlivilar ka puruveru nei, ana naio ba jotano mave eaio. ³ Mirano merera o-o mia, kiano kuluniabene meravo a miuvu mia miuvu kirinovo, ⁴ mia bogo na kulo na mira nalo amialio, nalo amerou kilkil bano-o mia mña amarmaro yulu kanio garuei aju.

⁵ Naruei nailiano nei naio mil ban tira juo nei, naio

berinavo “Kamjuo kumerou re. Kiniou nemijikia ka kamjuo kubinime nei kar ga Yesu napano ajukar naio ea mñakolkolo, ⁶ mia naio maka bunu toa vio nei, naio meul jumolu bereio ruei, jibe kanio napano naio berkario jukamu. Kamjuo kumei kuvial vio napano nanua mokotenano mon eaio. ⁷ Naruei kuve juo kuvan soḡeli, kuverialio ka kiano naiagagoano nalo ka naio meul bereio den namariano. Mia vonganei, naio tukamu rivatove Kalele, mia kamiu kuviniu kuvatove bunu kuvial naio ea vio na. Ninei naruei be kanaku iliano ban kamjuo.”

⁸ Naruei naljuo ajuvan buluvae, amila soḡeli aba. Naljuo abano jibe ka napano amerou kia ga vo, mia ajaaro toru bunu. Naruei abe juo ajikiti aban ka averial lillianiano nei ka kiano naiagagoano nalo, ⁹ mia naljuo aju aba kia ga jibe na, ana abitavo bija Yesu. Amiilo binvinlo garuei, ana naio mil banlo berinavo “Kavijo bo.” Naruei naljuo aba aminie yetano ka Yesu jaano, ana abe juo abokar jaano, ana amilotu kanio. ¹⁰ Naruei Yesu berii ka naljuo nei, berinavo “Kamjuo kumerou re. Kuve juo kuvan bereio kuverialio ka kuruaku nalo ka mia nalo ava Kalele, naruei ea vio na mia nalo amijikia aial kiniou.”

Kulo na mira nalo aba aberialio vite nalo nei

¹¹ Bogo napano tira juo nei aban bereio ea naiagagoano nalo, naruei kulo na mira nalo tealo aban bereio Yerusalemo, aberial vite nalo na amalmaluvo ka tomu na tortoru na kulo lu nalo. ¹² Naruei kulo lu nalo nei aba vio takurano naliko navurim̃araboiano nalo, aberii vite nei bano-o, bisi na abironikar ka abar veru toru ban kulo na mira nalo nei, ¹³ ana nalo amil jikili banlo, aberinavo “Kamii monokanio kuva kuverialio ga ka tomu nalo, kuverinavo ‘Kiano naiagagoano nalo ga abinimei bogiano, bogo napano kumemi numitum̃a numonmelio, naruei nalo abinalar ka mokotenano, amidu abano.’ ” ¹⁴ Aber kalo bunu, aberinavo “Verenio iliano na tenei riva rivoru ea Pailat, mia kumemi nuva nuvila vatitigio vija naio, mia kamii kuvijog re bunu iliano tai.”

¹⁵ Naruei kulo na mira nalo nei ajaaro ka veru nei, ana abario naruei, ana nalo aba amila ilisibiano janea vio jibe ka na aberii kalo, mila ana Kulo Israel nalo ajum̃a aberver iliano nei binimei bokar banei.

Yesu binimei ea kiano naiagagoano nalo

Mak 16:14-18; Luka 24:36-49; Jone 20:19-23

¹⁶ Naruei naiagagoano duelimo ba tai [11] abatove Kalele, ea burusuku na Yesu berii kalo, ¹⁷ mia bogo na nalo amial naio nalo amilotu ka naio, mia nalo tealo ajidom dede ga ka

be Yesu ðeli na maka ve naio. ¹⁸ Naruei Yesu binimei vaataro kalo, ana naio berii kalo, berinavo “Atua mijamo ka vite nonovio jua jum̃aku, napano mave a na vio yetemeriba nei bunu, ka mia kinioi neje tuboiano kalo. ¹⁹ Tenene na, kinioi nemiila bulag kamii naruei, ka kamii monoka kuvan ea m̃atatoko nalo ea vio yetemeriba reraio, monoka kamii kuvurulo amei ave kiaku naiagagoano nalo, napano kuvaruei ealo ea Teta, Kenerinio a Niununo Lu sialo, ²⁰ a napano kamii kuverlogloglo ka mia ajogkar iliano nalo napano kinioi neber ka kamii ruei. Mia monokanio kamii tiniemiu rimaio ka tulaka ka na mia kinioi noto kitoliko dam̃ariga, rivano-o rivokar juluvati na yetemeriba. Mm.”

Yesu Kristo Kiano Ioluano Vou Napano MAK Bivitauiaio Verialiano Moti

Tukunu bulati na niosi nei
Niosi nei Yesu Kristo Kiano Ioluano Vou napano Mak Jirio Iliano nei naio berinavo ioluano vou nei, napano be Yesu Kristo kiano Ioluano Vou, Atua kenerinio. Mak jiloglog napano Yesu be toro na iñauano, a moroano joa kiano iliano. Kito romjikia roial kiano moroano ea bajago nei napano naio jo berloglogii tomu nalo, a napano mije moroano ka riljilbulag sim̃aro, a ka ridu bulag tomu nalo kialo kariano. Yesu berial ka naio be Kulorinio Kenerinio napano binimeĩ ka sian kiano meuliano ka ridu bulag tomu nalo kialo kariano, ka rila lo ajev ioruriano. Mak berii Yesu kiano vremesiano nalo liei jovulu napano naio berii kiano iliano nalo.

Ea niosi nei, beamu Mak berii Jone Baruei a kiano iñauano, bija napano Jone baruei ea Yesu. Iorou naio berii napano Sim̃aro mila von Yesu. A iorou ka iliano bulati nei, naio judu ka berii Yesu kiano iñauano napano naio jo mila tomu nalo napano amie amijog bo bereio, bija napano naio jo berloglog tomu nalo. Bogo na Yesu jo mila kiano iñauano nalo, bogo

nonovio kiano tomu nalo aju amijikia naio liei. Mirano maariano nalo na niosi nei aberii Yesu kiano meuliano ea kiano sude maaro ea yetemerba nei, a vite burtumoruo napano naio berenio, nina kiano m̃ariano, bija napano naio meul bereio.

Ea mirano duelimo ba ari [16] tomu miroano amonea aber Mak bivitauia tukunu maaro ea togio arolu [8] ga mia torogio iorou kanio, toro dolu tai bivitauiaio.

Tukunu nalo na ajua niosi nei

Jone Baruei kiano iñauano 1:1-13

Yesu kiano iñauano yako

Kalele 1:14—9:50

Yesu jaluvo den Kalele ban yako Yerusalemo 10:1-52

Yesu kiano sude maariano napano mila kiano iñauano yako Yerusalemo a ea vio nalo jeliviv kean Yerusalemo 11:1—15:47

Yesu meul bereio 16:1-8

Yesu miyotuba kean kiano tomu nalo bija naio bavin ea Tiniabene 16:9-20

Jone Baruei naio joa vio yauo, naio berial Atua kiano iliano

¹ Niosi nei, naio be Ioluano Vou na Yesu Kristo kiano, Atua kenerinio.

² Tukunuano na ioluano vou nei naio jikario bija Jone Baruei, jibe napano Atua kiano Iliano Lu beriio nuanua ruei, ea iliano tai napano naverialiano Aisea berialio, napano Atua naio berenio, berinavo

"Naio be toro tai na ridu kiaku iliano, napano kiniou nemiila naio biedu jukamu kaso, ka rila vatitigio kiamo m̃arabo nalo ameravo rivu. Mal 3:1

³ *Mia naio joṃa bio ea vio yauo, berinavo*

'Kamui kuvila vatitigio m̃arabo nalo na Tubo Atua kiano, nalo amemedu rivu, ka naio mijikia rieliel ealo, naio rimaluvo ea kenemiu meuliano nalo!'" Ais 40:3

⁴ Jibena naruei, Jone Baruei naio miyotuba ea vio yauo ea tanobuku na Yutea, ana naio jo mioliolu ka Atua kiano iliano ban tomu nalo. Naio berial banlo berinavo "Kamui monokanio kuvilig kamui rivior kenemiu kariano nalo, a kumei, ana mia navaruei ea kamui ka uei, naruei mia Atua riviekokoa kamui riviorio." ⁵ Mia tomu telabo laka yako Yerusalemo a ea komeli dolu nalo na ea tanobuku na vio Yutea, nalo aban ka aiagago ka Jone, naruei nalo ajum̃a aber bulag kialo vovaiano nalo ban Jone ana naio baruei ealo ea marauei na Yortano.

⁶ Mia bogo napano Jone Baruei joa vio yauo jibe na, naio mila javukia tormoruo naverialiano re nua nei, Elaija, jibe napano naio maka to riya kulum̃arauo novo nalo leleio, m̃ano kulukoti abie bija vijinio temeul na toru tai ga kamel,

mia miorikar m̃ano kulukoti nene bija niati kulubue marauo ga. Mia sano sinaniano ea vio yauo nene, be surubu nalo ga bija vite sese nalo nei napano jago deden mir̃aukanio.

⁷ Ana Jone berkar ban tomu nalo, berinavo "Mia toro tai, napano kiano moroano loa kiniou, naio mia takisor kiniou rimei. Toro nene loa ka kiniou, mia kiniou maka navare ka nomon korkor neialar kiano kulubue, p̃elina nala im̃auano dolu tai na jibena van naio. ⁸ Kiniou nabaruei ea kamui ea uei ga, mia naio rivaruei ea kamui ea Niununo Lu."

Jone naio baruei ea Yesu

Mataiu 3:13-17; Luka 3:21-22

⁹ Mia maka vesiou, Yesu juvan komeli nei Nasarete, ea tanobuku na Kalele, binimei ea vio na ea marauei nei Yortano, ana Jone baruei ea naio ka uei nene. ¹⁰ Bogo napano Jone baruei ea Yesu bisi, Yesu binimei mave, jaluvo den uei, mia vaarakurano ga tiniabene betavo, ana naio mial ka Niununo Lu jo batove jibe ka vaama tai napano binimei yetano, bujo joa naio. ¹¹ Ana amijog Atua na tiniabene nei mil batove, berinavo

"Jau kobe keneriku novokario ga takurano na, a tinieku jiiso toru. Kiaku jidomiano joaso, kiniou najaaro toru kaso."

Sim̃aro mila von Yesu

¹² Ana ea bogo nene bunu, Niununo Lu buru Yesu naio takurano ban lie ea vio yauo, ¹³ ana Yesu joa vio na ba bokar bogoti duelimo va veri [40] napano bogo nonovio Simaro jom̃a mila von naio laka. Yesu naio jo bija tededen nalo ea vio nene, mia Atua kiano nailiano nalo abitikar naio.

Yesu naio jikar kiano iñauano yako Kalele

Mataiu 4:12-17; Luka 4:14-15

¹⁴ Mia iorou, abinimei abokar Jone Baruei, ana abuku naio ban ea yimo na lakoiano. Mia Yesu mijog lilianiano nei, karina jaluvo den vio nei, naio ba batove bereio ea tanobuku na vio Kalele, ana jikar ea bogo na, naio jo mioliolu ka Atua kiano Ioluano vou. ¹⁵ Bogo na naio mioliolu, jo berinavo “Vonganei, Atua mila ka kenemiu bogo memedu ka kuvilig kamiu naruei. Atua kiano nave-natuboiano jo binimei ea kamiu naruei, mia vonganei monokanio kuvilig kamiu a kumonea Ioluano Vou nei.”

Yesu bio tom veri na aburu niado

¹⁶ Iorou kanio, ana na Yesu jom̃a mieliel ea baramudou na burum̃ara ueiyabo na Kalele, mial tomjuo, nam̃a aburuvurua niado, be Saimon bija kuruano Andru, napano naljuoaju aburu kialo levlevi. ¹⁷ Ana naio ber kalo abe juo, berinavo “Kamiu kumei kuvitakisior

kiniau. Mia kiniau nala kamiu kuve tomu nalo na avuru tomu nalo amei ave kanaku tomu nalo.”

¹⁸ Mia vaarakurano ga, naljuo ajuvan kialo levlevi, ajakisior Yesu. ¹⁹ Karina Yesu miel ba lie kija, ana mial Sepeti kenerinio abe juo, be Yemesi naio kuruano Jone. Naloaju jutano joomo ea kialo uako ana nalo abe juo amila batitig kialo levlevi. ²⁰ Mia bogo napano Yesu mial naljuo nei, naio bio naljuo, ka atakisior naio bunu, mia ajuvan karam̃alo Sepeti joa uako bija kialo tomu nalo na iñauano, ana naljuo ajakisior Yesu.

Yesu mijil lar niununo va tai

Luka 4:31-37

²¹ Ana Yesu nalo amiel aba abokar m̃arkomeli na Kape-neam, a ea Legiano Lu, nalo aba joomo ea yimo na volkouano, ana Yesu jo berloglog tomu nalo ka Atua kiano Il-iano Lu. ²² Mia nalo napano amiagago nalo amiilo laka, bior nalo amijog Yesu kiano verloglogiano maka tibe ka kialo naverloglogiano dolu nalo, bior napano Yesu kiano temi vatitig bo, ana Atua kiano moroano joaio. ²³ Ana ka bogo na, toro tai napano niununo va joaio, naio jo naliko, ²⁴ ana mila toro neibano miaga va souo, naio mil ban Yesu berinavo “? Yesu re Nasarete, kiamo venia jua kumemi? Peli na jau kobinimei ka kala lelan

kumemi, a! Kiniou namijiki-
aso ruei, ka jau kobe kiri-
novo, kobe Atua kiano Tolu
tai.”

²⁵ Mia Yesu mil kirisikili
ban niununo va neibano,
joko vio ka naio, berinavo
“E! Jau keil re! Jau kataluvo
den toro na vonganei ga!”

²⁶ Mia niununo va neibano
naio mila kema neibano
naio miaburusalsal, ana
naio miaga souo vaaraku-
rano bereio, naruei naio
moluo den naio ana buro
bano.

²⁷ Mia tomu nalo na vio
na amiilo laka, nalo ajumã
aberverii Yesu, aberinavo
“? E jumãbe nei? ? Ver-
loglogiano vou tai bereio
nei, ðeli venia na? Toro
na, kiano moroano kirisikili
laka na, naio mil ga ban
niununo va nalo, nalo ami-
jogkar naio.” ²⁸ Kar vite
nalo na naruei nalo ajaaro,
ana nalo ajumã aber vatitig
Yesu siano novo ban ea vio
nonovio ea tanobuku na vio
Kalele.

*Yesu milarur Saimon
Pitere koano kenieno bija
tomu telabo dolu nalo bunu
Mataiu 8:14-15; Luka
4:38-39*

²⁹ Mia Yesu naliko tomu
nalo nei, Yemesi bija Jone
a Saimon bija Andru,
nalo abatavio ea yimo na
volkouano mia nalo aban
ea Saimon naio Andru
kunualo, ninei ea mmarkomeli
na Kapeneam kia ga vo.

³⁰ Naruei ea mmaratavo nene,
Saimon kenieno simemi,
naio mie mma niabene
bituvitunu na naio jomã
mon ea ga mmano jogu,

mia nalo aberial ka Yesu.
³¹ Ana Yesu naio binime
bokar tiramoruo neibano
jumãno, naio burular naio
jumolu, jotano ea mmano
jogu, ana niabene minini
bereio, mia naio jumolu
ju, ba borosebi salo. ³² Ea
kijev na legiano nene, bogo
napano Legiano Lu bisi,
bogo na mmerenio batove
ruei, mia tomu nalo abarvar
tomu nalo na amie bija nalo
na simaro nalo abujo ealo
abinime ea Yesu. ³³ Mia
tomu nalo miroano laka, jibe
ka napano vaataro ka tomu
nalo na mmarkomeli neibano
abinime amivinkakarlo
vatitig ea mmaratavo na yimo
neibano, vio telisu. ³⁴ Mia
Yesu naio milarur tomu nalo
miroano na amie ka mieiano
ninio nalo, naio mijil bulag
simaro miroano den tomu
nalo, naio joko vio ka simaro
nalo neibano ka nalo aver
re titai leleio, ka napano
nalo amijikia ruei ka naio
be Naverikariano riano.

*Yesu mioliolu reraio ea
tanobuku na vio Kalele
Luka 4:42-44*

³⁵ Mia ea vio niogoravo,
bogo na tu naio maka
tokokoreko vo, ana Yesu
naio jumolu jaluvo den
yimo, mia naio ban ea vio tai
napano vio melumu bo laka,
mia naio rivolkouo rivan
karamano. ³⁶ Ana iorou,
tomu nalo abinime ka naio
ea yimo bereio, mia Saimon
nalo maka bunu aial naio,
mia nalo aban ka asiravo
naio. ³⁷ Nalo ajiravo naio
bano-o, nalo amilealio ea vio
nei, mia nalo aber ka naio,
aberinavo “Tomu dolu nalo

miroano abinimei kaso, mia nalo aju ajiragso.”

³⁸ Ana Yesu berdoŝe banlo, berinavo “Riano, kiniou nemijikia na. Mia makanio, kito monokanio ravan lie ea m̃arkomeli dolu nalo napano aju kia vo, ka mia kiniou nemijikia noioliolu ka ioluano vou nei ea vio dolu nalo bunu. Ka tena naruei, kiniou najaluvo yako nebinimei ea vio nei biorio.”

³⁹ Mia Yesu naio ba mieliel ea vio nonovio na Kalele, na naio jo mioliolu ea yimo na volkouano na kulo Ju nalo kialo, a jo mijil bulag siŃaro telabo den tomu nalo.

Yesu milarur toro tai na menko burumieni jua niabene, binimei bo bereio

Mataiu 8:1-4; Luka 5:12-16

⁴⁰ Mia toro tai napano bokar menko burumieni naio binimei ea Yesu, naio minie tano keanio, naio bika kirisikili denio, berinavo “Neber bo, ver jau kojamo ka ga, kiniou nomonea ka jau komijikia kolarur kiniou, nomeravo bereio.”

⁴¹ Mia Yesu tinien miia naio laka, ana naio maka river mirou ka tokolio ka kiano mieiano, mia naio midu jumano joa naio, ana berkanio “Kiniou nemijamo; voniganei niabemo monoka rimeravo.”

⁴² Mia vaarakurano ga menko burumieni neibano naio jaluvo den toro nei niabene, naruei naio meravo bereio. ⁴³⁻⁴⁴ Mia Yesu jutua naio, berinavo “Jau komijog, jau kava koververii re tenei

van tomu nalo vo, a voniganei ga jau kova kosel ea toro lu ka naio mijikia rivitii veve niabemo. Karina jau komijikia kava kala lotuano van Atua vija koisebi bunu ga sida ka meravoiano nei napano m̃a Mosis naio bere-nio, napano toro monoka rilao bior vite na jibena. Karina iorou ka nina, toro lu naio mijikia riverialio ka menko burumieni nei naio biniu ruei.” Ana Yesu mila toro neibano bano.

⁴⁵ Ana bogo na toro neibano naio bano, mia naio ba jo berii tenalo neibano ka tomu nonovio, mila na iliano neibano ban ea vio nonovio, bano-o napano mila Yesu naio maka bunu rijikia ka riel ka riva joomo ea m̃arkomeli nalo, ka ver naio rivano, tomu ve miroano laka amei ka naio. Naio jojo tavio ga ka vonuo, mia tomu nalo amalmaluvo ea kialo vio nonovio kiavo, nalo abinimei eaio.

2

Yesu naio mijikia riviekokoa kariano

¹ Ana bogoti nalo tealok abarlaka ruei, ana na Yesu naio ban bereio ea m̃arkomeli napano Kape-neam, a maka ve kirisio, mia tomu nalo amijogial ka naio binimei bereio ruei.

² Ana nalo miroano abinimei ea Yesu, mia joomo ea yimo neibano naio bujomagmago kalo, a tavio ea m̃aratavo bunu, vio telisu ga. Mia bogo napano aju vio takurano jibe

na, ana na Yesu mioliolu ka Atua kiano iliano lu banlo. ³ Mia ea bogo nene, tomu nalo aŋier nalo tai napano naio mie binimei, napano niabene nonovio m̃aro. Mia nalo veri aŋier ea ga m̃ano jogu, napano naio jo monmoneaio. ⁴ Mia bogo napano abinimei abokar vio neibano, amial ka vio nene teliki laka, mia nalo maka ajikia adu kialo bilbilu nei rivan vaataro ka Yesu.

Naruei nalo aŋier abavin ea yimo mave, ana nalo amuedulu vodobi loglog vio napano Yesu naio jo memedu kanio yetano, ana ajuvarvan toro nei batove bija m̃ano jogu batove ea buluvio, batove joomo ea yimo. ⁵ Mia bogo na Yesu mial vite nei, naio mijikia ka tomu nalo nei amonea naio kirisikili laka, ka mia naio rijai toro neibano mie nei, mia Yesu ber ka kema neibano mie nei berinavo “Keneriku, kiniou nebiekokoa kiamo kariano nalo.”

⁶ Ea bogo nene tomu nalo tai tena naverloglogiano na tuboiano, nalo bunu ga aju, mia nalo amijog Yesu kiano iliano. Ana kialo jidomiano jo miñau bova ka vite nei, ⁷ nalo aju amil niege naio, aberinavo “Jum̃abe ana toro nei naio mil mila bulag Atua siano lu jibe na? Atua naio takurano ga naio mijikia riviekokoa kariano, maka bunu toro dolu tai bereio, ana kema nei naio jo mil jibe ka naio jo jidomii ka berianã

naio be Atua naruei.”

⁸ Mia vaarakurano ga Yesu naio mijoglubar ea naio mijikia ka tomu nalo neibano aju ajidomii va jibe na ka naio, mia naio ber kalo berinavo “? Ka vaio ana kene-miu iviso bujo ka jidomiano va nalo na jibe na? ⁹ A ver kiniou never tibe nei ka namieiano nei neverinavo ‘Kiniou nebiekokoa kiamo kariano’ p̃elina kiniou never kanio, neverinavo ‘Jau kotumolu, kojuku m̃amo jogu ana keiel,’ ana ea iliano juo nei, tai naio jikili ka averenio, ana tai naio monmaio ga ka averenio. Ana naina berinavo ‘Kotumolu keiel,’ naio jikili bior ka kami ku-vijikia kuvitilubar kiaku iliano nei naio be riano p̃elina naio maka rive riano, ka toro nei naio tumolu p̃elina makanio. ¹⁰ Mia vonganei, kiniou noim̃auka titai napano mia kami kuvisidomii kuver Atua ga takurano naio mijikia rim̃aukanio, ka mia kami kuvijikia kuvitilubar ka kiniou Kulorinio Kenerinio, kiaku moroano bare ka noviekokoa bunu kariano na yetemeriba nei. Kami kuviagago vatitigio.”

¹¹ Ana na Yesu mil ban namieiano nei, berinavo “Kiniou neber kaso, jau kotumolu, kojuku m̃amo jogu, keiel kava vonuo.”

¹² Mia kirisop̃eli ga ea tin-iobi miralo napano aju amialio, toro neibano naio jumolu ana na naio mijuku m̃ano jogu, ana miel ba tavio ba vonuo.

Bogo na tiniobi neibano amial tenei, mia nalo amiilo toru, abamenea Atua, aberinavo “Koig, kito maka lele reial titai tibena ea kiado meuliano, mia banei ga.”

Mataiu, napano abio bunu ka Livai, Yesu bijauia lario ka rime takisor naio

Mataiu 9:9-13; Luka 5:27-32

¹³ Mia Yesu batove tivelinio bereio ea burumara ueiyabo neibano, mia tiniobi nalo abinimei vio takurano aju jelifiv eaio, naio berlogloglo. ¹⁴ Karina, naio mieliel ba lie, mia naio mial toro tai jotano joa kiano vajoomo na imauano ea yimo na abarivar bijii veru na takis. Toro nene, be Livai, Alveas kenerinio. Ana Yesu bio naio berinavo “Komei kotakisor kiniou,” mia soŕeli ga Livai naio jumolu ana jakisor Yesu. ¹⁵ Karina, Yesu ba jinano ea Livai neibano kunuano, mia ea bogo na, tilikiti na tomu dolo nalo na abarvar bijii takis, bija tilikiti na veribinio dolo nalo, nalo bunu abinimei ajutano burukuti bija Yesu naliko kiano naiagagoano nalo, bior napano bogo nei, tomu ninio ga aju ajakisor Yesu. ¹⁶ Mia

tomu na verloglogiano na tuboiano tealo, napano nalo abe Varisis, nalo amial ka Yesu naio joŕŕa jotano burukuti bija tomu nalo na jibena, ana nalo abika den naiagagoano nalo aberinavo “? Kar vaio ana kenemiu naverloglogiano naio ba joŕŕa jinano burukuti jibena

bija tomu veribinio nalo na?”

¹⁷ Mia Yesu naio mijog iliano nei, mia naio berdoŕe berenio banlo, berinavo “Nalo napano mokotenalo kirisikili bo, nalo maka asidom ka ava aial toro naŕŕa mieliel ka namieiano nalo, mia namieiano nalo ajidom mŕlea naio. Kiniou maka nemei ka novio tomu nalo na aber nalo amemedu ruei ea Atua mirano ka nalo atakisor kiniou, mia kiniou nebinimei ka tomu nalo na abova ajibe ka tomu nalo nei naruei.”

Vikadeniano tai ea tivelinio na veliano na sinaniano

Mataiu 9:14-17

¹⁸ Naruei ea bogo nei, Jone Baruei kiano naiagagoano nalo bija Varisis nalo ajumŕa abokar bajago na veliano na sinaneano ka nalo abolkouo ban Atua. Ana tomu nalo abinimei ea Yesu, mia abika veve denio, aberinavo “?A jumabe? Jone Baruei kiano naiagagoano nalo Abel ka sinaneano kamŕa abolkouo, a Varisis nalo kialo naiagagoano bunu ga amila jibe na, ana jumabe na jau kiamo naiagagoano maka atumŕa alaio?”

¹⁹ Ana Yesu berdoŕe banlo, berii naio naliko kiano naiagagoano nalo jibe kanio napano nalo ajaaro toru laka bogo napano naio jo naliko, mia nalo ajog rivova iorou ka bogo napano mia naio taluvo denlo, ana berinavo “?Bogo napano toro na naio joro jo kia ga vo ea jokoluolu naliko kiano bilbilu nalo,

kamiu kuberianña amijikia atuvan sinaniano na jokolu-olu? Maka leleio. ²⁰ Mia bogo tai navo, ver bogo tai toro nei kiano uolu tai amei avurular naio den kiano bilbilu nalo, ea bogo na naruei mia kiano bilbilu nalo amijikia aveli ka sinaniano, bior napano nalo tiniel miia naio laka.”

Vite moruo a vite vou

²¹ Bajago na veliano na sinaneano, naio be bajago moruo tai na kulo Ju nalo kialo lotuano, mia Yesu naio jidom rila rimeravo vanlo ka bajago moruo na jibe na, nalo maka ajikia aveverare rivija vite vou nalo napano naio joñña berlogloglo kalo. Ana naio ber jamerijiano tai tivelinio kalo, naio berinavo “Kito maka rejikia rodu niati kulumñarauo napano be terivou, ka rotuluko ka kulumñarauo moruo tai ka toko bulukuti vio na buruñe eaio. Bior napano niati kulumñarauo vou nei najo mijikia rila korov kulumñarauo moruo na togio, ana mia bulujeleigio mijikia rimei ve toru lievo.

²² “Ana mñarjumlñelu vou napano naio joñña jarabujo kia ga vo, maka rojikia roisonio rivan ea kulukuti nani napano be terimoruo, napano amison mñarjumlñelu ban ea vate-labo ruei. Verenio jau kala tibe na, mia mñarjumlñelu nene riyukuio, rila kulukuti nani nei saburu, mia mñamo mñarjumlñelu riou bulagio ana bauei nene rimei rivova

bunu. Mia mñarjumlñelu vou, jau monokanio koisonio rivan ea kulukuti nani napano be terivou bunu, jikili bo, naruei na jau komijikia kodu batitigio to vesiou.”

Yesu be tubo ka Legiano Lu

Mataiu 12:1-8; Luka 6:1-5

²³ Ana ka legiano tai bereio, napano naio be Legiano Lu, Yesu naliko kiano naiagagoano nalo amiel abano, mia kialo mñarabo ba jel bure tiniavio na subavio. Nalo amiel jibe na, naruei naiagagoano nalo jijerlo ana amikiti kokorov subavio nei mñarati tealó ana ajenio. ²⁴ Nalo ajumña amila jibe na, naruei Varisis tealó ajua vio na, napanoaju abitii Yesu nalo, naruei nalo aber ka Yesu, aberinavo “Ai, kal kija! Kiamo naiagagoano naloaju amila jumñabe na, mia nalo maka ajikia ala imñauano na ea Legiano Lu, ver tibe na nalo ajumña amila korov kiado tuboiano na.”

²⁵ Ana Yesu berdoñe banlo, berinavo “?Peli kamiu maka kuvulukulu Iliano Lu bogo tai bo, napano berii vite nalo napano Parinio Tubo Teviti na nanua naio joñña milaio? Naio naliko kiano tomu nalo, nalo jijerlo mñele, ²⁶ ana naio ba joomo ea Atua kiano vio lu, ana naio midu joko lu napano tuboiano ber kulo lu ga amijikia asenio, mia Teviti nalo nei ajenio. Ana Abieta, napano naio be parinio

toro lu ka bogo na, naio mijamo ka banlo ga. ²⁷ Kiniou neber ka kamiu, neber kiado tuboiano nalo maka ka atutua niegeniege kito bereio. Jibe na, Legiano Lu naio maka ve tena rila bulag kiado meuliano bereio, mia naio be tena ka rijai kito. ²⁸ Mia kiniou nebe Kulorinio Kenerinio, a naio be tubo ka vite nonovio, naio naruei be tubo ka Legiano Lu bunu. Mia naio ga mijikia river venia napano ramijikia rala ea Legiano Lu, p̃eli venia na maka rimemedu ka kito ralaio.”

3

Yesu milarur jumevuluku ea Legiano Lu

Mataiu 12:9-14; Luka 6:6-11

¹ Ana ea Bogoti Lu tai bereio, Yesu naio ban bereio ea yimo na volkouano, mo na ka bogo nene, jumevuluku tai naio jo joomo bunu napano naio juṁano buluku. ² Mia Varisis tealo napano tiniel jer Yesu ruei, nalo aju vaatara ka ga Yesu ea bogo neibano, nalo ajum̃a miralo jua ga Yesu ka ajidom aleal bajago va nalo eaio Yesu.

Naruei nalo ajidom ka aial von ka ver Yesu rilarrur kema neibano ea Bogoti Lu nei p̃eli mia rila re. ³ Mia Yesu naio mil ban kema neibano, berinavo “Jau kotumolu, komei mave nei beamu vo.” ⁴ Ana Yesu bika den tomu nalo na aju, berinavo “? Kiado tuboiano naio berinavo kito

romijikia rola venia ea Bogoti Lu? ?Naio bo ka kito reinṁauka tena bo, p̃eli na bo ka kito reinṁauka tena bova? ?Peli na naio berinavo bo ka kito ralarur tomu nalo, p̃eli na bo ka kito rouebinvinlo?”

Mia tomu nalo neibano maka leleio aver iliano tai bereio. ⁵ Naruei Yesu jirarag jeliviv ealo, napano naio mial miralo nalo kirisikili ga, mia naio mijog bova toru biorio a naio tinien jerlo. Naruei naio mil ban kema neibano bereio, berinavo “Kala von ka kovitirii juṁamo beamu vo,” mia ea bogo na ga toro na mila jibe na, juṁano binime i bo bereio.

⁶ Mia Varisis nalo nei abava tavio, aban memedu ga abiviuo vio takurano bija Parinio Tubo Erot kiano tomu nalo, ka nalo alavon ka aleal m̃arabo ka amijikia auebin Yesu riṁaro tuṁabe.

Tomu telabo abinimei kar Yesu

⁷ Ana Yesu naliko kiano naiagagoano nalo ajaluvo denlo abatove bereio ea buruṁara ueiyabo, mia tomu nalo miroano ajakisorlo abatove. Tomu nalo neibano, tealo abinimei ea vio dolu nalo tealo ea vio nei Kalele, ⁸ ana nalo tealo abinimei rove yako ea vio Yutea bija kiano m̃arkomeli nei Yerusalemo, mia tealo abinimei ea tanobuku na vio Itumea, a tealo abinimei ea vio nalo napano marauei na Yortano tivelinio bano, ana tealo abinimei ivin ea tei napano toru laka ea komeli nalo na ea komeli juo

nei, Taia bija Saiton. Nalo nonovio nei abiniu nalo amijog ruei iliano na vite nalo napano mña Yesu naio jomña milaio, naruei nalo ajidom ka amei kanio. ⁹ Ana bogo napano nalo miroanoaju tivelinio ea ueiyabo napano ana Yesu ber ka kiano na-iagagoano ka nalo averiko tauako sesa tai to, ka tomu nalo miroano laka, mia naio merou ka mia tomu nalo amei mña aivinkakar naio laka. ¹⁰ Nina bior naio milarur tomu nalo miroano napano amie amijog bo bereio ruei, naruei tomu dolu nalo na amie kia ga vo nalo ajumña amila von ka aivinlo tibe na ka mia nalo bunu amijikia atokol Yesu. ¹¹ Mia ka bogo nene aver niununo va nalo tai napano ajua tomu nalo tealó, bogo na amial Yesu, mia nalo monokanio avatove ka naio, nalo ajorua jaano, abio toru, aberinavo “Jau kobe Atua Kenerinio.”

¹² Ana Yesu mil kirisikili ban niununo va nalo neibano berburelo, berinavo mia nalo atu re aververii ka tomu nalo aver naio be kei.

Yesu bitiri bulag kiano atevi duelimo ba juo [12]

Mataiu 10:1-4; Luka 6:12-16

¹³ Naruei iorou kanio ana na Yesu naio bavin mave ea suku nalo, ana naio bio tomu nalo tai abinimej eaio.

¹⁴ Bogo na nalo abinimej, naio bitiri bulag nalo duelimo ba juo [12], naio ber nalo ave atevi nalo, napano kialo imñauano naio jibe nei,

mia nalo aiel vija naio tulaka ka mia naio rilalo avar ioluanou avan ea vio nalo, ¹⁵ a mia moroano na ajil bulag simñaro nalo tualo.

¹⁶ Naruei Yesu kiano atevi duelimo ba juo [12] sialo ajibe nei:

Saimon, napano Yesu midu sio vou joa berinavo Pitere.

¹⁷ A Yemesi, napano Sepeti kenerinio.

A Jone napano Yemesi kuruano napano Yesu midu sio vou ban naljuo nei, berinavo Boanejes, napano ber nalo abe juo atibe ka tubaal memedu, bior naljuo na niolo jaburu julaka ga.

¹⁸ A Andru,

a Vilip,

a Bartolomio,

a Mataiu,

a Tomas,

a Yemesi, napano Alveas kenerinio,

a Tatesa,

a Saimon, napano naio mila poletik die kulo Romo nalo.

¹⁹ A Jutas na Kariot, napano iorou kanio, ana naio jiveluku ka Yesu ban kiano uolu nalo.

Yesu kiano mñaratavo ajidom aberiamña naio miavovu

Mataiu 12:24-32; Luka 11:14-23, 12:10

²⁰ Ana iorou, Yesu naio binimej bereio vonuo, mia tiniobi toru abinimej ka naio bereio, ana Yesu bija kiano naiagagoano nalo amimñau

kalo bano-o nalo maka bunu averio ajilimebi kija ka asin. ²¹ Naruei Yesu kiano torogio nalo amijog ka napano Yesu naio jo miñau ñele jibena, a nalo amijog bunu ka tomu nalo ajumã amil dieio, aberinavo “Peli kema nei, naio milaluvu parinio ruei kovio!”

Mia Yesu kenieno bija ku-ruano nalo aban ka ajidom ka alavon ka avurular naio den tomu nalo nei.

Tomu nalo na tortoru bunu aberii Yesu naio jo miñau bija Siñaro kiano moroano

²² Naruei ea bogo nene, tomu nalo na naverloglogiano na tuboiano, nalo ajaluvo den vio Yerusalemo abatove ea vio neibano, mia nalo ajumã amilidie Yesu ban tomu nalo ajumã aberial, aberinavo “Siñaro nalo kialo Tubo Belsabel, naio ba joa toro na ruei,” a nalo aju bunu ga aber “Toro na naio jomã jitig bulag siñaro ea moroano na ga napano Belsabel juvan ban naio.”

²³ Naruei Yesu biolo abin-imei eaio, ana na naio mil banlo ea jamerijiano, berinavo “?Jumãbe na kamiu kuberiamã Siñaro bereio naio mijikia titiglar siñaro. Maka rijikia tibe na! ²⁴ A verenio tubo tai napano kiano tomu nalo avuruburelo, napano togio atumã aildie nalo togio, mia tubo neibano naio kiano imãuano nalo maka rijikia

atu sikili leleio. ²⁵ Ana verenio ea maratavo tai na nalo ajumã aburuburelo napano nalo togio ajumã ajitig nalo togio, mia nalo maka leleio ajikia atu rivu bogo tai. ²⁶ A jibe na bunu ga, averenio niadu nalo na Siñaro kiano togio nalo atumolu alavon ka ajil bulag togio dolu nene, nina jibe ka moroano na Siñaro kiano maka bunu rijikia tumolu tu, kiano moroano bakovio ruei. Mia maka leleio, Siñaro ãirinio kirisikili dolu ga kiana vo.

²⁷ “!Kuvijii! Verenio toro tai sidomii ka riva joomo ea toro kouo tai kunuano ka mia naio rivina ka kanano saba nalo, mia naio monoka rivar teli riorkar toro kouo nei sikili beamu vo, avona bisi ana mo naio mijikia riva joomo ka rivina ka nonovio saba nalo na be toro kouo nei kanano. Mia kin-iou nojomã nomila jibe na naruei ka toro kouo neibano Siñaro.

²⁸ “Mia kiniou neber riano ka kamiu, tomu nalo kialo kariano bija iliano va nalo namã ajumã aberenio, Atua mijikia riviekokoalo riviorio, ²⁹ mia toro na mil boya lelan Niununo Lu naio berenio kiano imãuano tealó Siñaro ga naio miñaukanio, toro na jibe na naio mia maka lele rijikia rivokar viekokoano bogo tai, kiano kariano naio mia toa naio rivano-o, mia maka rijikia ribisi.”

³⁰ Naruei Yesu naio berii vatitig iliano jikili nei banlo, bior nalo naruei ajumã

aberii ruei ka niununo napano joa naio, be niununo va.

Yesu kenieno bija kuruano nalo abinimei ka avurular naio

Mataiu 12:46-50; Luka 8:19-21

³¹ Mia Yesu kenieno bija kuruano nalo abinimei amiyotuba kean naio ea bogo nei, mia nalo abinimei ajikili aju tavio ga, na amiila toru ban ka naio rimoluo rimei rialo. ³² Ana ea bogo na, tiniobi toru ajutano vaataro ka Yesu, mia iliano binimei bokario, ana nalo aberinavo “Ai, koniomo bija kuruamo bija kuviviniemo nalo aju tavio, ajidom ka ail kijaso beamu vo.”

³³ Ana na Yesu berdoŋe berinavo “?A kenioku nalo be kei? A nalo na abe kuruaku nalo abe kei?” ³⁴ Naruei naio jiraravo bitikar tomu nalo napano ajumia ajutano vaataro ka naio, ana berinavo “!Kamui kuvial, nalo nei abe kenioku bija kuruaku nalo, nalo nei naruei. ³⁵ Bior toro napano mila jibe ka napano Atua jidomio, toro na jibe na naio be kuruaku, a be kuviviniekue, ŋeli na abe kenioku ruei.”

4

Jamerijiano na toro napano bisivisii kurukuti subavio

Mataiu 13:1-9; Luka 8:4-8

¹ Ana ea bogo dolu bereio, Yesu naio jo berloglog tomu nalo ea tivelinio na ueiyabo na Kalele. Mia tomu telabo

laka napano abinimei ea naio ka bogo na, mila na naio bavin ea uako sesa tai napano joa ueiyabo nei, ana naio ba jotano mave eaio, mia tomu nalo aju reraio ea baramudou uro. ² Mia Yesu jo berlogloglo ka vite telabo ea jamerijiano nalo, ³ mia naio ber kalo berinavo “Kamui kuvilavon ka kuvia-gago vatitigio. Toro tai, ban ka rivisivisii kurukuti subavio ea kiano tiniavio. ⁴ Naio jo bisivisii jibe nei bano, mia kurukuti tealo ajibirbili vaataro laka ka ikiŋarabo tivelinio. Ana iorou, menu nalo abinimei amikiti bulaglo bereio.

⁵ “Mia kurukuti tealo ajibirbili ea vio na be tabaver yetano, mia ea vio na maka tano rimerorolu napano rivu mave, mila na nalo amiluo soŋeli. ⁶ Mia bogo na mŋerenio mijivi ana naio junulo ana soŋeli ga amekekeu ka bati nalo maka avatove vatitigio.

⁷ “Mia nalo tealo ajibirbili ea vio tai na beamu maka ate bulag vatitig teli va nalo na beve niononoti ealo, mia iorou teli neibano miluo toru bereio, ana naio misoveko kialo vitoviano nalo bano-o aŋarmaro, mia maka ave mŋarati nalo.

⁸ “Mia kurukuti dolu tealo bereio, ajibirbili ea borotano novo tai, mia nalo amiluo bo, bano-o ajarako abar mŋarati nalo. Tealo abar mŋarati abokar duelimo va rolu [30], nalo tealo abokar duelimo va ari [60], mia

nalo tealo abokar toromomou takurano [100].”

⁹ Mia Yesu naio berkalo berinavo “Kamii kubiniu kube burutiliniemi, bo ka kamii monokanio kuvi-jogkar kiaku iliano nalo.”

?Ka vaio na Yesu jo mil jelia jamerijiano nalo?

¹⁰ Ana iorou kanio tiniobi nalo abanvan bereio, ana na Yesu jo naio takurano ga, naruei tomu nalo napanoaju bija naio bija kiano naiagagoano nalo, abinimei abika den naio aberinavo “Vaio naruei naio be nioti na jamerijiano na? Mia ka vaio ana jau kojoma komil jibe na, a koberloglog tomu nalo jamerijiano nalo?”

¹¹⁻¹² Ana Yesu berdoŝe banlo, berinavo “Kiniou nojoma neberlogloglo ka jamerijiano nalo na bior abeveribinio laka. Nalo ajibe ka, ajuma amila iliano tai na naverialiano Aisea nua binimei maluvo, napano naio berenio

‘Nalo ajuma abitii, abitiio bano, aaju amijogii, amijogiio bano,

mia maka lele aver avitilubar a maka lele mia ajog lubar vite.

! Ver makanio, ŝeli nalo avilig kialo jidomiano nalo ruei, a ŝeli Atua biekokoa kialo kariano ruei!’ Ais 6:9,10

“Jibe na naruei kin-iou neber nalo pariparilo kirisikili laka, naloaju koalabo laka keano vo. Mia kamii naruei bo lie vo ban kamii. Ililuklukuano

nalo na Atua kiano nave-natuboiano, mia kiniou neverial rimeravo ga rivan kamii.

¹³ “?Ana jumabe, kamii maka kuvijoglubar nioti na kurukuti subavio neibano? A ver kamii maka kuvijikia kuvisidomii lubarbar nioti nene, mia tumabe naruei na mia kamii kuvijoglubar jamerijiano dolu nalo na mia kiniou neverio ka tomu nalo?”

Yesu ber bulag nioti na jamerijiano na toro napano bisivisii kurukuti subavio

¹⁴ Ana Yesu berinavo “Mo, mia kiniou never bisivisii nioti na jamerijiano neibano van kamii. Nioti nene naio jibe nei: Borotano ninio nalo na, nalo ajibe ka tomu nalo kialo iviso ninio nalo. Mia toro nei nana jo bisivisii kurukuti ea borotano nalo na, naio jibe ka toro napano joma berial Atua kiano iliano ban tomu nalo.

¹⁵ “Borotano na kirisikili na jel ikimarabo tivelinio, naio jibe ka toro na napano naio mijog Atua kiano iliano, ana iliano nene maka lele riva joomo vatitig ea kiano iviso na jikili leleio. Mia menu nalo neibano, ajibe ka Simaro, napano naio binimei vaarakurano ga, naio midular bereio iliano nei ea toro napano kiano iviso.

¹⁶ “A borotano na puruveru toru yetano tabaŝilio, naio jibe ka toro na napano naio mijog Atua kiano iliano, mia kirisopeli ga naio tiniene jaaro kanio, miduio.

¹⁷ Ana iliano nene naio

maka totano vatitig joomo ea kiano iviso. Mia naio miluo jibe ka titai napano maka ve sano bati novo, napano mijikia riluo bogo ve bulati ga. A verenio bogokouo rimeĩ pelina tomu nalo asidom ka ajil lo rivior ka amonea Atua kiano iliano, a mia soĩeli ga nalo atuvan bereio.

¹⁸ “Mia borotano na napano teli na bova juaio, naio jibe ka tomu nalo napano bogo na amijog Atua kiano iliano, ¹⁹ mia karina, nalo ajumĩa ajidomii mĩlea ga kialo meuliano nalo, a jidomii ka avar vite ve telabo rimeĩ rive sibiano ga rivanlo, a nalo ajumĩa ajidomii mĩlea vite novnovo nalo na yetemeriba nei. Bajago nalo na abinimeĩ jibe ka teli va, ana na amikitiko ioluano vou nei ka rivar re mĩarati ea tomu nalo tibe na ea kialo meuliano.

²⁰ “Ana borotano na bo na, jibe ka tomu nalo napano bogo na nalo amijog Atua kiano iliano, amijoglubario ana tiniel jaaro kanio a amiduio ea kialo iviso ana iorou kanio abar mĩarati na ioluano vou neibano ea kialo meuliano nalo, napano na tealo abar mĩarati duelimo va rolu [30], a tealo abar mĩarati duelimo va ari [60], a nalo tealo abar bokar toromomou takurano [100].

“Ninei naruei jamerijiano na kurukuti uiti, naio bisi ea vio na.”

Jamerijiano na yulu
Luka 8:16-18

²¹ Mia Yesu ber bereio banlo, berinavo “Kito tomu nalo, ver kito rotilan yulu tai, mia kito rodu van re to yetano ka basaro tai. Maka leleio, kito monokanio rotilan to mave ga ka rimererali vio vatitigio. ²² A bo ga, Atua kiano navenatuboiano naio jibe ka yulu na, napano vonganei naio jo malmaluvo terteliki ea kito ka rimermerali vite nonovio nalo, a mia vite nonovio napano ajuluku ju, a bija ililuklukuanono nonovio mia monoka amei medave. ²³ Mia kamiu nonovio kube burutiliniemiũ, bo ka kamiu kuvijoglubar kiaku iliano nei.”

Monokanio aiagago
vatitig ka Yesu kiano iliano
nalo

²⁴ Mia Yesu ber kalo bereio, beri-navo “Kamiu monoka kuviagago vatitig ka kiaku iliano nalo, a kuvila von ka kuvisidomii vatitiglo. Toro na jo mijog ga mia maka to takiio, mia naio maka bunu rijikia rijoglubar vatitigio bereio. A toro na mijogkar kiaku iliano nalo, mia naio mijikia rijoglubarbar vatitig kiaku verloglogiano ve telabo iorou.

²⁵ Toro napano kiano saba nalo miroano ruei, mia naio rivar lie ve miroano laka, mia toro na maka kiano saba, mia naio rilaluvu vaio napano kiri teliki na be kiano.”

Jamerijiano na kurukuti napano jo miluo

²⁶ Yesu ber bereio, berinavo “Atua kiano navenatuboiano naio jibe kurukuti napano toro bisivisiio ea kiano borotano. ²⁷ Bogo na naio bukuio bisi, mia naio maka bunu river rila titai ka kurukuti nene bereio. Toro neibano monmelio, jumolu, monmelio, jumolu, bogiano bija legiano, mia kurukuti nene naio ga takurano bitovi moluo, ana jo miluo. Jomā miluo jibe na banbano-o mia toro neibano maka lele rijikia ka kurukuti neibano jomā miluo jumabe. ²⁸ Toro nei maka rijikia, naio maka rila titai, mia vite nei miyuku jumano nalo aba laka, ana maka vesiou bar niati, bano-o bar nioti.

²⁹ “Naruei bogo na nioti meruo bo, kema neibano jikario ka miñau bereio naruei, midu kiano iobogu ba je bulag m̄arati.

“Mia Atua kiano navenatuboiano jomā miluo tertelisu jibe ka jeliviv ea vio yetano nei vonganei, a ea bogoti tai, mia reial m̄arati na toru naio rimeĩ mave.”

Jamerijiano na kurukubako

Mataiu 13:31-32; Luka 13:18-19

³⁰ Ana Yesu ber bereio, berinavo “Bajago na Atua kiano navenatuboiano, naio be dolu laka, naio kirisikili ka mia neleal jamerijiano tai bereio ka never naio jumabe. ³¹ Peli naio jibe ka kurukubako, napano naio

teliki ka kurukuti dolu nalo tealõ namā remebijaio ea kiado tiniavio nalo, naio teliki mia teliki. ³² Mia bogo na naio miluo binimeĩ toru, burupati toru loa ka sinaniano dolu nalo napano ea kiado tiniavio. Mia jaati nalo tor-toru, napano menu nalo aba ajaio ka vamelu nene bunu ga bo.”

Yesu berloglog tomu nalo ka jamerijiano

³³ A Yesu jo berloglog tomu nalo ka ioluano vou ea jamerijiano na miroano jibe na, jibe napano bare ka nalo ajoglubario. ³⁴ A iliano nalo nonovio napano naio berloglog kalo, mia be jamerijiano ju joomo eaio, ana bogo na aju jibe naio ga bija kiano naiagagoano nalo, ea bogo na naruei naio jo ber bisivisiĩ vatitig jamerijiano nalo na kalo.

Burumāra jegi napano Yesu mil kovio kanio

Mataiu 8:23-27; Luka 8:22-25

³⁵ Mia Yesu joa kea uako napano naio ba joa ka verloglog tomu nalo, mia bogo na m̄erenio jo batove, naio ber ka kiano naiagagoano nalo, berinavo “Ei, kito ravarkorov rava tivelinio ea ueiyabo neibano yako.” ³⁶ Mia naiagagoano nalo ajuvan tomu nalo neibano aju, ana abavin ea uako na Yesu ju joomo eaio ruei, ana aburu naio abano. Mia uako dolu nalo bunu ga aban bijalo. ³⁷ Uako nalo neibano aburo abano-o, mia

burum̃ara jegi tai jumolu, mila na burum̃ara tei nalo ajum̃a abievelveluo a abava joomo ea uako bano-o bujo ka tei vare ga rimadudu.

³⁸ Mia Yesu jo milugu ea selailugu tai ea uako iorou, naio jo monmelio ga. Naruei nalo aba abio bonio, ana nalo aber kanio aberinavo “!Naverloglogiano! ?Jum̃abe na jau maka kosidomial kito ka vaataro ka mia ramadudu naruei?”

³⁹ Ana Yesu jumolu, mia mil kirisikili ban jegi, naio mil ban burum̃ara tei bija bievelveluo tortoru nalo nei, berinavo “Kamiu kumelumu.” Ana vaarakurano ga jegi m̃aro, vio melumu nonovio. ⁴⁰ Ana Yesu ber kalo berinavo “? Ka vaio ana kamiu kumerou jibe na? Peli kamiu maka kuvarkar tiniemiu ea kiniou kovio?”

⁴¹ Naruei nalo amerou m̃elei, ana ajum̃a aberver kalo bereio aberinavo “? Toro kenia nei? Naio mil jibe na ga, mia jegi bija tei, abe juo amijogkar naio! Ou!”

5

Yesu mijil bulag niadu telabo den toro Kerasa tai

Mataiu 8:28-34; Luka 8:26-39

¹ Naruei Yesu nalo amaluvo aboru ea burum̃ara ueiyabo nei tivelinio, naina memedu ka vio na Kerasa, mia nalo tealo ajisia ka Katara p̃eli na Kerkasa.

² Naruei nalo abauro ea vio nene, ana ea vio nene be buluvae nalo na tomu na am̃arm̃aro nalo ajuaio, mia

be toro tai napano niununo va telabo ajuaio, napano naio jo joa m̃artanbo nei, jibe ka kiano vio.

Naruei bogo na Yesu jabulu den uako nei, mia vaarakurano ga toro neibano moluo ea m̃artanbo nei, jikiti binimei ka rial Yesu. ³ Toro nene be deden laka, mia tomu nalo amila von ka aiorikario banbano-o mia amila de ga. ⁴ Va telabo ruei amiorkar jaano bija jum̃ano ka m̃arimieni, mia naio jo burukokorovio ga, mia va telabo amiorkar ea iesi, mia jo mila kokorovio ga, banbano-o napano maka bunu ve toro tai na be kiano moroano bare ka rila toro nei rimei melumu. ⁵ Ana ea legiano nonovio a bogiano nonovio naio jo m̃a jeliviv ea m̃artanbo nalo a bunu mave ea suku dedade nalo, a naio jo m̃a miaga m̃erere, a naio jo jukujuku niabeno ka puruveru nalo.

⁶ Ana toro nei naruei napano bogo na naio jo koalabo kia ga vo ka vio na Yesu nalo abauro eaio, mia naio mial Yesu, ana jikiti batove keanio, a batove ka naio, minie tano kamu kanio. ⁷⁻⁸ Ana Yesu berenio, berinavo “Niununo va, kotuvan kema na, kotaluvo den naio vonganei!”

Mia niununo va nei miaga toru laka ban Yesu naruei, ana berinavo “Mia jau, Yesu, Atua kenerinio napano meul, jau kiamo vaio joa kiniou? Kiniou nebikaso ea Atua siano, ka mia kosian re vironiano rivan kiniou!”

⁹ Mia Yesu bika denio, berinavo “?Na siamo, kei?”

Naruei niununo va nei berdoŝeio, berinavo “Kiniou siaku, burutiniobi na mira, bior kumemi miroano laka nei.” ¹⁰ Mia niununo va nei naio jo bivika kirisikili den Yesu bereio, ka Yesu rijil bulaglo re ea kialo tanobuku nei.

¹¹ Mia ea burusuku neibano tivelinio, be burumara taara na kiribue nalo miroano, nalo aju amiuo ea borotano, abokar kovio menu juo [2,000], ¹² ana simaro nalo neibano ajegi, nalo abika kirisikili den Yesu aberinavo “Nuber bo banso, jau koiila kumemi nuvan ea kiribue nalo na, jau kajamo ka kumemi nuva nuvit juomo ealo.”

¹³ Mia Yesu naio mijamo kalo, berinavo “Bo ga, kami kuvano.” Naruei nalo ajaluvo den toro neibano, ana aba aju juomo ea kiribue nalo neibano. Ana soŝeli ga kiribue nalo neibano ajikiti, abatove ea bavio tai burukorovio, ana nalo ajibirbili abavatove ea ueiyabo na toru ana nalo amunu tei banbano-o abiniu amadudu.

¹⁴ Naruei tomu nalo na abitikar kiribue aburo, aban bereio vonuo, aban aberial vite nei, a aberveriio ea vio dedade nonovio bunu, mila na tomu telabo abinimei ajidom aialio. ¹⁵ Mia bogo na aba amial ka Yesu naio jo, naio bija toro neibano nua niununo va nalo ajuaio, napano vonganei, naio miya vatitig kulunarauo ruei,

naio jomā jotano marga, a maka bunu rive deden leleio. Nalo amialio ka naio binimei bo ruei jibe na, mia amerou. ¹⁶ Mia nalo napano mā aju beamu, napano amial vite nonovio nalo, ajukunu ka nalo na abinimei vonga, aber vaio na Yesu mila ka toro nei, a jumabe na kiribue nalo neibano aba amadudu ea tei. ¹⁷ Mia nalo amialio bova ga, mia nalo ajumā ajikili ka Yesu, ajidom ka mia naio tubilig den kialo vio.

¹⁸ Mia Yesu nalo abatove ea kialo uako bereio, mia bogo napano Yesu jo bavimave ea uako, toro neibano na, naio binimei bika kirisikili den Yesu, berinavo “Aiou, Tubo, kiniou nojidom ka ver jau kajamo ka kiniou nemei vijaso.”

¹⁹ Mia Yesu naio maka rijamo kano, mia naio ber ka ga berinavo “Makanio, bior bo laka ka jau kova vonuo bereio, a kava kotukunu rivan kiamo maratavo vija kiamo bilbilu nalo, jau kover kalo ka jumabe na Atua tinien miaso toru laka, ana naio mila bo mia bo laka banso jibe na.”

²⁰ Naruei toro nei naio ban bereio, ana naio jo jeliviv ea vio nalo na kiano tanobuku nei, napano ajisia ka Komeli Duelimo, napano tomu nalo na maka ave Ju ajuaio, a naio berial imauano novo nalo napano Yesu jomā mila ka naio. Mia nalo na amijog kanano tukunuano nei, nalo amiilo toru ka naio.

Jairas kenerinio tira sesa, naljuo tira na jokol Yesu m̃ano kulum̃arauo

Mataiu 9:18-26; Luka 8:40-56

²¹ Mia Yesu nalo ajel ea uako, abarkorov bereio ueiyabo nei aba tivelinio ruei, ana bogo na Yesu biako yetano jo bauro ga, tiniobi toru na tomu nalo abinimei ajelivivi eaio bereio. ²² Ana toro na toru tai na kialo yimo na volkouano ea vio na, siano Jairas, naio binimei mial Yesu, binimei vaataro kanio, minie keanio. ²³ Ana naio jegi ban Yesu, bika berinavo “Keneriku tira sesa mie mia mie, vonganei p̃eli naio m̃aro ruei. Mia kiniou nebika denso ka jau komei, kodu jum̃amo toaio, ka naio mijikia rijog rivu bereio, ka naio rimeul kia to.”

²⁴ Ana Yesu naio jumolu, ban naljuo kema neibano abano, ana tomu telabo na tiniobi neibano, nalo bunu ga aban bijalo, napano ajum̃a aba amivinvinkakarlo janea vio jeliviv ea ga Yesu.

²⁵ A nalo tai napanoaju aban bija Yesu jibena, naio be tira tai, napano mieiano na jada mila naio bogoti nonovio ga, bokar yuka duelimo ba juo [12] ruei.

²⁶ A tira neibano, naio bulu nakulekuleano nalo banbano-o kiano veru binu, mia nalo amim̃auka naio bano-o, mia mijog bova ga, kiano mieiano nei jo ba bova lie dam̃ariga. ²⁷⁻²⁸ Naio jom̃a mijog vatelabo ruei napano tomu nalo ajum̃a ajukunu ka Yesu ruei, mia be kiano

jidomiano tai, berinavo “A ver kiniou notokol ga m̃ano kulum̃arauo, mia kiaku mieiano ribisi vatitigio.” Mia naio binimei juluku ga iviso ea tomu nalo neibano, ana jo binimei binimei iorou vaataro ka Yesu taakano ana naio jian jum̃ano jibe na, jokol Yesu m̃ano juluvati kulukoti ga.

²⁹ Mia naio jokol Yesu m̃ano kulum̃arauo jibe na, ana monloglog ka bogo nene ga, jada nei mijelkorovio, mia naio mijoglubar ea ni-abeno ka kiano mieiano jaluvo denio ruei. ³⁰ Mia Yesu bunu ga mijogii ea naio, naio mijogii ka kiano moroano jaluvo den naio, ana soṑeli ga barṑilig naio iviso ka tomu nalo, ana naio bika berinavo “? Mia kei naio jokol vonga kiaku kulum̃arauo?”

³¹ Mia naiagagoano nalo aber ka naio aberinavo “? Jau kobika koberinavo kei naio jokolso vonga na, ana jum̃abe, jau maka keial ka tomu nalo na miroano nei naaju ga amivinkakarlo jeliviv easo?”

³² Ana Yesu naio jo jiraravo jeliviv kia ga vo mila von ka rial kei jokol naio.

³³ Mia tira neibano, naio mijikia ruei ka naina, ana naio merou laka, ana jo memebiju, mia naio binimei ea Yesu, mijorua Yesu jaano, ana naio berial vite nonovio. ³⁴ Mia Yesu berkanio, berinavo “Nena, kiamo viekouoiano ea kiniou milaso komijog bo bereio ruei, ki-

amo mieiano na maka bunu. Atua kiano tumaro to vijaso, jau kava vonuo bereio ga.”

³⁵ Mia bogo na Yesu jo mil kiaga vo ban tira nei, mia iliano tai binimei den Jairas kunuano, aber ka toro na toru nei, aberenio “Kenerimo tira sesa m̃aro ruei. Bo ka jau kovuru re bunu naverloglogiano na toru na rimei, kala bulag re naio.”

³⁶ Mia Yesu bunu ga mijogio, ana naio ber ka Jairas, berinavo “Kiamo iviso rivova re, jau komonea kar ga Atua sikili.” ³⁷ Naruei Yesu berbure tom nonovio ka mia atakisor re bunu naio avan ea vio neibano, ana naio buru ga tom tolu nei, nina Pitere, bija Yemesi, bija kuruano Jone, abano.

³⁸ Mia bogo na abinimei vaataro ka toro na toru nei kunuano, amial ka tomu nalo ajum̃a tiniel miia tira sesa neibano ruei, aju ajegi, a amila burum̃ara uetubiano. ³⁹ Mia Yesu ba joomo, ber ka tomu nalo nene berinavo “?Ka vaio ana kamiu kumitum̃a kumila uetubiano toru, a kumitum̃a kumiteg jibe na? Tira sesa na naio maka rim̃aro, naio jo monmelio ga.” ⁴⁰ Mia nalo abital niege naio ga.

Mia Yesu miila bulag tomu nalo abava tavio, ana naio buru tira sesa nei karam̃ano bija kenieno ga, bija kiano naiagagoano nalo tolu neibano, nalo aba joomo ea vio na tira sesa nei mokotenano mon eaio. ⁴¹ Ana Yesu ba bokar jum̃ano, mia naio mil banio

jelea kialo iliano, berinavo “Talita kum” napano naio berenio “Keneriku tira sesa, jau kotumolu von beamu vo.”

⁴² Mia ea bogo nene ga, tira sesa nei, napano kiano yuka duelimo ba juo [12], jumolu, ana jo mieliel. Mia nalo na amialio vite nei, amilo bano-o, jidomiano bulati ga. ⁴³ Mia Yesu ber kalo berenio mia adu sinaniano ve telisu vanio, a naio ber bunu banlo ber mia tomu dolu nalo monokanio ajog re tenei.

6

Kulo Nasarete maka asidom Yesu

Mataiu 13:53-58; Luka 4:16-30

¹ Mia Yesu jaluvo ea vio nei, ana binimei bereio ea kiano vio, naio naliko kiano naiagagoano nalo. ² Mia ea Legiano Lu, naio bija tomu nalo na kiano vio aba joomo ea kialo yimo na volkouano, ana naio jo berlogloglo. Mia bogo napano amijogio, nalo amiilo laka ka kiano iliano nalo. Ana nalo aberenio “Tomnei! ?Kema na naio bar tenalo na be? ?Naio bokar masouano na jum̃abe? ?A naio jom̃a mila vremesiano nalo na jum̃abe? ³ Kito romijikia kema na naruei. Naio be toro na miñauka yimo nalo ga na, tira na Mere kenerinio na. Mia nalo nei Yemesi, a Joses, a Jutas, a Saimon, nalo na abe kuruano nalo. A kuviviniene nalo, nalo nei napano aju kitoliko ga.”

Naruei nalo tiniel jer naio, maka asidom naio.

⁴ Mia Yesu ber kalo, berinavo “Toro napano be navelialiano, tomu dolu nalo amijikia atovon naio, mia tomu na kanano vio, naliko kanano m̃aratavo nalo, nalo na ga maka ajikia atovon naio.”

⁵ Naruei ea kiano vio memedu nei, Yesu maka rijikia rila vremesiano, mia midu juṃṃano jua tom juo ṗeli tolu ga na amie, milarurlo bereio. ⁶ Mia Yesu miilo laka ka tomu nalo na kiano vio na, bior napano maka asidom amonea naio leleio. Ana naio juvan kiano vio na, ana ba jeliviv ea m̃arkomeli dolu nalo napano naio jo berloglog tomu nalo.

Yesu miila bulag kiano atevi nalo abeve juo

Mataiu 10:5-15; Luka 9:1-6

⁷ Mia Yesu bio kiano duelim ba juo [12] nei, ana mil batitig banlo, naio jian moroano banlo ka nalo amijikia atuvulu niununo va nalo, mia iorou naio mila bulaglo abeve juo abano.

⁸ Ilivatitigiano nalo na naio beriio beamu ruei nua ka avano, ajibe nei, napano naio berinavo “Ea tivelinio na kenemiu m̃arabo, mia kami kuvar re titai vija kami, mia kenemiu nasitoga ga na kubanio, kumijikia kuvario. Mia kami kuvar re semiu sinaniano

tai kuvano, ṗelina kene-miu basaro, ṗelina kenemiu veru. ⁹ Kami kumijikia kuvar kenemiu kulubue kuviya ea jaamiu, a mia maka kuvijikia kuvar kenemiu kulum̃arauo dolu nalo bereio, mia kami kuvar ga kenemiu kulum̃arauo ve takurano ga napano kuviya bogo na kuviel kuvano.”

¹⁰ Ana Yesu ber bunu, berinavo “Bogo napano ver avuru kami kuva joomo ea kunualo nalo tai, mia kami monoka tiniemiu saaro ka kuvitu kamlikolo, m̃aratavo nalo na vonuo nene, rivano-o rivokar bogo napano mia kuvitaluvo den m̃arkomeli na bereio. ¹¹ Ana ver ea m̃arkomeli tai, tomu tai maka asidom avuru kami kuvan ea kunualo nalo, ṗelina maka asidom aiagago ka kami, mia kuvituvan ga kialo vio na to, mia bogo na kami kuvitaluvo den vio na, kami monoka kuvijubakon yevi na vio na den jaamiu nalo, jibe ka kijokijo tai ṗelina kenemiu iliano tai na kirisikili banlo, ka mia nalo avokar vironiano tai na memedu ga ka kialo bajago na bova nene.”

¹² Mia atevi nalo aban abeve juo jibe na naruei, mia aba amioliolu ban tomu nalo ka monoka aviliglo, ¹³ a amijil bulag siṃaro telabo den tomu nalo, ana nalo amion-ion bonotanunu na m̃arolivi teliki ea tomu na amie telabo parilo, jibe kijokijo tai na Atua kiano ilivuiano, ana

amijog bo bereio.

Tubo Erot Antipas berii Yesu

Mataiu 14:1-2; Luka 3:19-20, 9:7-9

¹⁴ Naruei ea bogo nei, Parinio tubo Erot naio bunu mijog kija vaio na Yesu joma milaio, bior ka Yesu siano, ajuma aberverii janea vio nonovio, mia tomu nonovio amijikia batitigio ruei. Ana tomu tealo ajuma aberii Yesu, aberinavo "Nina be Jone Baruei bere na, napano vonganei meul bereio ea mariano. Tenei naruei napano mila naio be kiano moroano ka rila kijokijo nalo na."

¹⁵ Ana nalo dolu nalo aberii Yesu, aberinavo "Nina tormoruo Elaija re nua na," ana tealo aberenio "Nina be naverialiano tai na, jibe kiado naverialiano moruo nalo tai re nuanua laka."

¹⁶ Mia bogo na Parinio tubo Erot mijog vaio na Yesu joma milaio, berinavo "Toro na pli Jone Baruei bere ga na! Kiniou nejelar pariparinio ruei, mia vonganei naio meul bereio ea mariano bo?"

? Jone Baruei maro jumabe?

¹⁷⁻¹⁸ Parinio tubo Erot mil jibe na bior naio naruei muetamaria Jone Baruei maro ruei, ana jo merou mlea kanio. Mia tukunuano na mariano na Jone Baruei kiano naio jibe nei. Parinio tubo Erot kuruano nei, be Vilip,

napano naljuo nei, karamalo takurano mia keniele naljuo. Vilip naio joro ka tira tai siano Erotias, mia iorou kanio ana Parinio tubo Erot naio ba burular tira nene. Tenena Jone joma mil ban Parinio tubo Erot kanio, berinavo "Tena jau komila na maka rimemedu, ka na jau koburu tira na, bior naio be kuruamo koano."

Mia Erotias maka leleio saaro ka Jone kanano iliano, naio tinienjer Jone, mila na Parinio tubo Erot mila kiano tomu nalo tealo abano abokar Jone amiorkario aburu ban ea yimo na lakoiano. ¹⁹ Mia Erotias jo jidom ka auebin Jone rimaro, mia naio maka rijikia rilaio, ²⁰ bior Erot merou ka ruebinio. Naio merou jibe na bior naio mijikia ka Jone be toro na memedu tai, a be toro lu bunu, ana naio bokar vatitigio ga jo. Bogo telabo naio bio Jone binimei ka ave juo atukunu, mia naio jidom Jone kanano iliano nalo, mia bogo nonovio iliano nalo nei aju ajulu naio bunu, a mila na naio kiano jidomiano beve juo naruei.

²¹ Mia maka vesiou, Erotias mial ka be kiano bogo. Nina, ea bogo napano nalo amimauka jokoluolu ka asidomkar bogo na Erot moluo eaio. Ana Erot naio mila jokoluolu tai ka kiano tomu nalo na tortoru bija kiano navurimaraboiano na kiano imauano nalo bija

tomu nalo na tortoru na tanobuku na vio Kalele.
 22-23 Ea jokoluolu nei naruei, Erotias kenerinio tira naio binimej bolu ea ga miralo, ana Erot nalo tinielo jaaro laka ka kiano voluano, naruei Erot naio mila verikariano tai kirisikili ban naio berinavo "Vaio na jau kovika den kiniou, mijikia rivano-o rivokar togio na kiaku vite nalo nonovio, ana mia kiniou nemijikia notuvan ga rivanso."

24 Mia tira neibano naio ba tavio, ana bika den kenieno, Erotias, berinavo "? Nena, mia kiniou nevika vaio denio?"

Naruei kenieno ber banio, berinavo "Mia jau kover ka ga koverinavo naio monokanio rudu Jone Baruei parinio rivan kito juo."

25 Naruei kenerinio tira nei naio mila soŕeli bere ga ba joomo, ba bika soŕeli ga den Erot, berinavo "Kiniou nojidom ka jau kodu Jone Baruei parinio ea baju tai ana kodu rimej ea vio nei vonganei."

26 Naruei iliano nei mila tubo Erot mijog kirivova, mia naio maka bunu rijikia rila korov kiano verikariano na kirisikili nei napano naio mila ea kiano bilbilu nalo miralo ruei, 27 mia ea bogo nene ga naio miila kiano toro tai na mira, ba ber ka mia adu Jone parinio rime. Naruei nalo aban ea yimo na lakoiano ana aje korov Jone burujono, 28 ana amidu Jone parinio neibano ea baju

tai, amidu abinimej ban tira neibano, ana tira neibano naio midu ba ban kenieno.

29 Mia iorou, bogo na amijog vite nei, Jone kiano naiagagoano nalo abinimej amidu mokotenano, aba amidu batove jua m̃artanbo. Naruei tukunu na berii Jone Baruei, naio maaro ea vio na, mia bogo na Erot mijog veriiano na Yesu, mila naio merou laka, ber ŕeli Jone Baruei nene napano naio muebinio, meul bereio.

Atevi nalo aba amioliolu, karina abinimej bereio

Mataiu 14:13-21; Luka 9:10-17; Jone 6:1-13

30 Naruei atevi nalo napano Yesu miila bulaglo abano ka aioliolu, mia abinimej bereio naruei. Mia naloaju aberialio ban Yesu vaio nalo napano amila ka tomu nalo, bija jum̃abe ajum̃a aberlogloglo.

31 Mia tomu miroano napanoaju abinimej ealo, karina nalo abano, ana tealo bere abinimej, karina aban bereio, mia jibe na ga bano, mia Yesu nalo maka ajikia ajilimebi leleio, maka leleio bogo vare ka ajikia adu salo sinaniano ve teliki. Naruei Yesu ber kalo berinavo "Boga, mia kito ravano. Kito rala von ka rotu ŕilig den vio nei ve telisu vo beamu, kito rava resiravo vio tai na be tum̃aro vatitigio, napano kamiu kumijikia kuvi-jilimebi vatitig eaio."

32 Jibe na aba amidu uako tai, ana ajel eaio ka ava asir-arag ka vio tai ea ueiyabo

tivelinio, napano maka tomu nalo atua vio nene.

Yesu bagan tomu telabo juvulu menu jimo [5,000]

³³ Mia tomu miroano na abutilubar ka Yesu nalo ajaluvo jibe na, ana nalo bunu ga ajaluvo den kialo m̃arkomeli nalo, ajikiti, ajel uro, ana aba abokar beamu vio napano amial ka uako nei naio joṃa ban eaio, beamu ka Yesu nalo. ³⁴ Mia Yesu bauro, a bogo na naio mial ka tomu telabo aju ruei, mia naio tinien miialo laka, bior naio mialo jibe ka nunu nalo napano amilaluvu m̃arabo, napano maka toro tai ka rivitikarlo, ana naio joṃa berlogloglo ka iliano novo nalo telabo.

³⁵ Mia bogo na m̃erenio batove, kiano atevi nalo abinimeĩ eaio, aberinavo “Ai Tubo! Vio nei naio bova ga, a vaataro ka vio ribobogio naruei bunu. ³⁶ Bo kanio jau keiila tiniobi nalo na avanvan bereio ea kialo vonuo nalo p̃elina avanvan ea m̃arkomeli nalo na aju dedade ea vio nalo nei, ka avulu salo sinaniano tai.”

³⁷ Mia Yesu ber kalo, berinavo “E, makanio, bo kanio kamiũ ga kuvar sinaniano tai rivanlo.”

Mia aberiam̃a Yesu maka river vatitigio, naruei nalo aberinavo “E! Bo ga na p̃eli jau kojidom ka kumemi nuvar kiado puruveru na toru na, kumemi nuvario nuvalu ka joko rivare ka tomu menu telabo nei ka asenio?”

³⁸ Naruei Yesu ber kalo berinavo “Mia kamiũ kuva kuvial von ver joko vio na ju bija kamiũ vonganei.”

Mia nalo aba amialio, ana abinimeĩ bereio, aberinavo “Kumemi nubar joko jimo na tereteliki ga ju, bija niado momaio juo.”

³⁹ Mia Yesu ber ka tomu nalo, berinavo “Kamiũ kuvitutano ea soro na beamu,” ⁴⁰ ana ajutano ea taara nalo, napano tealò abokar duelimo va limo [50], a tealò abokar toromomou takurano [100]. ⁴¹ Ana naio bar joko jimo nei bija momaio juo nei, jirarago bavin ea tiniabene, ber siva ban Atua biorio, ana burekokorov joko nalo nei, jian ban kiano atevi nalo, ka avario asian van tiniobi nalo nei, mia naio janka bunu ga niado tereteliki juo neibano jibe na.

⁴² Mia nalo ajinan bano-o, mia mabolo jouo vatitigio, ⁴³ mia ioroti sinaniano bija niado nalo napano ajen ana nina beva aju, nalo amisonio ban ea basaro nalo bokario duelimo ba juo [12]. ⁴⁴ Mia tomu nalo napano ajinan, napano sum̃ano nalo ga, nalo abokar jibe kovio menu jimo [5,000].

Yesu miel mave ea ni-unuku tei

Mataiũ 14:22-23; Jone 6:16-21

⁴⁵ Karina Yesu berii ka kiano atevi nalo, berenio “Kiniou nojidom ka kamiũ kuvidu kiado uako, kuvan beamu tivelinio ea ueiyabo

nei, ea m̃arkomeli na Bet-saeta, mia kiniou noto nei beamu vo ka mia naiila tiniobi nalo nei avanvan bereio.” ⁴⁶ Ana bogo na miila bulag tiniobi nalo nei abano beve terakurano bisi, naio bavin ea suku ka rivolk-ouo. ⁴⁷ Ana bogo na vio binime i viobobogio ruei, uako jo koalabo tavio ea tinia tei ruei, mia Yesu jo naio takurano ga uro. ⁴⁸ Ana Yesu mial ka nalo ajum̃a amila bijon ka ña abeluo ka uako neibano, bior aju abiniua jegi ga, mila nalo aburo melmelumu laka ga. Mia vaataro ka viorijeni mermeravo, naio binime i ealo, jom̃a miel mave ea niunuku tei. Nina naio jidom rivan vaataro ga kalo, ka riva rivoru tivelinio tukamu kalo, ⁴⁹ mia bogo na nalo aju abitii naio jo miel mave ea niunuku tei binime i vaataro kalo jibena, abio souo, aberinavo “E! ?Vaio na binime i jibe na? ?Peli sim̃aro tai, p̃elina venia na jibe na?”

⁵⁰ Nalo abiniu ajum̃a abitikar naio jibena, mia amerou laka. Mia kirisop̃eli Yesu mil banlo “E, kamiu kumerou re bunu, kiniou ga na.” ⁵¹ Mia Yesu bavin ea uako bijalo, ana ea bogo na memedu ga, jegi neibano ñaro, ana nalo na ajua uako amiilo toru laka garuei. ⁵² Nalo amiilo jibe na bior kialo jidomiano nalo kirisikili laka kia ga vo, maka atu avitilubar vite nalo napano Yesu mijikia rila ea kiano moroano, jibeka vaio

napano naio mir̃auka bija joko jimo tereteliki neibano.

Namieiano nalo ajokol ga Yesu kiano juluvati kulum̃arauo

Mataiu 14:34-36

⁵³ Ana Yesu nalo abarkorov ueiyabo neibano aban ea kialo uako tivelinio, naruei aba aboru ea vio tai, siano Kenasarete. Mia bogo na abuku veru ba uro, ⁵⁴ mia abavatove ea uako, ana soṽeli ga tomu nalo na vio na abitilubar Yesu. ⁵⁵ Naruei nalo ajikiti ajeliviv ea kialo m̃arkomeli nalo, aju abarvar kialo namieiano nalo ea m̃alo jogu nalo, abinime i ea vio nalo vabe napano amijog ka Yesu jom̃a ban eaio.

⁵⁶ Ana ea vio nonovio na Yesu naio jom̃a ban eaio, ea m̃aratavo nalo, ea m̃arkomeli nalo, p̃elina ea m̃arabo nalo, nalo ajum̃a abar kialo namieiano nalo, aju abarlo ju vatitig ea vio medave, ana aju abika denio ka rijamo ka namieiano nalo nei atokol ga juluvati na kiano kulum̃arauo. Mia nalo na mia atokolio tibena, kialo mieiano nalo ribisi, a nalo amei rivu bereio.

7

Yesu kiano atevi nalo maka atakii bajago moruo na kulo Ju na nalo kialo

Mataiu 15:1-9

¹ Mia ea bogo nei, Varisis teal o abinime i vio takurano ea Yesu, bija bunu naverloglogiano na tuboiano, napano nalo ajaluvo ea vio Yerusalem o abinime i. ² Mia

naloaju amial ka bogo napano Yesu kiano atevi naloajuña ajinan, amila napano ea Varisis nalo kialo vitiano, juñalo nalo abova. Nina bior napano maka atakii vatitig kiri m̃arabo sesa nalo telabo ka asekona juñalo, napano Varisis nalo aber tomu nalo monoka alaio, karina amijikia asinan. ³ Nina bior ea bogo na, Varisis nalo bija kulo Ju dolu nalo ajikili laka ka ala tibena naruei, ka nalo monoka atakii vatitig rivu kialo bajago moruo na kialo lotuano re beamu. ⁴ Ajum̃a amila jibena ka ver nalo amiel aban ea komeli p̃eli na vio vabe, mia bogo na abinimei vonuo bereio, mia monoka nalo atakii tuboiano na ka asekono ameravo rivu p̃eli na ave lu vatitigio rivu bereio. Iorou ka nina, amijikia atikar ka asinan naruei, bior ver nalo ala re, maka ajikia atokol sinaniano leleio. Mia be tuboiano sesa telabo bereio jibe na napano monoka atakio, napano teal, aber monoka asekona baja tibe na tibe na, a teal, aber monoka asekona p̃ili marauo tibe na tibe na, a teal, aber monoka asekona baju na amim̃aukanio ea burujievi na be bras tibe na tibe na, rivan tibe na. ⁵ Vite na naruei mila Varisis nalo abika den Yesu, aberinavo “? Ka vaio ana kanamo atevi nalo maka atu atakii bajago moruo nalo na kiado lotuano nanua, napano kiado navurim̃araboiano nalo na ajum̃a aberloglogio ka kito.

Kanamo nalo na, ajum̃a ajinan bija niamiamo nalo na juñalo, bior napano maka asekona batitig juñalo nalo.”

⁶ Ana Yesu berdope banlo, berinavo “Riano ga na, naverialiano Aisea re nua naio berii memedu ga kamiu tomu nalo na sibiano na, napano naio berial iliano nei napano Atua naio berenio, napano ber

“Tomu nalo na abamenea kin-iou ka kialo iliano nalo ga,

mia kialo jidomiano naloaju koalabo den kinioukia ga vo.

⁷ *Mia naloaju amilotu ka kiniou kurano ga,*

bior bogo napano aber-loglog tomu nalo, naloaju aber nina Atua kanano iliano na,

mia makanio, iliano nei be tomu nalo kialo ga.” Ais 29:13

⁸ Ana Yesu ber kalo berinavo “Kamiu kumitum̃a kumituvan Atua kiano tuboiano, ana kumitum̃a kubokar bajago moruo na kulorinio ga kiano kirisikili laka. ⁹ Maka leleio rimemedu ka mia kamiu kuvitum̃a kuvila tibe na, bior napano kamiu kumitum̃a kumisikili ka kuvitakii bajago moruo nalo na toro ga kanano, mia vonganei kamiu kumila banbano-o mia bajago nei naio jo midu jeleig vio p̃elina naio jo bukular Atua kanano tuboiano. ¹⁰ Mosis kiano tuboiano naio berenio ruei, berinavo

‘Jau komonmonea karamāmo
naio koniomo,’
a naio ber bunu, berinavo
‘Toro na mil bova ka
karamāno naio ke-
nieno, mia kamiu
kuvuebinio riñaro.’

¹¹ “Tuboiano nei berenio
ka kito monoka rovitikar
vatitig kiado tormoruo juo
nei, mia kamiu kumitu
kumila dolu nei. Verenio
toro tai verko kario kiano
vite tealo ka river abe Atua
kiano, ana ver tormoruo
juo jumalo bulati, amei
avikanio, mia kamiu kuver
van naio ka monoka rila
vaio van naljuo?” ¹² Mia
kamiu kuvitutua naio,
kuverinavo ‘Maka lele, maka
kajokia kosian van naljuo
nei, bior kanado bajago
moruo ber vaio na ku-
berkoio ban Atua, monoka
kosian ga van kiano tomu
lu nalo, jau maka kajokia
kotuvan van toro dolu.’
¹³ Kamiu kuberenio jibena,
mia vaio na jibena? Kamiu
kumitu jikili ea bajago
moruo nalo, kamiu kumitu
kumitubarvan batove, mia
jo mila Atua kiano tuboiano
binimej be vite kurano tai.
Mia maka nina ga, mia
kamiu kumitu kumila vite
telabo na jibena.”

*Vite nalo namā mijikia
rila toro riagiago ea Atua
mirano*

Mataiu 15:10-20

¹⁴ Naruei Yesu bio tomu
nalo ka amei vio takurano
bereio ea naio, ana naio
mil banlo, berinavo “Kamiu
nonovio kuviagago vatitig ka
kiniou, kamiu monokanio
kuvijoglubar kanaku iliano

nei. ¹⁵⁻¹⁶ Maka leleio ve
vite tai namā jo tavio ea
toro, mia river riva joomo
ea naio mijikia rila naio ria-
giago ea Atua mirano. Mia
vite nalo namā aju joomo
ea naio, napano mā amoluo
ea naio, vite nalo na naruei
amila naio miagiago ea Atua
mirano.”

¹⁷ Ana Yesu jaluvo den
tomu nalo nei, ana ba vonuo
bereio, ana karina, kiano
naiagagoano nalo abinimej,
abika denio jamerijiano na-
pano naio jomā berii kalo.
¹⁸ Ana Yesu berinavo “?
Jumabe, pēli kamiu bunu
parimiu bono kia ga vo
javukia nalo na? Bior vaio
napano kamiu maka kuvi-
tilubar vite na? Vite vaio
na jo tavio, jibe sinaniano
nalo, verinavo riva joomo ea
toro, nalo maka ajikia ala
toro rivova ea Atua mirano.
¹⁹ Nina bior napano vite nalo
nei maka ava avokar kiano
jidomiano, mia abatove ea
mabono ga, karina abar-
laka amoluo den niabene
bereio.” Mia Yesu ber jibe
na naruei, ana karina, tomu
nalo abitilubarior von naruei
ea kiano iliano nei, Yesu mila
meravo ka maka ve sinani-
ano tai napano toro monoka
rivel kanio ka rila naio
rimeravo rivu ea Atua mi-
rano, mia sinaniano nonovio
ga nalo abo ga ka asenio.

²⁰ A Yesu berenio bunu
“Mia vite nalo napano ajua
toro ruei, ana aju amal-
maluvo ea kiano meuliano,
vite nalo na naruei amijikia
ala toro riagiago. ²¹ Nina
bior joomo ea toro, be ba-

jago va nalo napano aju amoluo ea naio, jibe jidomiano va, siakiano, vinauano, amue tam̃aro ea toro, siakiano, ²² tinieiano, bajago na bova, sibiano, lakoroviano na tuboiano, jokuano, tii ilisibiano nalo, ilivarvariano, bija vovuiano. ²³ Bajago va nalo nei naruei, nalo amoluo den toro kiano iviso, mia nalo nei naruei vite nalo nam̃a amijikia ala toro riagiago kamu ea Atua mirano.”

Yesu mijil lar niadu den niatira tai

Mataiu 15:21-28

²⁴ Ana Yesu jaluvo den vio na, naio batove ea tanobuku na komeli nei Taea. Mia naio ban ea yimo tai, naio jidom rila ka mia tomu nalo ajikia re ka naio joa vio na, mia naio maka rijikia toluku tibena. ²⁵⁻²⁶ Naruei tira tai joa vio na napano maka ve Ju, bior napano kiano torogio nalo abe Kris ga, mia abinimei ajua tanobuku na Vonisia vaataro ka Siria. Tira nene, kenerinio kiri tira sesa, niununo va tai joaio, mia bogo na tira neibano mijog ka Yesu joa vio na, naio binimei minie tano ka Yesu jaano, jegi banio, ka naio rijil lar siñaro nene den kenerinio niatira sesa nei. ²⁷ Mia Yesu berdoŋe naio, berinavo “Mia memedu ka kiritete nalo monoka asinan beamu! Maka rimemedu ka navar bulag kiritete nalo salo sinaniano nalo denlo, novuku rivan kuli nalo.” Naio berenio jibe na bior ka bogo na, kulo Ju nalo, napano aberiam̃a nalo ga abe Atua

kenerinio nalo, nalo ajum̃a abio niegeniege tomu nalo napano maka ave kulo Ju, aberinavo “Kam̃u kuli nalo ga.”

²⁸ Mia tira neibano berdoŋe naio, berinavo “Jau kober be riano Tubo, mia kuli nalo aju aban vaataro ka vio na kiritete nalo salo sinaniano, ka mia amijikia asen yororoti sinaniano nalo nam̃a ajibirbil yetano ea borotano.”

²⁹ Naruei Yesu berkanio, berinavo “Jau kojian verdoŋeiano novo tai ka kaku iliano nei. Naruei bior kanamo iliano novo na, kinio nebitilubar ka jau tiniemo barkar vatitig kinio, ana bo, neber kaso ka jau komijikia kava vonuo ga, siñaro nene jaluvo den kenerimo niatira nene ruei.”

³⁰ Naruei tira nei naio ban bere vonuo, ana binimei mial kiritete neibano kenerinio naio jo melumu ga, naio jo mon vatitig ea m̃ano jogu.

Yesu miñauka batitigio bulubau tai

³¹ Mo, karina Yesu juvan tanobuku nei Taea, ana naio ba jel ea m̃arkomeli dolu na Saiton, ana binimei bereio ea ueiyabo na Kalele, nina tivelinio na tanobuku napano abio ka Komeli Du-elimu. ³² Ana nalo na vio na aburu toro tai binimei banio, ka naio rudu jum̃ano toaio, bior toro nene naio tiliniene bono, naio mil dede laka ga. ³³ Naruei Yesu buru toro nei jaluvo den tiniobi nalo nei napano

aju, naruei naljuo aba laka

kija. Naruei Yesu miyuku m̃arjukum̃ano ban ea bulukuti buru tiliniene, karina naio midu titinio, mia ea kema neibano buruminano.

³⁴ Karina Yesu jirarago mave ea tiniabene, naio burukar kiano jegi toru, ana ber ka kema neibano jel kialo, berinavo "Evata," napano iliano na berenio "Jau kovetavo."

³⁵ Naruei vaarakurano ga, kema neibano, buru tiliniene betavo, bija buruminano miñau vatitigio, mila na kema neibano naio mijog vite bo a mil vatitig meravo ga.

³⁶ Naruei Yesu jadu kalo, ka mia avan re atukunu ka tenei tanea vio van tomu dolu nalo, mia bogo na naio jo berii jibe na ka tomu nalo, mia nalo aba aberverii lie vo ea vio reraio ga. ³⁷ Nalo aberii m̃elea jibe na, bior amiilo mia amiilo ka vite nalo nonovio napano m̃a nalo amialio ka Yesu mijikia miñaukanio. Nalo ajum̃a aberverii aberinavo "Yesu nei mila nalo nam̃a tilinieto bono nalo amijog vite, a naio miñauka tomu na maka ajikia ail, nalo amil. Kaleliki, kema na miñauka vite nalo nonovio bo mia bo laka, mm."

8

Yesu bagan tomu nalo juvulu menu veri [4,000]

Matiai 15:32-39

¹ Ana bogo tai, tiniobi toru tai na tomu telabo nalo abinimei ea Yesu bereio. Mia nalo aju bija naio bano-o, ana nalo jijerlo, ana nalo

maka bunu salo sinaniano. Ana Yesu bio kiano naia-gagoano nalo abinimei ea naio, ana naio ber kalo, berinavo ² "Kiniou tinieku jii tiniobi nalo nei toru, bior aju bija kito bogoti tolu ruei, mia salo sinaniano biniau ruei. ³ A ver kiniou neila bulaglo avan ea kunualo napano maka ve salo sinaniano jibenei, p̃eli tealosiserlo ve toru ea m̃arabo togio ana miralo ribobogio, bior nalo tealos, kialo komeli aju koalabo laka."

⁴ Ana Yesu kiano atevi nalo aber ka naio, aberinavo "Ana mia kito ravagan tomu nalo nei ea vio iauo nei tum̃abe?"

⁵ Ana Yesu bika denlo, berinavo "Ana kamiu be semiu joko vio?"

Ana nalo aber "Aluo ga."

⁶ Naruei Yesu mil ban tiniobi toru nei, berinavo "Kamiu kuvitutano ea vio nei beamu vo." Ana naio bar joko aluo nei, naio ber siva ban Atua kanio, karina naio burekokorovio, ana bario janea kiano naia-gagoano nalo ka avar van tomu nalo, ana nalo aba ajankanio ealo. ⁷ A nalo abar niado momaio juo na tertelisu ea bogo nene, ana Yesu ber siva kalo bunu, ana berinavo "Kuva kuvitan kalo bunu van tomu nalo." ⁸ Ana nalo ajenio banbano-o, napano mabolo jouo vatitig, ana amison basaro aluo bereio abujo magmago vatitig bija ioroti sinaniano nalo na ju. ⁹ Ana nalo na ajinan ea bogo nei,

nalo abokar ĉeli menu veri [4,000].

Naruei Yesu miila bulag tiniobi nei aban bereio ea kialo komeli,¹⁰ ana naio ban ea kialo uako na, bija kiano atevi nalo, a nalo ajuvan vio na, aba abokar tanobuku na vio Dalmanuta.

Tomu na tortoru tai ajidom aial kijokijo

¹¹ Ana ea bogo tai na, Varisis nalo tai abinimei ajidom avilvil ea Yesu, a ajidom ala vonvon naio, ana nalo aberinavo "Kumemi numisidom jau koverloglog kijokijo tai na toru ka nuvalio, napano jau kalaio vija sikiliano na tiniabene."

¹² Mia Yesu naio buru kiano jegi, jibe napano naio tinien maro kalo ruei, ana berdoĉe banlo, berinavo "Ka vaio kiamu na tena banei, kumitu kumisidom kuvial kijokijo tai tibena? Kiniou neber be riano ban kiamu, maka leleio, mia kenemiu bajulukuti na banei mia maka ajikia aial kijokijo tai."

¹³ Ana Yesu jaluvo denlo juvanlo ajubo, ana naio ban ea uako bereio, naio barkorov bereio ueiyabo ba tivelinio.

Navurim̃araboiano nalo na lotuano amila bajago vaaju amiluo lie

Mataiu 16:5-12

¹⁴ Ana bogo na nalo ajaluvo aba abokar tivelinio na ueiyabo na toru nei, nalo ajidomii von bereio napano tinielo bobogia ka avar salo joko tai rimej, mia salo joko

takurano ga jo bijalo ea uako.¹⁵ Ana Yesu ber iliano tai banlo, berinavo "Kiamu monoka kuvitikar vatitig kiamu, ka Varisis nalo bija Erot kialo is." Yesu berenio jibe na ber ka bajago va nalo na kialo navurim̃araboiano nalo, mia atevi nalo maka asidomiilubario.

¹⁶ Nalo amijog ga, ana aju aberii ealo, aberinavo "Ĉeli naio mil jibe nei bior napano kito maka ravar joko tai rimej."

¹⁷ Ana Yesu mijikia kialo jidomiano na, ana berinavo "Kiamu kumitu kuberii napano m̃aka ve sado joko ka vaio? Jum̃abe, kiamu maka kuvijoglubar ĉeli maka kuvitilubar vite nalo navo? Ĉeli tiniemiu nalo jikili laka ga!"¹⁸ Kiamu, miremiu nalo ju, mia kiamu maka kuvitu kuvitilubar vite, a burutiliniemiu nalo ju, mia kiamu maka kuvijoglubar vite. Ĉeli kiamu maka bunu kuvitu kuvisidomii bereio vite nalo napano kiniou nomilaio ban tomu nalo?¹⁹ Bogo na kiniou nemila burevure joko jimo nua na ruei ea tomu nalo menu jimo [5,000] na, nalo ajenio banbano-o mia kiamu kumison iororoti sinaniano nalo aban ea basaro vio?"

Nalo aberdoĉe ban naio, aberinavo "Kumemi numison duelimo ba juo."

²⁰ Ana naio bika bereio, berinavo "Ana bogo na nalo menu veri [4,000] na ajen ga

joko aluo na, iorou kamiu kumison basaro vio bereio?"

Ana nalo aberdoŝe, aberinavo "Kumemi numison aluo."

²¹ Ana naio ber kalo, berinavo "Boga, ana juŝabe vonganei? Kamiu kumijikia kija vite nalo nei naruei, ŝeli na makan vo?"

Yesu milarur merebono tai na vio Betsaeta

²² Naruei Yesu nalo abinimei abokar komeli nei, Betsaeta. Ana nalo na vio na, aburu merebono tai binimei ea Yesu, ajegi ban Yesu ka naio tokol vatitig toro nene. ²³ Ana Yesu bokar merebono napano juŝano, ana naio burio bano, ana naljuo aban bilig ea komeli tivelinio abano. Naruei Yesu midu titinio jua toro napano mirano, a naio midu juŝano joa mirano be juo, ana bika den naio, berinavo "Juŝabe, jau kojo komial vite, ŝelina makan vo?"

²⁴ Ana toro napano naio jirarago, mial vio, mia naio ber berinavo "Nao-o, kiniou nemial tomu nalo, a nemial nalo jibe bulapati buruiesi ga nalo napano aju amiel."

²⁵ Ana Yesu midu juŝano joa naio bereio ea bogo valuo nene, ana toro nei, mirano binimei bo nonovio garuei, ana naio jirarago bereio, mial vite nalo meravo mia meravo bo. ²⁶ Ana Yesu berkanio, berinavo "Mia kavan re bunu keial nalo na ajua komeli, kavan memedu ea kunuamo."

Pitere berial ka Yesu be Naverikariano memedu

Mataiu 16:13-20; Luka 9:18-21

²⁷ Mia Yesu bija kiano atevi nalo ajidom avatove ea ŝarkomeli na tertelisu vaataro ka komeli na toru nei Sisiria Vilipai, a bogo napano nalo aju amiel ea ŝarabo ka avatove ea vio na, naio bika denlo berinavo "Kamiu kumitu kumijog tomu nalo aju aberverii kiniou ka kiniou kiniou kei?"

²⁸ Nalo aberdoŝe banio, aberinavo "Tealo aberinavo jau Jone Baruei bereio, a tealo aber Elaija, a tealo aber jau naverialiano na nuanua laka."

²⁹ Ana naio bika bereio den nalo, berinavo "A juŝabe ka kamiu, kamiu kumitu kuberii kiniou kiniou kei?"

Naruei Pitere berdoŝeio, berinavo "Jau kobe kenememi Naverikariano memedu na."

³⁰ Ana Yesu ber memedu banlo, berinavo "Bo, mia kamiu kuva kuverialio re vite nei van tomu nalo."

Yesu berial kiano ŝariano Mataiu 16:21-28; Luka 9:22-27

³¹ Ana ea bogo na, Yesu jikar ka milavon ka riverloglog kiano atevi nalo ka Kulorinio Kenerinio, mia monoka nalo ala vite ve telabo napano mia naio rijog rivova kanio, a mia navuriŝaraboiano nalo na kulo Israel bija kialo parinio kulo lu nalo, bija tomu na verloglogiano na tuboiano

nalo, mia nalo avukular naio. A Yesu ber bunu mia auebin naio, mia bogoti ve tolu nene, mia naio tumolu bereio, naio tovulu m̃ariano. ³² Iliano nalo nei, Yesu berialio meravo vatitig kalo, a bogo na Pitere mijogio, bio Yesu, burular naio, mil jikili banio, jidom verbure naio, ber mia tibe na re. ³³ A soḡeli ga Yesu naio bilig taakano ka Pitere, naio bitii ban ea kiano atevi nalo dolu na aju, ana naio mil koko vio jikili ban Pitere, ber kaio, berinavo “Sim̃aro, kava bilig den kiniou! Kiamo jidomiano na be toro kiano ga, maka Atua kiano jidomiano leleio.”

Yesu kiano naiagagoano monokanio sidomii ve iakurano ga ka kiano sidomiano nalo

³⁴ Ana Yesu bio tiniobi nalo bija kiano naiagagoano nalo, ka amei ea naio, ana ber kalo, berinavo “Toro na jidom takisor kiniou, naio monoka sidomii iakurano ea kiano sidomiano nalo, monoka rudu kiano m̃akolkolo, ana takisor kiniou. ³⁵ Toro na jidom rilarur kiano meuliano, mia rilaluvuio. Mia ver toro tas milaluvu kiano meuliano bior kiniou, ḡeli na bior kiaku Ioluano Vou, mia naio rije ioruriano.

³⁶ “Verver toro tai rije vite nonovio na yetemeriba nei, mia iorou naio rilaluvu m̃arabo na meuliano, naio maka rije tena bo tai leleio.

³⁷ Mia kiano vite novo nalo nei napano bario, maka ajikia avulu kean bere kiano meuliano bogo tai. ³⁸ Tomu nalo miroano ea taara na vonganei nalo amila kari-ano, nalo maka leleio ave riano ea Atua, nalo abova laka, a nalo amimou ka tomu dolu nalo bior kiniou bija kiaku iliano. Ana iorou mia Kulorinio Kenerinio rimeĩ bereio, naio vija kiano nail-iano lu nalo, vija karam̃ano kiano mermerano, a bogo na amei, ver toro mimou ka naio vonganei, mia naio bunu rimou ka toro nene.”

9

¹ A Yesu ber bunu banlo, berinavo “Riano ga neber ka kamiu, tomu nalo tai na aju ajikili ajua vio nei, napano mia nalo maka ajikia am̃arm̃aro, rivanvano-o rivokar bogo na nalo aleal Atua kiano Navena-tuboiano rimeĩ riyotuba vija kiano burum̃ara sikiliano.”

Yesu niabene binimeĩ be dolu

Mataiu 17:1-13; Luka 9:28-36

² Iorou ka bogo nei, bogoti ari barlaka ruei, ana Yesu buru Pitere, a Yemesi, a Jone, nalo abano mave ea burusuku tai na bavin laka, napano nalo veri ga. Ana bogo na nalo aju jibena, naiagagoano tolu nei amial Yesu niabene jo binimeĩ be dolu, ³ a nalo amial kiano kulum̃arauo nalo amieg, a

nalo amiuvu bo mia amiuvu nonovio garuei, jovulu vite dolu nalo tealo na yetemeriba neibano na amiuvu. ⁴ Ana nalo amial bunu naverialiano Elaija bija tormoru Mosis, naljuo amiyotuba, naljuo aju ajukunu bija Yesu.

⁵ Ana Pitere ber ka Yesu, berinavo “Tubo, bo ka kito rotua vio nei. Bo ka kumemi nuviñauka yimo tobobo ve tolu ea vio nei, kiamo ve takurano, Mosis kiano ve takurano, a Elaija kiano ve takurano.” ⁶ Pitere mil vovu jibe na ka nalo amemebiju laka, a nalo amerou, nalo maka bunu ajikia mia aver venia.

⁷ Ana vaarakurano ga, melijo tai binimei jovukolo, ana nalo amijog iliano tai binimei eaio, berinavo Ninei be keneriku na, napano kiniou nojidom naio laka. Kamiu monoka kuvijogkar vatitig naio.

⁸ Naiagagoano nalo amijog iliano na, ana ajiraravo jeli-viv ealo, ana maka bunu aial naljuo nabano, mia amial Yesu naio ga takurano jo bijalo. ⁹ Ana nalo ajaluvo den burusuku neibano, nalo aju abatove bereio, ana Yesu mil jikili banlo, berburelo berinavo “Tena Atua mila kumialio, mia kamiu kuvan kuver re ka tomu nalo vonganei, riva riva rivokar bogo na Kulorinio Kenerinio naio rimeul bereio ea namariano, naruei ea bogo na mia kuverialio ka tomu nalo.” ¹⁰ Ana

nalo amijogkar Yesu kiano iliano nei, mia nalo abokar iliano nei be kialo ga, kar na nalo aju abivika denlo aber venia naruei be nioti na kiano iliano nei napano naio jo berii rimeul bereio ea namariano.

Nalo aberiamña Elaija juo nene mia naio rimei navo, mia Yesu ber Jone Baruei ruei

¹¹ Ana naiagagoano tolu nei nalo abika den Yesu, aber “Jumabe ka tomu na verloglogiano na tuboiano nalo aju aber Elaija mia rimei bereio beamu, iorou Naverikariano nei mia riyotuba?”

¹² Ana Yesu berdoŝe banlo, berinavo “Nina nalo aberio be riano ga, Elaija monoka rimei beamu ka rila saba nalo rimemedu ka Naverikariano naio rijikia rimei. Mia iliano lu nalo aju aber todolu tai bunu na nalo maka atu asidomiiio, nina jo berii Kulorinio Kenerinio, berinavo mia naio monoka riviviuo bogokouo ve telabo, a mia tomu nalo asidomii va lelan naio laka. ¹³ A kiniou neber ka kamiu, neber Elaija nei naio binimei vonga garuei, a tomu nalo maka asidom naio. Jibe Iliano Lu naio berenio, nalo amila bova ka naio ruei.”

Yesu mijil bulagio siñaro ea mēaku tai

Mataiu 17:14-22; Luka 9:37-43

¹⁴ Naruei Yesu bija nalo tolu nei aju aban ea naiagagoano dolu nalo,

ana amial napano tiniobi miroalo aju jeliuiv ealo, a nalo amial ka naverloglogiano nalo na tuboiano bunu aju jeliuiv ealo. ¹⁵ Ana bogo na tiniobi nalo nei amial Yesu jo binimeu bereio, nalo amiilo ka naio, a nalo ajaaro toru ka amialio, ana nalo ajikiti abinimeu eaio, nalo aban jumalo bija naio. ¹⁶ Ana Yesu bika den naiagagoano nalo berinavo “Ee, kamiu kumitu kumitukunu ka vaio bija nalo na?”

¹⁷ Ana nalo tai ber ka Yesu, berinavo “Naverloglogiano, kiniou naruei noburu keneriku sumano meaku binimeu easo ka jau keial naio, ka simaro tai na buru joa naio. ¹⁸ Ana bogo na jo mimaukanio, buku naio batove ea borotano, titinio miou kirivova jibe tililevlevi, naio jer marjuvono, a niabene nalo amarmariulu. Ana kiniou noburu naio binimeu, ana jau maka koto, ana nebika kiamo naiagagoano nalo ka abolkouo ka ajil lar simaro nene, ana nalo amila vonvonio, amila banbano-o, nalo abijukudeio.”

¹⁹ Ana Yesu berdope, mil banlo, naio berinavo “Kamiu na, jumabe jibe na? Kamiu maka kuvitu sikili ea Atua leleio. Kiniou monoka noto vija kamiu vano-o vokar nagi? Kiniou tinieku maro ka kamiu ruei. Mo, bo ga, kuvuru meaku nene rimeu ea kiniou.”

²⁰ Ana nalo aburu binimeu, ana bogo napano simaro nene mial Yesu, mila

meaku neibano niabene marmariulu, mila mijoru ea borotano, naio jo bilivilig janea vio jibe na, a mila titinio miou bova jibe jo bepeili. ²¹ Ana Yesu bika sumano meaku nei karamano, berinavo “A simaro nei jikar mila naio jibe na nagi ruei?”

Ana karamano berdopeio, berinavo “O, tenei nua ruei, bogo na naio be tete kia ga vo. ²² Binimeu bokar baneu bogo telabo ruei, tena joma mila naio jo mijoru batove ea sebi peli ea bulukue. Tena jidom ruebulag naio laka, a ver jau komijikia kala titai ka naio, kumemi nubika denso, aua jau tiniem riia kumemi, jau koiia kumemi rivior kenerimemi nei.”

²³ Ana Yesu ber ka naio berinavo “Kiniou nomijog ka kober jibe na, ver kiniou nejikia neimaukaio. Ana kiniou neber kaso, verver jau komonmonea ga, jau komijikia koiimauka vite nonovio.”

²⁴ Naruei sumano meaku nei karamano bio soveli ban Yesu, jegi banio, berinavo “Nojo nomonea teliki, a maka nomonea vare vo. Aua jau koiia kiniou ka kiaku moneano rimeu ve toru lie.”

²⁵ Ana bogo na Yesu mial ka tiniobi abinimeu miroano aju ajelivivi ealo, ana naio mil ban niununo va nei napano joa sumano meaku nei, berinavo “Jau niununo va na tiliniene bono, a na be buru, neber memedu banso, neber jau kataluvo den naio vonganei, a mia kavan lele

re bunu joomo eaio bereio bogo tai.”

²⁶ Ana niununo va nene miaga va laka, a mila sumāno mēaku nei niabene amarmariulu banbano ba bova laka, ana naio jaluvo denio, buro bano. Vonganei sumāno mēaku nei niabene melukluku laka jo, jibe ka naio m̃aro ga, a tomu nalo na aju abitii aber jibe nei naruei, aberinavo “O, sumāno mēaku nei naio m̃aro ruei na.”

²⁷ Mia Yesu bokar jumāno, ana buru sumāno mēaku nene jumolu, ana jumolu ju vatitig jo. ²⁸ Mia iorou, Yesu ban bere ea komeli bereio, ana ka bogo na, napano naio jo naio takurano ga, kiano naiagagoano nalo abinimei abika, aberinavo “Jumābe kumemi maka nuvijikia nuvijililar simāro na joa sumāno mēaku na?”

²⁹ Ana Yesu ber kalo, berinavo “Simāro ninio nalo na jibe na, nalo ajikili laka, volkouano ga mijikia rijil bulaglo.”

Yesu berial bereio kiano m̃ariano

Mataiu 17:22-23; Luka 9:43-45

³⁰ Mia Yesu nalo ajuvan vio nei, ana nalo abanvano amalmaluvo ga ea tanobuku nalo na Kalele, mia ea bogo na, Yesu maka sidom ka tomu nalo ajikia venia na naio jo milaio, p̃eli ea vio vabe na nalo aju aban eaio. ³¹ Nina, bior ka naio jo berloglog kiano

naiagagoano nalo ea bogo na, ana naio jo ber kalo, berinavo “Vaataro ka mia adu Kulorinio Kenerinio van ea tomu nalo jumālo napano mia auebin naio rimaro, mia iorou, ea bogoti ve tolu, mia Atua rila naio rimeul bereio.”

³² A kiano naiagagoano nalo maka ajoglubarbar vo venia napano Yesu naio jo berenio banlo, a nalo amerou ka avika vatitig denio bereio.

Toro kei naio jo mave ka toro dolu

Mataiu 18:1-5; Luka 9:46-48

³³ Ana iorou, bogo tai abinimei abokar bereio Kape-neam, abinimei joomo ea yimo tai, ana Yesu bika den kiano naiagagoano nalo, berinavo “Kamii kumitu kubivivika iliano ea kamii ea m̃arabo bior vaio?”

³⁴ Mia maka averdopeio van naio, bior ka bogo na nalo aju amiel abinimei ea m̃arabo, nalo aju amil banlo, aber kei kalo na jo loa mave, p̃eli kei naio bo loa teal. ³⁵ Ana Yesu jotano, bio nalo duelimo ba juo [12] nei ka amei vaataro ka naio, ana naio ber kalo, berinavo “Verver kamii tai na jidom naio to ve moti, a naio jidom ka siano to mave, bo ga, ana mia naio monoka rila naio rimei ve na maariano, to totano maariano laka garuei, naio monoka rimei tibe toro na im̃auano na nalo dolu beamu.”

³⁶ Ana Yesu bio kiritete tai napano jo binime i ea naio, naio miduio jikili ju iviso kalo, ana naio bokar tete nei ana ber kalo, berinavo ³⁷ “Toro na kiano jidomiano batove ka kiniou, ana naio tinien jaaro ka rila vatitig kiritete tai na jibe nei, nina, jibeka ga na naio jo jaaro ka kiniou. A toro na jaaro ka kiniou jibe na, maka saaro ka kiniou ga, mia naio jaaro ka nina naio miila kiniou nebinime i.”

“Toro na maka to verbure kito, naio jo miija kito”

Mataiu 18:6-9; Luka 9:49-50, 17:1-2

³⁸ Ana naiagagoano nei Jone ber ka Yesu, berinavo “Naverloglogiano, kumemi numial toro tai, napano naio jo mijil bulag simaro nalo, naio jo mijil bulaglo ea siamo. A toro nene maka nuvijikiaio, naio maka ve kito tai, mia kito rotuko vio ka naio.”

³⁹ Ana Yesu ber kalo, berinavo “Makanio, kami u kuverbure re naio. Verver toro tai jibe naio be riano, ana naio mila imauano nalo na bo tortoru laka ea siaku, mia toro na maka rijikia ril vova ea siaku bereio bogo tai. ⁴⁰ Toro na maka to toko vio ka kito, naio jo miija kito na. ⁴¹ Neber be riano ban kami u, ka ver toro tai mijikia ka kami u kumitu kubar Kristo siano ea kami u, ana naio midu baja na uei tai ban kami u ka kumunio, toro na mia maka rijikia rilaluvu

kiano jidomiano tai na bo mia naio ruduio iorou.”

Tuboluboiano nalo

⁴² A Yesu ber bunu, berinavo “A verver toro tai rila ka tete tai naio maka bunu sikili ea kiniou, mia toro na ridu mauo tai na jikili lie vo, todovulu nina mia ver aiorikar puruveru tai na toru ea burujono ana avuku naio rivan ea niogovu.

⁴³⁻⁴⁶ “Verver jumamo tai peli na jaamo tai milaso maka bunu koto sikili ea kiniou, bo ka ketelario rivan ga. Verver kete bajago na kariano ea kiamo meuliano tibe na, mia komijikia kava joomo ea meuliano, a ver kava joomo ea meuliano a jumamo tivelinio peli jaamo aba kovio ruei, nina bo ga na. Mia bova laka ver jumamo ve juo vija jaamo ve juo nalo atu rivu ga, mia iorou avukuso ea sebi na maka rijikia rimaro bogo tai. ⁴⁷ Peli ver miramo, peli venia bereio ea kiamo meuliano milaso maka bunu koto kesikili ea kiniou, bo ka jau koi ja lario ga. Tibe na, mia jau kava joomo ea Atua kiano navenatuboiano napano vite teliki nei bakovio denso ruei, a nina bo ga na. A bova laka ver miramo ve juo peli kiamo bajago bova nalo ju bo ga easo, mia iorou tenalo teliki nei ga buru kiamo meuliano ban ea sebi ea vio na jogvaiano, ⁴⁸ napano sebi nene maka rijikia rimaro bogo tai, sorel

nalo aju ajen mokotenamo bogo nonovio ga.

⁴⁹ “Jibe na tei mijikia rila sinaniano maka jikia soono, mia Atua ridu sebi toa tomu nalo ka sisen bulag soro nalo na joa kialo meuliano. ⁵⁰ Mia romial bunu tei mila sado sinaniano jesei bunu, a ver kiano sikiliano riva kovio, naio maka bunu rijikia rila kiano iñauano. Vonganei kamiu monoka kuvijamo ka Atua kiano tei rinñau ea kamiu bogo nonovio, ka kenemiu meuliano soono re, a ka kenemiu bajago naio sese, mia kamiu kuvitu vija tuñaro bogo nonovio.”

10

Yesu berii juñabe toro jitiglar koano

Mataiu 19:1-12; Luka 16:18

¹ Ana iorou, Yesu juvan vio Kalele, naruei naio bavin tivelinio ka tanobuku na Yutea, ea mñarauei na vio Yortano tivelinio bano. Ana tiniobi nalo aju abinimeĩ ea naio bereio ea vio na, a javukia napano naio jomña mila julaka, naio berlogloglo ka vite telabo. ² Mia Varisis tai aju bunu ea bogo nei, mia nalo abinimeĩ ea Yesu, a ajidom alavon naio bereio, naruei nalo abika vikadeniano tai denio. Nalo aberinavo “Tuboiano na kanado naio ber vaio ka tivelinio na bajago nei napano toro naio jitiglar koano? Juñabe, jau be tiniemo ka napano toro

mijikia rila tibena, ñeli na maka rimemedu?”

³ Ana Yesu bika ber banlo, berinavo “Mia tormoruo Mosis naio berial venia ea kiano tuboiano ruei?”

⁴ Mia Varisis nalo nei aberenio, aberinavo “Mosis naio berial ea tuboiano tai napano mijamo ka toro mijikia sian mñesi tai van koano, naruei naio mijikia riilalar naio rivano.”

⁵ Mia Yesu naio berdoñe banlo, berinavo “Nao, mia Mosis naio bivitauia iliano na bior napano ga pariparimiu nalo abinimeĩ jikili laka, tenene na naruei mila naio mijamo jibe na kar kamiu kumijikia kuviilalar kouemiu nalo. ⁶ Mia jikario ea tiiano naio maka tibena, bior napano Atua kanano iliano lu naio berinavo ‘Ea burupati Atua jii tomu nalo, napano suñano bija tira.’

⁷ “A iliano dolu bunu berinavo

‘Tibena, mia toro tuvan karamño a kenieno, naruei riva to rivijurukar vija koano,

⁸ naruei naljuo abinimeĩ abe takurano ga.’

“Nina naio mila ka naljuo maka bunu ave juo, mia naljuo abinimeĩ abe takurano ga. ⁹ Mia venia na Atua miasolio binimeĩ be takurano, maka rimemedu ka toro silubar bereio.”

¹⁰ Ana bogo napano nalo aba joomo ea yimo bereio, Yesu kanano naiagagoano nalo abika naio bereio

tivelinio na iliano nalo nei.
¹¹ Ana Yesu ber memedu banlo, berinavo “Verenio toro tai titiglar koano, karina naio riva rivuru tira dolu tai, Atua mial jibe toro nei naio jo mila siakaiano ruei, naio mila lelan bunu tira nei napano naio be koano jukamu. ¹² Mia verenio tira tai rivuro den kanano sumano, riva soro ka toro dolu tai bereio, naio bunu Atua mial ka naio mila siakaiano ruei.”

Yesu milivu ka kiritete nalo

Mataiu 19:13-15; Luka 18:15-17

¹³ Naruei tealó aburu kenerilo nalo abinimei ea Yesu ka naio tokol lo, ana naiagagoano nalo amialio, naruei amil jikili ban tomu nalo nei aberburelo. ¹⁴ Mia bogo napano Yesu mialio, maka saaro leleio ka napano kanano naiagagoano nalo amila jibena, ana naio ber kalo, berinavo “Kamui kuverbure re kiritete nalo na, kamui kuvijamo kalo amei ea kiniou ga, bior napano kiritete nalo ajibe ka ga tomu nalo napano aju jouro ea Atua kiano navenatuboiano. ¹⁵ Kiniou neber riano ka kamui, ka toro napano naio jidom riva jouro ea Atua kiano navenatuboiano, naio monoka rijikia ka naio javukia kiritete teliki tai ga, naio maka rijikia rila vite tai ka rila ka naio rudu Atua kiano navenatuboiano nei ea kiano meuliano.”

¹⁶ Ana Yesu bokar kiritete nalo nene, jikario naruei ka naio midu jumano joa pariparilo ka naio rilivu kalo.

Meaku tai napano be sani-baiano

Mataiu 19:16; Luka 18:18-23

¹⁷ Naruei bogo napano Yesu jo batavio ka riel rivano, toro tai jikiti binimei minie tano ka Yesu, naio bika denio, berinavo “? Naverloglogiano novo, kiniou monoka nala imauano vaio ka rila ka mia kiniou novokar meuliano nei napano maka rijikia ribisi?”

¹⁸ Ana Yesu ber ka naio berinavo “?Bior vaio ana jau kobio kiniou jibe na kober kiniou nebe naverloglogiano novo? Maka ve toro tai napano be kirinovo to, mia Atua naio ga takurano naio be kirinovo. ¹⁹ A jau komijikia bunu kanano tuboiano nalo, napano kito monoka romonea nalo, napano aber jibene aberinavo: Jau kouebin re toro, jau kola re siakaiano, jau kovina re, jau kala sibi re, jau kojukujuku re toro, jau kavamenea karamamo naio koniomo.”

²⁰ Ana meaku nene berkanio, berinavo “Naverloglogiano, tuboiano nalo na napano jau koberenio, bogo napano kiniou nebe tete kia ga vo, kiniou nojomna nobokar nonovlo, binimei bokar banei.”

²¹ Ana Yesu bitikar naio bano-o, tinien jii naio toru bior kanano iliano nei, ana naio berkanio, berinavo

“Vite takurano ga jo keano vo, napano jau maka kalaio vo. Jau kava koʻviliʻvili bulag ka kanamo vite nonovio nalo, ana jau kavar veru na vite nalo nene, jau kava kotiburevure van talimʻasa nalo. Ver jau kala tibena, mia jau ve kanamo vite novonovo nalo ve miroano ea tiniabene. Mo, jau kava kalaio, karina komei katakisor kiniou.”

²² Mia bogo na mʻeaku nei mijog iliano nei, naio mило va kanio, ana kanano iviso mijog bova toru, bior napano naio be kiano vite miroano. Ana naio jaluvo den Yesu.

Toro napano be sanibai-iano, jikili ka naio rivan ea Atua kanano navenatuboiano

Mataiu 19:23-30; Luka 18:24-30

²³ Naruei Yesu jirarag jeliviv ea naiagagoano nalo, ber kalo, berinavo “?Kiniou neber batitig ban kamiu, neber ver toro tai napano be kiano vite miroano, mia naio jidom riva jouro ea Atua kanano navenatuboiano, nina naio jikili mia jikili na.”

²⁴ Mia naiagagoano nalo amiilo toru laka ka Yesu kiano iliano nei, ana naio ber bereio kalo, berinavo “Riano keneriku nalo, ka ava jouro ea Atua kanano navenatuboiano, jikili mia jikili na. ²⁵ Kiniou neber ka kamiu, ka kamele tai ri-ovodulu ea bulumirano nitil tai, naio jikili laka, mia ka toro tai napano be kanano vite miroano ka naio rijikia

riva jouro ea Atua kanano navenatuboiano, nina naio kirisikili lie vo.”

²⁶ Ana bogo na naia-gagoano nalo amijog iliano nalo nei, mia nalo amiilo toru laka kanio, ana aberinavo “Tomnei! Mia karina, aber mia kei naio mijikia rivokar meuliano?”

²⁷ Mia Yesu jirarag bitikarlo, berinavo “Toro maka rijikia rilarur toro, mia Atua naio mijikia rila vite nonovio.”

²⁸ Naruei Pitere naio jidom ril naruei, berinavo “?Mia jumʻabe ka kumemi? Kumemi numituvan kenememi vite nonovio ruei, ana kumemi nubinimei numitakisorso.”

²⁹ Ana Yesu ber kalo, berinavo “Kiniou neber riano ban kamiu, ka toro kei napano naio tuvan kunuano, ʻpeli kuruano bija kuviviniene, ʻpeli kenieno bija karamʻano, ʻpeli kenerinio, ʻpeli kiano borotano, rivior kiniou a rivior kanaku ioluano vou nei, ³⁰ mia naio rijev bereio venia naio juvan riva rivokar toromomou ve takurano [100]. Ea yetemeriba nei, mia naio rivokar bereio yimo nalo, kuruano nalo, kuviviniene nalo, kenieno nalo, kenerinio nalo, borotano nalo, mia vija vite nalo nei mia naio rivokar bogokouo nalo ve telabo, napano tomu nalo ajermi ka naio bunu. A mave ka vite dolu nalo nei, ea bogo napano jo binimei, mia naio rivokar bunu meuliano nei napano

maka rijikia ribisi. ³¹ Mia tomu telabo napano ña aju mave vonganei, iorou nalo atu yetano, a nalo napano ña aju yetano vonganei, iorou mia nalo atu mave.”

*Yesu berial kanano
mãriano varolu nene*

*Mataiu 20:17-19; Luka
18:31-34*

³² Ana Yesu nalo aju amiel ea ñarabo, aju abavin Yerusalemo naruei. Ana Yesu naio jo miel jukamu ka kanano naiagagoano nalo, mia aju amiilo laka napano naio jo buruñarabo kalo aba Yerusalemo, bior nalo amijikia ka tomu nalo na vio na ajerni laka ka Yesu. A nalo dolu namã aju abinimei iorou kalo, nalo bunu aju amermerou kija naruei. Mia Yesu naio bio kanano duelimo ba juo [12] amei vaataro ka naio, ana naio berial bere kalo jumãbe mia ala kiki naio yako Yerusalemo.

³³ Naio ber bisivisii banlo, naio berinavo “Kamju kuviniagago vatitig. Vonganei kito roju rabavin Yerusalemo naruei, napano rivesiou re, mia adu Kulorinio Kenerinio toa tomu na tortoru na kulo lu nalo jumãlo nalo vija naverloglogiano na tuboiano, naruei mia nalo na atibure naio ka mia naio monoka riñaro. A mia adu naio toa kulo Romo nalo jumãlo, ³⁴ naruei nalo na mia ayotel va ea naio, avule mirano, mia avitiv naio, rivan mia auebinio riñaro. Mia ka bogoti ve

tolu nene, mia naio rimeul bereio.”

*Yemesi naio Jone naljuo
abika titai den Yesu*

Mataiu 20:20-23

³⁵ Ana nalo aban lie telisu bereio, ana Sepeti kenerinio juo nei Yemesi naio Jone, naljuo abinimei vaataro ka Yesu, ana abika denio, aberinavo “Naverloglogiano, kumemi juo numisidom ver venia na mia kumemi ve juo nuvika denso vonganei, mia jau kotuvan van kumemi juo ga.”

³⁶ Ana Yesu berdoþe ban naljuo, berinavo “?A kamjuo kumisidom kuvika ka mia kiniou nela vaio ka kam ve juo?”

³⁷ Ana nalo abe juo aberdoþeio, aberinavo “Kumemi juo numisidom ka kajamo ana ver bogo napano jau komei tibe parinio tubo ea yetemeriba nei, mia kumemi juo numijikia nuvitutano ea kiamo vio lu vaataro kaso, tai toa jumãmo meruo, a tai ea mali.”

³⁸ Ana Yesu ber ka naljuo, berinavo “Kamjuo maka kuvijikia tena kamju kumitu kubikanio? Jumãbe, kamjuo na kumisidom ka kamjuo kubare ka romunu vio takurano ea baja na jogvaiano na mia kiniou monoka nomunu eaio? Peli kamjuo kuber kamjuo kumijikia kuvidu varueiano napano abaruei ea kiniou kanio?”

³⁹ Ana naljuo aber ka naio, aber “Ee, kumemi juo nubare.”

Ana Yesu ber ka naljuo, berinavo “Ee, be riano ka mia kamjuo kumunu ea kiaku baja na jogvaiano, a be riano bunu ka mia avaruei ea kamiu ka uei napano abaruei ea kiniou kanio,⁴⁰ a vite na kamiu kubika na, ka kam ve juo kuvitutano vija kiniou, ea tivelinio ve juo na kiniou, tena maka ve kiaku ka mia nejikia notuvan van kamjuo. Vio nalo na jibe na, nalo ga na Karamaku mila vatitigio kalo, a napano naio berkar ruei ka mia nalo atutano ealo.”

Kulorinio Kenerinio binimeĩ ka rimau tomu nalo kialo

Mataiu 20:24-28

⁴¹ Mia naiagagoano due-limo dolu amijog tenei napano kurualo juo nei Yemesi naio Jone abikanio, ana nalo tiniel jerlo abe juo. ⁴² Ana Yesu bio nalo abinimeĩ ka naio ril vanlo, ana naio ber kalo, berinavo “Kito romijikia ruei tomu nalo kialo bajago napano maka amonea Atua. Kito romial ka tubo nalo bija tomu nalo na tortoru ea vio yetemeriba nei, nalo aju ajututua tomu nalo dolu ka atu yetano ka nalo bogo nonovio. ⁴³⁻⁴⁴ A kiaku naiagagoano nalo kenemiu bajago monoka tibena re. Verver kamiu tai sidom ka rimeĩ rive toro na toru tai peli naio rimeĩ rive kenemiu toro na vurimmaraboiano tai, kiano mmarabo jibe nei. Toro na monoka rimeĩ tibe toro tai ga na rimau kenemiu.

⁴⁵ Kulorinio Kenerinio mila jibena ruei, na naio maka rimeĩ ka tomu nalo aija naio, mia naio binimeĩ ka rijai tomu nalo a ka rijamo ka kiano meuliano ka rivulu bulag tomu ve miroano.”

Yesu milarur merebono tai

Luka 18:35-43

⁴⁶ Ana Yesu bija kiano naiagagoano nalo abinimeĩ aju Jeriko, ana iorou, bogo na nalo ajumna abanvan ea komeli nei, tomu miroano ajakisorlo. Nalo aju amiel abano, ana merebono tai naio jomna jotano ea ikimmarabo tivelinio ea vio nei. Toro nene, karamano siano Timeas, ana nalo abio kenerinio nene ka Batimeas. Batimeas nene, naio jomna jotano ea mmarabo bogo nonovio ga, naio jo bio ban tomu nalo ka nalo aje veru ve teliki van naio ka rimeul eaio.

⁴⁷ A bogo na mijog ka Yesu na vio Nasarete nei naio jo miel ea mmarabo binimeĩ, naio jo bio, berinavo “Oi Yesu, jau Teviti kiano bajulukuti! Kiniou nojidom tiniem riia kiniou beamu.”

⁴⁸ Ana tomu nalo dolu amil tiniemimi ban naio, aberinavo “!Ei, jau koyotuba re!”

A naio jo bio mave lie, berinavo “Oi Tubo, jau Teviti kiano bajulukuti! Neber bo kaso tiniem riia kiniou!”

⁴⁹ Ana Yesu binimeĩ jikili joa vio nei, ber ka tomu nalo ber avio toro napano na rimeĩ vaatara ka naio, ana

nalo aba aber ka merebono napano, aber “?Ei, komijikia vaio?”

Ana toro neibano ber “Venia?”

Nalo aber “Yesu nei naio berenio jau komei vaataro ka naio beamu vo. Bo ga, jau kotumolu kito ravano.”

⁵⁰ Ana toro napano naio miyalar m̃ano kulukoti, naio jumolu soṑeli ga, ana binimei ea Yesu. ⁵¹ Mia Yesu bika den naio berinavo “?Ana jau kojidom mia nala vaio kaso?”

Mia toro nei berdoṑe, berinavo “Tubo, aua, kiniou nojidom ka kala miraku nalo rimeĩ rivu, ka kiniou nejikia nesirarago.”

⁵² Mia Yesu ber kanio, berinavo “Bo, jau komijikia kavan bere ea kiamo vonuo, kiamo viekouoiano naio mila na jau kobinimeĩ bo ruei.” Mia toro nei naio mial vatitig vite ea aura nene ga, mia naio jo mieliel ea m̃arabo, naio jo jakisor Yesu bano.

11

Yesu binimeĩ bokar vio nei Yerusalemo

Mataiu 21:1-11; Luka 19:28-40; Jone 12:12-19

¹ Vonganei, Yesu nalo abini mei vaataro ka Yerusalemo naruei, ana beamu kanio, nalo amiyotuba ea komeli juo nalo na terteliki nei, Betevas bija Betani, napano naloaju tivelinio ea suku nei napano ajisia ka Suku na Buruolivi. Ana Yesu mila kiano naiagagoano juo, berinavo ² “Kamjuo kuvan ea komeli yako na, mia

memedu ka bogo na kam ve juo kuva jouro eaio, mia kuvial kirikiti togki tai, napano amiadikario ju, napano toro maka lele totania kija taakano vo. Mia kam ve juo kuvijubarlar sano teli, ana kuvuruio rimeĩ bereio van kiniou ea vio nei. ³ A verver toro tai ril rivan kamiu kanio, rivika riverinavo “?Kamĩu kumila jibe na ka venia, mia kamiu kuver ka naio, kuverinavo “Tubo naio jidom temeul nei, a mia naio riila rimeĩ bereio ea vio nei vesiou re.”

⁴ Ana naiagagoano juo nei abano, ana aba amial kirikiti togki nene, napano amiadikario, naio jumolu ju ju tavio ka m̃aratavo na yimo tai tivelinio ka m̃arabo. Ana naljuo ajidom ka ajubarlar sano teli, ⁵ mia nalo napano ajua vio na, abika aberinavo “?Oĩ, kamiu kumitu kumila venia na, na kumitu kumijubar bulag teli nene na?”

⁶ Mia naljuo aber kalo iliano nalo na Yesu ber kalo ruei, napano mia nalo amijikia averii ka tomu nalo, ana tomu nalo amijamo ka naljuo amijikia avuru togki riva rivu ga. ⁷ Ana naljuo aburu togki nene binimeĩ, ana nalo abisi m̃alo kulukoti nalo ea taakano, ana Yesu bavin jotano mave eaio. ⁸ Ana tomu nalo miroano amiya bulag m̃alo kulukoti nalo abisi ea m̃arabo, a nalo tealõ aba aje m̃am̃ali nalo, abar abulan ea m̃arabo ka togki naio rijikia riel eaio. Jibe na, nalo amila ka avatove ka Yesu jibe ka naio be

tubo tai na toru laka. ⁹ Ana nalo amiel ka abano ka ava jouro Yerusalemo, a tiniobi nalo napano aban jukamu ka Yesu, bija nalo napano iorou ka naio, nalo aju amigaga laka jibe nei, nalo aberinavo

!Bo mia bo laka! Roiovu ka naio!

!Atua Soři jau keilivu ka naio nei napano binimeĩ ea siamo!

¹⁰ !Kito rajaaro toru ka Nave-natuboiano na kiado tormoruo Teviti nei napano joa binimeĩ!

Kamiu nalo na tiniabene mave kuviovu bunu ka naio!

¹¹ Ana Yesu ba jouro yako Yerusalemo, a naio ba bokar Atua Kunuano Lu. Ana naio ba joomo, ba bitii vio nalo nene, a vite nalo nonovio napano amila eaio. Ana mĩrenio jo batove ruei, mia naio buru kiano naia-gagoano duelimo ba juo [12], ana nalo ajaluvo ea komeli na toru nei bereio, nalo aba amon Betani.

Buruiesi tai na maka rivar mĩarati vo

Mataiu 21:18-19

¹² Ana kavijova, nalo ajaluvo Betani bereio, nalo amiel abinimeĩ bereio Yerusalemo, ana Yesu naio mijog vitu. ¹³ Ana naio bitii buruviki tai jo, ana naio miel ba vaataro kanio ka rivar mĩarati tealo. Mia bogo na naio binimeĩ mialio, naio mial ka buruviki nene, mĩati telabo, a maka ve mĩarati, bior maka ve bogo nene vo. ¹⁴ Ana Yesu naio mil ban buruviki nene, berinavo "Jau, mia jau maka leleio

kejikia kavar mĩarati bereio ka tomu nalo ajikia asenio." A kiano naiagagoano nalo amijog bunu ka naio beriliano nei.

Yesu naio mijil dedade ea nalo namĩa aju ařilřvili ka saba ea Atua Kunuano Lu

Mataiu 21:12-17; Luka 19:45-48; Jone 2:13-22

¹⁵ Ana Yesu nalo aba abokar Yerusalemo bereio, ana nalo aban bereio joomo ea Atua Kunuano Lu. A Yesu bitii bereio ka tomu nalo miroano ka nalo aju tivelinio ka yimo, nalo aju amimĩauka imĩauano nalo na ka ajev veru eaio, a tomu miroano aju abulu saba nalo na aju ařilřvili kanio. Ana naio maka leleio saaro kanio, naio ba mijil bulaglo, bilig dea ka barobaro nalo napano nalo ajumĩa amijebukua veru nalo na vio Romo binimeĩ ea veru na kulo Ju nalo kialo, napano nalo ajumĩa ajuvanio ea Yimo Lu. A ba bunu buku bulag kialo iesi na totaniano na nalo aju ařilřvili ka sibo na sida. ¹⁶ A naio berbure bunu nalo namĩa aju ajidom avar kialo saba nalo na imĩauano ka aiel avarkorov yati na Yimo Lu nei.

¹⁷ Ana naio berlogloglo, berinavo "?Jumĩabe, kamiu maka kuvijikia ka Atua berial ea kiano Iliano Lu, ber

'Mia nalo aver kiaku Yimo Lu naio be yimo na volkouano na taara nonovio na tomu nalo na yetemeriba reraio'?
Ais 56:7

‘A mia kamiu kumitu kubilig Yimo Lu nei ruei ka rimeĩ tibe buluvae tai na vinuano.’”
Jeremaia 7:11

¹⁸ Ana maka vesiou tomu nalo na tortoru na kulo lu bija naverloglogiano nalo na tuboiano, amijog venia na Yesu naio mila ruei ea Atua Kunuano Lu, mia nalo tiniel mimi laka, nalo ajidom ala titai kanio. Mia nalo amerou laka ka Yesu, nalo maka bunu ala, bior nalo abitilubar ka tomu nalo ajidom laka ka naio, nalo aju amiilo ka kiano verloglogiano novo nalo.
¹⁹ Mia ka bogo na mērenio jo batove ruei, Yesu nalo ajaluvo Yerusalemo bereio.

Bulabati iesi na maka rivar m̃arati naio riṃaro nonovio

Mataiu 21:20-22

²⁰ Mia kavijo, nalo aju amiel abano Yerusalemo bereio, ana amial bereio buruviki napano beamu na, ana nalo amial ka vonganei m̃ati nalo mekekeu biniu ruei.
²¹ Ana Pitere naio jidomii bereio Yesu kiano iliano, ana naio ber ka naio, berinavo “Tubo, jau keial vo! Buruviki nei napano jau komil banio niovo, vonganei naio binimeĩ mekekeu nonovio ruei!”

²² Ana Yesu berdoṑeio, ber kalo, berinavo “Kamiu monoka kuvitu sikili vija Atua.
²³ Kiniou neber be riano ban kamiu, ver toro kei na maka kiano jidomiano veve juo, a monea

kirisikili, ana venia na naio berenio, mia monoka tibe na ga. Verver naio ril van burusuku na toru nei, river kanio riverinavo ‘Jau kavatove koviako ea tei,’ nina, mia monoka tibe na ga.
²⁴ Nina naruei kin-iou neber ka kamiu, ka venia na kamiu kumitu kubika ea kenemiu volkouano, verver jau komonea sikili ka tena be kiamo ruei, bo, mia monoka tibe na ga naruei.
²⁵⁻²⁶ A ea bogo nonovio na kamiu kuvišidomii ka kubolkouo, kamiu monoka tiniemiu maio ka bunu, ka ver titai joaso bija toro dolu, monoka koviekokoa beamu, karina jau komijikia kotumolu koverialio ea kiamo volkouano nene van Atua. Verver jau kala tibena, mia Karam̃ado na tiniabene, naio bunu mia sidomii ka riviekokoaso ka kiamo vovai-iano nalo.”

Navurim̃araboiano nalo na Israel nalo ajidom averbure Yesu

Mataiu 11:23-27; Luka 20:1-8

²⁷ Ana Yesu nalo amiel abinimeĩ abokar bereio Yerusalemo, ana nalo aba jouro ea burusio na Atua Kunuano Lu bereio. Ana bogo napano nalo aju amiel jouro, tomu nalo na tortoru na kulo lu nalo, bija tomu na verloglogiano na tuboiano, bija tomu na vurim̃araboiano na kulo Ju kialo, nalo abinimeĩ ea naio.
²⁸ Nalo abika naio, aberinavo “?Jau kojo komila

jibena ea vio nei ea kei siano? Peli kei bereio na berii kaso ka jau kala tibena?"

²⁹ Ana Yesu naio ber kalo, berinavo "Bo ga, a kin-iou bunu nojidom nevika vikadeniano tai van kamiu beamu. Verver kamiu ku-verdoŋe kiaku vikadeniano nei rivu, mia kiniou neveral van kamiu jumabe ana kiniou nemijikia nemila jibe nei. ³⁰ Bo ga, kiaku vikadeniano naio jibe nei naruei, berinavo? Baruei nei na Jone naio mila von nua bogobe ka tomu nalo, naio be titai na Atua ber ka Jone ka naio rilaio, ŋeli tomu nalo ga nalo aber ka naio? Kamiu kuvilavon ka kuverdoŋe kiaku vikadeniano nei."

³¹ Mia Yesu kiano vikadeniano nei naio mila nalo abilvili ealo bereio, nina nalo aju aberinavo "Mia kito rover tumabe ka naio? !Rovitakar batitig kito nei! Verver kito rover varueiano nene Atua naio ber ka Jone, mia toro na monoka rivika den kito river ka venia na kito maka romonea Jone. ³² Ana kito maka rejikia rover bereio Jone kiano varueiano nene naio miyotuba ea tomu nalo kialo jidomiano ga, ka ver maka mia tomu nalo tiniel ser kito!"

Tomu nalo na tortoru nei nalo amerou ka aver iliano nei, ka nalo amijikia ka tomu nalo aju amonea Jone jikil ruei ka naio be Atua kiano naverialiano tai na be riano. ³³ Ana kialo jidomiano nalo jibe nei mila nalo aberdoŋe

Yesu jibe nei ga, nalo aber ga "Kumemi maka nuvijikiaio."

Ana Yesu ber ka nalo neibano, berinavo "Jumabe, mia kiniou bunu, kiniou maka nejikia nover ka kamiu kei naruei naio ber ka kiniou ka nala imauano nalo nei."

12

Jamerijiano na tomu va nalo namā abitkar jiotilikrevi tai

Mataiu 21:33-46; Luka 20:9-19

¹ Mia bogo na Yesu naio jo berlogloglo, naio jo berii jamerijiano banlo bogo nonovio. Jamerijiano tai naio ber jibe nei, naio berii toro na toru tai, bija kiano jiotilikrevi tai. Toro nene naio mimauka vatitig ka kiano vio nene, naio mila burusio tai jikili jeriko tivelinio nalo binu, ana naio mila vio tai ka rivie bulag vati markrevi, a naio mila bunu kanano burutili vio tai ka avoio avavin atu mave eaio ka asiraragkuku ka jiotilikrevi nei. Mia bogo tai, toro na toru nei naio jidom riel kiki kija rivan ea buruvenuo dolu nalo, ana naio juvan kanano jiotilikrevi nei ban kulo dolu nalo teal, ka nalo amei aimau eaio, nalo avuluio van naio.

² Naruei toro na toru nei naio ba jo laka-o, karina naio mial ka vonganei be bogo na m̄ariesi nalo ameruo naruei. Ana naio mila kiano toro tai ban bereio, ka rivar veru na m̄arati krevi nene togio ve

kiano, nina monoka avario van naio. ³ Ana bogo napano naio ba miyotuba kean nalo nei, nalo amue niegeniege naio bova laka, ana nalo amijil deven naio ban bereio naruei naio maka rivar titai leleio. ⁴ Mia tubo nei naio miila kiano toro dolu bano, mia nalo nei amueio, bar ja ea parinio, nalo amila bova toru banio bano-o nalo amijil lar naio ban bereio.

⁵ Karina naio miila bereio tai, nalo amuebinio m̃aro, a iorou kanio naio miila kiano tomu nalo miroano nalo abano, a nalo aju ajukulo a amuelo bunu nalo aṃarm̃aro ga. ⁶ Naruei toro na toru nei naio mial ka toro ga takurano naio jo naruei, nina be kenerinio memedu na naio tinien jii m̃elea naio, ana naio jidomii banbano na berenio “Vonganei, monoka neiila keneriku ga naio rivano, mia nalo monoka avamenea naio.”

⁷ “Ana bogo na kulo va nalo nei amial toro na toru nei kenerinio binime, nalo aju aberverii kalo, aberinavo ‘Nina be toro na toru kenerinio na. Toro na naruei, napano verver toro na toru rivakovio, mia naio naruei rudu tanobuku nei tibe kanano jajum̃ano. Bo ka rouebin bunu naio riṃaro, ka mia kito ga rojikia ro-vokar tanobuku nene ve kido.’ ⁸ Tibe na naruei, nalo aba abokakar naio kirisikili, nalo amuebinio, ana nalo abukuio batavio ea jitolikrevi nene.”

⁹ Naruei Yesu naio bika denlo, berinavo “?Bogo na

toro na toru na jitolikrevi nene mia naio rime, bereio, mia naio rila tum̃abe ka nalo na aju amim̃au ea kanano jitolikrevi? Tomu nalo bova nei, mia naio rime ruebinvin nalo aṃarm̃aro ea bajago tai na jikili, a mia naio rudu kiano jitolikrevi rivan kulo dolu na bo.” ¹⁰ Naruei Yesu ber kalo, berinavo “Il-iano tai ea Atua kiano Ilano Lu napano naio ber jibe nei, berinavo

Veru na, tomu nalo na amim̃auka yimo aberinavo naio bova, ana nalo abuku ban ruei, mia vonganei veru nene binime be veru tai napano bo ka toa sudu na yimo, ka naio rivokar yimo sikili.

¹¹ *Tena, Atua ga naio mila, a kumemi numial jibe ka bo mia bo.” Iouano 118:22,23*

“?Ana jum̃abe naruei, iliano na kami kumijikia ruei, a p̃eli kami maka kuvulukuio kija bogo tai?”

¹² Mia bogo na Yesu berii jamerijiano nei bisi, mia nalo na tortoru abitolubar ka naio ber iliano na jibe na ka kialo bajago, ana nalo tinie mimi, mila nalo aju ajidom alavon ka avokar naio sikili to, karina nalo amial tomu miroano laka, ana nalo amerou kalo, ana nalo ajuvan naio jo, nalo aju koalaboden naio ga.

Vite na be Atua kanano, a vite na be Sisa kanano

Mataiu 22:15-22; Luka 20:20-26

13 Mia tomu nalo na tortoru aba abitii tenei, mia nalo amiila Varisis tealo bija Erot kiano burukuti tealo abinimei, ka alavon ka avika vikadeniano tealo na jikirkili ka alavon Yesu kanio, napano mia naio maka rijikia ka riverdoŝeio.

14 Mia nalo abinimei ea Yesu, amila sibilili naio ka iliano novo nalo, nalo aberii “Naverloglogiano, kumemi numijikia ka jau kobe riano garuei. A jau, jau maka koto komerou ka toro, ka toro na jo loa nalo dolu ŝeli toro na toru ŝeli na juŝabe, a jau kojo koberial memedu Atua kiano m̃arabo ka tomu nalo abiniu. Mia kumemi numisidom nuvika denso tibenei, kiado tuboiano naio ber juŝabe? ? Naio berii memedu ka kito kulo Ju rovulu takis van Parinio Tubo Sisa nei na Romo, ŝeli naio ber maka rimemedu? 15 Bo ka rovulu takis nalo ŝeli na makanio?”

Ana Yesu naio mijikia ka aju abivika sibisibi ga, nalo ajidom ala bulag naio ga, ana naio berkalo, berinavo “? Ee, kamiu kumitu kumisidom kuvilavon kinjou tibe na ka vaio? Bo, kuvidu veru tai rimei ka nevitiio.”

16 Ana nalo amidu tai binimei banio, ana naio bika denlo, berinavo “? Mirano toro kei nei joa veru na teliki nei? ? A sio na abivitaŭia joaio, naio be toro kei siano?”

Nalo aberenio “Parinio Tubo Sisa mirano na, a siano bunu.”

17 Ana naio ber kalo berinavo “Bo ga, vite na be Sisa kiano, kamiu monoka kuvar van Sisa, a vite na be Atua kiano, kamiu monoka kuvar van Atua.”

Mia bogo na amijog verdoŝeiano nene, nalo amiilo va laka.

Tomu nalo na aŭarm̃aro mia nalo ameul bereio

Mataiu 22:23-33; Luka 20:27-40

18 Mia iorou kanio, ana Satusis tealo abinimei ea Yesu, napano nalo ajidom avika den naio tivelinio na vite tai napano nalo amonea kirisikili eaio, napano tomu nalo na aŭarm̃aro, nalo maka bunu ajikia ameul bereio ea bogoti na maaro. Nina naruei nalo abika den Yesu, nalo aberinavo 19 “Naverloglogiano, kumemi numi-sidom nuvika denso, ka juŝabe ka iliano tai na tormoruo Mosis naio bivitaŭia be kiado beamu nua. Naio berinavo ver toro tai, kuruano naio m̃aro den koano tira, na nalo maka ve kenerilo tai vo, mia toro na monoka rivuru taanou nene ve koano. Ana verver tira nei rivar tete, nalo amijikia asisia naio takii karam̃ano na m̃aro ruei, ka siano rimeul to. 20 Mia ea bogo tai, tomu aluo na abe kurualo. Nana beamu laka kalo naio buru koano tai, a mia naio m̃aro den koano napano naljuo maka avar kiritete tai vo. 21 Karina kurualo juo nene naio buru tira neibano, karina naio bunu m̃aro denio, na maka ve kenerinio, a iorou kurualo

tolu nene naio bunu mila jibe na, ²² banbano-o bokar kurualo aluo nene, nalo nonovio amila jibe na ga, nalo aṃarmāro den tira nene. A iorou ka koano suṃano nalo nei napano abiniu aṃarmāro ruei jibe na, tira nene naio bunu m̃aro. ²³ Mia jau kover von tenei? Ea legiano na maaro, bogo na mia atu aver ka mia tomu nalo amemeul bereio, mia tira neibano ve kei koano, ka napano naio joro ka tomu aluo napano abe kurualo ruei?”

²⁴ Mia Yesu naio berinavo “Makanio, kenemiu jidomiano na naio ba kirivova laka. ?A p̃eli kamiū maka kuvijikia venia mila kene-miu jidomiano bova jibe na, a? Nina ka maka kuvijikia venia na Atua kiano iliano lu berenio, a kamiū maka kuvijikia venia bunu kiano moroano na toru rijikia rilao. ²⁵ Bogo na tomu nalo amemeul bereio, mia nalo atibe ka nailiano nalo na tiniabene ga, ana mia nalo maka bunu ala tenei soriano. ²⁶ A ea tivelinio na ameul bereio nei, kiano iliano jo ruei ea niosi na Mosis bivitauiā, napano naio berii iesi na teliki napano sebi jijenio, na Atua mil ban Mosis, berinavo

‘Epraamo, Aisak, a Yakovo, kiniou nebe kialo Atua.’

“? Vede kamiū maka kuvuluku iliano nei kija bogo tai, ²⁷ ana mia kiniou never bisivisii van kamiū ka rivuririi kenemiu jidomiano nalo. Nalo tolu nei

aṃarmāro ea yetemeriba nei bogo be nua ruei, mia yuka telabo barlaka ruei karina Atua naio ber vonga iliano nei, ber naio be kialo Atua. Tibena, kanano iliano nei berenio nalo tolu nei aṃarmāro ea yetemeriba nei, mia nalo aju ameul ea naio kiano vo. Atua naio maka sidom ka kiano tomu nalo ave tomu nalo na aṃarmāro ga, mia naio jidom ka rive Atua ka tomu nalo napano amemeul.”

Tubeoiano juo na tortoru

Mataiū 22:34-40; Luka 10:25-28

²⁸ Naruei naverloglogiano na tubeoiano nalo tai binimej jikili ju bunu ka bogo nei, mia naio joṃṃa mije tiliniene ka napano Satuisis nalo ajum̃a ajidom ka alavon Yesu, mia Yesu naio joṃṃa juvululo ea kiano verdoṃeiano novo nalo. Naruei naverloglogiano nei naio be tiniene ka naio kija, mia naio bika den Yesu, berinavo “?Ea kiado tubeoiano nalo, nana vabe nene naio bo lie loa laka juvulu nalo dolu nalo?”

²⁹ Naruei Yesu berkanio, berinavo “Iliano Lu naio ber jibenei, berinavo

‘Tomu nalo na Israel, kamiū kumije tiliniemiu.

Atua Soṃi, kiado Atua, naio takurano be Atua Soṃi.

³⁰ Atua Soṃi napano be kiamo Atua, jau monoka tiniemo tii naio ka kiamo iviso momou, ka kiamo meuliano momou,

ka kiamo jidomiano momou, a
ka kiamo moroano momou.’

31 “Nina naruei naio be moti, a juo nene, naio ber jibe nei, berinavo

‘Jau tiniemo tii nalo napano aju vaataro kaso, jau kovijuku rivu kalo, tavukia napano kojoma tiniemo jiiso.’

“Mia maka bunu ve tuboiano dolu tai bereio napano naio loa laka ka juo nei.”

32 Naruei naverloglogiano na tuboiano nei naio berdoŝe, berinavo “Riano ga naverloglogiano, jau kober memedu ga. Jau kober be riano, ka Toro na Toru naio takurano ga, maka ve dolu tai.

33 “Mia jau kober be riano bunu, ka kiniou monoka tinieku tii naio vija tinieku momou, a vija kiaku jikiano momou, a vija kiaku moroano momou, a kiniou monoka tinieku tii nalo napano ma aju vaataro ka kiniou, tavukia napano tinieku jii kiniou kiniou takurano. Be riano na, ea Atua kiano vitiano, ver kito rala tibe na, nina naio jo mave laka, naio bo laka ka sida nalo napano ma kito roju romilaio ea Kunuano Lu.”

34 Mia Yesu mijog kiano verdoŝeiano naio bo, naio be masou, naruei naio berkanio, berinavo “Kiniou neber kaso, neberinavo, jau kojo vaataro ruei, ka mia

jau kava jouro ea Atua kiano navenatuboiano navo.”

Ana mia iorou ka bogo na, maka bunu toro tai rila vonvon Yesu ea vikadeniano bereio.

Naverikariano naio be tormoruo Teviti kiano Atua Mataiu 22:41-46; Luka 20:41-44

35 Ana iorou, Yesu joma berloglog tomu nalo joomo ea Atua Kunuano Lu, karina naio kija bika vikadeniano tai denlo. Naio bika, berenio “? Kiniou nomijikia ka naverloglogiano na tuboiano ajuma aberloglog kami, mia kiniou nojidom novika ka bior vaio ana ajuma aberenio Naverikariano naio monoka riyotuba ea tormoruo Teviti nei kiano yati, napano naio be Parinio Tubo beamu. 36 Kiniou nebika nina, bior napano beamu, Niununo Lu naio binime i ea Teviti, mila na naio mil berinavo

‘Atua Soŝi naio ber ka kanaku Tubo, berinavo

“Jau kototano tivelinio vameruo na kiniou, jau kotororea rivano o mia kiniou novuru kanamo uolu nalo amei ave madayebe tai tena kovijankon jaamo eaio.” Iouano 110:1

37 “Ea vio na kito romialio ka napano Teviti naio joma bio Naverikariano nei naio be kiano Tubo ruei. Naruei bior Teviti naio ber jibena, jumabe ana ajuma

aberinavo mia Naverikariano nene mia naio riyotuba ea Teviti, be kiano yati ga?"

Mia burum̃ara tiniobi napano aju ka bogo na, ajidom m̃lea verloglogiano na jibe ka Yesu kanano, nalo amije tilinielo toru laka eaio.

Yesu naio mil jikili ban navuriṃaraboiano na lotuano nalo

Mataiu 23:1-36; Luka 20:45-47

³⁸ Mia bogo napano Yesu joṃa berlogloglo, naio jo jokol bunu bajago na m̃arouano na kialo navuriṃaraboiano. Naio berinavo "Kamiu kuvitikar kamiu ka naverloglogiano na tuboiano nalo. Nalo abarvar kalo m̃lea ka kialo burutili kulum̃arauo nalo na, mia verenio amiel ea vio na vioruru, nalo ajidom ka tomu nalo monoka avatove kalo, a avio batitiglo aver 'Naverloglogiano, kavijo bo!'

³⁹ A ea bogo na jokoluolu a joomo ea yimo na volkouano bunu nalo ajidom dam̃ariga nalo atutano ea vio na tomu na tortoru jelelo ga. ? Kamiu kubitilubarlo ruei, a? ⁴⁰ A ajum̃a aburii kialo volkouano terebievi laka, mia ajum̃a amila sibi ga, bior bogo nene kia ga, nalo ajum̃a amijukujuku taanou nalo ka amijikia avina ka kialo saba nalo. Naruei bior kialo bajago nalo na, mia kialo mauo nene mia naio sikili lie vo."

Taanou tai jian veru sesa tai ban Atua
Luka 21:1-4

⁴¹ Naruei iorou kanio, Yesu mijian naio ba jotano vaataro ka vio nam̃a abuku ijaiano na Yimo Lu nei, mia naio bilig pariparinio bitivitii tomu nalo nam̃a ajuvan kialo ijaiano. Naruei naio mial tomu telabo napano abe sanibaiano, nalo abar kialo burum̃ara ijaiano nalo abinimei, ajuvanio. ⁴² Mia karina naio mial bunu ka napano tiramoruo tai naio binimei, naio be taanou ga tai, a naio be talim̃asa laka. Naruei naio bar veru sesa subaier juo binimei naio jian ban Atua.

⁴³ Naruei Yesu bio kiano naiaga-goano nalo ka amei ea naio, naruei naio mil banlo, naio berinavo "Kamiu kumial tiramoruo na, napano naio juvan veru sesa juo na? Kiniou neber be riano ka kamiu, ka naio jian loa, naio jovulu ijaiano dolu nalo nonovio napano na sanibaiano nalo ajuvanio. ⁴⁴ Nalo na, be kialo burum̃ara puruveru nalo, mia amije bena ga torogio nene, mia taanou nei, kiriveru teliki na naio bokar jo ka mia rijai kiano meuliano, naio jian nonovio ban Atua."

13

Yesu berial ka mia aue bulag Atua kunuano lu

Mataiu 24:1-2; Luka 21:5-6

¹ Mia Yesu naio jaluvo den Atua Kunuano Lu, mia bogo napano naio joṃa miel bano, naiagagoano nalo tai naio jiloglog burum̃ara yimo

nalo na Yimo Lu nei, ana berinavo “Naverloglogiano, jau keialio! Yimo nalo na bija salo puruveru nene nalo romial lo amieg kirinovo laka, a!”

² Ana Yesu berkanio, berinavo “?Jau komial yimo nalo na tortoru na? Mia iorou kanio mia ve re salo puruveru nene nalo atu batitig ea jeleigio, bior mia tomu tai, mia amei auebulag lelan nonovio yimo nalo na aviniu.”

Jaleleano mia monoka rime

Mataiu 24:3-14; Luka 21:7-19

³ Ajumã amiel jibe na, abinimei ea Suku na Buruolivi Nalo, nina naio jo jirarago ban ea Yimo Lu, ana Yesu naio jotano ea vio na. Ka bogo napano maka ve kulo dolu nalo atu, a na-iagagoano ver abinimei ea naio, nina be Pitere, Yemesi, Jone a Andru. Naruei nalo abika denio, aberinavo

⁴ “?Mia auebulag Yimo Lu na nagi, a venia naruei mia naio rila vite nalo nei monoka amalmaluvo?”

⁵ Ana Yesu mil banlo naruei, naio berdoŕe, berinavo “Bo ka kamiu kuvitika vatitig kamiu rivu, ka mia ve re toro tai rime rila sibilili kamiu, ⁶ bior mia tomu ve telabo napano mia adu siaku, ana mia amei averinavo ‘Kiniou nobe Naverikariano nene,’ naruei mia avuru tomu ve telabo aiel vovu. ⁷ Ana ver ea bogo na, mia kamiu kuvijog

uetubaiano na mira naio jo binimei vaataro, ŕeli na kamiu kuvijog lilianiano na burumãara mira nalo napano mãaaju koalabo, mia kamiu kumemebiju m̕elea re. Vite nalo nei monoka amalmaluvo beamu vo, mia nina maka ve legiano na maaro nene navo. ⁸ A mia parinio tubo nalo, mia ala mira ka parinio tubo dolu nalo, mia buruvenuo nalo mia atumolu ka buruvenuo dolu. Mia vio reraio ea yetemeriba nei, mia m̕ii rikulkulu ve toru, a mia ve burumãara bogo na vitu bunu, mia vite nalo na, maka ve Legiano na Maaro nene navo. Vite nalo na naio jibe ka ga napano tira napano m̕abono, naio mijog dovorovo ka taakano mijalele garuei be moti ka rudu kenerinio, mia burumãara jaleleano nei naio maka navo.

⁹ “A kamiu monoka kuvitika vatitig kamiu rivu, bior ka napano tomu nalo mia avuru kamiu ea komeli nalo ŕeli ea kialo yimo na volkouano ka mia ail van kamiu, naruei mia atibure kamiu ŕeli mia avitiv kamiu. Mia monoka avuru kamiu kuva kuvitu kamu ea mirano tomu na tortoru na buruvenuo nalo rivior ga kamiu kube kiaku naiagagoano, ana ea bogo na kamiu kumijikia kuverial kenemiu moneano ea kiniou kamu ka miralo. ¹⁰ Ana Ioluanou Vou, mia aioliolu kanio van taara nalo na tomu nalo na yetemeriba nei beamu

vo, karina mia vite nalo nei amijikia amalmaluvo. ¹¹ Ver nalo amei avokakar kami, ka avuru kami kuvan ka atibure kami, mia kami kuvisidomii bijovijon re laka, verenio “Mia kiniou never vaio vanlo?” Mia kami kuverial ga iliano vaio napano mia Niununo Lu naio sian rivan kami, rimonloglog bogo napano mia kami monoka kuvil, bior ka napano mia ve re kami napano kuvil, mia naio rive Niununo Lu napano mia naio ril moluo ea kami.

¹² “Ea bogokouo na, mia toro mijikia rijamo ka tom na bova dolu nalo nei amei avuru bulag kuruano rimemedu ŗeli na kenerinio memedu, ka auebinvinlo aŗarŗaro, nina kar ga napano amonea kiniou. A mia kiritete nalo amijikia atumolu bunu ka averial keniele nalo a karaŗalo nalo napano amonea kiniou, ka aŗarŗaro bunu tibe na. ¹³ Mia tomu nalo aserŗi ŗilea ka kami napano siaku joa kami, mia kami kei napano naio tumolu tu sikili riva rivokar juluvati na bogokouo nei, mia Atua rilarurio.”

Jaleleano toru yako Yerusalemo

Mataiu 24:15-28; Luka 21:20-24

¹⁴ Ana Yesu naio ber iliano dolu tai bunu, napano naio bo ka ver toro napano

naio rivuluku, rilavon ka rijikia vatitig nioti nene. Iliano nei naio ber jibe nei, berinavo “Mia kami kuvial ka napano mia avitirilar tavoru tai napano kirivova mia kirivova laka, naio tumolu toa vio lu tai napano maka rimemedu ka toaio. A bogo na kami kuvial vite nei, kami napano kumitu Yutea, bo ka kami kuvuro bilig, kami kuva kuvitoluku ea burusuku nalo. ¹⁵ Ea bogo na, ver toro tai to rijilmebi tavio ea kunuano, naio monoka riva joomo re bereio ka rivar kanano saba tai, ¹⁶ ŗeli ver toro tai toa kanano tiniavio, mia naio monoka rivan re bunu ea kunuano ka rivar kanano kulumŗarau, mia naio monoka rivuro soŗeli tibe na ga rivan. ¹⁷ Ka bogo na, mia rivova laka bunu rivan nena nalo napano abe ŗabolo, vija nalo naŗa amiye yu ban kenerilo solbouo nalo. ¹⁸ Ver tibe na, bo ka kami kubolkouo rivior kami, ka bogo na kenemiu vuroiano nei ka mia naio rivokar re kami ea bogo na burumŗara niavo. ¹⁹ Nina bior ka napano bogo na, mia sikili mia sikili, sikili lie tovulu bogokouo dolu nalo, napano jikar ea bogo na Atua naio jii yetemeriba nei binimei bokar banei, a mia ve re bunu burumŗara bogokouo na toru tai tibe nei bereio bogo tai. ²⁰ Mia Atua jidomii ruei ka mia naio tekor bogokouo nei ve bulati

ga, bior kanano tomu nalo napano naio bijauia bulaglo ka ave kanano ajua bogo nei. Ver naio tekoro re ve bulati tibe na, mia ve re toro tai rijikia rimeul to.

²¹ “Mia ver tomu nalo averver ka kamiu ka bogo nei, averinavo ‘Kamiiu kumial toro yako, nina be Naverikariano na,’ p̄eli na ver averii toro dolu, averinavo ‘Naio be Naverikariano na niako laka,’ mia kamiu kumonea re kialo iliano nalo na. ²² Naverikariano telabo napano maka ave riano amijikia atumormolu, vija bunu naverialiano na sibisibiano, mia nalo na amijikia ala jamerijiano nalo, vija vite nalo na memebijuiano. Mia nalo ala tibe na, ana mia avuru tomu nalo ave vovu, riva rivokar napano mia alavon ka avuru bunu Atua kiano tomu nalo napano bijauia bulaglo ka ave kiano, mia vite nei mia maka ajikia alaio ga. ²³ Mia kamiu kumijikia kuvitikar vatitigio, bior napano kiniou neberial vite nalo nei ka kamiu vonganei ruei, napano maka amalaluvo vo.”

Mia Kulorinio Kenerinio rimeĩ bereio

Mak 13:24-27; Luka 21:25-28

²⁴ Ana Yesu berinavo “Naruei ea bogo na, iorou ka napano jaleleano nalo nei ribisi, mia m̄erenio rimeĩ ribobogio, a mia siberio rimermera re bunu. ²⁵ Marvitano nalo ea bul niogovu mia atibirbili, a

moroano na vio yauo, mia Atua rikulkulu kalo. ²⁶ Naruei ea bogo na, mia aial Kulorinio Kenerinio rimaluvo ea melijo vija kiano buruñara moroano a vija kiano buruñara mermerano. ²⁷ Avona bisi, mia naio riila kiano nailiano nalo aseliviv ea vio reraio yetemeriba a tiniabene, a mia avuru kiano tomu nalo napano naio bijauia bulaglo ruei, nalo amei vio takurano ea naio.”

Maka toro tai napano rijikia bogoti na maaro nei

Mataiu 24:32-36; Luka 21:29-33

²⁸ Ana Yesu berenio, berinavo “Kamiiu kuvisidomii von buruiesi nei, napano aber buruviki. Naio be kiano titai ka veriloglog ka kamiu, napano kamiu monoka kuvitii vatitig eaio. Bogo na kamiu kumial ka sudoti vou nalo aju amiluo, aju abinimeĩ amemeaio, ana kumijikia ka bogo na inio ve toru jo binimeĩ vaataro. ²⁹ Tibe na, bogo na kuvial jamerijiano nalo na ea yetemeriba, nalo aju amalmaluvo jibe ka napano kiniou neber ka kamiu ruei, mia kamiu kumijikia ka Kulorinio Kenerinio jikili jua m̄aratavo ruei, vaataro ka riyotuba naruei.

³⁰ “Riano, kiniou neber ka kamiu, mia tenalo na mia amaluvo beamu, ana iorou, tarati na tomu nalo napano ameulial bogo na

amijikia aňarmňaro ea yetemeriba nei. ³¹ Ana mia buluniogovu vija yetemeriba nei, naljuo avakovio bunu, mia kiaku iliano nalo maka ajikia avakovio bogo tai. ³² Mia maka toro tai napano mijikia bogoti na ħeli aura nene napano mia Kulorinio Kenerinio rimeĩ bere eaio. Nailiano nalo na tiniabene, bija Atua kenerinio, nalo maka ajikia, mia Karaňaku, naio takurano ga mijikia.”

Kamiu monoka kuvitur-orea rivu

Mataĩu 24:42-44

³³ Naruei Yesu berenio, berinavo “Tibe na, kamiu monoka kuvitu kuvitikař vatitigio rivu, bior kamiu maka kumijikia ka legiano na vabe naruei mia kenemiu Tubo rimeĩ bere eaio. ³⁴ Vite na naio jibe ka napano toro na toru tai juvan kiano vonuo ka riva rudu kiano buruňara ieliano tai. Beamu ka naio taluvo ea kanano vio, mia naio juvan kiano saba nonovio jua kiano tomu na imauano nalo juňalo, ka avitikař kiano imauano nalo, a mia ril vatitig van nalo napano abe nakukuano ea kiano morouo, ka monoka avitikař rivu.

³⁵ “Vonganei, jibe na bunu ban kamiu, naruei mia kamiu bunu monoka kuvitu kumisirařag kuku rivu, bior kito maka rejikia ka mia toro na toru na vonuo mia naio rimeĩ nagi. Vede naio rimeĩ ka niogoravo, vede ka bogiano, vede ka bogo

na tu riolu, vede kavijo va, ³⁶ mia maka rivu ka ver naio rimaluvo kean kamiu, ana rial napano kamiu kumitu kumonmelio ga. ³⁷ Naruei iliano nei napano kiniou naber ka kamiu, naio memedu ga ka tomu nalo aviniu monoka ajogio, napano berio kamiu kuvitikař rivu, kamiu kuvitikař kamiu rivu.”

14

Navuriňaraboiano nalo na kulo Israel kialo ajuňa ajidom auebin Yesu kiana vo

Mataĩu 26:1-5; Luka 22:1-2; Jone 11:45-53

¹ Naruei, bogo binimeĩ vaataro ka yuka nonovio nalo ajuňa amila kialo jokoluolu juo na tortoru. Bogoti juo ju kia vo, ka mia aimauka jokoluolu na sidomkariano na ioruriano tukamu, ana kario na aimauka ka jokoluolu na asen beskit na jikili.

Mia ea bogo nene, tomu na tortoru nalo na kulo lu kialo bija naverloglogiano nalo na tuboiano, ajuňa ajidom kea auebin Yesu. Aju kea amilavon ka asirař mňarabo tai ka mia avokarvan ga naio. ² Mia nalo ajuňa aberii banlo bereio, aberinavo “Vite na, kito maka rojikia roimauka ea tomu nalo miralo napano abinimeĩ ea jokoluolu nei, ver ħeli mia nalo tiniel ser tanea kito kanio, mia ala buruňara uetubaiano na, bior

napano nalo telabo ajumãa ajidom kema nei laka ruei.”

Mere miyon m̃aatei ea Yesu

Mataiu 26:6-13; Jone 12:1-8

³ Mia ka bogo nene, Yesu joa m̃arkomeli na Betani, naio ba jo miadu ka toro nei napano ajisia ka Saimon Burumieni, napano nanua beamu naio bokar burumieni ea niabene. Mia Yesu jo jinano ea vio na, tira tai binimeia eao napano naio midu bauei tai na amim̃auka ea puruveru na kirinovo tai, mia bauei neibano naio bujo ka m̃aatei na kirinovo tai napano amim̃aukanio ea uei na baiesi na buruiesi tai, napano puruveru nene toru laka garuei. Mia tira neibano naio mijukonlar tiniu na bauei neibano, ana miyon nonovio m̃aatei nene ea Yesu parinio. ⁴ Mia nalo tealo napano ajua vio neibano amial tenei, mia nalo tiniei jer tira neibano, aju amil muñii kanio ban berelo, aberinavo “?Ka venia na tira na miyon bulag kule m̃aatei na bo nei jibe na? ⁵ A ver naio rivulvulu kanio ga, mia naio rivar burum̃ara puruveru tai, ana naio mijikia rivar puruveru nene ka rijai talim̃asa nalo. Mila bulagio ga na!” Ana ajum̃a amil niegeniege tira neibano jibe na.

⁶ Mia Yesu ber kalo berinavo “? E, kamiu kumila jibe na ban tira na ka

vaio? Kamiu kuvil niegeniege re naio tibe na, naio mila tonovo tai ban kinio, milivu ka kinio laka. ⁷ Talim̃asa nalo nam̃a kumitu kuberiilo na, mia nalo bogo nonovio atu burukuti vija kamiu, ana kamiu kuvijikia kuvijailo bogo nonovio ea bogo ve telabo napano kamiu kumisidom. Ana kinio, mia noto re bogo nonovio rivija kamiu na. ⁸ Tena, tira nei mir̃aukanio, napano naio miyon m̃aatei na ea kinio, naio mila nonovio saba nalo na bo bo laka ga, napano naio mijikia rim̃aukanio, ka rijikia rila vatitig mokotenaku ka mia navan ea m̃ariano. ⁹ Kinio neber be riano ban kamiu, ea vio nonovio ea vio yetemeriba reraio napano mia averial kiaku ioluanou nabo eao, mia nalo atukunu bunu ka vaio na tira nei naio mir̃aukanio, ka nalo asidomial bereio bogo nonovio tena tira nei kiano tinietiano ban kinio, napano naio tinien miia riano kinio.”

Jutas jiveluku ka Yesu

Mataiu 26:14-30; Luka 22:3-20; Jone 13:21-30

¹⁰ Naruei Jutas na Kariot, napano naio bunu be Yesu kiano naiagagoano duelim ba juo [12] tai, naio jo jidomii ruei ka mia tiveluku ka Yesu, ana naio ba mial tomu nalo na tortoru na tomu lu nalo. ¹¹ Mia bogo na nalo amijog ka mia naio rim̃aukanio m̃arabo ka nalo ajikia avokar lukua Yesu,

nalo ajaaro laka, aberkar ban naio aberinavo “Naio bo laka na, a ver jau kajai kumemi tibe na, mia kumemi nuvisian ijaiano tai ve telisu rivanso riviorio.”

Naruei jikar ea bogo nene, Jutas naio jo jiravo buluvio tai na mia naio riven Yesu rivan ea kulo lu nalo nei jumalo.

Yesu miila Pitere naio Jone ka ava ala batitig sano sinaniano na maariano

¹² Naruei ea legiano napano be moti na jokoluolu ka asen taba na, be Taste, a ea legiano nene ajumã amila sida ka nunu solbouo nalo ka sidomkariano na ioruriano. Naruei ea bogoti nei naiagagoano nalo abika den Yesu, aberinavo “?Jau kojidom ka mia kumemi nuva nuvila batitig sado sinaniano na jokoluolu nei ea vio vabe?”

¹³ Mia naio ber kalo abe juo, berinavo “Kuve juo kuva jouro Yerusalemo, mia kamiu kuvial toro tai napano midu burumãara bauei tai, naio rimei riviviuo vija kamiu. Mia kuve juo kuvitakisor naio kuvano, ¹⁴ ana mia naio rivuru kamiu kuvan ea yimo tai. Naruei bogo na kamiu kuve juo kuva joomo ea yimo nene, mo na kamiu kuvil van boru na yimo nene, kamiu kuverii tibe nei, kuverinavo ‘Kiado naverloglogiano naio bikanio, berenio vajoomo vabe na valauo nalo kialo, ka naio naliko kumemi kanano naiagagoano nalo, kumemi numijikia nuvisen

sinaniano na sidomkariano na ioruriano eaio?”

¹⁵ “Kuve juo kuvil tibe na vanio, ana mia naio siloglog burumãara vajoomo na yimo tai napano ea kotkoti na jo mave ka kamiu, napano vite nonovio jua ruei, ana mia kamiu kuve juo kuviomon vite nonovio na sinaniano nei ea vio nene.”

¹⁶ Mia Yesu ber jibe nei ka naiagagoano juo neibano bisi, ana nalo abe juo abano, nalo amiel aba abokar vio Yerusalemo. Mia ea bogo nene amial ka saba nalo nonovio amalmaluvo jibe ka ga napano Yesu berii kalo abe juo jukamu. Jibe na naruei, ana na naljuo amila batitig sinaniano na maariano na jokoluolu na Yesu kiano, karina abe juo aban bereio.

Yesu berial ka mia Jutas tiveluku ka naio rivan kiano uolu nalo jumalo

¹⁷ Naruei ea bogiano, Yesu naliko kiano duelimo ba juo abinimeis Yerusalemo, naruei nalo aban ea yimo neibano. ¹⁸ Naruei bogo napano nalo ajumã ajanan, Yesu mil banlo, berinavo “Kinio neber be riano ban kamiu, ka mia kamiu tai ga mia naio riivilvili bena ga ka kinio, kamiu ga tai napano mia kumemi ve juo nuvisinan burukuti vonganei.”

¹⁹ Naruei naiagagoano nalo amijog ka naio ber jibe na, mia nalo tinielo miia naio toru laka, ana na nalo ajumã abivika veve

terakurano denio, aberinavo “?Koig, maka ve kiniou, a?”

²⁰ Ana na Yesu berdoŝeio, berinavo “Nana mia naio rila tibe nei ka kiniou, naio be tai ga ea kiaku due-limo ba juo [12] nei ga, naio napano mia kumemi ve juo nuvititi ka sememi joko ea baju ve takurano ga.

²¹ Mia Kulorinio Kenerinio monokanio rimaro tibe ka na vivitauiano lu nalo aberii nua ruei, mia toro napano naio ŵilŵili bena ga ka naio, mia rivova laka van naio, bo laka verenio naio rimoluo re.”

Sinaniano maariano

²² Ana bogo napano nalo ajum̃a ajinan jibe na, Yesu midu joko tai, ber siva ban Atua kanio, ana burekokorovio bar banlo, ana ber kalo, berinavo “Kam̃u kuvijevio kuvisenio, ninei naio be mokotenaku.”

²³ Mia iorou kanio nina, Yesu midu baja na m̃arjuml̃m̃elu tai, ana naio ber siva ban Atua kanio, ana jian ban kiano naiagagoano nalo, mia nalo abeve terakurano abiniu amunu tertelisu eaio. ²⁴ Ana naio ber kalo, berinavo “Ninei naio be kiaku burukija, ka rila Atua kiano virakariano tumolu tu sikili bogo nonovio, bior mia kiaku burukija nei naio riou ka sovoko tomu ve miroano kialo meuliano nalo.

²⁵ Kiniou neberkar be riano ban kam̃u, ka mia kiniou nomunu re m̃arjuml̃m̃elu na bereio rivano-o rivokar bogo na ga mia kiniou nomunu

m̃arjuml̃m̃elu vou ea Atua kiano navenatuboiano.”

²⁶ Mia bogo napano Yesu naio mila jibe na bisi, ana na nalo amiou ka iou tai napano joa niosi na Iouano nalo, avona bisi ana nalo abava tavio, aban ea Suku na Buruolivi Nalo.

Yesu berial ka mia Pitere rivarbonbonua naio

Mataiu 26:31-35; Luka 22:31-34; Jone 13:36-38

²⁷ Naruei bogo na ajua burusuku nene, Yesu ber kalo berinavo “Banei bogiano na, kenemiu moneano ea kiniou mia rijoru, bior iliano lu naio ber ruei, berinavo

‘Mia kiniou nouebin toro na bitikar nunu,

ka mia kiano nunu nalo

mia avuro ave dedade tanea vio.’

Sek 13:7

²⁸ “Ea iliano nei, Iliano Lu jo berii venia napano mia rimaluvo ea kiniou, mia bogo na kiniou nemeul bereio ea m̃ariano, mia kiniou notu-kamu nava Kalele, ana mia kam̃u monokanio kumei iorou, kumei ea vio nene bunu ga.”

²⁹ Naruei bogo na Pitere naio mijog ka Yesu ber jibe na ana naio mil ban Yesu, berial, ber “Peli kumemi tealo nonovio mia kialo moneano easo rijoru, mia nalo avuro denso, mia kiniou maka nejikia notuvanso bogo tai.”

³⁰ Mia Yesu berkanio, berinavo “Bo Pitere, ka na jau kober jibe na, mia kiniou neber be riano ga banso neber ka mia bogiano na ga, mia tu tokokoreko ve

valuo ga, ana mia jau kavar-bonbonua kiniou rive varolu ruei.”

³¹ Mia Pitere naio mil joko vio ka iliano na, naio berkar iliano na kirisikili lie, berinavo “A ver nalo ajidom ka auebin kiniou vijaso, bo laka lie vo, mia kiniou, maka nejkia nalabonuaso ka never kiniou maka nove kiamo.”

Ana bogo nene, naia-gagoano dolu nalo bunu aber iliano nene bunu ga.

Yesu ba bolkouo yako Ket-semani

Mataiu 26:36-46; Luka 22:39-46

³² Mia iorou, Yesu nalo abarĉiliglo ajel tivelinio ea suku neibano, abatove abokar bolu na telisu tai, aban ea vio tai siano Ket-semani. Ana naio ber kalo, berinavo “Kamiu kuvitu nei vo, mia kiniou nava nobolkouo ve telisu kija tukamu.”

³³ Mia naio buru Pitere naljuo Yemesi naio Jone, nalo aban bija naio, ana nalo aban lie kija telisu ga, ana ea bogo na Yesu kiano iviso binimej temi laka, ana naio mijog naio bova laka. ³⁴ Naruei Yesu mil banlo abe tolu, berinavo “Vonganei namijog jibe ka niunuku burukorovio ruei, mila na kiniou vaataro ka namaro kanio. Neber bo ban kamiu, kamiu kuvilavon ka kuvitevijo kuvitu vija kiniou ea vio nei kija ga vo.”

³⁵ Ana Yesu naio miel ba lie kija ga, ana naio mijoru minie ana bolkouo ban karamano, berinavo “Teta o, Teta o! Verver jau komijikia

kajamo ga ka aura na jogvaiano nei naio rimei ea re bunu kiniou. ³⁶ Jau komijikia komila vite nonovio, mia kiniou nobika denso ka jau kodular baja na jogvaiano den kiniou, ka mia kiniou nomunu eaio re. Mia jau kala re tibe ka na kiniou nejidom, mia be kiamo ga.”

³⁷ Kario naio binimej bereio ea kiano naiagagoano tolu neibano ana naio mial amonmelio ruei, mia bogo na nalo ajevijo ana Yesu ber ka Pitere, berinavo “? Saimon ĵumabe na jau kojo komonmelio jibe na? ? Kamiu maka kuvijikia kuvitevijo kuvitu vija kiniou ka aura ve takurano ga? ³⁸ Kamiu monokanio kuvitkar vatitigio, ka mia kamiu monokanio kubolkouo bogo nonovio, ka mia lavonvoniano nalo ala re kamiu kuvijoru ea kariano. Ee, kenemiu jidomiano nalo kirisikili vatitig, mia mokotenemiu nalo niabelo mave.”

³⁹ Mia iorou kanio ana naio bano bereio ea vio napano, ana naio bolkouo bereio jaki kiano ilibolkouoiano napano jukamu. ⁴⁰ Naruei naio binimej bereio mial ka nalo tolu nei ajumã amonmelio bereio, bior miralo jouo tomi laka, a bogo na naio mil banlo, maka bunu ajikia averdoĉe titai bereio rivanio.

⁴¹ Mia naio ba bolkouo bereio, nainei be varolu nene, karina naio binimej bereio, mia naio mil banlo berinavo “E, kamiu kumitumã kumijilimebi kia ga vo,

kamiu kumonmelio kia ga vo. Bo ga, bare naruei! Na vonganai vaataro ka bogo na Kulorinio Kenerinio naio rivan ea tomu va nalo jumalo naruei. ⁴² Ei, kamiu kuvitumolu, kito ravano. Toro na vilvili bena ka kiniou, naio yako jo binimei vaataro.”

Nalo abokar kilkil ea Yesu Mataiu 26:47-56; Luka 22:47-53; Jone 18:3-12

⁴³ Naruei monloglog bogo na Yesu naio jo ber kea iliano nalo nei kia navo, Jutas neibano be nalo duelimo ba juo [12] tai, naio binimei naliko tomu nalo miroano, napano nalo abar iobogu na mira nalo bija kialo nia nalo. Nalo na naruei, tomu nalo na tortoru na kulo lu nalo, bija naverloglogiano nalo na tuboiano, bija navurim̃araboiano nalo na kulo Ju nalo, nalo amiilalo abinimei. ⁴⁴ Nua na maka amei vo tibe na, toro na jiveluku neibano Jutas, naio jii jamerijiano tai ruei kalo, napano naio berinavo “A ver toro na navan jumaku vija naio tukamu, toro nene naruei napano kito rojidoio, ana kenemiu tomu nalo na be pirilo monoka avokario avuru naio avano.”

⁴⁵ Mia ka bogo na nalo abinimei naruei, Jutas naio miel ban memedu ka Yesu, naio berkanio, berinavo “Bogiano bo, Naverloglogiano.” Ana naio ban jumano bijaio. ⁴⁶ Ana kialo tomu nalo abinimei abokario kirisikili,

nalo ajidom ka avuru naio rivano. ⁴⁷ Nalo abakar naio jibe na naruei, ana naia-gagoano nalo na ajua vio na nalo tai midular kiano iobogu na mira, jidom ka te toro tai na Parinio Kulo Lu kialo, naruei naio jeluvuio ana jelar ga burutiliniene tivelinio.

⁴⁸ Na Yesu mil ban tomu nalo neibano, berinavo “? Jumabe ana kamiu kubar kenemiu iobogu a kenemiu nia nalo? Bior venia ana kamiu kumisidom ka kumei kuvokar kiniou tibe na? Peli na kamiu kumituma kumisidomii kuber kiniou nebe toro tai na be piriku ka nevina bija nouebin toro? ⁴⁹ Julaka ea bogoti nonovio, kiniou nojoma neberloglog kamiu ea Atua kunuano lu ruei, ana ka venia ana kamiu maka kumei kuvokar kiniou ea bogo nalo nene? Mia bo ga na, bior vite nalo napano vivitauiano lu berenio nua bogobe ruei, monoka amei tibe na ga.” ⁵⁰ Mia ea bogo nei, naiagagoano nalo ajuvan Yesu ana nalo aburo dedade denio.

⁵¹ Mia bogo nene, meaku tai naio joma jakisorilo, ana aburu Yesu bano ana meaku neibano naio jukulou ga. Mia nalo teal abitilubar-bar naio, mia nalo ajidom ka avokar naio bunu ga, ⁵² naruei nalo abuluvu naio, nalo abokar ga kiano tukulou ana nalo aburu lario denio, naio buro jibe na ga napano be blamoma ga jo.

Aburu Yesu ea komeli na toru, na tomu nalo na tortoru na kulo Ju nalo kialo

Mataiu 26:57-68; Luka 22:54-71; Jone 18:13-24

⁵³ Naruei nalo aburu Yesu binimej jikili jukamu ka Parinio Toro Lu, nina be Kaivas, ana tomu na tortoru nalo na kulo lu nalo, bija naverloglogiano nalo na tuboiano, bija navurim̃araboiano nalo na kulo Ju nalo, nalo abinimej vio takurano ea vio neibano bunu. ⁵⁴ Mia Pitere bunu jom̃a jakisosor Yesu ea bogo nene, mia naio maka riva vaataro kanio, mia bogo na nalo abinimej jouro ea burusio na komeli neibano, Pitere naio ba jotano bija tomu nalo na amim̃au Kaivas kiano, napano nalo ajum̃a ajutano vaataro ka sebi, bior vio menini.

⁵⁵ Naruei tomu nalo na tortoru napano aju joomo ea vioriano neibano, nalo ajirag von tomu tealó ka aver vite nalo tai napano Yesu jom̃a mila p̃eli nam̃a naio jo berenio, ka nalo amijikia auebin naio riviorio, ana nalo maka aleal tai.

⁵⁶ Nalo amileal tealó napano aburulo abinimej aberial iliano miroano, mia iliano nalo na abiniu ajum̃a amila sibi ga, mia nalo ajum̃a aber saba nalo na abeve dolu, naruei kialo ilisibiano nalo nei ajum̃a ajibirbili ga.

⁵⁷ Mia karina tomu tealó na sibiano nalo neibano nalo amileal iliano tai, ana ajikili aberinavo ⁵⁸ "Kumemi numijog ka kema na, naio jom̃a

mil barvar m̃elea ka naio jibe na naruei, berii Yimo Lu neibano korobido nalo amim̃aukanio bija jum̃alo nalo, berinavo naio ga mia rue bulagio bereio, ka mia naio ga rim̃auka vatitig Yimo Lu vou tai bereio, ka bogoti ve tolu [3] ga, napano mia toro jum̃ano rim̃auka re." ⁵⁹ Nalo aber iliano nalo na bano-o, mia karina kialo iliano nalo amierier janea vio ga, maka bunu atu sikili.

⁶⁰ Naruei parinio toro lu nei jumolu jikili jua miralo, mil ban Yesu, bika denio berinavo "Mia jau koverdopeio vanlo, p̃eli makanio? Jum̃abe ka iliano nalo nei napano aju aber bulagio?"

⁶¹ Mia Yesu naio jo ga jibe na, maka riverdope vanio bereio. Naruei Parinio Toro Lu nei ber bereio ban Yesu, berinavo "Jum̃abe, jau kobe Naverikariano nei napano naio be Atua Lu kenerinio, p̃eli na makanio?"

⁶² Naruei Yesu berdope banio, berinavo "Ee, Naverikariano na be kiniou na. Mia kiniou najidom never bunu vanso, never iorou, mia rivesiou re, mia kamiu kuvial kiniou Kulorinio Kenerinio napano nojo nojotano ea tivelinio vameruo ea Atua na moroano. Mia kamiu kuvial ka mia noyotuba ea melijo nemei bereio ea vio yetemeriba nei."

⁶³ Ana Parinio Toro Lu neibano tinien mimi laka, naio mijede kiano kulukoti, berinavo "Bisi ea vio na! ?

Bior venia ana kito rojumã rejiravo toro dolu bereio ka river saba nalo tealo rivanio? ⁶⁴ ? Kamiu kumijogio na? Toro na naio jo mila bulag tolu na Atua siano lu ruei! Mia vioriano naio jidom jumãbe, mia kito rotibure naio tumãbe?”

Ana nalo ajibure Yesu, aberinavo memedu ga ka nalo monoka auebinio. ⁶⁵ Mia nalo tealo ajumã abuvule eaio, napano abiviko mirano, ana ajukuio, naruei nalo amiyotel eaio, abika denio, aber “Ei, jau kover von, kei mijubaso vonganei?” Naruei Parinio Toro Lu kiano tomu nalo nei abinimei ka avuru Yesu ajaluvo den vio neibano, mia nalo neibano bunu napano ajumã ajuku naio bija amijuba naio napano mia nalo aju aburu naio abano.

Pitere barbonbonua Yesu Mataiu 26:69-75; Luka 22:56-62; Jone 18:15-18,25-27

⁶⁶ Naruei ea bogo nei, Pitere naio jo jouro ea burusio nei kia ga vo, ana tira tai na jo bitikar Parinio Toro Lu kunuano naio binimei ea vio neibano. ⁶⁷ Mia bogo na naio mileal ka Pitere jo juva sebi, ana naio mial mijikia Pitere, mia naio berkanio, berinavo “Ei, jau bunu kojo kajakisor toro na Nasarete na!”

⁶⁸ Mia vonganei, Pitere naio mila bonua tenei, berinavo “Ei, kiniou maka leleio nojoglubarbar vaio na jau kojomã koberenio.” Naruei naio jaluvo den vio neibano, ba vaataro ka burumãara

mãaratavo na toru na yimo neibano.

⁶⁹ Mia ea vio nei, tira neibano mialio bereio, a naio berealio ka tomu nalo napano aju na, berinavo “Toro na, naio be nalo tai na abe kiano.”

⁷⁰ Ana Pitere naio mila bonua iliano nei bereio. Ana maka vesiou, ana tomu nalo na ajua vio na aber ka Pitere, aberinavo “Maka, jau kobe nalo tai na, bior jau kobe toro tai na vio Kalele memedu na!”

⁷¹ Mia Pitere mil kirisikili lie ea iliano nalo na kirisikili, berinavo “Riano mave, kiniou neber ruei, kiniou maka lele nejikia kema na kamiu kumitumã kuberenio na.”

⁷² Naruei memedu ka bogo na Pitere naio berenio jibe na, tu naio jokokoreko valuo nene, mila na Pitere naio tinien maio ka bereio iliano na Yesu berenio berinavo “Riano ga kiniou neber kaso, mia bogiano na ga, bogo na tu naio tokokoreko rive valuo nene vo, mia jau kalabonua kiniou rive varolu ruei.”

Mia Pitere mijog tinieno bova mia bova, ana batavio, mia naio jegi mia jegi.

15

Aburu Yesu ban ea Parinio Tubo na Romo napano jomã bitikar Israel, nina Pailat

Mataiu 27:1-2,11-14; Luka 23:1-5; Jone 18:28-32

¹ Naruei ka Vraire kavi-jova, tomu na tortoru na kulo Israel nalo ajutano bereio ea kialo burumãara komeli. Nalo nei, tomu na

tortoru na kulo lu nalo kialo, bija navurin̄araboiano nalo a kialo naverloglogiano nalo na tuboiano. Nalo amil bano-o, nalo abokar jidomiano tai, ana iorou amiorkar Yesu jum̄ano, aburu naio aban ea Parinio Tubo Pailat, ana ajuvan Yesu jua jum̄ano ka tibureio. ² Ana Parinio Tubo Pailat naio bika den Yesu berinavo “? Jau kobe Parinio tubo ka kulo Israel nalo p̄eli na makanio?”

Ana Yesu berdope, berinavo “Tenene na naruei, jibe na kojom̄a koberenio kia na.”

³ Mia tomu na tortoru na kulo lu nalo aberii bulavulag vite nalo telabo kar Yesu, aberinavo naio jo mila vite telabo na bova. ⁴ Naruei Pailat bika bereio, berinavo “Jum̄abe? Nalo nei aberenio vite telabo na bova biorso ruei, mia jau be kiamo verdopeiano kanio, p̄eli makanio?” ⁵ Mia ea tivelinjo na venia nalo na ajum̄a aberenio, mia Yesu maka bunu sian verdopeiano tai bereio vanlo, naruei Pailat miilo toru kanio biorio.

Pailat mijamo ka Yesu ka naio monokanio rim̄aro

Mataiu 27:15-26; Luka 23:13-25; Jone 18:39-19:16

⁶ Ea bogo na, mia nalo aju kia ga vo ea Jokoluolu na Sidomkariano na Ioruriano, a ka yuka nonovio ea jokoluolu nei, Parinio Tubo na Romo naio jom̄a mila vite tai ka kulo Israel nalo. Naio mila jibe ka napano verenio nalo tealo ajua lakoiano,

tomu nalo amijikia avika nalo tai napano ajidom, ka mia Pailat rijamo ka naio riva tavio ga. ⁷ Ana ea bogo na, toro na poletik tai joa lakoiano, napano tomu nalo amijikia batitig naio, napano siano be Barabas. Naio be toro tai na kirisio napano ajumolu ka ala mira keano kulo Romo, naio muebinvin tealo am̄arm̄aro, naruei ajetavokio ea lakoiano biorio.

⁸ Jibe na, ana tiniobi nalo abinimei telabo vio takurano ea Pailat mirano, nalo abika den naio ka rila rivanlo tavukia nam̄a naio jom̄a mila, ka naio monoka rijamo ka nalo tai kalo napano joa lakoiano naio riva tavio bereio.

⁹ Naruei Pailat berdope, berinavo “Moo, p̄eli kami kumisidom ka kiniou najamo ka kema nei rivatavio bereio, nina be kami kulo Ju kenemiu Parinio Tubo?”

¹⁰ Pailat bika jibe nei, bior naio mijikia ruei ka tomu na tortoru nalo na kulo lu nalo na Ju nalo ga aburu Yesu binimei ban naio, jibe ka im̄auano na jokuano ga, bior amial ka tomu dolu nalo ajaaro laka kanio.

¹¹ Jibe na, Pailat jidom tuvan Yesu rivano, mia tomu na tortoru na kulo lu nalo amila bulag tomu nalo kialo jidomiano binimei bitunu m̄elea, ana aber monoka asikil ka Pailat ka naio tuvan re Yesu rivano, mia naio tuvan ga Barabas rivano.

¹² Mia Pailat naio mijog venia napano ajum̄a aber ka naio, naruei naio bika

denlo bereio, berinavo “Mo bo ga, a ver tibe na, mia kin-iou nala tumñabe ka toro nei naña kamiu kubio Parinio Tubo na kulo Ju nalo kialo?”

¹³ Mia nalo abiniu amiaga mave bereio, aberinavo “! Kuvitukukakar naio ea m̃akolkolo!”

¹⁴ Naruei Pailat bika denlo, berinavo “? Mia bior vaio, naio mila vaio na kirivova?” Mia nalo amiaga jouo lie vo, aberinavo “Kuvitukukakario, kuvituku-kakar naio mave ea m̃akolkolo!”

¹⁵ Mia Pailat maka bunu rijikia naruei mia naio rila tumñabe, mia jidom ka naio monoka river titai ka mia tomu nalo nei amijikia ajog rivu rivorio, naruei naio berinavo Yesu naio tobo, mia naio tuvan Barabas bere rivanlo. Ana naio midu Yesu joa kiano na mira nalo jumñalo ka nalo avitivio, ana ka ayurio riva atukukakario ea m̃akolkolo.

Namira nalo amiyotel ea Yesu

Mataiu 27:27-31; Jone 19:2-3

¹⁶ Naruei Pailat kiano na mira nalo aburu Yesu aba joomo ea burusio na kanano komeli, mia nalo abio kialo taara dolu nalo telabo abinimei ka aialio. ¹⁷ Naruei nalo amiya bulag kanano kulumñarauo, ana amiya kulukoti tai ea naio napano be vabolo, jibe ka naña parinio tubo nalo amiyaio, a nalo abar nionoti tilikibi abili, amiveio ea parinio, jibe ka parinio

tubo tai kanano batubatu. ¹⁸ Mia bogo napano abar tenalo na bisi, amiyotel eaio, aberinavo “Parinio Tubo na kulo Ju kialo, o! Kumemi nubatove kaso, kumemi numiaiaso!” ¹⁹ Ana nalo amidu jaati subavio, amue pariparinio, a abuvule niegeniege naio, aminie ka naio jibe ka abameneaio. ²⁰ Mia bogo naña amiyotel ea naio jibe na bisi, nalo amiyalar kulukoti vabolo nei denio, ana amiya m̃ano kulumñarauo eaio bereio, ana nalo aburu naio, abatavio ka atukukakar naio ea m̃akolkolo.

Ajukukakar Yesu mave ea m̃akolkolo

Mataiu 27:32-44; Luka 23:26-43; Jone 19:17-27

²¹ Ana bogo na na mira nalo aburu Yesu aju abano, nalo amileal toro tai napano naio ba yeturu jo miel binimei. Toro nei, nina be Saimon nanua beamu naio be toro na Saireni, a napano naio be karam̃ano tomu juo nei Aleksada bija Rovus. Naruei nalo amial naio, ana ajutua ka naio kija rudu Yesu kiano m̃akolkolo rivano. ²² Mia nalo aburu m̃arabo ka Yesu aba abokar suku tai, siano Kolkota, napano nioti nene berenio vio na jibe kanio bordada na buriu na toro. ²³ Naruei bogo napano nalo amijivi ea suku nene, nalo ajidom adu m̃arjum̃elm̃elu van Yesu ka rimunuio. Mia m̃arjum̃elm̃elu nei, nalo

amiyon buron vite tai mijeja ban bijaio ka rila Yesu niabene rije, ka naio rijog rijalele m̃lelea re, mia bogo na nalo ajian banio mia naio maka sidom rimunuio.

²⁴ Ana nalo amidu Yesu, ana ajuku kakario mave ea m̃akolkolo. Karina, nalo amiere m̃abujo, ka aleal ka kei kalo mia rivar kiano kulum̃arauo tai, a mia kei rivar dolu nene.

²⁵ Mia bogo napano amidu Yesu joa m̃akolkolo nei, nina kavijova, ea aura kover jibe na.

²⁶ Ana na mira nalo na Romo nei, nalo ajiri iliano tai, napano berial vite napano navurim̃araboiano nalo na ajidom auebin naio rim̃aro riviorio, napano berinavo “Toro nei, naio be Parinio Tubo na Ju nalo.” ²⁷ Mia ka bogo na bunu, tomu va juo na vinauano, ajukukakarlo bunu ea m̃akolkolo jibe ka Yesu, tai abitirilario ea vameruo na naio, a tinene abitirilario ea vañali. ²⁸ Ea bajago nei naruei, nalo amila ka mia iliano moruo tai na iliano Lu naio rimej rive riano, napano berenio berinavo “Nalo amidu naio mon naliko tomu nam̃a amila kokorov tuboiano.”

²⁹ Naruei tomu nalo napano m̃a amiel abarlaka ea vio na, naloaju aṗiligvilig pariparilo, naloamil niegeniege Yesu liki, aberinavo “Aie, jau na, nanua m̃a kober komijikia kala bulag Atua Kunuano Lu, a mia jau kovitiri lario bereio ka bogoti ve tolu ga, mia jum̃abe von-

ganei? ³⁰ !Bo ga, jau kalavon ka kalarurso, jau kataluvo den m̃akolkolo na, jau katabulu!”

³¹ Ea bajago na bunu, tomu na tortoru na kulo lu nalo naliko naverloglogiano na tuboiano naloaju abital niegeniege naio, nalo aberinavo “! Naio milarur tomu dolu nalo telabo ruei, mia naio maka bunu rijikia rilarur naio bereio naruei! ³² ? Naio be Naverikariano, naio be Parinio Tubo ka kito kulo Ju, ṗeli? Bo ka naio tavulu den m̃akolkolo vonganei, ka mia kito reial ka naio be riano, ka mia kito romijikia romonea naio.” Mia naljuo napano ajukukakarlo ea m̃akolkolo bija Yesu, naljuo na bunu amiasol ilivaiano nalo ea naio jibe na.

Yesu m̃aro

Mataiu 27:45-56; Luka 23:44-49; Jone 19:28-30

³³ Mia ka legiano viovare, ana melijokouo binimej miununuko vio reraio garuei, naio jo jibe na bano o bokar m̃erenio tolu niogoravo. ³⁴ Ana ea bogo na, Yesu miaga jouo ea kiano iliano memedu, naio berinavo “? Eli, Eli, lam̃a sabatani?” napano berenio “?Kiaku Atua, kiaku Atua, ka vaio ana kovuvin kinioj nojo jibe nei?”

³⁵ Mia tomu tealona panu ajum̃a ajumolu ajua vio nei, napano naloaju

abitii vite nalo na, nalo ami-jog belea Yesu kiano iagiano nei, naruei nalo aberinavo “Kamiu kumijog, toro na naio jo bio tormoruo Elaija na, ka rime i rijai naio.” ³⁶ Mia soḡeli ga, nalo tai jikiti binime i, midu burujumu, miyon m̃arjuml̃elu na mije a banio, ana julukar ka iesi tai, ana miyuku ban ka Yesu rimunu eaio, berinavo “! Ei, kito rotu vo! Reial von, ḡeli mia tormoruo Elaija rime i rilarur naio kovio, ḡeli na rime i re.”

³⁷ Naruei Yesu miaga jouo, naio buru maaria kanano jegi, naio m̃arodobi. ³⁸ Ea bogo nene na ga, jagidago merorolu laka napano jaklele ea Atua Kunuano Lu, naṃa joko vio lu na be vio lu laka, naio buruḡe tivelinio juo, jikar mave batove boru yetano.

³⁹ Naruei toro na toru ka na mira nalo, napano ju bitikar Yesu, bogo na mial Yesu buru maaria kiano jegi jibe na, naio berinavo “! Banalo tom nalo, toro nei be Atua Kenerinio riano ga!”

⁴⁰ A tire teal o napano ajum̃a ajakisor Yesu aju ka bogo nei, nalo ajikili aju koalabo kija, aju abitikar kialo naverloglogiano. Ea nalo nei, nalo tolu nei, be Mere tira re Maktala, a Mere dolu napano Yemesi naio Yoseve kenielo, a tira napano Salome. ⁴¹ Nalo nei naruei napano bogo na Yesu jo Kalele nua ruei, ajum̃a

ajakisor naio, ajum̃a ami-jaio. A be tire telabo dolu nalo bunu ajumolu aju ea bogo na, napano nalo bunu ajaluvo Kalele, ajakisor Yesu abinime i mave Yerusalem o.

Yoseve jivin Yesu

Mataiu 27:57-61; Luka 23:50-56; Jone 19:38-42

⁴² Mia bogoti nei be Vraire, naio be bogo na ala vite nonovio atu batitig rivu ea Legiano Lu nei beni, mia bogo napano vaataro ka m̃erenio rivatove, ⁴³ toro tai na Arimatea, naio siano Yoseve, naio mila kiano jidomiano jikili, ana ba jikili jukamu ka Pailat mirano, naio bika Pailat ka rijikia ridu Yesu mokotenano.

Mia kirisikili ka Yoseve naio rila tibe na, bior ka naio be tarati tai na burum̃ara vironiano na komeli na kulo Ju kialo, mila na tomu nalo amijikia batitig naio, a naio be toro tai bunu naṃa jidom laka ka Atua kiano navenatuboiano rime i.

⁴⁴ Ana ka bogo na, Pailat maka rijikia ka Yesu naio m̃aro ruei ḡeli na makan vo, naruei naio bio kiano toro na toru na kiano na mira nalo, ka vika denio. ⁴⁵ Mia bogo napano naio mijogial ka Yesu naio m̃aro ruei, naio mijamo ka Yesu mokotenano ban Yoseve.

⁴⁶ Mia Yoseve naio je m̃ano buluvae tai be terivou ga maka vesiou vo, karina naio ba bulu kulum̃arauo vou tai, naio ba amidular Yesu mokotenano batove ea m̃akolkolo, ana amijuvuliko

ka kulum̃arauo neibano, ana nalo amidu abano mon ea m̃ano buluvae napano. Ana amelivlivi ka puruveru na toru nene binime, ajubonkokar m̃aratavo nene, ana aban bereio.

⁴⁷ Ana Mere juo nei, tinene tena vio Maktala, naliko dolu nene napano be Joses kenieno, naljuo bunu abinime amial vio nei napano Yesu mokotenano joaio.

16

Buluvae be teau jo

Mataiu 28:1-8; Luka 24:1-12; Jone 20:1-10

¹ Mia bogo napano Legiano Lu naio barlaka ruei bisi, nina ka bogo napano m̃erenio jikar batove vonga kijev ka Sarere, mia Mere na vio Maktala, bija Mere napano Yemesi kenieno, bija Salome bunu, nalo tolu nei aba abulu bonotanunu nalo tealo ka amijikia aion ea Yesu niabene.

² Naruei ka Sade kavijo, bogo na m̃erenio jikar ka mijivio kia ga vo, nalo tolu amiel ka avan ea buluvae nene. ³ Aju amiel abano, nalo ajum̃a abivika denlo, aberinavo “? Mia bogo na rovoru yako, mia kei mijikia rimelivlivilar ka burum̃ara puruveru napano ajubonkokar buluvae nei van kito, ka romijikia rava joomo?”

⁴ Mia bogo napano nalo abinime vaataro ka vio nei,

nalo amial ka burum̃ara puruveru nei, napano toro tai melivlivilario ruei. ⁵ Naruei nalo aba joomo ea buluvae nene, amiilo ka m̃eaku tai, naio jotano tivelinio vameruo, napano naio miya kulum̃arauo nalo na amiu-vuruvu laka, mia bogo na nalo amial naio amiilo bova laka.

⁶ Naruei naio mil banlo, berinavo “! Ei, kamiu kumerou re! Kiniou nemijikia ruei ka napano kamiu kubinime ea vio nei bior Yesu na vio Nasarete, napano ajukar naio ea m̃akolkolo. Mia naio jumolu meul bereio ruei, naio maka bunu toa vio nei. Kamiu kumei von kuvialio! Ninei naruei vio nanua amidu batitig mokotenano mon eaio! ⁷ Mia kamiu kuan soṽeli, kuva kuverial ka Pitere vija naiagagoano dolu nalo, ka mia Yesu rivatove tukamu kalo yako Kalele, mia nalo bunu monokanio atakisor naio, mia nalo amijikia aialio ea vio na, tavukia na nanua berkar kalo nua ruei.”

⁸ Naruei tire nalo nei amila soṽeli, ajaluvo den buluvae, aburo abano, bior nalo amiilo toru laka ka vite nalo neibano bano-o m̃a amemebiju garuei. Ana amerou m̃elea bunu, mila ana maka ava averial ka tomu dolu nalo leleio, mia nalo aban memedu ka naiagagoano nalo ga.

Yesu naio miyotuba ka Mere re Maktala
Mataiu 28:9-10; Jone

20:11-18

⁹ Ana Yesu naio meul bereio jibe nei ea kavijo vio buru vurevure ka Sade nei ruei, napano naio be legiano moti na bogoti aluo. Naruei naio jo malmaluvo keanlo napano ajakisor naio, mia nana miyotuba kean beamu be Mere re Maktala, nina napano naio mijil bulag siñaro nalo aluo eaio nua ruei.

¹⁰ Ana iorou ka na Mere naio mial Yesu, naio ba miyotuba kean nalo nanua ña ajakisor naio, napano aju amijog bova a ajumña ajegi kia ga vo, ana naio berial kalo ka napano Yesu naio meul bereio ruei. ¹¹ Naio ber batitig kalo ka naio mial Yesu ruei ka mirano, mia nalo maka amonea naio.

Yesu miyotuba kean kiano naiagagoano juo

¹² Ana iorou ka bereio, ea bogo tai napano naiagagoano juo aju ajaluvo den Yerusalemo, naljuo aju amiel abano, ana Yesu naio maluvo kean naljuo. Naruei naljuo amial jibe ka napano Yesu niabene be dolu, naio maka tibe ka nua.

¹³ Mia bogo napano amial naio bisi, abe juo abarñiliglo, aban bere, abano aberial vite nei ban nalo dolu, mia bogo tai bereio, nalo dolu nei maka amonea vite nei.

Yesu naio miyotuba ka kiano naiagagoano nalo

¹⁴ Ana iorou ka bereio, Yesu naio miyotuba kean naiagagoano duelimo ba tai, ea bogo tai napano nalo

ajutano aju ajinan. Ana naio mil kija banlo, bior ka napano maka avar tinielo ea naio, a bior ka napano kanalo iviso nalo jikili laka, mila na maka atu amonmonea kialo iliano nalo ka amial naio meul bereio ruei.

¹⁵ Ana Yesu naio ber kalo, berinavo “Vonganei, kamiu monoka kuvano, kuvitan ka kamiu ea vio nonovio na yetemeriba nei, a kamiu monoka kuvioliolu ka kanaku Ioluanu Vou van tom nonovio. ¹⁶ Ver toro tai rijogio, mia naio rimoneaio, mia karina avaruei ea naio, toro nene mia naio rijeve ioruriano. Ana naio napano ver maka rimoneaio, mia Atua naio riverkar ñariano vanio.

¹⁷ “Mia nalo napano ña amoneaio, mia vremesiano nalo toalo, tibe ka napano mia ajil bulag siñaro nalo ea moroano na siaku, a mia ajev iliano dolu nalo, ¹⁸ mia ver bogo tai avokar maro tai, mia nalo avu ga, a ver bogo tai amunu vite tai napano monoka añaro kario, mia vite nene naio maka rijikia rila titai kalo, a mia adu jumñalo toa namieiano nalo, naruei mia nalo amei avu bereio.”

Yesu naio bavin bereio tiniabene

Luka 24:50-53; Iñauano 1:9-11

¹⁹ Ana iorou ka napano kiado Tubo Yesu ber iliano nalo nei banlo bisi, Atua burular naio ban bereio mave tiniabene, midu naio jotano tivelinio vameruo na naio.

²⁰ Naruei naiagagoano nalo abanvan tavio naruei, aba amioliolu ea vio nonovio, a nalo amial ka napano Tubo naio jo mĩñau bijalo, naio jo mila lo amila vremesiano telabo ka rila tomu nalo avitilubar ka kanalo iliano nalo nei abe riano.

A tukunu nei naio bisi ea vio na.

**Yesu Kristo Kiano
Ioluano Vou
Napano
LUKA
Bivitauiaio
Verialiano Moti**

Tukunu bulati na niosi nei

Niosi nei, Yesu Kristo Kiano Ioluano Vou napano Luka Jirio, naio berii Yesu ber naio be toro napano Atua berkar ruei ban taara nalo na Israel nua, ka mia rime i rilarurlo, a ka rilarur tomu nalo na yetemerba. Luka jiri ea kiano niosi nei ber Yesu nei, Atua sofi kiano niununo naruei bio naio ka riverial ioluano vou van talimasa nalo. Naruei bior vite nei, ioluano vou nei napano jirio, bujo ka tukunuano nalo napano aberial ka Atua tinien miia tomu napano ajua jaleleano.

Vite dolu telabo napano romialio ea niosi nei, nina tukunuano nalo na tomu nalo napano amijog bo ajaaro. Tukunuano nalo telabo jibe na ajua mirano takurano [1] napano berial ka mia Yesu rime i, a ea mirano juo [2] napano berial ka Yesu moluo. Mia bereio ea mirano maariano, tomu nalo ajaaro napano Yesu meul bereio, a bavin ea Tiniabene. Toro napano jiri niosi nei, naio jiri niosi dolu tai bereio napano sian Atevi Nalo Kialo Imãuano Nalo.

Ea niosi juo nene nei, naio berial tukunuano nalo napano amiyotuba iorou ka bogo nei napano Yesu bavin ea Tiniabene.

Tukunuano nalo nei aberial ka tomu nalo napano amonea Kristo abinimei mirouano, a aba aberial kialo moneano nei ea vio dolu nalo. Niosi nei Yesu Kristo Kiano Ioluano Vou napano Luka Jirio abe torogio arolu [8]. Ea torogio juo nene, bija torogio ari nene be tukunuano nalo napano ajua niosi nei ga, nalo maka atua niosi tolu nalo na Yesu Kristo kanano Ioluano Vou napano Mataiu, Mak bija Jone nalo tolu ajirii. Nine tukunuano napano berii agelo nalo napano amiou, a tukunuano napano berii tomu nalo ka avitakar nunu napano abinimei ka aial Yesu ea bogo nei napano naio moluo, a tukunuano napano berii Yesu ea bogo na napano naio ban ea Atua kunuano ea bogo na naio be tete m̃eaku kiaga, a jamerijiano na toro novo na Samaria, a jamerijiano na kirtete napano ba kovio. Vite burtumoruo tealo nalo napano Luka berii van telabo ea niosi nei jibena. Naio berii bolkouano, a Niununo Lu, a tire nalo kialo vio ka aimãau Yesu kanano, a berii napano Atua mijikia viekokoa toro, mijikia ridular kiano kariano.

*Torogio nalo na niosi nei
Ilano moti 1:1-4*

Jone Baruei, bija Yesu
naljuo amoluo, a naljuo
amiluo bavini 1:5—2:52

Jone Baruei kiano
iñauano 3:1-20

Jone Baruei baruei ea
Yesu, a Simāro milavono
naio 3:21—4:13

Yesu mila kiano iñauano
ea tanobuku na Kalele
4:14—9:50

Yesu jaluvo den Kalele ba
Yerusalemo 9:51—19:27

Yesu kanano sude maar-
iano napano mila
kanano iñauano yako
Yerusalemo bija nalo
na vaataro kean
Yerusalemo 19:28 —
23:56

Yesu meul bereio bija
kiano tomu nalo amial
naio 24:1-53

Iliano na be moti

¹ Kiniou Luka nebivitauia
tukunuano nei banso, toro
na toru Tiovilas. Jibe ka
napano jau komijikia ruei,
tomu telabo abivitauia ruei
tukunuano na vite nalo
nei nanua amalmaluvo ka
kito yuka tealo bar laka
ruei. ² Vite nene nalo,
kito maka reialio rimemedu
ka mirado, mia tomu nalo
napano jikar ea burupati
nene, naloaju amialio, a ka
napano nalo ajibe ka tomu
na be moti na Lilianiano Vou
nabo, nalo naruei aberial
sosolio batitig binimei ban
kito. ³ Naruei jikar nanua
ruei, kiniou nojomā nebitii
batitig mēsi dolu nalo namā
abivitauiāio, a nojomā nabar
iliano na vite nene nalo,
naruei namial jibe bo ka ver
nalavon ka navar torogio

dolu nalo na tukunuano nei,
novivitauiā sosolio amei tibe
ka niosi novo tai napano
jakii memedu kiri mārabo
sesa nalo na tukunuano
novo nei. ⁴ Naio naruei
nobivitauiāio ruei jo, mia
kiniou najaaro ka notuvan
riviedu ve kiamo, ka mia
jau komijikia kovulukuio,
komijikia kovitilubar ka
vite nalo namā kojomā
komijogio ruei amemedu ga
a abe riano, ajavukia namā
kanaku niosi nei berialio.

*Nailiano mijuelar ban
Sakaraia ka mia naio rivar
Jone Baruei*

⁵ Tukunuano nene naio
jikar jibe nei: Ea bogo
namā Parinio Tubo Erot
naio jo mije tuboiano ea
tanobuku na vio Yutea, toro
lu tai, naio be mārātavo
na Abija, a naio buru
tira tai napano naio bunu
miyotuba ea yati na kulo
lu nalo, nina ea mārātavo
na tormoruo Erono, Mosis
kuruano re nua laka. Toro
nene siano Sakaraia, a
koano, siano Lesveti. ⁶ Mia
naljuo nei, kialo meuliano
kiri memedu laka ea Atua
kiano vitiiano, ka namā
amonmonea kiano tuboiano,
a nalo ajumā amila bajago
nalo na memedu kamā
amila bogo nonovio ga,
maka atumā ala belea tai.
⁷ Mia vite takurano ga,
naljuo maka ve kenerilo tai,
bior tira nei Lesveti naio
jumolumu ga, mia vonganei
naljuo abinimei abe kulo
moruo nalo laka ruei.

⁸ Mia ka bogo tai, naio
be bogo na Sakaraia kiano

taara nalo monoka ava ala sida ea Atua Kunuano Lu, tavukia namā taara nalo amila terakurano ea sude nalo. ⁹ Mia damāriga, bogo namā amilala jibe na, nalo monoka ala tibe ka namā amiere mābujo, ka mia aleal nalo na vabe kalo naruei napano mia naio mijikia rila burumāra imāuano nei ka mia mā riva joomo ea Vio Lu na Yimo Lu nei, ka risebi sida ea boda na jo. Mia ka bogo na amilaiio jibe na, mia Sakaraia siano mijoru loglogio, ka mia naio naruei riva rilaii burumāra imāuano nene. ¹⁰ Naruei monloglog bogo namā amisebi sida nene, ana naio ba joomo ka rilaiio, a burutiniobi toru na tomu nalo aju tavio ajumā abolkouo.

¹¹ Ana bogo na Sakaraia naio ba joomo, mia milobin naio ka mial Atua kiano nailiano tai napano naio miyotuba kanio, jikili ju tivelinio vameruo na boda nene. ¹² Mia bogo na Sakaraia mial nailiano nei, naio maka bunu rijikia ka mia tumābe naruei, a merou toru bunu. ¹³ Mia nailiano nei naio mil banio, berinavo “Sakaraia, jau komerou mēle re. Kiniou nebinimeī ka neverial ga vanso ka Atua mijog kenemiu volkouano kube juo ruei, a mia koamo tira na Lesveti, mia naio rivar kenerimo solbouo sumāno tai, mia bogo na naio riyotuba, mia jau monoka kesisia naio ka Jone. ¹⁴ Mia bogo na naio riyotuba dovorovo, mia kuve juo tiniemiu saaro ve

toru laka, tiniemiu sese, mia kamiū ve juo re ga, mia kulo dolu nalo bunu mia asaaro ve toru laka. ¹⁵ Kiritete nene, mia naio rimeī rive Atua kanano toro na toru tai, a mia naio tibe ka toro lu tai, mia naio rivel ka mārjumēlmēlu vija uei na bitunu. Tikario ea bogo napano joa kia ga kenieno mabono, mia Niununo Lu to rivujolou ea naio ruei. ¹⁶ Mia naio rive toro tai napano mia naio rivilig kulo Israel nalo ve telabo amei bereio ea Atua Soḡi, kialo Tubo. ¹⁷ Mia aial ka napano niununo a moroano nanua joa Naverialiano Elaija mia to rivare ka ga naio bereio, bior mia naio tukamu rimeī, ka riverial ka mia Naverikariano naio rimeī iorou ka naio vesiou re. Mia naio rivilig teta nalo kialo iviso nalo ka mia asidomial vatitig bereio kenerilo nalo, a mia rivilig tomu nalo namā amila kokorov tuboiano ka mia atakii bereio bajago napano be masou a memedu. Ea mārabo nalo na naruei, mia naio rila vatitig rivu taara na tomu nalo tai ka mia ave Atua kiano, ka atu rorea naio ka mia riyotuba kalo.”

¹⁸ Mia Sakaraia naio mijog iliano nei, ana naio berkanio nailiano nei, berinavo “Ai, abe kover re tibe na. Maka rijikia tibe na, bior kumemi juo nei mērenio batove ruei nei.”

¹⁹ Ana na nailiano nei mil ban bereio, berinavo “Makanio, mia tibe ga na. Kiniou nebe nailiano Kapriel nei, namā bogo nonovio na-

jikili nojua Atua mirano ka ña nabar kanano iliano, naruei naio miila kinioi nebinime i easo ka neverial lilianiano novo nei vanso.
²⁰ Mo bogo na kinioi neberialio kaso, mia jau maka komoneaio, naruei kinioi never kaso ka mia kove buru, a mia jau koto tibe na rivano-o rivokar bogo na keial vite nalo nene ayotuba kaso, nina ea bogo nene rimemedu.”

²¹ Mia bogo na nailiano joña mil kia ga jibe na ban Sakaraia, mia tomu nalo ajikili aju tavio kia ga vo, aju rorea bano deio, ana nalo aju ajidomii aberinavo “?Ka venia ana naio ba joomo, bijuku kiki jibe na?”
²² Ana iorou kanio, ana naio batavio bereio, mia nalo amial ka naio maka bunu rijikia ril vanlo, naruei nalo abitilubar ka naio jo joomo naio mial titai napano mila naio jibe na. Naruei naio joña mil ka ga juñano banlo, maka bunu ril be buru ga jo.
²³ Mia naio jidel dolu ka ga ña jo mila kiano iñauano ea Yimo Lu na Atua Kunuano, bano-o kiano bogo nene bisi, ana naio ban bereio vonuo.

²⁴ Naruei nalo aju jibe na bano-o, mia maka vesioi, ana koano ñigi, mia bogo na naio mial ka naio be ñabono jibe na, mia naio ba jo vonuo ga bano-o bokar siberio jumo.
²⁵ Ana ea bogo na, naio jo ber jibe nei, berinavo “!Atua bijuku bo tanea ban kinioi nei! Beamu

tomu nalo ajuña abiti sa ea kinioi bior maka navar tete, mia vonganei, Atua naio mial kinioi, tinien miila kinioi, naruei naio midular imouiano na kanaku jumolumu nene ruei.”

Nailiano binime i mijelar ban Mere ka mia naio rivar Yesu

²⁶⁻²⁷ Naruei Lesveti naio be ñabono siberio ari ruei, ana na Atua miila kiano nailiano nei, Kapriel, ka riva riverial kiano iliano tai rivan niatira tai, siano Mere, napano naio be niatira tai na komeli na vio Nasarete ea tanobuku na vio Kalele. Ea bogo na, aberkar Mere nene ruei ka mia riva soro ka toro tai, siano Yoseve, napano naio miyotuba ea yati na Parinio Tubo Teviti re nua, mia Mere naio maka riva to rivija naio vo.

²⁸ Ana na nailiano nei Kapriel naio binime i, miyotuba ka Mere, naio berinavo “Mere-o, abe Atua naio jo jaaro toru laka ka jau, naio milivu kaso, a naio jo bijaso riano.”

²⁹ Mia bogo na Mere mijog iliano nei, naio jidom bivovijonio toru laka, ana ber mia riviti von, ka nailiano nei mil kirinovo laka ban naio jibe nei, ber nioti nene venia.
³⁰ Karina nailiano nei mil bereio banio, berinavo “Mere, jau komerou re. Atua tinieno jaaro kaso ga, mia rila buruñara ilivuiano tai rime i ea kiamo meuliano.
³¹ Vonganei, mia jau kove ñabomo, vano-o mia kodu kenerimo suñano tai,

a ver naio riyotuba kario, ana monoka jau kesisia ka Yesu. ³² Iliano Lu re nua berii kenerimo nene ruei, na naio berinavo

‘Naio mia rive toro na toru, a mia siano rive

“Atua Na Loa Laka Kenerinio,”

a Atua Tubo rila naio rime ve parinio tubo tai, napano ridu jeleig korobinio re nua nene, napano parinio tubo Teviti,

³³ naruei mia naio rije tuboiano ka nalo napano na amiyotuba ea Yakovo kanano m̃aratavo, nina be kulo Ju nalo na aju vonganei, a ka mia nalo na amei iorou, a kanano navenatuboiano mia naio maka rijikia ribisi bogo tai.”

³⁴ Naruei Mere naio m̃ilo toru laka ka iliano na ber mia naio rudu tete, ana bika den nailiano nei, berinavo “? Ana mia vite nene riyotuba sel tum̃abe liki nei, bior kiniou maka nuvitū biju kumemi juo kanaku sum̃ano vo?”

³⁵ Ana na nailiano berdoṽe, berinavo “Mia Niununo Lu rivatove easo, a mia moroano na Atua Na Loa Laka kiano rime sovokoso, ana na mia jau koṽigi. Ana bior mia jau kotibe na, mia nalo averinavo kiritete lu napano mia jau koduio be ‘Atua kenerinio.’

³⁶ “Ea kanamo vitiano, jau komial tena kirisikili laka

ka mia tibe na, ana bo ka jau kosidomii von koniomo tiramoru Lesveti yako. Aju amial aber mia naio rivar kulu re tete ga, mia naber kaso, naio be tiramoru ruei, mia vonganei, naio kiano siberio ari ruei. ³⁷ Jau monoka tiniemo rimaio, ka jibe ka napano Atua ber ka tiramoru Sera re nua laka, ea tivelinio ka naio, maka ve titai leleio napano mia naio rijikia re ka rilaio.”

³⁸ Ana na Mere naio berdoṽe, berinavo “Ierinio ga. Kiniou nobe niatira na Atua kanano im̃auano ga, mo kiniou nomijamo ga ka mia naio rila vite nalo na ayotuba ka kiniou tibe ka ga napano naio jidomio, tibe kanio na jau koberial ban kiniou na.” Ana na nailiano nene juvan naio ban bereio.

Mere ba miadu ka Lesveti

³⁹ Ana na Mere joṽia jidomii nailiano nei kanano iliano nalo nei, karina naio jidom toru ka riva rial kenieno nene napano Lesveti, mia maka vesiou ga, ana naio jumolu den kiano vio, mila soṽeli ban ea m̃arkomeli napano Lesveti naio koano Sakaraia ajuaio, nina ea tanobuku na suku nalo na vio Yutea.

⁴⁰ Mia Mere neibano bokar naljuo nei kunualo nene, naio ba bio Lesveti. ⁴¹ Mia bogo napano Lesveti naio mijog lubar Mere joono ka mil banio, naio mijog ka kenerinio napano joa naio, bijobijo toru. Naruei Niununo Lu binime i ea Lesveti,

naio binimei bujolou eaio,
⁴² naio miaga manenea,
 berinavo "Aiou Mere, Atua
 rilivu kaso ve toru laka,
 loa tira dolu nalo aviniu,
 a mia kanano burum̃ara
 ilivuiano toa bunu kanamo
 m̃arati napano mia kovario!
⁴³ Kiniou maka nove tira
 na memedu leleio ka mia
 kanaku Tubo Kenieno rime
 riadu ka kiniou tibe nei,
 mia namial kirinovo laka
 ban kiniou. ⁴⁴ Mia kanaku
 solbouo naio bitilubarso,
 naio jaaro toru laka, bior
 monloglog bogo napano
 numijog joomo be moti
 garuei, naio bijobijo toru
 laka ea kiniou. ⁴⁵ Kito
 juo rajaaro mia rajaaro,
 bior robiekar batitig Atua
 Soṽi kanano iliano, a mia
 rime rive riano van kito
 juo tavukia ga napano naio
 berkar ban kito ruei."

*Mere miaia Atua ka
 iouano tai*

⁴⁶ Ana ka bogo na, Mere
 kanano iouano tai jibe nei,
 berinavo

"Kanku iviso miaia Atua
 toru,

⁴⁷ niunuku jaaro toru laka ea
 Tubo kiaku ioruriano,

⁴⁸⁻⁴⁹ naio mial kiniou no-
 jotano,

tira na kiano im̃auano tai,

naio be Atua na Moroano,

jidomial kiniou,

mila tonovo ban kiniou.

Taara nalo napano amei
 iorou, averii kiniou,
 averinavo

"Tira nei, Atua milivu toru."

Nomidular siano lu,

⁵⁰ tinien miia nalo nam̃a aju-
 tano kanio,

taara re nua, na iorou.

⁵¹ Moroano na jum̃ano mila
 vite miroano,

naio jiburevure nalo nam̃a
 tinielo jikili,

mila dedade ealo abeve ter-
 akurano.

⁵² Mila bulag parinio tubo
 den jelelo,

bitiri bulag nalo nam̃a jido-
 miano batove ga.

⁵³ Nalo nam̃a jijerlo, naio
 bagan batitiglo,

nalo nam̃a abe sanibaiano,
 naio mijil bulaglo, jum̃alo
 yauo ga.

⁵⁴⁻⁵⁵ Naio mila nam̃a
 berkario nua ban
 korobido nalo,

binimei miija kito, kanano
 kulo Israel nalo.

Maka rivitoviton ea
 Epraamo,

tinienriia kiano bajulukuti
 nam̃ariga-o tobo to."

⁵⁶ Naina naruei Mere
 kiano iouano maaro ea vio
 na, mia naio jo bija Lesveti
 bano-o bokar siberio tolu,
 karina ban ea kanano vonuo
 bereio.

Jone Baruei naio moluo

⁵⁷ Naruei binimei mon-
 loglog bogo na mia Lesveti

rudu kenerinio, mia naio
 barlar be sum̃ano. ⁵⁸ Mia

bogo napano Lesveti kiano
 m̃aratavo bija tomu na

vaataro nalo amijogial vite
 nei, nalo ajaaro toru laka

bija naio ka Atua kanano
 burum̃ara tinieiano nei

banio, ka beamu naio be
 jumolumu ga, mia vonganei

naio barlar kenerinio mo-
 toru. ⁵⁹ Mia bogo na kiritete

nei naio bokar bogoti aluo,
 ana abinimei ka ala pakuveu

ka naio. Ka bogo na,

ajidom ka adu siano bunu, avio ka Sakaraia, tibe ka karamāno siano, ⁶⁰ mia kiritete kenieno berbure, berinavo “Makanio, naio siano Jone.” ⁶¹ Naruei nalo amil banio, aberinavo “? Venia na? ! Maka lele garuei kanamo mārātavo tai napano adu sio na jibe na toa naio!”

⁶² Naruei amil ka ga juṁṁalo ban kiritete nei karamāno, ka avika denio ka naio jidom ka adu sio na vabe toa kenerinio nene. ⁶³ Ana na Sakaraia mil ka juṁṁano banlo, ber adu mēsi tai rimei vanio, naruei naio bivitauia, berinavo “Siano, Jone.”

Vite na naruei mila nalo na vio na amiilo toru laka kanio, ⁶⁴ mia monloglog bogo na bunu, Sakaraia minano mijuo, naruei naio mijikia mil bereio, ana na miaia Atua.

⁶⁵ Mia tomu nonovio nalo na tanobuku na, amijogial vite nei, amiilo va kanio, mia tukunuano nene mererako janea mākomeli dolu nalo na tanobuku na suku nalo na vio Yutea. ⁶⁶ Ana na nalo namā amijogio, ajidom bi-jovijon toru laka kanio, bior abitilubar ka Atua juṁṁano jo bijaio, naruei nalo ajumā abivika denlo, aberinavo “? Kiritete lu nei mia naio tumābe?”

Sakaraia berial iliano na Atua jian banio

⁶⁷ Naruei Niununo Lu binimei bujomagmago ea Sakaraia, kiritete telisu nei karamāno, ana naio berial jibe nei, ber

⁶⁸ “Kito raiaia kanado Atua siano, Tubo re Israel, batove kean kito, bulular kito,

⁶⁹ bitirilar kiano siyovo, miyotuba ea bajulukuti na kiano toro na imāuano Teviti, ka mia rilarur kito.

⁷⁰ Nina kiano verikariano nanua, naverialiano nalo aberialio, aber

⁷¹ Naio mia rivuru bulag kito den kiado uolu nalo juṁṁalo,

⁷² tiniene ribobogia re kanano virakariano bija korobido nalo, tinien miialo kia ga vo.

⁷³ Nina verikariano jikili nene bija korobido Epraamo,

⁷⁴⁻⁷⁵ nanua Atua berkar ber rilarur kito ka kiado uolu nalo juṁṁalo,

ka romerou re bunu, rove lu, romemedu kamu ea mirano, roimāu kanano ka legiano nonovio ea kiado meuliano.

⁷⁶ Keneriku, mia avioso ka Atua Loa Laka kiano Naverialiano,

mia kotukamu ka kala vatitig Tubo kiano mārabo.

⁷⁷⁻⁷⁸ Mia koverial ka mia Atua tinien riia kiano tomu nalo,

tinien tiilo, ana mia riviekokoa kialo kariano nalo,

a rilarurlo.

Mia Atua riila kiano kiriyulu telisu na kavijo ve moti rimererali kito,

⁷⁹ rimei rimererali kito napano mā rojua meli-jokouo,

napano niununu namãariano
miununuko kito ruei,
a mia rimeĩ rimererali
marabo na tumãaro ka
rotumã reiel eaio.”

Jone Baruei miluo

⁸⁰ Mia bogo na yuka nalo
aju abarlaka bano, Jone
nene naio miluo bavin ririo
bo, a kiano jidomiano meruo
batitigio, a naio biekouo ea
Atua kiano imãuano bo. A
naio ba joa vio yauo, ka riva
rivokar bogo na mia naio
monoka riyotuba ea kulo Is-
rael nalo miralo.

2

Yesu moluo

Mataiu 1:18-25

¹ Ana ka bogo na, parinio
tubo na kulo Romo kialo,
naio siano Sisa Okastas.
Naruei naio berial ka mia
monoka avuluku tomu
nalo na venuo nalo namã
ajutano ka kiano vitikariano.

² Imãuano na abuluku tomu
nalo nei, naio be moti na
amila jibe na, a ka bogo
na amilaio, mia toro tai
na Sisa kanano naio jomã
bitikar burumãara tanobuku
nei na vio Siria, a toro na
toru nene, siano Kuarenias.

³ Ana ka ala imãuano nei,
aberenio tomu nonovio
monoka avanvan bereio
ea kialo vio nalo, ka mia
amijikia avivitauia vatitig
sialo, a avuluku vatitigio.

⁴ Vite na naruei mila ana
Yoseve naio jumolu den
komeli na vio Nasarete,
namã naio jojoaio, nina ea
tanobuku na vio Kalele, ana
naio bavin ea komeli na vio
Betleem, ea vio na tormoruo
Parinio Tubo Teviti naio

moluo eaio nua, nina ea
tanobuku na vio Yutea, bior
Yoseve naio miyotuba ea yati
na tormoruo Teviti nene.

⁵ Mo Yoseve burukar
koano Mere jakisorio, na-
pano ka bogo na, vaatara ka
rivarlar kenerinio. ⁶ Naruei
abe juo abano, mia bogo
na nalo aju kia ga Betleem
vo, mia Mere mijog ea naio
ka kiano bogo na mia naio
to joomo binimeĩ nonovio
naruei. ⁷ Ana na Mere midu
kenerinio motoru, naio be
sumãano, a naio bivikakari
batitigio ka niakulmarauo,
mia maka kanano vio nabo
tai, bior abe juo amilavon
ka ava atua yimo na valauo,
mia naio bujo ruei, naruei
Mere mila kenerinio mon
joomo ea vio na abagan
temeul nalo eaio.

*Nailiano nalo amiyotuba
ka navitikariano na nunu
nalo*

⁸ Naruei ka bogiano nene,
be tomu tai namã abitikar
nunu aju bija kialo temeul
nalo, ea soro tavio ka
Betleem nene ga. ⁹ Naruei
Atua kanano nailiano tai
batove keanlo, a Atua kiano
mermerano midulij rera vio
nene jibe ka burumãara yulu
tai, mila nalo nei amerou
toru laka. ¹⁰ Naruei nailiano
nei mil banlo, berenio
berinavo “Kamiu kumerou
re. Kiniou nomidu iliano
nabo tai ka naver ka kamiu,
ka mia naio mijikia rila tomu
nonovio ajog rivu ve toru
laka. ¹¹ Ka bogiano nei ga, ea
komeli na Parinio tubo Teviti
re nua kanano, nina ea vio
Betleem, kiritete solbouo tai
naio moluo vonga, ka mia

naio rive kenemiu ioruriano. Naina naruei be kenemiu Tubo, naio be Naverikariano namã Atua berkario nua ruei ka mia riilaio rimeĩ.

¹² “A naina naruei be kijok-ijo na vite nene: Mia kamiu kuvileal kiritete telisu nene, napano amila kokouro ea naio. Mia kuvial ka napano abivikario ka niakulmãarauo nalo ga, ka mia adu naio ka rimon ea vio na temeul nalo salo sinaniano.”

¹³ Naruei nalo amiilo ka soŕeli ga, burumãara taara na nailiano dolu nalo na vio mave abinimeĩ amiasolo bija nailiano neibano. Naruei nailiano nalo nei amiaia Atua, a amiou aber

¹⁴ “Mave niogovu, nalo ajumã amiaia Atua toru, a ea yetemeriba nei, tumãaro joa tomu na Atua jaaro kalo.”

Tomu na abitikar nunu nalo aba Betleem

¹⁵ Nailiano nalo aberial iliano nei ruei, bisi na ajaluvo den tomu na abitikar nunu nalo nei bereio, karina abavin mave niogovu. Naruei nalo nei ajumã aberverii vite nei banlo bereio, aberinavo “Ai, abe ravano. Bo ka rava Betleem ka reial vite nei miyotuba vonganei, napano Atua berial ka kito.”

¹⁶ Ana nalo amila soŕeli, aba amileal Mere naio Yoseve, a amijaka aba amiadu ka kiritete seša napano monea mãano vio namã abavagan temeul eaio.

¹⁷ Mia bogo na amial vite nalo nei, ana aber bulavulag

nonovio iliano nalo napano nailiano berial kalo ruei, tivelinio na kiritete seša nei. ¹⁸ Telikiti na kulo dolu nalo amijog tukunuano nei, tinielo bujo ka burumãara vameneano tai. ¹⁹ Mia Mere, mijekar vatitig nonovio vite nalo nei jua kiano iviso, maka tiniene ribobogia, naio joĩna jo jidomiio julaka ga.

²⁰ Mia tomu nalo nei aban bereio ea kialo nunu nalo, a ajumã abamenea Atua siano, a nalo ajumã amiaia naio toru laka ka vite kirinovo nalo napano amijogio a amialio, napano kirimemedu ga ka nailiano nei kiano iliano napano berial banlo.

Amidu Yesu siano banio

²¹ Telikiti napano kiritete bokar kiano sude takurano, naio be bogo na mia ala pakuveu ea naio. Amila jibe na, kario ajisia ka Yesu, napano sio nei be sio nanua nailiano berial kalo jukamu ruei, avona bisi ana Mere naio be ŕigi kanio.

Amidu dovorovo Yesu ban ea Atua Kunuano Lu

²²⁻²⁴ Telikiti na Yesu miyotuba sude ari barlaka ruei vo, bisi na be bogo na monoka avuru sida na lakoniano ea Atua Kunuano Lu, nina bior burukija na tira na bar tete. Naruei aba aburu sida nene, jakii tuboiano na Mosis kiano berenio, berinavo “Taliĩasa nalo amijikia aue ga vaama ve juo, ŕeli na kirisibo ve juo.”

Ana ka bogo nene, amidu dovorovo Yesu ban ea Atua

Kunuano Lu, amiokoio ban Atua. Vite na jakii Mosis kiano tuboiano, na naio berenio “Tete sumano nalo nonovio na amoluo jukamu, nalo abe lu, abe Atua kanano.”

Tormoruo Simion mial Yesu ea Atua Kunuano Lu

²⁵ Mia be toro tai joa Atua Kunuano Lu ka bogo na, siano be Simion. Naio be tena vio Yerusalemo ga tai, naio be namemedu tai, a naio be toro tai namã biekouo ea bajago na volkouano. Naio jororea jidom m̃lea ka rial Atua kanano Natinieiano, nina Naverikariano, rimei ea kulo Israel nalo ea bogokouo nei ajaiao.

Mia Simion nei naio be toro tai namã Niununo Lu joia m̃a naio namariga, ²⁶ mia Niununo Lu berial ka naio ruei ka mia naio rivakovio re vo rivano-o mia mirano rialio Atua kiano Naverikariano. ²⁷ Ana Niununo Lu buru naio binimei ea Atua Kunuano Lu, monloglog bogo na amidu kiritete sesa Yesu binimei, ka ala bajago na tuboiano nene.

²⁸ Ana Simion midu kiritete nene, ana naio miaia Atua a ber siva banio, berinavo

²⁹ “Tubo toru o, vonganei nemial vite na jau koberkar ka kiniou, naio miyotuba ruei. Mila tumaro binimei ea tinieku,

ana vonganei jau komijikia kajamo ka kiniou kanamo naimauano, nataluvo den yetemeriba nei neviedu.

³⁰ Ea miraku ga namial kanamo Ioruriano, ³¹ napano komiila binimei ea tomu kinkin nalo na yetemeriba nei miralo,

³² javukia yulu tai napano jiloglogso ka kulo dolu nalo, a ka mia aiaia kumemi kanamo kulo Ju nalo, bior kenememi mermerano nei, Yesu.”

³³ Ana Yoseve naio Mere, abe juo amiilo toru laka ka Simion kanano iliano nalo namã berii Yesu, ³⁴ ana Simion mil bereio, milivu kalo, naruei naio mil ban Yesu kenieno, berinavo

“Atua mila kiritete nei binimei ban kito na vio Israel ka rila kito ve telabo rojoru,

a kanio rila kito ve telabo rotumolu bereio.

Atua mila naio binimei jibe ka kijokijo tai, mia tomu ve telabo ail riovva ka naio,

³⁵ ana tibena mia naio rila kialo jidomiano nalo napano m̃a ajuluku nei amalmaluvo ea vio medave.

Mia tivelinio ka jau, mia jogvaiano tulu tiniemo tavukia iobogu na mira, mia kanamo iviso rivurupeio kar tenalo na napano mia ayotuba ka kenerimo nei.”

Tiramoruo Ana mial Yesu ea Atua Kunuano Lu

³⁶⁻³⁷ Mia tiramoruo tai bunu jo ka bogo nene, siano Ana, napano naio be naverialiano tai. A Ana nene,

karamãno siano Vanuele, napano naio miyotuba ea yati na tormoruo Aisere re nua. Naio joro nua ruei, ka bogo na naio be niatira kia ga vo, mia naio jo bija koano ka yuka aluo ga, ana koano m̃aro denio. Naruei naio be taanou jibe na ga, bano-o kiano yuka bokario duelimo va arolu ba veri [84].

Naio be tira tai napano monmon ka ga m̃a jojoa m̃a Atua Kunuano Lu, napano naio jom̃a bijurukar bogo na lotuano na kavijo bano-o bokario na kijeve, a dam̃ariga naio mondulu ka m̃a jo bolkouo.

³⁸ Ka bogo na naruei, naio binimeĩ vaatara kalo, ana naio bolkouo, ber siva toru ban Atua bior kiritete nei, a iorou ka nina, naio ba tavio ba jom̃a berii Yesu ban tomu nalo nam̃a aju ajirag rorea ka Atua rimeĩ rilarur Yerusalemo, mia Ana ber bisivisii banlo ka kanalo Naverikariano naio binimeĩ ruei.

Yoseve nalo aban bereio Nasarete

³⁹ Telikiti napano Yoseve naio Mere amila nonovio vite nalo nei biniu javukia nam̃a Atua kanano tuboiano berenio, mo Yesu abatove bereio ea kanalo komeli na Nasarete, nina ea tanobuku na vio Kalele. ⁴⁰ Mia kiritete nene miluo binimeĩ toru, a kiano jidomiano binimeĩ be masou laka, a amial ka napano Atua miija naio ka naio rila vite nonovio rivu ea kiano meuliano.

Yesu be m̃eaku kia ga, naio berloglog tomu nalo ea Yimo Lu

⁴¹ Ana ka yuka nonovio, kulo Ju nalo ajum̃a amila kanalo jokoluolu tai, napano naio be Sidomkariano na Ioruriano. A dam̃ariga, nalo nam̃a aju janea vio dolu, tiniel jii toru ka avavin Yerusalemo ka ala jokoluolu nene, a Yesu kanano tormoruo juo bunu amila jibe na. ⁴² Ana ka yuka tai, bogo napano Yesu kanano yuka bokar duelimo ba juo [12] kia ga vo, aban bereio aburu Yesu bijalo.

⁴³ Mia amila vite nalo na jokoluolu nei bano-o biniu, ana tomu nalo amieliel bere abanvan ea kanalo vio nalo. Mia Yesu naio maka rivano, naio jobo kia Yerusalemo, mia kanano tormoruo juo, maka ajikiaio. ⁴⁴ Naljuo ajidomii aberiam̃a naio jo kovio bija lo bure burum̃ara taara na m̃aratavo bija kanalo bilbilu nalo, mia nalo amiel ba bokar legiano momou takurano. Mia bogiano ana ajirag Yesu bano-o, ⁴⁵ mia maka aialio to vijalo, naruei nalo amial ka monoka atakii bere jaalo ava Yerusalemo alavon ka alealio. ⁴⁶ Amiel bogoti takurano momou, abinimeĩ aboru bereio Yerusalemo, nalo ajiragio bano-o, ana ea bogoti dolu nene, be bogoti tolu na kialo ieliano, ana amileal vonga naio, amial naio jom̃a jotano ea Atua Kunuano Lu. Naio jotano

bija naverloglogiano nalo na vio na, naio joŋa mije tiliniene ka kialo iliano nalo, a joŋa bivika vikadeniano denlo. ⁴⁷ A nalo naŋa aju vaataro ka Yesu ea bogo na, amiilo toru ka kiano buruŋara masouano a jikiaiano na, a kanio verdoŋeiano nalo naŋa naio jian ban nalo naŋa ajumŋa abika vite denio. ⁴⁸ Ana telikiti napano kanano tormoruo juo nalo amial ka napano naio joŋa mila jibe na, amiilo toru kanio, ana kenieno mil banio, berinavo “!Ai, keneriku! ? Bior vaio ana kojidom ka kala lelan kumemi ve toru tibe na? Kealio, kumemi juo numisiragso-o mia, maka lele nuvillealso, komila kumemi numijog kirivova-o mia.”

⁴⁹ Ana ka bogo na Yesu midu verdoŋeiano tai banlo, napano ber jibe nei, berinavo “? Bior vaio ana kubano kumituŋa kumisirag kiniou janea vio dolu nalo jibe na? Juŋabe, kamjuo maka kumisidomii ka kiniou monoka notomŋa nala Teta kanano imauano joomo ea kunuano?” ⁵⁰ Mia verdoŋeiano na ber kalo, maka ajikia ajog lubar nioti nene. ⁵¹ Naruei Yesu jumolu den vio nei, ana naio ban bijalo, abatove bereio ea kanalo vio Nasarete.

Ana Yesu jobo bijalo ea vio na, naio jo mijogkarlo bo daŋariga. A kenieno Mere naio joŋa jidomikar vite nalo nei joomo ea kanano

iviso bogo nonovio. ⁵² Mia yuka nalo aju abinimei abarlaka bano, mia Yesu jo miluo binimei toru nonovio, a kiano masouano bija kiano moroano jo binimei toru lie vo, mia Atua jo milivu kanio toru laka, mila ana tomu nalo amial naio bo laka, ajaaro toru kanio.

3

Jone Baruei naio joa vio yauo, joŋa mioliolu ka naviligiano

¹⁻² Yuka tealoo bar laka ruei vo bisi, ana Jone Baruei, Sakaraia kenerinio, naio miyotuba ea vio yauo. Nina ea bogo na buruŋara parinio tubo Taiperias Sisa na vio Romo naio be tubo bokar kiano yuka duelimo ba jimo ruei, ana ka telikiti na naio bitiri bulag kanano tomu na tortoru nalo tai ruei, jibe Pontas Pailat, naio mije tuboiano ea vio Yutea, a Erot, naio mije tuboiano ea vio Kalele, a kuruano Vilip, naio mije tuboiano ea tano na vio Ituraia bija Trakonaetis, a Lesanias, naio mije tuboiano ea tanobuku na vio Abilini. Ana ka bogo na bunu, parinio kulo lu juo napano ŋa aju Yerusalem, be Anas naljuo Kaivas.

Mia Jone joa vio yauo, ana Atua jian iliano ban naio, ³ naio ba jeliviv ea tanobuku nalo na Yortano, naio joŋa mioliolu berinavo tomu nalo monoka aviliglo, a avaruei, tibe na ana mia

Atua riviekokoa kanalo kari-
ano nalo. ⁴ Naio mila javukia
ga na nanua mña Naveri-
aliano Aisea naio ber nua
ruei ea kiano niosi, napano
mña berenio

*“Niono tai naio jo bio ea vio
yauo, berinavo: Kuvila
vatitig Atua kanano
mñarabo nalo, ka naio
mijikia rimei ea kene-
miu meuliano nalo.*

⁵ *Mia monoka kuvitiviniko
bořařili nalo,*

*a monoka kuvikili bulag
yasuku nalo avatove
rivu,*

*a vio nalo na jorokoro
monoka nalo amemedu
rivu,*

*a vio nalo namña jukujukuduo
monoka nalo aierivin
rivu;*

⁶ *tibe na, ana mia taara
nonovio na tomu nalo
aial kialo Ioruriano
napano Atua riila
riel ea mñarabo nei
riyotuba kalo.” Ais
40:3-5*

*Tomu nalo abinimei ka
Jone*

⁷ *Imñauano na be Jone
kanano, naio jo ka mña ri-
oliolu tibe na naruei, mia
telikiti na tiniobi toru aba
tavio ea vio yauo ka naio
rivaruei ealo, naio mil jikili
banlo, naio ber jibe nei beri-
navo “Kamiu na kumitibe
ka maro nalo ga napano
amerou ka sebi tai ana
aburo, mia kuberianña kumi-
jikia kuvuro ka buruta ke-
nieno sebi na mia Atua ri-
onio rimei? Makanio, bior
maka kuvilig kamiu vatitig*

*vo. ⁸ Mia ver kube riano ka
napano kumerou ka vironi-
ano nei, kenemiu meuliano
monoka avar mñarati nabo
napano rivare ka kenemiu
viligiano nene. Mia kuvi-
tikar, kuve re mñarou bereio,
tibe ka namña kumila ruei,
namña kumitumña kuberinavo
‘Ee, kito roju bo ruei, bior
kito naruei robe Epraamo
kiano yati nalo memedu kia
nei.’ Mia nina maka tite-
nia, bior ver Atua sidom,
naio mijikia rivar puruveru
nalo na ga rimñaukalo ave
Epraamo kanano yati ve
telabo, ka mia adu jelemiu.
⁹ Kiniou neber ka kamiu, ka
mñaryekesi jo ruei ka te bulag
buruiesi nalo na maka avar
mñarati nabo, ka avukulo
avan ea burutinia sebi.”*

¹⁰ *Telikiti na tiniobi
neibano amijogio amerou
mia amerou, ana abika
aberinavo “Mo aver tibe
na, ana mia kumemi nuvila
tumñabe naruei?”*

¹¹ *Ana Jone berdořelo,
berinavo “Toro na mñano ku-
lukoti juo, mia monoka naio
rijamo ka tinene van toro na
maka ve mñano tai; a toro na
be sano sinaniano miroano,
mia naio monoka riviovio ka
tealo van toro na maka ve
sano taio.”*

¹² *A tomu na takis, namña
abe tomu na jukujukuano
memedu, telabo bunu abin-
imei ka Jone rivaruei ealo,
mia nalo bunu abitilubar
kialo vovaiano nalo, naruei
abika bunu aberinavo “?
Naverloglogiano, tumñabe ka
kumemi, mia monoka nuvila
tumñabe?”*

¹³ Ana naio ber kalo, berinavo “Mia kuvar den tomu nalo rive verare ka ga nana mia monoka avuluio, mia to loa re, tibe ka naña kumilala mugaruei.”

¹⁴ Mia tomu na mira tealo bunu abika jibe na ka Jone, aberinavo “? Mia kumemi, nuvila tumabe?”

Naruei naio ber kalo, berinavo “Kamui kubar kenemiu tenalo na mira ana tomu nalo aju amerou laka ka kamui, mila na bogo napano kamui kumisidom vite tai, kuber ga, ana nalo monoka ajamo bior napano amerou. Mia bajago na, mia monoka kuvila re bereio. A kamui kumitumña tiniemiu mimi damariga ka kuber tom na tortoru nalo ajumña abulu kamui telisu ga, ñeli bare ga kovio vo, mia kamui monoka kuvisaaro ga kanio.”

Jone berenio mia Naverikariano rimei

¹⁵ Mia ea bogo na, kulo Ju ajidomii aber kialo Naverikariano vaataro ka maluvo, ana nalo amijog Jone kiano ilinovoiano nalo nei, ana nalo ajaaro kanio, naruei vikadeniano joa kialo jidomiano, ajumña abivika, aberinavo “?Aa, ñeli toro na naruei, ñeli naio be kiado Naverikariano koviobo?”

¹⁶ Mia Jone naio joña ber lubarbario banlo, naio berinavo “Makanio, kiniou nebinimej jukamu, nojoña nabaruei ea kamui ka uei ga, mia be toro dolu tai napano naio jo binimej iorou

ka kiniou. Toro nene, naio loa lie vo ka kiniou, mia kiniou maka navare ka ñeialar kanano kulubue na jaano, ñeli nala kanano imauano dolu tai. Mia naio naruei, mia rivaruei ea kamui ka Niununo Lu, rivija kanano sebi, ka risebi kon niamiamo nono den kenemiu meuliano nalo. ¹⁷ Naio jibe ka napano naio midukar burupña marteja tai, ka mia rikurkar ka uiti nalo, riñilig kon mñarati nalo. Tibe na, ka mia naio rivar mñarati uiti nabo nene ava vonuo, mia naio rivuku vinikiti nene rivan ea sebi tai napano mia maka rijikia rimñaro bogo tai.”

¹⁸ Nina naruei, Jone Baruei naio joña mioliolu ka ioluanou vou nabo ban tomu nalo jibe na naruei, a naio joña ber iliano dolu nabo telabo ka tunukakarlo, a ka rilabonlo. ¹⁹ Mia be toro tai naio tiniene maka saaro ka Jone nene leleio, nina be Parinio tubo Erot, bior ka napano Jone naio joña mil banio ka napano naio burular tira nei Erotias, napano kuruano koano, mia mil banio bunu ka vite dolu telabo napano joña milao. ²⁰ Mia loa ka kanano vovaiano dolu nalo, Erot tinien jer Jone banbano-o deio, ana jumolu buku naio ban ea yimo na lakoiano.

Jone baruei ea Yesu

Mataiu 3:13-17; Mak 1:9-11

²¹ Mia bogo na Jone maka rivan ea yimo na lakoiano vo, naio joña baruei ea

tomu nalo banbano-o, mia bogo tai ana Yesu bunu binime i ea vio nene, ana na Jone baruei ea naio bunu. Naruei telikiti na Yesu jaluvo den uei, naio jomña bolkouo, ana vio mave betavo, ²² naruei Atua kanano Niu-nuno midu niabene, naio batove binime i jibe ka vaama tai, binime i bujo jua naio. Ana na Atua mil jel mave batove berkanio, berinavo “Jau kobe keneriku na, namña nejidomso toru laka. Tinieku joaso, tinieku jaaro toru kaso.”

*Yesu korobinio nalo
Mataiu 1:1-17*

²³ Mia iorou ka na Jone baruei ea Yesu, ana na naio jikar kiano imãauano naruei, ana ka bogo na, naio kiano yuka bokar duelimo va rolu. Mia yati na Yesu miyotuba eaio, nina tivelinio ka sumño, jikar ea Yoseve, napano amial jibe ka naio be Yesu karamño, naio jo ban jibe na:

Yoseve, naio be Eli kenerinio

²⁴ Eli naio be Matata kenerinio

Matata naio be Livai kenerinio

Livai naio be Melki kenerinio

Melki naio be Janae kenerinio

Janae naio be Yoseve kenerinio

²⁵ Yoseve naio be Matateas kenerinio

Matateas, naio be Amos kenerinio

Amos, naio be Neam kenerinio

Neam, naio be Esli kenerinio

Esli, naio be Nagae kenerinio

²⁶ Nagae, naio be Mat kenerinio

Mat, naio be Matateas kenerinio

Matateas, naio be Semein kenerinio

Semein, naio be Yosek kenerinio

Yosek, naio be Jota kenerinio

²⁷ Jota, naio be Joanan kenerinio

Joanan, naio be Resa kenerinio

Resa, naio be Serupapele kenerinio

Serupapele, naio be Sieltiel kenerinio

Sieltiel, naio be Neri kenerinio

²⁸ Neri, naio be Melki kenerinio

Melki, naio be Adi kenerinio

Adi, naio be Kosam kenerinio

Kosam, naio be Elmñatam kenerinio

Elmñatam, naio be Ere kenerinio

²⁹ Ere, naio be Yosua kenerinio

Yosua, naio be Eliesa kenerinio

Eliesa, naio be Jorim kenerinio

Jorim, naio be Matat kenerinio

Matat, naio be Livai kenerinio

³⁰ Livai, naio be Simion kenerinio

Simion, naio be Yuta kenerinio

Yuta, naio be Yoseve kenerinio
 Yoseve, naio be Jonam kenerinio
 Jonam, naio be Eliakim kenerinio
³¹ Eliakim, naio be Melea kenerinio
 Melea, naio be Mena kenerinio
 Mena, naio be Matata kenerinio
 Matata, naio be Netan kenerinio
 Netan, naio be Teviti kenerinio
³² Teviti, naio be Jese kenerinio
 Jese, naio be Oveti kenerinio
 Oveti, naio be Boasa kenerinio
 Boasa, naio be Sala kenerinio
 Sala, naio be Nesono kenerinio
³³ Nesono, naio be Aminatapo kenerinio
 Aminatapo, naio be Atmin kenerinio
 Atmin, naio be Ani kenerinio
 Ani, naio be Esrono kenerinio
 Esrono, naio be Peres kenerinio
 Peres, naio be Yuta kenerinio
³⁴ Yuta, naio be Yakovo kenerinio
 Yakovo, naio be Aisak kenerinio
 Aisak, naio be Epraamo kenerinio
 Epraamo, naio be Tera kenerinio
 Tera, naio be Nao kenerinio
³⁵ Nao, naio be Seruk kenerinio

Seruk, naio be Reu kenerinio
 Reu, naio be Pelek kenerinio
 Pelek, naio be Epa kenerinio
 Epa, naio be Sela kenerinio
³⁶ Sela, naio be Kaenan kenerinio
 Kaenan, naio be Avaksati, kenerinio
 Avaksati, naio be Sem kenerinio
 Sem, naio be Noa kenerinio
 Noa, naio be Lamek kenerinio
³⁷ Lamek, naio be Metusela kenerinio
 Metusela, naio be Inok kenerinio
 Inok, naio be Jarete kenerinio
 Jarete, naio be Malalel kenerinio
 Malalel, naio be Kaenan kenerinio
³⁸ Kaenan, naio be Enos kenerinio
 Enos, naio be Sete kenerinio
 Sete, naio be Atam kenerinio
 ana Atam, naio be Atua kenerinio.

4

*Sim̃aro nalo kanalo
 parinon tubo, napano Setano,
 milavon Yesu*

Mataiu 4:1-11; Mak 1:12-13

¹ Naruei telikiti na Yesu naio binimei bereio ea tanobuku na marauei na Yortano ea vio na Jone baruei ea naio, naio binimei bujo vatitig ka Niununo Lu. Ana na Niununo buru Yesu ban ea vio yauo bereio, ² mo

naio joa vio na bano-o bokar bogoti duelimo va veri [40], napano mia siñaro nalo kanalo parinio tubo nei jomña milalilio. A ka bogoti nalo na, naio maka mña to sinano, banbano-o na mijog ka jijer naio.

³ Ana Setano nene binimeĩ, berinavo “Ver jau kobe Atua kenerinio riano, jau kover von ka puruveru na ka rimeĩ rive joko, ka kosenio.” ⁴ Ana Yesu berdoŕe, berinavo “Maka leleio, bior Iliano Lu naio ber rueĩ, berinavo
‘Maka toro rijikia rila toro rimeul ea sinaniano ga.’”

⁵ Ana na Setano jidom rilavon Yesu bereio, naruei naio buru kanano jidomiano bavin ea burumñara burusuku tai. Ana vaarakurano ga naio jiloglog buruvenuo nalo na yetemeriba nei kanio, ⁶ ana naio berkanio, berinavo “Navitikariano na vio nalo na, bija kialo mermerano nonovio nalo na, ajua jumaku ruei. Kiniou nabar siano kario, ka namijikia najamo ka van kei napano tinieku ka naio. ⁷ Mo, ver jau kojorua jaaku ga, kobolkouo ka kiniou ga, mia kiniou najamo ka vite nalo na riviniu tua jumamo.” ⁸ Mia Yesu berdoŕe, naio berenio berinavo “Iliano Lu naio berenio ber

‘Jau kobolkouo ka Atua ga, jau monoka kala kanano imñauano naio ve takurano ga, bior naio ga be kanamo Tubo.’”

⁹ Naruei Setano naio jidom rila-von Yesu bereio, naio buru kiano jidomiano ba Yerusalemo, midu naio jo levlevi ea vio tai, mave ea Atua kunuano, ana berkanio, berinavo “Ver jau kobe Atua Kenerinio, koviako yetano. Ver jau kalaio, mia rivu ga na, ¹⁰ bior Iliano Lu berii Atua, berinavo

‘Naio mia riila kiano nailiano nalo, ka mia amei atu avitiikarso, atukuku kaso.’

¹¹ *Mia aisopkarso mave ga ka jumalo ka mia kavan re jaamo ea puruveru.’” Iouano 91:11,12*

¹² Mia Yesu berdoŕe naio bereio, berinavo “Maka leleio, bior Iliano Lu ber bunu ber

‘Jau kolavon re Tubo kiamo Atua ka naio rila kanamo vite tai!’”

¹³ Mia telikiti na Setano mila juboluboiano nalo nei bisi, ana buro denio, ba jo rorea ka rileal bogo dolu tai napano naio jidom ber mia mijikia tovulu Yesu eaio.

Yesu jikar kiano imñauano yako Kalele

Mataiu 4:1-11; Mak 1:12-13

¹⁴ Karina, Yesu miel ea moroano na Niununo Lu, binimeĩ boru Kalele, mia tomu nalo ajumña aberii naio banbano-o ba bokar vio nonovio ea tanobuku nei. ¹⁵ Ana naio jomña ban ea kanalo yimo nalo na volkouano, naio jomña berlogloglo, naruei nalo

ajaaro toru kanio, ajumã amidular siano bavin.

Nalo na vio Nasarete amijilar Yesu

16-17 Bogo tai Yesu binimeí boru ea kiano vio Nasarete, vio napano naio miluo binimeí toru eaio, ana ka Legiano Lu, javukia namã naio jomã mila bogo nonovio, naio ban bijalo ea kanalo yimo na volkouano. Ana aber naio rivuluku bulag Atua kanano Iliano Lu vanlo, ana na amidu niosi namã Aisea naio bivitauia binimeí banio. Ana naio jumolu betavo ea niosi nene, mileal vio na naio jidom rivuluku bulag vanlo, ana naio bulukuio, napano naio ber jibe nei, berinavo

18 *“Niununo na Atua kanano naio joa kiniou ruei, bior Atua naio jiloglog kiniou ka kiniou naruei noioliolu ka Ioluano vou nabo rivan taliãasa nalo.*

Naio miila kiniou nebinimeí ka neverial van nalo na ajua lakoiano, ka vonganei, amijikia avanvan tavio bereio ga tibe na,

a ka kiniou neverial ka merebono nalo, ka vonganei, miralo mijikia rimeí rivu bereio.

A naio miila kiniou, ka tomu nalo namã ajutano, napano kulo dolu nalo ajumã amila kikilo julaka, mia kiniou novuru bulaglo, amei atua vio tai nabo bereio.

19 *Tenene na, kiniou nemijikia nala rimeravo, ka*

vonganei, Atua mila kanano bogo vou nabo tai miyotuba ka tomu nalo nene naruei.” Ais 61:1,2

20 Telikiti na Yesu buluku nina bisi, ana na mijukukarko niosi nene, jian ber ban tikon, ana naio ba jotano mave ea jeleigio vio namã amioliolu eaio, ka naio ril van tomu nalo. Naruei nalo abiniu napano aju joomo aju abiti kilkil ea Yesu ka ajog ka venia napano mia naio river kalo. 21 Mia bogo napano naio jikar kiano iliano, naio ber jibe nei, berinavo “Kiniou neber ka kamiú, ka Atua kiano Iliano Lu na kumijogio vonganei, iliano nalo nei kanano abinimeí be riano bo vonganei ga, ea miremiú.”

22 Mia telikiti na tomu nalo amijog Yesu kiano iliano nalo nei, amijog jibe ka naio mil bo mia bo, melokloko a mñadigdig, mia nalo abameneaió toru, ajumã aberverenio jibe nei, aberinavo “!Ana kema na, naio be Yoseve kenerinio ga na! ? Mia naio jomã bar tanea iliano novo nalo na ea vio be?” 23 Ana na Yesu berdoþelo, berinavo “Peli kumisidom kuver kanado iliano moruo tai ka kiniou, napano ber ‘Nakulekuleano, jau kala vatitigso beamu vo, karina jau komijikia kajai tomu dolu.’ Nina bior kamiú kumijog ruei ka bogo napano nojo yako Kapeneam, nojomã namieliel ka tomu telabo, tenene na kumitu kumisidomii kuber bior vaió

ana maka nemei nala tena van kamiu ea kanado vio nei bunu. ²⁴ Be riano never ka kamiu, ka ver naverialiano tai, mia tomu na kanano vio memedu, maka ajikia asaaro kanio, maka ajikia avatove kanio. ²⁵⁻²⁶ Nina be riano ga. Nejidom ka kamiu kuvisidomii von tormoruo Elaija re nua. Ka bogo na, yuo maka rivovo bano-o bokar yuka tolu togio, a burumñara vituiano tai jovuko rera vio Israel. ?Ana Atua miila Elaija ba miija kei ka bogo na? Kam kuvialio, naio maka riila naio rivan ka riija taanou re Israel tai naña aju amijog bova, mia naio miila ba miija taanou na bulukomeli na vio Serevati, nina ea tanobuku dolu na vio Saiton. ²⁷ A kuvisidomii von tormoruo Elisa kiano bogo bunu. ?Ka bogo na, tomu miroano na abar burumieni, mia Atua milarur kei? Naio maka rilarur nalo na Israel tai na bokar mieiano nei, mia naio milarur toro re Siria nei, Nomano. Be riano, kito tomu nalo naña roju rober kito robe Atua kiano tomu nalo memedu, mia nalo naña Atua miilalo abinime i ka ala iñauano van kito, mia kito romielikue kalo ga.”

²⁸ Ana na nalo napano aju joomo ea yimo na volkouano nei amijog iliano nei, kialo jidomiano bilig ba be dolu, vonganei nalo tiniei jer Yesu toru. ²⁹ Naruei nalo ajermi ka Yesu, ana aburio bano, aburu ba tavio ka kanalo komeli, ana aburu naio ba

abavin ea burumñara yabalili tai napano kanalo komeli joaio ka ajidom avuku Yesu rivatove ea vio na naruei. ³⁰ Mia Yesu jaluvo den jumñalo bea ga, ana naio miel jel burelo ga bano, naio juvanlo ajubo.

Yesu ban ea vio Kape-neam, naio miilalar niadu tai Mak 1:21-28

³¹ Ana na Yesu miel batove bokar komeli dolu tai na vio Kalele, nina be Kape-neam, mia ka Legiano Lu berlogloglo ea kanalo yimo na volkouano. ³² Mia nalo naña amiije tilinielo amiilo toru laka, bior amijog Yesu kanano iliano temi bo, a Atua kanano moroano joaio. ³³ Ana ka bogo na, toro tai jo joomo naliko, napano ni-ununo na siñaro va tai joa mila bulag naio, mia toro nene miaga mñerere kirivova tai vo, naio mil ban Yesu, berinavo ³⁴ “? Ei, Yesu re Nasarete, kiamo vaio joa kumemi? !Peli jau kobin-ime i ka kalakiki kumemi, a! Bior nemijikiaso ruei, ka kobe Toru Lu nabo tai na Atua kanano.” ³⁵ Ana Yesu mil jikili ban niadu va nene, berbureio, berinavo “! Ee, abe keil re bunu! Jau kataluvo den toro na vonganei ga.” Ana niununo va nei buku toro nei mijoru iviso burelo, ana na naio jaluvo denio, buro bano, mia toro nei mijog bo bereio jo.

³⁶ Naruei tomu na vio nei amiilo toru laka, mia nalo ajumña aberverii Yesu, aber

“Ei, iliano na jumabe tenia na? Nina be buruvayukouo tenia, kiano moroano buru tomoruoa loa laka. Naio mil ga ban niununo va nalo, mia aburovuro jibe na ga.” ³⁷ Ana bior tena mia nalo ajaaro, ajumã aberial vatitig Yesu siano ba janea vio bokar vio nonovio na tanobuku nei.

Yesu milarur Saimon Pitere kenieno simemi, naliko kulo dolu telabo bunu

Mataiu 8:14-17; Mak 1:29-34

³⁸ Ana Yesu jumolu den yimo na volkouano nei, mia naio ban ea Saimon kunuano, nina ea komeli na Kapeneam kia ga vo. Naruei ea vonuo nei, Saimon kenieno simemi naio jo mon ea m̃ano jogu, mie yulu, niabene bituvitunu, mia aberial ka Yesu, abika den naio aber jumabe ka tiramoruoa nei. ³⁹ Naruei Yesu binimej jikili ju tivelinio ka tira neibano, ana mo naio mil berbure mieiano nei, ana niabene binimej menini nonovio bereio, naio mijog bo bereio, ana jumolu, ba milaii salo sinaniano. ⁴⁰ Mia bogo namã m̃erenio batove, jibe ka na Legiano Lu na bisi, ana nalo namã nalo tealo amie ajumã, abarvarlo abinimej ban Yesu, ana naio mije jumãno monealo, mieliel kalo.

⁴¹ A telabo kalo, simãro nalo abava tavio denlo, napano ajumã amiaga, aberinavo “! Ei, jau naruei jau

kobe Atua kenerinjo a!” Mia Yesu berbure simãro nalo nei ka mia aver re bunu titai leleio, bior amijikia ruei ka naio be Naverikariano riano.

Yesu mioliolu janea tanobuku na Yutea

Mak 1:35-39

⁴² Mia kavijova kia ga vo, ana Yesu jumolu ana naio takurano batavio den yimo, ban ea vio tai napano be tumãro bo. Kar iorou, ana tomu nalo abinimej kanio, ajirag naio bano-o mia amileal naio joa vio nei naruei, ana ajidom naio to naliko, amila vio ka averbure naio ka tuvanlo re, ⁴³ mia naio ber kalo, berinavo “Makanio, monoka kinioi nava noioliolu ka Ioluanou vou nabo na nave-natuboiano na Atua kanano nei van komeli dolu nalo na aju keano vo, bior amila kinioi nebinimej ka vite nei naruei.” ⁴⁴ Ana naio jaluvo denlo, ba mioliolu janea yimo na volkouano nalo ea komeli nonovio na tanobuku nei Yutea.

5

Nalo napano Yesu biolo be moti, aba ajakisorio

Mataiu 4:18-22; Mak 1:16-20

¹ Bogo tai, ana Yesu joa yaba ueiyabo na toru nei, namã tomu tealo ajumã abio ka Ueiyabo na Kenasarete, a tealo abio ka Ueiyabo na Kalele. Ana ka bogo na, tomu nalo miroano laka ajumolu aju jelviviko Yesu, jibe ka vio telisu ga, bior ajidom

ajog naio rioliolu ka Atua kiano iliano rivanlo. ² Mia Yesu mial ka uako sesa juoaju ga vaataro kalo yako, napano aburulo abavauro ajua baramudou ea bayono, a naio mial ka napano tomu nene nalo ajudobi ea tei, ajumña ajekon kanalo suņede. ³ Mia Yesu miel bano-o biako ea uako sesa nei tinene, napano be Saimon kanano, ana naio berkanio ber naio riyukulario rivajou lie kija ga. Naruei Yesu jotano ea uako sesa nei, ana naio jomña berloglog nalo napano mñaaju bijilo uro.

⁴ Mia bogo na naio milbanlo-o avona bisi, ana naio ber ka Saimon, berinavo “Kito, kiniou nejidom ravajou lie kija koyou von ka rovuku suņede beamu vo.”

⁵ Ana Saimon berdoņe, berinavo “E abe toro na toru, kumemi numisidel ka tenaruei o-o viomijeni nei, maka nuvokar niado tai leleio. Mia bior jau naruei kober ka kiniou jibe na, bo, kiniou najaaro ka rava lie kija bere vo.”

⁶ Ana nalo aba amila jakiio napano Yesu berenio, mia amiilo ka burumñara taara na niado napano bujo ea kialo suņede, mila kanalo suņede jikar ka buruboņeio, ⁷ naruei abio nalo dolu nalo na ajua uako sesa dolu, ajuvanjumñalo kalo ka amei aijalo. Ana nalo nei abinimei, ana aburu bitiran suņede ka niado nalo nei binimei

joomo ea buluku uako, bano-o uako juo nei abujovujo vatitigio, vaataro ka mñaamadudu.

⁸ Mia Saimon Pitere mial tenei, naio bitilubar ka Yesu ga mila tenei ea kiano burumñara moroano lu nei, ana minie tano ea Yesu jaano, berinavo “Tubo, kiniou nobe toro na bova ga tai. Bo laka ka kovuro den kiniou, jau kotu re vaataro ka kiniou.” ⁹ Mia maka naio ga ve takurano, mia nalo dolu napanoaju naliko ka aura nei, nalo abiniu abameneaiotoru laka ka burumñara tinioibi na niado na abokarlo, ¹⁰ bija bunu Sepeti kenerinio juo nei, Yemesi naio Jone, napano naljuo amiasol Saimon amimñau vio takurano, naljuo amiilo toru kanio.

Ana na Yesu mil ba Saimon, naio berinavo “Ei, jau komerou re ka vite na tibe na. Bior tika baneĩ, mia jau kovuru bere re niado, mia jau kotoñña kovuru tomu nalo amei atakisor kiniou.” ¹¹ Ana nalo abinimei bereio, aburu kialo uako nalo nene abauro bereio, mia maka bunu ala titai, mia ajuvan kialo saba nalo biniu ju bo ga jibe na, ana ajakisor Yesu abano.

Yesu mieliel ka toro na barburumieni tai

Mataiu 8:1-4; Mak 1:44-45

¹² Ana iorou kanio, ea bogo tai, ana Yesu joa komeli na vio na tai, ana toro tai mialio, binimei ka naio, napano toro nene, mieiano na burumieni mila

tanea niabene-e mia mila bulagio laka. Naruei naio binime i mijoru ea Yesu jaano, jegi banio, bika jikili denio berinavo “! Tubo! Kiniou nomoneaso jikili ka jau komijikia kalarur kiniou bereio, mia ver jau komijamo, kiniou nejidom nevikaso ka jau kalakon kiniou ga.”

¹³ Mia Yesu maka rienien ka tokol kiano menko nene, mia midu jumano joaio, naio berinavo “Nao, kiniou nejidom komeravo.” Mia vaarakurano ga niabene meravo, burumieni nei m̃apm̃apvo denio. ¹⁴ Ana na Yesu berkanio, berinavo “Komijog, jau kava koverii re tenei ka toro tai vo, mia vonganei ga jau kejaka kava kesel ea toro lu ka naio riia veveso mia mijikia riverial niabemo meravo ruei. Karina monoka kava kolotu van Atua a keisebi sida na kanamo lakoniano, tavukia nam̃a Mosis naio ber monoka alaio.”

¹⁵ Yesu naio ber toro nei naio riva riverii re vite nei, ana deio ga, maka vesiou ana ajum̃a aberverii Yesu banbano-o, ba bokar vio reraio biniu, mila ana tin-iobi na toru aju abinime i ka ajog kiano iliano nalo, a ajidom ka rilarrur kialo mieiano nalo. ¹⁶ Mia ka bogo nalo nene, Yesu jom̃a miel batavio ea tomu nalo bunu, naio jom̃a janea vio yauo, bolkouo ban Atua.

Yesu mijikia biekokoa kariano

Mataiu 9:1-8; Mak 2:1-12

¹⁷ Mia ka bogo tai, ana Yesu jom̃a berlogloglo, mia Varisis tai naliko naverloglogiano na tuboiano ajum̃a ajutano ea vio nei, napano nalo abe nalo na komeli dolu nalo na tanobuku na Kalele bija Yutea, a tealo ajuvan vio Yerusalemo abinime i. Ana ka bogo na, Atua kiano moroano jo binime i toru nonovio ea Yesu, mila ana naio mijikia milarur tomu na mieiano nalo. ¹⁸ Ana tom tai ap̃ier toro na mieiano tai binime i, napano niabene biniu m̃aro, mia nalo ap̃ier binime i, naio mon ea ga m̃ano jogu. Ajidom adu naio riva joomo rimon vaataro ka Yesu, ¹⁹ mia amial tin-iobi toru jo joomo ruei, mia vio nene telisu laka, maka ajikia adu kialo bilbilu rivan. Naruei amidu naio abavin ea yimo, ana amijag bulag vodobi mave memedu ka vio na Yesu jotano loglogio, ana ajuvarvan toro nei bija m̃ano jogu batove ea buluvio nene ba jotano iviso ka tomu nalo, kamu kean Yesu mirano memedu.

²⁰ Mia bogo na Yesu mial vite nei, mijikia ka nalo aju abiekouo kilkilii ea naio ka mia naio rijai toro na mieiano nei, ana naio berkanio berinavo “Koig, kiniou nebiekokoaso ka kiamo vovaiano nalo.”

²¹ Mia bogo napano Varisis nalo bija naverloglogiano na tuboiano nalo amijog iliano nei, aju ajidomii kirivova-o mia, naruei nalo ajum̃a abivika denlo, aberinavo “?

Kei tenia m̃a jo mil niege-niege tolu na Atua siano jibe na? Atua ga takurano naio mijikia riviekokoa kariano, maka toro dolu bereio, mia tete na naio jo m̃a mil jibe na ka jo jidom ber naio naruei, naio be Atua ruei kovio.”

²² Mia Yesu mijoglubar ea naio ka ajum̃a ajidomii kirivova jibe na ka naio, ana ber kalo, berinavo “?Kar venia ana tiniemiu nalo bujo ka jidomiano na kirivova jibe na? ²³ Ver never ka toro na mieiano nei, neverinavo ‘Kiniou nebiekokoaso ka kanamo kariano,’ p̃eli kiniou never kanio neverinavo ‘Jau kotumolu, keiel,’ ana ea iliano juo nei, tinene jikili ka averenio, a tinene naio monmaio ga. Nana berenio ‘Jau kotumolu, keiel’ naio jikili lie, bior mia kamiu kumijikia kuvitilubar ka kanaku iliano nei naio be riano p̃eli na makanio, ka napano toro nei naio jumolu p̃eli maka tumolu. ²⁴ Mia vonganei, kiniou noim̃au ka titai na mia kamiu kuveriam̃a Atua ga takurano mijikia rilao, kanio mia kamiu kuvitilubar ka kiniou Kulorinio Kenerinio nemijev moroano. A kiniou neber ka kamiu, neberinavo moroano nene naruei naio bare ka kiniou nemijikia neviekoko kariano bunu ea yetemeriba nei. Kamiu kuviagago vatitigio.”

Ana Yesu ber ka namieiano nei, naio berinavo “Kiniou neber kaso, ka jau kotumolu, kojukular

m̃amo jogu, jau keiel kava vonuo.”

²⁵ Mo soṽeli ga, ea mirano tomu nalo na aju amialio, toro nei naio jumolu jibe na, midu m̃ano jogu miel batavio, ana ba vonuo napano naio miaia Atua ga naio jo bano.

²⁶ Mia bogo na tiniobi nei amial vite nei, abamenea naio toru riano, kuluniabelo p̃ili burevure biorio, a nalo ajum̃a amiaia Atua, ajum̃a aberinavo “!Uerei tom nei, riano ga, banei romial titai napano dolu laka!”

Yesu bio Mataiu bunu, napano abio ka Livae, binimei jakisorio

Mataiu 9:9-13; Mak 2:13-17

²⁷ Iorou kanio, ana Yesu miel kiki kija ga bano, naruei naio m̃al toro tai jo m̃a jotano ea kiano vio na totanian na imauiano, joomo ea vio na m̃a barbijii veru na takis eaio. Toro nene siano tai Livai. Ana Yesu bio naio, berinavo “Jau komei katakisor kiniou.” ²⁸ Mia soṽeli ga Livai jumolu, juvan kiano im̃auano, juvan kiano saba nonovio ju bo ga jibe na, naruei jakisor Yesu.

²⁹ Karina, Livai nene mi m̃auka Yesu sano burum̃ara sinaniano tai ea kunuano, mia ka bogo na, tomu telabo dolu nalo nam̃a abarbijii takis bija tomu dolu nalo na jibe na, nalo bunu abinimei ajutano vio takurano naliko Yesu a kiano naiagagoano nalo ea

sinaniano nene. ³⁰ Mia Varisis tealo, naliko kialo naverloglogiano na tuboiano tealo, amil niege naia-gagoano nalo, aberinavo “? Bior vaio ana kumitumã kumisinan burukuti kamliko tomu na bova a tom na pariparilo kiri merorol na?”

³¹ Mia Yesu naruei naio berdoþelo, berinavo “Tomu na niabele jikili bo, maka mĩa tiniel tii ka mĩa avan ea toro namĩa mimãuka mieiano, mia tomu namĩa amijogjog mieiano, nalo naruei ajidom naio toru.

³² Kiniou maka nemei ka novio nalo na ajumĩa aber amemedu ruei kamu ea Atua mirano ka atakisor kiniou, mia kiniou nebinimei bior tomu na bova jibe ka nalo na naruei, ka aviliglo rivior kialo vovaiano nalo.”

*Navikadeniano tai
tivelinio ka atuvan sinaniano
Mataiu 9:14-17; Mak 2:18-22*

³³ Naruei nalo abika vikadeniano tai den Yesu, nalo aberinavo “Jone Baruei kanano naiagagoano nalo ajumĩa abokar jikili bajago namĩa vatelabo, ajumĩa ajuvan sinaniano kamĩa abolkouo ban Atua, a Varisis nalo bunu ajumĩa amilala jibe na. ?Mia bior vaio ana kanamo naiagagoano nalo maka atumĩa alalaio?”

³⁴ Ana Yesu berdoþelo, berii naio bija kiano naia-gagoano nalo, jibe ka napano amijog bo laka ka bogo na naio jo naliko, ana mia ajog rivova iorou ka bogo na ver naio taluvo denlo. Naio berinavo “? Bogo na

toro na soriano naio jo kean ea jokoluolu naliko kiano bilbilu nalo, kuberiamĩa mia amijikia atuvan sinaniano na jokoluolu nei to, asenio re? Peli ga. ³⁵ Mia ve bogo tai rimei napano mia avurular toro na soriano nei denlo, mia ka bogo na naruei mia nalo amijikia atuvan sinaniano bior amijog bova toru kanio.”

Vite moruo a vite vou

³⁶ Bajago namĩa ajuvan sinaniano na, naio be bajago moruo tai na kulo Ju nalo kanalo lotuano, mia Yesu jidom rila rimeravo vanlo ka bajago moruo nalo na jibe na, maka ajikia atusol vite vou nalo namĩa naio jomĩa berloglog kalo. Ana naio beri jamerijiano tai kalo. Naio berinavo “Jau maka kejikia kavar niati kulumĩarauo tai na be terivou, kejedeþe lario niati nene tai, ana jau kotulukoko ka kulumĩarauo na be terimoruo ka toko vio na buruþe be bulukuti eaio. Ver tibe na, jau komijedelar kule ga niakulmĩarauo vou nene kurano ga, a niati nene, mia keial ve kirivova-o mia.

³⁷ A jau maka kejikia koison mĩarjumĩelmĩelu vou napano jomĩa jarabujo kia ga vo rivon ea kulukuti nani napano be terimoruo namĩa amison mĩarjumĩelmĩelu vatelabo ban ea ruei. Ver jau kala tibe na, mia mĩarjumĩelmĩelu vou nei riyukuio, mia rila kulukuti nei saburu, ana mia mĩarjumĩelmĩelu nene ri-iou kule ga na, mia bati

nene bunu rimej rivova.
³⁸ Mia m̃arjuṃelṃelu vou, monoka jau koison rivan ea kulukuti nani na be terivou bunu, na jikili bo, naruei komijikia kodu vatitigio m̃amo m̃arjuṃelṃelu to rivu eaio.
³⁹ A bunu, bogo naṃa tomu nalo ajum̃a amunu m̃arjuṃelṃelu na amim̃auka jiou kija ruei, mia asaaro re bunu ka amunu m̃arjuṃelṃelu vou napano amim̃auka vonganei ga, mia monoka averenio m̃arjuṃelṃelu moruo nei naio jesei kiano vo.”

6

Yesu be tubo ka Legiano Lu

Mataiu 12:1-8; Mak 2:23-28

¹ Naruei ka legiano tai bereio, napano naio be Legiano Lu, Yesu naliko kiano naiagagoano nalo ajum̃a amiel abano, mia kanalo m̃arabo naio ba jel bure tiniavio na kon. Amiel jibe na naruei, mia naiagagoano nalo jijerlo naruei ana nalo ajavo bulag m̃arati tealo abal kon avona bisi ajenio.
² Ajum̃a amila jibe na, mia Varisis nalo tai ajua vio na ka bogo nene, napanoaju amial Yesu nalo, naruei nalo aberinavo “! Ai, bior vaio kumitu kumila im̃auano na ea Legiano Lu jibe na? Jibe na, kamiukumitu kumilakorov kanado tuboiano ga na.”

³ Ana na Yesu berdoṃelo, naio berinavo “?Ii, ṃeli jibe na kovio, ana kamiu maka

kuvulukuku ea Iliano Lu bogo tai vo, ka vite nalo naṃa Parinio tubo Teviti re nua jom̃a milaio? !Kamiu kumijikia ruei tena! Naio naliko kiano tomu nalo jijerlo toru laka,
⁴ naruei naio ba joomo ea Atua kiano Yimo Lu, mia midu joko lu naṃa tuboiano berenio kulo lu ga nalo amijikia asenio, mia Teviti nalo ajenio.”

⁵ Ana Yesu ber kalo, naio berinavo “Kiniou Kulorinio Kenerinio, kiniou naruei nebe Tubo ka Legiano Lu, mia nemijikia neverenio venia na memedu ka mia alaio ea Legiano Lu, ṃeli na venia na maka rimemedu ka mia alaio re ea Legiano Lu.”

Yesu mieliel ka jumevuluku tai ea Legiano Lu

Mataiu 12:9-14; Mak 3:1-6

⁶ Ana ea Legiano Lu dolu bereio, Yesu ba ba joomo bereio ea yimo na volkouano, mia naio berlogloglo. Mia ka bogo na be toro tai bunu jo joomo napano jum̃ano tivelinio vameruo be jumevulukuku.
⁷ Naruei naverloglogiano na tuboiano nalo bija Varisis nalo, napano tiniel jer Yesu ruei,aju vaataro ka naio ka bogo nei. Nalo ajum̃a abitikuku vatitig bo ka naio ka alavon ka aleal bajago na bova tai eaio, jibe na naruei ajidom aial ka mia rieliel ka jumevulukuku ea kialo Legiano Lu nei ṃeli na mia rila re.

⁸ Mia Yesu mijikia batitig bo ruei venia napano jo joomo ea kialo jidomiano

nalo, naruei naio mil ban kema neibano, naio berinavo "Jau kotumolu, komei, kotu mave ea vio nei beamu vo," naruei toro neibano jumolu bano. ⁹ Ana na Yesu bika den nalo neibano aju nei, naio berinavo "?Kiado tuboiano ber kito romijikia rala venia ka Legiano Lu nalo? ? Naio berenio bo ka kito rala tena bo p̃eli na bo ka rala tena bova? ? Naio ber bo kanio kito ralarur kulorinio, p̃eli na bo kanio rouebin toro rim̃aro?" ¹⁰ Ana Yesu barp̃ilig, naio bitiilo abiniu jeliviv, avona bisi ana na naio ber ka toro neibano bereio, berinavo "Jau kovitirii jum̃amo vonio." Mia monloglog bogo neibano ga toro nei naio mila jibe na, mia jum̃ano binimei bo vatitigio bereio.

¹¹ Mia Varisis nalo tinielo kiri mimi, bano-o m̃a tinielo bitunu mia bitunu vatitigio laka, naruei nalo abava tavio aber vonvon ka mia ala tum̃abe ka Yesu.

Yesu bitiri bulagio kiano naiagagoano duelimo ba juo

Mataiu 10:1-4; Mak 3:13-19

¹² Ana iorou ka bogo dolu bereio, Yesu jaluvo denlo ban ea burusuku na toru tai ka tom̃a rivolkouo van Atua, naruei naio jo mila jibe na ea vio nene bano mia viomijeni konio garuei. ¹³ Ana kavijo nene naio binimei bere, bio kiano naiagagoano nalo abinimei vio takurano ea naio, mia ea nalo nei naio berial nalo duelimo ba juo,

napano bitiri bulaglo, berenio nalo nene naruei nalo abe atevi.

¹⁴ Mia duelimo ba juo neibano, sialo nalo ajibe nei:

Saimon napano Yesu midu sio dolu ban ber Pitere, a Andru, na naio kuruano, a Yemesi, a kuruano Jone, a Vilip,

a Bartolomio

¹⁵ a Mataiu,

a Tomas,

a Yemesi, napano Alveas kenerinio,

a Saimon, nanua m̃a mila poletik, jidom ka rijil bulag kulo Romo,

a Jutas, na Yemesi kenerinio,

¹⁶ a Jutas re Kariot, napano karina naio jiveluku ka Yesu.

Yesu jo m̃a mioliolu a mieliel ka namieiano nalo

Mataiu 5:1-12

¹⁷ Mia Yesu buru atevi nalo neibano abatove bereio, ana amileal vio vodobi tai, ana aba ajuaio. Ana ka bogo na, vio bujo ka Yesu kiano naiagagoano nalo miroano dolu nalo bunu, naliko burum̃ara tiniobi nalo na komeli dolu na vio Yutea, a kulo Yerusalemo bunu bija bunu tomu na vio Taia a tom na vio Saiton napano ajumormolu den kialo vio rove yako ea tei na toru abinimei. ¹⁸ Nalo nei abinimei ka ajidom ajog Yesu kiano iliano nalo, a bunu ajidom ka naio rieliel ka kialo namieiano nalo. Naruei Yesu milaiilo jibe na bano-o, ba bokar bunu tomu

naña niadu jualo ña mila lelanlo vururu. ¹⁹ Tomu nalo miroano laka, mia abiniu ga ajidom atokol Yesu, ka avokar kija burumñara moroano naña amial jomña miyotuba ea naio, napano ña jo mila batitig tomu nalo miroano ruei.

Yesu kiano verloglogiano nalo

²⁰ Ana na Yesu jomña bitii kiano naiagagoano nalo nene, karina naio berlogloglo, naio berinavo:

“Kamiiu naña kubitilubar ka ña kube talimñasa, ilivuiiano toa kamiiu, bior kamiiu naruei, Atua naio be Parinio Tubo ka kamiiu, mia naio vitikar kamiiu.”

²¹ “Kamiiu naña jijer kamiiu vonganei, ilivuiiano toa kamiiu, mia kamiiu kuvijog ka kamiiu kubinimei kuvujo vatitig ka vite novo nalo.

Kamiiu naña kamiiu kumitumña kumiteg vonganei, ilivuiiano toa kamiiu, mia kamiiu kumijikia kuvisaaro.”

²² “Kamiiu naña tomu nalo maka asaaro ka kamiiu, a napano ña maka asidom kamiiu, a napano ña amil niegeniege lelan kamiiu, a napano ña abuku bulag siemiu nalo aberinavo kamiiu tomu na kirivova ga, nina bior kamiiu kube kiniou Kulerinio Kenerinio kanaku

tomu nalo, ilivuiiano toa kamiiu bunu.”

²³ “Ka bogo nalo na jibe na, kamiiu kuvisidom bijovijon re, mia kuvitatabujo vija saariano, bior ajumña amila lelan kamiiu ea ga bajago na nanua ña korobilo nalo amilaio ban naverialiano nalo re nua. Mia naio boga, mia kamiiu kuvi-jev burumñara ijaiano nene ea vio mave.”

²⁴ “Mia kamiiu tomu na sanibaiano mia rivova ve toru laka van kamiiu, bior kamiiu kubar kenemiu jogvuiano a kenemiu saariano na kenemiu meuliano nabo na ruei ea yetemeriba nei.”

²⁵ “Mia kamiiu naña mabomiu bujo batitig ruei jo, mia ve kirivova laka rivan kamiiu, bior mia siser tanea kamiiu ve toru laka.

A kamiiu napano kumitumña kubital banei kia ga vo, mia rivova laka rivan kamiiu, bior mia kamiiu kuvijog rivova ve toru laka mia kuviteg ve toru.”

²⁶ “Mia kamiiu monoka kuvitkar vatitig bogo napano tomu nalo aju amiaia siemiu. Verver tibe na, maka rivu ka kamiiu bunu kuvisidomii kuver kubo, bior napano naverialiano sibisibiano re nua,

kiado tormoruo nalo,
ajumã amiaia sialo,
mia Atua bitiilo abova
ga, naruei naio mije
vironiano banlo.”

*Yesu berii tinietiiano na
uolu nalo*

Mataiu 5:38-48, 7:1-5

²⁷ Ana na Yesu berenio,
berinavo “Kamui namã
kumijoglubarbar kanaku
iliano, kiniou neber ka
kamiu, neber: Monoka kito
rosidom kanado uolu nalo,
a monoka rovijuku rivu ka
nalo namã maka asidomii
kito, ²⁸ a monoka reilivu
ka nalo namã amiolua
kito, a monoka robolkouo
kalo namã ajumã amila
kiki kito. ²⁹ Verenio
toro tai rujuba kulbibimo
tivelinio, monoka jau kovilig
kulbibimo tivelinio vanio
ka rijikia rijuba bunu,
mia verenio toro tai sikili
ka rivar mamo koti, mia
kasaaro ga ka kajamo ka
mamã soto bunu van naio
rivario. ³⁰ Mia ver toro tai
rivika kiamo titai, monoka
jau kajamo ka rivanio, a
ver toro tai rudular kanamo
titai, mia jau kovika re
bunu ka rudu merano bere
rivanso. ³¹ Bajago na vabe
namã jau kojidom ka tomu
nalo ala vansom, bajago nene
naruei monoka jau kala
rivanlo.

³² “Mia ver kito rotumã
tiniedo riia ga nalo na ga
mã ajidom kito, nina maka
ve titenia, bior tomu na
kariano nalo tiniei jii tomu
nalo namã aju ajidomlo mu-
garuei. ³³ Peli na ver rotumã
rovijuku rivu ka ga nalo

namã abijuku bo mugaruei
ka kito, naio bunu maka rive
titenia, bior tomu na kariano
nalo, nalo bunu ajumã amila
jibe na mugaruei. ³⁴ Peli na
ver rotumã rajamo ka veru
van nalo na ga amijikia avar
meran bereio, naio bunu
maka ve titenia, bior tomu
na kariano nalo, nalo bunu
ajumã amilala jibe na mu-
garuei.

³⁵ “Mia kiniou neber ka
kamiu, neberinavo: Monoka
tiniemotii kanamo uolu, a
mia kovijuku rivu kanio, a
mia kajamo ka kanamo veru
tibe na ga, napano kosidom
bijovijon re ka na naio bario,
ka mia naio mijikia rivar
kean bogo tai, peli na mia
naio rivar kean lele re bunu.
Mia ver jau kotomã kalala
tibe na, kojomã kabar ba-
jago na karamãdo, Toro na
Loa laka, mia naio sian
kanamo ijaiano tai na mia
ve toru lie vo, bior naio
be toro tai napano kiano
iviso bo ga ka nalo na maka
atu aver siva vanio, peli
na nalo na ajumã ajido-
mial nalo ga bereio. ³⁶ Ver
tibe na, jau monoka tiniem
riia tomu nalo tavukia namã
karamãdo tinien miialo.”

*Yesu berii tibureiano na
toro dolu*

Mataiu 7:1-5

³⁷ Mia Yesu mil kia ga
banlo vo, naio berinavo “Mia
kamiu monoka kuvitu re mã
kuvitibure mēlea toro dolu
peli na kuvijev vironiano
vanio. Aver tibe na, mia
Atua tibure laka re kamiu

tibena, mia naio rije re vironiano van kamiu. Ver kuviekokoa toro dolu, mia Atua riviekokoa kamiu, ³⁸ mia ver kuvisian titai van toro dolu, mia Atua sian vite rimei van kamiu. Mia Atua sian vite van kamiu ve toru loa nana kamiu kumisianio, mia naio sian ve miroano lie vo, tavukia naŋa ajosonu ea bake, ajan kakario, amielio bano-o mia josonu batitigio bo, vite nene nalo bujo magmago ana na jibirbili. Riano, mia avar van kamiu rive verare ka ga nana ŋa kamiu kumituŋa kumisian ban tomu dolu nalo.”

Kamiu monoka kuvitii vatitig kenemiu meuliano

³⁹ Mia Yesu joŋa mil banlo kia ga vo, naio ber jamerijiano tai banlo, berinavo “?Juŋabe, ver toro tai ve merebono to, naio mijikia rivuru ŋarabo ka merebono dolu ka nalo ve juo ava aiel nunu? Peli ga, mia ave juo atibirbil avatove ea bulukuŋili tai na! ⁴⁰ Naiagagoano, naio maka to loa nana berloglog naio, mia ver naio rila kakar vatitig vite nonovio na naverloglogiano berloglogio kanio, mia naio mijikia rimei rive verare ka kiano naverloglogiano. ⁴¹ Maka rivu ka kotoŋa koververii niamiamo na telisu na joa kuruamo mirano, mia jau maka keial kar buruŋara burupati iesi na joko miramo jo. ⁴² ?Juŋabe jau koberiaŋa komijikia keil

van kuruamo na, kover ‘Koig, mia nelelar niamiamo na joa miramo na beamu vo’? Ver tibe na jau kojoŋa kobitoviton ia kia ga ka kiamo vovaiano, a jau kojoŋa kejibure toro dolu kiano vovaiano ga. Jau komijikia ruei ka jau kobova ga, ana jau kojidom kala van tomu nalo ka aver jau kobo ruei. Jau monoka kodular beamu buruŋara bulapati iesi na den miramo beamu vo, karina mo jau komijikia kovitii vatitig niamiamo na monea toro dolu mirano.”

Buruiesi bija ŋarati nene Mataiu 7:16-20, 12:33-35

⁴³ Ana Yesu ber bunu, berinavo “Buruiesi na bo maka rijikia rivar ŋarati na bova, a buruiesi na bova maka rijikia rivar ŋarati na bo. ⁴⁴ Nao, jibe na naruei, napano kito rojuŋa robitilubar buruiesi nalo ka ajumuŋabe ea salo ŋarati. Marati nalo na bo a naŋa jesei bo, kito maka rotuŋa ravarlo ea soro na be niononoti, makanio. ⁴⁵ Toro na tiniene bo, naio joŋa miobijii vite nalo na bo jua kiano iviso, naruei bogo nonovio be kiano jidomiano na bo napano jo ka mijikia jian bulagio. Ana toro na bova naio jo miobijii vite nalo na bova jua kiano iviso, naruei naio jian bulag jidomiano na bova ga. Vite venia napano bujo toru ea toro kiano iviso ŋeli na kiano

jidomiano, vite na naruei mia naio tomã rimalmaluvo bogo nonovio ea niono.”

Yimo juo

Mataiu 7:24-27

⁴⁶ Ana Yesu ber kalo, berinavo “? Bior vaio ana kumitumã kubio kiniou kuber ‘Tubo o, Tubo o,’ karina maka kuvitumã kumonmonea venia namã kiniou nojomã neber ka kamiu ka mã kuvilaio? ⁴⁷ Toro na ver binimeia ka kiniou, mijog kiaku iliano, naio monoka rimonmoneaio a naio monoka rilaiio. Toro namã rila tibe na, naio javukia tukunu tai napano berii, ber jibe nei: ⁴⁸ Toro tai jo miñauka kunuano, mia toro nene be masou laka, jomã mikil ãili nene nalo bululuo batove yetano laka ka rivokar vio na borotano jikili eaio, karina mebija marteia nene nalo ea bulukuãili nalo neibano. Mia bogo na bogu va, burumãara ueimia mieraro, mia maka rijikia rila yimo rikulkulu leleio, bior toro nene miñaukanio, miñauka jikili bo. ⁴⁹ Mia toro namã mijog kanaku iliano nalo mia maka tomã rimonmoneaio, naio jibe ka toro dolu tai. Toro nene naio bunu miñauka kunuano tai, mia naio be vovu, miñauka jumolu ju vorvoru mave ea ga borotano, mia marteia nene maka rivatove rivare leleio. Mia bogo na bogu va, burumãara ueimia binimeia, mila yimo nene mijoru, burukokorovio nonovio, bova laka.”

7

Toro na toru na mira tai na Romo naio monea Yesu jikili

Mataiu 8:5-13

¹ Naruei bogo na Yesu ber bulag nonovio kiano ver-loglogiano nalo nene ban tomu nalo bisi, ana naio ba jouro ea bulukomeli na vio Kapeneam. ² Mo ea vio na, be natukamuano na mira na kulo Romo naio jo, mia naio be kiano toro novo na imãuano tai mie toru laka, vaataro ga ka rimaro. ³ Ana bogo napano naio mijog ka napano tomu nalo ajumã aberii ka mia Yesu rimeia ea kialo vio naruei, ana bio navurimãaraboiano na kulo Ju nalo, miilalo aban ka Yesu, ka avikanio rimeia rieliel ka namieiano neibano.

⁴ Naruei nalo nei abinimeia ea Yesu, aberii toro namieiano nei banio, a abika jikili banio jibe nei, aberinavo “Natukamuano na, memedu ka jau komeia keijaio. ⁵ Be riano ka naio maka ve kito tai, naio be toro re Romo ga, mia naio be toro tai namã jidomii mñlea taara na kiado tomu nalo, a naio bunu miiia kumemi toru rueia ea vio nei, napano naio miñauka kenememi yimo na volkouano. Naruei numial bo laka ka ver kajaaro ka komeia keial kanano toro na mie toru neibano.”

⁶ Ana Yesu mijamo kanio, naruei ban bijalo. Aju amiel abano, ana bogo napano aju koalabo kija kia ga vo ka

natukamuano na mira nei kunuano, mia nalo amial ka tomu tealo ajumã amiel abinimei. Nalo nei natukamuano nene kiano bilbilu nalo tealo bereio, napano naio miilalo abinimei ea Yesu, ka aver kiano iliano tai kanio. Naruei abinimei aber ka Yesu, aberinavo "Toro Romo nei miila kumemi nubinimei easo bereio, naio ber jibe nei, ber naio jo mila lelanso toru laka. Naio berenio berinavo naio mial naio jibe ka napano naio maka ve toro na bare ka mia jau komei joomo ea kunuano. ⁷ A jidomiano nei bunu mila naio mial ka maka rivu bunu ka riyotuba kaso, bior naio maka ve Ju tibe kaso, mia naio ber ga, ver jau kover ga iliano tai, mia kanano toro neibano rijog rivu bereio ga na. ⁸ Naio mijikia ka monoka tibe na, bior naio mijikia ka kanamo iliano mije moroano. Naio berenio berinavo vite na naio jibe ka tomu na mira nalo napano ajutano yetano ka naio, napano monoka ajogkar kanano iliano nalo. Ver naio river ka tai riverinavo 'Jau kavano,' naio monoka rivano, p̃eli na riverinavo 'Jau komei,' naio monoka rime, p̃eli na riverinavo 'Jau kala tibe na,' mia naio monoka rilajo. A naio berinavo naio bunu monoka rimauka vaio napano kanano natukamuano na toru river kanio. Jibe na naruei, naio monea ka ver jau kover titai ga, mia monoka tibe na."

⁹ Telikiti na Yesu mijog iliano nei, naio miilo toru ka natukamuano nei kiano jidomiano, a bunu naio jaaro toru kanio, naruei mil ban tiniobi nalo napano m̃a aju naliko ka bogo nei, berenio berinavo "Kiniou neber ka kami, ka kiniou maka ne-leal leleio toro Ju tai napano naio tumolu tu sikili ea kin-iou tibe ka toro nei."

¹⁰ Mo iorou kanio, nalo nene aban bereio ea natukamuano nei kunuano, mia amiilo ka napano amial toro na mie neibano naio binimei bo nonovio bereio ruei jo.

Yesu burumeulia taanou tai kenerinio meaku sumano den m̃ariano bereio

¹¹ Ana iorou kanio, maka vesiou, ana Yesu miel ba bokar m̃arkomeli dolu tai, siano Naeni, a jibe ka titiliu, kiano naiagagoano nalo naliko kulo dolu nalo telabo ajumã ajakisorio. ¹² Ana tilikiti napano Yesu nalo nei aju abinimei vaataro ka morouo labo na komeli nei, amial ka tomu nalo amidu buronlo amielvei abinimei, nalo aju ãpier tasiñaro tai ka ava ativinio. Naio napano m̃aro ruei, naio be meaku sumano tai, napano kenieno be taanou. Taanou nene, naio maka rivar kenerinio dolu tai bereio, naio bar takurano ga neibano m̃aro ruei. ¹³ Mia Yesu nalo aju amial nalo napano m̃a aju amiel abinimei, mia bogo na kiado Tubo mial taanou nei, naio tinien miiaio toru laka-o mia. Naruei naio ban vaataro kanio, berkanio, berinavo "Ai, jau koteg

re bunu.” ¹⁴ Ana Yesu binimej vaataro ka tasiñaro nei, midu jumano joaio, a nalo napano ajumña aþier ba ajumomou ga aju jibe na, maka bunu aiel. Ana naio mil banio, berinavo “Koig, kiniou neber kaso, jau kotomolu bereio.”

¹⁵ Naruei meaku nei naio jumolu jibe na, jo mil banlo, ana amidular naio bereio, ana Yesu jukamu kanio ba ban kenieno bereio. ¹⁶ Mia bogo na tomu nalo amial vite nei, burevure burelo toru laka, mia aju abamenea Atua, aberenio aberinavo “! Uerei, burumñara naverialiano na Atua kanano tai jumolu ju iviso ka kito vonganei naruei!” A tealo aber bunu, aberinavo “! Riano ga na! Atua miyotuba ka kiano tomu nalo naruei.” ¹⁷ Mia tukunuano na tenei, ajumña aber liliano banbano-o bokar tanobuku na vio Yutea, bija vio dolu nalo napano mña aju ga vaataro kanio.

Jone Baruei miila kiano naiagagoano nalo abinimej ea Yesu

Mataiu 11:2-19

¹⁸ Ana ea bogo na, Jone Baruei naio joa yimo na tetavokoiano ruei, ana kiano naiagagoano nalo abinimej ajukunu banio ka vite nalo napano mña Yesu joñña mi-laio. ¹⁹ Naruei Jone mil ban kanano tom juo, naio miilalo aban ea kiado Tubo, ka ava avika vatitig denio, ka naio be Naverikariano na, namña aju rorea ka mia rimej, þeli na maka ve naio.

²⁰ Ana amiel ka amei aial Yesu, mia bogo napano amileal naio, abika jibe nei naruei denio, aberinavo “Kenememi toro na toru nei Jone, jidom rijikia jumabe? ? Jau kobe toro na nanua mña aberenio ruei aber ka mia toro na toru tai rimej ve kiado navurimñaraboiano, þeli na jau maka kove naio vo, mia monoka kumemi nuviturorea kiano vo ka mia toro nene naio rimej?” ²¹ Mia memedu ka bogo napano abinimej ka avika vikadeniano nei, Yesu joñña mieliel ka tomu na mieiano nalo, a joñña mijil bulag niadu nalo denlo, a jo mila merebono nalo miralo abinimej abo bereio, ana Jone kiano naia-gagoano nalo amial vite nalo nei. ²² Naruei Yesu berdoþe vikadeniano nei, naio berinavo “Kamiu kuvan bereio kuvoru ea Jone, ana mo ku-verial vanio vite venia napano kumialio þeli kumijogio ea vio nei. Ajibe ka vite nalo namña Naverialiano Aisea berial nua ruei, napano berinavo:

‘Merebono nalo, vonganei amial vatitig vite bo bereio ruei,
a javuluku nalo, vonganei nalo amiel bo bereio ruei,
a tomu nalo napano burumieni milalo, vonganei niabelo binimej meravo bo ruei,
a nalo na abe bulubau, vonganei tilinielo bo bereio ruei,
a tomu nalo na amarmñaro, vonganei amemeul bereio ruei,

a talimāsa nalo, vonganēi neberial Ioluanō Vou banlo ruei.’

²³ Mia kamiū kuva kuverial ka Jone bunu, kuverinavo ‘Toro napano ver maka leleio kiano jidomiano riveve juo ea kiniou bogo tai, ilivuiāno toa naio.’”

Yesu berii Jone Baruei

²⁴ Ana bogo napano Jone Baruei kiano naiagagoano nalo ajuvan ka avan bereio, Yesu berii Jone nei ban tomu nalo napano aju naliko, naio berinavo “?Bogo namā kamiū kubatavio ea vio yauo na beamu, kamiū kuban ka kuvial venia? !Maka tinieku ka kamiū kuban ka kuvial buruburi namā jegi jomā miuvuio pīligvīligio! ²⁵ A

maka tinieku bunu ka kamiū kuban ka kuvial toro na toru tai napano mā miya kulumārauo na kirinovo a napano joa meuliano nabo, bior tomu nalo na jibe na maka ajikia atua vio na kiriniagiago jibe ka vio yauo na, mia nalo damāriga ajujua yimo nabo na be tubo na tortoru nalo kunualo.

²⁶ ? Makanio, mia kiniou tinieku ka kamiū kubatavio ka kuvial naverialiano tai, inau? Nina bo na, mia kiniou neber ka kamiū, Jone namā kamiū kubatavio ka mā kumialio, naio loa laka, naio jovulu naverialiano nalo re nua, ²⁷ bior Atua berii naio ea kiano Iliano Lu ruei, naio berinavo

‘Kiniou nemīla kiaku atevi na binimeī jukamu kaso, ka rila

vatitig kiamo mārabo.’ Malakai 3:1

²⁸ “Riano neber ka kamiū, ka ea yetemeriba nei, Jone Baruei naio loa laka ka kulo dolu nalo abiniū. Mia nalo nonovio napano mia amei jouro ea Atua kanano nave-natuboiano, riva rivokar toro na maariano kalo nana jotano laka garuei, nalo na abiniū nalo loa laka ka Jone, napano mia avar Atua kiano ilivuiāno nalo ve toru loa tovulu naio.”

²⁹ Mia bogo na aban ami-jog Jone Baruei jo mioli-olu, berial mārabo na Atua ka ajikia aviliglo, mia tomu na bova telabo, ba bokar tomu na takis bunu, amial ka mārabo nene be riano, ana abiliglo ana Jone baruei ealo. ³⁰ Mia kulo dolu nalo, jibe ka Varisis bija naver-loglogiano na tuboiano nalo, abilig taakalo ka mārabo na Atua naio mila ka ajikia aviliglo ka naio, ana Jone Baruei naio maka rivaruei ealo.

Yesu naio mil jikili ban tomu nalo ea kiano bogo

³¹ Mia Yesu berii kulo mārōu nalo nei ka bogo na, naio berinavo “? Mia kin-iou never iliano na vabe na mia mijikia rivokar tomu re banei kialo bajago, ka river nalo tomu na ajuñabe?

³²⁻³⁴ Vite nonovio na Atua mila ka rilavonio rivu van kamiū, mia kamiū maka kuvisidomio ga, mia kumil niegeniege naio ga biorio. Bior bogo napano Jone naio

binimeĩ, naio joĩna mon-
odulu ka mĩa bolkouo, a
naio bel ka mĩarjũmĩelũ,
mia tomu nalo amial jibe
na, nalo ajũna amilia naio
aberinavo ‘Tete na siĩaro
juao.’

“Mia bogo na kiniou Ku-
lorinio Kenerinio nebinimeĩ
nojo, nejinan batitig bo a
nomunu batitig bo, naruei
amilia kiniou, aberinavo ‘!
Keal, tete na naio be toro
naĩna jinano mĩele, a naio
be toro naĩna munu mĩelea
mĩarjũmĩelũ, a napano
kanano bilbilu nalo, nalo
abe tomu naĩna abarbiji
takis a tomu na abova!’

“Bior vite na naruei, kin-
iou nemial kamiũ tomu na
vio baneĩ napano kamiũ ku-
mitibe ka kiritete nalo, na-
pano ver ajũna amiijeja ea
vio yauo na komeli, mia
nalo aviovio aiagiaga van
kialo bilbilu sesa nalo, averi-
navo ‘! Oi, kamiũ kubova
na! Ver kumemi numi-
tũna numue bulaiũ, mia
kamiũ maka kuvisidom ku-
volu rivija kumemi, pĩeli na
ver kumemi numitũna nu-
miou ka iou na mĩariano,
mia kamiũ maka kuvisidom
kuviteg vija kumemi!’

35 “Nina naruei, tomu nalo
maka asidom Atua kanano
mĩarabo nalo, mia kirimĩarati
novo napano maluvo ea
toro kiano meuliano na jo
jakii Atua kiano mĩarabo,
rila rimeravo ka mĩarabo na
naruei naio be mĩarabo na
masouano napano be riano.”

*Tira tai ber aua riano bior
kiano bajago va nalo*

36 Mia Varisis nalo tai kalo,
siano Saimon, naio berinavo
naio jidom rimĩauka Yesu
sano sinaniano tai, ana
Yesu ban ea kiano vonuo,
a naio ba jotano ka asinan.

37 Ana ea komeli na, be
tira tai napano jo naio
mila bajago miroano na
kirivova laka, naruei naio
mijog ka napano Yesu ba
jo jinano ea Varisis nei
Saimon kunuano. Naruei
tira nene bitilubar kiano
kariano, mijog kirivova toru
laka, naruei naio mijog ka
monokanio riva rial Yesu,
ana naio midu kanano bauei
na bonotanunu nabo tai,
naio midu binimeĩ ea yimo
nei.

38 Mia Yesu mijoru
mon ka merikono ka sinano,
naruei tira nei binimeĩ
jumolu ju iorou ka naio ea
jaano, napano jogumirano
miou jibirbili bavatove ea
Yesu jaano. Jogumirano
nei joĩna jekon Yesu jaano
jibe na, naruei naio bar
burutili vijinio mĩa na, naio
joĩna miolkono ka Yesu
jaano, a naio mije kulbibinio
tivelinio mon mave ea Yesu
suvajaano, avona bisi ana na
miyon bonotanunu nei eaio.

39 Naruei Varisis neibano
miog Yesu binimeĩ ea
kunuano, naio joĩna bitii vite
nei, naruei naio joĩna tiniene
bova kanio kija. Naio joĩna
jidomii jibe nei, berinavo
“Verenio Yesu na naio be
naverialiano riano tai, pĩeli
mia rijikia batitig ruei ka tira
na naio be tira na kariano
mugaruei jibe na, mia naio

rijikia re rijamo ka naio tokol jaano lu na. Mia naio mijamo ka ga naio ka rila tibe na, kiniou maka bunu nejikia vatitig naio naruei.”

⁴⁰ Mia Yesu mijikia kiano jidomiano, naruei berdoŭe banio, berinavo “Saimon, kiniou nejidom never kiri iliano tai ve telisu vanso beamu vo.”

Ana Saimon berdoŭe berinavo “Bo ga, Naverloglogiano. Jau komijikia kovere-nio.”

⁴¹ Naruei Yesu berdoŭe jibe nei banio berinavo “Toro tomoruo tai, mia tomu juo amila jabue ea naio. Ea naljuo nei, tinene kiano jabue toru, mia tinene, naio kiano jabue burutomoruo laka. ⁴² Ana ea bogo na ka avulu meran bereio jabue nalo nei, mia abe juo maka ajikia avulu meran bereio, naruei toro tomoruo nei tinene mialo abe juo, naio biekokalo abe juo ka kialo jabue nonovio. ?Mo bior vite na, tom juo nei na vabe nene na naio monoka tinienriia melea toro tomoruo nei?”

⁴³ Ana Saimon berdoŭe ban Yesu, naio berinavo “Kiniou maka nejikia, ŭeli na kanano jabue burutomoruo laka kovio, naio monoka sidomii naio rivu lie.”

Ana Yesu berenio berinavo “Nao koig, naio jibe na naruei.” ⁴⁴ Mo Yesu barŭilig naio ka tira nei, jiloglog naio ka Saimon, berinavo “Saimon, bogo na kiniou nebinimei joomo ea kunuamo, maka neial toro

tai rudu uei tai rimei ka mia nemijikia nesezon bulagio niamiamo na n̄arabo den jaaku, napano javukia kanado bajago, jau monoka kalaiio. Mia jau keial tira nei, naio naruei jekon jaaku ka jogumirano, a miolkon juva ka vijinio.

⁴⁵ Kiniou nebinimei joomo ea kunuamo, mia jau maka kavan juñamo vatitig rivija kiniou tibe ka nebe kanamo bilbilu nabo tai, mia jikar ea bogo na kiniou nebinimei joomo, naio midu kulbibinio tivelinio mon mave ea suvajaaku nam̄ariga. ⁴⁶ Jau maka kavar bonotanunu rimei ka koyon ea paripariku, mia naio mila ka jaaku ruei. ⁴⁷ Mia kiniou neber batitig banso, ka tira nei, kanano kariano nalo miroano laka, mia kiniou nebiekokoa nonovlo biniu ruei, ana mila na tinien jii kiniou toru laka. Mia kiniou nemial ka toro na kanano kariano maka ve toru, kiniou nebiekokoa naio, mia naio tinien jii kiniou maka rive toru.” ⁴⁸ Mia Yesu mil batitig ban tira nei bunu, naio berkanio berinavo “Kiamo kariano nonovio nam̄a kojom̄a kojidomii bova vururu biorio, kiniou nebiekokoa nonovlo ruei.”

⁴⁹ Mia bogo na Yesu ber iliano na, kulo dolu nalo napano ajum̄a ajinan vio takurano naliko ka bogo nei, nalo maka asaaro laka, nalo ajum̄a amijuvaluva tertelisu banlo, ajum̄a aberinavo “? Mia tete na naio jidom naio rive kei, napano jom̄a bere-

nio naio mila bulag kariano na tomu nalo kanalo jibe na?"

⁵⁰ Mia Yesu mil ber ban tira nei vaarakurano bereio, naio berinavo "Kanamoviekouoiano milaso kobokarioruriano ruei. Jau maka bunu kojog rivova, jau komijikia kavano ga, mia Atua kanano tumaro to vijaso."

8

Tire nalo telabo ajakisori Yesu

¹ Ana maka vesiou bereio, Yesu naio jom̃a mieliel bano, naio jo ba jel burevure komeli nalo na tertelisu a nalo na tortoru, mia ea vio nonovio naio jom̃a mioliolu, a jom̃a midu lilianniano vou nabo na Atua kiano navenatuboiano binimeiban tomu nalo. Mia jibe ka titiliu, kiano duelimo ba juo [12] nalo aju bija ka bogo na, ² mia tire nalo telabo kija bunu aju iorou ka nalo. Ea tire nalo nene, tealo kalo napano Yesu mieliel kalo bior niununo nalo na kirivova a kanio mieiano na jualo, jibe ka Mere na Maktala, napano nanua beamu niadu aluo ajua naio, ³ bija Joana, napano naio be toro nei Kusa koano, nanua naio be toro na toru tai na im̃auano na Parinio tubo Erot kiano, a bija Susano bunu. Mia nalo miroano lie vo bereio, napano nalo amijia Yesu nalo toru, mia nalo ajum̃a abitikarlo ka ijaiano nalo

nam̃a tomu nalo aju ajian banlo.

Jamerijiano na kurukuti na uiti napano ajibirbili ea borotano kinkin veri

Mataiu 13:1-9; Mak 4:1-9

⁴ Naruei ea kiri bogo tai, burum̃ara tiniobi na tomu nalo amoluo ea komeli telabo beve terakurano na kanalo, naruei nalo abinimeiamioibijiilo jeliviv ea Yesu, naruei naio mil banlo, buku jamerijiano tai kalo. ⁵ Naio berenio jibe nei, berinavo "Be toro tai napano ban ka rivisivisii kurukuti ea kiano tiniavio. Bogo napano jom̃a bisivisii kurukuti nene abano, kurukuti tealo ajibirbili ea m̃arabo, mia iorou, tomu nalo abinimeiamiel ea abie lelanlo, a menu nalo amikiti nonovlo. ⁶ A kurukuti tealo ajibirbili ea vio na be tabaṣilio eaio, abitovtov soṣeli, mia karina abinimeiamekekeu ga, bior maka ve uei tai ea vio nene. ⁷ Mo kurukuti tealo ajibirbili ea vio nanua beamu maka atekon batitig rivu teli va nalo eaio, mia iorou kanio ana ṣeli nana bova nei naio barboṣeio miluo bereio, bisovoko toti nalo bano-o mia am̃arñaro. ⁸ Mia kurukuti dolu tealo bereio ajibirbili ea kiri borotano nabo tai, mia nalo amililiuo bano-o, ajakou abar m̃arati nalo, bokar toromomou takurano [100]."

Mia bogo napano Yesu berenio iliano nei banlo bisi, ana naio miaga m̃erere banlo, naio berinavo "Toro

na be tiliniene, monokanio riagago vatitig ka iliano nei.”

?Bior vaio ana Yesu jo mil jel ea jamerijiano?

Mataiu 13:10-23; Mak 4:10-20

⁹ Ana iorou kanio, ana naiagagoano nalo abinimei ea Yesu mia nalo abika nioti na jamerijiano nei denio.

¹⁰ Naruei naio berdoŕe banlo, berinavo “Atua naio mila jibe na ka mia kamiu kumijikia kuvileal ililuklukuano nalo na kiano navenatuboiano.

‘Mia ea kulo dolu nalo, ililuklukuano nalo na ajuluku ea jamerijiano kia navo,

mia ajumã abitio-o mia maka avitilubarlio, a ajumã amiagago-o mia maka ajog lubarlo.’”
Ais 6:9

Yesu naio ber bisivisii nioti na jamerijiano na kurukuti uiti

¹¹ Naruei Yesu ber bisivisii masosoua jamerijiano nei banlo. Naio berenio berinavo “Mo, nioti na jamerijiano nei naio jibe nei. Vite na be moti, naio be kurukuti, mia nina naio jibe kanio Atua kiano iliano. ¹² Mia kurukuti nalo napano ajibirbili ea m̃arabo, nina naio jibe kanio napano tomu nalo amijog iliano nei, a kurukuti novo nei ajibirbili ban ea kialo jidomiano nalo. Mia Parinio Sim̃aro nei naio binimei bar bulag iliano nei bereio den kialo iviso nalo, ka rila amonea re bunu, a ajikia re avokar ioruriano.

¹³ “Dolu, nina kurukuti nalo napano ajua tabaŕilio, mia nina jibe kanio tomu nalo namã amijog Lilianiano Vou na bo nei, mia nalo amijevio, ajaaro kanio, mia jibe kanio napano maka ve salo bati na bo. Nalo amonea ka bogo bulati ga, mia verenio ve bogokouo, ŕeli na juboluboiano rimei, mia nalo ajoru bereio ga.

¹⁴ “Dolu bunu, nina kurukuti nalo napano m̃a ajua vio napano be teli na bova eaio, a nina jibe kanio napano tomu nalo na amijogio, mia bogo namãaju amiel abano jibe na, mia ajidom yebekavo toru ea kialo meuliano, mia ajidom m̃lea puruveru, a nalo tiniel jii m̃lea serevuiano nalo na yetemeriba nei. Bajago nalo na abinimei jibe ka teli na bova tai namã m̃ekolo, ka mia rila ana na mia nalo ajikia re avar m̃arati napano meruo bo ea kialo meuliano nalo leleio.

¹⁵ “Mia nana maariano, nina kurukuti napano ajua borotano nabo, nina javukia napano tomu nalo namã amiagago ka Lilianiano Vou nabo nei, naruei nalo amije batitigio monea kialo iviso nalo, abokario jikili vatitig bo be riano. Kulo novo nalo na jibe na, nalo ala kialo jidomiano nalo ve terebievi, naruei nalo aim̃au rimemedu rivanvano-o mia avar m̃arati na Ioluanou Vou nei ea kialo meuliano nalo.”

*Jamerijiano na yulu**Mak 4:21-25*

¹⁶ Ana Yesu ber bunu, berinavo “Kito tomu nalo, verenio kito ravar yulu rimei, mia ve re tai napano roduvanio sel tano ka basaro p̃eli na vite na jibe na. Peli ga, kito reive takilele mave ga ka rila tomu nalo na ver amei joomo aial ka napano vio merera bo.

¹⁷ Mo, na Atua kanano navenatuboiano naio jibe ka yulu nei, napano vonganei joṃa malmaluvo ea kito ka rudulii vite nonovio. Vite nonovio napano ajuluku aju, a ililuklukuano nalo, mia nalo monoka amalmaluvo ea vio medave ka tomu nalo avitilubario. ¹⁸ Kamiu monoka kuviagago vatitig ka kanaku iliano nalo, a kuvilavon ka kuvisidomii vatitigio. Toro napano be kiano saba miroano ruei, mia naio rivar rivan lie vo ve telabo laka, mia toro napano maka kiano saba, mia rila luvuio vite vaio na telisu nei napano naio tiniene ka ber kiano ruei.”

Yesu kenieno naliko kuruano nalo, abinimei ka avurular naio

Mataiu 12:46-50; Mak 3:31-35

¹⁹ Ana na Yesu kenieno naliko kuruano nalo amiyotuba ka naio ka bogo nei, mia nalo maka ajikia avokar naio joomo, bior burutiniobi toru laka, mila vio telisu.

²⁰ Mia tomu nalo aber lilian iliano binimei bokar Yesu, ana aberenio aberinavo “!

Ai, koniomo naliko kuruamo nalo, nalo yako ajikili aju tavio, ajidom aialso beamu vo!”

²¹ Mia Yesu berdoṃe banlo, berinavo “Nana naio be kenieku, p̃eli na kuruaku, nina nalo ga nei napano amijog Atua kiano iliano lu, a nalo ajum̃a amila javukia ga napano iliano nei berenio.”

Burum̃ara jegi napano Yesu berbureio

Mataiu 8:23-27; Mak 4:35-41

²² Mo ea legiano tai, Yesu buru naiagagoano nalo, abiako ea uako tai, naruei Yesu ber kalo, berinavo “Kito ṃa rava tivelinio ea ueiyabo nei.” Naruei ajuvan vio, ana abano, ²³ mia bogo na uako jo juvan bano, mia Yesu mirano jouo toru ana monmelio. Ana iorou kanio, ana burum̃ara jegi tai jumolu binimei ea ueiyabo nei, mia burum̃ara kenieno niatuya nalo na amidon tanealo bano-o mia uako nei binimei bujo ka jumu, mia nalo amialo ka bova kitkiti ga naruei. ²⁴ Ana nalo aba abio bon Yesu, aber kanio, aberinavo “! Tubo, Tubo, vaataro ka mia kito ramadudu naruei!”

Ana na Yesu jevijo jumolu, ana naio berbure jegi bija burum̃ara kenieno niatuya nalo nei, naruei vite nalo nei ajuba binilo, vio be tum̃aro nonovio bo.

²⁵ Ana Yesu ber kalo berinavo “? Kenemiu viek-ouoiano nibe?”

Naruei nalo amerou mia amerou laka, amiilo toru, ana na nalo ajumã abivika denlo bereio, aberinavo “? Toro kenia na? Naio mil ga jibe na mia jegi naio tei amijogkar niono. !Tomnei!”

Yesu jitig bulag niadu miroano den toro Kerasa tai Mataiu 8:28-34; Mak 5:1-20

²⁶ Naruei Yesu nalo abarkor abokar tivelinio nene, napano Kalele jirarago ban eaio, nina memedu ka vio nei Kerasa. ²⁷ Mia bogo napano Yesu jabulu, bauro ea vio nei, toro na vio nei tai binimeia ka rivitavo vijaio, napano toro nene simãaro nalo ajuaio. Bogobe nua ruei, toro nene naio jo jibe ga na, maka riya kulumãarauo tai, a maka m̃a monmon ea yimo, mia tinien jii ka m̃a mon ea pakeltavo ga, ea buluvae nalo namã abar kanalo tasimãaro nalo aba amonmoneaio. ²⁸⁻²⁹ Simãaro nalo nei ajumã ajutua kiki toro nei va telabo ruei, mila na tomu nalo amilavon ka atukuku kanio damariga, a nalo ajumã amiorkakar ka m̃armieni, p̃eli amiorkakar jaano a jumãano ka teli, mia naio jomã mila kokorovlo ga, a simãaro nalo nei amijil deven naio binimeia joa vio momã nei.

Mia Yesu mialio, mil ban niununo va nei, jitig naio berinavo tuvan toro nene.

Mia toro nei mial Yesu, naio bio banio, a naio mijorua jaano, ana niununo

neibano joa naio mil buru-tomoruo, naio berenio berinavo “? Mia jau, Yesu, Atua Soři kenerinio, kanamo vaio joa kiniou? !Kiniou nobika jikili denso, ka mia jau kesian re vironiano van kin-iou!”

³⁰ Ana na Yesu bika denio berinavo “?Ana siamo, kei?”

Ana na niununo va nei naio berdoře, berinavo “Siaku be ‘Tomu na mira miroano.’ ” Naio ber jibe na, bior simãaro nalo namã aba joomo ea naio nalo miroano laka. ³¹ Mia niununo va nalo nene nalo ajumã abivika jikili den Yesu bereio ka mia naio rijil nalo re, naio rila lo re ava ajoru avatove yetano ea burumãara bulukuti sebi.

³² Mo ea suku tivelinio na vio nei, be burumãara taara na kiribue, nalo ajumã amiuoiuo ea borotano, ana simãaro nalo neibano amia-ga ban Yesu, abika jikili denio aberinavo naio rila lo ava joomo ga ea kiribue nalo nei. Ana na Yesu mijamo ka jibe na banlo, ³³ naruei nalo ajaluvo den toro nei, ana nalo aba joomo ea kiribue nalo neibano. Mia sopeli ga, kiribue nalo nene ajikiti, ajibirbili ea yabalili tai, abavatove yetano ea burumãara ueiyabo nei, amadudu nonovio ea bulu niogovu.

³⁴ Ana bogo napano tomu na abitikar kiribue amial vite nei, mia nalo bunu aburo kilkil, aban bereio vonuo, aberial vite nei, mia nalo aberial janea vio reraio bunu, ³⁵ mila ana vio bujo ka tomu nalo abinimeia, ka

ajidom aial kija. Mia bogo na abinimei, amial ka na Yesu naio jo, a toro namã niununo va nalo neibano aburo denio ruei, naio jomã jotano ea Yesu jaano. Naruei naio miya batitig kulumãarauo nabo ruei, mia naio jo melumu bo ruei jo, maka bunu rive deden leleio. Bogo napano amialio ka napano toro nei naio binimei bo ruei jibe nei, mia nalo amerou toru. ³⁶ Mia nalo napano aju jukamu, napano amial vite nonovio, nalo ajukunu kanio ban nalo na abinimei vonga, nalo aberbisivisiio banlo jumãbe ka toro nei nua niadu nalo aban ea naio, mia Yesu mila naio binimei bo bereio ruei. ³⁷ Mia tomu nalo na tanobuku nalo na vio Kerasa, nalo amial ka bova ga, naruei nalo aju ajadu jikili ka Yesu ka ajidom ka mia naio taluvo denlo, bior vite na milalo amerou toru laka. Naruei Yesu nalo abajou bereio ka avan ea kialo uako, ka nalo avan bereio.

³⁸ Ana bogo na ajumã abajou, toro neibano naio binimei balea Yesu jikili, ka jidom riva to naljuo bogo nonovio, mia Yesu maka rijamo kanio, mia naio berkanio, berinavo ³⁹ "Makanio, bior bo laka ka kava vonuo bereio, a jau kava kover van tomu nalo, kover kalo jumãbe napano Atua mila bo mia bo laka banso jibe na."

Ana toro nei ban bereio, a naio jomã miel jeliviv ea vio nalo na ea tanobuku

na kanano burumãara bulukomeli, a naio jomã ber bulavulag inãuano novo nei napano Yesu mila ban naio.

Jairas kenerinio vevinio, naljuo tira tai napano jokol Yesu m̃ano kulumãarauo

Mataiu 9:18-26; Mak 5:21-43

⁴⁰ Naruei Yesu nalo abarkor bereio ueiyabo aba tivelinio, mia burumãara tiniobi na tomu nalo aju rorea naio, mia nalo ajaaro toru ka amial naio bereio. ⁴¹ Mia toro na toru tai na yimo na volkouano na kanalo na vio nei, siano Jairas, naio binimei vaataro ka Yesu. Naruei minie yetano kanio, jegi banio, baleaio ka rimeia kunuano, ⁴² ka rial kenerinio vevinio, napano mie toru. Tira sesa nei, naio be toro na toru nei kenerinio takurano m̃anono ga, a kiano yuka be titai jibe ka duelimo ba juo ga [12], mia kiano mieiano binimei biloulo ruei, mila ana amial ka vaataro ka mia naio rimãaro. Naruei Yesu jumolu, ban bija toro nei abano.

Mia bogo na naio jo ban jibe na, vio bujo ka burumãara tiniobi na aju ajakisosorio, nalo ajumã amivinkakarlo ajeliviv ea Yesu. ⁴³ Mia nalo nene tai kalo, naio be tira tai, napano kiano mieiano na monoleri mila naio ka legiano nonovio ga, bokar yuka duelimo ba juo [12] ruei, mia maka ve toro tai napano mijikia rila rivu kiano mieiano nei leleio. ⁴⁴ Naruei tira nei,

naio milavan naio bure tomu nalo nei, naruei mijian lilie ka naio binime i vaataro ka Yesu taakano, ana na naio jian jumano jibe na ana jokol m̃ano ikiniono kulukoti. Naio jokol Yesu m̃ano kulum̃arauo jibe na, mia monloglog bogo nei ga, kiano mieiano nei bisi ruei.

⁴⁵ Mia kolvare ga Yesu bika, berinavo “?Kenia na jokol kiniou vonganei ga?”

Mia nalo aber “Maka toro tai tokolso,” mia Pitere bunu berkanio berinavo “?Ana Tubo, jumabe? Tom miroano miroano laka na amivinkakarlo jeli viv easo, a ajum̃a abalbaliaso.”

⁴⁶ Ana Yesu berkanio, berinavo “Makanio, toro tai jokol batitig kiniou nei, bior nomi-jog lubar ka kanaku mo-roano togio jaluvo ea kiniou ban ea toro nene ruei.”

⁴⁷ Naruei tira nene, naio bitilubar ka naio maka bunu rijikia rilavan naio, naruei naio binime i ea Yesu, napano naio merou toru bano m̃a jo memebiju ka garuei. Naio binime i mijoru ea Yesu jaano, kamu ka tomu nalo napano aju na miralo, naio ber bulag nonovio vite ea naio banio, jibe na kar vaio napano naio binime i jokol Yesu, a jumabe napano naio binime i bo ruei ea bogo nei. ⁴⁸ Ana na Yesu berkanio, berinavo “Nena, kanamo viekouoiano ea kiniou milaso kobo bereio ruei. Atua kiano tum̃aro to vijaso, jau kava vonuo ga bereio.”

⁴⁹ Naruei bogo napano Yesu jom̃a mil ban tira

nei kia ga vo, iliano binime i ea toro na toru nei kunuano, berinavo “Kenerimo vevinio nam̃a na, naio bakovio ruei. Bo ka mia jau kovuru re bunu naverloglogiano na toru na rime i, ka kala lelan kule re naio.”

⁵⁰ Mia Yesu bunu mijog iliano nei, ana na naio ber ka Jairas, berinavo “Jau niukniuku rivieso re, jau kavarkar tiniemo sikili ea Atua ga, bior mia kenerimo vevinio naio rimeul bereio na.”

⁵¹ Naruei Yesu ban bija toro nei ea kiano vonuo, mia bogo napano abinime i abokar vio nene, naio berbure nalo dolu berinavo mia nalo ava joomo re naliko naio, mia naio buru ga Pitere naljuo Jone, bija Yemesi, naliko niatira sesa nei karam̃ano a kenieno, mia nalo na ga aba joomo.

⁵² Mia bogo na nalo aba joomo jibe na, amial ka napano tomu nalo ajum̃a tiniel miia niatira sesa nene ruei, nalo ajum̃a ajigio, mia Yesu ber kalo, berinavo “Kam̃u kuviteg re rivior niatira na tibe na. Naio maka rim̃aro na, mia naio jo monmelio ga na.” ⁵³ Mia nalo abital m̃elea ga banio, bior nalo amijikia ruei ka napano niatira nei naio m̃arodobi ruei.

⁵⁴ Naruei Yesu ba bokar niatira nei jumano, a naio mil banio, berinavo “Kanaku niatira, jau kotumolu von.”

⁵⁵ Naruei monloglog bogo nei ga, nalo amial ka napano niatira nei kiano meuliano

binimei bere joaio bereio, naruei naio jumolu jikili ju, naio jom̃a miel, ana na Yesu ber kalo berinavo bo ka adu kiri sinaniano tai vanio. ⁵⁶ Mia karam̃ano a kenieno, nalo amiilo toru napano mila kanalo jidomiano bakovio ruei, mia Yesu ber kalo berinavo mia averial re vite nei van kulo dolu nalo.

9

Yesu miila bulagio kiano naiagagoano nalo abeve juo

Mataiu 10:5-15; Mak 6:7-13

¹ Naruei Yesu bio birov-iron kiano duelimo ba juo [12], ana na naio mil batitig banlo, jian moroano banlo, mijamo kalo ka amijikia atuvulu sim̃aro, a ka amijikia aieliel ka mieiano nalo.

² Naio mila jibe na ka mia naio riila bulaglo ka mia ava aioliolu ka Atua kiano nave-natuboiano, a ka aieliel ka namieiano nalo. ³ A iliano nabo nalo tealo napano naio ber kalo beamu vo, avona bisi ana na nalo abanio aber jibenei, napano naio berinavo

“Tivelinio ka kenemiu m̃arabo, mia kamiū kuvar re titai. Mia kamiū kuvar re kenemiu nasitogo nam̃a kubanio, p̃eli na kenemiu basaro, p̃eli na sinaniano, p̃eli na kenemiu puruveru, a mia kuvar re kenemiu kulum̃arauo ve juo, mia kamiū kuvar kenemiu kulum̃arauo ve takurano ga nam̃a kumiya kar vonganei ka kuvano.

⁴ “Mo vonuo na vabe na mia avurukar kamiū kuvituma, kuva jouro eaio, mia monoka kamiū kuvisaaro ka mia kuvitu kamliko m̃aratavo na vonuo nene, mia kuvituvan vonuo nei bogo napano mia kuvitaluvo den m̃arkomeli nei bereio.

⁵ A ea m̃arkomeli na vabe na ver maka asidom avurukar kamiū ea kunualo nalo, mia kamiū kuvituvan ga kialo vio nene, a bogo na kamiū kuvitaluvo denio, kamiū monoka kuvijubakon bulukievi na m̃arabo na vio neibano den jaamiū nalo, tibe ka kijokijo tai, p̃eli na iliano na kirisikili tai na kenemiu banlo, ka mia avar vironiano tai napano memedu ga ka kialo bajago na bova nene.”

⁶ Ana na naiagagoano nalo abava tavio naruei, nalo aba ajel ea m̃arkomeli nalo, nalo ajum̃a amioliolu ka Lilianiano Vou nabo, a nalo ajum̃a amieliel ka tomu nalo.

Parinio Tubo Erot Antipas jidom bitovitonia Yesu

Mataiu 14:1-2; Mak 6:14-16

⁷ Ana ea bogo na, Parinio Tubo Erot nene bunu naio mijog kija ka vaio napano m̃a Yesu nalo ajum̃a amilaio, naruei naio jo tiniene burukokorov biorio, bior tomu tealo ajum̃a aberii Yesu, ka naio be Jone Baruei, napano naio meul bereio den nam̃ariano, ⁸ mia nalo dolu ajum̃a aber vonvon aberinavo Yesu be tormoruo Elaija re nua, napano naio

miyotuba bereio, a nalo tealo ajumã aberinavo Yesu be naverialiano nalo re nua nua tai, napano naio jumolu bereio den namãariano. ⁹ Mia Parinio Tubo Erot naio berinavo “Maka ve Jone Baruei na, bior kiniou nomiovlar pariparinio ruei, mia toro namã ajumã aberveriiio na, naio be kenia bereio?” Mo jidomiano nei mila ana naio jidom toru ka rial kija Yesu.

Naiagagoano nalo aba amioliolu, karina na abinimeĩ bereio

Mataiu 14:13-21; Mak 6:30-44; Jone 6:1-15

¹⁰ Ana naiagagoano nalo napano Yesu miila bulaglo ka ava aioliolu, nalo aborvoru bereio, naruei nalo aberial ka Yesu vite nalo nonovio napano m̃a amim̃aukanio. Ana Yesu burulo ajaluvo den tomu nalo, ajubilig telisu ea m̃arkomeli tai, siano Betsaeta. ¹¹ Mia karina, tomu nalo amijog ka aju aban ea vio nei, mia nalo bunu ajakisorilo, aban ea vio nene bunu. Mia Yesu naio jaaro ga, naio jukunu kija naliko, a kario naio berlogloglo ea tivelinio na navenatuboiano na Atua kiano, a naio mila batitig nalo namã aju ajidom toro tai ka rieliel kalo.

Yesu bagan tomu menu jimo [5,000]

¹² Mia Yesu jo naliko banbano-o, karina nalo amial ka napano m̃erenio jo batove nonovio, naruei kanano duelimo ba juo [12] abinimeĩ keanio, aberinavo

“Ai, Tubo, bo kanio jau kajamo ka tiniobi nei avan bereio ea kanalo vonuo nalo, p̃eli na ea m̃arkomeli tealo na, ka amijikia avulu salo sinaniano tealo, a ka amijikia aleal vio tai ka mia amon eaio, bior vio nei kito rojua nei naio bova ga, maka rivu ka vio ribobogko kito eaio.”

¹³ Mia Yesu ber kalo, berinavo “Ee, makanio. Bo kanio kamiu ga kuvar sinaniano vanlo.”

Mia nalo aberdope aberinavo “!Ajerei! Abe kumemi nubarkar ga joko sesa jimo, bija niado na tertelisu juo. ?Peli na ver makanio, jau kojidom ka mia kumemi naruei, nuva nuvalu sinaniano rivare ka burutiniobi nalo na?” ¹⁴ Mia nalo aber jibe na bior tomu nalo napano aju na nalo miroano laka, napano kulovu nalo ga abokar titai kovio jibe ka menu jimo [5,000].

Ana na Yesu ber kalo berinavo “Kamiu kuva kuver ka tomu nalo na kuver atutano beamu vo, atutano ea taara nalo, napano mia tomu veve duelimo va jimo [50] atua taara tai.” ¹⁵ Naruei nalo abano amila javukia napano naio berenio, naruei tomu nalo ajutano ea taara nalo. ¹⁶ Naruei Yesu bar joko jimo bija niado na tertelisu juo nei, naio jirarago bavin tiniabene, naio milivu kanio, karina burekokorovio, ana bar jian ban naiagagoano nalo ka aviovio ka tanea taara nalo nei. ¹⁷ Naruei nalo ajinan banbano-o, mabolo

jouo batitigio bo, a iororoti sinaniano napano ajen digio ju, nalo amisonsonlo aban ea basaro solokobaro nalo bokar duelimo ba juo [12].

Pitere berial ka Yesu be Naverikariano memedu

Mataiu 16:13-28; Mak 8:27-31

¹⁸ Mia bogo tai, ana Yesu jo bolkouo naio takurano, a kanano naiagagoano nalo aju vaataro ka ga naio, naruei naio bika denlo, berinavo “? Kamiu kumitumã kumijog tomu nalo ajumã aberverii kiniou aber kiniou nebe kei?”

¹⁹ Ana na nalo aber kanio, aberinavo “Tealo aber jau kobe Jone Baruei, a tealo aber jau kobe Naverialiano Elaija, a tealo aber jau kobe naverialiano dolu nalo re nua nua tai napano meul bereio den namariano.”

²⁰ Mo naio bika denlo, berinavo “?Mo ana jumabe ka kamiu, kamiu kumitumã kuber kiniou nebe kei?” Ana na Pitere naio berdope, berinavo “Jau kobe Naverikariano na Atua kanano.”

Yesu berial kiano m̃ariano

²¹ Naruei Yesu mil jikili, ber kalo memedu, berinavo mia nalo avan re averial vite nei ka tomu nalo, ²² mia naio ber batitigio bo banlo ka mia tumabe ka naio. Naio berenio berinavo “Kin-iou nebe Kulorinio Kenerinio, mia navurim̃araboiano nalo na kulo Israel nalo kialo, vija tomu na tortoru na kulo lu nalo, bija

naverloglogiano na tuboiano nalo, mia avukular kiniou, monoka mia ala vite ve telabo ka ala lelan kiniou. Mia monoka auebin kiniou nam̃aro, mia ka bogoti ve tolu nene, mia Atua rivitirilar kiniou nemeul bereio.”

Yesu Kiano naiagagoano naio monoka sidom iakurano ga ea kanano sidomiano nalo

²³ Naruei ea bogo na, Yesu mil banlo, naio berenio berinavo “Toro napano jidom rimeitakisori kiniou, naio monoka sidom iakurano ga ea kanano sidomiano nalo, ana mia naio monoka rudu kanano m̃akolkolo ea legiano nonovio, jibe napano mia nodu kanaku, naruei naio takisor kiniou nam̃ariga. ²⁴ Neber jibe

na bior toro na ver sidom ridururu kiano meuliano, mia naio rilaluvu kiano meuliano. Mia toro na ver rijamo ka kiano meuliano rivior kiniou, mia naio rijeve kiano meuliano bereio. ²⁵ Avona ver toro tai bokar vite novo nalo na yetemeriba nei riviniu, mia rilaluvu m̃arabo a rilaluvu kiano meuliano, naio maka rijeve vite novo tai leleio.

²⁶ “Toro nam̃a mimou ka kulo dolu nalo miralo bior kiniou p̃eli bior kanaku iliano, mia kiniou Kulorinio Kenerinio, mia kiniou bunu noimou ea Atua mirano rivior toro nene, ea bogo napano mia nemei bereio eaio, napano mia nemei vija burum̃ara mermerano napano kanaku, a napano

be karamñaku kanano, a napano be nailiano lu nalo kanalo. ²⁷ Riano kiniou neber ka kami, be tomu tai ajumolu aju ea vio nei, napano mia maka ajikia amaro, rivanvano-o rivokar bogo napano mia aial navenatuboiano na Atua kanano riyotuba.”

Yesu niabene binime be dolu

Mataiu 17:1-8; Mak 9:2-8

²⁸ Iorou ka bogo na napano Yesu berenio iliano nalo na, titai jibe ka sude takurano barlaka bereio ruei, naruei naio buru Pitere, Jone, a Yemesi, nalo veri abavin ea burusuku tai, napano jidom rivolkouo. ²⁹ Naruei nalo abinime abokar vio nene, a bogo namã Yesu joña bolkouo, naiagagoano tolu nalo nei amialio napano mirano binime be dolu, a amialio ka napano mñoano kulumñarau merera laka, a amiuvu bo mia amiuvu nonovio garuei.

³⁰⁻³¹ Ana iorou, tormoruo juo nei Elaija naio Mosis, naljuo amiyotuba bija burumñara miamoiano na mermerano na tiniabene, ana na abe juo ajumã ajukunu naliko Yesu, napano ajumã aberii ka mia tumãabe ana na mia naio monoka riva Yerusalemo, a monoka mñoaro den yetemeriba nei, tavukia napano Atua berkario ruei.

³² Mia beamu, Pitere nalo nei amijog miralo jouo toru, amiyukudovo banbano-o mia amonmelio garuei, mia

bogo napano ajevijo bereio, amiilo ka vite nalo nei, napano amial Yesu kiano burumñara miamoiano na mermerano, a amial tomu juo nei ajumolu aju bijaio. ³³ Naruei nalo amial ka napano naljuo neibano aju ajuvan vio ka avan bereio, naruei Pitere naio jidom ril, mia maka rijikia vaio ka mia riverenio, ana naio ber ilikodovoiano tai ban Yesu, berenio berinavo “Tubo, bo ka napano kito rojua vio nei. Bo kanio kito roimñauka tobobo ve tolu ea vio nei, tai ve kiamo, tai ve Mosis kiano, a tai ve Elaija kanano.”

³⁴ Mia bogo napano naio joña ber iliano nei, melijo tai binime midukolo, mia bogo napano amialio ka nalo aju joomo ea melijo nene, nalo amerou binvinlo. ³⁵ Naruei amijog iliano tai miyotuba ea melijo neibano, naio berenio berinavo “Nina be keneriku na, napano kin-iou nebitirilar naio ruei. Naina naruei monoka kumonmonea naio rivu.”

³⁶ Mia bogo na iliano nei bisi, melijo bakovio, amial ka napano Yesu naio ga takurano ju naliko bereio. Iorou ka nina, naiagagoano nalo aju ajurbanin kanio ga aju, maka ava averii vite neibano amialio ka tomu dolu nalo.

Yesu mijil lar simñoaro den mñeaku tai

Mataiu 17:14-21; Mak 9:14-29

37 Mia ea legiano dolu nene, Yesu naliko nalo tolu nei ajuvan burusuku nei, abatove bereio, mia burum̃ara tiniobi na tomu nalo aju rorea ka ajidom aial naio. 38 Mia bogo napano amiyotuba kalo, toro tai kalo bio jouo ban Yesu, naio berenio berinavo “Naverloglogiano, neber aiou banso, kovitii von keneriku m̃eaku nei, bior naio be keneriku takurano m̃anono ga. 39 Niununo va tai jom̃a binimeia naio jibe na, mila naio miaga burutomoruo laka, a miaburusalsal bano-o m̃a titilevlevi bavin eaio. Tenei jom̃a mila naio napano kirivova laka, mila lelan naio laka, a naio jom̃a monmon ga milαιο, naio maka lele tuvan naio torm̃aro bogo tai. 40 Kiniou noburu naio ban ea kiamo naiagagoano nalo, neber aiou kalo ka ajilar niununo va nei, naruei nalo amila von, amim̃aukanio bano-o, mia abijukudeio ga.”

41 Naruei Yesu berdoṽe, mil banlo, berinavo “?Kamiau na, jum̃abe jibe na? Kamiau maka kuvarkar tiniemiu sikili ea Atua leleio. ?Mia kiniou monoka noto vija kamiau kelvovu nalo riva rivokar nagi? Kiniou tinieku m̃aro ea kamiau ruei. Mo, bo ga, kovuru kenerimo nene rimeia vonio.”

42 Naruei nalo aba aburu kiritete nene binimeia, mia bogo napano aju abinimeia kia ga vo, niununo va nei mila m̃ele niadua kiritete nei bereio-o mia, mila niabene

memebiju a ba burukar jikili. Mia Yesu mil jikili, berbure niununo va nene, ana naio mieliel ka m̃eaku nene, naruei naio buru bereio ba ban karam̃ano. 43 Mia nalo napano amial vite nalo nei, nalo amiilo toru laka ka Atua kanano moroano na loa laka na kirinovo nei, napano mila bo laka jibe nei ban tete m̃eaku nei.

Yesu berial bereio kiano m̃ariano

Ana memedu ka bogo na napano m̃a kulo dolu nalo ajum̃a aberverii vite novo napano Yesu milαιο, mia Yesu ber iliano tai ka kanano naiagagoano nalo. 44 Naio ber kalo, berinavo “Kamiau kuvije tiliniemiu rivu ka kanaku iliano nei, kamiau kuvidu vatitigio toa kenemiu jidomiano nalo, ka mia tiniemiu ribobogia re bereio bogo tai. Nao, kiniou neber batitigio ban kamiau, Atua miila kiniou jibe Kulorinio Kenerinio, mia vaataro naruei ka mia adu kiniou navan ea tomu nalo jum̃alo napano mia ala bin kiniou nam̃aro.”

45 Mia naiagagoano nalo maka ajog lubar vo venia napano Yesu jom̃a berii kalo, jibe ka nioti nene joluku kia ga vo, mila maka ajikia ka avitilubarario, a amerou bunu ka avika batitig den Yesu tivelinio ka iliano nene.

?Toro kei naio loa laka ka kulo dolu nalo?

Mataiu 18:1-5; Mak 9:33-40

⁴⁶ Mia iorou, ana baravo tai moluo iviso bure naia-gagoano nalo, ka mia kei naio to mave ka nalo dolu.

⁴⁷ Mia Yesu mijikia kialo jidomiano nalo, naruei naio bio kiritete tai napano jo miel binime i kano, naruei naio midu kiritete nene ji ju tivelinio ka naio, ⁴⁸ ana naio ber kalo, berinavo "Toro napano kiano jidomiano batove ka kiniou, mo naio saaro ka rije v kiritete nei, nina javukia ga napano naio jaaro ka rije v kiniou. A toro namā jaaro ka kiniou, jibe ka napano naio jaaro ka nana miila kiniou nebinime i. Nina bior nana ka kami u napano kiano jidomiano rivatove laka, naio naruei napano mia naio loa laka ka kam nonovio."

"Toro na maka riverbure kito, naio jomā mii ja kito"

⁴⁹ Ana Jone ber ka Yesu, berinavo "Tubo, kumemi numial toro tai, napano naio jomā mijil bulag si māro nalo, naio jo mijil bulaglo ea siamo. Mia toro nene, kumemi maka nu vijikiaio, naio maka ve kito tai, naruei kumemi nuberbureio."

⁵⁰ Mia Yesu berkanio, berinavo "Makanio, kami u kuverbure re naio, bior toro napano maka mā riverbure kito, naio jomā mii ja kito kiana."

Yesu jidomial ka vaataro ka monoka naio rivavin ea vio Yerusalemo

⁵¹ Mia Yesu bitilubar ka vonganei, vaataro ka mia

Atua rivuru naio rivavin bereio tiniabene, naruei naio midu vatitig kiano jidomiano ruei ka kiano māarabo monoka rivavin mave Yerusalemo. ⁵² Ana na nalo aju amiel abano, ana Yesu miila kiano atevi nalo ajukamu, aban ea māarkomeli tai na kulo Sameria kialo, ka ayomon vite nonovio rimemedu ka mia naio mijikia rime i iorou.

⁵³ Mia nalo na vio na, maka asidom Yesu nalo amei jouro ea kialo vio, bior nalo maka atumā tiniel tii ka aija kulo Ju nalo, napano ajumā ajel ea kialo vio na abavin Yerusalemo.

⁵⁴ Tilikiti napano naia-gagoano juo nei Yemesi naio Jone naljuo amial ka napano nalo ajumā aberburelo jibe na, abika den Yesu, aberinavo "Tubo, kojidom nubolkouo, nuvio sebi tai taluvo ea vio mave rivatove sisen tanea nalo na?"

⁵⁵ Mia Yesu naio bilig naio banlo, berbure kialo jidomiano na jikili nei. ⁵⁶ Ana naio jukamu kalo, maka bunu ava jouro ea vio nei, mia amiel ga aban ea komeli dolu tai.

Toro napano naio jakisor Yesu, maka rijikia siraragdi bereio

Mataiu 8:19-22

⁵⁷ Tilikiti napano aju amiel ea māarabo abano, toro tai binime i vaataro ka Yesu, naio berkar banio, berinavo "Mia kiniou natakisorso, ea

vio na vabe na jau kavan eaio.”

⁵⁸ Ana Yesu berdoŝe banio, berinavo “Kuli deden nalo abe m̃alo bulukupili na amon eaio, a menu nalo abe m̃alo niuku nalo. Mia kiniou Kulorinio Kenerinio napano nebinimej tiniabene, maka ve kiaku vio tai, ka mia nava nomon eaio. Ver jau kajaaro bunu ka meuliano na jibe na, jau komijikia komei.”

⁵⁹ Ana ea bogo nei, toro dolu tai, Yesu berkanio bunu ber rimej takisorio, ana naio berdoŝe banio, berinavo “Tubo, bo ga, mia jau kajamo ka kiniou navan nevitikar kanaku tormoruo beamu vo, mia ver naio riṃaro bogo tai, mia kiniou nemej bereio natakisorso.”

⁶⁰ Ana Yesu ber ka naio, berinavo “Jau kotuvan tomu nalo napano maka ajev meuliano vo ka mia aṽa ativin kanalo tomu na aṃarm̃aro. Mia jau, komej ga, rava roiololu ka Atua kanano nave-natuboiano.”

⁶¹ A dolu tai bunu mila soŝeiano jibe nei, naio bika den Yesu, berinavo “Tubo, mia kiniou tulaka ga natakisorso, mia vite tai ga, kiniou nojidom ka jau kajamo ka kiniou nava never bogiano bo van nalo na ea kanaku vonuo beamu vo.”

⁶² Ana Yesu ber iliano tai banio jibe nei, berinavo “Toro naṃa joṃa jidom m̃lea kanano vonuo a kiano saba nalo nonovio nei, naio jibe toro naṃa jelanvu ka uako, a julaka joṃa jiraragdi. Toro na

jibe na maka rivare ka rimej ve toro na Atua kiano navenatuboiano.”

10

Yesu miila bulag tomu miroano ka aveve juo ava aioliolu

Mataiu 9:37-38, 10:7-16, 11:20-24

¹ Ana ea bogo na, kiado Tubo bitiri bulag kiano naiolioluan tealo berejo. Nalo duelimo va aluo ba juo [72] abiniu, a naio joṃa jidomii ka mia rila lo ava atukamu ka naio, ava aveve juo ea m̃arkomeli a ea vio nalo napano mia naio rivarlaka ealo iorou. ² Naio berlogloglo jibe nei, naio berinavo “Be sinaniano miroano laka ju mermeruo ea tiniavio, mia tomu nalo maka ve telabo aju abarvar bijilo binimej vonuo. Kamiu monoka kuvika sikili van boru na tiniavio nene, ka mia naio riila bulag tomu ta bunu avan ka avarvar sano sinaniano nene nalo rimej. ³ Ver tibe na, mo kamiu monoka kuvidu kenemiu m̃arabo kuvano. Mia bo kanio kamiu kuvitilubar ka nemiila kamiu kuba tavio, jibe ka napano kamiu kumitavukia nunu solbouo nalo, napano kumituṃa kuba tavio ka mia kuviniua buruṃara kuli deden nalo. ⁴ Bogo na ver kamiu kuvano, mia kuvar re siveu na kenemiu puruveru, mia kuvar re kenemiu basaro nalo, a kuvar re kulubue na jaamiu tai bereio. Mia kuviel

yauo ga tibe na kuvano, kuvitukunu ãilipili re ea m̃arabo van tomu nalo.

⁵ “A bogo napano kuvano-o kuviyotuba ea yimo na vabe, vite na be moti ka mia kuverenio, kuver tibe nei, kuverinavo ‘Tuñaro toa vonuo nei.’ ⁶ Ana verenio toro na toa vonuo nei naio tinien tii ka tuñaro, mia tuñaro neibano kuberenio mijikia to vija naio, mia verenio ve re toro tai tibe na, mia tuñaro nei rimei ea kamiu bereio. ⁷ A kamiu kuvitatan ea re yimo nalo, mia kamiu kuvitua ga yimo ve takurano nei ga, mia kamiu kuvisaaro ga ka kumisen sinaniano vaio ãeli na kumunu vaio na avar rimei asian van kamiu. Kamiu kuvimou re ka kuvijev vite novo vaio napano ajidom ala van kamiu, bior memedu ga ka toro na im̃auano monoka rivar kiano ijaiano ve telisu.

⁸ “Tibe na, m̃arkomeli na vabe na kuva kuviyotuba eaio, ver asaaro ka avitika kamiu, mia monoka kamiu kuvisaaro ka sinaniano vaio napano mia asian van kamiu, ⁹ a mia kamiu monoka kuvieliel ka tomu na mieiano nalo na vio nene, a kamiu kuvijikia kuver kalo, kuver ‘Vonganei, Atua kanano navenatuboiano binimei vaatara ka kamiu, vonganei Atua jo binimei ka ve kenemiu Tubo naruei.’

¹⁰ “A bogo tealo mia kamiu kumalmaluvo ea m̃arkomeli tai, mia nalo asaaro re ka mia avuru

kamiu kuva kuvitu kamliko. Verenio tibe na, mia kamiu kuvitakii ga m̃arabo labo kuvan na jel jouro medave ea komeli nene, a kuverial ka tomu nene nalo tibe na, kuverinavo ¹¹ ‘Yevi na m̃arabo na kenemiu vio nei, kumemi numijuba kon bulagio den jaamemi, jibe ka kijokijo tai ka kamiu kuvisidomii. Kamiu monoka tiniemiu ribobogia re, ka vaatara ga ka Atua kanano navenatuboiano riviedu kean kamiu ruei, mia kamiu kumilkue kanio, naruei kumilaluvuio ruei.’

¹² “Kiniou neber riano ka kamiu, ka legiano na tibureiano, mia nalo na jibe na avar vironiano nana jikili loa tovulu nana mia nalo na bulukomeli na Sotomo re nua mia nalo avario.”

Yesu berii nalo nam̃a maka amonea naio

Mataiu 11:20-24

¹³ Naruei Yesu mil jikili ban tomu nalo ea vio tealo, berenio berinavo “!Kulo Koroſin, bija kulo Betsaeta, kamiu kumila lelan kamiu toru liki-e mia! Ver kulo Taia vija kulo Saiton nalo aial kijokijo neibano kamiu kumialio ruei nei, mia nalo aviliglo nua ruei. Nalo maka ave kulo Ju, mia nalo aya m̃adabake ga a avuku bulukievi ea pariparilo ruei, nalo atutano atu tibe na ka tomu nalo avitilubar ka nalo amijog bova toru riano bior kialo kariano nalo. ¹⁴ Kiniou neber ka kamiu, ea bogo na tibureiano, mia kenemiu

vironiano tovulu napano ve nalo nei kanalo.

¹⁵ “!A kamiu kulo Kape-neam, napano kubarvar ka kamiu m̃ele, napano m̃a kumisidom kumijalar kamiu ka kumitu mave levlevi, kamiu kuvitikar kamiu! Mia Atua rivuku bulag kamiu kuvatove laka ea bulukuti sebi.”

¹⁶ A Yesu ber bunu ka nalo, berinavo “Toro napano verenio ka mia naio rudukar kamiu, naio jo midukar kin-iou, a ver toro napano maka sidom kamiu, naio jo maka sidom kiniou, a ver toro na maka sidom kiniou jibe na, naio jo maka sidom toro na toru napano naio miila kin-iou nebinimej.”

Naruei bija iliano na, Yesu miila kiano naiolioluano nalo abatavio ka ala im̃auano.

Naiolioluano nalo abinimej bereio

¹⁷ Naruei naiolioluano nalo nei aba amila im̃auano novo nalo telabo, karina iorou kanio ana abinimej bereio ea Yesu, napano tinielo bujo laka ka saariano ka vite nalo napano m̃a amilaio. Abinimej bereio aber ka Yesu, berinavo “!Tubo, kumemi numim̃auka vite nalo ea siam̃o bano-o bokar napano sim̃aro nalo bunu ajutano ka kumemi!”

¹⁸ Ana na Yesu berdoṣelo berinavo “Ee, kiado im̃auano jibe na naruei. A kiniou bunu, nemial Sim̃aro jumolu den tiniabene, amiila deven naio mijoru

batove jibe ka viobijiio tai. ¹⁹ Vonganei, kiniou nomijamo ka ban kamiu ruei, ka kamiu kumijikia kuvivikar maro a buruolu, a moroano na kiado uolu kiano naio totano ka jaamiu bunu, ana mia ve re titai rijikia re rila bulag kamiu. ²⁰ Mia kamiu kuvarvar ka kamiu re ka vaio napano kiniou nemijamo ka ban kamiu, napano niununo va nalo ajutano ka kamiu, mia be vite takurano ga napano kamiu kumijikia kuvujo ka saariano kanio, nina napano siemiu nalo, ajirikakarlo aju joomo ea niosi na meuliano ruei.”

Yesu ber siva ban karam̃ano

Mataiu 11:25-27, 13:16-17

²¹ Mia ka bogo nei, Yesu bolkouo, berinavo “!Teta o, Tubo na vio mave a Tubo na yetemeriba! Neber siva banso, bior vite nalo napano ea tivelinio na kiniou, jau kobisiṣeio banlo napano kialo jidomiano jibe ka kiritete nalo ga, mia nalo napano ajidomii ka abe m̃asou laka, bija nalo napano ajidomii aber amijikia vite, mia jau komilavan vite nalo nei kalo. Riano, Teta, ninei javukia ga nana jau kojidomiio.”

²² A Yesu ber bunu berinavo “Karam̃aku mijamo ka vite nonovio jua jum̃aku ruei. Teta naio ga takurano napano mijikia batitig kin-iou ka nobe kei, a kiniou napano nobe kenerinio, kiniou

ga takurano napano nomi-
jikia batitig naio, ka naio be
kei. Kiniou bija nalo na-
pano nebijauia bulaglo abe
kanaku, ka mia nesiloglog
Teta kalo ka mia avarkar
tinielo eaio, kumemi naruei
numijikia batitig naio ka
naio be karimememi.”

²³ Naurei Yesu barþilig
ka kiano naiaga-goano
memedu nalo, naio mijuval-
uva banlo bare ka nalo ga
ajogio, naio berinavo “Atua
mila bo ban kami, napano
kumijikia kuvial vite nalo
na. ²⁴ Naverialiano telabo
a parinio tubo telabo re nua
napano ajidom mēlea ka aial
vite nalo na, mia maka aial
kija bogo tai, a abijuku kouo
ka ajog vite nalo na bunu,
mia maka ajog kija leleio.”

*Jamerijiano na toro na vio
Sameria tinien miia toro Ju
tai*

*Mataiu 22:34-40; Mak
12:28-31*

²⁵ Mia bogo tai bereio, toro
tai napano be māsou bo ka
tuboiano, naio jidom rijuku-
juku Yesu ea vikadeniano
tai na kirisikili, naruei naio
jumolu ju, bika den Yesu,
berinavo “?Naverloglogiano,
verenio kiniou nesidom
nalavon ka navokar meuliano
napano maka ve jukuti
nene, mia kiniou monoka
nala tumabe?”

²⁶ Naruei Yesu berdoþe
banio, berinavo “?Mia kiado
Niosi Lu naio ber venia ka
tivelinio na? ?Jau kobuluku
komialio ber jumabe?”

²⁷ Ana na toro neibano
berdoþeio berinavo “Niosi
Lu ber jibe nei, berinavo:
Atua Soþi napano naio be
kiamo Atua, jau monoka
tiniemo tii naio, kodu naio to
tukamu ea kiamo iviso mo-
mou, a ea kiamo meuliano
momou, a ea kiamo sikiliano
momou, a ea kiamo jidomi-
ano momou, a jau monoka
tiniemo tii nalo napano aju
vaataro kaso, jau kovijuku
rivu kalo, tavukia napano
māa tiniem jiiso.”

²⁸ Ana Yesu berkanio, beri-
navo “Nao, jau kober kir-
imemedu tanea na. Mia ver
jau kala tibe na, mia jau ko-
vokar meuliano na kojomāa
kobikanio na.”

²⁹ Mia tete nei nao mi-
jikia ka naio maka tomāa rila
rimemedu tibe na, mia naio
jidom rila soþeiano, naio
bika den Yesu, berinavo “?
Ana be kei nalo napano māa
ajuju vaataro ka kiniou, na-
pano kiniou monoka nala
rivu kalo?”

³⁰ Naruei Yesu berdoþe
kiano vikadeniano nei ea
jamerijiano tai, napano naio
ber jibe nei berinavo: Toro
tai, bogo tai naio juvan vio
Yerusalemo naio jo miel ba-
tove yako Jeriko. Naruei
naio jomāa miel ba bokar
vio kouo tai, naruei naio
miilo ka taara tai na tomu
nalo na vinauano, napano
abiako eaio, amue tanea,
naio, abar bulag nonovio
kiano saba nalo, ana aburo
kilkil, napano ajuvan toro
nei māruiulu mijoru joa kiano

m̃arabo togio. ³¹ Ana kanado toro lu tai, naio bunu jo miel naio iorou kanio ea m̃arabo nene, ana bogo na naio binimeĩ vaataro kean toro neibano, naio ju p̃ilig kanio jel ea ikim̃arabo tivelinio ka ga bano, naio miel barlaka denio ban ga. ³² Ana iorou kanio, ana toro dolu tai miel binimeĩ. Naio be Livai nalo tai na, napano ajum̃a amila im̃auano nalo nonovio ea Atua Kunuano Lu, mia bogo na binimeĩ bokar toro nei, naio bunu maka sidom rijai naio, naio miel ga barlaka ban ea ikim̃arabo tivelinio ban ga. ³³ Mia iorou ka bereio, toro dolu tai, napano naio jo miel ea kiano burutili m̃arabo na, naio binimeĩ. Naio be tete re Same-ria tai, naruei jibe napano romijikia, nalo nene abe bil-bilu va toru naliko kito kulo Ju nalo. Mia bogo na naio binimeĩ bokar vio na, mial toro na m̃ariulu mijoru mon ea m̃arabo, mia tinien miia naio toru.

³⁴ “Mia naio binimeĩ vaataro keanio, ana jekon batitigio kiano niajebijo nalo, a mia titikivaka ealo, a bitakar batitiglo bo. Naruei naio burular toro nene jumolu, midu jotano mon mave ea kiano togki taakano, ana miel ka bija naio bano-o abinimeĩ abokar vio tai napano be yimo na jilimebiano tai joaio. Ana naio buru toro neibano ba joomo ea vio nene, miija batitig naio bo mia bo laka.

³⁵ “Mia kavijo, ana naio

bar kanano puruveru tai, bar ban boru na yimo na jilimebiano nei, berenio berinavo ‘Kiniou monoka navan ea kanaku m̃arabo, mia toro nei toa jum̃amo beamu vo. Kovitika batitig ka vite nonovio, a verenio puruveru na rivare re, mia kiniou nevitiĩ bereio ka bogo na nemei nei bereio ea kanaku ieliano.’”

³⁶ Naruei Yesu bika den toro neibano bika vikadeniano nei denio, berinavo “? Jau komial tukunu nei jum̃abe? ? Ka nalo tolu neibano amiel ea m̃arabo napano toro nei jo mon eaio, na vabe kalo mila banio jibe ka napano naio be toro tai napano jo vaataro ka naio?”

³⁷ Ana na toro nei berinavo “Peli nana tinien mi-iaio.”

Mia Yesu ber ka bereio, berinavo “Ee naio nao, a jau bunu, jau kava kataki kiano bajago novo na.”

Marita naio Mere

³⁸ Mia ka bogo na, Yesu naliko kiano naia-gagoano nalo ajum̃a amiel abavin mave Yerusalemo, naruei nalo amalmaluvo ea m̃arkomeli na telisu na Betani, ana ea vio na tira na Marita naio buru Yesu ban ea kialo vonuo. ³⁹ Mia bogo na Yesu ba jo bijalo, ana Marita nene kuluene tai, siano Mere, naio jotano kamu ka Yesu jaano, naio jom̃a miagago ka kiano verloglogiano nalo. ⁴⁰ Mia ka bogo na, Marita maka tovon ka riagago, naio jom̃a

bukudeli toru ka rila vite nonovio riviniu tu vatitig rorea Yesu, a naio jo jidomii bijovijon ka iñauano nalo nei. Mia iorou kanio, ana naio binimei mial Mere naio jomā jotano, naio jomā miagago ka Yesu, naruei naio ber ka Yesu, berinavo “Tubo, kulueku na naio jotano kurano ga jumabe na, napano kiniou ga takurano nojomā nomila vite nonovio nalo. Peli jau maka koto kovitilubar koviobo, mia bo kanio jau kover ka rimei riija kiniou.”

⁴¹ Mia kiado Tubo berdoŋe naio berinavo “Marita, jau kobe tira tai nañā kojo kojidom bijovijon vite mēle, a jau kojomā komijog bova mēle ka vite telabo na jibe na. ⁴² Mia be vite takurano ga jo ka mia jau kosidomii ve temi kanio, a vite nene Mere nei naio jo mileal ruei ea kiano meuliano, mia maka nejikia nodu lario den naio bereio.”

11

Volkouano nañā Tubo berloglog ka kito

Matai 6:9-13

¹ Bogoti tai, Yesu ba bolkouo ea vio tai, avona bisi, ana naio binimei bereio, ana na kiano na-iagagoano nalo tai bika denio, berinavo “Tubo, bo laka ka ver jau kalavon ka koverloglog kumemi ka kumemi bunu nuvijikia nubolkouo, tavukia na Jone berloglog kiano naiagagoano

nalo beamu ka abolkouo tavukia naio.”

² Ana Yesu mijamo kanio, naio berinavo “Mo, ver kami kuvisidom kubolkouo, kami kumijikia kuver tibe nei, kuverinavo:

‘Karamememi, memedu ga ka kumemi nuvitu nuvatove ka siamo lu.

Kumemi nubolkouo ka kiamo nave-natuboiano rimei.

³ Kumemi nubika denso ka kavar simemi sinaniano na banei a legiano nonovio.

⁴ A koviekokoa kumemi rivior kenememi kariano nalo, bior nañā kumemi numitumā nubiekokoa nalo nañā abijuku bova ban kumemi.

A jau kotuvan re vite nalo alavon kumemi mēle.”

Jamerijiano na vikaniano na vite

⁵⁻⁶ Mia Yesu naio jidom ka nalo monoka amerou re ka avika vite den Atua, naruei naio ber jamerijiano tai banlo, berinavo “Verenio ka bogiano vio vare, kei-ilo ka kanamo bilbilu tai napano miel binimei boru ea kanamo vonuo. Mia samo sinaniano maka bunu tai rito, mia monoka jau ketikiti kavan ea tai na kunuano jo vaataro keanso, monoka kovika sikili denio, kover ‘Koig, bilbilu tai miyotuba ka kiniou vonganei ga, mia kiniou nebe deio riano. Maka bunu ve titai leleio ka mia nomijikia nodu rivian naio ka mia senio. ? Jau samo sinaniano tai beva

ju kovio napano komijikia kajamo kanio van kiniou beamu vo?"

7 "Mia jumabe, rojidomii rober p̃eli mia toro na mijikia riverdoṑe, verinavo 'Ee koig, jau kala m̃elea re kiniou tibe na. Jau keialio, kumemi numituboniko m̃aratavo ruei, mia kumemliki kiritete nalo, kumemi numitua mememi jogu nalo ruei, naruei maka bunu nejikia notumolu bereio.' Mia toro na maka rijikia river tibe na."

8 Mia Yesu naio jusol tukunuano, ana naio ber kalo, berinavo "Peli bogo tealoro tai rijikia sidomii iakurano ka riijaso bior jau kojo vaataro ga ka naio. Mia ver jau koiṃau re ka kovivika sikili denio vano-o, mia monoka sian vite venia napano m̃a kojo kobivika banio."

Yesu berii navikadeniano na vite den Atua
Mataiu 7:7-11

9-10 Mia tibe ka kiano jamerijiano Yesu ber bunu kalo berinavo "Toro na ver joṃa bika vite, julaka mia naio mijikia rijeio, mia verenio toro na joṃa jirag vite julaka, mia naio mijikia rilealio, mia ver toro na joṃa miniania m̃aratavo julaka, mia m̃aratavo nene mijikia rivetavo kanio. Tibe na, mia kami kumijikia kuvar vite nalo naṃa kumitum̃a kubika denio, a mia kami kuvileal venia na

kami kumitum̃a kumisiragio denio, a m̃aratavo naṃa kumitum̃a kuminianiaio mia naio rivetavo ka kami. 11 Ver kenerimo tai siserio, naio rivika niado sesa na jo, mia maka kejkia kodu maro tai vanio, 12 p̃eli na ver rivika boboti tu na jo, mia maka kejkia kodu buruolu rivan naio ka senio. 13 Be riano ka kami kube tomu na kirivova ga nalo, mia maka kami tai mijikia rila tibe na, kami kumitu kumisaaro julaka ga kaṃa kumisian tonovo nalo ban kenerimiu nalo. Jibe ga na, bogo napano kami kumitum̃a kubika den karamemiu na tiniabene, naio jaaro ga ka sian Niununo Lu van kami kenerinio nalo."

Aberenio Yesu miṃau ea Siṃaro kiano moroano
Mataiu 12:22-30; Mak 3:20-27

14 Ana iorou kanio, ana aburu m̃arabo ka toro tai na siṃaro ban ea naio binimeṃi ban Yesu, siṃaro nene mila toro nei maka ril, mia Yesu mijidiglar siṃaro nene denio, naruei naio mil bo bereio, mila ana nalo napano amial vite nei amiilo toru laka. 15 Mia nalo tealoro amijoku, naruei nalo aberii niegeniege Yesu, nalo aberinavo "Tete na naio joṃa mijil bulag siṃaro nalo ea ga moroano na siṃaro nalo kanalo tubo, napano siano Belsabel, naio mijamo ka ban naio." 16 A nalo tai bereio, ajidomii bova bunu ka Yesu, naruei nalo ajum̃a

amilavon naio, nalo ajidom ala luṗiluṗi naio ka naio rila kijokijo tai ea moroano na vio mave ka amijikia aialio.

¹⁷ Mia Yesu mijoglubarbar kialo jidomiano nalo, ana na naio berinavo “Ver tubo tai, kanano tomu nalo avuruburelo, napano mia togio atuṗelo ka togio dolu, mia tubo nene kanano imāuano nalo monoka atibirbil. A ver vonuo tai, atuṃa avuruburelo napano togio sidom rijil togio dolu, mia nalo na maka ajikia atu rivu bogo tai. ¹⁸ ? Jibe ga na bunu, ver siṃaro nalo na Setano kanano atuṃa avuruburevurelo ruei, ana mia navenatuboiano na Setano kanano tumolu tu tumabe? !Ana kamiu kumituṃa kuberinavo jibe na naruei, ka kuber kiniou nojomā nemijil bulag siṃaro dolu nalo ea moroano na burumāra siṃaro na Belsabel kanano, mia maka rijikia tibe na leleio! ¹⁹ ? Mia ver tibe ka naṃa kamiu kuberenio, jumabe naruei ana kam tealo bunu ajumā amijil bulag siṃaro? ? Kei naio mijamo ka moroano na banlo, ṗeli Setano bunu ga bo? Bo ka ver kenemiu naiagagoano nalo naṃa ajumā amijil bulag siṃaro nalo ajog kenemiu iliano nalo. ²⁰ Mia makanio, kamiu kuber nina maka rimemedu na. Mia kiniou nojomā nemijil bulag siṃaro nalo ea moroano na Atua jumano ga, mia vite na berialio ka Atua kanano nave-

natuboiano naio ju iviso ka kamiu ruei.

²¹ “! Kamiu kuvialio! Jibe kanio napano ver torkouo tai, naio rivar kiano saba na mira nalo, a tukuku vatitig ka burumāra kunuano. Naruei, vite nalo na toru nei kiano aju bo ga jouro ea kanano burusio. Naina naruei Setano kiano imāuano jibe na naruei. ²² Mia ver torkouo dolu tai rimeī napano naio ṗirinio jikili loa naio, mia naio rila mira kanio-o tuvulu Setano, ana mia naio mijikia rivar bulag vite nalo na mira na be kanano, napano beamu barkar tinieno eaio, a naio mijikia rivar vite nonovio napano ju jouro ea burusio na torkouo kanano, tan kalo van kanano tomu nalo.

²³ “Toro napano maka takisor kiniou, naio jo berbure kiniou, a toro na maka rimāu vija kiniou ka kumemi nuvuru kanaku tomu nalo amei vio takurano, naio jomā mijil dedade ealo abeve terakurano.”

Niununo va naio mijikia binimeī bereio

Mataiu 12:43-45

²⁴ Ana Yesu ber bunu, berinavo “Bogo tai, bogo naṃa amijil lar niadu den toro tai, niadu nene mijikia riva yeturu ka sirago kunuano dolu tai. Mia ver rileal re tai, mia naio riverinavo ‘Ee, mia nalavon ka navan bere ea kunuaku moruo na beamu vo.’ ²⁵ Mia bogo napano naio binimeī, mia rileal ka yimo nene meravo bo jo, abar

batitig vite nene nalo biniu ju memedu bo ruei. ²⁶ Ana mia naio rivan rivuru niadu ve aluo dolu napano nalo abova loa naio lie vo, amei vija naio, ka na mia nalo ava joomo bereio ka atua toro nene. Ana toro nene, beamu kiano meuliano bova, mia iorou kiano meuliano bova bova laka.”

Marabo na avokar saariano na be riano

²⁷ Ana ka bogo na, tira tai jo naliko nalo napano ajumã amial vite nalo nei, napano m̃a amijog Yesu kanano iliano, naruei tira nei jaaro m̃ele kanio. Mia naio miaga m̃erere laka naio berinavo “! Aiou liki! Koniomo napano bariso, midu yu banso, Atua kiano ilivuiiano ve toru laka toa naio, napano bar tete tai jibe ka jau.” ²⁸ Mia Yesu berdoŋe ban naio, berinavo “Nao, nina be riano na, mia kiniou neber ka jau ka mia Atua kiano ilivuiiano rimeĩ ve toru lie bereio vo van toro kei napano naio monmonea Atua kiano iliano nalo, naio mila venia napano naio jo m̃a berenio.”

Tomu na ajidom aial kijokijo

Mataiu 12:38-42; Mak 8:11-12

²⁹ Ana ka bogo na, tiniobi nalo nam̃a amiagago ka Yesu nalo aju abinimeĩ telabo lie vo, mia Yesu naio mijikia ka nalo miroano kalo nalo abinimeĩ ka ajidom aial kiano kijokijo nalo ga, ana naio mil banlo, berinavo “Kiniou

nemial jibe ka tomu nalo na taara na kenemiu banei abova laka. Nalo aju ajidom aial kijokijo toru laka, mia makanio, mia Atua maka rijikia sian kijokijo tai leleio vanlo. Mia naverialiano Jona, kiano kijokijo re nua ga, nina ga mia amijikia aialio. ³⁰ Atua miila Jona, jibe ka kijokijo tai ban nalo na vio Nineva re nua ruei, ana naio miila bunu kiniou Kulorinio Kenerinio nebinimeĩ jibe kijokijo tai ban kamiu na vonganei.

³¹⁻³² “Mia kulo Nineva re nua napano amijog Jona kiano iliano nalo, abiliglo ka bogo nene, a mia nalo na atumolu ea legiano na tibureiano, mia aver bulag rimemedu kenemiu torokoriano nalo, bior be toro tai napano naio loa laka ka Jona naio jo bija kamiu, mia maka kuvilig kamiu.

“Nanua bogo tai bunu tira na toru tai na naio be parinio tubo tai napano naio jumolu ea kiano buruvenuo, napano jo koalabo laka, naio batove binimeĩ ka rijog tormoruo parinio tubo Solomon kiano ilimasosouano. Naruei tira na toru nei bunu mia naio tumolu tu ea legiano na tibureiano, naio river bulag rimemedu kenemiu torokoriano nalo, bior be toro tai napano naio be masou loa Solomon naio jo bija kamiu, mia kamiu maka kuvisidom naio leleio.”

Kijokijo juo ea tivelinio na

yulu

Mataiu 5:15, 6:22-23; Mak 4:21; Luka 8:16

³³ Mia Yesu ber bunu, berinavo “Bogo na ver rejelan yulu, kito maka retelan ka mia rava roduvanio toa bututanbo tai ea borotano, ŗeli na mia kito reivekoio ka basaro tai bereio, mia kito rejelanio ka mia reiveio takilele mave, ka mia ver toro na rimei mia mijikia rial ka yulu mereralii vio nonovio biniau.”

³⁴ A Yesu ber bunu, berinavo “Toro mirano naio jibe ka vio takurano napano yulu mijikia mereraliio binimej joomo ea mokotenano. Tibe na, ver miramo rimeravo rivu, rivitii batitig vite nalo, mia tibe ka napano tiniemo bujo magmago ka yulu. Mia verenio miramo riovova, tinie jii vite nonovio namā jomā mialio, mia jibe kanio napano tiniemo bujo magmago ka melijokouo. ³⁵ Tibe na, mia kamiu monoka kuvitakar rivu, ka yulu napano joa tiniemiu rimei re bunu tibe ka melijokouo bereio. ³⁶ Mia ver tiniemiu rivujo ka yulu tulaka namāriga, napano maka ve melijokouo tai ve telisu toaio, mia kenemiu meuliano rimerera vatitig rivu, rudulii vatitig vio nonovio rivu.”

Yesu mil jikili ban navurimāraġoiano na nalo-tuano nalo

Mataiu 23:1-36; Mak 12:38-40; Luka 20:45-47

³⁷ Mia Yesu mil ban tiniobi nalo bano-o, naruei Varisis tai napano jomā miagago kanio ber ka Yesu berinavo mia rivuru naio rivan ea kunuano, ka rila sano sinaniano tai. Ana na Yesu ban bija naio, mia bogo na sinaniano amiomon ju, Yesu ba jotano ea vio na sinaniano. ³⁸ Naruei ka bogo nene, Varisis nalo abokar jikili kialo tuboiano tai ka toro monoka takii mārabo tealō ka mā sekon jumāno karina mijikia sinano. Mia Varisis nei naio jidom ber Yesu naio be toro lu tai, naio monoka rila tibe ka napano kialo bajago na jikili nei berenio, mia bogo napano naio mial ka Yesu maka sidom bijon ka naio rilaio, naio miilo toru laka kanio. ³⁹ Ana Tubo mil ban toro nei, naio berinavo “Kin-iou nemijikia kenemiu bajago kamiu Varisis nalo ruei. Kamiu tiniemiu jii mēlea ka mā kumisekon vatitig rivu damāriga kenemiu baja nalo a kenemiu baju nalo, ana kumitumā kube mārōu kanio, kumitumā kuberianā kamiu kumeravo, a kube lu. Mia burumāra niamiamo na bijurukar kamiu kiano, bior kenemiu iviso nalo abujo magmago ka mā kumijukubin toro, a kumila kiki toro, a bajago nalo na kiriovova jibe na. ⁴⁰ !Ai, abe mia mā kuviavovu mēlea re tibe na! ? Kamiu maka kuvitilubar ka Atua namā jii vatavio na vite nonovio, naio ji bunu vajoomo na vite nonovio, mia bo laka ka

ver kamiu kuvilakon nono tivelinio na kamiu rimeravo rivu ve riano, vativio a vajoomo bunu. ⁴¹ Tonovo nalo naŋa kamiu kumituŋa kumisonlo toru bogo nonovio ban ea kenemiu baju nalo a bija kenemiu baja nalo, ver kamiu kuvituŋa kuvilavon ka ŋa kuvio ka kija ga rivan talinŋasa nalo ga, mia rivu. Ver tibe na, ŋeli mia kamiu kuvial ka kenemiu vite nonovio nalo amei rimeravo vatitig ruei, ana mia ŋa kumila bijon re bunu kenemiu bajago dolu nalo.”

⁴² Naruei Yesu berii bajago nalo na juboluboiano na navuriŋaraboiano na nalotuano nalo ba lie vo, naio berinavo “!Kamii kulo Varisis, aua! Kamii kumila bulag kamiu toru laka, mia rivova laka van kamiu. Kiniou nemijikia ka kamiu kumituŋa kubitikar batitig bo daŋariga, ka ver kubar semiu ŋarsinaniano due-limo, mia monoka ve takurano rivan ea Atua kunuano, tavukia na tuboiano najo joŋa berenio, a kumituŋa kumila jibe na ka saba nonovio na be kenemiu, ba bokar bunu ŋasebitu sesa nalo a vite nalo bunu na jibe ka ŋarsili nalo. Mia vite nalo na tomormoruo naŋa tuboiano berenio, kamiu maka kuvisidomialio leleio, jibe ka naŋa ber monoka kamiu kumemedu rivu, a kamiu monoka tiniemiu tii Atua a kulo dolu nalo bunu. Ver kamiu kuvisidom kuvokar sikili vite nalo na tertelisu nei, naio bo ga, mia vite nalo na tomormoruo nei

naruei naio bo ka kamiu kuvituŋa kuvila ruei, mia maka lele kuvilaio.

⁴³ “!Kamii kulo Varisis o! Kamii kumila lelan kamiu toru laka, mia rivova laka van kamiu. Joomo ea yimo nalo na volkouano, kamiu kumisidom ka bogo nonovio kuvitutano ea vio na be tomu na tortoru nalo jelelo ga, a verenio kuviel ea tomu nalo miralo, kumisidom ka avatove ka kamiu, a avio vatitig kamiu, a averinavo ‘Aiou, naverloglogiano novo, kavijo bo!’ ⁴⁴ Mia ve kirivova laka rivan kamiu bior kamiu kube tekurano ga, kumitavukia ŋartanbo moruo nalo na tinielo bobogia ea ruei, amiel ŋilinio mave ea ga, maka bunu ve tinielo ka vite jono tai napano menunun mon tano nei.”

⁴⁵ Ana ea bogo na, toro tai napano naio be masou bo ka tuboiano, naio bunu joŋa miagago, ana mijog jibe ka Yesu kiano iliano bokar naio bunu bija nalo napano amiuŋau jibe ka naio, ana na naio berinavo “!Naverloglogiano, kiniou nomijog jibe ka kojidom keil niegeniege kumemi bunu!”

⁴⁶ Ana Yesu berdoŋe, naio berinavo “!Nao-o, mia rivova van kamiu tomu nalo natuboiano bunu! Kamii kumituŋa kubitiri bulag bereio tuboiano sesa nalo tivelinio ka nalotuano bogo nonovio, nalo ajibe ka vite na teremi napano kumivon kakarlo ea tomu nalo taakalo ka monoka avarlo, mia kamiu kumitu jibe na ga, maka kuvikulkulu

ka m̃arjukujumemiu tai leleio ka rilavon ka riijailo. ⁴⁷ Mia rivova van kamiu, bior kamiu kumituṃa kumiyovovua batitig m̃artanbo na naverialiano nalo na Atua kiano, mia kamiu kubevirare ga ka korobimiu tormoruo nalo re nua, napano nalo naruei amuebinvin naverialiano nene nalo aṃarṃaro. ⁴⁸ Kamiu bija nalo nei kubare ga, bior nanua, tormoruo nalo nei amue naverialiano nalo, mia banei kamiu kumisaaro ka kialo iṃauano nene, kumitusolio bereio napano ṃa kumituṃa kumiyovovua martanbo nene nalo.

⁴⁹ “Kamiu kumitibe ka ga napano ilimasosouano na Atua kiano ber nua, naio berinavo ‘Mia kiniou neiila kiaku naverialiano nalo a atevi nalo aviedu ealo, mia ala lelanlo, ṃeli mia auebinvinlo aṃarṃaro.’ ⁵⁰ Iliano nei sano nioti nene ber mia kamiu naruei kuvokar viro-niano naṃa korobimiu nalo re nua amuebinvin naverialiano nonovio nalo, jikar ka bogo na tikariano na yetemeriba nei. ⁵¹ Nina jikar ea Epel, binimeibokar Sakaraia, napano korobimiu nalo amue taṃaria naio iviso ka boda bija Vio Lu joomo ea Atua Kunuano Lu. Riano, kiniou neber ka kamiu nei, ka vironiano na burukija na Atua kiano naverialiano nalo jua kamiu na vonganei.

⁵² “Nao, mia ve kirivova lie vo van kamiu tomu naṃa amijikia batitig tuboiano,

bior kamiu naruei kumidu van navetavoiano na m̃aratavo na jikiaiano, ana kamiu maka bunu kuvituṃa kuva joomo eaio, a kamiu kumituṃa kumituko m̃arabo ka tomu dolu nalo naṃa ajuṃa amila vio ka ava jouro.”

⁵³ Ana Yesu ber iliano nalo nei bisi ana naio batavio den yimo neibano, naruei naverloglogiano na tuboiano naliko Varisis nalo tinielo bitunu tanea ka naio, napano tiniel mimi laka. Ana na nalo abie soṣor Yesu daṃariga, nalo ajuṃa abika iliano nalo a vikadeniano nalo na jikirkili banio, ka alavon ka ayukuru naio a ka rila naio river iliano tai na maka rimemedu. ⁵⁴ Amiliviko Yesu jibe naio be temeul deden tai, bior ajidom ka aleal kiano iliano nalo tai ka mia amijikia atibure naio riviorio.

12

Ililuklukuano nalo mia amalmaluvo amei medave Mataiu 10:26-27

¹ Ana na tiniobi nalo ajuṃa abinimeibokar Yesu keano vo, ajovulu menu na tomu nalo miroano. Mia bogo naṃa abinimeibokar vio takurano jibe na, vio telisu garuei, napano ṃa ajuṃa amivinkakarlo ga. Ana na bogo na Yesu maka ril vanlo vo, mia naio mil ban kiano naiaḡagoano nalo jukamu, berinavo “Kamiu monoka kuvitikar vatitigio ka Varisis nalo kialo bajago va nalo, bior nalo ajuṃa amil ka

kuluniolo ga, ajumã amil moruo mia amila sibi ga. Kialo bajago va nalo nei amijikia amaluvo rivokar a rila bulag toro dolu nalo, jibe isi na joko telisu ga mia kirisopeli ba mimãu bokar joko nonovio. ² Vite nonovio na bova namãa tomu na jibe na ajumã amilavano, ðeli namãa aber luklukua ga, mia amalmaluvo ea vio medave navo, ka mia aviniu ajikiaio. ³ Iliano vaio namãa toro jomãa berenio ea meljokouo, mia monoka ajogio bereio ea legiano, a vite nalo namãa toro jomãa mijuvaluva kanio ea kunuano ga, mia aiaga m̃erere bereio ea tomu nalo miralo, ka mia aviniu amijikia ajogio.”

Yesu kiano naiagagoano monoka rimerou re ka tomu nalo

Mataiu 10:28-31

⁴ Ana na Yesu ber ka bunu kiano naiagagoano nalo, naio berinavo “Banalo, kiniou neber ka kamiu ka kamiu kumerou re ka nalo namãa amijikia aue tamãaria mokotenemiu nalo ga, karina mia maka bunu ajikia ala titai bereio ka niunumi nalo. ⁵ Mia nejidom neil vatitig rivan kamiu ka mia kumerou ka toro kei? Mia kamiu monoka kumerou riano ka Atua ga, napano mia naio mijikia rila niabemiu rinãaro beamu, karina mia mijikia rivu niunumi bunu rivan ea vio namãa ajog rivova eaio. Lerinio, toro na naruei

kamiu monoka kumerou ka naio. ⁶ Mia ver kumerou kanio, mia kamiu maka bunu kuvijikia kumerou ka todolu bereio, bior Atua jomãa bitikar kamiu, naio jo jidomial kamiu. Kuvisidomii von menu sesa napano kirijako. Nalo miroano laka janea vio ga, ajibe ka soro ga, apiliivilo kalo veru telisu ga ka kirijako jimo, mia Atua jomãa tinien maio kalo abeve terakurano damãariga, naio maka tinien ribobogialo. ⁷ A vijumiu nalo na ea pariparimiu bunu, miroano laka, mia naio buluku nonovlo beve terakurano ga. Mia Atua naio jo mial kamiu kubo laka jovulu kirijako nalo nei, naruei mia naio rivitikar vatitig kamiu rivu ka vite nonovio na kenemiu meuliano.”

Toro na berial ka naio be Yesu kiano

Mataiu 10:32-33, 12:32, 10:19-20

⁸ Ana na Yesu berenio, berinavo “Kei namãa berial kamu ka tomu nalo miralo ber naio be kanaku toro tai, mia kiniou Kulorinio Kenerinio, kiniou bunu neverial siano van nailiano nalo na mave ka toro nene be kanaku. ⁹ Mia toro kei namãa berial kamu ka tomu nalo miralo ber naio maka ve kiaku, mia kiniou Kulorinio Kenerinio kiniou bunu neverial van nailiano nalo na mave never toro na naio maka ve kanaku.

¹⁰ “Kariano nalo bija ilivovaiano nalo, bija iliano nalo namãa mila lelan kiniou

Kulorinio Kenerinio, Atua mijikia riviekokoa toro riviorio, mia toro na ver mila lelan tolu na Niununo Lu, berii Niununo Lu kiano imāuano, berinavo Siñaro ga mimāukanio, toro na jibe na, Atua maka rijikia riviekokoa bogo tai leleio.

11 “A verenio bogo tai, tomu nalo tiniel ser kamiū, mia avan ea ilivatitigiano ka kamiū. Mia amijikia avuru kamiū kuvan kuvitumolu kuvitu kamu ea tomu na tortoru na yimo na volkouano nalo miralo, a ea komeli bunu, mia kamiū kuvisidomial mēle re ka mia kuverdoḡelo tumābe, ḡeli na mia kuver iliano na vabe vanlo. 12 Rimonloglog aura nei ga, mia Niununo Lu ga rijai kamiū, ka riverloglog kamiū ka iliano na vabe na mia kamiū kumijikia kuv-erenio.”

Jamerijiano na toro be sanibaiano napano maka sidomii vatitig kiano meuliano

13 Naruei tiniobi nei napano aju nei nalo tai, naio bio ban Yesu, berinavo “Naverloglogiano, kuruaku naio jomā mijukubin kiniouo mia, naio maka tomā tan ka batitig karamememi jajumāno rivija kiniou. Bo kanio mia jau kover kanio ka naio rila rive verare ga vija kiniou.”

14 Ana na Yesu berdoḡe, berinavo “Ai, abe vite na maka ve kanaku ka nalaiio. Kiniou maka nove toro nana

mia netibure kamiū.” 15 Jibe na naruei ana na Yesu maka rila tibe ka na kema nei naio berkanio, mia naio jian iliano tai tivelinio ka sidom mēlea vite nalo. Naio berinavo “Kamiū monoka kuvitakar rivu, maka rivu ka kuvitumā kuvijoku mēle ka kulo dolu nalo, kumisidom mēle ka kuvar vite nalo na be kialo. Kiado meuliano maka toa vite ve telabo nalo napano na roju rabario, mia kiado meuliano jikili jua vite dolu.”

16 Mia Yesu jusol kiano iliano ea vio na lie vo, naio ber jamerijiano tai banlo, naio berinavo “Toro sanibaiano tai kiano boratano toru laka, a bo laka, naruei kiano tiniavio nalo abar marimeuano toru ealo. 17 Mia tete nei naio mial sinaniano nalo nei, naio maka bunu rijikia mia rila tumābe naruei, ka mia rivar vatitig sano sinaniano nalo nei tua vio na vabe, bior kiano yimo na varvatitigiano na sinaniano bija kiano vio dolu nalo abujovujo nonovio ruei. 18 Ana na kema neibano, berinavo ‘! Mia noue bulag kanaku yimo na varvatitigiano na sinaniano moruo nalo nei, ana mo nomijikia noimāu kanio na be terivou dolu nalo bereio, na mia nalo ave tortoru lie vo, na mia rivare ka sinaniano a vite dolu nalo na miroano nei kanaku. 19 Mia bogo na ver noimāu kanio riviniu, mia kiniou nai al kiniou tibe ka kiniou riano, kiniou nobo kija naruei!

Riano ga, mia kiniou nojog rivu! Mia kiaku saba na miroano nei, mia nesenilo rivano-o mia avitigar vatitig kiniou rivano-o rivokar yuka ve miroano. Ka bogo na, mia noim̃au lele re bunu mia nesen vaio na nojidom, a mia nomunu uei tibe na ga, mia notoa meuliano nabo nam̃ariga na.’

20 “Toro nei naio jom̃a jidom jibe na bano-o, mia naio maka rijikia ka Atua berii ruei ka mia ril vanio naruei, naio berinavo ‘E kodovo, komiavovu ga na, bogiano nei ga, kiniou nojidom nodular bereio kanamo meuliano denso. A vite nalo na miroano nam̃a komim̃au bijon kalo na, nam̃a jau komiobijilo be kanamo na, mia ave kei kiano bereio liki na?’”

21 Ana na Yesu ber kalo, berinavo “Mia tibe na naruei rivan tomu nalo nam̃a ajum̃a abarbijii kialo saba telabo, napano abe tomu na sanibaiano tivelinio na yetemeriba nei, mia maka leleio ave sanibaiano tivelinio na saba nalo na ea Atua.”

Yesu berlubarbar banlo jum̃abe ka toro nam̃a jo jidomii m̃elea kiano meuliano

Mataiu 6:25-34

22 Ana na Yesu ber ka bunu kiano naiagagoano nalo, naio berinavo “Kar tena, kiniou naber ka kami, ka maka rivu ka kenemiu jidomiano rivujo m̃ele ka im̃auano na kuvitigar kami ga, ka na mia m̃a kuvivika, kuverinavo ‘?Mia vio na vabe na mia kito

romijikia releal sinaniano?’ Peli na ‘? Mia rovokar kulum̃arauo na royaio tum̃abe?’ 23 Jidomiano nalo na maka rimemedu, bior kenemiu meuliano naio bo loa ka sinaniano, a niabemiu naio bo loa ka kulum̃arauo. 24 Kuvisidomii von menu maina nalo nam̃a ajum̃a amierier janea vio nalo na. Nalo na maka m̃a aim̃auka kialo tiniavio, a maka avavenei ka avarbijii sinaniano rime i vonuo, a maka avar batitig salo sinaniano nalo tua vio nene tai. Mia Atua jom̃a baganlo, a ea kiano vitiiano, naio mial kami kubo lie loa ka menu nalo, ana mia naio rivitigar kami rivu laka tovulu nalo. 25 ? Kami kuberiaña toro napano jom̃a jidomii kiano meuliano toru laka naio mijikia rila kiano meuliano na bulati na rime i vetebievi kija bere ve telisu? 26 Makanio, maka tibe na, mia bior kami maka kuvijikia kuvila titai na telisu jibe na, bo kanio kami kuvisidom bijovijon re vite dolu nalo na ea kenemiu meuliano nalo.

27 “Kuvisidomii von bu-runiegniegi novo nalo nam̃a ajum̃a amililuo janea vio na. Nalo na maka m̃a atu aim̃au a maka m̃a atulu m̃alo kuluniabele nalo. Mia kiniou naber ka kami, Parinio tubo Solomon re nua, napano naio be nasanibaiano laka, a naio be kiano saba nonovio, kulum̃arauo nalo nam̃a miyaio maka rivar niogniogu na bo tibe ka m̃aniegniegi nalo

nei. ²⁸ Maniegniegi nalo naña abe tena bogoti takurano ga, mia beni ana aisebilo ea sebi, mia Atua jo miyovovualo batitigio abo laka. Jumabe, kuberiamña Atua maka rijikia rivar kulumñarauo van kamiu? Kaleliki, kamiu na maka kuviekar naio sikili leleio a!

²⁹ “Bior vite nalo na, mia maka rivu ka kenemiu iviso rivujo ka jidomiano nalo na, kuverinavo ‘? Tumabe ana na mia rosinan, a romunu, a realeal kulumñarauo?’ Mia maka rivu ka kuvitumña kuvisidomii bijovijon mñlea laka tibe na. ³⁰ Ierinio, tomu nalo reraio na buruvenuo nonovio na yetemeriba neibano ajumña ajidomii mñlea vite nalo jibe na bogo nonovio ga, mia kamiu, karamemiu naio mijikia ruei ka monoka kuvar vite nalo na jibe na. ³¹ Tena be moti ka mia kuvisidomii ve toru ea kenemiu iviso nalo, naio be Atua kiano navenatuboiano. Mia verenio kuvila tibe na, ana na mia naio rivar bunu vite dolu nalo nei rivan kamiu. ³² Ierinio kiaku nunu sesa nalo, karamemiu naio jidom toru ka rijamo ka kamiu kumei kuve tubo ka kiano tomu nalo, ana na mia kamiu kuvisidomial re titai leleio, mia vite nonovio rimej rivu ka kamiu.”

Toro na be sanibaiano tivelinio na Atua

Mataiu 6:19-21

³³ Ana na Yesu ber bunu ber “Bo kanio kamiu kuñiliñili bulag ka kenemiu

saba nalo na, kuvar veru nene van talimñasa nalo ka kuvijailo. Ver kuvitumña kuvila tibe na, jibe kanio kumitu kubar kenemiu burumñara basaro tai joa vio mave, napano mia maka rijikia rimej dagdago bogo tai, a kuvitumña kuvison bijii kenemiu saba nalo na miroano rivan eaio, ka mia kuvarkar tiniemiu eaio, ka mia toro na vinauano rijikia re ka rivar bulagio den kamiu bereio, ñeli na mia sivinia ser dudulio re. ³⁴ Mia bo kanio kamiu ve kenemiu saba novo nalo na atua vio mave tibe na, bior mia kenemiu jidomiano nalo atu tulaka ea vio na ga napano kenemiu saba na bo nalo ajaio.”

Naiagagoano nalo monoka atu vatitigio ka mia Tubo rimej bereio

Mataiu 24:42-51; Mak 13:33-36

³⁵⁻³⁶ Ana na Yesu ber bunu kalo, berinavo “Kamiu monoka kuvitu derevijo tulaka ka mia kenemiu Tubo riyotuba ka kamiu. Kamiu monoka kuvitibe ka tomu namña amimau toro na toru tai kanano, napano naio juvanlo ka ban ea soriano tai. Naruei nalo amiyovovualo, ajelan bunu yulu nalo, ajumormoluaju, mia bogo vaio napano mia kialo toro na toru naio rivoru, naio rimej rinia mñaratavo, mia naloaju rorea ruei, amijikia avetavo kanio vaarakurano ga. ³⁷ Mia burumñara

ilivuiano van tomu nalo naña amimau jibe na, ka bogo napano kialo toro na toru boru keanlo, mia nalo aju rorea ruei, nalo ajevijo aju. Mia kialo toro na toru naio saaro ve toru kalo, ana na mia naio riva riija naio, karina mia rimei mia amiilo ka naio riviolo ka amei atuano ea kiano vio na sinaniano, naio biovio ka sinaniano novo tai banlo.
³⁸ Mia bekurano ka ver vio bobogio ruei, p̃eli na ba bokar bogiano vio vare, p̃eli na vaataro ka tu riolu, mia ver toro na toru naio rimei, rial ka kiano tomu nalo ajevijo aju rorea naio jibe na, mia naio rila vatitiglo rivu-o mia.

³⁹ “Mia bereio be verare ga ka ver toro tai napano mijikia memedu ka bogo na toro na vinauano mia rimei ea kunuano, mia toro nei maka rijikia tuvan kunuano to ga tibe na ka naio riva vio dolu, naio monoka to derevijo rorea naio to. ⁴⁰ Tibe na, kami bu bunu monoka kuvitu rorea vatitig rivu ka mia kin-iou Kulorinio Kenerinio nomaluvo, bior mia nomaluvo ka kami bereio ea bogo tai napano maka toro tai rijikiao, p̃eli na toña sidomii ka mia river nemei bereio eaio.”

Jamerijiano na toro na im̃auano na kiano toro na toru naio binime bereio

Mataiu 24:45-51

⁴¹ Ana mo Pitere bika den Yesu, berinavo “? Tubo, jamerijiano na jau kober vonganei na, jau

kober ban kumemi kanamo naiagagoano ga, p̃eli na kober ban tomu nalo nei ga abiniu?”

⁴² Mia Yesu maka sian verdopeiano nene rimemedu vanio, mia naio berdope ban ea jamerijiano tai. Jamerijiano nene naio jibe nei, ber “Ver toro na im̃auano tai, napano naio be masou bo laka, a naio biekoouo ea kiano im̃auano, mia naio rim̃au tumabe naruei? Ver kiano toro na toru juvan vio ka riva koalabo, mia naio tuvan kiano naim̃auano nalo atua naio jumano. Mia kema nei naio rivitigar kiano tomu na im̃auano dolu nalo, mia naio rivokar vatitig im̃auano nalo nene. ⁴³ Mia bogo na toro na toru naio rimei bereio, mia naio rileal ka kiano toro na im̃auano nei, naio jo bokar batitig im̃auano nalo nene kiano vo. Mia ka bogo na, mia toro na im̃auano nei naio rijog rivu ve toru laka, ⁴⁴ bior mia toro na toru nei naio tuvan vite nonovio na kanano tua jumano. Ierinio, mia Atua rila tibe na ga bunu.

⁴⁵ “Mia ver toro na im̃auano nei naio rim̃au rivova, mia bogo na ver kiano toro na toru nei tuvan vio ka riva to koalabo, mia naio jidom riverinavo ‘E, toro na toru nei naio ba jo yako kirisiou laka ruei, p̃eli mia rimei re bunu naruei.’ Ana na mia naio tumolu rila kiki tomu na im̃auano dolu nalo, a rivijuku rivova ka tire nalo na im̃auano, a mia naio toña sen veru na

toro na toru nei kiano, a riva rimunu uei ea legiano nonovio. ⁴⁶ Ana mia toro na toru nei naio rimei bereio ea legiano tai na mia toro na iṁauano nei naio riilo kanio garuei, ea bogoti tai na mia naio risidom re ka mia boru nei rimei eaio. Ana na mia toro na toru nei sian burum̃ara vironiano van toro nei napano mia rila naio riva toa vio na tomu na pariparilo kirisikili ajuaio.

⁴⁷ “Mia toro na iṁauano napano mijikia batitig venia napano kiano boru jidomio ka naio monoka rilaio, karina maka rilaio, mia monoka avitii vatitig naio.

⁴⁸ Mia toro na iṁauano napano mila na bova memedu ga ka mia avitii vatitig naio riviorio, verver naio maka rijikiaio, mia avitiv naio ve toru re.

“Toro na Atua mije ban naio ve toru, Atua jidom ka rial toro nene riṁau ve toru rivijaio. Mia ver toro napano tomu nalo amije vite nalo miroano monea jum̃ano, mia amijikia avika vite ve miroano lie vo den naio bereio.”

Yesu be burupati na toro naṁa mil die toro

Mataiu 10:34-36

⁴⁹ Ana na Yesu berenio berinavo “Kiniou nebinime i ka noyon sebi rimemedu ea vio yetemeriba nei, mia bo ka ga ver sebi nene rivilvili ruei, ana makan vo. ⁵⁰ Burum̃ara iṁauano kouo tai monokoro jo kamu ka miraku kia navo, ka mia monoka nevija dulu

eaio, mia vonganei notom̃a noṁidig kar kiniou ruei riviorio. Bo ka tenene rimei soṁeli, ka nomijikia nala nonovio. ⁵¹ ? Kamiu kumisidom kuberianaṁa kiniou nebinime i ka nala burum̃ara tum̃aro toa yetemeriba nei? Makanio, maka nemei ka nodu tum̃aro toaio, mia nebinime i ka nala bajago na vuruvureiano rimei ve toru lie vo. ⁵² Mia tikar vonganei, ṁeli ea vonuo tai, tomu nalo jumo ajuaio, ana mia nalo tolu nene avuruburelo ka naljuo nene, ṁeli na juo nene avuruburelo ka nalo tolu nene. ⁵³ Mia tomu nalo avuruburevurelo, ka na mia tete ṁeaku nalo atudie karam̃alo nalo, mia teta nalo atudie kialo tete ṁeaku nalo, mia nena nalo atudie kenerilo niatira vevinio nalo, a niatira vevinio nalo atudie kialo nena nalo, a mia niasimemi nalo atudie niatira na joro vonga ka kenerilo ṁeaku nalo, ana mia niatira nalo atudie keniello niasimemi nalo.”

Monoka avitilubar kijok-ijo na bogo na Yesu kiano

Mataiu 16:2-3

⁵⁴ Ana mo Yesu mil ban tiniobi nalo bereio, naio berinavo “Bogo na kito rotum̃a roial burum̃ara melijo na bobogio joa vio naṁa jegi moluo eaio, romijikia ka mia yuo rimei, mia maka vesiou ga ana na yuo bovo. ⁵⁵ Mia bogo naṁa romijog ka kanado jegi na saot jom̃a miuvuvu, nina naruei romijikia ka mia vio rivitunu ṁele, ana na mia monoka

tibe na ga na. ⁵⁶ ? Nina naruei, kamiu kumitumña kubitilubar ruei kijokijo na vio yauo a yetemeriba, ka mia bogo tumñabe p̃eli mia tumñabe, ana mia jumñabe kamiu maka kuvijikia kuvitilubar kijokijo nalo na ea kanaku burumñara bogo na vonganei nei napano mña nojo bija kamiu? Peli kamiu maka kuvisidom kuvitilubar ga kovio? Tomnei, kamiu kubarvar laka ka kamiu, kuber vite nalo mia maka kuvilaii.”

⁵⁷ “Bo ka ver kamiu kuvilavon ka kuvijikia kuvitilubar kija ka mñarabo na vabe naruei na naio memedu ka kamiu kuvitakiio. ⁵⁸ Verver bogo tai jau kala baravo kam juo toro tai ka titai, mia naio sidom rivurso kavan kotumolu kotu kamu ea toro na tibureiano mirano riviorio, mia bo ka jau kala vio sikili ka keil vatitig rivija naio, beamu ka bogo na kamiu maka kuvoru komeli vo. Ver makanio, p̃eli mia naio ruduso kotoa toro na toru namña jijibure toro jumñano, ana na toro na toru nei p̃eli mia naio ruduso kotoa tomu namña abokakar tomu nalo jumñalo, ana mia nalo aduso kotoa yimo na tetavokoiano. ⁵⁹ Ierinio, kiniou neberii kaso, ka ver tibe na, mia jau maka kejikia kataluvo bereio den yimo na tetavokoiano nene, rivanvano-o mia jau kovulu bulag nono kiamo mauo riviniu beamu vo, ana mia jau komijikia kataluvo

bereio.”

“Mia iliano nei naio be riano ban kenemiu meuliano na yetemeriba nei, a be riano bunu ea tivelinio na kamiu bija Atua.”

13

Ver koviligso re, mia jau kamñaro

¹ Mia tomu nalo na aju ea bogo na, ajukunu ka kulo Kalele tealo ban Yesu, napano toro na toru na Romo nei Pailat mila bajago na kirivova tai kalo. Nalo aberenio “Nalo na ajua Atua Kunuano Lu, mia monloglog bogo na aju amilotu ka Atua, amila sida banio, mia Pailat nalo abinimei amiel binvinlo amñarmñaro, mia amila kitkiti kialo burukija bija burukija na kialo sida neibano ajumña amilaio.”

Naruei bogo na aber vite nei ka Yesu, ajidomii ruei ka vite na bova nei na maluvo kalo, p̃eli be Atua kiano vironiano tai banlo, bior kialo vovaiano tai napano p̃eli nalo amilaio.

² Ana na Yesu berdope banlo, berinavo “Kamiu kuvial kulo Kalele nalo na amñarmñaro kirivova jibe na jumñabe na? Peli kuberianña nalo abe tomu na bova laka, jovulu kulo Kalele dolu nalo, naruei naio be kialo viro-niano ga? ³ Kiniou nojidom nover ka kamiu never makanio, naio maka tibe na. Mia monoka kuvitakar vatitig rivu, bior ver kuvilig re kamiu, mia kumijikia kumñaro bunu ea bajago na jibe na.

4 “Mia kamiŭ kuvisidomii von yimo na siraragkuiano napano joa komeli na Sailomo. Naio bavin loa laka, mia bogo nanua naio mijoru, na jibirbil ea tomu nalo mia nalo duelimo ba arolu [18] aŕmarmaro. ? Mia juŕnabe ka nalo na? ? Peli kumituŕna kuber nalo na bunu abova loa ka kulo dolu nalo na vio Yerusalemo, mia nina naio jibe ka kialo vironiano tai, a? 5 Mia makanio, naio bunu maka tibe na. Mia kiniou neber bereio ka kamiŭ, neber monoka kuvitkar kamiŭ rivu, bior ver kuvilig re kamiŭ, mia kumijikia kuŕmarmaro bunu ea bajago na tai jibe na.”

Kijokijo na burubilivo na maka takou

6 Ana na Yesu ber jamerijiano tai bereio, napano naio ber jibe nei, berinavo “Toro tai, kiano burubilivo tai jua kiano tiniavio. Mia bogo tai ana toro nei naio binimeŭ ea burubilivo nene, jidom ka rial von naio jakou ŕeli na maka takou. Naruei naio binimeŭ mial ka buruiesi nene maka takou leleio. 7 Mia naio mil ban toro naŕna bitikar kiano tiniavio, berinavo ‘Vonganei bokar yuka tolu ruei, napano nobinimeŭ najirarago ka burubilivo nei ŕarati, mia maka lele tai. Niabeku mave ka ruei, naio jukoko vio na bo nei kurano ga, mia jau ketelario ga rivano.’

8 “Ana na toro na iŕmauano neibano naio tinien miia burubilivo nei toru, ana ber ka kiano toro na toru nei,

berinavo ‘Ver tuŕnabe, mia kito ralavon ka rotuvan tu ka yuka ve takurano bereio von. Ka mia kiniou nalavon ka noiŕmau ka vatitigio von beamu vo, mia nekil ŕili sel-vivia burupati, ka mia novisiviŭ tera buluku ea ka mia rila riluo rivu. 9 Naruei ver riluo rivu, rivar kija ŕarati ka yuka yako, mia mijikia tu bo tibe na bo kanio, ver makanio, mia jau komijikia ketelario rivano.’”

Jamerijiano nene ber be bogo telisu kiano jo ka tomu nalo amijikia aviliglo, verver makanio mia Atua rijev vironiano vanlo.

Yesu mieliel ka tiramoruo tai ka Legiano Lu

10 Ana ea Legiano Lu tai, mia Yesu naio joŕna berloglog tomu nalo joomo ea kialo yimo na volkouano. 11 Ana ea vio na be tiramoruo tai naio jo, napano niununo na bova tai na mieiano joa naio. Ana niununo napano miadikar naio ka yuka duelimo ba arolu [18] ruei, napano mila na tiramoruo nei taakano juŕe laka, naio maka rijikia rivitiri naio memedu leleio. 12 Mia bogo na Yesu jirarag loglogio, bio naio binimeŭ, ana mil banio, ber jibe nei berinavo “Tiramoruo, kiniou neber jibe nei, neber jau, mieiano naŕna bivikakarso na, mia ritaluvo denso vonganei ga.” 13 Ana bija iliano nei Yesu midu juŕano joaio, mia vaarakurano ga taakano binimeŭ memedu bo bereio,

naruei tiramoruo nei mijog bo toru laka, miaia Atua Soñi-o mia.

¹⁴ Mia navurim̃araboiano na yimo na volkouano nei, naio tinien jer Yesu ka napano naio mieliel ka tiramoruo nei ea Legiano Lu. Naruei naio mil ban tomu nalo, berinavo “Jibe ka na kito romijikia ruei, romijikia ka roim̃auka bogoti ve ari, mia bogoti takurano, maka roim̃au. Ver kamiu kuvisidom ka aieliel ka kamiu, mia bo kanio kumei ka bogoti ve ari ga, mia Legiano Lu na jibe nei naio maka rive bogo nene rimemedu.”

¹⁵ Ana na Tubo berdoñeio berinavo “? Jum̃abe? Peli kamiu kumitum̃a kumijian kenemiu bue m̃arauo nalo ka Legiano Lu, ñeli maka kumijianlo? Peli na kamiu kumitum̃a kubagan kene-miu temeul nalo a kumitum̃a kumiyon uei banlo ka Legiano Lu, ñeli na maka kuvila tibe na? ?Mia bior vaio ana maka kuvisaaro ka namila batitig tonovo tai ea tiramoruo nei? ! Kamiu kubarvar laka, kuber vite nalo mia maka kuvila!

¹⁶ Tiramoruo nei, naio be kuviviniedo tai napano kito robiniu romiyotuba ea yati na tormoruo Epraamo, mia Najuboliboiano miorikar naio ka mieiano nei mijil yuka duelimo ba arolu [18] ruei. Ana kiniou namial jibe ka Legiano Lu naio memedu ga ka kito rovurular naio den vio na bova nei napano joaio.”

¹⁷ Mia bogo na Yesu ber iliano nei, mila kiano uolu nalo nei amijog amimou toru laka ea tomu nalo miralo. Mia kulo dolu nalo, nalo ajaaro toru laka ka im̃auano na bo nalo na miroano napano Yesu milaio banlo.

Jamerijiano na kurukubako

Mataiu 13:31-32; Mak 4:30-32

¹⁸ Mia Yesu mil bereio, naio berinavo “? Kiniou never iliano venia rivan kamiu ka mia rila na kamiu kuvijikia ka Atua kanano navenatuboiano naio jum̃abe? ?Mia kiniou never navenatuboiano nene naio javukia vite venia?

¹⁹ Mia nalavon ka nala rimeravo rivan kamiu ka jamerijiano nei, napano naio ber jibe nei, berinavo, Navenatuboiano nene, naio jibe ka kurukubako napano mijoru ba birakar joa buruiesi tai. Marati nei kiritavaso leleio, mia bogo na miluo, binime be buruiesi tai na burutomoruo laka, naruei menu nalo abinime amila m̃alo niuku nalo jua jaati nene nalo.”

Jamerijiano na isi

Mataiu 13:33

²⁰ Ana Yesu ber jamerijiano dolu tai bereio banlo, naio berinavo “? Peli mia kiniou neverinavo Atua kiano navenatuboiano naio javukia vite venia bereio?

²¹ Navenatuboiano nei, naio javukia tira tai nam̃a jo milalaglag isi na teliki ga bija burum̃ara baju na yevi tai,

naruei isi na teliki nei naio mila joko nonovio miyuku toru.”

Be m̃arabo juo ga

Mataiu 7:13-14,21-23

²² Ana Yesu naio jo midu kiano m̃arabo bereio, naio jo jidom ka rivavin bere Yerusalemo. Mia bogo na jo ban jibe na, jo miel jel ea komeli nalo, joñã berloglog tomu nalo. ²³ Naruei ea komeli tai, be toro tai bika denio, naio berinavo “?Tubo, nalo na mia avokar meu- liano, nalo telabo, p̃eli na maka ve telabo laka?”

²⁴ Naruei Yesu berdoṣelo, berinavo “Kamiau monoka kuvilavio sikili ka mia kuva joomo ea bulutavo dolu na, napano na teliki ga. Kiniou neber riano ka kamiau, ka mia tomu ve telabo asidom ava joomo, mia maka ajikia alaio. ²⁵ Nina bior iorou, ana mia toro na toru na yimo mia naio rial ka bare ruei, mia naio tumolu, tetavoko vatitigio bereio. Ka bogo na, mia kamiau ve telabo kumei kuvidu buron kamiau ea m̃aratavo nei, mia kuviniu kuvio kuverinavo ‘Tubo, kumemi nuber bo ka jau kovetavo ka kumemi.’ Mia toro na toru nei naio riverdoṣe ga tibe nei, naio riverinavo ‘Ai, abe kiniou maka najikia kamiau leleio! Kamiau kube kulo be nalo?’ ²⁶ Ana na mia kamiau kuvilavon ka kuver kanio ka bogo na, kuverinavo ‘Ana juñabe, jau maka bunu kosidomial ka kito naruei rojuñã rajinan vio

takurano dam̃ariga beamu mugaruei m̃ã na? !Kumemi nene nei naruei nam̃ã jau kobinime i m̃ã koberloglog kumemi janea vio medave nalo ea kenememi komeli nalo!’ ²⁷ Mia naio river kalo, riverinavo ‘Kiniou neber ka kamiau vaarakurano nua ruei, ka maka lele nejikia kamiau, kamiau kube kulo be. Mia namijikia ga ka napano kamiau kube tomu nam̃ã amim̃auka bajago na kirivova ga. !Kamiau, kuvitaluvo den kiniou vonganei!’

²⁸ “Ka bogo na, mia kuvijog rivova ve toru, mia ve burum̃ara tegiano, kuviser m̃arjuvomi. Nina bior ka mia kamiau kuvial ka napano Atua kiano tomu novo nalo, jibe ka Epraamo, Aisak, Yakovo, a naveri- aliano dolu nalo bunu, nalo aju bo jouro ea kiano navenatuboiano ruei, mia kamiau, avuku kamiau kuvitu bo ga tavio tibe na. ²⁹ Ea bogo na, mia kulo dolu vetelabo ayotuba ea sudu veri na yetemeriba nei, amei ka atu- tano ka asinan ea burum̃ara jokoluolu na jouro ea Atua kiano navenatuboiano, mia kamiau maka kuvijikia kuva jouro eaio. ³⁰ Mia tibe na naruei, ka nalo nam̃ã aju iorou, mia atu tukamu, a nalo nam̃ã aju jukamu, mia atu iorou.”

Parinio Tubo Erot naio jidom rue bin Yesu

Mataiu 23:37-39

³¹ Ka bogo na, ana Yesu jo bavin Yerusalemo kia vo, mia Varisis nalo tai abinimeia eao, aberial kanio, aberinavo “Peli jau maka kejikia, ana Parinio Tubo Erot na, naio berkar ruei ka mia ruebinso. Bo ka jau kataluvo den tanobuku na naio jomña be tubo eao, jau kovuro kava Yutea beamu vo.”

³² Ana na Yesu berdoþelo berinavo “Kinioi maka nosidomial souo kurkuru na ka naio be toro tai na mijikia rila titai ka kinioi. Kuva kuverial ea mirano kuver kinioi noto nala kiaku imauano beamu vo. Kuver kanio kuver kinioi nojomña nemijil bulag simaro nalo, a nojomña nemieliel ka tomu nalo, a mia notomña noiñau tibe na banei, beni, veua bereio, rivano-o mia neial ka namila nonovio ruei. ³³ Mia kinioi namijikia na ver ka kami, ka mia kami kuvisidomii mñlea re kinioi, bior ka legiano nalo nei, kinioi nojo najaluvo den tanobuku nei navan tibe na naruei. Monoka najaka nava novoru Yerusalemo vo, bior namial jibe ka vio na naruei namña tomu nalo ajumña amuebinvin naverialiano nalo eao, jikar nua ruei.”

Yesu naio tinien miia vio Yerusalemo

³⁴ Ana na ka bogo na, Yesu tinien miia Yerusalemo mña jegidu kanio, naio berinavo “! Yerusalemo, Yerusalemo! Bior vaio ana kojomña komuebinvin naverialiano nalo, a kojomña kojuba binvin tomu nalo namña Atua

jomña miilalo abinimeia easo? Vatelabo kinioi nejidom nodu jumñaku selvivko kiamo tomu nalo tibe ka sabarou bio kirikiti nalo abinimeia amiyuku jel tano ka sibiano, mia kanamo tomu nalo maka asaaro kanio. ³⁵ Mia komialio na, Atua naio jo bilig taakano kaso ruei nei, ana naio miila kinioi nebinimeia be moti nei naruei, ana naber kaso, neber mia kanamo tomu nalo ajikia re aial kinioi bereio, rivano-o rivokar bogo na avitilubar kinioi, averii kinioi averinavo

“!Atua sopi loa laka, jau keilivu ka naio napano naio jo binimeia eamio!”

14

Yesu mieliel ka toro na mieiano tai

¹ Ana ka Legiano Lu tai, navurimñaraboiano na Varisis tia bio Yesu ba jinano ea kunuano. Mia tomu dolu nalo tealo namña maka tiniei tii Yesu, nalo aju bunu ka bogo nei, ajumña abitivitii julaka ver naio rila vite tai na maka rimemedu, mia amijikia ala tibekovio ka naio. ² Mia toro na mieiano tai jo naliko joomo ka bogo nei, napano toro nene niabene nalo jurojurobi tortoru laka. Mia Yesu mial toro nene, ³ naruei mil ban naverloglogiano na tuboiano nalo, bija Varisis nalo napano aju, naio bika denlo, berinavo “? Jumñabe ka tivelinio na kiado tuboiano? ? Naio berenio kito romijikia reieliel ka toro

ea Legiano Lu, ðeli na ber maka rejikia reieliel kanio?"

⁴ Mo bogo na Yesu bika vikadeniano nei, amial jibe maka bunu ajikia asian verdoðeiano rivanio, mia maka bunu ail. Ana na Yesu buru toro nei binimeï vaataro keanio, ana mieliel vatitig ka naio bo bereio, berinavo mijikia rivan bereio vonuo. ⁵ Ana naio mil ban nalo na aju, naio berinavo "Kamïu kuvilavon ka kuvïdomïï vonio. Ver kamïu tai, ka Legiano Lu, kenerinïo tai, ðeli na kanano temeul tai, naio riva rijoru rivatove ea bulukueï tai, ana mia jau kala tuñabe? ?Mia jau monoka kala soðeli ga kava kovurular bereio, ðeli na mia koverinavo 'Uerei ðova narueï, vonganei be Legiano Lu rueï, tuboiano berenio mia kiniou noimïau re ea Legiano Lu, mia ðeli keneriku ðeli na kanaku temeul na tobo beamu vo ea ðili na, mia beni ga ana mia nava novuru lario?" Peli mia maka bunu kejikia koto rorea titai bereio, mia jau kala soðeli ga na."

⁶ Mia nalo maka bunu ajikia ka mia aver verdoðeiano venia ka tivelinïo na rivan naio bereio, aju buru ga jibe na.

Maka rivu ka toro riyuku lelar naio bereio

⁷ Mia bogo na aju ka atutano ea sinaniano, Yesu bitilubar ka nalo tealo napano boru na jokoluolu biolo abinimeï, tiniel jii

toru ka ajidom aleal vio na bo, nalo aba ajutano mave ea tomu na tortoru jelelo. Ana Yesu mial kialo bajago na mïarouano nei, ana ber kalo, berinavo ⁸ "Ver bogo tai avioso ka kavan ea sinaniano na soriano tai, ðeli na jokoluolu tai na jibe na, maka rivu ka koyokovo soðeli ka kava kototano ea tomu na tortoru jelelo garueï. Peli jau maka kejikia ka vio na, amila batitigio bo jororea toro na toru tai, ⁹ ana mia boru na jokoluolu nei mia rimeï river ka jau, riverinavo 'Aïou kuruaku liki, mia ðeli jau kavatove beamu vo, bior jau kojomïa kojotano ea kanaku toro na toru jeleigio na.' Narueï mia jau kavar burumïara imouiano tai na rila kojog ve kirivova laka, mia monoka jau kavatove ga bereio, kalavon ka keleal kiri vio sesa tai ka na mia komijikia ketivan miramo eaio. ¹⁰ Mia bajago na bo naio jibe nei: Ver avioso ka kavan ea sinaniano tai, bogo na kovoru eaio, jau kava kototano rivija tomu ninio ga. Mia ver boru na jokoluolu nene naio rimeï, mia naio rialso, mia naio riverinavo 'Oï, burumïara toro, kiniou nemije batitig jelemo na jo mave rueï, mia kito ve juo ravan ana neti vatitigso.' Ana ka bogo na, mia komijikia kojog rivu ve toru laka, ka boru na jokoluolu rivitiri larso tibe na ea kulo dolu nalo

miralo namā kumisinin vio takurano. ¹¹ Tibe na naruei, ka mia toro namā miyuku lelar naio, mia adu naio totano, mia toro namā midu naio jotano mia ayukular naio to mave.”

Bo ka kovio talimasa bunu rimei ea kiamo jokoluolu

¹² Ana ka bogo na, Yesu ber iliano tai bunu ban toro napano bio naio binimej jinano ea kiano vonuo, naio berkanio, berinavo “Vonganei, kito romial ka napano tomu nalo, bogo na amila sinaniano tai, tiniel jii ga ka avio kialo bilbilu na bo, p̃eli kurualo nalo, p̃eli na kialo m̃aratavo dolu nalo, vija bunu tomu na tortoru nalo na abe sanibaiano namā aju vaataro ga kalo. Ajumā amilala jibe na naruei, bior amijikia ka iorou, ver nalo nei bunu ala sinaniano tai bogo tai, mia monoka ala meran rivanlo bereio.

¹³ “Mia bajago na bo ka rila bogo na jokoluolu naio maka tibe na. Bo laka ka kovio kulo dolu nalo, jibe ka nalo namā abe talimasa, p̃eli na nalo na niabelo maka rivu, p̃eli na jaba nalo, p̃eli na merebono nalo, p̃eli na tomu nalo na ajiberbena, amei asinan rivijaso.

¹⁴ Tomu nalo na jibe na maka ajikia ala meran rivanso bogo tai, mia bogo na Atua mial ka jau tiniem jaaro ka koburulo abinimej ajinan kamliko ea kanamo vonuo, mia naio saaro laka

kaniso. Karina naio rilivu kaso, a mia jau kavar vonga kiamo ijaiano na bo biorio, ea bogo na naio rila kanano tomu na memedu ameu bereio den namariano.”

Jamerijiano na sopeiano Mataiu 22:1-10

¹⁵ Ana na toro tai napano joa sinaniano nei, naio mijog ka napano Yesu berii ka mia Atua rivitiri bulag kiano tomu na memedu ea legiano na maaro, naruei naio berinavo “!Ierinio, mia rivu lie rivan kito ka bogo na, ka napano mia kito riasol burum̃ara jokoluolu na jouro ea Atua kanano nave-natuboiano nene!”

¹⁶ Toro na, p̃eli naio jomā ber naio bo kovio ruei, mia tomu na jibe na maka asidom ava jouro, naruei Yesu ber jamerijiano tai ea tivelinio na, napano jibe nei “Toro na toru tai, naio jidom ka rila sinaniano tai, mia naio bio tomu nalo telabo ka amei. ¹⁷ Ana bogo na naio miomon vite nonovio bisi ju, ana miila kiano toro tai ka riva rivuru nalo namā abiolo ruei ka amei.

¹⁸ Mia bogo na kiano toro nene bano-o miyotuba kalo, nalo abiniu abare ga, ajumā amila ilisopeiano ga. Tai ber jibe nei, berinavo ‘Ierinio, mia kiniou nobulu von ga kiaku niatano tai, naruei nojo napano ka neial von ka borotano nene jum̃abe. Mia kover ka toro na toru kover aua toru vanio, mia maka nejikia neviedu vonganei.’

¹⁹ Mia dolu, naio ber jibe nei,

berinavo 'Ierinio, mia kiniou nobulu von ga kanaku buluku nalo tai, ka avuru kanaku rukuruku nalo, naruei nojidom ka nava neial ka be ĩirilo jikili ĵumabe. Mia kover ka toro na toru kover aua toru laka, mia maka nejikia neviedu vonganei.' ²⁰ Mia dolu bunu, naio berinavo 'Ierinio, mia kiniou namila jokoluolu na kanaku soriano maka vesiou vo, naruei namial jibe ka ĩeli mia maka nejikia neviedu, bior saba telabo laka.'

²¹ "Ana na toro nei binimei berial iliano nalo nei ka kiano toro na toru, mia bogo na naio mijogio mila naio mila siniabu kalo. Naruei miila kiano toro nei bereio, naio berinavo 'Mo, jau kala soĥeli kavan ea m̃arabo nalo na tertelisu vaataro na, kava keleal talim̃asa nalo, vija nalo napano abe mervitovi, vija merebono nalo, ana kuvurulo amei ea kiado jokoluolu.' ²² Naruei naio ba milaio, mia iorou kanio ana naio binimei bereio ea kiano toro na toru nei, ana naio berinavo 'Tubo, vite napano jau koberenio, kiniou nemilaiio ruei, mia tomu telabo abinimei ruei mia be vio toru jo kiano vo.' ²³ Ana miila naio bereio, berinavo 'Tibe na, jau kavan bereio, kava lie kija ea vio nalo na komeli, mia katadua sikili toro kei na ver jau keialio, ka monoka amei, ka aison kanaku burusio, ka

rila jokoluolu nei rive kiri-novo tanea. ²⁴ Nalo dolu nam̃a amila ilisoĥeiano na kirivova na, kiniou nobiolo batitig ka amei ea jokoluolu nei ruei, mia vonganei, mia maka nalo tai kalo napano mia rijikia sen kiri sinaniano nei tai leleio ea jokoluolu nei. !Kiniou neber vatitigio kiana!"

Yesu monoka to tukamu ea kiano naiagagoano nalo kialo meuliano

Mataiu 10:37-38

²⁵ Naruei Yesu naio jo midu kiano m̃arabo ka rivavin Yerusalemo bereio vo, mia tiniobi niukniuku vio bujo kalo ajum̃a ajakisorio. Amiel bano-o, mia naio barĥilig kalo, ber kalo, berinavo ²⁶ "Toro na jidom rimei rue jaaku, mia naio monoka rudu kiniou noto tukamu ea kiano meuliano, kiniou loa laka lie vo ka karam̃ano, kenieno, koano, kenerinio, kuruano, ĩeli na kuviviniene. Toro napano ver maka riilkue ka kiano meuliano, naio maka rivare ka rimei rive kanaku naiagagoano tai. ²⁷ Mia toro nam̃a jidom ka rimei rive kiaku naiagagoano, naio monoka rila tibe nei. Naio monoka rudu kiano makolkolo, rue jaaku nam̃ariga, tibe ka mijamo ka naio ka rijog jaleleano rivor kiniou. ²⁸ Bo ka kuvisidom̃i vatitig rivu vite nei beamu vo, beamu ka na mia kuvil soĥeli, kuver mia kuvitakisor kiniou.

“Naio jibe ka na toro tai, ver naio sidom ka rimauka burumara yimo tai, naio monoka totano, rivitii beamu vo, mia rivuluku vatitig beamu kiano veru na vuliano na imauano nei, mia monoka rivitii veve rivu ka naio bare ka mia rila nonovio burumara imauano nei, p̄eli na maka rivare. ²⁹ Ver p̄eli na, mia naio tikar rimauka batitig bulapati, rivavavin kija ga, ana mia naio riilo ka napano jumano bulati garuei, ana na mia imauano nei tei riuedom tobo. Naruei bogo na kulo dolu nalo amei aial yimo neibano jo bija bayimo nene be togio ga jo, a maka ve vodobi nene, mia avital niegeniege m̄lea toro nene-o mia averinavo ³⁰ ‘O, kema na, kiano jidomiano kirinovo laka. Naio jidom rimauka kunuano, mia maka rila batitig tiiano na imauano, mila na maka rijikia rila nonovio riviniu.’

³¹ “Jibe ga na, toro na jidom riverkar ka mia rime i rila imauano vija kiniou, naio monoka rila tavukia parinio tubo tai, napano toro na toru dolu jumolu ka naio, buru kiano burumara taara na mira abinimei ka ala mira kanio. Tomu na mira na parinio tubo nei kanano nalo maka ve telabo tavukia toro na toru nei kanano, mia parinio tubo nei monoka rivitii vatitigio ga beamu vo, monoka sidomii vatitigio rivu ka naio mijikia tovulu burumara taara neibano naio jo binimei ka naio

kiana, p̄eli na maka rijikia tovulio. ³² Ver naio rial ka maka rijikia rilaio, naio monoka rila toro rieliko marabo ka toro na toru nei, ka bogo napano naio jo koalabo kia ga vo. Naio monoka rivika denio, ka mia rivulu venia na ver toro na toru nei riverenio, ka mia ave juo atua tumaro bereio. Tibe na ana naio monoka rivatove ka toro na toru nei, rijamo ka naio nonovio rivanio. ³³ Mo kamiu nam̄a kumisidom ka kumei kuvitakisor kiniou, kamiu monoka kuvitilubar ka kamiu bunu monoka kuvila tibe na ka kiniou. Toro na maka rijamo ka kiano meuliano kar kiniou, vija rera garuei kiano saba nalo, naio maka rijikia rime i rive kiaku naiagagoano tai.”

Jamerijiano na vaatei
Mataiu 5:13; Mak 9:50

³⁴ Ana Yesu ber jamerijiano dolu banlo, naio berinavo “Vaatei naio be tonovo tai, mia ver bogo tai ana vaatei nene naio rije a re bunu rivu, naio maka bunu rijikia rila kiano imauano, p̄eli na maka bunu ve titai rijikia rila rije a rivu bereio. ³⁵ Mo vaatei naio jibe na, naio maka rijikia rila imauano na bo easo ea kanamo vonuo, p̄eli na ea kanamo tiniavio bunu. Vite na bo kanio, bo ka avuku rivan ea vio na soro ga. Nina naruei be tovorovo na kanaku naiagagoano napano milaluvu kanano moroano ka rila kanaku imauano.

“Ana toro na be tiliniene bo, bo ka naio rijogluar kanaku iliano nei.”

15

Yesu mila bilbilu naliko tomu na bova nalo

¹ Ana ea bogo nalo na jibe na, amial ka napano tomu tealo napano tomu dolu nalo maka tiniel tiilo, jibe ka tomu na takis nalo, bija kulo dolu nalo napano Varisis aber abova, nalo bunu abinimej vaataro ka Yesu ka aia-gago ka naio. ² Naruei bogo na Varisis naliko naverloglogiano na tuboiano nalo aju amial ka Yesu jomā tinien jii ka tukunu vijalo, amial kirivova, ana aju aberinavo “Riano ga, tete na naio jidom ga tomu na kariano na jibe na, a bogo nonovio naio jidom ka riva sinano vio takurano naliko bunu. ?Peli naio mial ka kialo bajago ga naio bo, a kiado naio bova, a?”

³ Mia kialo jidomiano jibe na mila ana Yesu jukunu banlo ka jamerijiano nalo namā aberii jumābe ka napano naio binimej ea yetemeriba nei kar toro napano milaluvu mārabo.

Jamerijiano na nunu napano ba kovio

Mataiu 18:12-14

⁴ Yesu kiano jamerijiano na be moti ka tivelinio na naio jibe nei, napano naio ber kalo, berinavo “Toro tai, naio be toro namā bagan nunu nalo, mia kiano nunu nalo abokar toromomou

takurano [100]. Kiano nunu nalo telabo mugaruei jibe na, mia ver bogo tai, nalo tai riva kovio, mia naio sidomveia ga, pēli mia naio sidom bijovijon kanio? Mia monoka naio tuvan kiano nunu dolu nalo na aju bo beamu vo, mia naio rivakar napano ba kovio, mia naio sirag rilealio. ⁵ Mia bogo napano naio milealio, mia saaro ve toru laka, mia naio rudular nunu tavaliki nene rimon mave ea burusovonano, ana naio rudu rimej bereio. ⁶ Ana na iorou, ka bogo napano naio batove binimej ea kiano vonuo bereio, mia rivio nalo na ea kiano mārātavo, pēli na kiano bilbilu dolu nalo bunu, ka amej. Ana mia naio tukunu vanlo, riverinavo ‘Ei, vite tai napano kito ramijikia rasaaro ve toru mēle riviorio. Kanaku nunu tai napano ba kovio napano ba kovio laka garuei, mia karina naban kanio, najiragio-o, namilealio. ! Bogo napano namilealio, najaaro mia maka garuei!”

⁷ Ana Yesu mila meravo ban Varisis nalo, berinavo “Mia tibe na ga bunu ea vio mave. Tomu telabo napano ajua vio yetemeriba nalo ajavukia kamiū, be tinielo ka aber nalo amemedu ruei, ana pēli mia saariano na mave rivior kamiū tomu kinkin na jibe na kovio? Mia ver toro na kariano tai ga, naio rivilig kiano meuliano, mia ve burumāra saariano ea vio mave, riva lie vo ka

mia ve burutomoruo laka. Vite na naruei mila ana tinieku jaaro ka notukunu vija tomu nalo namā kamiu maka tiniemi tiilo.”

Jamerijiano na kuruku-veru tai napano ba kovio

⁸ Ana Yesu ber jamerijiano ta bunu ea tivelinio na, naio berinavo “Be tira tai, kiano kurukuveru du-elimu, napano naio midu-van batitigio bo jo joomo ea kunuano. Ana ver bogo tai, rimei ber riadu kalo mia rial ve takurano naio mijoru ruei, ba kovio tai, mia naio rila tumabe naruei? Monoka naio rigoru yulu, rija bulag kiano saba nalo, a rikon vatitig vio ea kunuano, rivano-o mia rilealio. ⁹ Ana bogo napano rilealio, mia naio rivio nalo na ea kiano maratavo, pēli na kiano bilbilu dolu nalo, ka amei. Ana naio tukunu kanio vanlo, riverinavo ‘Ai, abe vite tanie napano romijikia rojog rivu ve toru kanio. Kanaku burumara kurukuveru tai nemilaluvuo mijoru banbo kovio tai, mia karina, nejiragio bano-o ana nemilealio bereio. !Bogo napano nemilealio, kiniou nomijog bo-o mia!’”

¹⁰ Ana na Yesu mila meravo ka Varisis nalo, naio berinavo “Naruei mia tibe na ga bunu ea vio mave. Ka bogo napano ver toro na kariano ga tai naio rivilig kiano meuliano, mia Atua kiano nailiano nalo aialio mia saariano ve toru laka ea vio mave.”

Jamerijiano na mēaku napano ba kovio

¹¹ Mia Yesu kiano jamerijiano na maariano na tivelinio nei, naio jibe nei, napano berenio berinavo “Kulovu tai, be kenerinio sumano juo, namā aju amimāu bijaio ea kialo borotano. ¹² Ana ka bogo tai, maratoru na naljuo nei naio jumolu, berial ka karamālo abe juo, berinavo ‘Teta, kiniou nejidom navar saba togio na jajumāmo ve kanaku ga.’

“Mia vite na maka rimemedu leleio ka naio rivika tibe na, bior karamālo naio meul jo kia vo. Mia karamāno maka ril, naio jan ka nonovio kiano saba nalo, mijamo ka togio ban mēaku nei, a togio be motoru kanano. ¹³ Avona bisi, ana na mēaku nei naio jomā pīlvili ka saba nalo napano karamāno bar banio, mia iorou, maka vesiou, amialio ka naio mison nonovio kiano saba nalo, bar kiano puruveru beven ka bano. Mia ba joa buruvenuo dolu tai koalabo laka, ana ea vio na, naio ba mijamo ka momon naio ban bajago na bova, jinan ka puruveru nei bano-o mia mila lelan nonovio biniu.

¹⁴ “Vonganei naio bitilubar ka jumāno bulati naruei, ana ea bogo na, burumara vituiano tai binimei bokar buruvenuo neibano naio joaio, naio midu mēaku nei naio joa vio tai na kirisikili laka kanio. ¹⁵ Ana

na naio ba jirag iũaauano tai ka mia rimaukano ka mia ŕeli mijikia rilarur kiano meuliano, naruei ba miũaau ea toro na toru tai na vio nene, ba bagan kiano kiribue nalo. Meaku nei naio maka rimemedu ka rila iũaauano nei, bior naio bel ka kiribue jibe ka kito kulo Ju dolu nalo, mia nina be iũaauano takurano ga napano naio mijikia rilealio.

16 “Naruei naio miũaau jibe na bano-o, mia maka avar sinaniano vanio, a maka m̃arabo tai ka rileal sano sinaniano eaio, mila jijer naio nam̃ariga. Naio jijer jibe na bano-o mila naio jidom sian jum̃ano rivan ea basaro na sinaniano torogio na menunũ bija botuotu na kon nam̃a kiano toro na toru naio jom̃a bagan ka kiano kiribue nalo ajenio.

17 Mia bogo napano jidom ka rila tibe na, naio bitilubar naio bereio, naio mial ka kiano bijuku m̃eteano ga mila lelan naio bereio. Mo naio tinien maio bereio ka karam̃ano bija kiano vonuo, naio berinavo ‘Riano ga, kin-iou nomiavoyu toru laka. Ki-aku bijuku m̃eteano ga mila kiniou nam̃aro ka vituiano ea vio nei, mia kosidomii von nalo nam̃a atibe ka tomu na iũaauano ga na teta kanano. Naio jom̃a jian sinaniano novo nalo telabo banlo ka legiano nonovio ga, maka ajikia asen nonovio.

18 Ver tibe na, bo laka ka kiniou nalavon ka navan bereio ga, noim̃au kija ga tavukialo. Mia kiniou nava naial teta, never kano, nev-

erinavo “Aiou teta, kiniou namila burum̃ara kariano va tai ban Atua, a banso bunu. 19 Vonganei, maka bunu rimemedu ka jau keial kiniou tibe ka nebe kenerimo tai, mia nobika denso ka tinien riia kiniou ka noim̃au kija ga tavukia nalo nam̃a amim̃au kanamo.” 20 Mia naio mila vatitig kiano jidomiano jibe na bisi, naruei naio jumolu, binimej ju lilie ju lilie, binimej boru ea karam̃ano.

“Mia naio maka rijikia, mia karam̃ano naio jo tinien maio ka naio julaka ga, naio jom̃a jirarag lili m̃arabo ka ŕeli mia naio rimej. Mia bogo na naio ju koalabo ka kunuano kia ga vo, mia karam̃ano bitilubar naio, tinien miia naio-o mia, ana jikiti ka riva rivitavo vijaio. Mia bogo napano naio binimej bokar kenerinio nene, miabukario ka jum̃ano be juo, maka sidom tuvianio bereio. 21 Ana m̃eaku mil ban karam̃ano naruei, berinavo ‘Aiou teta, kiniou nomila burum̃ara kariano va tai ban Atua, a banso bunu. Vonganei, maka rimemedu ka jau keial kiniou notibe ka kenerimo.’

22 “Mia karam̃ano berbu-reio, bio kiano tomu na iũaauano nalo, berinavo ‘Ai, kamiũ kuvila soŕeli kuva, kuvar kulum̃arauo na bo laka, vija kiano kulubue na jaano, a kiano ŕejelinio, vite nalo na jibe na, kuvar kumej kuviya eaio. 23 A kiribue m̃arauo nam̃a roju rabagan vurua m̃adigdig

kirinovo na, kami u kuva kuvueio, ka kito rala sado sinaniano tai ka ramijikia rasaaro kitoliko keneriku maratoru nei. ²⁴ Bior keneriku nei, naio m̃aro ruei, mia meul bereio; naio ba kovio, mia kito romileal naio bereio.' Ana ka bogo na, nalo abukudel ka jokoluolu na m̃eaku neibano.

²⁵ "Ana ka bogo nene, kiritete motoru naio bave nei ea tiniavio, ba jo miñau ruei, avona kario ana naio binime i bere vonuo. Mia bogo na naio binime i vaataro ka vonuo, naio mijog ka ajum̃a amioiou, a mijog joa na voluano jo jaburu bunu. ²⁶ Ana naio mial nalo na iñauano nei tai, bika denio, berinavo "Ei, venia na jibe na nam̃a aju amila vonuo jibe na?"

²⁷ "Ana toro neibano berinavo 'Ai, abe kuruamo m̃a na! Naio binime i bere ruei, meul bo kia ga vo. Tenene na, karam̃amo naio jidom rila sano sinaniano tai. Amue kiribue m̃arau nam̃a na ruei!' ²⁸ Mia bogo napano motoru mijogio naio tinien mimi, maka riva joomo naliko. Naruei karam̃ano binime i mil banio, ka rivuru naio riva joomo, mia naio miilkue ga ka rivano. ²⁹ Naio ber ka ga karam̃ano, berinavo "Teta, yuka vio ruei nam̃a kiniou nojom̃a nomim̃au kanamo ea vio nei? Kiniou nomidu niomo batitig bo ea vite nonovio, mia jau maka lele kala titai tibe na van kiniou. Kiniou maka lele neial ka napano jau koue

kirikiti nani tai van kiniou bogo tai ka nala sinaniano tai vija kanaku bilbilu nalo. ³⁰ Mia bogo napano ga jau komial kenerimo novo na naio binime i vonuo bereio, ana kojumolu komue kiribue m̃arau novo nam̃a rojum̃a rabaganio jo mijabo m̃adigdig bo na. ? Mia tete na naio mila venia bo ruei banso a? Naio bar bulag kanamo burum̃ara puruveru togio ruei, naio ba jen puruveru nene ka ga m̃a mior ka tire nalo ga, bano-o miakon batitig garuei. ? Peli bajago na naruei na jau tiniem jii, tenene na jau komila sano sinaniano kanio a?"

³¹ "Mia karam̃ano tinien miia motoru nei bunu, ana naio berkanio, berinavo 'Ei, keneriku, kiniou maka m̃a noto nosidomii tibe na liki. Jau komila kiniou najaaro toru ruei, napano m̃a kojo bija kiniou dam̃ariga, a kanaku saba nonovio na ju, kiniou namijamo ka nonovio ruei banso. ³² Be riano ka keneriku maratoru na naio milaluvu m̃arabo na kiano meuliano, mia bogo na naio bilig naio binime i bereio, kiniou tiniek miia naio, ana namial jibe bo ga ka kito rasaaro ka naio, rala sinaniano tai kitoliko. Kuruamo na naio m̃aro ruei, mia meul bereio; naio ba kovio, mia kito romileal naio bereio.'"

Naruei Yesu ber ka Varis nalo, naio berinavo "Mo, jamerijiano nei naio bisi naruei ea vio na. Mia jibe ka napano naio berenio,

bo ka toro napano milaluvu m̃arabo, naio monoka rivilig naio bereio, tavukia maratoru nei. Mia kamiu monoka kuvitika vatitigio bunu ka mia kuvitavukia re motoru nei, napano kiano jidomiano kirisikili laka, naio mijoku ka kuruano napano bilig naio ka kiano bajag moruo ruei.”

16

Jamerijiano na bajago na aiñau vija puruveru

1 Iorou kanio, ana Yesu mil ban kiano naiagagoano nalo, naio berii jamerijiano tai banlo, ana naio berii toro na iñauano tai. Toro nene, naio mial ka mia kiano boru rivukular naio, naruei naio jumolu miñauka vite tai ka mia iorou ana kiano meuliano rivu ga. Jamerijiano nene naio jibe nei, berinavo “Toro na toru tai, naio bitirilar kiano toro tai ka rivitika kiano puruveru nalo. Mia bogo tai, iliano binime i bokar naio ber kiano toro nene naio jom̃a jen kiano puruveru nalo, jom̃a mila lelan kiano saba nalo. ² Naruei naio bio kiano toro nene binime i mial naio, mil ban berinavo ‘Ei, tomu nalo amidu kanamo veriiano ban kinio ruei. Kinio namial bo ka mia nodu larso den iñauano na bereio, mia jau kobisi ga. Mia beamu ka na jau kavano, nojidom ka jau kavar vatitig saba nalo beamu vo, ka mia kinio namijikia noviti jabue nañña tomu nalo amila jua kinio.’

³ “Mia toro na iñauano nei naio mijog bova, berinavo ‘Riano, vonganei bova nono naruei. Toro na toru midular iñauano novo nei den kinio, maka nejikia ka mia kinio nesen venia naruei. Kinio nojotano ea iñauano nei kirisio ruei, mia maka bunu ve kiaku moroano ka nava noim̃auka tiniavio bereio, a kinio maka nosidom natan ea yimo nalo kam̃a noiniog sinaniano den tomu nalo bunu. ⁴ Mo bo ga, kiaku m̃arabo naio tibe nei. Mia note vatove kija bereio tomu nalo kialo jabue nalo, mia asaaro ka kinio-o mia monoka avitika vatitig kinio ka bogo na ver toro na toru rivukular kinio den iñauano nei.’

⁵ “Naruei naio ba bio nalo napano kialo jabue jua toro na toru nei, nalo abinime i abeve terakurano eaio, ana naio berinavo ‘? Mo, jau komila jabue ea venia, a bokar vio?’ ⁶ Ana naio berdoñe, ber ‘Titiki-vaka basidobidobi duelimo toromou takurano [100].’ Ana toro neibano berkanio, berinavo ‘Mo, mia kito juo rete rivatove ga. Ninei be kanamo jabue nene, jau kototano ana koyolkon bulag soñelia nana beamu, mia kovivitaia kar ve duelimo va limo [50] ga.’

⁷ “Mia naio bano, ana dolu binime i, ana naio bika denio, berinavo ‘? Koig a jau, kanamo jabue venia?’ Ana naio berdoñe, ber ‘Bake na uiti tormomou takurano [100] ga.’ Ana naio berkanio,

berinavo 'Mo, mia kito ve juo rete rivatove ga. Ninei be kanamo jabue nene, jau kototano, ana koyolkon bulag soĝelia nana beamu, ana kovivitaui kar ve duelimo va arolu [80] ga.' Naruei naio mila jibe na-o mila nonovlo abiniu.

8 "Ana iorou kanio, ana toro na toru nei naio bitilubar vite nei, ana naio ber ka kanano toro naŋa jenjen kanano puruveru nalo beamu, naio berinavo 'Riano ga, jau kobina vatitigio ka kiniou, ana namial jibe kanamo masouano tenia, jau kobe pariparimo kija ga na.'"

Naruei Yesu berinavo "Kamiu kumial kulorinio nalo na yetemeriba nei, bogo naŋa amiŋau bija puruveru, mia abe masou ka bo, nalo amijikia bajago na ala bilbilu vija tomu nalo, ka mia tomu nalo nene ala rivu kalo iorou bereio. Mia kiniou nemial ka napano keneriku nalo na miŋamoiano, va telabo nalo maka ave masou batitig rivu ka aiŋau vija puruveru napano Atua jian banlo.

9 "Neberenio batitig ban kamiu, neberinavo, Puruveru naio be tena yetemeriba nei ga, mia verenio mijikia riijaiso ka kove bilbilu rivu vija Atua, bo ka koiŋau kanio. Ver jau koiŋau rivu vija puruveru ea mŋarabo na memedu nene, mia iorou kanio ana Atua naio risaaro ka mia rivurso kavan ea vio na

maka puruveru toaio, naina naruei be kanamo vonuo na mave.

10 "Toro na bar ka naio batitig bo ea iŋauano na kiritavaso ga, mia kito ramiikia ravarkar tiniedo ea naio ka mia naio rivar naio ka iŋauano na toru bunu. Mia toro na miŋau maka rimemedu ea vite na telisu, mia naio riŋau rivova lie vo ea vite na toru. 11 Ver kamiu kuvar vatitig re kamiu ka iŋauano nalo na puruveru na yetemeriba nei, mia kei bereio rivar Atua kanano tonovo nalo tua jumemiu ka ve kenemiu? 12 A ver kamiu maka kuvijikia kuviŋau rimemedu rivija vite nalo naŋa Atua mijamo ka ban kamiu ka bogo bulati ga ea yetemeriba nei, mia kei bereio rijamo ka mauo novo nalo napano ajua vio mave ave kenemiu daŋariga?"

Maka toro rijikia riŋau tubo ve juo kialo

13 Mia Yesu ber bunu, berinavo "Bereio, ver toro na iŋauano tai, naio riŋau dede ga ea tubo ve juo ve vaarakurano. Ver tibe na, mia naio tinien tii tinene, mia riilkue ka dolu nene, ĝeli na mia rudu tinene, mia tuvan dolu nene. Kamiu maka kuvijikia ka kuvila ka napano kamiu kube tomu naŋa amiŋau Atua kanano, a kube tomu na puruveru ka bogo nene bunu."

Varisis nalo maka tiniel tii Yesu kiano iliano nalo

14 Ana na ea bogo na, Varisis nalo bunu aju kiano vo, ajumã amiagago ka iliano nalo nei. Mia nalo abe tomu namã tiniel jii mñlea puruveru toru bogo nonovio, naruei nalo abital lelan ga mñarabo novo nalo na imãuano bija puruveru napano Yesu berial ban kiano naiagagoano nalo. 15 Ana Yesu mil banlo berinavo “Kamiu tiniemiujii ka kuvila ka napano mia tomu nalo aial kamiu tibe ka tomu na memedu nalo, mia Atua biti dulu venia napano joa kenemiu iviso. Vite miroano napano mña tomu nalo amiaia, aberinavo naio bo, mia ea Atua kiano vitiano tenalo na abova ga.”

*Atua kiano nave-
natuboiano binime naruei*

*Mataiu 11:12-13, 5:18;
Mak 10:11-12*

16 Iliano dolu tai napano Yesu berenio, naio berinavo “Beamu, Niosi Moruo jo, napano niosi nalo na Mosis kanano bija niosi nalo na naverialiano nalo kanalo juao, bano-o binime boka bogo na Jone Baruei. Jone mĩmãu bano-o bisi ana vonganei Ioluan Vou na bo na Atua kanano navenatuboiano naio binime, naruei ajumã amioliolu ka janea vio reraio, mia tomu namã ajidom ka ava jouro eaio na aju amila vio jikili ka ajogkario. 17 Mia nina maka rila ka tuboiano na Atua kanano napano joa Niosi Moruo naio bova ruei.

Peli vio mave a yetemeriba nei nalo ava kovio ga, mia kiri mñariliano na tuboiano nei maka rijikia riva kovio bogo tai ka tumolu tu re.”

*Maka rivu ka kito rotuvan
koado nalo*

*Mataiu 5:31-32, 19:9; Mak
10:11-12*

18 Iliano dolu tai napano Yesu berenio, naio berinavo “Ver toro tai riilalar koano, ana naio riva rivuru tira dolu, mia Atua mialio ka toro nei naio jo mila siakaiano bija tira dolu nei. Be verare ga bunu ka ver toro tai soro ka tira tai napano koano na beamu miilalar naio ruei: toro nene bunu mila siakaiano.”

*Jamerijiano na toro na
sanibaiano bija Lasaros*

19 Yesu ber jamerijiano nei bunu, napano naio ber jibe nei, berinavo “Toro tai, jumãano bujo toru laka ka vite na bo nalo miroano, naio miyovovua naio bo laka bogo nonovio, a legiano nonovio amĩmãuka sano burumãara sinaniano novo nalo. 20 Toro dolu tai naio bunu jo, napano mña bogo nonovio amidudu naio binime amidu naio jo tavio ea burusio na burumãara yimo na toro nei kunuano napano be kiano saba telabo. Toro nei, naio be toro tai na maka ve kiano saba tai, naio be toro tai namã jo miogiog sinaniano, niabene nalo vio bujo ka meniko, a siano be Lasaros. 21 Amidu naio joa vio na ka

ĥeli mia naio mijikia riniog sinaniano nalo nei torogio naĥa toro na toru nei jen digio ju, mia makanio. Naio jo miog kuleio ga jibe na, naliko kuli nalo napano abinimei amiom kanano meniko nalo.

²² “Milala jibe na bano-o na tete nei naio ĥaro, ana na nailiano nalo abinimei amidular naio, aba amidu jo tivelinio na Epraamo, ea vio mave. Ana maka vesiou ana na toro na toru bunu ĥaro, ana ajivinio.

²³ Mia abuku deven naio ban ea sebi, napano mijog naio bova-o mia bova laka, mia iorou ana naio jirarag bavin, mial koalabo laka, naio mial Epraamo naio jo, a mial ka napano Lasaros jotano naljuo naio, abe juo ajumĥa ajinan. ²⁴ Ana naio bio banlo, berinavo ‘Aue-e, karamĥaku Epraamo, kovi-juku bo tiniem riia kiniou liki, jau keiĥla Lasaros rimei rudu juluvati ĥarjukjumĥano titi ka kiri uei tai, ka titi ka minaku. Bior vonganei sebi jijen kiniou mia nomijogio bova toru nei.’

²⁵ “Mia Epraamo berdoĥeio, berinavo ‘Kener-iku, jau kosidomial bereio meuliano novo nanua beamu. Ka bogo na, jau kobokar kanamo vite nonovio napano jau kojidom ĥeĥea bo kaso, mia kiri tavaliki Lasaros nei, ea kiano meuliano re nua, vite nonovio maka tai rimelumu van naio. Vonganei, naio mije jogvuiano ea vio nei, ana jau komijog bova toru

liki ea vio na. ²⁶ Mia be vite tai ga, naio maka rijikia riviedu ka riijas, bior Atua mila burumĥara vio kiri bululuo tai napano jo iviso bure ka kito juo, ka rila ka toro rijikia re taluvo ea vio nei ka riviedu rialso, a maka rijikia taluvo ea vio na jau kojoaio ka rimei ea vio nei.’

²⁷ “Mia toro nei bika bereio, berinavo ‘Teta, aver tibe na, kiniou nabika jikili banso ka keiĥla Lasaros rivatove bereio ea karamĥaku kunuano, ²⁸ bior kuruaku nalo jimo aju keano vo. Bo kanio Lasaros riva ridu tiniemaiano vanlo, ver ĥeli mia nalo bunu amei ajoru ea jogvaiano nei na.’

²⁹ “Mia Epraamo berdoĥe, berinavo ‘? Mia bior vaio ana monoka Lasaros naio rivano? Nalo ajumĥa abar Niosi Lu ruei, napano viv-itauiĥano lu na Mosis kiano bija naverialiano nalo juaio ruei. Bo ka avuluku nina, ka mia aleal vite nonovio juaio.’

³⁰ “Mia toro nei naio jo jikili kia navo, naio berinavo ‘Teta Epraamo, ĥeli mia maka ajikia ala nina na? Mia ver toro tai rimei bereio ea namĥariano, river vite nonovio kalo, mia monoka aviliglo kanio na.’

³¹ “Ana Epraamo berdoĥe, berinavo ‘A verenio nalo na maka asidom ajog vaio napano ĥa Niosi Lu berenio, maka bunu ve titai bereio ka napano rijikia rilalo amoneaio. Peli toro tai rimei bereio ea namĥariano, river vite nonovio nalo vanlo, ĥeli

na venia, mia asidom re ka amoneaio ga na.”

17

Bajago na ala juku-jukuano rivan toro dolu

Mataiu 18:6-7,21-22; Mak 9:42

¹ Ana Yesu ber ka kiano naiagagoano nalo, naio berinavo “Mia jukujukuano nalo amijikia amei bogo nonovio ga, mia toro napano mila vite tai napano mā buru jukujukuano jo binimei vaataro, mia rivova laka vanio. ² Ver aiorikar puruveru tai toa burujono ana avuku naio riva ea buluniogovu, nina na be vironiano tai napano melala ga. Mia toro namā mila kanaku tete nalo nei tai juvan kiniou, mijoru ea kariano ana maka bunu tu sikili ea kiniou, mia toro nene naio rivar vironiano tai napano kirisikili laka riva lie vo tovulu ninei. ³ Ver tibe na, monoka kuvitkar vatitig kenemiu meuliano nalo bogo nonovio, ka mia mā kala re jukujukuano rimaluvo ka kiamo bilbilu nalo.”

Bajago na koviekokoa kuruamo

Ana Yesu berenio, berinavo “Ver jau keial ka napano kuruamo naio jo mijoru ea kariano, monoka keil van naio ka kovururirio, mo ver naio rivilig naio, monoka jau koviekokoa naio. ⁴ A ver naio rila rivova vanso ve va aluo ka legiano ve takurano ga, a bogo nonovio, naio

mila kirivova karina naio ber vonga berinavo ‘Aire koig, aua namila bulagso toru laka. Naber bo ka jau, koviekokoa kiniou,’ mia jau kala tumābe? Monoka jau koviekokoa naio ve va aluo nei nonovio riviniu.”

Moroano na viekouoiano

⁵ Ana atevi nalo abika den Yesu, aberinavo “Tubo, kumemi numisidom ka jau kala kenememi viekouoiano rimei sikili lie vo.”

⁶ Naruei naio berdoŕe, berinavo “Ver kamiu kuvika kiniou ve telisu ga, tavukia kurukuti mārabako, mia ver kenemiu viekouoiano nene naio sikili rivu, ana mia kumijikia kuver ka burupati burujou yako kuverinavo ‘Jau kataluvo den jelemo na vija kanamo pati nalo, jau kava kotu koiluo ea tinia tei iviso,’ ana mia naio rimonea kamiu.”

Toro na rimāu toro na toru kiano monoka saaro ga ka rimāu

⁷ Ana Yesu berinavo “Ver kamiu tai naio ve toro na toru tai, a kanano toro tai tomā rila kiano imāuano. Peli naio riva rimāu ea tiniavio, ŕeli na rivitkar kiano temeul nalo, ŕeli na venia, ana verenio kijeve bogo na naio rimei bereio ea imāuano, mia toro na toru nei naio river venia kanio? Maka rijikia river kanio riverinavo ‘Mo, jau komei kototano vija kiniou, kito ve juo rosinan,’ bŕor naio be kiano toro na imāuano ga. ⁸ Mia toro

na toru monoka river kanio ga riverinavo 'Mo, mia kava kovoroŝebi beamu vo. Vere-nio sinaniano rimenoŝo, ana kava koyovovuŝa so rivu, ana kavar saku rimeŝi ka nese-nio, a nomunuio, biŝi, ana mo jau komijikia koviovio samo.' ⁹ Mia bogo napano toro na iŝauano nei mila nonovio vite nalo naŝa toro na toru ber ka naio, mia toro na toru maka rijikia river buruŝara siva tai vanio, bior nina be kiano iŝauano ga. ¹⁰ Mia kam bunu monoka tibe na. Verenio kamiu kuvila vatitig nonovio iŝauano napano Atua ber ka kamiu, rivano-o riviniu, mia kuver ga tibe nei, ku-verinavo 'Aa, nina maka ve titenia na. Kito rala ga venia napano memedu ka kito ralaio, tavukia Atua kiano tomu na iŝauano nalo ga."

Yesu mieliel ka tomu na burumieni nalo duelimo, mia takurano ga ber siva

¹¹ Ana ka bogo na, Yesu nalo aju amiel kia ga vo ka avavin Yerusalemo, ana kialo ŝarabo jel bure tanobuku juo nei Sameria bija Kalele. ¹² Naruei nalo amiel bano-o, vaataro ka ayotuba ea ŝarkomeli tai, abitavo bija taara tai na tomu na burumieni, nalo duelimo, napano ajujuŝa ea ikiŝarabo. ¹³ Mia bogo napano amial Yesu, abio jouo banio, aberinavo "Yesu, Tubo, nuber bo kaso tiniem riia kumemi."

¹⁴ Ana bogo napano Yesu mijogio, naio ber kalo beri-

navo "Kamiu kuva kuvar laka ea kulo lu nalo beamu vo, ka avitii veve niabemi-niu nalo ka aver niabemi-niu nalo ameravo ruei." Naruei nalo abano, ana bogo napano aju amiel abano, amilo ka mokotenalo nalo aju abinimeŝi meravo. ¹⁵ Naruei nalo tai, bogo napano mial ka naio binimeŝi bo ruei jibe na, naio barŝilig binimeŝi, miaia Atua laka, ¹⁶ binimeŝi mijorua tano ea Yesu jaano, ber siva kanio. Toro na, naio maka ve Ju tai memedu, mia naio be yati na Ju togio na Samaria. Mia nalo dolu na, nalo abe Ju memedu, mia nalo maka amei bereio.

¹⁷ Ana na Yesu berinavo "Nalo napano niabelo meravo ruei, nalo duelimo, mia nalo kovuŝo dolu nene nalo be? ¹⁸ Naina binimeŝi bereio, naio be toro na vio dolu ga, mia ka venia ana naio ga takurano binimeŝi bere ka rivamenea Atua, ana nalo dolu nalo maka amei bereio?"

¹⁹ Naruei Yesu ber kanio berinavo "Koig, jau kotu-molu keiel kava vonuo. Ki-amo viekovoiano milarurŝo ruei."

? Atua kiano nave-natuboiano naio rimeŝi tumabe?

Mataiu 24:23-28,37-41

²⁰ Ana iorou, kulo Varisŝi nalo abinimeŝi abika den Yesu, aberinavo "Nave-natuboiano na Atua kiano naŝa jau kojomŝa koberii vurua na mia kumemi nuvalio nagi?"

Ana na Yesu berdoŝe, berinavo "Atua kiano nave-natuboiano naio maka

rijikia rimei tibe ka titai napano toro mijikia rialio ka mirano. ²¹ Naio maka ve titai napano mia averinavo 'O naio naruei, jau komial naio jo binimei kia,' ħeli na averinavo 'Naio nei jo binimei ruei.' !Kamiu maka kuvitilubarario, mia Atua kiano navenatuboiano naio ju iviso ka kamiu ruei!"

²² Naruei Yesu mil ban kiano naiagagoano nalo, naio jukunu banlo ber mia tumabe ka legiano na maaro nalo napano aju abinimei. Naio berenio "Iorou kanio ana mia kamiu kuvilavio sikili ve toru ka kuvial bogo na mia kiniou Kulorinio Kenerinio noyotuba ea yetemeriba nei, mia nina maka ve kenemiu ka kuvialio. ²³ Mia tomu nalo atumã averver averinavo 'Naio nei!' ħeli na 'Naio yako!,' mia kamiu kuan re rivijalo, bior maka kiniou navo. ²⁴ Mia bogo na kiniou Kulorinio Kenerinio nemei bere be riano rimonloglog legiano nene, mia aviniu avitilubarario, mia kiniou nemei tavukia vio bijiiio tai napano rila niogovu rimerera ea vio tivelinio riva rivokar tivelinio dolu nene. ²⁵ Mia maka ve bogo na vite nene vo, bior beamu ka nina, mia kiniou Kulorinio Kenerinio, tom na vonganei mia monoka ala kiki kiniou ka saba vetelabo, mia monoka avukular kiniou.

²⁶ "Rivano-o rivokar bogo na mia kiniou Kulorinio Kenerinio nemei bereio, mia tomu nalo atu vatitigio re

rivu, rivare ga ka nanua amila ea bogo na tormoruo Noa kiano bogo. ²⁷ Ka bogo nene, tomu nalo ajidel ka m̃a ajinan, a ajumã amunu vite nalo, ajumã amila soriano jibe na ga, binimei bokar bogo na Noa ba joomo ea kiano burumãara uako nanua naio mimãukanio. Naruei burumãara ueimia binimei burubulag nonovio kialo meuliano nalo. ²⁸ A ea bogo na Lot kiano jibe na ga bunu. Tomu nalo ajumã ajinan, ajumã amunu vite nalo, ajumã aban ea yimo na ṽilṽiliano a amila bijii puruveru, ajumã amimãauka tiniavio, ajumã amimãauka yimo, amila jibe na banbano-o, mia maka bunu tinielrimaio ka titai leleio. ²⁹ Mia monloglog legiano napano Lot jumolu den kialo vio, mia sebi bija vovosebi na sebi jinano ajibirbil abavatove ea vio yauo, jijen nonovlo abiniu abava kovio. ³⁰ Mia kiniou neber ka kamiu ka mia bogo napano mia kiniou Kulorinio Kenerinio nemei, mia tomu asidomial re titai, mia asidomialo ga, mia nalo aiilo va ka burumãara vite nalo na jibe nei amalmaluvo ea kialo meuliano nalo.

³¹ "Ea bogo na, ver toro tai tomã rivonvon ea kunuano mave ea ino, mia naio rial tenei naio to rimei, mia ver naio rivatove, mia maka rivu ka rilavon ka rivar kiano saba joomo ea kunuano, mia naio monoka rivan ga tibe na.

Mia toro namā mimāu ea tiniavio, naio bunu maka rivu ka rimei bere vonuo, mia naio monoka rivan ga tibe na. ³² Kam tiniemiu ribobogia re Lot koano, napano jiraragodi, mia naio binimei be puruveru ju. ³³ Toro namā jidom rilarur kiano meuliano ga, mia naio rila luvuio, mia nana mña mijamo ka kiano meuliano ba kovio, mia rilarur naio bereio. ³⁴ Kiniou neber ka kamiu ka ea bogo na, pēli ka bogiano napano mia toro tai naio koano amon ea mñalo jogu, mia amei avurular tinene ga, mia atuvan tinene tobo. ³⁵ Peli na tira ve juo atu vio takurano avijii salo baba, mia ve takurano ga rivano, mia tinene naio tobo. ³⁶ [Peli na tomu ve juo atu aimāu biju ea tiniavio, tinene tuvan vio rivan mia tinene naio sikili tumomou tu.”]

³⁷ Naruei kiano naia-gagoano nalo abika denio aberinavo “?Ana Tubo, vite nalo nene mia ayotuba ea vio be?”

Ana naio berdoṣelo, berinavo “Ea bogo nene, mia tavukia napano ver tena mñaro tai jo kovio tai. Ea vio na naruei, menu nalo namā ajenjen tena mñaro, mia nalo amei kanio, monoka nalo ve miroano ea vio nene. Ea vio na vabe napano kariano joa, vio na naruei ve natibureano eaio.”

18

Jamerijiano na tira na jegi

ban kiano tubo bano-o mia tubo tinien miiaio

¹ Ana Yesu jii jamerijiano dolu banlo, ka tunukakarlo ka mña tinielo veve juo re bereio ea kanalo volkouano, mia atu sikili damariga eaio, abolkouo rivano-o mia avokar verdoṣeiano eaio.

² Kiano jamerijiano nei, naio ban jibe nei, berinavo “Be komeli tai, tubo nene naio be toro kouo tai, be toro tai namā maka rialerinio ea Atua leleio, maka rimerou kanio, a maka tovon tomu nalo bunu. ³ Ana taanou tai bunu joa vio na, napano toro tai joñā mila bulag kiano saba nalo bogo nonovio ga, ana taanou nei naio jo ba jo jegi ban kanano tubo, joñā mila kiano veriiano ka toro neibano, berinavo ‘Aiou, jau monoka kala titai ka tete na, naio joñā mila kiki mñelea kiniou mia.’ ⁴ Mia tubo nei maka tinien riia tira nei, naio miovo ka ril van tete neibano. Mia naio mila jibe na banbano-o, mia tira nei naio joñā monmon ga ba jegi ban kanano yubo.

“Ana iorou kanio ana tubo nene berenio ‘Kiniou nebe toro tai namā maka nosidomial ka nala vaio namā Atua pēli toro dolu ber ka kiniou ka bo ka nalaio. ⁵ Mia tira nei naio joñā binimei jegi vururu ban kiniou mia maka nosidom nala tena mña joñā berenio. Mia naio joñā binimei bika jibe na, mila kiki tanea kiniou toru laka, pēli mia nala ga venia namā naio joñā bikanio. Ver pēli

mia tinieku riñaro ka nojog kiano tegiano.’”

⁶ Ana Yesu mil ban nalo naña ajumña amiye tilinielo ka jamerijiano nei, ana naio berinavo “? Kamiu kivia-gago vatitig ka toyovo nei kiano iliano naña berenio? Bior tira nei jegi va telabo banio, mo mia naio monoka sidomii vite naña tira na naio joña bikanio. ⁷ ?

Mia tumabe ka Atua na mave? ? Bogo na naio mijog ka kiano tomu nalo naña bijauia bulaglo, ajumña ajegi ban legiano a bogiano, mia naio rijikia to vesiou tibe na rivano-o mia rila re titai vanlo? ⁸ Makanio, mia neber ka kamiu ka ver naio rijog ka mña kamiu kumitumña kubolkouo jikili damariga banio, mia naio tumolu soñeli ga tulaka ka rijai kamiu. ?Mia nejidom nevika kamiu bunu, ka ver bogo na mia kiniou Kulorinio Kenerinio nemei bereio ea yetemeriba nei, mia nemijikia neial ka tomu vetelabo atu sikili ea kiniou tibe na, ðeli na mia ve re tai kovio ga?”

Jamerijiano na toro naña be ñarou ka kiano bajago na memedu

⁹ Bogo na Yesu jo bija tomu nalo, naio bitilubar ka napano nalo tealo ajumña abe ñarou toru laka,aju aberiaña kialo meuliano memedu bo ruei, mia ajumña abitii saia tomu dolu nalo, amialo jibe ka maka avu tibe ka nalo. Naruei naio berii tomu nalo jibe nei, jii jamerijiano tai, berinavo

¹⁰ “Tom juo, aba joomo ea Atua kunuano monloglog bogo na volkouano. Nalo tinene, naio be Varisis, mia tinene, naio mila iñauano tai napano tomu nalo maka tiniei tii naio riviorio, naio be toro na takis. ¹¹ Mia bogo na Varisis naio jo jumolu ka rivolkouo, naio ber jibe nei, berinavo ‘Atua o, kiniou neber burumñara sivaiano toru laka nei banso, napano kanaku meuliano naio bo lie jovulu nalo dolu nei kanalo. Nemiaso napano kiniou maka natavukia tomu na vinauano nalo, ðeli tomu na amijukubin toro, ðeli tomu naña amila siakaiano, ðeli tomu na takis jibe ka ninei jumolu ju nei. ¹² Makanio, mia kiniou nojomña nomila bo laka damariga, bior kiniou nomondulu ka nojomña nobolkouo banso ea legiano juo ka sude takurano, a ea vite nonovio naña kiniou nabokar ka jumaku, verver novokar ve duelimo mia monoka noðu ve takurano vanso damariga. Vite nalo na naruei naña kiniou nojomña namilaio ana mila kiniou nobo laka ea miramo.’

¹³ “Mia toro na takis naio jo mijog bova bior kiano kariano tealo naña milao, mia niabene buru vurebure jibe Atua bitii kiano meuliano maka rimemedu lelejo. Naruei naio niabene ðili ka riva vaataro keanio, naio jumolu ju koalabo ga, mia maka sidom sirarago rivavin mave, naio jurubanini naio joña mijubaluba bairene,

naio jegi naio berinavo '! Aiou Atua, jau kala luṗiluṗi kiniou, a tiniem riia kiniou, kiniou toro na kariano.'

¹⁴ "Mo kamiu kumisidomii von: mia Atua naio saaro ka tomjuo nei na vabe kiano volkouano? Nao-o, toro napano bitilubar kiano kariano, naio mijog bova biorio, Atua mijelar kiano kariano. Mia dolu nene, naio ban bere vonuo napano kanano meuliano jo jibe ka ga bogo na naio binime. Toro naṃa jo bavavin ea naio, mia Atua rudu naio to yetano, mia toro naṃa jo midu naio jo yetano, mia Atua rivitiri lario."

Yesu milivu ka kiritete nalo

Mataiu 19:13-15; Mak 10:13-16

¹⁵ Ana ka bogo na, nena nalo tai abar kenerilo solbouo nalo abinime. Ea Yesu, ajidom naio tokol lo, rilivu kalo. Mia bogo na naia-gagoano nalo amileal, aberburelo, aber avatavio bereio.

¹⁶ Mia Yesu bio ban tire nalo, ber amei bo ka ga aialio, a naio ber ka naiagagoano nalo, berinavo "Kamiu kuverbure re kiritete nalo na, kuvijamo kalo amei aial kiniou, bior kiritete nalo na, tomu nalo napano ajavukia nalo, nalo ga naruei aju aba jouro ruei ea navenatuboiano na Atua kanano. ¹⁷ Kiniou neber be riano ban kamiu, ka toro na ver sidom navenatuboiano na Atua kanano, naio monoka rila naio tibe ka kiritete nalo nei, ver ṗeli,

naio maka rijikia riva jouro eaio."

Kulo Ju nalo kanalo toro na toru tai jidom rivokar meuliano

Mataiu 19:16-30; Mak 10:17-31

¹⁸ Avona bisi, ana tubo tai binime. Bika Yesu, berinavo "Naverloglogiano novo, neber bo kaso, jau koverial van kiniou ka monoka nala venia ka mia nemijikia novokar meuliano na maka rijikia ribisi."

¹⁹ Ana Yesu berdoṗe, ber "Ei! ?Jau komijikia venia, ana kobio kiniou kober kiniou nobo? Maka ve toro dolu tai na rivu ve riano, mia Atua ga takurano. ²⁰ Mia jau kobika kober juṃabe ka toro tai na jibe ka jau mijikia rime. Rivu ea Atua mirano. Mo, ṗeli jau komijikia batitig tuboiano nene nalo ruei naṃa aber ka: Jau kala re siakaiano, jau koue taṃaria re toro, jau kovina re, jau kala sibi re, jau kotovon karamamo naio koniomo ga."

²¹ Ana tete nei naio berdoṗe ber "Nao, kiniou nomijikia nono tuboiano nalo naṃa jau kober kiana, mia nomijikia na ver ka jau ka kiniou nojorṃa nabokar batitiglo jikar ea bogo na kiniou nobe ṃeaku kia ga vo. Binime bokar vonganei, maka nalabelea tai."

²² Mo bogo napano Yesu mijog ka napano naio ber jibe na, naio berenio "Kirinovo, mia tivelinio na

jau, vite tai ju keano vo. Jau monoka kava kořiliřili nono ka kanamo saba nalo na miroano na, mia jau kavaru puruveru nene, kavano katan ka van talimasa nalo. Ver jau kala tibe na, mia ve kanamo vite novo nalo ve miroano ea vıo mave. Mo, jau kava kalaio, avona bisi ana komei katakisor kiniou.”
 23 Mia bogo napano toro nei mijog iliano nei, naio mijog kiano iviso jegi toru laka, kiano jidomiano kiri temi mēle, bior naio be toro na jumano bujo ka saba toru laka.

Toro na kiano saba toru, kirisikili ka naio riva jouro ea Atua kiano navenatuboiano

24 Naruei Yesu bitii toro na toru nei bano-o, kar na naio berinavo “Ver toro tai na kiano saba toru, ver naio sidom riva jouro ea Atua kiano navenatuboiano, vite na kirisikili kija na. 25 Nao-o, kiniou neber ka kami, ver kamele tai rıovodulu ea bulumirano nitil tai, nina be kirisikili laka, mia ver toro tai na be kiano saba toru mia naio sidom ka riva jouro ea Atua kiano navenatuboiano, nina naio kirisikili lie vo ka nina.”

26 Mia nalo napano amijog iliano na, nalo abame-ne naio kanio, aberinavo “! Tomnei! Ver tibe na, mia kei naio mijikia rijeve meuliano?”

27 Mia Yesu naio berdoře, berinavo “Nao-o, toro maka rijikia rila naio rijeve meuliano, mia venia namā toro maka rijikia rilaio, mia Atua naio mijikia rilaio rıvu ga.”

28 Ana Pitere naio bika, berinavo “?Ana mia tumabe ka kumemi? Kumemi numituvan kenememi vonuo nalo ruei, ana kumemi nubinimei numitakisorso.”

29 Mia Yesu naio ber ka kiano naiagagoano nalo, naio berinavo “Kamıu ku-visidomıi mēlea re tivelinio na. Ka toro kei napano ver tuvan kiano vonuo, řeli koano, řeli karamāno a kenieno, řeli na kenerinio nalo, mia ver naio tuvan vite nalo nonovio na rıvior imāuano na Atua kiano navenatuboiano, 30 mia naio rijeve meran bere kiano saba nalo na jibe nei ve miroano lie vo. Nina ea bogo na naruei, a iorou ka bunu ea bogo na ju binimei, mia naio rıvokar meuliano na maka rijikia ribisi.”

Yesu berial kiano mārıano varolu nene

Mataıu 20:17-19; Mak 10:32-34

31 Mia bogo na ajumā amiel abano, ana Yesu bio kiano duelimo ba juo [12] abinimei kean naio, naruei naio ber kalo berinavo “Kamıu kuviagago vatitig rıvu. Vonganei kito roju rabavin Yerusalemıo kija nei, mia bogo na kito rovoru ea vıo na, vite nonovio nanua nailiano nalo abıvıtaıuaıo nua ruei ea tivelinio na Kulorinio Kenerinio, mia kamıu kuvial amalmaluvo takııo.

32 “Mia kamıu kuvial ka napano adu naio toa kulo Romo nalo jumālo, ka mia aserei niadua rıvanio, ala kiki naio, a avule titia naio, 33 a avıtiv naio, rıvano-o mia

auebin naio riñaro. Mia ka bogoti ve tolu nene, ana mia naio tumolu rimeul bereio.”

³⁴ Be kurano ka na Yesu berial vite nonovio meravo banlo jibe na, mia maka lele ajoglubarbar vatitigio rivu. Naio jibe ka napano amilavan iliano nei kalo, mila ana maka avokar batitig nioti na iliano nene.

Yesu miñauka batitig merebono tai mirano Mataiu 20:29-34; Mak 10:46-52

³⁵ Mia Yesu nalo aju amiel abano, abinimei vaataro ka komeli na vio Jeriko, mia merebono tai joña jotano ea ikinarabo, naio joña miogio sinaniano den tomu nalo naña ajeljel ea ñarabo nei. ³⁶ Naruei merebono nei naio mijog ka Yesu nalo aju abinimei, naliko tiniobi nalo napano ajumña amiel bijaio, ana naio bika berinavo “Nalo na vio be na, ajumña amiel ka ava be?”

³⁷ Naruei nalo aberdoñe aberinavo “!E, abe Yesu na vio Nasarete ga, naio miel binimei jel kean kito ga!”

³⁸ Ana toro nei bio jouo, jegi ban Yesu berinavo “! Yesu, jau Teviti kiano yati, kiniou nojidom ka jau tiniem riia kiniou!”

³⁹ Mia nalo naña aju amiel jukamu ka Yesu, amijog ka ña naio bio jibe na, ana aberbureio, aber naio rimelumu ga. Mia tete nei naio maka sidom rijoglo, mia bio bereio, jouo lie, berenio “!Yesu, jau Teviti

kiano yati, neber bo kaso, tiniem riia kiniou!”

⁴⁰ Mia Yesu miel bano, mebi loglog vio nene, ana ber avuru toro nene rimei vaataro kanio. Ana aburio binimei, ana Yesu bika denio, berinavo ⁴¹ “?Jau kojidom ka mia kiniou nala vaio kaso?”

Ana naio berdoñe berinavo “Aiou, Tubo, kiniou nojidom ka miraku rivu, ka nejikia neial vite.”

⁴² Ana Yesu berinavo “Mo, vonganei kiniou nesian kiamo siraragiano vanso tibe ka na jau kobikanio. Kiamo viekouoiano milaso kovu bereio.” ⁴³ Mia monloglog bogo na, toro nene mirano binimei bo, ana naio joña miel naliko Yesu, naio joña miaia Atua toru laka. Mia tomu nalo bunu napano amial vite nei, amial bo laka, ajumña abamenea Atua siano biorio.

19

Yesu biviuo naljuo Sakias

¹ Mia Yesu nalo abinimei jouro ea komeli na vio Jeriko, ajumña amiel aban ka aiovodulio ga. ² Mia ea vio na, be toro tai jo, siano Sakias. Naio be toro na toru ka nalo na takis ea tanobuku na toru na vio nei, mia bior naio joña miñau bova, joña mijukubin tomu nalo ka kialo puruveru na takis nene, mila jumano bujo kanio, kiano saba nalo miroano. ³ Mia naio bunu binimei ka bogo nei, jidom rial kija Yesu ka naio be toro na jumabe,

mia tomu kinkin telabo aju vaataro ka Yesu, aju kovio amila vio telisu laka, mila naio maka rijikia rial vatitigio, bior naio be toro na bulati ga tai. ⁴ Mia mial bova ga, ana jikiti jukamu ka Yesu nalo, ba bokar buruviove tai, jakiiio bavin mave joa jaati tai, jororea ka mia Yesu nalo aiel amei, ka mia naio mijikia rial vatitigio.

⁵ Mia bogo na Yesu binimej bokar buruviove nei, Sakias miilo ka napano Yesu jirarag bavin, mialio, mil banio berinavo "Sakias, jau katabulu soŋeli. Kiniou nomijoglubar ea kiniou ka banej monoka noto kija ea kiamo vonuo beamu vo." ⁶ Mia Sakias mijogio, jumolu jabulu soŋeli batove, naruej buru Yesu ba vonuo ea kunuano, bija burumara saariano tai.

⁷ Naruej bogo na tomu nalo amial tenej, nalo telabo maka asaaro, amil mumiiio tertelisu, a berinavo "Toro na Sakias na, naio be toro tai namia miŋau kirivova, naio joŋa mijukubin tomu nalo bogo nonovio ga, mia kar vaio ana Yesu jidom riva to naljuo ea kiano vonuo?"

⁸ Mia bogo na aju joomo kario, ana Sakias mijog lubar ka monoka naio rivilig naio, riyelar kiano meuliano, naruej naio jumolu berial ea Tubo mirano, naio ber "Tubo, vonganaj kiniou nomijamo ka kiaku saba torogio ban tomu na abe talimasa, maka ve kanalo

titai. A venia namia namila sibilili toro kanio, nebina kalo, mia navar meran bereio vokar ve va veri tukario."

⁹ Mia Yesu mijog bo toru laka ka venia napano Sakias mijue bulagio banio, ana berinavo "Kiniou nemial jibe ka banej ioruriano na Atua kiano naio binimej bokar m̄aratavo nei memedu. Tete na naio milaluvu m̄arabo na kiano meuliano, mia naio bunu naio be Epraamo kiano bajulukuti memedu, naio be toro Ju riano, ¹⁰ mia kiniou Kulorinio Kenerinio nebinimej ea yetemeriba nei ka nesirago nalo namia amilaluvu m̄arabo jibe toro nei, a ka nalarurlo."

Jamerijiano na tomu nalo na abitikar kialo toro na toru kiano puruveru

Mataiu 25:14-30

¹¹ Mo tomu nalo ajumia amije tilinielo ka Yesu kiano iliano nalo nei, naruej naio mil banlo ba ber jamerijiano tai kalo. Naio mial bo ka riverlogloglo ka jamerijiano nei, bior naio mijikia ka tomu nalo ajumia ajidom aber bogo na naio riva rivoru Yerusalemo, mia naio rila Atua kiano navenatuboiano riyotuba kalo ve vaarakurano ga ruej. Mia vonganaj aju abinimej vaataro ka Yerusalemo ruej, ana Yesu jidom riverlogloglo ka mia naio monoka tuvanlo beamu vo, karina mia naio rimej bereio. ¹² Naio ber kalo jibe nei berinavo "Be toro na toru tai, aber ka

naio ka rieli riva koalabo ea vio na parinio tubo na toru joaio, ka avitirilar naio ka rimeĩ rive parinio tubo ea tanobuku na kiano, karina, mia mijikia rimeĩ bereio rive tubo ea kiano vio. ¹³ Mia beamu ka bogo na maka rivan vo, naio bio kiano tomu nalo, nalo duelimo, mia mije puruveru banlo abeve terakurano. Ana naio ber kalo berinavo monoka aimau rivija puruveru nei o-o mia bogo na naio rimeĩ bereio. ¹⁴ Mia tomu nalo na tanobuku nei amiolu titig toro na toru nei, mia bogo na naio ban kario, ana aberiio aberinavo maka bunu asidom naio ka rimeĩ rive parinio tubo kalo. Naruei amiila toru ba ban parinio tubo na toru, aber 'Kumemi maka nuvisidom nuvial kema na rimeĩ ka rive parinio tubo ka kumemi, kumemi maka lele garuei nuvisidom jau kodu burumara sio na vanio.' ¹⁵ Mia parinio tubo na toru nei naio mila ga, ana toro na toru nei binimeĩ bereio ka rive tubo ea kiano tanobuku. Naruei naio binimeĩ bio kiano tomu nalo nei napano naio bar puruveru banlo beamu ruei, naio jidom ka rial ka amimau eaio abokar puruveru vio bereio. ¹⁶ Ana toro na jukamu binimeĩ jikili jukamu ea toro nei mirano, berinavo 'Tubo, kanamo puruveru takurano ga naio nei, kiniou nomimau bija bano naio milelar duelimo bereio judu kanio.'

¹⁷ "Ana na toro na toru nei naio mial kanano toro

nei mimau bo, ana naio berkanio berinavo 'Bo mia bo, komimau bo laka. Mia bior jau kobitkar batitig imauano telisu na nomidu joa jumamo na, vonganei nodu burumara imauano tai vansom, nebitiri larso ka kovitkar kanaku komeli duelimom na tortoru.'

¹⁸ "Bisi, ana naliamo ka binimeĩ, naio berinavo 'Tubo, puruveru takurano nua komidu ban kiniou, nomimau eaio bano-o nemijevo jumom bereio judu kanio.'

¹⁹ "Ana na toro na toru berkanio, ber 'Kobo, jau bunu komimau bo, mo mia kiniou nevitiri larso ka mia kovitkar kanaku komeli jumom na tortoru.'

²⁰ "Avona bisi ana na maariano nene naio binimeĩ, berinavo 'Tubo, kanamo puruveru na komidu ban kiniou, nomijuvulukoio batitig ka nikulumarauo tai, nomidu van batitigio jo, naio nei nomidu ber binimeĩ ka nodu vansom.

²¹ Kiniou nojo nomialso jibe ka kobe toro tai na komijikia kavar bulag vite na toro dolu mije batitigio jo ve kanamo, a komijikia kejinan ea tiniavio na maka komebijaio. Kiamo bajago kirisikili kija jibe na, mila na kiniou nomerou kaso, tenene na maka nala titai ka kanamo puruveru nene, nomidukar batitigio jo bo ga.'

²² "Ana toro na toru nei tinien jerio, naio berinavo 'Kaleliki, jau kober niegeniege kiniou kirivova teniavano, napano kober nobe

toro kouo tai jibe na. Mia bo ga, mo kanamo iliano na mia serso bereio. ²³ ?Ver kiniou nobe toro na jibe na, bior vaio ana komidukar kurano ka kanaku puruveru jibe na? Bo laka ka ver jau kodu riva toa yimo na puruveru, ka ver nemei bereio, ana nemijikia navar bulagio rivija boboti napano naio miin bulagio.'

²⁴ "Ana na toro na toru nei naio ber ka nalo dolu na ajikili aju vaataro, berinavo 'Kuvidular puruveru na den jumano, kuvidu van nana mileal duelimo.'

²⁵ "Ana nalo aber ka toro na toru nei, aber 'Ana Tubo, naio bar miroano kiana, kiano duelimo ruei!'

²⁶ "Mia toro na toru ber kalo, berinavo 'Nao-o, jibe na naruei. Nana be kiano saba telabo ruei, mia naio rivar ta bunu bereio, mia nana maka kiano titai mia naio rilaluvu venia napano be kanano telisu mugaruei.

²⁷ Mia tivelinio ka kiaku uolu nalo nei, napano maka asidom neve tubo kalo, nejidom ka kuva kuvurulo amei ea vio nei, kuvuebinvinlo amarmaro kamu ea miraku."

Naruei Yesu kiano jamerijiano naio biniu ea vio na.

Yesu binime i boru ea vio nei Yerusalemo

Mataiu 21:1-11; Mak 11:1-11; Jone 12:12-19

²⁸ Iorou ka napano Yesu ber iliano nei bisi ana naio jumolu, miel jukamu bano, burumarabo kalo abavin

Yerusalemo. ²⁹ Mia nalo abinime i vaataro ka komeli juo na tertelisu nei Betevas bija Betani, ea tivelinio ka Burusuku na Buruolivi nalo. Ana Yesu mil ban kiano naiagagoano juo, berinavo ³⁰ "Kuve juo kuviel kuvan ea komeli na telisu yako jo beamu vo. Mia bogo na ver kuva jouro eaio, mia kuvial togki tai amiorkar ju. Togki nene be meaku ga, maka ala kor taakano vo, mia kuvijubarlar sano teli ana mo kuvuru kumei bere ea vio nei. ³¹ Mia ver avika den kam juo averinavo 'Ai, kumitu kumijubarlar sano teli ka venia?' Ana mia kamiu kuverdoŝelo kuverinavo 'Tubo jidom temeul nei ka rila kiano imauano tai.'"

³² Yesu ber jibe na kalo, naruei miilalo abano, mia nalo amial jibe ka ga napano naio ber kalo. ³³ Ana na nalo aba ajumia amijubar bulag temeul nei sano teli, mia bogo namia ajumia amilaiio, ana sano taanou nalo abika aberinavo "Ai, kumijubarlar sano teli ka venia a?"

³⁴ Naruei nalo aberdoŝelo, aberinavo "Makanio, Tubo naio jidom temeul nei ka rila kiano imauano tai beamu vo." ³⁵ Ana nalo amijamo kanio, ana na nalo aburu togki nene binime i ban Yesu, mia abisii bulag mialo kulukoti nalo mave ea taakano, ana na amidular Yesu bavin jotano mave eaio.

³⁶ Ana Yesu midu togki nene, jomna miel bano, mia

bogo na naio jo bano, mia tomu nalo abisii m̃alo kulukoti nalo ea m̃arabo, kanio mia Yesu kiano togki mijikia riel mave ealo. ³⁷ Naruei nalo amiel ea Burusuku na Buruolivi nalo, bano o abinimei aboru ea vio na m̃arabo mialolo batove ka rivatove Yerusalemo. Mia bogo na burum̃ara tiniobi na naiagagoano nalo miroano amial ka Yesu jo miel binimei vaataro ka vio Yerusalemo, mia ajidomial bereio burum̃ara im̃auano nalo bija kijokijo nalo nam̃a naio milaiio, mia amial jibe ka napano kialo burum̃ara parinio tubo vou tai naio jo binimei, mila na ajaaro toru kanio, aju abamenea Atua biorio. ³⁸ Ajuñā abiovio, aberinavo “! Atua loa laka, keilivu ka parinio tubo nei binimei ea siamo! Burum̃ara merivuiano ea vio mave, kamiu na ea vio na mave kuvitirilar Atua siano, kiano mermerano bo mia bo!” ³⁹ Mia ka bogo na, Varisis tealō aju iviso ka tiniobi nalo nei, mia maka lele asaaro ka na abitirilar Yesu jibe na, ana na aberii kanio, aberinavo “! Naverloglogiano, koverbure kanamo naiagagoano nalo na ka auetuba kavuru kaso re tibe na!”

⁴⁰ Mia Yesu berdoṑe banlo, berinavo “! Ee, vede ga. Ver nalo aviovio tibe na re, ṑeli mia puruveru rera ga nei monoka nalo aviovio.”

Yesu jegidu ka komeli lu nei Yerusalemo

⁴¹ Mia Yesu binimei vaataro ka rivokar

burum̃ara komeli nei Yerusalemo, mia naio jirarag ba jouro eaio, tinien miiaio, ana jikar ka jogumirano jibirbil biorio. ⁴² Mila jibe na ana naio mil ban memedu, berinavo “Kiniou nomijog bova toru kaso. Ver jau kovitilubar ga venia miyotuba ea kiamo vio banei nei! Atua jo mila kiamo m̃arabo novo tai ka kojev tum̃aro eaio, mia jau maka kovitilubariorio.

⁴³ Mia monoka nover ka jau ka mia bogo tai rimeĩ easo napano mia kanamo uolu nalo ve miroano laka amei kaso. Mia aseliviv easo atukoso, a mia ayuku bijii borotano rimeĩ vio takurano, ve kialo m̃arabo ka mia amijikia avavin ea kanamo burum̃ara tagvoru nalo. ⁴⁴ Mia amei jouro, aue vatitigso. Mia auebinvin kenerimo nalo, a mia ala bulag nonovio kunuamo nalo, avar bulag kiamo burukis nonovio avatove mia riviniu. Vironiano na jibe na mia rimeĩ easo bior ka napano jau maka kosidom kovitilubar ka banei be kanamo bogo memedu ka napano Atua maluvo ka rilarurso.” ⁴⁵ Naruei Yesu miel ba jouro ea komeli, mijaka ban ea Atua Soṑi kunuano lu, ana mial nalo nam̃a aju amim̃au bior veru ea vio na. Naruei naio mijil dedade ealo, berinavo

⁴⁶ “Atua ber ea kiano Iliano Lu, naio berinavo ‘Kunuaku Lu naio be yimo na volkouano,’ mia kamiu kubiliglar yimo nene ruei,

binimei jibe ka buluvae tai na tom na vinauano nalo kunualo.”

⁴⁷ Ana ka bogo na Yesu jom̃a bava joomo ea Yimo Lu legiano nonovio, naio jom̃a berloglog tomu nalo, mia tomu na tortoru ka kulo lu nalo naliko naverloglogiano na tuboiano nalo bija tomu nalo kialo tomu na tortoru maka lele asaro kanio. Ajum̃a ajiravo kavuru m̃arabo ka amijikia ala titai ka rila Yesu monoka rim̃aro.

⁴⁸ Mia bedede ga, abitilubar ka maka ajikia aleal m̃arabo tai, bior tomu nalo nam̃a ajum̃a amije tilinielo ka kiano verloglogiano, tiniel jii kiano iliano nalo toru laka, ajidom naio julaka ga.

20

Navurim̃araboiano na vio Israel ajidom averbure Yesu Mataiu 21:23-27; Mak 11:27-33

¹ Mia ka legiano dolu bereio, ana Yesu ban bere joomo ea Yimo Lu na Atua Kunuano yako Yerusalemo, naio jom̃a berloglog tomu nalo a jom̃a mioliolu ka Ioluano Vou na bo banlo. Ana tomu na tortoru na kulo lu nalo bija naverloglogiano na tuboiano nalo bija navurim̃araboiano dolu nalo abinimei eaio, abika denio aberinavo ² “?Jau kover von ka kumemi, ka nam̃a jau kojom̃a komila jibe na ea vio nei ea kei siano? ?A kei ber kaso ka jau kala tibe na?”

³ Ana Yesu berdoṣelo, berinavo “Mo, mia kiniou bunu nevika vikadeniano tai den kamiu beamu vo. Kiaku vikadeniano jibe nei, ber ⁴ ? Varueiano nam̃a Jone jom̃a mila nua ban tomu nalo, naio be vite tai napano Atua berkanio ka m̃a naio rilaio, p̃eli na Jone ga naio jidom ka rilaio? Kamiu kuver von nina.”

⁵ Mia Yesu kiano vikadeniano nei mila amil toru banlo, ajum̃a aberinavo “?Mia kito rover tum̃abe ka naio? !Kito rovitikario vatitig rivu! Ver kito roverinavo varueiano na Atua ber ka Jone, mia tete na naio monoka rivika bere den kito riverinavo bior vaio ana maka romonea Jone.

⁶ Mia bunu, ver kito rover Jone ga jidomii ka rilaio, mia tomu nalo tinielser kito, mia atuba kito, bior naloaju amonea Jone jikili ruei ka napano naio be Atua kiano nailiano riano tai.” ⁷ Ana jidomiano na mila ana aberdoṣe ban Yesu aberenio nalo maka ajikiaio ga.

⁸ Mia Yesu ber kalo, berinavo “Tibe na, mia kiniou bunu, maka nejikia never ka kamiu ka kei naruei naio ber ka kiniou ka nala im̃auano nalo nei.”

Jamerijiano na tomu na bova napano m̃a abitakar jiotilikrevi tai

Mataiu 21:33-46; Mak 12:1-12

⁹ Ana Yesu ber jamerijiano tai ban tomu nalo na ka bogo na, berinavo “Toro na toru tai, bija kiano jiotilikrevi tai.

Bogo tai naio jidom riel rivan ea buruvenuo dolu tai, napano jo vaatarobe laka, ana juvan kiano jiotilikrevi nei ban tomu dolu nalo ka mia amei aiñau eaio, ka mia avulu vanio. ¹⁰ Ana toro na toru nei naio ba jo-o, avona bitilubar ka be bogo na m̃arkrevi meruo naruei. Jibena miila kiano toro tai ka ban bereio ea nalo napano ajua kiano jiotilikrevi nei, ka rivar puruveru na m̃arkrevi nei togio napano monoka avulu vanio. Ana toro nei bano, mia bogo na naio miyotuba kalo, nalo maka asidom avuluio, mia amue naio ga o-o bisi ana na amiila naio ban bereio jum̃ano ravavo ga jibe na. ¹¹ Ana toro na toru nei miila kiano toro dolu tai bano, mia abitivi naio bunu, amila lelan toru laka, ana amijil deven naio ban bereio jum̃ano yauo ga jibe na. ¹² Mo varolu nene, toro na toru nei miila kiano toro dolu bereio, mia naio bunu, amueio-o bar ja, ea naio toru laka, ana abukulario den jiosi.

¹³ “Mo toro na toru na jiosi nei naio mial bajago na kirivova nei, mia naio maka bunu rijikia naruei, berinavo ‘! Aiou! ? Bo ka mia nala tum̃abe naruei? Peli vonganei, monoka neiila ga keneriku rivano. Naio be keneriku takurano ga, tinieku jii m̃elea naio, mia ver naio rivan mia nalo monoka avitilubar avijuku rivu ka naio.’ ¹⁴ Naruei miila naio bano, mia bogo

na tomu nalo amialio, nalo ajidomii kirivova kanio. Aberiio ealo, aberinavo ‘Naina be toro na toru kenerinio na. Toro na naruei, napano ver toro na toru na riva kovio, mia naio naruei rivar kiano borotano nene tibe kiano jajum̃ano ve kiano. Bo ka kito rouebin naio rim̃aro, kanio mia kito ga romijikia ravakar borotano nei rive kiado.’ ¹⁵ Naruei nalo ajumolu abokario, abukulario batove den jiosi nene, amuebinio.”

Ana Yesu berinavo “Tukunu nei naio bisi ea vio na, mia bo ka kamiu kuvisidomii vonio. Bogo na toro na toru rijog tenei, mia naio rime i rila tum̃abe ka nalo nei? ¹⁶ Neber ka kamiu neber tomu kirivova nei, mia naio rime i ruelo, am̃arm̃aro ea bajago kouo tai, a mia naio rudu kiano jiosi nei toa tomu dolu na bo nalo jum̃alo.” Ana bogo na amijog Yesu naio ber jibe nei, amijog lubar ka iliano nei be ilivaniano tai, ber jibe ka kulo Ju maka asidom naio napano be Atua kenerinio, ana mia Atua rivuru tomu nalo na maka ave kulo Ju adu jelelo. Ana vite nei nalo maka asidom ajogio, naruei nalo amil jikili aberinavo “Vite na jau konom̃a koberiio na, Atua maka lele rijamo ka mia riyotuba tibe na.”

¹⁷ Mia Yesu bitikarlo, bika ber “Kamiu maka kumisidom, ana bior vaio ana abivitaui iliano lu nei napano naio ber jibe nei, berinavo

'Puruveru na, tomu nalo napano amirñauka yimo aber naio bova, mia abuku ban ruei,

mia vonganei, puruveru nene naio binime i be puruveru na kirinovo tai ea sudu na yimo, ka rudukar yimo sikili.'
Iouano 118:22

18 "Tomu nonovio na mia ava aserbape ea puruveru nei mia ajoru napano mia puruveru nene rila kokorov mokotenalo. Mia ver riva rivokar bogo na puruveru nei rijoru, toro kei napano puruveru mon kakario mia rila kitkitio rivova, naio riva kovio."

19 Ana naverloglogiano na tuboiano nalo bija tomu na tortoru na kulo lu nalo, abitilubar ka Yesu kiano jamerijiano nei jilogloglo memedu, naruei nalo tiniel jerio lie vo, ajumolu ajidom avokar naio rimemedu ea bogo nei garuei. Ajidom toru ka ala titai kanio, mia amila dede ga, bior amial ka tomu nalo ajumña tiniel jii naio ga. 20 Jibe na naruei ana bogo nono ga ajumña abitivitiio, a nalo tealoo ajumña ajivanlo ga aba vaataro kanio, abar kokoalo ga amilalo jibe amonea naio bo, mia tena ajumña amilaio, ajumña abarkakar kiano iliano nonovio ga. Kialo jidomiano, ka ajidom aleal iliano na naio riverenio, ana amijikia ala veriiano van toro na toru na vio Romo nene Pailat, ka naio mijikia sian vironiano tai vanio tibe ka na ajidomio.

Tena be Atua kanano a tena be Sisa kanano

Mataiu 22:15-22; Mak 12:13-17

21 Ana nalo namña ajumña abar kokoalo ka napano abinime i vaataro ka Yesu, bogo tai ana abika vikadeniano tai denio, ajidom ajukubinio. Aberinavo

"Naverloglogiano, kumemi nubitilubar ka kiamo iliano a kiamo verloglogiano be riano a memedu. A kumemi nubitilubar ka jau maka ketibure tomu nalo aveve dolu, mia komialo abe veverare ga kojomña koberial Atua kiano mñarabo na memedu ka tomu nalo nonovio. 22 Ana numisidom nuviaka denso tibe nei ka: ? Kiado tuboiano naio ber jumñabe? ?Naio ber memedu ka kito kulo Ju nalo rovulu takis van parinio tubo na Romo na Sisa, pñeli na ber maka rimemedu?"

23 Mia Yesu bitilubar ka ajidom ajukujuku naio, naruei naio ber kalo, berinavo 24 "Kuvidu puruveru sesa nene tai rime i van kinio. ? Kuvial von kei mirano na joaio? ?A sio nei ajiri joaio, be kei siano?"

Nalo aberinavo "Sisa mirano na, a siano na bunu."

25 Ana naio ber kalo, ber "Mo, tena be Sisa kanano, kami u kuvidu van Sisa. A tena be Atua kanano, kami u kuvidu van Atua."

26 Nalo nei ajidom toru ka avokar vatitig kija Yesu ea tomu nalo miralo ka kiano iliano tai, ana mia bogo namña amijog kiano verdoñeiano nei, amiilo toru kanio, amial ka naio bokar tanealo, ana

nalo aju buru ga, maka bunu ajikia aver bereio titai.

Tomu na aṃaro mia ameul bereio

Mataiu 22:23-33; Mak 12:18-27

²⁷ Mia iorou ka naina, Satusis nalo tealo abinimei ea Yesu, ka ajidom avika denio ka tivelinio na vite tai naṃa abiekar kouo eaio, aber tomu nalo na aṃarmṃaro, maka bunu ajikia ameul bereio ea bogo na maaro. ²⁸ Naruei nalo abika denio, aberinavo “Naverloglogiano, kumemi numisidom nuvikaso, ka juṃabe ka iliano tai naṃa tormoruo Mosis re nua naio bivitauiiao be kiado. Naio berinavo, ver toro tai riṃaro den koano, napano maka ve kenerilo tai vo, mia monoka nana lian ka naio rivuru taanou nene ve koano, ka mia rila ka tira nei mijikia rivar tete, ka mia rudu kuruano napano naio ṃaro siano, ka mia siano rimeul to. ²⁹ Mo, ka bogo tai, be kurualo aluo. Motoru kalo buru tira tai be koano, mia ṃaro den koano napano naljuo maka avar kenerilo tai vo. ³⁰ Ana maratoru naio kija buru tira nene, karina naio bunu ṃaro denio, ³¹ karina baratoru, naio bunu milaio, bano-o bokar kurualo aluo nene, nalo abiniu amila jibe na ga, napano maka ve kenerilo tai leleio. ³² Ana iorou ka koano nalo nao-o abiniu, tira nene bunu ṃaro. ³³ Mo jau kover von vite na. Ea bogo na maaro, ka bogo naṃa ajumṃa

aberveriio vurua na aber mia tomu nalo atumormolu bereio, mia tira nei naio ve kei koano, bior naio joro ka kurualo aluo nei abiniu ruei?”

³⁴ Naruei na Yesu berdoṃelo berenio berinavo “Ea yetemeriba nei ga tomu nalo ajumṃa ajorjoro, ³⁵ mia nalo napano Atua ber ka amijikia ameul bereio ea naṃariano, ka ava jouro ea kiano vio, mia maka bunu ajikia alaio. Ka bogo na, maka bunu asorsoro kalo, ³⁶ mia maka bunu ajikia aṃarmṃaro, bior mia amei atavukia nailiano nalo. Mia Atua rivuru meul ealo bereio den naṃariano, naruei amei ave kenerinio nalo riano.

³⁷ “Mia ka tivelinio ka na meul bereio na, Mosis bunu beriio nua ruei, naina jakii tukunu na buruiesi tai napano sebi joṃa bovago eaio. Ea vio na romial ka Mosis naio joṃa bio Atua Soṓi ber naio be Atua na Epraamo kanano, a Atua na Aisak kanano a Atua na Yakovo kanano. ³⁸ Ana bogo na Mosis naio ber iliano na, tom tolu nei aṃaro ea yetemeriba nei nua bogo be ruei, jibe na aṃaro ea yetemeriba nei, mia aju ameul ea Atua kiano vo. Atua naio maka ve Atua na tomu na aṃaro ga, mia naio jidom ka tomu nalo na aju bija naio nalo abe tomu na ameul. Ea Atua kiano vitiano, tomu nalo naṃa aṃaro ruei ea yetemeriba nei, nalo ameul kia ga vo aju.”

³⁹ Ana naverloglogiano na

tuboiano nalo, nalo ajumã amiagago ka Yesu kiano verdoþeiano ban Satusis nalo, ana amial ka naio be masou bo laka, ana aber “Naverloglogiano, kanamo verdoþeiano naio bo mia bo.” ⁴⁰ Aber jibe na bior Yesu kiano iliano nei mila Satusis nalo amerou ka avika vite tai den naio bereio.

Yesu Naverikariano naio be tormoruo Parinio Tubo Teviti kiano Atua

Mataiu 22:41-46; Mak 12:35-37

⁴¹ Naruei Yesu mil ba lie banlo, bika vite denlo, berinavo “Bior vaio ana nalo ajumã aberloglog kamiu, aberinavo Naverikariano naio monoka riyotuba ea tormoruo Parinio Tubo Teviti nene kiano yati, napano nua naio be Parinio tubo beamu?” ⁴² Kiniou nebika naina, bior beamu, Teviti naio bivitauia niosi na Iouano kanano, berinavo ‘Atua Soþi naio ber ka kaku Tubo, naio berinavo “Jau kototano ea vameruo na kanaku,

⁴³ *jau koto rorea rivano-o, mia kiniou nala kanamo uolu nalo amei tibe ka yebe tai namã kobijankon jaamo eaio.” Iouano 110:1*

⁴⁴ “Ea vio na romial ka napano Teviti naio jomã bio Naverikariano ka kiano Tubo mugaruei. ?Mo bior Teviti naio ber jibe na, mo jumãbe ana ajumã aberenio mia Naverikariano naio riyotuba ea Teviti, rive kiano yati tai ga?”

Mia ea bogo tai bereio, amiilo toru ka Yesu kiano iliano nalo.

Yesu mil jikili ban navurimãraboiano nalo na nalotuano

Mataiu 23:1-36; Mak 12:38-40; Luka 11:37-54

⁴⁵ Ana tiniobi nalo aju amiagago ka kia ga vo, ana Yesu berial iliano tai, napano be kanano naiagagoano ga nalo kialo. ⁴⁶ Naio berinavo “Kamiu kuvitikar kamiu ka naverloglogiano na tuboiano nalo na namã abarvar kalo mēle ka m̃alo burutili kulu-m̃arauo nalo na, a verenio nalo amieliel ea vioruru nalo, ajidom ka tomu nalo monoka avatove kalo, avio vatitiglo averinavo ‘! Aiou, naverloglogiano novo, kav-ijo bo!’ A ea bogo na jokoluolu þeli joomo ea yimo na volkouano nalo bunu, nalo ajidom ka dam̃ariga atutano ea vio na tomu na tortoru nalo kanalo ga. ? Kamiu kubitilubar ruei, a? ⁴⁷ Mia ajumã aburu kialo volkouano nalo kiri þetepeteli laka, mia ajumã amila sibi ga, bior ka bogo nene ga, nalo ajumã amijukubin taanou nalo, amila bulaglo. Naruei bior kialo bajago nalo na, mia kialo vironiano sikili lie vo.”

21

Taanou tai buku veru sesa juo ban Atua

Mak 12:41-44

¹ Naruei bogo napano Yesu nalo ajua Yimo Lu na Atua Kunuano, ana amial ka napano tomu tealó abinimei ka

mia avuku kialo ijaiano ea basaro na Yimo Lu. Naruei Yesu bitii, ana naio mial ka nasanibaiano nalo abinimei abuku kialo ijaiano novo nalo, ² ana na iorou kanio, naio mial bunu taanou tai, napano naio be talimasa ga, mia naio binimei buku kiri veru sesa juo ga.

³ Naruei naio berii tira nei banlo, naio berinavo “? Kamiu kumial taanou na, napano naio buku kiri veru sesa juo na? Kiniou neber riano ban kamiu, ka naio jian loa jovulu nonovio ijaiano dolu nalo na nasanibaiano nalo na kanalo. ⁴ Nalo be kialo burumara veru nalo, mia amije bena ga togio, mia taanou na, veru telisu nei naio bokario ka rijekar kiano meouliano, naio jian nonovio ban Atua.”

Yesu naio berial ka mia aue bulag Yimo Lu na Atua Kunuano

⁵ Karina iorou ka naina, tomu tealo ajumã aberii Yimo Lu, aberinavo naio kirinovo tai mia, bija sano veru maraiu nene nalo, a tonovo nalo napano m̃a tomu nalo abario kamã mijovovua tanobuku nene. Ana Yesu mijog tukunu nalo na jibe nei, ana berinavo ⁶ “?Kamiau kumitumã kumial vite nalo na kuber bo? Neber ka kamiu mia iorou ka bogo tai na jo binimei, mia ve re bunu puruveru tai totano vatitig ea jeleigio, bior mia tomu nalo tai amei aue bulag searia yimo na riviniu.”

Jaleleano monoka mia rimei

⁷ Mia bogo na nalo amijog ka Yesu ber jibe na, abika denio, aberinavo “?Ana Naverloglogiano, mia aue bulag Yimo Lu nene nagi, a mia kumemi nuvijikia nuvial kijokijo venia naruei naio verial ka vaataro ka vite nalo nene amalmaluvo?”

⁸ Ana na naio ber kalo, berinavo “Bo ka kamiu kuvitkar vatitig kamiu rivu, ka mia ve re toro tai rimei rila sibilili kamiu, bior mia tomu ve telabo napano mia adu siaku, mia nalo amei averinavo ‘! Kiniou nebe Naverikariano nei!’ p̃eli averinavo ‘! Naina naruei, bogo nene naruei!’ mia maka rivu ka kuvitakisorlo. ⁹ Ana ver ka bogo na, mia kamiu kuvijog uetubaiano na mira, a jaleleano nalo aju vaataro, mia kumembiju m̃ele re. Vite nalo na monoka amalmaluvo beamu, mia naina maka ve bogo na maaro nene navo.”

¹⁰ Ana naio ber bunu kalo, berinavo “A parinio tubo nalo, mia ala mira kanio parinio tubo dolu nalo, a venuo nalo atumolu ka venuo dolu nalo. ¹¹ Mia m̃ii ve toru, mia reraio ea yetemeriba nei mia ve burumara vituiano a mieiano kouo nalo, a rivija naina mia ve vite na memebijuiano ave burumara kijokijo nalo ea bulu niogovu yauo mave. ¹² Mia bogo na ve re vite nalo nei vo, mia tomu nalo ala kiki kamiu ve toru laka. Mia nalo amei avokakar kamiu sikili, avar niajebijo rivan

kamiu, ana iorou kanio mia adu kamiu kuvitua jumano navurimaraboiano na yimo na volkouano nalo, p̃eli na avuku kamiu kuva kuvitua yimo na tetavokoiano, p̃eli ala kamiu kuvitumolu kuvitua mirano kialo parinio tubo nalo p̃eli na kialo navurimaraboiano nalo. Vite va nalo na mia kuvarilo bior kubokar siaku jikili. ¹³ Ka bogo na mia sikili laka rivan kamiu, mia rive kenemiu bogo na kuvijikia kuverial Ioluanu Vou na bo vanlo.

¹⁴ “Mia vonganei, bogo na vite nalo nei maka vo, kamiu kuvisidom m̃elea re ka mia kuver venia ka bogo na, ¹⁵ bior rimonloglog bogo nene ga, mia kiniou nesian iliano na masouano rivan kamiu. Mia bogo na kuver iliano nalo nei ka kenemiu uolu nalo, mia tovulo, mia ajikia re ka atuṽedoṽe bereio kenemiu iliano nene.

¹⁶ “Ka bogo na, mia nalo na ga napano m̃a kumituṽa kubiolo ka teta p̃eli kuruemiu p̃eli tumano p̃eli bilbilu, nalo na jibe na naruei napano mia amijikia avuru bulag kamiu kuvano, adu kamiu kuvitua tomu na tortoru nalo jumalo, ka mia ala tanea kamiu rivano-o mia m̃a auebinvin kamiu tealo amarmaro. ¹⁷ Mia tomu nalo tiniel ser kamiu laka, mia nalo asian liliu iliano rivan kamiu napano siaku joa kamiu.

¹⁸ “Mia kiniou neber ka kamiu ka mia vijumiu tai riva kovio deio. ¹⁹ Mia

kamiu kuvitu sikili rivano-o kuvitovulu juluvati na bogokouo nene, ana ea m̃arabo na naruei mia kamiu kuvokar meuliano riano na kenemiu.”

Burum̃ara mira ea vio Yerusalemo

²⁰ Mia ea tivelinio na burum̃ara bogokouo nei mia rimej, Yesu ber kalo bereio, ber “Telikiti na ver kuvial taara na tomu na mira atu selivivko burum̃ara bulukomeli na vio Yerusalemo, mia kuvijikia ka bogo na burum̃ara sano labulagiano nene naio jo binimej vaatara. ²¹ Mia bogo na kuvial vite nei, kamiu na kuvitua vio Yutea, bo ka kuvuro, kuva kuvitivan kamiu ea suku nalo, mia ver kamiu na kuvitu jouro Yerusalemo, bo ka kumolmoluo kuvuro kilkil, p̃eli na kamiu na kuvitu mave nei, maka rivu ka kuvilavio ka kuvatove vonuo bereio.

²² Nina bior ka bogo na, naio be burum̃ara legiano na lameraniano na Atua kiano siniabu, tavukia na vivitauiano re nua nalo aberkakario. ²³ Ka bogo na bunu, mia ve kirivova laka rivan tire nalo na be m̃abolo, rivija bunu nalo nam̃a ajum̃a amije yu ban kenerilo solbouo nalo. Ka bogo na, mia ve burum̃ara najogvaiano ea kiado venuo nei, a burum̃ara siniabu rimej ea kiado tomu nalo nene. ²⁴ Mia iobogu na mira rila vinvin ve telabo atibirbil, mia m̃arimieni riorkar ve

miroano juñalo, avurulo
ava airñau kurano ga ea
taara dolu nalo. Mia kulo
dolu nalo avie niegeniege
kitkit lelan komeli lu na kito
kulo Ju kiado Yerusalemo
nei, mia ave tubo eaio
rivano-o rivokar bogo na
Atua jekar ka ve kialo bisi.”

*Mia Kulorinio Kenerinio
rimeĩ bereio*

²⁵ Ana na Yesu berii
legiano na maaro, naio
berinavo “Ka bogo na, mia
amijikia aial kijokijo ea
mñerenio a ea siberio a
ea mñarvitano nalo. Ea
yetemeriba nei, mia taara
na tomu nalo mia niukniuku
rivielo ve toru laka, asidom
bijobijon ve toru, mia bogo
na aial tei tumolu ve toru to
rivavauro, mia nalo ajikia
re ka mia tuñabe kalo.
²⁶ Telikiti na nalo abitilubar-
bar ka venia napano mña jo
binimeĩ ea yetemeriba nei,
a napano vite na tortoru
nalo na bul niogovu yauo
amikulkulu janea vio, mia
nalo amemebiju ve toru,
meribobogo amñarmñariulu
rivior meroano. ²⁷ Mia
ala tibe na rivano-o, ana
iorou kanio ana mia aial
kiniou Kulorinio Kenerinio
noyotuba ea melijo vija
kanaku burumñara moroano
a vija kanaku burumñara
miamoiano.

²⁸ “Ana ea tivelinio na
kamiu, ver bogo na kuvial
vite nalo nei atikar kañña
amalmaluvo tibe na, mia
kamiu kumerou re. Mia
niukniuku rivie re kamiu,

mia kamiu kuvitumolu ku-
var bulag pariparimiu ku-
visirarag mave, bior vite
nalo na nioti nene ber ken-
emiu toro na laruriano naio
jo binimeĩ, vaataro ka riy-
otuba.”

Kijokijo na burubilivo

²⁹ Ana na Yesu ber jamer-
ijiano tai banlo ea tivelinio
na bogokouo na jo binimeĩ
keano vo, naio berinavo
“Kamiu kuvisidomii von
burubilivo na, pñeli na
buruiesi dolu nalo na jibe
na. ³⁰ Telikiti na kumial jaati
nalo abinimeĩ amemeaio,
a abinimeĩ amelokloko, a
sidiati nalo abarbovelo,
ana na kamiu kumijikia ka
be bogo na vio bitunu jo
binimeĩ vaataro. ³¹ Jibe
na bo ka na ver kamiu
kuvial kijokijo nalo nei,
ajuñña amalmaluvo jibe na
javukia nañña kiniou naber
ka kamiu ruei, mia kamiu
kuvijikia ka navenatuboiano
na Atua kanano naio jo
binimeĩ vaataro kean kamiu.
³² Riano neber ka kamiu,
mia vite nonovio na monoka
ayotuba tibe na rivano-o,
mia iorou kanio ana taara
na tomu na ameul ea bogo
na ava kovio ea yetemeriba
nei. ³³ Mia vio yauo rivija
yetemeriba nei nalo ve juo
bunu ava kovio, mia kanaku
iliano nalo maka ajikia ava
kovio bogo tai.”

*Kamiu monoka kuvila
vatitigio kenemiu meuliano
nalo*

³⁴ Naruei Yesu midu il-
iano na banlo ka bogo na,

iliderevijoiano banlo, naio berinavo “Mo ea tivelinio na kamiu, kamiu kuvitii vatitig kamiu. Maka rivu ka kenemiu meuliano tanea vio, ħeli na kumunu mēlea mārjunēmēlu ħeli na vite nalo na jibe na, a maka rivu ka kenemiu jidomiano to tulaka ea vite nalo na yetemeriba nei ga. Aver ħeli, mia kuvitumā kuvila tibe na rivan-o mia kuvilo ka burumāra legiano na maaro riyotuba ka kamiu vaarakurano ga tavukia viobijio.

³⁵ Nao, mia tomu nalo tanea vio reraio ea yetemeriba nei, mia atu asidomialio re, atu avitilubario re, mia legiano nei rivokarlo tibe ka na menu miilo ka buruniavo jubulinio mārō garuei. ³⁶ Mia monoka kamiu kuvitu derevijo damāriga, monoka kuvitu kubolkouo ka kuvijikia kuvitu sikili ka kuvilarur kamiu ea vite nalo na mia ayotuba, rila ka mia kamiu kuvijikia kuva kuvitumolu kuvitu ea kiniou Kulorinio Kenerinio miraku.”

³⁷ Ana na Yesu jo mā berlogloglo jibe na ea Yimo Lu ka legiano nalo, mia ka bogiano naio jo batavio den komeli, ba joa Suku na Buruolivi Nalo. ³⁸ Mia kavijova nalo, ana tomu nalo ajumolu soĥeli, aban bereio ea Yimo Lu ka ajog kiano iliano nalo.

22

Navuri māraboiano na kulo Israel nalo ajumā

ajidom auebin Yesu keano vo Mataiu 26:1-5,14-16; Mak 14:1-2,10-11; Jone 11:45-53

¹ Na karina, bogo binimei vaataro ka namā yuka nonovio, amila kialo jokoluolu juo na tortoru, jibe ka jokoluolu na najenjeniano na beskit napano maka isi toaio, bija jokoluolu na nasidomialiano na ioruriano. ² Ana ka bogo na, tomu na tortoru na kulo lu nalo bija naverloglogiano na tuboiano nalo, ajumā amila vio ka auebin Yesu keano vo, mia maka ajikia aleal mārabo tai, bior amerou ka ver alaio, ħeli mia tomu nalo ajikia ala titai kalo.

Jutas jukunu bija tomu na tortoru, berkar ka mia tiveluku ka Yesu

³ Mia monloglog bogo na ga, si mārō binimei ba joomo ea Jutas na vio Kariot kiano iviso, napano naio be na duelimo ba juo tai. ⁴ Ana na maka vesiou, ana naio jumolu, bano ba miyotuba ka nalo napano tortoru ka kulo lu nalo bija tomu na tortoru na kialo menumia nalo, berial kiano jidomiano, ana na nalo aberii mārabo na vabe napano bo ka mia naio mijikia tiveluku ka Yesu selia rivanlo. ⁵ Ana na Jutas kiano jidomiano milalo amijog bova toru laka, mia nalo amial bo ka aje veru tai rivan naio riviorio. ⁶ Mia Jutas jaaro kanio, mia jikar ea bogo na, julaka ga naio jo mā jiravo ka vulu kiano bogo ka ver bogo tai napano

ver ve re bunu tomu nalo tai eaio, ana na mia mijikia tiveluku ka Yesu rivanlo.

Yesu miila Pitere naio Jone ka ava ala vatitig sano sinaniano na maaro

Mataiu 26:17-25; Mak 14:12-21; Jone 13:21-30

⁷ Naruei abinimei monloglog legiano na beamu na jokoluolu na najenjeniano na beskit napano maka isi toaio, napano naio be bunu legiano napano monoka ala sida na nunu sesa nalo ka sidomialiano na ioruriano. ⁸ Naruei Yesu ber ka Pitere bija Jone, berinavo "Nei-ila kamjuo ka kuva kuvila vatitig vite nalo na sado sinaniano na jokoluolu nene."

⁹ Ana na naljuo nei abika denio aberinavo "?Ana jau kojidom ka nuvila vatitigio to be?"

¹⁰ Ana na Yesu berinavo "Kuve juo kuva kuvokar m̄aratavo na toru na vio Yerusalemo, mia bogo na ver kuva joomo von kiaga eaio, mia kuvial toro tai napano midu burum̄ara bauei tai na rimeu rivetavo ka kamiu. Mia kuvitakisorio kuva a mia naio rivuru kamiu kuan ea yimo tai.

¹¹ Mia bogo na ver kuva joomo ea yimo nene, mia kuvil rivan toro nene kuverinavo "Kiado naverloglogiano naio bika berinavo, Kumemi valauo nalo, kene-memi vajoomo naio be, ka nuvijikia nuvisen sinaniano na sidomkariano na ioruriano eaio?" ¹² Kuvil tibe na rivanio, naruei mia naio

siloglog ka kamiu ka burum̄ara vajoomo tai mave, napano vite nonovio juaio ruei, ana na mo kuvila vatitig vite nonovio na sinaniano nei ea vio nene." ¹³ Mia Yesu ber jibe na ka na-iagagoano juo nei bisi, ana na abano, mia amial ka vite nonovio miyotuba jibe ka ga napano naio beriio kalo jukamu.

Jibe na naruei, ana na amila vatitig sinaniano na maaro na Yesu sano.

Sinaniano na maaro

Mataiu 26:47-56; Mak 14:2-26; Jone 18:3-11

¹⁴ Karina Yesu nalo abinimei mave ea vio nene, ana bogo na sinaniano, Yesu ba jotano ea vio na sinaniano, mia atevi nalo abinimei ajutano naliko.

¹⁵ Ana na Yesu mil banlo, naio berinavo "Bogo jiou ruei, kiniou najom̄a nojidomii sado sinaniano na sidomkariano na ioruriano nene. Ninei naruei saku sinaniano na maaro, napano kito ga rosinan vio takurano, ana iorou kanio ana mo nemijikia navan ea kanaku bogokouo. ¹⁶ Kiniou neber ka kamiu ka joko nei nioti nene berii ioruriano. Mia kiniou nesen re bunu bereio, rivanvano-o rivokar bogo na kiaku ioruriano rimeu ea yetemeriba nei, ea bogo napano mia Atua kiano navenatuboiano rimeu."

¹⁷ Naruei naio midu baja tai, bolkouo ber siva ban Atua biorio, avona bisi ana ber kalo, berinavo "Kamiau kuviyon burevure tanea

kamiu, kamiu ga kumunio.
¹⁸ Nina bior jikar vonganei, mia kiniou nomunu re bunu m̃arjumẽlm̃elu rivano-o rivokar bogo na mia Atua kiano navenatuboiano naio rimei.”

¹⁹ Naruei naio mije salo ni-ajoko, naio bolkouo ber siva ban Atua kanio, avona bisi ana burekokorovio janealo, berenio “Ninei be mokotenaku, napano namijamo ka bior kamiu, mo mia monoka kamiu bunu kuvitu kuvila tibe na, tibe ka kenemiu bu-ruka ka kiniou.”

²⁰ Ana iorou kanio, bogo napano ajinan bisi, naio mila jibe na bereio javukia napano mila ka niajoko jukamu, naio midu baja namuniano tai, berenio “Baja nei naio be kijokijo na kiaku burukija napano mia riou ka kamiu, ka vitirilar Atua kiano virakariano vija kamiu. ²¹ Mia be titai bova, toro na mia tiveluku ka kiniou, naio be kito tai ga napano rojinan vio takurano nei ruei. ²² Mia kiniou Kulorinio Kenerinio monoka nam̃aro tibe ka nam̃a aberkario nua ruei, mia toro napano mia tiveluku ka kiniou, tiniek miia naio, mia rivova lie vo van naio!”

²³ Mia bogo napano amijogio, ana na nalo ajum̃a abivika denlo amilavon ka alealio na vabe kalo napano jo jidomii ka mia rila tibe na, mia maka avokario.

? Kei kalo na mia naio

tukamu kalo?

Mataiu 20:25-28; Mak 10:42-45

²⁴ Ana ka bogo na, siniabu jumolu bure naiagagoano nalo, ber mia kei kalo napano mia nalo asirarag kanio ka naio loalo lie, rive kialo navurim̃araboiano.

²⁵ Mia Yesu mijogio ana na naio berenio berinavo “Kito romijikia ruei tomu na tortoru nalo na yetemeriba nei kialo bajago, Parinio tubo nalo abe tubo ka kialo tomu nalo, a navurim̃araboiano nalo, tomu nalo monoka atovonlo, adu sio na loa laka rivanlo, abiolo aberinavo toro na bitikarlo. ²⁶ Mia kamiu kiaku naiagagoano nalo, monoka kuvila re kamiu tibe ka tomu na tortoru nalo nei. Naio be kenemiu napano p̃eli mia averinavo naio be toro na toru, mia monoka naio rimei tibe ka kenemiu toro na kiritelisu tai, tibe kanio napano naio moluo iorou. Kamiu tai napano ver sidom ka naio rimei rive kenemiu navurim̃araboiano, naio monoka rimei tibe ka toro na mia m̃a riijaja kamiu.

²⁷ “Ka bogo na sinaniano, toro tai jotano ana toro dolu bar sano sinaniano binimeibanio. Naruei naljuo nei, na vabe nene napano amial jibe ka naio toru lie loa tinene? Kamiu kumijikia, mia kiniou maka netibe ka naio, mia kiniou nebinimeiea yetemeriba nei jibe ka naio nam̃a mila im̃auano,

miija kulo dolu nalo, bijuku bo kalo.”

Yesu berkar ijaiano banlo

²⁸ Ana na Yesu ber kalo, berinavo “Kamii na, nemial kumitibe ka kiaku ikurukariano na bo nalo ea bogokouo nalo namã nabokario, binimeï bokar baneï. ²⁹ Mia jibe kanio napano teta naio bitirilar kiniou ka neve tubo ea kiano vio, mia kiniou bunu neber ka kamii neber nevitiri bulag kamii kumei kuve m̃artubo nalo ea kiaku vio nalo nei. ³⁰ Tibe na, ana na mia kamii naruei kuvijikia kuvitutano rivija kiniou bereio, mia kito resinan vio takurano jouro ea kanaku navenatuboiano, ana mia kamii kuvitutano ea vio na mave loa laka bunu ka mia kuve tubo ka bajulukuti du-elimu ba juo na Israel nalo.”

Yesu berial ka mia Pitere rivarbonbonua naio

Mataiu 26:31-35; Mak 14:27-31; Jone 13:36-38

³¹ Naruei Yesu mil ban Saimon Pitere, berinavo “O Saimon, jau monoka kovitika vatitigso rivu. Sim̃aro tinien jer kamii ruei, naio jidom toru ka rila bulag kamii, mia Atua mijamo ka ruei ka mia naio mijikia tokol von kamii ve telisu, a mijikia tiburelar nana naio bo a nana naio bova. ³² Mia kiniou nobolkouo kaso ruei, a noju jikili dam̃ariga ea kanaku volkouano ka ver jau kotum̃abe, ana na mia kanamo viekouoiano rijoru nonovio denso re. Ana verenio jau komei kovu

bereio, komei bereio, mia jau monoka komei kove toro tai na mia kala kuruamo nalo atumolu atu sikili lie dam̃ariga.”

³³ Mia Pitere naio berdoŋe Yesu berinavo “Tubo, verenio avukuso kavan ea yimo na lakoiano, mia kiniou neviedu rivijaso rivu ga. Peli mia ala kikiso mia kam̃aro kario, mia kiniou najaaro ga ka kito ve juo.”

³⁴ Ana na Yesu berkanio, berinavo “Pitere, kiniou neber telerinio ka jau, ka bogiano nei ga, mia tormano tokoko-reko re vo, mia jau kavarbonbonua kiniou ve varolu, koverinavo jau maka kejikia kiniou leleio.”

Bogo kouo naio miyotuba ruei

³⁵ Ana na Yesu bika denlo, naio berinavo “Kamii kuvisidomii von nanua, ka bogo namã nemiila kamii kubano m̃a kubioliolu janea vio nalo. Kiniou neber ka kamii ka mia kuvar re kenemiu saba nalo tealo vija kamii, jibe ka siveu na veru, p̃eli na basaro, p̃eli na kulubue dolu na jaamii, p̃eli na vite nalo na jibe na. ? Mia jum̃abe, kamii kumial ka jumemiu bulati ka vite nalo tai?”

Naruei nalo aberdoŋe aberinavo “Tubo, maka jumememi ve bulati ka titai.”

³⁶ Ana na Yesu ber kalo berinavo “Nao, naina naruei. Mia vonganei, kito rojua bogo dolu tenia nei. Vonganei, verenio nana be

kiano siveu na veru, ħeli na kiano basaro, mia monoka naio rivar vija naio rivano. Toro na ver maka kiano iobogu na mira tai, bo ka naio riĳiliĳililar kanio mĳano saluvoiano, mia naio rivar veru nene rivan rivulu ka kiano iobogu na mira tai.

³⁷ Kiniou neber naio nei ka kamiu, bior vivitauiano lu nalo re nuā namĳa aberii kiniou, ajuĳmĳa amalmaluvo abe riano naruei, ban bokar iliano namĳa Aisea naio berenio, napano berinavo

‘Amila ka naio jibe ka naio bunu be toro va tai na lakokoroviano na tuboiano.’ Ais 53:12

³⁸ Mia naiagagoano nalo ajuĳmĳa ajidomii ga iliano na iobogu na mira nei, naruei nalo aberinavo “Tubo, keĳiio, ninei be kiado iobogu na mira juo nei.”

Mia Yesu mial ka napano maka ajikia dulu kiano iliano nei, ana na naio berinavo “E abe, roberii vite na bare naruei.”

Yesu ba bolkouo Ketsemani mave ea Suku na Buruolivi Nalo

Mataiu 26:36-46; Mak 14:32-42

³⁹ Mia Yesu nalo ajuvan vio nei mave, mia jibe ka napano naio joĳmĳa milαιο, naio miel bavin bokar Suku na Buruolivi Nalo, naio naliko kiano naiagagoano nalo. ⁴⁰ Mia bogo napano aba aboru ea vio napano Yesu jo ban eaio, amijilimebi eaio, naruei naio ber kalo berinavo “Kamiu monoka kubolkouo tulaka ka mia

jukuano nalo ala re kamiu kuvijoru.” ⁴¹ Naio ber jibe na kalo, bisi ana na naio juvanlo, ba lie denlo telisu ga, naruei minie ka sudu jaano ana bolkouo ban Atua.

⁴² Naio bolkouo jibe nei, berenio “Aiou Teta o-o, ver jau komijikia kala mia riva ga, jau kodular baja na jogvaiano nei kanaku, ka nomunu re. Mia jau kala re kanaku sidomiano, mia kala ga kiamo.” ⁴³ Ana ka bogo nei Yesu mijog temiano toru ea naio, naruei amial nailiano tai jaluvo ea vio mave binimei yetano, binimei mijija Yesu ka naio ve ĳirinio sikili bereio. ⁴⁴ Mia Yesu jo mijog bova toru, jiniomo de sano titi, mia bolkouo jikili lie vo banbano-o mia sano minonoano nalo aju abadigdig jibe ka burukija bavatove ea borotano.

⁴⁵ Mia bogo na naio bolkouo bisi, ana na jumolu bereio, ban bereio ea naiagagoano nalo, mia mial tinieĳiano na monmeliano muelo ruei, aju amonmelio ga. ⁴⁶ Naruei mila bovonlo, berinavo “Ai, juĳmĳabe ana na kamiu kumitu kumonmelio? Bo kanio kuvitumolu kuvila tibe ka na kiniou naber ka kamiu ruei. Monoka kubolkouo ka mia jukujukuano nalo amei re ka ala kuvijoru.”

Jutas nalo abinimej abokar Yesu

Mataiu 26:47-56; Mak 14:43-50; Jone 18:3-11

⁴⁷ Mia bogo na Yesu joĳmĳa mil banlo kia ga vo,

amial burum̃ara taara na tomu nalo amiyoyotuba kalo, amial ka napano toro tai jukamu kalo abinimei vaataro, nina naio napano beamu, naio be nalo tai, be Jutas. Ana na Jutas binimei vaataro ka Yesu, bokario ana miomiom babibiniono.⁴⁸ Mia Yesu mil jukamu banio, berinavo “Jutas, ka vai na koniom kukulnioku jibe na mia naio bo ga, mia ka vaio ana jau kojidom kovulvulu ka kiniou Kulorinio Kenerinio ea m̃arabo na jibe na?”

⁴⁹ Mia bogo na nalo na Yesu kiano napano ajikil aju vaataro ka naio abitilubar venia nei Jutas nalo ajidom alaio, abika den Yesu, aberinavo “?Tubo, jum̃abe, mia kito retelo ka kiado iobogu na mira?”

⁵⁰ Mia Yesu naio maka riverdopelo vo mia naia-gagoano nalo tai naio jumolu, burular kiano iobogu na mira, miven ea nalo tai, napano naio be toro tai na parinio toro lu kanano, mia naio jetitire ea ga meriniano ana jelar tiliniene vameruo.

⁵¹ Mia Yesu mil banio, berinavo “!Ee, to to to! Kito rola re bunu tibe na kalo.” Ana na naio mijiou jokol jeleig burutiliniene toro nei, mia mila vatitigio bereio bo. ⁵² Naruei naio bitikar tomu na tortoru na kulo lu nalo naliko tomu na tortoru na menumia nalo na Atua kiano yimo, bija navuriñaraboiano na kulo Ju nalo kialo, napano abin-

imei ka naio, naio mil banlo berinavo “?Jum̃abe ana na kubar iobogu bija kenemiu nia nalo jibe na? ?Peli kumitu kumisidom kuberiam̃a kiniou nebe toro na p̃irinio jikili ka m̃a bina p̃eli nam̃a muemue toro?⁵³ Nanua, legiano telabo ga, kiniou nojo bija kamiu ea Yimo Lu banbano-o, mia bior vaio ana maka kumei vaataro ka kiniou ka kuvokar kiniou ea bogo nalo na ruei? Mia nemial jibe ka kamiu kube tomu na melijokouo, napano kubinimei bija mo-roano dolu nalo na melijokouo, a vonganei be kenemiu aura memedu.”

Mo abinimei abokar Yesu, aburio bano.

Pitere naio barbonbonua Yesu

Mataiu 26:57-58,69-75; Mak 14:53-54,66-72; Jone 18:12-18,25-27

⁵⁴ Bogo na abokar Yesu, aburio ban bereio naliko, abano aba jouro ea burusio na parinio toro lu kanano. Mia Pitere bunu jom̃a jakisosor vavanlo ga ka bogo nei, naio maka riva vaataro keanlo. ⁵⁵ Mia bogo na abinimei jouro ea burusio nei, tealo aba ajovokar sebi bilvili ka atuṽalo eaio, mia Pitere bunu ba jotano naliko.

⁵⁶ Naruei aju ana jegliano na sebi mereralii Pitere mirano, ana na niatira tai nam̃a mim̃au napano jo bijalo, naio bitilubarario, ana berenio “!Ai, kamiu kuvialio! Kema na, naio bunu be nalo

tai naŋa bogo nonovio ajak-
isosor tete na.”

⁵⁷ Mia Pitere barbon-
bonua, berinavo “!Ee maka!
Kuvivinieku!, kiniou neber
vatitig kaso, maka nejikia
kema na!”

⁵⁸ Karina maka vesiou
ga, nalo tai mial Pitere,
bitilubarior, ber “Ai, jau
bunu, kobe nalo tai na.”

Mia Pitere berdoŋe
berinavo “Ai kema, abe
makanio.”

⁵⁹ Mo aju jibe na bano-o,
na aura takurano barlaka
bereio, dolu binimeier berial
bereio, ber mŋlea banlo,
berinavo “Kiniou neber
vatitig ka kamiou, kema na,
naio naliko tete re Kalele na
jukamu ruei. !Kuvial, naio
bunu be toro Kalele memedu
ga ruei!”

⁶⁰ Mia Pitere berdoŋe mila
sibi bereio berinavo “Kema,
abe kiniou maka nejikia tena
mŋa kojomŋa koberenio na
koig.”

Ana monloglog bogo naŋa
Pitere jomŋa ber iliano nei kia
ga vo, tu jokokoreko.

⁶¹ Mia bogo na tu jokoko-
reko, ana Tubo ŋilig parinio
binimeier, bitikar Pitere, naio
bitii kilkil eaio. Naruei
Pitere jidomial bereio Tubo
kiano iliano nanua berial
kanio nua ruei, napano
berenio berinavo “Riano
kiniou neber kaso, ka
bogiano na legiano nene ga,
bogo na tu tokokoreko re
vo, mia jau kavarbonbonua
kiniou ve varolu ruei, kover
jau maka kejikia kiniou.”

⁶² Mia Pitere naio mijog

kirivova toru laka, naio
batavio, jegi-i o-o mia jegi.

*Parinio toru lu kiano
tomu nalo amila kikii Yesu
Mataiu 26:67-68; Mak
14:53-65; Jone 18:19-24*

⁶³ Mo nalo napano ajumŋa
abokakar Yesu ea bogo na,
amila kikii naio, a amil
vulevulei eaio, ajukukikio,
⁶⁴ ban amiorko mirano
ka mia naio rijikia re
rial vite, mia bogo naŋa
ajumŋa amijuba biliviligio,
amiyotel eaio abika denio
aberinavo “Ei, aber jau kobe
naverialiano tai, bo ga, jau
kabagbag von ka kenia na
jomŋa mijubaso vonga na.”
⁶⁵ Mia amila jibe na ka
banbano-o, amil niegeniege
toru laka.

*Aburu Yesu ban ea komeli
na toru na tomu na tortoru
na kulo Ju nalo kialo*

⁶⁶ Aju jibe na banbano-
o mŋrenio bavin garuei,
ana na navurimŋara-boiano
na kulo Ju nalo, jibe ka
kulo lu na tortoru nalo
bija naverloglogiano na
tuboiano nalo, abinimeier vio
takurano ea kialo komeli
na toru neibano. Bogo na
abinimeier vio takurano bisi,
ana na aburu Yesu ba jikili ju
jukamu ea miralo. ⁶⁷ Naruei
amil banio abika denio
aberinavo “Verenio jau kobe
Naverikariano be riano,
naŋa kulo Ju nalo ajumŋa
amial aber mia monoka
rimeier, mo, numisidom ka
jau koverial ka kumemi
vonganei.”

Mia Yesu berdoŋe banlo,
berinavo “Kiniou nemijikia

neverial ka kamiu, mia ver neverenio, mia ĥeli kuvisaaro re ka kumon-moneaio.⁶⁸ Mia kiniou nejidom ka nevika vite tai den kamiu bunu, mia ver nevikanio, ĥeli mia kamiu kuverdoĥe kulu re ga na.⁶⁹ Mia be titai nana kiniou najaaro ka nejidom never ka kamiu naio ber jibe nei, ber 'Jikar vonganei, mia tibe ka ga napano Iliano Lu berenio ruei, napano berinavo mia Kulorinio Kenerinio riva totano mave tivelinio vameruo ka Atua na moroano toru.'"

⁷⁰ Mia bogo na amijog iliano nei, abika denio, aberinavo "I Tomnei, venia na jibe na! ? Jau kojo kober jau naruei kobe Atua kenerinio memedu?"

Ana na Yesu berdoĥelo bere "Verver kuvisidom kuver tibe na, mia tibe na ga naruei."

⁷¹ Mia bogo na amial Yesu joĥa mijamo ka ber naio be Atua kenerinio, tiniel kirimimi, aber jibe nei aber "Kema na mil jibe na, kito robitilubar vatitig ka burumĥara tokoriano joa naio ruei. Mia kito resiravo re bunu toro dolu ka rila veriano na naio bereio, naio kiano iliano ga jibure naio bereio ruei."

23

Aburu Yesu ba ban ea Pailat, napano be parinio toro na vio Romo naĥa jo bitikar Israel

Mataiu 27:1-2,11-14; Mak 15:1-5; Jone 18:28-38

¹ Ana na nalo na komeli na kulo Ju nalo amijog Yesu kiano iliano bisi, ana aju-mormolu, amioburovuronlo ba vio takurano ea burumĥara taara tai, naruei aburu Yesu ba jumolu jukamu ea Pailat mirano ea kiano vio na tibureiano.² Naruei amila veriiano ban Pailat, aber bulavulag vite telabo banio, tivelinio ka Yesu. Nalo aberenio aberinavo "Kema na, joĥa mila bulag tomu na kenememi venuo kialo jidomiano, naio joĥa berburelo ka avulu re bunu takis van kiamo boru parinio tubo Sisa na Romo, a naio joĥa miaia naio toru ber naio bar sio na Naverikariano, jibe ka naio be kenememi parinio tubo na toru. Vite nalo na naruei, kumemi numialio ka mirememi memedu."

³ Telikiti na Pailat mijog kialo veriiano nei, naruei naio bika den Yesu, berinavo "Mo, jau kija kover kanamo vonio. ?Be riano ka jau kobe parinio tubo ka kulo Ju nalo ĥeli na makanio?"

Ana Yesu berdoĥe, berinavo "Naina naruei jau kojoĥa koberver kiana."

⁴ Mia bogo na Pailat mijog venia napano Yesu berenio, naio maka rial ka naio mila tena bova tai, ana ber ka tomu nalo kialo tomu na tortoru nalo, berinavo "Kema na, ea kanaku vitiiano, naio memedu ga, naio maka rila kor leleio tuboiano tai."

⁵ Mia nalo maka asidom ka ajog Pailat kiano iliano, mia amila jibe ka tena soĥeli ga tai, ajikili lie vo kanio,

aberinavo “Peli ga, tete na naio kirivova ga. Naio joŋa julu vilivilig kenememi tomu nalo kialo jidomiano, a joŋa mioliolu banlo ea vio nonovio, jikar jo Kalele, binimej midu nonovio Yutea, binimej bokar bulukomeli na toru nei ruei.”

⁶ Mia bogo naŋa Pailat mijog aber Yesu jikar kiano iŋauano yako Kalele, ana bikanio berinavo naio be tete re Kalele memedu ŋeli na makanio. ⁷ Pailat bikanio jibe na bior naio maka ŋa to riadu ka tanobuku na Kalele, mia parinio tubo dolu nei Erot naio be toro na toru ka vio na, mila na ka bogo napano aberial ka Pailat ka Yesu naio be toro Kalele, naio berial ber mia monoka avuru naio riva van parinio tubo Erot ka naio rivitii veve vonio bior kiano tanobuku memedu. Ana ka bogo na, Erot bunu binimej miadu ka Yerusalemoe ruei, tenene na aburu Yesu ba ban naio.

⁸ Mia bogo na parinio tubo Erot bitilubar ka Yesu nene, naio jaaro, bior naio mijog sano tukunu mugaruei, mila na kirisioe ruei naio jidom rialio kija, mila na naio jidom ka vonganei naruei na, ŋeli mia rial Yesu rila kiano kijokijo tai rivanio. ⁹ Naruei naio milavon ka tukunu vija Yesu, bivivika vite telabo denio, mia Yesu maka riverŋe titai vanio, naio juburu ga jibe na ju, maka lele ril.

¹⁰ Naruei ka bogo na, kulo lu na tortoru nalo bija naverloglogiano na

tuboiano, nalo bunu ajikil aju vaataro ajumŋa amil kilkil ajaamŋi ka ŋa aber bulavulag vite nalo na tivelinio ka Yesu. ¹¹ Mia vite nalo nei naruei mila Erot naliko kiano tomu na mira nalo maka asaaro ka Yesu, ana amila kikio naio, amiyotel searia naio. Karina, amiya tubo nalo ŋalo kulumŋarauo nalo tai eaio, ka amijikia avital eaio, naruei amila banbano-o, karina Erot miila naio ban bere ea Pailat bitii bereio.

¹² Beamu ka vite nalo na, tomu juo na Pailat naljuo Erot abe bilbilu va kalo, mia monloglog bogo na amimau biju jibe nei bereio ka tibureiano na Yesu, burulo abinimej abe bilbilu bo bereio.

Yesu jumolu jukamu bereio ea Pailat mirano

Mataiu 27:15-26; Mak 15:6-15; Jone 18:39-19:16

¹³ Mia abinimej bere ea Pailat kiano vio, ana naio bio tomu na tortoru na kulo lu nalo bija tubo nalo bija tomu nalo ka amei aialio. ¹⁴ Telikiti na nalo abinimej joomo, naio mil banlo, berinavo “Nanua na, kami na kuburu toro na binimej jikili jua miraku, kuberial ka naio joŋa bilivilig niegeniege ŋelea kenemiu tomu nalo kialo jidomiano nalo. Mia kiniou nebika vite nalo denio, jibe ka naŋa kumijogio, mia maka neial ka naio mila vite nalo naŋa kumituŋa kuberenio na, nemial jibe ka naio memedu ga. ¹⁵ Naruei ne-miila naio ba mial Erot ka rivitii, mia Erot maka rileal

titaio, naruei miila binimeia ea kiniou bereio. Mo, kiaku tibureiano jibe nei, ber naio maka rila titai napano naio monoka riñaro riviorio. ¹⁶ Mia kiniou nala tibe na ga van naio: mia nala avitiv naio, karina mo atuvan naio rivan, rijikia rivan bereio ea kiano vio.”

¹⁷ Ana na bior bogo na be bogo na kulo Ju nalo kialo jokoluolu na toru, ajumña ajidom aber jibe ka namña Pailat jomña milala vururu, mia monoka tuvanlar Ju nalo tai namña amiadikakario jua kiano tetavokoiano. ¹⁸⁻¹⁹ Ana ka bogo na, nalo tai namña Pailat miadikario, naio kema nei Barabas, napano nanua beamu naio buru tomu dolu nalo amila baravo tai yako Yerusalemo, napano amuebinvin kulo Romo kialo tomu na mira nalo amarmaro, mila na Pailat miadikario joa kiano tetavokoiano.

Mia bogo na amial ka Pailat jidom ka tuvan Yesu rivan bereio tibe na ga, amiaga mērerere banio, aberinavo “Ei, maka, makanio! Kumemi numisidom kesilar Barabas rimeia bereio rivan kumemi. Mia toro na, kumemi nuber kaso ka numisidom jau kodular kiano meuliano ga.”

²⁰ Mia Pailat maka sidom, naio jidom ka Yesu taluvo ga tibe na bereio, naruei naio milavon ka ril, ber banlo. ²¹ Mia abuku deven ga kiano iliano, abiovio kanio, aberinavo “! Kotukukar, kotukukar toa mñakolkolo!”

²² Naruei Pailat mil banlo varolu nene, berinavo “?Ana kar venia, naio mila venia napano kirivova? Kiniou nemial vite nonovio ruei, maka nealeal vovaiano tai toa nai na memedu ka mia naio riñaro riviorio. Mia kiniou nala avitivio ga, karina mia notuvan naio riva vonuo bereio.”

²³ Mia nalo ajuve Pailat kiano iliano bereio, amiaga jouo lie jibe na bereio banio, ajaamñi lie, aber monoka Yesu rivan ea mñakolkolo, mia nalo amila jibe na banbano-o na ajovulu naio.

²⁴ Karina Pailat mila kiano tibureiano, berial ber naio mijamo ka kialo vikaniano.

²⁵ Naio napano mña joa nalakoiano bior bajago namña mila mira a bajago namña mue toro, Pailat mijamo ka naio batavio bereio ba banlo jibe ka namña abikanio. Mia tivelinio ka Yesu, naio berial ka mia kiano tomu na mira nalo ala van naio tibe ka ga na kulo Ju nalo ajidomio.

Aburu Yesu ban ea vio napano Kalvari

Mataiu 27:32-44; Mak 15:21-32; Jone 19:17-27

²⁶ Ana na aburu Yesu, amiel ban ea vio na atukukakar naio toa mñakolkolo. Bogo na ajumña abano, amial toro na ba yeturu karina jo miel binimeia vonuo bereio, nina be Saimon na nanua beamu be toro na vio Saireni, naruei ajutua naio ka rudu Yesu kiano mñakolkolo, mia

amidu joa burusovonano, miel jakisor Yesu bano.

²⁷ Amiel jibe na bano, a ka bogo na vio bujo ka kulo dolu nalo bunu ajumña ajakisor Yesu, na nalo telabo be tire nalo, napano ajumña amiel bija burumñara tegiano bija burumñara tinieiano. ²⁸ Mia Yesu jomña miagago ka kialo iliano na jogvaiano nei, karina naio barþilig parinio, jiraragidilo, mil banlo, berinavo "Tire re Yerusalemo nalo-o, kuvitig re bunu kiniou tibe na. Ver kuvisidom kuvitig, mia kuvitig kamiu ga, a kenerimiu nalo bunu. ²⁹ Kiniou neber jibe na ka kamiu, bior bogo na jikili tai mia rimei, ana na mia nalo na mia atua naio mia aver tibe nei averinavo 'Iver tire nalo ve re kenerilo ga! Mia rivu lie vo ver avar re tete ka mia mña rimunu yu ealo, bior bogo nei mia sikili laka van kito rivija kanado solbouo nalo.'

³⁰ "Ana mia bogo na rimei rivova laka vanlo, rivan rivan mia atumolu ateg van burusuku nalo vija suku nalo, aver 'Aiou, kuvitibir-bilko kumemi, kuvituba kitkit kumemi, kuvitivinko kumemi.' ³¹ Kamiu monoka kuvitigar rivu, bior vonganei buruiesi memeai kia ga vo ajumña amila kilkil ea kiniou ruei, mia iorou ka bogo na buruiesi rimei rijel bisi, mia amijikia ala rivova laka lie vo van kamiu."

Ajukukar Yesu ea mñakolkolo

³² Ana na ka bogo nei, ajumña aburukakar tomu juo namña amila kokorovio tuboiano, naruei aburulo naliko Yesu, ka auebinvinlo vijaio. ³³ Naruei amiel banbano-o, abokar kanano vio, vio tai namña abio ka Bordada na Kulorinio. Ana amidu Yesu ajuku kakario joa mñakolkolo, abitiri lario jumolu ju iviso, mia ajuku kakario tomu na bova juo neibano, abitiri bulaglo tinene jua Yesu jumano meruo, a tinene jua jumano mali.

³⁴ Jibe na naruei ana na Yesu jomña jaklele ea mñakolkolo, naruei naio mil ban Atua, berinavo "Aiou Teta, jau koviekokoa nalo nei. Nalo maka avitilubar vatitig vite nei mña ajumña amilaio nei."

Ana na iorou kanio, ana tomu na mira naloaju jibe na ajumña amila jibe ka namña amiere mñabujo, ka aleal ka kei kalo na mia rivar Yesu mñano kulumñarauo tai, a kei rivar tai.

Amiyotel va ea Yesu

³⁵ Mia kulo dolu nalo ajikilaju ga koalabo,aju ga mña abitivitiio, mia kialo natukamuano nalo ajumña amil bova ka Yesu, ajumña amiyotel va eaio, aberenio "Kumialio kema na! Tomu nalo ajumña aber naio milarur tomu dolu nalo miroano ruei, mia vonganei jumñabe naruei? Aber naio be Atua kiano Naverikariano, þeli na naio

be toro novo tai napano Atua miilaio binime. Aver tibe na ŗeli bo ka rilarur kija naio bereio!”

³⁶ Mia na mira nalo ajum̃a amil niegeniege naio bunu, abinimei amiyuku m̃arjum̃elm̃elu na mijeab an naio ka rimunuio, ³⁷ aberinavo “! A verenio jau kobe parinio tubo ka kulo Ju riano, javukia nam̃aaju aberenio, bo ka jau kalarurso vonganei.”

³⁸ Mia ka bogo na abivitaia tiniemaiano tai, ajuku jo mave ea m̃akolkolo mave ka Yesu parinio, na naio berinavo “Kulo Ju kialo Parinio Tubo.”

Tomu juo nam̃a amila kokorov tuboiano amil ban Yesu

³⁹ Ana na ka bogo nei, naljuo napano ajaklele ea m̃akolkolo bija Yesu amil banio na. Tinene mil kirivova banio, javukia nalo dolu nalo, naio berinavo “? Mia jau kobe Naverikariano, ŗeli na makanio? Bo jau kala soŗeli, kalarur kito!”

⁴⁰ Mia tinene mil banio berbureio, ber “Kaleliki, vonganei be kiado bogo na maariano naruei, mia jau maka kotovon Atua vo. Kito tolu nei tibureiano na amije ban kito be takurano ga, ⁴¹ mia tivelinio ka kito juo, memedu ga ka torokoriano nam̃a romilaio, mia tivelinio ka naio, naio maka rila titai leleio.”

⁴² Ana na mil ban Yesu, bika denio, berinavo “Yesu,

bogo na ver komei kove barago, komei bereio, aiou kovijuku rivu, jau tiniemo ribobogia re kiniou.”

⁴³ Ana na Yesu berdoŗe banio, berinavo “Kiniou neberkar banso, neber ea legiano na banei ga, mia jau koto vija kiniou ea kiado vio vuiano.”

*Yesu m̃aro
Mataiu 27:45-56; Mak
15:33-41; Jone 19:28-30*

⁴⁴ Mia vonganei, rimei rivokar leri, ana tikar ea bogo na m̃erenio maka bunu merera, mila na melijokouo jovuko reraio vio nonovio garuei, naio jo jibe na bano-o bokar m̃erenio tolu niogoravo. ⁴⁵ Ana iorou kanio, ana jagidago napano ajelanio jo joomo ea Atua Kunuano Lu, nam̃a joko vio lu na be lu laka, naio buruŗe mieli-bievi niati juo. ⁴⁶ Mia ea bogo na, Yesu miaga maariano, ber “Teta, kiniou nomidu niunuku joa jum̃amo.” Mia naio miaga jibe na bisi, ana burum̃aria kanano jegi naruei, naio m̃aro.

⁴⁷ Ana bogo na toro na toru na mira naio mial vite nei, miolua Atua siano, berinavo “!Riano ga na, kema na naio be toro tai na memedu ga!” ⁴⁸ Mia tiniobi na toru napano abinimei vio takurano ea vio nei, nalo bunu amial vite nalo nei napano m̃a amila ka Yesu, tiniel miia naio toru laka na. Avona bisi, ana na abanvan bereio,

amiel bija buruñara jogv-
iano, abano bere ea kialo
vonuo nalo.

⁴⁹ Mia taara dolu na tomu
nalo ajua vio nei ka bogo
nene bunu, ajikili aju koal-
abo kija ga, ajumña abitivitii
vite nalo. Nina be Yesu
kiano bilbilu nalo, naliko
tire nalo nanua abinimei ea
vio Kalele, ajumña ajakilili
Yesu banbano-o bokar vio
nei, mia nalo bunu amial
Yesu kiano mñariano.

Yoseve jivin Yesu

Mataiu 27:57-61; Mak
15:42-47; Jone 19:38-42

⁵⁰ Naruei toro tai na
komeli na kulo Ju nalo kialo
na Arimatea, mia siano be
Yoseve. Naio be toro na toru
tai na komeli na toru na
vio Yerusalemo, be toro na
memedu tai napano kiano
bajago kirinovo laka. ⁵¹ Naio
tai napano jidom toru ka
Atua kiano Navenatuboiano
rimei, mia beamu ka napano
aber ka mia ala vaio ka
Yesu, naio takurano kiano
jidomiano maka tibe na,
naio milavon ka riverburelo
ka ala re rivova kanio.

⁵² Mia bogo na mijogial ka
aber Yesu mñaro ruei, naio
ba jikil jukamu ea Pailat
mirano, naio bika denio ka
ver mijikia rudu Yesu moko-
tenano. ⁵³ Ana na Pailat
mijamo ka banio, naruei
naio ba midular Yesu moko-
tenano ea mñakolkolo, naio
mijuvuluko ka kulumñarauo,
ana midu ba midu vatitig
joa buluvae vou tai napano
aje vonga, napano maka adu
toro tai rimoneaio vo.

⁵⁴ Naruei legiano na Yesu
kiano mñariano, naio be

Vraire, jibe ka bogo na
amiomon vite rorea Legiano
Lu. Mia vonganei mñerenio
jo mialolo batove, vaataro
ka Legiano Lu tikario,
nina monloglog bogo na
mñerenio javin. ⁵⁵ Naruei
tire nalo nanua mña ajakisor
Yesu, jikar Kalele binimei
boru ea kiano mñakolkolo,
mia vonganei bogo na
amidu mokotenano binimei,
ajakisorio bereio. Ajakisor
binimei boru ea pakeltavo
naruei, amial vio na amidu
mokotenano jo mon joomo
ea buluvae.

⁵⁶ Nalo amialio avona bisi,
ana aban bere vonuo ka ala
vatitig sano bonotanunu vija
pomat. Nalo aboru vonuo
ruei, avona bisi ana Legiano
Lu jikar naruei, mila na
maka bunu ve bogo tai ka
avan bereio ka ayovovua
Yesu niabene. Mila na nalo
aju ga vonuo jibe na, jibe ka
namña tuboiano berenio ber
monoka nalo ala ea Legiano
Lu.

24

Buluvae kurano ga jo

Mataiu 28:1-10; Mak 16:1-8; Jone 20:1-10

¹ Legiano Lu barlaka ban
kario, ana na viomijeni
kanio, naio be legiano na
be moti na sude dolu. Mia
viomijeni mermeravo kia ga
vo, ana na tire nalo nei tealo
abar bonotanunu bija pomat
nalo na amirñauka batitiglo
ruei, amiel aban bereio ea
buluvae ka ayovovua vatitig
Yesu niabeno. ² Naruei
bogo na abinimei aboru

ea vio nene, amial ka burum̃ara puruveru na ajubonko kar ka buluvae, ajubon lario ruei, ³ ana na nalo aba joomo, mia amiilo ka napano Yesu mokotenano bakovio tai ruei.

⁴ Mia ajikili aju ajidomii dede toru laka-o, mia amiilo ka vaarakurano ga tom juo ajikili aju bijalo. Tom juo nei, m̃alo kulum̃arauo miuvu mia miuvu batitigio bo. ⁵ Mila na tire nalo nei amerou ka avitikarlo, naruei aminie ka sudu jaalo, ajak banini tano kamu kalo. Ana naljuo amil banlo, aberinavo “Oi, tire nalo, kami u maka kuvijikia kuvial toro na meul ea vio na m̃ariano. ⁶ Naio maka toa vio na, Atua bitirilar naio ruei. Kami u kuvisidomii von bereio, venia naio berial ka kami u ka bogo na naio jo kamliko nua yako Kalele, maka kumei nei vo. ⁷ Naio ber jibe nei berinavo, jibe ka naio be Kulorinio Kenerinio, mia monoka ajamo ka naio rivan ea tomu na bova jum̃alo, ka mia atukukakar naio toa m̃akolkolo, mia ka bogoti ve tolu nene, mia naio tumolu rimeul bereio. Naina naruei be iliano nanua m̃a naio berenio ka kami u ruei.”

⁸ Mia tire nalo amijog ninei, mila na tiniel maio ka bereio Yesu kiano verikariano, nanua naio ber batitigio bo banlo berinavo mia naio mijikia rimeul bereio. ⁹ Tiniel maio ka bereio, ana na ajuvan vio nei, aban bere amial atevi duelimo

ba tai bija nalo dolu nalo. Mia vite nalo nam̃a amial ea buluvae, aberiio meravo vatitig bo banlo, ¹⁰⁻¹¹ mia nalo nei maka amoneaio, amial jibe ka tire nalo nei ajum̃a ajukunu vovu ga.

Mia tire nalo na amial vite nalo nei, sialo ajibe nei, Mere re Maktala, Joana, Mere na Yemesi kenieno, bija tire nalo dolu bereio.

Pitere jikiti ba bitii veve buluvae

¹² Mia Pitere, naio takurano jidom rileal ka tenei naio be riano p̃eli na makanio, naruei naio jumolu, jikiti bano-o jidom rial vonio vajoomo na buluvae nene. Naio binime i boru ea vio nei, monkorkor ba joomo, mia mial Yesu m̃ano kulum̃arauo nalo aju keano ga, mia mokotenano ba kovio tai ruei. Ana na naio batavio bereio miel ba vonuo, naio jo jidomii toru laka ber vite nei naio jum̃abe nei, p̃eli na nioti nene venia.

Naia gagoano juo amiel abatove Emeas abiviuo Yesu

¹³ Ana iorou ka ninei bereio, ka legiano nene ga, tom juo kalo ajuvan vio Yerusalemo ka avan ea komeli na telisu tai, siano Emeas. Marabo na ban ea vio na maka ve tebievi laka, naio jibe ka sadu duelimo titai, ¹⁴ ana bogo nam̃a amiel abano, ajukunu toru ka vite nalo na abarlaka ruei.

¹⁵ Ajukunu abano-o, ana na Yesu miel binime i iorou

kalo, jo miel nalikolo abano. ¹⁶ Amial naio jom̃a miel bijalo, amialio jibe ka valauo tai ga, bior miralo maka ajikia avitilubar naio. ¹⁷ Ana na Yesu bika denlo, berinavo “? Kube juo kumitum̃a kumiel jibe na, kumitukunu ka venia?” Mia bogo na bika jibe na, amebi ajikiliaju ga jibe na, miralo bova kanio.

¹⁸ Naruei nalo tinene, siano Kleopas, berdoŋe ban Yesu, berinavo “Tomu nalo telabo na vio reraio ajum̃a amiadu ka Yerusalem̃o ka bogo na, mia ũeli jau takurano maka kojog burum̃ara vite nalo na amalmaluvo vonganei yako, a?”

¹⁹ Ana Yesu bika ber “? Ana vite venia nalo nam̃a jau kojom̃a koberenio na?”

Nalo aberdoŋe, aberinavo “Tenei be tivelinio na tete re Nasarete nei, Yesu. Naio binimei, be naverialiano tai, naio mim̃auka kijokijo telabo ea burum̃ara moroano na kiano, mioliolu berloglog tomu nalo bo laka, mila ajidom naio toru laka, ba bokar bunu ka nam̃a Atua Sopi berial ber naio jaaro toru laka ka naio. ²⁰ Mia karina, nanua viomijeni niovo ga, kulo lu na tortoru bija kiado natukamuano nalo, tiniei naio, aburu naio jela ea burum̃ara komeli nalo banbano-o na ajibure naio aber monoka mia rim̃aro, ana aban ajukakar naio joa m̃akolkolo ana m̃aro. ²¹ Nanua beamu, kenememi jidomiano joa naio ka mia

naio naruei mia rilarrur kito kulo Israel, ka mia naio rivuru bulag kito den kulo Romo nalo kialo moroano, mia vonganei vite nonovio ba bova bereio ruei. Naio buro den kumemi banei bekiano bogoti tolu nei naruei.

²² “Mia be vite tai bereio mila kumemi numiilo m̃ele kanio, mila numitum̃a numisidom bijovijonio ka kia nei vo. Banei ga napano tu tokokoreko ve vaarakurano kia ga vo, kenememi tire nalo tealoe ajevijo aban bereio ea buluvae ea vio na amidu Yesu mokotenano mon eaio, aban ka ayovovuaio vatitig rivu. ²³ Mia bogo na aboru ea vio nene, amial ka mokotenano maka bunu toa vio na jo mon eaio, naruei ajikiti abinimei bere ea kumemi, mia maka nina ga, mia aberialio ka amial bunu nailiano naljuo, napano aberial aberinavo Yesu meul bereio ruei. ²⁴ Ana kumemi tealoe ajidom aialio vatitig, naruei aban ea buluvae, amialio javukia napano tire nalo nei aberenio, maka lele aial naio.”

²⁵ Naina naruei be iliano napano tom juo neibano aberiio ka Yesu, bogo na ajikili ajua m̃arabo. Naruei naio bunu mil ber kalo, berinavo “Tomnei, kamiu kube bulubau nalo ga. Naverialiano nalo aberial batitig bo vite nalo na kirisiou ruei, mia jum̃abe maka kumonmoneaio vo? ²⁶ Peli na kamiu kumijikia ruei, napano mia Atua rivitirilar kiano Naverikariano naio ve

toro na toru ea yetemeriba nei. Mia kamiu maka kuvitilubar ka Iliano Lu nalo aju aber mia ala Naverikariano rojog rivova, ala bulag naio beamu, karina mia Atua mijikia vitirilar naio, riovokar kiano burumbara mermerano.”

²⁷ Naruei Yesu jo jukunu banlo jibe na naruei, berlogloglo ba lie vo. Naio jikar ea Mosis kiano niosi nalo, binimej bokar Naverialiano nalo kialo niosi nalo, naio joma ber bisivisii meravo banlo jumabe napano iliano moruo nei joma jiloglog naio ga, peli na ajuma aberii damariga naio.

²⁸ Naruei abe tolu amiel aban bereio, mia maka vesiou ana abinimej vaataro ka komeli na tom juo nei aban kalo. Mia nalo amial jibe ka Yesu miel ka riel rijaka, ²⁹ mia ajikili kanio ka naio to vijalo beamu vo. Amil banio, aberinavo “Koig vonganei, merenio jo mialolo batove keano, vaataro ka vio rimelijo naruei. Jau komei koto kija vija kumemi beamu, romon ea vio nei ga vo.”

Ana na Yesu ba jo naliko ea kialo vio. ³⁰ Aju bano na monloglog bogo na sinaniano, mo nalo abinimej ajutano vio takurano ea vio na sinaniano. Naruei be bogo na abolkouo ka sinaniano, mia Yesu ga naio jumolu midu salo niajoko, naio bolkouo ban Atua ber siva kanio, naio burekoko-rovio bar janealo. ³¹ Mia bogo na naio mila jibe na,

memedu ka bogo na naruei ana miralo jibe ka betavo, abitolubar ka naina jo naliko na, be Yesu nene na. Ana aju amial naio, mia bogo bulatiga, mia naio jaluvo ba kovio denlo bereio. ³² Naruei abe juo ajuma aberverio, aberinavo “Ajerei, robe juo garuei maka rovitilubar, mia naio be kiado Tubo namariga neibano. Mia riano ga, bior bogo nama roju rojukunu bija naio rojakii marabo robinimej, napano naio joma ber bisivisii Iliano Lu nalo ban kito, kiano iliano nalo ajese laka, ajibe ka sebi jo bovago joomo ea kiado iviso.”

³³ Mia bogo na amijikia ka amial Yesu mirano ruei, maka bunu amonmelio, mia ajumolu soveli, amiel ea burumbara miamo aban bereio Yerusalemo ka averialio ka nalo dolu nalo.

Mia nalo aba amaluvo ka duelimo ba tai napano aju abior vio takurano kia ga vo naliko dolu nalo, ³⁴ mia naljuo maka ail vanlo vo, mia nalo aberial kanalo jukamu aberinavo “!Ai, tom juo, abe bogo na ga kubano, titai miyotuba ea vio nei! Iliano napano tire nalo aber beamu, naio be riano ga. Kiado Tubo naio jumolu den namariano ruei, Pitere nei mialio ka mirano memedu.” ³⁵ Ana na naljuo nei bunu ajusolio kialo iliano, nalo aberii jumabe ka Yesu miyotuba ka naljuo ea marabo, a ka napano maka avitolubar naio, banbano-o bokar ga

bogo napano jan ka joko janealo.

Yesu maluvo kean kiano naiagagoano nalo

Mataiu 28:16-20; Mak 16:14-18; Jone 20:19-23; Imãuano 1:6-8

³⁶ Mia bogo namã naljuo nei ajunã ajukunu banlo ka vite nalo nei kia ga vo, amilo va ka napano Yesu jikili ju iviso kalo garuei, naio ber kalo berinavo “Tumãaro rito vija kami.”

³⁷ Yesu binimei ealo jibe na, mila na ajidomii aberinavo naio be simãaro tai, mila na amerou toru laka.

³⁸ Mia Yesu bitilubar ka amerou kanio, ana naio bika denlo berinavo “! Ai, ka venia kami kuvisidomii m̃lea jibe na? Kenemiu iviso veve juo re bunu!

³⁹ Kuvial vonio jumãaku vija jaaku, jeleig venia nalo nei jualo! Kam kuvialio, ninei be kiniou ga nei! Kumei kuvitokol veve niabeku torogio nalo nei, bior vite na jibe ka simãaro maka ve burui, a maka ve niamoiou tibe ka mokotenaku nei.” ⁴⁰ Ana naio jomã mil banlo jibe na, naio jiloglog jumãano bija jaano kalo ka ajikia avitii vevelo.

⁴¹ Ana ka bogo na, naiagagoano nalo, kialo jidomiano jomã miãau toru jibe na, napano ajaaro toru ka amial aberii Yesu, mia ajidom deio kia ga bunu. Ana Yesu mil bereio, bika denlo berinavo “Ei kami kuburosebi ruei?” ⁴² Mia nalo amijege niado menoko ju ruei, ana na amidu niatai

ban Yesu, ⁴³ mia naio midu denlo, naruei kamu ka miralo naio jenio.

Yesu mil maariano ban kiano naiagagoano nalo

⁴⁴ Karina na, Yesu mil banlo, berinavo “Bogo na nanua m̃a nojo kitoliko nua, kiniou nojomã neberii iliano miroano ea yati na nonovio na Navivitauiano Lu nalo ban kami ruei. Kiniou nobar iliano nalo na ea niosi na Mosis kiano, ea naverialiano nalo kialo niosi nalo, a ea niosi na Iouano lu nalo, naruei kiniou neberial ka iliano nalo na naruei, aberii kiniou ga, mia amei ave riano rivesiou re ga na. Tenene na kiniou neber jibe na ka kami, mia vonganei naruei kumial vite nonovio nalo na abinimei be riano ruei ea miremiu nalo.”

⁴⁵ Naruei Yesu jomã berlogloglo ba lie vo, mila kialo jidomiano nalo ba toru laka bereio joomo ea Vivitauiano Lu nalo nei, naruei vite nalo nonovio binimei meravo bo kalo. ⁴⁶ Naio ber kalo berinavo “Nina naruei, iliano nalo nei aberii jibe na naruei, ka Naverikariano, mia ãnele naio rijalele rivano-o mia rimãaro, mia sano bogoti tolu nene, mia naio tumolu den namãariano rimeul bereio. ⁴⁷ Ana iorou kanio, ea siano ga, mia kiano tomu nalo mia atikar to yako Yerusalemo, mia avan ea yetemeriba vodolu, avan aioliolu van taara nonovio na tomu nalo, averial vanlo ka monoka aviliglo ka mia amijikia

ajev viekokoano ka kialo vovaiano nalo.

⁴⁸ “Naruei kamiū napano mā kumial vite nonovio nalo na ka miremiū, kamiū nene naruei kuva kuverialio van tomu dolu nalo ka vite nalo nene be riano. ⁴⁹ Imāuano nei, naio be imāuano tai na kirisikili laka, mia kin-iou nodu moroano tai toa kamiū ka mia rijai kamiū kuvituvulio. Moroano nei, Teta kiano verikariano naio jo, ka mia naio riila lario sel mave tiniabene rimeī rivujo loa ea kamiū, tenene na kiniou nejidom never ka kamiū, ka kamiū kuviel dedade re den komeli nei vo, mia monoka kuvitu rorea ea vio nei beamu vo-oa, ka kuvokario.”

Atua buru Yesu ban bere mave ea tiniabene

Mak 16:19-20; Imāuano 1:9-11

⁵⁰ Bogo na ka mia Yesu jidom ka tuvanlo, jukamu kalo abatove ea komeli sesa na Betani. Abinimeī abokar vio nene, ajumā jibe na, banbano-o na Yesu jumolu jian jumāno loalo, milivu kalo. ⁵¹ Naio jomā mioa vatitiglo banbano-o, jo jikar juvanlo bavin mave tiniabene bereio. ⁵² Naruei naiagagoano nalo amial kialo Tubo naio buro denlo bereio, ana na nalo aminie ka sudu jaalo abatove amilotu ka naio, karina aban bere Yerusalemo, napano ajaaro mia ajaaro. ⁵³ Mia ajua vio na banbano-o ana damāriga ea bogo nalo na volkouano nalo ajumā

aban ea Atua Kunuano Lu amiaiaio naio.

Naina naruei be Liliani-ano Vou na Yesu Kristo napano kiniou Luka nebivitauiā, maaro ea vio na.

**Yesu Kristo Kiano
Ioluano Vou
Napano
JONE
Bivitauiaio
Verialiano Moti**

Tukunu bulati na niosi nei

Niosi nei, Yesu Kristo Kiano Ioluano Vou napano Jone jirio, naio berii Yesu, ber naio be Atua kanano iliano napano binime i be kulorinio, naruei jo bija kito. Ea niosi nei, Jone berinavo naio bivitauia kiano iliano nalo, ka tomu nalo napano avulukuo ajikia amonea ka Yesu naio be toro napano Atua berkario ka riila naio remei ka rilarur tomu nalo, a be Atua Kenerinio. Mia naio bivitauia jibena, ka ajikia ajev meuliano ea Yesu siano, bior napano amonea naio (20, 31).

Vite moti napano Jone berenio, naio ber ka Yesu, naio be iliano nei napano beamu laka, naio jo bija Atua. A iorou, naio berii vremesiano nalo napano Yesu milaio, napano amijika aija kito, ka kito rovitlubar ka Yesu be Atua Kenerinio, napano Atua berkario ka riila naio rime i ka rilarur kito. A iorou ka vremesianio nalo nei terakurano napano Yesu milaio, Jone berii nioniag nalo nene. Naio berial napano tomu tealo amonea Yesu a ajakisor naio, mia tomu tealo maka asidom amonea naio. Ea mirano

duelimo ba tolu [13] ba bokar mirano duelimo ba aluo [17], Jone berii vite nalo napano amaluvo ea bogiano nei napano uolu nalo abinime i ka avokar Yesu. Ea bogiano na barlaka na, Yesu jo mil ban kiano tomu nalo, ka ala vatitig vite nalo tu napano mia rime i rivokarlo, a ril ka ridular kialo jidomiano beamu, ana iorou kiano uolu nalo amei avokar naio.

Ea togio maaro na niosi nei, Jone berii napano uolu nalo nei abinime i abokar Yesu, aburu naio aban ea voroniano, a iorou aba ajukukar naio ea makolkolo, naruei naio m̃aro, a iorou, naio meul bereio a kanano tomu nalo amial naio. Ea niosi nei, Jone berii meuliano na napano jo maka jikia ribisi, napano toro mijikia rivokar ga ea Yesu Kristo. Meuliano nene jikar voniganei, a binime i ea tomu nalo ga napano amonea Yesu ka naio ga be m̃arabo, a be burupati na ilirianiano, a be burupati na meuliano.

Mia vite burtomoluo napano kito romial va miroano ea niosi nei, naio be bajago napano bogo na Yesu jo berloglog tomu nalo, naio jo berii vite nalo napano toro jo m̃m̃auka bogoti nonovio ea kiano meuliano. Naio mil ea bajago na jibene i bija jamer-ijiano nalo, ka rila kijokijo van kiano tomu nalo napano amonmonea naio, ka verial bajago na meuliano na mon-eano. Naina vite nalo jibeka

uei, a joko, a miamoiano, a toro na vitikariano na nunu bija kiano nunu nalo, a telikrip nei bija marati.

Torogio nalo na niosi nei
Iliano moti 1:1-18

Jone Baruei bija Yesu kiano tomu nalo na beamu 1:19-51

Yesu mĩmauka kiano imãauano 2:1—12:50

Yesu kiano bogoti maar-
iano yako Yerusalemo
13:1—19:42

Yesu meul bereio bija kiano tomu nalo amial
naio 20:1-31

Yesu miyotuba kean kiano
tomu nalo yako Kalele
21:1-25

*Naverikariano naio jo
beamu ka tiiano na yete-
meriba nei*

¹ Beamu beamu, ea burupati, naio namã abio ka Parinio Bajago na Atua kiano bajago naio jo, naio jo bija Atua, a naio, naio be Atua. ² Ea bogo na tiiano na vite nonovio, naio bija Atua ruei, ³ naio mĩmauka imãauano na rimãauka vite nonovio, maka ve vite tai na naio maka rimãaukanio.

⁴ Meuliano na be riano maluvo den naio ga, naruei meuliano nei binimeĩ jibe ka yulu na taara nonovio na tomu nalo. ⁵ Naio binimeĩ jibe ka yulu namã mereralii nalo na ajua melijokouo, ana melijokouo neibano naio maka rijikia tovulio.

*Jone Baruei naio binimeĩ
berial ka yulu naio jo binimeĩ*

⁶ Karina, Atua naio mĩla kanano toro tai binimeĩ ea yetemeriba nei, naina be Jone. ⁷ Naio binimeĩ jibe nailiano tai, ka rive-
rial riverinavo toro na yulu nene naio jo binimeĩ, ka rijai tomu nalo nonovio ka ajikia amonea ka toro na naio be Atua kanano yulu. ⁸ Jibe na, Jone naio maka rive yulu nene navo, mia naio be toro na verialiano ga.

⁹ Mia iorou kanio, toro na yulu nene naio binimeĩ miyotuba ea yetemeriba nei. Naio be yulu napano be riano, napano naio bo laka, naruei binimeĩ ka rudu kanano yulu toa tomu nalo nonovio kanalo meuliano.

Yulu na yetemeriba

¹⁰ Toro na yulu, naio naruei napano jii yete-
meriba nei, mia bogo na binimeĩ eaio, ana tomu nalo na yetemeriba nei maka avitilubario. ¹¹ Naio binimeĩ be moti ea kanano tomu nalo kanalo vonuo, mia nalo na ea kanano torogio nei maka asidom naio ga. ¹² Mia tealõ ajaaro kanio, amoneaio, naruei ea nalo na abiniu, naio mijamo kalo ka amijikia amei ave Atua kenerinio nalo. ¹³ Naio milalo amiyotuba valuo bereio, napano maka tibe ka napano kiritete nalo amiyotuba jakii yati na bu-
rukija, p̃eli na jidomiano na tira bija sumãano kialo, p̃eli na toro kanano jidomiano,

mia amiyotuba bereio jakii jidomiano na Atua kanano.

Parinio Bajago na Atua kiano naio binime be toro

¹⁴ Tibe na, Parinio Bajago na Atua kiano naio binime be toro riano, naio binime be toro iviso ka kito, naruei kito romial kanano meuliano na bo nene, naio bujo laka ea bajago na tiniememiano a bajago na ilirianiano. Naio be novo na bo laka be motoru na Karamãdo kenerinio, naruei kumemi numial kanano burumãara mermerano nene, napano be kanano, naio ga takurano.

¹⁵ Mia bogo namã Jone Baruei berii naio nua, naio berinavo “Naina namã kiniou nojomã neberii ban kamiu, neber mia naio rime iorou ka kiniou, naio loa laka, mia kiniou yetano ga, bior ka napano naio meul beamu laka garuei, mia kiniou nebe na vonganei ga.”

¹⁶ Naio bujo ka bajago novnovo nalo, mia bogo nonovio naio jo mila bo toru ban kito, kiano burumãara tiniememiano mila kito romijog bo toru bogo nonovio. ¹⁷ Beamu, Atua bitirilar tormoruo Mosis, ka naio du ga kanano tuboiano binime be kanano tomu nalo, mia Yesu Kristo, Atua bitirilar naio ka naio naruei bar bajago na tiniememiano a iliano na ilirianiano binime be yetemeriba nei. ¹⁸ Kito kulorinio, maka kito tai napano naio mijikia Atua, a rialio ka mirano, mia toro napano naio jo damãariga ea Atua kanano jidomiano,

naljuo aju vio takurano bogo nonovio, naio naruei binime mila kito remijikia Atua bija kanano bajago novo nalo.

Jone Baruei naio mial Naverikariano

Mataiu 3:1-12; Mak 1:7-8; Luka 3:15-17

¹⁹ Ana bogo na Jone Baruei naio jomã mioliolu banbano na, navurimãaraboiano na kulo Ju nalo na vio Yerusalemo aju ajidomii toru aberinavo naio mimãau jumãbe na, peli vede naio be Naverikariano, peli naio be kei. Naruei nalo amiila kulo Lu tealó bija tomu na tortoru na yati lu na Livai, naruei nalo abinime be abika denio aberinavo “Jau kobe kei?”

²⁰ Naruei telikiti na abikano, naio ber bulag batitig vite nonovio banlo, naio berdoþelo berinavo “Makanio, kiniou maka neve Naverikariano nene.”

²¹ Ana nalo aberinavo “? Ver tibe na, jau kobe tormoruo Elaija re nua, naruei jau komeul bereio, peli? Nina bior Iliano Lu berenio mia naio monoka rime be bereio beamu ka Naverikariano.”

Mia naio berdoþe bereio, berinavo “Makanio, kiniou maka neve toro nene.”

Naruei nalo aberinavo “? Mo, mia vede jau kobe naverialiano nanua mã Mosis naio berkario ruei?”

Ana bereio naio berdoþe, berinavo “Makanio.”

²² Naruei abika bereio denio aberinavo “? Ana jau kobe kei bere na? Jau

monoka kover titai van kumemi ka numijikia nuvan bere nuverialio van nalo napano amiila kumemi nubinimei. Jau kover vatitig ga van kumemi, koverinavo, jau kobe kenia.”

²³ Ana kanano verdoŕeiano na ea bogo nei, naio jibe nei berinavo “Kiniou nebe niono kurano ga ea vio yauo, namā Naverialiano Aisea beriio nua ruei. Kiniou nebe niono napano binimei ka riverial riverinavo ‘Kuvila vatitig rivu mārabo nalo na Tubo kanano ea kenemiu meuliano nalo.’”

²⁴ Nalo tai kalo napano ajua bogo na, nalo abe Varisis, ²⁵ naruei nalo abika bere denio, aberinavo “Kumemi numijog jau kober ruei ka jau, maka kove Naverikariano, a maka kove Elaija, a maka kove naverialiano namā Mosis berenio. ?Ver tibe na bior venia ana jau koberenio kobare ka kojomā kabaruei mēle ea tomu nalo janea vio jibe na?”

²⁶ Ana Jone berdoŕe banlo, berinavo “Kiniou, varueiano na kiniou nojo namilaiio ban nalo na, naio ea uei ga. Mia toro dolu tai mia naio rime i rudu jeleku, napano naio jo iviso ka kito ruei, mia kami u maka kuvijikia naio vo. ²⁷ Naio loa lie laka ka kiniou, jibe ka napano kiniou maka navare ka nava vaataro ka naio, neiel vijaio, ŕeli neivelar kanano kulubuei.”

²⁸ Naruei vio nei naruei napano nalo abano ka aial Jone ea, naina ea tanobuku

na vaataro ka komeli na Betani, ea mārabei na Yortano tivelinio bano, nina ea vio namā Jone naio jomā baruei ea tomu nalo.

Yesu, naio be nunu solbouo na sida na Atua kanano

²⁹ Ana legiano dolu nene, Yesu naio miel ba miyotuba ka Jone Baruei bija kumemi naiagagoano nalo kiano ea vio namā numituaio. Ana bogo na Jone mial Yesu, naio berial ka kumemi, naio berinavo “!Mm, kami u kuvial toro yako naio jomā miel binimei kiana! Naio, jibe nunu solbouo na Atua kanano, napano mia naio rivar bulag vironiano na kariano nalo na tomu nalo na yetemeriba nei kialo.

³⁰ Naio namā kiniou nojomā neberiio ban kami u nua ruei, neberinavo: Iorou ka kiniou, mia toro na toru tai rime i napano mia tukamu ka kiniou, naio loa laka lie vo bior naio jo jukamu ka kiniou. ³¹ Kiniou neber iliano nei beamu, maka nejikia ka mia ve kei, maka nejikia ka naio be kanaku tumano ga na, mia kiniou nemijikia ga ka monoka navaruei ea kito kulo Israel, ka rila ka mia romijikia rovitilubar kiado toro na toru nei.”

³²⁻³³ Ana Jone naio ber bisivisii vatitigio ban kumemi jumabe ka na naio mijikia ka Yesu naio be Naverikariano. Naio berinavo “Jibe ka namā neber beamu ruei, maka nejikia naio be kei, mia maka vesiou ga, ana Atua mil ban kiniou, naio ber jibe nei, berinavo ver bogo na jau

keial kanaku Niununo Lu naio riyatove totano ea toro tai, naina naruei mia naio rivaruei ea tomu nalo ea kanaku Niununo.

“Naio ber jibe na ka kin-iou, ana bogo na namial Yesu nene, namial napano Niu-nuno juvan vio mave, batove ea naio javukia vaama tai, binimei bujo joa naio.

³⁴ Bior vite na naruei napano namialio, nemijikia neverialio vatitigio van kami, ka be riano ga, toro na naio be Atua Kenerinio memedu.”

Yesu kanano naiagagoano juo na be moti abinimeia naio

³⁵ Ana ea legiano dolu nene bereio, ana Jone Baruei naio jo keano ea vio nei vo, naio joña jukunu bija kumemi liko Adru, napano ea bogo nene kumemi nube kanano naiagagoano. ³⁶ Ana numial Yesu jo miel binimeia barlaka jel vaataro ka kumemi. Ana Jone berial ban kumemi, berinavo “! Tom juo, kuvial toro yako, naio jibe ka kirikiti nunu na telisu na sida na Atua kanano na!”

³⁷ Kumemi juo numijog Jone naio ber jibe na, naruei vaarakurano ga nube juo numitumolu, nubano numitakisor Yesu. ³⁸ Ana Yesu barpilig naio ka kumemi, berinavo “Tomu juo, kiniou namial jibe ka kam juo kumisidom titai kovio.”

Ana nuberdope naio, nubio naio jibe ka kene-memi naverloglogiano, ana nuberinavo “? Rapai, jau

kobinimeia ea vio nei, vio na vabe jau kojoma komon eaio?”

³⁹ Ana naio berinavo “Mo, kami kumei, rava kuvi-alio.” Ana numiel nuba nubokar vio naña Yesu joaio ka bogo na, a jikar ea titai jibe ka mērenio veri niogoravo, numitu bija naio, numitukunu banbano-o bokar vio melijo nonovio.

⁴⁰ Ana Andru nene napano kumemi juo numijog Jone berii Yesu numitumolu numitakisor naio jibe na, naio be Andru napano naio be Saimon Pitere kuruano na telisu. ⁴¹ Ana Andru nene naio ka takisor Yesu garuei, mia naio ban sopeka kuruano nei beamu vo, ana bogo na naio mileal naio berii banio, berial Naverikariano, napano kulo Ju nalo abio ea iliano na Ipru aberinavo Misaea, a kulo Kris nalo abio ea iliano na Kris aberenio Kristo. Naio berial kanio, berinavo “Kuruaku, Naverikariano na na, kumemi numileal naio ruei.” ⁴² Berial ka kuruano nei, ana buru binimeia ea Yesu.

Ana bogo na Yesu mialio, naio berinavo “? O, jau na naruei kobe tormoruo Jone kenerinio dolu nene, siamo Saimon? Mo vonganei kin-iou nesisiaso bereio, never siamo Kevas.” Sio nei bunu naio be iliano na Ipru, napano naio ber puruveru, napano ea iliano na vio Kris aberenio Pitere.

Yesu buru naiagagoano dolu juo abinimeia ajakisor naio

43 Ana ea legiano dolu tai bereio, Yesu jidom rudu kanano m̃arabo bereio, naio jidom rivarkor vio, rivan bere ea kanano tanobuku na vio Kalele. Nubano jibe nei, ana Yesu mial toro tai bereio, berkanio berinavo “Jau komei katakisor kiniou.” Toro nene siano Vilip, 44 napano naio bunu ea komeli na Andru naio Pitere kanalo nei Betsaeta.

45 Ana maka ve sio, Vilip naio ba jirag kanano bil-bilu tai, siano Nataniel, naio ba berkanio, berinavo “Toro na toru nãma tormoruo Mo-sis naliko naverialiano nalo abivitau kakario, aberialio nuanua ruei, naio miyotuba iviso bure kito ruei. Kumemi numileal naio ruei, be toro Nasarete tai, kenerinio tormoruo tai siano Yoseve, ana toro nene, naio siano Yesu.”

46 Mia bogo na Nataniel mijog ka Yesu naio be na komeli na telisu nei, naio bika berinavo “Ana jum̃abe? Tonovo na toru tai na jibe na naio maka rijikia riyotuba ea komeli na telisu na Nasarete nei!”

Ana Vilip berdoṽe, berinavo “Ai, abe jau keil re tibe na, jau komei ga keial naio beamu vo.”

47 Ana naljuo aban bereio ea Yesu, mia bogo na amiel abinimei vaataro kanio, Yesu mial Nataniel, beriio, berinavo “Lerinio, kiniou namial toro na jibe toro novo na Israel tai memedu na, toro tai napano maka ve sibiano ea naio leleio.”

48 Mia Nataniel mijog Yesu berii naio jibe na, naio bika

berinavo “?Ana jum̃abe jau komijikia ka kiniou nebe toro na jibe na?”

Mia Yesu berdoṽe naio berinavo “Bogo na Vilip maka riviedu kaso vo, bogo na jau takurano kojo komijilimebi yetano ea vamelu na buruviki, kiniou namialso ruei kiana.”

49 Mia Nataniel miilo va ka Yesu kiano jikiaiano, berinavo “!Naverloglogiano, jau kobe Atua kenerinio riano! !Jau kobe parinio tubo na Israel memedu kia na!”

50 Ana Yesu ber banio, berinavo “!Kiniou neber iliano tai na telisu banso, ka kiniou namialso ea buruviki na, mia vaarakurano ga jau komonea kiniou jikili! Nina naio bo laka, mia neberkar banso ka mia jau kaial vite na iloiano ve telabo bereio, napano nalo tortoru lie todovulu ninei na jau komialio navo. 51 Nao, kiniou neber memedu, ka mia kamiu kuvial ka vio mave naio rivetavo to, vija nailiano nalo na vio mave na atu amei yetano ea kiniou atu avavin mave bereio, atu avatove bereio avavin tibe na. Vite kinkin nalo na tibe na ana mia kamiu kuvijikia kuvialio bior ka kiniou nebe Kulorinio Kenerinio, jibe napano kiniou tena vio mave, a nebinimei nebe kulorinio riano.”

2

Yesu kiano kijokijo na be moti, ea soriano na vio Kana

1 Mia Yesu nalo abinimei aboru ea tanobuku na Kalele ruei, ana ea legiano

tolu nene, jokoluolu na sori-
ano tai ea komeli na Kana.
Mia Yesu kenieno naio ba
miyotuba ea jokoluolu nene
ruei, ² ana iorou kanio ami-
ila toru binimei ka Yesu
naliko kanano naiagagoano
nalo, abiolo bunu ka amei
eaio. ³ Mia Yesu nalo abano
amiyotuba ea jokoluolu,aju
naliko tomu nalo banbano-
o, mia vite tai bova, uei
na amunu ea jokoluolu nei
naio biniu soĝeli. Ana
Yesu kenieno binimei beri-
alio ban Yesu, naio berinavo
“Munuiano na toro na toru
na jokoluolu mila batitigio,
amunu koko kanio, biniu
ruei vio be teau, amila de
batitigio garuei.”

⁴ Ana Yesu berdoĝe,
mil banio berinavo “?
Tiramoruo, venia na
iĉauano na naio joa kiniou?
Jau kodu re toa juĉaku, bior
kanaku bogo na nala vite
nalo na jibe na, naio maka
vo.”

⁵ Kenieno naio mijog ve-
nia napano Yesu berenio,
mia naio ber ka tomu na
iĉauano na jokoluolu nei,
berinavo “Venia na mia naio
river ka kamiu ka kuvilaio,
mia kamiu kuvil re, kuvilaio
ga.”

⁶ Ana Yesu mial buruĉara
basi-dobidobi na uei taiaju
vaataro, naĉa kulo Ju nalo
abar ka ĉa ajekon ka vite
nalo jibe ka na kanalo nalo-
tuano naio berenio. Bu-
ruĉara basidobidobi nalo
nei amiauka ea puruveru,
abe verare ka sadu toromo-
mou takurano janealo, basi-
dobidobi nene nalo biniu be
ari. ⁷ Ana naio ber kalo

berinavo “Kamiu kuva ku-
viov uei, ana kuvar kumei
kuvioionio rivan ea basi-
dobidobi nalo nei rivano-o
avuvujo magmago.” Naruei
nalo amila banbano-o na
amisono batitigio abujovujo.

⁸ Ana Yesu naio berenio
berinavo “Mo, vonganei ku-
viov ve telisu eaio, ana ku-
var va van toro na toru na
jokoluolu nei ka naio rijikia
rimunu vonvonio.” Naruei
nalo abiovio, abar ba ban
naio.

⁹ Naruei toro na toru
nei naio munu vonvonio,
mijog jibe ka binimei be
ĉarjuĉelmĉelu ruei, mia
naio miilo toru kanio, naio
maka rijikia ka amileal
munuiano nei ea vio na
vabe. Mia nalo ga napano
abiovio, amijikia, mia maka
aver kanio, mia naio bio
toro na joro vonga binimei
mial naio. ¹⁰ Toro nene naio
binimei, ana toro na toru
nei berkanio, berinavo “Ea
jokoluolu dolu nalo, ajumĉa
abiov ĉarjuĉelmĉelu nana
bo naio binimei jukamu, mia
bogo na tomu nalo amunu
kija banbano-o, karina abiov
vonga ĉarjuĉelmĉelu na
maka rivu laka binimei
iorou. Mia ea jokoluolu nei
ajumĉa amunu uei banbano-
o, karina jau kobiov vonga
ĉaku ĉarjuĉelmĉelu na-
pano naio bo laka, naio
binimei maariano garuei.
Ka venia komila jibe na?”

¹¹ Vite nei naĉa Yesu naio
mila ea bulukomeli na Ke-
nan ea vio Kalele, naio jibe
ka buruĉara vremesiano
tai, be kiano vremesiano
na be moti napano milaio.

Naio mila jibe ka na naio jo jikar jo jiloglog kanano moroano na vio mave, mia bogo na naiagagoano nalo amialio, kanalo moneano na ea naio, ka naio be Naverikariano na be riano, binimej bavin lie vo. ¹² Bisi naruei ana nalo abiniu aban bere ea Kapeneam bereio, nina be Yesu, kenieno, a kuruano nalo, bija kanano naiagagoano nalo, abinimej abokar vio nei ana aju kija jibe na ba bokar legiano nalo tai.

Yesu mijil dedade ea nalo namā aju aṣilvili ka saba joomo ea Atua kanano Yimo Lu

Mataiu 21:12-13; Mak 11:15-18; Luka 19:45-46

¹³ Mia bogo tai, vaataro ka bogo na kulo Ju nalo ala kanalo jokoluolu na toru, Jukoluolu na Sidomkariano na Ioruriano. Ana kanalo bajago tai, ber yuka nonovio nalo nonovio monoka ala vonio ka avavin Yerusalemo monloglog bogo ka ala jokoluolu nei, ka sidomkariano na korobilo nalo ajaluvo den Ijivi, ana ka bogo nei, Yesu bunu naio bavin. ¹⁴ Naio ba bokar vio nene, ana ba miyotuba ea Atua kanano Yimo Lu, mia naio mial ka napano nalo telabo aju napano ajumā aṣilvili ka buluku, nunu, bija menu nalo, mia naio mial nalo namā amijebukua veru dolu nalo binimej be veru na memedu na Atua kanano Yimo Lu. Imāuano nalo nene abe imāuano na bo

tai, bior abe imāuano na aṣilvili ka vite na tomu nalo monoka avulu ka ala sida kanio, mia titai bova, nalo aju amijukubin tomu nalo toru, mia mave kanio, nalo aju amilaio jouro ea burusio na vio lu.

¹⁵ Ana Yesu naio mial ka namā amila niegeniege dolu ga yimo lu nene jibe na, naruei naio tinien mimi, bar teli nalo, buru vuronlo jibe na, ana banku kalo. Naio ba jibe na, naio ba mijil dedade ealo bija kanalo nunu a buluku nalo abava tavio den Atua kanano Yimo Lu, mia ea tivelinio na nalo namā aju amijebukua veru, naio ba miyon bulag kanalo basaro na puruveru nalo, naio bilig bulag kialo barobaro nalo bijaio. ¹⁶ Nalo namā aju aṣilvili ka menu nalo, naio mil banlo berinavo “!A, kuv var bulag kenemiu saba nalo na ea vio na! !Kamiu kuvila re karamaku kunuano nei rimej ve kenemiu yimo tai na kuvokar veru eaio tibe na!”

¹⁷ Ana bogo na kanano naiagagoano nalo amial Yesu naio mijil dedade ealo jibe na, mila na nalo tiniel maio ka vivitauiano lu tai bereio, jibe ka na naio berii Naverikariano beamu ruei, napano berenio berinavo

“Kanku jidomiano temi laka ea kanamo yimo lu, naio jibe ka sebi tai bovago ea kanku iviso.”
Iouano 69:9

¹⁸ Mia ka tenei, tomu na tortoru na kulo Ju nalo,

nalo bunu amial venia napano Yesu milaio, naruei nalo abika denio, aberinavo “Venia napano jau komilaio vonga na, naio be buruñara vite tai. ?Mia jau na komijikia kala vremesiano na vabe ea mirememi, ka rila kumemi nuvijikia nuvial ka naio rimemedu ka jau kala tibe na?”

¹⁹ Ana Yesu berdoŕe banlo, naio berinavo “Mo, kanaku vremesiano naio jibe nei: kamiu kuvue bulag Yimo Lu na, avona iorou kanio, ea legiano ve tolu ga, mia kin-iou nevitiri lario bereio.”

²⁰ Ana nalo aberinavo “Nalo nañña amimñauka yimo na, amimñauka ba bokar yuka duelimo va veri ba ari [46], mia jumabe ana jau kober jibe na, kober komijikia kovitiri lario bereio ka legiano ve tolu ga? !Maka leleio rijikia tibe na!” ²¹ Nalo amil jibe na, a nina bior nalo maka ajikia vatitig rivu venia nañña Yesu naio berii ea bogo na. Nalo maka avitilubar ka bogo na naio jomña berii Atua kunuano na, nioti nene jibe ka mokotenano. ²² Ana iorou laka garuei, iorou ka na naio jumolu bere den mñariano, kanano na-iagagoano nalo ajidomialio bereio ka naio ber iliano nei banlo, ana mila na amonea lie vivitauiano lu nalo bija Yesu kanano iliano nalo banlo.

²³ Naruei Yesu nalo ajua jokoluolu na ea Yerusalem

banbano-o na, naio jomña mila vremesiano telabo, mia bogo na tomu nalo amialio, nalo telabo amoneaio ka naio be Naveri-kariano. ²⁴ Mia Yesu maka to rijamo ka naio laka vanlo, naio maka to rivarkar tiniene mñele ealo, bior naio mijikia batitiglo. ²⁵ Toro dolu tai rijikia re river titai van Yesu ea tivelinio na toro kanano bajago, bior naio mijikia vatitigio ruei, naio mijikia vite nonovio napanoaju joomo ea toro kanano jidomiano.

3

Nikotimas binime i mial Yesu

¹⁻² Ana ka bogo tai bereio, ka bogiano tai, kulo Israel nalo kanalo navurimñaraboiano tai naio binime ka jidom rial Yesu. Toro nene naio be Varisis nalo tai, siano Nikotimas. Mia naio binime, naio mil bija Yesu naio berinavo “Naverloglogiano, kumemi numialso, nubitilubar ka jau kobe naverloglogiano tai napano jau kobinime ea Atua, bior maka ve toro tai napano mijikia rila kijokijo nañña jau kojomña komilaio, ver Atua to re vija.”

³ Ana Yesu berdoŕe banio, berinavo “Ee, burutomoluo nalo na bo, a monokanio never ve riano bo vanso, toro na maka sidom rimoluo bereio ve terivou, mia Atua naio maka rijikia rive tubo ea kiano meuliano.”

⁴ Mia Nikotimas naio miilo ka iliano nei, ana berinavo “! Tomnei! ?Mia toro na be tormoruo ruei naio mijikia rimoluo bere tumabe? Kiniou maka ve tinieku ka mia naio mijikia riva joomo bereio ea kenieno mabono, ka mia naio rimoluo ve vaarakurano bereio.”

⁵ Ana Yesu berdoŝe berinavo “Kiniou neber riano banso, ka toro monoka riyotuba ea uei, a monoka riyotuba ea Niununo. Ver ŝeli, mia naio maka rijikia riva jouro ea Atua kanano navenatuboiano. ⁶ Toro naio mijikia rivar bereio toro ga, mia Atua kanano Niununo naio mijikia rivar bereio niununo vou ea toro kanano meuliano. ⁷ Naina naruei be yotubaiano valuo namã kinioi nojo neber kaso. Tibe na, jau keiilo re bunu ka kiniou neber kaso ka jau monoka komoluo bereio.

⁸ “Kosidomii von jegi. Jeg naio joŝa miuvuvu, naio jo janea vio jibe ka ga na naio jidom, ŝeli na kito roju romijogio, mia kito maka rejikia ka naio jo binimej jumabe, ŝeli na naio jo ba be. Mia m̃arabo na Niununo naio rim̃au ea toro kanano meuliano jibe na naruei, naio jibe ka jegi.”

⁹ Mia Nikotimas naio jidomii bijon iliano nei toru laka, ana bika berinavo “? Tomnei, mia vite na naio mia tumabe na?”

¹⁰ Ana Yesu berdoŝe banio, berinavo “Jau kobe naverloglogiano na toru tai na kulo Israel kialo ruei, mia kiniou nemial jibe ka

vite nalo namã kiniou nojoŝa neber bisivisiio banso na, jau maka lele kejkia vo, a! ¹¹ Kaiagago rivu! Javukia namã naverialiano nalo amilaiio beamu ruei, kiniou nojoŝa neberial ga venia na m̃a kiniou nemijikiaio, ŝeli na venia na m̃a kiniou namialio, mia tibe na dam̃ariga, kamiu tomu nalo na vio Israel kamiu maka kuvisidom kuvisov kenememi iliano nalo. ¹² Kiniou nojo neberii saba nalo na yetemeriba nei ban kamiu, mia maka kuvisidom kumonmoneaio, mia ver neverii saba nalo na vio mave, mia kamiu kuvijikia kumonmoneaio tumabe? Kiniou namial ka mia ve deio ga. ¹³ Mia kiniou Kulorinio Kenerinio, kiniou ve takurano ga nemijikia neverloglog kamiu ka na vio mave, bior ka napano maka ve toro dolu tai riva rial vio nene, mia kiniou ga Kulorinio Kenerinio najaluvo den naio nebinimej yetano ruei, a iorou, mia navan bere eaio.

¹⁴ “Beamu beamu tormoruo Mosis nalo ajua vio yauo, maro nalo ajumã ajer binvinlo, mia naio bitirilar iesi tai, midu butoto maro jo mave, ana kei kalo napano maro jerlo, mia ver sirarago ga vitikar maro na jo mave, mia Atua rilarurlo. Ana ea m̃arabo nene kia ga, mia monoka adu kiniou Kulorinio Kenerinio bunu noto mave ea iesi tai. ¹⁵ Naruei toro kei na rimonea kiniou, mia naio rivokar meuliano vou nei napano naio maka

ve jukuti nene.”

¹⁶ Yesu ber jibe na bior Atua tinien jii tomu nalo na yetemeriba nei toru laka, naruei naio mijamo ka kenerinio na kirinovo laka, napano naio ga takurano be kanano, binime i m̃aro kar kito, naruei toro kei napano rimonea naio, mia maka rijikia riva kovio, mia rivokar meuliano na bo nei napano maka rijikia ribisi bogo tai. ¹⁷ ? Ana bior vaio Atua miila kenerinio nei binime i yetano ea yetemeriba nei? Maka riilaio rime i ka tibure tomu nalo na yetemeriba nei, mia miilaio binime i ka rijamo ka kanano meuliano ka rilarur kito.

¹⁸ “Toro kei napano rimonea kenerinio nei ve riano, mia Atua tibure re naio, mia toro na maka rimoneaio, vironiano joa naio ruei, bior naio maka rimonea Atua kenerinio. ¹⁹ ? Ana vironiano nei napano mia Atua naio monoka rilaio, burupati nene be venia? Naina bior napano naio miila kanano yulu binime i ea yetemeriba nei, mia tomu nalo ajum̃a amila kikiio ga banbano-o na, maka asaaro kanio, mia ajidom ga bajago na bova tena melijokouo. ²⁰ Mia nalo nonovio nam̃a aju amila bova jibe na, jibe ka napano maka asidom yulu nei leleio, a maka asidom amei vaataro kanio, bior amerou ka aberinavo

vede mia naio rila kanalo vovaiano nalo ayoyotuba ea vio medave, naruei tomu nalo ajikia avitilubario. ²¹ Mia nalo nam̃a amim̃au ea bajago na bo a memedu, nalo maka amerou ka toro na yulu nei, a nalo abinime i vaataro kanio. Nalo ajaaro kanio, bior yulu nene naio rila merayo vatitig ka vite nalo nam̃a amilaio, nalo amim̃auka amonmonea ga jidomiano na Atua kanano.”

Jone Baruei naio jaaro ka Yesu jikar kanano im̃auano

²² Ana iorou ka vite nalo nei, Yesu buru kanano naiagagoano nalo ajuvan vio Yerusalemo abatavio ea tanobuku na vio Yutea. Nalo aju jibe na, naruei ajum̃a abaruei ea tomu nalo. ²³ Ana ka bogo nene nei ga Jone Baruei bunu naio joa vio dolu tai, siano Aenon, vaataro ka vio na Salim. Naio binime i ea vio na bior uei tai joaio, mia tomu nalo na aju abinime i ka naio, naio jom̃a baruei ealo ea marauei nene. ²⁴ Nina ea bogo na nalo maka avokar naio, a maka avuku naio riva joomo ea yimo na lakoiano vo.

²⁵ Naruei ka bogo na Jone kanano naiagagoano nalo amila iliano tai bija toro Ju dolu tai, ea tivelinio ka m̃arabo na sekon vite nalo jibe ka kanalo nalotuano berenio, ana ea tivelinio na bunu varueiano nalo napano Jone bija Yesu kialo. ²⁶ Aberii banbano-o karina abinime i amial

Jone, abika denio, aberinavo “Naverloglogiano, kumemi numisidom nuvika denso ea tivelinio na toro na Yesu napano beamu, bogo na kito rojua marauei na Yortano tivelinio bano, naio binime i mialso, naruei jau koberial saba telaboio naio. Vonganei, naio bunu binime i jo baruei ea tomu nalo, mila abiniu aju ajuvarvan kito aban ea naio ga, vio bujo mia vio bujo.”

²⁷ Ana bogo namā aber jibe na ka Jone, naio maka rijoku, maka rijog rivova, mia naio jaaro ga, berinavo “Kito tomu nalo nonovio monoka roimauka ga venia napano Atua naio midu jua jumado. ²⁸ Javukia napano kami kumijikia batitigio rui, namā kiniou nojōma neberial julaka ga, ka kanaku imauano, kiniou maka neve Naverikariano, mia nebinime i beamu ka naio ga, ka neverial ka naio jo binime i rui. ²⁹ Ana vonganei jibe ka namā kami kuberialio ban kiniou, naio binime i jo mila kanano imauano rui, ana vite nei najaaro kanio, nami alio bo laka.

“Naio jibe ka bogo na soriano, napano naio jibe nei. Ver toro na naio soro, kanano bilbilu tai, naio riija naio ve toru ka aiomon saba nonovio na jokoluolu, mia karina, ea legiano nene, bogo na avuru tira rime i, tira nei naio maka riva totano vija naio mia naio ba jotano bija koano

ga. Mia naio maka rijog vova, kanano saariano naio bare ka toro na soriano kanano. A vonganei kiniou bunu najaaro jibe na, napano kanaku naia-gagoano nalo aju ajakisor Yesu. ³⁰ Nina bior Tubo Naverikariano naio monoka to rime i ve toru lie tibe na tulaka, kiniou monoka nome i nove telisu lie vo.”

Naverikariano naio binime i miñau jumabe ea yetemeriba nei?

³¹ Ana Jone Baruei naio berii Naverikariano, berinavo “Naio be na vio mave, naruei naio mave loa vite nonovio. Kito romiyotuba ea vio yetano nei, kito robe na yetemeriba nei ga ana romijikia roverii vite nalo na vio nei ga. Mia naio, jibe ka namā kiniou neberenio, naio jaluvo ea vio mave binime i yetano, naio loa lie ka tomu nonovio, ³² napano naio binime i jōma berial vite nalo namā naio mialio beamu ea vio mave, a vite nalo namā naio mijogio. Naio berial vite nalo na, mia tomu nalo maka asidom kanano iliano, maka amoneaio. ³³ Telabo na maka amoneaio, mia kito namā kito romoneaio, kanado moneano naio jekar batitigio ka Atua, kanano iliano nalo be riano, a amemedu batitigio bo ga. ³⁴ Kanano iliano nene nalo, naio miila Naverikariano naio binime i berial ban kito rui, ana romijikia ka iliano nalo nei abe riano. Nina

bior bogo na Naverikariano binimeí, kito romial ka napano naio mil ea moroano na Niununo na Atua kanano, bior Atua jian kanano Niu-nuno banio, maka ve torogio ga, mia momonio garuei.
³⁵ Karamãano Atua nene naio tinien jii kenerinio nene nei naio toru laka, naruei naio bar vite nonovio jua jumãano.

³⁶ “Tibe na, kito napano romonea naio, robokar ruei meuliano nei napano naio to tobo to. Mia toro napano maka mĩa rimonmonea naio, mia naio rijikia re rial meuliano nei bogo tai, mia Atua kanano tiniemimiano ve toru toa naio.”

4

Yesu naio jidom rivan bereio Kalele, naio jel ea vio Sameria

¹⁻² Ana ka bogo na, iliano jo jeliviv, ber Yesu joĩa buru naiagagoano telabo abinimeí ajakisor naio, a joĩa baruei ealo. A maka ve Yesu namĩa naio baruei ealo, mia kumemi kanano naiagagoano nalo ga numitumĩa numilaio, mia tomu nalo amialio ka nalo napano Yesu kanano aju abinimeí miroano, jovulu Jone Baruei kanano.

Naruei nalo ajumĩa aberver iliano nei ba janea vio jibe na, ba bokar Varisis nalo, mia bogo na Yesu mijogio ka nalo bunu amijikia vite nei a mila nalo amijog bova biorio, ³ naio mial bo ka tuvan vio Yutea,

naio rivatove bereio Kalele. Naruei kumemi numituvan vio nei, nubano jibe na, ⁴ mia Atua jiloglog ka kenememi mĩarabo monoka va sel ea tanobuku na Sameria.

⁵⁻⁶ Naruei kumemi numitu numiel nubano, numal-maluyo ea komeli na vio na tai, siano Saika. Vaataro ka komeli nene, be bulukuei tai jo, napano jikar nu-anua ruei, jo binimeí jibe na, abio ka Yakovo mĩano uei. Borotano nene, beamu be tormoruo Yakovo kanano, ana iorou kanio ana mijamo ka ban kenerinio Yoseve.

Naruei kumemi liko Yesu numiel nubinimeí nuboru ea uei nene, be bogo niogoravo memedu, naruei Yesu mijog tinien maro laka bior burutili ieliano ea burutini-anio na jikili, ana naio ba jotano mave ea tagvoru na bulukuei nene.

Yesu bitavo bija tira re Sameria tai

⁷⁻⁸ Numitua uei nene bano-o, bisi ana na kumemi naiagagoano nalo numitumolu nubano ea komeli ka nu-vulu simemi sinaniano, mia Yesu naio ga takurano jo mijilimebi. Mo iorou kanio tira re Sameria tai naio miel binimeí ka jidom riviove uei. Naio binimeí ana Yesu bika denio berenio “? Aiou, jau komijikia koviove mĩaku uei tai?”

⁹ Ana tira nene, naio maka rijikia Yesu, mia bitilubar ka naio be toro Ju tai, mia mĩilo toru laka ka napano naio mil batitigio bo ban naio jibe na, bior ka bogo na, kulo Ju

nalo bija kulo Sameria nalo abe bilbilu va maka avior kalo. Ana tira nei naio bika den Yesu, naio berinavo “? Juñabe na jau, kobe toro Ju, komil ban kiniou tira na Sameria, na jau kobika uei den kiniou?”

¹⁰ Naruei ana Yesu naio berdoþe berinavo “! Tira, verver jau komijikia ga ijaiano na bo napano Atua naio jidom sian vanso! ! Verver jau komijikia ga ka kiniou nebe kei nei ga nañña nebika uei denso! Ver tibe na, vede maka ve kiniou na nebika uei denso, ana mia jau kovika uei den kiniou. Mia bogo na ver jau kovika uei den kiniou, nemijikia nesian uei na be uei na ridu meuliano vanso.”

¹¹ Naruei tira nei naio mijog vite na, naio bika den Yesu, berinavo “Toro na toru, jau maka ve kanamo titai ka jau koviov ka uei nene, mia bulukuei nene naio bululuo batove laka. Tibe na, uei na meuliano nañña jau kojoñña koberenio na, mia jau koviovio tuññabe, þeli na mia jau koviovio ea vio be? ¹² Mia jau kojoñña kober uei na dolu na, mia ninei jo nei naio be uei na bo tai. Korobido tormoruo nanua na Yakovo, naio kanano uei nei. Naio munu bano-o, naliko kenerinio nalo, bija kanalo temeul nalo, naruei amila lilian binimej binimej bokar banej. ? Jau kober jau kobo loa tormoruo Yakovo ana komijikia kala uei tai na bo loa ninei?”

¹³ Ana na Yesu berdoþe

banio berinavo “Nao, uei nei naio bo, ana mia bogo na kito romunuio, mia maka vesiou ana midoujer kito bereio. ¹⁴ Mia toro na naio rimunu uei nei napano nemijikia nesianio vanio, karina mia naio maka rijikia midouser naio bereio. Mia uei napano naio rimunuio, mia rimei tibe ka burupati uei bereio joomo ea kiano iviso, ve uei na meuliano napano maka ve togio eaio, naio joñña mieraro den naio damariga, maka rijikia tabo bogo tai.”

¹⁵ Mia tira nei, naio maka rijikia vatitig vo Yesu kanano iliano, naruei naio berinavo “Toro na toru, ver tibe na, bo ka jau kodu uei na ve telisu van kiniou ka nomunuio, mia nomidou re bunu, ka mia nemei re bunu noviov uei tulaka ea vio nei.”

¹⁶ Ana Yesu jidom ka tira nei naio jikia ka naio be kei, a berkanio, berinavo “Kin-iou never titai ka jau beamu vo. Jau kavan bereio, jau kovio koamo kovuru naio rimei bere ea vio nei.”

¹⁷ Ana tira nei berinavo “Ee, maka ve koaku tai!”

Ana Yesu berkanio, berinavo “Rian ga na, jau kober memedu na, ka jau maka ve koamo tai. ¹⁸ Nina bior ka tomu nalo na kojoru kalo beamu ruei napano abiniu abokar jimo, mia vonganei kojo bija toro tai bereio napano maka kosoro kanio. Jibe na na kanamo iliano beriano na, jau maka ve koamo tai.”

19 Mia tira nei naio miilo toru laka ka napano Yesu mijikia batitig kiano meuliano jibe na, ana berinavo “Rian ga na, toro na toru. Vonganei kiniou nemijikia naruei, ka jau kobe naverialiano tai. 20 Naio bo laka kiana, mia ħeli jau kobe kulo Ju nalo kanalo naverialiano ga na. Mia kumemi kulo Sameria, kenememi vio lu naio napano be burumħara burusuku yako Kerasim, napano korobimemi nalo amila lotuano na Atua eaio nua ruei, binimeĳ bokar banei. Mia kamiu kulo Ju nalo, kumitu kumisikili ka kenemiu burumħara komeli lu na Yerusalemo, naio ga takurano be vio na memedu ka ĳa amila lotuano ban Atua. Tibe na, kei naio memedu, kamiu ħeli na kumemi? Kover vonio!”

21-22 Mia Yesu jaaro ka rivuriri tira nei kanano jidomiano ea tivelinio na bajago na memedu na amila lotuano ban Atua, ana berkanio, berinavo “Nao kuvivinieku, jau kober be riano na, kiado lotuano kito juo naio maka rive verare. Mia nina maka rivior vio na amila lotuano ave juo, mia bior vite napano jibe na: Kamiu na ea vio na, kamiu kumitumħa kumila lotuano, mia kamiu maka kuvijikia batitigio naio napano kamiu kumilotu banio, mia kumemi kulo Ju, Atua naio bijauialar kumemi ka toro na rilarur tomu nalo naio miyotuba ea kenememi torogio. Naruei

kumemi numijikia batitig kenememi Atua nei napano ĳa kumemi numitumħa kumilotu kanio.

“Mia kiniou nemijikia never kaso ka mia tibe na re tulaka. Mia jau monoka komonea kiniou, napano neber kaso vonganei ka bogo tai jo binimeĳ napano mia lotuano vou tai tikario, napano ve kanado roviniu. Toro Ju ħeli na toro Sameria, mia residomial re bunu ka vio na memedu ka rolotu ka Atua naio be suku na, ħeli na komeli na Yerusalemo, ħeli na vio be bereio. 23 Mia burumħara vite na mia residom, naio jibe nei, ber bogo na kolotu ka Atua, mia monoka kotuvan Niununo Lu rimau ea niunumo, a monoka kolotu ka naio ve riano, memedu ka kiano ilirianiano.

“Nina napano Atua Teta naio jidomio, ana vonganei ruei a ea bogo na jo binimeĳ, mia naio rivitikar kanano taara na lotuano riano, napano amijikia alotu ka naio ea bajago novo na jibe na. 24 Atua naio be niununo, naruei toro na jidom rilotu kanio monoka rilotu ka naio ea kanano iviso, a vite nei naio monoka rive riano ea kanano meuliano.”

25 Ana tira nei, naio jo monea ka mia Naverikariano naio rimeĳ, naio napano iliano na vio Kris naio ber Kristo, naruei naio ber ka Yesu, berinavo “Vite nalo nei na jau kojomħa koberenio, vede abe riano, mia kiniou nomonea ka Naverikariano napano mia naio rimeĳ,

mia naio naruei riverial vite nonovio ve riano vatitigio van kumemi.”

²⁶ Naruei Yesu ber iliano telisu nei ga banio, berinavo “Naio namã jau kojomã koberenio, kiniou nene nei ga nei, namã nojo nojukunu bijaso vonganei.”

²⁷ Naio berial naio ban tira nei jibe na bisi, ana naiagagoano nalo abinimei aboru ea vio nene bereio. Naruei amialio ka napano Yesu jomã jukunu bija tira nei, jibe ka naljuo nei ga, naruei nalo amiilo kanio. Nalo amiilo, mia nalo aju buru ga, maka ve nalo tai kalo napano naio rivika den tira nei ka naio jidom venia, p̃eli na rivika den Yesu river naljuo ajumã ajukunu ka venia. ²⁸ Mo tira nei jumolu, mebi ka m̃ano bauei jo bo, naruei naio miel ban bere vonuo ea komeli. Ana bogo napano boru vonuo, naio ba berialio ka tomu nalo, berinavo ²⁹ “Valauo Ju tai naio jo rove yako ea bulukuei, naio jukunu ban kiniou, naio mijikia vite nonovio ea kanaku meuliano. Kiniou namial naio jibe ka Naverikariano garuei memedu, p̃eli na? Kamiu kumei, ravatove reialio.” ³⁰ Naruei nalo ajumolu ajaluvo abatove ka ajidom aial Yesu nene.

Jamerijiano na sinaniano na meruo jua tiniavio

³¹ Mia bogo na aju amiel abinimei maka ayotuba vo, ana naiagagoano nalo abar bulag salo sinaniano napano

aba abuluio, aberii ka Yesu aberinavo “Naverloglogiano, komei kesinan.”

³² Mia Yesu naio maka rimei, mia abio bereio bano-o, karina Yesu berinavo “Kamiu kuvisinan, kiniou be saku sinaniano dolu tai naio jo napano kamiu maka kuvijikiaio.”

³³ Naiagagoano nalo amijogio nina, naruei nalo amil banlo, aberinavo “?Ana kenia naio bar sano sinaniano nene binimei? !Kito maka reial toro tai leleio!”

³⁴ Ana na Yesu ber kalo, berinavo “Makanio, sinaniano na kiniou nojo nebrenio na naio dolu kiana. Saku sinaniano, naio be im̃auano na jogkariano na tinieiliano na naio namã miila kinio nebinimei yetano nei, a kiniou monoka noim̃au ka nonovio riviniu rivanvano-o na ribisi. ³⁵ Bogo namã kito romebija tiniavio, rojumã rober bogo nonovio jibe nei, roberinavo: Siberio veri ju, ka sinaniano rimeruo. Mia vonganei ea Atua kanano tiniavio, tomu nalo aju ruei ka ajog Atua kiano iliano, jibe sinaniano nalo na amermeruo ruei. Kiniou nojidom ka kamiu kuvila vonio ka kuvetavo ea miremiu, ka kuvisirarago vatitig tanea vio, ana mia kuvijikia kuvial sinaniano nalo ameruo bo ruei, vonganei be bogo na ava avario rimei. ³⁶⁻³⁷ Mia nalo namã ava avario, mia nalo asaaro ve toru laka bior kanalo vuliano telisu naio jo ruei, ana bogo na avar sinaniano nene rimei vonuo na meuliano na maka ve togio

nene, toro na toru na mebija, mia naio bunu saaro ve toru. Naio jibe ka ga iliano napano ber jibe nei, berinavo "Toro tai naio ba mebijo, mia toro dolu naio ba bario, mia burumbara saariano be tena nalo nonovio." ³⁸ Jibe na, kiniou nojomã nemiila kamiu ka kuva kuvuru tomu nalo napano kulo dolu nalo amila burumbara imãuano kalo ruei, mia vonganei kam nonovio kuvije buron kamiu ea jogvuiano na imãuano nene."

Kulo Sameria telabo amonea

³⁹ Mia bogo napano kulo Sameria napano ea komeli nei amijog tira nei naio berii jumãbe ka na Yesu mijikia vite nonovio ea kanano meuliano, nalo amiilo toru, naruei mila nalo telabo amonea Yesu. ⁴⁰ Ana bogo na abinimei ka aial naio, aju ajukunu bija naio banbano-o, karina abika naio ka nuva vonuo, nuvitu kija vijalo. Naruei nuba numitu bijalo ba bokar bogoti juo, ⁴¹ mia nalo telabo lie amonea naio bior kanano iliano novo nalo. ⁴² Aber ka bunu tira nei, aberinavo "Beamu, kumemi numijog venia ga napano jau kober ka kumemi, maka nuvijikia, mia vonganei, kumemi numijog kanano iliano memedu ga, kumemi numijikia ka be riano ga, kanado toro na toru nei, naio be Ioruriano na yetemeriba."

Yesu kanano vremesiano juo nene Kalele, naio mieliel ka tubo na toru tai kenerinio

⁴³ Mia bogoti juo nei barlaka bisi ana kumemi liko Yesu numituvan vio nei nubano, numidu bere kenememi marabo ka nuvatoe ea tanobuku na Kalele. ⁴⁴ Yesu jidom rivan bereio ea kiano vio Kalele, bior naio mial tomu dolu na vio dolu aberverii naio, ajirag naio laka janea vio. Nina jakii kiano iliano tai, napano berinavo "Tomu dolu nalo tiniel jii ka aiagago vatitig ka naverialiano, mia tomu na kanano vio nalo makanio, ajidom naio be iakurano." ⁴⁵ Mia bogo na nubinimei numiyotuba ea vio Kalele, tomu nalo na kiano vio ajaaro toru ka ala vorvoruano ka naio. Naina bior beamu, nalo telabo bunu aju ajua jokoluolu na Yerusalemo, ana amial ruei vijuku mteiano na Yesu mila ea Atua Kunuano Lu ka bogo na, ana amialio ka naina bo laka.

⁴⁶ Naruei naio jomã miel ea vio nalo na Kalele binimei bokar bereio komeli na Kenan, nanua naio bilig uei binimei be marjumelnelu. Ana ka bogo na, tubo na toru tai na komeli dolu na Kapeneam naio joa vio na, mia naio jomã mijog bova bior kenerinio tete sumano naio mie toru laka vaatara ka ga rimãaro. ⁴⁷ Mia bogo na naio mijog ajumã aberii ka Yesu naio juvan vio Yutea binimei Kalele bereio ruei,

naio ba mileal naio. Naruei naio mial Yesu, jegi banio ka riva vonuo rieliel ka kenerinio nene.⁴⁸ Ana na Yesu ber kanio berinavo “Vede jau bunu jau kojibe ka tomu dolu nalo. Bogo nonovio ga ajidom vremeniano ninio nalo, mia ver noimāu kanio, mia amonea kiniou kanio. Mia bogo napano maka bunu atu aialio, nalo maka asaaro ka amonmonea kiniou.”

⁴⁹ Mia tubo na toru nei naio jikili kanio, berinavo “Toro na toru, neber bo kaso jau komei soṑeli, ver ṑeli mia keneriku nene naio rivakovio.”

⁵⁰ Mia Yesu naio jidom ka tubo nei monea kanano iliano ga, naio berinavo “Makanio, mia jau ga ve takurano kavano. Kiniou neber kaso neberinavo keṑerimo nene mia naio rimāro re na, naio rimeul rivu ga.” Naruei toro nei monea iliano napano Yesu berkanio, ana na juvan vio ka riva vonuo bereio.

⁵¹ Ana na viobijeni kanio, bogo na naio joṑṑa miel ban bere ka rivano, naio bitavo bija kanano tomu nalo, napano ajumā amiel bior naio. Mia nalo aberial banio, aberinavo “Kenerimo naio mijog bo ruei jo.”

⁵² Naruei naio bika denlo, berinavo “Kamiu kuvisidomii vatitigio: bogo na vabe naruei na kamiu kumialio jikar ka binimei bo bereio?”

Nalo aberdoṑe aberinavo “Kumemi numialio jibe ka niabene binimei menini

bo ea niogoravo naniovo, jibe ka mērenio takurano.”

⁵³ Mia tete nei karamāno naio mijogio jibe na, naio mijikia ka nina naruei bogo memedu ga ka napano Yesu ber kanio berinavo “Kenerimo naio rimāro re, naio rimeul rivu ga to.” Naruei vite na mila karamāno, bija nalo nonovio ea kanano māratavo, amonmonea Yesu.

⁵⁴ Naruei ielieliano na tete nei, Yesu mila iorou ka napano naio jaluvo den vio Yutea binimei, a naio naruei be kiano vremeniano valuo nene ea tanobuku na vio Kalele.

5

Yesu mieliel ka toro tai na niabene māro kirisiou laka ruei

¹ Ana Yesu naio jo Kalele kirisiou kija banbano-o na bokar bogo na kulo Ju nalo kanalo jokoluolu dolu mave yako Yerusalemo. Naruei Yesu nalo aban bere mave ea jokoluolu nene. ² Ajua vio Yerusalemo jibe na na ea legiano tai ana Yesu miel ba batove vaataro ka burumāra māratavo na komeli nei napano abio ka Maratavo na Nunu, ana nalo aban ea vio tai napano be uei na mā amijeljelia naio joaio, napano ea kialo iliano, abio ka Betsata. Naruei jeliviv ea bauei nei, be mārsuṑiki jimo nene ju, napano amimāu kalo ea puruveru. ³ Mo bogo nonovio ga be tomu na mieiano nalo, be merebono nalo, be jaba nalo, a be nalo

na niabele m̃arm̃aro, nalo na jibe na nalo miroano laka aju abinimei amonea m̃arsup̃iki nalo nei. Abinimei jibe na, bior uei nei, naio miyukulkulu be ve vaarakurano ga, ⁴ jibe ka Atua kanano nailiano naio binimei milao, mo ver nalo amial jibe na, namieiano kei napano naio ba bokar uei nei jukamu, mia mieiano vaio nañña joa naio mia ribisi denio vaarakurano ga. ⁵ Jibe na, tomu na mieiano nalo aju abinimei ea vio nei, mia ka bogo nene nalo nene tai be toro tai napano niabene nalo biniu m̃arm̃aro bokar yuka duelimo va rolu ba arolu [38] ruei. ⁶ Ana bogo na Yesu binimei, naio mial toro nene, mia mijikia toro nei naio jo mon bior mieiano nei bogo jiu ruei jibe na, ana naio bika denio berinavo “? Koig liki, jau kojidom ka niabemo rimei rivu, ina?”

⁷ Ana na toro na mieiano naio berdoṑe berinavo “Toro na toru, kiniou nojidom toru kiana, mia bogo nonovio, ver uei naio miyukulkulu, mia maka toro tai ka rudu kiniou navatove tii kiniou notoa ea. Ana bogo na kiniou takurano nemiel vonvon nabatove mia toro dolu naio binimei batove bokar uei nene jukamu ka kiniou.”

⁸ Ana Yesu mil memedu ban toro nei naio berinavo “Mo, jau kotumolu, jau kavar m̃amo yebe, koiel kavano.” ⁹ Naruei ea Yesu kanano iliano nei, toro nei niabene nalo na abova abin-

imei abo nonovio, ana naio jumolu bar m̃ano yebe, jumolu miel ba vonuo.

Ana ka legiano nei na vite nei miyotuba eaio, naio be Legiano Lu tai na kulo Ju nalo kanalo, ¹⁰ mila na ka bogo na tomu na tortoru na kulo Ju nalo amial ka kema nei naio jo miel bija m̃ano yebe, ana amil banio biorio, aberbureio, aberinavo “!Ai, abe banei be Legiano Lu kiana! Jau kojo komidu m̃amo yebe jibe na, jau komila korov kiado tuboiano kulo kito Ju nalo.”

¹¹ Mia naio berdoṑe banlo, naio berinavo “Kiniou niabeku nalo burukokorovio, mia toro nene binimei mieliel ka kiniou, berii ka kiniou berinavo nodu m̃aku jogu navano.”

¹² Mia nalo ajidom ajikia vatitig lie vo, nalo abika denio, aberinavo “?Ana keniana? ?Naio be keniana napano naio ber kaso ka jau kala tibe na?”

¹³ Mia kema nei naio maka rijikia riverenio, bior napano naio maka rijikia ka be Yesu napano mieliel ka naio, mia maka bunu rijikia rial naio bior napano be burum̃ara tiniobi na jo, mia Yesu jo miel bure tomu nalo nene, naio jaluvo den vio nei ruei.

¹⁴ Ana iorou kanio maka vesiou, ana Yesu mial toro nene bereio joomo ea Yimo Lu, ana berkanio berinavo “Vonganei na jau kobinimei kobo ruei, bo ka jau kovitakar vatitigso. Jau kotuvan nonovio kanamo kar-

iano nalo, ver maka vede titai naio riva rivova lie kaso tovulu napano beamu.”

¹⁵ Ana ka bogo na kema nei naio mijikia ka be Yesu nei napano mieliel ka naio, naruei naio ba berialio ka tomu na tortoru na kulo Ju nalo kialo.

¹⁶ Mia bogo na nalo amijogio ka be Yesu napano naio mieliel ka toro nei, tiniel jer naio, nalo maka asaaro ka na naio mila tenei ka Legiano Lu, naruei nalo ajikar ka amila baravo abilvili ea naio. ¹⁷ Ana na Yesu berdopelo, naio berinavo “Karamāku, naio jomā miñauka kanano iñauano nalo na bo ea bogo ninio, ba bokar bunu Legiano Lu nalo, mia kiniou bunu monoka noto nala tibe na ga napano naio milaio.”

¹⁸ Jibe na ga ka bogo na, navurimāra-boiano na kulo Ju nalo ajumā abitii Yesu ruei aber naio be toro namā mila bulag tolu na Legiano Lu. Mia vonganei mave ka naio, nalo amijog ka napano naio jomā bio Atua be karamāno memedu, nalo amialio jibe ka naio jomā mila naio be verare bija Atua. Naruei vite nalo nei mila ana abinimei abitunu lie vo, ajidom toru laka ka auebinio rimāro.

Atua kenerinio bija Karamāno naljuo amimāu be verare ga

¹⁹ Ana Yesu ber kalo, naio berinavo “Kiniou neber beriano ka kami, ka kiniou Atua kenerinio, kiniou maka nejikia nela titai kiniou ga

ve takurano, mia venia ga napano nemial Karamāku milaio, naina naruei kiniou bunu nemilaio jibe na.

²⁰ Atua teta naio tinien jii mēlea kiniou kenerinio, ana jomā jiloglog kiniou ka vite nonovio napano naio jidom ka mia nalaio. Abe iñauano dolu nalo ju kiano vo napano nalo tortoru lie vo, napano mia karamāku sian van kiniou ka mia noimāuka iorou, a bogo napano mia noimāukanio, mia kami kuviilo ve toru kanio. ²¹ A bunu, tibe ka napano Teta naio bitiri bulag bereio nalo napano mā amarmāro naio jian bere kialo meuliano banlo, mia kiniou Kenerinio bunu nemijikia nesian meuliano van toro kei namā nojidom nesian vanio. ²² Mia Teta, maka ve naio ga namā mila tibureiano, mia iñauano na bunu naio midu joa jumaku, ²³ ka rila na tomu nonovio monoka avatove ka kiniou, tibe ka namā abatove ka Karamāku. Tibe na, toro namā naio maka to rivatove rivu ka kiniou Kenerinio, jibe ka naio maka to rivatove rivu ka toro na toru napano miila kiniou nabatove.”

Mariano a meuliano

²⁴ Ana Yesu mil lie vo, naio berinavo “Kami kuviagago vatitigio. Toro kei namā monmonea kanaku iliano, a naio monea nana naio miila kiniou nabatove, ea bogo nei memedu mia naio rivokar meuliano. Naio maka totano yetano ka tibureiano tai leleio, bior naio jumolu

den bajago na m̃ariano, ba bokar kiano meuliano vou ruei.

²⁵ “A kiniou neber iliriani-
ano nei bunu ban kamiū, ka
bogo na jo binimeī vonganei
napano nalo nam̃a Atua mial
ka am̃arm̃aro den bajago va,
mia nalo ajog jooku kiniou
Atua kenerinio, mia nalo na
ajogkario, mia avokar meuliano.
²⁶ Kiaku Teta, meuliano
na be riano joa naio ga,
naruei naio mijamo ka
meuliano nei na joa kiniou,
²⁷ mia naio mijamo ka bunu
ka kiniou Kulorinio Kener-
inio, mia nala im̃auano nalo
na tibureiano.

²⁸ “Vite nalo nei, nalo
maka ve tena kamiū kuvi-
ilo kalo, mia naio monoka
tibe ga na ea bogo na-
pano kiniou nojo noberenio
ka naio jo binimeī. Mia
nalo nam̃a amonmelio ea
borotano mia ajog jooku
naio rivio, ²⁹ naruei mia ana
k̃ialo tumoliano bereio ka
aje meuliano, ana tomu nalo
na aim̃au bova, k̃ialo tumo-
liano ka avokar tibureano.”

*Vite nalo na rijai Yesu
kiano iliano nalo*

³⁰ Ana Yesu mil lie vo, naio
mil memedu ban tomu na
tortoru na kulo Ju nalo na-
pano maka asidom amonea
naio, naio berii vite nalo na
m̃a ajiloglog naio ka naio be
riano. Naio berenio beri-
navo “Ea tivelinio na tibu-
reiano, napano mia kiniou
nala, mia kiniou nala re tibe
ka kanaku jidomiano kiniou
ve takurano ga, mia nala

ea ga venia napano nomi-
jog Teta berenio. Tibe na,
mia kanaku tibureano naio
memedu ga, bior napano
maka nala ka kanaku jido-
miano, mia nemila ea Teta
kiano na naio juvan kiniou
nebinimeī. ³¹ Naruei nemil
jibe na ban kamiū, nemi-
jikia ka nojo neberii kiniou
bereio, ana vede nalo tai
amial ka maka rimemedu ka
neil tibe na, nalo maka ajikia
amonea iliano na jibe na.
³² Mia naio bo ga na, naio
maka ve titenia, bior napano
be vite dolu nalo na m̃a
amija kanaku iliano amijikia
atumolu atu.

“Na be moti nene, naio
be toro tai napano naio
berial vite ninio ban kin-
iou napano abe riano laka.
³³ Ninei be Jone Baruei nei,
napano beamu, kamiū kumi-
tuvan iliano ba banio, kamiū
kubika jum̃abe ka kiniou
eaio, naruei naio berial vite
nonovio be riano bo ban
kamiū. ³⁴ Mia maka rivu
ka kamiū ve tiniemiu ka
iliano na toro tai jibe na
Jone mila kanaku iliano tu-
molu tibe na. Mia kiniou
nejidom kamiū kuvisidomii
vatitig rivu bereio ea ve-
nia napano Jone berial ban
kamiū ea tivelinio na kin-
iou, bior nojo namila vio
ka najai kamiū ka kuvijikia
kuvokar ioruriano. ³⁵ Kiniou
neber Jone nene ka kamiū,
bior naio javukia yulu tai na-
pano mereralii batitig kene-
miu jidomiano, napano ku-
misaaro telisu ka naio.

³⁶ “Mia vite dolu na m̃a

miiĵa kanaku iliano, be toru lie ea vite nalo na mĵa Jone beriio. Vite nei naio be kijokijo nalo napano Teta naio mijamo ka ban kiniou ka neimĵaukano ea miremiu. Imĵauano nalo na tomormoruo nei na mĵa kiniou nojo namilaiio amiiĵa kanaku iliano nei toru ka be riano ka napano Teta nei naruei naio miila kiniou nebinimei.

³⁷ “Mia mave ka vite juo nei, dolu nene naio jo, naina be Karaĵaku napano miila kiniou nebinimei. Kamiu maka lele kuvijog joono a maka lele kuvial mirano, mia naio bunu, kanano iliano nalo amiiĵa toru ka kanaku iliano, na aberial kiniou. ³⁸ Mia kamiu kumila napano maka ve jeleigio ka iliano nei ea kenemiu meuliano, bior napano kamiu maka kuvisidom kumonea naio napano miila kiniou nebinimei. ³⁹ Bogo telabo kamiu kumituĵa kubitii vatitig Vivitauiano Lu nalo, bior kumituĵa be tiniemiu ka mia kuvileal kenemiu meuliano napano maka ve jukuti nene, ana Vivitauiano Lu nalo nei naruei napano aberial kiniou. ⁴⁰ Aber ka kiniou ga nebe burupati na meuliano nene, mia kamiu maka kuvisidom kumei kuvokar meuliano nene ea kiniou.”

⁴¹ Naruei Yesu mial kialo veribinio, mil jibe nei berinavo “Vite nalo na mĵa kiniou nojo nemila, maka noto nala rivior ka nejidom kamiu kuvitirilar siaku, makanio. Kiniou

maka nesidomial naina, ⁴² mia be vite tai na bova, kiniou nemijikia batitig kamiu ruei, naruei nemijikia ka kamiu maka tiniemiu tii Atua leleio. ⁴³ Bogo na mĵa kiniou nomiyotuba ka kamiu, nebinimei ea karaĵaku siano, mia kamiu maka kuvisaaro ka kiniou. Mia ver bogo tai toro dolu tai rimei, napano rimei ea naio ga ve takurano siano, a vede mia kamiu kuvisaaro kanio ga. ⁴⁴ Kiniou tinieku miila kamiu toru laka, mia namial jibe kiride ka kuvijikia kuvokar moneano riano bogo tai. Naina bior napano damĵariga, kamiu kumitu tiniemiu jii ka kuvidular siemiu rivavin. Kamiu maka kuvitu kuvisidom ka kuvijebukua kenemiu bajago leleio, ka kuvila vite nalo napano iorou mia Atua naio mijikia rivitiri bulag kamiu riviorio.

⁴⁵ “Kiniou neber iliano nalo nei ban kamiu, ĵeli kumitu kumisidom kuberinavo ‘Uerei, kema na tinien jer kito, ĵeli ea bogo na tibureiano mia naio naruei napano mia riverial kanado torokoriano nalo van Teta Atua ea vio mave.’

“Mia makanio, ve re kiniou na mia nala tibe na, mia ve dolu tai na mia naio rilaio. Dolu nene, nina be tormoruo Mosis, napano mĵa kumitu kubarkar tiniemiu ea naio ka mia naio river iliano na mia rijai kamiu, mia kiniou neber vatitig ban kamiu, naio naruei napano mia river bulag vova-

iano nalo na kenemiu na.
⁴⁶ Kamiu kumituma kuberi-
 navo kumitu kumonea jik-
 ili tormoruo Mosis kanano
 iliano nalo nei, mia ver
 tibe na bior vaio ana kamiu
 maka kumonea kiniou bunu,
 bior napano tormoruo na
 damariga naio bivitauui kin-
 iou ga. ⁴⁷ Mia vonganei kin-
 iou nemial jibe ka napano
 kamiu maka kumonea vivi-
 tauiano na kanano, mia ka
 tenei, kamiu kuvijikia dulu
 re ka kumonea kanaku il-
 iano nalo bunu.”

6

*Yesu bagan tomu nalo
 jovulu menu jimo [5,000]*

*Mataiu 14:13-21; Mak
 6:32-44; Luka 9:10-17*

¹ Iorou ka naina, kumemi
 liko Yesu numidu uako nu-
 mituvan kanano tanobuku
 bereio, nubar kor burumara
 ueiyabo nei Kalele, napano
 tealó abio ka ueiyabo na
 Taiperias. ² Mia bogo na
 tomu nalo amial ka numitu
 nubano jibe na ea tivelinio,
 ajumolu ajakisor kumemi.
 Ajidom avan vija Yesu bior
 nalo aju amial burutomoluo
 na ielieliano na naio joma
 mila ea nalo napano ma
 abokar mieiano nalo. ³ Ana
 nubano nubokar tivelinio
 nene, numiel nubavin ea
 suku tai napano joa vio na,
 numiel nubanbano-o na nu-
 mebi. ⁴⁻⁵ Ana Yesu naio
 jotano jo jirarag ba laka,
 naio mial burumara tiniobi
 napano nalo aju amiel abin-
 imei ka naio. Naio bitilubar
 ka nalo telabo abe tomu
 na vio kinkin napano ajuma
 amiel vei ka ava Yerusalemo.

Nalo aju abano bior bu-
 rumara jokoluolu na kulo Ju
 nalo kanalo, Jokoluolu na
 Nasidomkariano na Ioruri-
 ano, napano mia ala rivesiou
 re.

Naruei bogo na Yesu naio
 mial nalo ka aju abinimei,
 naio bika vite tai den
 Vilip, naio berinavo “Vilip,
 nalo na aju jijerlo toru
 laka liki kiana. ?Mia kito
 rovolu salo joko tumabe?”
⁶ Vikadeniano nei Yesu
 kanano, naio be tena rilavon
 kija Vilip ga, bior Yesu naio
 mijikia ruei vite napano mia
 naio rilaio van tomu nalo
 nei.

⁷ Ana Vilip naio berdope,
 berenio ga berinavo “Ver
 kiniou noimau yuka ve
 takurano, mia maka nejikia
 neleal puruveru rivare ka
 novulu ka sinaniano na nalo
 aviniu ajevio ve tertelisu!”

⁸ Naruei naiagagoano dolu
 nene, be Adru, napano be
 Saimon Pitere kuruanó na-
 pano teliki, naio berial ban
 Yesu, berinavo ⁹ “Tubo, kin-
 iou nemileal meaku tai jo
 nei, naio bar joko sesa jimo
 [5] bija niado momaio juo
 [2]. Ninei naio telisu ga mia
 tomu nalo miroano laka.”

¹⁰ Mia Yesu naio beri-
 navo “Makanio, naio bo ga
 na. Kuver ka tiniobi nalo
 ka atutano yetano beamu
 vo.” Naruei nuber kanilo, ka
 nalo atutano ea majumunei,
 ana naruei numial tomu
 nalo nene bokar menu jumo
 [5,000] titai jibe na. ¹¹ Naruei
 Yesu naio bar joko jimo nene
 ana bolkouo, ber siva biorio.
 Avona bisi ana jikar ka ma

burekokorovio a jijian bulag ban nalo napano ajumã aju-tano, naio mila jibe na ga bunu bija niado, jijianio ban nalo nonovio jibe ka na nalo tiniel jii ka asenio.

¹² Naruei nalo ajenio banbano-o na mabolo jouo, ana Yesu ber ka kumemi, naio berinavo “Sinaniano torogio na be va ju, kito ralaluvu re, ana bo ka kuvar bijio riva vio takurano.”

¹³ Naruei kumemi nubano nubar niati joko jimo nei binimeí, napano nalo ajen digio ju, naruei numisonlo ban ea basaro banbano bokar basaro duelimo ba juo [12] garuei.

¹⁴ Mo bogo na tomu nalo abitolubar burumãara buruto-moluo napano Yesu milαιο, ajumã aber jibe nei kalo aberinavo “Kiado burumãara naverialiano na m̃a koro-bido nalo aberkario ka mia naio rimeí riyotuba ea yetemeriba nei, tete na naruei naio be naverialiano nene memedu kiana.” ¹⁵ Naruei nalo aju ajidomii ka ava avokar Yesu, ajidom atutu-aio ka avitirilar naio rimeí rive kanalo parinio Tubo, mia bogo napano naio mijog lubar ea naio venia napano ajidomii ka alaio, naio jaluvo denlo, miel naio takurano ga ba bavin lie vo ea burusuku nalo nei.

Yesu miel mave ea ni-unuku tei

Mataiu 14:22-27; Mak 6:45-52

¹⁶ Naruei kumemi naia-gagoano nalo numial ka napano m̃erenio jo batove,

numial bo ka nuvan bereio, naruei nubatove ea tivelinio na ueiyabo. ¹⁷ Nubatove

mia maka bunu nuval Yesu riyotuba bereio ka kumemi, mia bior napano vio bobogio ruei, numidu kenememi uako, numituvan vio bereio nubeluo ka nuvavin ea ueiyabo ka nuvarkor bereio nuvan ea vio Kapeneam.

¹⁸ Naruei numitu nubano jibe na, kiri jegi tai binimeí jo miuvuvu kija, naio mila na tei jikar ka bieveluo laka.

¹⁹ Mia bogo napano nubeluo koalabo kija ruei, jibe sudu jimo, numiilo ka napano Yesu naio jomã miel mave ea niunuku uei jo binimeí vaataro. Naruei numerou kanio toru laka, ²⁰ mia naio mil ban kumemi berinavo “! Oi, kamiu kumerou re! Kiniou ga nei.”

²¹ Ana numijog bo bereio, mia nuburu naio bavin ea uako, mia vaarakurano numial ka kenememi uako naio jologlog vio na numisidom ka nuvan ea ruei.

Tomu nalo abinimeí ajiravo Yesu

²² Naruei ea kavijo, nalo na laka yako ea ueiyabo nei tivelinio, napano Yesu baganlo vonga, nalo aju ajidom toru ka Yesu naio jo jumãbe. Nalo aju ajidom jibe na bior bogo napano kumemi liko Yesu nubinimeí ealo, numidu uako takurano ga, mia nalo amial ka napano kumemi numidu uako nene nubano bere ruei, mia Yesu naio maka rivan vija kumemi, naio takurano jobo. Mia vonganei nalo

maka bunu ajikia aleal naio ealo, ²³⁻²⁴ mo nalo abano abar uako dolu nalo tai, nalo abarkor ea vio Kapeneam ka asirav kumemi. Uako dolu nalo nei, maka ave kanalo, mia be kulo Taiperias nalo kanalo napano nalo abinimei aborvoru ealo, abano vauro ea vio na ga mña Yesu bolkouo ka joko eaio, naio mila binimei bare ka nalo asenio.

Yesu berenio ber naio be joko na meuliano

²⁵ Naruei tomu nalo nei abinimei aboru Kapeneam, ana abavauro, naruei nalo ajiravo Yesu. Mia bogo na amilealio, abika denio, aberinavo “? Naverloglogiano, jau kobinimei bere koboru ea vio nei ka bogo na vabe?”

²⁶ Mia Yesu naio mijikia venia napano ajidom aial naio bereio riviorio, ana naio berdoŕe banlo, berinavo “Ver kamiu kubinimei kumisirav kavulu kinioi bereio bior kumial kanaku burutomoluo nalo ana kubitilubar ka kinioi kinioi kei, naina naio bo na. Mia kinioi nemial jibe ka kamiu kumitu kumisidomial ga ka naniovo kinioi nabagan vatitig kamiu, kumisinan banbano-o mabomiu nalo abujovujo vatitigio bo, tenene na kamiu kumisidom ka mia tibe na bereio banei, ŕeli makanio? ²⁷ Mo, kanaku ilirianiano van kamiu najo jibe nei: kamiu kuvitumña kuvisidomii mñele re rivior sinaniano ga napano naio be tena bogo bulati ga

naio joono bereio. Mia bo kanio kuvimñau sikili rivior sinaniano nei na mña naio mijikia to damariga to, naio mijikia to to riva rivokar bogo na meuliano nei napano naio maka ve jukuti nene. Be riano, mia kinioi Kulorinio Kenerinio nemijikia nesian meuliano nene van kamiu, bior ka napano teta Atua naio jekarlar kinioi takurano ga ka nela tibe na.”

²⁸ Naruei nalo abika denio, aberinavo “Ana ver kumemi nuvisidom ka kumemi nuvila vite nalo namña Atua naio jidomio, mia monoka nuvimñauka tumabe?”

²⁹ Ana Yesu berdoŕe banlo berinavo “Burumñara vite napano Atua jidom ka kuvimñau kanio, naio jibe nei: kamiu kumonea rive riano ea kinioi napano Atua miila kinioi nebinimei ea yetemeriba nei.”

³⁰ Ana nalo abika bereio, aberinavo “?Ana jau, venia naruei be kanamo burutomoluo napano ver kumemi nuvialio, mia kumemi nuvijikia nuvimoneaso? ? Mia jau kala imñauano vabe na bo van kumemi? ³¹ Kumemi nubika jibe na bior ka napano numitu numisidomial kanado tormoruo nalo na beamu, nanua na ajua vio yauo. Aju jibe na, mia Mosis mila burutomoluo tai na bo banlo, napano damariga nalo aju abar joko na abio ka mana, mia nalo ajenio, maka lele siserlo. Vite na naio joa niosi lu, a naio berenio berinavo

'Dañariga naio baganlo ka joko na vio mave!'"
Eks 16:4

32 Ana Yesu berdoṣelo bereio, berinavo "Nao, vite na naio joa niosi lu, mia joko napano Mosis bario, naio maka ve joko na vio mave. Joko na vio mave napano be riano, karamñaku ga naio mijikia sianio. 33 Atua kanano joko be kiniou napano najaluvo ea vio mave nebinimeí yetano, ka nesian meuliano vou rivan tomu na yetemeriba nalo."

34 Ana nalo aberdoṣe, aberinavo "Tubo, naina naruei be joko nañña kumemi numisidom tulaka."

35 Ana Yesu berial banlo, naio berinavo "Kiniou, kiniou nebe joko na meuliano. Toro kei napano naio rimeí ea kiniou, naio maka lele rijikia siser naio bereio, mia toro kei napano naio rimonea kiniou, naio maka lele rijikia midou ser naio bereio. 36 Be vite takurano ga naio bova, jibe ka napano neber ka kamiuruei, napano kamiu kumial kiniou bija kanaku burutomoluo nalo ka miremiuruei, mia kamiu maka kuvisidom kumonea kiniou. 37 Ana mia monoka tomu tai napano mia amonea kiniou, bior nalo nonovio napano teta mudulo ajua jumñaku, mia monoka amei ea kiniou, mia nalo nonovio napano mia amei ka kiniou, ve re tai kalo napano mia novukulario bereio, mia novokar vatitiglo aviniu ave kanaku.

38 "Kiniou najaluvo ea vio mave nabatove yetano ea yetemeriba nei, maka ka mia nala kanaku jidomiano, mia ka nala jidomiano na kanano napano naio miila kiniou nabatove. 39 Mo kanano jidomiano naio jibe nei, ka nalo napano naio mudulo ajua jumñaku, mia kiniou nalaluvu re nalo tai kalo, naio jidom ka ea legiano na maaro mia kiniou nevitiri bulag nonovlo bereio. 40 Karamñaku naio jidom toru ka tibe nei naruei, ka nalo nonovio napano mña amial kiniou, ana amonea kiniou, mia nalo avokar meuliano nei napano naio maka ve jukuti nene, a naio jidom toru bunu ka ea legiano na maaro, ka mia kiniou naruei nevitiri bulaglo bereio."

Navuriñaraboiano na kulo Ju nalo maka asaaro ka Yesu kanano iliano nalo

41 Naruei bogo na kulo Ju nalo kanalo tomu na tortoruaju amiagago ka Yesu kanano iliano nalo nei, nalo maka asaaro leleio, naruei ajumña amil mumñi kanio. Be kanano iliano tai napano nalo maka asidom ajogio, naina be iliano napano naio berial ber naio be joko napano naio jaluvo ea vio mave batove ea yetemeriba nei. 42 Nalo aberii ealo aberinavo "¿Jumñabe ana toro na naio jomña berial ban kito ber naio jaluvo ea vio mave tiniabene naio binimeí ea kito? Naio maka ve toro

kokouro tenia na, kito romi-jikia batitig naio ruei, bija kenieno a karamāno bunu. Naio be tormoruo Yoseve ga kenerinio na, Yesu.”

⁴³ Ana Yesu berdoṽe banlo naio berinavo “! Oi, ilimumiano ea kiniou naio bare, kamiu kuviagago vatitigio beamu vo! ⁴⁴ Toro kei napano naio binime i monea kiniou vonganei, mia ea legiano na maaro kiniou nevitiri lar naio rimeul bereio. Mia Teta napano miila kiniou nebinime i, ver naio rivuru re toro na rime i ea kiniou, mia naio maka rijikia rime i. ⁴⁵ Niosi na naverialiano Aisea kanano naio berial iliano tai, naio berinavo

‘Nalo nonovio, mia Atua ga naio riverlogloglo,’ Ais 54:13

ana mia never nalo namā ajog batitigio iliano na Teta Atua kanano, namā naio berloglog batitigio kanio, nalo narue i mia amei ea kiniou. ⁴⁶ Ana nalo na jibe na, mia ve re tai kalo napano aial Teta Atua, bior be toro takurano ga mial naio, nina be kiniou napano nejaluvo denio nebinime i.

⁴⁷ “Nao, kiniou nojomā neber be riano laka ban kamiu, ka tomu nalo nonovio napano amonea kiniou, aju jouro ea meuliano ruei, na maka jikia bisi, ⁴⁸ bior kiniou, kiniou nebe joko na meuliano. ⁴⁹ Joko nei naio maka rive verare ka joko na mana napano kulo moruo nalo ajenio ea vio yauo. Nalo ajen

banbano-o na, karina maka ve nalo tai kalo napano naio rimeul tobo to, nalo abiniu ajumā amarmāro jibe na ga. ⁵⁰ Mia ver joko tai to, ana toro napano tomā senio mia naio rijikia re rimāro bogo tai, naina narue i kito rejisia ka joko na vio mave memedu. ⁵¹ Mo, kiniou narue i, kiniou nebe joko napano meul mugarue i, napano jaluvo ea vio mave binime i ea yetemeriba nei, ka toro na naio senio, naio meul tobo to. Joko nene narue i be mokotenaku, napano kiniou nemijamo ka bior yetemeriba vodolu nei, nejian bior meuliano na kanano tomu nalo.”

⁵² Narue i Yesu kanano iliano nalo nei kirisikili laka ka tomu na tortoru na kulo Ju nalo kialo nei ajikia batitigio rivu, narue i ajumā abivika aberenio “Venia na? Toro na naio ber ka mia naio sian niamoiāno van kito ka kito resenio, ṽeli na naio jomā ber venia?”

⁵³ Narue i Yesu naio ber bisivisii meravo banlo ea tivelinio na nioti na kanano mōriano, naio berinavo “Kiniou neber riano ban kamiu, neber kamiu monoka kuvisen niamoiāno na kiniou Kulorinio Kenerinio, a kamiu monoka kumunu kanaku burukija. Ver ṽeli, mia kanaku meuliano naio maka rijikia toa kamiu. ⁵⁴ Mia naio napano mā jen niamonioku, a naio munu kanaku burukija, naio bokar meuliano napano maka ve jukuti nene, mo

mia kiniou nevitirilar naio bereio ea legiano na maaro, nala naio rimeul bereio.
⁵⁵ Nina bior niamonioku, naio be sinaniano dolu tai, a kanaku burukija, naio be munuiano dolu tai laka.
⁵⁶ Naio napano mā jen niamonioku, a naio munu kanaku burukija, kanano meuliano momou joa kiniou, a kanaku meuliano momou joa naio.
⁵⁷ Karamāku na be burupati na meuliano, ana naio miila kiniou nebinimeī, mia kiniou nojo nomeul ea kanano meuliano napano joa kiniou, naruei naio napano mā jen niamonioku, mia naio rimeul ea kanaku meuliano napano joaio.
⁵⁸ Naina naruei kiniou nojomā neber ea kanaku iliano ea tivelinio na joko nei napano jaluvo ea vio mave naio batove. Joko nei naio maka tibe ka joko nei nanua mā korobido moruo nalo mā ajenio mia nalo ajumā amāro jibe na ga. Naio be joko napano toro kei napano ver naio senio, mia naio mijikia rimeul to tobo to.”

⁵⁹ Iliano nalo nei naruei Yesu jo berloglog kalo joomo ea yimo na volkouano na vio Kapeneam.

Naiagagoano telabo nalo ajuvan Yesu nalo abanvan bereio

⁶⁰ Mia bogo na, Yesu naio ber iliano nalo nei, kumemi kanano naiagagoano nalo telabo ajidomii naio bereio, aberinavo “Kanano verloglogiano nalo nei kirisikili kiana. ? Kei bereio naio

mijikia rijoglubarbar vatitigio?”

⁶¹ Mia Yesu naio mijog lubar ea naio ka kanano naiagagoano tealo ajumā amil mumi ka naio tertelisu jibe na, ana naio bika denlo, naio berinavo “?Jumābe, kamiu maka kuvisaaro ka kanaku iliano telisu nei, mila kamiu kumisidom kuvituvan kiniou bereio?
⁶² Ver tibe na, maka nejikia kamiu naruei. Ver bogo tai, kamiu kuvial kiniou Kulorinio Kenerinio notuvan kamiu, navan bere ea kanaku vio mave, mia tumābe naruei? Peli mia tiniemiu bobogia kiniou naruei!
⁶³ Kanaku iliano nalo nei abe mārabo na Niununo, abe mārabo na meuliano. Kulorinio naio mijikia rivar bere kulorinio, mia kulorinio naio maka rijikia sian meuliano riano nei van kulorinio dolu. Vite na Niununo na Atua kanano ga naio mijikia sianio.
⁶⁴ Mia nebitilubar ka kamiu tealo kumonea ruei, mia tealo makanio.”

Yesu naio ber nina, bior ka napano beamu ruei, naio mijikia kulo be nalo namā maka amonea naio, ba bokar napano naio mijikia kei kalo napano mia naio tiveluku kanio.
⁶⁵ Ana Yesu ber kalo bunu, naio berinavo “Tealo mia amonea, a tealo mia amonea re, naina naruei kiniou neber batitigio ban kamiu iliano nei naruei, ka maka toro tai rijikia rimeī ea kiniou, ver karamāku maka rijamo ka naio rimeī.”

⁶⁶ Naruei ea bogo nei,

kumemi tealo kanano naia-gagoano nalo amial jibe Yesu kanano verloglogiano nalo nei, abinimei jikili lie vo, naruei amialio ka be de ga, ana nalo aban bereio, maka bunu atu atakilili kumemi.

Pitere naio berial jikili kanalo moneano ban Yesu

⁶⁷ Ana bogo napano Yesu naio mial ka napano tomu tealo ajuvan naio bereio, naio mil ban kumemi kanano naiagagoano du- limo ba juo [12] nei, naio bika berinavo “?Ana jumabe ka kami? ?Peli kami bunu tiniemi jii ka kuan bere vija nalo na?”

⁶⁸ Ana Saimon Pitere naio berdope, berkar jikili ban Yesu, berinavo “Tubo, ver kumemi nuvituvanso, mia kumemi nuva nuvitakisor kei bereio? Jau takurano ga napano ioluan na meu- liano na joaso, ⁶⁹ jau ga takurano napano vonganei kumemi numonmoneaso, a kumemi numijikia ruei ka jau kobe Naverikariano Lu napano Atua juvanso kobin- imei ka kolarur kumemi.”

⁷⁰ Ana Yesu berdope, naio berinavo “Nao, kiniou nebi- jauia bulag kami duelimo ba juo [12] na be kanaku, ka kami kumonea kiniou tibe na, mia iviso bure kami, kami tai naio be simaro memedu.” ⁷¹ Mia Yesu naio maka riverial kumemi tai sian ka bogo na, mia iorou kanio ana nubilubar ka ea kanano iliano nalo nei, naio joma ber Jutas, tor- moruo Saimon re Kariot

kenerinio, napano naio be tai ka kumemi duelimo ba juo [12], mia naio maka ritovonio, naio jiveluku ka kanano Tubo novo nei.

7

Yesu kuruano nalo maka avijurukar batitig naio rivu

¹ Iorou ka naina Yesu naio joma miel jeliviv, joma ban ea ga vio na be kiano tanobuku ga nei Kalele. Naio maka bunu toma rivavin ea vio nalo na tanobuku na vio Yutea, bior navurimaraboiano na kulo Ju na vio na nalo ajoma ajirarag ka naio ruei, ka ajidom ka ala bin naio rimaro. ² Mia bogo tai, be vaatara ka bogo na burumara jokoluolu tai na kulo Ju nalo kialo bereio, napano be Jokoluolu na Yimo Tobobo. Mia jibe ka ga bogo nonovio, nalo miroano tinie jii ka avavin Yerusalemo kanio. ³ Mia ka bogo na, Yesu kuruano nalo amal banio, aberinavo “Ei, jau kojo bogo jioe ea vio nei ruei, bo ka jau kalavon ka kavavin Yutea, ka kanamo naiagagoano nalo na yako nalo kija amijikia aial kijokijo nalo nama jau kojoma komilaio. ⁴ Jau kojidom ka tomu nalo ajikia vatitigso, a kojoma kominau lukuluku ga. Ver be riano ka nama jau komila burumara burutomoluo nalo nei, bo kanio kava koyotuba ea yetemeriba mirano.” ⁵ Mia nalo nei kialo

iliano nei jibe ka amiyotel ea ga Yesu, bior nalo abe kuruano memedu, mia nalo maka amonea naio.

⁶ Mia Yesu berdoŋelo, naio berinavo “Kamui kumijikia kuvila kenemiu vite nalo ea bogo na vabe ga napano kamiu tiniemiu jii ka kuvi-laio, mia kiaku burumŋara bogo naio maka rimeŋ vo.

⁷ Kamui kumijikia kuvila kenemiu iŋauano nalo rivu ga, tomu nalo maka ajikia aserŋi ka kamiu riviorio, mia bogo na kiniou nemila kiaku iŋauano, neberial ka kialo bajago va nalo na yetemeriba nei maka rimemedu, mia nalo ajerŋi ka kiniou toru laka. ⁸ Tibe na mia kamiu ga kuvavin Yerusalem, kiniou notobo nei ga beamu vo. Kiniou maka nejikia nava noyotuba ea mirano tomu nalo na jokoluolu nei, bior kiaku bogo jo binimeŋ, mia maka rimeŋ nonovio vo.” ⁹ Naio ber iliano nei banlo, avona iorou kanio ana nalo abano ana naio jobo.

Iorou kanio ana Yesu bavin ea jokoluolu

¹⁰ Yesu jobo jibe na, mia maka vesiou ga, naio bunu bavin Yerusalem, mia maka tibe ka na tomu nalo amijikia aial naio, mia naio milavan naio. ¹¹ Naruei tomu na tortoru na kulo Ju nalo, ajumŋa ajidomio ruei ka ŋeli mia naio rimeŋ ea jokoluolu, naruei nalo ajumŋa ajiravo naio janea vio, abivika aber naio jo be. ¹² A tomu nalo bunu, bogo

nonovio ajumŋa aberverii naio, napano nalo tealo ajumŋa aber naio be toro na bo tai, a tealo aber naio kirivova, naio jomŋa mila niegeniege mŋlea tomu nalo kialo jidomiano. ¹³ Ajumŋa aberverii Yesu jibe na, mia maka atumŋa averial naio ea vio medave, bior amerou ka ver kialo tomu na tortoru ajogio, mia ala titai kalo.

Yesu ba miyotuba ea Atua kunuano lu

¹⁴ Mo nalo ajua jokoluolu banbano-o na, legiano tealo barlaka ruei, mia Yesu naio mial bo ka riva rivavin ea Atua Kunuano Lu ka riverloglog tomu nalo bereio. ¹⁵ Mia bogo na tomu na tortoru na kulo Ju nalo kialo amijog kiano verloglogiano novo nei, amiilo toru laka, aberinavo “Jumŋabe ana tete nei naio mijikia vatitig Atua kiano iliano jibe na? Naio maka rivan ea yimo na verloglogiano leleio, mia kiano verloglogiano kirinovo-o mia!”

¹⁶ Ana jibe na Yesu naio berial banlo, berinavo “Venia namŋa nojomŋa nejiloglog ban kamiu, maka ve kiaku, mia be Teta na naio miila kiniou nebinimeŋ ea yetemeriba nei kiano. ¹⁷ Ver toro tai saaro ka rila ga Teta kiano jidomiano, mia naio rila toro nene mijikia rivitii vatitig kanaku verloglogiano nalo. Mia toro nene naio mijikia rivitilubar ka kiniou maka noto neverloglog tomu

nalo selia ga siaku, mia mijikia rivitilubar ka verloglogiano nalo nei, be riano laka ka amaluvo ea Atua. ¹⁸ Ver kito reial toro tai toña rila iliano ea siano bereio, kito romijikia ka naio joña midular naio ga rivavin. Mia ver toro na ña mil, midular kiano toro na toru siano napano miila naio binimej, romijikia ka naio be riano ga, naio maka toña rilasibi.

¹⁹ “Toro tai na mila jibe nei be Mosis. Atua jian kiano tuboiano banio, naruei naio binimej jian ban kami, ana kami kumituña kumila kokorovio ruei. Mia jumabe na kami kumisidom kuvuebin kiniou nañaro, bior kuberinavo namila korov tuboiano? Naio memedu jibe na?”

²⁰ Naruei tomu nalo aberdoße aberinavo “Jerei, vonganei kojoma komil vovu jibe ka siñaro tai joaso! Kei jidom rueso? Koverial vonio!”

²¹ Ana Yesu berdoße, berinavo “Nanua beamu nebinimej ea vio nei, nemila buruñara burutomoluo tai ea miremiu, nemieliel ka toro na be javuluku. Mia bogo na kumialio, maka kumisaaro kanio, kuberinavo kiniou nominau bova ga ka napano nemila ea Legiano Lu. ²² Mo bo ka kami kuvilavon ka tiniemi rimao bunu ka bajago na pakuveu, javukia tormoruo Mosis naliko tormoruo dolu nalo na beamu ka naio, jibe ka Epraamo nalo, ajian ban

kito. Naio bunu be inauano tai kiana, mia ver legiano na ala rijoru ea Legiano Lu, kami maka kuvisidomialio, na kumituña kumila ga. ²³ Kami kumituña kuber maka kuvisidom kuvila korov Mosis kiano tuboiano, mia damariga kumijamo ka ala inauano na pakuveu ka Legiano Lu nei, naio bo ga na. Mo ver kami kumijamo ka nina, ana bior vaio ana kami tiniemi mimi meje jibe na ban kinio bior kiri inauano sesa novo na kanaku na takurano ga nei, napano namila batitig kiri tavaliki nei niabeno bo bereio ea Legiano Lu? ²⁴ Kiniou nemial jibe ka kami kumituña kubitii vite nalo na jibe nei ea kulukuti ga, mia bo laka ka kuve masou kija, kuvilavonio ka kuvisidomii rivu vite nalo riva rivokar niamoiou.”

Aberivonvon ka Yesu be Naverikariano ðeli na maka ve naio

²⁵ Ana ka bogo na tomu telabo na Yerusalemo amial ka napano Yesu joña berloglog joomo ea Yimo Lu, mia nalo amiilo, aberinavo “Ierinio ga na! Toro nene kia ga nei navo, napano tomu na tortoru ajumia aber ajidom ka auebinio rimaro. ²⁶ Be naina joña berial kiano iliano jibe na ga, naruei nalo maka bunu alavon ka ala titai ka leleio. Kito maka rejikia, ðeli maka asidom ail vanio bior napano abitilubar batitigio ruei ka be riano ka toro nei,

naio be kiado Naverikariano memedu. ²⁷ Mia makanio, maka rejikia ka reverenio aver naio nina ga, bior napano kiado moneano tai ruei, ka Naverikariano, bogo na ver naio riyotuba, mia maka ve toro tai rijikia river naio joa vio be na binimej na. Mia toro nei Yesu, kito nonovio romijikia kiano vonuo ruei.” Nalo aber jibe nei, aber ĉeli Yesu abario jo Nasarete, mia makanio, naio abario jo Betleem.

²⁸ Mo bior nalo ajunā aber jibe na, Yesu jaamī ka berlogloglo joomo ea Yimo Lu, naio berial iliano nei banlo, berinavo “Kamīu kuberiamā kumijikia kiniou, a kuberiamā kumijikia vio napano nebinimej eaio, mia nemial jibe ka maka kuvijikia batitigio rivu. Nebinimej ea vio nei, maka ea kiaku jidomiano, mia toro dolu tai miila kiniou nebinimej, napano naio be burupati na ilirianiano. Mia jibe ka maka kuvijikia kiniou, mia maka kuvijikia naio bunu. ²⁹ Mia naio, kiniou naruei napano nemijikia naio batitigio bo, bior ka napano naio naruei miila kiniou nebinimej ea yetemeriba nei.”

³⁰ Mia Yesu kiano iliano nalo na jibe nei mila ajikili lie vo ka monoka avokakar naio, ana maka ve toro tai leleio ka napano mijikia tokolio, bior ka napano kiano bogo maka rimej vo. ³¹ Ajidom aue naio, mia tomu nalo miroano laka

amonea naio ruei, bior burutomoluo nalo napano jomā milao. Aber jibe nei aberinavo “Ana mia Naverikariano na vabe napano mijikia rimej rila burutomoluo venia bereio tovulu naio? Makanio, tete nei naio be kiado Naverikariano memedu kiana.”

Amiila tomu na mira aban ka Yesu

³² Mia Varisis tealō ajunā amiagago ka tomu nalo namā amijakar Yesu ka kialo iliano nalo, mia amila soĉeli, aba amil bija kulo lu na tortoru nalo, naruei abiorkar ka monoka ala titai ka Yesu vonganē ga. Ana amiila kialo kukuano nalo, ka ava asirago buluvio ka avokar Yesu, ka avuru naio rimej bere vanlo.

³³ Ana Yesu berial, berinavo “Mia kiniou nemijikia noto vija kamīu bogo ve telisu ga bereio, karina navan bereio ea naio napano miila kiniou nebinimej. ³⁴ Bogo napano navan bisi, mia kuvila von ka kuvisirag kiniou rivanvano-o, mia maka kuvijikia kuvileal kiniou. Vio napano mia nava notoaiō, mia maka kuvijikia kumej eaio.”

³⁵ Mo bogo napano tomu na tortoru na kulo Ju nalo kialo amijog iliano nei, abito vitonu eaio, ajunā aber kalo, aberinavo “Kema na jo ber vio be na, ka mia naio rivan ea karina mia kito rejikia re realeal naio bereio eaio? Peli naio jidom rivan ea vio dolu nalo na yetemeriba napano kuruado

Ju aburo aban ea ka bogo na burumñara vurubureiano, tenene na naio jidom riva riverlogloglo kija koviobo?

³⁶ Mia naio ber venia na, ber mia kito resirag naio rivano-o mia kito releal re naio. Mia tumñabe ea kiano iliano napano berinavo naio to rivan ea vio tai napano kito rejikia re ratakisorio, maka rejikia ravan eaio?"

Mia ka bogo na, kukuano nalo maka avokar Yesu vo.

Yesu miolioluii Niununo Lu, be uei na meuliano

³⁷ Naruei amila jokolu-olu nene bano-o, na bin-imei bokar legiano maariano nene, napano jibe ka legiano na toru nene. Mia bogo napano aju vio takurano, Yesu jumolu bio jikili jibe nei, naio berial berinavo "Kamiu kei na midou jer, bo naio rimeĩ ea kiniou, rimunu uei na meuliano. ³⁸ Toro namña monea kiniou, mia rivu laka vanio, tibe ka namña Vivitauiano Lu naio berenio, napano berinavo

"Toro na jibe na, mia tiniene rivujo ka uei na meuliano, rivano-o rio magmago lou ea naio bereio tibe ka uei namña mieraro."

³⁹ Mia Yesu kiano iliano nei, naio jijamerji ka Niununo Lu, bior ka napano naio mijikia ka iorou, nalo na mña amonea naio, mia avokar Niununo Lu. Mia ka bogo na, Niununo Lu naio maka rimeĩ vo, bior ka napano Yesu naio jo kia navo ea yetemeriba nei, naio

maka riva totano ea kiano vio lu na mave vo.

Jidomiano niukniuku ka Yesu

⁴⁰ Mia bogo napano tomu nalo amijog Yesu bio jibe na, kialo jidomiano nalo ba beve dolu. Nalo tealo aberinavo "Toro na, naio be naverialiano jibe Mosis namña kito romoneaio ka mia naio rimeĩ." ⁴¹ Tealo abeinavo "Nina, jibe na kovio, p̃eli na ver maka naio be kiado Naverikariano garuei."

Mia nalo tealo aberdope, aberinavo "Makanio, maka iliano tai napano river Naverikariano mia rive toro Kalele tibe ka tete na. ⁴² Kiado Vivitauiano Lu ajumña aber ga mia Naverikariano mia naio riyotuba ea Parinio Tubo Teviti kiano yati, mia naio rive toro re Betleem." ⁴³ Mia jidomiano telabo ka naio jibe na banbano-o, mila na tomu nalo aburuburevurelo bior Yesu. ⁴⁴ Mo tealo nalo maka lele asaaro ka naio, amial bo ka avuku naio rivan ea nalakoiano, mia iorou kanio maka tai kalo napano ava vaataro kanio ka avokario.

Navurimñaraboiano nalo tinieljer Yesu toru laka

⁴⁵ Mia iorou ka vite nalo na, kukuano nalo na Yimo Lu aban bereio ea kulo lu na tortoru bija Varisis nalo, ka asian veriiano rivanlo. Ana bogo napano amiyotuba ea miralo, tomu na tomor-moruo nei maka aial Yesu, ana amil banlo, aberinavo "? Ana toro nene naio be napano numiila kamiu kanio?"

?Bior vaio ana kamiu maka kuvuru naio rimei?"

⁴⁶ Naruei kukuano nalo nei aberdoŝe, aberinavo "Kumemi numiagago ka kiano iliano nalo abo mia abo, maka ve toro dolu tai napano mijikia riverloglog kito rivu tibe ka naio."

⁴⁷ Mia verdoŝeiano nei mila Varisis nalo amiilo kanio, aberinavo "¡Tomnei, vonganei kamiu bunu, kema na buru kenemiu jidomiano ba be vovu!"

⁴⁸ Kamiu kumijamo ka naio milasibilili kamiu, mia juŝabe, kamiu kumial ea kumemi tomu na tortoru ŝeli na ea kumemi Varisis, be tai napano amonea naio? Makanio. ⁴⁹ Nalo ga naŝa amoneaio, nina be taara kirivova dedade nalo na, mia nalo na maka ajikia vite. Maka ajikia batitig kiado tuboiano rivu, Atua berkar iliano va ka kialo vironiano ruei."

⁵⁰ Ajuŝa amel jikili jibe na, mia nalo tai milavio jikili ka rila kialo iliano rivatove bereio. Nina be Nikotimas, napano nua beamu ea bogiano tai, naio ba jukunu bija Yesu. ⁵¹ Naio ber kalo, berinavo "Kito rojuŝa romil ea toro na jibe na, javukia napano rojuŝa rejibure naio ruei. Mia kiado tuboiano berbure nina, naio ber ver kito rosidom reil van toro tai, kito monoka rotutano ea komeli kitoliko, monoka rodu bogo rivanio ka naio riverial kiano jidomiano van kito, ka kito monoka rovika

vikadeniano nalo ka releal ka be riano naio mila jibe na ŝeli na juŝabe. Nina naruei ŝarabo na ala iŝauano memedu."

⁵² Mia maka asidom aia-gago ka kiano iliano nei, bior amial ka napano naio mikurkar Yesu. Amil banio, aberinavo "¡Tomnei, jau ko-joŝa komil jibe na jau bunu kobe toro Kalele tai bereio! Kosidomii vatitig rivu ka venia napano Iliano Lu bere-nio. Maka leleio ve iliano tai napano riverial ka mia nave-rialiano vou tai naio tumolu rove yako Kalele rimei mave ea vio nei."

⁵³ Naruei kialo iliano nalo ba birankakario ea vio na ga, karina nalo abeve ter-akurano abanvan bereio ea kialo vonuo nalo.

8

Tira napano aberenio amilealio ka naio be nasiaka-iano

¹ Naruei Yesu juvan Yimo Lu, naio miel ban bereio ea Suku Na Buruolivi. ² Naio mon ea vio na-o viomijeni kon naio, ana kavijo naio ban bereio ea Yimo Lu na Atua Kunuano. Bogo na-pano tomu nalo amial naio, nalo telabo abinimej eaio, naruei naio jotano joŝa berlogloglo.

³ Mia maka vesiou, naver-loglogiano na tuboiano bija Varisis nalo, aburu tira tai binimej eaio, amila naio jumolu jua mirano na tomu nalo. Tira nene,aju abokar naio jibe na bior aberenio naio mila siakaiano bija

toro tai, mia nalo tai amial, aberialio. ⁴ Ana amila naio jumolu ju jibe na, amil ban Yesu, aberinavo “Naverloglogiano, tira nei amileal naio jom̃a mila siakaiano. ⁵ Mia jibe ka napano Mosis kiano tuboiano berenio ea tivelinio na kariano nei, vonganei naruei kumemi monoka nuvitubabinio ga riñaro. Mia tuboiano na Romo berenio be lu ka nuvitubabin toro. ? Mia jum̃abe ka jau, kiamo jidomiano jum̃abe?”

⁶ Naruei vikadeniano nei, maka avika masosoua den Yesu, mia ajum̃a aburu vonvonio, ka naio river belbeleia titai napano mia iorou kanio ana amijikia atibure naio riviorio.

Mia Yesu naio maka riverdoŋe, naio maka river vite tai, mia jurubanini ga, bitiri m̃artukuji na jum̃ano naio bivitauia iliano tai ea borotano.

⁷ Ana ajum̃a abivika denio jum̃abe ka tira neibano, ana Yesu barlar naio bereio, mil banlo, berinavo “Mo, ver kamiu tai napano maka lele ve kariano tai toa kiano meuliano, mia naina rivuku puruveru na tukamu, tuba tira nei.” ⁸ Vaarakurano bereio, naio jurubanini batove, bivitauia iliano dolu tai ea borotano.

⁹ Mia bogo napano amijog venia napano Yesu ber kalo, ajikar ka abeve terakurano abanvan bereio. Na naio jukamu, be kialo tormoruo tai, mia iorou ka naio, nalo

dolu bunu aburu dedade ealo beve terakurano, o-oa ka tira nei ga jumolu ju ea Yesu mirano. ¹⁰ Mia Yesu bitikar naio bavin, naio bika berinavo “? Tira, nalo napano aju be? ?Maka bunu nalo tai sidom tibureso?”

¹¹ Ana tira neibano naio berdoŋe, berinavo “Tubo, maka bunu toro tai.”

Mia Yesu berenio berinavo “Bo ga, mia kiniou bunu natiibureso re. Jau komijikia kava vonuo bereio ga, mia kola re bunu kariano bereio.”

Yesu ber naio be yulu na yetemeriba

¹² Mo iorou kanio ana na Yesu mil banlo bereio, naio berinavo “Kiniou nebe yulu na yetemeriba, toro kei napano takisor kiniou, mia naio riel re bunu ea melijokouo, ana mia yulu na meuliano toa naio.”

¹³ Mia Varisis nalo tealo napano aju kia navo abukular kiano iliano bereio, aberinavo “Jau kober jibe na, jau ga bereio komiija kanamo iliano, jau kojom̃a komidular jau bereio bavin. Tibe na, kumemi maka nuvijikia numoneaso, kanamo iliano maka ve riano ga.”

¹⁴ Ana na Yesu berinavo “Peli namila jibe na kovio, mia kiaku iliano nonovio ŋeli kiaku verloglogiano abe riano laka. Kiniou nemijikia nonovio vite na tivelinio ea kiniou, ka kiniou nojo be na nebinimei ea vio nei, ŋeli na nojo nei ka mia nava be bereio,

mia kamiu maka kumijikia lele tivelinio na kiniou.
¹⁵ Kumitunãa kumitibure kiniou ea jidomiano na toro, mia kiniou maka netibure toro leleio. ¹⁶ Mia ver bogo tai netibure tomu nalo, mia kiaku tibureiano naio rimemedu ga, bior napano kiniou re ve takurano nalaio, mia kumemi juo naina napano miila kiniou nebinimej, kumemijuo nuvila buronio.

¹⁷ “Mo ea kenemiu tuboiano, abivitauija jibe nei berinavo ver ve tomu ve juo aikurukar iliano tai, mia kamiu kumoneaio, ¹⁸ naruei mia monoka tibe na bunu ea kumemi juo Teta. Kiniou neber kiniou nebe riano, a naio mikurukar kiniou, mila na vonganei kamiu monoka kumonea kiniou.”

¹⁹ Nalo amijog iliano nei, naruei abika denio, aberinavo “Jau koma kober karamamo na, mia naio jo be vonganei?”

Ana na Yesu berdope, naio berinavo “Kamiu maka kuvijikia naio, jibe ga napano maka kuvijikia kiniou. Ver kumijikia batitig kiniou rivu, mia rila kamiu kuvijikia vatitig naio bunu rivu, a maka kuvijikia kuvika vikadeniano tibe na, ana makanio.” ²⁰ Iliano nalo nei, Yesu berlogloglo ea Yimo Lu, nina ea tivelinio na naio, vio be na mia avar vatitig kiano ijaiano na veru nalo napano ajuvan ban Atua. Ana ea bogo nei, maka ajikia avakar naio, bior maka kiano bogo vo.

²¹ Ana Yesu berial bunu jibe na banlo, naio berinavo “Kiniou nava kovio den kamiu naruei. Bogo na ver nava kovio varlaka, mia kamiu kuvisirago kiniou, rivano-o mia kuvial re kiniou, mia kumarmaro vija kenemiu kariano nalo. Kiniou navan ea vio tai napano mia maka kuvijikia kumei eaio.”

²² Telikiti napano tomu na tortoru na kulo Ju nalo amijog iliano nei, abika aberinavo “?Kema na naio jidom rila venia? Naio ber mia naio rivan ea vio tai na kito maka rejikia ka ravan eaio, peli na naio ber mia rila kuku naio rimaro bereio bo?”

²³ Ana na Yesu berenio berinavo “Kenemiu jidomiano a kiaku jidomiano abe dolu laka. Kamiu kube na vio yetano nei ga, mia kiniou nebe na vio mave, kamiu kube na yetemeriba, kiniou maka neve kiano. ²⁴ Ana jibe ka napano kiniou neber ruei, mia kumarmaro ga rivija kenemiu kariano nalo. Ver kumonea re kiniou ka kiniou nebe naio napano jo jobo jo, mia monoka tibe na ga.”

²⁵ Ana nalo abika, aberinavo “Abe jau kover vonio bereio, ka jau kobe kei.”

Ana na Yesu buku bere iliano banlo, naio berinavo “Kiniou nebe naio ga napano nanua jikar beamu ruei binimej bokar vonganei, kiniou nojo neber kiniou nebe naio ga. ²⁶ Naina ga kiniou nojoma neber tivelinio

na kiniou. A tivelinio na ea kamiu, ve vite miroano napano nemijikia neverenio, mia p̄eli ver neverenio, a be iliano na tibureiano nonovio. Ana vite nalo napano nojom̃a neberial ea yetemeriba nei, naio be iliano nalo ga napano nomijog den naio napano miila kiniou, bior dam̃ariga, kiano iliano nalo amemedu laka.”²⁷ Yesu bisi meravo ga jibe nei, berii karam̃ano na mave banlo, mia maka ajikia leleio.

²⁸ Naio mil bereio banlo, naio berinavo “Telikiti napano kuvitelan kiniou Kulorinio Kenerinio mave ea iesi m̃akolkolo bisi, mia kamiu kumijikia ka kiniou nebe kenemiu Naverikariano. Mia kamiu kuvitilubar ka napano vite nonovio nam̃a namilalo, maka nala kiniou ga ve takurano, mia dam̃ariga neber ga venia nam̃a Teta naio berloglog ka kiniou.”²⁹ Naio naruei napano miila kiniou nebinimei, a naio jo bija kiniou vonganei. Naio maka leleio tuvan kiniou bogo tai, bior dam̃ariga nojom̃a namila vite nonovio jibe ka ga nam̃a naio jaaro kanio.”³⁰ Yesu naio jom̃a mil jibe na, kiano iliano nalo aburu kulo Ju telabo amonea naio.

Ilirianiano mila m̃arimieni nalo na kariano ajibirbili bereio

³¹ Yesu mil ban nalo na amonea dovorovo ea naio, naio berinavo “Ver kamiu kuvokar sikili kiaku iliano,

kuvitum̃a kuviduio, kamiu kuve kiaku naiagagoano riano nalo.”³² Mia kamiu kuvijikia ilirianiano, naruei mia ilirianiano rila m̃arimieni nalo atibirbili den kamiu.”

³³ Nalo aberdope banio, aberinavo “Ai, abe kumemi nube tormoruo Epraamo kiano yati nalo, maka numitum̃a numim̃au kurano ea toro na toru dolu tai. ? Mia jum̃abe ana jau koberinavo mia m̃arimieni nalo atibirbili den kumemi?”

³⁴ Yesu berdope, naio berinavo “Kiniou neberiano ban kamiu, tomu nonovio napano m̃a amila kariano, nalo abe tomu nam̃a aju amiñau kurano bior kariano, m̃arimieni na kariano miadikarlo jikili.

³⁵ Kamiu kumitum̃a kumim̃au kurano ga bior toro na toru na kariano kanano, mia kamiu maka kuve kiano m̃aratavo. Mia kiniou, notobo rivija karam̃aku, bior kiniou nebe kiano m̃aratavo memedu.”³⁶ Kiniou nebe tete na mave, mia ver novulu bulag kamiu, mia kamiu bunu kumijikia kuvitu dam̃ariga vija kiniou ea vonuo na mave.”

Yesu berenio nalo maka ave Epraamo kenerinio, nalo abe Sim̃aro kenerinio

³⁷ Ana Yesu ber bunu ka tomu nalo, naio berinavo “Kiniou nemijikia vatitig ka napano kamiu kube tormoruo Epraamo kanano yati nalo memedu, ana Epraamo kanano yati nalo nei naruei napano bo ka ver asaaro ka

kinious. Mia makanio, kamiu tealo kube yati nene nalo naruei napano kiaku iliano maka totano batitig rivu ea kenemiu iviso, naruei kumisidom toru ka kuvue bin kinious namaro. ³⁸ Bo ka kamiu kumonea kiaku iliano nalo, bior kinious nojomã neberial ga venia napano kinious nemial bogo napano nojo bija Teta, mia kamiu kumitumã kumila ga venia naña kumijog karamemiu naio berenio.”

³⁹ Mia aberdoþe, aberinavo “Riano ga, bior karamemiu tormoruo buo Epraamo re nua nua laka.”

Ana na Yesu berinavo “Maka leleio! Ver kamiu kube tormoruo Epraamo kenerinio riano, mia bo ka kamiu kija kuvitumã kuvila von ka kuvila vite nalo ayu tibe ka naña naio milaio.

⁴⁰ Ana makanio, kamiu kumitumã kumila vite kirivova laka. Jibe kinious, nebe toro tai naña nojomã neberial ga ilirianiano nalo napano nomijog Atua naio ber ka kinious, mia kamiu kumitumã kumisidom kuvuebin kinious namaro. ?Peli kamiu kuberiamã bajago na naruei napano kenemiu tormoruo Epraamo tinien jii ka kuvilaio? ⁴¹ Makanio, kinious nemial jibe ka maka naina, mia be karamemiu dolu tai napano naio jo, kamiu kumimãu kiano.”

Mia nalo aberinavo “! Jerei, venia na! !Kojidom kala kumemi nuve tete na marabo nalo, kumemi maka nuvijikia karamememi! Karamememi takurano

riano ga naio jo, naina be Atua.”

⁴² Ana na Yesu berinavo “Ver iliano na be riano, ka Atua naio be karamemiu, mia kamiu monoka tiniemiu tii kinious ve toru mia, bior ka kinious najaluvo den naio nebinimei ea vio nei. Kinious maka nemei tibe ka napano kinious ga, mia naio naruei miila kinious nebinimei.

⁴³ Kinious nojomã neberii vite nalo na ban kamiu banbano-o kiride ga, mia damariga kamiu maka kumijikia leleio. Kinious maka nejikia den kamiu, bior vaio ana maka kuvisidom ka kuvokar vatitig rivu kiaku iliano na? ⁴⁴ Kamiu, karamemiu Simaro, a kamiu tiniemiu jii ka mã kuvila tena bova tibe ka ga napano naio jidomio. Jikar nua ea tikariano binimei, naio be toro naña muebin toro m̃aro a naio maka tinien tii ilirianiano, naio maka tumolu tua tivelinio ka naio leleio. Bajago na memedu na kiano, naio mil damariga ea burum̃ara kenieno sibiano nei, bior naio be burupati na sibiano nalo nonovio, naio be teta na bajago na sibiano. ⁴⁵ Naio jibe nei, mia bogo napano kinious nebinimei, neberial ilirianiano novo nalo ban kamiu, mia karina kamiu maka kuvisidom kumonea kinious bereio. ⁴⁶ Mia kamiu kei na naio mijikia riverial kiaku beleano tai? ?Mia ver kumial ka nemil be riano, bior vaio ana maka kumonea kinious?

⁴⁷ “Toro na be Atua kanano, naio jo miagago

vatitig ka Atua kiano iliano. Mia kamiu na ver kamiu maka kuvisidom ka kuvijog kiano iliano nalo, nemijikia ka nina bior kamiu maka kuve kiano leleio.”

Yesu naio Epraamo

⁴⁸ Mia Yesu kiano ilisikiliano nalo nei mila tomu na tortoru na Ju nalo amijog bova, ana nalo abika denio, aberinavo “Kumemi numijog aber jau maka kove Ju rimemedu na, jau kobe niabe leri na Sameria ga tai. Ana kumemi numial napano siñaro tai joaso, naio jomã milaso kobe kodovo kija. ? Iliano nalo na abe riano, ðeli na makanio?”

⁴⁹ Ana na Yesu berdoðelo, naio berinavo “Makanio, maka ve siñaro tai toa kiniou. Vite nalo namã nojomã nemilaio, nemila ka karamãaku siano rivavin. Vite nalo namã kamiu kumilaio ka kiniou, kumila ka siaku vatove. ⁵⁰ Nina maka ve titai ea kiniou, bior ka napano kiniou maka noto noimãu ka nala siaku rivavin. Mia be toro na toru jo napano naio jidom ka tom nalo bo ka atovon kiniou, mia naio ga ve takurano tibure vite nonovio ea tivelinjo na. ⁵¹ Mia be iliano tai napano be riano napano nemijikia never ka kamiu jibe nei, ka ver kamiu tai rivokar kiaku iliano sikili, naio rudukario, mia naio maka rijikia rial namãariano bogo tai.”

⁵² Ana Ju nalo amijog iliano nei, aber ka naio, aberinavo “Vonganei numijikia batitig ka Siñaro

joaso ruei. Jau kober toro napano tovonso mia naio maka rijikia riñaro, mia ve re toro tai napano mia maka riñaro bogo tai. Tormoruo Epraamo naio meul banbano-o karina naio mñaro, a naverialiano nalo bunu amimãu banbano-o karina amãmãaro. ⁵³ ?Peli na jau komialso jau loa laka ka kiado tormoruo lu nalo a? ?Jau koberiamã jau kobe kei bereio, m?”

⁵⁴ Ana na Yesu berdoðe, naio berinavo “Ver kiniou neverial ka kamiu, ðeli kumial jibe na ka napano nomidular siaku bavin bereio, mia kamiu kuvial rivova. Toro dolu tai ga napano mña jo mila siaku bavin, nina naio napano mña kuber naio be kenemiu Atua, naina be karamãaku. ⁵⁵ Naio, kamiu maka kuvijikiaio, mia kiniou nemijikia batitig naio. Kiniou maka nala sibi tibe ka kamiu, neber vatitigio ga na, ka kiniou nemijikia batitig naio bo, a kiano iliano nonovio, nemije batitig bo monea kiaku meuliano. ⁵⁶ Nemijikia never bunu ka korobimiu tormoruo Epraamo, naio tai napano jidom toru ka rial kiaku bogo nei. Naio jidom rial ka kiniou noyotuba ea kiano torogio, nemei nala kiaku imãuano nei, a bogo na naio rialio bisi, mia naio saaro mia saaro.”

⁵⁷ Ana Ju nalo abika naio aberinavo “Jau maka kove tormoruo tai tibe naio vo, kanamo yuka maka rivokar duelimo va limo [50] vo.

? Ana na juñabe ana jau
kojomña kober jau komijikia
tormoruo Epraamo re nua
nene? ? Jau komial kovio
tai?"

⁵⁸ Ana Yesu naio
berdoḡelo, naio beri-
navo "Kiniou neber riano
ban kamiu, ka tormoruo
Epraamo re nua nei, kiniou
nojukamu laka ka naio.
Bogo na naio maka vo, mia
kiniou nebe naio napano jo
beamu ruei." ⁵⁹ Ana telikiti
napano kulo Ju nalo amijog
ka napano Yesu jomña ber
kiri iliano telisu neibano,
napano naio jibe ka Atua
siano lu tai, ana amijikia ka
naio jo ber naio be Atua,
mia nalo tiniel mimi toru.
Naruei ajirag puruveru ka
atuba Yesu riñaro, mia naio
juvan naio bena ga denlo,
juvan Yimo Lu ba tavio
bereio bano.

9

*Toro napano naio miy-
otuba naio be merebono*

¹ Ana kumemi naia-
gagoano nalo kumemi liko
Yesu numiel nubano, naruei
bogo na numiturña numiel
nuban jibe na, numial
toro tai napano bogo na
naio miyotuba, naio be
merebono. ² Mia nubika
den Yesu, nuberinavo "?
Naverloglogiano, venia mila
kema na? ? Peli maḡo
na kiano kariano ga, ḡeli
na mauo na kenieno naio
karamñano kialo, mila naio
be merebono jibe na?"

³ Ana Yesu berdoḡe naio
berinavo "ḡeli ga, naio maka

ve kiano kariano, a maka
ve kariano na kiano tor-
moruo juo kialo, mia naio
miyotuba jibena ka rila ga
ka mia tomu nalo ami-
jikia aial moroano na Atua
kiano riñau ea kiano meu-
liano. ⁴ Jibe na, mia nalarur
naio vonganei, bior bogo na-
pano viomijeni kia ga vo,
kito monoka roirñau sikili,
monoka roirñauka naio na-
pano miila kiniou nebin-
imej ka kiano iñauano nalo.
Melijokouo jo binimej, na-
pano kito maka bunu rejikia
roirñau eaio. ⁵ Mia vonganei,
kiniou nojo yetano ea vio
nei, kiniou nebe yulu na
yetemeriba nei."

⁶ Yesu naio ber jibe na
bisi, ana naio buvulei ea
bulukievi na borotano, naio
monkorkor batove mila kitk-
iti titinio melmeloko jibe bu-
lukinia, karina naio bijan
ea toro neibano mirano be
juo. ⁷ Ana naio mil banio,
naio berinavo "Mo, jau ka-
vano, kavatove ea bulukuei
na Sailomo, kesekon batitig
bereio miramo."

Uei napano Yesu berkanio,
siano naio berenio "uei na
riila rivano." Ana toro nene
naio batove, mila jibe na,
mia mirano abinimej abo.
Ana naio binimej bereio
kean kumemi bija Yesu, na-
pano naio mijikia bitilubar
vite nonovio bo.

*Iliano telabo ka tivelinio
na merebono nei*

⁸ Ana iorou, nalo na
vaataro ka toro nei, bija
nalo nanua beamu amial
naio jomña miogiog, amial

naio bereio, mia aberenio aberinavo “? Merebono m̃a na naina p̃eli, napano beamu jom̃a miogiog sano janea vio dam̃ariga na, p̃eli na maka ve naio?”

⁹ Mia nalo tealo aberinavo “Nao, naio ga na,” a tealo aber “Ee, toro dolu ga na napano midu mirano,” mia toro nene naio ga berial meravo banlo, berinavo “Kiniau nene nei.”

¹⁰ Mia bogo napano berial naio banlo jibe na, ana abika denio, aberinavo “Jum̃abe ana miramo bo bereio jibe na?”

¹¹ Mia naio berdoṣelo, berinavo “Toro m̃a na Yesu, naio naruei miñaukanio. Naio mila kitkiti bulukinia telisu ea titinio, naio miaia jeleig miraku, ana naio berenio navatove ea uei na Sailomo, nese konio bulag den miraku bereio. Mia nemila ga jibe na, nabatove, nejekon miraku, namial jibe ka tinia miraku bo naruei.”

¹² Ana nalo abika Yesu denio, aberinavo “? Mia toro nene naio jo be vonganei?”

Naio berdoṣelo berinavo “Maka nejikia, maka bunu naialio.”

Varisis nalo aburubure jidomiano juo ka tivelinio na ielieliano nei

¹³ Ana iorou, aburu toro neibano beamu mirano bono ba ban Varisis nalo ka amijikia aialio. ¹⁴ Aburu naio ba jibe na bior napano legiano napano Yesu milarur toro neibano mirano eaio, naio be Legiano Lu tai, mia nalo aberinavo p̃eli Yesu

mila im̃auano tai napano tuboiano na legiano nei naio berbureio.

¹⁵ Telikiti napano abinimei aberial ka Varisis nalo, abika den toro nene, aberinavo “Mo, jau kija kala vonio ka kover jum̃abe ana miramo binimei bo.”

Ana naio ber ga jibe nei, naio berinavo “Maka, toro nene bijan bulukinia melmeloko telisu ea miraku, avona bisi ana nabano nejekon bulagio bereio ga, ana kiniau nemijikia nemial vite nonovio bo.”

¹⁶ Telikiti na Varisis nalo amijogio, tealo aberinavo “Toro nam̃a mila tena, naio mila jibe na naio maka rialerinio ea tuboiano na Legiano Lu. Jibe na naio maka taluvo den Atua rimei.”

Mia tealo dolu aberenio aberinavo “Peli ga, ver be riano ka naio be toro va tai napano mila korov tuboiano, jum̃abe ana naio mijikia mila burutomoluo novo nalo jibe na?” Ana nalo aberii jibe na bano-o, mila na ajua jidomiano juo biorio.

¹⁷ Ana nalo abika bereio den toro nei napano beamu naio mirano miunu, aberinavo “? Ana jau, jau na naruei napano naio miñauka miramo, mia jau kover venia tivelinio ea toro neibano?”

Naruei naio berdoṣe memedu ga banlo, berinavo “Naio be naverialiano riano tai.”

¹⁸ Naio ber jibe na, mia tomu nalo na tortoru na Ju nalo maka amonmonea

veriiano na, maka amon-monea ka beamu toro na mirano bono, vonganei naio mijikia jirarag. Karina abio karamāno a kenieno abe juo ka amei aialo.

¹⁹ Telikiti naljuo abinimei, abika denlo, aberinavo “Kuvitii vatitig toro na vonio. ?Nina be kenerimiu memedu, napano aberinavo naio miyotuba naio be merebono, ĩeli na maka ve naio? ?A ver be naio, juṁabe ana mirano binimei bo bereio jibe na?”

²⁰ Naruei aberdoĥe, aberinavo “Kumemi numijikia ka naio be kenerimemi, numijikia ka bogo napano nubario binimei bokar vonganei, naio be merebono batitigio. ²¹ Mia kumemi

maka nuvijikia juṁabe ana naio mijikia mial vite nalo vonganei, kumemi maka numijikia keinia napano mila mirano binimei bo bereio jibe na. Mia bo ka kamiū ga kuvika vonio, naio maka ve tete na, naio mijikia mil.” ²² Tom juo

na amil jibe na, ajuvan kija ga kialo jidomiano, bior ka napano tomu na tortoru na kulo Ju nalo aberiio ruei aberial ka toro kei napano naio rimonea ka Yesu be Naverikariano, mia avukular naio tusolo re bunu ea Atua kunuano lu.

²³ Aberial jibe na, na tomjuo nei amerou, mila aberinavo maka ajikia ga, aberinavo “Bo ka kamiū kuvika naio ga, naio maka ve tete na.”

ban toro nei napano be mere-bono

²⁴ Ana vaarakurano bereio, abio bere merebono nei nua naio binimei joomo keanlo. Naio ba joomo naruei amil jikili banio, aberinavo “Jau kover Atua na mave siano, jau koverial vite nonovio na be riano ga van kumemi, bior vonganei kumemi numileal ruei ka kema na naio be toro kirivova na lakoroviano na tuboiano.”

²⁵ Ana toro nei naio berdoĥelo, naio berinavo “Naio be toro na bo ĩeli maka ve toro na bo, kiniou maka nejikia. Vite takurano ga na kiniou nemijikia, jibe ka. Nua beamu, miraku bono batitigio, mia vonganei kiniou nemijikia nemial vatitig vite nonovio.”

²⁶ Mo nalo abika aberinavo “? Mia ver tibe na, naio miṁau kaso juṁabe? ?Naio mila batitig miramo juṁabe?”

²⁷ Ana toro nei berdoĥe, berinavo “Kiniou neber bisivisii vatitig bo vite nonovio ban kamiū vaarakurano ruei, mia kamiū maka kuvisidom kuvijogio, ana vonganei kumisidom kuvi-jogio bereio. ?Kar venia? ? Peli tiniemiu jii ka kamiū bunu kumei kuve kiano naiagagoano nalo na?”

²⁸ Naio ber jibe na, jibe ka naio miyotel ealo kija telisu, mia nalo tiniei jer ṁelea naio, amil jikili banio, aberinavo “!A! Jau ga kove kiano naiagagoano, kumemi nube naiagagoano nalo na

Varisis nalo amil bereio

tormoruo lu Mosis kiano.
²⁹ Mosis nei, kumemi numijikia batitigio bo ka be riano ka Atua berial kiano iliano nalo banio, mia tivelinio ka toro dolu na, kumemi maka nuvijikia naio, ka naio be toro na vio be p̃eli na naio binimej jum̃abe.”

³⁰ Naruei toro nei naio berdope, naio berinavo “! Tomnei, kiniou nemiilo va ka kamiu ka napano maka kuvijikia naio! Naio joṃa mila buruṃara iṃauano nalo jibe na, banbano-o na naio mila batitig miraku, mia kamiu maka kuvijikia ka naio be kei p̃eli na naio be toro re be. ³¹ Kito romijikia ka ver toro va naio rivio van Atua, mia Atua maka rijikia riagago kanio, mia ver toro na be toro naṃa milotu ka naio a napano joṃa mijogkario, ver naio rivio naio, mia naio riagago kanio. ³² Mia toro nene, Atua joṃa miagago ka naio, bior jikar ea tikariano na yetemeriba nei binimej bokar vonganei, maka lele aial toro tai rilarur bereio toro napano naio miyotuba mirano bono. ³³ Kema na naio monoka jaluvo ea Atua ga binimej ea vio nei, ver p̃eli naio rijikia re rila vite tai leleio tibe na.”

³⁴ Mia maka lele asaaro ka napano toro nei mil banlo jibe nei, aberinavo “Tomnei, jau, jau toro kiriniagiago laka. Jau komiyotuba bija bajago na kariano ga, binimej bokar vonganei. ? Mia jau kobe kei koberiaṃa komijikia koverloglog

kumemi bereio, ee kamali?”

Amil niegeniege naio banbano-o na, amijil lar naio batavio bereio.

Toro merebono nei naio balea Yesu

³⁵ Mia maka vesiou Yesu naio mijog ka napano amijil lar tete nei jibe na, mia ba milealio, bika denio, berinavo “?Jum̃abe? ? Vonganei jau komonea Kulinio Kenerinio ruei p̃eli makan vo?”

³⁶ Mia toro nei naio bika den Yesu, naio berinavo “? Ana naina kober na, naio be kei? Ver jau komijikia koverialio ka kiniou, mia nemijikia nomonea naio ga.”

³⁷ Ana Yesu berdope, naio berinavo “Jau komial naio ruei, jau komial naio vonganei. Kiniou ga nene nei, naṃa nojo nemil bijaso nei.”

³⁸ Ana naio berdope, berinavo “Aiou Tubo, ver tibe na, kiniou nomoneaso vodolu.” Ana toro nei jidel dolu ka miaia Yesu.

Yesu mil ban Varisis nalo

³⁹ Ana na Yesu mil, berinavo “Kiniou nebinimej ea yetemeriba nei ka nevitii tomu nalo, ka rila meravo ka tomu nalo naṃa abe merebono, amijikia aial vite, a ka tomu nalo naṃa aberiaṃa amijikia amial vite, ajikia ka abe merebono ga.”

⁴⁰ Mia Varisis tealo aju vaataro ga, amijog iliano nei, abika den naio aber “? Ana jau kober kumemi bunu nube merebono a?”

⁴¹ Ana Yesu berdope, berinavo “Ver ve riano ka kamiu kuve merebono naio bo ga,

kamiu kuvijikia re kuvar vironiano riviorio. Mia bogo napano kumituña kuberinavo kamiu kumijikia kumial batitigio vite nonovio, burumñara beleano na joa kamiu ruei.”

10

Jamerijiano na burusio na nunu nalo

¹ Ana Yesu naio mil lie vo, naio berii jamerijiano tai banlo, ka tivelinio na burusio na nunu, napano ajumña amimñau vei ka napano mia nunu na tomu ve telabo kialo amijikia atu amon jouro eaio. Naio berenio jibe nei, berinavo “Kiniou neber be riano ka kamiu, ka toro namña maka selia morouo ka riva jouro ea burusio na nunu nalo, mia naio mijaloa burusio, toro na jibe na naio be toro va na vinauano ga. ² Mia naio napano mña jeljel ea morouo namñariga memedu, naio naruei be toro na be riano na bitikar nunu. ³ Ver adu toro tai to ka mña riviti kuku ka morouo, mia bogo na toro na bitikar nunu rime, mia morouo mijikia rivetavo ga ka naio, mia bogo napano naio ba jouro, nunu nonovio abiniu amijog joono, mia naio bio nalo na ga abe kiano sialo, mia nalo nei ga ajumolu, naruei naio jukamu kalo abava tavio. ⁴ Telikiti napano naio jukamu kalo abatavio bisi, naio miel jukamu kalo, ana nalo amiel iorou ka naio

abano, bior ka napano amijikia vatitig joa na joono. ⁵ Nalo maka ajikia ala tibe na ka valauo tai, mia nalo amerou ga kanio, bior napano amijog lubar dede joa na toro dolu joono.”

⁶ Jamerijiano nei Yesu ber kalo, mia maka ajikia yati nene.

Yesu ber naio be morouo na burusio na nunu

⁷ Jibe na, mia Yesu mil lie vo banlo ea tivelinio na burusio na nunu, naio berinavo “Kiniou neber riano ka kamiu, ka morouo na burusio na nunu nalo, kiniou nene nei. ⁸ Kulo dolu namña abinimei jukamu ka kiniou, namña amila sibi aber mia avitkar vatitig nunu nalo, abe tomu kirivova na vinauano ga, a bogo namña aba amiyotuba ka nunu nalo, nunu nalo maka ajogilo. ⁹ Kiniou ga nebe morouo na burusio, toro na rime, selia kiniou ga, mia kiniou nevitikar vatitig kiano meuliano. Mia naio mijikia rivatavio ka sirago sano sinaniano, karina mijikia rime, rimon jouro ka bogiano, naio mijikia rime, rivan tibe na rivu ga. ¹⁰ Toro na vinauano naio binimei ka rivuru bulag bena nunu, peli na rue binvinlo amñarmñaro, peli na ka rila lelanlo ve toru ga, mia kiniou nebinimei ka ajikia avokar meuliano, ka amijikia asaaro ka meuliano tai napano rivu laka rivanlo.”

Yesu naio berinavo naio be toro na vitikariano na bo na nunu nalo

¹¹ A Yesu ber bunu, naio berinavo “Kiniou nebe toro na vitikariano na bo na nunu nalo. Toro na bitikar batitig nunu nalo, naio monoka saaro ka rijamo ka kiano meuliano ka rilarur nunu nalo kialo meuliano.

¹² Ver toro na imauano ga tai, naio maka rijikia rivitikar rivu nunu nalo tibe na, naio maka tinien tiilo tibe na, bior maka ave kiano nunu nalo. Ver bogo tai naio rial burumara kuli deden amei rivior nunu nalo nei, mia naio rimerou ga, naio tumolu rivuro, naio tuvan nunu nalo atubo ga, naruei mia kuli deden nalo nene abinimej ajer lo ana amlabulag lo, ana amjilo aburo aba dedade. ¹³ Toro nei buro den nunu nalo jibe na, bior naio be toro tai napano mimauka kiano veru ga, mia naio maka rialerinio ea nunu nalo leleio.

¹⁴ “Mia kiniou, nebe toro na nabitikar batitig bo kiaku nunu nalo. Kiniou nemijikia batitig bo nalo napano abe kiaku, a nalo bunu amijikia batitig kiniou bo. ¹⁵ Kumemi numijikia batitig kumemi javukia napano kumemi juo Teta numisidom batitig kumemi juo bo. A kiniou tinieku jii kiaku nunu nalo bare ka najamo ka kiaku meuliano riviorlo. ¹⁶ A kiaku nunu dolu nalo miroano napano aju bunu, napano maka amei atu jouro ea kiaku burusio nei vo, naruei kiniou monoka novio nalo bunu, mia bogo na ajog

jooku, mia amei. Mia kiniou nala tibe na-o mia kiaku nunu aviniu amei ave burukuti ve takurano ga vija kiniou, kialo toro na vitikariano na toru nene.

¹⁷ “Rivano-o mia kiniou najamo ka kiaku meuliano riviorlo, naruei mia karamaku naio saaro ve toru ka kiniou kanio. Mia nemijikia never bunu ka kiaku meuliano nei napano ver nesian rivano, mia nodu bereio. ¹⁸ Vere toro dolu tai napano mia rudular kiaku meuliano nei den kiniou, mia kiniou ga takurano nemijamo kanio. Be kiaku ga nesian rivano, a be kiaku ga ka mia nodu bere rimej. Ka noimau tibe na, Teta ga mije monea kiniou.”

¹⁹ Ana bogo tai bereio, Yesu kiano iliano na jibe nei mila na kulo Ju nalo aburuburelo ea jidomiano juo bereio. ²⁰ Telabo kalo aberinavo “Simaroba ga joa naio, kema na miavovu tanea na! Kuviagago ka re naio!” ²¹ A tivelinio dolu aberinavo “Makanio, kiano iliano na bo nalo na maka ave iliano na toro napano simaroba toa naio. ?A mia tumabe, mia simaroba naio mijikia rilarur merebono binimej rivu bereio jibe ka napano naio mila ruei na?”

Yesu berial naio batitig bo ban kulo Ju

²² Ana ea bogo na be bogo na jokoluolu na toru bereio, mave yako Yerusalemo. Jokoluolu nei abio ka Jokoluolu na Aioko Vatitig

Atua Kunuano Lu, a ajumã amilaio ea bogo na niavo. ²³ Yesu bunu ba joa jokoluolu nene, ana bogo tai miel ban ea burumãara m̃arsup̃iki nei namã abio ka Solomon kiano Marsup̃iki.

²⁴ Naruei tomu na tortoru nalo na kulo Ju napanoaju, abinimei amivonlo jeliuiv ea naio, abika jikili denio, aberinavo “Bogo jio ru ei kumemi numisidom nuu- jikia vatitigso ka jau kobe kei, mia jau komila lukuaso ka kumemi mia! Ver jau kobe kenememi Naverikar- iano riano, kumemi nu- misidom ka jau monoka koverial vatitig rimeravo riu van kumemi vongan ei.”

²⁵ Ana Yesu berdoŋe, naio berinavo “?Ana kiniou neber batitig bo ban kami ru ei, ŋeli na makanio? Kiniou neber ka kami ru ei mia maka kumonea ga. A burumãara imãuano nalo napano m̃a nemilaio ea karamãaku siano, jibe ka napano kami kumitumã kumialio ru ei, nalo bunu abisikon kiniou jo me- dave bo ka kami, ²⁶ mia naina bunu kami maka kumoneaio. Peli nina bior kami maka kuve burukuti na kiaku nunu nalo. ²⁷ Kiaku nunu nalo amijog lubar joa na jooku, a kiniou nemijikia batitiglo abiniu, a nalo ajumã ajakisior kiniou. ²⁸ Kiniou nojomã nejian meuliano nei napano maka ve jukuti nene banlo, ka mia ava kovio deio, a ve re toro tai napano mijikia rivuru bulaglo den jumãaku. ²⁹ Nina

bior napano karamãaku naruei napano naio jianilo ban kiniou, a naio jikili lie jovulu tomu dolu nalo nonovio, mia maka ve toro tai napano rijikia rivuru bulagio nunu nalo nei den jumãano. ³⁰ Nao-o, kiniou bija Teta kumemi juo nube takurano.”

Kulo Ju nalo tiniel jer Yesu

³¹ Mia bogo napano Yesu ber iliano nei bisi, ana tomu na tortoru na kulo Ju nalo tiniel jer naio bereio, abar puruveru ninio ga ajidom atuba ka naio rimãaro. ³² Yesu mialio, ana mil banlo, bika ber “? Kiniou namila burumãara imãuano telabo na bo na Teta naio jidomio ka nala ea miremi ru ei, ana kami kumisidom kuvituba kiniou tibe na bior na vabe kalo?”

³³ Ana nalo aberdoŋe, aberinavo “Maka, kumemi nuvisidom nuvitubaso, maka rivior imãuano na bo tai, mia bior napano jau kojomã komila niegeniege laka ka Atua siano lu, ka napano jau, kobe toro ga, mia damãariga kojomã komila von ka kalaso kotibe ka Atua garuei.”

³⁴ Ana Yesu berdoŋe, naio berinavo “Ea kiado Niosi Lu, Atua kiano iliano tai joa Niosi na Iouano, napano naio mil ban kulo Israel, naio berii jumãabe abe kener- inio, ana naio mil jibe na banlo, naio berinavo ‘Kami kumitibe ka atua nalo ga.’

³⁵ “Tibe na, ea vio nei kito romial napano nalo napano

Atua kiano iliano nene ban ealo, abe kulorinio ga nalo, mia iliano nei berinavo nalo abe atua nalo, a iliano nene naio be kiado vivitauiano lu tai, naio monoka ve riano ga. ³⁶ Atua naio berii kiano tomu nalo jibe nei ruei, ana mia jumabe ka kiniou, napano kiniou ga takurano naio mioa kiniou miila kiniou nebinimeia ea yetemeriba nei? Memedu ga ka neverenio ka naio be Atua karamaku, a kiniou nebe kenerinio, a mia kamiu kuber maka rivu ka naber jibe nei. Mia kamiu kuber nojomā namila niege Atua siano lu, mia maka tibe na. ³⁷ Ver be riano ka kiniou nojomā nomimau maka ve karamaku kiano, mo, kamiu kumonea re ana bo ga. ³⁸ Mia ver kiniou notomā nala kiano imāuano nalo, pēli mia kumonea kiniou pēli na kamiu kumonea re kiniou, mia kamiu monoka kumonea kiaku burutomoluo nalo, ka abe Atua kiano burutomoluo riano. Ver tibe na, mia kamiu kuvijikia kuvitilubar ka Teta naio joa kiniou be riano, a kiniou nojoa naio.” ³⁹ Yesu naio ber jibe na kalo, mia kialo jidomiano nalo kirisikili bare damariga. Amila von ka avokar sikili naio bereio, mia amiilo ka napano naio jaluvo iviso denlo bano.

⁴⁰ Naruei Yesu naio jaluvo Yerusalemo, barkor uei na Yortano nei ba tivelinio ea vio nanua Jone Baruei

naio baruei ea tomu nalo. Naruei Yesu joa vio na kirisioi kija, ⁴¹ mia tomu nalo ajumā abinimeia ka naio damariga. Abinimeia, aberii Yesu aberinavo “Jone nanua na naio maka rila burutomoluo tavukia namā kema nei naio jomā milaio, mia naio jomā berial vite telabo ea tivelinio na naio, naruei kito rojumā romial ka mirado ka napano vite nonovio napano naio berenio na ajumā abinimeia be riano ga.” ⁴² Naruei kialo jidomiano jibe na mila napano nalo telabo ea vio nei amonea Yesu.

11

Tukunu na Lasaros

¹ Mia bogo napano Yesu naio jo laka kia ga vo, mieiano na jikili tai binimeia bokar kiano bilbilu tai, napano naio be Lasaros. Naina be Lasaros napano kuviviniene juo be Mere naio Marita, a nalo tolu nei tena komeli na telisu na Betani vaatara ka Yerusalemo. ² A Mere nei bunu napano iorou, naio miyon bonotanunu ea Yesu, naio miolkon jaano nalo ka vijinio. ³ Mia bogo napano kuviviniene juo nei amial ka kumanelo na mōaro naio mie toru jibe na, amiila toru ka Yesu, aberinavo “Tubo, kiamo bilbilu mā na jau tiniemo eaio, naio mie laka.”

⁴ Ana bogo na iliano nei binimeia bokar Yesu, naio maka rivano, mia naio ber

ga, berinavo “Kiano mieiano na maka ve tena m̃ariano, mia mieiano na naio jibe Atua kiano m̃arabo tai ga, ka naio riverial kiano mermerano, a ka riverial kiano burum̃ara moroano na jian ban kiniou Atua Kenerinio.” Yesu naio ber iliano na, jibe na ka naio mijikia vite na mia naio rilaio.

⁵ Yesu tinien jii Marita toru laka bija kulueno na telisu a kum̃anelo nei, a naio mijog bova toru kalo, mia maka rimonloglog bogo na tenei vo.

⁶ Jibe na, mia naio maka rivan vo, naio jo bere legiano juo ea vio nei ea marauei na Yortano tivelinio bano. ⁷ Naio jo bere bogoti juo jibe na, bisi ana naio ber ka kumemi kiano naiagagoano nalo, naio berinavo “Kito m̃a, ravarkor ravan bere ea tanobuku na Yortano.”

⁸ Mia kumemi numitu tiniememi maio ka kia ga vo nanua tom na tortoru na kulo Ju nalo na ea tanobuku nei taniel jer m̃elea Yesu, mila na numerou ka nuvan bereio. Naruei nubika den Yesu, nuberinavo “? Naverloglogiano, jum̃abe? Vonganei ga napano kito roju yako, kulo Ju nalo amila vio toru laka ka ajidom atubabinso kam̃aro, mia vonganei ana jau koberinavo mia kito ravan bereio.”

⁹ Ana Yesu naio ber ka kumemi naio berinavo “Kia ku verdopeiano ban kamiu naio jibe nei: Ea legiano, ea aura duelimo ba juo nene, burum̃ara inio mereralii vio, mila na toro mijikia miel bo,

maka tom̃a rijorjoru taatei. ¹⁰ Mia toro napano mila von ka riel ea melijokouo boganio, mia naio to rijorjoru, bior napano inio nene maka bunu mereralii kiano m̃arabo.”

¹¹ Yesu naio ber iliano nei ban kumemi, berial ka naio mijikia riel rivu ga, maka jikia vite tai na bova eaio, vano-o vokar bogo na Atua berkar ruei ka mia ajikia auebinio. Naruei naio jusol bereio, berinavo “Kiado bilbilu neibano naio monmelio ruei. Vonganei, kito ravan ka novio bonio.”

¹² Mia kumemi naiagagoano nalo maka nuvijikia lubar nioti na iliano nei, naruei nuberinavo “Tubo, ver naio monmelio ga, nina bo ga na, mia naio rijog rivu bereio ga.” ¹³ Nuber jibe na bior ka napano numitu nuberiaña Yesu naio ber ka Lasaros naio mijilimebi ga, mia Yesu naio ber Lasaros kiano m̃ariano.

¹⁴ Naruei Yesu berial meravavo ban kumemi, naio berinavo “Lasaros naio m̃aro ruei, ¹⁵ bior bogo na naio mie, maka noto vijalo. Mia jibe na kiniou nemial mia rivu ga, p̃eli rivu lie van kamiu, bior kiano m̃ariano na mia rimeĩ tibe ka kene-miu buluvio tai, ka kuvijikia kumonea kiniou ve riano. Mo, kito ravan eaio.”

¹⁶ Mia kumemi naiagagoano nalo numitum̃a numerou ka nuvano, naruei Tomas m̃a na abio naio ka Tomas Savoro, naio ber ka kumemi, naio berinavo “Kamiu kuvitumolu, kito

roviniu ravano, kiado Tubo naio jidom riva riñaro tibe na, bo ka kito rovinu ravano, rañaro vaarakurano kitoliko naio.”

¹⁷ Naruei kumemi nubiniu numiel nubano, nubano numiyotuba ea komeli telisu na Betani. Ana aberial ban Yesu ka amidu Lasaros taati monea buluvae bogoti ver barlaka ruei. ¹⁸ Mia komeli nei Betani naio jo vaataro ga ka komeli labo nei Yerusalemo, titai jibe ka kilometa tolu ga, ¹⁹ mila na kulo Ju nalo na Yerusalemo nalo telabo, bogo na amijog mñariano nei, tiniel miia Marita naljuo Mere toru, naruei abinimei ka ateg naio vijalo. ²⁰ Mia Marita naio jo naliko, ana amiila toru binimei ban naio aber Yesu binimei joa mñarabo ruei, naruei naio jumolu ban ka rivan jumano naljuo naio. Mia kuluene neibano telisu Mere naio jo joomo ga ea yimo, a naio maka rivatavio. ²¹ Mo Marita, naio binimei mial Yesu, naio berkanio, berinavo “!Kanku Tubo liki, ver jau komei ea vio nei ga, mia kumñanememi riva kovio re na! ²² Mia kiniou nomonea ka be kurano ka napano naio mñaro, mia venia na ver jau kovika den Atua, mia naio rijamo ka ga vanso.”

²³ Ana Yesu berkanio, berinavo “Marita, mia kumñanemo naio tumolu rimeul bereio na.”

²⁴ Naruei Marita berdoñeio berinavo “Ee, kiniou nemijikia nina, nemijikia ka mia rimeul bereio ea buruñara

tumoluano bereio ea legiano na maaro.”

²⁵ Ana Yesu berial iliano nei kanio, naio berinavo “Kiniou nebe mñarabo na tumoluano bereio, kiniou nebe burupati na meuliano. Toro na rimonea kiniou, buriakurano naio monoka riñaro ea yetemeriba nei, mia naio rimeul bereio. ²⁶ Toro napano rivokar meuliano nei, a viekouoiano ea kiniou toa naio, naio mia rivokar re mñariano bogo tai. ?Marita, jau komonea jibe na a?”

²⁷ Ana naio berdoñe, berinavo “Aiou, Tubo, nomonea. Kiniou nomoneaso, ka jau kobe Naverikariano, jau kobe Atua kenerinio, jau kobe naio nañña aber jikar beamu ruei ka mia rimeu rilarur tomu nalo na yetemeriba nei.”

Yesu, jogumirano jibirbili

²⁸ Telikiti na Marita ber jibe nei ka Yesu avona bisi, ana naio milivi joomo bereio, ban ka kuluene nei Mere, mijuvaluva banio, berinavo “Naverloglogiano nene, naio binimei ruei, naio joa mñarabo yako, naio jidom rialso beamu vo.”

²⁹ Mere mijogio, naruei jumolu vaarakurano, jidom ka rivatove ka rial Yesu, ³⁰ nina rove ea mñarabo napano Marita mial naio ruei eaio, bior ka napano naio maka rimeu jouro ea komeli vo. ³¹ Mia kulo Ju nalo napano aju bija Mere joomo amial ka naio jumolu soñeli jibe na batavio, naruei be tinielo ka naio jidom

riva teg bereio ea buluvae, naruei nalo bunu ajumolu ajakisorio.

³² Ana Mere naio miel binimeï bokar vio na Yesu joaio. Ana bitikario, binimeï vaataro kanio, buku naio mijoru ea jaano, jegi banio, berinavo “!Tubo, ver jau komei ea vio nei ga, mia kumãneku riva kovio re na!”

³³ Mia naio jomã jegi jibe na, a kulo Ju dolu nalo napano mĩa ajakisorio, nalo bunu abinimeï ajumã ajegi. Mia telikiti napano Yesu naio mial Mere nalo kialo burumãara jogvaiano nei, naio bunu mijog bova, mijog tenei jibe ka temi laka ea kiano iviso, ³⁴ ana naio bika denlo, berinavo “? Kamiu kumidu naio mon be?”

Ana nalo aberinavo “Tubo, jau komei rava raialio.”

³⁵ Mia Yesu mijogio jibe na, mila jogumirano jibirbili.

³⁶ Mia nalo amial ka naio jegi jibe na, tealò aberinavo “!Ierinio, naio tinien jii tanea kiano bilbilu nei, naruei naio tinien miiãio mia tinienmiiãio!” ³⁷ Mia tealò dolu nalo, aju abivika denlo, aberinavo “Toro na naruei nanua beamu naio mila na merebono mirano binimeï bo bereio. Peli vere-nio naio sidom, naio mijikia rila ka napano kiano bilbilu naio maka rijikia rivakovio ga p̃eli?”

Yesu naio biobon Lasaros jumolu den m̃ariano

³⁸ Mia Yesu naio miel ban bija burumãara jogvaiano nei, naliko Mere nalo aba amiyotuba ea buluvae

napano Lasaros taati mon eaio. Bulukuveru nei naio be buluvae tai, napano amidu burumãara puruveru tai joko buluku tavo nene. ³⁹ Ana Yesu naio berinavo atubonlar puruveru na toru nei.

Mia Marita naio mijog Yesu ber atubonlar puruveru, mia naio jidom riverbureio, ber kanio, berinavo “Tubo, maka rivu ka rala tibe na, bior naio m̃aro bogoti ver barlaka ruei, mia bonoti rivova laka na.”

⁴⁰ Ana Yesu berdope banio, berinavo “? Ee, jau maka koto tiniemo rimaio vo ka kiku iliano nei napano neber ka jau ruei? Kiniou neber ka ver jau komonea ga, mia keial moroano na Atua kiano naio rimãu.” ⁴¹ Ana ajidel ka ga, ajubonlar burumãara puruveru nei, bisi ana na Yesu naio jirarag bavin mave, naio bolkouo, berinavo “Teta, kiniou neber siva toru banso ka napano jau kajaaro ka mĩa komijog kanaku valeiano nei.

⁴² Kiniou nemijikia ka venia napano ver kiniou nesidom nevika denso, mia jau kojogio ga. A vite nei mia kiniou nevika denso vonganei, nebika ea tomu nalo nei ajumol aju miralo, ka nalo bunu ajikia ajogio. Naruei ver aial ka napano mia jau koverdope rivan kiniou tibe ka na nobikanio, mia rijikia rijailo ka amonea ka be riano ka napano jau naruei komiila kiniou nebinimeï ea yetemeriba nei.”

⁴³ Mia telikiti napano Yesu bolkouo bisi jibe na, ana naio bio jikili jibe na ba ban naio berinavo “Lasaros, jau kotumolu komei tavio.”

⁴⁴ Naruei amiilo ka napano toro na m̃aro nei naio jumolu miel binime i tavio, bija kulum̃arauo napano abiviko ka naio, napano m̃a ajum̃a ajarakii lele gorogoro ea jum̃ano a jaano a parinio kia ga vo. Naruei Yesu naio ber kalo berinavo “Mo, kami u kuvijubar bulag kulum̃arauo nalo nei denio, ka mia mijikia riel rivu bereio.” Ana nalo amilaio, naruei Lasaros naio meul bo naio jo naliko bereio.

Komeli na toru naio birok̃ar ka monoka auebin Yesu rim̃aro

Mataiu 26:1-5; Mak 14:1-2; Luka 22:1-2

⁴⁵ Mia kulo Ju nalo telabo napano ajakisor Mere abinime i ea bulukuti puruveru nei, telikiti napano amial ka napano Yesu naio mila Lasaros meul bereio jibe na, amonea batitig naio bo. ⁴⁶ Mia nalo tealo maka amoneaio, aban bereio, aba amial Varisis nalo, aberial kalo ka venia napano Yesu milaio. ⁴⁷ Ana telikiti na amijogio, maka lele asaaro kanio, naruei nalo bija tomu na tortoru na kulo lu nalo, abio nalo dolu na burum̃ara komeli na kulo Ju abinime i vio takurano. Naruei telikiti napano abinime i vio takurano bisi, aberial kalo aberinavo “?Mia kito rala venia ka toro nei naruei? Naio jom̃a mim̃auka

burutomoluo na tortoru telabo janea vio ea kiado tomu nalo miralo. ⁴⁸ Ver kito roverbure re naio, mia naio rila tibe na rivano-o mia ve re tai napano mia rimonea naio, mia naio rivuru nonovlo atakisor naio ga. A ver nalo na mira na vio Romo aial tete na naio jom̃a mila von ka rila naio rime i rive navurim̃araboiano na toru tai tibe na, mia ala siniabu ka kito kulo Ju rovinu. Mia amei ala mira ka kito-o mia auelar kiado taara kito rovinu vija kiado Atua kunuano lu.”

⁴⁹ Ajum̃a aber jibe na, mia kialo navurim̃araboiano na toru nei Kaivas, napano ka yuka nei naio bokar sio na Parinio Toro Lu, naio ber kalo, berinavo “?Tomnei, bior venia ana kube vovu jibe na, ka napano maka bunu kuvijikia ka mia kito rala venia ka toro na? ⁵⁰ ?Venia naio bo ka kami u? Bo ka napano toro na ve takurano rila kito rovinu rava kovio, p̃eli na bo ka naio ga ve takurano rim̃aro ka rilarur meuliano na kiado taara rovinu?” ⁵¹ Mia ea bogo napano naio ber iliano nei, beriam̃a jom̃a berial kiano jidomiano ga. Atua mila naio bokar im̃auano na Parinio Toro Lu ka bogo na, mia Atua kiaga vo naio midu iliano nei joa kiano jidomiano ka naio riverial ilirianiano tai, ka ver Yesu naio monoka rim̃aro ka rilarur tomu nalo kialo meuliano aviniu. ⁵² Naio maka rijikia, mia naio jo berial ka iorou kanio, telikiti napano mia

Yesu naio riñaro, mia naio maka riñaro rivor taara na kulo Ju nei ga, mia kiano mñariano nei naio kario Atua kenerinio dolu nalo napanoaju janea buruvenuo dolu bunu, ka mia rivuru birovionlo aviniu amei ave mñaratavo ve takurano.

⁵³ Mia ea bogo na, Kaivas naio berial iliano nei, naio buru tomu na tortoru na kulo Ju nalo kialo jidomiano nonovio naruei, ka Yesu monoka riñaro ga. A jikar ea bogo na, ajumña aberii damñariga, ka mia ajikia ala tumñabe. ⁵⁴ Mia kialo jidomiano nei mila na Yesu maka bunu rijikia rieliel iviso ka tomu nalo na tanobuku nalo nei na Yutea, ana naio buru bulag kumemi nubano numitua komeli na telisu tai, siano Ivraem, napano naio jo yako ea tanobuku napano vaataro ka vio teauo.

Vaataro ka bogo na Jokoluolu na Sidomkariano na Ioruriano na maaro na Yesu kiano

⁵⁵ Naruei be vaataro ka bogo na jokoluolu na kulo Ju nalo kialo, napano be Jokoluolu na Sidomkariano na Ioruriano. Ana kulo Ju nalo napano ajua tanobuku dolu ninio, ajumña ajuvan kialo vio nalo abavin Yerusalemo, ajidom avan ea Atua kunuano Lu, amila sida na meravoiano nalo ka mia ajikia ameravo ea Atua mirano beamu vo, karina jokoluolu naio tikario. ⁵⁶ Telikiti napano tomu nalo nei ajumña abavin

ea Yimo Lu, ajumña amila von ka ajirag Yesu-o mia maka alealio. Ana ajumña abivika denlo, aberinavo “? Ee, kamiu kuber venia? ? Mia ver naio riyotuba ea jokoluolu nei, ðeli na naio rimei re?” ⁵⁷ Naruei parinio kulo lu nalo bija Varisis nalo, nalo bunu ajumña ajidom ka ðeli mia Yesu rilavon ka riyotuba ea bogo nei. Naruei nalo aberial jikili ka ver aial Yesu to kovio na, monoka ala iliano rimei ealo ka amijikia amei avokakar naio sikili.

12

¹ Mia telikiti napano Jokoluolu na Sidomkariano na Ioruriano nei naio maka vo, bogoti ari ju, ana kumemi liko Yesu nubano nubokar bereio komeli na telisu nei Betani. Naruei nubano numiyotuba bereio ea Lasaros kiano vonuo, naio napano Yesu nanua mila meul bereio den mñariano maka vesiou ga. ² Kumemi numitu bijalo jibe na bano-o, ana nalo nei aber ajidom ala Yesu sano sinaniano tai. Ana telikiti na amila batitig vite nalo biniu, kumemi nubinimei numitutano, Lasaros bunu jotano bija kumemi, naruei kuviviniene nei Marita naio jomña barvar simemi sinaniano binimei. ³ Naruei Lasaros kuviviniene dolu nei Mere, naio bunu jo, naruei naio midu burumñara pati bonotanunu tai binimei, napano jibe mñatei, napano kidi nene bavin laka. Mo

naio miduio, naio binime
vaataro ka Yesu, naio
mionio jelele Yesu jaano
nalo. Karina Mere nene
bar burutitili vijinio, naio
miolkon bereio, mia maka
vesiou, bonoti bonotanunu
novo nei janunu misono
batitig vio joomo ea kunualo
nei.

⁴ Ana ka bogo na, Yesu
kiano naiagagoano napano
iorou kanio ana naio
jiveluku ka naio, Jutas na
Kariot, naio bunu jo mial
vite nei. ⁵ Naio berinavo
“? Bior vaio ana maka
aṽilivililar ka buruṽara
bonotanunu nei ga? Ver
tibe na, amijikia avokar
buruṽara veru tai tibe ka
veru na iṽauano na yuka ve
takurano ka rijai talimasa
nalo. !Mila kule ga na!”
⁶ Naio ber jibe na, mia
naio maka sidomial talimasa
nalo. Naio ber jibe na bior
naio naruei joṽa bitikar
kenememi basaro na veru,
a joṽa bina kanio, joṽa jen
kenememi veru, mila naio
be viti bunu ka veru na
bonotanunu nei.

⁷ Mia Yesu berdoṽe ve-
nia napano Jutas berenio,
naio berinavo “Ee, maka
rivu ka jau keil niegeniege
kuviviniedo tibe na. Naio
mila jibe na ban kiniou bior
napano naio jo jidom ṽelea
ka napano bogoti na mia
navan ea buluvae jo binime
vaataro laka naruei. ⁸ Mia ve
talimasa nalo atu vija kamiu
bogo nonovio, ka mia kamiu
kumijikia kuvijailo tibe na,
mia ka kiniou maka ne-
jikia noto vija kamiu bogo

nonovio, mia venia napano
naio milaio ban kiniou von-
ganei naio bo bo laka mia.”

⁹ Ana maka vesiou, lilia-
niano naio ba bokar tomu
nalo napano aju amidu
bijiilo yako Yerusalemo bior
jokoluolu, ka vonganei Yesu
naio binime jo Betani ruei.
Mo nalo abatavio ka aialio, a
maka ve naio ga, mia ajidom
aial Lasaros bunu, nanua
Yesu mila naio meul bereio
den ṽariano maka vesiou.
¹⁰⁻¹¹ Tomu nalo aju aba amial
Lasaros jibe na bisi, a venia
napano Yesu mila banio mila
napano nalo telabo kalo, ba
bokar kulo lu na kulo Ju
tealo, aburo ajuvan kialo
navurimṽaraboiano dolu
nalo abinime amonea Yesu.
Ana ka tena, tomu na tortoru
na kulo lu aberio, abirokar
ka mia aleal ṽarabo tai ka
ajikia auebin Lasaros rimaro
bo.

*Yesu naio binime boru ea
vio nei Yerusalemo*

*Mataiu 21:1-11; Mak 11:1-
11; Luka 19:28-40*

¹² Mo Lasaros nalo amila
Yesu sano sinaniano nei bisi,
ana ka legiano dolu nene,
iliano ba bokar buruṽara
tiniobi nei napano aju
Yerusalemo bior jokoluolu,
ka vonganei Yesu naio jo
binime ruei. ¹³ Mo tomu
nalo amijogio, ana nalo
ajumolu aba aje ṽaṽali
nalo, abarkakar ka juṽalo
nalo amiel abadigdig aba
ṽavio ka aviviuo naio ko
ṽarabo.

Ajidom ka ala rivan naio
tibe na ka napano naio rime
ve kialo parinio tubo, naruei

nalo aba tavio jibe na, ajumã abiovio, aberinavo

“! Bo mia bo laka! ! Kito ravamenea naio, be kido parinio tubo vou na Israel!

! Atua sofi, jau keilivu ka naio napano binimeia ea siamo!” Iouano 118:26

14 Ana Yesu naio jo miel binimeia, naruei milalo aburu kirikiti togki tai binimeia banio, ana naio jotano eaio miel binimeia. Vite na napano naio mila na naio jakii memedu iliano na iliano Lu tai napano berinavo

15 *“Kamiau kulo Yerusalemo nalo, kamiau kumerou re bunu.*

Kuvialio, vonganei kenemiu parinio tubo naio jo binimeia ea kamiau naruei.

Naio joa kirikiti togki ga tai naio jo binimeia.” Sek 9:9

16 Ana ea telikiti na, kumemi naiagagoano na Yesu kiano, kumemi maka nuvisidomial iliano na, mia iorou, telikiti napano naio bavin mave bisi, kumemi nubitilubar ka iliano moruo re nua nei naio berial naio memedu, ka napano naio mila vite nonovio memedu ga ka venia namã Vivitauiano Lu aberialio beamu ka mia Naverikariano naio rilaio.

17 Naruei tiniobi toru nei aju aborvorua Yesu jibe na. Nalo miroano napano naniovo ga aju bija naio telikiti na naio bio Lasaros meul bereio den mãariano, ana

aba aberial burumãara burutomoluo nei ban nalo dolu nalo. 18 Mia telikiti napano kulo dolu nei amijog burutomoluo namã Yesu milaio, nalo ajidom aial naio, naruei abinimeia bunu ka ava aviviuo naio. 19 Ana nalo nonovio nei, abe burumãara tiniobi ruei, mia bogo napano Varisis nalo amialio, amijog bova, ajubar parilo, aberinavo “Kito romila vio ka kema nao-o mia bova ga. Naio jovulu batitig kito ga, naio buru yetemeriba vodolu ga ajakisora naio ruei kiana.”

Kulo Krik tai ajidom aial Yesu

20 Tomu nalo miroano namã abavin Yerusalemo ka alotu ka Atua ka jokoluolu namã, a nalo tealo maka ave Ju, nalo abe kulo Krik namã amonea Atua javukia kulo Ju nalo. 21 Mia telikiti napano nalo nei ajumã amijogjog mugaruei sio nei Yesu, naruei ajidom aial naio. Naruei aba ajiragio, amileal kiano naiagagoano nei Vilip napano be tena Betsaeta yako Kalele, ana abika Yesu denio. 22 Ana Vilip ba berial ka Andru, karina naljuo aba aberial ka Yesu.

23 Ana bogo napano Yesu naio mijog ka napano nalo nei bunu napano maka ave kulo Ju ajidom aial naio, naio berial berinavo “Vonganei, be aura nene memedu ka Atua rila kiniou Kulorinio Kenerinio siaku rivavin. 24 Kiniou neber beriano ban kamiau, ka ver kুরুti tai, ver amebija re,

mia naio ve takurano to kurano ga tibe na. Mia ver amebijaio, mia naio rimei menunu, mia karina mia naio rivar m̃arati ve telabo bereio. ²⁵ Jibe nei, naio napano jidom m̃lea kiano meuliano na yetemeriba nei loa ka napano naio jidom kiniou, mia rila luvuio, mia naio nam̃a maka sidomial lele naio, mia naio to rivu ga rivano-o rivokar meuliano vou napano maka ve jukuti nene. ²⁶ Toro Ju p̃eli na toro Krik nam̃a ber jidom rim̃au kiaku, jidom riija kiniou, naio monoka takisor kiniou dam̃ariga. Mo ver naio to takisor kiniou tibe na, mia vio vabe nam̃a nava notoa, mia naio bunu mijikia rivija kiniou. Toro nam̃a be kiaku naim̃auano, mia Atua sian sio na bo van naio.”

Yesu berii kiano m̃ariano

²⁷ Mo Yesu naio jikar ka jidomii ka napano vesiou re, mia naio monoka rim̃aro, naruei naio mijog deio ea kiano iviso. Naruei naio berinavo “Vonganei, kiniou namijog jidomiano niukniuku joomo ea kiniou. ? Mia kiniou never venia rivan karam̃aku? ? Bo ka kiniou novolkouo, nevika den naio, neverinavo: Teta, aiou jau kovurular kiniou den aura na bogokouo nei? Mia maka rivu ka neber tibe na, bior kiniou nebinime i ea yetemeriba nei kar im̃auano nene ga na. ²⁸ Makanio, mia kiniou neber jibe ga na, neberinavo: Teta, aiou

jau kala siamo rimei ve toruriano ea venia napano mia ala ka kiniou.”

Naruei telikiti napano Yesu naio ber iliano nei bisi, niono tai na mave mil batove berinavo “Kiniou nojo namila siaku bavin easo ruei, a mia kiniou nala bere navo.”

²⁹ Ana tiniobi nalo napano m̃a aju vaataro amijog joa na niono nene, mia nalo teal o aber nina be tubaal tai ga, a nalo teal o aber “Makanio, nailiano tai na mil banio.”

³⁰ Naruei Yesu berial kalo, naio berinavo “Niono nei napano kito romijogio vonganei, naio maka rimei ka kiniou nejogio, mia naio binime i ka kami u, ka kami u kuvijikia ka kiniou nebinime i be. ³¹ Monoka tibe na bior ka napano vonganei be bogo na tibureiano na yetemeriba, be bogo na avukular parinio tubo sim̃aro na yetemeriba naruei. ³² Ka kiniou nala im̃auano na, mia monoka kiniou natakilele mave ea m̃akolkolo, mia bogo napano noto mave tibe na, nomijikia novuru nono tomu nalo aviniu amei ea kiniou.”

³³ Ana Yesu kiano iliano nei, naio berenio ka rila rimei rimeravo vanlo ka kiano m̃ariano naio ve m̃ariano na jum̃abe. ³⁴ Mia bogo na tiniobi nalo amijogio, aberinavo “Kumemi numitum̃a numijog ka nam̃a abuluku Vivitauiano Lu, ber ka mia Naverikariano mia naio rimeul toboto,

mia rijikia re riñaro bogo tai. ?Tibe na, jumabe jau kojo kober ka mia atelan Kulorinio Kenerinio mave ka naio riñaro? ?Vede jau kojomña kober toro dolu tai ga kovio? ?Kei Kulorinio Kenerinio na naña jau kojomña koberenio, kober ka mia tibe na kanio?"

³⁵ Naruei Yesu berdoŝe banlo, naio berinavo "Kiniou nebe yulu na Atua kiano, na nomijikia noto lie vo vija kamiu bogo ve telisu bere vo. Mia bogo napano noto vija kamiu, bo ka kamiu kuvituña kuviel ea miamoiano nene, ver ŝeli, mia melijokouo sovoko kamiu, a toro napano jomña mila von ka riel naio rijikia re bunu rivitilubar kiano m̃arabo. ³⁶ Telikiti napano kiniou burupati na yulu nojo kia ga bija kamiu, bo kamiu kumonea kiniou, ka kuvi-jikia kumei kuve tomu na miamoiano."

Mia bogo na Yesu ber iliano nalo nei bisi, naio juvanlo aju, naio ba jo luku ea vio tai napano ajikia re amei bunu rivior naio eaio.

Kulo Israel maka asidom amonea Yesu

³⁷ Yesu miñauka burutomoluo na tortoru telabo ea miralo ruei, mia be iakurano maka asidom amoneaio ga.

³⁸ Kialo bajago na, amila bereio javukia ga nanua m̃a kulo moruo Ju re nua amila ka bogo na naverialiano Aisea, napano naio beriio ea kiano iliano juo. Tai naio berjibe nei, berinavo

"?Atua Soŝi, kumemi numitumña nuber bulavulagio banlo, mia nalo maka asaaro ka amoneaio,

a jau kobisiŝe moroano na jumamo banlo, mia kei kalo naio rivitilubario? *Maka tai!*" Ais 51:1

³⁹ Mia dolu nene, naio bunu ber kalo ka maka ajikia amoneaio, naio berinavo

⁴⁰ "Atua jidel kalo banbano-o mia deio ga, ana naio mila miralo nalo abe merebono,

naio mila kialo iviso nalo abinimej jikili laka.

Mia miralo nalo ajikia re bunu aial vite, ana kialo iviso maka ajikia ajoglubarbar vite.

Ver ŝeli, mia aviliglo amei bere ea kiniou ruei, ka mia kiniou neielielilo." Ais 6:10

⁴¹ Mia Aisea kiano iliano nei binimej ea naio, iorou ka napano naio mial miamoiano na Naverikariano joomo ea Atua Kunuano Lu, mia vonganei kito romial ka naio berii Yesu memedu, bija nalo na ea kiano bogo.

⁴² Mia jibe ka naña iliano nei berenio, telabo maka amonea Yesu, mia tai amoneaio, ba bokar kialo navuriñaraboiano tealó. Naina bo, ana vite tai naio bova, ajumña amila vavanlo ka amoneaio, bior amerou ka Varisis nalo, amerou ka tibe m̃a na mia avuku bulaglo den kialo yimo na volkouano. ⁴³ Nalo amerou jibe na bior napano maka

bunu asidomii ka ala vite napano mia Atua rijikia saaro kalo riviorio, mia ajidom ga toru ka mia kulo dolu nalo aialo tumabe.

⁴⁴ Ana Yesu naio berial burumara ilimaariano tai ea kanano tomu nalo miralo, naio berinavo "Naio napano monea kiniou, maka rimonea kiniou ve takurano ga, mia jibe na naio monea kumemi juo naio napano mila kiniou nebinime, ⁴⁵ a naio napano jomā mial kiniou, jibe na naio jomā mial naio. ⁴⁶ Kiniou nebinime, ea yetemeriba nei, jibe ka kanano yulu, ka rila ka napano toro kei na rimonea kiniou, mia naio toa re melijokouo. ⁴⁷⁻⁴⁸ Mia ver tealo ajog kanaku iliano, naruei nalo ajogkar re, ŗeli ver tealo ailkue ka kiniou maka asidom ajog kanaku verloglogiano, nalo na mia avar kanalo tibureiano nalo ea Legiano na maaro. Ea bogo na, ve re kiniou napano mia notumolu netiburelo, bior kiniou maka nemei ka netibure tomu nalo na yetemeriba nei, mia kiniou nebinime ka nalarurlo, mia vite napano mia tiburelo, nina be kanaku iliano napano neber kalo ka bogo napano nojo bijalo kia ga vo. ⁴⁹ Kanaku iliano mijikia rila tibe na, bior ka bogo napano nojomā naberial iliano nalo na, maka neil ea siaku kiniou ga ve takurano, mia nemil ea Teta siano napano naio miila kiniou nebinime yetano. Naio ga berial batitig ban kin-

iou vite nonovio na monoka neverialio, ⁵⁰ naruei jibe na, damariga kiniou notomā never vite nonovio napano Teta naio jidom ka neveriio. A kanano tuboiano nalo na, namijikia ka be meuliano na bo nei napano maka ve jukuti nene joalo."

13

Beni be Yesu kiano bogo na maaro na meuliano, naio jekon kiano naiagagoano nalo jaalo

¹ Vonganei, vite nonovio ju batitig ruei, beni ga naruei ana ve burumara legiano, napano Jokoluolu na Sidomkariano na Ioruriano naio tikar eaio. Naruei Yesu naio jo bitilubar ruei ka kiano bogo binime, legiano na beni ga be kiano bogo na naio monoka tuvan yetemeriba nei ka rivavin mave ea karamāno. Binime bokar bogo nei, ea mārabo telabo, naio bijuku bo laka ban nalo na abe kanano napano ajua yetemeriba nei ruei, naio tinien jiilo toru laka, mia vonganei be bogo na naio tinien riialo lie vo, rivano-o rivokar napano mia kiano meuliano rivakovio riviorlo.

² Naruei naio jo kumemi liko kiano naiagagoano nalo ea vio mave, naio jo mila sano sinaniano na maaro kumemi liko. Mia Jutas na Kariot, tormoruo Saimon kenerinio, naio bunu jo kumemi liko kia ga vo ea bogo nei, naio jo bija kanano tiniekakariano ka

mia tiveluku ka Yesu, ka na Sim̃aro midu joa tiniene ruei. ³ Kunituñã numisinan banbano-o mia Yesu jo tinien maio ka jum̃abe ka beamu, naio jaluvo den Atua naio binimeĩ yetano, a jum̃abe ka napano vonganẽi Atua bar vite nonovio jua jum̃ano, a tum̃abe ka napano mia naio monoka tovuilio, karina mia naio mijikia taluvo den yetemeriba nei ka rivavin bereio mave ea naio. ⁴ Naio mijog ka burum̃ara tinietiano ea naio ka kumemi kanano naiagagoano nalo, a naio jidom ka rila burutomoluo tai ka tinietiano nei van kumemi. Naruei naio jumolu, ba miyalar m̃ano kulukoti, jukulou ka iolkoniano tai, ⁵ midu baju na uei tai, midu binimeĩ, ana naio jikar ka jekon jaamemi nalo, naio mila jibe ka naio be kenememi toro na im̃auano tai. Naio jom̃a jekon jaamemi jibe na bano-o, m̃a miolkonlo ka iolkoniano napano naio jom̃a jukulou kanio, ⁶ banbano-o na binimeĩ bokar Saimon Pitere jaano. Mia Pitere jo mial ka napano binimeĩ bokar naio, naruei naio ber kanio berinavo “?Tubo, venia na? Jau kobe kenememi toro na toru, maka rimemedu ka jau kesekon jaaku tibe na.”

⁷ Mia Yesu berdoṑe, berinavo “Pitere, venia napano kiniou nojom̃a nemila vonganẽi, jau maka kovitilubarío vo. Mia iorou kanio ga mia jau kejkia

vatitigio rivu.”

⁸ Mia Pitere naio jo jidom riverbure Yesu kiaga vo, naio berinavo “Makanio Tubo, najamo ka lele re so ka kasekon jaaku.”

Ana Yesu naio berinavo “Ver kiniou nesekon vatitigso re, maka ve kanaku titai toaso.”

⁹ Naruei telikiti na Pitere naio mijog ninei, kiano jidomiano be dolu kija, naio ber ka Yesu berinavo “!Tubo, ver tibe na, najamo ka ga, nejidom ka jau kesekon kiniou maka ea jaaku ga, mia ea mokotenaku reraio, riva rivokar bunu jaaku a pariku!”

¹⁰ Ana Yesu berdoṑe ban Pitere ea jamerijiano sesa tai, na berial jum̃abe na toro naio meravo ka kiano kariano. Naio berinavo “Toro napano mijeliou vonga, niabene reraio meravo nonovio ruei. Ana ver jaano riagiago bereio, mia naio maka rijikia riva rijeliou nonovio bereio, mia naio sekon ga jaano. Mia kiniou nemial kamiu kumitibe na. Kamiu kumeravo nonovio bo ruei, mia kamiu tai ga maka tibe na, naio miagiago dolu ga jo.” ¹¹ Mo Yesu naio ber jibe nei, ber maka nuvinu napano numeravo, bior ka napano naio mijikia ruei ka kumemi tai napano mia vesiou re mia naio tiveluku ka naio.

¹² Naruei Yesu jekon Pitere jaano bija kumemi dolu nalo-o bisi na ba miya m̃ano kulukoti bereio, jotano ana

bika den kumemi, naio berinavo “? Kamiu kubitilubar imauano na namila ban kamiu na, ĩeli na makanio?

¹³ Vite na naio jibe nei. Telikiti naña kubio kiniou kuber Naverloglogiano ĩeli na Tubo, kamiu kumituña kuber riano ga na. ¹⁴ Mia ver kamiu kumial ka napano kenemiu Naverloglogiano ĩeli na kenemiu Tubo naio jekon jaamiu, bo ka kamiu bunu kuvituña kuvisesekon jaamiu nalo, kamiu kuvilala bajago novo nalo tibe na ea kamiu bogo nonovio. ¹⁵ Kiniou nemila jibe na ban kamiu ka mia kamiu kuvue jaaku ea legiano nalo na ju binimeĩ kiana, ka mia kamiu kuvila bereio van kamiu tibe ka na kiniou nemila ban kamiu ruei. ¹⁶ Kiniou neber riano ka kamiu, ka toro na imauano naio maka to loa kiano tubo, ĩeli na toro na midu iliano naio maka to loa nana miila naio bano. ¹⁷ Mia verenio kamiu kumijikia ka kanaku iliano nalo nei aĵeriano, a ver kamiu kuvituña kuvila venia napano ña neberenio, mia buruñara ilivuiano ve toru laka rimeĩ rivan kamiu iorou.”

Yesu berial ka mia Jutas rivar bonbonua naio

Mataiu 26:22-25; Mak 14:17-21; Luka 22:21-23

¹⁸ Ana Yesu berenio “Kiniou neber jibe na, mia maka never kito nonovio, bior kito tai naio jo, napano kiano jidomiano bilig be dolu ruei. Ierinio, kiniou

nemijikia batitig kamiu kubiniu napano nebijaui bu-lag kamiu, mia kiniou nemijikia ka mia kamiu tai naio rila rimemedu ga takii napano Vivitauiano Lu berial nua ruei, napano ber jibe nei, berinavo

Naina mia kumemi ve juo nuvisen bitiran saku joko,

naio mudular buruñeiano ka rivuta davalar ka kiniou ruei. Iouano 41:9

¹⁹ “Vite na kirivova tai vo mia kiniou nejidom neverial ka kamiu beamu, naruei bogo napano mia kamiu kuvialio iorou kano, ana vesiou re mia kumijikia kumoneaio ka kiniou nebe riano, kiniou nobe naio napano jobo jo. ²⁰ Kiniou neber riano ka kamiu, toro naña mila ilivorvoruano ban toro naña midu kiaku iliano napano ña nemiilaio, naio javukia napano naio mila ilivorvoruano ban kiniou, a naio naña mila ilivorvoruano ban kiniou jibe na, naio jibe ka napano naio mila ilivorvoruano ban naio napano miila kiniou nebinimeĩ.”

²¹ Yesu ber iliano nei ban kumemi bisi, ana naio jikar ka mijog ka napano kiano iviso bujo ka jidomiano na temi laka, banbano-o karina naio berial meravo ea mirememi, berinavo “Ierinio kiniou neber ka kamiu, mia kamiu tai tiveluku ka kiniou.”

22 Mia bogo napano naio ber jibe na, kumemi numiilo, numitumãa nubiti kumemi jeliuiv bereio, maka nuuikia ka naio jo ber kumemi na vabe naruei. 23 Ana ea bogo na, kinioiu Jone, jibe ka naiagagoano tai napano Yesu tinien jii kinioiu m̃lea, nojomãa nojotano vaataro lie ka naio, 24 naruei Saimon Pitere mil ka jumãano ban kinioiu, berinavo “Ai koig, jau kovika vatitigio bere vo, kover naio jomãa ber kenia.”

25 Naruei nemijian kinioiu telisu, nemijian paripariku ba vaataro ka Yesu, nemi-juvaluva banio, neberinavo “?Tubo, jau kojomãa kober kumemi kei?”

26 Ana Yesu berdoŋe, berinavo “Kinioiu nojomãa neber ga naina napano niati joko sesa nei, kinioiu nejiti ka vaatei, karina nejian banio.” Naruei naio mila jibe ka ga nanua naio berenio, naio midu niati joko sesa tai, naio jiti ka mememi vaatei, bisi na naio midular jian ban Jutas tormoru Saimon na Kariot kenerinio. 27 Mo Jutas midu jenio, mia ea bogo nene ga, Simãaro bunu naio binime i ba joomo eaio. Ana Yesu berkan naio berinavo “Jau, venia napano kojidom kala, jau kavan soŋeli kala beamu vo.”

28 Mia ka kumemi dolu nalo napano m̃a numitutano ea sinaniano nei kumemi liko Yesu nene, maka ve kumemi tai napano naio

rijiãa bior venia ana Yesu ber iliano nei ban Jutas. 29 Kumemi tealo be tinielo ka Jutas naio bitikar kenememi basaro na veru, tenene na Yesu miila naio ban ka rivulu simemi sinaniano, ŋeli na ba bar veru ban talimãasa nalo, ŋeli na titai na jibe na. 30 Mia Jutas naio mijikia batitig venia napano Yesu berkanio, naruei ka bogo nei ga napano naio midu joko sesa nei bisi, kolvare ga naio jumolu ba tavio bereio, napano viobobogio laka ruei.

Taboiano vou na tinietiano

Mataiu 26:31-35; Mak 14:27-31; Luka 22:31-34

31 Mia bogo na Jutas bisi, ana Yesu jikar berloglog kumemi bereio ka vite telabo. Naio ber ka kumemi, naio berinavo “Vonganei be bogo na Kulorinio Kenerinio kiano miamoiano rimalmaluvo, vonganei be bogo na naio rila Atua kiano miamoiano rime i ve toru lie vo. 32 A verenio venia napano mia naio rilaio, mia naio rila Atua siano rivavin, ana iorou ka nina, bogo vesiou re leleio, mia Atua rivitirilar kinioiu kenerinio bereio, naio rila siaku bunu rivavin.

33 “Keneriku nalo, be bogo telisu ga jo napano kinioiu nemijikia noto kia vo kitoliko, vaataro ga ka monoka nataluvo den kami u. Telikiti na kami u kuvial ka napano nataluvo den kami u bisi, mia kami u kuvisidom

kuvila von ka kuvisirag kin-
iou tanea vio rera ga. Mia
venia naŋa kiniou neber ka
tomu na tortoru na kiado
Ju nalo dolu, neber bere
ban kamiū, ka vio vabe
na mia kiniou navan eaio,
kamiū maka kuvijikia ku-
vitakisor kiniou eaio von-
ganeī. ³⁴ Ana vonganeī,

kiniou nejian tuboiano vou
tai ban kamiū, ka monoka
kamiū tiniemiū titii kamiū
ve toru, rivanvano-o mia
tibe ka ga napano kiniou
tinieku jii kamiū. ³⁵ Mia ver
kamiū tiniemiū titii kamiū
mele tibe na, naina be
m̄arabo na rila tomu nalo
na yetemeriba nei aial ka
kamiū kube kanaku naia-
gagoano nalo riano.”

³⁶ Yesu ber burum̄ara il-
iano nei bisi, ana Saimon
Pitere jo tinien maio ka na-
pano Yesu naio berenio mia
naio taluvo den kumemi,
naruei naio bika, berinavo
“? Ana Tubo, mia kava be
na?”

Ana Yesu berdoŋe, beri-
navo “Kiniou noto navan ea
vio tai napano kamiū maka
kuvijikia kuvitakisor kiniou
eaio vo, mia kamiū kuvijikia
ga kumei navo.”

³⁷ Mia Pitere mijogio, naio
bika bereio, berinavo “?
Tubo, bior vaio ana kiniou
maka nejikia neviedu kito
juo vonganeī. Kiniou na-
jaaro ga, namijamo ka ki-
aku meuliano riviorso von-
ganeī.”

³⁸ Ana Yesu berkanio, naio
berinavo “?Jau kober ka mia

jau kajamo ka kiamo meu-
liano rivior kiniou? Bo
ga, mia kiniou neber riano
banso, neber ka bogiano nei
ga, bogo na tu tokokoreko
re vo, mia jau kavarbon-
bonua kiniou ve varolu [3]
ruei, kover jau maka kove
kanaku.”

14

*Yesu mila ililuŋiluŋiano
ban kanano naiagagoano
nalo*

¹ Mia Yesu mial ka na-
pano kumemi naiagagoano
nalo numijog bova ka na
monoka mia naio taluvo
den kumemi, naruei naio
ber ka kumemi, berinavo
“Kamiū kuvila tiniemiū
rijog vova mele re, kamiū
kuvarkar tiniemiū ea Atua,
ana kuvarkar tiniemiū ea
kiniou bunu. ² Tibe ka
naŋa kiniou neberenio ruei,
kiniou navan ka nala vatitig
kenemiū vio nalo mave ea
Teta, a mave ea kunuano
be vajoomo miroano napano
bare ka kamiū nonovio. Ver
ŋeli, kiniou maka nejikia
never tibe na ka kamiū.
³ Kiniou navan ka nala
vatitig rivu kenemiū vio
nene, avona bisi, mia kiniou
nemei bereio yetano nei ka
kamiū, novuru bulag kamiū
kumei ea kiniou, ka na
mia kamiū kuvijikia kuvitu
dam̄ariga vija kiniou ea vio
napano mia notoaiō. ⁴ Mia
m̄arabo na ka riva rivokar
vio napano mia kiniou noto
navan eaio, kamiū kumijikia
ruei.”

⁵ Ana Tomas bika denio, berinavo “Tubo, kumemi maka nuvijikia vio be na jau kojomā koberenio mia jau kavan eaio, mia tumābe ana kumemi nuvijikia mārabo na rivan eaio?”

⁶ Ana Yesu berinavo “Kin-iou nebe burupati mārabo, kiniou nebe burupati iliria-niano, kiniou nebe burupati meuliano. Maka toro tai rijikia rivan ea karamāku, ver naio maka selea kin-iou. ⁷ Ver kamiū kuvitilubar ka kiniou nebe kei, naio jibe ka kumijikia bunu karamāku ruei. Mia von-ganei, kamiū kumitumā kumial naio ruei, mila na jikar vonganei, kamiū kumijikia naio be riano.”

⁸ Ana Vilip bika denio, naio berinavo “Tubo, vite na naruei kumemi numisidomio, ka nuvial kija karamādo vo. Aiou, ver jau kovisiŝe naio van kumemi, mia kumemi nuvijikia nuvisaaro-o mia.”

⁹ Ana Yesu berdoŝe, berinavo “? Vilip, kiniou nojo bija kamiū-o bokar yuka vio ruei, mia jau maka kovitilubar kiniou vo? Jibe ka namā nojomā neberenio na, ka toro napano mial kin-iou, naio jo mial Teta ruei. ? Mia jumābe ana jau kojomā kobika bereio ka kin-iou nevisiŝe Teta na mave van kamiū? ¹⁰ ?Jau komonea ka kiniou ea Teta, a Teta naio ea kiniou, ŝeli na jau maka komoneaio? Iliano nalo namā neber ka kamiū, maka kiniou ve takurano namā nemil ea siaku ga,

mia Teta napano joa kiniou naio jo mila kiano imāuano nalo jel ea kiniou. ¹¹ Bo ka kamiū kumonea venia namā neberenio, ka kiniou ea Teta, a Teta ea kiniou. Ver kamiū maka kuvijikia kumonea kiniou rivior kanaku iliano ga, monoka kumonea rivior imāuano nalo namā kumialio napano mā nami-laio ruei.

¹² “Kiniou neber riano ka kamiū, ka toro kei napano naio rimonea kiniou, mia naio bunu rimāuka imāuano nalo napano nojomā nami-laio. Mia notuvan vio navavin bereio ea Teta, karina iorou neiila Niununo rimeŝ, mia naio mijikia rila burutomoluo nalo na tomor-moruo bereio lie vo, tovulu nalo napano kumialio ruei.

¹³ “Kiniou neberkar ban kamiū, ka venia napano mia kuvika ea siaku, mia kiniou nala ga rivan kamiū. Mia kiniou nala ga tibe na van kamiū, ka rila ka Teta siano naio mijikia rivavin ve toru lie vo iviso ka kamiū, ea imāuano namā kiniou, ne-jibe ka kenerinio, namilaio. ¹⁴ Tibe na, venia na kuvika den kiniou, mia nala van kamiū.”

Yesu naio berkar Niununo Lu banlo

¹⁵ A Yesu ber bunu ka kumemi, naio berinavo “Ver kamiū tiniemiu jii kiniou be riano, mia monoka kuvokar vatitig rivu kanaku tuboiano nalo. ¹⁶ Mia kiniou noto re bunu vija kamiū, ana mia nevika den Teta ka mia naio riila toro dolu tai ka riija kamiū ka mia ridu

jeleku ea kenemiu. Naio napano mia rimei, mia naio to vija kamiu damariga, ¹⁷ naio be Niununo na ilirianiano. Tomu nalo na melijokouo na yetemeriba maka ajikia avokar naio, bior ka napano nalo maka ajikia avitilubario, maka ajikia naio ga, mia kamiu kumijikia batitig naio bo bior naio naruei napano mia rivija kamiu bogo nonovio, to vija kamiu to toboto.

¹⁸ “Kanku naiagagoano nalo, mia kiniou notuvan lelan re kamiu napano mia kuvitu tibe ka kirikiou ga. Maka leleio, mia kiniou nemei bere ka kamiu. ¹⁹ Bogo teliki ga jo kiano vo, vesiou lele re, karina mia tomu nalo na yetemeriba nei ajikia re bunu aial kiniou bereio. Mia kamiu ga kuvial ka napano mia nemeul bereio, a bior mia nemeul, mia kamiu bunu kumeul. ²⁰ Ea legiano na naruei napano mia kamiu kuvial ka napano nemeul bereio, mia kuvijikia ka kiniou ea Karamaku, a kamiu ea kiniou, a kiniou ea kamiu. ²¹ Naina tinien jii kiniou be riano, naio be naina bokar batitig kanaku tuboiano a naio jo miduio. Naina tinien jii kiniou jibe na, mia karamaku tinien tii naio, vija kiniou bunu mia tinieku tii naio, notoma noyotuba ka naio ka rila naio mijikia rijikia kiniou lie vo.”

²² Ana kumemi naia-gagoano nalo tai, napano naio be Jutas napano naio maka ve Jutas na Kariot,

mia naio bika den Yesu, naio berinavo “Ana Tubo, jau koberinavo mia jau kotoma komalmaluvo ka kumemi, ana mia jau kala ea marabo na vabe ka napano mia tomu dolu nalo na yetemeriba nei bunu ajikia re aialio?”

²³ Ana Yesu berdope, berinavo “Ver toro tinien tii kiniou, mia naio rivokar vatitig kanaku iliano, ana mia karamaku tinien tii naio. Ana mia kumemi ve juo nuvedu ea naio, nuvila kenememi vonuo ea kiano meuliano, mia maka rijikia tibe na ea tomu na maka amoneaio. ²⁴ Mia toro na maka tinien tii kiniou, mia naio maka rimonea batitig kanaku iliano. Naina naruei be verdopeiano na kenemiu vikadeniano, ana iliano napano kumijogio ruei, naio maka ve kanaku, mia naio be Teta napano naio miila kiniou nebinimei ea vio nei kanano.”

²⁵ Ana Yesu naio berinavo “Tilikiti nama kiniou nojo kia ga vo bija kamiu, nojoma neber vite telabo jibe na ban kamiu ruei. ²⁶ Mia bogo napano navano, mia Teta naio riila Niununo na ijaiano rimei, ana mia naio ridu jeleku, naio riverloglog kamiu ka vite nonovio, ana mia naio rudu sidomii kakarioano na kanaku iliano nalo nonovio ea kenemiu jidomiano.

²⁷ Kiniou mia navano, mia notuvan tumaro to vija kamiu. Kanku tumaro naio be tumaro na bo tai napano yetemeriba nei naio maka rijikia rije van kamiu.

Tibe na, kamiu kuvila re ka mia tiniemi rivujo ĉele, a kamiu kumerou ka re vite nalo. Kamiu kuvisidomi ĉele re, ²⁸ bior ka napano mia tibe ka naĉa naberenio ka kamiu ruei, ka kiniou nava koalabo beamu, karina mia nemei bereio ea kamiu. Vede kamiu kuvijog vova ka na mia navano, mia ver kamiu tiniemi tii kiniou, bo ka kamiu kuvisaaro ve toru laka ka na mia nejikia nava neial bereio karamĉaku, napano naio loa laka lie vo ka kiniou.

²⁹ “Vite nalo na nalo makan vo, mia vonganei kiniou neberial batitigio bo ban kamiu ruei, mia bogo na kuvial maluvo memedu ga ka venia neberenio, ana mia kamiu kuvijikia kumonea kiniou ka nebe riano. ³⁰ Mia vonganei, kiniou maka nejikia never vite ve telabo rivan kamiu, bior parinio tubo naĉa jo mila tuboiano ea yetemeriba nei, vonganei naio jo binimej ka kiniou ruei. Kanano moroano naio maka rivare ka tovulu kanaku moroano, ³¹ mia kiniou nemijamo ka ga kiniou ea ĵuĉano, bior monokanio nala venia napano ĉa Teta berialio ka naio ĵidom ka kiniou nalaio. Mia nemila ĵibe na, ka tomu nalo na yetemeriba nei nalo ajikia avitilubar ka kiniou tinieku ĵiilo.

“Kito ĉa, voniganei kiano bogo nene na ruei, rotumolu rava tavio.”

15

Yesu naio be burupati na teli napano be riano

¹ Naruei ka bogo na numiel nubano, Yesu naio berilano ta bunu ban kumemi. Naio berinavo “Kiniou nebe burupati na telikrevi na be riano, mia Teta naio ĵibe ka toro na bitikar ĵiotilikrevi nei. ² Naio ĵoĉa bitii veve batitig tilikiti nene nalo, mia ver naio mial tilikiti nene tai napano mia maka rivar ĉarati, naio telario, a ver naio mial tai napano bar ĉarati, mia bivikon bulagio sidiati nalo denio bo, ka rikikia rivar ĉarati ta bunu bereio. ³ Vite na namila ban kamiu ruei, a vite napano bivikon batitig kamiu na, naio be kanaku iliano nalo naĉa noĵoĉa neber ka kamiu. ⁴ Kamiu kube saku tilikiti, kamiu monoka kuvijurukar vatitig kiniou rivu, a mia kiniou novijurukar vatitig kamiu rivu. Ver tilikiti rivijurukar vatitig re burupati, mia maka rikikia rivar ĉarati naio ga, mia bare ga ka kamiu bunu, ver kamiu kuvijurukar re kiniou rivu, mia kenemi meuliano maka rikikia rivar ĉarati na bo leleio.

⁵ “Kiniou nebe burupati na teli, a kamiu kube saku tilikiti nene nalo. Naio napano bijurukar kiniou a napano kiniou nobijurukar naio, naio naruei kiano meuliano mijikia rivar ĉarati ve buro nalo, bior ver kiniou re ea kamiu, mia maka kuvijikia kuvila vite tai na bo leleio ea Atua mirano. ⁶ Ver toro tai vijurukar re

kiniou, naio tibe ka tilikiti tai napano binimei menoko, ka mia atelario, adu avuku rivan ea sebi, ka mia sebi sisenio. ⁷ Ver kamiu kuvitu rivu damariga ea kiniou, a kanaku iliano to rivu damariga ea kamiu, venia namā kamiu kumisidom ka kuvikanio, kamiu kumijikia kuvokario. ⁸ Bo kanio kamiu kuvar mārati ve telabo ea kenemiu meuliano, nina naruei naio memedu ga ka kiaku naiagagoano naio tomā rilaio, a ve mārabo bunu ka rila Teta siano rivavin lie vo. ⁹ Teta naio tinien jii kiniou toru laka, mia javukia ga napano naio tinien jii kiniou, kiniou bunu tinieku jii kamiu, naruei bo ka mia kamiu kuvijurukar vatitig ea kanaku tinietiano nene. ¹⁰ Ver kamiu kumitumā kubokar vatitig kanaku tuboiano, kumijikia kuvijurukar ea kanaku tinietiano, tavukia namā kiniou nojomā nabokar batitig ruei karamāku kanano tuboiano, nobijurukar batitig joomo ea kanano tinietiano nene.

¹¹ “Naruei vite nalo namā nojo nober ka kamiu, nemije ban kamiu ka kanaku saariano jikia toa kamiu, naio mila napano ve burumāra saariano tai napano bo mia bo naio mijikia toa kamiu damariga. ¹² Ana kanaku tuboiano dolu tai na maariano na mia neje van kamiu naio jibe nei, ber kamiu tiniemiuti tii kamiu tulaka, tavukia namā kiniou tinieku jii kamiu. ¹³ Maka

bunu ve tinietiano dolu tai ka mia rivu lie tovulu tinietiano napano mia toro tai rijamo ka kiano meuliano, naio rimāro ka rilarur kanano bilbilu. ¹⁴ Verver kamiu kumidukar kanaku iliano nalo, kube kiaku bilbilu nalo ruei. ¹⁵ Kiniau novio re kamiu bunu ka kanaku tomu na imāuano ga, bior toro na imāuano naio mirāu ga, naio maka rijikia batitig kanano tubo kanano jidomiano na kiano imāuano. Mia kiniau nemial kamiu kumitibe ka kanaku bilbilu, bior vite nonovio namā nomijog Teta ber ka kiniau, kiniau neberial meravo bo ban kamiu. ¹⁶ Kamiu maka kuvijauia kiniau ka neve kenemiu, mia kiniau naruei nebijauia kamiu ka kuve kanaku, kiniau nebitiri bulag kamiu ka kuva kuvar mārati ea kenemiu meuliano nalo, mārati napano mia to toboto. Ana ver bogo napano kamiu kuvitumā kuan tibe na, venia na mia kuvika den Teta na mave ea siaku, mia naio sian van kamiu. ¹⁷ Mia kanaku tuboiano nene na jibe nei, ber kamiu monoka tiniemiu titii kamiu.”

Tomu nalo na yetemeriba nei mia nalo asermi ka Yesu kanano naiagagoano nalo

¹⁸ Ana Yesu naio berinavo “Ver mia kuvial ka mia tomu nalo na yetemeriba nei napano maka amonmonea, nalo asermi ka kamiu, kamiu kuviilo mēle re kanio. Kamiu monoka kuvisidomial ka napano nalo

nei ajermi ka kiniou beamu ruei, karina nalo asermi bunu ka kamiou iorou. ¹⁹ Ver kamiou kuvitibe ka tomu nalo na yetemeriba nei ga, mia nalo asaaro ga ka kamiou, mia kiniou nebijauia bulag kamiou kumitaluvo den meuliano na yetemeriba nei. Kamiou maka bunu kuve vere ka kanano tomu nene nalo, ana rila na mia nalo asermi ka kamiou namariga.

²⁰ Mia bo ka kamiou kuvitumi tiniemi rimaio namariga ka kanaku iliano nalo namā naber ka kamiou ruei, napano naberinavo: Toro na imāuano naio maka loa ka kiano tubo. Iliano na jaati nene ber javukia ga namā amila kiki lelan kiniou, mia ala kiki lelan kamiou bunu. Mia tibe ka ga namā maka ajogkar kanaku iliano nalo, mia ajogkar re bunu kene-miu iliano nalo. ²¹ Bajago va nalo na jibe na mia ala ka kamiou bior kamiou kube kanaku, mia ala bior maka ajikia naio napano miila kin-iou nebinime i yetano nei.

²² “Ver nemei re neverial vite nonovio rimeravo ea miralo, mia Atua rila re river nalo amila korov kanano iliano. Mia vonganei, maka ajikia aver sopeiano tai rivior kanalo kariano ka rila parilo sikili ka Atua, bior amijog kiaku iliano nalo ruei. ²³ Nao, be riano ka parilo jikili ka Atua ruei, bior napano ajermi ka kiniou, ana naio javukia ga napano ajermi bunu ka Karamaku.

²⁴ “Verver re kiaku buru-tomoluo nalo napano amial nemilaio, napano maka toro dolu rijikia rilaio, pēli mia Atua maka jikia river ka kariano jualo. Mia makanio, amialio ruei, mia maka ga amoneaio, ajidel dolu ka ga mā ajermi ka kumemi juo karamaku. ²⁵ Vite na naio memedu ga ka iliano tai napano Atua mudu jo joomo ea Vivitauiano Lu, napano berinavo

*‘Ajermi mele ka kiniou kurano, maka rivior kanaku beleiano tai.’
Iouano 35:19, 69:4*

²⁶ “Mia kiniou neber ka kamiou, ka mia neiila Niununo na ijaiano taluvo ea Teta mave riyotuba ka kamiou, napano naio be Niununo na jaluvo ea Atua kanano meuliano, napano be Niununo na ilirianiano. Mia naio rime i riverial kiniou lie vo van kamiou, ²⁷ ana iorou, mia kamiou bunu monoka kuverial kiniou ta bunu van kulo dolu nalo. Nina bior kamiou naruei kitoliko damariga jikar ea tikariano na kanaku imāuano binime i bokar vonganei.”

16

¹ Karina Yesu jo mil lie vo ban kumemi kiano naiaga-goano nalo kia navo, naio berinavo “Iliano nalo nei, neber ka kamiou na ka amijikia avokar vatitig kamiou, ka mia kenemiu moneano ajoru re bogo tai. ² Nao, kamiou monoka kuvijikia ka

kiado tomu na tortoru nalo, mia avuku bulag kamiu den yimo nalo na volkouano na kanado, mia rivoa laka van kamiu rivano-o rivokar bogo na ver auebinvin kamiu kuñarmaro, mia nalo averinavo niña naio be iñauano na bo tai napano nalo amila ka Atua saaro rivorio. ³ Mia nalo amijikia ala tibe na rivan kamiu, bior binimej bokar vonganei maka ajikia vatitig Teta na mave, a maka ajikia batitig kiniou bunu. ⁴ Mia iorou kanio, bogo napano ver kuvial vite nene amalmaluvo ka kamiu tibe na, kuvijikia kuvisidomialio bereio, kuvijikia kuverinavo Terinio kiana, vonganei romial vite nalo na jibe ka ga napano Tubo naio ber bisivisii ban kito beamu ruei.”

Mia Niununo Lu rijailo

Ana Yesu berinavo “Vite na, kiniou maka nojoma noberenio ka kamiu nua ruei, bior ea bogo na kiniou nojo kia ga bija kamiu vo. ⁵ Mia neber ka kamiu vonganei bior ka napano mia vesiou re, monoka notuvan kamiu, navan bereio ea naina nua beamu miila kiniou nebinimej. Kiniou nojoma neberver jibe na ban kamiu ruei, mia nemial ka kamiu maka kuvituma kuvivikano mia kiniou nava be, peli na navan ea vio na jumabe, ⁶ bior ka bogo napano neber ka monoka nataluvo den kamiu tibe na, kenemi iviso mijog bova toru laka biorio. ⁷ Mia makano, naio monoka tibe na ga. Neber be riano

ban kamiu, mia rivu laka van kamiu ka nataluvo den kamiu, bior ver navan re, mia Niununo na ijaiano naio maka rijikia rimej, avona ver navano, mia neila naio rimej ea kamiu. ⁸ A Niununo na, bogo na naio rimej, mia naio rila iñauano ea yetemeriba nei, rila kiano tomu nalo ka asidomlubar jidomiano na tortoru tealo, tai ea tivelinio na kialo kariano nalo, tai ea tivelinio na kanaku memeduo nalo, a tai ea tivelinio na Atua kiano tibureiano vanlo.

⁹ “Moti nene, be Niununo nene rila avitilubar ka burupati na kialo kariano naio be kialo bajago na maka asidom amonmonea kiniou.

¹⁰ “A tinene, mia Niununo nene rilalo avitilubar ka kiniou maka nala vova, nememedu laka. Kiniou nabare ka nemijikia navan bere mave ea karamaku, mia nalo aial re bunu kiniou.

¹¹ “A tolu nene, mia Niununo nene rilalo avitilubar ka mia Atua naio rijikia tiburelo, tibe ka ga napano naio jibure tubo kirivova nei ruei napano naio jo be tubo ka yetemeriba vonganei.

¹² “Vite telaboaju kiana vo ka mia neverialio, mia nemial ka napano kumijog bova jibe na, maka nejikia never ka kamiu vonganei. ¹³ Mia bo ga, bior mia iorou kanio, bogo na Niununo na ilirianiano naio rimej ea kamiu, mia mijikia rivuru marabo ka kamiu, mia kuvokar ilirianiano dolu nalo nei. Ilirianiano nalo na mia naio riverloglog ka

kamiu, mia river re ea kiano jidomiano ga, mia na naio mijogio ea vio mave, naio naruei mia naio riverialio ka kamiu, riva rivokar napano mia naio mijikia riverloglog vatitig kamiu ea tivelinio na vite nalo napano mia amalmaluvo ka kiniou rivesiou re. ¹⁴⁻¹⁵ Miamoiano nalo na be Teta kiano, abe kiaku bunu, naruei mia Niununo rudu kiaku iliano nalo na rimei rije vatitig rimonea kenemiu meuliano. Ea m̃arabo na naruei mia Niununo naio rila kiano im̃auano rimemedu, ka napano rudular siaku medave.”

Burum̃ara saariano ka bogo na Yesu rimei bereio

¹⁶ Mia Yesu ber bunu ban kumemi, naio berinavo “Mia vesiou re, bogo ve teliki ga, ana mia kamiu kuvial re bunu kiniou, karina, bogo ve teliki ga bereio, ana mia kamiu kuvial kiniou bereio.”

¹⁷ Naruei kumemi naia-gagoano nalo numijog iliano nei, nuberver ban kumemi nuberinavo “Kito maka rejikia vatitig rivu leleio vite nalo nei napano naio jom̃a berio. Beamu nua naio jom̃a berinavo mia naio rivan bereio riva to naljuo karam̃ano mave tiniabene, mia vonganei naio berinavo vesiou re, kito reial re naio, karina vesiou re bereio, mia kito reial naio. ¹⁸ A bogo ve teliki nam̃a naio jom̃a ber na, nioti nene ber venia? Kito maka ravokar kiano jidomiano leleio!”

¹⁹ Ana Yesu naio mijikia ka napano numisidom ka

nuvika vatitig vite nalo nei denio, ana naio jikario, naio berinavo “Peli kamiu kumitum̃a kubivika ea kamiu p̃eli ea tivelinio na kiaku iliano nei? ²⁰ Bo ga, mia kiniou neverial vatitigio van kamiu tibe nei, ka mia kuviteg, kuvijog rivova ka venia na ala ka kiniou, mia tomu dolu nalo na yetemeriba nei mia asaaro kanio, ajog rivu ve toru laka. Mia tiniemiu rivujo ka jogvaiano rivano-o, karina mia nemeul bereio ea nam̃ariano, mia kuvial kiniou bereio, mia kene-miu jogvaiano naio rivilig rimei ve jogvuiano bereio.

²¹ Mia nina tavukia ga tira na be m̃abono, napano ver rimonloglog kiano aura nene, mia taakano rijalele naio monoka rijog rivova-o mia ka naio rudu kenerinio. Mia bogo napano naio midu bisi, naio maka bunu sidomial kiano jogvaiano, mia naio tiniene bujo ka saariano bior kanano kiri solbouo neibano naio miyotuba ea yetemeriba nei.

²² “Naruei mia kamiu kuvitibe na ga. Vonganei mia tiniemiu nalo avujo lou ka burum̃ara jogvaiano, mia iorou kanio ana mia namalmaluvo ka kamiu bereio, ka na mia kamiu kumijikia kuvisaaro bereio ea burum̃ara saariano tai napano mia ve re toro tai naio rijikia rudular den kamiu bogo tai. ²³ Mo bogo napano mia namalmaluvo ka kamiu, vede mia kuvisidom ka mia kuvika vite ve telabo den kiniou, mia

makanio. Tenalo na kamiu kuvika re den kiniou, kamiu kumijikia kuvika rimemedu den Teta na mave. Kuvijikia kuvika ea siaku ga, naruei naio mia rijamo ka rivan kamiu. ²⁴ Binimei bokar vonganei, kamiu maka kuvitumã kuvivika vite nalo ea siaku, a tikar banei, ver kuvivika ea siaku, na mia kumijikia kuvokario, a mia naio rila tiniemiu rivujo ka saariano. ²⁵ Binimei bokar vonganei, nojomã nober vite nalo ban kamiu ea jamerijiano nalo, mia bogo nene jo binimei ka napano mia neilluku re bunu tibe nei rivan kamiu, ana mia neverii Teta na mave van kamiu, nemijikia neverial vite nonovio rimeravo rivu vatitigio van kamiu. ²⁶ Ana ea bogo na, mia ve re kiniou ga napano kiniou monoka nevika vite nalo den Teta kar kamiu, ana mia kamiu ga kumijikia kuvika denio rimemedu ea siaku. ²⁷ Kamiu kumijikia kuvika naio rimemedu, bior ka napano naio mial ka napano kumitumã tiniemiu jii kiniou, a naio mijikia ka napano kumonea kiniou ka nomoluo den naio nabatove ea yetemeriba nei. ²⁸ Ana ea tivelinio ka vio na mia kiniou noto navan ea, nemijikia never jibe ka na neber vonga, ka napano najaluvo ea Teta na mave nebinimei ea yetemeriba nei, naruei mia nataluvo den yetemeriba nei bereio ka navan bere ea karamãaku kanano vonuo.”

²⁹ Naruei nuberdoþe, nu-

berinavo “Tubo, vonganei jau maka bunu koilluku ea jamerijiano! Bogo namã kober vite nalo meravo jibe na mia kumemi numialio bo laka. ³⁰ Kumemi numijog kiamo iliano nalo, mila nubitilubar ka jau komijikia vite nonovio. Bogo na maka nuvika vikadeniano vo, jau komijikia ruei vite na nuvika denso. Jibe na, vonganei numonea jikili ka be riano, ka jau komoluo ea Atua ana kobinimei ea vio nei.”

³¹ Ana Yesu naio berdoþe kumemi, naio berinavo “Peli vonganei ga ana kamiu kumoneaio, a? ³² Bo kamiu kumoneaio, bior aura namã kiniou nojomã nober, naio jo binimei, ver þeli naio binimei ruei. Ea bogo nene, mia ajil kamiu kuve dedade tanea vio, þeli na kuvanvan veve terakurano bereio ea kenemiu vonuo nalo, mia ve re tai to vija kiniou, mia kiniou ga ve takurano noto. Mia naina naio bo ka ga kiniou, bior nemijikia ka mia ve re kiniou ga ve takurano mia Teta naio vija kiniou damãariga. ³³ Kiniou neber jibe na ka kamiu ka kamiu niukniuku rivie re kamiu, a ka kamiu kuvijog re rivova. Kenemiu meuliano na yetemeriba nei mia rivujo ga ka bogokouo, mia kiniou nojovulu vovaiano na yetemeriba nei, naruei kenemiu meuliano na ea kiniou, mia kamiu kuvileal tumãaro na bo tulaka.”

Yesu kiano volkouano na tomoruo

¹ Mia bogo na Yesu beriliano nalo na bisi, ana naio river rivolkouo rivan karamano. Naio jirarag bavin tiniabene, berinavo “Teta o, kiniou nemijikia ka vonganei be kiaku bogo na jogvaiano binimeinaruei. Aire, jau kovitikar kiniou kenerimo siaku, naio rivatove re, mia naio rivavin, ka na mia nemijikia nodular lie siamo bunu bereio. ² Nomonea ka mia jau kala tibe na, bior komidu burumara moroano na ban kiniou ruei, ka mia neve tubo ka tomu nonovio. Mia jau komijamo ka ban kiniou ka nalo napano komijemonea jumaku, mia nemijikia najamo ka meuliano napano naio maka rijikia ribisi bogo tai rivanlo. ³ Mo mmarabo na meuliano nene napano naio maka rijikia ribisi naio jibe nei, kanio napano amijikia jau, Atua takurano ga napano naio beriano, bija bunu kiniou Yesu Kristo napano jau komiila kiniou nebinimei. ⁴ Kiniou nojuvanso nebinimei ka nala siamo rimei ve tomoruo ea yetemeriba nei, naruei nominauka vite nene ruei, banbano-o vaataro ka nala nonovio inauano nalo napano kojidom nalaio. ⁵ A Teta, nojidom novika ver kiniou neviedu notumolu notua miramo bereio, mia jau kodu kiniou bere noto vijaso kito ve juo reje tuboiano bereio ea mermerano na vio mave, tibe ka napano kito juo romila beamu namia rejii

yetemeriba nei.”

Yesu bolkouo ka kiano na-iagagoano nalo

⁶ Mia Yesu jo bolkouo lie bano, berinavo “Teta, ea tivelinio na nalo na yetemeriba nei napano kobijauia bulaglo abe kiamo, jau kobjanlo ban kiniou, jau komijelo amonea jumaku, naruei nemijikia never ka jau ka neberialso kalo ruei. Vonganei naruei nalo ajuma abokar jikili kiamo Iliano Lu.

⁷ “Nalo abitilubar ruei ka vite novo nonovio napano ajua kiniou, nalo ajavukia kiamo ijaiano nalo ban kiniou, ⁸ bior kiamo iliano napano kojian ban kiniou, kiniou nejian solio ka banlo, naruei nalo amijevio nonovio ruei, mila na vonganei nalo amonea jikili ka kiniou najaluvo easo nebinimei, jau naruei komiila kiniou.

⁹ “Nobolkouo banso vonganei, maka nosidom nobolkouo ka tomu nonovio na yetemeriba reraio vaarakurano, naruei nojidom nobolkouo lie vo rivior nalo napano jau komijelo ban kiniou, bior napano nalo abinimei abekanamo ruei. ¹⁰ Nalo nonovio na abe kiaku, abe kiamo, a nalo nonovio na abe kiamo, abe kiaku, a nalo napano jau komiilalo ka kiniou, abe burupati na kiaku mermerano.

¹¹ “Mo vonganei binimei bokar bogo napano mia kiniou neviedu easo bereio, maka nejikia noto bunu ea

yetemeriba nei, mia kanado tomu nei mia nalo atu ga. Tibe na, Karamaku lu, bo ka jau kovitkar nalo nei napano komiilalo ka kiniou, jau kovokar vatitiglo rivu joomo ea kanado m̄aratavo, ka mia amijikia amei ve takurano, tibe ka na kito juo robe takurano. ¹² Tilikiti napano nojo bijalo, nebitikar batitiglo, nobokar batitiglo yetano ka siamo. Nobitikuku batitig kalo banbano-o nalo abiniu aju batitig bo ea kiniou, mia nalo ve takurano ga kalo monoka taluvo den kiniou, tibe ka ga napano Vivitauiano Lu berialio, nina be toro napano be kenerinio navakovioano.

¹³ “Vaataro ka ga kiniou nomei bere ea jau naruei, mia nejidom neverial iliano nalo na ka bogo napano nojo kia ga ea yetemeriba nei vo, ka rila burum̄ara saariano nei nam̄a joa kiniou vonganei, mia naio mijikia rimei ve toru bunu ea nalo dolu na. ¹⁴ Kiniou nejian kanamo iliano banlo ruei, mia bogo na kulo dolu na yetemeriba nei aial nalo, aserm̄i tanea kalo. Nina bior abinimei jibe ka maka bunu ave na yetemeriba nei, javukia napano kiniou maka nove na yetemeriba nei. ¹⁵ Mia kiniou nojom̄a nobolkouo bior nalo na kaso, maka noto novika ka mia kovuru bulaglo den yetemeriba, mia kiniou nobika ka bogo napano aju kia ga yetemeriba nei, mia jau

kuvurukolo vatitigio rivu, ka mia toro kirivova nei rila lelanlo re. ¹⁶ Aiou, jau kovitkar vatitiglo, bior nalo ajibe ka kiniou ga, kumemi nube valauo ga ea yetemeriba nei. ¹⁷ A nobolkouo bunu ka mia koverloglog kanamo ilirianiano rivvanlo, ka naio rioko nonovio kialo meuliano nalo amei ave lu, ave kiamo jau takurano ga. ¹⁸ Nobolkouo kalo jibe na, bior jibe ga nam̄a jau komiila kiniou nebinimei ea yetemeriba nei, naruei kiniou nojom̄a nemiila bulaglo bunu ka avanvan eaio. ¹⁹ Nomioko kiaku meuliano vanso riviorlo, ka mia nalo bunu aioko kialo meuliano rivanso rive riano.”

Yesu bolkouo ka namoneano nalo

²⁰ Ana Yesu jo bolkouo keano, berinavo “Teta, kiniou nojom̄a nobolkouo banso, maka nobolkouo rivior nalo nei ga, mia nobolkouo bunu bior nalo dolu napano mia amonea kiniou rivior kialo iliano nalo napano abe kiaku. ²¹ Kiniou neber bo kaso Teta, ka mia nalo nonovio nei amei ave takurano, rivare ga ka kito juo. Jau, jau ea kiniou, a kiniou, kiniou easo, mia nalo bunu monoka nalo ea kito, ka mia rila napano yetemeriba momou nei rijikia rimonea ka kiniou najaluvo denso, jau komiila kiniou nebinimei yetano. ²² Burum̄ara mermerano nam̄a kejian ban kiniou, ana kiniou nejianio banlo, ka

na mia amijikia amei ave takurano tibe ka napano kito juo kito takurano. ²³ Jau, jau ea kiniou, a kiniou, kiniou ealo, ka mia amijikia amei ve takurano ea vite nonovio, a bogo napano tomu nalo na yetemeriba nei aialio, mia amijikia avitilubar ka be riano, ka jau naruei komiila kiniou nebinime, a avitilubar ka napano jau tiniemo jiilo toru laka jibe ka napano jau konoña tiniemo jii kiniou.

²⁴ “Vonganei Teta, nemil maaro jibe nei, nejidom toru laka ka nalo namā jau kejian ban kiniou, mia iorou ajikia avija kiniou ea kanado vonuo. Kiniou nejidom avija kiniou ka ajikia aial kanaku burumāra mermerano nei, napano jau komije ban kiniou beamu ea tiano na yetemeriba nei, bior jau tiniemo jii kiniou toru laka. ²⁵ Teta, jau kobe lu a komemedu, mia tomu dolu nalo na yetemeriba nei maka ajikiaso, mia kiniou nemijikia batitigso bo damariga. Naruei kiniou namila ka napano vonganei kanaku naiagagoano nalo amijikia ka kiniou najaluvo denso, jau komiila kiniou nebinime. ²⁶ Kiniou nemila napano vonganei, telabo napano amijikia kanamo bajago novo ruei, a mia kiniou nala riva lie vo, ka mia burumāra tinietiano na tiniemo jii kiniou kanio naio mijikia toalo, a ka mia kiniou bunu noto vijalo bogo

nonovio.”

Naruei volkouano na Yesu kanano ban karamāno biniu ea vio na.

18

*Abokakar Yesu
Mataiu 26:47-56; Mak
14:43-50; Luka 22:47-53*

¹ Yesu berial iliano nalo nei, naio bolkouo bisi, ana na naio jumolu jukamu ka kumemi kiano naia-gagoano nalo, numituvan Yerusalemo bereio, numiel ea buru-melijo nubatove ea bolu na Kitron tivelinio bano. Numiel nubano nubokar jioburuolivi tai na telisu namā Yesu jomā banvan eaio va telabo ruei, naruei numitu kija ea vio na beamu vo. ² Vio nei, Jutas jo jakisor kumemi liko Yesu nuban eaio va telabo ruei, ana naio mijikia batitigio bo ruei ka bogo na a pēli kumemi numitua vio na kovio. Jibe na, ka bogo nei naio ba berial Yesu ka tomu na tortoru nalo ruei, mila na amiila kialo tomu nalo ajakisorio, ana naio burumārabō kalo abinime, ea vio nei ka Yesu. ³ Nalo neibano tomu na tortoru na kulo lu bija Varisis nalo amiilalo, nina be taara tai na tomu na mira na vio Romo, bija taara tai nakukuano na Yimo Lu. Ana naloaju amiel abinime, bija blayulu nalo, bija kialo tena mira nalo. ⁴ Abinime, ajidom avokar Yesu, mia naio jomā mijikia batitigio bo ruei vite nalo napano mia riyotuba ka naio, mia bogo napano naio mial lo, naio maka riilo,

mia naio miel ku kalo ga ban ka rivitavo ka nalo, ana mil banlo, bika berinavo “? Ei, kamiu kumitumã kumisirag kei?”

⁵ Naruei nalo nei ajumolu aju napano Jutas, toro na jiveluku ka Yesu, naio jo jumolu lelan bijalo, mia nalo aberdoŕe banio, aberinavo “Kumemi numitumã numisirag kema na Yesu, napano naio tena Nasarete.”

Ana Yesu berdoŕelo, naio berinavo “Naio namã kamiu kumitumã kuber na, kiniou nene nei naruei.” ⁶ Naruei telikiti napano Yesu beriliano nei kalo, amiilo mia mila amiel davarvatu vaarakurano, ajibirbili dedade ea borotano.

⁷ A vaarakurano bereio, Yesu bika bereio denlo, berinavo “? Kamiu kuvila von ka kuver bere vonio, kamiu kumitumã kumisirag kei?”

Naruei aber bereio, aberinavo “Kumemi numisirag Yesu na vio Nasarete.”

⁸ Ana Yesu naio berinavo “Jibe ka namã kiniou neberenio ruei, kiniou nene nei naruei. A ver kamiu kubinimeĩ kar kiniou takurano ga, bo ka kamiu kumijamo ka dolu nalo nei kanaku amijikia avano ga tibe na, kuvitokol re lo.”

⁹ Naio ber jibe na kalo, mila na kiano iliano tai napano naio berial vonga ea kiano volkouano ban karamãno naio miyotuba, napano naio ber jibe nei, berinavo “Ea nalo napano komijelo ban kiniou, maka ve nalo tai kalo

napano kiniou namilaluvu naio bano.”

¹⁰ Aju jibe na, mia amilo ka napano vaarakurano ga, Saimon Pitere naio jumolu burular kiano iobogu na mira, naio babijan ban parinio toro na imãuano tai na parinio toro lu, naruei naio jetitire ea ga, mioplar tiliniene tivelinio va meruo. Toro nene siano Malkusi.

¹¹ Ana Yesu mil ban Pitere, naio berinavo “Pitere, jau kodu vatitig bereio kanamo iobogu na mira na riva joomo ea siveu nene bereio. ?Jumãbe, jau maka kosidom ka kiniou navan ea bogokouo na jogvaiano napano Teta na mave naio mije ban kiniou? Makanio, monoka navan eaio ga.” ¹² Yesu naio ber jibe na avona bisi ana tomu na mira, bija kukuano nalo na Yimo Lu, abinimeĩ abokakar Yesu jikili, amiorkar vatitig jumãno be juo, aburu naio bano.

Aburu Yesu ban ea Parinio Toro Lu kiano vio

¹³ Naruei aburu Yesu bano, amaluvo ea Parinio Toro Lu kiano burusio, ana vite na jukamu napano amilaio, aburu Yesu ba miyotuba ea vio napano tormoruo nei Anas joaio. Anas nene, naio be Parinio Toro Lu nua beamu, mia naio joa vio na kia bija Parinio Toro Lu vou, bior napano Parinio Toro Lu vou nene, naio joro ka kenerinio vevinio niatira. ¹⁴ Toro nene siano Kaivas,

mia naio naruei napano nua beamu, naio berial m̃arabo tai ban navurim̃araboiano nalo na kulo Ju kialo. Naio berinavo verver amial ka monoka auebin toro tai ve takurano ka rilurur tomu ve telabo kialo meuliano, naio mijikia rijamo ka rivu ga.

Varbonbonuano moti napano Pitere mila ka Yesu

Mataiu 26:69-70; Mak 14:66-68; Luka 22:55-57

¹⁵ Jibe nei naruei, aburu Yesu ban ea vio napano Anas joaio, ana ea bogo na, kumemi juo Saimon Pitere numitu numitakisorlo. Beamu kumemi juo Parinio Toro Lu nei nuburon vio takurano, naruei amijamo ka kiniou natakisor Yesu nava jouro, mia aberbure Pitere jo bo. ¹⁶ Aber naio to tavio ga ea morouo, mia bogo napano nemial jibe na, nabano bereio, nemil ban toro na toru nei kiano niatira na im̃auano tai, napano jikili jua morouo. Ana niatira nei mijamo ka kiniou ka novuru Pitere bunu riva jouro. ¹⁷ Mia bogo napano Pitere jo binimej jouro, niatira nei mialio, bika denio, berinavo “?Ana jau bunu kobe naiagagoano tai na toro nei kanano, ina?”

Mia Pitere naio mijogio, miilo kanio ana berdoŋe mila sibililio, berinavo “Ee, makanio.”

¹⁸ Ana Pitere naio mial ka napano tomu na im̃auano bija kukuano nalo ajovokar sebi tai ka vovojulu, ana ajumoluaju jeliu eio amijegilo, mia naio bunu ba

vaataro kalo, jo mijegi naio eio.

Parinio Toro Lu moruo Anas mila vikadeniano nalo den Yesu

Mataiu 26:59-66; Mak 14:56-64; Luka 22:66-71

¹⁹ Naruei amila Yesu jumolu ju jukamu ea mirano Parinio Toro Lu moruo nei Anas, ana naio bika vite telabo denio. Naio bika jumabe ka naiagagoano nalo napano amonmonea naio, a bika denio ka tivelinio na verloglogiano nalo nam̃a naio joña jian banlo. ²⁰ Mia Yesu maka river vite ve telabo vanio, mia naio ber vatitigio ga banio, berinavo “Vite nonovio napano nojoña neberloglogio, kiniou maka lele neverloglog lukuvanio mia kiniou nojoña neberialio ea vio medave meravo banlo abiniu. Dam̃ariga nojoña neberloglog kiado kulo Ju joomo ea yimo na volkouano, ŋeli na joomo ea Yimo Lu, naruei dam̃ariga nalo miroano ajum̃a amiagago ka kiniou. ²¹ ?Tibe na, bior venia ana jau kobika den kiniou ka neberlogloglo jumabe? Ver jau kosidom kejikia, mia bo ka jau kovika von nalo nam̃a dam̃ariga ajum̃a amiagago ka kiniou. Nalo amijikia batitigio na.”

²² Mia bogo na Yesu ber iliano nei, nakukuano nalo tai kalo napano naio jikili ju vaataro kanio, naio mijogio jibe ka Yesu joña miyotel ea toro na toru nei, naruei naio

mijuba Yesu, mil banio berinavo “?Ei, jau be tiniemo ka koverdoŝe toro lu na kanado ka iliano na jibe na! Jau kovitikarso.”

²³ Mia Yesu berdoŝeio berinavo “Kovitii vatitigio vonio kanaku iliano nei. Ver nomila sibi, bo ka jau koverial ea nalo na miralo, ka namila sibi juŝabe. Mia ver maka never vite tai napano maka rimemedu, bior vaio ana komijuba kiniou?”

²⁴ Ana kario, aburu Yesu, napano amiorkakar juŝano nalo kia ga vo, ajaluvo den tormoruo Anas, aburu naio ban ea komeli na Parinio Toro Lu Kaivas kanano, ana naio mila vijagiano kanio.

Varbonbonuano valuo napano Pitere mila ka kiano Tubo

Mataiu 26:71-75; Mak 14:69-72; Luka 22:58-62

²⁵ Mia Saimon Pitere jikili ju bijalo ea tivelinio na sebi, aju amijegilo, ana abitolubar kija naio, ana abika denio aberinavo “?Juŝabe, ŝeli jau bunu kobe toro na kiano naiagagoano tai?”

Ana naio berbure, naio berdoŝe berinavo “Makanio, kiniou maka neve kanano.”

²⁶ Pitere berdoŝe jibe na, mia nalo tai napano mŝa ajumolu aju na naio be Parinio Toro Lu kanano toro na iŝauano tai, napano naio be torogio tai nanua Pitere jelar buru tiliniene meruo. Naio jikili lie vo ka bika bereio den Pitere, naio berinavo “?Peli jau maka kove kanano tai, mia kiniou be tinieku ka

namialso bija naio yako ea buruolivi ruei?”

²⁷ Mia Pitere milavano jikili, naio barbonbonua varolu ka ninei, naio berinavo naio maka rijikia Yesu, mia monloglog ka aura nene ana amijog tormano jokokoreko.

Aburu Yesu ba jikili jukamu ea Pailat mirano

Mataiu 27:1-2,11-14; Mak 15:1-5; Luka 23:1-5

²⁸ Naruei viomijeni mereravo kia ga vo, maka viorijeni vatitig vo, mia Kaivas naio mil ban Yesu ruei, naruei aburu naio ajaluvo den vio nei bereio, aban ea Pailat kanano komeli. Pailat naio be toro na toru napano kulo Romo abitirilar naio ka rije tuboiano ea buruvenuo na kulo Ju nalo kialo.

Mia ka bogo na abinimei vaatara ka kanano komeli, kulo Ju nalo kialo navurimŝaraboiano tinielo maio ka jibe ka napano Abel ka ava joomo ea yimo nei, ajidomii ver ava joomo eaio mia rila amei ameravo re bunu ea Atua mirano, mia ajikia re ka avijurukarlo ka sinaniano na Jokoluolu na Sidomkariano na Ioruriano. Tenene na, aburu Yesu, abinimei aju tavio ga, mia maka ava joomo. ²⁹ Ana aberial ka Pailat, ana naio binimei tavio mial lo, bika denlo, berinavo “Mo, kamiu kuver von kema nei mila venia na bova ana kuburu naio binimei jua miraku kavijova niogoravo nei jibe na.”

³⁰ Ana nalo aberdoŝe, aberinavo “Maka, kumemi

numijikia nuver kaso ka toro na, naio mña mila kirivova-o mia! Ver ðeli, mia kumemi maka nuvijikia nuvuru rimei vanso.”

³¹ Ana Pailat berinavo “Ver tibe na, mia kamiu ga kumijikia kuva kuvisian viro-niano na vabe van naio napano memedu ka kenemiu tuboiano.”

Naruei navurimãraboiano na kulo Ju nalo aber kanio aberinavo “Ea kenememi tuboiano, kumemi numijikia nuvitibure naio ka atuba bin riñaro, mia vonganei tuboiano na vio Romo naio berbure kumemi bereio ka mia kumemi maka nuvijikia bunu ka nuvila tibe na. Jau takurano ga, kobe toro na toru na parinio tubo na vio Romo kanano, jau ga komijikia kalaio, jau ga komijikia koverinavo asian vironiano na mñariano rivanio ea makolkolo.”

³² Mia bogo napano amije iliano nei ban Pailat, maka ajikia, mia aju amila Yesu kiano iliano tai re nua naio binimeĩ be riano. Nina bior naio berial kiano mñariano ruei, berenio memedu ga ea venia napano kulo Romo nalo ajumña amila, napano ajuk kakar toro ea makolkolo.

³³ Mia Pailat jidom ril kija naljuo Yesu ga, ana naio ba joomo ea kiano komeli, naio bio ber Yesu rimei rial naio vo. Naruei amiila Yesu ba joomo, ana Pailat bika denio, berinavo “Kiniou no-jidom ka jau koverial vatitig rivu van kiniou. Jau kobe

Parinio Tubo na kulo Ju be riano, ðeli na makanio?”

³⁴ Mia Yesu maka riverdoðe rimemedu rivanio, mia naio berdoðe liliu ea navikadeniano tai, naio berinavo “? Kanamo vikaniano na, jau kobika vatitigio, ðeli na jau kobika den kiniou bior venia ga napano jau komijog nalo dolu ajumña aber niegeniege kiniou kanio?”

³⁵ Ana Pailat berdoðeio, berinavo “Ii, kiniou maka nejikia den kamiu kulo Ju nalo, kiniou maka neve kamiu tai. Kiniou nemijikia ga ka kanamo tomu nalo naliko tomu na tortoru na kulo lu nalo na kenemiu, nalo aburuso kobinimeĩ ka netibureso. Jibe na, nojidom nejikia ga ka jau komila venia napano nalo amialio maka rimemedu?”

³⁶ Ana Yesu berdoðe, berinavo “Nalo ajidom ka jau monoka ketibure kiniou, bior ka napano nalo maka asidom kiniou neve tubo kalo. Mia kanaku tuboiano naio maka tibe ka tuboiano nalo na yetemeriba nei. Kanaku tomu nalo maka ala mira vija nalo na abinimeĩ ka avokakar kiniou ruei na, ka mia kiniou navan ea re kenememi tomu na tortoru na kulo Ju nalo jumalo. Kumemi maka nuve tomu na mira tibe na, bior kanaku tuboiano naio maka ve tena yetemeriba nei.”

³⁷ Ana Pailat berkanio, berinavo “?A na mña ka nomi-jog koberii kiamo tuboiano,

jibe ka napano jau kobe parinio tubo tai ruei ina?"

Ana Yesu berinavo "Naina naruei! Jau kobakario vatitigio kiana, javukia napano jau koberenio. Kiniou nebinime i yetemeriba nei, nomiyotuba eaio, kar vite na ga naruei, a ka kiniou nemei neverial ilirianiano nalo van kiano tomu nalo. Toro na ma naio jikili ju tivelinio na ilirianiano, mia naio riagago rivu ka kiaku iliano."

³⁸ Naruei Pailat bika den naio bereio, berinavo "Ana kei mijikiaio, ilirianiano naio be vaio na?"

Pailat jidom tuvan Yesu rivan bereio

Mataiu 27:15-31; Mak 15:6-20; Luka 23:13-25

Telikiti napano Pailat ber iliano nei bisi, naio jumolu batavio bereio, ana naio berial ka kulo Ju napano ajikili aju tavio, naio berinavo "Tete na, kiniou nobitiio ruei mia maka naleal vite na bova tai toa naio leleio. Bo kanio naio mijikia riva tavio bereio ga tibe na. ³⁹ Mia ver kamiu kuvituma tiniemiu rimao, ka yuka nonovio, ea jokoluolu nalo nei, nojomna noburular kamiu tai napano joa nalakoiano, nomijamo ka naio biedu bereio ea kamiu jibe na ga. Naruei kiniou nemial jibe ka ea yuka nei, naio bo ka ver kiniou notuvan toro nei, kenemiu Parinio Tubo kulo Ju nalo, naio riviedu ea kamiu tibe na ga."

⁴⁰ Naio berial jibe na, mia nalo maka asidomio, amiaga burelo aberinavo "Makan,

maka leleio, kumemi maka nuvisidom toro na. Kotuvan dolu na Barabas rimei maluvo kean kumemi bereio." Barabas na ma aberio, naio be toro Ju tai napano nanua mila baravo die kulo Romo nalo.

19

Pailat mijamo ka avitiv Yesu

¹ Mia Pailat naio jidomii ka tuvan Yesu rivano, mia tomu na tortoru na kulo Ju nalo ajikili ka aberbureio. Ana Pailat jidom rila titai ka asaaro kanio, ana naio miila kiano tomu na mira ka alavon ka avitiv naio kija beamu vo. ² Mia na mira nalo aburu naio bano, abar nionoti tilikibi abili vatitigio bo, ana amidu joa pariparinio jibe ka toro na toru tai kiano batubatu. Mia abar kulukoti na bo tai napano be si, jibe parinio tubo mana, amiya ea naio. ³ Ana aju lilie abinime i vaataro kanio, abeve terakurano amiyotel eaio, aberinavo "! Parinio tubo na kulo Ju nalo kialo, aiou! ! Kumemi nubatove kaso!" Aber iliano nei kanio, ajuma amijubajuba kulbibinio.

⁴ Bisi na iorou kanio, ana Pailat naio ba tavio bereio kean tomu na tortoru na kulo Ju nalo kialo napano aju tavio kiano, naio berial kalo, berinavo "Mo, vonganai kiniou nojidom kamiu monoka kuvitilubar ka kiniou maka bunu neleal ka kema nei, vovaiano joa naio leleio, naina naruei mia kiniou novuru rimei rivan

kamiu bereio.” ⁵ Naio ber jibe na, ana Yesu naio miyotuba tavio, jikili ju kamu ea miralo, bija batubatu na tilikibi ea parinio bija kulukoti napano amiya eaio. Naruei Pailat berial ka kulo Ju nalo, berinavo “Nainei naruei be kenemiu toro na toru!”

⁶ Mia tomu na tortoru na kulo lu nalo, bija navitikariano nalo na Yimo Lu, bogo napano abitilubar venia napano Pailat naio jidom rilaio, nalo maka lele asaaro kano naruei, nalo ajuma amiaganiaga, aberinavo “Kuvituku kakar naio ea makolkolo! Kuvituku kakar naio ea makolkolo!”

Mia Pailat maka bunu rijikia tovulu lo naruei, mijamo, berinavo “Mo, ea kanaku vitiano, kema nei naio maka rila vite tai vova lele garuei, a verver kuvisidom, kamiu ga kuvuru naio kuvituku kakario ea makolkolo.”

⁷ Mia bogo na amijogio, maka asaaro, aberinavo “E makanio! Komijikia ruei ka maka nuvijikia nuvila tibe na. A be riano, bo ka kema na naio rimaro, bior naio milakorov kenememi tuboiano. Naio joma milavonio ka vavavinia naio tulaka, ka ver naio be Atua kenerinio. A jau ga naruei komijikia kala rimaro.”

⁸ Mia bogo na Pailat mijogial vite nei, burumara moroano tai binimeia naio bereio, naio jo jidomii toru ka Yesu naio be toro na vabe bereio, ⁹ ana naio ba joomo ea kanano komeli bereio,

naio bio Yesu binimeia, bika denio, berinavo “?Jau, vio na vabe naruei naio be kanamo vio memedu?”

Naio bikanio, mia Yesu maka ril, maka river titai vanio. ¹⁰ Mila na Pailat naio berinavo “Ei, jau koma naio maka keil tibe na, jau ga komila bulagso bereio. Boka kano jau kover titai van kinio, bior kinio naruei, joa kinio ka nala venia napano nojidom nala vanto. Ver nosidom jau kava tavio bereio tibe na ga, kinio nemijikia nalaio, pli na ver kinio nosidom kamaro ea makolkolo, kinio nemijikia nalaio. Vede jau komijikia vite na naruei?”

¹¹ Vonganei Yesu mil naruei, naio berdope banio, berinavo “?Peli jibe na kovio, mia be kei na naio mije moroano na banto ka kala tibe na? Verver Toro na toru na mave naio maka rijamo ka vanto, maka kejikia kala titai ka kinio leleio. Ver koverinavo kinio namaro, nina be kiamo voviano tai ruei, mia naio napano midu kinio nojoa juma, naio mila bova laka, naina be kiano burumara kariano tai na.”

¹² Telikiti napano Pailat mijog Yesu mil jibe na, naio milavon bereio naio jidom ka tuvan naio rivan ga tibe na, mia kulo Ju nalo kialo tomu na tortoru abio bereio, aberinavo “Kema na naio barvar ka naio-o mia, berinavo naio be parinio tubo tai, naio jidom rila naio to mave, ka kanamo toro na

toru nei Parinio tubo Sisa naio totano. Tibe na, ver jau kotuvan naio rivano ga tibe na, jau komila iñauano tai napano mia Sisa naio maka saaro ka leleio ga, mja rivuku larso den kiamo iñauano na.”

¹³ Nalo aber jibe na, mila na Pailat kiano jidomiano beve juo bereio ana naio mila aburu Yesu ba tavio ea komeli bereio, ana ba jotano mave ea kiano vio tai na tibureiano, napano abio ka Puruveru Vodobi, ħeli na napano kulo Ju abio ka Kapata. ¹⁴ Ana ka bogo na, binimei bokar niogoravo naruei, nina ea legiano na imoniano na vite nonovio na beni nene napano be burumara legiano na Jokoluolu na Sidomkariano na Ioruriano.

Mia Pailat naio jotano mave ruei, naio jiloglog Yesu ban tomu na tortoru na kulo Ju nalo napano ajikili aju yetano aju, naio berinavo “!Nina naruei, be kenemiu Parinio Tubo nei!”

¹⁵ Mia maka asidomio, amiaga koko vio laka, aberinavo “!Kuvurular naio rivano! Kuvituku kakario mave ea mākolkolo, kuvuebin riñaro!”

Ana Pailat naio berdoĥe banlo, berinavo “!Tomnei? Juñabe, kamiu kumisidom ka kiniou nala ka napano mia auebin kenemiu Parinio Tubo nei?”

Naruei tom na tortoru na kulo lu nalo aberdoĥe, aberinavo “?Kei naio ber naio be kenememi Parinio Tubo? Toro na toru Sisa naio

ga takurano be kenememi Parinio Tubo.”

¹⁶ Mia Pailat mial ka ajikili laka, mo naio mijamo ka Yesu banlo, midu naio joa juñalo ka atukukakario ea mākolkolo, tavukia napano nalo ajidomio.

Ajukukakar Yesu ea mākolkolo

Mataiu 27:32-50; Mak 15:21-37; Luka 23:26-46

¹⁷ Pailat midu Yesu joa juñalo, naruei nalo aburular naio bano. Mia bogo napano aju abano, amila napano Yesu midu ga bereio kiano mākolkolo, naruei ajukamu kanio aba abokar suku sesa napano sano veru nene nalo ajavukia bordada na kulorinio tai, napano abio jelea iliano na Ipru aber Kolkota.

¹⁸ Ea vio nene naruei, ajukukakar Yesu ea mākolkolo, a bija tom juo dolu bunu, tinene jo tivelinio ka naio, a tinene jo tivelinio a naio jo iviso kalo.

¹⁹ A Pailat kiano iliano tai, naio berii kalo ka avivitauiā bisi na atukukario to mave ka Yesu parinio, jibe napano naio ber “Yesu re Nasarete, kulo Ju nalo kialo Parinio Tubo.” ²⁰ Iliano nene, abivitauiā jel ea iliano tolu, Ipru na kulo Ju kialo, Latin na kulo Romo kialo, a Krik na kulo Kris kialo, naruei amidu jo mave ea Yesu kiano mākolkolo. Vio na mākolkolo nei naio vaataro ga ka bulukomeli, mia tomu nalo nañña ajumña amiel abinimei mña abarvar

laka ea vio nei amial iliano nei ana ajumã abulukuio. ²¹ Mia tomu na tortoru na kulo lu nalo na kulo Ju nalo maka asaaro ka iliano nei. Nalo aberilubarbar ban Pailat, aberinavo “Toro na toru, jau koberenio avivitauiã tibe nei aver ‘Parinio Tubo na kulo Ju kialo,’ jau kober maka rimemedu laka. Kumemi numisidom ka avilig bereio, avivitauiã tibe nei, aver ‘Naina, naio ber be kulo Ju nalo kialo Parinio Tubo.’”

²² Mia Pailat maka sidom, naio jidom ka tobo ga tibe ka napano naio berenio, ana naio berial banlo memedu, berinavo “Vite napano nebivitauiã, nebivitauiã ruei.”

Namira nalo ajanika Yesu kiano kulumãarauo nalo ealo

²³ Tomu na mira nalo ajuku kakar Yesu naltolu ea kialo m̃akolkolo, mia amijilimebi. Tomu na mira nalo nei nalo veri, abokar Yesu m̃ano kulumãarauo nalo, mia aberinavo atan kalo ea taara ve veri, tai kanano tai, tai kanano tai, jibe na. Nalo ajanka jibe na ba bokar Yesu m̃ano kulukoti na toru, mia maka asidom ajede kokorovio niati ve veri ealo bior kulukoti nene, maka aiasosolio, mia amim̃auka ea burum̃ara niati kulumãarauo takurano ga. ²⁴ Mila na aberver kalo, aberinavo “Maka rivu ka rejede lelan kulukoti na, mia bo ka kito reiere m̃abujo ga riviorio.” Mia maka ajikia, mia nalo ajumã amila

memedu ga ka iliano tai ea iouano tai ea Niosi Lu na Iouano re nua ruei. Iliano nene naio ber jibe nei, naio berinavo

Ajanka m̃aku kulumãarauo jan ealo,

mia amiere m̃abujo ka m̃aku kulukoti. Iouano 22:18

Iliano nei naio ber jibe nei, memedu ga ka venia napano tomu na mira nalo amilaio.

Yesu mil ban kenieno

²⁵ Nalo ajelan Yesu mave ea kiano m̃akolkolo jibe na, a ea nalo napano m̃a ajikiliaju vaataro ajumã abitio, be tira veri. Nalo nei be Yesu kenieno, a kenieno dolu na teliki, a Mere napano koano Klopas, a Mere na vio Mak-tala. ²⁶ Ana Yesu jirarag batove, naio mial kenieno, a naio mial ka napano kin-iou bunu, napano kumemi juo nube kuruememi, nejikili noju vaataro, ana naio berial kin-iou ban kenieno, naio berinavo “Tiramoruo, ninei be kenerimo nei naruei.” ²⁷ Mia naio mil ban kin-iou bunu, naio berinavo “Naina, be koniomo nei naruei.”

Mia jikar ka bogo na, kin-iou noburu tiramoruo nene binimei mon ea kiaku vonuo, kin-iou nobitikar batitig naio bo jibe ka kenieku.

Yesu naio m̃aro

²⁸ Yesu naio mijog bova mave ea m̃akolkolo banbano-o naio bitilubar ka kiano im̃auano naio mila nonovio biniu ruei, naruei naio berial berinavo “Midou

jer kiniou.” Nina be kiano iliano tai bereio napano naio ber ka iliano tai ea Niosi na Iouano Lu nalo rime i rive riano. ²⁹ Mia nalo amijog ka napano naio ber midou jerio, naruei nalo amidu burujumu tai, abudom ea m̃alo m̃arjuml̃m̃elu tai napano jua baju tai, ana nalo amiyukuru kar ka jaiesi tai, ajian bavin jokol Yesu niono. ³⁰ Marjuml̃m̃elu nei jokol niono bisi, ana naio berial iliano tai, naio berinavo “Biniu binu naruei.” Mia bogo napano naio ber iliano nei, naio jurubanini ka parinio, naio mijamo ka niununo bano, naio burum̃aria kiano jegi ana m̃arodobi.

Amiuldulu Yesu merikono

³¹ Bogo napano Yesu m̃aro, nina ea legiano viovare ea legiano na lavatitigiano na vite nonovio na Jokoluolu na Sidomkariano na Ioruriano. Jibe na mia beni nene, naio be legiano lu na toru na jokoluolu nene, mia ea bogoti na, be lu laka ka atokol mokotenano kulorinio na m̃aro. Mila na tomu na tortoru na kulo Ju nalo ajidom ka monoka avar bulag mokotenalo tomu tolu nei beamu, karina m̃erenio rijoru. Mia amerou ka tibe m̃a nalo tolu nei tai maka rim̃aro vo, naruei amila toru ba ban Pailat, abika ka ver amijikia asavokokorov jaalo ka am̃arm̃aro soṑeli. ³² Ana Pailat mijamo kanio, mia kanano tomu na mira

nalo abinimei ajavo korovio naio jaano napano ajukar naio ea m̃akolkolo tivelinio ka Yesu, karina amila ka nalo tinene. ³³ Mo nalo abano ka ala ka Yesu bunu, mia amial ka napano m̃arodobi ruei, mila na maka bunu ala kanio.

³⁴ Mia na mira tai midu kiano mira, julululu Yesu merikono tivelinio, naio miyuku ba joomo banbano-o amial ka napano burum̃ara burukija bija uei miararo batove. ³⁵ Naruei vite nei naio be riano laka, bior ka napano kiniou namial ka miraku. Nomijikia ka be riano, ana neberial ka kami, naruei kami bunu kumijikia kumonea ka vite nei naio be riano ga. ³⁶ Vite naio nei ama-luvo jibe na ka rila iliano nalo na ea vivitauiano lu nalo re nua amei ave riano. Iliano tai naio ber jibe nei, berinavo

“Maka bunu na niabene tai napano mia rivurikorovio,” Iouano 34:20

³⁷ a dolu nene naio berinavo *“Ajulu niegeniege lelan naio, bisi na mia atu avitii naio.” Sek 12:10*

Naruei bajago na Yesu kiano m̃ariano naio jibe ga na napano iliano nalo na aberialio nuanua ruei.

Amidu Yesu mokotenano mon ea buluvae

³⁸ Mia toro na toru tai na kulo Ju nalo kialo, siano Yoseve, na vio bulukomeli na Arimatea, naio be Yesu kiano naiagagoano tai kirisioi kija ruei, mia

naio joña milavan kiano moneano ka napano naio joña mermerou ga ka tomu na tortoru dolu nalo. Mia bogo napano kiano Tubo naio m̃aro, karina merouano nei bakovio, naruei naio ban ea Pailat mirano, bika Yesu mokotenano. Ana Pailat mijamo kanio, ana naio ba midular Yesu mokotenano ea m̃akolkolo. ³⁹ Mia toro dolu tai naljuo Yoseve ka bogo na, nina be Nikotimas m̃a napano beamu, naio ba lukuluku ga ka riva rial Yesu ea bogiano tai ka ritukunu vijaio. Naruei Nikotimas naio binimeĩ ka bogo nei, naio bar bunu saba tai binimeĩ ka rujuvuluko batitig ka Yesu mokotenano, bija burum̃ara bam̃aatei tai, napano natemiiano nene juvulu kilo duelimo va rolu [30]. ⁴⁰ Naruei nalo amidu Yesu mokotenano, amijuvulukoio ka kulum̃arauo nalo napano mivu, bija m̃aatei nalo neibano jibe ka nam̃a kulo Ju nalo ajum̃a amilaio julaka ea kialo m̃ariano nalo. ⁴¹ Amijuvuluko bisi, mia vaataro ga ka vio napano ajukukakar naio m̃aro ea, tiniavio tai jo, mia jouro ea tiniavio nene be bulukuṽili vou na puruveru tai jo, napano aje vonga ka adu tasim̃aro romoneaio, mia maka ve tai rivan ea vo. ⁴² Naruei amial ka vaataro napano m̃erenio rivatove, bogo bulati ga ana Legiano Lu tikario, naruei amidu Yesu mokotenano

mebi joomo ea vio nene.

20

Buluvaẽ be teau jo

Mataiu 28:1-8; Mak 16:1-8; Luka 24:1-12

¹ Amidu Yesu mokotenano mon joomo ea buluvae nene, joa bano-o bokar legiano moti na sude dolu. A be tire nalo tealo kalo, jibe ka Mere na vio Maktala nalo, ajumolu kavijova niogoravo amiel ea vio bobogio abinimeĩ ea buluvae.

Mia bogo napano abinimeĩ vaataro, amiilo va ka napano burum̃ara puruveru maka bunu toko buluniono buluvae, amelivilivilar kanio ruei jo mon tivelinio ka ga. ² Mia bogo napano Mere naio mialio, naio barṽilig jikiti ban bereio, naio binimeĩ mial Saimon Pitere bija kinioa nam̃a kumemi juo Yesu numitibe kuruememi, naio berialio ka kumemi juo, berinavo “!Ai, abe Yesu mokotenano ba kovio tai ruei! Amidu lario ba kovio, kumemi maka nuvijikia ka naio jo be naruei.”

³ Kumemi juo numijogio, naruei numitumolu nuban soṽeli ea buluvae.

⁴ Numitikiti nubano, mia nojovulu Pitere, noboru ea vio nene jukamu, mia Mere bunu jakisor kumemi binimeĩ bereio. ⁵ Nabano naboru ea buluvae, naban vaataro neminiadu ba joomo ea vio nei napano amidu Yesu mokotenano mon eaio. Mia maka bunu

neialio, mia nemial ga kulum̃arauo napano amijuvuluko ka Yesu, jibirbil jibe na ga aju, mia maka nava joomo. ⁶ Mia maka vesiou ana Saimon Pitere naio iorou binimeijaka ba joomo ea buluvae. Naio mial kulum̃arauo nene nalo, jibe ka ga napano amijuvuluko ka Yesu nua viomijeni niovo ruei. ⁷ Mia be ielikono tai, napano amiorkar ka Yesu parinio, naio maka to vija kulum̃arauo nalo, mia amijuku batitigio bereio jo naio takurano.

⁸ Pitere naio jom̃a bitii vite nalo nei jibe na, mia kiniou bunu naba joomo nebitiio. Nubitiio jibe na, numijikia naruei a numonea ka napano Yesu jumolu bereio meul den nam̃ariano ruei, be riano mia be riano.

⁹ Beamu, kumemi na-iagagoano nalo maka nu-visidomiio ka mia tibe na, bior napano maka nuvijikia ka napano Vivitauiano Lu nalo ajum̃a aberialio ruei ka mia kiado Naverikariano monoka rim̃aro karina mia naio rimeul bereio. ¹⁰ Beamu, maka nuvijikiaio, mia vonganei kumemi juo numialio ka mirememi. Naruei nubitiio banbano-o, bisi ana kumemi nuban bereio vonuo.

Mere na vio Maktala mial Yesu

Mataiu 28:9-10; Mak 16:9-11

¹¹ Kumemi juo nuba vonuo bereio, mia Mere naio jikili ju tavio ea niono buluvae

nei ga ju jogumirano jibir-bili. Naio jom̃a jegi jibe na banbano, mia naio jirarag ba joomo ea buluvae, ¹² naruei naio miilo bereio ka nailiano juo amiya kulum̃arauo napano miuvuruvu laka, aju ajutano mave. Tinene jotano ea vio napano beamu Yesu parinio mebi eaio, a tinene naio jotano ea vio na jaano ban eaio. ¹³ Ana naljuo amil ban Mere, aberinavo “?Koig, jau kojom̃a kejegivaio?”

Naio berdoŋe berinavo “Amidular kanaku Tubo bakovio tai, maka nejikia ka amidu naio mon be naruei.” ¹⁴ Naio ber iliano na, karina naio jiraragodi bereio, naio mial toro tai jumolu jikili ju. Naio maka rivitilubario, mia be Yesu nene.

¹⁵ Naruei Yesu bunu bika denio, berinavo “?Koig, jau kojom̃a kejegivaio? Kojom̃a kejjirag kei ea vio nei?”

Mia Mere naio beriam̃a toro na im̃auano ea vio nei ga, naio berdoŋe banio, berinavo “Toro na toru, ver jau naruei komidular naio ea vio nei, aiou, jau koverial ka kiniou vio be naruei komidu mokotenano joaio. Kiniou nojidom ka nodu rimeij to vatitig ea jeleigio bereio.”

¹⁶ Naruei Yesu bio Mere ka siano, berinavo “Mere!”

Naio mijogio, ana bariŋiligio, bitilubar ka be Yesu, ba vaataro kanio, bioio mije kialo iliano, berinavo “Raponi!” napano nioti na iliano nei berinavo “Naverloglogiano.”

¹⁷ Ana Yesu ber kanio, berinavo “Mere, to, kotokol

re kiniou tibe na. Kiniou maka najikia notoa vio nei, bior maka nava mave vo ea Teta. Mia bo jau kavavan ea kuruaku nalo, koverial kalo ka kiniou neber jibe na, ka vonganei, kiniou nojo nabavin mave bereio ea naio napano be karamaku, a be karamemiu, napano be kiaku Atua, a be kenemiu Atua.”

¹⁸ Ana Mere na Maktala naio mila jibe na naruei, binimei bereio ea kumemi naiagagoano nalo, berialio berinavo “Kiniou namial Tubo ka miraku,” a naio berial ka kumemi vite nalo namia Yesu berkanio.

Yesu miyotuba ka naiagagoano nalo

Mataiu 28:16-20; Mak 16:14-18; Luka 24:36-49

¹⁹ Ana ea legiano moti na sude nei kia ga vo, kijev nene, na kumemi naiagagoano nalo numitu vio takurano joomo ea vio namia numitua numituluku eaio. Nubukar batitigio m̄aratavo nalo, bior ka napano numerou ka tomu na tortoru na kulo Ju tiniel ser kumemi bunu, tavukia namia tiniel jer Yesu beamu ruei. Numitu jibe na, mia kolvare ga, Yesu maluvo binimei jikili ju iviso ka kumemi, berinavo “! Tum̄aroano to vija kami!”

²⁰ Naio ber jibe na, karina naio jiloglog ka kumemi ka jeleig butoto nalo ea jum̄ano bija burum̄ara niajebijo na ea merikono

tivelinio. Numialio, mia bogo napano nubitilubarario ka be Tubo, numisaaro mia numisaaro. ²¹ Naruei naio ber ka kumemi bereio, berinavo “Tum̄aroano to vija kami!” A naio jusolio, berenio “Javukia ga napano Karamaku naio mila kiniou ka nala kiano im̄auano, naruei kiniou neiila kija kami bunu ka kuvila tibe na.”

²² Iorou ka nina, naio miuvu jegi binimei ea kumemi, naio berinavo “Kami kuvokar Niununo Lu. ²³ Toro kei napano ver kami kuviekokoa naio rivior kiano kariano, mia kariano nene taluvo den naio, mia toro kei napano ver kami kuviekokoa re naio rivior kiano kariano, mia kariano nene to dam̄ariga ea naio.”

Tomas mialio ana naio moneaio

²⁴ Telikiti napano Yesu maluvo ea kumemi, kumemi tai maka to, nina be Tomas Savoro. ²⁵ Iorou kanio, numial naio, nuberialio kanio, nuberinavo “! Tubo naio maluvo ea kumemi, numial naio ruei!”

Mia naio maka sidom rimoneaio, berinavo “Makanio, kiniou monoka naial naio ka miraku. Ver kiniou naial re jeleig butoto ea jum̄ano, a notokol ka m̄arjukujum̄aku nei, a ver kiniou nasian re jum̄aku nei ea niajebijo ea merikono, mia kiniou nomonea re ka naio meul bereio.”

²⁶ Tomas berial kanano jidomiano nei, mia sude

21

takurano barlaka bano, na kumemi numitu vio takurano bereio ea vio nei nua. Ea bogo nene Tomas bunu jo kumemliko, a m̃aratavo nalo ajetavo batitigio bo aju, mia Yesu miyotuba ka kumemi vaarakurano bereio, berinavo “!Tum̃aroano to vija kami!”²⁷ Naio mil ban Tomas, berkanio, berinavo “Naine be jum̃aku, jau koyuku m̃arjukujum̃amo, kotokol veveio. Naine be merikoku, jau kodu jum̃amo toaio. Jau kovitovtonia re bunu, koviekar kiniou sikili.”

²⁸ Tomas mijogio, bitii Yesu, naruei berdoŋe berinavo “Kanku Tubo, jau kobe kanku Atua!”

²⁹ Ana Yesu berkanio, berinavo “?Jum̃abe, jau komial kiniou, ana komonea kiniou? Nina bo, mia burum̃ara ilivuiano toa nalo napano maka aial kiniou vo, mia amonmonea kiniou ruei.”

Iliano na maaro tai

³⁰ Saba miroano napano Yesu milaio, nebivitauiua jua niosi nei ruei, mia naio mila burutomoluo dolu telabo bunu ea mirememi napano maka nevivitauiua bulagio.

³¹ Mia iliano nonovio na jua niosi nei, be tena rijai kamiu kumijikia kumonea ka Yesu naio be Naverikariano, naio be Atua kenerinio riano. Naruei kenemiu moneano ea siano na, mia ve m̃arabo na mia kuvokar meuliano ea naio.

Yesu naio miyotuba bereio, ka kiano naiagagoano aluo

¹ Iorou kanio, kumemi naiagagoano nalo tealo numitua burum̃ara ueiyabo nei na Taiperias, ŋeli na Kalele, ana Yesu miyotuba.
² Kumemi napano numitu ea bogo na, be Saimon Pitere, Tomas Savoro, Nataniel na vio bulukomeli na Kenan yako Kalele, kiniou bija kuruaku na toru na Yemesi, bija kumemi juo bereio. Naruei Yesu kiano yotubaiano ea bogo na naio jibe nei.

³ Beamu, Saimon Pitere naio berial berinavo “Mo, kiniou nava novuku levlevi tavio beamu vo.”

Naruei numitumolu nuberinavo “Bo ga, kitom̃a rovinu.” Naruei nubatove, numidu uako nuba nubuku levlevi. Naruei numitua tei bano-o bokar viomijeni, mia maka lele nuvokar niado tai.

⁴ Mia bogo napano viomijeni mermeravo, Yesu binimej jikili ju uro ea vio nei, numialio ka be toro tai ju, mia maka nuvitilubar ka be naina naruei.

⁵ Ana Yesu bio ban kumemi, bika ber “?Keneriku nalo, kubar kija niado ŋeli na makanio?”

Naruei nuberinavo “Maka leleio.”

⁶ Ana naio berinavo “Mo, kuvila tibe nei. Kuva kuvuku bere kenemiu levlevi, mia kuvuku re bunu tavukia beamu, kuvila

von ka kuvituvarvanio ea jumemiu meruo beamu vo, mia nomijikia ka mia kuvokar niado tealo.”

Kumemi maka nuvitilubar ka be Yesu na jo mil, mia nubano numituvarevan levlevi javukia ga napano naio berenio. Mia vaarakurano ga bujo, niado mia niado, mia bogo na kumemi nuburu vonio ka rimeí mave numila deio ga, naio temi laka ka niado.⁷ Ana vonganei nubitilubar ka be Yesu, ana kiniou napano kumemi juo Yesu nube kuruememi, neber ka Saimon Pitere, neberinavo “Pitere, keialio. Tubo yako ju.”

Bogo napano Pitere naio mijogio jibe na, ana naio jumolu vaarakurano, miya kiano kulukoti bereio, biako batove ea tei, mia ba uro.⁸ Maka nuvitu laka ka vio uro, titai jibe ka meta toromomou takurano [100], mia Pitere naio jukamu ka kumemi, ana numidu uako kumemi iorou, napano nuburude lilian levlevi nei bujo ka niado.

⁹ Mia bogo napano nuboru uro, numial ka napano sebi tai jo, napano ajumã ami-jege niado ea vovosebi nene ruei, a numial ka napano joko nalo na terteliki bunu amenoko batitigio bo ju.¹⁰ Ana Yesu berinavo “Niado napano kubokarlo naruei, kuvar tealo rimeí rive sado.”

¹¹ Ana Saimon Pitere naio batove ea tei, bavin ea uako, burular levlevi, buru binimeí uro. Niado nalo

miroano laka, numerou ka mia levlevi naio rivurkoko-rovio, mia makanio, nuburu binimeí bo ga. Mia bogo napano nubar bulavulag niado nalo, nubulukulo bokar toromomou takurano due-limo va jimo ba tolu [153].

¹² Naruei bogo napano niado nalo na aju amijegeio amenoko bo, ana na Yesu bio, berinavo “Mo, kamiu kumei kuvisinan.”

Ea bogo nei, nubitilubar ka be Tubo, maka bunu nuvila von ka nuvikanio ka naio be kei.¹³ Naruei nubinimeí numitu vio takurano naruei, ana Yesu midu joko burebove janea kumemi, bija niado nalo bunu, ana numisenio.

¹⁴ Nina naio jibe ka Yesu kiano varolu napano naio miyotuba ka kumemi kiano naiagagoano nalo, iorou ka napano Atua mila naio meul bereio ea namãariano.

Yesu naio Pitere

¹⁵ Telikiti napano numije simemi sinaniano na kavijo bisi, ana na Yesu jidom tukunu kija vija Saimon Pitere. Naio bika denio, berinavo “? Saimon, Jonas kenerinio, jumãbe? Jau tiniemo jii kiniou loa laka, juvulu ka napano nalo dolu tinielo jii kiniou, peli na makanio?”

Ana Pitere berdopeio, berinavo “Tubo, vite na jau komijikia ruei, ka kiniou najaaro toru kaso.”

Naruei Yesu berkanio, berinavo “Maraiu, mo jau

kavagan kiaku nunu solbouo nalo.”

¹⁶ Ana vaarakurano bereio, Yesu bika denio, berinavo “? Saimon, Jonas kenerinio, jau tiniemo jii kiniou toru laka, ħeli na makanio?”

Ana Pitere berdoĥe, berinavo “Tubo, vite na jau komijikia ruei. Javukia napano neberkario, kiniou na-jaaro toru laka kaso.”

Naruei Yesu berkanio, berinavo “Maraiu, mia jau kovitikar kiaku nunu nalo.”

¹⁷ Ana bereio, be varolu nene, Yesu bikanio, berinavo “? Saimon, Jonas kenerinio, jau kajaaro ka kiniou be riano, ĥeli na makanio?”

Mia bogo napano Pitere naio mialio ka napano Yesu joĥa bika den naio jibe na ba bokar varolu, naio mijog mimou, ana berkar ban Yesu, berinavo “Tubo, abe jau komijikia vite nonovio. Jau komijikia batitigio bo ruei ka napano kiniou na-jaaro toru laka kaso.”

Ana Yesu berkanio, berinavo “Maraiu, jau kavagan kiaku nunu nalo. ¹⁸ A neberiano ka jau jibe na, ka beamu, bogo na kobe mĥeaku kia ga vo, kojomĥa komila jibe ka ga naĥa kojidom kala. Jau takurano komiel janea vio na vabe napano kojidom kavan eaio. Mia nomijikia never kaso ka bogo na mia komei kove tormoruo, mia tomu dolu aya kulumĥarauo easo, avokar jumĥamo, avuruso kavan ea vio napano

maka kosidom ka kavan eaio.”

¹⁹ Iliano na Yesu kiano nei, naio jibe ka napano jo berialio jumĥabe ka mia auebin Pitere. Ea kiano mĥariano, naio mila bajago tai napano naio midu naio ju tano, mia rivitirilar Atua siano to mave.

Mia iorou ka Yesu ber ka Pitere jibe na, naio buru bere naio, ber naio takisorio bereio, berinavo “Jau komei, katakisor kiniou damĥariga.”

Yesu naio Jone

²⁰ Mia bogo napano Yesu jukunu bija Pitere bisi, ana Pitere barĥilig naio, mial kiniou, Yesu kiano bilbilu na bo, nojo vaataro ka naljuo. Kiniou nei napano beamu, ea sinaniano na maaro, nojotano vaataro ka Yesu, nebika naio ka ea kumemi naiagagoano nalo, kei naio mia tiveluku ka naio. ²¹ Mia bogo napano Pitere mial kiniou, bika den Yesu, berinavo “Tubo, jumĥabe ka bilbilu nei?”

²² Naruei Yesu berkanio berinavo “Ver kanaku sidomiano ka mia naio rivakovio re, mia mijikia to tibe nano vokar napano mia kiniou nemei bereio, vite na be kanaku, maka ve kanamo ka mia kover titai kanio. Mia venia napano be kanamo ka kala, nober kaso ruei, ka katakisor kiniou namĥariga.”

²³ Mia iorou ka bogo na, bogo napano namoneano dolu nalo amijog ka napano Yesu mil jibe na, amijog

belea, aberiamña Yesu berii
 kiniou, berkar ka mia maka
 nejikia nomñaro bogo tai.
 Mia Yesu maka river tibe
 na, naio ber ga ka ver naio
 sidom, mia rijikia tibe na.
 Tibe na, nioti nene ber ka
 vite na Pitere bikanio, naio
 maka ve kanano, mia be
 Yesu kanano ga.

Iliano na maaro

²⁴ Mia kiniou naruei
 napano nojomña nober
 bulavulag vite nalo nei,
 nojomña nobivitauiā bulagio
 batitig bo ka kuvijikia
 kuvulukuio. A kito rovinu
 romijikia romonmonea ka
 iliano nalo nei abe riano
 laka.

²⁵ Bo ga naruei, niosi nei
 binimeī maaro ea vio nei
 naruei. Mia vite telabo na-
 pano Yesu milaio ajuaio, mia
 vite telabo mia telabo bereio
 napano Yesu milaio maka at-
 uaio. Ver kito rovivitauiāio
 nonovio, nomial jibe ka pēli
 mia kiano niosi nene nalo
 ve miroano laka, rivanvano-
 o mia vio ve teliki ea yete-
 meriba nei.

Atevi Nalo Kialo IMAUANO NALO Verialiano Moti

Tukunuano bulati na niosi nei

Niosi nei Atevi Nalo Kialo Imauano Nalo, Luka bivitauia ba ban toro tai, siano Teovilas. Ninei niosi juo napano Luka jirio, a binime iorou ka kiano niosi moti napano siano Yesu Kristo kiano Ioluano Vou napano Luka jirio. Niosi nei, Atevi Nalo Kialo Imauano Nalo, napano siano na bulati Imauano Nalo berii Yesu kiano atevi nalo kialo imauano na beamu, napano Niununo Lu buru m̄arabo kalo ka ala imauano na verialiano na ioluano vou, tikario Yerusalemo, ban ea vio nalo na Judia a yako Sameria, banbano-o du nonovio nalo na yetemeriba (Imauano Nalo 1:18).

Niosi nei be tukunuano tai na namomeano nalo na beamu napano jikar ea taara tai na Israel napano amonea, amiluo-o binime toru, jovoko nonovio yetemeriba. Ea niosi nei, Luka jidom ka nalo napano amonea, nalo ailikuei re Parinio Tubo na Romo, napano midururu ea vio nalo ea bogo nene. Mia naio jidom verial ka vite nalo napano taara na Israel nalo amonea naio, nalo abinime i amaluvo ea ioluano vou nei ka tomu nalo na abe namomeano nalo amonea naio.

Niosi nei be kiano yati tolu, napano berial ka ioluano vou jo maluvo ba liei ea vio nalo, a yimo lu jo miluo bogo nonovio. Beamu, berii yimo lu napano jikar yako Yerusalemo, iorou ka bogo na Yesu bavini ea tiniabene. Mia valuo nene, berii napano imauano bunu jovoko vio nalo na Mediterenian, bano-o boru Romo.

Vite burtomoluo tai napano niosi nei berii, be imauano na Niununo Lu. Bogo na atevi naloaju kea yako Yerusalemo memedu ka bogoti na Jokoluolu na Yuvi Meruo, Niununo Lu binime ealo, a jian moroano banlo. Mia iorou ka bogo na, Niununo Lu judu ka mija imauano na yimo lu, a mija navurum̄araboiano nalo nei ea kialo imauano.

Ea niosi nei, be iliano nalo na atevi nalo aberialio, a berial ka kialo iliano nalo amievio moroano, bilig tomu nalo kialo meuliano napano amonmoneaio, amija tomu na moneano nalo ka avuron vio takurano.

Torogio nalo na niosi nei

Yesu jian iliano maariano a kiano verikariano ban kiano tomu nalo 1:1-14

Nalo abijauialar nana mia tujelain Jutas 1:15-26

Nalo aberial ioluano vou yako Yerusalemo 2:1—8:3

Nalo aberial ioluano vou yako Judia bija yako Samaria 8:4—12:25

Pol kiano imauano nalo 13:1—28:31

Pol kiano ieliano moti 13:1—14:28

Na vurum̃araboiano
abokar vioriano yako
Yerusalemo 15:1-35
Pol kiano ieliano valuo
nene 15:36—18:22
Pol kiano ieliano varolu
nene 18:23—21:16
Pol joa nalakoiano yako
Yerusalemo, a yako Sis-
ari bija yako Romo 21:17
—28:31

Iliano na jukamu

1 Nao, kanaku bilbilu
Tiovilas, kiniou najaaro ka
nevitavo vijaso ea niosi dolu
nei. Ea kanaku niosi na
jukamu napano nejiri banso,
nojo nejiri tukunuano na
vite nalo napano Yesu jom̃a
milaio, a napano naio jom̃a
berloglogio, nina jikar ea
kiano iniāuano, 2 binime
bokar bogo napano ea
moroano na Niununo Lu,
naio jian kiano iliano na
maaro ban kanano atevi
nalo napano naio jo buru
bulaglo ruei, ana iorou kanio
ana Atua buru naio bavin
bereio.

3 Bogo napano naio meul
bereio ruei ea nam̃ariano,
napano maka rivavin vo,
ana bogoti telabo, naio jo
malmaluvo kalo ba bokar
legiano duelimo va veri [40],
ka rila rimeravo vatitigio
vanlo ka naio meul bereio
ea nam̃ariano be riano.
Ea bogo na, nalo ajum̃a
abitolubarbar naio, mia
naio jom̃a berii m̃arabo
nalo na Atua kanano nave-
natuboiano banlo.

4 Bogo tai napano naio
joa vio tai naliko, ana
jian iliano nei banlo, bere-
nio, berinavo “Mia kami
monokanio kuvituvan re
vio nei Yerusalemo vo,
monokanio kuvitu rorea
beamu vo ka mia kuvokar
Niununo Lu na Teta naio
berkario ruei ka mia sian
van kami, jibe kanio nam̃a
neberii ka kami bunu ruei.
5 Beamu, Jone Baruei naio
baruei ea tomu nalo ka uei
ga, mia vesiou re, legiano
tai avar laka, mia Atua naio
rivaruei ea kami ve riano,
nina ea Niununo Lu.”

Yesu bavin ea tiniabene

6 Ea bogoti tai bereio, na-
pano atevi nalo abinime
vio takurano naliko Yesu,
abika denio, aberenio aberinavo
“? Tubo jum̃abe, be bogo
nene memedu kanio mia
jau kala kito kulo Israel
nalo kito ve kiado parinio
tubo bereio, p̃eli na maka
ve bogo nene vo?”

7 Ana Yesu berdoṣelo, beri-
navo “Maka ve kenemiu
ka mia kami kuvijikia bogoti
nene nalo p̃eli na legiano
nalo napano Karam̃eku naio
ga takurano, naio bar batiti-
gio ju ruei ka mia tibe na,
tibe na. 8 Ana na iorou
kanio, Niununo Lu naio
rime
i ea kami, ana bogoti
nei naruei kuvijev moroano,
ana mia kami monokanio
kuva kuverial kiniou ea
vio Yerusalemo nei, a ea
vio dolu nalo nonovio
napano yako Yutea
vija Sameria,

rivano-o rivokar vio dolu nalo na yetemeriba reraio.”

⁹ A bogo napano naio beriliano nei bisi, mia nalo aju abitikar naio memedu kia ga vo, ana Atua burular naio bavin, ana melijo tai binimei midukoio, ana nalo nei maka bunu aial naio bereio. ¹⁰ Bogo napano nalo ajumā abitikar kia ga tiniabene, nalo amiilo kolvare ga ka tomu juo na kialo kulūmarauo miuvuruvu, nalo abinimei abitirikarlo aju naliko, naljuo aberinavo ¹¹ “! Ai, kulo Kalele nalo! Kamiu kuvijog re rivova, ana kuvitu kuvisirarag re vavin vesio tibe na. Yesu nene napano Atua burular den kamiu bavin tiniabene, monokanio mia naio rimei bereio, a mia rimei bereio tavukia ga na naio bavin tiniabene ruei, napano kumialio vonganei na.”

Taara na atevi nalo

¹² Ana atevi nalo ajuvan suku nene, napano naio be Suku Na Buruolivi Nalo, nalo aban bereio abatove ea vio Yerusalemo, maka ve tebievi laka, mia jibe ka kilometa menu takurano ga. ¹³ Nalo abinimei aboru Yerusalemo, ana aban bereio ea vajoomo na mave ea yimo na ajujuaio mugaruei. Mia sialo nalo nene ajibe nei: Pitere, Jone, Yemesi, a Andru; bija Vilip, Tomas, Bartolomio, a Mataiu; a bija Yemesi, napano Alveas kenerinio, bija Saimon napano naio be nalo

tai napano jukamu mā amila baravo ka kulo Romo nalo, naliko Jutas, napano Yemesi kenerinio. ¹⁴ Ana ea bogoti nalo nei, nalo nei, naliko tire nalo, amidu buronlo bogo nonovio ka volkouano. A Mere, Yesu kenieno, bija Yesu kuruano nalo bunu, amidu buronlo nalikolo.

Toro na rudu jeleig Jutas

¹⁵ Be legiano tealō abarlaka ruei, ana namoneano nalo abinimei vio takurano, nalo abokar titai jibe kanio toromomou takurano due-limo valuo [120] abiniu. Ana ea bogo na, Pitere naio jidom riverii vanlo ka mia ala tumābe ka aleal toro na mia rudu jeleig Jutas. ¹⁶⁻¹⁹ Nina bior iorou kanio ana Jutas naio mila kanano imāuano va nei nua ruei, naio bulu niatano tai bija puruveru na naio mijeivio, ana naio ga mijoru ea vio nene, ana mabono buruṣeio, naruei tinieno nalo amolmoluo, ana naio m̄aro. Mia tomu nalo na vio Yerusalemo amijogial lilianiano nei, mila ana nalo abio niatano nei kanio kanalo iliano, aberinavo “Akeltema,” nina be iliano tai na berenio “Vio Na Burukia.”

Tenene na Pitere naio jidom riverii vite nene van namoneano nalo, naio jumolu ju kamu ea miralo, mil banlo, berinavo “Bilbilu nalo, nanua Niununo Lu mil ea Teviti niono, naio berii Jutas nene kiano imāuano, napano naio burum̄arabo

ka tomu nalo abinimei abokar Yesu, mia iliano nalo nei abinimei abe riano ruei, kanio mia iliano Lu monokanio rive riano bogo nonovio. Jutas nene naio be kumemi tai, napano Tubo bitirilar naio ka mia naio rivokar iñauano rivija kumemi, ²⁰ mia vonganei, naio jibe kanio na iliano juo napano joa Niosi na Iouano, napano tinene naio berinavo

'Bo kanio mia kunuano to kurano ga, mia maka toro tai rijikia toaio,' Iouano 69:25

mia tinene bunu, napano naio berenio

'Bo kanio toro dolu rudu jeleigio.' Iouano 109:8

²¹⁻²² “Bior vite na, monokanio toro tai rimei bereio tusol kumemi ka riverial ka verenio Yesu, kiado Tubo, naio meul bereio ea namariano. Toro nene naio monokanio ve nalo tai napano aju bija kumemi nanua, ea bogo nalo namã Tubo naio jomã miel kumemliko. Naio monokanio ve toro tai napano naio joa bogo nalo namã Jone miolioluii kanano varueiano, binimei bokar legiano na mia Atua burular Yesu den kito, ka naio bavin bereio.”

²³ Naruei ana nalo aberial tomu juo nei sialo. Tinene, siano Yoseve, napano abio kanio Basabas, a be siano dolu tai bunu, aber Jastas. A toro tinene siano Matias.

²⁴ Naruei ana nalo abolkouo, aberenio “Atua-o, jau ga kobe Atua Na Masosouano, komijikia venia napano joa tomu nalo kanalo iviso. Mo, kumemi numisidom ka jau kesiloglog van kumemi tomu juo nei na vabe nene napano jau koburu naio ruei, ²⁵ kanio mia naio rivokar iñauano na atevi, napano Jutas juvanio ruei ka rivan ea kanano vio na laveniano nene rimemedu.”

²⁶ Nalo abolkouo bisi, naruei nalo amila jibe kanio namã amiere mabujo, ana Matias siano maluvo. Naruei ana nalo abitirilar naio, ana nalo abuluku naio bija nalo dolu napano duelimo ba tai [11] nei, ana mila nalo duelimo ba juo [12] bereio.

2

Niununo Lu binimei

¹ Ea legiano na Jokoluolu Na Uiti Meruo, namoneano nalo abinimei aju vio takurano, ² naruei vaarakurano ga, be malioano tai maluvo ea tiniabene, napano naio jibe ka burumãara jegi tai miuvuvu, ana malioano nei barko nonovio vio nalo na yimo nei napano ajutano joomo eaio. ³ Naruei ana nalo amial vite tai jibe kanio sebi naio bilvili, ana na sebi nene jerabo ba janea nalo abeve terakurano. ⁴ Naruei nalo nonovio, Niununo Lu binimei bujo magmago ealo, milalo amil ka iliano dolu

nalo, jibe ka napano Niu-nuno nei naio milaio ana nalo amijikia amil kanio.

⁵ Naruei ea vio Yerusalemo, be kulo Israel naloaju, napano nalo abe tomu na volkouano nalo. Nalo na ajumolu ea vio telabo na yetemeriba nei, nalo abinimei. ⁶ Naruei nalo nei amijog malioano nei, ana nalo naliko kulo dolu nalo, nalo telabo abinimei ea vio nei. Mia nalo nei amiilo toru laka, bior tomu nalo neibano Niununo binimei ealo, nalo ajumġa amil, mia tomu nonovio gaaju amijog kialo iliano nalo memedu ga. ⁷ Naruei nalo amiilo binvinlo, amemebiju, aberinavo “! Uerei tomu nalo! Tomu nalo napano ajumġa amil jibe na, mia nalo abe kulo Kalele ga. ⁸ ? Jumġabe ana kito roju romijog ka nalo ajumġa amil kanio kanado iliano nalo jibe na? ⁹⁻¹¹ Kito robe tomu na buruvenuo telabo napano roju nei, na vio Patia, na vio Mitia, na vio Elamo, na vio Mesopotomia, na vio Yutea, na vio Kapatosia, na vio Pontas, na vio Esia, na vio Vrijia, na vio Pamvilia, na vio Ijivi, na vio Krit, na vio Arapia, na vio Lipia ea tivelinio ban yako Saireni, a ea burumġara bulukomeli na vio Romo bunu. Kito tealorobe kulo Israel nalo memedu, mia tealorapanano maka ave kulo Israel beamu, mia iorou kanio ana abinimei amidu kanado moneano. Mia kito robiniu, roju romijog ka nalo

ajumġa amil ka kanado iliano nalo beve terakurano, ajumġa aberii burumġara inġauano na tortoru napano Atua naio milaio.” ¹² Naruei nalo amiilo toru, a kanalo jidomiano ba kovio, ana maka bunu ajikia ka mia atumġabe naruei, ana nalo ajumġa abivika denlo, aberinavo “! Uerei tomu nalo! ?Venia na jibe na?”

¹³ Mia nalo tealoraju bunu abital ealo napano Niununo binimei joalo ruei, aberinavo “A, tomu nalo na amunu mġlea uei ga mila ana abe kodovo jibe na.”

Pitere mil banlo

¹⁴ Ana Pitere naliko atevi dolu nalo duelimo ba tai [11] nalo ajumormolu abinimei ajua vio nei, ana naio mil jouo banlo, napano berial jibe nei, berinavo “Bilbilu nalo, napano kamiu kube kulo Ju, bija kamiu kulo dolu nalo napano kamiu kumitua vio nei, ea Yerusalemo, kamiu kuviagago vatitigio ka kiniau ka never bisivisii vite nei van kamiu. ¹⁵ Tomu nalo nei makanio parilo selivivi tibe ka napano kumitumġa kuberenio, makanio, bior vonganei naio be mġerenio koveri [9] kavijo kia ga nei vo. ¹⁶ Mia vite napano kumialio, nina vite namġa Naverialiano Joel naio beriio nanua ruei, berinavo

¹⁷ *‘Atua berenio “Ea legiano nalo na bogo na maaro nei, mia kiniau nesian Niunuku van tomu nalo nonovio.*

*Ana mia kenerimiu nalo aver
bulavulag kanaku il-
iano,*

*a mia kenemiu mġeaku nalo
amon derevijo aial vite
nalo,*

*a kenemiu tormoruo nalo,
mia amonovovuii na
monovovuano nalo.*

*18 Riano ga, ea bogo na,
mia kiniou nesian Ni-
unuku,*

*rimei ve toru ea mġeaku
nalo a merevono nalo
ka kanaku inġauano,*

*ana mia nalo aver
bulavulag kanaku
iliano.*

*19 Mia kiniou nala vite na
iloiano nalo ea vio
yauo,*

*vija burutomoluo nalo
ea yetemeriba nei,*

*mia ve burukija a sebi a
burumara you banunu
ve toru bunu atu.*

*20 Beamu, mġerenio mia naio
rimei ribobogio, a mia
siberio naio rimei rivil-
vili tibe ka burukija.*

*Ana iorou kanio, ana legiano
na toru na Atua
kanano, napano mia
rivu laka, naio mijikia
rimei.*

*21 Mia ea bogo nene, ana toro
kei napano verenio
rivio ka Atua siano,
mia Atua rilalrur
naio.” Joel 2:28-29*

*22 “Tomu nalo na Israel,
kamiu kuviagago vatitigio
ka kiaku iliano nei. Yesu
na vio Nasarete, naio be
toro napano Atua jiloglogio
meravo ka kamiu ka naio be
Naverikariano. Atua mila
jibe na nina ea inġauano*

*nalo na moroano bija buru-
tomoluo nalo napano naio
mila Yesu mirġaukanio ea
miremiu nua ruei. Vite nalo
na kamiu kumitu kumijikia
ruei, 23 mia bogo na Atua
midu naio joa jumemiu,
kamiu kumitumolu kumue-
bin naio mġaro, napano
mia kumijamo ka taara va
nalo ajukukakar naio ea
mġakolkolo. Bogoti napano
kamiu maka kuvila vite nei
vo, mia Atua naio mijikia
ruei ka mia naio rimei tibe
na, ana naio mijamo kanio,
bior vite na jakii jibe na ka
naio jidom kakar batitigio
nua ruei ka rimġaukanio.*

*24 A karina, moroano na
namġariano maka rivare ka
rivokar Yesu sikili, mia Atua
burular naio den namġariano
kiano taniabe jaleleano, ana
na mila naio meul bereio.
25 Nina jibe ka Teviti kiano
iliano tai re nua, napano
naio berii Kristo, napano
berinavo*

*‘Kiniou nemial ka napano
Atua jo bija kiniou
bogo nonovio,*

*naio jo tivelinio vameruo
na kiniou, ana mila
kanaku iviso maka
rimemebiju.*

*26 Jibe na naruei, ana tinieku
jaaro, a buruminaku
miou,*

*kiniou nebe toro ga, mia
nabarkar tinieku jikili
ea Atua.*

*27 Ana jau Atua, mia jau kotu-
van re niunuku toa vio
na namġariano,*

a mia jau kajamo ka re taniabene na kanamo Toro Lu na kanamo inġauano rimenunu.

²⁸ *Jau kobisiġe mġarabo nalo na meuliano ka kiniou ruei,*

a mia tinieku rivujo ka saariano na toru, napano jau koġo bija kiniou.
Iouano 16:8-11

²⁹ Banalo, kiniou nejidom neverial vite nei rimeravo van kamiu. Korobido nanua beamu, napano siano Teviti, naio mġaro bogo be ruei, ajivinio nua ruei. Ninei be sano mġartanbo nene nei joa kanado vio, jo binimei bokar vonganei.

³⁰ Mia bogo napano naio jo meul kia ga vo, mijikia ruei ka Atua berkar jikili banio, berinavo mia bogo tai, kanano yati tai naio monokanio totano bereio ea kanano jobaro na toru, tavukia napano kanano yati naio rimeġ ve parinio tubo ka tomu nalo, tibe ka Teviti napano naio be parinio tubo jukamu. Ana Teviti nene naio be naverialiano tai, ³¹ mia bogo napano vite nei maka riyotuba vo, naio mial ruei ka mia Atua rila Naverikariano nei naio rimeul bereio ea naġmġariano. Tenene na mġa Teviti naio berenio ea kanano iliano napano berenio, berinavo Atua naio maka tuvan niununo tobo ea vio na naġmġariano, a maka rijamo ka kanano tati tobo rimenunu.

³² Vite nei naruei kumemi numituġma nuber bulagvulagio, ka Atua bitirilar toro

neġbano Yesu nene den naġmġariano bereio. ³³ Atua bitirilario, ana buru lario bavin ruei, midu jo tivelinio vameruo ka naio. Ana jibe ka napano Atua Karamġado berkario, naio sian Niununo Lu van naio, ana Yesu rion Niununo Lu van kumemi, ana Niununo Lu nei naio jo miġmauka vite nalo nei napano mġa kamiu kumitumġa kumialio a napano mġa kumitumġa kumijogio.

³⁴ Ea Teviti kanano iliano nene, naio maka riverii naio, bior napano maka ve naio napano rivavin tiniabene tibe na, mia naio berii Naverikariano nei. A kanano iliano dolu jibe nei bunu, napano naio berinavo *'Atua Soġi naio ber ka kiaku*

Tube, berinavo

"Jau kototano tivelinio vameruo ka kiniou, koto daġmariga,

³⁵ *mia kiniou nala kanamo uolu nalo ameġ atibe ka mġadayebe na kovulan jaamo eaio."* *Iouano 110:1*

³⁶ Bior vite nalo nei naruei, mia kiniou nejidom never bisivisii rimeravo van kamiu, mġaratavo vodolu nonovio na Israel, ka Yesu nene napano Atua bitiri lario nua beamu be kiado Tube a be Naverikariano, ana kamiu kumituku kakario ea mġakolkolo ruei."

Tomu telabo amonea Yesu

³⁷ Mia bogo napano tomu nalo amijog iliano nei, nalo amijog jibe ka julu kanalo mġaravuo ba bokar kanalo buruiu memedu, naruei ana

nalo abika den Pitere a at-
evi dolu nalo, aberinavo “?
Banalo, mia kumemi nuvila
tuñabe naruei?”

³⁸ Ana Pitere naio ber kalo
berinavo “Kamiu nonovio,
kuvilig kamiu, kuvan ea
varueiano ea Yesu Kristo
siano, ka mia Atua riv-
iekokoa kenemiu kariano
nalo. A mia Atua naio sian
Niununo Lu rivan kamiu,
tibe ka kanano ijaiano
novo tai van kamiu, ³⁹ bior
verikariano napano Atua
mila naio mila ban kamiu,
a mila ban kenerimiu nalo,
a mila bunu ban kulo dolu
nalo napano aju koalabo
kia ga vo. Verikariano nei
naio joa nalo napano kanado
Atua Soñi naio joñã biolo.”

⁴⁰ Ana Pitere joñã ber
iliano novo telabo ka mia
rivurlo amei, ana naio
berenio berinavo “Kamiu
monokanio kuvituvan kar-
iano na kulo va nalo na
vonganei, kamiu kuvilarur
kamiu den vironiano na-
pano jo binimeĩ ealo.”

⁴¹ Naruei nalo telabo
kalo napano amijog Pitere
kanano iliano nei, ana nalo
amonea naio kanio, ana
abaruei ealo. A ea tomu
nalo nonovio napano ajua
legiano nei, nalo telabo laka
mia titai jibe ka menu tolu
[3,000] napano abinimeĩ
ajusol lo ea kanalo taara
nene.

*Namoneano nalo kanalo
tinieano takurano*

⁴² Ana namoneano nalo
nei nalo aju abokar jikili
bajago nalo nene, napano

nalo amiagago julaka ka at-
evi nalo aberlogloglo, a nalo
amijeburonlo bogo nonovio
ea tinieano takurano novo
ea kanalo taara, a nalo
ajumã ajinan vio takurano
bogo nonovio, a nalo abarlo
ka aura na volkouano nalo
bogo nonovio. ⁴³ Naruei

atevi nalo amim̃auka vite
na iloiano telabo, bija
burutomoluo telabo, mia
tomu nalo amial vite nalo
nene, tinielo memebiju toru.

⁴⁴ Mia namoneano nalo, abe
tinielo takurano banbano-
o, mia nalo ajumã amijamo
ka kanalo saba nalo ka ve
kialo bitiraviranio. ⁴⁵ Jibe

na, ana nalo aju añilivili
ka kialo borotano nalo
a vite dolu nalo na be
kialo, ka avio ka puruveru
nene nalo napano abokario
van nalo kei napano abe
talim̃asa ka vite tealó.

⁴⁶ Legiano nonovio, nalo nei
aju amijeburonlo jibe ka
taara takurano, joomo ea
Atua Kunuano Lu, a nalo
ajumã ajinan vio takurano
ea kunualo nalo joomo. A

bogo nonovio napano nalo
ajumã amijeburonlo jibe na,
mia nalo ajaaro toru laka, a
bogo nonovio aju abatove
ka Atua, a dam̃ariga nalo
aber siva toru banio bior
meuliano novo nei napano
naio jian banlo, ⁴⁷ ana nalo
abameneã naio kanio. A
ea bogo nei, kulo dolu nalo
bunu ajaaro ka kialo bajago
vou novo nei, a legiano
nonovio, Atua Soñi naio jo
milarur tomu ta bunu vo,
naio jo buru bironlo ea taara

na atevi nalo kialo.

3

Javuluku tai jumolu miel

¹ Ana legiano tai, monloglog ea bogo na volkouano na niogoravo, mġerenio tolu, Pitere naio Jone, naljuo aju abavin ea Atua Kunuano Lu.

² Naruei be toro tai napano bogo na naio moluo be javuluku, mia legiano nonovio nalo ajumġa amiduio binime i amebi kanio joa morouo napano aber “Morouo Maraiu,” nina ea Atua Kunuano Lu. Ana javuluku nei naio jomġa miog ijaiano den nalo namġa ajumġa aba joomo ea Yimo Lu. ³ Naruei naio mial Pitere naio Jone napano naljuo aju aba joomo, mia naio miog ijaiano tai den naljuo.

⁴ Ana na Pitere naio Jone, naljuo abamere ea toro nei, ana Pitere naio berkanio, berinavo “Koig, jau kovitkar kumemi juo beamu vo.” ⁵ Naruei naio bitikarlo, jidomii beriamġa mia naio rivokar vite novo tai denlo. ⁶ Mia Pitere naio berkanio, berinavo “Koig, kiniou maka neje puruveru tai leleio, mia vite novo tai takurano ga napano nemijeivio ka mia neje vanso. Vite nene

ninei: ea Yesu Kristo toro re Nasarete siano, kiniou neber kaso, jau kotumolu naruei, keiel.” ⁷ Naruei Pitere monokorkoro bokar toro nei jumġano meruo, ana miiġa toro javuluku nei ka naio tumolu, ana vaarakurano ga, jaano be juo abinime i abo ajikili. ⁸ Naruei

naio jumolu vaarakurano ga, jumolu ju, miel vonvonio. Ana bogo napano naljuo aju abano, ana naio jo jakisorlo, ana nalo tolu abano aba joomo ea Atua Kunuano Lu, napano mia toro nei jo jaaro toru laka, jo miel, jajabujo, naio jo miaia Atua.

⁹ Naruei nalo napano aju joomo amialio ka toro nei napano jomġa miel a jomġa miaia Atua, ¹⁰ naruei bogo napano nalo abitolubario, nalo aberinavo “! Mm, kamiu kuvialio! Nina be toro javuluku namġa na-o! Bogo nonovio naio jomġa miog puruveru tavio ea morouo na ea Yimo Lu, vonganei naio binime i bo jo mieliel ruei.” Naruei nalo amemebiju vatitigio bior vite nei napano maluvo ea toro nei.

Pitere mil banlo joomo ea Atua Kunuano Lu

¹¹ Mia bior tomu nalo amiilo toru, nalo ajikiti abinime i ea nalo tolu nei ea mġarsuġiki na Atua Kunuano Lu, napano siano “Solomon Kanano Marsuġiki.” Ea vio na, toro neibano jomġa jakii Pitere naio Jone kia navo. ¹² Bogo napano Pitere mial ka tomu nalo nei abinime i vaataro, ana naio mil banlo, berinavo “? Ai, kito kulo Israel nalo, jumġabe? ? Ka venia ana kamiu kumiilo mġele ka vite nei, ana kubitii mġelea kumemi juo jibe na? ? Peli, kamiu kumisidom kuberiamġa kumemi juo ga numila toro nei naio mijikia miel ea kenememi moroano

ga, ƣeli na kuberiamġa kumemi juo nube kulo lu, ƣeli na venia? !Makanio! ¹³ Mia Atua ga mila vite nei naruei, Atua napano Epraamo a Aisak a Yakovo kanalo, a napano be Atua na korobido dolu nalo kanalo bunu. Naio mila vite novo nei ka rivitirilar kiano toro na inġauano nene Yesu siano ea miremiu nalo. Mia nina be Yesu nene kia ga navo, napano kamiu kuburu naio ban ea kiado komeli na toru nei, ana Pailat mialio berenio Yesu naio bo ga, ana berinavo naio mijikia rivatavio ga bereio, mia ka bogo na ana kamiu kumil jikili ban Pailat ea mirano, kuberinavo Yesu naio mila sibi ga, ana kamiu maka kuvisidom naio. ¹⁴ Bekurano ka naio bar sio na ka be Toro Lu a Toro Na Memedu, mia ea bogo napano kenemi u iliano jibe na naruei, kuber maka kuvisidom naio. Mia kuber ka ga Pailat kuberinavo kamiu kumisidom toro namġa muemue toro mġaro ruei naio mijikia taluvo, mia Yesu naio tobo, ana Pailat naio mijamo kanio. ¹⁵ Tenene na mia kamiu kumuebin ruei Burubati Na Meuliano naio mġaro, mia iorou kanio ana Atua mila naio meul bereio den namġariano, mia vite nei naruei kumemi numial ka mirememi, ana na numitumġa nuber liliano. ¹⁶ Mia Yesu siano nene naruei naio mila javuluku neibano kumijikia vatitigio naio, binimei bo, jibe ka napano

kumialio nei. Toro nei jaano be juo jikili bo bereio ga ea miremiu vonganei, bior ka ga napano kumemi numonea jikili ea moroano na Yesu siano.

¹⁷ “Mo bo, kuruaku nalo. Kiniou nemijikia ka vite nalo nanua kamliko kenemi u tomu na tortoru nalo kumila ka Yesu, kamiu nonovio ga kumilaio bior maka kuvijikiaio. ¹⁸ Mia nina naio be Atua kanano mġarabo ka rila iliano nalo napano naio berial nanua ruei nalo amei ve riano. Ea iliano na kanano naverialiano nalo, naio berialio ruei ka mia Naverikariano na kanano naio monokanio rijog rivova ea mokotenano. ¹⁹ Mo, ana kamiu monokanio kuvilig kamiu, monokanio kumei bereio ea Atua, ka mia naio riolkon kokoa kenemi u kariano nalo. ²⁰ Verenio kuvila tibe na, mia Atua naio mijikia sian moroano vou van kamiu ea kenemi u meuliano, a naio mijikia riila kenemi u Naverikariano na naio jii batitigio ruei, nina be Yesu, napano mia naio rime i bereio. ²¹ Mia Yesu naio monokanio to mave beamu vo, rivano-o rivokar bogo napano mia Atua sidom rila vite nalo nonovio amei ave terivou bereio, tibe ka napano naio ber bulagio ruei ea iliano nalo na kanano naverialiano lu nalo re nua beamu. ²² Ana nalo nene tai napano ber jibe na naio be Mosis, napano berinavo

‘Kenemi u Atua Soƣi na

mia naio rila kene-
miu naverialiano tai
naio tumolu iviso ka
kamiu, tibe ka napano
mila kiniou nojumolu
noju iviso ka kamiu
ruei. Naverialiano
nene mia naio ve
toro na kenemiu vio
ga, a mia kamiu
monokanio kuviagago
vatitigio ka kiano
iliano nalo.

23 Mia tomu nalo napano
maka adu kiano iliano
nalo, mia Atua rivuku
bulaglo den kiano
tomu nalo kar ga ruei,
kanio mia nalo ava
kovio.'

24 Tena Mosis naio bere-
nio, a naverialiano dolu
nalo bunu, jibe ka Samuel,
naliko nalo napano abinimei
iorou ka naio, ea kanalo il-
iano nalo, na nalo ajumã
aberii vite nalo na kiado
legiano nalo na vonganei.

25 Verikariano nalo napano
Atua jian nua ea iliano
nalo na naverialiano nalo na
kanano, nalo abe kenemiu,
a kamiu kumitu joomo bunu
ea virakariano nei napano
Atua milaio ruei naliko koro-
bido nalo re nua, jibe ka na-
pano Atua ber ka Epraamo,
naio berinavo

'Mia kiniou nala ka mia
ilivuiano rimei van
tomu nalo na yete-
meriba nei, rimei riy-
otuba ea ga kanamo
bajulukuti ga.'

26 Memedu ka verikariano
na, Atua mila Yesu jumolu
ruei jibe ka kanano toro na
imãuano, ana naio maka ri-
ila naio rimei ea kulo dolu

nalo, naio miila binimei ka
kamiu jukamu. Naio miila
Yesu binimei ka rila rivu
laka van kamiu, napano mia
naio rivilig kamiu, ka ku-
vituvani kenemiu bajago va
nalo."

4

1 Ana Pitere naio Jone,
naljuoaju amioliolu kia ga
vo ban tomu nalo, ana kulo
lu nalo, naliko natukamuano
nakukuano nalo na Atua
Kunuano Lu, naliko Satu-
sis nalo, abinimei vaataro
ka naljuo nei.

2 Nalo
nei tiniel mimi kilkil, kanio
naljuo nei ajumã aberloglog
tomu nalo aber jibe ka na-
pano Yesu meul bereio den
nañariano, tomu nalo bunu
amijikia ameul bereio tibe
na. 3 Naruei nalo abokakar
naljuo, aburulo aban ea
yimo na tetavokoiano ka
atu rorea riva rivokar beni
kanio, bior be bogo luvu
ruei. 4 Mia tomu dolu telabo
napano amijog kanalo il-
iano, nalo amoneaio, mia
mirano na sumãno nalo ga
na amoneaio, vaataro ka ri-
vokar menu jumo [5,000].

*Aburu Pitere naio Jone
aban ea kulo Ju nalo kanalo
komeli labo*

5 Ea legiano dolu nene,
tomu na tortoru na
kulo Israel, naliko kialo
navurimãaraboiano nalo,
naliko naverloglogiano na
tuboiano nalo, abinimei vio
takurano nei Yerusalemo.
6 Naruei ana nalo aba
ajutano ea komeli na toru
naliko Anas, napano naio
toru ka kulo lu nalo, a naliko

bunu kulo kouo dolu tealo jibe ka Kaivas, a naliko Jone, a Aleksada, a kulo dolu nalo na m̃aratavo na toru na kulo lu nalo nei. ⁷ Naruei nalo amiila atevi juo nei ajumolu aju iviso kalo, ana nalo abika vikadeniano tai denlo nei. Nalo abika aber “?Kei naio berenio ka kamjuo ka kuvila tibe na van javuluku na? ? A kami kumijeivio moroano na be?”

⁸ Naruei Niununo Lu binimej bujo ea Pitere, ana Pitere naio mil banlo, berinavo “Kiniou nojumolu nojukamu ea miremiu, kamiu tomu na tortoru nalo na vio Israel, a navurim̃araboiano nalo, ⁹ mia kiniou nemial jibe ka kami kumiturña kubika den kumemi juo, ka jum̃abe ka im̃auano novo na kumemi juo numim̃aukanio ea javuluku nei, mia jum̃abe ana kumemi numim̃aukanio bo bereio. ¹⁰ Mo, kiniou najaaro ga ka nesian verdopeiano na kenemiu vikadeniano nene, ka mia kami kuvijikiaio, a ka mia tomu na vio Israel bunu ajikiaio. Neber javuluku nene, naina jumolu jukamu ea miremiu ju na, bija jaano novo juo nene, naio binimej bo ruei ea moroano na Yesu Kristo na vio Nasarete siano. Yesu nene naio nanua kami kumuebinio m̃aro ea makolkolo, mia Atua bitiri lario meul bereio den nam̃ariano. ¹¹ Nina jibe kanio na Iliano Lu berii naio, napano berinavo

‘Kamiu tomu napano m̃a kumim̃aukanio yimo, kamiu kubukular belea

iesi tai, napano vonganei naio binimej be m̃artea siovo na ju iviso kanio yimo ruei.’ Iouano 118:22

¹² Mia maka m̃arabo dolu tai bereio napano mia romijikia rovokar meuliano eaio, bior Atua naio maka sian sio dolu tai leleio van kito ea yetemeriba nei napano mijikia rilarur kito eaio.”

¹³ Naruei tomu na tortoru nalo nei amiilo toru, bior nalo abitilubar ka Pitere naio Jone naljuo maka ave tomu na tortoru leleio, a naljuo maka ajikia vite ve telabo, mia naljuo nei maka niukniuku riviolo leleio. Naruei nalo amileal bunu ka beamu, tomu juo nei amiel naliko Yesu bogo nonovio. ¹⁴ Ana nalo maka bunu ajikia aue dobi Pitere kanano iliano leleio, bior toro napano jaano be juo binimej bo ruei naio jumolu ju naliko naljuo nei.

¹⁵ Mia nalo aber kanio nalo tolu nei aberinavo nalo avatavio beamu vo, ka mia nalo amijikia averii vite nei.

¹⁶ Nalo tolu nei aba tavio, naruei tomu na tortoru nei aberii nalo aberenio “? Mia kito rala tum̃abe ka tomjuo nei? Tomu nalo na Yerusalemo abiniu amijog vite nei ruei ka tomjuo nei amila im̃auano na toru tai ban javuluku nei ruei, mia maka bunu rejikia roverbure iliano nei bereio.

¹⁷ Mia bo ka kito ralavon ka iliano nei riva lie re bunu van tomu nalo, mo ver tibe na mia roverbure naljuo nei ka mia ail re van tomu nalo averii sio nei Yesu vanlo.”

Komeli na toru berbure Pitere naio Jone

18 Ana nalo abio tomu tolu nei ka amei joomo bereio, naruei amil jikili ban atevi juo nei, aberenio, aberinavo “Kamjuo na mia kuverii re bunu Yesu siano van tomu nalo, a kuverlogloglo re ka naio.”

19 Mia Pitere naio Jone, naljuo aberdoŕelo, aberinavo “? Juñabe? ? Peli memedu ea Atua mirano ka kumemi nuvitovon re naio, mia kumemi nuvitovon ga kamiu? Nina bo na mo kamiu kuver vonio tena, 20 mia kumemi nei, kumemi maka nuvijikia nuviturmaro leleio ga. Saba nalo na numial ka mirememi, monoka nuverial vija nana numijog ka tiliniememi.”

21 Naruei tomu na tortoru nalo nei amil jikili lie bereio ban naljuo neibano, aberburelo javukia ga nanua beamu, karina na aberenio naljuo amijikia ava tavio, bior maka bunu ajikia aleal ñarabo tai ka mia aje vironiano van naljuo, bior ga tomu nalo ajumña abame-nea Atua bior venia napano maluvo kanio javuluku nei, 22 napano bogo na, naio be kiano yuka duelimo va veri [40] barlaka ruei.

Namoneano nalo kanalo volkouano

23 Bogo napano Pitere naio Jone naljuo aba tavio, naljuo aban bereio memedu ea taara na namoneano nalo. Naruei naljuo aberial

iliano nalo na tomu na tortoru na kulo lu nalo kanalo a navurim̃araboiano nalo aberenio, 24 mia bogo napano namoneano nalo amijog iliano nei bisi, ana nalo abolkouo ban Atua. Nalo aberenio “Atua Soŕi, Atua Soŕi, jau kojii tiniabene, a borotano, a tei, a vite nonovio na jua yetemeriba nei. 25 Kumemi numisidomial kanamo Iliano Lu tai, napano korobimemi tormoruo Teviti, napano naio be kanamo toro tai, naio berialio ea moroano na Niununo Lu, napano naio berenio jibe nei, berinavo

‘? Bior vaio ana tomu napano maka amoneaaju tiniel mimi ñele jibe na?’

?Tomu nalo aju ajidom ka ala iñauano na bova, ana bior vaio ana maka ajikia alaio?

26 *Parinio tubo nalo na yetemeriba nei, nalo ajumolu aju batitigio ka ala mira,*

ana tomu na tortoru nalo abinimei vio takurano biorio,

mia maka ajikia ka nalo ajumña amila mira naliko Atua Soŕi, a bija kanano Naverikariano.’
Iouano 2:1,2

27 Atua Soŕi, kumemi numial iliano nei be riano, naio memedu ga ka kenememi bogo na vonganei, bior memedu ea bulukomeli nei, Erot naio Pontas Pailat, naliko kulo Israel nalo,

naliko kulo dolu nalo nei, tiniel mimi toru ka Toro Lu na kanamo inġauano nei Yesu, napano naio be Naverikariano napano jau komioakoio, ana nalo ajidomii kakario ka mia ala lelan naio. ²⁸ Nalo nei abinimei vio takurano ka ala tibe na, mia nalo amila memedu ga ka venia napano jau kojo kojidomii kakario ruei beamu, ana jau kobitirilar kober mia monokanio tibe na. ²⁹ Mia Atua Soġi, kumemi nubika denso ka tiemo monmaio vatitigio rivu ka iliano nalo na jikirkili nei napano nalo ajunġa aberiio ka kumemi, mia kumemi numisidom ka jau kajai kumemi, tomu na kanamo inġauano, ka mia kumemi nuverial kanamo iliano, ka mia tiniememi rimemebiju re, a numerou re. ³⁰ Mia kumemi nubika bunu denso ka jau kesianlar jumġamo, kala tomu na mieiano nalo ajog rivu bereio, a ka mia kumemi numijikia nuvila burutomoluo nalo ħeli na vite na vremesiano nalo, ea kanamo Toro Lu na kanamo inġauano nei Yesu siano.”

³¹ Mo bogo napano nalo abolkouo bisi, ana vio napano aju abior eaio mikulkulu, naruei Niununo Lu binimei bujoulou ealo, milalo abano aberial Atua kanano iliano, napano kanalo jidomiano jikili lie ea naio.

Namoneano nalo amiiġa bitiraviranlo ea vite nalo

³² Naruei ea bogoti nei, taara na namoneano nalo, kialo meuliano nalo binimei bo laka, jibe kanio tinielo takurano ga, a be kialo jidomiano takurano ga, mila ana maka toro tai napano mia sikili ka sidom riverenio ka vite nalo napano be kanano mia nalo abe kanano ga, mia nalo aju amijamo ka kanalo saba nalo be kialo bitiraviranio. ³³ Mia atevi nalo aju aber bulavulag ea tomu nalo miralo, ka kiado Tubo Yesu, naio meul bereio den namariano, mia kanalo iliano nene be mo-roano toru eaio, mia namoneano nalo amial ka bogo nei, Atua naio jo milivu toru kalo ea kiano tiniememiano banlo. ³⁴ Maka nalo tai ea kanalo taara, napano jumġano ve bulati ka vite tai, bior tomu nalo napano be kanalo borotano ħeli na kunualo, aju aġiliġili bulagio ka vite nalo nei, ana nalo ajunġa abar puruveru nene nalo abinimei, ³⁵ ajuvanio joa atevi nalo jumġalo. Mia iorou kanio, ana atevi nalo abarburevure puruveru nalo nene ban namoneano nalo tealoo napano jumġalo bulati ka vite nalo.

³⁶ Nalo tai nene napano naio jakii bajago na, naio be Yoseve, napano miyotuba ea bajulukuti na Livai, abar naio ea uleule na Saipras, mia nina naruei napano atevi nalo ajisia ka sio dolu bereio be Barnabas, napano sio nei sano nioti nene bere-nio “Toro namġa miiġalar

toro dolu kiano jidomiano.”
³⁷ Naio mila iñauano novo
 tai jibe na naruei, napano
 naio ñiliñililar ka kanano ni-
 atano tai, ana bar puruveru
 nene abinimei, juvanio joa
 atevi nalo jumalo.

5

*Ananaias naio koano
 Savira*

¹ Mia be toro dolu tai,
 siano Ananaias, napano
 koano siano Savira, naio
 bunu ñiliñililar ka niatano
 tai napano be kanalo
 naljuo, ² ana naio bar
 puruveru nene togio, naio
 bar binimei juvanio jua
 atevi nalo jumalo. Mia
 naio bar van puruveru
 na borotano nei togio,
 bokar bokanio be naljuo
 kanalo, a koano tira bunu
 naio mijikia vite nei, naio
 jaaro toru kanio. ³ Naruei
 Pitere berkanio, berinavo
 “? Ananaias, jumabe ana
 jau komijamo ka Siñaro
 binimei mila lelan kiamo
 iviso jibe na, ana jau komila
 sibilili Niununo Lu, ka
 napano jau kobokar bokanio
 puruveru na borotano nei
 togio nene? ⁴ ! Komialio
 kiana! Bogo na jau maka
 koñiliñililar ka niatano nei
 vo, be kei kiano? Naio
 be kanamo ga. Mia bogo
 napano jau koñiliñililar
 kanio, puruveru nene bunu
 jua kei jumano? Naio ju
 kia ga vo ea jumamo. Mia
 bogo na jau koberkar ka
 kavar nonovio van Atua,
 jau monokanio kala tibe na

naruei. ?Ana venia na mila
 kiamo jidomiano napano jau
 komila sibi ga bereio jibe na?
 !Mia jau maka kala sibilili ga
 tomu nalo, mia jau komila
 sibilili Atua memedu ga!”

⁵ Bogo na Ananaias naio
 mijog iliano nei, vaaraku-
 rano ga naio mijoru batove
 ea borotano, naio ñarodobi.
 Mia nalo napano amijog
 lilianiano nene, ameme-
 biju toru. ⁶ Naruei ana
 kialo ñeaku nalo ajumolu,
 amijuvuluko tati na naio,
 ana amiduio aba tavio, aba
 ajivinio.

⁷ Vaataro ka ñerenio ve
 tolu rivar-laka, ana koano
 tira Savira, napano naio
 maka rijikia vaio napano
 maluvo ka koano, naio kija
 binimei joomo. ⁸ Ana Pitere
 naio bika denio, ber “Savira,
 jau koverial ka kiniou. ?
 Nina be puruveru vodolu na
 kenemiu niatano nene na,
 ñeli na makanio?”

Tira nei naio bunu mila
 sibi, berdoñe berinavo
 “Makanio, tenalo nei ga
 biniu be kiaku.”

⁹ Ana Pitere naio berkanio,
 berinavo “? Jumabe ana
 kamjuo kumila sibi jibe
 na? !Kamjuo kubironkar ka
 mia kuvila von Atua Soñi
 kanano Niununo! ?Kojog
 tomu nalo na aju amiel
 abinimei ea ñaratavo? !
 Nalo ajivin koamo ruei
 abinimei, mia vonganei na,
 mia nalo añierso bunu kava
 tavio!”

¹⁰ Mia bogo napano tira
 nei naio mijog Pitere kanano
 iliano nei, ana mijoru

memedu ea Pitere jaano, m̄arodobi. Mia m̄eaku nalo nei abinimei joomo bereio, ana bogo napano nalo amial ka tira bunu m̄aro ruei, ana aṗier bunu taniabene ba tavio, aba ajivinio jo tivelinio ka koano suṁano. ¹¹ Naruei namoneano nalo napano ea lotuano, a kulo dolu nalo bunu napano amijogial lilianiano nei, nalo amemebiju toru laka.

Burutomoluo nalo a vite na iloiano nalo

¹² Mia ka bogo nei atevi nalo aju amila burutomoluo telabo na Atua kanano moroano, bija vite na iloiano telabo bunu, ea tomu nalo miralo. Mia bogo nonovio, nalo nei bija namoneano dolu nalo ajum̄a ajusol nalo vio takurano ea Solomon kanano Marsup̄iki, ea Atua Kunuano Lu. ¹³ Ana tomu nalo telabo aju abatove kalo, mia nalo napano maka amoneaio, nalo telabo amerou ka avan aiaburelo. ¹⁴ Mia dam̄ariga, tomu tealo a tire ajum̄a amonea Yesu, nalo aju abinimei telabo telabo lie vo, mia nalo na, Atua Sop̄i naio jusol nalo ea taara na namoneano nalo kanalo taara. ¹⁵ Bior vite nalo nei bunu, tomu nalo aju aburu kialo tomu na mieiano nalo abinimei, ana amidu nalo aju amon ea m̄alo jog a m̄alo yebe nalo, ea ikiṁarabo. Nina nalo amila jibe na ka bogo na Pitere naio riel sel ea vio nei, mia verenio niununo nene ga tokol nalo tealo, mia nalo avu bereio. ¹⁶ Mia

be tomu telabo bunu ea m̄arkomeli sesa nalo na aju jeliviv Yerusalemo, napano nalo abinimei bunu, a nalo aburu kanalo tomu na mieiano nalo abinimei, bija nalo tealo napano siṁaro ban ealo, ana atevi nalo amilarurlo abo bereio.

Tomu na tortoru nalo na vio Israel amiadikakar atevi nalo

¹⁷ Ana parinio toro lu, naliko kanano bilbilu nalo, ninei be Satusis nalo na vio na, nalo amijoku toru laka ka atevi nalo, ¹⁸ ana aba amiadikakarlo, abukulo aba joomo ea yimo na tetavokoiano, naliko tomu na bova nalo napano nalo ajua ruei. ¹⁹ Aju ga banbano-o na ka bogiano, ana Atua kiano nailiano tai binimei, ana betavo ea m̄aratavo na yimo na tetavokoiano nei, ana naio jukamu ka atevi nalo aba tavio bereio. ²⁰ Naio ber kalo, berinavo “Kam̄iu kuva kuvitumolu kuvitu joomo bereio ea Atua Kunuano Lu, kam̄iu kuverial iliano na meuliano vou nei van tomu nalo bereio.”

²¹ Ana atevi nalo amonmonea iliano nei, mia bogo na viomijeni mermeravo kia ga vo, ana nalo aba joomo ea Atua Kunuano Lu bereio, nalo aju amioliolu.

Komeli na toru na Israel mil ban atevi nalo

Ana ea kavijo nene kia ga vo, ana parinio toro lu naliko kanano bilbilu nalo nei, abio navurim̄araboiano dolu na Israel nalo ka nalo amei atu-tano ea kanalo komeli na

toru nei. Nalo nei abe tinielo ka aberiamā atevi nalo aju kia ea tavokoiano vo, mia bogo napano nalo abinimei vio takurano ruei jibe na, ana ajuvan iliano ban ea yimo na tetavokoiano ka mia kukuano nalo avurulo amei.

²² Mia bogo na nalo aba aboru ea yimo na tetavokoiano, mia nalo maka ajikia aleal lo. Ana nalo abinimei bereio ea komeli, amila iliveriioano, aberinavo ²³ “Bogo na kumemi nuba nuboru ea yimo na tetavokoiano, mia kumemi numial ka napano m̄aratavo naio birako batitigio jo, napano abukario bo ga jo, mia kukuano nalo na m̄aratavo nene ajumolu ajikili aju. Mia bogo na kumemi nubetavo, nuba joomo, mia maka bunu nūvial toro tai to.” ²⁴ Mia tomu na tortoru na kulo lu nalo, a natukamuano nakukuano na Atua Kunuano, bogo na amijog iliano nei, maka bunu ajikia jum̄abe ka atevi nalo nei naruei.

²⁵ Mia ka bogo na, ana toro tai binimei berial lilianiano dolu tai banlo, ber “!Jerei tomu nalo! Tomu nalo napano kuburulo aban ea yimo na tetavokoiano, nalo ajumolu aju joomo ea Yimo Lu, ajum̄a aberloglog tomu nalo bereio ruei!” ²⁶ Ana bogo napano natukamuano nei mijogio, naruei naio naliko kanano kukuano nalo aba aburu atevi nalo neibano abinimei bereio, mia nalo amila ea bajago na melumu

ga, bior ka nalo amerou ka mia tomu nalo na vio nei atubalo ka puruveru riviorio.

Aburu atevi nalo aban ea komeli na toru bereio

²⁷ Nalo nei aburu atevi nalo abinimei joomo, ana amila lo ajumolu aju kamu ea tomu na tortoru nalo nei miralo. Ana na parinio toru lu nei naio jom̄a bika denlo, berinavo ²⁸ “? Jum̄abe? Kumemi nuberbure kamiu kirisikili ruei, ka mia kamiu kuverii re bunu s̄io nei van tomu nalo, p̄eli na kuverloglog tomu nalo ka naio. ? Mia vonganei jum̄abe? Kamiu kumila mia vio Yerusalemo naio bujolou ruei ka kenemiu iliano nalo, a kamiu kumitu kuberenio kumemi naruei nube burupati na toro nei kiano m̄ariano.”

²⁹ Mia Pitere naliko atevi dolu nalo aberdoḡe, aberinavo “Mia monokanio kumemi numonmonea Atua loa ka napano numonmonea kulorinio. ³⁰ Kamiu kumuebin Yesu ruei, kamiu kumitukukakar naio ea m̄akolkolo, mia Atua Soḡi napano naio be korobido nalo kanalo, naio mila naio meul bereio den nam̄ariano. ³¹ Atua nene naio bitirilar naio ruei ka naio to tivelinio vameruo na naio, ka naio ve kiado Navurim̄araboiano a ve kiado Ioruriano. Atua naio mila jibe na ka kulo Israel nalo amijikia aviliglo, a ka mia naio mijikia riviekokoa kanalo kariano nalo. ³² Ana kumemi, kumemi

tomu na numial vite nalo na ka mirememi ruei, a numitu ka mña nuverialio van tomu nalo, nina kumemi liko Niununo Lu napano Atua naio jian ruei ban tomu nalo napano amonmonea naio.”

Kamaliel naio mil ban komeli na toru nei

³³ Bogo napano nalo na komeli na toru nei amijog iliano nei, mia iliano nei jululo mñele, mila ana tiniel mimi mñele ka atevi nalo, ana nalo ajidom ka atiburelo ka mia aňaro. ³⁴ Mia nalo tai kalo, napano nalo ajumña abatove ka naio, naio be Varisis, naio be naverloglogiano na tuboiano, siano Kamaliel, naruei naio jumolu berinavo avuru atevi nalo ava tavio beamu vo. ³⁵ Ana naio mil ban komeli na toru nei, berenio “Tomu na tortoru na Israel, miremiu ea kamiu, kamiu monoka kuvisidomii vatitigio rivu ka vite napano kumisidom ka kuvi-laio ka nalo na. ³⁶ Kamiu kuvisidomii toro nei Tutas. Nanua beamu kanio, maka vesiou laka, naio jumolu, ber naio be toro tai, a be titai jibe ka tomu nalo duelimo toromomou veri [400] napano aba abijurukario. Mia tomu nalo amuebin naio ruei, mia amijil dedade kanano tomu nalo abeve terakurano, mia kanano taara nei binime be kurano ruei. ³⁷ Iorou ka nina, nina ea bogo napano abuluku tomu nalo, Jutas nei na vio Kalele, naio bunu jumolu, buru tomu nalo ajakisor naio. Mia iorou

kanio, ana nalo amuebin bunu, a nalo amijil dedade ea kanano tomu nalo bunu abeve terakurano.

³⁸ “Mo ana, ea vite nei napano rojumña roberio, kin-iou neber jibe nei, neber mia kito rotuvan tomu nalo na atu ga tibe na, mia rala re titai kalo. Nina bjor ka ver kialo jidomiano pñeli na kialo inġauano nei rimaluvo ea ga toro, mia vite nei bunu naio monoka rijoru, ³⁹ mia verenio naio miyotuba ea Atua, kito maka rejikia roverbureio. Mia verenio kito ralavonio ka roverbureio, pñeli mia releal ka kito rojuko vio ka Atua kiano inġauano novo tai.”

Abitiv atevi nalo

⁴⁰ Ana komeli na toru nei mijog iliano masosouano na Kamaliel nei kiano, napano naio berenio mia nalo ala re titai ka atevi nalo nene, mia nalo aberenio mia atakii ga tibe kanio napano naio berenio. Ana nalo abio atevi nalo ka amei joomo bereio, ana ajian vironiano telisu banlo, abitivlo, amil kilkil banlo bereio, aberenio averloglog tomu nalo re bunu kanio sio nei Yesu, avona bisi, ana amiila bulaglo abano.

⁴¹ Ana atevi nalo aba tavio den burumñara komeli nei, mia nalo maka ajog rivova, amijog bo laka ga bior ka Atua naio mialo abe verare ka avokar imouiano ea tomu nalo miralo, kario Yesu siano. ⁴² Ana nalo maka ajogkar kialo tomu na tortoru nei, ana legiano nonovio, joomo ea Atua

Kunuano Lu, a joomo ea tomu nalo kunualo, maka nalo atuvan leleio ka napano nalo ajumġa aberloglog tomu nalo, napano nalo ajumġa amioliolu ka Ioluano Vou na Yesu, ka naio be Naverikariano.

6

Amioako tomu na ijaiano nalo aluo

¹ Ana ea bogo na, Yesu kanano naiagagoano nalo aju abinimei telabo lie vo, mia baravo tai jumolu iviso kalo. Mia nalo tivelinio be kulo Ju nalo napano nalo amil jelea Kris, a tivelinio dolu naio be kulo Ju nalo napano amil jelea ga kanalo iliano napano Ipru. Ana nalo napano amil jelea Kris, nalo ajumġa amila vukuleleano, nalo aberenio legiano nonovio, bogo napano nalo abio ka bulag kanalo ijaiano telisu ban taanou nalo, mia nalo maka ala rimemedu van kanalo taanou nalo.

² Ana atevi duelimo ba juo [12] nalo amijog iliano nei, abio burumġara taara na naiagagoano nalo nonovio ka nalo amei vio takurano, ana amil banlo, aberinavo "Banalo, maka rivu ka kumemi nuvituvan inġauano na verialiano na Atua kanano iliano, kanio kumemi nuvitu nuvitikar ga inġauano dolu nalo na. ³ Verenio tibe na, kami monokanio kuvileal tomu ve aluo ea kami, napano sialo bo ea tomu nalo miralo, a napano abujo ka Niununo Lu, a napano abarlo ka inġauano, kanio

mia kumemi nuvitiri bula-glo ka nalo ave taara sesa ka avitikar vatitig inġauano dolu nalo nei. ⁴ Ana tibe na, mia kumemi atevi nalo, kenememi iviso vodolu naio mijikia tumolu tu sikili bogo nonovio ea inġauano nana volkouano a nana verialiano na Atua kanano Iliano Lu."

⁵ Naruei nalo napano ea burumġara taara nei, nalo amijog jidomiano nei, mia ajaaro toru laka kanio, ana amileal tomu aluo jibe kanio napano nalo aberenio. Nalo aluo nei napano amilealo, nalo tai be Stevin, napano be toro tai napano jikili ka monmonea, a naio bujo ka Niununo Lu, bija Vilip bunu, a Pokaras, a Nikeno, a Timon, a Pamenas, a Nikolas toro na vio Antioko, napano naio maka ve toro Ju, mia naio monea kulo Ju nalo kanalo Atua ruei. ⁶ Naruei nalo aburu nalo aluo nei abinimei ajumolu aju kamu ea atevi nalo nei miralo, ka atokol parilo, a aioakolo.

⁷ Ana vite nei napano amila, mila ka bogo nonovio, Atua kanano iliano naio jo jelviv ea tomu nalo, a taara na naiagagoano na Yerusalem naio jo binimei telabo lie vo, bano-o bokar bunu kulo lu nalo telabo napano kulo Ju nalo kanalo, nalo bunu amijevio mon-eano.

Kulo Ju nalo tealo aburu Stevin ban ea kanalo burumġara komeli

⁸ Naruei nalo aluo nei tai, napano Stevin, naio be toro tai napano bujo ka Atua

kiano tiniememiano, a bujo bunu ka burumãara moroano na Atua kiano, mila ana naio mimãauka burutomoluo telabo a vite na iloiano bunu ban tomu nalo. ⁹ Mia kulo Ju nalo tealo napano ajua vio na, maka asaaro ka Stevin leleio, nalo naruei ajikar ka ajidom ala siniabu kanio. Nalo nei, abe kulo Saireni, a kulo Aleksadria, napano nalo aju Yerusalemo ea bogo na, a naliko kulo Selisia tealo bunu, a kulo Esia tealo, napano abinimei amiasol bijalo. Telabo ka nalo nei nalo ajibe ka bagaro takurano ga, napano ajuburon vio takurano julaka ea yimo na volkouano na kulo Ju nalo kialo tai. ¹⁰ Mia nalo nei amila vio ka averbure Stevin, bano-o mia kiri deio ga, bior Ni-ununo Lu naio mila Stevin be masou batitigio ea kiano iliano nalo, mia kialo ilimimiano nalo nei maka ajikia atuvulu naio leleio. ¹¹ Ana nalo aba amileal tomu tai bereio ka ava ala sibilili tomu na tortoru nalo, ana nalo nene aba aberial aberinavo “Kumemi numijog toro na naio mil niegeniege Mosis kiano tuboiano, a naio mila searia Atua kiano tolu bunu.”

¹² Ana ea bajago na, amila jibe ka navurimãaraboiano nalo, a naver-loglogiano nalo na tuboiano nalo, bija tomu dolu nalo telabo, tinielo bilulu m̃ele ka Stevin. Ana nalo abinimei abokakar naio jikili, ana aburu ban ea komeli na toru na kulo Ju nalo kialo. ¹³ Ana ea bogo na naruei, ana ilisib-

iano nalo aju amalmaluvo telabo lie vo, napano amil aber niegeniege Stevin, aberinavo “Bogo nonovio ga, toro na naio jomãa mili niegeniege kiado Atua kunuano Lu, bija Moses kiano tuboiano. ¹⁴ Mia kumemi numijog ka napano naio berii kiado Atua Kiano Yimo, napano naio berenio berinavo mia toro Nasarete na napano Yesu, mia naio rila bulag Yimo Lu nei, a mia naio rivilig bunu kiado bajago moruo nalo napano Mosis jianio nanua bogobe ruei, napano kito robokar batitiglo aju binimei bokar vonganei. !Toro nei Stevin naio jomãa ber bulavulag vite nalo na, naio jo mila lelan kito toru laka nei!”

¹⁵ Nalo amijog iliano nei, naruei aþilig pariparilo ka avitikar Stevin, ka naio rudu kiano verdoþeiano kanio iliano nei, ana bogo napano abitikario, nalo amialio ka napano mirano binimei jibe ka mirano nailiano tai garuei.

7

Stevin kiano iliano: Naio jukunu ka Epraamo jukamu

¹ Naruei ana parinio toro lu nei naio bika den Stevin, naio berenio berinavo “?Ana jau, jau kober jumabe? ? Riano ka napano jau kojomãa kobuku bulavulag iliano nalo na jibe ka na nalo ajumãa aberenio na, þeli na makanio?”

² Ana na Stevin naio berdoþe, berenio berinavo

“Karamāku nalo a kuruaku nalo, kamiū kuviagago ka kiaku verdoṣeiano beamu vo. Mia kiniou neverii korobido moruo nalo re nua tukamu vo. Nanua nanua laka, tormoruo Epraamo naio joa kanano buruvenuo napano Koltia, ea burumāra vio napano Mesopotomia, ana Atua na mermerano na kiado naio maluvo ka naio, berial kanio, berenio berinavo ³ ‘Jau monoka kataluvo den kiamo māratavo, a den kanamo vio, ka kavan ea buruvenuo tai napano mia kiniou nesiloglogio kaso.’

⁴ Naruei Epraamo jaluvo den Koltia, naio ba joa bulukomeli na Aran jukamu, banbano-o karamāno mārō, ana Atua buru naio binimeī joa buruvenuo nei napano kito rojuaio vonganei.

⁵ “Mia bogo napano Epraamo naio binimeī bokar vio nei, mia Atua maka rudu niatano tai ve telisu leleio vanio, a ea bogo na Epraamo naio maka rivar kenerinio bunu vo, mia naio bokar jikili ga verikariano napano Atua naio ber kanio nanua ruei, napano berkar berinavo mia buruvenuo vodolu na vio nei ve Epraamo kiano, vija kiano bajulukuti nalo napano mia nalo avavavin amei iorou ka naio. ⁶ Iliano napano Atua ber ka Epraamo ka bogo na jibe nei, napano Atua berenio, berinavo

‘Mia kanamo bajulukuti nalo na mia ava atua buruvenuo dolu, a mia nalo aimāu kurano ga

van sano tubo nene nalo,

napano bisi ana mia nalo ala kikilo mēle rivano-o rivokar yuka ve duelimo toromomou ve veri [400].

⁷ Avona bisi, ana mia kiniou netibure buruvenuo nene, mia nesian vironiano van kiano tomu nene nalo, ana na mia novuru bulag kanamo bajulukuti nalo bereio,

ka nalo amei bereio a alotu van kiniou ea kenemiū vio kar garuei nei napano nejian ban kamiū.’

⁸ “Mia ka bogo na naruei, Atua berenio bajago na pakuveuano ban Epraamo, javukia tovorovo tai ka virakariano nei napano Atua mila kario bija naio, mia bogo napano kenerinio Aisak nene naio moluo, bogoti aluo barlaka bano, ana Epraamo mila pakuveu kanio. A karina, Aisak bunu mila jibe na ka kenerinio Yakovo, mia iorou kanio, Yakovo bunu naio mila ban kenerinio duelimo ba juo [12], napano vonganei kito rojumā robiolo ka parinio karamādo nalo re beamu laka.”

Stevin naio berii Yoseve

⁹ Mia Stevin naio jomā mil kia ga vo, naio berenio berinavo “Tete nei Yoseve, naio be parinio karamādo nalo nei tai, ana kuruano dolu nalo amijoku mēle ka naio, ana aṣilivililar ka naio ban ka riva riṁāu kurano

ea buruvenuo na Ijivi. Mia Atua jo bija naio ea vio nene, ¹⁰ mia miiġa naio ka kiano bogokouo nalo na jik-ili nei, banbano-o mila napano parinio tubo na vio Ijivi nei, napano siano Vero, naio mial Yoseve kiano masouano bo laka, ana Vero nei naio midu inġauano nalo na tortoru na vitikariano na kanano buruvenuo ban ea Yoseve jumano naio takurano.

¹¹ “Ana ea bogo na, ana be burumara vitu tai ea vio Ijivi a ea vio napano korobido nalo kanalo Kenano, ana nalo amijog bova mġele biorio, nalo amial ka napano abe deio naruei, nalo maka lele salo sinaniano tai bunu. ¹² Mia tormoruo Yakovo naio mijog ka napano be sinaniano na viliiviliano tealo ju keano Ijivi vo, naruei naio miila kenerinio nalo, napano abe parinio karamado nalo, ka nalo avavin mave Ijivi ka avar tealo ve salo. Nina be kialo ieliano motiano garuei napano aba Ijivi. ¹³ Ea kialo ieliano valuo nene, Yoseve naio jiloglog naio ka kuruano nalo, a tukunuano na Yoseve kiano mġaratavo nalo nei bano-o bokar Vero bunu. ¹⁴⁻¹⁵ Ana Yoseve naio juvan iliano ba ban karamano Yakovo, berinavo naio naliko kanano mġaratavo nalo monoka amei atu naliko naio, ana na Yakovo nalo abokar duelimo va aluo ba jumo [75], napano abavin aba aju Ijivi. Nalo aju banbano-o, ana iorou kanio Yakovo nei naliko

kanado tormoruo dolu nalo nei nalo amarmaro ga ea vio nei. ¹⁶ Mia iorou laka kanio, ana na nalo abar buriu nene nalo aban bereio ea kanalo vio nei, ea vio tai siano Sekem, ana ajivinlo ea pakeltavo tai napano Epraamo naio bululario nanua ruei den kulo Amaro.”

Stevin naio berii Mosis

¹⁷ Mia Stevin naio jomġa mil kia ga vo, naio berinavo “Kanado tomu nalo ajua vio Ijivi ka yuka telabo bereio vo, naruei nalo amiluo abinimei napano nalo telabo lie vo, ana Atua naio mialio berinavo naio be bogo memedu naruei ka naio rila tibe ka napano naio berkario ban Epraamo nua ruei, berinavo mia naio rivurbulag kanano bajulukuti nalo den kanalo inġauano kurano ga. ¹⁸ Ana ea bogo na, parinio tubo vou tai naio jumolu ea vio Ijivi ruei, napano naio maka rijikia tukunuano na Yoseve kanano re nua a bija kanano mġaratavo nalo, ¹⁹ ana naio mila bova mġele ban kanado bajulukuti nalo re nua nei, napano bututualo ka atuvan lelan kenerilo nalo ka amarmaro ka mia amei re vetelabo.

²⁰ “Mia memedu ka bogo na, Mosis naio moluo, napano naio be tete mudomodomu kirinovo tanea. Ana karamano naio kenieno, abe juo ajivan naio joomo ea kunualo, banbano-o bokar siberio tolu, ²¹ mia karina, maka bunu ajikia ala titai, ana na monoka atuvanlario.

Mia karina, parinio tubo kenerinio vevinio nei ga milealio, ana na midular Mosis ana bitikar luġiluġio ka ve kanano. ²² Naio jo miluo bavin jibe na banbano-o, ana nalo ajumña aberloglogio ka masouano na kulo Ijivi nalo kanalo, ana naio binimej be toro novo tai ea ilimasouano a ea kiano imauano bunu.”

Mosis naio milavon ka jidom rilarur kulo Israel

²³ Ana na Stevin naio berenio, berinavo “Naruei ka bogo napano Mosis kanano yuka binimej bokar duelimmo va veri [40] titai jibe na, ana naio tinien maio ka kulo Israel dolu nalo napano aju keano, napano ajibe ka kurvano nalo, ana naio jomña jikar ka rivano mña miamiadu kalo kijakija.

²⁴ Ana bogo tai naio bano, mial ka napano toro Ijivi tai jo mue toro Israel tai, ana naio ba miija toro re Israel nei, ana milameran ban toro re Ijivi nei, ana muebinio mñaro. ²⁵ Nina bior ka napano Mosis naio jidomii ruei berinavo mia Atua rivitirilar naio ka rilarur kiano tomu nalo nei, ana ka bogo na, kulo Israel nalo maka avitilubar Mosis vo ka mia naio rila tibe na vanlo.

²⁶ “Ana ea legiano na beni nene, naio mial kulo Israel juo napano ajumña ajukulo, ana naio ban ka jidom rila naljuo nei avanju mñalo bereio, ana ber kalo, berinavo ‘Ei, kamjuo kuvia-gago. ?Jibe ka kamjuo kube

kuruemiu ga na, jumñabe ana kamjuo kumue lelan kamiu jibe na?”

²⁷ “Mia nana napano mila maka rimemedu ban dolu nene, naio jubonlar Mosis, naruei berkanio, berinavo ‘? Jumñabe, kei bitiri larso ka mia kove kenememi toro na toru, a ka ketibure kumemi tibe na? ²⁸ Peli jau kojidom kouebin kiniou tibe ka napano jau komuebin toro re Ijivi naniovo, a?”

²⁹ “Telikiti napano Mosis naio mijog iliano nei, mijog bova toru laka, ana jumolu buro den vio Ijivi, beven kanio ba joa buruvnuo dolu tai siano Mitiano, ana joa vio na kirisiou kija, ana kenerinio naljuo amoluo ea vio na.”

Mosis mijog Atua mil banio

³⁰ Ana Stevin naio berinavo “Naruei Mosis joa vio na banbano-o bokar yuka duelimmo va veri [40] bereio, karina legiano tai ana naio joa vio yauo tai, vaataro ka burumñara burusuku na vio Sinai. Naruei naio mial nailiano tai maluvo kanio ea sebi tai napano jijen buruiesi tai. ³¹ Ana Mosis naio miilo toru ka vite nei napano mialio, ana ba vaataro ka buruiesi nei ka rivitii batitigio. Ana naio mijog Atua Soġi joono, napano berenio, berinavo

³² ‘Kiniou nebe Atua ka korobumo tormoruo nalo, jibe ka Epraamo, Aisak, a Yakovo.’ Ana Mosis naio memebiju toru, naio merou ka rivitikario. ³³ Ana

Atua Soġi nei berkanio bereio, berinavo 'Jau keielar kanamo kulujabue, bior vio napano jau kojumolu kejkili kojuaio na, naio be vio lu tenia. ³⁴ Mia kiniou neber kaso, neberinavo kiniou nebitii batitigio ruei jogvaiano nalo napano kanaku tomu nalo ea vio Ijivi kanalo, a nemijog ruei kanalo tegiano nalo. Naruei kiniou nojo nebinime i naruei ka novuru bulaglo, a jau keialio, kiniou nojo nemiilaso bunu ka kavan bereio ea vio Ijivi tukamu, ka jau kove kanaku toro na rila inġauano nei.'"

Kulo Israel nalo maka asidom Mosis

³⁵ Mia Stevin naio joña milili kia ga vo banlo, berinavo "Mo Mosis na, naio naruei napano beamu nalo maka asidom naio, napano nalo aberenio iliano nei naruei, aberinavo "? Juñabe, kei bitirilarso ka kove kenememi toro na toru, a ka jau ketibure kumemi?" Mia Atua naruei napano miila nailiano binime i joa buruiesi napano jo bovago na, ka rivitirilar Mosis bereio ka naio ve tubo a rive naioruriano na kulo Israel nalo. ³⁶ Ana nina be Mosis nene kia ga navo napano naio buruñarabo ka kulo Israel nalo ajaluvo den vio Ijivi, nalo abinime i. A bogo nonovio, ea vio Ijivi, a ea Tei Mia, a bereio ea yuka duelimo va veri [40] ea vio yauo, naio joña mila vremesiano ea Atua

kanano moroano, a mila saba nalo na burutomoluo nalo banlo. ³⁷ Mia nina Mosis nene kia ga navo, napano naio berial ka kulo Israel nalo, naio berinavo 'Mia Atua naio rivitirilar kami u tai ga rimemedu, tibe ka kenemiu naverialiano dolu, jibe ka napano naio bitirilar kiniou jukamu ruei.' ³⁸ A ninei be Mosis nene kia ga navo napano naio jo naliko korobido tormoruo nalo a naliko kulo Israel dolu nalo, ka bogo napano nalo amiel burukuti ea vio yauo, a napano naio jo naliko nailiano nei napano mil banio mave ea burusuku na, Sinai. Ka bogo na, ana Atua jian iliano na meuliano ban Mosis nene ga, ana Mosis nene naio bar binime i jian banlo.

³⁹ "Mia korobido tormoruo nalo nei nalo maka asidom ajogkar Mosis leleio, a nalo abukular kanano iliano nalo ga, ana ea kialo jidomiano nalo, ajunña ajidom ka avan bereio Ijivi ga. ⁴⁰ Mia bogo napano Mosis jaluvo denlo, ba jo kirisiou ea burusuku na Sinai, nalo ajidomii bereio kialo meuliano re nua ea vio Ijivi, naruei nalo aber ka Erono nei, aberenio 'Kumemi numisidom ka jau monoka koinġauka kanado tavoru tai, ka mia nalo amijikia avuru mñarabo ka kito ravano, bior Mosis nei, naio buru bulag kito ea vio Ijivi naio buruñarabo ka kito robinime i ea vio nei, mia kito maka bunu rejikia ka naio jo be naruei, pñeli na mia

tumġabe ka naio.’⁴¹ Naruei nalo abano amila jibe na, amirġaukanio tavoru na kirikiti buluku napano be buruolu, ana amila sida banio, a nalo amirġaukanio burumġara jokoluolu tai ka kialo tavoru nene napano nalo ga amirġaukanio ka jumġalo nalo.

⁴² “Naruei bogo napano Atua mial vite nei, ana naio bilig taakano kalo, a juvanlo ka ava alotu ka mġarivitano nalo. Nina jibe ka Atua kanano iliano tai napano Naverialiano Amos naio berialio ea iliano Lu, napano berenio berinavo,

‘!Kulo Israel!

?Julaka ea yuka duelimo va veri [40] ea vio yauo,

kamii kumue temeul
nalo ka mġa kumila
sida,

mia nina be kanaku sida nalo
na pġeli na kei kiano?

⁴³ Makanio, maka kuvila ri-
van kiniou, mia ku-
milotu ka tavoru nalo
ga napano mġa kamii
ga kumirġaukanio,

jibe kanio Molek na,

napano kumiel bija
kanano tobobo,

a javukia bunu Revano na,

napano kamii kubar
tavoru na kiano
mġarivitano jukamu ka
kamii.

Kanio vite na, mia kiniou
nejili bulag kamii
kuva koalabo den
kenemii buruvenuo,
kamii kuva kuvitu
laka yako Bapilono
tivelinio bano.’” Amos
5:25-27

*Stevin berii ka napano
Atua mijai kulo Israel nalo
toru laka*

⁴⁴ Mia Stevin naio berenio, berinavo “Ka bogo napano korobido tormoruo nalo napano ajua vio yauo, ana Atua mil ban Moġis berinavo naio monoka rimġauka kanano tobobo tai, tavukia kijokijo tai ka riverialio river Atua naio jo nalikolo damġariga. Naruei nalo amirġaukanio memedu ka tiiano napano Atua berial banio, ana naruei nalo ajumġa amijiajian lilian tobobo nene ban taara nalo.

⁴⁵ Nalo ajumġa amila jibe na, binimei bokar bogo napano Yosua naio jukamu ka kiado tormoruo nalo abinimei amijil bulag kulo dolu nalo napano abinimei ajua kanado borotano nei ruei. Ana Atua naio buru kiado tormoruo nalo abinimei bereio jouro ea kiado buruvenuo nei, naruei ea bogo nei nalo amidu tobobo nei binimei jouro bijalo, jo bijalo binimei binimei bokar bogo napano tormoruo Teviti be parinio tubo.

⁴⁶ “Ana Teviti naio mial ka napano Atua jaaro mġele ka naio ka saba telabo, naruei naio bika ka verenio Atua naio mijikia rijamo ka mia naio rimġauka kunuano lu tai, ka Yakovo kiano bajulukuti nalo amijikia ava abolkouo vanio eaio. ⁴⁷ Mia Atua maka rijamo ka Teviti ka naio rimġauka yimo tai napano jibe na, mia karina kenerinio napano Solomon naio mimġauka burumġara kunuano lu nene. ⁴⁸ Mia kito monoka rosidomii

bunu, ka Toro Na Toru Na Mave Laka maka rijikia toa yimo tai napano tomu nalo ga aminĩaukanio, jibe ka napano Naverialiano Aisea naio berenio, berinavo

⁴⁹ *‘Atua Soƣi naio berenio, berinavo*

“Tiniabene ga tibe ka kanaku vio na nototano eaio, a yetemeriba naio jibe ka jeleigio vio na novulan jaaku mave eaio.

?Kamiau kuberiaĩa kumijikia kuvimĩauka yimo venia,

ka kiniou nava notoaio? ?Peli na kamiau kuberiaĩa kumijikia kuvimĩauka vio vaio,

ka kiniou nava nejilimebi eaio?

⁵⁰ *Vite nalo nonovio nei napano aju,*

mia kiniou ga na nejii nonovio lo abiniu.””” Ais 66:1,2

Stevin berenio kulo Israel maka ajogkar Atua

⁵¹ Mia Stevin naio jidom ka rila nonovio kiano iliano naruei, ana naio mil ban tomu na tortoru na kulo Ju nalo napano ajua komeli, ana ber kalo, berinavo “A kamiau, kamiau kumitibe ga ka korobido tormoruo nalo nanua beamu na. Tomnei, pariparimiu jikili laka, a tiliniemiu nalo abonbono, maka asidom ajog Atua kanano iliano, a tiniemiu nalo ajavukia tiniene tomu nalo napano maka ave pakuveu ga. Kamiau kube tomu namĩa aberbure mĩlea Niununo Lu bogo nonovio.

⁵² Atua kanano naverialiano

nalo re nua, korobido tormoruo nalo amila kiki nonovio lo abiniu, a amuebinvinlo telabo, be kurano ka abe tomu nalo napano Atua miilalo abinimei ka averial ka Toro Lu na Atua kiano imĩauano, mia naio jo binimei. Mia kamiau kubova kitkiti garuei, bior bogo napano toro nei naio maluvo ka kito ruei, mia kamiau kubielar naio a kumuebin naio mĩaro. ⁵³ Kamiau naruei napano kubokar Atua kiano tuboiano nene ruei, napano beamu nailiano nalo amidu binimei, mia kamiau maka kuvijogkario, kumitumĩa kumila kokorovio damĩariga.”

Nalo ajubabin Stevin mĩaro

⁵⁴ Stevin kiano iliano bisi ea vio na, mia bogo napano tomu na tortoru na bulukomeli amiagago ka naio, iliano nalo nei ajuluborua tinielo, naruei nalo tiniel mimi mĩele, ana na ajumĩa ajer mĩarjuvolo biorio. ⁵⁵ Mia Niununo Lu naio binimei bujolou toru ea Stevin, ana na naio jirarago bavin vio mave, jo bitivitii banbano-o, ana mial burumĩara mi-amoiانو na mermerano napano joko vio ka Atua, a naio mial bunu ka Yesu jikili ju mave ea vio na bavin laka vaataro ka tivelinio na naio, nina ea jumĩano meruo.

⁵⁶ Naio mial vite nei ana ber kalo napano aju, berinavo “! Aioou! Kiniou nojo nemial vio mave naio betavo jo, ana nemial Kulorinio Kenerinio jumolu ju tivelinio ea Atua jumĩano meruo.”

⁵⁷ Mia tomu na tortoru nei ami-jogivaio napano Stevin berenio, a nalo amijog jibe ka iliano tai na mia rila kule Atua, naruei nalo ami-aga toru, abuko burutilinielo nalo ka ajog re bunu Stevin, naruei nalo ajikiti abinimei ea naio, ⁵⁸ mia vaaraku-rano ga, abokar naio jikili, ana abatete kanio batavio den bulukomeli. Aba tavio den bulukomeli nene, ka atubabinio, mia aberinavo tomu nalo nanua aber bulag iliano nalo na ka mia rila ana Stevin rivar vironiano, aberenio berinavo nalo nene naruei monoka avisove ka puruveru na jukamu. Naruei nalo amiya bulag mñalo kulukoti nalo, ajuvanlo ajua mñeaku tai jumñano napano naio jo naliko ea bogo na, napano siano Sol, ana na nalo na aju ajuba Stevin.

⁵⁹ Ana bogo napano ajuba Stevin ba mia naio bolkouo, bio ban Atua, berinavo “! Aue, Tubo Yesu-o, koig kajamo ka niunuku riviedu to vijaso koig liki!” ⁶⁰ Ana naio minie ka sudu jaano, ana mil medave, berenio, berinavo “Tubo-o, koig jau koje re vironiano van nalo nei rivior kialo kariano nalo neibano nalo aju amila ka kiniou nei.” A bogo napano naio berenio iliano nei bisi, ana mijoru mon napano mñarodobi garuei.

8

¹⁻³ Mia Sol neibano jo ea bogo nei, naio mial vite neibano, napano ajubabin

Stevin mñarodobi, naio mial jibe ka napano amila imãuano na bo tai. Ana maka vesiou, mia tomu tealo na ãirilo ajikili ka volkouano, nalo maka amerou, mia nalo amijog bova toru laka, naruei abinimei amidu Stevin tati abano, ajigi mia ajigi, ana aba ajivinio.

Sol joñã mue lelan nalo napano mña amonea Yesu

Ana jikar ea bogo na, Sol nalo amila bova lie vo ban taara na namoneano nalo yako Yerusalemo. Mia ajumña amijil kikilo bova bano-o, mila napano miroano ka nalo aburo ka vio nei aban ea vio dolu nalo ea vio Yutea bija Sameria, mia atevi nalo maka avano, mia nalo aju damñariga Yerusalemo. Mia Sol nalo ajermñi mñele vo ka namoneano nalo, ba lie vo, a nalo aju aban janea kunualo nalo, naruei aburu bulaglo, abukulo aban ea yimo na tetavokoiano, nina be sumñano nalo a tire nalo bunu.

Vilip ba mioliolu ea tanobuku na Sameria

⁴ Naruei namoneano nalo miroano aburovuro dedade den Sol nalo ea bogo nei, mia bogo napano ajumña ajanea vio jibe na, nalo ajumña amioliolu ka Yesu kiano iliano abano. ⁵ Ana nalo tai kalo, be toro nei Vilip, napano nalo abitirilar naio jibe ka tikon jukamu, naio binimei rove yako ea burumñara bulukomeli tai na

vio Sameria, naio mioliolu be moti garuei ka Naverikariano Yesu ban tomu nalo na vio na. ⁶ Ana nalo na ajumā amiagago vatitigio ka kanano iliano, a nalo amial burutomoluo nalo napano naio miñaukanio, ⁷ jibe ka napano siñaro nalo ajaluvo den tomu nalo telabo, napano bogo na amoluo, nalo amiaga burutomoruo laka, naruei nalo aburo kilkil. A amial bunu ka napano nalo na niabele tivervelinio nalo amārmāro, bija javuluku nalo, abinimei abo bereio. ⁸ Naruei ea vio nei, tiniobi nalo ajaaro mia ajaaro toru laka ka vite nalo neibano amijogio a napano amialio.

Jumāliano tai siano Saimon

⁹ Mia beamu, ka napano Vilip maka rimeia ea vio Sameria nei vo, be jumāliano tai naio jo, napano siano Saimon. Jikar bogo be nua ruei, naio bar semei telabo a joñā miñauka vite telabo jibe na, mila ana naio joñā berial naio ber naio be toro dolu tai, naruei tomu nalo na tanobuku na naloaju amiilo toru bogo nonovio kanio. ¹⁰ Kialo tomu na tomormoruo nalo, bija tomu dolu nalo, nalo ajumā amonea kanano iliano nalo, a nalo ajumā aber jibe nei, aberinavo “!Kaleliki! Toro na, Atua kiano moroano tai joa naio riano. Nina monokanio moroano na naruei napano rojumā romijog aberiio, abio

ka ‘Buruñara Moroano.’” ¹¹ Naloaju amiilo toru ka naio jibe na naruei, napano jo mila vite nalo na bogo be nua ruei, nina naruei milaio ana amonea naio.

¹² Mia vonganei, napano Vilip binimei mioliolu banlo, ana nalo amonea kiano iliano nei naruei, napano naio mioliolii navenatuboiano na Atua kanano, a sio nei Yesu Kristo banlo. Naruei nalo abiniu amonea iliano nene, a nalo amijev na varueiano, nina sumānalo a tire nalo bunu, ¹³ binimei bokar bunu toro nei Saimon, naio bunu monea, naruei abaruei eaio. Ana iorou ka nina, damāriga naio jo lili ga Vilip, naio joñā miilo toru damāriga ea burutomoluo nalo a burumāra imāuano nalo na moroano na Atua kanano napano Vilip joñā milaio.

¹⁴ Naruei maka vesiou ga, ana iliano na vite nalo nei napano amiyotuba ea vio nei naio ba bokar atevi nalo yako Yerusalemo, berinavo kulo Sameria bunu, vonganei nalo amonea Atua kiano iliano ruei. Naruei atevi nalo aberiio, amial bokanio nalo aiila Pitere naio Jone ka naljuo ava ayotuba kalo, ka ave juo ala vonio ka avitii veve vite nalo nene. ¹⁵ Naruei naljuo nei abatove ea nalo na Sameria jibe na, ana abe juo ajokol pariparilo, a abolkouo biorlo ka Atua sian Niununo Lu vanlo. ¹⁶ Abe juo abolkouo kalo jibe na, bior ka napano Vilip naio baruei ea nalo nei ruei ea Tubo Yesu siano, mia Niununo Lu naio maka

rivatove ealo vo. ¹⁷ Jibe na, ana Pitere naio Jone, naljuo amila jibe na banlo naruei, ana nalo abokar Niununo Lu ka bogo nene naruei. ¹⁸ Naruei na jumġaliano nei Saimon, bogo napano naio jo mialio ka napano atevi nalo nei ajokol pariparilo napano ajikar vonga ka amonmonea jibe nei, mila ana nalo abokar Niununo Lu, naruei naio mijoku ka kialo moroano na. Naruei naio ba bar puruveru na toru tai binimej, mijian ban naljuo nei, jidom rivulular moroano neibano joa naljuo nei, ¹⁹ ber kalo, berinavo “Nina naruei kiniou nejidom ka kamiu kuvisian moroano na togio van kiniou, ka kiniou bunu nemijikia notokol tomu nalo pariparilo, ka mia amijikia ajev Niununo Lu.”

²⁰ Mia Pitere naio maka lele saaro ka vaio napano Saimon bikanio, naio tinien jerio, naruei mil jikili banio, berinavo “!Tavaliki! Maka nejikia navar kanamo veru napano jau koberianġa komijikia kovulular moroano na Atua kiano kanio. Nina naio be iġaiano ga tai napano Atua mijikia sian kurano ka ga van toro. Kiniou neber kaso, mia kanamo puruveru mia rivano, sebi sisenio ea vio na jogviano, ana jau bunu katakisorio kavano. ²¹ Mia vonganei naruei kumemi numijikia vatitigso, ka maka rivu ka kala inġauano rivija kumemi, bior ka napano kanamo iviso maka to

batitigio rivija Atua leleio. ²²⁻²³ Peli ga, kiamo iviso naio bujo ka jokvano ga, a kiamo kariano va nalo amiorkakar mġlea kanamo meuliano laka. Jau monoka koviligso ka kanamo jidomiano va nalo nene, jau monoka kobolkouo van Atua ka naio riviekokoaso riviorio.”

²⁴ Ana na Saimon naio berdoġe, berinavo “!Inau! Verenio tibe na, kiniou nejidom toru ka kamiu kubolkouo van Tubo kar kiniou, ka mia vite kouo nalo namġa kumitumġa kuberenio na, mia nalo amei re ea kanaku meuliano.”

²⁵ Naruei atevi juo nei, Pitere naio Jone, nalo aju kija bere vo naliko nalo nei, nalo ajumġa aberbisivisii vite nalo napano mġa Kristo milaio a Atua kanano iliano nalo, banbano-o bisi ana nalo ajaluvo ea vio nei, amidu mġarabo na ka avan bereio mave Yerusalemo. Mia bogo napano naljuo ajumġa amiel ea mġarabo abano, ajumġa amioliolu ka Iolvano Vou na Yesu ea mġarkomeli telabo ea tanobuku na Sameria bisi, ana na nalo abinimej aboru bereio Yerusalemo.

Vilip mil bija torbobogio tai re Itiopia

²⁶ Naruei bogo napano Vilip naio jo minġau yako Sameria kia ga vo, ana Atua kanano nailiano tai binimej eaio, mil banio, berinavo “Vilip, kiniou neber ka jau, neber jau kotumolu, kava katakii mġarabo napano jikar

Yerusalemo bavin ea komeli na Kasa.” Mia m̃arabo nene be m̃arabo napano bavin je-lea vio yauo.

27-28 Jibe na, ana Vilip naio mijog iliano nei, ana jumolu, jikar ka ban naruei. Naio jo miel ban jibe na, mia miilo ka torbobogio tai napano joa kanano rukuruku napano parinio bue m̃arauo burio, binimei ea m̃arabo nene. Toro nene naio joṃa buluku Niosi Lu napano Aisea bivitaui. Naio be toro na toru tai na tira na toru tai na vio Itiopia, napano abio tira nene ka Kedesi, napano nioti nene berenio naio be parinio tubo ea kanalo buruvenuo. Toro nei kanano iñauano be tena rivitikar iñauano nalo na tortoru ea tivelinio na veru na tira na toru neibano kanano, a toro nene, naio be toro tai bunu napano nanua ruei amila jibe ka tuṃaro. Naruei ea bogo na, naio batove Yerusalemo ruei ka rivolkouo van Atua, naruei naio jo jakii kanano m̃arabo ka rivan bereio ea kiano vio. 29 Jibe na, ana Vilip bunu jo miel ea m̃arabo nene bano, a toro na toru nei bunu joa kiano rukuruku buro bano, naruei Vilip mialio. Mia bogo napano Vilip mialio, Niununo Lu mil banio, berinavo “Jau katakisor toro na, kava vaataro ka kanano rukuruku.”

30 Naruei Vilip jikitisosorio bano, naruei naio ban vaataro, mijog ka napano toro nei naio joṃa buluku niosi na Naverialiano Aisea. Naruei naio bika

denio, berenio berinavo “? Jumabe, jau kobuluku lubar batitigio iliano na jau kojom̃a kobulukuio na, ṃeli na makanio, jau maka kovuluku lubario?”

31 Ana na toro nene berdoṃe berinavo “? Koig, ana mia kiniou nejikia tuṃabe, ka napano maka toro tai to, ka riveribisivisii iliano nei van kiniou?” Ana na naio ber ka Vilip, berinavo “Mo verenio tibe na, mia jau komei mave beamu, kito ve juo rotu tano ea vio nei.” Ana na Vilip bavin ea rukuruku.

32 Mia Iliano Lu napano Aisea naio bivitaui, napano toro na toru nei joṃa milavonio ka rivulukuio ea bogo nei, nina be iliano napano ber jibe nei, berenio berinavo

“Toro nene jibe ka nunu tai, bior ka bogo napano abokar naio ka mia aueio, mia naio melumu ga,

ṃeli na naio jibe kanio kirikiti nunu tai, ka bogo napano aburon bulag vijinio napano be moti, mia maka rijikia riaga.

Toro nene naio jibe na naruei, napano ea bogokouo na kiano meuliano, naio maka rijikia riveriṃe iliano tai leleio, mia naio mon melumu daṃariga.

33 *Nalo amila buruṃara iñauano toru laka ban naio ruei,*

*mia bogo na ajibureio, nalo
amila maka rimemedu
kanio.*

*Mia nalo amial ka maka ve
kenerinio tai ka rudu
siano,*

*bior aje korovio kiano meu-
liano ea yetemeriba nei
kiri bulati ga.” Ais
53:7,8*

³⁴ Mo toro na toru nei bikanio nioti na iliano nalo nei den Vilip, berinavo “Kikaku bilbilu, jau kover bisivisii vonio van kiniou ka naio be kei napano naveri-aliano nei naio joña berii nei? ?Naio joña berii ber ga naio, ðeli na naio joña berii toro dolu tai?”

³⁵ Ana na Vilip jukunu ka banio, naio jikar memedu garuei ea Iliano Lu neibano joña bulukuio nei, jakii ba lie ana berial Ioluano Vou na bo vodolu na Yesu kiano banio. ³⁶ Mia ka bogo na, abe juo aju aburo ea rukuruku kia ga vo, ajakii m̃arabo abano, mia nalo abinimei abokar vio tai napano uei tai joaio. Naruei bogo napano toro na toru nei naio mial uei nei, naio mil ban Vilip, berinavo “Kiniou nejidom ka jau kavaruie ea kiniou, mo keialio, ninei be uei tanie jo. ?Ðeli maka bunu ve titai tokovio ka kito juo ka kavaruie ea re kiniou a?”

³⁷ [Ana na Vilip berdoþe, berinavo “Jibe nei, verenio jau komonea vija kiamo iviso momou reraio garuei.”

Ana na toro nei berial ka Vilip, berinavo “Kiniou nomonmonea ka Yesu Kristo naio be Atua Kenerinio riano.”] ³⁸ Naruei toro na toru

nei mila kiano rukuruku mebi ea vio nei, ana abe juo amiel abatove, ajudobi joomo ea tinia uei, ana mo Vilip baruei ea toro Itiopia neibano.

³⁹ Mia bogo na abavin den uei nei bereio, mia Niununo Lu binimei burular Vilip den vio nei kolvare ga, mila ana toro na toru nei maka bunu rial naio. Ana naio ba jotano bereio ea kanano rukuruku, jakii kiano m̃arabo, naruei naio jo bano, napano tinieno jesei mia jesei toru laka.

⁴⁰ Mia Vilip jibe ka napano naio jaluvo ruei, mia mii-ilo ka mial ka napano naio joa bulukomeli na vio Asotas ruei. Mia naio jo miel batove, ba jelea komeli na tanobuku na vio na, jo mii-oliolu ka Ioluano Vou na bo banbano-o bokar burum̃ara bulukomeli na vio Sisiria.

9

*Atua bilig Sol binimei be
Yesu kanano toro*

Imãuano 22:4-16, 26:9-18

¹ Naruei ea bogo nene, Sol napano beamu naio joña mila baravo m̃ele ka namoneano nalo, naio joña tinien jer Tubo kiano naiagagoano nalo kia ga vo, a naio joña berkar kia ga vo berinavo mia naio ruebinvin nalo tibe na. Tenene na bogo tai, ana naio ba mial parinio kulo lu nalo, ² naio bika ijaiano tealó denio. Sol jidom ka parinio kulo lu nei rivivitauiá niosi nalo tealó van navurim̃araboiano na yimo na volkouano na kulo Ju nalo kanalo, nina

ea vio Tamaskas, ka riverial vanlo ka monoka ajamo ka Sol rivatove ealo ka sirag tomu nalo napano aju joomo ea vaio napano m̃a abio ea bogo na kanio “Marabo Vou,” ninei be namoneano nalo. Sol mila jibe na bior naio jidomii ka riva rivokakarlo sikili, suṃṃano nalo a tire nalo, ana mo naio rivurlo avan bereio Yerusalemo, napano beamu nalo aburo kanio, ka rivukulo avan ea yimo na tetavokoiano. Ana toro na toru nei bivitauia jibe ka napano Sol bika denio, ana midu jian banio.

³ Mo Sol naio bar m̃a niosi nalo nei, karina ana naio juvan vio Yerusalemo naio jo batove Tamaskas. Mia Sol nalo aju amiel bano-o legiano tealò ruei, ana na nalo abinimej vaataro ka vio nei Tamaskas, mia naio miilo kolvare ga ka Atua kanano buruṃṃara mi-amioiano tai maluvo ea tini-abene, mereralii vio napano Sol joṃṃa miel eaio.

⁴ Miamoiano nene midulii Sol jibe na, mila mijoru ea borotano, ana naio mijog niono tai mil banio, berinavo “!Sol, Sol! ?Kar vaio ana jau kojom̃a komila lelan kiniou m̃ele, jibe ka na kojom̃a komila na?”

⁵ Bogo napano Sol mijog vikadeniano nei, ana bikanio, berinavo “?Tubo, jau keinia?”

Ana Yesu berdoṃe jibe nei berinavo “Yesu napano jau kojom̃a komila kiki naio, kiniou nene nei naruei.”

⁶ Ana Yesu naio berkanio bunu, berinavo “Mo jau, kotumolu, keiel kava jouro ea komeli na Tamaskas, ana mia toro tai rimej riverial vanso ka mia jau kala tuṃṃabe.”

⁷ Naruei ana tomu nalo napano ajuṃṃa amiel naliko Sol ea bogo na, nalo amijog iliano nalo nei, mia maka aial toro tai na ber kalo, naruei nalo amiilo toru kanio, ajikili aju vovu ga aju jibe na, maka bunu kanalo iliano tai ka mia aver kalo. ⁸ Avona bisi, ana Sol naio mila jibe ka na Yesu berenio. Naio jumolu bereio, mia bogo napano bisiṃe mirano, mia maka rijikia rivitilubar titai leleio, jibe kanio napano mirano miununu ga. Vite nei naruei milaio ana nalo abokar juṃṃano, ana abalavo kanio ka ava Tamaskas. ⁹ Naruei nalo aba aboru vonuo ea vio nei, mia Sol naio mirano miununu jo jibe na ba bokar bogoti tolu, a ka bogo na, naio maka sen titai a naio maka rimunu titai, naio mondulu ga.

Ananaias ba bolkouo ka Sol

¹⁰ Naruei ea vio neibano Tamaskas, be naiagagoano tai jo, siano Ananaias, mia naio mial ka napano Tubo Yesu bio siano, jibe ka namonvovuano tai, naio berkanio, berinavo “Koig, Ananaias.”

Ana Ananaias miolu, berinavo “Nao, kiniou nei Tubo.”

¹¹ Ana na Tubo berkanio, berinavo “Jau kotumolu katove iviso ea bulukomeli

na, jau katakii m̄arabo na telisu na abio kanio ‘Marabo Na Memedu,’ mia jau kava kovoru ea Jutas kunuano. Ana ea yimo nene, jau kovika toro na vio Tarsis tai napano naio siano Sol. Mia toro na, vonganei naio jo bolkouo, a naio mial visiṣeiano tai ruei, ¹² ana ea visiṣeiano nei, naio mial jau naruei, napano kobinimei joomo ka naio, ana komidu jum̄amo jo mave ea naio, ka mia mirano sirarag bereio rivu.”

¹³ Mia bogo napano Ananaias mijog iliano nei naio miilo va kanio, ana berinavo “Tubo, kiniou nemijog tomu telabo aberii toro na kiano bajago ban kiniou ruei, a aberial jum̄abe napano m̄a mila ka kanamo namoneano lu nalo napano aju Yerusalem, ¹⁴ a vonganei, nemijog naio binimei ea vio Tamaskas ruei, bior tomu na tortoru na kulo lu nalo amidu moroano banio ruei ka mia naio rimej rivotakar kumemi nalo napano numitum̄a nubolkouo ka siamo.”

¹⁵ Ana Tubo naio berkanio, berinavo “Jau komerou re, mia jau kavan ga, bior kiniou nebitirilar toro na ruei, ka mia naio rila kanaku im̄auano, ka mia naio rivar siaku riva tanea taara dolu nalo na maka ave kulo Israel, riva rivokar kialo parinio tubo nalo, a rivan kulo Israel nalo bunu kija.

¹⁶ Mia kiniou nala naio rivitilubar vite kouo dolu tai bunu, ka mia naio monoka rijog rivova ka vite ve telabo

kario siaku, ea bogo napano mia naio tom̄a riverialio.”

¹⁷ Ana Ananaias midu iliano nei, ana ban ea yimo napano Tubo berkanio, ana ba joomo naruei naio mial Sol, ana midu jum̄ano jo mave ea parinio. Ana mil banio berinavo “Kuruaku Sol, Tubo naio miila kiniou nebinimej ka neialso, nina be Tubo Yesu napano miyotuba kaso ea bogo napano jau konoṣṣa komiel ea m̄arabo kobinimej. Naio mila kiniou nebinimej ka mia nobolkouo ka miramo, ka mia rivu bereio, a ka mia Niununo Lu rimej rivujo lou easo.” ¹⁸ Naruei naio bolkouo kanio, mia vaarakurano ga vite nalo napano jibe ka tiririkiti niado ajibirbil den Sol mirano, mila ana mirano abo bereio. Naruei Sol naio jumolu ju, ana ea bogo nei, aburu aba abaruei eaio. ¹⁹ Mia naio jinano moti bere, a mijog ṣirinio jikili bo bereio.

Sol jikar ka mioliolu ea vio Tamaskas

Naruei Sol naio jo legiano tealu bereio yako Tamaskas naliko naiagagoano nalo napano ajua vio na. ²⁰ Mia maka vesiou, ana naio jom̄a ba joomo ea kulo Israel nalo kanalo yimo na volkouano nalo na vio nei, ana naio jo joomo jom̄a mioliolu ka Yesu, berinavo naio be Atua kenerinio riano. ²¹ Mia tomu nalo napano amijogio, nalo amiilo toru laka, a ajum̄a abivika denlo, aberinavo “! Tomnei! Toro nanua beamu naio jo Yerusalem, jom̄a

mue lelan tomu nalo namġa ajuġa aberenio sio na napano vonganai naio bunu joġa mioliolu kanio bereio. Kamiu kuvialio, naio binimej ea vio nei kar ga vite nene kia ga navo, ka naio riadikar tomu nalo nene, ka rivurlo avan bereio, rivan parinio kulo lu nalo yako Yerusalemo, mia vonganai naio ba be dolu ruei. ?Venja mila naio jibe na?"

²² Mia Atua mija Sol ka kanano iliano binimej temi lie vo, mia naio jo bokar tomu nalo telabo lie, napano jo mila meravo laka banlo ka Yesu, naio naruei be Naverikariano na memeduriano. Ana kulo Israel dolu nalo napano ajua vio Tamaskas, maka aleal verdoġeiano na bo tai leleio ka atukovio ka Sol kiano iliano nalo, mia kanano iliano nalo amila searo ea kanalo jidomiano nalo batitigio.

²³ Naruei bogoti tealo barlaka bano, ana Sol joġa mioliolu jibe na, ana kulo Israel nalo ajumolu abinimej vio takurano, aberij ka aleal mġarabo tai ka auebin naio rimġaro. ²⁴ Mia bogo nonovio, ka legiano a bogiano, nalo aju rorea naio ea burumġara morouo nalo napano ju bure tagvoru na komeli nei, ka mia amijikia auebin verenio rilavonio ka rivuro. Mia iliano nei binimej bokar Sol, ²⁵ naruei kiri bogiano tai, ana nalo napano aju bija naio amidu naio bano, amisonio ban ea burumġara basaro tai,

ana nalo ajuvarvan naio batove-e boru yetano tavio ka tagvoru na komeli nei. ²⁶ Naruei Sol buro den vio nei Tamaskas, naio bavin Yerusalemo bereio.

Sol ban bereio Yerusalemo

Ana na Sol ba Yerusalemo, mia naio jidom riva rivijurukar rivija naiagagoano nalo na vio na, mia maka amonea naio ka averenio naio be Yesu kiano naiagagoano riano tai, mia nalo niabele ġili kanio, mila na amerou mġele kanio. ²⁷ Mia nalo tai kalo be Barnabas, naio mial ka Sol naio be riano, ana jidom ka riijaio, mila kiano mġarabo ka mia mijikia rivan sikili tu tukamu ea naiagagoano nalo miralo. Ana abe juo abano, ana Barnabas berial kalo jumabe ana Sol mial kiado Tubo ea mġarabo, a napano kiado Tubo mil banio jumabe, a naio berial bunu jumabe napano Sol jikili laka ka mioliolu yako Tamaskas ka Yesu siano. ²⁸ Naruei nalo amijog iliano nei, nalo ajaaro kanio, ana na Sol naio jo naliko, jo ban ea vio nalo na Yerusalemo, a naio maka leleio rimerou, mia joġa mioliolu ka kanado Tubo Yesu siano. ²⁹ Ana naio joġa mil bunu naliko kulo Israel nalo napano ajumġa amijev tomu na vio Kris nalo kanalo iliano, naio joġa mila mira ka iliano naliko, banbano-o mia nalo ajidom auebin naio rimġaro. ³⁰ Mia bogo napano namoneano nalo amijog vite

nei, mia nalo aburu Sol batove Sisiria bo ga, avona karina nalo aber bogiano bo kanio, ana nalo amiven naio ban ea kiano vio Tarsis bereio.

³¹ Ana ka bogo na, namoneano nalo napano aju rorea ea vio Yutea, a ea vio Kalele, a ea vio Same-ria, nalo amial bogo melumu kija kalo. Ana na Niununo Lu naio jo miijalo, naio jo mila na tumāro binimej jikili lie vo, ana jo mila mirano na namoneano nalo aju abavin lie vo, ana namoneano nalo nene nalo aju ajovon kiado Tubo damāriga.

Ea vio Lida, atevi Pitere mila batitigio Aneas jaano

³² Naruei ea bogo na, Pitere naio miel janea komeli nalo na tanobuku nei, naio jomā mioliolu, karina bogo tai bereio, batove ka riaduka namoneano lu nalo na yako ea komeli na Lida.

³³ Ana bogoti napano boru ea vio na, mial toro tai napano niabene tivelinio māro, mila naio mon ea māno jogu ka yuka arolu [8] ruei. Toro nene, siano Aneas. ³⁴ Mia bogo napano Pitere mialio, ana berkanio jibe nei, berinavo “Aneas, kiniou neber ka jau, Yesu Kristo rila vatitigio niabemo rivu bereio. Jau kotumolu kojukio nāmo yebe.” Mia vaarakurano ga, Aneas jumolu, niabene bo ruei. ³⁵ Ana na tomu nalo na vio Lida bija nalo na ea vio vodobi na Saron, amial toro nei binimej bo ruei, ana

nalo abilig kanalo meuliano nalo abiniu amdu ban Atua.

Pitere mila Toraka meul bereio yako Jopa

³⁶ Mia ea vodobi nei be bulukomeli tai, siano Jopa, mia namoneano tai kalo napano joaio, naio be tira na, napano siano Tapita. Nina be sio tai napano jelea iliano na Krik aber Toraka, sano nioti nene ber temeul maraiu tai napano siano tia. Tira nei, naio mila imāuano novo nalo telabo julaka, a jomā miija talimāsa nalo damāriga. ³⁷ Ana ka bogo na, mieiano tai bokario, bano-o mia mārrodobi, naruei nalo ajekon niabene, ana amidu batitigio joa kunuano mave, ka atigio. ³⁸ Mia bogo napano naiagagoano nalo na vio Jopa amijogial ka Pitere naio jo ga vaataro ea komeli dolu yako Lida, nalo amila tomu juo ka avan soḡeli kanio. Ana abano amiyotuba ka Pitere, abika mēlea ga naio, aberinavo “Kumemi numisidomso toru ka komei soḡeli kean kumemi.”

³⁹ Jibe na naruei ana Pitere bar vio jumolu, ban bija naljuo ana nalo abano. Bogo na naio binimej boru, ana aburu naio bavin ea vodobi na jo mave napano amidu batitigio tira nei jo mon eaio. Mia taanou nalo abinimej aju jeliviv ea ajumā ajigio ruei, a bogo na Pitere binimej, ajian kulusoto nalo a kulutiresi nalo napano tira neibano naio jomā jululo bogo napano meul jo kia ga bijalo. ⁴⁰ Ana

iorou kanio, na Pitere ber jidom ava tavier beamu vo, a iorou ka napano abavio, ana na naio minie ka sudu jaano ana bolkouo. Ana barlar parinio bitikar tira nei mokotenano, mil banio, berinavo "Tapita, jau ketevijo." Mia vaarakurano ga tira nene bisiġe mirano, mia bogo napano naio mial Pitere, naio barlar naio jumolu jotano jo. ⁴¹ Ana Pitere mijou bokar jumano, ana burular naio jumolu, bio ba tavier ban namoneano nalo bija taanou nalo. Ana nalo abinimej joomo, ana naio ber kalo, berinavo "Nainei naruei, kenemiu tira nene, Atua mila naio meul bereio."

⁴² Mia iliano na burumġara vite neibano soġeli ga jaburu janea komeli na vio Jopa, ana mila tomu telabo amonea kiado Tubo biorio. ⁴³ Naruei Pitere naio jo jiu kija ea vio Jopa, nina ea toro tai, siano Saimon, napano naio be toro na mġa mimġauka vite ea kulukuti bue mġarauo.

10

Atua mil ban Kornelias

¹ Mo be bulukomeli dolu tai jo koyou ea tanobuku nei, napano siano Sisiria, a be toro na toru tai na be na tukamuano na kulo na mira nalo na vio Romo, naio joa vio na, naio siano Kornelias. Ana naio jomġa bitikar taara tai na mira nalo, napano abokar toromomou takurano [100] na tomu nalo, a nalo abio kanano taara nei kanio

"Taara Na Vio Italia." ² Mo toro na toru nei, naio be toro novo tai, a naio naliko kiano mġaratavo nalo damġariga nalo ajumġa abolkouo ka Atua, a amilotu kanio, a bogo nonovio nalo ajumġa amiiġa tomu na vio Israel nalo napano abe talimġasa ga, ajumġa aġian iġaiano toru banlo. ³ Mo ea legiano tai, titai jibe kanio mġerenio tolu [3], monloglog bogo na volkouano na niogoravo, ana naio mial vite tai jibe kanio visiġeiano, napano Atua jiloglog kanio. Vite napano naio mialio, meravo batitigio bo, a mial ka napano Atua kiano nailiano tai batove binimej joomo ea kunuano, naruei bio berinavo "Kornelias!"

⁴ Mia bogo napano Kornelias mial nailiano nei, naio merou bin naio, naruei naio jo bitikar nailiano nei jikili, ana berinavo "?Venia na?"

Ana nailiano nei berdoġe, berinavo "Atua naio mijog kanamo volkouano nalo ruei, a maka tiniene ribobogġa bajago novo nalo napano mġa komila ban talimġasa nalo, naio jaaro kanio a naio jo tinien maio kaso kia ga vo. ⁵ Mo naio ber kaso berinavo jau monokanio keiila kanamo tomu tai avan ea bulukomeli na Jopa, ka avio toro tai napano siano vodolu be Saimon Pitere, ka naio rimej ea vio nei. ⁶ Toro nene naio joa toro dolu tai kanano vonuo, napano siano Saimon bunu, kunuano jo koyou vaatara ka tei, naio be

toro napano miñauka vite ea kulukuti bue m̃arauo.”

⁷ Naruei nailiano nei berial iliano nei bisi, ana javin bereio. Ana Kornelias naio bio kanano tomu naim̃auano juo, a bija kanano toro na mira napano naio bunu joñña milotu ka Atua, napano naio jo bija naio julaka, bitikar naio, ana nalo tolu nei abinimei eaio. ⁸ Ana naio berial vite nei banlo abe tolu, avona karina miilalo aban ea vio Jopa ka avuru Pitere rimei.

Atua jiloglog ka Pitere bunu ka visiñeiano tai

⁹ Leri ka beni nene, bogo napano tomu nalo nei aju amiel abinimei Jopa kia ga vo, Pitere naio jo, naruei naio jidom rila volkouano na legiano viovare, mia jibe na bogo nonovio ana naio ban ea vio vodobi mave ea yimo napano naio joaio. ¹⁰ Naio joa vio na, naruei naio mijog ka jijerio, naruei naio berenio avurosebi. Mia bogo napano nalo ajum̃ña amim̃auka sano sinaniano kia ga vo, naio mial visiñeiano tai napano Atua jiloglog kanio jibe kanio monovovuano tai. ¹¹ Ana mial vio mave betavo, ana naio mial titai jibe kanio panpano na toru tai, naio jo batove yetemeriba nei. Naio mial ka napano nalo aju abokar sudu nene nalo be ver, naruei nalo ajum̃ña ajubarvan batove. ¹² Ana joomo ea panpano nei, Pitere mial ka be temeul kinkin dolu nalo ajuaio, bija bunu vite

napano Atua naio miilalo abe lu ka kulo Israel nalo asenio re, jibe kanio m̃aro nalo, a niobi nalo, a menu nalo. ¹³ Ana naio mijog joono tai mil banio, berinavo “Pitere, jau kotumolu, koue vite nalo nei tai ana jau kesenio.”

¹⁴ Mia Pitere naio berinavo “Peli ga Tubo, maka lele rijikia tibe na. Kiniou maka lele nesen vite nalo na jibe na napano maka rimemedu ka asenio, a ka napano kumemi kulo Ju nalo kumemi nubel kanio.”

¹⁵ Ana naio mijog joono nei bereio naio berenio, berinavo “Vite napano kiniou Atua neber ruei neberinavo naio meravou, jau maka bunu kejikia kover naio miagiago.” ¹⁶ Ana vite nei naio maluvo jibe na valuo kanio, naruei iorou kanio ana varolu nene bereio, napano Pitere naio jo berbure kia ga vo, ana panpano na toru nei naio jo bavin bereio.

Pitere bokar nioti na kiano monovovuano nene

¹⁷ Ana Pitere naio mijog bova, naio jidom dede nioti na vite napano maluvo kanio, mia bogo napano joñña jidom dedeio kia ga vo, Kornelias kiano tomu tolu napano naio miilalo abano, nalo abinimei aboru Jopa. Naruei nalo abika Saimon kunuano den tomu tai, ana ajiloglog yimo nene kalo, ana nalo abinimei ajikili ajua Saimon kunuano m̃aratavo. ¹⁸ Naruei nalo abio jouo, aberenio “?O, be

toro tai siano Saimon napano siano tinene abio ka Pitere, naio jo kamlika ea yimo na, Ƥeli na makanio?”

¹⁹ Ana ea bogo nei Pitere naio jotano joġña jidomii kija ga vo vite neibano mialio, ana Niununo Lu mil banio ber ka, berinavo “?Jau komijogio? Tomu tolu nalo ajunġa ajiragso, nalo nene na ajikili aju tavio, ajunġa abioso kiana. ²⁰ Mo jau kotumolu kavatove keialo, avona verenio nalo avaleaso ka mia kavan rivijalo, mia monoka jau kosidomii re ka mia kavan re kamlika, mia jau katakisorlo ga kavano, bior kiniou nemilalo abiedu kaso.”

²¹ Ana Pitere jumolu jabulu batove tavio, ana mial nalo tolu nei, ana mil banlo, berinavo “Ninei be kiniou napano kamiu kumisiragio. ?Kamiu kumisidom kiniou ka titai kovio Ƥeli na?”

²² Ana nalo nei aberdoġe, aberinavo “Nao, kumemi nubinimei ea kenememi parinio navurimġaraboiano na mira, Kornelias, ana naio miila kumemi nubinimei kaso, kanio jau komei ea kunuano ka naio rijog kija kanamo iliano nalo tai. Atua kiano nailiano tai mil banio ka naio rivioso ka komei tibe na. Kenememi toro na toru nei, naio maka ve toro Ju, mia naio be toro na memedu tai napano damġariga naio joġña bokar batitig bogo na volkouano nalo nonovio na kenemiu, a kulo Israel bunu ea kenememi vio nei nalo tiniei jii naio toru laka. Naio miila kumemi nubinimei kaso, tenene na kumemi

numitu nei.” ²³ Mo bior mġerenio batove ruei, ana Pitere naio burulo aba amon ea yimo napano naio joaio, ka mia aviniu aiel kija ga kavijova avatove.

Pitere ba miadu ka Kornelias

Viomijeni kanio bereio, ana Pitere naio bano naliko, a naliko bunu namoneano dolu nalo na vio Jopa, nalo aban bunu naliko. ²⁴ Nalo aba vio melijokolo mġarabo togio, naruei nalo amon, mia viomijeni bereio, ana nalo abatove ea vio Sisiria. Ea vio na, Kornelias naio jo naliko kiano mġaratavo nalo, a naio bio bunu kiano bilbilu nalo ka amei atu rorea Pitere nalo. ²⁵ Telikiti napano Pitere binimei boru ea Kornelias kunuano, Kornelias binimei biviuo naio, mijoru ea jaano jibe ka naio milotu kanio. ²⁶ Mia Pitere burular naio jumolu bereio, berkanio berinavo “Aiou, koig, jau kotumolu kotu memedu. Kejiio, kiniou nebe kulorinio ga.” ²⁷ Mo, ana Kornelias jumolu, ana nalo ajikar ka ajukunu, naruei naljuo aba joomo ea yimo, napano ka bogo nei naruei Pitere mialio ka napano tomu nalo telabo aju rorea naio joomo.

²⁸ Mo Pitere naio mil banlo naruei, berinavo “Kamiu kumitunġa kumijikia batitigio ka napano tivelinio na naltuano na kumemi kulo Ju nalo, maka nuvijikia nuva joomo ea kulo dolu nalo kunualo napano maka ave

kulo Ju, p̃eli na nuve bil-bilu vu rivijalo. Mia von-ganei, Atua naio jiloglog meravo bo ban kiniou ka maka rimemedu ka neviti va ea tomu nalo tealo neverinavo nalo abova p̃eli na nalo amiagiago ga. ²⁹ Bior vite na naruei napano Atua jiloglog ban kiniou, maka never bure nalo na ka bogo napano abinimei ka kiniou, ka mia neverenio re maka nejikia nemei, mia kiniou nebinimei ga. ?Ana nejidom ka kami kuverial van kin-iou, kuverinavo kami ku-bio kiniou ka nemei ka ve-nia?”

³⁰ Mo ana Kornelias naio berdope Pitere, naio berinavo “Nao, koig siva tanea. Vonganei, bogoti tolu barlaka ruei, mon-loglog bogo nene jibe nei naruei, ka m̃erenio tolu ka niogoravo, kiniou nojo joomo ea kunuaku ga, nojom̃a nemila volkouano na niogoravo. Nojom̃a nobolkouo, ana nemiilo ka nailiano tai binimei jumolu ju kamu ea miraku, napano m̃ano kulum̃arauo mieg bo laka. ³¹ Ana na naio mil ban kiniou, berinavo ‘Kornelias, Atua naio jom̃a mijog kanamo volkouano nalo, a naio jom̃a jidomial kanamo bajago novo nalo napano m̃a jau kojom̃a komila ban talim̃asa nalo. ³² Mo jau monokanio kala tibe nei: monoka keiila tomu nalo tai ava Jopa ka toro tai, ka mia toro nene rime i rivijalo bereio. Toro nene siano vodolu be Saimon

Pitere, a naio joa toro dolu tai kunuano napano naio bunu siano Saimon, napano kanano imāuano naio jom̃a mim̃auka vite nalo telabo ea kulukuti bue m̃arauo. Mia kanamo tomu nalo amijikia aleal kunuano nene jo koyou vaataro ka tei.’ ³³ Nailiano nene naio mil ban kiniou jibe na, naruei soṑeli ga nemiila tomu nalo na abiedu kaso, a kiniou neber siva toru banso ka kanamo bijukuvuiano napano jau kobinimei ka kumemi ea vio nei. Mo, kito robiniu rojua vio nei, kamu ka Atua mirano, ka mia kumemi nuvijog iliano napano Atua ber kaso, ka mia jau koveriio van kumemi.”

Pitere mil ban Kornelias nalo

³⁴ Pitere mijog iliano nalo nei, ana mil banlo, berinavo “Bo ga, ana mo kin-iou neberenio siva toru laka napano kami kumidu bogo nei ban kiniou, ka kiniou nemijikia neil van kami. Nejaaro toru laka, bior von-ganei nebitilubar ka be riano toru laka ka napano Atua naio maka rivitisa ea kulo dolu nalo. ³⁵ Toro Israel, p̃eli na toro napano maka rimoluo ea bajulukuti nei, p̃eli na toro be bereio, mia avona naio tovon Atua, rila ga vite nalo napano Atua naio jidomio, mia Atua naio saaro ka naio.

³⁶ “Iliano napano Atua naio miila binimei ban kumemi kulo Israel nalo, kami kumijikia ruei, napano naio be ioluanovo

tai napano berial berinavo toro mijikia rivokar tumāro napano naio be riano ea Yesu Kristo, napano naio be Tubo ka tomu nonovio na yetemeriba nei reraio.

³⁷ Ana kamiu kumijikia sano natukunuano nene, napano beamu, ana Jone Baruei naio binimeī mioliolu ka kanano varueiano nei, ana iorou ka nina, be burumāra vite na maluvo ka kito, jikar rove yako Kalele, bano-o bokar nonovio vio reraio napano Yutea. ³⁸ Burumāra vite nene, nina Yesu na vio Nasarete na bija burumāra imāuano nalo napano naio jomā milαιο, napano Atua midu kanano Niununo Lu banio, bujolou batitigio toru eaio, a naio midu kanano burumāra moroano toru banio, ana Yesu jo miel jeliviv ea vio nonovio, mila imāuano novo nalo a mila batitig bunu ga nalo napano Simāro jomā mila lelanlo laka. Yesu mila vite nalo na, bior napano Atua jo bija naio.

³⁹ “Mo vite nalo nei napano naio jomā mila yako Yerusalemo, a ea tanobuku dolu bunu ga nalo ea kenememi buruvenuo kumemi kulo Ju nalo, kumemi atevi nalo numitumā nuberial vite nalo nei ban tomu nalo. Numitumā nuberial ka napano kenememi tomu na tortoru nalo ajukakar Yesu ea mākolkolo, ana na naio māro, ⁴⁰⁻⁴¹ ana ea legiano tolu nene, Atua burumeulia naio bereio. Ana Atua mila kumemi tealo numialio, napano kumemi

numitu tano, numisinin a numunu uei bijaio. Mia Atua maka rijamo ka naio rimaluvo tibe na ka tomu nalo nonovio, mia naio maluvo ka ga kumemi nalo, napano Atua bitiri bulag kumemi jibe nei, ka mia nuverial van tomu dolu nalo ka Yesu naio meul bereio ruei. ⁴² Ana bogo napano Yesu jo bija kumemi jibe na, naio mil ban kumemi, berinavo kumemi monoka nuvisivisii kiano Ioluano Novo van tomu nonovio, a monoka nuvila rimeravo vatitigio vanlo ka Atua naio bitirilar naio takurano ka naio tibure tomu nalo, nina nalo napano amāro ruei, a nalo napano mia nalo ameul kia ga vo ea bogo na tibureano. ⁴³ Ninei be Yesu nene kia ga napano naverialiano nalo aberial naio nanua ruei, napano aberenio aberinavo mia Atua riviekokoa tomu nalo napano amonea siano kialo kariano nalo, nina nalo napano mia avie kouo ea naio.”

Niununo Lu mijoru burelo

⁴⁴ Bogo napano Pitere jo mil kia ga jibe navo, nalo amiilo ka napano Niununo Lu binimeī batove ba bokar nalo napano ajumā amia-gago kanio. ⁴⁵ Ana namoneano dolu nalo napano ajuvan vio Jopa naliko Pitere abinimeī, nalo abe kulo Ju nalo, naruei nalo amiilo toru manenea ka vite nalo nei, bior napano binimeī bokar bogo nei, ana nalo aberianā

Niununo Lu naio be jidomiano tai napano Atua jian ga ban kulo Ju nalo ga. ⁴⁶ Mia vonganai, nalo amial ka napano nalo napano maka ave kulo Ju, mia nalo amil ka iliano dolu nalo, ana ajumia amiaia Atua toru laka, ana na nalo amijikia ka naio jian Niununo Lu ban nalo napano maka ave kulo Ju nalo bunu.

⁴⁷ Ana na Pitere ber ka nalo napano naliko naio, berinavo “!Kamiu kumialio na! Vonganai, nalo abokar Niununo Lu jibe ka ga napano kito rabakario jukamu. Jibe na, mia maka rejikia roverburelo bunu ka mia ravaruei re ealo.” ⁴⁸ Bisi ana Pitere mil ban Kornelias nalo, berinavo ajev navaruieano ea Yesu siano, ana nalo abaruei.

Naruei nalo abalea Pitere jikili bunu ka naio to rivijalo ka bogoti tai bere vo.

11

Pitere mila veriiano ban namoneano nalo na Yerusalemo

¹ Ana maka vesiou, na lilianiano nei bano o bokar atevi dolu nalo yako Yerusalemo, bija bunu namoneano dolu nalo ea tanobuku momou na vio Yutea, berinavo be tomu tealo napano maka ave kulo Ju napano nalo amonea Atua kiano Ioluano Vouruei. ² Ana namoneano tealo na vio Yerusalemo ajidomii kirisikili aberinavo namoneano dolu nalo napano maka ave kulo Ju, nalo bunu monoka ave pakuveuiu ka

mia atibe ka kulo Ju, mia bogo napano Pitere naio bavin ea vio Yerusalemo, nalo aber niegeniege naio bova laka. ³ Nalo amil banio, aberinavo “? Jumabe ana jau kaba kojo kamliko tomu kurano nalo napano maka ave pakuveulo, a kojomia kojinan kamlikolo bunu?”

⁴ Naruei Pitere naio mil banlo, jikar ea sano burupati nene naio ber bisivisii batitigio vite nonovio banlo, jukunu banlo jibe nei, berinavo ⁵ “Nanua beamu kiniou nojo Jopa, bogo tai nojomia nobolkouo. Nojo mia nobolkouo bano mia nojobobogu garuei, ana nomial titai jibe ka burumara panpano tai, napano naio jumolu den vio mave binimej yetano, napano ajumia abokakar sudu ver nene nalo, nalo ajumia ajubarvan binimej yetemeriba, binimej yetano vaatara kean kiniou. ⁶ Nobitii batitigio joomo ea panpano nei, naruei nomial temeul nalo na vonuo, naliko temeul nalo na yeturu, bija mario nalo a niobi nalo, bija menu nalo, aju joomo eaio. ⁷ Kiniou nojomia nobitikario, ana nomijog joono tai mil ban kiniou, naio berinavo ‘Pitere, jau kotumolu, koue vite nalo na tai, ana mo kesenio.’ ⁸ Ana kiniou neberinavo ‘! Ee, Tubo! ! Peli ga, maka rijikia tibe na! Vite nalo na jibe kanio maka rimemedu ka asenio, a kumemi kulo Ju nalo nubel kalo, kiniou nojomia nebel

batitigio kalo julaka ga.’
⁹ Ana na kiniou nomijog
 joono na vio mave mil
 bereio ban kiniou, berinavo
 ‘Vite napano kiniou Atua
 neberenio ruei ka naio
 meravo, mia jau maka bunu
 kejikia kover naio miagiago
 bereio.’ ¹⁰ Nomijog iliano
 na miyotuba jibe na varolu
 avona bisi, ana panpano
 nene bija saba nene nalo
 napano ajaiao, aburio bavin
 mave bereio.

¹¹ “Naruei monloglog ka
 bogo na, ana tomu tolu tai
 abinimei aboru ea yimo
 napano kumemi numituaio,
 napano toro na vio Sisiria
 tai naio miilalo abinimei ka
 avuru kiniou navan bereio
 kumemilikolo. ¹² Naruei
 Niununo Lu naio mil ban
 kiniou, berinavo ‘Jau maka
 kejikia koverenio maka
 kasaaro ka kava kamliko
 nalo tolu na,’ mia kiniou
 naban ga, a kuruado dolu
 nalo ari nei na vio Jopa, nalo
 bunu abinimei kumemi-
 likolo. Kumemi nubano-
 o nuboru Sisiria, ana na
 nalo aburu kumemi nuban
 ea toro neibano Kornelias
 kunuano.

¹³ “Naruei nuba joomo,
 ana naio jomā jukunu ban
 kumemi, jomā berii jumābe
 napano naio mial nailiano
 tai maluvo ka naio, jumolu
 ju kamu ea mirano joomo ea
 kunuano nei, ana na naili-
 ano nene mil banio, beri-
 navo ‘Jau keiila toru riva
 Jopa, ka toro napano Sai-
 mon Pitere, naio monoka
 rimeī rialso. ¹⁴ Toro na

mia naio rimeī riverial lilia-
 niano tai van kamiū napano
 mia iliano nene naio mi-
 jikia rilarurso rivija kanamo
 maratavo nalo.’

¹⁵ “Mia bogo napano Ko-
 rnelias naio mil bisi, ana
 na kiniou kija nemil banlo,
 mia monloglog bogo napano
 nojomā nejikar ka nemil kia
 ga, ana Niununo Lu batove
 ealo javukia ga napano jomā
 batove ea kito be moti nanua
 ruei. ¹⁶ Kiniou nemial vite
 nei, ana tinieku maio ka
 bereio kanado Tubo kanano
 iliano, napano beriio nanua,
 berinavo ‘Jone baruei ea
 kamiū ka uei, mia bogo
 vesiou re, ana mia kamiū
 kuvokar varueiano napano
 ea Niununo Lu.’ ¹⁷ Mo kito
 kulo Ju nalo, napano kito
 romonea kiado Tubo Yesu
 Kristo ruei, Atua jian kiano
 Niununo ban kito, jibe ka
 ijaiano tai, mia bogo napano
 nemial napano Atua jian
 ijaiano nene kia ga banlo
 napano maka ave kulo Ju,
 ana vite na mīla kirimeravo
 batitigio ea kiniou ka von-
 ganei, maka lele rimemedu
 ka mia neverenio tomu nalo
 nei nalo maka ajikia amei
 jouro kitoliko. !Kiniou nebe
 kenia, ka neielkue kanio
 Atua tibe na, verenio naio
 sidom ka rila tibe na vanlo!”

¹⁸ Naruei ea bogo na-
 pano nalo nei na Yerusalemo
 neibano nalo amijog Pitere
 kanano iliano, nalo maka
 bunu ajikia averenio titai
 vanio, mia nalo ajaaro ga
 toru, a nalo abamenea Atua
 toru laka, aberinavo “!Riano

ga na o-o! Vonganei ga kito robitilubar vatitigio ka Atua naio jaaro m̃ele ban nalo napano maka ave kulo Ju bunu, ana na naio midu buluvio banlo bunu ka mia nalo amijikia aviliglo, a ka nalo amijikia avokar meuliano riano ea naio.”

Taara na namoneano nalo na vio Antioko

¹⁹ Ana nanua, bogo napano Sol nalo amuebin Stevin naio m̃aro ruei, Sol nalo nei amila lelan liki namoneano dolu nalo ea vio Yerusalemo bunu, naruei namoneano nei nalo telabo aburo dedade janea vio abeve terakurano. Nalo tealo aburo vio tebievi laka aba abokar tanobuku na vio Vonisia, tealo aburovuro lilian kalo aba abokar uleule na vio Saipras, a tealo aban lie vo aban ea burum̃ara bulukomeli labo tai, napano siano Antioko. A bogo napano nalo ajua vio nalo na, nalo ajum̃a aberial Ioluano Vou nei, mia nalo ajum̃a aberbisivisiio ban ga nalo napano abe kulo Ju javukialo. ²⁰ Mia karina, ea vio Antioko nei be namoneano dolu nalo napano ajaluvo ea tanobuku na Saireni a uleule na Saipras, nalo abinimei bunu, amioliolu, mia nalo ajum̃a aber lualua Ioluano Vou na Tubo Yesu ban nalo na vio Antioko napano maka ave kulo Ju. ²¹ Naruei Atua kanano moroano jo binimei toru ea nalo na, a tiniobi toru amijog kanalo iliano

nalo, ana na nalo amonea Yesu, nalo abiliglo abinimei ea naio.

²² Ana na lilianiano na vite nei binimei bokar taara na namoneano nalo tilin-ielo ea vio Yerusalemo, berinavo Atua kiano iliano bano-o bokar nalo na maka ave kulo Ju ruei, mila ana nalo amiila Barnabas ban ea vio Antioko ka naio rial vonio vite nei vo. ²³ Bogo napano Barnabas naio boru ea vio na, naio mial vite nei be riano laka, napano Atua milivu toru ka tomu nalo nei kialo meuliano nalo, ana na mila naio jaaro toru laka kanio, naruei naio jusol iliano banlo ka avokar Tubo sikili, vija kialo iviso vodolu nalo, ea bogo na bo a ea bogo na bova. ²⁴ Barnabas naio mila jibe na bior naio be toro novo laka, napano Niu-nuno Lu bujolou eaio, a naio biekouo ea Atua, mo jibe na, ana tomu telabo abinimei ea Atua ka bogo na.

²⁵ Mia Barnabas naio mial ka be im̃auano toru ea vio Antioko, naruei mial bo ka rila vonio ka rivan ea bulukomeli na vio Tarsis, ka rileal Sol, ka rivuru naio rimei ka rijai im̃auano. ²⁶ Bogo napano naio milealio, ana burio abinimei bereio aba Antioko. Abe juo amijai namoneano nalo ea vio na, aberloglog tiniobi toru, amim̃au jibe na bano-o bokar yuka vodolu. Ea bulukomeli labo nei Antioko, kulo dolu nalo amilikotkotu kija ka naiagagoano nalo, abiolo ka “Kristo tomu nalo”

þeli na “Kristin nalo” a nina naruei nalo aberenio sio nei be moti.

27-30 Naruei ka bogo na, namoneano tealo napano abe naverialiano, ajumolu ea vio Yerusalemo abinimei aboru Antioko, ana na nalo nene tai, siano Akabas, naio jumolu, mil ea moroano na Niununo Lu, berinavo “Mia bogo vesiou re, ana na mia vituiano tai ve toru rivokar tomu nalo nonovio ea venuo reraio na kanado tanobuku.”

Naruei bogo napano nagagaoano nalo na vio Antioko nalo amijog iliano nei, nalo aberii bisi, ana aberinavo mia aviniu monoka asuvan puruveru na vabe napano toro ve takurano naio mijikia suvanio, ka atuvan riva van kurualo nalo napano ajua tanobuku na vio Yutea, ka rijailo ka nalo atu rorea batitigio ka bogokouo nene. Naruei nalo ajuvan puruveru nei, ana amijev ijaiano nei monea Barnabas naio Sol jumalo, ka mia naljuo nei avar riva van navurimāaraboiano na namoneano nalo na vio Yerusalemo.

A naverialiano nei kiano iliano be riano, bior napano iorou kanio, be bogokouo tai bokar vio nalo nei javukia ga napano naio berialio, ana nina ea bogo napano Klotias naio jomā be parinio tubo ka vio Romo.

12

Tomu na tortoru nalo amue kulo namoneano nalo,

amila bulaglo toru laka

¹ Ea bogo nei, napano naljuo abar ijaiano nene binimei yako Yerusalemo, Parinio Tubo Erot jo mue searo ea taara na namoneano nalo tealo. ² Kanano tomu na mira nalo tealo aba abokar Jone kuruano nei, Yemesi, ana amuebinio ka kanalo iobogu na mira nalo.

³ Ana kulo kouo nalo na kulo Ju nalo kanalo, nalo ajaaro toru ka vite nei, ana mila Parinio Tubo Erot naio mila bajago nei ba lie vo jibe na, ana naio berkanio kanano tomu nalo nei ka ava avokar bunu ga Pitere. Naio mila nina monologlog bogo na jokoluolu na kulo Ju nalo kanalo, napano nalo amila Jokoluolu Na Sidomkariano na Ioruriano, a bija bunu ga Jokoluolu Na Sinaniano Na Taba. ⁴ Erot jo jidomii berinavo verenio bogo na jokoluolu nei rivarlaka bisi, ana mia naio rivuru Pitere riva tumolu tukamu ea tomu nalo miralo, ka nalo ailvanio, a ka nalo averenio naio monoka rimāro.

Jibe na naruei, tomu nalo nei aba abokar Pitere, ana abuku naio ban ea yimo na tetavokoiano, a nalo amidu bagaro na mira nalo veri ka asirarag kuku vatitig kanio, napano bagaro nalo nei kanalo tomu nene nalo abeve veri ealo. ⁵ Ana bogo napano Pitere jua yimo na tetavokoiano jibe na, namoneano nalo aju

abolkouo jikili ka naio julaka ga ban Atua.

Nailiano binimeĩ burular Pitere den yimo na teta-vokoiano

⁶ Pitere joa yimo na teta-vokoiano bano-o, bokar bogiano napano Erot jo jidomii berinavo ea kavijo nene, mia rivuru Pitere riva tumolu tukamu ea tomu nalo miralo ka atibure. Ea bogiano nene, Pitere naio jo monmelio, nina iviso ka tomu na mira naljuo, napano amidiakar Pitere ban ea naljuo nei bija marimieni juo. A be tomu dolu juo na mira bunu napano naljuoaju abitikar m̃aratavo nalo na yimo na tetavokoiano nene. ⁷ Mia

kolvare ga, Atua kiano nailiano tai naio jumolu ju joomo ea vio nei, ana burum̃ara miamoiano na toru laka ea vio nene. Ana nailiano nei ba mikulkulu ka burusovonano Pitere, ka biobonio, ana berinavo “!Jau kalasopeli, kotumolu!” Ana marimieni juo nei ajaraluvo ga jibe na den Pitere jum̃ano kolvare ga, ajibirbil batove juai borotano. ⁸ Ana na

nailiano nei berinavo “Kovitirakar vatitigio kanamo kulubue na serikar mabomo, keya kanamo kulubue na jaamo a m̃amo kulusoto, ana kito ve juo ravano.” Ana Pitere mila jibe na, ⁹ ana jakisor nailiano nei naljuo abano. Ea bogo nei, Pitere maka rijikia ka vite nei naio be riano kovio, p̃eli na jum̃abe, bior naio jidom berinavo p̃eli naio monvovu

kia ga vo. ¹⁰ Ana naljuoaju abano, ajodovulu m̃aratavo na be moti napano toro na mira juaio, aba ajovulu bunu ga m̃aratavo juo napano toro na mira juaio, naruei naljuo abinimeĩ abokar burum̃ara m̃aratavo na maariano napano be m̃arabo na abatavio den yimo na lakoiano. Burum̃ara m̃aratavo nene amim̃aukanio be butoto, ana bogo na abe juo abinimeĩ vaataro kanio, naio ga betavo kanio, ana abe juo abatavio. Ana na abe juo amiel kija ga telisu ea m̃arabo aban jibe na, ana Pitere mii lo ka nailiano nei jaluvo den naio kolvare ga, ana Pitere naio ga takurano ju.

¹¹ Ana ea bogo nei ga, Pitere bitilubar ka vaio napano nailiano nei mila banio, ana berinavo “!Tomnei! !Riano laka nei! Nemijikia naruei ka napano Atua miila kanano nailiano nei binimeĩ ka rivinalar kinio den Erot jum̃ano, a ka rivurular kinio den vite na bova nalo napano kulo Israel naloaju ajidomio kia ga ka aber mia ala van kinio.” ¹² Pitere bitilubar vatitig vite nei naruei, ana naio ban memedu ga ea Jone Mak kenieno kunuano, siano Mere. Ea yimo nei naruei, nalo telabo napano ajua vio na ruei ka mia abolkouo rivior naio.

¹³ Ana Pitere boru ea yimo nei, minia m̃aratavo nene, ana niatira sesa na vio nei tai, siano Rota, naio binimeĩ ka rivetavo. ¹⁴ Naio maka rivetavo vatitig ka m̃aratavo

nene vo, mia mijog lubar Pitere joono ka mil banio, ana jaaro mia jaaro, juvan m̄aratavo nene jo, ana jikiti ba berial banlo, berinavo “! Pitere nene nei! !Pitere nene nei naio jumolu ju tavio ea kiado bulum̄aratavo ruei!”

¹⁵ Ana nalo aber kanio, aberinavo “!Jau keil vovu re tibe na!”

Ana naio ber batitigio bereio banlo, berinavo “! Maka leleio, kiniou maka nalasibi nei, neber riano nei!”

Ana nalo aber kanio bereio, aberinavo “! Makanio! Ver tibe na, p̄eli sano sim̄aro nene ga na koviobo?”

¹⁶ Nalo ajum̄a amil kia ga jibe, ana Pitere naio ju kia tavio, naio ju minia dolu ka ga m̄aratavo bano-o, ana nalo aba abetavo kanio. Bogo napano abetavo, ana nalo abitilubar ka be Pitere, mia nalo amiilo toru laka. ¹⁷ Ana Pitere jisiu benavena ga banlo, juvan jum̄ano berinavo aturm̄aro ga, ana naio jukunu banlo ka jum̄abe napano Atua burular naio den yimo na tetavokoiano. Ana naio ber kalo berinavo “Bo ka kamiū kuva kuverial vite nei van Yemesi vonganei, a vija bunu ga kuruado dolu nalo na.” Ana iorou kanio, ana Pitere jaluvo bereio, ba joluku ea vio dolu tai.

¹⁸ Mia kavijo, ana tomu na mira nalo amemebiju toru ka napano Pitere maka bunu toa marimieni nalo nei leleio, ana nalo amerou, maka bunu ajikia mia ala

tum̄abe naruei, nalo ajum̄a abivika denlo, aberinavo “? Ana toro nei buro jum̄abe nei a naio ba jo be na?”

¹⁹ Ana iliano nei ba bokar Parinio Tubo Erot berinavo Pitere ba kovio ruei, ana Erot miila kanano tomu nalo aba ajiragio bano-o, mia nalo maka ajikia alealio. Ana Erot mil ban kiano tomu nalo napano nalo aju kuku ka Pitere, ana nalo nene maka ajikia averenio vite tai vanio, ana Erot berinavo avuku bulag nalo nene ana auebinvinlo am̄arm̄aro.

Mia iorou kanio, ana Erot juvan vio nei Yutea bereio, batove ba jua burum̄ara bulukomeli na toru napano Sisiria.

Tukunuano na m̄ariano na Parinio Tubo Erot kiano

²⁰ Ana ea bogo nei napano Erot naio jom̄a mijil namoneano nalo kia ga vo, naio jom̄a mila baravo toru bunu bija tomu na burum̄ara bulukomeli juo nei Taia a bija Saiton, ban bano-o mia mila tomu na komeli juo nei amerou toru laka, aberenio aberinavo verenio baraviano nei rimei rivova mia rimei sikili kalo. Nalo na ajidom jibe na bior napano nalo aju ameul ga ea sinaniano nalo napano nalo abar ga ea Erot nene kiano borotano tai. Ana nalo amila kanalo kulo kouo tealo ka amei ala merevu naliko Erot. Ana nalo nei abano abe bilbilu batitigio bo naliko toro kouo tai na Erot kiano, napano siano Plastas, ka naio mijikia rijailo a rila kialo

m̃arabo ka amijikia ail rivija Erot ka atu rivu bereio ea tum̃aro rivija naio. ²¹ Ana Erot berial legiano tai berinavo nalo amijikia amei aial naio eaio, ana ea legiano nene nalo abinimei. Ea bogo nei, Erot miya m̃ano burum̃ara kulusoto novo nalo, jibe kanio napano naio be burum̃ara parinio tubo, a jotano ea kiano burum̃ara jobaro, ana jom̃a jian kiano iliano tai banlo. ²² Ana nalo nei amijog kiano iliano nene, ana ajidom ajubolbolili naio p̃eli na tum̃abe, ana nalo abio jouo, aberinavo “!Uerei, ninei maka ve toro na mil nei, p̃eli nina be Atua ga na, a!”

²³ Ana Erot mijog iliano nei, mia jaaro kanio, a barvar ka naio bunu ga ka napano nalo aberinavo naio be Atua, ana memedu ka bogo nei, nailiano na Atua kiano tai binimei mue naio, bior napano naio maka riverburelo ka aiaia ga Atua, mia aiaia re toro. Mia maka lele vesiou, ana ilo va nalo abujolou eaio, ana ajer kokorovio tiniene ana naio m̃aro.

²⁴ Ana ea bogo nei, bekurano ka napano tomu nalo na ajibe ka Erot nei nalo aju amila vonio ka m̃a auedom inġauano na Atua kiano, mia Atua kiano iliano naio jo jaburu miadu ban ea vio nonovio, a jo bar m̃arati telabo.

²⁵ Ana Barnabas naio Sol, abe juo amidu ijaiano napano namoneano nalo na vio yako Antioko nalo

abuku ruei, abar ban navuriñaraboiano nalo na namoneano nalo na yako Yerusalemo, bisi ana abe juo abatove, aban bereio yako Antioko, ana ea bogo nene, aburu Jone Mak jakisorlo.

13

Amioako Barnabas naljuo Sol

¹ Ea taara na namoneano nalo yako Antioko neibano, ana tomu tai nalo aju napano abe naverialiano nalo, a tealoo napano abe naverloglogiano nalo. Nalo nei tai kalo kanalo sio jibe: Barnabas, a Simion Kuluniabene Bobogio, a Lusias na vio Saireni, a Manaen nei nanua m̃aratavo na Parinio Tubo Erot nalo amidular naio bogoti napano naljuo Erot abe kiritete kia ga vo, a naliko nalo na, Sol bunu.

² Ana bogoti tai, ana nalo nene naliko namoneano dolu nalo amondulu, ana aju amilotu ka Atua, ana Niununo Lu mil banlo, ber kalo berinavo “Kamii kuvurular Barnabas naio Sol den kamii vonganai, kuvitiri bulaglo ave juo ka ala inġauano tai napano kinioi nejidom ka alaio.”

³ Ana iorou, amondulu bogo tai bereio ka abolkouo, ana nalo abokar Barnabas naio Sol pariparilo, ana amioakolo abe juo, bisi ana amiila bulaglo abano ka ala Atua kiano inġauano.

Barnabas naljuo Sol aboru yako Saipras

4 Ana jibe ka napano Ni-ununo Lu miġla bulag Barnabas naljuo Sol jibe na, abe juo ajuvan vio Antioko, ana abatove ea mġarkomeli nei Selusia napano jotano koyou, ana nalo ajel ea uauako tai, aba aboru ea uleule na Saipras. 5 Ea uleule nei, abe juo abauro ea burumġara bulukomeli na Salamis, ana naljuo aban ea yimo na volkouano nalo na kulo Ju nalo kialo, ana ajumġa aberial Atua kiano iliano. Ana ea bogo na, Jone Mak bijurukarlo kia ga vo, ana naio jomġa mijailo ka inġauano.

6 Ana nalo tolu nei amiel ea uleule nei, abatove abokar togio dolu nene, ea bulukomeli dolu na toru nei Pavos. Ana ea vio na, amial toro tai napano mijikia mila mġesi ka tomu nalo jo, napano naio be toro Ju tai, siano Baryesu, a abio bunu naio jel ea iliano na kulo Kris nalo kialo, aber Elimas. Toro nei naio jomġa mila sibi janea vio, naio jomġa berenio naio be Atua kiano naverialiano tai. 7 Ana toro napano mġa mila mġesi nei, naio be toro na toru tai bunu ea inġauano na parinio tubo na uleule na, napano Sejes Poloso. Ana parinio tubo nei, naio be toro tai napano mijikia batitigio vite bo, ana bio Barnabas naljuo Sol ber amei aialio, bior napano naio jidom ka rijog Atua kiano iliano tai denlo. 8 Ana bogo napano naljuo abinimeġ, ana toro na mijikia mila mġesi nei

naio milidielo, milavio ka riverbure naljuo nei a jidom ka parinio tubo nei naio rudu re bunu moneano ea Yesu. 9 Narueġ Sol, napano ajumġa aber bunu siano aber Pol, naio binimeġ bujolou ka Niununo Lu, ana tiniamirano bitikar jikili ban ka toro namġa mila mġesi nei, 10 ana berkanio, berinavo “!Jau kobe Siġaro kenerinio memedu! Vite nonovio napano bo, mia jau maka kosidom leleio, ana jau kobujo ka sibiano a bajago va nalo ga. Atua kiano iliano nalo, jau kojomġa kobilivilig lelario julaka ka rimeġ rive sibiano bereio. 11 Vonganei ga mia keial Atua jumġano rivokarso rimemedu. Vonganei ga mia jau miramo ribono, mia jau kojikia re keial legiano vesiou kija.”

Ana kolvare ga ana toro na mijikia mila mġesi nei naio mial jibe ka napano iou tai na yeturu napano kiri bobogio laka binimeġ juko mirano, ana naio jo miel vovu ga jibe na ka jidom rileal toro tai ka rivokar jumġano ka rivurio rivano. 12 Ana bogoti napano parinio tubo naio mial vite nalo nei, ana naio monea Atua kiano iliano, ana bogo napano Barnabas naio Pol aberloglog naio ka iliano lu nalo nei, ana naio miġlo kanio, mialio bo mia bo.

Pol naljuo Barnabas abano Antioko dolu tai, ea tanobuku na vio Pesitia

¹³ Ana Pol nalo ajuvan vio Pavos, ana ajel ea uako abatove naruei abauro ea tanobuku nei Pamvilia, ana nalo amiel abano-o abokar bulukomeli nei Peka. Ana ea vio na, ana Jone Mak juvanlo, maka bunu takisorlo, mia naio ban bereio Yerusalem.

¹⁴ Ana Pol naljuo Barnabas, ajuvan vio Peka, ana amiel naruei aba aboru ea tanobuku na vio Pesitia, aba abokar bulukomeli tai napano siano Antioko bunu. Ajua vio na, ana ea Legiano Lu, ana aba joomo ea yimo na volkouano na kulo Ju nalo kialo, ana ajutano naliko tomu nalo. ¹⁵ Ana navurimāaraboiano nalo amila lotuano, ba bokar napano abuluku Iliano Lu, ana nalo abuluku vivitauiano tai ea Mosis kiano tuboiano, a tai ea niosi na naverialiano nalo. Ana bogo napano vulukuiano nalo nei bisī, ana kulo navurimāaraboiano nalo abika den Pol naljuo Barnabas, aberinavo “Banalo, verenio kamjuo kumije iliano tai napano mijikia rijai tomu nalo kialo meuliano, ana mo kumemi numisidom kamjuo kuverialio van kumemi.”

¹⁶ Ana na Pol jumolu, ana buku jumano, beramelumu ka aje tilinielo ka naio ana mil banlo, berinavo “Mia bo, ana kiniou nejidom ka kamiu kulo Ju nalo, naliko kulo dolu nalo napano kamiu bunu kumonea kenememi Atua, kamiu nonovio kuvije tiliniemi rivu ka kiaku

iliano nei. ¹⁷ Kiado Atua nei, naio naruei napano bitiri bulag kiado kulo moruo nalo na beamu, a naio naruei napano mila nalo abinimei miroano laka ea bogo napano amimāu kurano yako Ijivi, a naio ga bereio napano buru bulaglo den bogokouo nei, ea kiano burumāara moroano nei. ¹⁸ Ana naio burumāarabo kalo aba tavio aban ea vio yauo, ana amiel ea vio na bano-o bokar yuka duelimo va veri [400], ana va telabo ka bogo na nalo ajumāa abilig taakalo ka Atua, mia naio maka lele tuvanlo. ¹⁹ Naruei ka bogo napano abinimei abokar buruvenuo nei Kenano, napano Atua berkar ka mia rudu vanlo, ana naio jitig bulag bajulukuti aluo na kulo dolu nalo napano abinimei ajua vio nei ruei, karina midu borotano nene ban korobido nalo, abe boru kanio, ana aba ajua bokanio. ²⁰ Jikario ea bogo napano abano be moti garuei Ijivi, binimei bokar bogo napano abano bereio jouro ea kanalo buruvenuo bereio, bokar titai jibe ka yuka duelimo toromomou veri duelimo va limo [450].

“Ana ea bogo napano ajua kanalo borotano jibe na, ana Atua bitiri bulag kanalo tubo nalo, ka avurimāarabo kalo ka mā atiburelo, ana tubo nalo nei amimāu mā jibe na ba bokar nalo toro na maariano nei Naverialiano Samuel. ²¹ Ana nalo aberinavo maka bunu asidom tubo nalo na jibe na, mia

aber ka Samuel aberinavo naio rileal toro tai napano mijikia ve kanalo parinio tubo na toru. Ana Atua jiloglog Sol, Kis kenerinio, banlo, napano naio be bajulukuti na Beniamen kiano, ana Sol binimei be kanalo parinio tubo na toru na be moti garuei, ana naio be tubo kalo bokar yuka due-limo va veri [40]. ²² Karina, na Atua burular Sol bereio, ana bitirilar Teviti midu jeleigio, ana Atua jaaro toru ka Teviti, naio jo berii berinavo 'Ea Teviti nei, Jese kenerinio, mia kiniou nemial ka nabokar toro tai napano kiano bajago jakii kiaku jidomiano memedu, ana nemijikia ka mia naio rimāu tibe ka ga napano nejidomio.' ²³ Ana Atua naio berkar ban korobido nalo re nua nua nalo ruei, berinavo mia naio rudu toro tai ea tormoruo Teviti nei kanano bajulukuti, rudu naio van kito kulo Ju nalo, tibe kiado Ioruriano, ana vite nei Atua milaio ea toro nei Yesu ruei.

²⁴ "Beamu, bogo napano maka Yesu nei rimeī vo, ana Jone Baruei jo mioliolu ban kito, berinavo 'Kamui monoka kuvilig kamui, ana monoka kuvan ea varueiano.' ²⁵ Ana bogo na Jone vaataro ga ka rila nonovio imāuano nalo napano Atua midu banio, ana naio jomā bika den tomu nalo, berinavo 'Kamui kumisidomii kuberiamā kiniou nebe Naverikariano?

Kiniou neber ka kamui, kiniou maka leleio neve toro napano kamui kumitu rorea naio nei, makanio. Mia na iorou ka kiniou, naio jo binimei kia ga nei, naio bo mia bo, a naio be lu laka, ana nemial jibe maka neve verare ka neve kiano toro na imāuano, maka navare ka nava vaataro ka mia neivelar kiano kulubue na jaano.'"

Pol ber napano tomu na tortoru na kulo Ju nalo, nalo naruei amuebin Yesu

²⁶ Ana Pol ber kalo, berinavo "Kuru-aku nalo, kamui tealō napano abe kulo Ju nalo memedu, napano kumaluvo ea bajulukuti na Epraamo kanano, a kamui tealō abe kulo dolu nalo, ana kumonea kenememi Atua kumemi kulo Ju nalo, kiniou nejidom ka kamui nonovio monoka kuvitilubar ka kito nei naruei, napano Atua jian iliano na ioruriano ban kito ruei, mila ana kiniou nojomā neberial ban kamui nei. ²⁷ Nalo na vio Yerusalemo naliko kanalo tomu na tortoru nalo, nalo maka lele avitilubar Yesu ea bogo napano naio binimei, a maka avitilubar ka naio be Ioruriano napano naverialiano nalo aberiio ea Iliano Lu nalo napano abulukulu julaka ea Legiano Lu nalo. Tibe na, nalo maka avitilubar, mia amila ka naverialiano nalo kialo iliano telaboamei ave riano, bior nalo naruei ajibure

kanalo Naverikariano nene nei aber naio monokanio riṁaro. ²⁸ Maka ajikia aleal titai napano rimemedu ka mia naio riṁaro riviorio, mia ajikili ka Pailat ka naio monoka rijamo ka riverenio nalo amijikia auebinio. ²⁹ Ana amila kikio jakii ga vaio napano naverialiano nalo aberialio bogbe nua ruei, napano aberenio mia tomu nalo ala van naio, rivano-o mia auebinio ea ṁakolkolo, ana iorou kanio amidu tati nene, aba amidu joa buluvai. ³⁰ Ana Atua mila naio meul bereio den naṁariano, ³¹ ana ea bogoti tealō telabo kija, ana na naio joṁa mioyoyotuba ka kanano tomu nalo napano beamu naliko naio yako Kalele, a napano ajakisorio abinimei mave Yerusalemō. Ana nalo napano ṁa amial Yesu jibe na ruei, mia nalo nene naruei ajumā aberveriiō ban tomu nalo aberenio naio meul bereio den naṁariano ruei.

³² “Mia vonganēi, ea vio nei, kumemi juo nubinimei ea kamiū ka nuvar Lilianiano Novo nei rimeī van kamiū. Kumemi juo nuberial ban kamiū, nuber vite novo nalo napano Atua berkario ban korobido nalo re beamu, berenio mia rila van kiano tomu nalo, ³³ ana vonganēi vite nalo nene abinimei abe riano ea kito ruei, kito kumābilo nalo, a ea kito kulo dolu napano kito romonea naio. Ana kito robokar vite novo nei ea

kiado bogo ga, napano Atua miila Yesu binimei yetano ea yetemeriba nei, a mila naio meul bereio den naṁariano kar kito.

“Ea Iliano Lu, Iouano mirano juo naio berii vite nei, napano ber

‘Kiaku tete, nemial jibe ka banei kobinimei kobe keneriku, ana kiniou nebinimei nebe karamāmo riano.’
Iouano 2:7

³⁴ Ana ea tivelinio napano Atua mila Yesu meul bereio den naṁariano, napano naio maka rijikia rivan bereio ea ṁartanbo, ea tivelinio nei iliano juo na Iliano Lu aberenio ruei. Ea iliano na be moti ana Atua berii jibe nei, berinavo

‘Iliuiano lu nalo nei napano kiniou neberkario nua ban Teviti beamu ruei, nalo aju ajikili kia ga vo, ana vonganēi mia kiniou neje van kamiū naruei.’ Ais 55:3

³⁵ Ana iliano tinene na tivelinio nei, naio joa Iouano tai bereio, napano toro napano jirio, naio ṁil ban Atua, berinavo

‘Mia jau kojikia re kajamo ka kiamo toro lu rial naṁariano,

ṗeli na mokotenano ri-menunu bogo tai.’
Iouano 16:10

³⁶ “Ana iliano nalo nei maka atuṁa averii tormoruō Teviti nanua beamu, bior karina napano naio mila Atua kiano imāuano ban kiano tomu nalo, ban bano-o mia naio ṁaro

garuei, ana ajivin jo bija korobinio nalo, ana mokotenano mon ea vio na bano-o mia menunū. ³⁷ Ana iliano nalo nei aberii Yesu nei ga, aberii napano mokotenano maka riva rivoa tibe na, mia Atua bitirilar naio meul bereio.”

Pol berii viekokoano naio joa ga Yesu

³⁸ Ana Pol naio berinavo “Kuruaku nalo, ver tibe na, kiniou nejidom ka kamiū monoka kuvijikia vatitigio vite nei, ka ea ga Yesu nene ga, ana Atua jo mila ban kitojuo berii naio biekokoa kiado vovaiano nalo bunu ruei. ³⁹ Mosis kiano tuboiano maka lele rijikia rivurular kitojuo den kiado bajago na vovaiano, mia jau kei, napano verenio komonmonea Yesu sikili, ana mia naio rijelar kiamo bajago na kariano denso. ⁴⁰ Tibe na, monoka kuvitika vatitig kamiū rivu, bior ver makanio, mia kuvitibe ka napano naverialiano nalo kialo iliano tai berenio, ⁴¹ napano berinavo

‘!Kamiū kuvialio! Kamiū kumitum̃a kubital niege-niege vite lu nalo,

mia vonganei mia kuvitilubario, karina mia kum̃arm̃aro.

Bior napano kiniou nojo nemila im̃auano tai iviso bure kamiū ka bogo napano kumeul kia ga kia navo,

ana nalo aju aberbisivisii meravo ban kamiū,

mia maka kuvisidom kumonmoneaio.” Apakuk 1:5

Tomu nalo na vio Antioko ajaaro ka Pol kiano iliano

⁴² Ana Pol mil banlo bisi, ana na nalo aba tavio, ana tomu nalo abinimei abika jikili den Pol, aberinavo “Kumemi numisidom nuber ea Legiano Lu nei napano jo binimei, mia kamjuo kumei nei bereio ana mo kuverloglog kumemi lie vo ka vite nalo nei.” ⁴³ Naruei bogo napano Pol naljuo Barnabas aju abano, ana kulo Ju nalo telabo naliko bunu kulo dolu nalo napano abinimei ajibe kulo Ju nalo ruei, abinimei amiel ajakisor naljuo aban napano aber atukunu lie vo. Naruei atevi juo nene amil banlo, aberii kalo aberenio nalo monokanio avarkar tinielo lie vo ea Atua, a nalo monoka ala vonio ka ava joomo lie vo ea kiano tiniememiano. ⁴⁴ Ana jibe ka napano nalo aberii ka Pol naio Barnabas ruei, ea Legiano Lu dolu napano binimei iorou, ana viobujo ka kulo Ju nalo, a viobujo bunu ka kulo dolu nalo ea bulukomeli nei abinimei vio takurano ga, ka aber aia-gago ka Pol jom̃a mioliolu ka Iliano Lu na Atua kiano. ⁴⁵ Mia bogo napano kulo Ju nalo kialo tomu na tortoru nalo amial tomu dolu nalo telabo nei, ana amijoku kanio, aju amil bova ka ga Pol, ajum̃a aberii ka tomu nalo aberenio naio jom̃a milasibi ga na. ⁴⁶ Mia Pol naio Barnabas naljuo maka

tinielo rimemebiju, naljuo aju amil toru ga, naljuo kanalo iliano ba jikili lie vo, ana aberii ka kulo Ju nalo nei, aberinavo “Kumemi numial memedu ka mia Iliano Lu na Atua kiano napano kumitunã nuber ka kamiu, rimei rivokar kamiu kulo Ju nalo ve moti, beamu ka kulo dolu nalo. Mia maka kuvisidom kumoneaio, ana kumitunã kubuku searia bulagio ga bano, javukia napano maka bunu kuvijikia kuvokar meuliano na maka rijikia ribisi. Mia bo ga, jua ga kamiu, mo ver tibe na mia kumemi nuva nuviololu ga van nalo napano maka ave kulo Ju nalo. ⁴⁷ Bior napano Iliano Lu tai berenio ruei napano kumemi monoka nuvila tibe na, napano Atua naio berenio, berinavo

‘Kiniou nebitiri larso ka mia jau komerera, kotibe ka yulu tai rimererali nalo napano maka amonea kiniou vo.

Mia jau kavar kiaku ioruriano riva rivokar vio reraio nalo ea yetemeriba.’” Ais 49:6

⁴⁸ Ana bogo napano nalo na maka ave kulo Ju amijog iliano nei, mia nalo amijog bo toru laka biorio, aberinavo “!Tomnei, Atua kiano iliano nei naio bo mia bo, koig kumemi tiniememi jiioo mia!” ana nalo napano Atua berkarlo ka mia avokar meuliano napano maka rijikia ribisi, nalo nei naruei

amonea Yesu ea bogo nei. ⁴⁹ Ana jikario ea bogo nei, Tubo kiano iliano joña mijajian janea vio nonovio ea tanobuku nei.

Kulo Ju nalo tiniei jer Pol naio Barnabas

⁵⁰ Mia kulo Ju nalo napano amijoku aba amial tire nalo na tortoru nalo ea kialo yimo na volkouano, bija navurim̃araboiano na m̃arkomeli nei, ana amil banlo amila searo ea kanalo jidomiano, ban bano-o mia tomu na tortoru nalo nei amiila tomu nalo aba amijil lar Pol naljuo Barnabas den kanalo vio. ⁵¹ Ana bogo napano naljuo aju aba tavio, ana naljuo amila kijokijo tai ban nalo na m̃arkomeli nei, nalo amijuba kon yevi na m̃arabo napano jua jaalo.

Ana nalo ajaluvo den vio Antioko, aba abokar m̃arkomeli nei Aekoniam, ⁵² mia naiagagoano vou nalo napano aju yako Antioko, tinielo jaaro toru, a Niununo Lu binimei bujolou vatitig ealo.

14

Pol naio Barnabas, naljuo amioliolu ea vio Aekoniam

¹ Naruei ea komeli na vio Aekoniam, vite nonovio amalmaluvo javukia napano ea vio Antioko garuei. Pol naljuo Barnabas aboru ea vio na, mia iorou kanio ana abe juo aba joomo ea yimo na volkouano na kulo

Ju nalo kialo, naruei amioliolu. Abe juo amioliolu bija Atua kanano mo-roano, naruei tomu telabo napano ajua vio na amonmonea Ioluano Vou na bo nei, napano nalo togio abe kulo Ju, a nalo togio abe kulo Kris. ² Mia kulo Ju dolu nalo napanoaju na, maka asidom amonmonea, naruei iorou kanio ana aba amila vonio ka avilig lelan tomu dolu nalo napano maka ave kulo Ju kialo jidomiano, nalo amila tiniel jerlo nalo napano amonea vonga. ³ Vite na naruei naio mila ana na Pol naio Barnabas, naljuoaju lie vo ea vio na,aju bogo tebievi kija, ka alavon ka aija namoneano nalo. Mia bogo napano naloaju naliko jibe na, mia maka amerou ka nalo napano tiniel jerlo, mia amioliolu dolu ga ka Tubo Yesu banlo, a ka aberii kiano buruñara tiniememiano ban tomu nalo. Ana Tubo naio mila tomu nalo abitulubar ka kanalo iliano nalo abe riano, bior naio mijamo ka ban naljuo ka amila burutomoluo nalo a vite na iloiano telabo bunu ea vio nei.

⁴ Mia tomu nalo na komeli nei nalo aburuburelo ea taara juo naruei, napano tealo amijakar kulo Ju nalo, mia nalo tealo amijakar atevi juo neibano. ⁵ Tivelinio juo nei ajumña amila baravo kalo jibe na, ban bano-o mia kulo Ju nalo naliko kulo dolu nalo napano maka lele tiniel tii namoneano nalo neibano, bija bunu kanalo tomu na

tortoru tealo, nalo naruei aber kakar ka mia atuk atevi nalo nei a atuba binvinlo amarmaro.

⁶⁻⁷ Mia atevi juo neibano nalo amijog vite nei, ana amial aber bo kanio avuro den vio nei, ka ava aje jogvuiano ea vio tai. Jibe ga na, nalo ajumolu den vio nei, aban ea tanobuku dolu na vio Likonia, ana nalo aba aberial Ioluano Vou na bo ea tanobuku na vio na, bija sano komeli nene juo, napano sialo jibe nei, Listra bija Tebe.

Pol naio Barnabas naljuo amioliolu ea vio Listra

⁸⁻⁹ Naruei ea mñarkomeli na yako Listra, bogo tai ana Pol naio jomña mioliolu ban tomu nalo, mia toro tai be javuluku naio jomña jojo tano, jomña miagago ka Pol. Toro nei jikar ea bogo napano naio moluo, naio maka leleio riel bogo tai, bior jaano be juo abuluk.

Naruei Pol mial ka toro nei jomña miagago batitigio ka naio, a mijog lubar ka toro javuluk nei naio jo monea Yesu ka mia naio mijikia rila vatitig jaano ve juo. Naruei Pol bitii kilkil eaio, ¹⁰ ana bio naio, berinavo “! Toro javuluk, jau kotumolu, kesikili kotu ka jaamo ve juo!” Naruei toro nei mijog Pol mil banio jibe na, naruei naio jumolu soñeli ga, ana na jo miel bija jaano be juo napano abinimei ajikirkili bo ruei.

¹¹ Ana bogo napano tomu nalo amial vite nei napano

Pol milaio ea toro javu-luk nei, nalo aju abiovio kanio jel kialo iliano, aberinavo “!Aiou! !Kiado atua nalo amidu kulorinio mirano, abatove kean kito jibe ka toro garuei!”¹² Naruei nalo ajian sio na ban Barnabas, abio naio ka Susu, napano naio be sio na parinio tubo na kialo atua nalo, a ajian sio na ban Pol, abio ka Emis, ka naio be sio na toro napano jomġa bar kanalo atua nalo kialo iliano nalo, bior amial ka Pol naio jomġa mil lie jovulu Barnabas.

¹³ Ana tavio ea morouo na komeli nei, yimo lu tai tena kialo atua nei, Susu, naio jo, bija toro lu nene, naruei na toro lu nei naio jidom riomon ka tomu nalo monoka avuru sida rivan Pol naio Barnabas, napano nalo ajidomii aber tomjuo nei abe kanalo atua. Naruei toro lu nei milalo amila soġeli aba aburu bue mġarauo nalo abinimej, ana amiovovualo ka maniegiegi nalo, ka auebinvinlo ea burusio na yimo lu neibano.

¹⁴ Naruei Barnabas naio Pol, naljuo maka atumġa ajikia kialo iliano, napano ajumġa aberii vite nalo nei, mia bogo napano naljuo amijog venia napano ajumġa ajidomii ka alaio, naljuo amijog bova-o mia! Atevi juo neibano, naljuo maka asaaro leleio ka napano tomu nalo nei ajidom alotu kalo, mila na abe juo amijede mġalo kulusoto nalo, ajikiti aba ajikili aju iviso

ka tomu nalo nei, amiaga, aberinavo¹⁵ “!Kuverburelo, kuverburelo! !Kamiu kuvila re tibe na van kumemi! !Kumemi juo nube toro ga javukia kamiu ga, maka nuve atua nei! Kumemi nubinimej ga bija Lilianiano Vou na bo, nubinimej ka nuverial van kamiu ka monoka kuvituvan kenemiu bajago moruo nalo na jibe na atu, kuvolkouo re bunu ka kenemiu atua nalo na telabo napano amġarmġaro ga. Mia nubinimej ka nuverial van kamiu ka Atua takurano ga jo napano naio meul, a numisidom nuvilig kamiu van naio, napano naio ga naio jii na vio yauo bija borotano, bija tei, a naio jii vite nalo nonovio napano ajua vio nonovio nalo ea yetemeriba nei.¹⁶ Ea yuka nalo na telabo ġeli na terati nalo napano abarlaka ruei, Atua mijamo ka tomu nalo na vio yetemeriba, jibe ka kamiu, nalo ajumġa amiel ajakii bajago doldolu nalo, a maka ajikia naio, ana na nalo amila lotuano jibe ka ga napano ajidomii aber memedu ka alaio.¹⁷ Nemial ka napano kamiu kumila jibe na bior kamiu maka kuvijikia naio, mia tivelinio ka naio, naio maka ruduvan naio reraio ka kamiu, bior bogo nonovio naio jomġa jiloglog naio tertelisu damġariga ka kamiu, berinavo naio be riano, a napano kiano bajago ea kamiu kirinovo laka. Naio naruei naio jomġa mila kiano yuo bovo jibirbili batove,

a naio naruei napano jom̃a mila vite nonovio amiluo ea tiniavio nalo na kenemiu, nalo abar salo nioti nalo ka bogo nene memedu. Naio naruei jom̃a mila, kamiu kumisaaro a kamiu kumijog bo toru laka ea sinaniano novo nalo napano kumitum̃a kubar ea kenemiu tiniavio nalo nene.”

¹⁸ Pol naio Barnabas naljuo aber iliano na jibe na naruei, mia kolvare ga ka mia ajikia re ka mia averbure re tomu nalo nei napano ajidom m̃elea ka ala lotuano vanlo a napano amiomon sida kalo. Mia iorou kanio napano nalo amijog tomjuo nei kialo iliano, ana na nalo maka bunu alaiio bereio.

¹⁹ Avona kario, ana kulo Ju nalo tealó napano m̃a amijil Pol naio Barnabas ea vio Antioko a ea vio Aekoniám ruei, vonganei ana nalo aba amiyotuba ea vio Listra nei bereio. Naruei nalo ajum̃a ajukunu ban kulo Listra nalo, ban bano-o mia aburu batitigio kialo jidomiano nalo abano be dolu bereio, avona kario, ana nalo aban ka Pol, ana ajubaio ban bano-o mia amialio aberiam̃a naio m̃aro ruei. Naruei nalo aburutitigia taniabene ba tavio ea komeli, abuku searia naio jo jibe ga na, naruei aban bereio. ²⁰ Mia naiagagoano tai abinimeí amidu batitig Pol, ana naloaju naliko, avona bisi, ana naiojevijo bereio, ana ban bereio vonuo nalikolo. Mia ea

kavijo, ana naljuo Barnabas, abe juo amiel, aban ea m̃arkomeli dolu na telisu nei Tebe.

Pol naio Barnabas, abe juo aban bereio, ajakii jaalo ajel ea vio nalo nei bereio

²¹ Naruei ea vio Tebe, Pol naio Barnabas abe juo amioliolu, mia ea vio na nalo aburu tomu telabo abinimeí amonea, abinimeí abe Yesu kiano naiagagoano nalo. Ana iorou kanio, ana naljuo ajaluvo ea vio Tebe bereio, ajikar ka avan bereio, naruei nalo ajakii m̃arabo nene kia ga napano nanua ajel eaio abinimeí. Jibe na ga nalo avan bereio ea vio Listra, karina, Aekoniám, karina, aba aboru Antioko na vio Pesitia. ²² Ana ea vio nalo nei, aberloglog namoneano nalo bereio, mia ajian iliano novo nalo ka rijailo, a nalo aberinavo “Be iakurano ka napano p̃eli mia kito romijikia roviniua bogokouo nalo, p̃eli na mia tomu nalo ail die kito, mia ka kito rava jouro ea Atua kiano navenatuboiano naio monokanio tibe ga na naruei. Verenio tibe na, kamiu kumelukluku re, kuan re bunu, mia kuvitumolu kuvitu sikili ea Kristo dam̃ariga.” Nalo aber iliano nalo na jibe na, mila ana namoneano nalo abokar jikili moneano. ²³ Ana ea komeli nalo abiniu, ajokol tomu nalo tai parilo ka ave navagadeano nalo ka taara na tomu na moneano nalo, ana nalo ajuvan sinaniano

ka abolkouo kalo. Naruei amidulo ajua Tubo jum̃ano, napano nalo amonea ka mia naio rijailo tulaka.

²⁴ Naruei nalo aju aban bereio jibe na, amiovodulu ea tanobuku na vio Pesitia, bisi na abinimei ea tanobuku na vio Pamvilia.

²⁵ Ea tanobuku nei, amioliolu ea komeli na vio Peka, karina abatove ea vio Atalia, koyou ea tei, ²⁶ ana nalo amidu uako, aba aboru bereio ea komeli na vio Antioko, nina ea vio Siria. Nina be burum̃ara komeli labo napano beamu, nalo abolkouo ka Pol naljuo Barnabas, ka mia Atua kiano tiniememiano vija kiano vikitariano vu novo to rivijalo, ana na amiila bulaglo ka adu Lilianiano Vou na bo rivano. Mia vonganei naruei, naljuo amila nonovio batitigio burum̃ara im̃auano nei, ana abinimei bereio ruei. ²⁷ Naruei nalo abio ban namoneano nalo ka aviniu amei vio takurano, ana aberii iliverioano banlo, a naljuo aberbisivisii batitigio banlo ka jum̃abe ana Atua naio betavo ka nalo napano maka ave kulo Ju, ka mia nalo bunu amijikia amonmonea, a amijikia aiasol ea navenatuboiano na kanano.

²⁸ Ana na naljuo aju bunu siberio tolu titai jibe na naliko namoneano nalo ea vio Antioko.

15

? Namoneano vou nalo monoka atakii Mosis kiano Tuboiano p̃eli na makanio?

¹ Ana bogo napano Pol naljuo Barnabas aju kia ga vo yako Antioko, kulo namoneano tealo na tanobuku na vio Yutea, napano abe kulo Ju, abatove ea vio nene. Ana bogo napano nalo amioliolu ban kulo namoneano dolu nalo na vio Antioko, aberial kanalo verloglogiano tai, aberinavo “Verenio kami kulo namoneano nalo tealo, maka ave pakuveu takii vaio napano Mosis kiano tuboiano berenio, mia Atua maka rijikia rilarurlo.”

² Mia Pol naio Barnabas, naljuo maka asaaro leleio ka iliano nei, bior amijikia ka Lilianiano Vou na bo na Tubo kiano naio maka river tibe na, naruei amil jikili banlo, amila baravo naliko jiou kija jibe nei, ka amila vonio ka averbure nalo nei averloglog re bunu tomu nalo ka vovuiano na jibe nei.

Ana kulo namoneano na vio Antioko, nalo ajidomii m̃lelea iliano nalo nei bano-o mia deio, ana amial jibe bo ka nalo aiila Pol naio Barnabas, a vija bunu ga nalo tealo, avavin Yerusalemo, avan aial atevi nalo a navurimaraboiano nalo, ka ajog vonio ka kulo kouo nalo nei ajidomii jum̃abe ka tivelinio na vite neibano ajum̃a amila baravo biorio.

³ Naruei, kulo namoneano nalo amiilalo abano, abatove ea tanobuku na ea vio nalo na jibe kanio Vonisia, karina vio Sameria, a ea bulukomeli nonovio napano amiovodudulu eaio, ajum̃a

abior bija kulo namoneano nalo, a ajumā ajukunu naliko ka jumābe ana nalo aba ajeliviv ea bunu nalo napano maka ave kulo Ju, a aberial Lilianiano Vou na bo banlo, a jumābe ana viobujo kalo abiliglo abinimei ea Atua ruei. A kialo veriiano nei naio mila namoneano nalo ajaaro toru laka, a nalo abamenea Atua biorio.

⁴ Nalo amila jibe na ban bano-o, abatove abokar vio Yerusalemo, ana aba amial taara na namoneano nalo, a bija atevi nalo a navurimāaraboiano nalo na nalotuano, mia nalo nei ajaaro ka amial Pol naliko Barnabas, amila ilivorvoruano banlo. Jibe na ana mo Pol naio Barnabas naljuo bunu amila veriiano bunu ban nalo na vio Yerusalemo, aberii jumābe napano Atua naio mila imāuano telabo ruei banlo, napano naljuo aba abokar nalo napano maka ave kulo Ju, a amioliolu banlo, aberinavo verenio nalo amonea ga Kristo, mia Atua naio rilarrurlo.

⁵ Ana bogo napano naljuo amila iliveriioano jibe na, kulo namoneano nalo tealo napano abe kulo Ju, napano abe Varisis, ajumolu aberial kanalo jidomiano nene bereio, aberinavo “Bo ka nalo napano maka ave kulo Ju, avona verenio nalo tinielo ka amonea Kristo, mia nalo monoka ave pakuveu bunu ga, a monoka atakii bunu ga

iliano dolu nalo na Mosis kiano tuboiano, mo verenio atakii kiado bajago kito kulo Ju nalo tibe na, mia kito romijikia roverenio mia Atua naio saaro kalo.”

Burumāara vioriano ea vio Yerusalemo

⁶ Ana nalo ajumā aberii vite nei toru laka, mila jibe na ana atevi nalo a navurimāaraboiano nalo aberinavo monoka ala vioriano tai ka averiio. ⁷ Ana ea vioriano nei, nalo amil banbano-o mia Pitere jumolu, mil banlo, berinavo “Kuruaku nalo, kamiu kumijikia ruei ka beamu, Atua naio bitirilar kiniou ka neve moti na kito ka nava noioliolu ka Lilianiano Vou na bo nei van nalo napano maka ave kulo Ju, mia vonganei kito roju romijog ka napano nalo telabo ajumā amonea Yesu ruei. ⁸⁻⁹ Atua naio mila jibe na bior naio maka tibure nalo nei den kito, mia naio mial tinielo beberare jibe ka napano naio mijikia vatitig vaio napano jua kiado iviso nalo. Naio berial ka naio jaaro ka nalo amijikia amonea kia ga mārabo napano kito rojumā romoneaio, napano naio mije Niununo Lu banlo, a napano naio jekon kialo iviso nalo meravo bunu, bior nalo abarkar tinielo ea naio, javukia kito. ¹⁰ Atua naio mila bo laka banlo ruei, mia vonganei, kito tealo ajidom ka ala sikili vanlo bereio. Verenio kito rosidom resikili ka nalo nei ka avar vite na

teremi na kiado tuboiano ea taakalo, tibe napano ajumã aberenio, tibe na ana kito roju ramila von Atua bereio. Korobido nalo amial kiado tuboiano nei ana aber naio kirisikili laka, mia kito bunu romialio ka maka toro tai napano rijikia rudu nonovio iliano nene nalo riviniu. ¹¹ Mia nalo amoneaio, a kito bunu ga romoneaio bijalo, ka kito nonovio rabarkar tiniedo ea Tubo Yesu, a robokar bunu meuliano ea naio, binimeĩ ga ea kiano tiniememiano ga.”

¹² Naruei nalo napano ea vioriano nalo maka bunu ail bereio, mia aju melumu ga, ana amidu bogo na iliano tai ban Pol naljuo Barnabas, nalo tinielo ka aber ajog kija bere lie vo burutomoluo nalo a vite na iloiano nalo napano naljuo amilaio ea moroano na Atua kiano ban nalo napano maka ave kulo Ju, ea bogo napano naljuo aba amiel jeliviv ealo.

Yemesi jusol kialo iliano nalo

¹³ Ana bogo napano naljuo ajukunu ka vite nalo nei bisi, ana Yemesi nei, napano naio be kanalo toro na toru tai yako Yerusalemo, naio jumolu jusol iliano ban tomu nalo, berinavo “Kuruaku nalo, nejidom kami u kuviagago ka kiniou beamu vo. ¹⁴ Kito romijog m̃a ruei ka napano Saimon nei, napano Pitere, naio ber bisivisii batitigio ban kito ruei jumabe napano Atua malmaluvo moti ka nalo napano

maka ave kulo Ju, a napano naio buru bulag nalo tealó abinimeĩ ka ave kulo vou tai napano siano joaio. ¹⁵ Ana ea Iliano Lu, iliano napano kiado naverialiano nalo nanua beamu aberenio, naio ber ka mia tibe na naruei. Nalo tai napano naio ber jibe na, naio be Amos, napano naio berial Atua kiano iliano tai, berenio jibe nei, berinavo

¹⁶ *‘Karina, mia kiniou nemei bereio, neim̃au vatitigio ka Teviti nene kiano bajulukuti tai napano mijoru, naio rimeĩ rimeul bereio.*

Bajulukuti nene javukia yimo tai napano burukokorovio bova ju nei, mia kiniou nevitirilario bereio.

¹⁷ *Ana jibe na, tomu dolu nalo napano maka ave kiaku vo, nalo ajirav kiniou Atua Soĩ, a tomu nalo na buruvenuo nonovio na yetemeriba nei, napano nomidu siaku jualo ruei, mia nalo amei ave kiaku tomu nalo.*

¹⁸ *Kiniou nebe Atua Soĩ, napano nemila tomu nalo abitilubar vite nalo nei, jikar nanua beamu laka ruei, kiaku verikariano jibe na naruei.” Amos 9:11,12*

¹⁹ Ana Yemesi mil lie vo, ber bisivisii kiano jidomiano, berinavo “Ea kiaku vitiiiano, naio jibe nei naruei. Mia maka rivu ka kito rovijuku kouo ñeli na rala

m̃lelea nalo napano abiliglo vonga abinimei ea Atua, napano maka ave kulo Ju. Maka rivu ka roverenio nalo monoka ave pakuveu, p̃eli na nalo monoka atakisor kiado tuboiano tibe na a tibe na. ²⁰ A vaio ga napano bo ka kito rala vanlo, tibe nei, ka mia rovivitauiã m̃esi tai, roverial vite ve tolu. Vite na be moti, rovere ka, mia nalo asen re bereio sunbue nalo napano kulo dolu nalo amila ka sida ban kanalo tavoru nalo, nalo monoka aveli kalo. A tinene, nalo ala re bereio bajago va, na jibe ka siakaiano p̃eli na siakiano. A tolu nene, asen re bunu ga burukija na vite na meul, jibe sunbue na vite na meul napano burukija nene maka tabo vatitigio vo eaio. ²¹ Tomu nalo ajum̃a amijikia vite nalo nana napano maka rimemedu ka ala, bior Moses kiano tuboiano naio jo berenio, a nalo ajum̃a abuluku bulag tuboiano nene a amioliolu kanio julaka ga ea Legiano Lu nalo ea kanalo yimo na volkouano na kanalo m̃arkomeli nalo, jikario nanua ruei binimei bokar banei.”

Tomu natortoru nalo na Yerusalemo abivitauiã verdopeiano ban nalo na vio Antioko

²² Ana iorou kanio, ana nalo amial jibe ka amil bare, ana atevi nalo a navurim̃araboiano nalo, a bija bunu ga kulo na namoneano nalo nonovio, nalo amial jibe bo ka mia

aiila nalo tealo avan bereio naliko Pol naljuo Barnabas, avatove bereio yako Antioko. Naruei nalo ajekar kanalo kulo kouo juo na imãuano nei, Jutas Barsabas naljuo Sailas, aberinavo mia naljuo nei avano. ²³ Mia nalo abivivitauiã bunu m̃esi tai ka naljuo amijikia adukario avatove, ana m̃esi nene berenio jibe nei, berinavo “Kumemi atevi nalo bija navurim̃araboiano nalo na vio Yerusalemo, napano kumemi nube kuruado bija kamiã ea Yesu, kumemi numisaaro toru laka ka nuviviuo kamiã bereio ea m̃esi nei. Kumemi nubivitauiã ea m̃esi nei biedu ban kamiã m̃arkomeli na vio Antioko, a sano tanobuku napano Siria, a ban kamiã bunu ga ea tanobuku na vio Silisia, ninei kamiã nalo napano maka kuve kulo Ju, napano beamu kamiã kumitua melijokouo ga. ²⁴ Iliano binimei bokar kumemi ruei, berinavo beamu, kumemi tealo abiedu rove ea kamiã a nalo aberloglog kamiã aber kamiã na monoka atakisor kenememi tuboiano nalo kumemi kulo Ju, aver makanio, mia Atua naio maka rijikia rilarur kamiã. Kumemi numijikia ka iliano nei mila lelan kenemiã jidomiano nalo toru laka, a mila kamiã kumijog bova laka, ana iliano nei napano nalo aberenio, kumemi maka nuvijikiaio, kumemi maka nuver kalo ka monoka aviedu averloglogio tibe na van kamiã. ²⁵⁻²⁶ Ana kuruado novo juo nei, Pol

naljuo Barnabas, napano nalo na maka asidomii ve temi ka kanalo meuliano, mia aju ajidom yebekavo toru ka ga averial Tubo Yesu Kristo siano, kamiu kuviila nalo na amei aial kumemi rivior vite nei. Ana kumemi nuvioro kanio, kumemi nuvitiio rivano-o, naruei nuvironkario ka mia nuviila kuruado juo na vio nei adu mġesi nei, aviedu bereio naliko Pol naio Barnabas. ²⁷ Naljuo neibano, Jutas naio Sailas, mia ave juo atukunu vatitigio lie vo van kamiu, riveverare ka ga vaio napano nubivitaui ban kamiu ea mġesi nei. ²⁸ Ana ea kenememi vitiiiano, a ea vitiiiano na Niununo Lu kiano bunu ga, kumemi numial jibe bova ka nuvututua ka monoka kuvijogkar kenememi tuboiano nalo kumemi kulo Ju. Mia kumemi numial jibe vite nalo nei tealo napano kumemi kulo Ju nalo maka nuvisidom leleio, a bo ka kamiu bunu kuvila re, ka mia rila ana kumijikia kuvitu rivu kamlika kuruado dolu nalo napano abe kulo Ju. ²⁹ Vite nalo nei, tai berenio jibe nei, berinavo mia kamiu monoka kuvel ka sunbue napano kulo dolu nalo amila sida kanio ban kanalo tavoru nalo ruei. Ana na juo nene, mia kamiu kuvisen re burukija, pġeli na sunbue na vite na meul napano sano burukija makariou konio vo. A na tolu nene, mia kamiu kuvila re bajago na bova nalo, jibe kanio siakaiano a siakiano.

“Verenio kamiu kuvituvan vatitigio vite nalo nei, kumemi numial ka tibe na mia ve novo laka van kamiu nonovio. Bo ga, mia kenememi iliano ribisi ea ga vio na.”

³⁰ Ana nalo amiila Pol naio Barnabas naliko naljuo dolu nene, aban bereio abatove rove yako Antioko. Bogo napano nalo nei aboru ea vio nei, abio taara na kulo na namoneano nalo abinimei vio takurano, ana amidu mġesi nei banlo. ³¹ Naruei nalo na vio Antioko abuluk mġesi neibano, naruei nalo ajaaro toru laka ka iliano novo nalo napano nalo na vio Yerusalemo abivitaui binimej banlo. ³² A naljuo na vio Yerusalemo neibano, Jutas naio Sailas, naljuo nei abe naverialiano, mia ajumġa amioliolu ban nalo napano Antioko, aberinavo monoka avarkar tinielo sikili ea Kristo tulaka ga, ana amila kialo iviso nalo jumolu ju jikili, ea kanalo iliano novo telabo napano aberenio.

³³⁻³⁴ Nalo aju amil banlo jibe na ea legiano telabo, ana iorou kanio, ana nalo na vio Antioko amivenlo aban bereio ea kialo mġarabo, abolkouo ka naljuo, aber “Tumġaroano na Atua kiano to vija kamjuo.” Ana naljuo abavin bereio ea vio Yerusalemo. ³⁵ Ana Pol naljuo Barnabas, naljuo aju bokar siberio tai bere vo yako Antioko, ajumġa amija kulo dolu nalo napano ajumġa amioliolu a aberloglog tomu nalo ka Atua

kiano Iliano Lu.

Pol naio Barnabas, naljuo amila baravo

³⁶ Mia iorou kanio, ana Pol ber ka Barnabas, berinavo “? Ei, jumabe, mia kito ve juo ravan bereio ka reiadu ka kuruado a kuviviniedo nalo ea vio nalo napano m̃a rabano rabisivisii Iliano Lu na Atua kanano banlo beamu vo? Naruei kito ve juo rava ralavonio ka reial lo aju jumabe.”

³⁷ Ana Barnabas berinavo “! Bo laka koig, kiniou na jaaro toru kanio! Ana kiniou nejidom toru ka rovurukar Jone Mak nei rimej vija kito.”

³⁸ Mia Pol naio jo jidomii kia ga nanua ea kialo ieliano na jukamu, Jone Mak nene naio buro denio vaarakurano ruei, nina yako Pamvilia, napano bogo napano inĩauano maka riviniu vatitigio vo mia naio barpilig naio ban bereio. Tenene na, Pol mialio maka rivu ka Jone Mak rimej vijalo ea kanalo ieliano dolu nei bereio. ³⁹ Vite nei naruei mila ana Pol naio Barnabas abilvilii ealo memedu, naruei nalo aburuburelo. Barnabas naio ba buru Jone Mak ga, ana naljuo aba ajel ea uako tai, abe juo aba amim̃au yako Saipras, ⁴⁰ mia Pol naio ba bijauia Sailas. Ana kulo namoneano nalo abolkouoko naljuo nei aberinavo mia Atua kiano tiniememiano a kiano vitikariano novo to rivijalo. ⁴¹ Ana naljuo amiel aba ajeliviv ea tanobuku juo na

Siria bija Silisia, amim̃auka ala taara na namoneano nalo ka amei asikil lie vo.

Nina jibe kanio Pol kanano buru-m̃ara ieliano valuo nene.

16

Timoti bunu naio bano naliko Pol naio Sailas

¹ Naruei ea kiano burum̃ara ieliano valuo nene, Pol binimej bokar bereio komeli juo nei Tebe bija Listra. Naruei ea vio Listra nei, be naiagagoano tai jo na, nina be toro m̃eaku nei Timoti. Timoti nene kenieno be tira re Ju tai, napano naio monmonea Yesu ruei, mia karam̃ano naio maka ve toro Ju, naio be toro tai na vio Kris. ² Naruei kuruado nalo na Timoti kiano vio, bija nalo na komeli dolu na vaataro nei Aekoniam, nalo amial ka Timoti naio mila Tubo kiano inĩauano banlo bo laka. ³ Naruei Pol naio jidom rivuru Timoti rivan vijaio ea kiano ieliano nei, mia be titai ga takurano naio bova, nina ga napano Timoti naio maka rive pakuveu, nina b̃ior karam̃ano naio maka rive toro Ju. Mia Pol naio mijikia ka verenio Timoti takilili naio tibe na, mia kulo Ju nalo mia averbure naio ka riva joomo re ea kanalo yimo na volkouano nalo, a mia asaaro re ka ajog kiano iliano nalo. Mia b̃ior vite na, ana na Pol mila Timoti ba amila pakuveu ka naio, karina iorou kanio ana nalo tolu nei Pol, Sailas, Timoti, abano. ⁴ Naruei ka

bogo na nalo ajum̃a ajeliviv ea komeli nalo, ajum̃aajian iliano ban namoneano nalo, aberial banlo tuboiano napano naiagagoano nalo a navuriñaraboiano nalo re Yerusalemo aberenio ea kialo vioriano jukamu ruei, ana na Pol nalo aber kalo ka monoka atakilili iliano nalo nei naruei. ⁵ Naruei bogo napano Pol nalo ajum̃a amiadu a aberloglog taara na namoneano nalo jibe na, mila ana taara nalo nei ajumolu aju jikili batitigio lie vo, a nalo amial ka napano namoneano nalo aju abinimei telabo lie julaka ga.

Ajua vio Troas, naruei Atua mil ban Pol ea namonvovuno

⁶ Naruei Pol nalo ajidomii ka ayotuba ea komeli nalo na telabo ea tanobuku na vio Esia, mia Niununo Lu berburelo ka avan re, averial Iliano Lu ea vio na, mila ana na amiyotuba ea ga tanobuku na vio Vrijia a vio Kalesia. ⁷ Ajum̃a aban jibe na, ana bogo napano abinimei vaataro ka tanobuku na Mesia, amila vonio ka avatove ea tanobuku na toru Bitinia, mia bogo tai bereio, Yesu kiano Niununo makarijamo kalo ka avan tibe na. ⁸ Naruei nalo amiovodulu vonga ea vio Mesia yako ga, abanbano-o abokar komeli nene tai koyou ea tei, siano Troas. ⁹ Naruei ea vio na, ka bogiano, Pol naio monmelio mial toro tai tena tanobuku na toru na tei tivelinio yako Masetonia, mia toro nene binimei

ka Pol, jegi banio, bika denio, berinavo “Aiou koig liki, kumemi numisidom toru ka jau kavarkor komei keial kumemi, kanio mia kajai kumemi.” ¹⁰ Ana ea bogo na, kiniou Luka nojo kumemliko nalo bunu, mia bogo napano Pol berial ka naio mial toro nei mil ban naio, vaarakurano ga kumemi nubano numisirag m̃arabo ka nuvijikia nuvarkor nuva Masetonia, bior numijikia ka Atua naio bio kumemi ruei ka nuva nuvioliolu ka Lillianiano Vou na bo nei vanlo.

Ajua vio Vilipai, ana tira na Litia naio monea

¹¹ Tibena naruei, kumemi numidu uako, numituvan vio Troas, nuburo nubano-o nubokar uleule na vio Sametresi. Naruei numonmelio ea vio na, mo kavijo, ana na nubano-o nubokar tanobuku na vio Masetonia, naruei nubauro ea sano komeli na Niapolis. ¹² Naruei ea tanobuku na Masetonia nei, burum̃ara bulukomeli dolu tai jo, napano naio jotan ka vitikariano na parinio tubo na vio Romo. Komeli nene siano Vilipai, naruei numiel nubano-o nuboru eaio. Numitu legiano juo tolu ea vio na, banbano-o bokar Legiano Lu. ¹³ Mia kumemi numijog ruei ka aberenio ea Legiano Lu, kulo Ju nalo na ea vio na ajum̃a amila lotuano ea vio na volkouano tai rove yako ea uei tai, ea komeli tivelinio bano. Naruei bunu numitaluvo ka nuvatove ka nuval lo ea vio na,

naruei kumemi numitutano numitukunu kumemliko tire nalo tai napano aju kamu abinimei ruei ajuaio.

14 Tire nalo nei tai, naio maka rive Ju, mia naio jo monmonea Atua. Naio be tena komeli na vio Tuatira, mia be kiano burum̃ara im̃auano, naio jom̃a p̃ilivili ka kulum̃arauo na be vabolo na kirinovo nalo napano amim̃aukanio ea kiano vio. Tira nei, siano Litia. Ana ea bogo na, Tubo betavo ea kiano jidomiano, naruei naio midukar batitig iliano napano Pol jom̃a beriio banlo, mia naio bokario jikili bo ea kiano iviso. 15 Ana ea bogo na, Litia nei naliko nalo na ea kiano vonuo, abiniu abokar varueiano. Avona bisi, ana naio jadua jikili ban kumemi, naio berinavo “Verenio kamiu kumial kiniou noju jikili riano ea Tubo, kiniou nejidom ka kamiu kumei kuvitua kunuaku kija.” Jibe na naruei, ana na naio buru kumemi nuba numitua kanano vonuo.

Abuku Pol naio Sailas aban ea nalakoiano

16 Naruei ea legiano tai bereio, ana kumemliko Pol nubatove bereio ea kanalo vio na volkouano, naruei nubitavo bija niatira tai ea m̃arabo. Niatira nei, tomu tai abulular naio ka rim̃au kanalo, mia niununo va tai joaio napano abio ka niununo na m̃aro, napano be niununo na jom̃a mial vite nalo napano mia ayoyotuba iorou. Naruei tomu nalo telabo ajum̃a abinimei

abika den niatira nei kiano tomu na tortoru nalo, ka naio riverial vanlo ka mia tum̃abe ka kanalo meuliano nalo. Ana bogo napano niatira nei berial banlo, ana nalo ajum̃a abar ijaiano ban kanano tomu na tortoru nalo, mila ana bogo nonovio nalo ajum̃a jum̃alo bujo ka puruveru telabo biorio. 17 Naruei kumemi numiel nuban jibe na, mia niatira nei jakisor kumemi naio iorou, naio jom̃a miagiaga toru ban tomu nalo nonovio ga, jo berinavo “!Ai! Abe tomu nalo na nalo abe tomu na amim̃au Atua kanano napano meul ea vio soṑi mave. Nalo naruei amijikia averial m̃arabo na ioruriano van kamiu.”

18 Karina, naio jom̃a mila jibe na ban kumemi ka legiano telabo, mila Pol mijog bova-o deio, ana bokar bogo tai ana naio tinien jer niununo va nei, ana jiraragidi, berkanio, berinavo “! E, bare! Neber kaso memedu, ea Yesu Kristo siano, jau komoluo den niatira na vonganei.” Mo vaarakurano ga, naio buro den niatira nei naio bano.

19 Naruei bogo napano niatira nei kanano tomu na tortoru nalo nei amialio ka m̃arabo na na m̃a abar kanalo puruveru eaio binimei bova ruei, tiniel mimi toru ka Pol naio Sailas. Naruei nalo aburu tomjuo nei aba ajumolu ajukamu ea natibureano na vio Romo nalo miralo ea komeli. 20 Naruei nalo aberial banlo, aberinavo “Kulo Ju nalo na,

abinimei ea kanado vio, nalo aju amila bulag kito toru o-o mia. ²¹ Nalo ajum̃a ajadua kito ka ratakii kanalo bajago tealó, mia ea tuboiano na vio Romo napano roju tan kanio ea vio nei, maka rimemedu leleio ka rala tibe ka napano nalo ajum̃a aberenio.”

²² Naruei tomu nalo amila burum̃ara uetubaiano na, a nalo amila searia Pol naio Sailas, ajidom atukulo, naruei natibureano nalo nei aberenio ajede bulag kanalo kulum̃arauo ealo ave juo, ana na avitivlo ka iesi. ²³ Naruei nalo abitiv searialo jibe na-o bisi, ana na aburulo aba abukulo aban ea nalakoiano, mia amil jikili ban toro na bitikar nalakoiano, aberinavo monoka naio rivokar batitiglo ka avuro re bereio, ver p̃eli mia rivova ka naio.

²⁴ Naruei bogo napano toro nei naio mijog iliano nei, naio buru tomjuo nei aba laka joomo, ea vio kouo tai napano m̃a aburu nalo na parilo jikili laka aban eaio, naio miorkakar jaalo aban ea burum̃ara iesi napano naio joa vio na.

Borotano memebiju, a mikulkulu ka nalakoiano

²⁵ Naruei Pol naio Sailas naljuo aju banbano-o bokar bogiano viovare, ajum̃a abolkouo ban Atua ea iouano lu nalo, a nalo dolu napano aju nalikolo ea nalakoiano nalo ajum̃a amiagago ka bunu. ²⁶ Naruei nalo amiilo toru laka, napano kolvare ga, burum̃ara

m̃ii tai binimei, mikulkulu ka yimo nalakoiano nei, mukulkulu ka tati nalo reraio. Ana amial m̃aratavo nonovio abevetavo, a marimieni nonovio napano amiorakakar ka jum̃alo a jaalo ajibirbili ga bunu.

²⁷ Mia toro na bitikar yimo nalakoiano nei naio jevijo, naruei jikiti binimei mial m̃aratavo nonovio abiniu abevetavo aju, mia beriam̃a nalo napano aju joomo, nalo abiniu aburovuro abeve terakurano ajanea vio ruei. Naruei vite nei mila naio merou toru, naruei midular kiano iobogu na mira, ka jidom rielbin naio rim̃aro.

²⁸ Mia Pol mialio, ana bio jouo banio, berinavo “! Ei, jau kotovo kala lelanso re vo! !Kumemi nonovio nubitu kiaga ea vio nei.”

²⁹ Naruei toro nei naio bio ber avar yulu rimei, naruei jikiti ba joomo ea vio napano Pol naio Sailas ajuaio, mia memebiju mia memebiju.

³⁰ Avona karina, naio burulo aba tavio bereio, ana bika denlo, berinavo “?Ai, tomjuo na tortoru, mia monoka nala vaio ana na mia neje ioruriano?”

³¹ Naruei tomjuo nei aber kanio aberinavo “Jau monoka komonea Tubo Yesu, ana jau kovokar ioruriano, jau kamliko nalo na ea kanamo m̃aratavo.”

³² Naruei nalo aberial Tubo kiano iliano banio, a ban nalo na ajua kiano vonuo, ³³ mia memedu ka bogiano viovare ga, toro nei naio mila batitig Pol naio Sailas

kanalo niajebijo na menko nalo, ana kanio bogo nei bunu, nalo abaruei ea naio naliko nalo na ea kanano m̃aratavo. ³⁴ Naruei naio burulo aba joomo ea kunuano, naruei bar sinaniano banlo, ana naio naliko nalo na kiano vonuo nalo ajum̃a ajaaro-o mia ajaaro, bior vonganei nalo amileal Atua ea kialo meuliano nalo.

³⁵ Ana ea kavijo nene ga, ana na natibureano nalo maka ajikia vite nei vo, mia nalo ajutano bereio bisi, ana amiila kialo tomu nalo abinimeĩ aberial, aberinavo “Tomu juo na nalo amijikia ava tavio ga.”

³⁶ Naruei toro na bitikar nalakoiano nei naio binimeĩ berial ka Pol, berinavo “Natibureano nalo amiila toru binimeĩ aberinavo kamiũ kuve juo kumijikia kuva tavio ga. Tibe na mo kamiũ kumeĩ, kuan ga tibe na. Mia kito rela re bunu iliano van kito rivor vite nei.”

³⁷ Mia Pol naio ber ka nalo nei, berinavo “Ee, makanio, maka tibe na. Kumemi bunu numitutano ka parinio tubo re Romo nene, a ea kiano tuboiano, natibureano nalo na amila maka rimemedu ka kumemi ga na. Maka aleal ka kumemi numila tena bova tai, ana abitiv kumemi ea tomu nalo miralo, karina abuku kumemi nuba joomo ea nalakoiano, naruei vonganei ana ajidom ajil bulagio bena ea kumemi ga tibe na. !Makanio, kuan bereio kuver kalo kuverinavo nalo naruei monoka amei ana mo avuru bulag

kumemi ea vio nei, nalo monoka amei nei averenio iliano tai van kumemi beamu vo!”

³⁸ Naruei tomu natibureano nalo abar Pol kanano iliano nalo nei aban bereio, ana bogo napano nalo amijogial ka Pol naljuo Sailas, nalo bunu ajutano ka natuboiano re Romo, naruei nalo amerou toru. ³⁹ Naruei abinimeĩ aberenio iliano tai banlo, karina aburulo aban ea m̃arabo, aberinavo ajidom ka monoka nalo ataluvo den vio nei. ⁴⁰ Mia Pol naio Sailas, aban bereio amiyotuba ea Litia kunuano jukamu, karina iorou kanio, ana na nalo amial kuruado nalo bereio ana ajian iliano novo nalo na be tena ilivituniano banlo, a karina iorou kanio ana nalo ajaluvo den komeli nei.

17

Pol naio Sailas, ajua vio Tesalonaika

¹ Naruei Pol naio Sailas, naljuo amiel abano, ana ajel ea m̃arkomeli juo nei Amvipolis bija Apolonia, abinimeĩ abokar m̃arkomeli nei, Tesalonaika. Markomeli nei be yimo na volkouano tai na kulo Ju nalo kialo joaio, ² ana jibe ka napano Pol jom̃a mila ea vio nonovio napano ban eaio, naio jusol nalo na vio nei, jo ban bijalo joomo ea kialo yimo na volkouano nei, ea bogoti nalo na volkouano. Ana ea Legiano Lu tolu, naio jom̃a mila jibe na, a mil vatelabo bijalo ea vaio napano Iliano

Lu joġna jiloglogio. ³ Pol naio joġna jilogloglo kanio, a joġna berial binimej meravo bo, berinavo takij vaio napano İliano Lu berenio, naio memedu ga ka napano kanalo Naverikariano, tomu nalo amila searo ga banio, banbano-o naio ġaro, ana iorou kanio monoka naio rimeul bereio den naġariano. Ana Pol berial banlo, berinavo “Yesu nej napano nojoġna neberio, naio naruej, be kiado Naverikariano nene.”

⁴ Ana nalo tealo napano ajunġa amiaġago, amialio aber iliano nene be riano, ana amonea Yesu, ana abinimej amiasol Pol naio Sailas. Ana ea vio na, be tomu nalo na maka ave kulo Ju, mia napano amonea Atua ruej, ana nalo telabo bunu amonea Yesu ruej, bija bunu natukamuano telabo na tire nalo kialo.

⁵ Mia tomu na tortoru na kulo Ju nalo maka asaaro, nalo amijoku, ana naruej aberij ka mia ala von vite tai. Ana aba amial terati na parilo jikili nalo na vio nej, ana aburu nalo tealo napano abova lie vo, ana aba aburu tomu nalo telabo bereio ana amila burunġara tiniobi na, ana nalo aba amila burunġara uetubaiano janea ġarkomeli nej. Ana nalo aberianġa Pol naljuo Sailas nalo ajua yimo na toro tai kunuano, siano Jesono, ana nalo aban kalo ea yimo nene, ka avurulo ava komeli. Ana abinimej abokar yimo nej, ana amila searo mia, amila

korovio ġaratavo nene, ⁶ mia maka aleal naljuo joomo eaio. Ana abokar ga Jesono nene, bija kuruado dolu nalo, ana aburulo aba ajumoluaju ea mirano kulo navurimġaraboiano nalo na ġarkomeli nej. Amil toru, aberinavo “Kulorinio nalo napanoaju abiliglar kiado yetemeriba nej, aban ea vio dolu nalo telabo ruej, mia vonganei abinimejaju kija kitoliko naruej. ⁷ Ana toro nej, Jesono, naio burulo aban ea kunuano, ana nalo nej abova, ajunġa amila kokorov tuboiano na parinio tubo na vio Romo nej, Sisa, kiano. Sisa nene ga naio berenio ruej ka mia rolotu ka naio ga, mia nalo nej ajunġa aberenio aberinavo parinio tubo takurano ga ea yetemeriba nej, nina naio be toro tai napano siano Yesu.” ⁸ Ana tomu nalo bija kulo navurimġaraboiano nalo na ġarkomeli nej, bogoti napano amijog iliano nej, mia nalo tinielo jikili, ana ajunġa amiaġaniaga a ajunġa amil bova toru laka. ⁹ Ana na kulo navurimġaraboiano nalo nej aber Jesono nalo monoka adu burunġara puruveru tai toa ġunġalo, ka rila ana mia avokar re bunu Pol to vijalo bereio bogo tai, ver ġeli mia maka ajikia avar merano bereio puruveru nene. Ana iorou ka napano amidu puruveru nene jo, ana amijamo ka nalo aba tavio bereio.

Pol naio Sailas, ajua vio Beria

10 Ana bogiano kia ga, ana kuruado nalo na vio na aban amivenbena Pol naljuo Sailas ea kanalo m̃arabo, ana naljuo aban bere mave ea m̃arkomeli tai bereio, nina Beria. Mia bereio naljuo aju aba joomo ea yimo na volkouano na kulo Ju nalo na vio nei kialo.

11 Kulo Ju nalo na vio nei nalo abo, a nalo abe kialo vijauano, maka atibe ka nalo na vio Tesalonaika, nalo abar jidomiano novo ka napano amijikia amia-gago vatitigio bo ka Pol naio Sailas kialo verloglogiano. Mia legiano nonovio, nalo tiniel jii m̃elea ka avitii Tubo kiano Iliano Lu ka aleal aver naljuo aberii be riano p̃eli na jum̃abe.

12 Amila jibe na bano-o, mia maka vesiou, ana na ajikar ka amonea naruei, ana navurim̃araboiano na tire nalo re Kris nalo bunu, naliko kulo Kris nalo telabo, nalo bunu amonea.

13 Mia karina, ana iliano ban bereio bokar kulo Ju nalo yako Tesalonaika nanua, ana aberenio vonganei Pol naio jom̃a mio-liolu ka Atua kiano iliano yako Beria bunu, ana nalo tinielo jikili bereio. Ana abinimei mave yako Beria, ana amila searo ea kulo Beria dolu nalo kanalo jidomiano bereio ka rila nalo tiniel ser naljuo ka ajil lo avano. 14 Ana kuruado nalo amial vite nei, aber bo ana amila Pol ka rivatove soṑeli koyou bereio, mia amial aberii Sailas naio Timoti,

naljuo amijikia atu beamu vo, naljuo abo ga. 15 Ana nalo aburu Pol ea kiano m̃arabo, abatove koyou ea tei, ana amidu uako tai ana aba abokar burum̃ara bulukomeli nei, Atene. Ana bogo napano nalo ajuvan Pol ea vio nei ka avan bereio, ana Pol berii kalo berinavo mia Sailas naljuo Timoti, nalo bunu monoka ava tove soṑeli ea naio vesiou re, ka mia nalo aim̃au vio takurano bereio vija naio.

Pol joa vio Atene

16 Naruei Pol joa vio Atene, naio jororea Sailas naljuo Timoti ka naljuo amei, ana bogo napano naio jom̃a jirarag veve vio janea m̃arkomeli nei, mia naio mial ga ka napano vio bujo ga ka tavoru nalo, ana tenei mikuru kiano iviso. 17 Ana naio jo ban ea yimo na volkouano na kulo Ju nalo kialo, ana jom̃a mila iliano nalo telabo ka vite nalo nei bijalo a bija bunu kulo dolu nalo napano amonea Atua. Ana legiano nonovio ga, naio jom̃a ban bunu ea vio medave na m̃arkomeli, ka tukunu vija toro kei napano ver rialio ea vio nei. 18 Ana yako Atene, be burum̃ara yimo juo na verloglogiano na m̃asosouano, napano tomu na verloglogiano nalo na yimo juo nei, abiolo ka kulo Epikururu nalo, bija kulo Stoiki nalo, ana nalo aju abior bunu bija Pol.

Mia nalo tealó ajum̃a amili tertelisu ban Pol, aberinavo “!Toro na mil m̃ele mia, mia

naio maka rijikia vite na bo tai ka napano mijikia riverii ka kito.” Mia tealo bereio, amijog ka napano Pol jomā berii Yesu bija tumoluano, ana nalo ajidomiio aber nina tomu juo na, ana aberinavo “Peli, kumemi numial nuber toro nei naio jomā berii atua dolu nalo a niununo dolu nalo na buruvenuo na koalabo ga tai.”

¹⁹ Ana iorou kanio, ana kulo Atene nalo abio Pol aberenio naio riva totano vijalo ea kanalo burumāara komeli, mave ea burumāara burusuku na vio nei, napano siano, Areopakas. Ana abika den Pol, aberinavo “Kumemi numisidom ka jau kalavon ka koverii verloglogiano vou nei napano mā kojomā koberial ban tomu nalo. ²⁰ ? Kumemi numijog jibe verloglogiano na naio be dolu ga, ana kumemi numisidom nuvijikia ka vite nalo na kojomā koberenio na, salo nioti nene be venia?” ²¹ Ana bogo napano amila jibe na, ana aju ajakii kanalo bajago kouo tai, bior napano kulo Atene naliko kulo dolu nalo napano ajua vio na, nalo ajidom mēlea ga ka danāariga, ana atu ga ajog pēli na atukunu ka verloglogiano pēli na iliano vou, pēli na jidomiano dolu nalo, pēli na tomu nalo kialo moneano nalo.

²² Naruei Pol jumolu jua miralo ea komeli nei napano jo mave yako Areopakas, ana mil banlo. Naio ber

kalo, berinavo “Tomu na tortoru na vio Atene nalo, kin-iou nemial jibe ka kamiu tiniemiui jii mēlea nalotuanu nalo toru laka, juvulu napano kulo dolu nalo tinielo jiio. ²³ Bogo napano nojomā nemiel ea komeli nei, ana nemial vio lu nalo a boda nalo, a kenemiui tavoru nalo telabo laka, mia bogo tai ana nemial boda tai napano aje vivitauiano tai joaio, napano berinavo ‘Boda na atua napano maka rejikia naio.’ Ee, kamiu kumitumā kumilotu ka atua nene, mia kuber be riano ga, maka kuvijikia leleio naio, ka naio be kei. Mia be Atua riano takurano ga napano naio jo, a naio naruei kinioi nejidom neverial van kamiu ka kuvijikia naio. ²⁴ Naio naruei naio be Atua Tomoruo napano jii yetemeriba nei, a vite nalo nonovio napano romial ajuaio. Naio naruei naio be Parinio Tubo na tiniabene a be Parinio Tubo na yetemeriba nei. Naio maka lele toa vio lu nalo pēli na vite lu nalo napano kulorinio nalo ga amilaio, ²⁵ a naio maka to ga vain kito tomu nalo ka mia ravaganio pēli na rovitikario. Peli ga, bior naio naruei, naio jian meuliano, a jian jegi, a jian vite nonovio ban tomu nonovio nalo. ²⁶ Atua nene naruei, naio mila tomu kinkin nalo nonovio amaluvo ea toro na jukamu napano naio jiio, ana jukamu beamu ruei, naio jekar bogoti nalo a vio nalo reraio ea mirano

yetemeriba nei, napano mia kulo kinkin nalo nei amijikia ameul eaio. ²⁷ Naio mila jibe na ka kito nonovio monoka rosidomii ka monoka releal Atua nene, ana mila kito roju rojian juñado ban ea vio bobogio ka rabagbago ka kiano yulu. Mia bo ka rosidomiikar bunu, ka Atua nene, naio maka to koalabo laka, mia naio jo ga vaataro ka kito terakurano. ²⁸ Tomu nalo ajiri kenemiu iouano nalo aberii vite nei ruei, napano tai berii jibe nei berinavo 'Kito romeul ea naio, kito romiel ea naio, kito ea ga naio damariga,' ana dolu berii jibe nei, berinavo 'Kito nonovio naruei kito robe kiano kulo vou nalo.'

²⁹ "Ana bior ka napano kito nonovio robe Atua nene kenerinio nalo jibe na, ana maka rimemedu leleio ka rotu rosidom rover naio jibe ka tavoru tai napano juñano toro ga miñaukanio ea niogo, p̃eli na ea verumera, p̃eli na ea puruveru, napano amim̃auka jakii vaio napano jua ga kialo jidomiano. ³⁰ Beamu laka ruei, ea melijokouo, tomu nalo maka ajikia vite tai, mia Atua bijuku bo kalo, naio maka toñña rivuluku kanalo vovai nalo ea bogoti nene. Mia vonganei naruei, ana na Atua berial memedu ga ban kulorinio reraio ea vio nonovio, berinavo monoka nalo aviliglo, ³¹ bior ka napano naio berkar legiano nene ruei, napano mia naio

tibure yetemeriba nei, tibe ka napano rimemedu ka mia naio rila, a naio berkar bunu ruei kiano toro tai napano mia rila kiano inġauano nene. Naio mila vite nei meravo batitigio ban tomu nalo ruei, napano kiano toro lu nei, nalo amuebini m̃aro ruei, avona bisi ana Atua bitirilario meul bereio."

³² Ana binimei bokar vonganei, mia nalo ajuñña amagago vatitigio ka Pol, mia bogoti napano amijog ka naio jom̃a berii berinavo toro tai m̃aro, mia Atua mila naio meul bereio, mia nalo tealò abital searo ea naio biorio, mia nalo tealò aber kanio, aberinavo "Bo ga, tobo beamu vo. Peli mia kumemi nuvidu bogo vanso ka mia kotukunu bereio van kumemi bogo tai navo."

³³ Ana Pol mial ber nalo maka bunu tiniel tii ka aiagago kanio, ana jumolu denlo batove bereio, ³⁴ ana tomu nalo na vio nei tealò amoneaio, ana aju abinimei abior vio takurano bija Pol, napano nalo tai kalo, naio be toro na toru tai na komeli na vio Areopakas nene memedu, siano Tionisia, ana tai bereio, naio be tira tai, naio siano Tamarisi, a nalo dolu bunu.

18

Pol jo yako Korin

¹ Ana iorou ka vite nalo neibano Pol mila yako Atene, naio jaluvo denio, ana ban yako ea burum̃ara bulukomeli dolu na Korin. ² Ana ea vio na, naio mileal

toro Ju tai napano toro nene be toro tai na tanobuku na vio dolu Pontas, mia naio ba joa venuo na vio Italia, ea sano buruñara bulukomeli na vio Romo, mia vonganei, naio naljuo koano, abinimei vonga aju Korin, bior Parinio Tubo Klotias na vio Romo naio bukubulag kulo Ju nalo ea kiano vio nei. Mia toro neibano siano Akuila, a koano siano Prisila.

Jibe na ana Pol ba mial naljuo,³ mia naljuo aberenio bo ka Pol naio to naliko, ka aimġauka puruveru kija, bior naljuo naliko Pol, naltolu, kialo inġauano takurano, napano inġauano namġa ajul panpano na yimo.⁴ Mia amimġau jibe na banbano-o, mia ea Legiano Lu nalo, Pol naio joġma ban ea yimo na volkouano na kulo Ju nalo kialo, mia joġma mila iliano telabo laka naliko kulo Ju, a naliko bunu kulo Kris napano ajuaio, naruei naio mila jibe na banbano-o mia jo buru nalo telabo.

⁵ Mia iorou kanio, ana Sailas naljuo Timoti nalo abinimei aboru iorou ea vio nei, ana ea bogo na, Pol naio mijamo ka momonio kiano bogo ea Tubo kiano inġauano, ka napano naio joġma mioliolu, joġma berialio ban kulo Ju nalo berinavo kialo Naverikariano riano napano mġa aju rorea ka naio rimej, nina be Yesu nene napano binimei ruei.

⁶ Ana iliano nei mila ana kulo Ju tealu tiniel jer Pol,

mia aberdoġe niegeniegeio kirivova laka, naruei amila banbano-o mila ana bogoti tai ana Pol mila kijokijo tai banlo, napano mijagdago bulag ka bulukievi na vio nei den mġano kulumġarauo, ber kalo berinavo "Iliriani-ano na Atua kiano kiniou neberial batitigio ban kamiu kulo Ju ruei. Mia vere-nio kamiu maka kuvisidom kuvijogkario, kuvisidom kuvanvan kovio ga, kiniou neber ka kamiu ka kene-miu burukija toa jumemiu ga, maka bunu toa jumġaku naruei. Tikar vonganei, kiniou notuvan kamiu, mia nava neverial Lilianiano Vou Na Bo nei van nalo napano maka ave kulo Ju."

⁷ Ana na Pol jaluvo denlo ea kialo yimo na volkouano, naruei naio ba jua ga yimo tai napano jumolu ju ga tivelinio ka yimo na volkouano neibano. Yimo nene be toro tai napano maka rive toro Ju kunuano, mia vonganei naio monea Atua ruei, napano siano Titias Jastas.⁸ Mia navurimġaraboiano na yimo na volkouano nei, napano siano be Krispas, naio tai nene napano monea Tubo Yesu, naio naliko nalo na ea kiano mġaratavo, a be tomu dolu nalo telabo na vio Korin bunu napano bogo napano amijog Pol kiano iliano nalo, mia nalo amoneaio, mia karina amila varueiano ealo.

⁹ Ana iorou kanio ea bogiano tai, ana Pol monmelio ana na mial Tubo mil banio, berinavo "Pol, jau komerou

re ka tomu nalo, mia jau kala bo ka ga, koto koverial kiaku iliano. Mia jau kala re ka napano tomu dolu nalo ala so koto melumu, ¹⁰ bior kiniou nojo bijaso. Mia ve re bunu toro tai ea komeli nei napano mia rijikia tukuso p̃eli na rijilso, bior kiniou be kiaku tomu nalo telabo ruei ea vio nei.” ¹¹ Ana na Pol naio joa vio nei bogo tebievi kija ga, ba bokar yuka vodolu a togio bereio, a bogo nonovio naio jom̃a berloglog Atua kiano iliano ban tomu nalo.

Kulo Ju nalo aburu Pol ban ea komeli

¹² Ana ea bogo na, parinio tubo na vio Romo naio bitirilar toro tai ka ve tubo na tanobuku reraio na kulo Kris nalo kialo, mia toro nene siano, Kalio. Naruei ea bogo na, kulo Ju nalo aberii abirakar ka monoka ala vite tai ka tokovio ka Pol ka naio rioliolu re bunu, naruei nalo aba abokar Pol, ana aburu naio ban ea komeli na Kalio nene kiano. Naruei kulo Ju nalo aberial ka Kalio bija kiano natibureano juo, nalo aberinavo ¹³ “Toro nei, naio jom̃a milavonio ka rivuru tomu nalo ka aya abolkouo van Atua ea m̃arabo nalo tai napano maka rimemedu leleio ea tivelinio na kene-memi tuboiano.”

¹⁴ Ana na Pol naio jom̃a jidomii ka sian kiano verdopeiano ea kialo iliano nei naruei, mia naio maka ril vo, ana na Kalio nei monkoyo, mil kija ban kulo Ju nalo. Naio ber kalo, berinavo

“Kulo Ju nalo, verenio kamiu kuverii ka kiniou ka toro na naio mila bajago nalo napano abova laka, p̃eli na naio mue toro tai, p̃eli na naio bina, p̃eli na titai tibe na, mo bo ka kiniou naiagago ka kamiu. ¹⁵ Mia venia napano kuberenio, mia nemijog jibe ka maka ve titenia leleio, be vite kurano ga ea tivelinio na kenemiu tuboiano na kamiu kulo Ju ga. Verenio tibe na, ana na mia kamiu ga kuvitiio, kiniou maka nasaaro ka neiagago ka vite nalo na p̃eli na nala tibureiano tai riviorio.”

¹⁶ Mo ea iliano nalo nei mia naio mijil bulaglo den kiano komeli bereio. ¹⁷ Naruei vite nei mila tinielmimi lie vo, mia bogo napano aba tavio, abokakar natukamuano vou na kialo yimo na volkouano, napano siano Sostinis, naruei ajuk niegeniege naio ea ga m̃aratavo na komeli nene. Naruei Kalio naio jo bitiio, mia naio maka rialerinio eaio, naio maka rila titai leleio ka nalo nei.

Pol naio jo yako Eveso, karina ban bereio Antioko

¹⁸ Mia iorou ka nina, ana na Pol jo bogo tebievi lie bereio vo naliko kuruado nalo na vio Korin, ana iorou kanio ana naio jaluvo denlo, jidom rivan bereio Siria, ana ea bogo na, Prisila naio Akuila, abe juo naliko naio. Naruei nalo abajou koyou ea tei, ea komeli na vio Kenkria, naruei ea vio na,

ana Pol berenio avuron vijinio. Nina bior naio mila verikariano na tai jikili bija Atua beamu ruei, ana von-ganei vite nonovio na ea verikariano nei abiniuviniu ruei, ana nalo aburon vonga vijinio ea bogo nene. Ana nalo abavin ea uako tai, napano naio jo ban ea vio Eveso. ¹⁹ Mia bogo napano abinimei aboru Eveso, ana na nalo abauro, naruei ana Pol naio berenio mia Prišila naljuo Akuila nalo atu aimau ea vio na beamu vo. Mia naio juvan naljuo, ba joomo ea yimo na volkouano na kulo Ju nalo kialo ea vio nei, a mila iliano telabo bijalo. ²⁰ Nalo ajaaro ka ajukunu naliko Pol, naruei nalo ajidom ka naio to kija rivijalo ka amijikia ail lie vo vijaio, ²¹ mia Pol naio ber kalo, berinavo “Siva tanea, mia kiniou monoka navan bereio ea vio Siria beamu vo. Mia verenio Atua kiano tiiano, mia kiniou nemei ea kamiu bereio ea vio nei Eveso vesiou re.” Naruei naio takurano jumolu den nalo nei, ana midu uako ban bereio.

²² Mia bogo napano naio binimei bereio-o boru Siria, naruei bauro ea bulukomeli na vio Sisiria, ana na ba bavin Yerusalemo. Karina naio ba miyotuba ka taara na namoneano nalo, mia iorou kanio, ana na naio batove bereio yako Antioko. Nina naruei ana na Pol mila nonovio kiano burumara ieliano valuo nei.

Pol naio miel bereio, ninei be kiano varolu nene

²³ Ana na Pol naio jo yako Antioko banbano-o, bisi na naio juvan vio nene bereio, ban bereio ea komeli dedade nalo na tanobuku na vio Kalesia bija Vrijia. Naio jel ea komeli nalo nei vaarakurano ruei, mia naio ban ealo bereio ka rijai naiagagoano nalo ka atu sikili lie vo.

Apolos naio mioliolu ea vio Eveso bija vio Korin

²⁴ Mia bogo napano Pol naio maka rimej rivoru bereio Eveso vo, mia toro Ju tai binimei ea vio nei, naio be toro na burumara komeli yako Aleksadria. Toro nei, siano Apolos, naio be toro tai napano pariparinio bo laka, napano mijikia iliano nonovio napano jua Vivitauiano Lu nalo, a naio be toro tai namia mioliolu bo-o mia bo. ²⁵ Nalo aberloglog naio batitig ka Tubo kiano mmarabo ruei, naruei naio mijamo ka kiano meuliano vodolu ka mia ma rioliolu peli na riverloglog vatitig tomu nalo ka vite nalo ea Yesu. Mia vite nonovio na ma naio joma berenio naio kirimemedu laka, mia vite takurano ga, naio maka rijog vo ka napano tomu nalo monoka avaruei ea Yesu siano, naio mijikia ga varueiano napano Jone Baruei milaio jukamu nua beamu. ²⁶ Mia bogo napano naio joma ba mioliolu joomo ea kulo Ju nalo kialo yimo na volkouano, mia naio maka rimerou kalo, maka rialerinio. Mia bogoti tai, ana na Prišila naio Akuila, abe juo amijog ka napano

naio joġna mioliolu jibe na, naruei amijog lubar ka toro nei maka rijikia batitig vite nalo nei tealo vo ea mġarabo na Atua kiano, ana na nalo aburu naio aberloglog vatitig naio ka vite telabo bere vo.

²⁷ Ana iorou kanio, Apolos naio jidom rivan ea kulo Kris nalo kialo vio yako Akaia, naruei banalo na yako Eveso nalo aberinavo bo laka verenio rivan tibe na, naruei nalo abivitauija mġesi tai ban naiagagoano nalo yako ka mia Apolos naio mijikia ridukario rivano, ka rila nalo asaaro ka avurukar naio to rivijalo. Mia bogoti napano naio bano-o bokar vio na, naio miija vatitig nalo napano Atua kiano tiniememiano milalo amonea ruei. ²⁸ Naio mijailo napano ea tomu nalo miralo, naio jilogloglo ka jumġabe ana kulo Ju nalo amilaluv mġarabo, bior naio ber meravo ka iliano telabo napano ajua Vivitauiano Lu napano aberenio meravo vatitigio ka Yesu naio be Naverikariano riano. Ana bogo napano kulo Ju nalo amijog kiano verloglogiano nei, nalo maka bunu ajikia aver titai bereio.

19

Pol naio joa vio Eveso bereio

¹ Naruei bogo napano Apolos naio ba jo kia ga Korin vo, mia Pol naio jo miel jel ea kiano mġarabo

napano jel ea tanobuku na mave ea suku nalo, naruei naio jakii mġarabo nene banbano-o binimej boru Eveso. Naruei ea vio na, naio bano-o miyotuba ka taara na telisu na naia-gagoano nalo kialo napano nalo aju, ² ana bogoti tai, ana na naio bika denlo, berinavo “?Mia bogoti napano kamiu kumonea Yesu, mia kumijev Niununo Lu rimej ea kamiu ka bogoti na, peli na maka kuvijevio?”

Naruei nalo aberdoġe, aberinavo “? Ana Niununo Lu na vabe na? Kumemi maka lele nuvijog kija vo ka be titai jibe na.”

³ Ana na Pol naio bika denlo bereio berinavo “?Mia bogoti napano abaruei ea kamiu, mia kamiu kumial ka sano nene be venia?”

Naruei nalo aberdoġeio, aberinavo “Abaruei ea kumemi, numial jibe ka ga varueiano nanua Jone naio joġna milaio.”

⁴ Ana na Pol naio berloglog vatitiglo, berinavo “Nao, nina bo ga na, ana varueiano napano Jone naio joġna milaio nua ban tomu nalo, naio jibe ka kijokijo ga tai ka ber ka tomu nalo nei abiliglo ruei, mia nina maka riverenio ka tomu nalo nei amonea Yesu ruei na. Mia Jone naio mijikia vite nei bunu, bior ka napano naio binimej jukamu, mia joġna ber ka tomu nalo berenio monoka amonea nana mia naio rimej iorou kanio, jibe ka Yesu.” ⁵ Mia nalo na

vio Eveso amijog Pol kiano navervisivisiano nei, mia amial bo laka ka avokar varueiano ealo bereio, ana na nalo abaruei ealo ea Tubo Yesu siano. ⁶ A ka bogoti na, ana Pol naio jokol pariparilo, naruei Niununo Lu binime i ealo, mila ana nalo ajum̃a amijev ka iliano dolu nalo, a mila bunu ajum̃a aber bulavulag bunu iliano tealo napano m̃a Atua jian banlo. ⁷ Ea kialo taara na telisu nei, mirano nene titai jibe kanio duelimo ba juo [12] ga.

⁸ Naruei Pol naio jo Eveso siberio tolu [3] bereio, mia bogo nonovio naio jom̃a ba joomo ea kulo Ju nalo kialo yimo na volkouano, mia mila iliano telabo banlo. Mia bogo tai na maka rialerinio ealo, mil kirisikili banlo, bogo tai bilvili ealo, a bogo tai jegidu kalo ka mia nalo amei jouro ea Atua kiano navenatuboiano. ⁹ Mia naio mila jibe na banbano-o, mia mial ka napano bijuku deio, bior nalo pariparilo kirisikili ga, mia nalo maka asidomii ka amonea leleio. Ana nalo tealo ajum̃a aberii niegeniege lelan Marabo Vou nei ban kulo dolu nalo joomo ea yimo na volkouano nei, ana na Pol naio jumolu burubulag bereio naiagagoano nalo, ajaluvo den kulo Ju nalo nei, mia legiano nonovio nalo aba abior a amioliolu ban tomu nalo na ea yimo na teninio na toro nei Tireñas kiano. ¹⁰ Nina, Pol naio jom̃a milala jibe na banbano-o bokar yuka juo [2] bereio,

naruei mila ana tomu nalo na burum̃ara tanobuku nei Esia, kulo Ju nalo naliko tomu dolu, nalo nonovio amijog Tubo kiano iliano.

Tomu tealo abolkouo ea Yesu siano amilaluvio

¹¹ Ana bogo napano Pol naio jom̃a miñau jibe na yako Eveso, mia Atua miñau ea naio, mila burutomoluo na tortoru nalo telabo ka rijai tomu nalo. ¹² Mia verenio niat̃i kulum̃arauo na telisu tai, p̃eli na soto tai, mia tomu nalo abario ba ban Pol bu veveio jukamu vo, bisi ana abar bano, aburu ea tomu namieiano nalo niabelo, mia kulum̃arauo nalo nei amijil bulag kialo mieiano nalo, p̃eli na niununo va nalo napano ajualo.

¹³ Ana ka bogo na, kulo Ju tealo bunu aju ajanea tomu nalo, aju amijidig bulag niununo va nalo denlo. Nalo nei maka amonmonea Tubo Yesu, mia bogo napano amijog ka napano Pol miñau jum̃abe, mia nalo bunu ajidomii ka mia ala vonio ka mia aim̃au ea mo-roano na sio nene. Mia bogo napano amijidig bulag niununo va, amil banio, aberinavo “Nuber kaso memedu ea Tubo Yesu napano m̃a Pol jom̃a mioliolu kanio, ka jau kataluvo den toro na.”

¹⁴ Ana be bogo tai, m̃eaku nalo tealo bunu ajidom ala vonio tibe na. Nalo na, nalo kiritete aluo na toro tai na be parinio toro lu ka kulo Ju nei, napano siano Skeva. ¹⁵ Naruei nalo nene abinime i abolkouo ka toro

tai napano niununo va joaio, naruei amil ban niununo va nei ka taluvo denio, mia niununo va nei naio tinien jerlo, berinavo “Mo, kiniou nemijikia sio na Yesu, a nojo nemijog sio na Pol bunu, mia kamiu kenia? ! Kiniou maka lele nejikia kamiu, kamiu kuvitika kamiu vo!”¹⁶ Mia kolvare ga, toro nei biako binime ealo, midonilo bano-o jovulu nalo aluo neibano, mila niegeniege tanealo napano mijede bulag nonovio m̃alo kuluñarauo nalo. Naruei nalo aburo den vio nei napano amijeljel lulua ka salo burukija naruei.¹⁷ Naruei tomu nalo aberii vite nei bano-o bokar Ju nalo naliko kulo dolu nalo, mila na nalo na vio Eveso abiniu amijogio, mia vite nei mila ana nalo amemebiju kija, ana abamenea Tubo Yesu siano lie vo.

¹⁸ Ana iorou kanio, ana nalo telabo kalo napano vonganei abinimei abe namoneano nalo ruei, nalo abinimei aber bulavulag ka ajum̃a abar semei, a aber bulavulag vite nalo nam̃a ajum̃a amim̃aukanio ea burisolu nalo.¹⁹ Mia nalo tealoo napano abe tomu na burupati burisolu memedu, abarvar vite nalo nam̃a amim̃au bijaio, jibe kanio kialo niosi nene nalo binimeio vio takurano, naruei kamu ea tomu nalo miralo napano aju amialio ka bogo na, abuku nonovio ban ea sebi. Niosi nalo nei miroano laka, mia bogo napano ajum̃a ajidomii sano

puruveru nonovio nene nanua beamu abulu kanio niosi nene nalo, amialio jibe ka burutomoruo laka, jovulu taam̃aka [1,000,000] puruveru telabo laka.²⁰ Mia bogo napano vite nalo na jibe nei amalmaluvo, mia nalo aju amialio ka Atua kiano moroano mim̃au jikili laka, mia amialio ka napano Tubo kiano iliano jom̃a mikulkulu ba buru tomu ta bunu lie vo ea vio nonovio.

Siniabu toru ea vio Eveso

²¹ Mia Pol bitilubar ka Atua kiano im̃auano jo bavin, ana mijog ea naio ka monoka rim̃au rivan lie vo, ka mia selivivi rivitii veve bereio tanobuku nalo na vio Masetonia vija vio Akaia, yako Kris, a karina, mia naio riva Yerusalemo bereio. Ana naio berkario bunu ea bogo na, berinavo “Mia iorou ka napano kiniou navan bereio Yerusalemo, mia monoka neiel bereio navan lie vo, monoka najaka-o novoru Romo.”²² Mia naio mial ka mia naio monoka to bogo ve telisu kija bereio beamu vo ea tanobuku na vio Esia vija burum̃ara komeli nene nei Eveso, naruei kiano tomu juo na ijaiano nei, Timoti naljuo Erastas, naio miilalo ajukamu aban ea vio Masetonia.

²³ Ana ea bogo na, napano Pol naio jo kia ea vio nei Eveso vo, ana burum̃ara siniabu tai jumolu tivelinio ka Marabo Vou na Yesu kiano.²⁴ Vite nei, burupati nene napano kulo Eveso, aberenio kanalo atua, naio

be tira tai, siano Ateses, a nalo ajum̃a abolkouo ka kanano burum̃ara tavoru na ea burum̃ara yimo lu na kanano. Mia toro tai na vio na, siano Timitrias, naio buru tomu telabo abinimei amim̃au kiano, napano ajum̃a amim̃auka kiri tavoru sesa nalo na yimo lu na atua na tira nei kanano, nalo amim̃aukanio ea verumera, ana tomu nalo ajum̃a abulu denio, napano mia naio naliko kiano tomu nalo abar tanea puruveru miroano biorio.

²⁵ Ana iorou kanio, naio mial ka napano im̃auano na m̃a Pol jom̃a milaio naio jom̃a muedom kanano im̃auano nei ruei, ana bogoti tai ana naio bio ban kiano tomu nalo, naliko tomu dolu nalo napano ajum̃a amim̃auka vite nalo ea verumera, naruei bogo napano nalo abinimei vio takurano, mia mil banlo, berinavo “Mo, tomu nalo, kami kumijikia ruei ka kito roju romeul ea ga kanado im̃auano neibano m̃a kito rojum̃a romim̃auka vite nalo ea ga verumera. Im̃auano na ga mila ana kito rojum̃a rabar kija puruveru. ²⁶ Mia neber p̃eli kami kumijog ruei, p̃eli na kito tai romial ka mirado, ka napano toro nei Pol naio jo bilig tomu nalo kanalo jidomiano nalo aju abano be dolu. Naio jom̃a mila ea vio na, a jom̃a mila bunu ka komeli nonovio na burum̃ara tanobuku na kanado nei Esia, napano jom̃a berloglog

tomu nalo ka tavoru nalo napano m̃a jum̃ano toro ga mim̃aukanio, nalo maka ave atua riano leleio ga. ²⁷ Ana kiniou nemialio ka toro na kanano iliano na mia rila kiado im̃auano nei rivatove laka, ka napano mia tomu nalo asidom re bunu ka mia avulu vite nalo napano m̃a kito romim̃aukanio. Mia mave ka nina, kitoliko kulo Esia, a vija bunu tomu dolu reraio ea yetemeriba nei, rojum̃a romilotu ka kiado atua na bo nei Ateses, mia p̃eli toro na naio jidom rivuku lelan naio kovio, p̃eli na naio jidom rila kunuano lu rimei rive vite kurano ga tai kovio.”

²⁸ Naruei bogo na nalo amijog iliano nei, amila legleg tinielo ana mila tiniei mimi toru laka, mia ajum̃a amiaia ga aberinavo “Ateses na Eveso naio bo mia, naio ga takurano kito rojidoimio-ol” ²⁹ Ana na abitudu vatitigio, naruei aba amila burum̃ara uetubaiano ea komeli, ana aba abokar Kaias naljuo Arestakas, tomjuo na vio Masetonia napano naljuo ajum̃a amiel naliko Pol abinimei ajua vio nei, ana aburulo, ajikiti kalo aba joomo ea burum̃ara vio na vioriano na Eveso nei, mia kulo Eveso bunu aba naliko, abano amison vio nei bujo vatitigio.

³⁰ Naruei Pol jidom ka riva joomo bunu ka mia rilavonio ka ril van tiniobi nei, mia naiagagoano nalo na vio Eveso amerou ka mia aue beleaio, ana na aberbure

naio. ³¹ Mia tomu na tortoru tealo na mātatoko komeli na kulo Esia kialo, nalo amila bilbilu bo naliko Pol, naruei nalo bunu amiila toru binime, abika jikili den Pol ka mia naio rivan re joomo, mila ana naio maka bunu rivano bereio.

³² Naruei joomo ea vio nei, tomu nalo aju amila burumāra māduano, nalo telabo amel vaarakurano, tealo amel ban jibe nei, a tealo amel be dolu, a nalo telabo maka lele ajikia ka nalo aju bior kar venia.

³³ Naruei kulo Ju nalo amerou ka mia tibe mā na averenio nalo naruei abe burupati na siniabu nei, ana na nalo amiyukular nalo tai, siano Aleksada, naio ba jumolu jukamu ea tomu nalo nei miralo ka rilavon ka ril vanlo ka tiniel ser re nalo kulo Ju nalo. Naio buku jumāno ka rila atu melumu ga, mia nalo be kialo jidomiano ruei ka aberiamā naio be toro na siniabu nei tai naruei. ³⁴ Ana karina, bogo napano abitilubar ka naio be toro Ju ga tai, mia māduano nei naio maka lele riva-tove, mia aju amiaga burutomoru ea tira na be kialo atua nei siano, amiaa ga amidu buron joolo kanio, aberinavo “! Kene-memi Atemes kumemi kulo Eveso naio bo-o! !Kenememi Atemes naio takurano ga bo-o laka-o!” Mia nalo ajumā amiaga jibe na ba bokar aura juo titai jibe na.

³⁵ Mo iorou kanio, ana tubo tai na vio Eveso nei naio jumolu jukamu ea

miralo, naio milavon ka amelumu bereio bano-o bisi, ana naio ber kalo, berinavo “Tomu nalo na vio Eveso, kito nonovio romijikia batitigio ruei ka kiado komeli nei naio be burumāra komeli tai, a naio be komeli lu tai. Kito naruei, rojumā robitikar yimo lu na kiado burumāra atua nei, Atemes, a romijikia ka kiado moneano be riano, bior nanua beamu, mārivitano tai mijoru, ana sano burumāra puruveru lu nei mijoru jel tiniabene binime, napano maka rijoru ea vio dolu, mijoru ea kito ga, naruei kito roju robitikario bo. ³⁶ Vite nalo na romijikia ruei ka aberiano ga, tomu nalo na vio dolu nalo maka ajikia aili lelan leleio. Verenio tibe na, mia bo ka kito ralavon ka rotu rivu damariga. ³⁷ Ana ea tivelinio na naljuo nei napano kamiū kuburulo abinime ei ea vio nei, kiniou maka nojog ka napano kuverenio ka aba abina ka vite lu tai ea yimo lu na kanado atua, pēli na amiolua siano, ana tibe na mia maka rejikia rala titai ka naljuo ea vio nei.

³⁸ “Mia verenio tomu nalo na amimāuka verumera nei, jibe ka Timitrias nalo, verenio nalo be kanalo veriiano kia navo ka ala ka tomjuo nei, mo, be kiado komeli nalo aju, mia be kiado natibureano nalo aju, mia verenio nalo aial ka tumābe ana amijikia avurulo ava ail vanlo ea sano vio nene.

39 Mia verenio kamiu ku-visidomii ka be titai kia nayo ka roviniiu rovitiiu bereio, mo bo, romijikia rovitiiu ga ea kiado viorian tai bereio.

40 “Nina, bior ka napano bajago namā rojuṃa romilaio banei, kito raba koalabo laka ruei na. Maka lele ve vite tai rimemedu ka napano mia kito romijikia rala buruṃara māduano nei riviorio, a verenio makan, p̃eli ana mia tomu na tortoru nalo na vio Romo mia nalo avuku kiō ea nalakoiano navo kario kiado inġauano nana banei nene.”

41 Mia bogo napano naio berenio iliano nei bisi, mia tomu nalo kanalo jidomiano nalo abavatove bo bereio ruei, naruei naio jetavoko iliano ana naio ber kalo ka nalo amijikia aieliel dedade bereio.

20

Pol miadu bereio ka namoneano nalo ea vio Masetonia bija ea vio Kris

1 Mia be legiano tealu bereio, bogo napano buruṃara māduano napano kulo Eveso nei nalo amilaio batove bereio, mia Pol naio bio namoneano nalo abinime i vio takurano, naruei naio jian iliano novo banlo ka atu sikili lie vo, naruei naio mil maariano banlo, ana juvanlo, ba Masetonia bereio. ² Ana ea vio na, naio ba miel jel ea kiano tanobuku nalo, mia ea vio nonovio naio jomā mijai tomu nalo ea kiano iliano novo nalo, ana iorou kano,

bavin bere Kris, napano bulukomeli labo nene naio be Korin. ³ Naruei Pol naio joa vio na bano-o bokar siberio tolu, naruei naio jo jidomii ka sel ea uako tai napano naio jo, ka mia rivan ea vio Siria bereio. Mia vaataro ka avuru veru, mia iliano boru ea naio berinavo kulo Ju nalo na vio na, ajuṃa amila jidomiano va tai ka ala van Pol ea bogo napano naio jo ban ea m̃arabo togio kia ga vo, mila ana naio maka bunu rivan ea uako nene, mia midu m̃arabo na tebievi, miel barlaka ba jeli-viv ea vio Masetonia bereio. ⁴ Ana ea bogo na nalo tealu napano abano naliko naio, jibe kano Sopata na vio Beria, napano Piras kenerinio, naliko Arestakas a Sekantas, naljuo na vio Tesalonaika, bija Kaias na vio Tepi, bija Timoti, a bija bunu Tikikas a Trovimas, naljuo na vio Esia.

Pol nalo aju yako Troas

⁵ Naruei nalo nei tealu kalo napano aju naliko Pol, nalo ajukamu aba aboru Troas. ⁶ Ana Pol naio iorou bano, mia kiniou Luka, nojusolo bereio ea vio Vilipai, a kumemi numila Jokoluolu Na Sinaniano Na Taba ea vio na. Bogo napano jokoluolu nei bisi, ana numisel ea uako, nuburo bano-o nubokar bogoti jumo, naruei nubinime i nuboru Troas, napano nalo napano ajukamu aju rorea kumemi eaio. Naruei kumemi nubiniu numitua

vio Troas bokar bogoti aluo [7].

⁷ Ana ea Legiano Lu, bogo napano mērenio batove bisi, jibe ka napano legiano na be moti na bogoti aluo jikario naruei, kumemi nubior kumemi liko namoneano nalo na vio na, nubolkouo a nubure kokorovio joko lu. Naruei Pol naio jidomii ka ber mia nuvituvan kavijova kia ga vo, mia bior ninei be vioriano na maariano kumemi liko, be iliano telabo, mila Pol bunu mil vio tebievi, ba bokar bogiano viovare vaarakurano. ⁸ Naruei ea bogo nei, kumemi numitu nubior ea vajoomo tai mave ea vio vodobi tolu, mia tomu nalo abar yulu telabo binime, ana mila vio bituvitunu toru laka joomo.

⁹ Naruei mēaku tai, siano Yutikas, naio jomā jotano ea bulukujegi, mia bogo napano Pol jomā mioliolu jiou bano-o, ana mēaku neibano mirano jouo mia mirano jouo. Naio mila jibe na banbano-o monmelio bobogu naruei, mia amiilo kanio naio mijoru ea bulukujegi nei, mijoru batove tavio ban manenea naio ea borotano. Vio nei naio jo laka mave, naruei bogo na ajikiti abatove, abokar naio, mia amialio ka napano mīaro ruei. ¹⁰ Mia Pol bunu batove ka rial naio, naio mon korkoro ba tove, miabukario ka jumāno be juo, naruei naio ber kalo, berinavo “Kamīu kuvijog rivova re, kuvitigio re, vonga

nei kiano meuliano binime, ea naio bereio ruei nei.”

¹¹ Ana na Pol nalo abavin bereio, ana nalo amijev Sīniano Lu nei, karina na nalo ajinan, ana iorou ka nina, ajukunu bereio bano-o viomijeni konlo, ana na Pol juvanlo bano. ¹² Ana tivelinio ka mēaku nei, nalo aburu naio meul batitigio bereio jo naliko aba vonuo, a nalo amijog bo toru laka ka napano Pol mila batitigio mēaku nei banlo.

Pol nalo ajua mārabo ka avan bereio

¹³ Mia Pol naio ber ka kumemi ruei berenio nuvitukamu nuvisel ea uako, nuva nuviturorea naio ea komeli na vio Asoso, mia naio rime, iorou, riel ga sel uro. ¹⁴ Naruei kumemi nubano nuboru Asoso, karina naio binime, iorou, binime mave ea uako, naruei kumemi nubiniu nubano nuboru ea bulukomeli na vio Maetilin ea uleule sesa tai.

¹⁵ Karina, kumemi nuburo-o nubokar legiano takurano bereio, mia nubauro numijaka ea uleule sesa tai bereio, siano Kiosi, a iorou kanio nina, ea legiano dolu nene, kumemi nubinime, nuboru ea uleule sesa na Samoso, mia legiano dolu nene bereio, ana nuboru ea komeli na vio Maelitas ea tanolabo, naruei nubauro ea vio na. ¹⁶ Ea bogo na, kumemi nubarlaka ga ea vio Eveso jibe na, maka nuvauro eaio, bior Pol naio mial berinavo maka rivu ka kito rodu bogo ve

telabo laka ea tanobuku nei na vio Esia, bior naio jo jidomii ka verenio nuvijikia nuvila, mia bo ka nuvoru Yerusalemo rimemedu ka bogo na Jokoluolu na Yuvi.

Pol naio joa vio MaELITAS, naio mil maariano ban navuriñaraboiano nalo na vio Eveso

¹⁷ Naruei ea vio MaELITAS, Pol miila toru ban ea vio Eveso, berinavo navuriñaraboiano na nalo-tuano nalo amei aial naio.

¹⁸ Naruei iorou kanio ana nalo abinimei, ana Pol berial kiano iliano na maaro banlo. Naio ber jibe nei, berinavo “Kamui, kamui kumijikia batitig kiniou bo ruei, napano jikar ea bogo napano nebinimei be moti garuei ea kiado tanobuku nei, na vio Esia, binimei bokar vonganei, kiniou nojo bija kamui bogo tebievi ruei. Mia kumijikia batitig kanaku bajago bunu a kanaku irñauano nalo na Tubo kanano napano ña nemilaio ruei. ¹⁹ Kamui kumijikia ka irñauano nalo na, nojomã nemilaio napano kanaku jidomiano melumu ga, a nemilaio ea jogumiraku, a nemilaio bunu ea bogokouo naio napano kulo Ju nalo amila ban kiniou, napano miyotuba ea kialo tiniemimiano nalo kar kiniou. ²⁰ A kamui kumijikia batitigio bunu ruei, napano iliano nonovio napano memedu ka averenio, napano mijikia riija kamui, iliano nalo na

maka noimou ka naverialio van kamui, ðeli na maka nemerou ka neverloglog kamui kanio, nina ea bogo nalo napano kito rojua vio medave bija tomu telabo, ðeli na ea bogo nalo napano kiniou nojomã nemiel jeliviv ea kunuemi nalo. ²¹ Mia kiniou nemil ban kulo Ju nalo ðeli na nemil ban nalo napano maka ave kulo Ju, mia maka neialerinio, mia nojo nejikili kalo, neberial banlo, neberenio nalo nonovio monoka aviliglo amei ea Atua, monoka amonea kiado Tubo Yesu Kristo.

²² “Mia vonganei, kiniou nojo naban bereio yako Yerusalemo, mia maka nejikia venia mia kulo Ju nalo ala van kiniou ka bogo napano mia novoru ea vio na, mia nomijog lubar ea kiniou ka Niununo Lu naio jomã buru kiniou jibe na, naruei monoka navan ga.

²³ Mia Niununo Lu naio jomã mila kirimeravo ban kiniou ruei ka napano ea bulukomeli nonovio nalo napano mia notomã navan ealo, mia monoka novokar bogokouo nalo, mia tomu nalo aju rorea ga ka mia avuku kiniou navan ea nalakoiano. ? Tenene na kiniou nemial ka ver kiniou navan yako Yerusalemo, ðeli mia tibe na ga bunu bo?

²⁴ Mia naio bo ga na, bior napano maka nevitii kanaku meuliano naio rive vite tai, ðeli na mokotenaku, ka monoka nesidomiio ñelea,

ṗeli ga. Mia kiniou nejidom titai takurano ga, ka mia nemijikia novuro ga rivano-o mia novokar juluvati na im̃auano napano Tubo Yesu midu joaio jum̃aku, ka napano monoka neverial Ioluanu Vou na Bo na Atua kiano na tiniememiano ea vio reraio ga.

25 “Ana vonganei, nemijikia bunu ruei ka kamiū napano nojom̃a najanea kamiū, napano nemioliolu ka Atua kiano navenatuboiano ban kamiū, nemijikia ka mia kamiū nonovio maka lele kuvijikia kuvial miraku bereio bogo tai. 26 Verenio tai ka kamiū maka rudu Atua kiano iliano nalo ea kiano meuliano vo, napano m̃a neber ka kamiū ruei mia naio riva kovio, mia verenio naio riva kovio, kiano burukija ritoa naio, mia ritoa re kiniou, 27 bior kiniou neberial m̃arabo ban kamiū ruei, mia kiniou maka noduvan Atua kiano jidomiano leleio ka kamiū.

28 “Naruei kamiū navurim̃araboiano nalo, bior Niununo Lu bitiri bulag kamiū javukia tomu nalo na m̃a abitikar nunu nalo na Atua kiano nalotuano nei, napano naio bulular ka burukija na kenerinio kanano, naruei kamiū monoka kuvitikar vatitig kamiū, a monoka kuvitikar vatitig nalo na. 29 Nao nejidom never ka kamiū, bogo napano ka mia kiniou nataluvo den kamiū bisi, mia nemijikia ka mia kuli deden nalo amei, aser niege-

niege lelan kenemiū nunu nalo, mia nalo ala von ka ala dedade ealo, ava aveve terakurano. 30 Mia kiniou nemijikia never bunu, ka mia iorou kanio, mia kamiū tomu na tortoru tai ka kamiū ga, mia nalo atumolu, mia aver ilivovuiano na sibiano ve telabo, ka ala von ka avuru bulag naiagagoano nalo ava atakisorlo ga. 31 Tibe na, kamiū monoka kuvitu vatitig, a monoka kuvisirarago vatitig rivu, a monoka kuvisidomial ka kuvim̃au kouo tibe ka napano kiniou nemilaio ka bogo napano nojo bija kamiū bano-o bokar yuka tolu momou, napano bogo nonovio, ea legiano a ea bogiano, nojom̃a neberloglog tomu nalo, a neberial Atua kiano iliano memedu banlo, bano-o mia jogumiraku m̃a jibirbili biorlo.

32 “Mo vonganei, maka bunu toa jum̃aku ka mia nevitikar kamiū, mia nomidu kamiū kumitua Atua jum̃ano ga. A nobolkouo ka mia lilianiano Vou na Bo na tiniememiano na kanano, mia naio tom̃a rijai kamiū, rila kamiū kuvitu sikili, a rila ka mia kamiū bunu, kamiū kuvijikia kuvav ilivuiano maraiū nalo napano mia Atua rivar iorou van kiano tomu lu nalo.

33 “Mo nejidom kamiū monoka tiniemiū rimaio ka bogo napano kiniou nojom̃a na kitoliko, kiniou nojom̃a nemim̃au jibe na ga, a kiniou maka neyabar ka kenemiū saba novo nalo na jibe kanio

kenemiu puruveru nalo, ħeli na kenemiu kulumġarauo nalo. ³⁴ Mia maka neverenio ka mia kuvitkar kiniou ka saba nalo na, mia kiniou ga nebitkar kiniou ea iġauano na jumaku be juo nei, mia nebitkar bunu nalo napano ajumġa amimau bija kiniou ea bogo nei. ³⁵ Naruei ea mġarabo na, a ea bajago dolu nalo bunu, kiniou nejiloglog ka kamiu, neber bo ka kito roimau kouo ka rajai tomu nalo napano amelukluku a abijukude, bior kito monoka rosidomial Tubo Yesu kiano iliano tai, napano berinavo ‘Verenio jau kovokar kiamo ijaiano tai, mia kojog rivu, mia verenio jau kesian ijaiano tai rivano, mia kojog rivu ve toru lie, ilivuiano naio toaso.’”

³⁶ Mia bogo napano Pol naio ber iliano nei bisi, ana nalo aminie, naruei naio bolkouo nalikolo. ³⁷ Mo nalo ajikar ka aġegi naruei, mia abanjumġalo naliko Pol, ajakia naio amijubaluba naio-o mia, ³⁸ bior nalo ajumġa ajidomial kiano iliano tai ga, napano ber mia aial mirano re bunu bogo tai. Kiano iliano nei naruei mila ana nalo amiel naliko, amiven binimej bereio ea uako napano kumemi numisel eaio.

21

Luka berii ka naio naliko Pol nalo, aba aboru Yerusalem

¹ Ana kumemi numituvan nalo ajua vio nei Maelitas, ana nuburu mġaaja, nubano

memedu ga nuboru ea uleule sesa na Kos, ana numon ea vio nene. Viomijeni kavijo, ana kumemi numituvan vio bereio, nubano-o nuboru bereio ea uleule dolu na Rotis, ana numon bereio, viomijeni kavijo, ana nubano bereio, napano nuboru ea bulukomeli na Patara ea tano labo. ² Ana kenememi uako nei naio ba boru ga ea vio na ga, ana numitabulu nubauo. Ana bogo napano numileal bereio uako dolu tai napano ban yako Vonisia, ana nubavin eaio, ana aburu mġaaja, ana numitua kenememi mġarabo bereio. ³ Kumemi nubano ga jibe na ea burumġara tinia tei na toru, ana nubitkar ga burumġara uleule na Saipras, ana numituvan joa kenememi va mal ga, ana nubano-o ka mia nuvoru ea tanobuku na Siria napano numisidom ka nuvan eaio. Uako nei naio bar togogo nalo ka riva tuvanlo ea bulukomeli na Taia, ana bogo napano nubano nuboru ea vio nene, ana nubauo eaio. ⁴ Ana nubano numisirav naiagagoano nalo ea vio nei, ana iorou kanio ana numitu kumemi liko bano-o bokar legiano aluo [7]. Ana ea bogo na, nalo amial napano Niununo Lu jiloglog nalo napano mia tumġabe ka Pol yako Yerusalem, ana amil banio, tinielo ka averbure naio ka mia naio rivan lie re ka mia naio rivokar vio nei. ⁵ Mia Pol mijog ea naio, ber ħeli ga, monoka naio rivan ga, ana iorou kanio,

kumemi nuban bereio ea kenememi māraḃo. Ana ea bogo na, sumano nalo a tire nalo naliko kiritete nalo, amiel kumemi liko nuba tavio ea kanalo bulukomeli, ana amiven kumemi nubatove bereio ea kenememi uako. Ana kumemi nubiniu numinie ea bayono, ana nubolkouo ka kumemi, bisi ana nubanijumememi kalo. ⁶ Ana nubavin bereio ea kenememi uako, ana nalo aban bereio aba vonuo.

⁷ Ana kumemi numituvan vio Taia, ana nuburo nuba ea māarkomeli na vio Tolimeas, ana ea vio na nuba nubitavo bija kuruado nalo, numitu kumemilikolo ea ga legiano takurano nei. ⁸ Ana kavijo, naruei numituvan vio nei bereio, ana nubinimei nuboru ea bulukomeli na Sisiria, ana ea vio nei naruei, nubauo nuba numitua toro na Lilianiano Vou na Bo nei, Vilip, kunuano, napano naio naruei naio be nalo aluo nei tai napano abitiri bulaglo beamu ka aija imāuano, nene yako Yerusalemo. ⁹ Ana Vilip nene, kenerinio vevinio nalo veri aju vonuo, nalo maka asoro vo, ana nalo nei, bogo telabo Atua jomā jian iliano banlo, ana nalo aberialio ban tomu nalo. ¹⁰ Ana kumemi numitua vio nei kumemilikolo ka legiano tealoe ruei, ana naverialiano tai juvan vio Yutea binimeirove ea vio nei, toro nene siano Akapusi. ¹¹ Ana naio binimeiea kumemi, jidom

mila tovorovo tai van Pol, ana bar Pol kiano kulumārauo tai, mēnkar jumāno bija jaano kanio, ana berial, berinavo “Niununo Lu berenio berinavo “Toro napano kiano kulunārauo nei, mia kulo Ju na vio Yerusalemo, mia aiorikario tavukia ga, naruei iorou kanio, ana ala naio rivan ea nalo napano maka ave kulo Ju nalo jumālo, napano mia ala searo vanio.” ¹² Naruei ea bogoti napano kumemi numijog iliano nei, kumemliko nalo napano aju ea bogo na, nubitig Pol, numisikili ka naio nuberbure ka naio ka maka rivu ka rivan bereio mave yako Yerusalemo.

¹³ Ana Pol berdoḃe ban kumemi, berinavo “Ee, tomu nalo, kamiu kumitumā kumiteg jibe na, mila nemijog jibe ka mia kiaku iviso rivurkokorovio ga. Mia vite nonovio naio bo ga, verenio nalo na vio Yerusalemo adu kiniou notoa yimo na nalakoiano rivior Tubo Yesu siano, nina naio bo ga na, ana verenio sikili ga tibe na rivano-o mia namāro, nina kiniou najaaro ka ga.”

¹⁴ Ana kumemi numilavon ka nuver-bure naio tibe na-o mia nuberbure deio ga, ana nuberenio ga, nuberinavo “Bo ga, mia monoka tibe ka ga na Tubo naio jidomio.”

¹⁵ Ana kumemi numitu legiano tealoe bunu ea vio na Sisiria, naruei iorou kanio, ana numila batitigio kenememi basaro nalo

bereio, numituvan vio nei, ana numiel nubavin yako Yerusalemo. ¹⁶ Ana na naiagagoano nalo tealo na vio Sisiria ajakisor kumemi bunu ga, ana bogo napano nubinimei nuboru Yerusalemo, ana aburu kumemi nuban ea toro na vio Saipras tai kunuano, ka napano mia nuvitu kumemliko. Toro nene, naio bunu be naiagagoano tai napano be moti, napano nalo amonea Yesu garuei jukamu, a naio siano, Nasono.

Ea vio Yerusalemo, Pol ba mial Yemesi

¹⁷ Ana bogoti napano kuruado nalo amial kumemi nubinimei nuboru bereio ea vio Yerusalemo ruei, mia ajaaro toru laka. ¹⁸ Naruei numon, viomijeni kavijo ana kumemliko Pol, nubano numaluvo ka Yemesi, ana navurim̃araboiano dolu nalo na nalotuano na vio Yerusalemo bunu naloaju ea bogo nei. ¹⁹ Ana nubanjumememi kalo, naruei Pol mil banlo, naio berial vite nonovio beve terakurano napano Atua milaio ruei, miyotuba ea im̃auano na kanano, nina ea nalo napano maka ave kulo Ju, napano naio jom̃a ba jeliviv ea kanalo vio nalo.

²⁰ Ana bogo napano nalo amijog veriiano na Pol nei kanano, ana mila nalo amijog bo laka, ana amiaia Atua biorio. Mia ka bogo nei, be iliano nalo telabo bunu yako Yerusalemo, napano kar Pol, ana nalo amijikia vite nei,

naruei aberii ka Pol, aberinavo “Tavaliki Pol, jau komijikia ruei ka ea vio nei nalo menu tealo napano amonea vonga, nalo abe kulo Ju ga nalo, a jibe kanio napano jau komijikia, tomu nalo na jibe na amijikia atumolu atu sikili laka ea kiado tuboiano moruo nalo. ²¹ Mia nalo amijogio ruei, ka napano tomu nalo ajum̃a aberverisiko kirivova, aberenio jau konom̃a koberloglog kiado torogio nalo kirivova napano ajua buruvenuo dolu laka yako. Aber jau kojo koberloglog searialo, kober bo ka atuvan tuboiano na Mosis kiano vija kiado bajago moruo nalo, a bo laka ka alare bunu pakuveu ea kenerilo nalo. ²² ?Ana mia kitorala vaio naruei, bior iliano nalo nei amila nalo tiniel jerso m̃ele ruei? Ana vonganei, mia vesiou re, ana mia monoka ajog bunu ka jau kobinimei kojoa vio nei ruei. ²³ Mia bo ga, jau kala ga tibe ka napano kumemi nuv-erenio ka jau, bior numileal m̃arabo tai ruei napano mia jau komijikia kala ka mia koue bulag kialo tiniemimiano nei. Mia monoka kala tibe na: ea vio nei, be kene-memi tomu nalo ver napano beamu, nalo amila verikariano na jikili tai ban Atua, aberenio mia aveli ka vite tealo nalo rivano-o rivokar bogo na jibe nei. ²⁴ Ana beni, naio be kanalo bogo ka monoka avan ea Atua Kunuano Lu, ka ala vite nalo ea tivelinio na kanalo verikariano nei, jibe ka volk-

ouano nalo, bija ijaiano na meravo, a vite nalo na jibe nei ka rila ana amijikia avuronbijiilo bereio. Ana numial nuber bo ka verenio jau bunu kavan rivijalo, jau kava koto vijalo ea bogo napano ala vite nalo nei, ana vite reraio ga nalo napano monoka avulu ea bogo nei, bo bunu ka verenio jau ga kovitiilo. Ana verenio kala tibe na, ana mia tomu nalo aial ka jau kobe toro tai napano kojo kajaaro ga ea tuboiano na Mosis kiano bija bajago nene nalo kia ga, ana mia ajikia iliano napano amijogio, napano beriiso, naio maka rive riano ga. ²⁵ Ana ea tivelinio na nalo napano maka ave kulo Ju, napano nalo amonea ruei, kito roberii vite nei nua ruei, ana kiado iliano napano robere-nio nanua ruei, ana kumemi nubivitaia ea mosi tai ba banilo rui. Kumemi nuberial banlo, nuber monoka nalo aveli ka sunbue nalo napano kulo dolu nalo amila sida kanio ban kanalo tavoru nalo ruei, a monoka asen re burukija, a asen re sunbue na temeul nalo napano sano ja maka riou kon vo, a mia monoka ala re bajago nalo napano bova, jibe kanio siakiano, ŗeli na siakaiano.”

²⁶ Naruei Pol ba mila jibe ka napano nalo aberenio, napano ea legiano dolu, ana naio buru nalo veri neibano, ba mila ijaiano na meravo nalikolo, a ba joomo

ea Atua Kunuano Lu bunu bijalo, ka rijogio verenio kanalo verikariano naio riva rivokar legiano ve vio, ana monoka asian kanalo ijaiano nalo veve terakurano ka verikariano nei ea legiano vaio. Ana aberenio legiano ve aluo [7] rivar laka, ana mia atikar ka ala vite nalo nene.

Abokar Pol jo joomo ea Atua kiano Yimo Lu

²⁷ Ana ea bogo nei, kulo Ju tealó aju joomo ea Atua Kunuano Lu napano ajumolu ea tanobuku na vio Esia, ana abinimei, ninei ea vio nalo napano Pol jeliviv ea beamu ruei. Ana bogo napano bogoti aluo [7] na verikariano na Pol nalo kialo vaataro ga ka riviniu, ana kulo Ju nalo neibano amial napano ka Pol jo joomo ea Atua Kunuano Lu. Ana nalo amila burum̃ara m̃aduano, aba abokar Pol, ana ajukunu niegeniege naio ban tomu nalo, ²⁸ amiaga ealo, aberinavo “!Ai, kamiú kulo Israel nalo, kuvijai kumemi ka toro nei! !Toro nei naruei naio ban ea vio nonovio, ana jom̃a berii niegeniege kito kulo Ju nalo, napano robe Atua kiano kulo lu nalo, a naio jom̃a berloglog niegeniege tomu nalo ber kiado tuboiano bija kiado Yimo Lu nei, maka ave titenia. A kumemi numijikia bunu ka naio buru bena tomu nalo tealó napano maka ave kulo Ju nalo, abinimei jouro ea tanobuku lu na Yimo Lu nei. !Naio binimei mila lelan tolu

na Yimo Lu nei, bo ka kito rala titai ka naio!”²⁹ Nalo aber jibe nei, aberinavo Pol buru toro tai napano maka rive toro Ju binimej jouro ea tanobuku lu, bior napano amial Pol tavio ea mġarabo ka napano naio miel naljuo Trovimas nei na vio Eveso, napano naio maka rive toro Ju, ana nalo aberiamġa Pol buru naio ba joomo.

³⁰ Ana nalo ajumġa amila jibe na joomo ea Yimo Lu, ana mġaduano nene naio ban ea vio nonovio nalo nei ea bulukomeli bunu, ana milaio ana tomu dolo nalo ajikiti abinimej. Abinimej naruei abokakar niegeniege ga Pol, ana aburu naio ba tavio ea Yimo Lu nei, ana bogo napano aba tavio kario, ana kulo lu nalo ajetavoko vatitig mġaratavo na tortoru nene nalo.³¹ Naruei bogo napano ajumġa aburu Pol ban ka ajidom ka auebinio rimġaro, ana iliano binimej bokar toro na toru na kulo na mira nalo na vio Romo napano aju yako Yerusalemo, berinavo burumġara mira judolu ga mijian yako.³² Ana toro na toru nene jumolu vaarakurano, bio kiano tomu nalo, naliko kanalo tomu na mira nalo, ana nalo ajikiti abatove ea vio napano ajumġa amila burumġara mġaduano nei eaio. Ana bogo napano tomu nalo amial toro na toru na mira nei binimej bokar vio nei, ana ajuvan Pol, maka bunu atukuio.³³ Ana toro na toru nene

binimej, mil ban kiano tomu nalo, berinavo ava avokar Pol, ana avivikar jumġano tivelinio rivan ea nalo tai a tivelinio ea dolo tai ka marimieni. Naruei naio bika denlo, berinavo “?Ana toro nei naio be kei? ?A naio mila venia ka kamiu?”

³⁴ Ana tomu nalo telabo ajumġa amiaga kokovio toru laka, tealoo aber jibe nei, tealoo aber jibe na, banbano-o mia toro na toru nei naio maka bunu rijikia rijoglubar iliano tai leleio ea tivelinio na vaio napano ajumġa ami-laio, naruei naio miila kiano tomu nalo berinavo avuru Pol rivan bereio ea kanalo burusio.

³⁵ Ana bogo napano ajumġa aban ea mġarabo sesa tai, ana mġarabo nene naio bujo ga ka tomu nalo napano ajumġa tinielo ka ajidom atuku Pol kia ga vo. Naruei tomu na mira nalo aburu ga Pol bano,³⁶ ana taara na tomu nalo aju iorou kanio abinimej, ajumġa abiovio kanio aberinavo “!Kuvuebin toro kirivova na a! !Kuvuebin ga naio rimġaro!”

³⁷ Ana nalo ajumġa abano, mia vaataro ga ka amei avokar mġaratavo na ka mia ava jouro ea burusio na tomu na mira nalo nei, ana Pol bika den kanalo toro na toru, berinavo “Novika denso, kajamo ka kiniou nevika titai denso vo.”

Ana toro na toru nei naio miilo ka Pol mil jel Krik banio, naio berinavo “!A, jau komijikia ga komil jelea Krik!³⁸ ?Jibe na, kiniou nejidom neverii jau kobe

toro Ijivi nanua maka vesiou ga ana milavon ka rila baravo, ana naio buru bulag tomu nalo menu veri [4,000] aban ea kanano taara na m̃a amuemue tomu nalo, mia nalo aburo abano ajuluku ea vio yauo? ?Jau naruei jau kobe toro nene, a?”

³⁹ Naruei Pol berdoŕeio, berinavo “Ee, makanio, kin-iou nebe toro Ju ga tai memedu nei, mia kin-iou nemijikia nemil jel ea Krik, bior nebe toro na burum̃ara bulukomeli na vio Tarsis, ea tanobuku na vio Silisia. Tenene na kin-iou nejidom nevika denso ka jau kajamo ka kin-iou ka neil kija rivan tiniobi nalo na beamu vo.”

⁴⁰ Naruei toro na toru nei naio mijamo, ana Pol jumolu ju mave, ana buk jum̃ano ber amelumu, ana abinime i amelumu batitig bo. Ana naio mil banlo, mil jel ea kulo Ju nalo kialo iliano ga memedu.

22

Pol mil ban nalo napano ajidom auebin naio riñaro

¹ Naruei Pol naio mil banlo berinavo “Banalo, kamliko teta nalo, kin-iou nejidom ka kami u kuvijamo ka kin-iou never bisivisii vatitig vite nonovio van kami u. Kami u kuviagago vatitig rivu ka kin-iou beamu vo.” ² Mia bogo napano amijog ka Pol naio joñ a mil banlo ea kialo iliano, napano mil jel Ipru, naruei nalo amelumu bo,

ana ajidom ajog kanano iliano.

Ana naio berenio, ber ³ “Kin-iou nebe toro Ju ga tai, jibe ka kami u, a kin-iou nemiyotuba ea komeli na vio Tarsis, ea tanobuku na vio Silisia. Mia bogo napano kin-iou telisu kia ga vo, nebinime i ea vio nei, ea vio Yerusalemo, a nomila kakario ea naverloglogiano na Kamiliel, napano kami u kumijikia batitigio naio ruei. Kin-iou nojoa jaano, naio berloglog batitig kin-iou ka tuboiano na kido tormoruo nalo kanalo, bano mia kin-iou bunu nomue jaano, nebinime i nebe naverloglogiano na tuboiano nene. A jibe ka napano kami u banei, kami u kumisidomii toru ka kuvila Atua siano rime i ve toru, kin-iou bunu, ea bogo nanua, kin-iou nemila Atua kiano im̃auano bija kiaku meuliano momou. ⁴ Ea bogo na, kin-iou bunu nebe toro tai napano m̃a tinieku jerlo laka napano ajum̃a ajakii Marabo Vou nei, napano kin-iou nojoñ a nejeliviv ka nesiravo nalo na m̃a aju ajakiio, ana kin-iou nojoñ a nobokakarlo, a nojoñ a nobukulo aban ea yimo na tetavokoiano, sum̃ano nalo a tire nalo. Ka bogo na, kin-iou nejidom ka nalo monoka am̃arm̃aro ga, a nejidom ka kialo m̃arabo nei naio ribisi soŕeli ga. ⁵ Mia vite nei, kami u kumijikia kuvika den parinio toro lu vija navuriñaraboiano na

kanano komeli, bior ka napano nalo amijikia batitig bo ka kiniou napano nemila jibe na. Ana ka bogo na, abivivitaui m̃esi tealo ka rila ka mia nemijikia nava nejili tomu nalo kario Marabo Vou nei ea kanalo vio nalo.

“Ana ka bogo tai, kiniou nomidu m̃esi tai jibe na, mia nejidom ka navatove yako Tamaskas ka novokakarlo ea vio na, ka noiorkakarlo ka marimieni a ka novurulo amei bereio ea vio nei ka mia kanado tomu na tortoru nalo aje vironiano vanlo.

6 “Ana ka bogo na, nojo nemiel nabano, mia legiano viovare, vaatara ka ga novoru Tamaskas, mia nemiilo ka napano kolvare ga burum̃ara miamoiano tai na vio mave mereralii vio napano nojom̃a nemiel eaio. 7 Naruei vite nei mila ana nomijoru nabatove ea borotano, ana nemijog iliano tai berinavo ‘!Sol, o, Sol, o! ? Bior venia ana jau kojo komila lelan kiniou jibe na ka napano jau komila na?’

8 “Ana na nebika denio neberinavo ‘?Ana Tubo, jau kobe keinia?’

“Ana kiniou nemijog mil ban kiniou bereio, berinavo ‘Yesu re Nasarete nene nei, napano jau komila bova banio, ninei be kiniou nene nei.’ 9 Naruei nalo napanoaju iorou ka kiniou ka bogo na, nalo abitakar burum̃ara miamoiano nene, mia nalo maka ajog joono nei napano jom̃a mil ban kiniou.

10 “Avona bisi ana nebika bereio, neberinavo ‘? Ana

Tubo, mia kiniou nala tum̃abe naruei?’

“Ana Tubo mil ban kiniou, berinavo ‘Jau kotumolu, keiel kava jouro ea vio Tamaskas ga, ana mia toro tai rimei riverial vanso im̃auano nalo napano kiniou nemije vatitigio ju ruei ka mia jau koiim̃aukanio.’ 11 Ana nemijog iliano nei, mia maka bunu nejikia neial vite, bior burum̃ara miamoiano neibano naio mila miraku miununu garuei, naruei nalo abokar jum̃aku ga, aburu m̃arabo ka kiniou jibe na, nubano-o nuboru Tamaskas.

12 “Ana na maka vesiou ga, toro tai na vio na naio binime i mial kiniou. Naio be toro tai napano be Atua kiano riano, a naio monmonea kanado tuboiano, a kanado Ju nalo na vio nei nalo amial naio jibe ka toro novo tai laka, mia siano be Ananaias. 13 Naruei naio binime i jikili ju vaatara ka kiniou, ana mil ban kiniou, berinavo ‘Kuruaku Sol, vonganei, neber ka jau miramo avu bereio.’ Ana ea auranene ga jibe na naruei, ana nemijikia nemial Ananaias nene mirano. 14 Mia naio mil ban kiniou bereio, berinavo ‘Atua Tomoru na korobido nalo kanalo, naio berkarso nua ruei, ka mia jau naruei komijikia kejkia kanano sidomivaniano na toru tai, a ka mia jau naruei keial kiano Toro Memedu, a kojog kanano iliano. 15 Atua naio berkarso ruei, ka mia jau kava koverial ka tomu nalo ea vio nonovio, ka vite

nalo na jau komialio a napano jau komijogio. ¹⁶ Mia vonganai ga, kito monoka rala vite tai beamu vo. Jau monoka kotumolu, kavaruai ea Yesu siano, naruei sio nei ga naio mia sekoni bulag nono kiamo kariano nalo, ana mia jau komei komer-avo ea Atua mirano.'

¹⁷ "Avona kario, ana kiniau nebinimeia ea vio nei Yerusalemone bereio, ana naban ea Atua Kunuano Lu, ka nejidom nobolkouo. Ana bogo napano nojomā nobolkouo, nemijogio jibe ka kiaku jidomiano ba kovio, ¹⁸ ana nemial Tubo mil ban kiniau, berinavo 'Jau kala soṑeli, kataluvo den vio Yerusalemone vonganai, bior ver nalo na vio nei, ver kotukunu vanlo ka venia napano nemila banso, mia nalo maka ajikia amonmoneaso leleio.'

¹⁹ "Mia kiniau neberii ka naio, neberinavo 'Ana Tubo, nalo amijikia batitigio kiniau ruei, bija venia napano mā nojomā nemilaio beamu. Nalo amijikia ga ka kiniau naruei nojo nejeliviv ea yimo na volkouano na kumemi kulo Ju nalo kenememi, a nojomā nobokar nalo napano amoneaso. A amial ruei napano nojomā nebitilo, a nojomā nobukulo aban ea nalakoiano, naruei nejidom neber monoka amonea kiniau ga ka neberiano ga. ²⁰ Mia nanua, bogo napano kanamo toro na Stevin, kiano burukija miou,

nalo amijikia batitig ka kiniau naruei nojo bijalo ka bogo na. Bogo napano nalo ajubabinio m̃aro, kiniau nemijalo, a kiniau nebitikar batitig m̃alo kulukoti nalo. ! Monoka nalo aiagago ka kiniau ga na!'

²¹ "Mia Tubo naio ber ka kiniau ga, berinavo 'Jau kataluvo den vio na ga, kiniau nejidom neilaso kavan ea vio nalo na koalabo laka, jau kavan ka nalo napano maka ave kulo Ju nalo.'"

²² Ana binimeia bokar aura nei, ana nalo nene napano ajumā amiagago ka Pol aju amije tilinielo batitigio ga kanio, mia vonganai, kanalo siniabu ka naio binimeia bereio, naruei nalo aju amiagiaga ga bereio, aberenio "!'Ei, bo ka auebin ga toro kiri bova na riñaro! ! Kito maka rosidom toro na jibe na naio rimeul toa vio yetemeriba nei!" ²³ Naruei nalo ajumā amiagiaga ga jibe na, a ajumā aṑilig m̃alo kulukoti nalo ea Pol, a aju ajuvu bulukievi na m̃arabo janea vio. ²⁴ Ana toro na toru na mira naio ber ka avuru Pol taluvo den tiniobi nalo na, riva jouro ea kanalo burusio ga, a naio berenio nalo avitivio kija, ajikili kanio ka aleal vite venia naruei naio mila ana na tiniel jer m̃elea naio toru jibe na.

²⁵ Mia bogo napano amiorkar naio bisi, ana ajidom avitiv naio naruei, mia Pol ber ka kanalo navuriñaraboiano nei

tai, beri-navo “? Juṁabe, memedu ka kamiu kuvitiv tavukia toro tai napano naio jotano ka navitikariano na vio Romo, a napano naio maka rivan ea komeli vo ka atibure vatitig naio, ħeli na kamiu kumijikia kuvitivio ga tibe na a?”

²⁶ Mia bogo napano navurimāra-boiano nei naio mijog Pol kanano vikadeniano nei, naio berenio mia avitiv re naio tukamu vo, ana soħeli ga naio ba mial kanalo toro na toru, berinavo “?Ei, mia jau kala tuṁabe ka toro nei naruei? Naio berialio ber naio jotano ka vitikariano na vio Romo.”

²⁷ Naruei toro na toru nei binimej ka rial Pol bereio, naruei bika denio, berinavo “!Ei, jau kover vatitig rivu! ? Jau kojotano ka vitikariano na vio Romo, ħeli na makanio?”

Ana Pol berdoħeio, berinavo “Ee, kiniou nejibe na naruei.”

²⁸ Naruei toro na toru nei ber ka Pol berinavo “?Ana jau kojumābe na jibe na? Ka kiniou jibe na, kiniou nobulu burumāra puruveru nei.”

Ana Pol berenio jibe nei, berinavo “!i, mia kiniou, karamāku jibe na mugaruei, ana kiniou nemiyotuba, nejibe kanio bunu.” ²⁹ Mia bogo napano nalo napano ka avitiv naio amijog iliano nei, amijikia naruei ka Pol naio be toro na toru tai jibe na. Ana ajaraluvo den naio vaarakurano, amijikia ka mia avitiv re naio naruei,

a toro na toru nei bunu, vonganei naio bunu merou kija, bior ka napano naio be toro na mira na vio Romo tai, mia naio mila bova ruei ka Pol napano naio bunu jotano ka navitikariano na vio Romo.

Aburu Pol ea kulo Ju nalo kanalo burumāra komeli

³⁰ Mia kavijo nene, ana toro na toru na mira nei naio jo jidomio ka rijikia kia na vo venia naruei be burupati na siniabu nei, ana naio bio tomu nalo na tortoru na kulo lu nalo bija navurimāra-boiano na kulo Ju nalo kialo, ber monoka atu rorea naio ea burumāra kanalo komeli. Naruei naio berenio ajubarbulag mārīmieni den Pol, ana naio buru batove ea burumāra komeli neibano, naio bitirikar Pol ju iviso ka nalo.

23

¹ Naruei Pol naio buku mirano memedu ea tomu na tortoru nei, ber kalo, berinavo “Kuruaku nalo, ea nono kiaku meuliano binimej bokar banei, ea iṁauano nonovio na Atua kiano napano nemilaio, maka nojog titai tuluborua kiaku iviso, ka river kiniou namila maka rimemedu. ! Maka leleio ga ruei!”

² Mia bogo napano parinio toro lu nei Ananaias mijog iliano nei, naio tinien mimi toru laka ban Pol, a ber ka nalo napano aju vaataro ka Pol ber nalo ajuba niono. ³ Naruei Pol mil

kija ban naio naruei, berinavo “!Ei, jau kovitikarso, mia Atua ruebinso navo! Jau kojo tano ea vio na kiado natuboiano, ea vio na nati-bureano na toro, mia karina jau na naruei komila korov tuboiano nene bereio, napano koberenio ajuba kiniou tibe na. Jau kobe kulmedede ga tai na kojo na.”

4 Mia nalo napano aju vaataro aberinavo “?Ei, jau koberiam̃a bo ka keil rivova tibe na van Parinio Toro Lu na Atua kanano tibe na, p̃eli na tum̃abe?”

5 Naruei Pol naio berinavo “!Aa, riano-o! Kuruaku nalo, kiniou namijog kiano iliano mia maka nejikiaio, maka bunu nesidomiio never naio be Parinio Toro Lu na. Mia jibe ka napano kamiu kuberial batitigio ban kiniou ruei, naruei nemijikia ka nemil maka rimemedu ka naio, bior Atua kanano Il-iano Lu berial batitigio ruei, ber maka rivu ka kito reil rivova van toro na toru na tomu nalo na kiado.”

6-8 Naruei Pol maka bunu rijikia venia mia naio riv-erenio naruei, ana mial ka nalo napano aju joomo ea vioriano ka bogo na, togio abe Varisis, a togio abe Satusis. Taara juo nei ajum̃a amila baravo toru, bior Satusis nalo aberenio mia tomu nalo maka ajikia ameul ea nam̃ariano, mia aberenio vite nalo na jibe kanio nail-iano nalo, p̃eli na niununo nalo, aberenio vite nalo nei

maka titai tibe na, mia Varisis nalo amonea vite nalo nei. Ana Pol mijikia naruei ka mia river tum̃abe, naruei naio bio ban tomu nalo na tortoru nei, berinavo “Kuruaku nalo, kiniou namaluvo ea yati na Varisis memedu. Karam̃aku nalo abe Varisis, a kiniou bunu nebe Varisis. Naruei bija Varisis nalo, kiniou nomonea ka bogo napano toro m̃aro, karina, mia naio mijikia rimeul bereio. Naruei nejidom jibe ka kiniou nojumolu nojukamu ea miremiu bior tomu tai ajidom ail van kiniou rivior kiaku moneano nei.”

Naruei Pol kiano iliano nei mila ana Varisis nalo napano aju ana ajikar ka amila baravo bereio naliko Satusis nalo napano aju nei, mila ana nalo nonovio na ea vioriano nei aburuburelo bereio.⁹ Amila jibe na bano-o, binimeu toru laka, a karina, nalo naverloglogiano tealoka tivelinio na Varisis nalo ajumolu, amil kirisikili laka, aberinavo “Kumemi numial ka toro na naio bo ga, maka vite tai ka napano mia kito romijikia reil vanio riviorio. ?A kei mijikia, p̃eli be riano ga ka niununo tai bo p̃eli na nailiano tai mil ban naio koviobo?”

¹⁰ Mia siniabu nei ba toru laka naruei, nalo ajum̃a ajidom ka atukulo riviorio, ana toro na toru na kulo na mira kialo mialio ka bova, naio merou ka tibe m̃a na mia nalo aser niegeniege laka ka Pol, naruei naio mi-

ila kiano tomu nalo abatove, aburular Pol denlo, ana aburjo ban bereio ea kialo burusio.

¹¹ Ana ka bogiano, Pol mial ka napano Tubo ju jumolu ju vaataro keanio, napano joġna mil banio, berinavo “Pol, mia komerou re. Jau koberial batitig kiniou ban tomu na abe ħirilo ea vio nei ruei, ana kiniou nejidom ka mia jau monoka kala tibe na ga, ve vaarakurano bereio, nina ea vio Romo.”

Kulo Ju tealu abarvio ka auebin Pol

¹² Ana ea kavijo, kulo Ju nalo tealu abinimei vio takurano ka atuluku ga, ka averii ka mia tuġabe ana mia amijikia auebin Pol. Mia bogo napano amileal mġarabo tai bisi ana aberkar ea Atua siano ka mia atuvan sinaniano vija munuiano nalo, rivano-o mia auebin Pol tukamu vo. ¹³ Naruei nalo napano abijurukar iliano nei a napano amilakakar verikariano jibe na, nalo ajodovulu tomu nalo duelimo va veri [40].

¹⁴ Ana iorou kanio ana aba amial tomu na tortoru na kulo lu nalo, naliko navurimġaraboiano nalo, ana aberial vite nei banlo. Aberinavo “Kumemi nuberkar jikili ea Atua ruei, ka mia kumemi nuvel ka sinaniano nonovio rivano-o mia rivokar bogo napano mia numijikia nuvue bin toro na.

¹⁵ Mia kumemi numisidom ka kuvijai kumemi, napano kamiu kamlika nalo na ea kiado komeli, kamiu kuviila

toru rivan ea toro na toru na tomu nalo na mira na, ka naio rivuru toro neġe rivatove ea komeli bereio, kamiu kuvila sibilili naio ga kuver kumisidom kuvitii bereio iliano nalo na. Naruei mia kumemi nuvitu rorea ea mġarabo ga, a bogo napano amei, mia nuvuebinio, napano naio jo koalabo ka komeli kia ga vo.”

¹⁶ Mia iorou kanio, ana na Pol, kuviviniene kenerinio tai naio mijogial ka napano ajumġa aberii ka mia ala tibe na, naruei kiritete nei naio ba memedu ea burusio na tomu na mira nalo kialo, ana ba berial vite nei ban Pol. ¹⁷ Ana Pol bio tomu na mira nei tai kalo, berinavo “Ai, koig kobijuku bo, jau kovuru mġeaku nei riva rial kenemiu toro na toru, naio mijikia titai napano bo ka mia toro na toru na naio monoka rijogio.”

¹⁸ Naruei naio buru Pol kumerano nei ba ban kialo toro na toru, a berkanio berinavo “Pol napano jo rove yako ea nalakoiano, naio berenio novuru kumerano nei rimei river titai vanso.”

¹⁹ Naruei toro na toru nei naio bokar mġeaku nei juġano, ana burio ba jibe ka naljuo ga, naruei bika denio, berinavo “?Mia jau kojidom kover venia van kiniou?”

²⁰ Ana na Pol kumerano nei ber bulavulagio banio, ber “Jau keialio, tomu na tortoru nalo na kulo Ju abitirilar kanalo tiiano tai ruei, ka mia auebin kumeruaku nei, Pol. Nalo aberenio ruei ka mia aiila toru rimei vanso, ka nalo ajidom avitii vatitig

bere vo ea tivelinio na il-
iano nalo nei, ka mia nalo
avikaso ka beni, mia jau
kovuru Pol rivatove bereio
ea kialo komeli.²¹ Mia maka
rivu ka jau kala tibe na,
bior nalo ajum̃a amila sibi
ga na. Aberenio ruei ka
bogo napano verenio kami-
u kuvitua m̃arabo, kuvitum̃a
kuvatove, mia nalo tovulu
duelimo va veri [40] nei
aviako ea kami, nalo aue-
bin kumeruaku na. Nalo
na aberkario ruei ea Atua
ka mia atuvan sinaniano
vija munuiano rivano-o mia
verenio aial ka auebinio bisi,
ana nalo nei naruei ajum̃a
aju rorea kami ruei, ka
verenio jau kajamo ka mia
kuva tove bereio.”

²² Ana toro na toru nei
naio ber ka Pol kumerano
nene, berinavo “Bo ga, mia
kiniou never kaso memedu,
mia jau koverial re van
toro tai bereio ka kobinimei
koberial vite nei ban kin-
iou ruei. Mo siva toru, jau
komijikia kava vonuo bereio
naruei.”

*Amiila Pol ban ea parinio
tubo tai na Romo ea vio
Sisiria*

²³⁻²⁴ Mo toro na toru na
kulo na mira kialo nei naio
bio kiano tomu juo, naio ber
jibe nei, berinavo “Vite nalo
na tivelinio ka toro nei Pol,
abinimei jikili laka. Von-
ganei, mia kiniou neiila naio
riva toa kiado parinio tubo
Veliks jum̃ano, napano naio
jo rove yako Sisiria. Kamjuo,
kuvila batitig taara tai na
tomu na mira na kiado, ka
kuvisirag kuku vatitig rivu

ka Pol, kuvuru naio riva-
tove. Kamiu kumijikia ku-
vuru tomu na mira toro-
momou ve juo [200], vija
duelimo va aluo [70] na-
pano avar parinio bue ku-
lorinio, vija toromomou ve
juo [200] bereio napano abar
mira nalo na uteute. Ku-
vidu Pol kanano parinio bue
kolorinio tai bunu ka naio
mijikia totano eaio. Kiniou
nejidom ka kamiu kuvituvan
banei bogiano, ka m̃erenio
koveri [9] bogo napano vio
melijo ruei.”

²⁵ Naruei toro na toru nei
naio jiri m̃esi tai ka adukario
rivan vijalo, naio jirio jibe
nei, berenio:

²⁶ “Mesi nei, kiniou Klo-
tias Lisias, napano
nebivitauia biedu
banso, Parinio Tubo
Veliks, napano jau
kobe toro na toru
na vio Romo napano
jau kobitkar kiado
burum̃ara tanobuku
nei.

²⁷ Kiniou najaaro toru ka
nevitavo vijaso bereio
ea m̃esi nei.

Toro napano aburio biedu
banso na, kiano
tukunu nene jibe
nei: beamu, kulo
Ju nalo na vio nei
abokar naio, vaataro
ka auebinio. Avona
karina, nemijogial ka
napano naio jo yetano
ka kiado vitikariano
na Romo, naruei
kumemi nubatove,
ana nuburular naio
den kulo Ju nalo nei
jum̃alo.

28 Naruei kiniou nejidom ne-
jikia ka venia naruei
naio be burupati
na vite nei, naruei
noburu naio batove ea
kialo komeli na toru.

29 Ea bogo na, kiniou ne-
mial ka napano naio
maka rila titai napano
rimemedu ka mia aue-
binio pġeli na adu vi-
roniano rivanio, mia
nemial jibe kanio nalo
ajumġa amila baravo
naliko ka tivelinio na
tuboiano na nalotu-
ano na kanalo ga.

30 Avona karina, iliano tai
binimej bokar kiniou,
ber aberiio ruei,
amileal mġarabo ruei
ka ala vonio bereio ka
auebin riġaro. Mia
kiniou nemial bo ka
nejila naio riviedu
soġeli ga, mia neber
bunu ka nalo napano
tiniel jerio, neber
monoka nalo aviedu
averial ea miramo vite
nalo napano ajidom
atibure naio riviorio.”

31 Naruei tomu na mira
nalo amila jibe ka napano
kialo toro na toru nei
berenio, naruei bogiano
ana aburu Pol, mia bu-
rumġara taara nei ajuvan vio
Yerusalem, aba abokar vio
Antipatris. 32 Naruei kavijo
nene, tomu na mira nalo
na amiel ka jaalo ga abavin
bereio Yerusalem, mia nalo
napano abar parinio bue
mġarau, naliko kia Pol vo,
aban ea kialo mġarabo abano
lie abatove Sisiria.

33 Mia bogo napano abin-
imej aboru ea vio nene,

amidu mġesi nei ban parinio
tubo nei naruei, iorou kanio
ana aburu Pol ba ajuvan
naio joa jumġano. 34 Naruei
parinio tubo nei naio bu-
luku mġesi nei bisi, ana naio
bika den Pol, ber naio be
toro na tanobuku na vabe.
Ana Pol naio berenio naio
be toro na vio yako Silisia
ga, 35 ana parinio tubo nei
ber bereio, ber “Mo bo ga,
kito monoka rotu rorea ga
nalo napano mia amei ail
vanso, naruei bogo napano
ver amei, mia kiniou novu-
rulo ea nailivatitigiano ki-
toliko.” Mia naio ber ka
kiano tomu nalo na mira,
ber “Toro nei naio mijikia to
vija kito beamu vo ea yimo
moruo nei, Parinio tubo Erot
kiano, ninei kito rojua von-
ganei, mia kamiu kuvisir-
arago kuku vatitig rivu ka
naio ea vio na.”

24

*Kulo Ju nalo abinimej ka
ail van Pol ea Veliks mirano*

1 Mo Pol naio jo jibe na-o,
bokar bogoti jumo barlaka,
ana iorou kanio ana Parinio
toro lu na vio Yerusalem
neibano Ananaias naio
binimej rove nei Sisiria, naio
naliko navurimġaraboiano
dolu nalo teal, na kulo
Ju nalo kialo, bija toro
tai na kialo tuboiano, ka
mia naio ril kanalo, siano
Tetalas. Naruei nalo nei
aba amial Parinio Tubo
Veliks ka averial vite nalo
napano ajidom ka ail rivan
Pol riviorio. 2 Mo nalo abio
Pol binimej joomo bunu, ana
Veliks naio jian bogo ban

Tetalas ka mijikia rivetavo ea kanalo iliano.

Mia naio mil ban parinio tubo nei naio berinavo “Parinio Tubo Veliks, kumemi numisaaro toru laka ka nuvitumolu ea miramo banei, bior ka napano numialio ka napano jau kojomġa kobitkar kumemi bo laka. Jikario ea bogo napano jau kobokar inġauano nei, binimei bokar vonganei, kiamo masouano naio mila tumġaro novo joa buruvenuo nei, a jau kojomġa komila vite vou nalo telabo ka rijai inġauano na vio nei. ³ Tibe na, kumemi nubereno kenememi burumġara sivaiano banso ka napano damġariga jau kojomġa komila batitig kumemi bo laka ea vio nei jibe na. ⁴ Mia jau, kobe kanamo inġauano telabo, maka rivu ka kumemi nuvila lelanso ka kenememi iliano nalo ve telabo laka, mia kiniou najidom ka novika denso kovijuku rivu ka kumemi, keiagago ka kenememi iliano telisu tai napano bulati ga.

⁵ “Mia ea tivelinio na toro nei, kumemi numialio jibe ka pariparinio kirisikili kija. Naio joġma miel janea kulo Ju nalo ea buruvenuo dolu nalo, a ea vio nonovio napano naio ban eaio, mia naio mila tomu nalo aburuburevurelo a amila baravo. A naio be navurimġaraboiano tai na taara na tomu nalo neibano, napano aberenio naio miyotuba ea vio Nasarete, napano pġeli naio be nalotuanu dolu tai kovioġo, pġeli

na ver makanio, mia nalo ajumġa amila baravo ga na. ⁶⁻⁷ Ana bogo napano toro nei naio binimei jo Yerusalemo, naio mila kirivova-o mia naio jidom rila bulag tolu na yimo lu na kenememi nei, tenene na kumemi nubano nubokario. ⁸ Mia ver jau kovika den naio ga, mia komijikia kojog ka vite nalo namġa nubereno nalo aberiano ga.”

⁹ Ana bogo napano naio joġma milili jibe na, ana kulo Ju dolu nalo ajumġa aġiliġilig pariparilo, aju aberverenio aberinavo “Nina naruei, jibe na naruei, be riano ga na.”

Pol berdoġelo

¹⁰ Ana iorou kanio, parinio tubo nei naio bitikar Pol ana jian bogo banio ka naio mijikia river kiano verdoġeiano. Naruei Pol naio berinavo “Parinio Tubo Veliks, jibe ka napano jau kejibure kumemi ea buruvenuo nei ka yuka telabo abarlaka ruei, mia najaaro ga ka notumolu notukamu ea miramo ka nodu kanaku verdoġeiano. ¹¹ Mia kiniou nejidom never kaso ga, ka nabavin yako Yerusalemo maka vesiou leleio. Ver jau kovika vatitigio ga den tomu nalo, mia jau keleal ka kiniou naban ea vio na ka ga nava novolkouo ea Atua Kunuano Lu, maka rivokar bogoti ve duelimo ba veri [14] vo. ¹² Mia bogo napano nojoa vio na, mia maka aial ka napano kiniou nemila vite tai. Maka nala siniabu vija toro tai, a maka

neilili van tomu tai neverenio nalo amila vite tai. Ea Atua Kunuano Lu, ̃peli na ea yimo nalo na volkouano nalo, ̃peli na ea vio be na ea komeli, mia maka nala titai leleio. ¹³ Mia vite nalo napano nalo aberii kaso vonganei na, ka kiniou nemila jibe na jibe na, nina be iliano na kanalo taara ga na, mia nalo maka aver vite tai ka rikurukar kialo iliano vanso, ka rila kanalo iliano nei rive riano.

¹⁴ “Mia vite takurano ga kiniou nemijikia najamo kanio, nemijikia never kaso neverenio, nao, kiniou nemila nina. Vite na, napano kiniou nojom̃a najakii Marabo Vou nei, napano m̃a aberenio nalotuano dolu. Mia maka tibe na, bior ea m̃arabo na, kumemi numitu nubolkouo ka Atua takurano ga, nina Atua na korobimemi tormoruo nalo kanalo, numitu numonea ga vite nalo napano kene-memi tuboiano berenio ̃peli napano kenememi nave-rialiano nalo abivitauiiao. ¹⁵ Mia jakii vite nalo na, mia kiniou nojo ga ban Atua, be verare ga ka napano nalo bunu aju abitikuku kanio, ka mia naio rila tomu nalo nonovio ameul bereio ea nam̃ariano, nina nalo napano amemedu ea mirano, a nalo napano maka amemedu ea mirano. ¹⁶ Naruei bior kiniou nemijikia ka mia Atua rila tibe na, mia maka nosidomii ka mia nela re bajago na bova

tai leleio. Mia bogo nonovio ga, nemila vonvon toru laka ka mia vite tai ve telisu tul re kiniou bogo tai, river ka nemila bova ea Atua mirano ̃peli na tomu nalo miralo.

¹⁷ “Mia yuka tealó bar-laka ruei, mia nojom̃a naban ea buruvenuo dolu nalo, mia karina, vonganei ga, ana nebinimeí bereio ea vio Yerusalemo. Mia tomu nalo na laka yako ajuvanini ijaiano tai ka rijai kene-memi tomu nalo na vio Yerusalemo, ana na kiniou nabar ijaiano nei nebinimeí, nabar banlo, a nejidom nava nala sida bunu ea Atua Kunuano Lu. ¹⁸ Ana bogo na m̃a kiniou nojoa Yimo Lu, nemila sida na meravoano bisi, ana na nalo na abinimeí amial kiniou. Ka bogo na, maka bunu ve toro dolu tai atu rivija kiniou, mia maka ve iliano ̃peli na uetubaiano leleio, mia iorou kanio, ana kulo Ju nalo tealó na vio Esia abinimeí, ana nalo naruei ajikar siniabu nei. ¹⁹ Mia nalo napano abe burupati na vite nei, ver asidomii ka kiniou namila vite tai bova, mia bo kanio ver nalo bunu atu rivija kito ea vio nei banei ka averialio kaso, mia maka neialo. ²⁰ Ver ̃peli, mia bo ka jau kalavonio ka kovika den nalo dolu napano aju na, ka bogo napano aburu kiniou naba nabavin ea kanalo komeli, mia amileal kiniou nemila venia. ?Kiniou nemila vite venia na maka rimemedu, ̃peli na neber iliano venia

na maka rivu? Nejidomiio-o, maka lele garuei. ²¹ Mia iliano takurano ga na kin-iou neberenio banlo, neber jibe nei, neberinavo: Kin-iou nemial jibe ka kamiu kumisidom kuvil rivan kin-iou banei, rivior ga kanaku moneano nei, ka bogo napano toro m̃aro, karina mia naio mijikia rimeul bereio. Naruei kiniou neber iliano na, karina mila ana nalo ga ajum̃a amila siniabu kalo toru bereio.”

²² Ana Parinio Tubo Veliks nei, naio mijikia kija ruei vite telabo ea tivelinio na Marabo Vou nei, mia bogo napano naio mial ka siniabu neibano, kulo Ju naliko Pol amila bior vite nei, naruei naio jetavoko iliano ga, berinavo “Bo, mia kito rotua vio nei beamu vo. Mia kiniou notororea ga toro na toru na kulo na mira nalo kanalo Lisias tu mave Yerusalem o rimei, ana mia nemijikia nojog vatitig kiano veriiano tukamu vo, avona bisi, ana nejev kanaku natibureano van kamiu.” ²³ Mo naio ber ka kiano tomu na mira nalo ka avokar Pol vo, nalo atukuku kanio, mia naio berenio nalo ala sikili laka re rivanio, monoka ajamo ka naio rieliel kija ga, a averbure re kiano bilbilu nalo ka amei aiadu kanio avitikario.

Pol berii Yesu ban Veliks naljuo kouano

²⁴ Mia Parinio Tubo Veliks nei, kouano be tira re Ju tai, siano Trusila, mia naljuo nei ajidom atukunu kija naliko Pol vo. Mia legiano teal o

barlaka ruei, bisi na abe juo abinimei ea vio na Pol joaio, ana aburu Pol binimei, naruei Pol mil bijalo, naio berii kiano moneano na ea Kristo Yesu. ²⁵ Mia Pol juvan iliano telabo lie vo ban naljuo, naio maka rialerinio ealo leleio, mia berii jum̃abe ka napano toro monoka rila bajago na memedu, a ka napano toro monoka telan vuu vatitig ka kiano meuliano, mia berii bunu tibureano napano Atua kanano ka mia rimei ea legiano na maaro. Naruei bogo napano Veliks mijog iliano nalo nei, naio mijog jibe ka julum̃lea kiano jidomiano, mila naio merou kija, mo naio ber ka Pol, berinavo “Mo bo, bare ga vo. Jau kava joomo nei bereio vo, mia ver kin-iou neleal kanaku bogo tai, mia neiila toru riviedu kaso bereio.” ²⁶ Mia bogo napano Veliks naio mijog iliano nalo nei, mia naio be kiano jidomiano va tai bunu, napano naio jidomii berinavo mia Pol sian puruveru na toru tai rivan naina, ka rila ka naio river Pol naio mijikia taluvo bereio. Naruei kiano jidomiano nei mila naio jom̃a miila toru ka Pol julaka ga, a naio jo jukunu va telabo bijaio. ²⁷ Mia naio jom̃a milala jibe na banbano-o bokar yuka juo, ana na naio bisi ea kanano im̃auano nei. Mia naio maka rijamo ka Pol ka taluvo bereio ea vio napano naio joaio, bior naio jom̃a jidomii ka rila kulo Ju nalo asaaro ka naio.

Mo iorou kanio, ana na toro dolu tai binime'i midu Veliks nene jeleigio, napano siano Posias Vestas.

25

Pol berenio Sisa ga monoka tibure naio

¹ Ana parinio tubo vou nei Vestas, naio binime'i yako Sisiria, binime'i ka rivotikar kanano tanobuku nei, mia iorou ka napano bogoti tolu ga barlaka, ana naio mial ka monoka riva rivitii vio mave yako Yerusalemo.

² Ana bogo napano naio bokar vio nei, ana bior naliko tomu na tortoru nalo na kulo lu nalo, bija tomu dolu na tortoru na kulo Ju nalo, ana aberii niegeniege Pol banio. A nalo ajututua ka naio,

³ aberenio ver naio jidom rila tena novo tai vanlo, nalo ajidom naio riila Pol rime'i bereio ealo, napano amijikia avuru riva komeli ail vanio. Aber jibe na, mia nalo aju ajidomii luklukua ruei ka ver Pol rime'i, mia nalo ava atu rorea naio yako, ka mia auebin ga naio rimāro ea mārabo iviso viovare.

⁴ Ana Vestas naio berinavo "Bo ga, mia vesiou re ga ana kiniou bunu navan bereio yako Sisiria, ea vio napano ajumā abokar toro nene joaio.

⁵ Tibe na, mia kamiū tomu na tortoru tealō, kumijikia kuvitakisōr kiniou ravatove, ka mia reial tumābe. Ver toro na mila vite nalo tai napano maka rimemedu, mia romijikia rala iliano ea bogo nene ga."

⁶ Naruei Vestas jo naliko yako Yerusalemo maka rivokar bogoti ve duelimo ba veri [14], ana naio batove bereio yako Sisiria, naliko nalo nei tealō. Ana ea legiano dolu nene, ana naio ba jotano ea kanano vio na tibureano, ana berinavo ava avuru Pol rime'i.

⁷ Mia bogo napano Pol binime'i joomo, ana kulo Ju na vio Yerusalemo napano ajakisōr Vestas abinime'i, ajikili aju, ana ajumā aberial burumāra vite va nalo telabo napano aber Pol naio jomā milaio, mia kanalo iliano nalo nei maka atu sikili leleio.

⁸ Mia bogo napano Pol naio jidom ka sian kiano verdoŋeiano, naio jekorov bulati ga berinavo "Kiniou maka nala titai leleio, napano nemilakorov tuboiano na kulo Ju nalo kanalo, a maka nala niegeniege Yimo Lu na vio Yerusalemo, a maka nalakorov leleio bunu tuboiano na parinio tubo na vio Romo nei, Sisa kiano."

⁹ Mia Vestas nei, naio jomā jidomii ka rila kulo Ju nalo ajog rivu ka naio, ana naio jidom ka rilavonio ka rila tibe ka napano nalo aber kanio, ana naio bika den Pol, berinavo "?Jumābe, ŋeli bo ka mia kiniou novuruso rava komeli yako ga Yerusalemo, ana mia jau kotumolu kotukamu ea miraku bereio ea vio na?"

¹⁰ Ana Pol berdoŋe, berinavo "Vonganei, ea vio nei, kiniou nojumolu nojukamu nojua miramo, jau toro natibureano na tuboiano na Sisa

na vio Romo ruei. Vere-
nio vite tai napano ka mia
kala van kiniou, vio nei
naruei naio memedu ga ka
jau komijikia kalaiio. ?Mia
kiniou navavin mave yako
Yerusalemo bereio ka vaio?
Jau kobitilubar ruei ka na-
pano tivelinio na ea kulo Ju
nalo, maka kialo iliano tai ea
kiniou tu sikili leleio. ¹¹ Mia
ver jau komial kiniou nemila
titai bova napano memedu
ka mia monoka naniaro riv-
iorio, nina naio bo ga na,
maka notomna nalavonio ka
novuro denio. Mia ver
nalo na, maka kanalo il-
iano tai bereio ka mijikia
tumolu tu sikili, mia maka
rimemedu leleio ka jau kei-
ila kiniou navan bereio ea
juñalo ka ala vaio napano
ajidom van kiniou. Von-
ganei, jibe ka napano kin-
iou nemijikia nalaio, jibe ka
nojotano ka vitikariano na
vio Romo, mia kiniou neber
vatitig kaso, kiniou nejidom
ka Parinio Tubo Sisa na
vio Romo, naio ga monoka
tibure kiniou.”

¹² Mia iliano nei mila Ves-
tas ba mil naliko kiano vuro-
niano nalo beamu vo, avona
bisi, ana binimej bereio,
berinavo “Jau koberenio
ruei kober kojidom Sisa
ga tibureso. Mia kiniou
neberenio bo ga na, parinio
tubo nene, naio nei naruei
napano mia jau kotumolu
kotukamu ea mirano.”

*Vestas jukunuii Pol ban
tubo dolu na toru nei Akripa*

¹³ Ana iorou kanio, bogoti
tealo barlaka bereio, ana
tubo dolu tai binimej yako

Sisiria. Naio siano nei,
Akripa Juo, mia binimej
naljuo kuviviniene nei
Benisi. Naljuo amijog ka
Vestas jikar vonga kiano
inġauano napano be parinio
tubo na tanobuku nei,
naruei nalo ajidom amei
aiadu ka naio. ¹⁴ Mia naljuo
ajua vio nei bano-o, mia
bogo telabo ajumna ajukunu
naliko Vestas nene, mia
bogoti tai ana Vestas naio
jukunu banlo ea tivelinio
na Pol. Naio ber ka
naljuo, berinavo “Kiniou
be toro tai joa kiaku yimo
nalakoiano, napano joa
Veliks juñano beamu ruei,
beamu ka napano kiniou
nebinimej ea vio nei. ¹⁵ Ana
iorou ka napano nebinimej,
ana nabavin mave yako
Yerusalemo, ana tomu na
tortoru na kulo lu nalo,
bija navurimmaraboiano dolu
na kulo Ju nalo, abinimej
aberii toro nei ka kiniou,
ajidom ka kiniou neverial
kiano tibureano tai kanio.
¹⁶ Mia kiniou neber batitigio
kalo, neberinavo kiniou
maka leleio nejikia nala
tibe na ga, mia monoka
novuru tivelinio ve juo
amei vio takurano beamu
vo, ana nalo napano amila
veriiiano, monoka averialio
ea mirano toro napano
amila veriiiano kanio, a
monoka nodu bogo van
toro nei ka naio bunu rudu
kanano verdopeiano. Kiniou
neberii kalo neberinavo
bajago na tuboiano na vio
Romo na kenememi jibe na
naruei.

17 “Tibe na, nemei nei bereio ea vio nei, ana kulo Ju nalo atumolu den Yerusalemo amei ka kumemi nuvila iliano. Mia bogo napano nemijikia ka nalo abinimei abokar vio nei ka vio be kijeve, maka netii lilian bogo mia kavijo ga, nabano nojotano ea vio na tibureano, ana nabio toro neibano Pol binimei joomo. 18 Mia bogo napano kulo Ju nalo ajumolu ka averial vite nalo na toro nei, nejidomii neberiaña mia nojog aver burumñara vite va tai napano aberenio naio milaio, mia nina maka leleio. 19 Nalo aber ga vite sesa nalo ea tivelinio na kanalo nalotuano ga, napanoaju amila baravo kanio naliko toro nei. Nina ea tivelinio na kanalo bajago moruo ga nalo, a ea tivelinio ka toro tai, siano Yesu, napano naio mñaro ruei, mia Pol naio jomña berenio naio meul bereio. 20 Mia nalo ajumña aberii vite nalo napano kiniou maka nejikiaio, tenene na maka nejikia ka mia nala venia naruei, ana nebika denio verenio naio sidom ka rivan bereio mave yako Yerusalemo, ka nalo ala kanalo iliano ea vio na ga. 21 Mia karina, toro nei naio ber peli ga, mia rivan re tibe na, naruei naio jumolu ber naio jidomii ka Parinio Tubo Sisa ga naio tibureio. Kanano iliano nei mila ana nobokar naio joa vio nei kia navo, ka kiniou neleal mñarabo tai ka mia neiila rivan yako Romo, ka mia

Sisa rivitii vite nei.”

22 Ana Akripa ber ka Vestas, berinavo “Mo kiniou bunu tinieku jii laka ka ver nemijikia nojog kija toro na kanano iliano.”

Ana Vestas berinavo “Boga, beni ga, na mia kamjuo kuvitukunu.”

Vestas buru Pol binimei ka Akripa riagago ka naio

23 Mia kavijo, amila vite nonovio ju vatitigio ea kanalo burumñara yimo na vioriano tai, amila jibe ka burumñara titai. Ana tubo na toru nei Akripa naljuo kuvivinieno nei Benisi, naljuo abinimei napano amiovovualo novo batitig ruei, mia abinimei joomo napano tomu na tortoru na kulo na mira nalo bija tomu na tortoru dolu naloaju amiel iorou kalo. Ana amila vite nonovio ka naljuo nei jibe ka napano mña amila ea bogo na tortoru nalo na jibe nei. Amila bano-o bisi, ana Vestas berenio avuru Pol rimej joomo. 24 Ana aburio binimei, ana Vestas jian kiano iliano, berinavo “A Parinio Tubo Akripa, bija tomu dolu na tortoru nalo napano roju nei banei, nina be toro napano kulo Ju nalo abinimei amil ban kiniou biorio. Yako Yerusalemo, a ea vio nei, nalo abinimei abika jikili den kiniou aberinavo netiburio,aju amil telabo aberinavo toro nei, maka rimemedu ka naio rimeul riva lie vo, mia nalo ajidom ka naio monoka rimaro soḡeli ga. 25 Naruei

kiniou nebitii vite nei bano-o, mia maka neial titai ka mia rimemedu ka naio monoka riġmaro riviorio. Avona bisi, ana toro nei naio bunu bika parinio tubo na toru na vio Romo, berinavo naio ga tibure naio, ana vonganei nojomña nebitiio ka mia monoka neiila naio rivan ga ea Sisa jumano naruei. ²⁶ Mia monoka nevivitauia mēsi tai rivan vija toro nei ea kiado parinio tubo na, mia kiniou maka nejikia vatitigio bunu ka mia nevivitauia venia tua mēsi nei. Tenene naruei, kiniou najaaro ka noburu naio biedu jikili jukamu ea miramo, tubo na toru Akripa, bija kamiu tomu dolu na tortoru nalo na, ka rovitii kanano iliano nalo nei bereio, ka pēli mia kamiu kumijikia kuvija kiniou ka mia nevivitauia venia tua mēsi nei. ²⁷ !Maka rivu ka kiniou neiila toro nei rivan ea natibureano na toru, napano maka neverial vatitigio ka iliano vaio napano milao ana nemiila naio bano!”

26

Pol mil ban Parinio Tubo Akripa ea mirano

¹ Ana Akripa berii ka Pol, berinavo “Mo, kiniou nejian bogo bano naruei ka kotukunu kaso ea tivelinio na vite nalo na.”

Ana Pol naio buku jumano jibe na, ana jikar kiano iliano naruei, ka sian verdoġeiano na vite nalo nene.

² Naruei naio berii jibe nei,

ber “Parinio Tubo Akripa, kiniou nemial bo laka ka napano nemijikia notumolu banei ea miramo, ka mia nalavonio ka neverdoġe iliano nalo napano kulo Ju nalo amila ban kiniou. ³ Neber iliano na bior jau naruei, jau komijikia batitig ruei kanado bajago nalo kito kulo Ju, a jau komijikia batitig bunu ruei vite nalo napano bogo nonovio kiado tomu nalo ajumña amila baravo kalo biorio, a napano ajumña aburuburevurelo bunu biorio. Naruei kiniou nebika denso ka jau tiniem ser re kiniou, bior mia kanaku tukunuano naio tokol vite ve telabo tibe na naruei, a ve tebievi kija bunu.

⁴ “Kiaku tukunuano naio jikar jibe nei, kanio kiniou, jikar ea bogo napano nebe kiritete kia ga vo, nojo damariga kumemi liko kulo Ju nalo ga, nina ea kiaku vio, mia iorou kanio, ana yako Yerusalemo bunu. Naruei nalo amijikia batitig kiaku bajago nalo re nua ruei, a amijikia ka bogo napano nebe toro mēaku kia ga vo, ⁵ mia nebijurukar taara na Varisis nalo, napano nalo naruei abokar mēlea kiado tuboiano jovulu taara dolu nalo. Naruei ver nalo asaaro ka nalo bunu atumolu atukamu ea miramo, mia nalo amijikia averialio vanto, ka vite nalo nei napano nojomña neberenio nalo abe riano ga nonovio.

6 “? Naruei bior vaio ana nalo tiniel jer kiniou bereio? Nina bior kiniou noju jikili damariga ea verikariano tai napano Atua mila bija korobido nalo nua ruei, napano naio berenio mia naio rila tomu nalo napano amarmaro mia nalo amemeul bereio. ⁷ Verikariano nene, kiado yati nalo duelimo ba juo [12] bunu nalo ajumã abolkouo legiano a bogiano ka amijikia avokario. ! Parinio tubo, jau keialio vo! Vite nei Atua berkario ban kulo Ju nalo ruei, ana vonganei kulo Ju nalo nei ajidom ail van kiniou bereio bior kiniou nomoneaio. ⁸ ? Kiniou maka nejikia, mia bior vaio naruei ana tomu nalo ajumã aber Atua naio maka rijikia rila toro napano m̃aro ruei rimeul bereio?

⁹ “Be riano, beamu nua, kiniou bunu nejibe na, maka namonea vite nalo na. Kiniou tinieku jer toru nalo napano amonea Yesu re Nasarete, a nemial monoka nalavio sikili ka rila sio nei ribisi ga. ¹⁰ Naruei ea vio Yerusalemo, nojomã nemila vite telabo jibe na. Tomu na tortoru nalo na kulo lu nalo amijamo kanio ban kiniou, ana nabano nemila telabo ka namoneano lu nalo nei aban ea nalakoiano, ana bogo napano ajiburelo ka monoka am̃aro, kiniou nojo joomo eaio. ¹¹ A kiniou nojomã najanea yimo nalo na volkouano, bogo nonovio ga nojomã nemila kikilo, a

nojoma nomila vonvonlo, nojomã nomila vonvonlo ka aiolua Yesu siano. Mia nojomã nemila jibe na banbano-o napano nebitunu m̃ele, naruei nemijil dedade ealo abeve terakurano janea buruvenuo dolu nalo, karina, kiniou naban kalo bereio ea komeli nalo napano aba ajualo.”

Pol berii jumãbe napano Yesu miyotuba ka naio

¹² Naruei Pol naio jomã jukunu ban kia, berinavo “Ana bogo tai, kiniou nabatove Tamaskas ka nala tibe na van nalo napano ajua vio na. Tomu na tortoru nalo na kulo lu nalo, nalo amiila kiniou nabatove, a amidu m̃esi tai ban kiniou ka mia nemijikia nala tibe na. ¹³ Naruei kumemi numitu numiel nubatove, ka m̃erenio jo memedu, nemial burum̃ara yulu tai merera ea vio mave, napano merera jovulu m̃erenio, naruei yulu nei mijegili memedu vio napano kumemi numituaio. ¹⁴ Naruei miamoiano nei naio toru jibe na naruei, mila ana kumemi numitibirbili ea borotano, ana iorou kanio nomijog joono tai, mil ban kiniou jel iliano re Ipru ga, berinavo ‘!Sol o, Sol o! ? Bior vaio ana jau kojomã komila kiki kiniou jibe ka napano kojomã komila na? Jau kojomã jaamo je bereio kiniou jibe na, mia milαιο ana jaamo mijalele laka.’

15 “Naruei kiniou nebika denio, neberinavo “? Ana Tubo, jau kobe kei?”

“Naruei Tubo mil ban kiniou berenio, berinavo ‘Yesu napano jau kojomā komila bova kanio, ninei be kiniou nene naruei. 16 Mia jau kotumolu bereio bior ka napano mia jau koiñau kanaku. Kiniou nemiyotuba kaso jibe na bior vite na naruei. Banei kovitilubar kiniou ka mia kover kiniou kei, a iorou, mia keial kiniou notomā noyotuba kaso ea vite ve telabo ea legiano nalo na ju binimeia kia iorou. Vite nalo napano nejiloglog kaso banei nei, naio naruei mia jau kava koverialio van tomu nalo. 17 Mia jau kava koverialio ka kulo Ju, a ka nalo dolu napano maka ave kulo Ju, ana mia keial ka nalo na, mia ala rivova kaso, mia niukniuku rivieso re, kiniou noyotuba kaso ea bogo nalo na jibe na, nalarurso.

“Nina naruei, kiniou nemilasas ka kavan ealo, 18 ka kovetavo ea miralo nalo, ka koviliglo ataluvo den melijokouo napano ajuaio, amei ea miamoiano, a ka atuvan moroano na Siñaro kiano tobo, mia amei ka Atua ga. Naruei ka bogo napano aviekar kiniou tibe na, mia Atua rivie kokoalo ka kialo kariano nalo, a mia rivijurukarlo ea kiano taara na kulo lu nalo kialo.”

Pol berii kiano iñauano

19 Ana Pol naio mil kia navo, berinavo “Nina

naruei, Tubo Akripa, bogo napano kiniou nemial burumāara vite napano jaluvo ea vio mave binimeia ea kiniou, maka bunu nejikia nala titai bereio, mia nomonmonea ga Tubo kiano iliano ga. 20 Ana na-bano Tamaskas jukamu, naruei nemioliolu ban tomu nalo, neberenio monoka aviliglo rivan ea Atua, a kialo meuliano nalo monoka avu bereio aviniu, rimemedu ka viligiano nei. Ana iorou kanio, nabavin bereio ea vio Yerusalemo, nemioliolu jibe na bereio banlo, karina nabano nemila jibe na ea komeli dolu nalo ea tanobuku na vio Yutea, a karina, naban janea vio reraio nalo napano maka ave kulo Ju nalo kanalo, nomidu iliano nene ga banlo. 21 Naruei bior kiaku iñauano nei ga, mila ana kulo Ju nalo abinimeia abokar kiniou joomo ea Atua kiano Yimo Lu, ana ajidom auebin kiniou namāro riviorio.

22 “Mia binimeia bokar banei, ijaiano napano binimeia ea Atua jo bija kiniou damāariga, a vonganei nemijikia notumolu notua miremiu kamiū tomu na tortoru nalo, a kamiū kulo dolu nalo ga bunu, a be kiaku bogo ka nemijikia neil van kamiū. Venia napano Mosis naliko naverialiano nalo aberiio nuanua ruei, aberinavo mia tibe na mia tibe na, vite na ga kiniou no-

jom̃a neberialio ban kamiu vonganei. ²³ Nina naio jibe na, napano Naverikariano, na bogo napano mia naio rimei riyotuba, mia tomu nalo monoka ala rivova ka naio, mia iorou, mia naio naruei ve toro na meul ve moti den m̃ariano bereio. A kiano tumoluano nene bereio den nam̃ariano, mia vite na naruei rive m̃arabo ka rivar yulu na ioruriano rimei rimiamo ea tomu nalo nonovio, kulo Ju nalo a nalo napano maka ave kulo Ju.”

Pol jidom monoka amonea Yesu tibe ka naio

²⁴ Naruei bogo napano Pol jom̃a jian kiano verdoṽeiano jibe na, Vestas jumolu jekorov kanano iliano nalo, mil toru, berinavo “!Pol, jau komiavovu ga na! Jau kojidom ka jau kove masou ka jiki-aiano doldolu nalo, naruei milaio pariparimo banbano-o m̃a miavovu garuei.”

²⁵ Ana Pol berinavo “Kin-iou nabameneaso, Parinio Tubo Vestas, mia monoka never kaso ka paripariku naio bo ga. Kiaku iliano nalo napano nojom̃a neberialio ea vio nei, abe burupati na ilirianiano napano abe riano laka garuei.

²⁶ Vite nalo napano nojom̃a nojukunu kanio, nemijikia batitigio bo ka Tubo Akripa naio mijikia ruei, abinime i bokar kiano vitiiano, nina naruei mila ana maka nemerou ka neverialio ea mirano. Vite nalo nei, maka ayotuba ea vio na telisu ga tai napano toro maka rijikia vo,

mia tomu nonovio amijikia ruei, ajum̃a aberiio va telabo bunu. ²⁷ ?Mia Tubo Akripa, venia naruei naio be kiamo jidomiano riano ea vite nalo nei? ?Kiniou nemial ka jau bunu, komonea iliano nalo na naverialiano nalo re nua, a?”

²⁸ Naruei Akripa ber ka Pol, berenio “!Ee, makanio! ?Peli jau komil ea bogo kiri bulati ga, jau koberiam̃a komijikia kovuru kiniou bunu neviedu neve Kristo kiano, na?”

²⁹ Ana Pol berdoṽe, berinavo “Ee, kiniou maka nejikia, neil bogo ve bulati ga ṽeli na ve tebievi, mia vite takurano ga nobolkouo ka mia Atua rila banei, nejidom ka jau, kamliko nalo dolu na, napano kumitum̃a kumiagago ka kiaku iliano, nejidom ka mia kamiu kumei kuvitibe ka kiniou. Maka never ka mia kamiu kuvar marimieni nalo na tibe ka napano nabario, mia neberenio bo ka kamiu kumei kuvitibe ka kiniou, napano nemijev Yesu Kristo ea kiaku iviso, nebinime i nebe toro vou ea naio.”

³⁰ Mo Tubo Akripa naio jetavoko iliano ea vio na, ana naio naljuo Vestas, bija Benisi, naliko tomu dolu nalo na tortoru napano ajum̃a ajutano mave naliko, nalo ajumormolu, abava tavio bereio. ³¹ Ana bogo napano abava tavio bisi na, ajum̃a aberverii kalo aberinavo “Toro na maka rila titai rivova leleio, napano rimemedu ka mia

naio rimıaro ęeli na mia rıvar vironiano rıvıorio.”

³² Ana Akrıpa ber ka Vestas, berınavo “!Ver toro na river re Sisa ga tıbare naio, mia naio mıjıkıa rıva tavıo ga tıbe na rueı!”

27

Aburu Pol ajuvan vıo Sisırıa ka ava Romo

¹ Ana ea bogo na, kınıou Luka, kınıou bunu nojo bıja Pol ea vıo Sisırıa, ana neberenıo kınıou bunu navan vıja naio Romo. Narueı bogo napano tomu na tor-toru nalo amıal ka bogo na ka mıa nuvano, aburular Pol nalıkıo nalo dolu napano aju joomo ea nalakoıano, amıdulo jua toro na toru na mıra tai jumıano. Toro na, naio sıano Julıas, a naio be navurımıaraboıano na taara na tomu nalo na mıra nei napano abıolo ka “Taara na Okastas.” ² Narueı naio buru kumemi nubano, nubajou koyou ea teı, narueı nalo amıleal uako tai na vıo Atramıtıam ana nubavın eaıo. Ana ea bogo na, Arestakas na vıo Tesalon-aıkıa na tanobuku na Masetonıa, naio bunu kumem-lıkıo. Ana kumemi numıdu uako nene nubano, napano mıarabo nene ka mıa rıva sel ea bulu yanınıobi nalo na tanobuku na vıo Esıa.

³ Ana ea kavıjo, kumemi nubınımeı nubokar vıo nei Saiton, ana ea vıo na, Julıas mıla bo ka Pol toru laka, napano naio mıjamo ka bauro ka rial kiano bılbılu nalo, a naio mıjamo ka nalo

amıjai Pol ka vite nalo tai ka kiano mıarabo. ⁴ Narueı kumemi numıtıvan vıo nei bereıo, nuburo ea teı banbano-o, ana numıtıęe jęgi ka bogo na, mıla ana bogo napano nubokar uleule na vıo Saıpras, mıa numısel ea taakano tıvelınıo, tıvelınıo bano. ⁵ Narueı nubar korovıo burumıara teı neıbano jo tavıo ea tanobuku juo na vıo Silısıa bıja vıo Pamvılıa, narueı nuburo nubınımeı nubokar komeli na Maera, ea tano-buku na vıo Laesıa. ⁶ Ana uako nei naio mıyon kumemi ea vıo na, narueı toro na mıra nei Julıas naio ba jırag mıarabo dolu. Ana naio mıleal uako tai na vıo Aleksadıria napano naio jo ban ea burıvenuo napano kumemi numısıdom ka nuvan ea na, İtalıa, ana naio mıla kumemi nuban ea uako nene kıja.

⁷ Ana kumemi nubatavıo bereıo ea teı, mıa jęgi bova ga, mıla ana nuburo melmelumu ga nubano-o nubokar legıano nalo tai, narueı numıla vıo toru, numıaveve ka jęgi jıbe na ga ba bokar jelati na vıo Nıtas, mıa jęgi juko kumemi batıtıęıo garueı. Narueı nubarıęılıę, numıakar jelati dolu na vıo Salmone ea uleule na vıo Kıt, ana numısel ea taakano teı melumu. ⁸ Kumemi numıaveve ga uleule nene, numıtımıa numıtakıı nubano-o napano jęgi jomıa mue kumemi bova kıa ga vo, ana nubano-o nubokar bulu yanınıobi

tai napano abio kanio
“Bulu Yaniniobi na Maraiu,”
vaataro ka komeli na vio
Lasea.

⁹ Ana kumemi numitua
kija vio na telisu, mia nalo
amial ka bova laka naruei,
bior jegi joña mila jibe
na ka kumemi, mia numi-
tua m̃arabo kirisiou ruei,
mia m̃arabo tebievi jo keano
vo, a vonganei, be bogo
na jegi bija burum̃ara ni-
avo ruei. Bogo nonovio
ga ajum̃a aberenio bogo
kirivova nei joña jikario
ea siberio na Jokoluolu Na
Viekokoano, mia vonganei,
jokoluolu nene barlaka ruei.
Naruei Pol naio mijog bova
ka vite na, naio ber vatitigio
banlo, berinavo ¹⁰ “Tom na
tomoruo nalo, kiniou nemi-
jog lubar ka ver ravano, mia
rivova laka, mia vite nalo
nonovio avavakovio ga. Kin-
iou nemial jibe ka mia uako
nei naio mijikia rimadudu
ga vija sano vite nalo, a kito
bunu, kiado meuliano nalo
amijikia avavakovio ea tei.”

¹¹ Mia toro na mira nei
naio maka riagago ka Pol,
mia naio miagago ka toro
napano jilanivu ka uako,
bija nana boru na uako
nei. Mia naljuo aberinavo
“Peli ga, mia rivu ga na,
mia kito ravan ga, ¹² bior
kito maka rejikia rotua vio
nei rivano-o rivokar napano
rotua bogo na bo bereio.”
Naruei nalo aberiio, ana
nalo telabo amial bo ka
kumemi nuvituvan vio nei,
aber kumemi nuvuro ga ka
nuva nuvokar bulu yanin-

iobi dolu tai, siano Viniks,
ea uleule nei kia ga vo, na-
pano amialio ka aber naio
naruei bo ka nuvituaio, ri-
vokar bogo na burum̃ara
jegi na niavo nei tubabinio.

*Burum̃ara jegi tai miuvu
titig searialo abano*

¹³ Naruei bogo napano
amial ka napano jegi biligio,
be jegi na saut naio jumolu
kija naruei, amialio ana
aberenio bo naruei, ana nalo
ajidom aber jegi na naruei
mia naio riuvu kumemi nu-
van ea bulu yaniniobi na-
pano numisidomio ka mia
nuvan eaio. Naruei nalo
aburu veru binimej mave,
ana na nuburo nubano, nu-
misel veve vio uro ga. ¹⁴ Mia
maka vesiou, ana kumemi
numiilo ka burum̃ara jegi
uro tai naio jumolu bin-
imej miuvu kumemi. ¹⁵ Jeg
nei miuvuvu toru jibe na,
naruei maka bunu nuvijikia
nuvuro ka napano numidu
jegi nei, mia nalo abilig ga
uako ana ajuvanio, amijamo
ka ga jegi nei joña miuvu
lilian kumemi nuba tavio ga,
naruei jegi nei joña miuvu
titig kumemi nubano jibe na.
¹⁶ Ana na kumemi nuburo
nubano, numitoluku vonio
kija ga ea uleule sesa tai,
siano Kaoda, mila naruei ea
vio na ga kumemi numim̃au
bijon ka uauako nene bano-
o, ana aburu lario binimej
mave. ¹⁷ Naruei nalo ajum̃a
amerou aber tibe m̃a mia
uako nei naio rivuruboŋe
na, ana nalo aburu teli na
tortoru nalo ajel yetano ka

uako, ana na amiorkar kanio ka rivokar vatitigio.

Ana amial ka napano jegi joña miuvu titian kumemi nubano dolu ka ga, ana nalo amerou ka aju aban vaataro kanio baraaña nalo na vio Saitis, vaataro ka vio Lipia, naruei nalo aburu bereio mñaaja. Naruei jegi miuvu titian kumemi nubano numitovulu vio nei, ana na vio melijo, mia kumemi nuburo nunu ga jibe na nubano.

¹⁸ Ana ea kavijo, ana jegi joña miuvuvu biloulo kia ga vo, a tei joña buku bilivilig kumemi, naruei nalo ajikar ka abuku bulavulag togogo nalo banvan ea tei. ¹⁹ Naruei ea legiano dolu nene bereio, vio bova kia ga vo, ana nalo abano amijubar bulag teli nalo a mñaaja nalo a vite nalo na jibe na, abuku lo abanvan ea tei bunu.

²⁰ Jibe na kanio legiano telabo bereio, napano mia vio yauo na mave naio kiri bobogio ga jo, maka nuval mñarivitano a maka nuval mirano mñerenio. Kumemi numial ka napano numitu kokouo ea jegi tai nei napano mia maka bunu ve toro tai sidomii ka river mia numeul.

²¹ Mia tomu nalo na uako nei maka bunu asinan legiano telabo ruei, nalo amijog bova toru laka, naruei Pol naio binime mi-alo, ana ber kalo, berinavo “Tomu nalo, verenio kami-kuviagago batitig ka kiniou nanua ruei ka bogo napano kito roju kia ga yako Krit, mia burumñara jogvaiano

a burumñara laluviano nei maka rijikia rivokar kito.

²² Ana vonganei, mia kiniou never titai van kamiu bereio, mia kamiu kuvijikia kuvijog rivu eaio. Neberial ban kamiu, ka mia kiado uako nei mia naio rimadudu navo, mia maka kito tai leleio napano mia rivakovio.

²³ Kiniou nemijikia vite nei bior ka napano bogiano ga, nemial kiaku Atua napano nojoña nobolkouo ka naio, nemial miila kiano nailiano tai binime maluvo ka kiniou. Nailiano nei binime jumolu ju vaataro ka kiniou, ²⁴ ana naio berinavo ‘Pol, komerou re. Mia jau monoka kavano-o kovoru Romo, monoka kotumolu kotua mirano Sisa kia ga navo, ana nemijikia never kaso, ka nalo napano ajua uako na kamliki kialo meuliano, Atua jidom rijamo kanio vanso ga ka mia nalo ameul ga, nalo tai rivakovio re.’ ²⁵ Naina naruei, tomu nalo, kamiu kuvijog rivova re bereio, kiniou nebiekar mñlea Atua ka mia tibe ka ga napano kiano nailiano berialio ban kiniou. ²⁶ Mia vite takurano ga, mia kito monoka rovilig kiado uako riva sel uro ea uleule na telisu tai.”

Nalo abinime vaataro ea uleule tai

²⁷ Mia jegi nei joña miuvu titig lelan kumemi nubano kia navo, bokar sude juo ruei napano numiturnā nuburo janea burumñara tei na Metetireniano nei. Naruei ka bogiano tai, tomu

nalo na uako nei abitilubar ka kumemi numitu nubinimeĩ vaataro ka uleule tai kovio tai. ²⁸ Naruei ajuvarvan teli batove, abuluku bululuoiano na tei bano-o bokario meta duelimo va veri [40], karina, aju kija ga telisu, karina amila bereio, abulukuio aber meta duelimo va rolu [30]. ²⁹ Naruei nalo amerou ka mia nuvuro nuva nuvijivi ea burum̃ara puruveru nalo tai p̃eli na venia, naruei nalo ajuvan veru na teremi veri iorou ea bareno uako, ana na nalo ajum̃a abolkouo ka veru teremi nalo nei monoka avokar kumemi, a ka viorijeni monoka rimeĩ soṑeli.

³⁰ Ana tomu nalo na uako aberiio, aberenio mia ala sibilili kumemi dolu nalo, ka mia ala vonio ka adu uauako nei ga avuro avauo eaio. Naruei nalo amila sibilili kumemi, aberinavo “Oi, mia kumemi nuvidu von veru temi nei rivan yako beamu vo, ka nuvila vonio ka rivurukar kiado buruako.” Naruei nalo ajuvarvan uauako batove ea tei.

³¹ Ana Pol bitilubario, ana ber ka tomu na mira nalo, berinavo “Ver kamiũ kuvisidom ka kamiũ kumeul, nalo na monoka kuverburelo ka atu vija kito ea uako ga.” ³² Naruei na mira nalo nei amijogio, ajumolu vaarakurano ga abano aje kokorov teli nalo na uauako nei, ana naio mialalo den uako bano.

³³ Naruei vaataro ka viorijeni mermeravo, ana Pol jidom asen titai, ana ber

kalo berinavo “Ei, binimeĩ bokar banei, be sude juo naruei napano kito rojua bogo na bova nei, maka rosinan batitigio rivu. ³⁴ Ana bo ka banei, kito rosinan vatitigio kija rivu bereio, kanio niabedo nalo amijikia amei sikili bereio, tibe na ana mia kito romijikia romeul. Tibe ka napano neberenio ruei, mia maka lele kiri vijudo tai rijikia rivakovio, mia kito rovinu rovu ga.”

³⁵ Naruei iorou ka napano naio berii vite nei bisi, naio ba midu joko tai, naruei bolkouo ea miralo, ber siva ban Atua biorio, karina burekokorovio jom̃a jenio. ³⁶ Ana bogo napano nalo dolu amialio ka napano Pol jom̃a jinan jibe na, nalo bunu amonea ka be riano, mia nalo avu ga, naruei nalo bunu ajaaro ka asinan bereio, ana ajinan. ³⁷ Mia kumemi nonovio napano numitua uako nei, kumemi nubokar toromomou juo duelimo va aluo ba ari [276]. ³⁸ Mia bogo napano abiniu ajinan bisi, amialio bo ka ala uako rime-lala lie vo, naruei nalo abar bulag m̃arauti nalo napano jibe ka sememi sinani-ano, abukuvukulo banvano ea tei.

Uako ba ijel tavio ga, ana amijeljelio ga abauro

³⁹ Naruei telikiiti napano viomijeni kario, ana kumemi numial vio uro jo vaataro ga ruei, mia maka nuvijikia vio be nei. Ana amial bulu yaniniobi tai jo, a

be bayono novo uro, ana na nalo aberiio, aberinavo mia ala vonio ka ala kenememi uako rivuro rivauro ea vio nene. ⁴⁰ Naruei nalo aje bulag teli nalo na veru teremi nalo, ajuvanlo ajubo ea tei, a nalo amijubar bulag teli nalo napano amior kakario ka vuu na uako, ana aburu māaaja sesa na buruako, ka mia jegi riuvu kumemi nuva nuvia yono.

⁴¹ Kumemi numitu nuburo bano-o, naruei numiilo ka uako ba miakar belia ga burumāara yonovoro tai napano tei buru bijiilo ju vio takurano yetano. Buruako na uako miakar bayono nene, naruei naio birakar jo jikili batitigio jo, maka bunu rijikia rikulkulu leleio. Naruei burumāara niatuva nalo ajumormolu abinimei amidon boʻve baren uako garuei.

⁴² Mia na mira nalo ajumāa aberii ruei, ka vere vite tai tibe nei mia auebinvinlo ga, nalakoiano nalo napano māa ju kuku kalo, ver makanio pēli mia nalo tai ala vonio ka aviako avatove ea tei, ajelio ava uro, mia avuro kilkil.

⁴³ Mia kialo toro na toru naio berburelo ka nalo ala re, bior napano naio jidom ka Pol naio monoka rimeul ga. Mia naio ber ka kumemi nubiniu, berinavo “Mo, kito napano romijikia romijeliou, kito rotukamu, ratabulu ea tei ana reia vonio ka rovoru uro. ⁴⁴ Ana kito napano maka rejikia reia, mia kito ravar mābulu, pēli na venia napano romijikia relealio ea uako nei ka

romijikia romonmonea mave eaio, ana kito iorou rava uro.” Naruei ea māarabo nei ga, kumemi nonovio nubano-o nuboruvoru uro ea vio nei, napano kumemi nonovio numeul bo ga, maka kumemi tai rivakovio.

28

Pol nalo ajua uleule na Molta

¹ Mia bogo napano kumemi nubiniu nubinimei numitu batitig uro bo ruei, ana na tomu nalo na vio nei abinimei amial kumemi, ana aber ka kumemi aberenio vio nei naio be uleule tai, siano Molta. ² Naruei nalo amila batitig kumemi bo laka, nalo abijuku bo ka kumemi mia. Ea bogo na, yuo jomāa bovo, naruei nalo amial ka napano kumemi numijog niavo toru laka, ana nalo ajovokar sebi, mia abitikar vatitig kumemi jibe na. ³ Ana na Pol naio ba miabu bagaro na yeto tai, naio jidom rivukuio rivan ea sebi, ana bogo napano naio bar jakou ea sebi, mia kiri maro sesa tai mijukukar jo bure yeto nalo nene, mia naio mijog sebi mijegio bitunu, naruei naio mijuojuo den yeto nalo nei, mia mēnkakar naio ea Pol jumāano, mia jerio. ⁴ Mia bogo napano tomu nalo na vio nei amial maro na māa jer binvin tomu jomāa jakilele ea Pol jumāano jibe na, ana nalo amijuvaluva melumu ga ealo, aberinavo “!Keialio, toro na yimo nalakoiano nei,

þeli naio be toro tai na m̃a muemue tomu dolu nalo telabo ruei! Tei jidom rila bin naio rim̃aro, mia naio buro kilkil ga, mia vonganei, mia maro na rila ka naio rimemedu na.”

⁵ Mia Pol þiliglar bere maro nei den juñano ban ea sebi, mia naio maka rijog titai, juñano maka rijalele leleio. ⁶ Mia nalo aju abitivitiio, aberiam̃a mia niabeno nonovio monoka aturobi ve tortoru, þeli na ver maka ana m̃a monoka naio rijoru rim̃aro ga, mia nalo aju rorea jibe na, banbano-o mia amial ka napano maro neibano maka ruebin naio leleio. Mia bogo napano amialio ka Pol naio bo ga, nalo ajidomii be dolu naruei, aberinavo þeli Pol naio be atua tai koviobo.

⁷ Ana vio neibano kumemi nubauo eaio, nina naio vaataro ka tubo na uleule nei kiano tiniavio, siano be Puplias. Ana naio buru kumemi nuban ea kiano vonuo, mia bitikar vatitig kumemi ka bogoti tolu, napano numitua juñano. ⁸ Ana bogo napano numitu kumemlika nalo na, tubo nei karam̃ano tormoruo naio jomon ea m̃ano jogu, naio mieyulu, napano niabene bitunu, a barbulo bunu. Ana Pol naio ba mial tormoruo nei, ana midu juñano joaio, bolkouo kanio, mila naio binimeis bo bereio. ⁹ Mia bogo napano tomu dolu nalo amijogio ka napano Pol mila vite nei jibe na ka tormoruo nei, nalo bunu

napano amie abinimeis, naruei kanalo mieiano nalo ajaluvo. ¹⁰ Naruei nalo ajaaro toru ka vite nalo nei, naruei ajum̃a abar kurano ka vite telabo ban kumemi. Ana kumemi numitua uleule nei bano-o bokar siberio tolu, ana bogo napano mia kumemi numitaluvo bereio, mia nalo abar sinaniano telabo a ijaiano nalo abinimeis, abar jua kenememi uako dolu ka rijai kumemi ea kenememi m̃arabo bereio.

Pol nalo abano-o aboru Romo

¹¹ Mo uako dolu na mia kumemi nuvisel ea naio be uako tai na Aleksadria kanano napano naio bunu jo kirisiou ea uleule nei, naio jo rorea ga ka bogo na jegi nei rivarlaka kario. Mia uako nene, ajisia kanio “Kasto a Polakis,” napano sio juo nei be tena atua juo na kanalo napano naljuo abe savoro, napano aje tavoru nene nalo jua buruako na uako nei. ¹² Ana numituvan vio, nuban nuboru ea vio tai bereio, siano Sairakius, numitua vio na bogoti tolu. ¹³ Karina nuburu veru bereio, numisel tivelinio taakano nuburo jibe na bano-o nuboru Rejamo. Mia numitua vio na bogoti takurano bisi, karina jegi saut novo tai miuvuvu, naruei nuburo m̃asosou ka bogoti juo, mia kumemi nuboru ea bulu yaniniobi na vio Puteol. ¹⁴ Ana na kumemi numitabulu den uako ea vio na naruei, ana

numileal namoneano nalo tealo, ana aburu kumemi nuban numitu kumemilikolo ka bogoti aluo [7]. Ana iorou ka nina, numial ka kenememi burum̃ara ieliano nei vaataro ka ribisi naruei, numitu nubinimei vaataro ruei ka burum̃ara komeli na yetemeriba nei, Romo.

¹⁵ Naruei namoneano nalo napano aju Romo, iliano bano-o bokarlo ka numitu numiel nubinimei rove ealo, naruei amielko m̃arabo ka kumemi. Nalo abinimei koalabo laka, nalo tealo abinimei aju rorea kumemi ea komeli nei napano burum̃ara yimo na ṽilṽiliano na Apias kanano naio joaio, a tealo abinimei lie vo bereio, abinimei nam̃ariga-o abokar komeli na yimo tolu na valauo nalo ajuaio. Ana bogo napano Pol mial ka napano nalo aju rorea jibe na, naio jaaro toru laka, a naio ber siva ban Atua ka napano vite nei mila ana naio mijog bo, mila ana mijog be p̃irinio bereio. ¹⁶ Ana bogo napano kumemi numiel nubinimei nuboru Romo, nalo maka adu Pol toa nalakoiano, mia amijamo ka naio ka mijikia rileal yimo tai ka naio toaio, mia nalo amidu toro na vitikariano tai jo bijaio.

Pol naio jo Romo ka yuka juo

¹⁷ Ana Pol naio jo Romo bogoti tolu bisi, ana miila toru ba ban kulo Ju nalo kialo navurim̃araboiano nalo napano ajua vio nei,

ana bogo napano abinimei vio takurano, Pol jukunu banlo. Naio ber kalo, berinavo “Banalo, kiaku tukunuano jibe nei: kiniou nebinimei ea vio nei bior ka yuka nanua beamu, kiniou nojo Yerusalemo, ana kiado tomu na tortoru nalo na vio na abuku kiniou naban ea nalakoiano, karina amidu kiniou nojoa natibureano nalo na vio Romo jum̃alo napano abitkar kiado buruvenuo. Ea tiveliñio na kiniou, maka nala vite tai ka kiado tomu nalo, a maka nala titai napano maka rimemedu ea kanado bajago p̃eli na ea korobido nalo kanalo iliano nalo, mia nalo amila jibe na ka kiniou dam̃ariga. ¹⁸ Ana bogo napano natibureano nalo na vio Romo abitii batitigio vite nei, bisi ana nalo ajidom ka kiniou nava tavio bereio ga, bior maka aial vite tai napano rimemedu ka mia asian vironiano van kiniou riviorio, ka river kiniou monoka nam̃aro. ¹⁹ Mia karina, nalo na navurim̃araboiano na kiado kulo Ju nalo amil vaarakurano bereio biorio, mia naio ba bova ga vo. Nalo amila jibe na, naruei ana kiniou nemial ka maka bunu ve kiaku vio tai naruei ka mia nemijikia nesel eaio, mia m̃arabo takurano ga nemijikia nesel eaio, naruei kiniou neberial ka nejidom ka Parinio Tubo Sisa na Romo ga, naio ga tibure kiniou. Maka notom̃a nesidomii ka novuru nalo

na ea kiado buruvenuo avan
 ea buruġnara komeli na vio
 nei,  eli ga, mia bior ka
 napano amila jikili laka ban
 kiniou jibe na, tenene na
 mila ana neberenio nalo
 monoka avuru kiniou nemei
 ea vio nei ea vio Romo.
²⁰ Tenene na kiniou nojoa
 vio nei naruei, ana nejidom
 kamiu monoka kuvijikia
 vite nalo nei, ana nebio
 ka rotu vio takurano tibe
 na ka nemijikia notukunu
 van kamiu kanio. Kiniou
 nejidom ka monoka ku-
 vijikia ka m arimieni nalo
 nei aju amior kiniou jibe
 nei, nina maka rivior kiaku
 vovaiano tai, nina bior ga
 Naverikariano na kanado,
 naio napano kito kulo Israel
 nalo nonovio roberenio ka
 roju ga ban naio.”

²¹ Naruei navurim araboiano
 nalo na kulo Ju nalo nei
 napano aju Romo nalo
 aber ka Pol aberinavo “Vite
 nalo na napano jau kojom a
 koberenio, mia kumemi
 nubitovitonia. Kumemi
 maka nuviai m esi tai napano
 tom a riverii jau napano
 kotaluvo Yerusalemomei
 ea kumemi, a namoneano
 tealo napano ajumolu eaio
 abinimei, mia maka averii
 jau van kumemi ka jau
 komila jibe na jibe na.
²² Mia kumemi numijog
 kiamo iliano nalo, naruei
 numisidom ka nuvijog kija
 bere vo kanamo jidomiano
 nalo  eli na kanamo mon-
 eano, bior ka napano be
 riano, kumemi numitum a
 numijog kijakija ga ka
 tivelinio ka nalotuanu vou

nei, mia numijog ga ka tomu
 nalo ajum a aber niegeniege
 janea vio nonovio.”

²³ Ana nalo aji bogo tai
 ka mia amei aial Pol bereio
 ea vio nei napano naio
 joaio. Ana iorou kanio,
 bogo napano nalo abinimei,
 abinimei nalo miroano mia
 miroano, naruei nalo ajum a
 amiagago ka Pol, ka napano
 jikar kavijo ga bano-o bokar
 m erenio batove mia naio
 jom a mil banlo. Naio berial
 banlo ka jum abe ana toro
 mijikia ba jouro ea nave-
 natuboiano na Atua kanano,
 a naio jom a berlogloglo
 jum abe ka napano tuboiano
 nalo na Mosis kanano,
 bija naverialiano nalo re
 nua kanalo iliano nalo,
 nalo amila meravo bo ka
 Yesu naruei, naio be kiado
 Naverikariano, ka napano
 nalo bunu ajum a aju rorea
 naio ka mia rimej rilarurlo.
²⁴ Naruei nalo tealo amijog
 Pol kiano iliano jibe ka
 be riano, mia nalo tealo
 maka amoneaio. ²⁵ Vite
 nei naruei mila ana nalo
 ajua taara juo kanio, ajum a
 ajidom bijovijonio-o, deio ga,
 aberenio bo ka abisi ga, ava
 vonuo beamu vo. Ana Pol
 naio ber vite tai maariano
 banlo, berinavo “Ei, kiniou
 nemial ka napano Niununo
 Lu ber riano laka ga na,
 ka napano nanua, naio ber
 iliano tai ban korobido nalo,
 ka napano naverialiano
 Aisea naio berial banlo.
 Naio berinavo

²⁶ *Jau kavan ea kanado
 tomu nalo nei, koverial
 vanlo tibe nei, kover*

*“Mia kamiu kuvijogio-o mia
kuvijog kulu re bogo
tai,*

*mia kamiu kuvialio-o mia ku-
vial kulu re bogo tai,*

*27 bior kamiu kumitibe ka
tomu nalo napano
kanalo jidomiano nalo
añarm̃aro ruei,*

*jibe ka ajiko burutilin-
ielo,*

*ṽeli napano miralo kiri
bono ga ju.*

*Mia verenio nalo ala re tibe
na,*

*ṽeli mia miralo nalo avi-
tilubario,*

*a burutilinielo nalo
ajoglubario,*

*a kialo jidomiano nalo
amijikia*

avokar jikiaiano ruei,

*tibe na amijikia aviliglo
amei ka kiniou ka mia
nalarurlo.”” Ais
6:9,10*

28-29 Mo vonganei, neberii
ka kamiu, neberinavo kamiu
monoka kuvijikia ka Atua
kanano Ioruriano naio jo
miadu ba tavio ba bokar ruei
nalo napano maka ave kulo
Ju, nalo naruei ajum̃a amijo-
gio a mia nalo nene naruei
ajogkario.”

Naruei bogo napano Pol
berial kiano iliano na maaro
nei banlo bisi, ana na nalo
ajumormolu abava tavio, na-
pano mia nalo aju tiniel jer
tanealo kar iliano nei.

³⁰ Ana Pol naio joa vio
na jibe na ka yuka juo, a
naio ga jom̃a bulu kunuano,
naio jo bitikar naio. A
ver toro kei napano bin-
imei mial naio, mia Pol

jaaro ka rivurukar naio ri-
van ea kunuano, ³¹ ana jibe
na, na naio jom̃a mioli-
olu ka Atua kanano nave-
natuboiano bogo nonovio
ban tomu nalo nonovio na-
pano naio milealo. A naio
jom̃a berlogloglo ka Tubo
Yesu Kristo, ka napano mia
maka bunu ve toro tai ka
ril van naio riviorio, ṽeli na
riverbure naio ka mia rila re
bunu.

Mesi Napano Pol Bivitauiāio Ban Namoneano Lu Nalo Na ROMO Verialiano Moti

Tukunuano bulati na niosi nei

Pol bivitauiā mēsi nei ka rila vatitig kiano m̃arabo, napano jidom riva rial namoneano nalo na Romo. Ea kiano jidomiano, naio jidom ka rim̃au bogo ve bulati vija tomu na moneano nalo na vio nei, ana iorou mia nalo aija naio, ka naio rijika riva voru Spen. Naio mijikia vatitigio bo ver toro rimonea Yesu Kristo, a rimei ve kiano toro napano takisor vatitig kiano bajago ea kiano meuliano, toro na mia rimemedu ea Atua mirano. Naruei bior vite na, naio bivitauiā mēsi nei ka riverial bajago na moneano nei van tomu na moneano nalo yako Romo. Niosi nei bokar burupati Pol kiano jidomiano ea marabo napano toro rijikia monmonea Kristo.

Beamu, naio ber ilivorvoriano ban tomu nalo na yimo lu na Romo, a berial banlo ka naio jo bolukouo kalo. Ana kario, naio berial burupati jidomiano na mēsi nei napano bernavo “Toluano vou nei jo berial Atua kiano bajago ka rila tomu nalo ave tomu memedu ea mirano. Bajago nei jo maluvo ea kito ea moneano, jikario ea kiano

tiiano rivano-o rivokar juluvati nene.” (1:17)

Ea mēsi nei, Pol judu ka berii kiano burupati jidomiano nei. Naio ber ka tomu nalo be iakurano napano abe yati na Israel, p̃eli maka ave yati na Isreal, mia abe veverarei ga, aju yetan ka moroano na kariano. Mia toro mijika ga rimei memedu ea Atua mirano, ver naio rimonea Yesu Kristo. Vite dolu, Pol berii meuliano na napano toro to riasol vatitigio ea Kristo, bija meuliano vou nene napano toro binimei be memedu ea Atua mirano. Toro napano monea Kristo, naio joa tum̃aro bija Atua, a Atua kiano Niununo mila napano naio be teau, moroano na kariano bija m̃ariano maka bunu vokar naio. Mia jikario ea mirano jimo [5] ba bokar mirano arolu [8], Pol berial bior vaio Atua jian tuboiano ban kiano tomu nalo, a berii bajago napano Atua kiano Niununo jo mim̃au ea tomu nalo kialo meuliano napano amonmonea Kristo.

Mia naio judu kia ka berii bajago napano taara na kulo Israel, a nalo napano maka ave taara na Israel, amijikia avuron ea verikariano nei napano Atua mila be tomu nalo na yetemeriba kialo ka atakiio. Bogo na naio jidom rila nonovio kiano iliano, naio berinavo bajago na napano taara na Israel nalo abilig taakalo ka Yesu, naio be togio na Atua Kiano Verikariano napano

naio tinienmiia tomu nalo na yetemeriba, naruei miila Yesu binimej, ka toro napano rimonea naio, naio mijikia rimej rive toro memedu ea Atua mirano.

Mia Pol monea ka taara nalo na Israel, mia maka ajikia avilig taakalo bogo nonovio ka Yesu. Ea togio maariano na mēsi nei Pol berii bajago napano memedu ka tomu na moneano nalo atakiio ea kialo meuliano, a mave liei, naio berii bajago na toro monoka tinien riia toro dolu. Naio berii bajago napano toro monoka takiiio ea Atua kiano iñauano, a bajago napano tomu na moneano monoka ala van parinio tubo a van toro dolu. Mia naio berii bajago napano toro na moneano monoka sidomiio vatitig ka rilabulag re toro dolu kiano jidomiano. Ea kiano juluvati mēsi nei, naio ber iliano nalo na ber kiano ilivorvoriano bija kiano bilbilu nalo, ba ban kialo bilbilu dolu nalo, a berenio iliano nalo na aiaia Atua.

Torogio nalo na niosi nei

Iliano moti bija burupati jidomiano na mēsi nei 1:1—17

Tomu nalo adu meuliano vou napano Atua jianio 1:18—3:20

Atua kiano mārabo ka rilarur toro 3:21—4:25

Toro kiano meuliano vou napano miasol ea Kristo 5:1—8:39

Atua kiano verikariano ban taara nalo na Israel 9:1—11:36

Bajago novo napano namoneano monoka takiiio 12:1—15:13

Iliano maariano 15:14—16:27

Iliano moti

¹ Bilbilu nalo na Romo:

Kiniou Pol neber kavijo bo pēli bogiano bo ban kamiu ea Yesu Kristo siano, na nebe kiano toro na iñauano, nebe atevi nei na Atua bio kin-iou, naio bijauia kiniou ka noimñau ka neverial kiano Ioluanu Vou.

² Ioluanu Vou nene, naio ju joomo ea iliano nalo na vivitauiano lu nalo na Atua kanano ruei, nina ea verialiano nalo na napano kanano naverialiano nalo aberialio nua nua binimej.

³ Burumñara vite napano Ioluanu Vou nei naio berialio, naio be Yesu Kristo kiado Tubo, napano naio be Atua kenerinio napano naio miila naio miyotuba ka kito ea yetemeriba nei. Naina naruei napano ea tivelinio na yati na māratabo na kanano, kito romijikia roverinavo naio moluo ea yati na tormoruo Parinio Tubo Teviti memedu. ⁴ Mia ea tivelinio na kanano niununo, naio be lu laka, naio miyotuba memedu ea Atua kanano yati ga. Amuebin naio mārō, ana ea kiano burumñara moroano, Atua mila naio jumolu meul bo bereio, naruei romijikia rovitilubarario batitig ka beriano, kiado Tubo nene naio be Atua kenerinio memedu.

⁵ Naio naruei bitirilar kin-iou ne-be atevi, a miila kin-iou ka nava noioliolu van taara dolu na tomu nalo napano maka ave Ju, ka nalo bunu amijikia amonea Atua, ana amijikia amon-monea kanano iliano nalo. Imauano na jibe nei naio be ijaiano novo tai napano Tubo naio jian ban kin-iou, naruei najaaro ka nala ka siano rivavin.

⁶ Mia vonganei, kin-iou nojo nomila imauano nei ea kami, bior ka napano kami bunu siemi joa vio na, kami bunu kamlika nalo dolu nei napano Atua biolo ka amei ave Yesu Kristo kiano tomu nalo. ⁷ Kami bunu tomu nalo napano naio tinien jii kami toru, napano naio bitiri bulag kami kube kanano namoneano lu nalo ea burumara komeli nei Romo, naina naruei najaaro ka nebivitaia mesi nei biedu ban kami.

Nebivitaia jibe nei, nobolkouo ka tiniesese a tumaro na karamado Atua vija kiado tubo Yesu Kristo kanalo, naio to ve tomoru ea kenemi meuliano nalo veve terakurano.

Pol jidom toru ka riva rimaluvo ka nalo na Romo

⁸ Beamu ka neverial vite tealo rivan kami, kin-iou nobolkouo ea Yesu Kristo siano, neber siva toru ban kanado Atua bior kami. Nojidom nela tibe na, bior napano vonganei, iliano nalo ea tivelinio na kenemi bajago novo nalo, napano

kuvitumolu kuvitu sikili ea moneano ea Kristo, naio jo ban ea vio miroano ruei. ⁹ Tenei naruei mila kin-iou najaaro toru, bior napano kirisiou ruei nojo nominau Atua kanano bija kanaku meuliano momou, nominauka neverial Ioluan Vou napano beriio kenerinio. A naio mijikia ruei ka napano nojo tinieku maio ka kami ea kanaku volkouano damariga, ¹⁰ a nojo nobika den naio bunu ka river memedu ea kiano jidomiano ga, mia naio rila kiaku marabo ka nomijikia namaluvo ka neadu ka kami. ¹¹ Nojidom laka ka neviedu neial kami, ka verenio nemijikia nejev ijaiano tealo na moroano na Niununo Lu juvan ban kami ka rila kuvisikili lie vo, mia naio riva laka. ¹² Kin-iou nomonea ka kiaku viekouoiano naio mijikia tunukakar kami, a nojidom nomei ka kenemi viekouoiano mijikia tunukakar kin-iou bunu, a tibe na kito roju romija bitiraviran bo ea kito bereio.

¹³ Banalo, nojidom kami kuvijikia ka va telabo ruei kin-iou nemila vio jikili ka neviedu kean kami, mia damariga marabo bisaro ea vite tealo, mila na maka neviedu vo. Mia nojidom toru ka neviedu, ka kanaku imauano mijikia rivar marati tai bunu ea kami napano kumonea ruei, jibe na napano bar ruei ea nalo napano maka ave Ju

ea vio dolu nalo.

14 Imauano napano joa juṁaku naio jibe nei, berinavo monoka noioliolu ea kiado tomu nalo memedu kulo Ju, a tomu dolu bunu, a monoka noioliolu ea tomu nalo napano amijikia vite ruei a nalo napano maka ajikia vite vo, ¹⁵ naina naruei mila na nojidom neviedu neverial Ioluano Vou van kamiu ea burumara komeli na kenemiu nei, Romo.

16 Ioluano Vou nei, naio be m̃arabo takurano ga napano Atua kanano moroano jo miṁau eaio ka ridu ioruriano riyotuba ea tomu nalo, mila na maka noimou leleio ka neverialio bogo nonovio. Ioluano nei naio miyotuba ea kito kulo Ju beamu, karina naio ba tavio ea nalo napano maka ave kulo Ju, naruei toro kei napano rimoneaio, mia rileal meu-
liano eaio.

17 Ioluano novo nei, naio be kiado m̃arabo ka remijikia romei memedu ea Atua mirano bereio, ka maka bunu rovokar vironiano na kiado kariano nalo, mia bo romijikia ka monoka retikar vija viekouoiano, a mia rala nonovio rivija viekouoiano, bior napano naio jibe ka iliano moruo tai napano Naverialiano Abakuku bere-
nio, berinavo

“Toro napano ver ga naio
rivarkar tiniene ea
Atua,

mia Atua rila naio rime-
i rimemedu rive riano,

a nina ga naruei naio be
m̃arabo na ajev meu-
liano.”

18 Marabo na aje meu-
liano naio jo, mia verib-
inio bija vovaiano abujo
laka ea tomu nalo na maka
ave Ju reraio ea yetemeriba
nei, mila naloaju aberbure
m̃lea Atua kiano iliriani-
ano, ana jibe na kito romi-
alio ka napano Atua naio
joa vio mave, kiano sini-
abu monoka riyotuba rilalo
ajikia. ¹⁹ Naio jo berloglog
kiano bajago vu nalo amiy-
otuba medave ea mirano
tomu nalo ruei, naruei bo
ka abitilubario, mia maka
asidom ajikia. ²⁰ Be riano ka
Atua naio maka ve kulorinio,
a toro maka rijikia rial naio,
mia jikar ea tiiano na yete-
meriba binimeibokar von-
ganei, tomu naloaju amial
kiano bajago novo nalo, ana
amijikia avitilubario ka naio
be Atua riano. Ver aial kiano
tiiano nalo ga, maka bunu
ajikia avika aver ka naio be
kenia. ²¹ Ver makanio, ami-
jikia ka Atua naio jo, mia
maka lele asidom ala kialo
jidomiano rivatove ka naio,
maka lele asidom aver siva
van naio rivior kiano tovu
ealo. Nalo maka asidomial
titai, banbano kialo jidomi-
ano nalo bujo ka melijokouo
batitigio. ²² Nalo be tinielo
ka aber abe masou, mia
nalo abano aba vovu batiti-
gio, ²³ a nalo maka bunu
alotu ka Atua napano naio
maka rijikia rimaro bogo
tai. Nalo maka asidom naio,
mia amim̃auka tavoru na-

pano midu mirano toro ĵeli mirano menu ĵeli mirano temeul nalo jibe niobi ĵeli venia, ana nalo be tinielo bo ka alotu ka tenalo nei naruei.

²⁴ Bogo na amila jibe na, Atua naio binimej tinien maro laka ea kialo veribinio nalo nei, naruei naio juvanlo ka avan bo kanio vija sidomvaiano venia napano tinielo jiio. Ea bogo nei naruei kito realeal ka napano tomu nalo aju amila bajago na imouiano ea mokotenalo nalo, ²⁵ mia naina monoka tibe na, bior napano abar bulag Atua kanano iliriani-ano, amidu sibiano ju keano, a maka bunu alotu ka Atua napano bo ka aiaia siano lu daŋariga, mia abatove ga ka vite nalo napano naio jiilo.

²⁶ Nalo abilig dabu lelan vite nonovio na jibe na, mia Atua maka bunu riverburelo, mia juvanlo aba amila pariparilo ea kialo sidomiano va nalo. Jibe ka tire nalo maka bunu avan vija suŋano nalo, mia aban bija tire nalo bereio, ²⁷ a suŋano nalo bunu, nalo maka bunu asidom aver bo ka asoro ka tira, tibe ka napano Atua naio berenio berinavo bo ka alaio, mia nalo ajidom suŋano ga, aju aban bija nalo bereio ea bajago napano romimouo ka roverio. Iŋauano nalo na jibe nei maka amemedu leleio, mia nalo napano ajurŋa amilaio, ea kialo meuliano nalo ga, aial vironiano napano memedu ka toro napano mila jibe na monoka rivario.

²⁸ Tomu kinkin na jibe na, maka aialerinio ea Atua ea kialo meuliano nalo, maka asidom titai kanio, ana Atua maka tokovio kalo, mia naio juvanlo ka kialo sidomsearioano nalo aburulo aba amidu momou ea bajago va.

²⁹ Amila jibe na banbano komial kialo meuliano binimej bujo ka bajago nonovio na lakorov tuboiano, bija vovaiano nalo, jokoluolu nalo, bija sidomvaiano ea kulo dolu nalo. Amijoku, amuebinvin tomu nalo aŋarmaro, abilvilialo, amila sibi, ajermi ka kulo dolu nalo, aberveriilo, ³⁰ ajian merano kanalo iliano nalo, a ea tivelinio na Atua, nalo maka asidomialio ga. A bija bajago nalo na bova nei, parilo kirisikili laka, abarvar kalo, amil vevavin, amila verikariano bior iŋauano vou na vovaiano napano nua makanio, mia bogo napano kialo tormoruo nalo amil banlo, amilkuei ga.

³¹ Tomu nalo na, romijikia roverinavo nalo maka aje masouano, maka adukar vatitig kialo verikariano nalo, maka ave tinievuiano rivu, maka tiniei riia toro leleio.

³² Nalo amijikia vatitig bo Atua kiano iliano ruei, amijikia ka Atua naio berkar ŋariano ban tomu nalo na jibe na, mia maka atovonio. Nalo aju ajidel dolu ka amila jibe na, mia mave ka nina, aju ajaaro lie vo ver amial kialo bilbilu dolu nalo aju amila bova jibe nei bijalo.

2

*Atua naio takurano tibure
tomu nalo*

¹ Jibe na, ver jau toro Ju tai napano *kojo komial vo-vaiano nalo na kulo dolu nei kialo, mia jau kosidomii tuñabe kanio?* Peli jau kosidomii ka jau kobo, nalo abova, mia maka leleio, vo-vaiano na joaso be verare ga, mia maka bunu kojikia kover titai. Jau kobe toro na tibure kulo dolu na, a *kojo kojibureso bereio kar napano jau *kojo komila tena javukia napano *kojo kojibure dolu nalo kanio.*** ² Mia jibe napano kito romijikia, Atua naio rije vironiano van tomu nonovio napano amila bova jibe na be verare ga.

³ Peli jau tai napano *kojo kojidom ka jau kobo bior napano *kojo komil ban toro napano mila korovio tuboiano, a jau bunu *kojo komila korov, mia bova jau *kojo kojidom ka vironiano na mia Atua sianio mia maka rijikia rivakarso.**** ⁴ Peli *kojo kojidom ka Atua naio tiniene bo laka, tinien miia toro, a kiano jidomiano tebievi, ana kober ðeli maka rijikia rila titai kaso?*

Ee, Atua naio bo laka jibe ka napano *kojo koberenio, mia kiano tiniememiano maka rijamo kaso ka kala du ka kalakorov tuboiano, mia naio ga rivurso koviligso kataluvo ea kariano nalo napano *kojoaio.**

⁵ Ana jau, maka kosidom koviligso leleio, jau pariparimo jikili ga bano, ana jibe na *kojo komila ka *kojo komivon kakar kiamo vironiano nalo banbano bokar bogo napano mia Atua kiano tiniemimiano tibure memedu tomu nalo.** ⁶ Ea bogo nei naruei mia naio rivar bulag van tomu nalo rivare ga tavukia venia napano nalo aju amilaio.

⁷ Jibe na, tomu tealó, nalo ajurmaro ga, nalo aju ajudu bogo nonovio ka amila bajago na bo napano mijikia rila sialo rivu ea Atua mirano, a mijikia rilalo avokar mermerano na vio mave. Venia na mia Atua sian vanlo, naio be meuliano napano maka rijikia ribisi.

⁸ Mia tealó, tomu na baravoiano, nalo maka amonea ilirianiano, a nalo aju yetano ka moroano na vovaiano. Venia napano Atua mia sian vanlo, nina vironiano napano riyotuba ea kiano burumñara tiniemimiano ga. ⁹ Mia bogokouo bija jogvaiano rimei rivokar tomu nalo nonovio napano amila bova, jikar ea nalo napano Atua bijauia bulaglo beamu, nina Ju nalo, ba bokar tomu nalo na vio dolu napano maka ave Ju.

¹⁰ Ana nalo napano kialo meuliano bo, mia avokar Atua kiano ilivuiano novnovo nalo, sialo nalo mia atu rivu vijaio, kiano tuñaro to vijalo. A nina bunu tikar ea nalo napano abe Ju, ba bokar tomu nalo na maka

ave Ju, ¹¹ bior ka napano Atua naio maka rivitii tomu nalo ve dolu, a naio mila memedu bare abiniu.

¹² Kulo Ju nalo aju yetano ka tuboiano napano Atua jian banlo ruei, ana verver amila korov tuboiano nene, mia Atua rije vironiano vanlo. A tomu nalo na maka ave Ju, nalo maka avokar tuboiano nene, mia ħeli nalo maka ajikia venia napano tuboiano naio berenio, a ver nalo amila bova, mia aṃarṃaro. Jibe na, kariano joa kito robiniu robe verare ga, a mia Atua monoka tibure kito rovinu. ¹³ Tomu nalo na amemedu ea Atua mirano, maka nalo napano amijikia ga venia napano tuboiano berenio, mia nalo napano Atua jaaro ka rivurlo, nina mia nalo napano kialo meuliano jakii vatitig bo venia napano tuboiano berenio. ¹⁴ Tomu tealo maka ave Ju, maka ajikia Atua kiano tuboiano, mia bekurano, kialo meuliano bo bano-o, kialo bajago jibe ka ga napano verver Atua kiano tuboiano jo bijalo ruei. ¹⁵ Nalo jibe ga napano venia na tuboiano jo beriio, naio joa kialo iviso ruei. Jibe na, bogo napano amijog iliano nalo reraio aberinavo jau kavan na, ħeli jau kavan nei, kialo jidomiano novo jo ber vatitigio kalo venia na bo a venia na bova.

¹⁶ Jibe napano ioluano napano nojo nomiololu kanio berenio, bogoti na toru nei

naio jo binimei, a ea bogo na, mia Atua sian van Yesu Kristo ka rivitii veve tomu nalo kialo jidomiano nalo, riva rivokar venia na amilavania joa kialo iviso, mia naio tibure tenalo napano amilaio, ba bokar naio napano aber ħeli toro tai maka rijikiaio.

Kulo Ju nalo bija Atua kiano tuboiano

¹⁷ Nemialio bo ka noil lie bereio ea tivelinio na vite nalo napano kito kulo Ju roju reberenio. Kito roju reberii jumabe napano kito naruei rajakii Atua kiano tuboiano, reberiaṃa kito naruei Atua jidom lie kito, ana mila napano kiado jidomiano bavavin laka. ¹⁸ Kito roju rober ka kito romijikia vite bo ea Atua kiano tuboiano, mila roberiaṃa kito ga romijikia vatitig Atua bija kiano tinieiiiano, kito ga romijikia vatitig vite nalo napano beriano a memedu bo. ¹⁹ Kito roju rober kito kulo Ju ga naruei bo ka kito rovuru ṃarabo ka nalo napano maka ave Ju, kar napano rober nalo abe merebono napano maka ajikia ṃarabo. Kito roberiaṃa kito ga kito robe yulu ka nalo napano ajua melijokouo, ²⁰ kito ga bo ka rala toro rimemedu napano milaluv ṃarabo, kito ga romemedu ka roverloglog vatitig nalo napano ajibe kiritete nalo, maka ajikia vite.

Mo nojidom never ea vio nei, bo ka napano

robitilubar ka Atua kiano tuboiano bujolou ea jiki-aiano novo a ilirianiano novo nonovio ruei, mia maka rivu ka rotu rosidomii ka rover kiado ga. ²¹ A

titai bereio na bova lie vo mave kanio, kito rosikili ka roverloglog kulo dolu nalo, mia nemial jibe maka rotu roverloglog vatitig kito bereio. Verver koto koioliolu ka toro ka rivina re, a bo ka jau kojo kobina kia ga vo?

²² Jau na kojo koberloglog ka toro monoka rila re siakaiano, ka venia jau bunu komilaio? A jau na kober ka tavoru napano nalo dolu amirñaukanio, nalo abova laka, jau kober be riano na, mia jau bunu, ðeli jau kojo kobina ka niogo vite nalo na abar joa kialo vio lu nalo, ina?

²³ Ea vio nei, monoka kito rover aua ve toru laka, bior kito tomu nalo napano rabarvar ka napano romidu Atua kiano tuboiano, mia roju romila niegeniege kiado Atua siano lu bereio, ka napano roju romila kokorov kiano tuboiano nalo na.

²⁴ Iliano Lu naio berenio kiado bajago naruei, berenio jibe na, ber “Kamiu tomu nalo na Atua kiano, kenemiu sibiano mila na tomu dolu nalo aju amilkue bova ea siano.”

Toro napano be toro Ju riano

²⁵ Jau kober ka apakuveuso ruei, ana kobe Ju tai riano, nina bo laka. A tena mijaso verver ga jau kojo komonea Atua kiano

tuboiano. A ver jau kolakorov tuboiano na, jau kobe Ju ka iakurano ga, jau kobova ea Atua jibe ga nalo napano maka abakuveulo. ²⁶ A ðeli toro tai naio maka tibe ka kulo Ju nalo napano apakuveuo, naio maka apakuveuo ga, a ver toro na rimonea vatitig tuboiano nalo, ea Atua kiano vitiano naio binimeï bare ka toro Ju ruei.

²⁷ Toro Ju naio apakuveu ruei a midu tuboiano, a ver naio maka rijogkario, naio monoka rivitigar vatitigio, ver makanio, Atua rivukular naio vatitig, mia rivuru toro dolu na maka avakuveuo ana napano mijogkar kiano tuboiano.

²⁸ Nina ka ea Atua kiano vitiano, nina be Ju riano, maka nana be Ju ea kuluniabene ga. A pakuveu napano Atua bitiio be riano, maka nana tavio ea toro niabene ga. ²⁹ Toro na Atua kiano riano, maka nana bokar ga vivitauiano lu nalo ka jumñano, a naio be toro napano Niununo Lu jo mimñau ea kiano iviso, napano kiano meuliano mijulu kon bo. Toro na jibe na, ðeli tomu nalo maka asidomiio ka naio be toro tai, mia Atua naio jaaro laka kanio.

3

Tonovo na bo laka na joa Ju nalo

¹ Kiniou nojomña nemil jibe nei, ðeli vikadeniano tai miyotuba, bika jibe nei, ber “Verver toro Ju be verare ga ka tomu dolu nalo, jibe ka

na koje koberiio, ka venia na sio na Ju naio bo, roberiamña ka nina naio be titai? Roju romila pakuveu ea kito, ka romei rove kulo Ju riano, a pñeli na ka iakurano ga?"

² Vikadeniano na naio memedu, a neberdoñeio jibe nei neber, Makanio, robarkar sio na Ju, naio be burumñara tolu tai napano mila bo laka ka kito. Bajulukuti vabe bereio na tomu nalo napano Atua midu kiano iliano lu joa jumñalo nalo? Maka nalo dolu tanea vio, mia kito kulo Ju nalo ga. ³ Be riano ka kiado tomu tealó nalo maka amonmonea Atua kiano iliano nalo nei, naruei vikadeniano naio jo ber jibe nei, pñeli mia Atua maka bunu riilivu ka kito tibe napano naio berkar ka rilaio? A makanio, maka tibe na. Be iakurano napano tealó nalo maka avokar vatitig Atua kiano iliano, mia Atua maka rijikia leleio tuvan bogo tai kiano verikariano na ban kito. ⁴ Peli kito tomu nalo romila sibi bogo nonovio, a Atua naio be riano bogo nonovio jo, jibe na napano Parinio Tubo Teviti naio ber ea Niosi na Iouano nalo, napano ber

*Mia nalo aialio napano jau kobe riano ga ka kanamo iliano nalo ka kotiburelo,
a mia nalo ajidom atibureso bereio, mia jau komemedu ga koje.
Iouano 51:4*

⁵ Kiado tokoriano nalo bova ga, a titai napano bo

kija, tokoriano nalo na amila meravo ea tomu nalo miralo ka Atua kiano tuboiano nalo napano juko vio ka tokoriano nalo na, nalo amemedu mia amemedu. Kiniou neber jibe na, pñeli mia kelvovu nalo tai atumolu averinavo "A verver kiado tokoriano nalo amila tenalo na bo nei, ka venia Atua tinien jer kito jidom sian vironiano van kito bereio riviorio?" Mia makanio, nina toro kiano jidomiano ga, ⁶ maka tibe na leleio! Verver Atua naio maka tibure kito kulo Ju, pñeli maka rivu ka naio tibure kulo dolu napano maka ave Ju, mia makanio, naio memedu a naio takurano ga be natibureano.

⁷ Vikadeniano dolu jibe nei mijikia rimei bereio, napano naio ber jibe nei, berinavo "Beamú neber nomonea Atua, mia iorou maka neiagago ka naio, naruei jibe nojo nemila sibi ga. Mia kiaku sibiano na jo berialio ka Atua kiano iliano ga be riano, a jibe na jo rila siano ka rivavin. Ana ver tibe na, ka venia naio jidom to tibure kiniou kia na vo ka nobova?" ⁸ A mia tomu nalo dolu aviligvilig iliano kinkin nalo tibe na riva vova lie vo, nalo aver "Verver bajago va berialio ka Atua kiano iliano be riano, bo ka kito rotu raladu bogo nonovio ka rala kariano ve miroano, ka rila Atua kiano iliano ve riano lie vo." Nalo tealó aber nojo nomioliolu ka jibe nei, a nina be sibiano ga, a nalo na napano aju aber, mia nalo avar vironiano rimemedu ka

kialo iliano va nalo nene.

⁹ Kiniou nejidom navan bere ea tena roju roberio, na rober toro na bar sio na Ju, mia tumabe ka naio? Peli tomu tealo be kialo vikadeniano ka mia bo lie ka naio jovulu toro napano maka rivar sio na jibe na, peli makanio? Bo ga, kiaku verdopeiano, neber maka tibe na. Jibe ka napano neber ruei, kulo Ju nalo bija kulo Kiriki, abiniu aju yetano ka moroano na kariano bare ga.

¹⁰ A jibe ka iliano nalo na niosi lu aberenio,

Maka lele toro tai na kiano meuliano memedu.

¹¹ *Makanio, maka toro tai na bitilubar m̃arabo, maka tai na jo milavio jikili ka rial Atua ea kiano meuliano.*

¹² *Tomu nalo ajitetere den m̃arabo na memedu, nalo abano bova laka, maka lele tai na miñau memedu bo. Iouano 14:1-3*

¹³ *Kialo iliano nalo bova, jibe tanunu na jono,*

buruminalo aju amim̃auka sibiano nalo, ililelaniano nalo aju amiyotuba ea kulu-niolo nalo, jibe ka maro va naio jerbin toro. Iouano 5:9

¹⁴ *Riano ga, niolo ju bujo ka ilikakarioano va bija ilijaleiliano nalo ga. Iouano 10:7*

¹⁵ *Jaalo nalo aju abarlo ajikiti jan ea vio ka ala bu-rukija riou,*

¹⁶ *kanalo ieliano nalo aba amila bulag vite nonovio, amila tomu nalo amijog bova.*

¹⁷ *Maka asidom asidomii ka m̃arabo tai na tum̃aro jo, Ais 59:7,8*

¹⁸ *miralo maka leleio abitolubar ka Atua naio jo bitikarlo. Iouano 36:1*

¹⁹ Ee, iliano nalo na amiyotuba ea Atua kiano tuboiano, a kito romijikia ka venia napano Atua kiano tuboiano berenio, naio jo jiloglog kito kulo Ju. Kito roju yetano ka tuboiano na, a toro na bitilubar venia na tuboiano na berenio, naio maka bunu iliano ka verenio, naio mijikia ka yetemeriba reraio amila kokorovio, monoka aviniu ka avar vironiano kanio.

²⁰ *Maka toro tai rijogkar ka tuboiano na Atua kanano rivare ka naio rimemedu ka Atua mirano, a tuboiano na mila na abiniu amijikia vatitig ka kariano joalo.*

²¹ Jibe ka, m̃arabo na monmoneano ea tuboiano, maka toro tai rijikia takii rivanvano-o rime i rimemedu ea Atua mirano, a nina mila na Atua mial bo ka naio mila vatitig m̃arabo vou dolu tai napano romijikia ratakiio.

Marabo vou dolu na naio bo laka, bior napano maka ve kiano tuboiano nalo napano mia toro monoka rijogkarlo. Marabo na, ilivivitauiano lu moruo nalo bija naverialiano nalo kialo iliano, nalo aberio ruei

tertelisu beamu nua, a vonganei Atua berialio ka kito ruei.

²² A m̃arabo nene jibe nei: naio be m̃arabo na moneano. Jibe na, toro kei napano biekoŭo ea Yesu Kristo, mia Atua rila naio rimemedu ea naio mirano kario. Marabo na maka ve tena tomu tealo ga, a tena tomu nonovio, ²³ ka napano abiniu amila kariano, maka tai na kiano meuliano rimemedu rivokar jeleig meuliano novo napano Atua jidomio.

²⁴ Mia bo ga, bior Kristo Yesu naio bulu bulag kito ruei, mila na Atua rila kito romemedu ea mirano, jibe ka jidomiano tai napano naio jian ban kito, binimeia ea kiano tinieseseiano ga. ²⁵ Naio bulu bulag kito ka napano Atua bitirilar naio jibe ka sida napano kiano burukija miou ka sekona bulag kiado kariano nalo kito napano romonea naio.

A jum̃abe ka tomu nalo na jikar yuka nalo re nua binimeia, bogo na Yesu maka rimeia vo? Maka reialio napano Atua rije vironiano vanlo ka kialo kariano nalo, ana p̃eli be jidomiano ka p̃eli Atua mije vironiano na kariano na tomu tealo ga, a tomu tealo maka rije vironiano na kialo kariano? Mia makanio, nina maka river tibe na. Bogobe nua ruei, na Atua jo mila kiano jidomiano tebievia ga, a jo jokoko vio ka kiano tiniememiano, a

naio mila jibe na ba bokar bogo na Yesu m̃aro ka kialo kariano na re nua bunu. ²⁶ Jibe na, Atua berloglogial ka kito vonganei ka naio miñau memedu bogo nonovio ga, mila na toro kei napano balea ga Yesu, mia naio meravo rivu ea mirano.

²⁷ Ver tibe na, mia kito romijikia ravarvar ka kito kar venia bereio? Maka titai, bior venia mila kito robo bija Atua bereio? Maka bajago na bo na jogkariano na kiano tuboiano napano rojidomii ka romila, mia maka leleio, bulapati nene, kiado moneano ea Yesu ga. ²⁸ Kenememi iolioluano aber jibe nei vonganei, ka toro rimeia rimemedu ea Atua mirano, joa ga naio kiano viekoŭoiano ea Kristo. Naio maka rijikia balea kiano iñauano novo nalo, napano naio rijogkar rivu tuboiano nalo nonovio na kulo Ju nalo kialo bogo nonovio, kar napano maka toro tai rijikia rila tibe na.

²⁹ Jibe na, romial napano Atua maka ve kiado Atua ga kulo Ju nalo, a be Atua na kulo dolu nalo bunu. ³⁰ Ee, Atua naio takurano ga, a be tomu nonovio kanalo, a verver toro Ju, naio mijikia rimeia rimemedu ea Atua mirano verenio ga riviekoŭo eao, a p̃eli verver toro napano maka ve Ju, naio bunu mijikia rimeia rimemedu ea Atua mirano verenio ga riviekoŭo ea naio.

³¹ Ana iliano nalo na

maka river ka bajago na
viekouoiano ea Yesu rivuku
bulag Atua kiano tuboiano
moruo napano ju, ka naio
maka bunu kiano iñauano
ka rilaio. Naio maka river
tibe na, naio ber ka bogo
napano roju romomea Yesu,
roju rabamenea vatitig
tenalo napano tuboiano nei
naio berenio, roju romilaio
be riano.

4

*Epraamo barkoro yeturu
jiloglog m̄arabo na viek-
ouoiano ka kito*

¹ Roju roberii jibe ka
bajago na viekouroiano ea
Kristo naio ga be m̄arabo
na robokar ioruriano, a
jum̄abe ka korobido nalo
re nua, jibe korobido na
toru nei ea kiado yati na
tormoruo Epraamo? ² Naio
mila iñauano novo telabo
napano Atua jaaro kanio,
a iñauano nalo nene na
maka ala naio rimemedu
ea Atua mirano. Verver
naio rimeĩ rimemedu kar
kiano iñauano, p̄eli naio
mijikia rivarvar ka naio
bereio, mia maka tibe na.
Maka toro tai napano mijikia
rivarvar ea Atua mirano
bior iñauano napano naio
milaio, ³ a viekouroiano ga
mijikia rila toro rimemedu
vija Atua, jibe ka napano
Epraamo kiano tukunuano
naio berenio ea Niosi na
Tiiano, napano berenio

*Epraamo naio biekouo jikili
ea Atua kiano verikar-
iano nalo,*

*ana Atua jaaro, midu
Epraamo kiano viek-
ouoiano na,
mila naio binimeĩ
memedu bo ea mirano
kario. Jen 15:6*

⁴ Kosidomii vonio, ver toro
na miñauka veru, bogo
na siberio burukorovio naio
monoka rivar kiano veru. A
kito rover re ka veru nei
naio be jidomiano tai na-
pano kiano toro na toru jian
ban miyotuba ea tinieno vu,
mia veru nei, toro na miñau
nei naio miñau jikili kanio,
nina naio memedu ka rivar
ve kiano.

⁵ A tivelinio ka toro
rimeĩ rimemedu ea Atua
mirano, naio maka ve titai
tibe veru napano romijikia
roiñaukanio, napano romi-
jikia rovar tibe titai napano
kito ga romijeio be kiado.
Kito, kiado iñauano nalo
abova ga, tenena monoka
ravalea Atua, napano naio
ga mijikia rivar bulag
vovaiano ea kiado meuliano.
Verver ga ravalea naio, mia
naio rila kito romemedu ea
mirano.

⁶ Tormoruo Burubati
Parinio Tubo Teviti naio
mijikia tena nua ruei, mia
kiano iouano tai beriio
jum̄abe mia rivu laka ka toro
napano maka rivalea kiano
iñauano nalo bereio, mia
balea ga Atua ka mia naio
saaro ka rila naio rimemedu
ea mirano. Iouano nene ber
jibe nei, ber

*⁷ Toro na Atua biekokoa
kiano vovaiano nalo,
napano miolkon bulag
kiano kariano nalo,*

*naio be ilivuiano tai
napano mia bo laka
kanio.*

⁸ *Toro napano Atua mial naio
jibe ka napano maka
bunu miamiamo tai
toaio, napano monoka
rivakar vironiano
kanio,
mia naio mijikia rijog
rivu mia rijog rivu.
Iouano 32:1,2*

⁹ Ana nalo napano amijikia ajog rivu jibe napano iouano nei berenio, nalo kei na? Ilivuiano nei, mia maka rijikia rimei ea tomu na apakuveulo ga, jibe kito kulo Ju ga, a mia rimei bunu ea nalo na maka ave pakuveulo. Nina meravo bo, bior jibe ka napano roberio, Epraamo binime memedu ea Atua mirano, maka ka napano naio be pakuveu ga, a binime memedu ea Atua mirano ka napano ga naio baleaio jikili.

¹⁰ A kito romijikia tena juñabe? A Atua naio ber Epraamo naio memedu ea mirano ea bogo vabe? Naio berenio ea bogo napano Epraamo naio be pakuveu ruei, ðeli berenio ea bogo napano naio maka ve pakuveu vo? Verver ravan bereio ea kiano tukunuano, mia reial ka Atua ber mia Epraamo memedu ea mirano bogo na naio maka ve pakuveu vo.

¹¹ Jibe na, Epraamo kiano viekouo-iano ea Atua, naina ga mila naio memedu ea mirano. Ea bogo neibano,

naio maka ve pakuveu vo, a iorou, Atua jian pakuveu ban naio jibe kijokijo tai napano berial ka viekouoiano ea Atua ga be ñarabo ka toro rimei memedu rivijaio.

Epraamo naio be toro na beamu napano jibe nei, ana tomu telabo abinime iorou napano maka ave pakuveulo ga, a nalo amonea Atua ana Atua mialo jibe amemedu ea mirano kanio. Nalo maka amoluo memedu ea Epraamo kiano torogio, mia vonganei nalo aju amial naio jibe naio be korobilo tai bunu, ¹² be verare ka naina be korobilo napano aju amila pakuveu kalo.

Beamu kito kulo Ju nalo roberiamña toro napano be pakuveu jibe tormoruo Epraamo, be riano ka miyotuba ea kiano torogio. Mia vonganei, jidomiano vou tai moluo napano jibe nei, berinavo toro napano mijikia river ka Epraamo be korobinio riano, nina toro napano naio biekoou ea Atua be verare ka Epraamo naio biekoou ea Atua, bogo napano maka rive pakuveu vo.

*Toro kiano viekouoiano
mila Atua kiano verikariano
binime be riano*

¹³ Nua nua beamu Atua berkar ban Epraamo ka mia kiano ilivuiano nalo amaluvo ea naio vija kiano torogio nalo, avan ea tomu nalo na yetemeriba reraio. Ana ka venia Atua jaaro ka rila verikariano nei

van Epraamo? Maka ka napano Epraamo mijogkar vatitig kiano tuboiano, bior ka bogo napano Atua mila verikariano na, maka tuboiano to vo, bogo na Atua jian tuboiano ban Mosis naio jo koalabo kia ga. Jibe na, romijikia rover ka Epraamo kiano viekouoiano ga mila naio memedu ea Atua mirano, ana Atua jaaro ka sian verikariano novo nei rivanio. ¹⁴ Verver verikariano na ve tomu nalo na aju amijogkar tuboiano ga, mia rila ka toro napano moneaio, rimoneaio ka kurano, mia rila ana Atua kiano verikariano sikili re tu. ¹⁵ Mia bereio, titai dolu mila meravo ka kito berenio Atua kiano verikariano novo nalo maka ajikia amaluvo ea bajago na jogkariano ea tuboiano. Nina bior ka bogo napano tuboiano jo, bajago na lakokoroviano na tuboiano monoka riyotuba, a iorou kanio, monoka vironiano tai kanio, ka napano maka toro tai napano jilimebi ka rilakorovio tuboiano bogo tai.

¹⁶ Jibe na, tuboiano maka rijikia rijai kito ka kiado vo-vaiano nalo amei memedu ea Atua mirano, mia Atua kiano tinieseseiano laka ea kito ana naio ga milaio. Naio mial ka roju ban naio, ka rabalea naio ga, ana naio mila robokar kiano verikariano nalo na bo. Nina maka Ju nalo ga napano tuboiano binimei ealo beamu ruei, a

tomu dolu nalo bunu napano amiasolo. Nalo abe tomu na vio ninio, a ver abar bajago na amonea Atua bare ka Epraamo monea naio, naina jibe napano nalo bunu amiyotuba ea kiano torogio. Mia bunu, kito robiniu ea taara na namoneano nalo ea yetemeriba reraio roju romial naio jibe korobido na toru.

¹⁷ A nina memedu ga ka venia napano Atua berkar ka Epraamo nua ruei, napano berkanio berinavo

"Kiniou nebitiri larso, jau kobe burupati na torogio na tomu nalo na venuo miroano."
Jen 17:5

Bogo napano Atua berkar jibe nei ban Epraamo, Epraamo maka rimemebiju, a bokar vatitigio bo, kar napano naio mijikia ka Atua nei napano mil banio, naio be Atua napano mijikia rila venia napano m̃aro rimeei rimeul, mijikia tii venia napano maka to, rimaluvo. ¹⁸ Be riano, Atua ber titai kanio napano jikili laka ka rimoneaio, bior berkar ka naio, berinavo

"Kiamo torogio nalo mia ave miroano mia ave miroano laka ea yetemeriba nei."
Jen 15:5

A bogo na Epraamo mijogio, naio moneaio jikili ka mia monoka tibe na ga naruei. ¹⁹ Ea bogo nei, naio mijikia ka naio bija koano tira Sera, kialo

mñerenio vaataro ka rijoru naruei, napano kiano yuka bokar toromomou [100], a koano tira maka lele rivar tete kija vo, mia kiano viekouoiano maka leleio rijoru.

²⁰ Naio maka sidomial titai mia kiano jidomiano jua ga venia napano Atua berkario. Kiano viekouoiano jo binimej jikili lie, a bogo nonovio jo miaia Atua a ber siva toru kanio ka venia napano mia rilaio. ²¹ Naio maka lele sidomii bogo tai river p̃eli Atua maka rivare ka rim̃auka takii kiano verikariano, ²² a kiano bajago na viekouoiano nei naruei mila na iliano Lu berial naio bereio, berinavo Epraamo biekouo ea Atua, naruei Atua berial ka naio memedu bo ea mirano.

²³ Ana iliano nei berial Epraamo naio takurano ga, ²⁴⁻²⁵ mia bo ka rodu tibe iliano tai napano berii kito nonovio, kar napano kito bunu romonea Atua ka mia naio rila kito romei romemedu ea mirano tibe napano naio mila ka Epraamo. Kito romonea ka naio naruei napano miila Yesu binimej ka rivokar m̃ariano kar kiado kariano nalo, a romonea ka Atua naruei midular Yesu den nam̃ariano ka rila rimeravo rivu ka kito romerevu bereio bija naio na ruei.

5

Kito romerevu bija Atua bereio ruei, remial tuñaro a saariano

¹ Bo ga, vonganei naio meravo bo ban kito ka

tenalo napano mila kito romerevu bereio bija Atua, naio be kiado viekouoiano ea venia napano Yesu mila ka rijai kito. A bogo napano romijikia ka romerevu bija Atua jibe na, mila napano romial ka tuñaro jo iviso ka kito bija naio, ² a mila napano roju bo joomo ea kiano tinieseseiano bogo nonovio. Jibe na naruei, kiado jidomiano jikili ka iorou, mia monoka rove togio joomo ea Atua kiano mermerano, mia rasaaro laka.

³ Mia maka rasaaro ga ka meuliano novo nei napano mia rimej iorou, mia rasaaro bunu ka bogokouo napano roju robiviuo vonganei. Peli romijog bova, mia rasaaro ga ka napano romijikia ka jogvaiano mijikia rila jidomiano rive tebievi lie, ⁴ a jidomiano tebievi rila bajago rimej rivu laka lie ea Atua mirano, a bajago nei bo rila baleano ea Atua rimej lie vo, ⁵ a baleano ea Atua rila kiado jidomiano maka rijikia rijoru leleio kar titai bogo tai. Nina bior ka Niununo Lu napano naio jian ban kito, bogo nonovio jo mison vatitig Atua kiano burum̃ara tinietiano ba joomo ea kito banbano-o kito robujo vatitig eaio.

⁶ Romijikia ka Atua naio tinien jii kito laka jibe na naruei bior napano nua, romijoru ea p̃ili tai napano maka rejikia rala titai bereio ka rijai kito, mia memedu ka

kiano bogo napano naio bi-
jauialario, naio miila Kristo
binimeĩ m̃aro kar kito tomu
va nalo.

⁷ Ea kito, maka roial m̃elea
napano toro tai mijikia ri-
jamo ka kiano meuliano
ka rilarrur toro dolu kiano
meuliano, p̃eli bogo teraku-
rano ga toro tai mijikia
rijamo ka kiano meuliano
ka rilarrur toro tai napano
aberiãna naio bo laka, mia
tena naruei Yesu mila ka
kito nonovio napano kito
tomu va nalo ga. ⁸ Atua

kiano tinietiano toru laka
jibe na naruei, kar bogo
napano kito tomu na kar-
iano nalo roju parido jik-
ili kia ga, Kristo binimeĩ
m̃aro kar kito. ⁹ Kiano

burukija miou jekon kito
romeravo ruei, ana robin-
imeĩ romemedu ea Atua mi-
rano a mila napano maka
bunu titai toa kito napano
naio mia ridu vironiano van
kito kanio. ¹⁰ Nua, bogo
napano kito robe Atua kiano
uolu kia ga, kenerinio kiano
m̃ariano mila kiado mere-
vuiano bija naio, a vonganei,
kar napano romila bilbilu bo
bija Atua ruei, mia kenerinio
kiano meuliano mila kito
bunu romeul to to dam̃ariga.

¹¹ Jibe na naruei, kito ra-
jaaro laka napano Atua bitir-
ilar kiado Tubo Yesu Kristo,
kar napano naio rila kiado
m̃arabo na merevuiano vija
naio, rotu vio takurano vi-
jaio bereio.

*Atam mila m̃ariano bin-
imeĩ, Kristo jian meuliano*

¹² Mia tenalo juo nei
m̃ariano bija meuliano,
naljuo abinimeĩ ea yete-
meriba jum̃abe? Toro na
beamu ea yetemeriba naina
Atam, a naio be toro na
beamu napano mila kariano,
a mila vironiano na kariano,
jibe m̃ariano, monoka ri-
maluvo ea yetemeriba. Mia
tomu nalo napano abinimeĩ
iorou, nalo bunu abokar
kariano, a m̃ariano bokar
nalo abiniu bunu.

¹³ Beamu nua, ea Mosis
kiano bogo, Atua maka
sian tuboiano vo, mia be
iakurano napano maka
tuboiano, bajago na kariano
jo ruei. Jibe na naruei, Atua
maka tiburelo ka bogo na
ka nalo amila kokorov kiano
tuboiano, kar napano ea
bogo na, tuboiano makan
vo, mia kialo kariano nalo
naruei mila na monoka
avar vironiano na m̃ariano
navo. ¹⁴ Romijikia ka jibe
na, bior napano jikar ea
bogo na Atam, binimeĩ
bokar Mosis kiano bogo,
maka tuboiano, mia tomu
naloaju am̃arm̃aro ga, kar
vironiano na kariano jo ruei
ea yetemeriba. Peli tealó
amila bova jibe Atam milao,
p̃eli amila todolu nalo, mia
ea Atua kiano vitiano, kialo
vovaiano nalo nene abiniu
abe kariano be verare ga.

Jibe na ga, romial ka ve-
nia napano toro takurano na
ga Atam milao, bokar tomu
nonovio kialo meuliano ea
yetemeriba, jibe ka ga venia
napano Kristo naio takurano
mila iorou, naio bunu bokar

kiado meuliano robiniu napano romoneaio.

¹⁵ Mia iñauano novo na Atua milaio napano maluvo ea kiano tinieseseiano naio bo laka, mijikia tovulu iñauano va napano Atam milaio napano maluvo ea kiano kariano. Atam kiano kariano naio takurano mila tomu nalo monoka añañaro, mia Yesu Kristo kiano tinievuiano naio takurano mila kito romemedu ea Atua mirano. Tenei jibe jidomiano vu tai napano kito romidu ga jibe na ga.

¹⁶ Atam kiano kariano na maka rila titai rivu leleio, mia jidomiano nei naio bo laka ka kito. Atua jibure toro takurano nei kiano kariano, naio ber ka kiano vironiano rivan ea tomu nonovio, a iorou, Atua mial jidomiano napano Yesu jian ban kito, napano bulu bulag kiado kariano nalo, ana berenio ka kito romemedu bo ea mirano bereio.

¹⁷ Be riano napano toro takurano kiano kariano ga, nina Atam, mila nañariano jo juvulu kito, napano mia mijikia rivar bulag tomu nonovio kialo meuliano. Mia iorou, toro dolu kiano tinievuiano, nina Yesu Kristo, jian jidomiano novo nei ban kito napano vonganei, romemedu ea mirano Atua, a rojuvulu ñariano ruei, a mia iorou robokar meuliano novo vija naio. ¹⁸ Ver tibe na, berial ka kariano takurano neibano Atam kiano midu tomu nonovio ajua vironiano, mia iorou, Yesu kiano iñauano

memeduano tai mijikia rivuru bulag nonovlo den vironiano nene a ridulo atua meuliano napano maka rijikia ribisi bogo tai. ¹⁹ Mia ber bereio ga, toro takurano parinio jikili, maka riagago ka Atua, ana mila tomu nonovio abe tomu na amila kariano, mia iorou, toro dolu miagago ka venia napano Atua berenio ka naio, ana ñaro ea ñakolkolo mila ka kito ve miroano romei romemedu rivu ea Atua mirano.

²⁰ Nua, Atua jian tuboiano ban Mosis, mia tuboiano nene jo berial ka tomu nalo ka kialo kariano nalo ju bujo laka. Mia bogo napano kariano nalo aju abinimei miroano lie bogo nonovio, Atua bunu ban lie vo, mila napano kiano tinieseseiano binimei toru lie vo. ²¹ Beamu, kariano buru ñariano binimei, mia ñariano nene na naio jo mila kariano jo juvulu bogo nonovio. Mia iorou, Atua mila kiado ñarabo ka romei memedu ea mirano, mia nina mila ka vonganei kiano tinieseseiano naio juvuluio, kar napano jo mila ka kito roviniu napano romonea Tubo Yesu Kristo, mia rovokar meuliano napano maka rijikia ribisi.

6

Bo laka ka kito robisi ka kariano, kito romeul vija Kristo

¹ Jibe ka napano neber vonga, kito robe tomu nalo na romila kariano, mia Atua

tinien jii kito biekokoa kito. Ana ka nina, bo ka kiado meuliano vonganei mia tumabe? Peli tomu tealo nalo aber mia bo ka rotudu ka rola kariano ve miroano, ka rila mia Atua kiano tinieseseiano bunu to rimei lie bereio ka naio todru ka riviekokoa kiado kariano nalo nei? ² Mia makanio, maka rijikia tibe na leleio! Kito romijikia rover ka tivelinio na sidomiano va na laiano na kariano, kito rojibe tanunu, monoka robisi ka naio na ruei, bo ka rotu re rolaio.

³ Kosidomii vonio bogo napano abaruei ea kito ka rove takurano vija Kristo Yesu. Ea bogo na, venia napano maluvo ea kito bare ga ka venia napano maluvo ea naio nua ruei. Jibe beamu, naio m̃aro bior kiado kariano, a vonganei, bogo napano abaruei ea kito, kiado meuliano moruo na kariano bunu naio monoka rim̃aro. ⁴ Beamu, nalo atuvan mokotenano mon luku ea vio na m̃ariano, a vonganei, bogo napano abaruei ea kito, monoka rotuvan bajago na kiado kariano nalo, a bo ka robisi vatitigio eaio. Mia beamu bunu, Atua mila im̃auano na iloiano napano mila Kristo meul bereio, a vonganei, bogo napano abaruei ea kito, rojumolu bereio ka roiel ea meuliano vou tai.

⁵ Jibe na, kito robe takurano bija Kristo ruei kar napano naio juvan kiano meuliano ea yetemeriba nei

naio m̃aro, a kito bunu monoka rotuvan kiado meuliano moruo nalo. A romijikia be riano ka mia rove takurano vija naio bereio navo, kar napano naio midu bereio meuliano vou tai, a mia kito bunu rodu kiado meuliano vou.

⁶ Mia kito monoka rosidomii bogo nonovio, ka bajago na laiano na kariano napano romoluo bijaio, jibe napano ajuku kakario joa m̃akolkolo bija Kristo. Tibe na, naio mila na maka bunu rala kariano nalo napano mokotenado ajidom ala, a kariano maka rijikia rive boru ea kiado meuliano jibe ka napano kito tomu nalo na kiano im̃auano ga. ⁷ Bo laka kito rom̃aro ka kariano ruei, mia moroano na sidomiano na laiano na kariano monoka ribisi ea kito, bior rojibe ka tanunu napano sidomiano va na kariano maka rijikia rila titai ka kito leleio. ⁸ Be riano ka beamu, jibe ka napano rom̃aro bija Kristo ruei, ana vonganei, kiado moneano jikili ka mia rotu romeul vija naio rivano.

⁹ Kito romijikia ka bogo napano Atua mila Kristo meul bereio den nam̃ariano, mila ka Kristo mia meul rivanvano-o mia maka rijikia leleio rim̃aro bogo tai bereio, m̃ariano kiano moroano maka rijikia rivokar naio bogo tai. ¹⁰ Kiano m̃ariano nua na, naio be m̃ariano tai na rivar bulag vironiano nonovio na

kariano, a kiano meuliano vonganei, naio be meuliano tai napano ka ridular Atua siano, ¹¹ a mia monoka tibe na ga ea kito. Monoka rosidomii ka kito bunu bo ka robisi vatitig ka bajago na kariano, a damariga monoka rodular Atua siano to mave ea meuliano vou nei napano rojuao bija Kristo Yesu.

¹² Jibe ka, kiaku iliano na temi tai ea vio nei jibe nei, ber kamiu kuvituvan re jidomiano na laiano na kariano rimei tibe ka moroano na jikili tai napano to rive boru ka kamiu. Ver makanio, mokotenemiu nalo, napano nalo be tena yetemeriba nei ga, mia nalo atu aiagago ga ka sidom vovaiano na bajago napano kito tomu nalo romoluo bijaio. ¹³ A mia ver tibe na, maka rimemedu, kar torogio nalo na mokotenado, maka riyu ka amei tibe tenalo na imauano napano vovaiano minau bija ka rila kiano bajago va nalo. Beamu, kito jibe tanunu nalo, napano meuliano na Niununo maka toa kito leleio, mia vonganei Atua mila kito romeul bereio, ana monoka rodu kiado meuliano vou nei ea naio bereio ka naio rivuru ka rila kiano imauano. Jibe na, mia torogio na mokotenado nalo amei tibe vite nalo na imauano napano Atua minau bija ka rila kiano bajago memeduardo nalo.

¹⁴ Nua, roju yetano ka tuboiano napano Atua jian ban Mosis, bija kiano vironiano nalo, mia romilavio ka

rojogkar bano-o mia maka leleio, maka rovere ka ro-vokar ioruriano eaio. Jibe na naruei, Atua tinien jii kito a vonganei jo mijai kito ka jidomiano na laiano na kariano maka bunu rijikia vurudidig kito leleio.

Kariano maka bunu vurudidig kito, mia kito tomu nalo na imauano na bajago memeduardo

¹⁵ Neber vonga ruei ka kito maka rotu yetano ka tuboiano napano Atua jian ban Mosis kar rojev ioruriano eaio, mia nomerou ka peli tomu nalo tealoadu kiaku iliano nei riva rivova. Peli ajidomiio aberiamia, O, Pol jo ber ka kito maka rotu yetano ka tuboiano, mia vonganei romijikia rala venia na bova napano rojidom rola, naina bo ga na, mia Atua tinien tii kito viekokoa kito. Mia makanio, maka never tibe na leleio. ¹⁶ Kamiu monoka tiniemiu maio ka bogo napano toro tai ju yetano ka tubo tai, naio monoka takii tubo nene kiano iliano a monoka rimei tibe kiano toro na imauano. A jibe na ga bunu ea kiado meuliano. Verver sidomiano va to rive boru ka kiamo meuliano, mia jau monoka kala kariano nalo napano naio jidom ka kalaio. A verver kiamo tubo naio be Atua, mia koto koimauka kiano imauano novo nalo. Marabo juo nei, tai mia rila jau vija Atua kuvitibure kamiu to tobo to, ana dolu nene mia rilaso komemedu rivu vija naio.

17 Beamu, kamiu bunu kube tomu nalo na iñauano na yetano ea moroano na kenemiu sidomiano va ga, mia siva toru ban Atua napano neberloglog kamiu, ana kamiu kumidu dañariga vatitigio ea kenemiu jidomiano, kumitakiio vatitig ea kenemiu meuliano. 18 Jibe na, kamiu kuvitaluvo den tubo va nei re nua, maka bunu kuve kiano tomu na iñauano, mia vonganei kube tomu na Atua kiano iñauano napano kumitua kumila tenalo na memedu jibe napano naio jidomio. 19 Nemijikia ka verloglogiano nalo nei ajikili kija kar napano toro kiano jidomiano maka tibe Atua kiano jidomiano, nina naruei mila na nemijai kamiu nemil ea kijokijo napano berii tomu nalo na yetemeriba nei ga, jibe tubo nalo bija kialo tomu na iñauano nalo.

A kamiu monoka kuvitilubar vatitig nioti iliano nalo nei, ka beamu, jidomiano na laiano na vovaiano naio toru laka ea kamiu, napano ju miyuku kiki ea torogio na mokotenemiu nalo amila kariano nalo napano kirivova mia kirivova, mia vonganei maka bunu tibe na. Vonganei, jidomiano na laiano na bajago na memeduo monoka ve toru ea kamiu, napano mijikia rila ka kenemiu meuliano rimei ve lu mia ve lu.

20 Bogo napano kumitibe ka tomu na aminauka kariano ga, moroano na jido-

miano na laiano na bajago memeduo maka rijikia rinau ea kamiu, 21 ana kamiu kumila iñauano va nalo. A tenalo na, maka rijai kenemiu meuliano nalo leleio, a nalo amidu kamiu kumitua ñarabo na ñariano memedu, mia vonganei, ver kuvitu kuvisidomilo bereio, kuvimou laka ka venia napano kumilaio. 22 Mia vonganei, Atua naio midular kamiu den bajago na sidomiano na laiano na kariano neibano, kubinimei jibe naio kiano tomu na iñauano nalo, mila napano bo laka ea kenemiu meuliano napano kubinimei kube lu bo ruei, a vonganei kuvitua ñarabo na meuliano na maka rijikia ribisi.

23 Vuluiano napano kariano rila ka toro rijeio, naio be ñariano napano maka rijikia ribisi, mia kiado Tubo Yesu Kristo mila napano robokar meuliano na maka rijikia ribisi, napano maka rovolio, a naio be jidomiano tai napano Atua jianio ban kito jibe na ga.

7

Kito namoneano nalo rotu re reseltano ka Tuboiano

1 Bilbilu nalo, nemijikia napano kamiu kumijikia vatitig tuboiano nalo ea kenemiu buruvenuo, a mia neberii tenalo tai ea tivelinio na tuboiano nalo nei napano mijikia rijai kiado jidomiano nalo ea tivelinio na Atua kiano tuboiano napano roju reberio.

Tenalo na jibe nei, ka ea tuboiano, bogo napano kito roju romeul kia ga vo, monoka romoneaio, a ver romaro, maka bunu rotu reseltano kano. ² Kosidomii vonio bajago na toro buru tira, naljuo ajoro. Ver tira tai, bogo napano koano meul kia ga jo, tuboiano jikili ka tira nei monoka to vatitigio tulaka vija koano sumano nene. A bogo napano ver toro m̃aro, tuboiano maka bunu riverii titai ka tivelinio na tira neibano, ka naio monoka to tibe na koano na toro nei kia ga vo. ³ Jibe na, ver tira nene, koano sumano meul kia ga ana naio ba bina ka toro dolu, mia tuboiano ber ka naio mila siakaiano. A ver koano sumano m̃aro den naio ruei, tuboiano maka bunu sikili tu ka river titai vanio. Naio mijikia riva soro ka toro dolu tai bereio bo ga na, mia maka siakaiano na.

⁴ Bo ga, bilbilu nalo, jidomiano na jibe ka kijokijo tai ga ka verial van kito ea tivelinio na tomu nalo vija tuboiano napano Atua jian ban Mosis. Nua, tomu nalo aju ajeltano ka tuboiano na, napano monoka amonea naio ka avokar ioruriano, mia vonganei, tuboiano nene naio m̃aro den kito namoneano nalo. Vonganei kito maka bunu rotu roseltano ka tuboiano, a romijikia rava rotu roseltano ka toro dolu, nina Kristo napano naio m̃aro kar kito. Atua burumeul ea naio bereio, mia rila ka kito tarati nene

nalo mia rovar m̃arati nalo na bo bo laka napano naio jidomio.

⁵ Beamu, bogo napano roju rojeltano ka bajago va kiano moroano napano abar kito bijaio, kiado sidomiano va nalo amim̃au ea mokotenado, amila romila kariano telabo. A bogo napano romijikia ka Atua kiano tuboiano naio jo juko vio ka kariano nalo nei, ber ka kola re nina, kola re nina, tenena mila kiado sidomiano va nalo abavavin lie. Jibe na naruei, tuboiano na verbureiano na bajago va nei ju mila ka kito rovova lie, a midu kito rojua m̃arabo na m̃ariano memedu. ⁶ Tuboiano na bokar jikili kito jibe na, mila robinimei robe tomu nalo na im̃auano kurano na tuboiano moruo nalo napano abivitaualo nalo miroano aju. Mia vonganei, romaro vatitigio ea m̃arabo nene, rojaluvo denio, ana robinimei robe tomu na im̃auano kurano ka m̃arabo vou novo nei Niununo Lu kiano.

⁷ Ana kamiu kumisidomii jumabe ka kiaku iliano nei, napano neber Mosis kiano tuboiano ju mila kiado sidomiano va nalo abinime i abavavin lie? Peli kamiu kuvitu kuvisidomii ka jibe nei kiniou nojo neber ka Atua kiano tuboiano bova?

Mia makanio, maka never tibe na, kar napano tuboiano kiano im̃auano novo ka rilaio. Verver maka tuboiano, mia maka rejikjikia ka navurikoro-viano na tuboiano naio

juñabe. Jibe tuboiano ber jikili berinavo “Tiniem tii re tomu dolu kialo saba” a ver tuboiano maka riverenio, mia maka rejikia tinietitiano naio be venia, ðeli tinietitiano naio be bajago na bova juñabe. ⁸ Riano ga, bogo napano tuboiano juko vio ka tinietitiano nei, vonganei ana jidomiano na lakoroviano na tuboiano jumolu mial vio tai ka sel eaio, mila tinietitiano nalo abinimei telabo joomo ea kito. Jibe na, tuboiano kiano iñauano ju, ka ver maka tuboiano, mia maka rejikia rovitilubar bajago va na laiano na kariano napano abar kito bijaio.

⁹ Jibe beamu, maka nejikia tuboiano, ana maka nosido-mialio, noju jibe na ga. Mia iorou kanio, nebitilubar ka tuboiano ber ka “Jau tiniemo tii re tomu dolu kialo saba,” ana vonganei nobitilubarario naruei ka nojo nomila korovio tuboiano, ¹⁰ a nobitilubar ka monoka novar vironiano riviorio, nañaro.

Jibe na, bajago na moneano ea tuboiano naio maka ve mñarabo na vokariano na meuliano, mia tuboiano binimei jibe mñarabo na mñariano na kanado ruei. ¹¹ Beamu, roberiamña tuboiano naio be mñarabo na meuliano, a nina kiado jidomiano va na laiano na kariano napano mila lelan kito ga, mila rosidomii tibe na. Mia maka tibe na, ka napano romila korovio tuboiano nene, ana

midu kito rojoa mñarabo na mñariano ruei. ¹² Naina naruei iñauano napano tuboiano jo milαιο, a maka never ka bova, kar tuboiano nei be lu mia be lu, a kiano iliano nalo amemedu a abo.

¹³ Ana ðeli mia tealó avika vikadeniano, averinavo ver be riano ka tuboiano be tonovo tai, a juñabe jo mila tomu nalo monoka avokar vironiano na mñariano? A makanio, maka never ka tuboiano na mila kito monoka rañaro, mia kiado jidomiano va na lakoroviano na tuboiano nei, naio ga milαιο. Iliano na tuboiano nalo abo, mia bogo na kiniou nemila kariano, kiniou ga nojo nomidu kiniou nojua mñarabo na mñariano. Verver maka tuboiano nei, mia maka rejikia ka kariano naio be venia, a mia maka rejikia venia na bo a venia na bova. A bogo napano tuboiano jikili ju, mila meravo bo ka kito ka bajago na laiano na kariano napano jua kito, bova mia bova.

Tivelinio juo amila sini-abu joomo ea tomu nalo kialo jidomiano

¹⁴ Jibe napano neber, Mo-sis kiano tuboiano be lu laka, maluvo ea Atua kiano Niununo, a nemial napano kiaku bajago maka lele ve lu, nojo nomirñau jakii ki-aku sidomiano va nalo ga. ¹⁵ Tenalo na bova napano nojo nomilaio, maka nejikia vatitigio nojo nomila juñabe, ðeli nemila kario

venia, bior tenalo novo napano nojidom nala, maka noto nalaio, mia tenalo na bova napano maka nosidom nalaio, naina naruei nojo nemilaio.

¹⁶ Naina naruei neber ka Atua kiano tuboiano bo, kar napano monoka tuboiano tai to ka tokovio ka kiaku vovaiano nalo na, napano jibe ka neberiio ruei, maka nosidom nalaio, a nojo nomilaio ga.

¹⁷ Jibe na ga naruei, maka kiniou napano nosidomii ka nala vovaiano nalo nei, mia bajago na sidomiano na laiano na kariano napano jo miñau toru ea kiaku meuliano, naio naruei jo milaio.

¹⁸ Mia kiaku bajago na sidomiano na laiano na kariano na, maka neial ka naio rila tonovo tai vo na joa kiaku meuliano. Bogo telabo kiaku sidomiano naio ber monoka nala saba memedu, a iorou kanio, maka bunu nalaio.

¹⁹ Naina naruei jibe namãa nojo neberenio: maka noto nala tonovo nalo napano nojidom nalaio, a vovaiano nalo napano maka nosidom nalaio, tenalo na naruei nojo nomilaio. ²⁰ A verver noto nala vovaiano nalo napano maka nosidom ka nalaio, naina berenio ka kiniou maka nala rivu na, todolu tai jo miyuku ea kiniou ka nalaio, naina bajago na laiano na kariano napano joa kiaku meuliano.

²¹ Bajago na laiano na kariano neibano, nemialio jibe tuboiano na jikili tai bereio napano jo miñau ea kiniou. Peli bogo tealó nojidom nala

tonovo tai, mia jidomiano va jo vaataro ga, milavon ka rivuru kiniou navan vova bereio. ²² Bogo telabo, ea kiaku jidomiano kiniou takurano, nojo nojidomii vite nalo na Atua berenio, a nemial kiano iliano nalo abo laka, ²³ a nomijog ea kiniou jibe iliano dolu tai bereio naio bunu jo mil. Nina bajago na kariano, napano jo miyukyuku kiniou ka noto neseltano ka moroano na kiaku sidomiano va nalo. Jibe napano kiaku sidomiano va nalo nei, ajua mokotenaku,aju amila burumãara mira bija kiaku sidomiano novo nalo napano nalo ajua kiaku jidomiano.

²⁴ Tomnei, sidomiano novo bija bajago va, naljuoaju amila baravo ka naljuo ea kiniou jibe na, kiniou nomijog bova, nemial kiado meuliano ea yetemeriba na vokariano na mãariano nei jikili laka.

A mia kei naruei mia mijikia rijai kito, kei mia mijikia rivar bulag kito den jogvaiano nei? ²⁵ Kiado meuliano jikili kija, kar napano ea tivelinio tai, kiado jidomiano jidom rimonea Atua kiano tuboiano, a ea tivelinio dolu nene, bajago na laiano na kariano jo miñau ea mokotenado.

A riano ga, siva toru ban Atua, kar napano naio miila Yesu Kristo kiado Tubo binimeí, napano mia rijai kito, ridular kito den jogvaiano neibano, a rilarur kito.

8

Meuliano novo bija Niununo Lu

¹ Kristo Yesu binimei ka rilarur kito, naruei mila ka kito napano kiado meuliano jo bo bija naio ruei, mia Atua maka leleio rijikia ridu vironiano van kito bogo tai.

² Nina kar napano beamu, kito rojua meuliano va tai napano bajago na kariano bavavin a napano berkar m̃ariano ban kito, a iorou, Yesu Kristo midu kito rajaluvo meuliano na, midu kito rojua m̃arabo vou dolu tai napano romijikia rovokar meuliano nabo napano Niununo Lu jianio.

³ Tomu nalo amila vio ka amonea vatitig Atua kiano tuboiano ka avokar ioruriano eaio, a maka ajikia ala kar toro parinio kirisikili laka. A venia napano maka ajikia alaio, Atua naruei milaio. Naio miila kenerinio Yesu binimei ea yetemeriba, mila mokotenano a kiano meuliano, be verare ka kito tomu na kariano. Mia Yesu binimei mijamo ka mokotenano a kiano meuliano nei jibe sida tai ka uelar vironiano na kiado kariano.

⁴ Vironiano na kiado lakoroviano na tuboiano, naio ga bario, mila kito romemedu ruei ea Atua kiano vitiano, naruei maka bunu roiel ea bajago napano kariano jo buru didig lelan kito, a romijikia roiel ea bajago napano Niununo Lu jo buru vuru kito ga eaio.

⁵ Toro na jo miel jakii bajago na kariano napano

abar naio bijaio, kiano jidomiano jo bujo ka sidomiano va nalo na yetemeriba nei, mia toro napano jo miel jakii Niununo Lu, kiano jidomiano jo bujo ka tonovnovonalo napano Atua jidomio.

⁶ Sidomiano laka bajago va nalo na yetemeriba nei, naio be m̃arabo na m̃ariano, a sidomiano laka bajago novo nalo na Niununo, naio be m̃arabo na tuñaro, be m̃arabo na meuliano. ⁷ Toro napano kiano jidomiano jidom bajago na sidomiano na laiano na kariano, naio be Atua kiano uolu memedu. Peli naio maka sidom rivatove ka Atua kiano tuboiano leleio, peli ver makanio, peli naio jidom rivatove kanio, mia bior naio bano-o bova laka ruei banbano-o ana maka bunu rijikia rivatove ka naio, a mia naio be toro na jibe na naruei. ⁸ Nalo napano amiel ajakii bajago na kariano napano abarlo bijaio jibe na, maka ajikia ala titai napano mia Atua rijikia risaaro ka nalo kanio.

⁹ Mia jau napano Atua kiano Niununo joaso, jau maka koiel ea bajago na kariano napano abariso bijaio, mia monoka koto koiel ea Niununo nei kiano moroano napano Kristo jian banso. Mia verver toro tai naio jo napano Niununo nei maka toaio, toro nene maka ve Atua kiano. ¹⁰ Bajago va na yetemeriba nei naio mila ka mia mokotenado riviniu monoka rim̃aro bogo tai, a kito napano Kristo joa kito,

naio mila kito romemedu ea Atua mirano ruei, naruei mia niunudo ameul to to-boto. ¹¹ Atua Niununo napano mila Yesu meul bereio den namariano, nina naruei Niununo napano joa kito ruei, a mia rila vatitig tibe na ea kito bunu. Bekurano napano mokotenado rimaro, ana Atua kiano Niununo napano joa kito mia rila kito romeul bereio.

¹² Bilbilu nalo, Atua mila bo laka ban kito jibe nei, mila jibe napano kiado burumara jabue joa naio vonganei. Tibe na, bo rodumiran tonovo tai rivanio, mia bova ver rotu reiel ratakii bereio kiado bajago na sidomiano va na kariano. ¹³ Bajago na kariano naio be m̃arabo na rovokar m̃ariano, mia toro napano jidom riel takii m̃arabo na meuliano, naio monoka tuvan Niununo rimau ea naio, rijai ka te bulag sidomiano va na laiano na kariano den kiano meuliano.

¹⁴ Mia kito napano romonea Atua Niununo joono jibe na, kito naruei robe Atua kenerinio riano. ¹⁵ Nina bior napano Atua Niununo maka rila kito romei tibe ka tomu nalo na amimau Atua kanano kurano ga, a naio mila jibe na napano Atua bar bulag kito, robe kenerinio nalo. Jibe na, monoka romerou ka re Atua, a bogo napano roil vanio, romijikia rovio naio tibe karamado, rover "Teta." ¹⁶ Kito robio naio jibe na

memedu ga na, kar napano Atua kiano Niununo jo berloglog kito ana niunudo bunu mijikia ka be riano, kito Atua kenerinio nalo.

¹⁷ Vonganei kar napano robe Atua kenerinio jibe na, ilivuiiano novo nalo napano Atua bar ju rorea kenerinio memedu nei Kristo, mia kito kenerinio dolu nalo bunu, mia kito ravar rotiburevure vija naio. Be riano ka mia monoka ravar bunu jogvaiano tibe napano naio bario, a ver rasaaro ga, mia Atua rila rivu van kito ve verare ka naio mila bo ban Kristo.

Mia rivu laka rivan Atua kiano tomu riano nalo

¹⁸ Banei, ea yetemeriba nei, roju robiniua bogokouo telabo nalo nei, mia ver kiado jidomiano jo damariga ea mermerano napano mia rimaluvo iorou, nemijikia never ka ea kiaku vitiiano, jogvaiano nalo na vonganei, nalo ajibe tena iakurano ga. ¹⁹ Jogvaiano nalo nei aju abokar tenalo nonovio napano Atua jiio, vonganei tenalo nonovio aju rorea, ajidom m̃elea ka bogo maaro rimei, ka Atua riverial vonga ka kenerinio riano nalo abe kei. ²⁰ Beamu, jogvaiano maka to, kar napano Atua jii tenalo nonovio bo, mia iorou, nalo aju abinimei aminunu, aburu kokorovio, abova jibe na banbano-o napano tenalo nonovio maka bunu aimau rivu tibe napano naio jidomio.

Naio mijamo ka tibe nei ea yetemeriba nei, ka rila ka mia tomu nalo monoka kialo jidomiano ve takurano ka monoka avalea naio ga.
²¹ Jidomiano na mia monoka toa kenerinio nalo, napano nalo monoka amonea ka mia saba nalo maka ajikia atu rivova tibe na bogo nonovio. Nalo monoka tiniel maio ka bogo tai, mia naio rila saba nonovio napano naio jii amei rivu bereio, nalo abokar kiano mermerano, jibe ga napano mia kito kenerinio nalo nei bunu rotu rovokario.

²² Mia vonganei, kito roju romial yetemeriba nei kiana, napano jikar ka nua binimeí, saba nalo napano ajuaio aju amijog bova jibe ga na tira tai jidom rivar kenerinio. ²³ A be verare ga ka kito napano robokar Niununo Lu, napano naio jibe jidomiano tai na beamu napano Atua jian ban kito ka rila rosidomii ka mia jidomiano na toru mia rimeí iorou navo. Kito bunu, tegiano jua kiado iviso kia ga vo, a romijikia ka mia kito rotu rojog rivova rivano-o vokar bogo napano Atua ridu bulag kito den yetemeriba. Rojidom nina laka, kar napano rojibe ka tete nalo napano naio bar bulagio ga, a ea bogo na, mia rojog rivu vatitig jumabe kenerinio riano nalo, napano rova rotu vija naio ea kiano vio memedu.

²⁴ Tenene na naruei naio

milarur kito kario, a jikar ka bogo na binimeí roju romonea jikili ka kiano verikariano napano ber mia naio rila rivu van kito tibe na. Roju romonea jikili eaio bior napano maka reialio vo, a bogo na ver maluvo, mia maka rejikia rover romonea ka mia tumabe, kar napano jibe na ruei. ²⁵ A maka reial tenalo na vo, naruei monoka romoneaio sikili ka mia tibe na, a monoka rala kiado jidomiano rivetebievi ka rotu rorea vanvano-o mirado rialio garuei.

²⁶ Bogo napano roju rorea jibe na, bogo tai tiniedo m̃aro p̃eli roburu didig, mia bogo nonovio Niununo Lu jo miija kito. Bogo tai, ro-jidom robolkouo kar jogviano nalo, a romijog bova laka ana romil vonio, maka rejikia reial iliano memedu ka rever. A ea bogo na Niununo Lu mijikia rimeí, ridu kiado vio ana naio ga bolkouo kanado ka tegiano nalo napano aberial kiado jidomiano nalo napano iliano nalo maka avare ka averenio. ²⁷ Ea bogo jibe na, Atua mijikia tenalo nonovio napano ajua kiado iviso kito kiano namoneano lu nalo, a mijikia napano Niununo jo bolkouo kanio kito, napano jo ber tenalo memedu ga ea venia napano joa Atua kiano jidomiano ruei.

²⁸ Ana ea bogokouo nalo napano robiniua, ea tenalo venia napano mia rimaluvo

ea kito, romijikia ka mia Atua rila ka ea juluvati nene, mia rivu ga van kito napano tiniedo jii naio. Naio mila jibe na kar napano naio bijauia bulag kito beamu ruei ka naio mijikia rimāuka kiano imāuano novo nalo ea kiado meuliano.²⁹ Naio mijikia vatitig kito nua beamu binimei, jiloglog bulag vatitig kiado mārabo kirisioi ruei, mia rila ka kiado meuliano rivar kijokijo na kenerinio nei Yesu. Jibe na, kito kuruado a kuviviniedo nalo ea māratavo takurano, napano Yesu naio be motoru ka kito.³⁰ Nina naruei imāuano novo napano Atua mila ban tomu nalo napano naio jiloglog bulaglo ka ave kiano māratavo. Naio biolo ka amei eaio, naio mila abe merevuiano bijaio, a mila ka mia avokar kiano mermerano ea bogoti napano mia rimei.

Atua kiano tinietiano novo

³¹ Tenalo na amila mer-avo ka Atua to vija kito, jo mila bo ban kito, a jibe na mia kito rover venia bereio? Verver Atua jidom ridular kito, mia kei mijikia rila kito rojoru bereio? ³² Kito romial ka Atua tinien jii laka ka kito banbano-o mijamo ka auebin kenerinio memedu kar kito, ana ver jaaro ka rila burumāara tonovo nei ban kito jibe nei, mia jaaro bunu ka sian tenalo dolu novnovo nalo rivan kito. ³³ A nina Atua naio jo mila ka kito ruei. Naio bijauia bulag

kito ka rove kiano ruei, mia kei bereio mia river ka kito maka ravare ka roytuba ea mirano? Atua naruei jo berial ka kito romemedu bija naio ruei,³⁴ ana kei bereio mia river ka kito monoka ravar vironiano kar kiado kariano nalo?

Maka toro tai, kar napano Naverikariano Yesu mila vite nonovio nalo ruei. Naio mārō kar kito, iorou meul bereio den namariano, karina bano bereio jotano ea kiano vio lu mave bija Atua, a vonganei jo berial kito ban Atua ka Atua naio viekokoa kito.³⁵ Kristo tinien jii mēlea laka kito jibe na, venia naruei mia mijikia vuru bulag kito den kiano tinietiano nei bereio? Maka titai.

Bogo tealō, imāuano nalo temi ka kito, pēli tomu nalo amila bova ka kito. Bogo tealō, kito robokar bogokouo, pēli maka sado sinaniano, pēli maka ve kiado kulumārauo. Bogo tealō, kito romerou kar kiado meuliano, pēli rojen iobogu na mira, a makanio, bogo nonovio ga Kristo tinien jii kito a kiado meuliano jo bo ea jumāno. ³⁶ Nina jibe na Parinio Tubo Teviti berenio beamu, ea bogo napano naio bunu bar bogokouo, napano ber

*“Siamo joa kumemi, ana nalo
aju ajidom auebinvin
kumemi numārmāro
bogo nonovio ga,
nalo amial kumemi jibe nunu
nalo napano ajil bula-
glo ka ativi bulag tili-*

*jolo."**Iouano*

44:22

³⁷ Tenalo kinkin na jibe nei nalo amijikia amaluvo ea kito, mia be iakurano ga. Ea tenalo nonovio na jibe na, Kristo kiano tinietiiano joa kito, ana kito roju loa, roju rojovulu damariga. ³⁸ Nemijikia

never memedu van kamiu bereio, ka maka titai leleio napano mijikia rila ka Atua maka bunu rijikia tinien tii kito. Verver romeul p̃eli romarm̃aro, verver nailiano nalo atu vija kito p̃eli sim̃aro nalo atu amei ka kito, verver kito roviniua tenalo napano aju amidu vio vonganei p̃eli roviniua tenalo na napano mia adu vio ea bogoti nalo napano amei, ³⁹ a verver moroano novo nalo ea vio mave nalo atu vija kito p̃eli moroano va na vio yetano nalo atukovio ka kito, a maka leleio titai napano Atua jii napano mijikia vurular kiano tinietiiano den kito. Kristo Yesu kiado Tubo midu Atua kiano tinietiiano joa kiado meuliano ruei, ana mia to toboto.

9

Pol mijog bova napano kulo Ju nalo maka asidom amonea ka Yesu naio be kialo Naverikariano

¹ Bilbilu nalo, vonganei nojidom noverii ea tivelinio napano kito kulo Ju, rober ka kito robe Atua kiano tomu nalo, mia kito miroano maka asidom Yesu. Mia tum̃abe ka nalo na? Bo

ga, kiniou maka nejikia nola sibi, monoka noverial ka kamiu jidomiano novo nalo tai napano Niununo Lu jian ban kiniou ea tivelinio nei ruei, ² mia be riano, iliano nalo na, nalo amila ka kiaku aua a kiaku jogvaiano toru laka, naio maka rivatove leleio.

³ Nina kario napano vonganei, kiaku meuliano mi-asol bo bija Kristo ruei, a nemial jibe yati dolu nalo na Ju napano robe burukija takurano, kialo meuliano maka riasol rivu vija naio vo. Verver nemijikia nodular kiniou bereio ka nalo amijikia amei adu jeleku, mia nasaaro ga, mia maka rijikia tibe na.

⁴ Kosidomii von tenalo na bo napano Atua mila ruei ka kito kulo Ju, napano nalo jibe nei:

kito naruei napano Atua bijauia korobido yati na Israel nalo ka ave kiano tomu nalo,

kito naruei napano Atua berialio ka naio bijauia bulag kito jibe kenerinio nalo,

kito naruei napano Atua midu yulu na kiano mermerano buruii kiado tomu nalo ea vio kurano nua,

kito naruei napano Atua jo mila virakariano nalo bija kiado tormoruo nalo,

kito naruei napano Atua midu kiano tuboiano joa kito,

kito naruei napano bu-
rum̃ara Atua kunuano
na lotuano jo bija kito,

kito naruei napano Atua
berkar ilivuiiano telabo
ban kito,

5 kito naruei napano
kito rovio tormoruo lu
re nua jibe Epraamo,
Aisak, a Yakovo, ka nalo
abe korobido,

a mave ka tenalo na,
kito naruei napano Yesu
maluvo ea kiado yati,
naio miyotuba ea yete-
meriba nei jibe napano
naio be toro, mia naio
bunu be Naverikariano,
napano naio be Atua
napano be tubo ea
vio reraio, napano bo
ka roiaia naio bogo
nonovio rivano-o maka
ribisi.

Nina naruei tenalo na bo
napano Atua mila ban kito
kiano tomu nalo, mia kito
telabo amial jibe titai kurano
ga.

6 Nina nalo napano maka
aiasol rivu vija Kristo, a ʔeli
tomu tealō nalo aber ʔeli
vite nene mila ka verikari-
ano napano Atua jian beamu
maka bunu riyotuba tibe na-
pano naio berenio, bior ka
naio berkar ber mia kiano
ilivuiiano toa tomu nonovio
na yati na Ju nalo. Mia
maka tibe na, bior todolu
tai, napano ban jibe na, ka
nalo napano amiyotuba ea
Yakovo kiano yati, napano
robio ka kulo Israel, maka
nalo aviniu napano Atua ber
ka nalo ave kiano tomu nalo
riano.

7 Peli romijikia rover

iliano na ea m̃arabo dolu
bereio, ka rover ka nalo
napano aber ka Epraamo
naio be korobilo, maka nalo
aviniu napano rover ka
amiyotuba ea kiano yati na
bo naruei. Iliano tai napano
joa Vivitauiano Lu nalo naio
ber jibe nei ruei, napano
Atua mil ban Epraamo ea
tivelinio na kenerinio juo na
Ismael bija Aisak, a naio ber
Kiamo yati nalo memedu
mia nalo amoluo ea
kenerimo nei Aisak
ga.

8 Ana iliano na jo ber kalo
napano Atua mial kaaju
joomo ea taara na Epraamo
kenerinio nalo a memedu,
nalo kenia? Maka tomu
nalo aviniu napano amoluo
ea yati nalo na kiritete nalo
dolu napano naio bario, a
naio be nalo napano amoluo
ea kiritete nei Aisak kiano
yati napano Atua bijauiaio,
naio berkar ka mia kiano
ilivuiiano nalo atualo.

9 Kito romijikia ka naio
jibe na, kario napano
beamu, Epraamo be kener-
inio bija kialo tira na
im̃auano na Aka, mia tete
na maka naio napano Atua
ber ka mia Epraamo kiano
yati nalo memedu ayotuba
eaio. Mia Atua berkar
vatitig ka Epraamo bereio,
berinavo “Epraamo, mia
kiniou nala kamjuo koamo
na Sarai ka yuka yako,
ea bogo tibe nei ga, mia
naio rivar kenemiu kiritete
suñano tai.” Mia iorou, tibe
ga napano Atua berkario,
a Epraamo kenerinio nene
Aisak, naio naruei yati

memedu napano kito kulo
Ju romoluo eaio.

¹⁰ A kito romial napano bogo napano Aisak nene naio toru, naio be kenerinio, a jibe na bereio. Koano Repeka bar savoro juo nei Yakovo bija Isau, ¹¹ a bogo napano naljuo maka amoluo vo, Atua berialio venia napano naio berkario ka naljuo. Naio maka sidomii ka rila takii kialo iñauano ka ala rivu ħeli rivova, a naio mila jakii ga kiano jidomiano.

¹² Naruei bogo napano naljuo amoluo, Isau moluo beamu, a Yakovo moluo iorou kanio, a Atua ber ka kenielo, berinavo

“Naio napano moluo iorou mia naio maka riagago ka naio napano moluo beamu, a naio napano moluo beamu, naio monoka riagago ka naio napano moluo iorou.” Jen 25:23

Jibe na, maka takii kiado bajago moruo, mia mila meravo ka Atua bitirilar toro maka takii toro kiano jidomiano, a jakii venia napano Atua berkario ga.

¹³ A vite na meravo laka ea tivelinio na savoro juo na, kar napano iliano dolu tai joa Vivitauiano Lu ruei, napano Atua berialio ber

“Kiniou nomidu Isau na napano moluo beamu, jo yetano, mia nomidu Yakovo na napano moluo iorou, jo mave.” Malakai 1:2,3

¹⁴ Bo ga, Atua berial kiano jidomiano meravo bo jibe na, naruei mia kito rover venia bereio? Mia romijikia rover ka Atua kiano bajago na bova, mila maka rimemedu ea tivelinio na tomjuo nei? Mia makanio, maka rejikia roil niegeniege Atua tibe na.

¹⁵ Nina jibe kiano iliano dolu tai bereio napano naio ber ka Mosis nua, napano berinavo

“Kiniou nebe Atua, mia joa kiniou ka nemi-jikia tinieku riiaio toro kei napano nojidom ka tinieku riaio.” Eks 33:19

¹⁶ Jibe na, Atua jo bijauia kiano tomu nalo maka rivior napano nalo ga naruei aber ka naio monoka rivi-jauialo, a maka kar napano nalo amila vio ka ala tenalo napano ħeli naio jaaro kalo kario, a naio bijauia tomu nalo jakii ga kiano tinieriaiano ea nalo napanoaju amijog bova.

¹⁷ Atua kiano bajago na, napano mila ka toro takii ga kiano jidomiano, romial naio mila bunu ka Parinio Tubo Vero na Ijivi, ea Mosis kiano bogo nua. Vero na naio be toro tai napano naio tinien jer Atua kiano tomu nalo, mia Atua bijauialar naio bunu ka rila kiano iñauano tai, jibe napano Vivitauiano Lu berenio, napano Atua mil ban Vero, ber

“Kiniou nomidu larso ka kovar moroano ea kiamo

buruvenuo. Mia nemi-jamo kaso ka kovar-var ka kiamo moroano beamu vo, mia nela ka mia jau koialio ga napano kiaku moroano lie laka ka kiamo moroano, a kiniou nojidom ka tomu nalo na vio nonovio mia ajikia ka moroano nonovio joa kiniou.” Eks 9:16

18 Jibe na, kito romial napano toro napano Atua jidom tinien sesei ka naio, mia monoka tibe na, mia ver toro tai napano jibe Vero nei napano Atua jidom rila kiano jidomiano sikili, mia tibe na bunu.

Atua kiano tiniemimiano bija kiano tinieseseiano

19 Kiniou neber jibe nei, mia monoka jidomiano tai vavin napano mia toro mijikia vika tibe nei, river “Ver tomu tealó, Atua ve tiniesesei rivano, a tomu dolu tealó, naio jo milalo napano kialo jidomiano jikili, mia tumabe naruei? Verver Atua naio ga naruei jo mila ka kito romei rivu ĵeli rova rovova, ana maka rivu ka naio to tibure kito bereio. A ver Atua jidom rila ka kito takii kiano sidomiano, mia maka rejikia rotuko vio kanio ka rila re.”

20 A mia kiniou noverdoĝe ka iliano nalo na, kiniou neber: Koig, makanio, jau kobe toro ga, jau kobe titai napano Atua ĵio, mia jau kola vonio re ka kodukian kiamo iliano mave ka naio bereio. Naio jibe ka napano toro tai jo miĉauka baju na

tano nalo. Bogo na naio miĉauka baju na tano tai karina, ana baju nei maka rijikia tumolu ril vanio bereio riverinavo “E, kar venia jau komiĉau kirivova ka kiniou jibe na?”

21 Mia maka rijikia tibe na, bior naio napano miĉauka baju na tano, joa naio ga ka riĉauka takii kiano jidomiano. Ver naio ridu kulati tano tai, naio mijikia riĉauka baju na tano ve juo kanio. Takurano, naio be baju novo na jokoluolu, a dolu, naio be baju na vonuo ga.

22 Ana Atua bunu miĉau jibe nei, a naio bunu be kiano tenalo juo napano jidom rilaio. Naio jidom rila tomu nalo avitilubar napano naio tinien jer kialo kariano nalo, banbano-o mia mijikia rije vatitig vironiano vanlo vija kiano moroano na toru. Bogobe ruei, naio mila kiano jidomiano ealo tebievi, a vonganei joa naio ka rila rivanlo venia napano naio jidom rilaio.

23 A todolu napano naio jidom ka riverialio, naina kiano bajago novo nalo napano naio jidom rila ka kito napano naio be tiniesese ka kito. Nina jibe napano nua beamu ruei, naio mila vatitigio kiano ilivuiano novo nalo, a vonganei miĉauka kito jibe basidobidobi na misonlo ban eaio.

24 Naio mila bo ka kito jibe na bior napano kito naruei napano naio bio kito, napano kito tealó romiyotuba

ea yati na Ju nalo, a tealo romiyotuba ea yati na nalo napano maka ave Ju.

²⁵ A bajago na jibe ka Atua kiano iliano tai napano Osea Naverialiano berialio ea kiano niosi, napano Atua ber jibe nei, berinavo

“Taara na tomu nalo, napano beamu maka ave kiaku, a vonganei, kin-iou nobiolo ka kiaku tomu nalo.

Venuo napano beamu maka tinieku maio kanio, vonganei neber nojidomio laka.” Osea 2:23

²⁶ A bogo tai bereio, Osea berial Atua kiano iliano dolu napano ber

“Beamu, neber ka tomu nalo ea vio nei ka nalo maka ave kanaku tomu,

a vonganei, mia ajog napano aju abiolo ka nalo abe keneriku, kin-iou Atua na moroano, kiniou Atua napano nemeul.” Osea 1:10

²⁷ A iliano dolu tai ber jibe nei bunu, napano joa niosi napano Naverialiano Aisea bivitaui. Ea vio na, naio mijog bova bior tomu na Israel, ber

“Taara na tomu nalo na Israel kialo yati miroano, nalo miroano mia miroano, nalo a jibe kurukuti yono napano toro maka rijikia rivu-lukuio.

Mia aua toru, nalo telisu ga napano mia Atua rilarurlo.

²⁸ A *ea bogo na tibureiano, mia naio rije vironiano van tomu nalo na yetemeriba, mia naio rila nalo na maka kialo moneano tai ka ajikia.” Ais 10:22,23*

²⁹ A nina jibe ga iliano dolu tai napano Aisea bivitaui beamu ruei, napano berii bogo na tibureiano napano mia rimei, napano ver Atua maka tinien riia toro, mia tomu nonovio amarnaro. Il-iano na ber jibe nei, ber

“Atua binimei bija kiano tomu na mira nalo, vaataro ruebinvin kito nonovio. Ver maka tinien riia kenerido tealo, mia tuvanlo atu, mia kiado yati ribisi vatitigio.

Vaataro naio rila ka kito ve verare ka venia napano mila ka tomu va nalo ea vio na tortoru juo nei nua, Sotomo bija Komora, karina iorou mila ka kiado tomu ve telisu amijikia atu ameul kia ga.” Ais 1:9

³⁰ Bo ga, iliano nalo na aber jibe nei, aber nalo napano maka ave Ju, nalo maka ala vonio ka atakii Atua kiano tuboiano ka amei amemedu ea mirano, a iorou, bogo napano nalo amonea Yesu, Atua mila vonga nalo ka amei memedu ea mirano.

³¹ A kulo Ju nalo, amila vonio jikili ka amonea tuboiano ka rila amemedu ea Atua mirano, a nalo abijukudeio ga, ana mia rivova vanlo. ³² Kiniou neber bova ka nalo na

10

jibe na, nina kar napano amila vonio jikili ka amei amemedu ea Atua mirano, a nalo ajel ea m̃arabo dolu, aba ajibirbil vatitig eaio. Nalo ajel ea m̃arabo napano ajidomiio aber kialo im̃auano novo nalo amijikia alalo rivu vija Atua, mia maka tibe na. Kito monoka rosikili rotua ga venia napano Yesu milaio, nina naruei be kiado m̃arabo na romei rovu vija Atua bereio.

³³ Iliano tai joa niosi na Aisea bereio, napano Atua berial jamerijiano tai, napano berii burupati puruveru tai, ana puruveru nene be Yesu, jibe Naverikariano napano Atua miila naio binime. Iliano nene beriio jibe napano tomu tealo maka asidom puruveru nene, mia tealo amoneaio, ana naio ber jibe nei, berinavo

“Kamii kubitii batitigio!

Nojo nebitirilar puruveru novo tai na yimo burupati, nina mave ea burusuku na Saion ea kiaku tomu nalo kialo burum̃ara komeli na Yerusalemo.

Puruveru nene jikili bo, ana mia tomu ve telabo asidomio re, nalo jaalo je puruveru nene bano amijorjoru janea vio.

Mia tomu nalo napano amonea puruveru nene, nalo aju jikili eaio, mia nala rivu laka kalo.” Ais 8:14, 28:16

Yesu ga mijikia rila kito romemedu ea Atua mirano

¹ Bilbilu nalo, kiniou nomijog bova napano kiaku yati nalo memedu, jibe kulo Ju nalo, maka amonea ga. A kiniou nojidom laka ka nalo monoka avokar ioruriano, nina naruei kiniou nojo nobolkouo jikili ban Atua kalo.

² Nalo aju amila vonio laka ka asira-rag ka Atua ea kialo meuliano, a neber be riano, nalo maka ajikia m̃arabo, mia maka ajikia aleal naio.

³ Nina bior napano nalo aju ajakii kialo jidomiano ga, a nalo maka asidom atakii m̃arabo napano Atua mim̃aukanio ka toro rijikia rime. rimemedu ea mirano bereio.

⁴ Nalo aju ajikili ka aber ka ajogkar tuboiano, naio ga be m̃arabo, mia m̃arabo nene bova ruei, kar napano kito robiniu romila korovio tuboiano nalo. Marabo napano kito rober ka romemedu bija Atua bior napano romijogkar tuboiano, Kristo juko ruei, a naio mim̃auka kiado m̃arabo vou tai. A vonganei, ver romonea ka Kristo bar bulag kiado kariano nalo, naruei Atua mijikia rila kito romei romemedu ea mirano.

⁵ Ver kito rala korov re tuboiano, mia rivu ga, romijikia romemedu ea Atua mirano, bior napano ga romijogkar tuboiano, kar napano Mosis berenio iliano tai ea tivelinio nei ruei, berinavo

*"Toro napano jakii
vatitig bo tenalo
napano tuboiano nei
berenio, mia mijikia
rivokar meuliano."
Lev 18:5*

Mia maka toro tai napano kiano meuliano bo jibe napano Mosis berenio, ana maka rejikia rovakar meuliano sel ea tonovo nalo napano romilaio.

⁶ Ka rila tibe na, naio jikili laka, a ver romonea ga Kristo romijikia romei romemedu ea Atua mirano, a nina maka titai napano jikili. Jibe iliano tai napano Mosis berenio, napano beriio

*Maka rivu ka kamiu kuv
isidomii ka tenei naio
jikili laka, ana kuvitu
kuvivika kuver kei mia
rila m̃arabo beamu ka
kamiu riva mave ea
tiniabene? Tiut 30:12*

Vikadeniano nei berenio ka kei mijikia riva rivokar tiniabene rivuru Kristo rimeiyetano ea vio nei ka rilarur kito, a jidomiano jibe nei naio maka rimemedu.

⁷ Peli nalo avika vikadeniano dolu tai napano joa Iliano Lu, napano ber

*A kei mijikia rivatove riva
rivokar vio na tomu
na am̃arm̃aro a rimeiy
bereio? Tiut 30:13*

Vikadeniano na ber ka nalo ajidom ka Kristo naio m̃aro ea m̃akolkolo, ana nalo aber p̃eli maka toro tai rijikia riva ridular naio ea vio na bereio ka rijikia rimeiy rilarur kito, a mia romijikia ka iliano nalo na maka rimemedu. Kito romijikia vatitig ka Kristo jaluvo ea tiniabene batove

ea yetemeriba ruei, a iorou ka napano naio m̃aro, naio jumolu meul bereio a ban ea tiniabene ruei.

⁸ Jibe na, kito romijikia rosian verdopeiano na vikadeniano nalo na, rover iliano dolu tai napano Mosis ber nua, napano berinavo

*Atua kiano iliano ban kito
kulinio naio jo bija
kito ruei. Jua jum̃ado
ruei,*

*ana romijikia rodu toa
niodo, romijikia rodu
vatitigio toa kiado
jidomiano. Tiut 30:14*

A Atua kiano iliano napano iliano nene beriio, nina Ioluanou Vou napano kumemi numitu numiololu kanio, napano berialio ka tomu nalo monoka amonea Yesu Kristo.

⁹ A jau kei napano komonea Yesu Kristo ea kiamo iviso, kober ka Atua mila naio meul bereio ea m̃ariano, a kojaaro ka koverialio ea vio reraio ka jau komidu Yesu jibe kiamo Tubo, mia jau kovokar meuliano. ¹⁰ Nina bior napano toro na biekoou ea kiano iviso ka Yesu meul bereio ea m̃ariano, a berialio ea vio reraio ka Yesu be kiano Tubo, mia Atua sian re bunu vironiano van naio kar kiano kariano nalo, mia rilarur naio.

¹¹ Nina jibe iliano tai ea Vivitauiano Lu re nua, napano jibe ka napano beriio napano romonea Kristo, napano berinavo

*Toro napano monea
naio, naio maka rijikia
rijog kiano jidomiano*

rijoru bogo tai. Ais
28:6

¹² Mia toro napano monea ka naio be Ju, ñeli maka rive Ju, mia Tubo naio takurano be kialo tubo abiniu, mila bo kalo abiniu ga napano ajegi banio naio.

¹³ Nina jibe iliano tai napano Naverialiano Joel nua bivitauia, napano berinavo

*"Toro kei napano bio
Tubo siano, mia rilarur naio." Joel*
2:32

¹⁴ Be riano, kulo Ju miroano maka avio van Kristo ka rilarurlo, a jumabe jibe na? Nina bior napano maka ajikia avio naio verver maka amonea naio, a maka ajikia amonea naio verver maka leleio ajog siano vo, a maka ajikia ajog siano verver maka toro tai rioliolu ka vanlo.

¹⁵ A maka jikia toro riva rioliolu verver Atua maka riilaio ka rivano, a verver naio jaaro ka rivano, mia tibe na napano Vivitauiano Lu berenio ruei, napano ber

*"Siva toru ka Atua
napano kiano naveri-
aliano nalo, romijog
jaalo aju amijubariva
ea kialo m̃arabo ninio
nalo ka avanvan tanea
vio vija kiano Ioluanu
Vou." Ais 52:7*

¹⁶ Nina naruei iliano napano tom tealo aberenio, a nemijikia never makanio, Atua jo miila kiano naverialiano nalo abanvan ruei, mia aua toru napano Ju nalo miroano maka asidom ajogio ga. Nina jakii iliano

tai ea Vivitauiano Lu bereio, napano Naverialiano Aisea jegi ban Atua, ber

*"O Tubo, kumemi numitu
numioliolu ka kiamo
iliano banbano-o, mia
jibe napano maka toro
tai rive tinieno ka rijo-
gio." Ais*
53:1

¹⁷ A banei kumemi jibe nei naruei, numitu numioliolu ka Yesu Kristo banlo, a bogo napano kumemi numitu numioliolu, tealo amijog, a bogo napano amijog, tealo amonea.

*Kar vaio jau komioliolu
ban kulo Ju nalo napano ab-
uluku Vivitauiano Lu nalo
ruei?*

¹⁸ Nina naruei kiniou nojo nomioliolu ban Ju nalo, a vikadeniano tai mijikia rimei mave ea vio nei, ber ñeli kojo komioliolu banlo kar napano kojidomii ka nalo maka ajog venia napano Vivitauiano Lu nalo aberenio? Vonganei mia neverdoñeio never, makanio, Atua kiano iliano bokarlo kirisiou ruei. Nalo abiniu amijikia bare ga napano nalo abiniu aju abiti m̃erenio a siberio bija m̃arvitano nalo, jibe napano iliano tai ea Niosi na Iouano berenio, berinavo

*"Tomu nonovio na yete-
meriba amial tenalo
na ea vio yauo mave,
a nalo abitilubario ka
Atua jo,*

*ba bokar tomu nalo
reraio napano aju
koalabo, nalo bunu
abitolubar ka kiano*

*moroano toru laka.”
Iouano 19:4*

¹⁹ Jibe na, kulo Ju nalo abitilubar tenalo miroano ruei, a mia titai bova, nalo aber p̄eli Atua jidom rilarurlo nalo ga.

Nalo maka avitilubar ka Ioluano Vou be tomu nonovio kialo, kar napano Atua jidom rilarur bunu tomu dolu nalo napano maka ave Ju. Mia bo ka avitilubar vite nei, bior kialo naverialiano moruo juo aberiio nua ruei ea Vivitauiano Lu, aber mia tibe nei. Mosis be motoru, napano berial iliano tai napano Atua ber ka kulo Israel, napano ber

“Kamiiu kubitii bova ka nalo napano maka ave Ju, jibe napano abe iakurano ga, a mia kamiiu kuvijoku ka ilivuiiano nalo napano mia kin-iou nala kalo.

Kamiiu kuber nalo maka ajikia ala titai na bo leleio, a mia kamiiu tiniemiu serlo bogo napano kuvial napano kiniou nelarurlo bunu.” Tiut 32:21

²⁰ A juo nene kanio, naio be Naverialiano Aisea, naio bunu jumolu berial memedu Atua kiano iliano dolu tai ban korobido nalo kulo Ju miralo, napano Atua berii nalo napano maka ave Ju, berinavo

“Beamu, nalo maka asirarag ka kiniou, a iorou, mia nalo amijev kiniou,

nua maka avika kiniou, a mia iorou, ajidom ka nava noyotuba keanlo.” Ais 65:1

²¹ A Aisea bivitauialar Atua kiano iliano dolu tai bereio, napano Atua berii nalo na abe Ju, berinavo

“Tomu nalo na aju maka amonmonea kiniou, nalo aju abukular kiniou bogo nonovio.

Kirisiou ruei kiniou nebetavo ka jumaku kalo, nojidom nalo amei bereio kean kiniou, mia maka garuei.” Ais 65:2

11

Kulo Ju nalo maka asidom Yesu, mia Atua maka vilig taakano kalo

¹ Vikadeniano dolu tai jo, nina ea tivelinio na kulo Ju nalo, ka bogo na nalo maka amonmonea Atua, naio bunu jumolu, bilig taakano kalo, p̄eli makanio?

Nemijikia never makanio, naio maka rila tibe na, bior napano kiniou nebe toro Israel nojo, kiniou bunu napano tormoruo Epraamo be korobiku, a kiniou nomiyotuba ea tormoruo Beniamen kiano yati, a nemijikia bo ka kiniou tai napano Atua maka rivukular kiniou.

² Jibe na, nemijikia never makanio, Atua maka rivukular kito tomu nalo napano bijauia bulag kito robe kiano. Bo ka rosidomii iliano tai na Vivitauiano Lu nalo re nua ruei, ea bogo na Naverialiano Elaija. Ea bogo

na, Elaija mijog bova laka
ka veribinio na Atua kiano
tomu nalo kialo, naruei naio
mil mĩmĩ ban Atua, ber

³ *Tubo, kiamo naverialiano
nalo, kiamo tomu nalo
aju amuebinvinlo,*

*a kiamo vio lu nalo, aju
aburu kokorovio,*

*a ba bova laka, nemial
jibe kiniou ga taku-
rano nojo nabame-
neaso,*

*a vonganei kiniou bunu,
aju ajusosor kiniou
ka adular kiaku meu-
liano. 1 Par Tubo
19:1*

⁴ Mia ea bogo nene, Atua
berdoŕe naio, ber

*Makanio Elaija, maka
jau ga ve takurano.
Jau maka kojikia, a
ea vio nei kiaku tomu
nalo menu aluo [7,000]
aju napano abo jibe so,
napano maka alotu ka
tavoru sibilibi na Baal.
1 Par Tubo 19:18*

⁵ A vonganei, ea kiado
bogo, be verare ga jibe na
ga. Tomu telabo maka
amonea, a kito naruei roju,
kito robe bagaro telisu tai
na Ju nalo, napano Atua be
tiniememi ka kito, bijauia
bulag kito, ana kito romonea
naio. ⁶ A bo romijikia vatitig
ka Atua bijauia bulag kito
kar venia, bior ŕeli tealo
nalo aber ŕeli naio bijauia
bulag kito bior napano romi-
lala iĩauano novno nalo
miroano napano naio jaaro
kanio. A makanio, bior na-
pano ver tibe na, ver ŕeli
ka Atua kiano tiniememiano
maka rila titai leleio. A Atua

maka bijauia bulag kito kar
napano romila tonovo nalo
miroano, a naio bijauia bu-
lag kito ea kiano tiniememi-
ano ban kito ga.

⁷ Kito romijikia ka kito
kulo Ju nalo, robiniu roju ro-
jirag kiado mĩarabo ka romei
rimemedu vija Atua, a kito
telisu ga romialio. Ana ver
tibe na, mia tumĩabe ka nalo
dolu na?

Nina berenio ka nalo
miroano napano nalo pari-
parilo jikili laka, ana nalo
maka aial mĩarabo nene vo.

⁸ Iliano tai ea Vivitauiano
Lu berenio nalo jibe nei, ber
“Atua juvanlo aju bija kialo
vovuiano, Ais 29:10
ana binimeĩ bokar baneĩ,
nalo jibe napano be
miralo, a maka ajikia
avitilubar vite, be tilin-
ielo, a maka ajikia ajog
lubar vite.” Tiut 29:4

⁹ A jibe ka bunu Parinio
tubo Teviti kiano iliano tai
re nua, bogo na naio jidom
Atua ridular kiano uolu nalo
kialo moroano napano aju
ajusosor naio. Ea bogo nene,
naio bika den Atua, ber

“Tubo, kiaku uolu nalo nei
nalo aju amijog bo
bogo nonovio ea kialo
burumĩara jokoluolu
nalo,

*a nebika denso ka kola
kialo jogvuiano nei
rimeĩ tibe vite tai
napano mila bulag
vatitiglo, senlo bere,*

*mila ka nalo maka
ajikia avitilubar
ka kialo uolu nalo
aju vaatara kalo
ga.*

10 *Bo ka jau kolalo tibe miralo rime i ribono, ka nalo maka ajikia avitilubar vite, a jau kola napano kialo uolu nalo ayukyukulo ka aimāu kurano, nalo avar vite nalo na temi ea taakalo.” Iouano 69:22,23*

11 Ana ea tivelinio na Ju nalo, Atua maka rivuku bulaglo, be riano, nalo abano bova kija. A kialo vovaiano na mila Atua milarur tomu nalo na maka ave Ju, a bogo napano Ju nalo amialio napano Atua tinien miia bunu nalo dolu na, amialio kirivova, amijoku kalo, ana mila amila vonio ka nalo bunu monoka amei rimemedu vija Atua bereio.

12 Ana nina berenio ka kulo Ju kialo bajago, napano maka amonea Yesu, naina mila mārabo na Atua kiano viekokoano a kiano ioruriano mijikia rime i rivokar tomu nalo na maka ave Ju. A ver Ju nalo bunu amonea, nalo amonea vanvan rivokar napano Atua berenio, mia mijikia rila napano kiano ilivuiano nalo amei ve toru lie.

13 Bo ga, vonganei nojidom nesian iliano ve telisu ea tivelinio na kami u napano maka kuve Ju. Kiniou nebe atevi napano Atua bitirilar kiniou ka navan reraio ka neverial kiano Ioluano Vou van kami u, a nina imāuano tai napano nojo nomila von vatitig ka nalaio, bior napano namial bo laka.

14 Nina bior napano nemial ka bogo napano nomioliolu ka ban kami u napano maka kuve Ju, kami u kumitu kumonea, a mila napano kumemi kulo Ju nalo teal o ajidom ka nalo bunu monoka atu joomo, ana nalo bunu amoneaio.

15 Nua, Atua bilig dabu naio ka kulo Ju, a nina mila vonganei naio bitii nalo napano maka ave Ju, jidom ka rila kialo mārabo ka ajikia amei ave merevu vija naio bereio. A ver Ju nalo aviliglo a nalo bunu amei bereio ea Atua, mia rivu mia rivu, bior napano vonganei nalo ajibe tanunu, a ver amonea Yesu, mia atibe ka napano abinime i ameul bereio.

16 Mia kiniou never jamerijiano tai ea vio nei ea tivelinio na mār iesi moti nalo napano roju robario ban ea yimo na volkouano, rober siva ka Atua biorio, romioa rive lu. Mia bogo napano rojian mār iesi moti ban Atua, mila na mār iesi dolu nonovio napano maka rosiano, nalo bunu abe lu, abe Atua kiano. Ana kulo Ju kialo tormoruo nalo ajibe mār iesi moti nalo napano aban ea Atua kunuano beamu, a nina mila ka Ju dolu nalo napano abinime i iorou, nalo bunu ave Atua kiano. A bereio, tormoruo nalo nei ajibe burupati iesi tai napano ju miluo joomo ea Atua kiano tiniavio, a verenio burupati ve Atua kiano, mia jaati nalo napano amei iorou, nalo bunu ave

Atua kiano.

¹⁷ Ver tibe na, burupati na bija jaati nalo aberenio ga Atua kiano tomu nalo, jibe Ju nalo. Mia iorou, Atua mial jaati tealo abova, naruei burekokorovlo, a ba je vatitig iesi dolu tai jerati nalo napano jo ga yeturu, ana midu binimei, je vatitiglo a miasol lo aba vio takurano ea burupati napano jo jouro ea tiniavio, nalo amidu jeleig jerati dolu nalo napano burekorovlo ruei. Jerati dolu nalo napano abinimei amijurukar burupati nei, naio berenio kamiu nalo napano kamiu maka kuve Ju. Kamiu maka kuviyotuba ea burupati na Atua kiano tomu nalo memedu, a naio jidom ka kamiu bunu monoka kuvijurukar vija nalo joomo ea kiano tiniavio, ka kamiu nonovio kuvokar kiano ioruriano nalo.

Nalo napano maka ave Ju, maka ajikia avarkalo ka Atua burulo

¹⁸ Jibe na, kamiu napano maka kuve Ju, monoka kuvarvar re napano Atua miasol kamiu bija kiano tomu nalo, bior napano maka kuve burupati, a kube jerati nalo ga napano Atua miasol kamiu ea burupati nei napano jo beamu ruei. Jerati nalo maka ala burupati meul, a burupati naruei jo mila jerati nalo ameul.

¹⁹ Bereio, maka rivu kamiu kuvisidomii ka kamiu kubo, naruei kuver O, Atua jidom m̄lelea kumemi,

ana bure kokorov jerati tealo na burupati neibano ka rila kumemi nuvijikia nuviasolio.

²⁰ Be riano napano Atua burkokorov jerati tealo, a mila ga ban Ju nalo napano maka amonea Yesu, a be riano napano naio jidom kamiu kuviasol, a nina maka rivor napano kumila vite novo nalo tai, a bior napano kumitu jikili ea kenemiu viekouoiano ea naio. Jibe na, kamiu kuvarvar ka re napano kubinimei jibe Atua kiano tomu nalo, a monoka kuviturmaro ka kuvisidomii vatitig vite novo nei napano Atua mila ban kamiu. A kamiu monoka kuvitakar vatitigio bunu, ²¹ bior jibe napano Atua buku bulag jerati moruo nalo nene, napano kiano tomu nalo na maka amonea, mia naio mijikia rivuku bulag kamiu bunu jerati vou nalo be verare ga, ver maka kuvitu kuvar m̄ariesi novo nalo.

²² Jibe na, ea vio nene romial tivelinio be juo na Atua kiano bajago. Ea tivelinio takurano nene, kiano tiniemimiano jikili napano jikili ea nalo napano ajibiribil, napano maka atu sikili ea naio, tibe kulo Ju nalo. Mia tivelinio dolu nene, naio tinien vuui laka ea nalo napano maka ave Ju, nina nalo napano ajaaro kanio a aju ajakii vatitig naio. Mia nalo bunu, ver nalo atu re sikili, naio mijikia telarlo bereio den burupati novo nei napano

aju amiasol eaio.

²³ Nina naio mila ka kulo Ju nalo ruei. Nalo maka amonmonea, ana je bulaglo, a ver aviliglo, amijikia amei bereio ana Atua mijikia riasol vatitiglo ea burupati bereio tibe kiano tomu nalo riano.

²⁴ Naio mila jibe na ka kami napano maka kuve Ju nalo, bior napano kami jibe jaati iesi na yeturu, a naio buru kami kubinimei, mi-asol kami ea burupati napano joa kiano tiniavio, ana kumijurukar bija ilivuiano nalo napano naio jidom sian van kiano tomu nalo. A ver mila ka kami ruei, mia mijikia rila bunu ka Ju nalo napano naio je bulaglo, bior ka naio jaaro ka riasol vatitiglo bereio ea burupati nene napano amiasol vatitigio eaio beamu ruei.

Atua jidom ka kulo Ju nalo avokar ioruriano

²⁵ Bilbilu nalo, kiniou no-jidom neverial van kami napano maka kuve Ju nalo, ka monoka kuvitilubar ka Atua maka rivukular kiano tomu nalo nei kulo Ju.

Be riano ka nalo aju pariparilo jikili keano a maka asidom amonmonea, ana naio juvanlo kija ga beamu, a jo mila ka kami napano maka kuve Ju nalo kumijikia kumonmonea, kumijikia kumei ve miroano joomo riva vokar bagaro na toru napano Atua jidomio. Vite na jibe vite luku tai napano tomu nalo maka ajikiaio beamu, a vonganei

Atua mila meravo. Mia kami monoka kuvijikia vite nei, bior bova ka kami ku-varvar ka kami kuveriana Atua jidom kami ga, naio maka bunu saaro ka Ju nalo.

²⁶ Maka tibe na, a mia naio rilarurlo kean navo, tibe iliano tai ea Vivitauiano Lu, napano beriio jibe nei, ber

“Toro na rilarur kito Atua kiano tomu nalo, mia riyotuba ea kiado vio ga, ea kiado komeli na toru Yerusalemo mave ea burusuku nei Saion.

Kito Yakovo kiano yati, kito kulo Ju napano kiado vovaiano nalo telabo laka, a naio naruei mia rimei rivar bulagio nonov kiado vironiano, rila kito rovu bereio.” Ais 59:20,21

²⁷ Iliano dolu tai ea Vivitauiano Lu berialio Atua kiano verikariano tai ea tivelinio na bunu, napano ber jibe nei, ber

“Kiaku verikariano ealo ju ruei, ka mia navar bulag kialo kariano denlo, noviekokoalo aviniu.” Ais 27:9

²⁸ Bogo napano Ioluanou Vou maluvo ea Ju nalo, nalo maka asidomio, ana ea tivelinio tai nina bo, bior napano rila ka kami napano maka kuve Ju, Atua midu bogo ka kami kija ka kumoneaio. A ea tivelinio dolu nene, nina bova bunu, bior ka mila na Ju nalo abinimei jibe na abe Atua kiano uolu nalo bereio. A Atua maka rijikia rivitiilo ka ave kiano

uolu dam̃ariga, naio monoka tinien riialo bereio, bior naio maka rijikia tinienne ribobogia verikariano novo nalo napano naio mila ban ko-robilo moruo nalo na kiano tomu nalo nei, kulo Ju nalo.

²⁹ Atua berkar ilivuiiano nalo banlo ruei, a naio bio nalo na abe kiano ruei, a mia maka jikia tibukua bereio kiano jidomiano bogo tai.

³⁰ Jibe na, naio miñau ea kito jibe nei. Beamu, kamiu napano maka kuve Ju, kamiu maka kumonmonea Atua, a bogo napano kumemi Ju kumemi maka numonmonea Ioluanu Vou, nina mila kiano m̃arabo ka tinien riia kamiu.

³¹ A bogo napano naio tinien miia kamiu jibe na, mila napano kumemi numonmonea Ioluanu Vou, ana mia naio mijikia tinien riia kumemi bereio.

³² Nina naruei Atua kiano jidomiano jibe na naruei. Beamu, naio mijamo ka kito robiniu roiel ea m̃arabo na maka rosidom rojog kiano iliano, mia rila ka naio rijikia tinien riia kito, rijikia rivuru kito nonovio ka romei rove kanano.

³³ Bilbilu nalo, Atua kiano ilivuiiano nalo ea kito tortoru laka! Kiano masouano nalo a kiano jikiaiano nalo abavavin mave! Kiano jidomiano nalo bululuo tanea, a kiano bajago nalo abo julaka! ³⁴ Jibe napano iliano tai ea Vivitauiano Lu bere-nio

“Maka lele toro tai napano vare ka rivakar venia napano joa Atua kiano jidomiano, maka lele toro tai napano mijikia sian iliano na ijaiano van Atua.

³⁵ A *maka lele toro tai napano mila bo ban Atua bare napano rijikia rila Atua saaro ka ridu kiano ilivuiiano novo nalo vanio, tibe napano naio jo jian ban kito.” Jop 41:11*

³⁶ Mia kiniou neiasol iliano na, neber: Kiado Atua, naio takurano be burupati na vite nonovio, naio takurano be moroano na vite nonovio, naio takurano be juluvati na vite nonovio, ana bo ka kito roviniu roiaia naio to toboto.

12

Bajago novo na toro napano monea

¹ Bilbilu nalo, jibe ka Atua tinien miia vatitig kamiu, mila bo laka ka kamiu, nojidom novika sikili van kamiu ka monoka kuvijamo ka kenemiu meuliano momou van naio. Kamiu monoka kuve lu rivu, tibe napano kumioa mokotene-miu ban naio jibe sida tai napano kumidu banio. Naio maka sida tai na jibe temeul tai napano amuebin m̃aro, a naio be sida tai napano meul, a mia Atua mijikia saaro laka kanio. Nina naruei bajago novo na ala lotuano van Atua napano memedu ka kuvilaio.

² A kamiu kuvijamo ka re vovaiano na yetemeriba nalo nei avuru kamiu kuvitakii kiano bajago nalo, a bogo nonovio, monoka kuvijamo ka Atua rila kenemiu jidomiano to rime i rive terivou bereio. Tibe na, mia kenemiu bajago mijikia riviligio, mijikia rime i rivu bogo nonovio, a mia kamiu kumijikia kuviel kuvitakii Atua kiano tinieiano, napano bo, kirinovo, a memedu mia memedu jula.

³ Kiniou neberial iliano nalo na ka kamiu bior napano Atua ve tiniesese ka kiniou, bijauialar kiniou midu imauano nei naruei joa jumaku. Mia nojidom never vite tai bereio ka kamiu, napano bova kuvitu kumila kenemiu jidomiano bavina laka. Kito rola kiano imauano nalo tumabe, a kiado jidomiano monoka rimemedu, monoka to yetano ga.

⁴ Kito maka rojikia rosidomii ka robo lie ka dolu nalo, bior napano rojibe mokotenano toro takurano ga, napano be yati nalo nene a yati nalo nene, be kialo imauano terakurano ka alaio.

⁵ Jibe kito miroano, mia Kristo midu kito robinu robinime i robe takurano, ana jibe napano kiniou nojo banso, jau kojo ban kiniou.

⁶ Atua be kiano tiniese seiano ka kito, mijamo ka jikiaiano dolu nalo ban kito, napano jibe jidomiano nalo

na naio jian bulagio ban kito ka kito roimau vijaio. A kito terakurano monoka rosikili ka roimau vija venia napano naio jian ban kito. Jibe nei

ver Atua rijamo kaso ka rive kiamo ka koverial iliano napano naio jian banso, ana monoka kolaio vija moneano ve toru ka kiano iliano nei be riano laka,

⁷ peli ver rive kiamo ka koi mau ea yimo lu, monoka kolaio vija kiamo moroano momou,

peli ver rive kiamo ka koverloglog tomu nalo ka Atua kiano iliano, monoka kovarso vatitig ka kolaio,

⁸ peli ver rive kiamo ka kotunukakar tomu nalo kialo jidomiano, monoka kosidomii ve temi ka kolaio,

peli ver rive kiamo ka kosian jidomiano nalo ka ijaiano, monoka kovario ve miroano,

peli ver rive kiamo ka kovuru marabo ka Atua kiano imauano, monoka koyovo re,

peli ver rive kiamo ka keija nalo napano ajua bogokouo, monoka kosaaro ka kolaio.

⁹ Ana ninei naruei bajago novo dolu nalo na mia kuvi laio:

kenemiu tinietiano ea tomu dolu nalo monoka rive riano,

monoka kuvitaluvo ea bajago va nalo,

monoka kuvakar vatitig

rivu bajago novo nalo,
 10 monoka kuve tiniemiu
 titii ea kamiu tibe kube
 torogio takurano,
 monoka kuvila vio sikili
 ka kuvial ka kei naruei
 mijikia rila bajago na
 vameneano rivan lie,
 11 monoka kuvijamo re ka
 kenemiu jidomiano sik-
 ili na laiano na tonovo
 nalo rivakovio bereio
 den kamiu,
 monoka kuvila ka sebi
 na Niununo Lu to meul
 rivu ea kamiu,
 monoka kuvimāu Tubo
 kiano tulaka,
 12 monoka kuvisaaro ka
 Atua kiano verikariano
 nalo napano kenemiu
 jidomiano balea naio ka
 mia naio rila rivu ka
 kamiu tibe ga napano
 naio berenio,
 bogo napano kubiniua jog-
 vaiano, monoka kuvila
 kenemiu jidomiano rive
 tebievi,
 monoka kubolkouo tulaka,
 13 bogo napano na-
 moneano dolu nalo
 maka ve kialo tenalo
 tai, monoka kuvisaaro
 ka kuvisian saba vanlo,
 a monoka kuvisaaro ka
 kuvitkar tomu dolu
 nalo ea kunuemiu.
 14 A nina naruei vite nalo
 tealo napano monoka ku-
 visidomiio ka kuvimāukanio
 van tomu dolu nalo:
 ver tealo aju amila niege-
 niege kamiu kar napano
 kumonea Yesu, monoka
 kuvila rivu kalo. Kuvil
 re rivova vanlo, a ku-
 vika Atua ka rilivu kalo,
 15 ver tealo amijog bo kar

vite novo tai, kamiu bun
 u monoka kuvisaaro vi-
 jalo,
 ver tealo aju ajegi bior vite
 tai, kamiu bunu monoka
 kuviteg vijalo,
 16 ver kamiu kuvija
 kulo dolu nalo, kamiu
 monoka kuvitu vatitig
 vijalo, napano ve ken-
 emiu jidomiano ve
 takurano ga,
 ver kuvimāu vija kulo
 dolu nalo, kuvidu re
 kamiu kuvitu mave kalo
 kuver kamiu kubo, a
 kamiu kuvisaaro ka
 imāuano na tertelisu
 nalo a kuvisaaro ka
 kuviasol vija tomu nalo
 na tertelisu,
 ver kuvila titai nalo, a ku-
 visidomii re ka kube ma-
 sou, a kuvila kenemiu
 jidomiano to yetano,
 17 ver tomu tai ala rivova
 ka kamiu, a kuvila
 meran re rivova vanlo,
 a bogo nonovio monoka
 kuvisidomii ka kuvila
 vite nonovio napano
 mia tomu nalo amijikia
 avitilubario ka bo a
 memedu,
 18 a ver kenemiu vite va
 tai jo iviso ka kamiu bija
 tomu dolu nalo, monoka
 kuvila vite nonovio na-
 pano ajua jumemiu ka
 ridu tumāro to bereio ea
 kamiu kuviniu.
 19 Bilbilu nalo, tinieku jii
 kamiu laka, naruei nojo
 neber tenalo nei ban kamiu.
 Tealo lie ajibe nei, berinavo
 ver tomu tealo ala rivova
 ka kamiu, kuvila vonio
 re ka kuvije vironiano

vanlo. Kumijikia kuvitu-
van rivan Atua ka naio
titurelo iorou, bior na-
pano iliano tai joa Vivi-
tauiano Lu ruei, napano
Atua berenio ber

“Kiniou naruei mia
nesian *vironiano van*
tomu nalo, kiniou
naruei mia nodu kean
van nalo napano amila
bova.” Tiut 32:35

²⁰ ver be kenemiu uolu
nalo aju, kamiu monoka
kuvila rivu kalo, jibe na-
pano iliano dolu tai ea
Vivitauiano Lu berenio,
napano ber

“*Ver kiamo uolu jije-*
rio, kodu sinan-iano ri-
vania, ver midou jerio,
kodu uei rivanio.

Verver kola tibe na, mia
jau kola naio rimou
laka ka kiano bajago
va,

rivano ĩeli naio jaaro ka
rila bilbilu rivu vijaso
bereio.” Ilimasou
25:21,22

²¹ Takiiano na tenalo nei,
kiniou neber jibe nei ka
kamiu, neber kamiu kuvi-
jamo ka re bajago va tovulu
kamiu, a monoka kuvitovulu
bajago va vija ga kenemiu
bajago novo nalo.

13

Namoneano nalo monoka
avatove ka parinio tubo nalo
napano Atua bitiri bulaglo

¹ Vonganei kiniou
nojidom naver iliano
nalo tai ea tivelinio na
navurim̃araboiano nalo.
Kito romijikia ka Atua naio
jo mave laka, naio be Tubo

ka vite nonovio, a naio
naruei bitiri bulag parinio
tubo dolu nalo napano aju, a
midu moroano banlo. Jibe
na, kito namoneano nalo
robiniu monoka ravatove
ka parinio tubo nalo nene,
monoka romonmonealo.

² Tomu nalo napano ver
aju amila vonio ka atukovio
ka parinio tubo nalo, nalo
aju ajukovio ka tena Atua
bitirilario, a mia Atua
mijamo ka parinio tubo nalo
amijikia asian vironiano
vanlo kario.

³ Parinio tubo nalo, Atua
maka vitiri bulaglo ka ala
tomu novo nalo ka amerou,
a naio bitiri bulaglo kar
nalo napano aju amila koko-
rov tuboiano. Nalo na
naruei monoka amerou, bior
napano ver parinio tubo
nalo avokarlo mia asian
vironiano vanlo. A ver
jau kosidom ka komerou ka
re parinio tubo nalo, mia
monoka kola memedu ga ka
venia napano tomu na tor-
toru aberenio, naruei mia
nalo maka ala rivova kaso,
mia ajaaro kaso.

⁴ Atua midu bulaglo ajibe
kiano tomu na im̃auano
nalo, ka ala im̃auano novo
ka avitikar tomu nalo, a
ver jau kojidom kola pari-
parimo, monoka kovitikar
vatitigio, bior napano aju
abbar nia bunu, a maka atu
avar kurano. Atua bitiri
bulaglo, midu joa jum̃alo ka
asian vironiano van nalo na-
pano amila bova.

⁵ Jibe na, bo ka kito ra-
vatove ka parinio tubo nalo,
bior bova ka rola rivova ana

nalo aje vironiano van kito. A nemijikia ka kiado jidomiano jo bitilubarío ruei bunu ka bo laka ver roju romila vite nalo memedu ga julaka.

⁶ Jakii iliano nalo nei, memedu ka rosaaro ka rovulu takis napano monoka rosian van parinio tubo, bior ka bogo napano parinio tubo mila ka kiano inãauano, jo mila inãauano napano Atua jian banio ka rimãaukanio.

⁷ Jibe na, monoka rola vite nonovio napano memedu ka rolaio. Ver takis tai ea tivelinio na veru napano roju robario, ðeli veru kinkin nalo napano monoka rovukuio ka vite nalo, kito monoka rovuluio. A nalo napano abar inãauano nalo na tortoru ðeli abar sio na tortoru joomo ea parinio tubo nalo, memedu ka kito rovatove kalo, monoka rosaaro ka rovamenealo.

Namoneano nalo monoka ala rivu ka tomu dolu nalo

⁸ Todolu tai, naina ea tivelinio na jabue nalo na tomu nalo aju amilaio. Ver komila jabue ea toro tai, jau monoka kodukian ka vanio rimemedu ga ka venia napano kam juo kuberkarío. A bo jau tiniemo maio ka bunu ka kiamo jabue tai joa Atua bunu, bior ka napano naio jian titai banso naio toru laka ruei. Tenena naio be tinietiano, ana monoka koto kovar keano vatitigio van tomu dolu nalo. Jau monoka tiniemo tii nalo napano aju vaataro kaso, kar

toro napano jo mila jibe na, naio jibe napano naio mononea nonovio Atua kiano tuboiano nalo garuei.

⁹ Iliano dolu nalo miroano ju joomo ea tuboiano, jibe nalo na aber jibe nei, aber jau kola re siakaiano, a jau kouebin re toro rimãaro, a jau kovina re, a jau tiniemo tii re tenalo na toro dolu kiano, a iliano dolu nalo na jibe nei. A iliano nalo na tuboiano nonovio, aju yetano ka burupati tuboiano na toru tai, napano naio ber jibe nei, berinavo: Jau monoka tiniemo tii toro dolu napano jo vaataro kaso, kala rivu ka naio jibe napano kojo komila kaso bereio.

¹⁰ Toro napano ver naio tinien jii toro dolu be riano, mia naio maka leleio rijikia rila titai napano bova kanio. Jibe na, bajago na tinietiano na toro naio mijikia rila ka jibe napano komonmonea nonovio iliano na tuboiano berenio.

¹¹ Kito monoka rola bajago novo nalo na, bior vonganei bogo jo bano. Monoka rovitilubar ka vaataro ka bogo na monoka rotumolu vatitigio, romonmelio re bereio. Bogo na kito romonmonea vonga beamu, rober ðeli mia Atua rilarur bulag kito ea yetemeriba nei kirisiou kia ga vo, a vonganei, binimej vaataro ruei.

¹² Kiniou nemijikia never tibe nei, never bogiano vaataro ka ribisi, legiano jo binimej, ana bo ka

robisi ka bajago va nalo na melijokouo, a monoka ravar tenalo na bajago vu na miamoiano, ka romijikia ravan ka rola mira kean tenalo na bova.

¹³ Kiado meuliano monoka rimemedu vatitig, tibe napano kito tomu nalo napano roju romieliel ea legiano, a mia monoka rotuvan bajago va nalo. Kito rola re bunu jokoluolu kinkin nalo napano abujo ka saariano nalo na yetemeriba a tomu nalo amun uei banbano amilaluv pariparilo. Kito rotu re rola ka tomu nalo vija tire nalo atu avuruvurulo tanea vio a atu ala bajago na be soro nalo. Kito rotu re rola baravo, a rotu re roiasol ea jokuano nalo.

¹⁴ Kito monoka rotuvan bajago va napano romiyotuba bijaio, a rosidomii re bunu ka rotakii kiano sidomiano nalo, a jibe na roju romiya kiado kulumārauo meravo bo ea tomu nalo miralo, monoka roya bajago na memedu nalo na Tubo Yesu Kristo ea kiado meuliano, ka tomu nalo aialio ka kito kanano tomu be riano.

14

Bo ka namoneano nalo atu re ail niegeniegelo bereio ka tenalo na tertelisu ga

¹ Bilbilu nalo, nojidom ka kamiu kuvijikia ka kiniou nomijog ruei ka iliano na toru tai joa kamiu vonganei.

Jibe tealo, kialo jidomiano telabo ea tenalo tealo, aber ĩeli bo ka ala ĩeli bova ka

ala, mia nalo amerou ka verver alaio, ĩeli mia Atua maka bunu saaro kalo.

Kiniou nojidom never ka nalo jibe nei, nomial nalo jibe maka atu sikili vo, mia bogo na nalo aju bija kito, kito monoka rala vonio re reilkuei laka kalo, mia rosaaro ka rovululo.

² Jibe na, tomu tealo amijikia asen non sinaniano ninio vija bunu sunbue nalo, mia tomu tealo ajidomii aber Atua jidom ka monoka aveli ka sinaniano tealo, ĩeli aveli ka sunbue.

³ Vonganei nojidom never ka kamiu, verver jau tai napano kojen sunbue, jau kovitiio rivova re ka toro dolu napano naio bel kanio, a ver jau tai napano jau kobel ka sunbue, jau kotibure re naio napano jo jenio, kober mia Atua ridu vironiano van naio kario. Atua naio jaaro ka kamiu nonovio, mia kamiu bunu monoka kuvisasaaro ka kamiu.

⁴ Namoneano nalo abiniu aju abitii Atua ga ka naio be kialo tubo, ka naio ga mijikia river kalo ve terakurano ka nalo ala nina ĩeli nalo ala re ninei. Ana jibe na, maka rivu kito ga rotu rotibure kito bereio. Atua mial napano kiano tomu tealo nalo ajen sunbue, a tealo maka asen sunbue, mia naio jaaro ga ka nalo abiniu, kar napano naio mijikia ka mia Tubo Yesu mijikia to rijailo bogo nonovio ka asikil atu sikili ea naio.

⁵ Mia nina naio bare ka bunu ea tivelinio na bogoti nalo. Tomu tealo nalo amidu bogoti tai ka be kialo bogoti lu, a tomu tealo nalo amial bogoti nonovio aber abiniu abe verare ga. Nina bo ga, mia kito roviniu ve terakurano monoka rala kiado jidomiano, a resikili rotuaio, a mia royuku re toro dolu ka takisor kiado jidomiano.

⁶ Toro na jikili ka ridu bogoti tai tibe kiano bogoti lu, naio mila kar napano jidom ridular Atua siano eaio. Toro na jaaro ka sen tenalo ninio, naio jo ber siva ban Atua kario, ana jibe na, bogo na jinano, jo midular naio siano. Toro na mila naio bel ka sinaniano tealo, naio bunu jo mila ka ridular Atua siano, a naio bunu jo ber siva ka Atua ka sinaniano dolu nalo na jo jenio.

⁷ Kito monoka rosidomii ka maka kito tai napano rijikia toa yetemeriba nei tibe naio takurano ga, ka rila tenalo nonovio tibe ga napano naio takurano jidomio, a maka kito tai napano ver rimaro, mia nina kiano tena naio takurano.

⁸ Maka tibe na, bior ver romeul, kito romeul ka rodular Tubo siano, a ver romaro, romaro ka rodular siano. Jibe na, tenalo na kito romilaio, monoka rolaio vija jidomiano napano maka rala kiado sidomiano, mia robe Atua kanano, mia ratakii kiano sidomiano.

⁹ Nina kar napano nua na, iorou ka Kristo m̃aro, naio

jumolu meul bereio, mia nina mila naio binimej be Tubo ka nalo na amarnaro a be Tubo ka nalo na ameul, mia bogo nonovio monoka rotutano ka kiano sidomiano.

¹⁰ Mia jibe na, bogo na namoneano tai jo mila tenalo jakii Ju nalo kialo bajago moruo, a naio jo jibure namoneano dolu napano maka to rilaio, nina bova laka. A bunu, bogo na namoneano tai maka rila tena jibe na, mia naio jo bitii va ea tai napano milaio, napano naio jibe kuruano tai joomo ea Atua kiano bajulukuti, nina be bajago na imouiano tai na.

Kito rotu rotiburevure re kito, kar napano mia kito roviniu rosikili rotu kamu ka Atua mirano na vo, a naio naruei mia rivitii veve vatitig venia napano kito robiniu romilaio.

¹¹ Tena joa Vivitauiano Lu nalo ruei, napano Atua mil, berenio

*Kiniou nemeul nei nojo,
mia nemijikia never
memedu ka bogo
na rimei napano
mia tomu nonovio
anietano kamu ka
miraku,*

*a mia tomu nonovio ave-
rial ka kiniou taku-
rano nebe Atua. Ais
45:23*

¹² Tibe na, mia kito roviniu monoka remei kamu ka Atua mirano, a mia monoka reverii veve terakurano veriiano nalo na tenalo napano roju romilaio, a naio naruei mia rivitii veveio.

Jau monoka kala re kiamo bilbilu dolu, kiano viekuoiano rijoru

¹³ Jakii jidomiano nalo nei, kito monoka rotu re rovitii laka kito bereio ka roverii venia na toro dolu milaio, rober bo ħeli bova. Mia venia na kito namoneano nalo monoka rosidomii ka rala ea kito bereio, mia jibe nei, monoka rala re titai napano ħeli rila namoneano dolu tai rijikia rila luvu m̃arabo ħeli rijikia rivuru naio riva rijoru ea kariano.

¹⁴ Jibe verver kiniou nosidomii ea kiniou, nemijikia never ka nojo noju jikili vatitig bija Tubo Yesu, ana nomonea jikili ka maka titai napano monoka reveli kanio, maka resenio. Mia ver namoneano tai rivar jidomiano ka sinaniano tai maka rimemedu ka naio senio, nina bo ga, mia nioti nene ber monoka rivel vatitigio kanio, a kito kulo dolu nalo monoka rojamo ka naio takii kiano jidomiano na.

¹⁵ Ana verver jau kojidomii ka sinaniano nalo abo ka asenio, komijikia koto kalala ga, mia ver kuruamo dolu naio bel kanio, jau kala vonio re ka naio bunu monoka senio. Ver maka, mia komijikia kola bulag vatitig kiano jidomiano, a nina maka bajago novo tai na kito tomu nalo napano tiniedo titii kito ka rolaio. Jau monoka tiniem maiio ka Kristo m̃aro ka rila kiado meuliano rivu, mia maka rivu rotuvan

jidomiano tertelisu nalo tivelinio na sinaniano nalo amei ve tena tortoru nalo napano atu ala bulag kiado meuliano bereio.

¹⁶ A bereio, ver vite tai napano jau komialio ka bo ga ka kolaio, nina bo ga, mia maka rivu ka koto kolaio ana rila bulag namoneano dolu kiano jidomiano, rivanvano-o rila tomu dolu ail niegeniege kito namoneano nalo siado riviorio. ¹⁷ Ea vio na roberenio ka iliano nalo na tivelinio na ka mia romijikia romunu venia ħeli rosen venia, ħeli monoka roveli ka uei ħeli sinaniano vabe, mia monoka tiniedo bobogia re ka nina maka ve tena toru tai joomo ea Atua kiano navenatuboiano na. Mia kiano tenalo na tortoru, naina rala bajago novo ea meuliano napano memedu, a rotua tuñaro vija tomu dolu nalo, a rovakar jogvuiano napano Niununo Lu jo jianio.

¹⁸ A bogo napano rodu tenalo na rimei ve toru ea kiado jidomiano, romila iñauano memedu napano Kristo jidomio, ana mia Atua risaaro laka ka kito riviorio, a mia tomu dolu nalo aialio ka bo laka.

¹⁹ Jibe na, bogo nonovio kito rovinii monoka rala vonio sikili ka roim̃auka bajago novo nalo napano amijikia adu tuñaro toa kito namoneano nalo, a napano aijaja kito ka rovinii kiado jidomiano rimei rimeruo vatitigio.

²⁰ Sinaniano naio jibe titai kurano, mia maka rivu ka rola naio rimei ve tena tai mia rila bulag bereio iñauano novo napano Atua milaio ea namoneano dolu nalo kialo meuliano ruei. Kiniou neber jibe na, ka sinaniano nonovio ga bo a memedu ka asenio, mia bova ver jau kosen vite tai ana toro dolu rialio a rila naio rijoru, naio rila tena napano naio ber ðeli maka rimemedu ka naio rilaio.

²¹ Mia bajago novo na rola tibe na, ka mia kosen re sunbue, ðeli mia komunu re m̃arjuml̃elu, ðeli mia maka kala todolu tai bereio, ver bogo napano kuruamo rialio, mijikia rila bulag naio, mijikia rila naio rijoru.

²² Tibe na, ver jau kiamo jidomiano nalo tai ea tivelinio na vite nalo tertelisu napano kojidomii kober bo ka alaio ðeli kojidomii kober bova ka alaio, naio bo, mia jau kovakar vatitigio rivu atu ve kamjuo Atua ga, jau kavan re koioliolu ka tanea vio. Toro napano mila ga vite napano naio mijikia ka memedu ka rilaio, mia Atua jaaro kanio, a naio maka rijog riovova ka naio rila vite va tai.

²³ Verver toro na ña jidom veve juo ea tivelinio na venia napano mijikia senio, mia jenio kia ga ruei, mia Atua risaaro kanio re. Nina bior toro na be kiano jidomiano ruei ka ðeli maka rimemedu ea Atua mirano ka alaio, be iakurano, naio

milaio. Tibe na, naio mila kariano ruei na, bior naio maka riñau vija jikiaiano ea venia napano bo ðeli bova ea Atua kiano vitiiano.

15

Kamiu kuvila von ka kuvijuku rivu van kamiu bereio

¹ Kito miroano roju jikili ea Kristo ga, a maka rotua jidomiano ve juo ea tivelinio na vite tertelisu napano namoneano nalo dolu aju amila baravo kanio. Mia kito jibe nei monoka rotu re rala venia ga napano rojidom ka ralaio, mia monoka rola kiado jidomiano rive tebievi rivu ka namoneano nalo dolu napano ajidomii ka maka ajikia ala vite tai napano rojidomii rober bo ka ralaio.

² Kito robiniu, monoka rosidomii namoneano nalo dolu napano aju vaatara ka kito, a monoka rola venia napano nalo ajidomii aber bo, ka nalo asaaro kanio, a ka rijai kialo meuliano vija Tubo.

³ Ver kito rosidomii Kristo, naio joa yetemeriba maka rila venia napano naio jidom ka rilaio, mia naio biniua bogokouo telabo, amila ka naio jibe napano iliano tai ea Niosi na Iouano nalo berenio, napano toro tai mil ban Atua, berinavo

Iliano va nalo napano abuku banso, abuku bunu bare ea kiniou. Iouano 69:9

⁴ Iliano nalo jibe na napano ajua Vivitauiano Lu

re nua, abivitaui ka averloglog vatitig kito napano robinime iorou, mia rovu-lukuio amijikia ala kiado jidomiano sikili vatitigio ka kito bunu romijikia ka rovar dulu bogokouo nalo. Il-iano nalo nei atunukakar kito, nalo ala kito rojikia vatitig ka mia monoka ro-tovulu vite nonovio napano Atua berkario.

⁵ Jibe na, kiniou nojo nobolkouo ban Atua ka kami, kar naio naruei be burupati na jidomiano tebievi, naio naruei mijikia tunukakar toro kiano meu-iano. Nebika ka naio rila ka kami kuvitu kuvitakii Kristo Yesu kiano bajago, kuvitu rivu vio takurano vija bajago na vironiano, ⁶ napano kenemiu jidomiano ve takurano ga, a kenemiu iliano ve takurano ga, naruei kumijikia kuviaia vatitig Atua, napano kiado Tubo Yesu Kristo karamiano.

⁷ Jibe na, kami kulo Ju bija kami napano maka ave Ju, bogo napano kumitu kubinimei vio takurano, a kumisaaro ka kumil vorvoru kami nonovio kubinimei jouro, jibe napano Kristo jaaro ka rilivorvorua kito. Bogo napano kumila jibe na, naio be m̃arabo tai bereio ka adular Atua siano.

⁸ Mia bo ka rola tibe na, bior napano Kristo binime i ea yetemeriba, maka rila im̃auano rivan kulo Ju nalo ga, mia mila bunu ban nalo napano maka ave Ju.

Jibe ea tivelinio na kulo Ju, naio mila nonovio vite

napano Atua kiano Iliano Lu nalo aberenio, mila napano verikariano nalo napano Atua mila ban Ju nalo kialo bajulukuti, nalo amol-moluo abe riano.

⁹ Mia ea tivelinio na nalo napano maka ave Ju, naio berial Atua kiano tiniese-seiano banlo, mila ka nalo aiaia naio, bare ga ka il-iano na Vivitauiano Lu nalo aberenio. Nana beamu kalo jua Niosi na Iouano nalo, ber

“Kiniou nojo iviso ka valauo nalo, nemiaia siamo, mia kiniou nolotuso ka iouano lu nalo.”
Iouano 18:49

¹⁰ Mia dolu, ea Niosi na Tuboiano nalo, berinavo

Kamiu valauo nalo, kami kuvijurukar vija Atua kiano tomu nalo memedu nei kulo Ju, ka mia kuviniu kuvisaaro! Tiut 32:43

¹¹ A tai bereio ea Niosi na Iouano nalo bereio, berinavo

Kamiu napano maka kuve Ju, kuvidular Atua siano mave, kami tomu nalo dedade, kuviaia naio. Iouano 117:1

¹² A tai na maaro miyotuba ea Niosi na Aisea, naio berii Ju nalo kialo Naverikariano, ber mia naio tukamu bunu ka nalo napano maka ave Ju. Naruei iliano nene ber jibe nei, berinavo

Mia tormoru Jese kiano torogio tai rimoluo, napano mia Atua ridu naio to mave rive tubo ka nalo dolu nei napano maka ave Ju,

*naruei mia nalo avalea
ea naio ka naio rije
Atua kiano ilivuiano
rimaluvo ealo. Ais
11:10*

¹³ Naruei nobolkouo bior kamiu bereio ban Atua, napano romijikia ravalea ea kanano verikariano nalo, nebika ka kamiu kuvitu kumonmonea naio rivanvano-o kanano saariano nalo a kanano tumaro rime i rivujo rivu ea kenemiu meuliano nalo, rila napano Niununo Lu kiano moroano mijikia rimau tanea kamiu ka rila ka kuvitu kuvalea kiano verikariano nalo, jo binimei toru lie riva rivan tibe na.

*Pol berii banlo ea tivelinio
na kiano imauano ban nalo
na maka ave Ju*

¹⁴ Bilbilu nalo, maka nosidomii veve ka kamiu, mia nemijikia vatitig kamiu, kenemiu iviso bo laka, kumijikia vatitig vite nalo miroano ruei, a kubare ka kuvijikia kuverloglog kamiu bereio ea Atua kanano iliano novo nalo.

¹⁵ Jibe na, peli kamiu kuviilo kija ka mesi nei, kumial ka nojumolu neberial vite telabo ban kamiu jikili kija, a neberenio bereio vite tealoo napano peli kamiu kumisidomii kuber kumijikia ruei. Mia nemialio monoka nala tibe na, kar napano Atua midu jikiano na laiano na imauano nei joa jumaku, jibe jidomiano kirinovo tai, ¹⁶ ka nomei tibe Yesu Kristo kiano toro na imauano ka neberial Atua kiano Ioluanou Vou ka nalo napano maka ave

Ju. Nomila imauano na, nojibe toro lu tai napano nomimau joomo ea Atua kunuano Lu, nomila nalo napano maka ave Ju abinimei abe lu vatitig, nomioalo ea Niununo Lu siano, ka amijikia amei tibe ijaiano novo tai napano ban ea Atua napano mia naio saaro ka vatitigio.

¹⁷ Tibe na, kumemi juo Kristo Yesu nuvitu nuvimau vio takurano, a nemijikia nasaaro laka ka kiniou bunu nemijikia nala Atua kiano imauano togio.

¹⁸ Maka neil varvarka vovu, mia nemijikia never ka nabarvarka laka ka venia napano Kristo mimauka miopdulu ea kiniou, bior vonganei, kumemi juo numidu nalo napano maka ave Ju nalo abinimei vaataro ka Atua,aju abatove kanio. Kiniou neberial iliano nalo, kiniou nemila imauano miroano, ¹⁹ Atua mila vremesiano kinkin nalo, a Niununo Lu kiano moroano mimau, ana mila na Kristo kiano Ioluanou Vou ba reraio nonovio ea vio miroano, jikario Yerusalemo ban yako, mijaka ba boru ea tanobuku na toru Lirikam.

²⁰ Mia nemialio ka maka rivare vo, kiaku jidomiano tai jikili joa kiniou ka monoka navan lie vo. Mia maka nosidomii ka navan ea vio napano Kristo siano bokario ruei, bior napano maka nosidom neiasol imauano napano nalo dolu ajikar ruei, mia nojidom

navan ea vio napano tomu nalo maka ajikia naio vo.

²¹ Nina jibe iliano tai napano naverialiano Aisea ber beamu, napano berii Naverikariano, berinavo

“Nalo napano tomu maka averial naio ka nalo vo, mia nalo avitilubarario vonga,

nalo napano maka lele ajog siano, mia nalo ajoglubario.” Ais 52:15

Pol jii vatitigio ka riva riyotuba ea nalo napano Romo

²² Jibe napano nober ruei, bogo miroano nojidom neviedu ea kamiu na Romo, mia nojo nomila imauano ea vio dolu, a todolu nalo miroano banbano-o maka bunu neial bogo tai kanio vo.

²³ Mia vonganei, nemial jibe kiaku imauano ea tanobuku nalo na Esia biniu ruei, a jidomiano napano joa kiniou yuka miroano ruei, ka nojidom neviedu noyotuba kean kamiu kija, nojidom ka p̃eli mia rimei rivu naruei. ²⁴ Nojo nomila vatitig ka nataluvo den vio nei nava nejaka yako ea buruvenuo napano Speni, naruei nojidomii ka mia nesel ea kamiu, ka romijikia rotu vio takurano ka ravar bogo novo vija kito kija beamu.

Mia maka nejikia noto vesiou tibe napano nojidomio, mia ver kamiu kuvijikia kuvila vite tealoo ka rijai

kiniou ka kiaku m̃arabo, mia netikar nodu kiaku m̃arabo bereio nataluvo navano.

²⁵ Mia nina maka vonganei ga, bior napano beamu monoka nava nesel Yerusalemo, kar napano kiaku kiri imauano tai ka nala ka Atua kiano namoneano nalo napano ajua vio na beamu.

²⁶ Nalo ajua bogokouo tai vonganei napano nalo miroano abe talimasa, maka ave kialo vite, naruei taara na namoneano nalo na vio nalo nei na Masetonia a Kris, nalo amijogio, ana nalo ga amidu jidomiano nei aberinavo bo ka avuku veru tai ka rijailo.

²⁷ Nina vite novo tai napano amila jakii kialo jidomiano ga, mia nemial jibe naio be tena memedu tai ka nalo monoka ala bunu. Nalo na maka ave Ju, mia ea kialo meuliano bija Tubo, nalo abar Atua kiano ilivuiiano miroano miopdulu ea kulo Ju nalo ban ealo, ana bogo napano Ju nalo na abiniua bogokouo bereio, bo ka nalo napano maka ave Ju adu kiano kija vanlo, aijalo ka tenalo tai napano maka ve kialo.

²⁸ Mia veru nei napano nalo amila bijiio, nalo abar jua jumaku ka kiniou navario navano, ana bogo napano naba nabar ju vatitig ea nalo na Yerusalemo ruei, mia nataluvo bereio ka nemei nesel ea kamiu na Romo, karina mia nejaka nava Speni.

29 Mia nomijog ruei ka bogo napano neyotuba kean kami, mia rivu mia rivu ka kito nonovio, mia neviedu vija Kristo kiano ilivuiano novo ve miroano ka neveriio van kami.

30 Bilbilu nalo, nojidom nevika sikili van kami ea kiado Tubo Yesu Kristo siano, ka kami kumitu tiniemi maio ka kiniou ea kenemi volkouano. Nemijikia ka kami kubujo ea tinietiano napano Niu-nuno Lu jiano, ana bo ka kubolkouo sikili ka kiniou, kuviasol kenemi volkouano vija kiaku volkouano napano nemila vonio jikili ka nobolkouo julaka kano.

31 Bogo napano nava novokar tanobuku nei Yutea ka nava Yerusalemo, telabo napano maka asaaro ka amonea Ioluan Vou nei aju, ana maka nejikia ka mia nalo ajidom ka ala tumabe ka kiniou, mia neber bo ka kami ka kubolkouo van Atua ka tukovio ka kialo jidomiano va nalo ea kiniou. Mia monoka kubolkouo bunu ka namoneano lu nalo napano aju Yerusalemo, mia nalo asaaro ka avar veru ve telisu napano mia kiniou nesiano vanlo.

32 Ana verver vite nonovio memedu tibe Atua kiano tinietiano, mia kiniou nemijikia neyotuba ka kami vija burumara kiaku tiniesareiano a mia nemijikia noto rivu vija kami, nojilimebi ve telisu beamu.

33 Mia kiniou bunu nojo nobolkouo ka kami, ka

mia kiado Atua, burupati na tumaro, to vija kami rivanvano-o maka rijikia ribisi.

16

Pol berial vite tealo ban namoneano nalo na Romo

1 Bilbilu nalo, nojidom netetavoko kiaku mesi ea iliano nalo tai ea tivelinio ka kami nalo tealo. Ea tivelinio na kuviviniedo nei Vipi, napano naio naruei ridu mesi nene riviedu ea kami, nejidom kuvijikia ka naio be ijaiano novo tai ea taara na namoneano nalo na ea komeli na Kenkria, 2 naruei bo ka kami kuvisaaro ka kuver iliano vorvorua vanio, kuvuru naio tibe kuviviniemi tai ea tivelinio na Tubo kiano torogio, jibe napano memedu ka kito namoneano nalo monoka ralaio van kito. Bo ka kami kuvijai naio ka venia napano mia jumano bulati kano, ka napano naio be tira tai napano be bilbilu novo ea kumemi miroano, mija vatitig kumemi.

3 Nejidom bunu ka kami kuver kiaku kavijo bo a bogiano bo rivan tira novo dolu nene Priska, rivija koano sumano Akuila, napano kumemi nube tomu na imauveiano ea Kristo Yesu kiano imauano. 4 Riano ga na, bogo tai nua na, kiniou nojoa juluvati na mario, ana naljuo amila napano vaataro ala luvu kialo meuliano ka amei alarur kiniou, mia nojo nober sivaiano laka biorio.

A maka kiniou ve takurano ga, mia taara na namoneano dolu nalo na tanobuku nei nalo bunu aber sivaiano kalo bior venia napano amila nei.

⁵ Mia kavijo bo a bogiano bo napano nober ka naljuo, nojidom nover bunu van ea nalo dolu napanoaju joomo ea taara na namoneano na tertelisu napanoaju abiviuo vio takurano ea naljuo kunualo.

Mia neber jibe nei bunu ka nalo nene, jibe kiaku bilbilu novo nei Epanetas, napano naio be moti na ea burumara tanobuku na Esia napano monea Kristo, ⁶ mia Mere, napano naio mila imauano novo nalo miroano iviso ea kami, ⁷ mia naljuo dolu na kiaku vio nene, Adronikas naio Junia, napano nua na kumemi nubiniu numitua tetavokoiano vaarakurano. Atevi juo nei, naljuo amonea Yesu nua ruei, beamu ka kiniou, a abar sio novo laka ea atevi dolu nalo miralo.

⁸ Tealo bereio, nina Ampli-atas, napano Tubo mila ka kumemi ve juo nuve bilbilu novo, ⁹ a Upanas, napano numimau vio takurano bija naio ea Kristo kiano Ioluan Vou, a kuruaku novo nei Stakis, ¹⁰ a Apelesi, napano be iakurano ka juboluboiano toru binimei ea naio, mia naio jikili ju kirisikili ea Kristo.

Mia bunu, neber kavijo bo a bogiano bo ban Aristobui-las kiano maratavo nalo, ¹¹ a

toro dolu na kiaku vio nei Erodiano, a namoneano nalo na Narsisas kiano maratavo, ¹² a tira juo novo na amimau Tubo kiano na, Traevina bija kuluene Traevosa, a kuviviniedo dolu nei bunu Pesisi napano tiniedo jii naio toru, a naio mila Tubo kiano imauano toru laka ruei, ¹³ a Ruvus, navurimaraboiano na Tubo kiano imauano, bija kenieno napano naio bijuku ban kiniou jibe napano nebe kenerinio.

¹⁴ Mia tealo bunu bereio, nina Asinkritas, Vlekono, Emesi, Patropas, a Emas, bija bunu kuruado dolu nalo napanoaju bijalo, ¹⁵ a bereio maka tinieku bobogia Vilolokas, Juliano, Nereas bija kuviniene, a Olimpasi, bija namoneano lu dolu nalo napano amila lotuano vio takurano bijalo.

¹⁶ Kiniou nejaaro ka nebiviuo kami nonovio ea kiaku mesi nei, a kami bunu monoka kuvorvorua vatitig van kami bogo nonovio, kuverial kenemiu tinietiano van kami, tibe kami kumiom babibiniomiu ea tinievuiano. Mia bunu, taara nalo na Kristo kiano namoneano nalo ea tanobuku nalo nei aberial ka naloaju ajidomii kami ea kialo volkouano nalo.

¹⁷ Bilbilu nalo, nebika jikili ban kami bereio ka monoka kuvitigar vatitig ka nalo napanoaju ajikar baravoiano nalo, pli aju amila namoneano nalo abeve terakurano, aaju amilkue ka

verloglogiano nalo napano kumijevio. Mia bogo napano kuvitkar vatitiglo, kuvitu re kuva vaataro kalo. ¹⁸ Nina bior tomu nalo kinkin na jibe na, nalo maka atu ala kiado Tubo Kristo kiano imauano, mia nalo aju amila jakii ga kialo sidomiano va nalo. Nalo amijikia averial vite nalo na bo mia bo ve miroano, mia be seseiano ga na, a nalo aju ajubolbo vatitig tomu nalo kialo jidomiano napano nalo maka ve kialo jikiaiano rivu.

¹⁹ Tomu nonovio amijikia vatitig ruei ka kumitumia kumijogkar vatitig Atua kiano iliano, a naina mila kiniou nejaaro laka, mia monoka kuvitu kuvitkar vatitigio. Ea tivelinio na vite nalo napano abo, kamiu monoka kuvilala masosouaio, mia ea tivelinio na vite nalo napano abova, ve re leleio soro nene tai toa kamiu.

²⁰ Mia verver kuvila tibe na, mia kiado Atua na tumaro naio be kiano marabo ka rila Simaro to yetano ka jaamiu ka kuvila tanea vatitig naio. Mia kiaku volkouano ka mia kiado Tubo Yesu Kristo kiano tinieseseiano to vija kamiu.

²¹ Bilbilu nei Timoti, napano kumemi juo numitu numimau vio takurano, naio berenio kavijo bo peli bogiano bo ban kamiu, a nalo tolu nei na kiaku vio, Lusias, Jasoni bija Sosipata, nalo bunu aberenio.

²² Kiniou napano nobokar vovojulu, nobivitauialar

m̃esi nei Pol kiano na ban kamiu, siaku Tesias, a kiniou bunu nejidom neverenio ka nejaaro laka ka nebiviuo kamiu ea m̃esi nei, ea Tubo siano.

²³⁻²⁴ Bo ga, kiniou Pol nei naruei nebivitauiar nei, mia vaataro nala nonovio kiaku m̃esi naruei, mia kavijo bo a bogiano bo jo biedu binimei ea nalo tolu nei, Kaias, napano nojoa kunuano, napano lotuano na vio na nalo aju abinimei vio takurano ea kunuano, bija Erastas, napano naio be navitikariano na veru na komeli nene, bija kuruado nei Kotas.

²⁵ Vonganei ea kiaku iliano maariano, nejidom nedular bereio ilivuiario nonovio nalo van Atua. Nobolkouo ka mia naio ridu iliano nalo na Ioluano Vou, vija verloglogiano nalo novo napano aberii Yesu Kristo napano nejian ban kamiu ruei, ridu vatitig tua kenemiu meuliano nalo, ka kuvijikia kuvitu sikili ea bogoti napano ju binimei. Ilirianiano novo nalo na, tomu nalo maka ajikiaio ea yuka miroano napano barlaka ruei, mia vonganei ga Atua berialio ka kito. ²⁶ Beamu, tomu nalo abuluku naverialiano nalo kialo iliano nalo, nalo maka ajikia ka ilirianiano nalo nene aju joomo ealo, mia vonganei, kumemi nuberialio meravo, kito robiniu romijikia rojoglubarario. A Atua, jibe naio jo nua a mia to toboto, naio berialio Iolu-

ano Vou nei monoka rivan
ea tomu nalo na buruvenuo
nonovio, ka nalo bunu ajikia
ajogio, ajikia amonmoneaio.

²⁷ Naio ga takurano be
Atua, naio ga takurano be
burupati na masouano, a
naio ga takurano napano
Yesu Kristo mila kiado
marabo ka rolotu naio,
ravano-o maka rijikia ribisi
bogo tai.

Mesi Moti Napano Pol Bivitauiāio Ban Namoneano Lu Nalo Na KORIN Verialiano Moti

Tukunuano bulati na niosi nei

Mesi moti napano Pol jirio ba ban namoneano nalo na Korin, naio jirio bior napano be vite va nalo jumormolu ea namoneano nalo kialo meuliano ea vio na, a naio juvan mēsi nene ban ka ri-jailo. Yimo lu na Korin, Pol naruei jikario.

Korin be burumāra komeli tai na tomu nalo na Kris kialo, a be bulu komeli na tanobuku nei Akaia, napano jo yetano ka Romo. Be tomu miroano na venuo doldolu nalo ea vio na, a naio be vio tai napano tomu nalo amijikia vatitigio ea tivelinio na vioruru, a ea tivelinio na kialo bajago moruo nalo. Tomu nalo na yetemeriba amijikia vatitig tomu nalo na vio na bior kialo bajago va nalo a bior kialo lotuano napano aju amilotu ka atua miroano doldolu nalo.

Vite burtumoruo nalo napano Pol berii ea mēsi nei jibenei:

jo berii vite va napano tomu nalo na yimo lu aju beve terakurano,
jo berii vite va nei napano nalo aju amila bova bija tira,

jo beridoŕe kialo vikadeni-ano nalo ea tivelinio na soriano,

jo berii tivelinio na sinaniano napano toro jo jiano ban tavoro nalo. Mia naio berii mārabo memedu ka atakiio ea lotuano ea yimo lu,

jo berii moroano nalo napano Niununo Lu jian ban yimo lu,

a jo berii bajago nene na napano toro mijikia meul bereio.

Pol berial ka naio mijikia vatitig kialo vite va nalo bija kialo vikadeniano nalo, a berial ka Yesu kiano ioluano vou ga jian veridoŕeiano banlo.

Ea mirano duelimo ba tolu [13] naio berii bajago na tiniedo titii Atua vija tomu nalo laka, nina bajago na bo laka ka Atua kiano tomu nalo atakiio. Yati nei tomu nalo amijikia vatitigio, jovulu torogio nalo na niosi nei.

*Torogio nalo na niosi nei
Iliano moti 1:1-9*

Tomu nalo ea yimo lu
abeve terakurano 1:10—
4:21

Bajago va bija tira, a meuliano na māratavo 5:1—
7:14

Namoneano nalo bija
tomu nalo napano maka
ajikia Atua 8:1—11:1

Namoneano nalo kialo
mārabo nalo na atakiio
ka alotu 11:2—14:40

Yesu meul bereio, a tomu
nalo napano amonea
naio amijikia ameul
bereio 15:1-58

Veru na asian va van namoneano nalo na Yutea 16:1-4

Iliano maariano 16:5-24

Pol jo Eveso, naio berenio vorvoruano ban tomu nalo na Korin

¹ Bilbilu nalo na Korin, kiniou napano nebitauia mēsi nei biedu ban kamiū, kiniou Pol, napano Atua jidom ka nemei neve Kristo Yesu kenerinio kiano atevi tai, ana naio bio kiniou, bitirilar kiniou ka navakar iñauano tibe na.

Kiniou nojoa vio nei bija kiado bilbilu nei Sostinis, ana kumemi juo nuberenio kavijo bo pēli bogiano bo ban kamiū nonovio, ² ea Atua kiano namoneano nalo ea burumāra komeli na Korin. Kamiū na naruei Atua bio kamiū ka kumei kuvi-asol vija kiano namoneano lu dolu nalo, napano vio reraio ea vio nonovio nalo aju amilotu naio napano mila kito robe lu vatitig bo ruei, nina Yesu Kristo napano naio be kito nonovio kiado Tubo.

³ Kumemi juo kenememi volkouano ka Tubo Yesu Kristo kiano tiniememiano a karamādo Atua kiano tumāroiano atu vija kamiū.

Pol berenio siva ka Atua kar tomu nalo na Korin kialo viekouoiano

⁴ Nemial jibe ka bogo na kube Kristo Yesu kiano tomu nalo, Atua kiano tiniememiano jo miñau toru ea kenemiu meuliano, ana bogo

nonovio nojo neber siva laka kanio.

⁵ Kamiū kumitu kubinimei bo laka ea tivelinio na verialiano na Ioluanō Vou, ana kumitu kubinimei mave ea tivelinio na kenemiu jiki-aiano, a ea tivelinio na bajago novo nonovio dolu. ⁶ Bogo napano nemial tena, nemialio jibe napano kiaku iñauano nalo re nua na, napano neberloglog Kristo ka kamiū, vonganei naio jo bar mārati toru.

⁷ Jidomiano nalo a mo-roano nalo napano Niununo Lu no jo jianio, maka tai napano maka kuvokario vo, ana kumitu kumiñau bijalo bo laka, bior napano kumitu kumisirarag ka kiado Tubo Yesu Kristo mijikia riyotuba bereio ea vio yetano nei.

⁸ Naio maka riyotuba vo, mia jo miiija kito julaka ka rotu sikili rivano-o rivokar legiano maaro nene, mia bogo napano rotua Atua mirano naio mila napano maka tokoriano toa kito.

⁹ Atua berkar ruei ka riviekokoa kito, mia romijikia rovarkar tiniēdo rivu ea kiano iliano nei, bior napano naio bio kito, midu kito misol kito robe bilbilu novo nalo bija kenerinio, kiado Tubo Yesu Kristo.

Namoneano nalo aju aburuburevurelo laka

¹⁰ Kiaku māratavo, Yesu Kristo kiado Tubo kiano terati nalo, kiniou nojidom nevika sikili van kamiū ea siano, ka kamiū kuvila von ka kuvila kamiū ka kumei

ve takurano bereio. Bova napano kumitu kuburuburevure kami, mia kenemi jidomiano a kenemi iliano monoka ve takurano ga.

¹¹ Neber iliano nalo na, kar nalo napano aju kea ea toro nei Kloe kiano vio nalo abinimei aberial ban kiniou ka siniabu nalo aju iviso kean kami, kuruaku nalo a kuvivinioku nalo.

¹² Nomijog napano kami terakurano kumitu kuber kenemi bagaro nalo. Peli tai berinavo "O, kiniou natakisor Pol," ĩeli dolu river "O, kiniou Apolos kiano," ĩeli tai bereio, river "O kiniou neiasol Kevas kiano bagaro." Ana tealo bereio nalo abitirilar kialo bagaro dolu na tertelisu nalo, abuku bulag dolu nalo, aberenio "O, kumemi ga nube tomu na Kristo kiano riano."

¹³ ? Ei, venia na kami kumila jibe na? Peli bo ka rotivirivi Kristo ea niati, ratankanio ea kenemi bagaro na tertelisu nalo tibe na? Peli tealo ajidomii aber nalo abe kiniou Pol kiaki, tibe napano aber kiniou naruei napano najakilele ea ĩakolkolo ka nalarurlo? Peli tealo tinielo bobogia napano abaruei ealo ea Yesu siano, mia nalo ajidomii aber abaruei ealo ea siaku?

¹⁴⁻¹⁶ Jibe na, nemial bo ga ka nanua na kiniou nala re varueiano ea kami tai leleio, ĩeli naljuo nei Krispas naio Kaias ga, a riano, tinieku bobogia, nabaruei

bunu ea Stevanas bija nalo na ea kiano ĩaratavo, a maka bunu nosidomkar vonganei ka nalo na ga ĩeli ta bunu bereio. Kiniou neber jibe na bior napano ver nala varueiano ea kami ve va moroano, ĩeli nalo atumolu atu ail vevavin ka garuei, atu averinavo "O, kumemi naruei, Pol baruei ea kumemi ea siano!"

¹⁷ Jibe na bova na, bior napano Kristo maka tuvan kiniou nemei navaruei ea tomu nalo, mia ĩila kiniou nebinimei ka noioliolu ka kiano Ioluano Vou vanlo. A bogo napano nojo nomioliolu jibe na, maka nala vija moroano na masouano na yetemeriba nei, mia nemila bija moroano na Kristo kiano ĩakolkolo.

Kristo berial Atua kiano masouano a kiano moroano

¹⁸ Ana tomu nalo napano aju ajakii ĩarabo na vakovioiano, amijog iliano na, Kristo kiano ĩakolkolo, jibe titai na vovuiano ealo, mia kito napano roju rajakii ĩarabo na meuliano, romijog iliano na, Kristo kiano ĩakolkolo, jibe Atua kiano moroano ka rilarur kito.

¹⁹ Nina jibe iliano tai ea Vivitauiano Lu, napano Atua berenio jibe nei, berinavo

Mia kiniou nouedom masouano den nalo napano ajidomii aber abe masou,

mia notuko vio ka jikiano ea nalo napano

ajidomii aber amijikia vite. Ais 29:14

²⁰ A iliano na be riano laka, bior napano robittii yetemeriba, romijikia rovika tibe nei, rever: ? Kiano tomu na masouano nalo, nalo be? Tomu nalo napano amilakakar vatitig jikiaiano nalo napano ajua niosi nalo, nalo be? ?Tomu nalo napano amijikia aberii jidomiano dolu nalo napanoaju jelviv vonganei, nalo be? Romial jibe maka atu na, a romial jibe Atua mila masouano na yetemeriba nei binimej jibe tena vovuiano tai bereio ruei.

²¹ Atua ga naio be masou, a ea kiano masouano, naio mila ka masouano na yetemeriba nei maka rijikia rila toro rijikia naio. Mia naio mial bo lie ka rila napano kenememi ioluano nalo napano tomu naloaju ajidomiio aber be vovu ga, mijikia rilarur toro kiano meuliano napano moneaio.

²² Kulo Ju miroano maka asidom amonea,aju aberenio ver nuvila aial vremesiano nalo, mia atikar ka amoneaio, a kulo Krik miroano maka asidom amoneaio,aju aberenio ver nuvil rimemedu ea kialo jikiaiano moruo nalo, mia nalo atikar ka amoneaio,
²³ mia maka nuvitu nuvila tibe na kalo. Kumemi numitu numiololu ka Yesu ga banlo, nuber naio m̃aro ea m̃akolkolo kar kialo kariano nalo, mia iliano na, kulo Ju nalo aber maka ajikia amoneaio, a kulo Krik

nalo, aber nina iliano vovu ga na.

²⁴ Mia ea tivelinio na nalo napano Atua biolo ka ave kiano, jibe kito, napano kito tealokulo Ju a kito tealokulo Krik, maka tibe na. Kito rosidomii re ka reial kijokijo dolu, bior napano robartilubar Atua kiano moroano ea Kristo kiano im̃auano ruei, a rosidomii re ka rotakii jikiaiano dolu, bior napano robartilubar Atua kiano masouano ea Kristo kiano m̃arabo na milarur kito.

²⁵ Tomu dolu nalo amial ka Atua mijamo ka Kristo m̃aro ea m̃akolkolo, ajidomii aber Atua melukluku ga, mia makanio, tenei berial kiano moroano napano jikili lie loa toro kiano moroano. Nalo amial tenei, ajidomii aber Atua miavovu ga, mia makanio, naio berial kiano masouano napano bo laka loa toro kiano masouano.

²⁶ Kuruaku a kuvivinioku nalo, kuvila von ka kuvividomii ver kamiujibe venia na, napano Atua bio kamiu be kanano? Maka kito ve miroano napano ea tivelinio na vitiano na yetemeriba robe masou, p̃eli kito tomu na be p̃irido, p̃eli kito tomu na tortoru.

²⁷ Yetemeriba nei ber kito romiavovu, mia Atua buru kito, ana mim̃au jel ea kito, jo bar bulag masouano na yetemeriba. Yetemeriba nei ber kito romilukluku, mia Atua buru kito, ana mim̃au jel ea kito, jo miladom sikiliano na yetemeriba.

²⁸ Yetemeriba nei ber kito robe tomu kurano napano roju yetano ga, mia Atua buru kito, ana ea miñau jel kito, jo muedom tenalo na burutomoluo napano aju, mila tenalo na abinimei be kurano.

²⁹ Jibe na, maka toro tai leleio napano mijikia ridular naio toa Atua mirano, river naio be masou, ðeli naio jikili, ðeli naio be toro tai, ³⁰ mia Atua ga be burupati na kiado meuliano vou bija Kristo Yesu. Naio naruei miila Yesu binimei jiloglog mñarabo ban kito, ana Yesu bulu bulag kito mila romemedu ea mirano, robinimei robe kiano tomu lu.

³¹ Ana bior tenalo na, romial ka iliano tai ea Vivitauiano Lu be riano laka, napano berenio jibe nei, ber
Toro napano jidom rive mñarou, naio mijikia rive mñarou ga ea venia Tubo milaka naio. Jeremaia 9:24

2

Pol mioliolu ka Yesu kiano mñakolkolo ea Niununo Lu kiano moroano

¹ Bilbilu nalo, nua na kamiu maka kuvijikia Atua kiano iliano nalo, mia kiniou nebinimei neberialio ban kamiu. A jibe na napano kumialio, bogo napano nebinimei nomila, maka nola napano navarvar ka iliano terebievi nalo ðeli toro kiano masouano nalo.

² Nemila kiaku jidomiano jikili ka bogo napano nojo iviso kean kamiu, mia maka nosidomii tenalo dolu leleio, a mia noioliolu ga ka Yesu Kristo, vija kiano mñariano ea mñakolkolo.

³ Nojo bija kamiu, nomijog ka nemelmeluku laka, nojo nomerou, nojo nomemebiju, ⁴ a kiaku iliano a kiaku tukunuano nalo maka avujo leleio ka masouano ðeli toro kiano jikiaiano. Mia ea bogo na, kumijog napano kiaku iliano nalo abujolou ka moroano na Niununo Lu, ⁵ ana mila na kenemiu viekouoiano maka sikili tua toro kiano ilimasosouano, mia jikili jua Atua kiano moroano.

Atua kiano masouano

⁶ Be riano napano kiaku iliano maka rivujo ka ilimasosouano na yetemeriba nei, ðeli jikiaiano ninio nalo napano tomu na tortoru na yetemeriba nei ajaaro kanio, mia naio bo ga, bior napano yetemeriba nei bija kiano tomu na tortoru mia ava añaro ga. Mia kamiu napano kenemiu jidomiano meruo bo, kubitilubar napano kiaku iliano bujo vatitig ka Atua kiano masouano nalo.

⁷ Kiano masouano na, naio midu vatitigio bo ju beamu karina jii yetemeriba nei, mia masouano na juluku ju vatitigio banbano-o, mia tomu nalo maka ajikia leleio, a vonganei ana maluvo ea kito medave jibe ilivuiano

na toru tai napano Atua jianio ka rila rivu ka kito.

8 Ana kiano masouano na maluvo ea kito ea m̄arabo napano Yesu binime i milarur kito, mia tomu na tortoru na yetemeriba nei maka avitilubar tenei, ana amidu Yesu, napano naio be Tubo na toru na mermerano na tiniabene, ajilan naio jak-lele ea m̄akolkolo m̄aro.

9 Tomu nalo maka avitilubar Atua kiano jidomiano tibe na, naio jibe Vivitauiano Lu tai, napano bere-nio jibe nei, berinavo

Tenalo na bo napano toro mirano maka lele rialio, p̄eli maka lele toro tiliniene rijogio, p̄eli toro kiano iviso maka lele sidomiio,

mia tenalo na naruei Atua mila vatitigio ju ka kiano tomu nalo napano tiniei jii naio.
Ais 64:4

10 A kito, romijikia ilivuiano nalo na, bior napano Atua Niununo napano bitilubar tenene nonovio, a mijikia Atua kiano jidomiano lukluku nonovio, naio berialio ban kito.

11 Jibe ka ga kito kulorinio, napano toro dolu maka rijikia venia joa kiado jidomiano, mia niunudo ga mijikia vatitigio bo, mia be verare bunu ka Atua. Kito maka rejikia venia na jua kiano jidomiano, mia Niununo mijikia, ana berialio ka kito.

12 Maka niununo tai na yetemeriba nei ga napano

riverialio ka kito, mia Niununo Lu nei napano jaluvo den Atua binime i, naio naruei mila kito robitilubar vatitig jidomiano nonovio nalo napano Atua jo jian ban kito.

13 Tibe na, bo ka kuvitilubar bunu ka kenememi iliano nalo napano abinime i ea kami, maka ea toro kiano masouano, mia Atua kiano Niununo ga berloglog ka kito. Jibe na, numitu numidu Niununo Lu nei kiano ilirianiano nalo, ana numisian ban kami napano Niununo nene joa kenemiu meuliano ruei.

14 Toro napano Niununo maka toa kiano meuliano, naio maka rijikia rivitilubar tenalo na Niununo, naio jibe joa kia ga melijokouo, ana maka rivokar leleio moroano nalo napano Niununo jianio.

15 Toro napano Niununo joaio, mia mijikia rivitilubar vatitig vite nonovio, mia toro napano Niununo maka toaio, naio maka rijikia rivitilubar vatitig venia joa toro kiano meuliano napano Niununo joa naio. 16 Iliano Lu berenio jibe nei, ber

Maka toro tai leleio napano naio mijikia venia joa Atua kiano jidomiano,

maka toro tai leleio napano mijikia verloglog vite van Atua. Ais 40:13

Iliano nei be riano laka, mia ea kito napano Niununo joa kito, romijev Kristo kiano jidomiano ruei.

3

Bova ver baravoiano jo iviso kean namoneano nalo

¹ Ea bogo napano nojo bija kamiu nua na, nojidom neil vatitig vija kamiu, tibe napano kamiu tomu nalo napano Atua kanano Niu-nuno joa kenemiu meuliano ruei, mia makanio. Namial ka maka kuvare vo, ana mila nemil ban kamiu jibe ka kamiu tomu nalo na yetemeriba kia ga vo, napano ea tivelinio na kenemiu meuliano bija Kristo, ajibe kiritete nalo kia ga vo.

² Jibe na, nabagan kamiu ka yu ga, maka nejikia nesian sinaniano na jikili van kamiu, bior napano maka kuvare. Mia bokar banei, nemial jibe maka kuvare vo, ³ bior napano bajago miroano na yetemeriba aju iviso kean kamiu kia ga. Peli kamiu maka kuvitilubar, mia bogo napano jokuano a baravoiano ju kean kamiu, ber peli kumitua melijokouo kea ga vo, kenemiu bajago ajibe toro ga kiano bajago.

⁴ Meravo laka ka kamiu jibe na, bior napano kumitu kuburu vurevure kamiu kea ga. Kamiu tealó kumitu kuberii kiniou, kuberinavo "O, kumemi numisidom Pol, kumemi nuvitakisor naio," a kamiu tealó aju aber bil-bilu navagadeano nei Apolos, aberenio "O, kumemi numisidom Apolos, kumemi

nuvitakisor naio," mia jidomiano kinkin jibe na naio be toro kiano jidomiano ga.

⁵ Verver kuvisidom ku-ververii kumemi juo Apolos siememi, bo ka kuvisidomiiio vatitig ka kumemi juo nube toro na jumabe? Kumemi juo nube Tubo kiano toro ga, ka nuvila imauano napano naio midu joa jumememi, ka rila ka kamiu kuvijikia kumonea naio. ⁶ Ea tivelinio na imauano nei, kiniou naruei napano nemebija kurukuti, a Apolos naruei napano naio se toti nene, mia Atua ga napano mila burupati binimei toru bar marati. ⁷ Naruei monoka rovitilubar ka toro napano mebija kurukuti a naio napano se toti nene, naljuo maka leleio ala titai na toru, mia naio napano mila burupati binimei toru bar marati, naio naruei mila titai na toru. ⁸ Mia kumemi juo, napano tai mebija kurukuti, a tai se toti nene, kumemi juo numimau be verare ga, a mia kumemi juo nuvijev kenememi jidomiano rimemedu ka kenememi imauano. ⁹ Maka tibe napano kumemi tai naio bo, tai naio bova, mia kumemi juo nube tomu na imauano vei na Atua kiano, a kamiu jibe borotano napano kumemi juo numitu numimau eaio.

Peli kijokijo dolu tai nene bereio, nemijikia never ka kamiu jibe yimo tai napano Atua naio jo mimaukanio.

¹⁰ Atua mije jikiaiano novo

ban kiniou, ana nomim̃au jibe toro tai napano bari nai ka im̃auano, nomim̃auka burupati yimo novo tai nene napano jikili bo ju. Mia iorou, maka kiniou napano nevitirilar yimo toa burupati neibano, mia bilbilu dolu nei binimej jo miija ka rim̃auka yimo. A kamiu tealo dolu bereio kumijikia kuvijia ka kuviñauka yimo toa burupati neibano, mia toro napano mila jibe na monoka vitikar vatitig kiano bajago na im̃auano. ¹¹ Naio monoka rila von re ka ridu burupati dolu tai bereio, bior napano kiniou nomidu burupati na memedu ruei ju, napano naio be Yesu Kristo. ¹² A bogo napano amim̃auka yimo mave ea burupati yimo nene, p̃eli tealo amim̃auka niogo p̃eli veriniogo p̃eli veru jikili, p̃eli tealo amim̃auka iesi p̃eli surukiaro p̃eli m̃aburi. ¹³ Mia iorou, sebi na legiano maaro rila von sisen veve kialo im̃auano nalo, rila im̃auano napano nalo amim̃aukaio, rimaluvo ea vio medave. ¹⁴ Ver sebi rivokar yimo napano toro tai bitirilar joa burupati neibano, ana ver maka rijikia sisen lele ga, yimo jikili ju bo ga ju, mia toro nene rijev jidomiano novo tai. ¹⁵ A ver toro dolu tai, sebi sisen nonovio kiano im̃auano, mia toro nene milaluvu nono vite. Vaataro mia sebi mijikia sisen bin naio toro na im̃auano nene bunu, ana p̃eli milarur naio

buro den sebi nei, milarur kiano meuliano.

¹⁶ A kamiu monoka kuvitilubar ka yimo neibano napano abitirilar joa burupati nene, naio be kamiu namoneano nalo, a jibe yimo na volkouano lu tai na Atua kanano, napano kiano Niununo jo joa joomo eaio. ¹⁷ Atua kunuano na volkouano nene, naio be kamiu ga, a ver toro tai jidom rila bulag yimo nene, mia Atua rivelar naio garuei, bior napano kiano yimo na volkouano nene be lu laka.

¹⁸ Monoka kuvidu venia napano nojo neberenio nei, maka rivu ka kuvisidomii kuver be titai iakurano ga. Ver kamiu tai ber naio be masou bo ea jikiaiano nalo na yetemeriba nei, bo lie ka naio tuvan jidomiano sibisibiano nalo na atu. Ea tivelinio na jikiaiano nalo na yetemeriba nei, naio monoka rila naio tibe toro vovu tai ga, ana ver rila tibe na, mia naio mijikia ve masou vatitig ea Atua kiano jikiaiano. ¹⁹ Ea Iliano Lu, kito romial iliano tai napano jiloglog ber masouano na yetemeriba nei jibe vite vovu tai ea mirano Atua, napano berinavo jibe nei, ber

*Nalo napano ajidomii aber
abe masou bo ea yete-
meriba nei, ajidomii
aber amijikia vite, mia
ea Atua mirano, nalo
abe vovu ga, naio
bitilubar vatitiglo ruei.
Jop 5:13*

²⁰ A iliano dolu tai bereio jibe nei, napano berenio

Tube bitilubar vatitig kulo masouano na yetemeriba nei kialo jidomiano, ber nalo abe kurano ga. Iouano 94:11

²¹ Tibe na, monoka rove m̃arou re ka jidomiano nalo na yetemeriba. Nalo maka ajikia ala vite tai rivu ka kamiu leleio, bior napano Atua jian nonovio kiano ilivuiano novo ban kamiu ruei.

²² Kiniou Pol bija Apolos a Kevas, kumemi numila iṃauano novo ban kamiu ruei, a vonganei yetemeriba nei joa jumemiu. Peli kumeul p̃eli kuṃarm̃aro, p̃eli kumitu vonganei p̃eli kuvitu ea bogoti napano ju ka rimei, mia vite nonovio be kenemiu ruei, ²³ a kamiu kube Kristo kiano, a Kristo naio be Atua kiano.

4

Pol bija Apolos kialo iṃauano, jibe Yesu kiano atevi nalo

¹ Tibe na, kamiu kuvidu re kumemi nuvitu mave, mia bo ka kuvitii kumemi tibe tomu nalo na Kristo kiano iṃauano ga, napano naio bar Atua kiano ililukuano nalo ban kumemi, ka nuverialio ka nalo napano maka ajikiaio.

² A vite tortoru napano jua kene-memi jidomiano, kumemi numijikia ka monoka nuviekar vatitig ea iṃauano nei napano

kenememi toro na toru midu jua jumememi.

³ Maka nosidomii m̃lelea ka p̃eli kamiu kumisidomii jum̃abe ea kiniou, p̃eli tomu nalo atibure kiniou tum̃abe, a kiniou bunu maka noto nevitvitii kiniou bereio ka kiniou jibe na p̃eli jibe nei.

⁴ Ee, p̃eli nebitii ka nomiṃau bo ga, mia nina kiaku jidomiano na ga na. Kiaku jidomiano na maka rijikia rila kiniou ka nomemedu, mia Tube ga naio be toro memedu ka tibile kiniou.

⁵ Tibe na, kito rala soṃeli re ka rotibure toro dolu, mia monoka rotu rorea Tube ka rimei bereio ea kiano legiano nene na tibureiano. Ea bogo na, mia naio rivar vite nalo napano ajuluku ea melijokouo, rila amal-maluvo ea mermerano, a mia naio rivar jidomiano nalo napano ajuluku ea toro kiano iviso, rila amal-maluvo ea mirano vio. Mia Atua rivitivitii vite nalo na, ana mia sian iliano van tomu nalo rimemedu ka venia napano naio mialio ea kialo meuliano.

⁶ Bilbilu nalo, iliano nalo napano nojo neber ruei na, nojo neberii laka kumemi juo Apolos ga, ana nemila jibe na bior napano nojidom neverloglog vatitig kamiu, ka kuvitii re ve dolu ea kenemiu naverloglogiano nalo. Kamiu tealo abe m̃arou bior naverloglogiano ea kialo bu-rukuti, a naloaju abitii bova ea naverloglogiano na nalo dolu kialo, mia maka rimemedu tibe na.

⁷ Kamiu kubiniu kube verare ga, maka kuvu lie tovulu nalo dolu, a ver vite tai na bo joa kamiu, maka kamiu napano kumiñaukanio. Atua ga mijevio ban kamiu jibe jidomiano tai, ana tibe na bo ka kuvil re mñarou riviorio bereio.

⁸ Ee, nemijikia ka kumitu kuber p̃eli kube sani-baiano ka vite novo nalo na Atua kiano ruei, a kumijog bo, kuber p̃eli kamiu kube kiano tomu na tortoru ea yetemeriba nei ruei, napano kubuku kumemi numitu iorou laka. Ver be riano ka kubinimei jibe ka Atua kiano parinio tubo nalo ea yetemeriba nei, bo lie vo, mia neber p̃eli maka tibe na.

Ana ver bogo tai tibe na, p̃eli maka kamiu ga na, mia Atua rial ka kumemi juo bunu nubare ka nuvitutano mave vija kamiu ka rotılan vuu ka kiano tomu nalo.

⁹ Ana vonganei, kumemi atevi nalo maka nuvitua vio novo na jibe na. Jibe napano Atua midu kumemi numitutano maariano laka, napano tomu nalo na yetemeriba bija agelo nalo bunu abiti niege kumemi, jibe napano kumemi nube verare ga ka tomu na bova nalo napano amijev vironiano na m̃ariano banlo.

¹⁰ Numitu nubamenea Kristo, numila kiano iñauano, ana kulo dolu nalo amial kumemi jibe vovu kija ga, ana aju aberii kamiu aber kube masou vatitig ea Kristo kiano meuliano. Nalo

abitii ka kumemi niabememi mave, ana aberenio kamiu be p̃irimiu. Nalo amilkuei ka kumemi, ana amidu kamiu kumitu mave.

¹¹ Kumemi maka tibe kamiu leleio, bior napano jikar nua binimei bokar vonganei jijer kumemi, midoujer kumemi, maka kene-memi kulum̃arauo novo tai, numitu nubiniua bogokouo nalo, maka kunuememi novo nalo ka nuvituaio, ¹² a numitu numeul ea iñauano na jumememi ga. Tomu nalo amiolua kumemi, ana numilivu kalo ga. Nalo amila bulag kumemi, mia numituvan ga. ¹³ Nalo amil bova ea siememi, ana numila von ka nuvila bilbilu rivu vijalo ga. Numila bo jibe na, mia nalo amila kumemi jibe niamiamo tai ga na yetemeriba nei. Be riano, binimei bokar vonganei nalo amial kumemi jibe kurano ga.

Pol bika ka nalo aue jaano

¹⁴ Bo ga, maka never iliano nalo na ka rila kamiu kuvimou, bior kumitibe ka keneriku nalo, napano tinieku jii kamiu laka, ana nojidom neverloglog vatitig kamiu.

¹⁵ Nemijikia ka tomu na tortoru nalo miroano napano abitikar kamiu a amijai kenemiu moneano ea Kristo, ana bo tiniemiu maio ka kiniou takurano ga jibe karamemiu. Kiniou nebe moti na nomidu Kristo kiano Ioluanu Vou binimei

ea kamiu, ana kiniou nojibe karamemiu ea kenemiu meuliano bija naio.

¹⁶ Jibe na, nemialio memedu ka noil van kamiu, nejikili ka kamiu ka kuvila von kuvue jaaku kija beamu.

¹⁷ Jidomiano na naruei mila nojidom noiila Timoti riviedu ea kamiu. Nemial jibe Tubo juvan naio ban kiniou jibe keneriku tai ga, bior napano naio biekouo julaka ea iñauano nalo a tinieku jii naio laka. Naruei bogo napano mia naio rimaluvo kean kamiu, nojidom ka naio rila kamiu kuvisidomii vatitig bereio kiku aku bajago nalo na nemiel najakisor Kristo, jibe napano nojo neberloglog ka tomu nalo ea taara na nalotuano nalo napano nojo nejeliviv ealo.

¹⁸ Kiniou nemijikia ka bogo napano kumial ka maka bunu namaluvo kean kamiu, kamiu tealó amila von ka adulo atu mave ruei.

¹⁹ Mia bo ga, bior napano ver Tubo rijamo ka van kiniou, mia namaluvo kean kamiu vesiou re. Ea bogo na naruei, mia maka nosidom nojog nalo na kialo iliano, ana mia nojidom neial ka kialo moroano ka ala iñauano jikili jumabe.

²⁰ Nina bior napano toro kiano iliano maka ve titai ea Atua kiano navenatuboiano, mia Niununo kiano moroano naruei naio be vite na toru.

²¹ Bo ga, nojidom ka kamiu kuvisi-domii vatitig

beamu, ver bogo napano namaluvo kean kamiu, mia tumabe? Ver kuvisidom, nemijikia neviedu vija iliano kouo nalo na baravoiano van kamiu, mia bo ka kuvidu kenemiu jidomiano totano beamu vo, naruei mia nemijikia neviedu vija iliano na melokloko nalo ga, ea bajago na tinietiano.

5

Bajago va ea taara na nalotuano

¹ Iliano binimei bokar tilinieku ber vite tai jo iviso ka kamiu napano kiriniagiago laka. Nalo aber kamiu tai, karamano ba joro ka tira dolu tai, ana iorou, toro na bina ka karamano koano tira neibano binimei jo bijaio. Be riano na, tomu na melijokouo maka ajikia ala bajago na, mia jumabe kamiu namoneano nalo tai joma milaio?

² Kamiu namoneano nalo kumitu kumidular kamiu, kuber kumitu kumiñau bo, mia jumabe kumitu kumituvan bajago na jibe na jo ba iviso kean kamiu? Bo ka kuvijog rivova ka vite nei, a bo ka kuvukular toro na den kenemiu taara na nalotuano.

³ Ee, be riano napano vonganai kiniou nojo ea vio nei koalabo den kamiu, ana ea niunuku nomijog jibe nojo bija kamiu ga. Jibe na, ea Tubo Yesu siano, noberial toro na kiano tibureiano tai jibe napano nojo nejikili nojo ea miremiu.

⁴ Jibe na, bogo napano kamiu kubinimei vio takurano bereio, monoka kuvitii ka jibe niunuku jo bija kamiu, a monoka kuvijikia ka Tubo Yesu bunu jo bikiano moroano, ⁵ naruei monoka kuvukular toro na den taara na nalotuano. Naio monoka taluvo bereio, rivan bereio ea yetemeriba ea Sim̃aro jum̃ano, ana bo ka bajago na kariano nalo na yetemeriba ala naio rijog rivova rivano-o, p̃eli iorou mia naio rimei bereio, ka Tubo saaro ka rilarur niununo ea bogoti na maaro.

⁶ Bilbilu nalo, maka rivu napano kumitu kube m̃arou laka ka kamiu, kuber kumeravo, bior napano niamiamo nei jo keano vo ea kamiu. Kamiu kumijikia ruei ka isi telisu ga, mia mijikia rila joko nonovio nalo riyuku.

⁷ Tibe na, bo ka kuvar bulag isi na bova nei napano jua kamiu, ka kamiu nonovio kumijikia kumei kumeravo vatitig bereio. Kito monoka rosidomii jibe ka ga napano kulo moruo nalo aju amila sida ka nunu kenerinio ka avar bulag kialo kariano, vonganei Kristo binimei m̃aro ea m̃akolkolo ka kiado kariano, ana maka rivu ka niamiamo toa kito kia ga vo.

⁸ Ana bogo napano kulo moruo nalo amila sida kario, be jokoluolu nene, ana kito bunu namoneano nalo be kiado jokoluolu. Mia maka rivu rotua jokoluolu na,

resen joko tai napano isi moruo tai joaio. Iliano nei berii bova ka kariano bija bajago va na meuliano moruo aju kea ea kito, bior joomo ea meuliano na taara na nalotuano, vite nonovio monoka rimeravo rivu, rive riano rivu, a ve lu rivu.

⁹ Kiaku iliano tai ban kamiu jibe nei ruei. Ea m̃esi dolu na napano nebivitauia biedu ban kamiu nua, neberial ban kamiu monoka kuvitu re vio takurano vija tomu nalo napano aju amila bajago va, p̃eli aju aburovuro janea vio ka tire nalo.

¹⁰ Ana p̃eli kamiu tealó kumijog belea kiaku iliano nei, bior maka never tivelinio na tomu nalo napano maka amonea. Ea nalo, miroano aju amila siakaiano, miroano abe buruviti, miroano abe navinauano, a miroano aju amilotu ka kialo tavoru nalo, mia ver rosidom ka rotu laka kalo, p̃eli monoka rotuvan yetemeriba nei ga, bior napano kito nonovio roju yetemeriba, a roju robiviuo tomu p̃ili p̃ili nalo na jibe nei bogo nonovio.

¹¹ Maka notuko vio ka nina, napano roju robiviuo tomu p̃ili p̃ili nalo jibe nei ea kiado ieliano nalo, mia venia napano nojidom neveriio, nojidom never ka ver toro tai to napano river ka naio be namoneano riano tai, mia kuvialio napano ea kiano meuliano naio jo mila siakaiano, p̃eli jo be buruviti

julaka, ðeli jo milotu ka tavoru nalo, ðeli jo mioluolu, ðeli jo munu uei, ðeli jo bina. Toro na jibe na naruei mia kuvila vite tai re leleio vija naio, kuvan re vaataro kanio, kuvisinan re vijaiio.

¹² Tibe na, ea tivelinio na nalo napano aju tavio ea taara na nalotuano, maka ve kiado ka rotibure kialo meuliano nalo, mia ea tivelinio na nalo napano aju joomo ea taara na nalotuano, monoka rovitii vatitiglo. Ver tealo aju amila kariano na kirivova jibe napano neberiio, monoka rotiburelo, a monoka rala vite tai kalo.

¹³ Atua ga mia tibure nalo napano maka atu joomo ea taara na nalotuano lu,
mia ea tivelinio na toro na napano jo mila bajago va iviso kean kamiu, kamiu ga naruei monoka kuvukular naio rivano. Tiut 17:7

6

Bajago novo ka ala vatitig baravoiano

¹ Kiniou nomijog bunu aber bogo tai, kuruado tai ea taara na nalotuano naio mila baravo bija dolu tai, naruei naio jumolu buru dolu napano na ban ea komeli na toru ka ail vanio. Kiniou nemial ka vite na maka rimemedu leleio, bior napano maka rivu ka tomu nalo napano amonea Atua ava asikil atua mirano tomu na tortoru nalo napano

maka amonea Atua, ka tomu na tortoru nene atiburelo.

² Bogo napano namoneano nalo be kialo baravo, bo ka namoneano dolu nalo ga ala vatitigio, bior napano monoka rosidomii ka kito namoneano nalo naruei napano mia rotibure tomu nalo na yetemeriba ea legiano na maaro. Ana ver kito na naruei napano mia rala iñauano ve toru tibe nei, ðeli mia kamiu kubare ka kuvila vatitig kenemiu baravoiano na tertelisu nalo ea kamiu bereio.

³ Mia Atua jii kito roju ka rotibure agelo nalo na tiniabene, ana bogo napano namoneano nalo dolu amil bior vite nalo na yetemeriba nei, jumabe? Kamiu kumial ka jikili laka, maka kuvijikia kuvila vatitigio?

⁴ Makanio, monoka kuvi-laio na. Ver makanio, ðeli kamiu kuber ðeli bo kamiu namoneano nalo kubar kenemiu iliano nalo jua tomu dolu jumalo napano maka atu amei ea taara na nalotuano?

⁵ Kiniou nemil jikili kija jibe na bior napano nojidom nala kamiu kuvimou kija! Ee, nomiilo laka ka nemi-alio ka jibe napano maka lele kamiu tai napano be masou, napano mijikia rila vatitig kenemiu baravoiano nalo na.

⁶ Peli nina naruei mila kuruado tai ea taara na nalotuano jumolu buru dolu nene ban ea komeli, naruei jo be-rial kiano vovaiano nalo ea mirano tomu na tortoru nalo

na komeli na, napano maka amonea Atua?

⁷ Kiniou nojo nemil ban kamiu jibe nei ea tivelinio na m̃arabo napano monoka kuvitakiio ka kuvila vatitig baravoiano nalo napano aju iviso kean kamiu, mia bo lie bunu ver maka bunu baravoiano nalo na tu. Baravoiano nalo na ju jibe na, berenio ka Siñaro jo jovulu kamiu ruei. Peli maka kuvi-jikia vo, ka ver kuruado tai mila bova banso, p̃eli bina ka kiamo titai, kotovonio re, kotuvan ga, bior kiano kari-ano na g̃a.

⁸ Ana ver kotumolu kojidom kovuru toro na ea komeli labo ka adu vironiano vanio, jau naruei jau bunu kojo komila bova bereio ban kuruamo.

⁹ Monoka kuvisidomii ka nalo napano kialo meuliano maka rimemedu, mia maka ajikia aial Atua kiano nave-natuboiano riyotuba keanlo. Maka rivu ka kuvila von tibe na napano maka kuvijikia vite na kiana vo, bior ku-mijikia ruei ka Atua maka saaro leleio ka nalo napano aju amiel vuru ninio vio, p̃eli nalo napano amilotu ka atua sibisibi nalo, p̃eli nalo napano amila siakaiano, p̃eli nalo napano aju aṗilṗili ka mokotenalo, p̃eli suṃano napano ju bano bija suṃano bereio, p̃eli tira napano ju bano bija tira bereio ¹⁰ p̃eli nalo napano abina ga, p̃eli nalo napano maka atu atan ka vite rivan toro dolu, p̃eli

nalo napano aju amunu uei, p̃eli nalo napano aju ami-oluolu, p̃eli nalo napano aju amim̃au kotkoti.

¹¹ Riano ga, beamu na kamiu tealo ajibe na ruei, mia siva toru napano Niununo Lu jekon kamiu kumeravo, mila kube lu, a kiado Tubo Yesu Kristo mila kito romemedu vatitig bereio ea Atua mirano.

Mokotenado monoka rimeravo vatitig

¹² Kiniou neberial bajago va nalo na, napano maka rivu ka ralaio, mia tomu tealo maka asidom ajikiaio. Nalo aber jibe nei, aberinavo “Ee, kiaku meuliano nei, kiniou nemijikia nala venia napano kiniou nojidom nalaio.”

Mia neverdoṗelo, never “Ee, p̃eli kiamo meuliano, mia kovitikario, bior vite telabo napano kojidom kalaio, nalo amijikia ala kiamo meuliano rivova laka. Mia vite telabo napano kojidom ka atua kiamo meuliano, kober mia komijikia kotelan vuu liliglo, mia maka leleio, mia koial napano vite nalo na naruei mia atelan vuu lilig kiamo meuliano bereio.”

¹³ Tealo bereio napano ajidom ka ala venia napano ajidom ea mokotenalo, aju aber iliano dolu tai, aber “Sinaniano, naio be tena maboku, a maboku, naio be tena sinaniano.”

Ee, be riano, mia kuvitkar vatitig bereio, bior napano

mia Atua rila tenalo juo nei riva rivakovio navo. Jibe na, Tubo jian mokotenado ban kito, ana kito monoka resian mokotenado rivan bereio van naio. Mokotenado tena rimauka kiano imauano, mia maka ve tena rivan tanea ninio vio.

¹⁴ Ver kito rojamo ka mokotenado rila imauano novo nalo ga, mia ea bogoti na maaro Atua mijikia vitirilar mokotenado bereio, jibe napano naio bitirilar Tubo Yesu mokotenano garuei, ea kiano burunara moroano.

¹⁵ Kito monoka tiniedo maio kanio ka mokotenado nalo ajibe niati nalo na Kristo mokotenano. Ana jumabe, bo ka niati na Kristo mokotenano tai riva riasol vija tira tai na marabo bereio? Maka rijikia tibe na leleio!

¹⁶ Iliano Lu berenio jibe nei, ber "Mia sumano a tira, abe juo abinimei takurano," ana sumano napano ban bija tira na marabo, mila napano mokotenano binimei takurano bija tira nei mokotenano.

¹⁷ Maka rivu ka toro tai rila tibe na, mia monoka roiasol kito vija Tubo, napano niunudo binimei takurano bija niununo.

¹⁸ Monoka rovitikar vatitig ka kariano va nalo napano tomu nalo amijikia ala vija mokotenalo, ea tivelinio na sumano bija tira. Kariano dolu nalo napano ajuma amilaio,aju amila bova ban toro dolu mokotenano, ana

toro napano mila kariano bija tira, jo mila bova ban mokotenano naio takurano bereio.

¹⁹ Kito tiniedo bobogia re, moko-tenado jibe yimo lu tai na volkouano napano bujolou ka Niununo Lu napano Atua midu ju joomo ea kito. Mia mokotenado na, maka ve kiado, ²⁰ mia be Atua kiano, bior napano naio bulular kiado meuliano ruei ea Yesu kiano mariano. Jibe na, monoka roimau vija mokotenado ka rala ga vite nalo napano atuma adular siano.

7

Soriano

¹ Bo ga, vonganei mia neverial jidomiano tealo ea nina napano kamiu kubika den kiniou ea tivelinio na soriano, ber bo ka rosoro, pli bo ka rotu ga tibe na? Bo ga, mia never tibe nei. Verver toro tai jo jidom ka soro re, nina bo ga na, maka ve titai.

² Mia bior napano romial ka juku-jukuano jikili, a siakiano telabo, pli bo lie ver tomu nonovio nalo ave koalo nalo.

³ Jibe na, bogo napano sumano jidom riva vaataro ka koano tira, koano tira monoka saaro kanio, a bogo napano tira jidom riva vaataro ka koano sumano, koano sumano monoka saaro kanio.

⁴ Tira napano joro maka jikia river mokotenano be kanano naio takurano, mia koano sumano mijikia river

be kiano bunu. Mia suṁano napano joro maka rijikia rive mokotenano be kanano naio takurano, mia koano tira mijikia river be kiano bunu.

⁵ Jibe na, tai monoka tukovio re ka dolu rimei re vaataro kanio.

Ee, ṽeli bogo tai ave juo averiio, ajamo ka mia atuvanlo, abe juo maka amonvio takurano ea bogo ve telisu, ka rila amijikia abolkoou sikili rivior vite tai beamu, a nina naio bo ga. Mia iorou, ave juo monoka asaaro ka amei vio takurano bereio, bior napano ver makanio, ṽeli Siṁaro bitilubar napano tai melukuku, maka bunu rijikia rivokar naio, ana mila mijoru ea jukujukuano ea vio tai.

⁶ Vite nalo na napano nojo neberenio, maka never tibe tuboiano tai na jikili, ka tomu nalo monoka asoro, ṽeli monoka asoro re, mia nejian von jidomiano tealo ka ijaiano ga.

⁷ Ver tomu nonovio amijikia atu tibe kiniou, napano maka nosoro, nojo jibe na ga, ṽeli mia bo mia bo, mia nemijikia ka tena joa ga jidomiano napano Atua jian ban kito terakurano.

⁸ Nojidom never iliano tai van nalo napano aju ga jibe na, jibe nalo napano maka asoro vo, bija taanou nalo. Kiniou nemial jibe ver kamiu kumijikia kuvitu tibe na ga, jibe napano kiniou bunu nojo nomilaio, mia

rivu mia rivu. ⁹ Ana ver tealo aialio aver makanio, mia sikili laka ka nalo ka avokarlo tulaka tibe na bogo nonovio, mia bo ga na, bo lie ka aleal tai napano amijikia asoro kanio. Maka rivu ka jukujukuano to serlo rivano-o atu ajog rivova tulaka.

¹⁰ Iliano dolu tai napano nojidom neverenio, naio rivan ea nalo napano ajoro ruei, napano maka kiaku jidomiano tai ga, mia iliano tai napano Tubo jian jibe iliano tai na jikili ban kito. Naio ber jibe nei, ber tira monoka rivuro den re koano suṁano. ¹¹ A ver bogo tai tira tai juvan koano suṁano, jaluvo denio bereio, naio monoka rivan re soro bereio, mia monoka to ga tibe na. A ver ṽeli, bo ka naio vija koano suṁano ave juo ala merevuiano vanlo, atu vio takurano bereio. Mia suṁano nalo bunu, monoka ajil bulag re koalo tira nalo.

¹² Bo ga, mia neverial vite dolu nalo tai. Nalo maka atibe ka Tubo kiano tuboiano tai, mia nalo ajibe kiaku jidomiano tealo ka rijai kamiu.

Vite na beamu, nina ea tivelinio na napano toro tai bija tira tai, naljuo ajoro, ana toro neibano naio monea Yesu mia koano tira naio maka rimoneaio. Mia ver tira nei jaaro ga ka nalo ve juo atu vio takurano, maka rivu ka toro neibano sidomii ka rivukular koano tira nei. ¹³ Mia bare ka bunu ver toro tai bija tira tai, naljuo ajoro,

ana tira neibano monea Yesu mia koano suñano maka rimoneaio. Verver suñano neibano jaaro ga ka nalo ve juo atu vio takurano, maka rivu ka tira neibano sidonii ka rivukular koano suñano neibano.

¹⁴ Nina bior napano naljuo tai napano monea naio mijikia rila vite novo tai ea napano maka rimoneaio, a bajago novo nei mijikia rila kialo soriano ave juo rimei rivu laka tibe tomu juo kialo soriano napano nalo abe juo amoneaio. A bunu, naljuo tai kialo napano monea naio mijikia rila vite novo tai ea kenerilo abe juo, bior napano naio mijikia ridu vatitig kenerilo ave juo atu ea m̃arabo na meuliano lu, nalo ailuo joomo ea taara novo tai tibe kiritete dolu nalo napano karam̃alo bija kenielo nalo abe juo amonea. ¹⁵ Mia ea tivelinio na naljuo nei napano tai monmonea mia tinene maka monmonea, ver naio napano maka monmonea jidom tuvan koano napano monmonea, kito namoneano dolu nalo monoka rojamo ka tibe na ga. Ver napano maka monmonea maka bunu sidom napano monmonea, maka rojikia rola von ka royuku napano monmonea ka to vija koano neibano napano juvan naio, bior napano Atua jidom ka rotua meuliano tai napano bujo bija bajago na tum̃aro.

¹⁶ Jau tira napano komonmonea, p̃eli jau suñano

napano komonmonea, p̃eli kojidomii kober jau komijikia kotuvulu koamo napano maka monmonea, mia makanio, jau maka kojikia vatitig ka mia tum̃abe, bior p̃eli jau maka kojikia kotuvulu naio leleio.

Kito monoka rotu riñaro vatitig ea meuliano napano Atua midu rojuaio

¹⁷ Mia venia ga napano monoka rolaio, kito nonovio monoka rotii vatitig kiado meuliano veve terakurano to rivu ea vio na napano Tubo jii kito rojua eaio ruei, p̃eli monoka rotu roieliel ga ea m̃arabo napano Atua bio kito ka roieli eaio. Nina naruei be iliano tai napano nojo nojii ea kiado yimo lu nalo. ¹⁸ Iliano nei nioti nene ber vio vabe kojua beamu komonea, monoka kosaaro ka kotoa kea ga bogo napano komonmonea. Tibe na, verver tealó abe Ju, a aju ajakii kialo bajago moruo nalo, jibe pakuveu p̃eli venia bereio, naio bo ga, kiniou maka never ka bogo napano amonmonea nalo monoka ajulu bajago moruo nalo napano aju ajakiio. Mia be verare bunu ka nalo napano maka ave Ju, napano maka ala pakuveu a nalo aju ajakii kialo bajago moruo dolu nalo. Ea tivelinio na nalo bunu maka never ka bogo napano nalo amonmonea nalo monoka ajulu kialo bajago moruo nalo nei. ¹⁹ Toro jakii bajago moruo venia, jibe abe pakuveu

þeli maka ave pakuveu, naio maka ve tena toru tai ea Atua kiano vitiiiano, mia Atua jidom ga ka rotakii kiano tuboiano nalo.

²⁰ Nina naruei neber ka bogo na jau komonmonea, jau kotormãaro ga ea vio nei napano kojoaio bogo na maka komonmonea vo.

²¹ Jibe, ver beamu jau koje komimãau kurano toro tai kiano, karina komonmonea, nina bogo na, monoka kosaaro ka koto koiãau kurano tibe na ga. Mia be riano, ver bogo tai koleal ka be kiamo bogo ka kotaluvo den imãauano kurano nei, nina bunu bo ka kobisi kanio. ²² Verver jau komimãau kurano ea toro tai, monoka kosidomkar ka bogo napano Tubo bioso, naio miiãa larso jiiso vatitig joomo ea kiano m̃aratavo memedu. Mia ea tivelinio dolu nene, ver maka koiãau kurano toro tai kiano, jau koje vatitig jibe na ga, jau bunu monoka tiniemo maio ka bogo napano Kristo bioso, monoka komei tibe kiano toro tai na miãau kurano, kala nonovio kiano imãauano.

²³ Nina bior napano Kristo bulu bulag kito ka vite toru tai, jibe kiano burukija, ka kito rove kiano, ana monoka rovitilubarío ka memedu ka roimãau kiano kurano ga, maka rivu ka roimãau kurano toro dolu kiano þeli roju yetano ka toro dolu kiano jidomiano napano romimãau kiano.

²⁴ Naina naruei bilbilu nalo, vio napano jau ko-

joa bogo napano maka kojikia Atua vo, vio na naruei mia monoka kotoaio kia ga, mia vonganei napano jau komonmonea naruei, mia Atua jo bogo nonovio bijaso bunu ea vio na.

Vikadeniano ea tivelinio na nalo napano maka asoro vo, vija taanou nalo

²⁵ Bo ga, kiniou nojidom nesian iliano ve telisu van kamiu ea tivelinio na nalo napano maka asoro vo. Iliano nene, maka nejikia never ka naio be Tubo kiano tuboiano tai napano naio ber ka kiniou, mia iliano nene jibe kiaku jidomiano tai ga. Mia kamiu kumijikia ruei ka Tubo mijukubo ban kiniou, jian masouano nalo ban kiniou napano kumijikia kubalea vatitigio eaio, mia bo ka kuvisidomii ve temi ea kiaku iliano nalo nei.

²⁶ Vonganei, kito rojua bogo va tai napano roju robiniua laka vite kouo eaio, mia bo ka never bereio iliano nei napano kiniou nober beamu mave, nober bo ka kito rotu rimãaro ga ea meuliano vaio napano rojuaio ruei. ²⁷ Tibe na, ver jau toro tai napano kojoro ruei bija tira tai, jau koto rimãaro tibe na, kosidomii re ka kotuvanio. Verver jau toro tai napano maka ve koamo vo, jau bunu koto rimãaro tibe na ga, kosidomii re ka kosoro ka tai.

²⁸ Mia verver kosidomiio kober makanio, kojidom m̃lelea ka kosoro vija tira tai, maka nover bova, a verver

tira m̃eaku tai soro vija toro tai, nina bunu maka tibe kiano kariano tai, nina bo ga na. Mia nalo napano ajidom ka asoro, nalo monoka avitilubar ka mia kialo meuliano maka melumu, mia nalo aviniua bogokouo ve telabo ea yetemeriba nei, a verver kotakii kiaku iliano, ka kosoro re, mia nasaaro laka.

²⁹ Bilbilu nalo, kiniou neber jibe nei bior napano bogo bulati ga ju ka Tubo rimei bereio, mia maka tomu ve telabo ka ala kiano im̃auano. Tibe na, bo lie verver tomu nalo napano abe koalo nalo ala tibe maka asoro, mia nalo amijikia ala Tubo kiano im̃auano ve telabo. ³⁰ A bunu, nalo napano aju ajegi bior vite tai, bo ka nalo tinielo bobogia vite nene napano nalo aju ajegio, a nalo napano aju amijog bo ea jogvuiano na yetemeriba, bo ka asidomiio re bunu. Nalo bunu napano aju amim̃au bior veru, bo ka nalo ala napano jum̃alo beteauo ga. ³¹ Nalo napano amila im̃auano dolu na yetemeriba nei, bo ka nalo ala tibe napano maka ve kialo vite nalo toaio, bior napano yetemeriba nei bija kiano vite nonovio nalo jo ban ka rivakovio garuei.

³² Kiniou neber iliano nalo nei ka kamiu bior napano nojo nojidomii laka ka kamiu, maka nosidom ka vite ve telabo napano kenemiu jidomiano jo jidom laka kanio bogo nonovio. Toro napano maka ve koano,

naio mijikia sidomii ve temi ea Tubo kiano im̃auano bogo nonovio ga, ber mia naio rim̃auka tum̃abe napano mia Tubo risaaro kanio. ³³ Mia toro napano be koano, naio jo jidomii ka vite nalo na yetemeriba, ka monoka rila tibe venia napano mia koano saaro kanio, ³⁴ a mijikia rila ka kiano jidomiano beveve juo. Mia tira m̃eaku p̃eli tira kulovu napano maka ve koano, naio bunu kiano jidomiano mijikia sikili vatitig ka rila Tubo kiano im̃auano nalo, a kiano ieliano bija kiano meuliano mijikia ve lu vatitigio laka. Mia tira napano be koano, kiano jidomiano monoka toa im̃auano nalo na yetemeriba nei, tibe napano monoka rim̃auka vite nalo na rila koano rijogio rivu.

³⁵ Kiaku iliano nalo nei, maka nosidom notuko vio ka kamiu ka vite ninio napano kamiu kumisidom kuvilaio, mia neber ka rila von ka rijai kenemiu meuliano. Nojidom ga ka vite nonovio na lotuano riva rivu, a nojidom ka kito namoneano nalo ravan re tanea vio, mia rovitii ga Tubo naio ve takurano.

³⁶ Kito tealó amila napano amila ko koalo tai, mia nalo aber p̃eli bo ka nalo atu vesiou tibe na ga beamu, nalo maka asidomii ka asoro bior napano ajidom ala Tubo kiano im̃auano. Mia ver tai rial ka jo jidomii laka ka tira nei napano aberkoio be kiano, a jidom laka kanio

banbano-o maka rijikia rivakar naio, nina bo kanio ga ka ala naljuo asoro. Nina bo ga na, naio maka ve kariano tai leleio. ³⁷ Mia ver tai rila kiano jidomiano rivu napano jikili ka naio jidom ka naio vija tira neibano aberkoio ka naio, ka nalo ve juo atu tibe na ga beamu, a ver naio bitilubar ka naio mijikia vokar vatitig naio, nina naio mila bo laka ver naio maka soro vija koano nei. ³⁸ Jibe na, naio napano joro von ka koano nei napano aberkoio ka naio, naio mila vite novo tai, mia nina napano jo jibe na, maka rila soriano vija tira nei napano aberkoio ka naio, naio mila bo lie mia bo laka. ³⁹ Ea tivelinio na nalo napano ajoro ruei, nalo monoka atuvanlo re. Tira napano joro ruei monoka to rivu vija koano suñano napano koano nene meul jo kia ga. Mia verver toro neibano riñaro, tira neibano mijikia soro bereio, a naio mijikia soro ka toro kei napano jidomio, mia monoka tai napano monmonea bunu Tubo. ⁴⁰ Jibe napano neber, naio mijikia soro, mia nemial jibe mia bo lie ka naio ðeli mia kiano saariano ve toru lie ver naio soro re bereio ga. Nina be kiaku jidomiano ga, mia neber ðeli Atua kiano Niununo naruei jian jidomiano masosouano nalo nene ban kiniou, ana bo ka kami kuvisidomii vatitig kanio.

8

Juñabe ka sunbue nalo napano amue ka ala lotuano van tavoru nalo?

¹ Vonganei kiniou nojidom neverdoðe kenemiu vikadeniano ea tivelinio na sunbue nalo napano tomu nalo na maka amonmonea amila sida kanio ban kialo tavoru nalo. Kamiu kumitu kubika kuber bo ka kito namoneano nalo rosen sunbue nalo na, ðeli na makanio.

Bo ga, mia kiaku verdoðeiano beriio tenalo juo nei, bajago na jikiaiano, a bajago na tinietiano. Ea tivelinio na jikiaiano, tomu telabo napano aberenio aber amijikia vatitig verdoðeiano na kenemiu vikadeniano nei, a nalo amijikia avarvar kalo kija napano ajidomii aber nalo amijikia vite. Bajago na jikiaiano mijikia rila toro ridu kiano jidomiano to mave, mia bajago na tinietiano maka tibe na, naio jo miija vatitig toro kiano meuliano ga.

² Toro napano jidomii laka ber naio bokar bajago novo na jikiaiano, naio maka rijikia vatitig Atua vo jibe napano naio bo ka rijikiaio.

³ A toro napano bokar vatitig bajago na tinietiano, nina naruei napano Atua bitilubar vatitig naio.

⁴ Bo ga, nina naruei kiaku iliano juo bereio ea tivelinio na sunbue nalo napano amila sida kanio ban tavoru nalo. Nana be moti ber jibe nei, ber kito romijikia vatitig ka tavoru nalo

na abe toto ga, ana maka ave toto ka vite na be riano tai leleio. A juo nene jibe nei, ber kiado Atua naio takurano ga be riano ju. ⁵ Tomu naloaju aberii kialo atua dolu nalo peli kialo tubo dolu nalo, aberinavo ajua tiniabene peli ea yetemeriba nei, a naloaju aberiilo jibe nalo miroanoaju, ⁶ mia ea kito, romijikia vatitig ka Atua takurano ga jo. Nina naruei Atua karamado, napano naio be burupati ka vite nonovio, napano kito robe kiano. A Tubo takurano ga ju, nina naruei Yesu Kristo, napano naio jii vite nonovio, napano kito romeul eaio.

⁷ Nina naruei jikiaiano novo napano kito miroano namoneano nalo robokario ruei, mia titai bova, kito tealoka ajikia vatitig vite nalo nei vo. Nalo nene, beamu laka nalo bunuaju amilotu ka tavoru nalo, ana binimeibokar banei, jikili kanilo ka avitilubar ka nina be vite na sibiano ga. Jibe na, bogo napano tomu nalo aborosebi bija sunbue nalo napano amila ruei sida kanio ka tavoru nalo, kito romijikia rosenio tibe napano maka ve titai ga, mia kito dolu nalo neibano, bogo na asenio, ajenio bija jidomiano ka sunbue nei be tena tavoru nalo, ana kar niabelo pili kanio bereio, amijog jibe amila vite tai napano maka rimemedu ea Atua mirano.

⁸ Mia monoka rojikia ka sinaniano maka ve vite tai

napano mijikia rila Atua rialka robo peli robova. Ver rosen re sunbue na, maka river ka robo ea kiano vitariano, peli ver rosenio, maka river ka robova.

⁹ Joa ga kito ka rojidom rosenio pelina maka rosidom rosenio, mia makarivu rala vite tai napano namoneano dolu asidomii aver maka rimemedu ka alaio. Peli kito romijikia rala vite na rivu ga, mia makarivu ka naio rialio napano romilaio, ana rila bulag kiano jidomiano.

¹⁰ Jibe tivelinio na sunbue nalo neibano, peli ea kiamojidomiano, komialio ka bo ga ka asenio, ana jau komijikia kala tibe maka ve titai. Mia ver bogo tai koto vija tomu nalo napano abolkouoka tavoru nalo, a nalo asian sunbue vansom a jau kosenio vijalo, mia tumabe ver namoneano dolu tai rialso. Peli naio tai napano berkar ka naio bel ka sunbue nalo nene, mia bogo napano mialso ka kojo kejenio, mia naio riverenio "E, toro na be taara na nalotuano nalo tai napano mijikia vatitig vite, mia naio jo jen sunbue nalo na ga. Tibe na, bo ka kiniou bunu nosenio." Mia ber jibe na, mila naio bunu jenio mia iorou mia mijikia rijog rivova laka bior napano ber peli naio mila burumara kariano tai.

¹¹ Nina berenio ka jau kojo kojakii kiamojikiaiano novo, kobitilubarika komijikia kala vite na. Mia

monoka tiniemo maio ka toro dolu na, napano naio be kuruamo tai napano Kristo m̃aro ka rilarur kiano meuliano, bior naio merou laka ka rilao. Tibe na, ver naio rial napano bogo tai komilaio, mia mijikia rila ka napano komila bulag kiano viekouoiano novo.

¹² Ver tibe na, mia Atua rialso tibe jau naruei komila kariano ea kuruamo nene, bior napano komila naio mila vite tai napano ea kiano jidomiano kirivova ka rilao. Nina naio bova, jibe ka napano jau komila kariano ea ga Kristo.

¹³ Bior vite nei, nomila kiaku ji-domiano tai, ka ver kiaku bajago ka nosen sunbue nene naio be titai napano mila bulag kuruaku kiano viekouoiano, mia notuvanio ga. Mia notokolio re bunu, bior napano maka nosidom ka mia nola kuruaku rijoru.

9

Pol berii kiano bajago na im̃auano

¹ Bilbilu nalo, nojidom never ka kamiu ka kinioi maka noto yetano ka toro dolu kiano jidomiano, mia nojo nomiñau jakii venia napano nemijikia ka memedu ka nalaio. Kiniou atevi tai napano nomial Yesu Kristo kiado Tubo ka miraku, a kamiu naruei ajibe m̃arati na kiano im̃auano napano nomilaio.

² Nemijikia ka tomu tealoo maka asidom avitilubar kiniou ka nebe atevi tai,

mia kamiu maka kuvitibe na. Vonganei, kenemiu meuliano ju vatitig bija Tubo ruei, mia vite na mila kamiu kubitilubar ka nomiñau ea kamiu jibe kiano atevi riano tai.

³ Mia ea nalo napano ajidom atibure kiniou ka nemila bova jibe na jibe na, kiaku verdoŋeiano naloaju.

⁴ Nemijikia ka nalo aberenio kaaju abitikar kumemi bano-o tinielo m̃aro, mia jum̃abe? Nalo abitikar nalo dolu ruei nua na, ana maka ail tibe na, ana bogo na napano nebinimei, ajikar ka amildie. Peli aber mia ver kumemi nuvidu re sinani-ano p̃eli munuiano mia numijikia numeul tibe na ga ka nuvila im̃auano ea nalo?

⁵ Mia nalo amil ea kumemi tealoo napano ajoro ruei, nalo abika aber bior vaio koalo nalo bunu abinimeiaju ajakisor kumemi? Mia kei bere- nio ka nina naio kirivova? Atevi nalo dolu napano abinimei beamu, bija Tubo kuruano nalo, bija Kevas, bogo napano amieliel ka im̃auano jibe na, koalo tire naloaju ajakigsorlo, mia ea bogo na, tomu nalo nei maka aildielo.

⁶ Mia bereio, nalo ajidom atuko vio ka kumemi ka monoka nuviñau re rivior veru ka nuvulu kenememi vite nalo. Ver kumemi juo Barnabas nuviñau re mia bo ga, mia bior vaio naaju aber jibe nei ban kumemi juo ga, mia maka aver ka nalo dolu?

⁷ Kuvila von kuvisidomii tomu na mira nalo na venuo tai. Bogo na aba amila mira,

mia kei jo bulu kialo vite nalo? Nalo ga abuluio, þeli kialo parinio venuo naio bululo?

Mia kuvila von kuvisidomii nalo napano amebija sinaniano ea tiniavio. Verver nalo asinan ea tiniavio nene, maka toro tai napano mia ril vanlo riviorio.

A bunu, jumabe ka toro napano jo bagan temeul nalo? Peli naio maka leleio sen sunbue nene nalo?

⁸ Kiniou neber vite nalo na ka rila kamiu kuvitilubario ka toro tai rila imauano tai, bo kanio nalo napano mimau kialo nalo monoka avitkar vatitig naio. Mia kiniou neber jibe nei, maka riyotuba ea kiniou kulorinio kiaku jidomiano, mia kiado tuboiano lu naio jo berenio jibe na bunu.

⁹ Iliano tai ju joomo ea Mosis kiano tuboiano ruei, napano ber jibe nei, berinavo

Bogo napano kiamo bue m̃arauo jo miel jeli-viv mave ea kiamo boboseru nalo, ka vita bulag kurukuti nalo nene, jau monoka koiadikar re niono, mia monoka kotuvan naio sinano kija riel rivano. Tiut 25:4

Ana bogo napano Atua ber iliano nei, naio maka to tinien maio ka temeul nalo, ¹⁰ mia naio jidomii kito napano romimau, ka nalo napano romimau kialo, nalo monoka avitkar vatitig

kito. Toro napano mimau ea tano, memedu ka naio sidomii ka bogo tai mia naio sen venia napano jo mebi-jaio, a toro napano ban ea tiniavio ka rivar sinaniano rime, memedu ka naio bunu sidomii ka mia ajev ve telisu rivanio.

¹¹ Mia tivelinio na kene-memi imauano ea kamiu, kumemi numebija kurukuti novo ruei ea kenemiu meuliano, mia bo ka kamiu kuvisaaro ka kuvitkar kumemi a kuvitanka vija kumemi ilivuiano nalo tealo napano Atua bario jua jumemiu.

¹² Kamiu kumitu kumijja tomu dolu nalo ruei jibe na, mia bo ka kuvisaaro lie ka kuvila ea kumemi napano numila bo laka ka kamiu nua ruei.

Ee, bo ka kuvila tibe na ka kumemi, mia bokario vonganei maka nuvit nuver leleio van kamiu nuver monoka kuvilaio. Kumemi numerou ka ver nuverialio tibe na, mia kenemiu jidomiano rivova kean kumemi, mia ver þeli tukovio ka m̃arabo na Ioluanou Vou rime, ea kamiu. Tibe na, kumemi nuvil re bunu, a ver numijog bova ka kamiu maka kuvitkar kumemi, nina bo ga na.

¹³ Mia bo ka kamiu kuvisidomii bunu ka ea Atua Kunuanou Lu, nalo napano amimau joomo eaio, bija nasidaiano nalo, aju ajen tenalo nei, a aju ameul ea vite nalo napano tomu nalo

aju ajianio jibe jidomiano nalo ban Atua.

¹⁴ Mia Tubo berial jibe na ga bunu ea tivelinio na kiano tomu nalo napano aju amioliolu ka Ioluanu Vou. Nalo bunu, memedu ka amijikia ameul ea jidomiano nalo napano tomu nalo neibano amijog Ioluanu Vou nene aju ajianio.

¹⁵ Bo ga, kiniou naruei kiniou tai kalo na jibe na, mia jikar nua binimeia maka leleio never ka tomu nalo monoka asian venia rivan kiniou, p̃eli monoka ala tuñabe ka kiniou. Mia nojo neberii vite nalo nei ea m̃esi nei, maka rivior ka nojidom novika vite tealó den kamiú. Maka nosidom ka kuvitkar von ka kuvisian vite nalo van kiniou, mia kamiú kube m̃arou kuber kamiú naruei kubagan kiniou, mia nojidom ka nomijikia noto nove m̃arou ka Atua ga jo bitikar kiniou bogo nonovio. Bogo napano nemijikia ka kiaku meuliano joa jum̃ano ga, nojo nomijog bo laka, a verenio naio re napano jo bitikar kiniou, p̃eli mia nojog ka bo ka ga nam̃aro.

¹⁶ Neber ka nebe m̃arou ka napano naio bitikar kiniou jibe na bogo napano nojo nomioliolu ka kiano Ioluanu Vou, mia ea tivelinio na kiniou, be riano ga na ka maka vite tai leleio napano nemijikia neve m̃arou kanio. Maka nejikia nosidomii vevavin ea siaku bereio never kiniou naruei nebe naiolioluanu na Ioluanu Vou, bior

napano Atua naruei bitirilar kiniou, mia nemial jibe monoka nala ga. Ver bogo tai novuro nala re bunu, mia rivova laka rivan kiniou na.

¹⁷ Maka noto nala im̃auano na rivior kiaku jidomiano tai ga, maka kiniou ga neber bo ka nala ka Atua saaro ka kinion, p̃eli naio rijikia sian jidomiano van kiniou riviorio. Maka tibe na, mia Atua ga naio berialio, midu joa jum̃aku, mia monoka nomonea, monoka nala tibe na ga.

¹⁸ A jibe na, neber p̃eli mia kiniou nodu re jidomiano tai riviorio, mia nina bo ga, bior ka Atua jo mila todolu tai napano jibe vuluiano novo tai ban kiniou ruei. Vite na, naio be burum̃ara jogvuiano na nabar bogo napano nojo nomioliolu ka Ioluanu Vou ban ea tomu nalo, napano nomila kurano ga jibe na banlo. Peli nemijikia never bo ka ajian vite ban kiniou bior, p̃eli avitkar vatitig kiniou bogo napano nojo nomilaio, mia maka nosidom nina, nojidom napano amijikia avokario tibe na ga, maka ve titai leleio napano tukovio kalo.

Pol be nakuraniano na tomu nalo jibe naiolioluanu novo tai na Atua kiano

¹⁹ Jidomiano jibe nei naruei joa kiniou, a mila nojo nomim̃au ea bajago tai napano mia nevisivisi vatitigio van kamiú vonganai.

Jibe nei, maka noim̃au toro tai kiano, a maka toro

tai napano ve kiaku boru, mia nojo namila kiniou nebinime i jibe nakuraniano ga na kulo dolu kialo, ka rila nemijikia novokar nalo ve telabo amei amonea.

²⁰ Ea tivelinio na Ju nalo, nojo namila kiniou nebinime i jibe toro Ju novo tai, ka rila na nemijikia novuru nalo tealo amei.

Ea tivelinio na nalo napano maka ave Ju, mia ajakii Mosis kiano tuboiano, nojo nomila kiniou nebinime i jibe tai napano jakii tuboiano nei bunu. Maka neial ka noto yetano ka tuboiano nene, mia najaaro ka nabamenea tuboiano nene jibe na, ka nomijikia novokar nalo na napano ajidom atu yetano kanio.

²¹ Ea tivelinio na nalo dolu napano maka ave Ju, napano maka atakii Mosis kiano tuboiano, nojo nomila kiniou nebe takurano bijalo. Maka never ka nomila kor Atua kiano tuboiano moruo, makanio, mia bogo napano nojo bijalo, nojo najakii Kristo kiano tuboiano vou ka rila ajikia aleal meuliano.

²² Ea tivelinio na nalo napano nemialo ka maka atu sikili rivu, maka neil sikili vanlo, mia nomila jibe kiniou bunu bijalo, nojo nemii-jalo, ka ĩeli nemijikia novurulo. Jibe na, nojo najakii m̃arabo nonovio ka nala vite nonovio napano nemijikia nala van tomu nonovio, ka rila rivano-o mia nemijikia nalarur nalo tealo amei amonea Yesu.

²³ Nemila jibe na, maka nala rivior kiniou ga, ĩeli rivior vite dolu ninio, mia nomila bior ga nojidom ka Ioluanu Vou monoka rivar m̃arati ea tomu nalo kialo meuliano, a bogo napano neial ilivuiiano nalo napano Ioluanu Vou rila kalo, nojog rivu mia nojog rivu.

²⁴ Kuvisidomii von bogo napano tomu na tikitiano aju ajikiti bijalo. Ea bogo na, nalo nonovio monoka ala von ka atuvanono ka atikiti avano, mia ve vio kalo amijikia amei atukamu beamu, atuvulu nalo dolu? Ve takurano ga mijikia rivuku nalo dolu, tikiti riva tuvululo rije v jidomiano riviorio. Mia tibe na, kami nonovio monoka kuvisikili ka Tubo kiano iñauano, monoka kuvila von ka kuvitiki kuvan ka kuva kuvijev kenemiu jidomiano.

²⁵ Tomu na sereiano aju amila von kirisikili, aju amilakakar vatitigio bogo nonovio, a nalo aju abel ka vite nonovio napano ĩeli amijikia ala mokotenalo sikili re vatitig. Nalo aju amila jibe na bior kialo jidomiano jikili ka ajidom atuvulu ka ajev jidomiano. Mia bogo na ajilan maniegieg ea tomu na sereiano nalo nei, bogo bulati ga maniegieg neibano bova bereio, mia maniegieg napano bo ka rola vonio roim̃au sikili ka atilano ea kito, naio naruei jo jobo jo.

²⁶ Jibe na ga, nojo nomim̃au jibe na naruei ea Tubo kiano iñauano napano

nojo nomilaio. Maka noto netikiti kurano tanea vio, a maka noto nesere ga, ²⁷ mia nojo nobokar kiniou, nojo nojilanvuu vatitig ka mokotenaku bogo nonovio, bior napano bova nojo nomioliolu vatitig ban tomu dolu nalo, neber nalo jibe nei jibe nei, mia iorou kiniou naruei nolaluvu m̃arabo p̃eli maka navare ka nala nonovio vatitig tikitiano napano nojo nejikitiio.

10

Nalo napano aber amemedu, amijikia alaluvu m̃arabo, jibe Ju nalo korobilo nalo

¹ Bilbilu nalo, bo ka kito tiniedo maio ka venia napano korobido nalo amilaio. Nina ea bogo napano tormoruo Mosis burulo ajaluvo den Ijivi, ajakisor melijo na napano jo ban beamu kalo, banbano burulo abarkor burum̃ara tei nei napano betavo kalo.

² Nalo abiniua bogokouo nalo nene, mia Mosis burulo abar duluio, a nalo abinimej jibe kiano tomu riano.

³ Yuka miroano aju amiel ea vio yauo, nalo nonovio ajen sinaniano na napano Atua jian banlo, ⁴ a bogo midoujerlo, Atua mila uei miyotuba ea bulukuveru ga, ka amunuio. Ea bogo na, jibe napano Kristo ga jo bijalo, jo bitikar vatitiglo ea vite nonovio.

⁵ Atua mila bo banlo jibe na banbano, mia maka asidom atu sikili ea naio.

Nalo abilig taakalo kanio, naruei naio maka bunu rijamo kalo ava joomo ea vio napano naio berkario banlo, naruei mila am̃arm̃aro garuei janea vio ea vio yauo ga.

⁶ Mia kito banei, maka rivu ka parido sikili tibe korobido nalo nei, mia ver rosidomii vatitig rivu ka venia na maluvo ealo, romijikia rolakakar vatitig vite eajo.

⁷ Tibe na, monoka rodu re vite dolu to tukamu ka Atua ea kiado meuliano, jibe tavoru tai napano romilotu kanio, jibe napano korobido nalo nei amilaio. Iliano tai napano berii kialo bajago ea bogo na, berinavo

Nalo maka asidomii vite dolu, ajidom ga ala jokoluolu, bija munuiano na torogiano, a asiraragii tira ea voluano, nina ga.

Eks 32:6

⁸ Nalo aber ka naina naruei meuliano novo, mia monoka tiniedo bobogia re bogoti nene napano Atua mila maro va nalo abinimej ajer tomu nalo a tire nalo napano amila siakaiano, mia ea bogoti tai ga menu duelimo valuo ba tolu [23,000] kalo am̃arm̃aro vaarakurano, jibe kialo vironiano na jikili tai. Jibe na kito monoka rovitikar vatitigio, maka rivu ka kito tealo atu avan tanea vio tibe na.

⁹ Toro na be m̃arou, mila kariano jibe na, a beriam̃a bo ga na, naio jo julu m̃ilea Tubo. Mia Tubo rila vite tai

kanio, mia toro na ritabujo, maro rimej kanio jibe nalo dolu neibano.

¹⁰ Mia maka rivu ka rosermii ka Atua, jibe napanoaju amilaio nua, ea korobido nalo kialo bogo. Ea bogo na, Atua miila nailiano tai na verikariano na marioano binimej ealo, muebinivinlo.

¹¹ Romial napanoaju amila kariano jibe na, a romial ka vironiano nalo amalmaluvo ealo jibe na, naio be vite tai na rilabon kito. Abivitauia bulag tukunuano nene nua beamu, mia romijikia ralakakar vite eaio banej, ea bogo maaro nalo napano rojuao.

¹² Jibe na, ver toro tai jo jidom veve naio ve takurano kiano meuliano bereio, a beriamna naio jo jikili ju kirisikili vatitig ruej, bo ka naio vitikar vatitigio, bior maka rivu ka bogo tai naio rila vite va tai, ana rijoru.

¹³ Kumial jukujukuano nalo binimej, mia kumemebiju re laka. Maka kamiu ga napano kubiniua jukujukuano nalo nej, mia aju amaluvo ea tomu nonovio kialo meuliano. Mia kumijikia kuvalea Atua, bior napano mia naio maka rilaso ka koviniua jukujukuano napano maka kovare ka kotuvuluio, mia bogo napano jukujukuano rimej rila vonso, mia naio riverial kiano marioano tai kaso ka kosikili koviniua jukujukuano nalo na,

rivano-o kotaluvo den kiano moroano.

¹⁴ Kiaku bilbilu novo nalo, monoka kuvan re vaataro leleio ea bajago na napano tomu nalo aju amilotu ka tavoru sibisibi nalo. ¹⁵ Nemijikia ka kube tomu nalo napano kumijikia vite, mia bogo napano nomil kirimemedu ban kamiu jibe nej, nomonea ka kumijikia kuvitii vatitig venia napano nojo neberenio.

¹⁶ Neber iliano nej bior napano bogo na komiasolso bija tomu nalo napano aju amilotu ka tavoru tai, jibe ka napano jau bunu kojo komilotu kanio ruej.

Nina be verare ga ka tivelinio na kito napano romonea Kristo. Ea bogo na sinaniano lu, robolkouo ka munuiano lu, romidu, a nina jibe ka roberialio ka romiasol bagaro na tomu nalo napano kiano burukija miou karlo. A iorou, rovrekokorov joko lu, romidu, a nina jibe ka napano robija nalo napano amila bulag mokotenano napano jaklele mave ea malkolo.

¹⁷ Nina be riano ka kito nonovio napano roju robinimej vio takurano ea sinaniano lu nej, bior ka robinimej jibe bajago takurano, a rojen ga joko takurano nej.

¹⁸ A jibe na bunu ea kulo Israel, bogo napano amue kialo sida nalo. Tealo maka ala sida, mia ajaaro ka asen sunbue na sida nalo

nei napano nalo dolu ami-
laio, naruei mila jibe na na-
pano abe bagaro takurano
ga amila lotuano jibe na ban
Atua.

¹⁹ Bo ga, iliano nalo na
berenio venia? Nojo neberii
tavoru nalo bija sida nalo
nei, mia maka neverenio ea
kiaku jidomiano ka vite nalo
nei abe riano, p̄eli abo.

²⁰ Maka tibe na leleio,
mia bo ka nala meravo
van kamiu ka nalo napano
aju amila lotuano kinkin
nalo jibe na, maka amonea
Kristo, a sida nalo napano
aju amilaio, maka atu ala
van Atua napano be riano,
mia aju amila ban ea siñaro
nalo ga. Tibe na, maka
rivu ka kuva vaataro kalo
napano aju amilaio, bior na-
pano maka nosidom ka kuvi-
asol vija siñaro nalo.

²¹ Jau napano kojo ko-
jotano ea Tubo kiano baro-
baro lu, kojo komunu ea
kiano baja lu, a kojinan ea
kiano sinaniano lu, maka
kojikia kova kototano ea
siñaro nalo kialo barobaro
ka kodu kialo munuiano a
sinaniano.

²² Toro napano naio mila
jibe na jo julu Tubo, mijikia
rila Tubo rijokua laka, tinien
ser naio. Peli na toro nene
beriañā ber ver Tubo tinien
jer naio jibe na, maka ve vite
tai na, bior ka naio kirisikili
lie loa Tubo? Maka nesidom
ver tibe na.

*Namoneano nalo monoka
ala re vite napano mijikia rila*

*namoneano dolu nalo ajog
rivova*

²³ Iliano tai jo, napano
tomu miroano aju aberenio,
aber toro mijikia rila ve-
nia ga napano naio jidomio.
Peli iliano na be riano, mia
vite nalo tai ju ka nemijikia
nalaio, mia maka nosidom
ga nalaio, bior ka kiaku vi-
tiano, nalo maka atu aija
kiniou ka kiaku meuliano,
a maka atu aija tomu nalo
kialo meuliano nalo napano
aju vaataro kean kiniou.

²⁴ Neber jibe nei bior na-
pano maka rivu ka toro
to sidomii naio ve taku-
rano ga, mia naio monoka
sidomii bunu tomu nalo na-
pano naio jo vaataro keanlo.

²⁵ Bo ga, vonganei mia
neber tenalo tai ea tivelinio
na sunbue na temeul nalo
napano amila sida ruei
kanio ka kialo tavoru
sibisibi. Verver avar sunbue
nene amei, avar tu vija
sunbue dolu nalo ka aṽilṽili
kanio, romijikia rovulu
ka resenio nina bo ga.
Nina bior napano maka
rotu rovitilubar ka sunbue
nalo nei ajumabe, nuber
sunbue vabe na amila sida
kanio, p̄eli sunbue vabe na
maka ala sida kanio, mia
rosidomio m̄elea re, rovika
re vikadeniano, rovulu ga.
²⁶ Rodu, rosenio, bior nina
jibe ka iliano tai napano ber
jibe nei, berinavo

*yetemeriba nei, bija vite
nonovio napano
ajuaio, abe kei kiano?
Abe kiado Tubo kiano
ga. Iouano 24:1*

²⁷ A ver toro tai napano maka rimonea rivoso ka kova kosinan ea kunuano, ĩeli komerou ka kovano, kojo kober ĩeli avar sinaniano tai vanso napano amila ruei lotuano kanio ban kialo tavoru nalo. Mia makanio, ver koto kosidomii ka kovano, kavano ga, a koto kovivika re vikadeniano tibe na, kodu ga venia napano aĵianio banso.

²⁸ Mia, vite tai ga, ver jau kova koto yako ruei, a namoneano dolu tai to, naruei ĩeli naio riverialio vanso tibe na, river, Kuruaku, sunbue na, kito juo monoka rovel kanio, bior napano nomijikia ka amila ruei sida kanio ban kialo tavoru nalo. Ver naio river tibe na vanso, naina naruei mia jau bunu kosenio re.

²⁹ Ee, ea tivelinio na kiamo jido-miano, kojaaro ka kosen ga, mia ea tivelinio na kuruamo dolu nei napano ber vite na kaso, bova ka naio, naruei bo ka kotokol re bunu, bior verenio makanio, mia jau kola vite tai napano kiano jidomiano maka rimemedu kanio leleio.

Mia ver jau ga takurano, a maka toro tai riverial vite tai vanso tibe na, jau komijikia ka kola venia napano komijikia ka memedu kaso ka kolaio.

Naina naruei kiaku jidomiano jibe na ka vio na. Kiniou neber ĩeli maka rimemedu ka toro dolu kiano jidomiano ga jo

miyuku kiniou ka monoka nala nina ĩeli nala re ninei.

³⁰ Ver sinaniano kinkin vaio, mia nemialio ka ver beamu, nobolkouo kanio, mia nemijikia nosenio rivu ga. Maka rivu ka toro dolu tinien seri kiniou ka nojo njen sunbue tai napano neber siva ban Atua bior ruei.

³¹ Bo ga, nina berenio jibe nei, ber verver kito rosen titai, ĩeli romunu titai, ĩeli vaio bereio napano romijikia ralaio, mia monoka ralaio nonovio ea bajago tai na ridular Atua siano. ³² Kirivova ver kamiu kuvila titai napano mia rila bulag kulo Ju nalo kialo jidomiano, ĩeli kulo Kris nalo, ĩeli kiado namoneano dolu nalo, ³³ mia bo ka kuvila von ka kuvila tibe na kiniou nojo nemilaio kalo. Ea vite nonovio napano nojo nemilaio, maka nala von ka nala ka rivu van kiniou, mia namila von ka nala rivu vanlo, ka rila ka ĩeli nalo tealomijikia avokar ioruriano.

11

¹ Ee, bilbilu nalo, jibe ka napano kiniou nojo nomila von ka neiel noue Kristo jaano, bo ka kamiu kuvila von kija ka kuviel kuvue jaaku.

Tomu nalo kialo bajago novo bogo na aban ea lotuano

² Bilbilu nalo, nomijog ka kumitu kumisidomii kia ga imauano nalo napano nominauka ban kamiu, a

kumitu kubakar batitig bajago nalo na imauano nei napano neberloglog ka kamiu.

³ Mia ea vite nalo nei, nalo tai jo keano napano nojidom ka kamiu monoka kuvijikia vatitigio, napano berii toro bija tira, napano naljuo kialo imauano maka rive verare. Jibe ka napano Atua karamado naio be parinio ka Kristo, a Kristo naio be parinio ka toro, naruei sumano be parinio ka koano tira.

⁴ Mia jakii kiado bajago, ver toro tai rivolkouo, peli ril ea mirano namoneano nalo, naio monoka riya re batubatu joa parinio. Verver riyaio, romial naio jibe vovu tai napano maka rijikia rila bajago na vameneano. ⁵ Mia ea tire nalo naio be dolu. Verver tira tai bolkouo, peli ril ea namoneano nalo miralo, romialio rober bo naio jovuko parinio ka batubatu peli kulumarauo tai tibe na. Verver sovoko re vatitig parinio tibe na, naio bunu mila bova, romial naio be verare ga ver ve boromo ga, to sikili tu ea mirano tomu nalo.

⁶ Ver tira tai parinio sikili, maka sidom sovoko parinio tibe na, bo ka kamiu kuver kanio ka tapig kon parinio ga tukamu, ana karina mijikia sikili tu ka rivolkouo joomo ea lotuano. Ana mia naio monoka rimou laka ka rila tibe na, bior maka rivu ka tira rivuron vijinio ve bulavulati laka, peli tapig vijinio ve boromo. A vere-

nio ve vite na imouiano ka tira jibe na, bo ka tire nalo asaaro ka avokar kiado bajago na vameneano, nalo monoka asovoko parilo tibe na, bogo na abinimei ka avolkouo ea lotuano.

⁷ Mia ka venia tomu nalo maka asovoko parilo? Nina bior Atua jo mave, a naio be boru ruei, mia mila sumano jibe nei, bitirilar sumano mila naio loa ka tira. Jibe na naruei sumano monoka re rilavan parinio, mia tira monoka sovoko parinio. ⁸ Romijikia ka sumano monoka to mave tibe na, bior napano Atua jii sumano beamu, karina jii tira den merikono tai na mokotenano sumano, mia maka tii sumano den tira, ⁹ a naio jii tira ka rijai sumano, maka tii sumano ka mia rijai tira. ¹⁰ Tibe na, tira monoka sovoko parinio, ka verialio ka naio bame-neo koano. Mia bogo na naio mila jibe na, nailiano nalo na tiniabene amialio, a mila abitilubario ka jibe ka tira jaaro ka vatove ka koano, mia nalo bunu monoka asaaro ka avatove ka kialo toro na toru, napano Atua. ¹¹ Ierinio napano tira monoka rivatove ka sumano tibe na, mia nina maka riverenio ka naljuo maka ave verare. Kito napano roju joomo ea bagaro na Tubo, romijikia ruei ka tira maka rijikia to naio ve takurano, a sumano maka rijikia to naio ve takurano, mia naljuo monoka atu aimau vei ka aijajalo ve verare ga.

¹² Beamu laka, ea tiiano, tira moti moluo ea suñano mokotenano, mia iorou ka naina, tomu nonovio aju amolmoluo ea tira mokotenano bokar banei, mia romijikia ka burupati riano nene, napano vite nonovio malmaluvo eaio, naio be Atua ga.

¹³ Peli tealó maka asaaro ka kiaku iliano, napano neber bo ka tira napano bolkouo monoka sovoko parinio, mia kamiú kuvila von ka kuvisidomii vatitig kanio. Ea kenemiú vitiiáno, kubitii ka tira napano maka sovoko parinio, memedu ka naio tumolu rivolkouo van Atua? Maka leleio, ea kiado bajago maka lele rimemedu.

¹⁴ Ea kiado meuliano na yetemeriba nei, meravo vatitigio ka kito ruei, ber bogo napano suñano juvan vijinio terebievi laka, maka rivu laka ka naio. ¹⁵ Mia bogo napano tira juvan vijinio terebievi kirinovo, bo laka ka naio, a vijinio na terebievi nei, Atua jian ban naio jibe ka vite tai ka riofovua vu mokotenano.

¹⁶ Mia jibe napano nebereño, na-moneano tealó aju amil laka, maka asaaro ka jidomiano nene napano ber ka tira napano jidom rivolkouo monoka sovoko parinio. Bo ga, kiaku iliano jibe na, ber kumemi naverloglogiano nalo, nuberloglog jibe nei ga, maka nuvisaaro ka bajago dolu, a Atua kiano bagaro na lotuano ãiliãili dolu nalo, nalo bunu abereño jibe na.

Marabo na memedu ka ala sinaniano lu

¹⁷ Vite tai bereio jo kia napano nojidom never jidomiano tealó ka van kamiú. A maka rivu ga, bior napano maka ve vite tai napano nemijikia nodular kamiú riviorio, mia be vite tai napano monoka noil van kamiú riviorio. Nina ea tivelinio na bogo na lotuano, napano bo ka tibe na vite tai napano rijai kenemiú meuliano, mia kumila tibe na binimei be burupati jaleleano tai bereio. ¹⁸ Neber jibe na bior napano nomijog ruei aber bogo napano kamiú namoneano nalo kuburon vio takurano, maka kuve takurano, mia vuruburevureiano jo binimei judu iviso kean kamiú. Ver iliano nalo nei be sibiano, bo, mia makanio, nemialio jibe monoka be riano ga.

¹⁹ Mia maka nejikia ka vaio kumisidom kuvila tibe na? Peli tai jidom tovulu tai, tai jidom tovulu tai tibe na? Peli kojidom kotuvuluio, ka mia tomu nalo aver jau naruei kobe riano, ãeli jau naruei Atua jo bijaso?

²⁰ Mia ea tivelinio na sinaniano lu, nomijog aberenio nina bunu kumitu kumila bova. Bogo napano kuburon vio takurano ka kuvila sinaniano lu nei, maka bunu kuvila ka kuvisidomiikar kiado Tubo, mia kumila jibe semiu sinaniano dolu nalo. ²¹ Verenio tai rimei rijog vitu, mia tumolu riyuku juñano rivar joko ve telabo naruei dolu nalo

ve re salo, ðeli dolu rimunu
 ñarjuñmñelu ve toru!
 22 Peli maka ve kenemiu
 yimo na vorosebiano, ana
 kubinimei ea lotuano ka
 kuvisinan eaio? Peli
 kamiu kumila jibe na bior
 napano kumitu kumisidomii
 kurano ea Atua kiano yimo
 na lotuano, ðeli kumitu
 kumisidomii kurano ea
 namoneano bilbilu dolu
 nalo? Maka nejikia mia
 never venia ka kamiu rivor
 vite nei, a mia neber ga
 maka nasaaro kanio leleio.

23 Marabo na memedu
 ka ala sinaniano lu, Tubo
 naruei ber ka kiniou, a
 iorou, kiniou naruei noju-
 van biedu ban kamiu. Bano
 jibe nei, ber Tubo Yesu, ea
 kiano bogiano maaro na,
 napano Jutas jiveluku naio
 eaio, naio midu joko nei,
 24 ana bolkouo ber siva
 biorio, burekokorovio, ana
 berenio “Ninei naruei be
 mokotenaku, napano nomi-
 jamo bior kamiu. A kamiu
 monoka kuvisen joko tibe
 na tulaka, tibe vite tai ka
 kuvisidomii kiniou.” 25 A
 iorou, bogo napano ajenio
 bano-o bisi, naio midu baja
 na ñarjuñmñelu, mila jibe
 nene bereio, ber kalo beri-
 navo “Baja nei, naio be ki-
 aku burukija, napano mila
 Atua kiano verikariano vou
 napano mila bija toro jikili
 ju. A bogo nonovio napano
 kamiu kuvidu baja nei tibe
 na, neber bo, kamiu monoka
 kuvisidomial kiniou.”

26 Bilbilu nalo, naina
 naruei Tubo kiano iliano
 ea tivelinio na, a mila ver
 bogo napano rosen joko

vija rodu baja tibe nei, roju
 romila sidomkariano na
 kiano ñariano, a mia kito
 monoka rotu rala tibe na
 vokar bogo napano naio
 rimaluvo kean kito bereio.

27 Tibe na, ka rodu Tubo
 sano joko nei, vija ñano baja
 nene, naio be vite tai napano
 be lu laka. Ver toro tai
 ridu ea bajago tai napano
 maka rimemedu, toro na
 mila kirivova, mila bulag vi-
 jauano na mokotenano Tubo
 bija kiano burukija, jibe ka
 naio ga muebin naio. 28 Tibe
 na, bogo na ala sinaniano
 lu nei, monoka rovitii vatitig
 kiado meuliano veve ter-
 akurano, karina, rodu joko
 vija baja nene. 29 Mia

bogo na rodu, monoka rovi-
 tilubario ka vite nei, nioti
 nene toru jo, napano be-
 rial ka kiado Tubo mijamo
 ka kiano meuliano bior kito.
 Naruei, ver toro tai senio,
 ana maka sidomii ve temi ka
 kito nonovio robe toro taku-
 rano ea Kristo, midu ka iaku-
 rano ga, a mia naio rialio
 napano rivova lie ka naio.

30 Vite na naruei jo mila
 kamiu ruei, napano miroano
 ka kamiu amelmeluku ðeli
 amie, ba bokar napano tealo
 añañaro. 31 Mia ver rotu
 rovitii vatitig kiado meu-
 liano bogo nonovio, mia
 Atua sian re vironiano van
 kito tibe nei. 32 Mia kito
 napano Atua mila ka kito
 jibe nei, maka rodu tibe vi-
 roniano tai, rodu tibe jido-
 miano tai napano Atua mila
 ka rilabon kito, ka sian bogo
 van kito ka ea bogo maaro,
 mia avukular kito re rovan

vija tomu dolu nalo na yetemeriba napano mia avan ea vio na jogvaiano.

³³ Bilbilu novo nalo, naina naruei kiaku iliano ea tivelinio na ala sinaniano lu. Bogo kumei vio takurano tibe na, mia kuvila ea bajago novo. Ve re tai napano rila von ka ridu soĝeli ka senio ve toru beamu, mia kuvitu riġaro ga, kar bogo napano aviniu atu, kamiu kuvilaio.

³⁴ Toro napano jijerio ana jidom laka sinaniano, bo ka tobo ga vonuo, sinan vatitig ea kiano vio. A monoka kuvitakii kiaku iliano ea tivelinio nei, ver ħeli, bogo na mia kumei vio takurano, mia maka lele vite tai rivu van kamiu.

Vite nalo dolu ju ka neverialio van kamiu, mia rotukunu kalo bogo na namaluvo kean kamiu.

12

Moroano nalo napano Niununo Lu jianio jibe jidomianio tai

¹ Bo ga kuruaku a kuvivin-ioku nalo, kiniou nojidom neverii moroano nalo napano Niununo Lu mijikia sianio van kito namoneano nalo jibe jidomianio tai. Ea tivelinio na, maka rivu kamiu kuve taboso, mia nojidom ka monoka kuvijikia vatitig kija kalo. ² Beamu, bo ka kuvisidomii nua ea bogo na maka kumonmonea vo. Ea bogo na, moroano nalo na niununo dolu nalo aju aminġau ea kamiu, aburu kenemiu jidomianio ba be

vovu vatitig ka kuvilotu ka tavoru nalo ninio napano maka ajikia ail. ³ Nina naruei niununo kinkin nalo napano amijikia ala toro ril rivova ka Yesu, riolua siano, mia Atua kiano Niununo Lu maka rijikia sian iliano na jibe na. A niununo nalo na, maka ajikia ala toro river iliano novo, verial Yesu be Tubo riano, mia toro napano ber jibe na, romijikia ka Niununo Lu jo miġau ea naio, bar iliano nei banio.

⁴ Jibe na, bogo napano romial moro-ano novo nalo napano namoneano nalo amijikia airġau vijaio, romijikia ka jibe jidomianio nalo napano Niununo Lu jianio banlo. Moroano telabo ka ala iġauano aju, mia Atua kiano Niununo naio takurano be burupati ka nonovio. ⁵ Jibe ka ga napano bajago telabo ka ala iġauano aju, mia kido Tubo naio takurano be parinio ka nonovio, ⁶ a jidomianio novo telabo ka ala iġauano aju, mia Atua naio takurano jo mila abavavin ea kito nonovio. ⁷ Jibe ka, ea tivelinio na moroano nalo napano Niununo Lu jianio, namoneano nalo amijikia ajevio beve dolu, jakii venia ga napano Atua bitii ka mia riija lie taara na namoneano nalo.

⁸ Ea tai, Niununo jian iliano nalo napano abe masou laka. Ea tai, jian navitilubariano novo nalo. ⁹ Ea tai, jian viekouoiano

toru. Ea tai, jian napano mijikia milarur namieiano nalo.

¹⁰ Ea tai, jian napano mijikia miñauka vremesiano nalo. Ea tai, jian verialiano na vite nalo na ju ka rimei. Ea tai, jian napano mijikia rijidig bulag siñaro nalo. Ea tai, jian napano mijikia rijeve ka iliano dolu. Ea tai, jian napano mijikia bilig iliano nalo napano amijeveio ka iliano dolu.

¹¹ Nina naruei ijaiano nalo napano Niununo Lu naio takurano ga mijikia ridu toa toro kiano meuliano, jo jian bulagio ban kito terakurano jakii ga venia napano naio jidomio.

¹² Namoneano nalo abar ijaiano nalo beve dolu jibe na, jibe ka napano mokotenado nalo be tarati dolu nalo miroano. Terati dolu nalo na, amiasolo aju amimau vei ea mokotenano takurano ga, a jibe ka bunu joomo ea taara na namoneano nalo, napano ajibe ka terati nalo ea Kristo mokotenano.

¹³ Peli kito kulo Ju p̃eli kito kulo Krik, p̃eli kito tortoru p̃eli roju romiñau kurano toro na toru tai kiano, mia Atua kiano Niununo midu kito nonovio, mila kito rabaruei ka romei rove terati na Kristo mokotenano, a Niununo na naruei napano naio takurano ga joa kiado meuliano nalo beve terakurano.

¹⁴ Bo ka kito rosidomii lie ea kijo-kijo nei napano roju roberio, rober kito namoneano nalo rojibe

Kristo mokotenano. Naruei ea tivelinio na mokotenado, romijikia ka terati nalo miroano. ¹⁵ Tibe na, maka rimemedu ka terati tai, tibe jaano, rijog rivova, tumolu riverinavo “O, kiniou jaano ga, kiniou maka noimau rivu tibe napano jumano miñau. Peli maka bunu rivu ka neve terati na mokotenano.” Mia makanio, jaado maka rijikia river tibe na, bior naio be terati na toru ea mokotenado ruei.

¹⁶ Mia maka rimemedu ka tiliniedo rijog rivova, tumolu riverinavo “O, kiniou tilinieno ga, kiniou maka nejikia nevitii vite tibe napano mirano milao, p̃eli maka navare ka noto noiasol ea mokotenano.” Mia makanio, tiliniedo maka ver tibe na, bior napano naio, kiano imauano novo napano mila ka mokotenado jo ruei.

¹⁷ Nina bior napano verver mokotenado rive mirano ga, mia maka rejikia rojog lubar vite, a ver mokotenado rive tilinieno ga, mia maka rejikia rojugunu vite. ¹⁸ Mia ea mokotenado, Atua mila jakii kiano jidomiano, bar vatitigio nonovio terati nene ajua vio nalo nene memedu terakurano, ka ala kialo imauano memedu veve terakurano.

¹⁹ Ver terati mokotenado nalo aviniu averaverarei ga, mia kito maka rejikia rovitii tibe ka na mokotenano jibe ka takurano ga, ²⁰ mia terati dolu nalo abiniu monoka aiasol vio takurano

ka ve mokotenano toro.
²¹ Mirado maka rijikia ril
 rivova van jumado, river "O,
 maka bunu nosidomso," a
 pariparido maka rijikia rijil
 jaado, river "O, maka bunu
 tinieku tiso." ²² Maka leleio
 tibe na, a! Terati mokote-
 nado tealo amelmeloko
 laka, mia romijikia kaaju
 amila burumara imauano.
²³ Terati dolu na mokote-
 nado nalo, rosidomii re
 rever abo jumabe, mia rotu
 rovitikar vatitiglo. Terati
 dolu tealo na mokotenado,
 maka rosidom toro dolu
 rialio, naruei rojidom temi
 ka roiako vatitiglo. ²⁴ A
 terati dolu na mokotenado,
 abo ka tomu nalo amij-
 ikia aialio, naruei maka
 roiakolo. Jibe ka, romial
 ka Atua bar vatitig terati
 nonovio memedu ga, a
 midu jidomiano tai joa kito
 ka napano bekurano terati
 tealo amelmeloko, peli maka
 ala imauano ve toru, mia
 rosidomii ve temi kalo a
 rovitikarlo rivu. ²⁵ A nina
 mila napano terati nalo
 nonovio maka ail niegelo,
 miaaju bo ga,aju amijajalo
 bereio bogo nonovio. ²⁶ Ver
 terati na mokotenado tai
 rijog rivova ka vite tai, terati
 nonovio dolu nalo monoka
 ajog rivova vija naio, a ver
 aijalar terati tai, amila bo
 banio, terati dolu nonovio
 amijikia ajog rivu vijaio.

²⁷ Naruei iliano nalo nei
 aberenio jibe nei, aber kito
 naruei namoneano nalo,
 rojibe ka Kristo mokote-
 nado, a kito trakurano robe

kiano terati nalo nene. ²⁸ A
 Atua bitiri bulag kito terati
 nalo na Kristo mokotenano,
 ka rola imauano nalo
 na lotuano. Na beamu,
 Atua bitiri bulag tealo abe
 navagadeano, na juo nene
 tealo abe atevi, na tolu nene,
 tealo abe naverloglogiano,
 a iorou kanio, nalo napano
 amimauka vremesiano, peli
 amilarur mieiano nalo,
 peli abitikar imauano ea
 lotuano, peli amijev iliano
 dolu nalo, jibe na. ²⁹ Naruei,
 ea taara na namoneano
 nalo, kito romialio napano
 abiniu abe atevi? Peli abiniu
 abe naverialiano? Peli
 abiniu abe naverloglogiano?
 Peli abiniu amimauka
 vremesiano? Maka leleio
 tibe na. ³⁰ A abiniu amijikia
 ala rur mieiano nalo? Peli
 abiniu amijikia ail ka iliano
 dolu nalo, peli avilig iliano
 dolu nalo? ³¹ Maka leleio
 tibe na, mia bo ka tomu
 nonovio asaaro ka avokar
 burumara moroano vabe
 napano Niununo mijikia
 sianio vanlo.

A ea moroano nalo na,
 tai jo napano monoka rimei
 ve moti ea kiado meuliano
 nonovio, napano bo lie laka
 ka nalo dolu, napano kin-
 iou nojidom noveriiio van
 kamiu, nina bajago na tini-
 etiano.

13

Tinietiano

¹ Tinietiano, naio be vite
 tai napano monoka ve vite
 moti ea kiado meuliano. Peli
 nemijikia neil sel kulo dolu
 kialo iliano, peli nemijikia

neil ka agelo nalo kialo iliano, nina bo, mia ver kin-iou tinieku tii re tomu nalo, mila napano kiaku iliano nonovio ajibe ka ĉi tai napano amue vovu, miolu kurano ga. ² Peli burumĉara moroano joa kiniau ka neverial Atua kiano iliano, ĉeli na nemijikia vatitig vite telabo napano tomu dolu nalo maka ajikiaio, ĉeli na kiaku viekouoiano toru laka bare ka nobolkouo ka tenalo na tortoru mia amaluvo, vite nalo na abo laka, a ver tinieku tii re tomu nalo, nebe iakurano ga. ³ Peli neĵian kiaku saba nonovio ban talimĉasa nalo, ver ĉeli noĵu jikili banbano-o amisebi mokotenaku bior napano nebe Kristo kiano toro, nina bunu bo, mia ver maka tinieku titii tomu nalo, nemila ka iakurano ga.

⁴ Naruei burumĉara vite nei, bajago na tinietiano, naio ĵunabe? Jidomiano nene tebievi, a be tinievuiano. Naio maka rijokua, naio maka rivarvarka, a naio maka to ridular naio bereio. ⁵ Kiano bajago kironovo, naio maka rive viti, maka tinien mimi soĉeli, a maka rivokar jidomiano va vesiou. ⁶ Naio maka sidom vite va, mia ĵaaro ka vite novo. ⁷ Tinietiano naio jikili ĵu ĵulaka, tinietiano naio be riano ĵulaka, tinetiano naio tinienekar ĵulaka, a tinetiano naio ĵuvulu ĵulaka. ⁸ Tinietiano maka tinien maro leleio bogo tai.

Be riano laka, moroano

dolu nalo, ĵibe verialiano nalo, ĉeli iliano na ka iliano dolu nalo, ĉeli ĵikiaiano nalo, mia nalo maka ajikia atu tulaka, mia tinetiano ga naio ĵo ĵulaka ga, naio maka rijikia ribisi bogo tai. ⁹ Ea kiado bogo, aĵu aberial Atua kiano Iliano nalo, a aĵu aberloglog ĵikiaiano nalo ĵibe nei, mia venia napano aĵu amila banei, be torogtorogio nene ga, maka rivokar kiano vujoano leleio. ¹⁰ Vite nalo nei abe tena vonganei ga, a ea bogo napano mia Atua rila vite nalo rimei rivu nonovio, vite dolu nalo nei mia abisi, mia tinetiano ga mia to.

¹¹ Nina be verare ga ka kiado meuliano. Bogo napano robe kiritete kia ga, kiado iliano bija kiado jidomiano bar kiritete kiano bajago. Mia bogo na robinimei tortoru, maka bunu rotibe ka kiritete, kiado bajago meruo vatitigio. Naruei kiado meuliano bija Niununo Lu monoka tibe na bunu.

¹² A naio be verare bunu ka mermerobi nalo napano roĵu robittii mirado eaio. Bogo tealoo, ver mermerobi nei miagiago ĉeli be mĉadati, mia maka rejikia rovitilubar vatitig mirado eaio. Mia bogo napano Atua rila vite nonovio rimei rivu, mia romijikia rovitilubar vatitig vite nonovio, a mia roial Atua mirano rimemedu ka mirado ga. Mia bunu ea tivelinio na kiado ĵikiaiano, vonganei romijikia telisu ga,

mia ka bogo na ju ka rimei, mia Atua rila kito rojikia vatitig naio, vija vite dolu nonovio, ve verare ka ga naio mijikia vatitig kito nua ruei binime i bokar banei. ¹³ Tibe na, vite dolu nalo mia abisi, mia vite tolu ga amijikia atu tulaka, nina navieko-ouoiano, baleaiano, a tinietiano. Mia ea vite tolu nei, nana napano toru laka kalo, naina neberenio maariano na, naio be tinietiano.

14

Pol jo berii bereio moroano nalo na Niununo Lu, jibe napano amil jel iliano dolu nalo

¹ Naruei bior napano tinietiano naio burumara vite laka jibe na, kamiu monoka kuviduio to ve vite moti ea kenemiu meuliano. Mia bija nina, monoka kuvidu kenemiu jidomiano toa moroano nalo napano Niununo Lu jomā jianio, kamiu kuvisaaro ka kuvakarlo. Mia ea moroano nalo nei, tai napano bo laka, nina napano toro berial Atua kiano iliano nalo.

² Ver toro tai tumolu verial iliano jel iliano dolu tai napano Niununo Lu jianio banio, pēli bo ka naio, mia jibe ka napano jo mil ban Atua ga, maka to ril ka tomu dolu nalo ajikia ajog lubar naio. Peli jo berial burumara iliano nalo napano Niununo Lu jian banio, mia iliano nalo na ajuluku ka kito, maka rejikia rovokarlo.

³ Mia ver toro tai riverial Atua kiano iliano nalo van

kito, ril van kito sel ea kiado iliano, kiano iliano novo nalo nei amijikia ala kito rosikili, amijikia adular kiado jidomiano, amijikia adururu kiado iviso. ⁴ Jibe na, toro napano mil jel iliano dolu napano Niununo Lu jian banio, jo bagan naio takurano ga, mia toro napano berial Atua kiano iliano napano tomu nalo amijoglubarario, naio jo bagan lotuano nonovio.

⁵ Ee, kiniou najaaro ver kamiu kuvil sel iliano dolu jibe na, mia nemialio ka bo lie ver kuvitu kuverial Atua kiano iliano van kulo dolu nalo. Naio napano jo berial Atua kiano iliano nalo, kiano imāuano bo lie loa ka napano jo mijev jel iliano dolu. Nina bior naio napano jo mil jel iliano dolu, kiano imāuano maka jikia rivar mārati ea kulo dolu kialo meuliano. Kiano imāuano maka rijikia vagan lotuano ver maka tai napano jo bilig kiano iliano nalo ka kulo dolu nalo ajikia ajoglubarario.

⁶ Bilbilu nalo, kuvisidomii vonio ver kiniou, bogo nojo nebinime i ea kamiu nojo nomioliolu ban kamiu jel iliano dolu tai napano Niununo Lu jianio ban kiniou. Tibe na, mia kiaku iliano nalo maka ajikia aija kamiu leleio. Mia bogo na nemil ban kamiu jel iliano napano kumijoglubarario, mila na venia napano nejianio ban kamiu, jibe vite vou tai napano Atua berloglog ka kiniou, pēli jikiaiano tai, pēli

verialiano tai na Atua kiano iliano, ħeli verloglogiano tai, mia mijikia rijai vatitig kenemiu meuliano.

⁷ Nina jibe ka ħi ħarauo tai, ver kiano terati jooa nalo avova, mia bogo na aserei kanio, maka rojikia rojog lubar vatitig iou venia napano ajerei kanio. ⁸ Peli ver tubo tai jidom rue ħi, mia ħi minunu, maka jikia riolu ħelea, mia tomu nalo maka ajikia ajoglubario ka tubo mue ħi bior vaio. ⁹ Mia jibe ka ga na lotuano na kenemiu yako bunu. Ver toro tai jo ber iliano nalo jel iliano dolu tai napano tomu nalo maka ajikiaio, mia maka ajikia avokar niati tai leleio ea venia napano naio jidom river kalo. Kiano iliano mia riva kovio ea vio yauo ga.

¹⁰ Jibe napano romijikia, iliano miroano ju janea yetemeriba, a kialo iliano nalo abe nioti aju. ¹¹ Mia ver nava kovio tai, maka nejikia kialo iliano, nejibe ka valauo kalo ea vio nei, a nalo ajibe ka valauo ea kiniou bunu. ¹² Ana iliano nei be nioti ban kamiu napano kumitu kumila vio jikili ka moroano nalo na Niununo Lu aimau iviso ea kamiu. A nioti nene jibe nei, ber kamiu kuvila re napano kubeve terakurano kuvitu kubavavini ea kamiu ga, mia monoka kuvilavio sikili ka kamiu nonovio kuvitu kuvidular lotuano rimei sikili vatitig nonio. ¹³ Tibe na, ver kamiu tai mijikia ril sel iliano dolu tai napano Niununo Lu jianio ban naio,

bo ka rivolkouo van Atua ka sian moroano van naio ka vilig kiano iliano nalo nei avan ea kenemiu iliano. ¹⁴ Kiniou neber jibe na bior ver noto nobolkouo sel iliano dolu tai tibe na, nemial jibe ka nojo nobolkouo ea niunuku ga, mia joomo ea kiaku jidomiano, maka nejikia venia napano nojo neberenio.

¹⁵ Ver tibe na, mia bo ka rala tumabe? Ea kiaku vitiiano, bo ka rala ea tivelinio ve juo. Ver kiniou noto nobolkouo, ħeli noto noiou, mia bo ka nala ea iliano napano miyotuba ea niunuku, a bo ka nala bunu ea iliano napano miyotuba ea kiaku jidomiano. ¹⁶ Ver makanio, ħeli kojo kobolkouo jel iliano napano maluvo ea niunumo, kojo kober siva ka Atua bior vite tealu, mia toro dolu napano maka rijevo moroano ka rijoglubar iliano nei, mia naio maka jikia rijikiaio, mia maka jikia riverenio "Jibe na ga naruei" ea kiamo volkouano. ¹⁷ Peli kojo kobolkouo jibe na, kojo kober vite novo miroano, mia kiamo volkouano na maka jikia rijai kiamo bilbilu kiano jidomiano leleio.

¹⁸ Kiniou najaaro laka ka Atua jian moroano ban kiniou ka noil ea iliano napano Niununo Lu jianio, neber siva laka kanio, a nemial jibe nemila toru jovulu laka kamiu nonovio. ¹⁹ Mia kiniou nojo nemila ea bogo napano nojo kiniou takurano ga, maka noto nala ea mirano tomu nalo ea bogo na

lotuano. Ea kiaku vitiiano, verver never iliano na telisu tai ga sel iliano napano tomu nalo amijikiaio, napano mijikia verloglog kialo meuliano, nina kirinovo laka jovulu napano nejian iliano telabo jel iliano dolu napano maka ajikia ajoglubarario.

²⁰ Bilbilu nalo, neber bo ka kamiu kuvila von kuvisidomii vatitig ea vite nalo nei, kuvisidomii re bunu tibe kiritete. Be riano ka ea tivelinio na bajago va nalo, bo ka kuvitibe kiritete nalo, napano maka ajikia vite ve telabo kanio. Mia ea tivelinio na bajago novo nalo, kenemiu jidomiano monoka meruo vatitigio.

²¹ Iliano tai joa Vivitauiano Moruo, berial iliano tai napano Atua ber jibe nei, berinavo

Mia novuru tomu nalo napano abinimei ea venuo dolu nalo, napano ail sel iliano dolu, neiilalo avan ka averial kiaku iliano van kiaku tomu nalo.

Mia kiaku tomu nalo pariparilo kirisikili laka, mia maka ajikia aiagago ka kiaku iliano napano valauo nalo nei averialio kalo. Ais 28:11-12

²² Ea iliano na, romial ka Atua berialio ka moroano na ail ka iliano dolu napano Niununo Lu jianio, ka vaio? Moroano na, maka van kito na romonea ruei, mia ka rijai nalo napano maka amonea vo. Bogo napano ajogio, avitilubarario ka be riano. Mia moroano

nei ka riverial Atua kiano iliano, rijai laka ka kito napano romonea ruei, ka romijikia rojoglubarario meravo bo. Mia moroano na maka jikia rijai laka nalo napano maka amonea vo, bior napano maka asidom aiagago ka Atua kiano ilirianiano.

²³ Tibe na, bogo na kumei vio takurano ka kuvila lotuano, maka rivu ka kuvitu kuvil laka sel iliano dolu nalo napano Niununo Lu jianio ban kamiu. Ver bogo tai tibe na, ver tai napano maka jikia vatitig vite nei, p̃eli maka rimonea, ver rimeĩ joomo ea kenemiu lotuano, mia naio rial tum̃abe? Mia monoka sidomii ver kamiu nonovio kumiavovu garuei.

²⁴ A ver rimeĩ joomo, rial ka kamiu kumitu kuberial Atua kiano iliano jel iliano tai napano kamiu nonovio kumijikiaio, mia riagago ka kenemiu iliano novo nalo, naruei mijikia rikuru tinieno, mijikia rila naio rivitilubar kiano kariano. ²⁵ A bogo napano naio riagago rivano-o, mia rijog ka Atua kiano iliano bokar kiano meuliano, bar dulu ea vite nalo napano milavanio ajua kiano jidomiano, a mia rila naio rijog rivova, rinie tano rilotu van Atua, riverialio riverinavo be riano ga, Atua jo iviso ka kamiu.

Monoka kuvim̃au vija moroano nalo na Niununo Lu ea bajago na memedu

²⁶ Jakii iliano nalo nei ea tivelinio na moroano nalo napano Niununo Lu jianio, mia kamiu kuvila tumabe ka bogo nalo na kenemiu lotuano? Bogo na kumei vio takurano, bo ka kuvitibu-revure imauano nalo nene ea kamiu. Tibe ka, tai sian iouano, tai sian ver-loglogiano, tai sian jidomiano vou napano Atua berialio ban naio, tai sian iliano sel iliano dolu napano Niununo jianio ban naio, a dolu tai rijikia vilig iliano nei ka tomu nonovio ajikia nioti nene. A vite nonovio napano kumila jibe na, monoka vagan vatitig namoneano nalo kialo meuliano napano aju na.

²⁷ Naruei jibe na napano neberenio, ver ea bogo na, tai jidom sian iliano tai sel iliano dolu tai napano Niununo Lu jianio banio, nina bo ga na. Ver juo peli tolu tibe na, bo ga na bunu, mia monoka tuvulu re ve tolu. Mia ail re ve vaarakurano, mia adu bogo vanlo, tai tukamu, karina tai bereio, tibe na. Mia bunu, bogo napano tai ril bisi, toro dolu tai monoka vilig kiano iliano, ka tomu nonovio ajikiaio. ²⁸ Mia ver asidom ka ail sel iliano dolu tibe na, mia maka tai to napano be kiano moroano ka verial nioti na iliano nei, mia ail re bunu sel iliano dolu nalo nei tibe na ea tomu nalo miralo. Mia toro na jibe na tormaro ga, a mijikia ril sel iliano kinkin nei joomo ea niununo ga, napano Atua ga mijikia

rijoglubario ave juo.

²⁹ Ea tivelinio na nalo napano aberial Atua kiano iliano, bo ka nalo ve juo peli ve tolu ga ail. Mia bogo napano asian bulag kialo iliano nalo karina, bo ka namoneano dolu nalo aver kialo jidomiano kanio. ³⁰ Ver tai to rioliolu jaka, ana Atua jilogloglar jidomiano vou tai ban namoneano dolu tai napano jotano jo, nina jo mil monoka ribisi beamu ka ridu bogo van dolu na. ³¹ Tibe na, kamiu nonovio kumijikia kuvar bogo ka ku-verial Atua kiano iliano, napano tai berial tai, karina tai berial tai, jibe na. A mia iliano nalo na amijikia adular tomu nonovio kialo jidomiano, a tomu nonovio amijikia alakakar vite novo ealo.

³² Iliano novo tai jo, napano memedu ka nalo na abokar moroano nalo nei napano Niununo Lu jianio. Iliano na ber jibe nei, ber Niununo napano jian iliano ban toro, naio maka tutua toro na, mia monoka takii toro nei kiano masouano, napano mia verial iliano nei. ³³ Iliano nei ber ka kito monoka roimau ea bajago novo na jibe napano Atua jidomio, bior napano naio maka rimau pilipli vija kiano moroano nalo, mia jo mirauka vite nonovio memedu ea bajago na tumaro.

Mia bo ka kamiu kuvitu kuvila tibe ka napano taara dolu na namoneano lu nalo ajuma amilaio, ³⁴ napano

ea bogo na lotuano, amila ka tire nalo atu aturmāro ga. Maka ajamo ka tire nalo atumolu ka aver iliano ea suñano nalo miralo, bior napano jibe ka tuboiano moruo berenio, tire nalo monoka atu mave re atuvulu suñano nalo.³⁵ Ver tire nalo ajidom ajikia vite, maka rivu ka avika vikadeniano ve miroano ĩeli averial kialo jidomiano nalo ve miroano joomo ea lotuano, mia bogo napano ava vonuo karina, amijikia avika von den koalo nalo.

³⁶ Naina naruei kiaku iliano tealo van kamiū, a maka rivu kamiū tealo aber ĩeli neber maka rimemedu. Maka kamiū napano Atua kiano iliano lu biedu ea kamiū jukamu, a maka kamiū ga napano kuvijevio.³⁷ Ver kamiū tai ber ĩeli naio be toro na verial Atua kiano iliano, ĩeli naio be toro napano jidomii jo jakii mārabo na Niununo Lu mila meravo banio, naio bo, mia ver jibe na beriano, mia naio monoka rivitilubar ka vite nalo napano nojo nojiri kakario ban kamiū, abe Tubo kiano ilirianiano.³⁸ Mia ver naio maka vitolubarario ka kiaku tirikariano nalo abe Tubo kiano ilirianiano, mia kamiū kuvijamo ka re rimāu vija kamiū.

³⁹ Bo ga, kamiū monoka kuvisidomii vatitig kiaku iliano nalo, ka kuvisikili ka kuvijev moroano ka kuverial Tubo kiano iliano, mia ver

tealo amijev moroano ka ail sel iliano dolu napano Niu-nuno Lu jian banlo, monoka kuvituko vio re ka nalo ku-ver ala re.⁴⁰ Mia ver ala nina, ĩeli venia bereio, mia monoka ala vite nonovio takii mārabo napano bo a memedu.

15

Jikili ju bere den māriano

¹ Bilbilu nalo, kiniou nojidom noverii bereio Ioluano Vou nei napano nebinime i nomioliolu ka ban kamiū ruei, napano kumijevio, kumitu kumitua kirisikili eaio, ka rila tiniemiu bobogia re.² Ioluano Vou nei naruei napano ver kuvitu kuvokar sikili rivu kia ga, naio to rila kamiū kuvokar kenemiu ioruriano. Mia ver maka bunu kuvokar sikili ve verare ka venia napano nomioliolu ka ban kamiū, ĩeli ver kuvilig van ve dolu, nioti nene ber kumonmonea beamu na ka iakurano ga.

³ Ioluano Vou nei napano ajian ban kiniou nua beamu, naina naruei nemijevio, neberialio ban kamiū. Kiano iliano na tortoru nalo aberii Kristo, napano naio mila be verare ga ka Tirikariano Moruo berialio nua ruei ka mia naio rilaio, bogo napano naio maka rime i vo. Ban jibe nei, ber Kristo, naio mārabo kito kar kiado kariano nalo,⁴ karina amidu naio joa buluvae, mia iorou ka kiano bogoti tolu nene naio jumolu meul bereio,⁵ a iorou ka

naina naio miyotuba beamu kean Kevas mirano, karina, miyotuba bereio kean nalo duelimo ba juo [12] miralo.

⁶ Kar iorou ka naina, bogo tai naio miyotuba bereio kean taara tai na namoneano nalo miralo, jovulu toromomou jimo [500], napano miroano ka nalo ameul kia bokar banei, mia tealo amarmaro ruei. ⁷ Bisi na, naio miyotuba bereio kean Yemesi mirano, karina miyotuba kean atevi nalo miralo, ⁸ a iorou ka nina ban bereio ea vio mave. Kiniou maka noto ka bogo na, mia siva toru napano kario, Tubo miyotuba vaarakurano bereio, napano naina maariano laka, miyotuba kean miraku.

⁹ Maka nememedu ka naio rila tibe na van kiniou, bior napano ea atevi nalo nonovio, kiniou nojo yetano kanio, a maka navare ka sio na leleio, bior napano nua, kiniou naruei nojo nomijil nalo na taara na Atua kiano namoneano nalo.

¹⁰ Mia Atua be tiniememi toru ban kiniou, bitirilar kiniou ea vio nei napano nojoaio vonganei, a naio be tiniememi ka kiniou jibe na bior titai, bior napano nela kiano imauano telabo na tortoru. Ee, p̃eli nemijikia never ka nemila imauano nalo jovulu nalo dolu nonovio, mia maka kiniou napano nomim̃au, mia Atua kiano tiniememiano nei naruei napano joa kiniou, naio naruei mila imauano jel ea kiaku

meuliano. ¹¹ Mia maka noto nosidomii laka never nomim̃au jum̃abe, p̃eli atevi dolu nalo amim̃au jum̃abe, mia vite na toru na jibe na, ka kumemi numiololu ka Ioluanou Vou ban kamiū, a kamiū kumoneaio.

¹² Naruei bogo napano numiololu ka ban kamiū jibe na, nuberialio meravo vatitig nuber Kristo, naio m̃aro, mia karina meul bereio. A bior napano numila jibe na, nomiilo toru ka nomijog ka kamiū tealo aju aberver bogo napano ramarm̃aro, ativin kito, a mia ram̃aro bo garuei, maka rojikia romeul bereio bogo tai. ¹³ Jidomiano na maka rimemedu, bior napano ver atu aver ka maka toro tai rijikia tumolu bereio, nioti nene berinavo Kristo bunu maka tumolu bereio. Mia maka leleio, Atua bitirilar naio meul bereio ruei. ¹⁴ Ver naio vitirilar re Kristo, rila na numitu numiololu ka Kristo ban kamiū ka kurano, a kamiū bunu, kumonea naio ka kurano ga. ¹⁵ A ver tibe na, rila na bogo napano numiololu ban kamiū nuber Atua bitirilar Kristo meul bereio, p̃eli numila sibi toru ea Atua siano, p̃eli numitu nuberloglog kamiū ka vite tai napano maka ve riano. ¹⁶ Ver be riano ka toro napano m̃aro maka rijikia rimeul bereio, nioti nene ber ka Kristo bunu maka rijikia rimeul bereio. ¹⁷ A ver Kristo rim̃aro to kia ga tibe na vo,

nioti nene ber kenemiu viek-ouoiano be kurano, a bere-nio ka kenemiu kariano nalo aju keano ea kamiu. ¹⁸ A bunu, ver Kristo rimeul re bereio den namariano tibe nei, nioti nene ka kiado bil-bilu nalo napano amonea mia amarmaro ruei, aban ea vio kouo ruei, bior napano maka toro tai napano rijikia rilarurlo. ¹⁹ A verver kiado moneano ea Kristo mijikia rijai kito ea yetemeriba nei ga, mia maka rijikia rijai kito ka bogo napano romarmaro eaio. Ver Kristo maka rijikia rilarur kito ea bogo napano romarmaro ea yetemeriba nei, mia rivova lie van kito, mia tiniedo riia kar kito mia tiniedo riia kar kito.

²⁰ Mia makanio, maka tibe na leleio. Nemijikia never rimemedu ka be riano, Atua mila Kristo meul bereio den namariano, a bitirilar naio jibe mariesi moti na namoneano nalo nonovio, napano ver ava kovio bogo tai mia Atua mijikia rilalo bunu ameul bereio den namariano. ²¹ Nua ea tikariano, toro moti nei Atam buru namariano binimei ea yetemeriba, mia vonganei, toro dolu nei Kristo mila meuliano bereio den namariano binimei. ²² Jakii venia napano Atam milaio, tomu nonovio na yetemeriba monoka amarmaro, mia jakii venia napano Kristo milaio, tomu nonovio na yetemeriba amijikia aleal meuliano. ²³ Mia vite nonovio be kialo bogo memedu, bior napano Kristo be moti ka jumolu

den namariano, mia kito namoneano nalo, mia rotu vo rivano-o vokar bogo na naio rimei bereio, naruei mia kito bunu rotumolu den namariano. ²⁴⁻²⁵ A kario ka ninei, mia naio rivar bulag niununo va bija simaro nalo na yetemeriba, a mia naio ve takurano rive parinio tubo ka vite nonovio rivano-o tovulu moroano va dolu nalo, atu yetano ka jaano. Kario mia naio sian nono navenatuboiano na vite nonovio rivan bere Atua karamano. ²⁶ A ea uolu nalo napano Kristo mia tuvululo ea bogo na, nina napano naio tuvulu maariano, nina vite nei na namariano, bija kiano moroano va nalo. ²⁷ Kristo monoka tuvulu namariano nei, bior napano iliano na beamu mave ber jibe na ruei, ber mia Atua ridu vite nonovio atu yetano ka naio. Naruei iliano nei maka river ka Atua ridu naio bereio to yetano ka Kristo, mia berii vite dolu nalo, napano mia Kristo tuvulu nonovlo. ²⁸ Mia bogo napano Atua ridu vite nonovio atutano ka Kristo tibe na, mia Kristo, tibe Atua kenerinio, ridu naio takurano bereio totano ka Atua, ana mia rila ka Atua naio ve takurano ve Atua ka vite nonovio.

²⁹ Navan ea bere iliano nei napano beriio ber ver kito ramarmaro, mia iorou rotumolu bereio. Ana tealo napano amonea jibe nei, aju ajidomii laka kialo bil-bilu nalo napano maka lele avaruei ealo ana amarmaro. Nalo aju aber peli nalo nei

maka ajikia ajev meuliano, mila na nalo abaruei bereio ea kialo bilbilu nalo na sialo, napano amarnaro ruei. Aju amila jibe na bior napano ga amonea jikili ka kito ramarnaro, mia rotumolu bereio.

³⁰ Mia be verare bunu ka kumemi. Ver kuvisidomii vonio ka venia numitu nubiviuo bogokouo nalo bogo nonovio, numitu nubar jogvaiano jibe na bior ga romonea jikili ka toro na m̃aro, mia mijikia rimeul bereio den nam̃ariano.

³¹ Ee bilbilu nalo, kumemi numitu numim̃au jibe na, nemijikia never memedu never kiniou nomijog jibe ka nojo nojuvan kiaku meuliano bior kamiu bogoti nonovio ga. Mia naina bo ga na, bior napano najaaro mia najaaro ka meuliano na kubokario bija kiado Tubo Yesu Kristo. ³² Mia bogo napano nojoa komeli na Eveso, veribinio nalo na vio nei ajibe ka kuli deden nalo, aju amiaboluo ka kiniou banbano-o, ana bior vaio nojo nojoko vio kalo? Nojo nomila jibe na, maka nejev vite na bo tai leleio na meuliano na yetemeriba nei, mia nojo nomila bior napano nojo nojidomii meuliano nei napano rime iorou.

Ver meuliano nei re, bo lie kito rotibe ka kulo dolu nalo ninio napano maka amonmonea, ana aju aber jibe nei, aberinavo "Banei, kito rola jokoluolu, rosidomii re vite tai, bior napano beni,

kei mijikia? Ver romarnaro, nina bisi naruei, mia maka rejikia vite tai!"

³³ Mia kamiu monoka kuvitakii re jidomiano vovu nalo tibe na, ver makanio, mia iliano dolu nei rime i rive riano ea kamiu, napano ber jibe nei, ber "Jau koiei vija bilbilu va nalo, mia kialo vovaiano rila niegeniege kiamo bajago novo." ³⁴ Kamiu monoka kuve masou, a monoka kuvituvan kenemiu kariano nalo. Neber jibe nei, p̃eli kuberiam̃a nemila niegeniege siemiu, mia monoka never ga, bior napano kamiu tealo maka ajikia vatitig Atua kiano m̃arabo na memedu nalo leleio.

³⁵ Mia ea tivelinio na meuliano bereio den nam̃ariano nei, mia tealo abika jibe nei, aber "Mia ala tomu nam̃ariano nalo atumolu bereio tum̃abe?" Peli mia avika tibe nei aver "Nalo napano amarnaro kirisiou ruei, mia atumolu bereio vija mokotenalo nalo na jum̃abe bereio?"

³⁶ Mia vikadeniano nalo na jibe nei, abe toro kiano vikadeniano napano maka jikia vite. Ver rosidomii kurukuti likiliki nalo napano roju romebijaio, mia rojev verdopeiano nene. Bogo napano jau komebija kurukuti na vite tai ban ea borotano, komijikia ruei ka mia kurukuti nene monoka riminunu, monoka rim̃aro, mia iorou, mia toti vou mijikia moluo eaio. ³⁷ Vite napano komebijaio, naio

be kurukuti tai ga napano mia toa borotano, mia vite napano mia rimoluo rive terivou bereio, naio be todolu tai. ³⁸ Jibe napano kojo komebija kurukuti kinkin nalo, naruei Atua mila abe kialo toti vou kinkin nalo, ³⁹ a beverare bunu ka tenalo napano ameul, napano mokotenalo nalo abe ve dolu kalo. Sunbue dolu tai joa toro mokotenano, a temeul nalo na tano, na tei, ĩeli na vio yauo, nalo abe kialo sunbue kinkin nalo. ⁴⁰ Ana temeul nalo nei, mokotenalo kinkin nalo abe dolu laka ka mokotenano vite kinkin napano aju tiniabene, ⁴¹ jibe mĕrenio, a siberio, a mĕrvitano nalo. Ea nalo tolu nei, tai mirano dolu ka tai, a be verare bunu ka tivelinio na mĕrvitano nalo, napano tai, mirano dolu ka tai.

⁴² Mia vite nalo nei nonovio, romial ka Atua mila abeve dolu laka, a tena jibe kijokijo tai na mokotenado vou, napano kito napano ramĕrmĕaro, napano romijikia rodu bogo ka rotumolu romeul bereio. Mokotenado rivan ea bulukuĩili na borotano, tibe kurukuti tai napano amebi-jaio, napano monoka riminunu, mia iorou, mokotenado vou napano riyotuba, mia maka rijikia rimeĩ riovva bogo tai. ⁴³ Mokotenado napano ban ea borotano, romialio bova, a buru kokorovio, ana mokotenado vou napano riyotuba iorou, mia roialio kirinovo, jikili

vatitigio. ⁴⁴ Vite napano van ea borotano, naio be terati na kito ea tivelinio na mokotenado ga, mia vite napano riyotuba iorou, naio be terati na kito ea tivelinio na niunudo. ⁴⁵ A bunu, romijikia rosidomii toro moti nei napano Atua jiio, napano be Atam, bija Atam na maariano napano midu joa yetemeriba, napano be Kristo. Iliano tai berenio ber Atam, Atua jii naio binimeĩ bija mokotenano tai napano meul, ana Kristo, Atua miila naio binimeĩ bija niununo tai napano be burupati na meuliano.

⁴⁶ Jakii nina, romial ka vite na tivelinio na mokotenano, binimeĩ beamu, mia vite na tivelinio na niununo, binimeĩ maariano. ⁴⁷ Toro na beamu nei Atam, Atua mijilar naio ea borotano na yetemeriba nei, mia toro juo nene nei Kristo, Atua miilalar naio ea vio mave binimeĩ. ⁴⁸ Naruei kito tomu dolu nalo, kito napano robe na yetemeriba nei, romidu toro moti na yetemeriba nei kiano bajago, mia kito napano robe na vio mave, romidu nana binimeĩ ea vio mave kiano bajago. ⁴⁹ A kito napano romonea, beamu romidu toro na yetemeriba nei mirano, mia vonganei, romidu toro na vio mave mirano. ⁵⁰ Bilbilu nalo, tenalo napano maluvo ea yetemeriba ga, jibe ka mokotenado, maka rijikia riva joomo ea Atua kiano navenatuboiano mave, a tenei napano mia rivakovio,

maka jikia riva rivokar vio napano mia to tobo to.

⁵¹ Ana mia tumabe ka namoneano nalo napano ameul kia ea bogo napano Kristo rimei bereio? Vite na, tomu miroano maka ajiki-aio, ana mia kiniou neberii memedu ban kamiu. Ee, be riano ka kito namoneano tealó mia ramarmáro re ea yetemeriba nei, mia ea bogo na, vaarakurano ga, tibe vio bijio, niabedo viligio.

⁵² Jibe ka napano rojeta-voko mirado bogo bulati kirisofeli ga, mia rotabujo ka vaarakurano ga simeduo rivio, a mia namoneano nalo napano amarmáro ruei mia atarabujo ameul bereio vija mokotenalo vou, a kito bunu napano romeul kia ea bogo na, mokotenado bunu rive terivou. ⁵³ Mokotenado moruo monoka riviligio tibe na, bior napano tena borotano monoka rimei rive tena vio mave, a tena marioano monoka rimei rive tena mia rimeul tulaka.

⁵⁴ Mia bogo napano kito rojev mokotenado vou tibe na, mia rila iliano tai na Vivitauiano Moruo rimei rive riano laka, napano berinavo

“Meuliano na Atua kiano moroano bar bulag moroano na marioano nalo.” Ais 25:8

⁵⁵ Ea bogo na, mia kito reielkuei vite nei marioano, rover tibe nei, rover

“Mariano, jau kojidom koto mave, mia vonganei kiamo sebi mario garuei.

Kiamo marmarbutoto ka tulu kumemi jo be vonganei?” Osea 13:14

⁵⁶ Mia kito roil tibe na bior ka tubo-iano napano jo, naio jian moroano ban bajago na kariano joomo ea kiado meuliano, napano mila na robinimei jibe tomu na lakokorov tuboiano, a bajago na kiado kariano nei jian moroano ban marioano na jibe marmarbutoto napano mijikia tulu kito ramarmáro.

⁵⁷ Mia siva toru ka Atua, bior napano naio mila kiado Tubo Yesu Kristo napano mije loa moroano na tuboiano a moroano na kariano a moroano na marioano, mila robokar meuliano nei napano maka rijikia ribisi bogo tai.

⁵⁸ Bilbilu novo nalo, bior napano Atua mila kirinovo ban kito jibe nei, kamiu kuvitu sikili, kuvikulkulu re tanea vio, a kuvikar rivu ka kuvimau Tubo kiano vija kenemiu moroano momou. A bogo na kumitu kumila jibe na, bo ka kuvitu kuvisidomii ka kenemiu imauano nei maka tena iakurano, ana mia monoka rivar marmarati tibe napano Tubo naio jidomio.

16

Veru na asuvanio van namoneano nalo na vio Yerusalemo

¹ Kiniou nojidom nesian iliano tealó van kamiu ea tivelinio na kuvarbijio veru

na ka rijai tomu na mon-
eano nalo na Yerusalemo,
napano abiviuo bogokouo,
abe talimāsa laka ea bogo
nei. Nejian iliano jibe na
ban lotuano nalo reraio
ea tanobuku nei Kalesia
ruei, mia vonganei nojidom
neverial ka kamiū bunu.
² Nojidom never tibe nei,
ka kuvitu re ga tibe na
kario kuvisuvan veru bogo
napano noyotuba kean
kamiū, mia nojidom ka tikar
vonganei, ea bogoti moti
na sude nonovio, kamiū
veve terakurano monoka
kuvar torogio ve telisu na
venia napano kumijevio,
a monoka kuvar vatitigio
tu. ³ Mia bogo napano
neviedu, mia rotikar ka
rovarvar veru nalo nene
rimei vio takurano, a mia
kuvitan ea kamiū tealo ka
avar jidomiano nei riva
Yerusalemo. A mia kiniou
novivitauiā mēsi nalo tai ka
avario riva van namoneano
nalo na yako, ka verial
kamiū vanlo. ⁴ Maka nejikia
vo mia bo ka kiniou vijalo
peli makanio, mia neial
vonio tena iorou.

Pol kiano m̄arabo

⁵ Bo ga, kiaku m̄arabo
jibe nei, ber kiniou no-
jidom nesel ea tanobuku nei
Masetonia beamu, a karina
mia noyotuba kean kamiū.
⁶ Maka nejikia vatitig vo
ka mia noto vija kamiū ri-
vokar bogo vaio, ana nojo
nojidomii ka noto vija kamiū
ea bogo na niavo napano
ju ka rimei, a kario ka

nina, kumijikia kuvitii kin-
iou bereio ea kiaku m̄arabo,
ka navan ea vio vabe bereio
na navan eaio. ⁷ Maka
nosidom nesel ea kamiū
vonganei napano nojo naba
Masetonia, bior tibe na mia
noto bogo ve telisu laka,
ana mia navan yako beamu,
karina neviedu, bior ver
Tubo rijamo, nojidom ka
noto vija kamiū vesiou kija.
⁸ Vonganei nojo Eveso, a mia
noto kea ea vio na navo,
rivokar bogo na Jokoluolu
na Marayuvi Vou ribisi. ⁹ Be
bogo dulu miroano laka kia
ga ka nala im̄auano novo ea
vio nei vo, a vite tai bunu,
mia uolu nalo miroano ajua
vio nei, mia maka nejikia
mia netaluvo den vio nei
nagi.

¹⁰ Ver kamiū kuvial na-
pano Timoti riyotuba kean
kamiū, neber bo, kamiū ku-
vijuku rivu ka naio, kuvila
rijog rivu ka to vija kamiū,
bior napano naio jo mila
Tubo kiano im̄auano, bev-
erarei ka na nojo nemi-
laio. ¹¹ Kamiū kuvituvan re
ka tomu tealo avitii rivova
ka naio, ana mia kuvitkar
vatitig naio ea bajago na
tum̄aro, karina kuvidu naio
toa kiano m̄arabo ka naio
mijikia rimei ea kiniou rivu,
bior napano nojo rorea naio
bija kuruado dolu nalo ka
asel ea vio nei.

¹² Ea tivelinio na kuruado
nei Apolos, nebika kirisikili
ban naio ka takisor kuruado
dolu nalo nei ayotuba kean
kamiū, mia kiano jidomiano
kirisikili ka nina maka kiano

bogo rimemedu ka rimei. Ana verver ve kiano bogo, ƣeli mia naio riviedu vonga iorou.

¹³ Bilbilu nalo, vaataro ka kiaku iliano ribisi, mia nojidom nover ka kami u ka kuvitikar vatitig kami u, kuvitu sikili vatitigio ea kiado moneano, kumemebiju re ka vite ninio, a kuvisikili. ¹⁴ A vite nonovio napano kumilaio, monoka kuvilaio ea bagago na tinietiano.

¹⁵ Bo ka kami u kuvitilubar Stevanas nei vija kiano torogio nalo, vija iŋauano napano aju amilaio. Ea tomu nonovio nalo ea kenemiu tanobuku nei Akaia, nalo na naruei napano abe moti ka amonmonea. Mia karina, iorou ka amonea, aju amila iŋauano novo laka, aju amija namoneano nalo toru binime i bokar banei.

¹⁶ Tomu novnovo nalo jibe nei, bo ka kuvitiri bulaglo ka avuru ŋarabo ka kami u, a bo ka kuvatove bunu ka tomu dolu nalo napano kumiŋau vei bijalo.

¹⁷ Stevanas nei jel ea vio nei ruei, naio binime i bija Vojunatas naljuo Akaikas, a nejaaro toru ka nalo tolu. Nalo aju amija vatitig kinio u ka vite telabo, beberare ga ka napano kami u bunu kumijikia kuvila ver kami u kuvitua vio nei. ¹⁸ Nalo tolu nei amila bo ban kami u ruei, mia bogo na abinime i ea vio nei amila kinio u bunu nomijog bo laka, amidular kiaku jidomiano. Bo ka kami u

kuver siva ve toru vanlo bior kialo iŋauano jibe na.

¹⁹ Lotuano nalo reraio ea tanobuku na Esia, aberinavo aju ajidomii kami u laka. A kiado bilbilu juo nei, Akuila naio koano Prisila, bija taara na lotuano na ea kunualo, nalo aber kavijo bo ƣeli bogiano bo ban kami u ea Tubo siano. ²⁰ Kiado bilbilu nalo ea vio nei ajaaro ka aviviuo kami u ea ŋesi nei, a kami u bunu, bogo nonovio napano kuviviuo kami u, bo ka kuvitu kvanjumemiu van kami u a kuviniomo babibiniomiu, ka kuvisaaro ka kami u vija jidomiano novo.

²¹ Mia jikar ea vio na telisu nei, kinio u Pol nojo nobokar vovojulu nojo nobivitau ka nesian kiaku iliano maariano van kami u. ²² Kami u monoka tiniemiu tii Tubo ve riano, ver makanio, toro napano maka tinien tiio, verikariano na ŋariano joa naio. Nojo nobolkouo jibe nei, neber Tubo Yesu, neber bo jau komei soƣeli, ²³ a nojo nobolkouo bior kami u bunu, ka Tubo Yesu kiano tiniememiano to vija kami u. ²⁴ A jibe bogo nonovio, nemijikia never ea Kristo Yesu siano ka kiaku tinietiano ban kami u toru laka ju.

Kiaku ŋesi maaro ga ea vio nei,

Kinio u, Pol.

Mesi Juo Napano Pol Bivitauiaio Ban Namoneano Lu Nalo Na KORIN Verialiano Moti

Tukunuano bulati na niosi nei

Mesi juo nene nei napano Pol jirio ba ban namoneano nalo na Korin, naio jirio ea bogo napano binua bogokouo bija namoneano nalo ea yimo lu yako Korin, napano nalo tealo tiniel jer naio laka, ana amilkuei keano naio. Mia Pol berloglog kalo ka naio jo jidom jikili ka rila vatitig vovaiano nei, ka rila mia naio vija nalo amijikia ave bilbilu vatitig bereio. Mia iorou, bogo napano abe bilbilu vatitigio bereio naio berial banlo napano naio jaaro mia jaaro.

Ea mēsi nei togio beamu, Pol berii bior vaio naruei naio mil jikili laka banlo ea mēsi tai napano bivitauia ba banlo. Mia naio ber kalo napano naio jaaro laka ka mijog napano nalo amijog kiano iliano, ana abilig kialo jidomiano ka kialo kariano, a amila vatitig vovaiano nei napano joalo, mia abe bilbilu vatitig bija naio bereio. Mia iorou, naio ber kalo, ber monoka asuvan veru ka asian van kialo namoneano bilbilu nalo na Judia napano nalo maka ve kialo saba.

Ea mēsi nei togio maariano, Pol milkuei jikili ban tomu tai na Korin napano aber ka nalo abe atevi riano mia nalo aju amila bulag namoneano nalo na vio na bija kialo verloglogiano napano maka rimemedu. Nalo aju aber ka Pol maka ve atevi riano, mia naio mil kirsikili ka tukovio kalo, a berial ka naio be Yesu kiano atevi riano.

Torogio nalo na niosi nei

Iliano moti 1:1-11

Pol bija namoneano nalo na Korin 1:12—7:16

Veru napano ka riva van namoneano nalo na Judia 8:1—9:15

Pol berialio ka naio be atevi riano 10:1—13:10

Iliano maariano 13:11-14

Iliano moti

¹ Bilbilu nalo, kiniou Pol bija kuruado nei Timoti, kumemi juo numisaaro ka nubiviou vija kamiu bereio ea mēsi nei, nina kamiu ea Atua kiano yimo lu, ea komeli na toru na Korin, bija kamiu namoneano lu dolu nalo napano kumitu janea vio ea burumāra tanobuku nei na Kris.

Ea kiano verikariano, Atua bitirilar kiniou Pol ka nemei tibe Yesu Kristo kiano atevi tai, mia vite telabo ka noverialio van kamiu ea mēsi nei, mia beamu ka nina, ² neber jibe nei ka kiaku volkouano ka mia karamādo Atua bija Tubo Yesu Kristo, naljuo atuvan kialo tiniememiano a tumāroano toa kamiu nonovio.

Pol ber siva ban Atua bior kiano tinievuiano

³ Kiniou nojidom noilivu laka van kiado Atua nei napano naio be kiado Tubo Yesu Kristo karaniano, a naio be teta novo tai napano be burupati na bajago na tinietiano, a naio be Atua novo napano bujo ka bajago na ililupilupiano.

⁴ Bogo ninio napano kito robiviuo bogokouo, Atua jo mililupiluŋi vatitig kito, ana mila kito rojikili bereio. A kario, romijikia rodu bajago na ililupilupiano napano naio mila ka kito, rolaio kija van kiado bilbilu dolu nalo napanoaju abiviuo kialo bogokouo nalo, rojalo tibe na.

⁵ Be riano laka ka bogo telabo roju robar jogvaiano nalo beberare ka Kristo bario, mia naio mila na romijikia rovar bunu kiano ililupilupiano novnovo nalo.

⁶ Mia bogo napano nubiviuo bogokouo nalo, numijamo ka ga, ka rila ka kamiukumijikia kuvijog rivu a kuvijikia kuvijev meuliano. Mia bogo na numialio ka Atua mililupiluŋi kumemi, naio bunu bo laka, bior napano mila ka numijikia nuvililupiluŋi kamiubereio, a numijikia nuviija kamiuka kamiukuvila kenemiu jidomiano ve tebievi ka kuvijikia kuvar dulu vovaiiano nalo napano kamiubunu kuvijikia kuviviuo.

⁷ Kumemi numisidomii venia napano kubar dulu

ruei, mila na ea tivelinio na kamiukenememijidomiano maka rimemebiju leleio, ka mia kamiutumabe. Nina bior napano numijikia vatitig ruei ka bekurano napano monoka kuviviuo jogvaiano veverare ka napano kumemi nubiviuo, a mia kuvijikia kuvokar burumara ililupilupiano ea Atua bunu, veverare ka napano nubokario ruei.

⁸ Peli kamiukuvijoglubar vatitig vo burumara bogokouo nalo napano kumemi nubinua bogo napano numitu numinau janea tanobuku na toru nei Esia, mia nemijikia never ka bova mia bova laka. Vite nalo teremi laka ka kumemi, maka nuware kalo, banbano numisidomii nuber nina naruei monoka nuviululuvati na kiado meuliano vonganei.

⁹ Ee be riano, numijog jibe napano ver toro na toru na komeli tai berial ka mia auebinvin kumemi, mia numialio ka bo laka, bior napano numial ruei ka maka nuvijikia nuvituvan kumemi ga bereio ka mia nuvisikili tumabe. Ea bogo na, numitu numidu kenememi meuliano joa Atua jumano ga, nubalea naio bior napano naio ga takurano be Atua napano mijikia rila toro napano mro binimei meul bereio.

¹⁰ A numonea naio jibe na, numial ka be riano, naio milarur kumemi, a vonganei kenememijidomiano jikili vatitig ka naio mijikia

rilarur kumemi bereio, maka rive vaarakurano ga, a mia naio to rila bogo nonovio.

¹¹ A kamiu monoka kuvija kumemi napano kuvisidomii kumemi bogo nonovio ea kenemiu volkouano nalo. Tibe na, bogo napano mia Atua rijog volkouano miroano nei, ana mia rilivu ka kumemi vatitig, rilarur kumemi den bogokouo nalo nei bereio, a mia kamiu ve miroano kuver siva laka vanio bior venia napano mia naio rila van kumemi.

Pol bervisivisii vatitig vite na mila naio maka bunu rime riel ealo

¹² Kumemi nubar jogviano nalo jibe nei, mia vite tai napano jo mila numijog bo laka ea kumemi. Nina jidomiano tai napano joa kumemi napano ber jibe nei, ber ea tivelinio na kenememi bajago kamu ea miremiu, a kamu ea tomu dolu nalo na yetemeriba nei miralo, kumemi numila vite nonovio be lu vatitig, a kenememi meuliano be riano vatitig, jibe napano Atua jidomio.

Maka numiñau vija jidomiano na yetemeriba nei, mia numiñau bija Atua kiano tiniememiano.

¹³ Vite nonovio napano nubivitauiio ban kamiu ea kenememi mesi nalo nei, nina vite nalo napano numijikia ka kamiu kuvijikia kuvulukuio, a numijikia ka kamiu kuvijikia kuvuluku lubario. Ana ver vite nalo tai napano kumitu

kumijikia beve torogio ga, nejidom ea bogoti nalo napano ju binime, mia kamiu monoka kuvila von kuvijog vatitig nonovio.

¹⁴ Verver tibe na, bogo napano kito nonovio rotu vio takurano ea bogoti na toru nei napano Tubo Yesu rime bereio, mia kamiu kuvisaaro laka ka kumemi, a mia kumemi nuvisaaro laka ka kamiu.

¹⁵ Mia bior napano nomi-jikia vatitigio ka jidomiano novo na jibe na ju iviso ka kito ruei, nojidom laka ka bogo napano nojo ka navan ea tanobuku na Masetonia, mia nomei ka namaluvo kean kamiu.

¹⁶ Riano, nojo nojidomiio ka nesel ea kamiu ea bogo ve va juo ruei, beamu ea bogo napano nojo nabano Masetonia, a juo nene ea bogo napano nojo nebinime bereio, napano neberiañia mia kamiu kuvitii kinio noto vatitig ea kiaku m̃arabo ka navan yako Yutea, mia be deio. Nojidom nola rivu ka kamiu tibe na, mia tibe napano kumijikia ruei, maka bunu nejikia nalaio.

¹⁷ Mia nejidom ka kamiu monoka kuvijikia vatitig ka bogo napano nojo nojidomii ka neviedu kean kamiu, naio be vite tai napano nojidom laka ka nalaio, napano kiaku jidomiano jikili laka kanio. Naio maka ve vite tai napano nobitoviton eaio, napano nojo nojidomiio ka navan

ĥeli mia navan re. Makanio, kiniou maka netibe tomu ninio napano maka kojikia komonmonea kialo iliano, ¹⁸ mia jibe napano kumijikia kumituvan ga Atua kiano iliano, kumijikia kumituvan ga bunu kenememi iliano. Kenememi “Ee” maka verenio “Makanio” ĥeli “tibe na kovio,” ¹⁹ mia bogo numitu nuberenio “Ee” be “Ee” ga. Kumemi monoka nuve riano tibe na, rila ka nuveverare ka Atua kenerinio Yesu Kristo, nina napano kumemi tolu Silvanus a Timoti, nubinimeĥi numioliolu ka ban kamiu nua ruei. Ea bogo na nuberial ka kiano iliano nalo abe riano bogo nonovio, bior “Ee” kiano be “Ee” bo garuei, ²⁰ a verikariano nonovio napano Atua berialio ruei ea tivelinio na Yesu, maka tai napano rimeĥi tibe sibiano, mia abiniu abe riano. Vite na naruei mila na bogo napano roĥu robolkouo ban Atua, ea kiano tikariano banbano-o bokar napano rober “Mm,” kito rotu rola ea Yesu Kristo siano. ²¹ Kristo na naruei napano numioliolu ka ban kamiu, a Atua ga bitiri bulag kumemi ka nuvila kiano iĥauano. A bija naina, Atua mila kumemi bija kamiu, kito robiniu robinimeĥi vio takurano ea naio. ²² Atua bijauia kito ka robe kiano, naruei naio jian Niununo ju joomo ea kito, jibe verikariano tai ka mia kitoliko naio ea bogo nonovio napano ju ka rimeĥi.

²³ Kiado Atua nei be riano bogo nonovio, a naio mijikia rijai iliano nei napano nojidom noverialio van kamiu. Jibe napano beamu neberio ruei ka mia noyotuba kean kamiu yako Korin, mia karina maka neviedu, a ĥeli kumisidomĥi niegeniege kiniou biorio. Mia nojidom noverial van kamiu ka naio maka rivior kiaku vite tai, mia bior kamiu ga, ka napano nemijikia ver neviedu, mia monoka neĥi sikili van kamiu rivior kenemiu bajago tealo. Mia maka nosidom ka mia nola kamiu kuvijog rivova, naina naruei mila na maka bunu neviedu. ²⁴ Kiniou nemil ban kamiu jibe na, neber bo ka kuvisidomĥi re kuver nuvisidom nuvitu loa kamiu, ka nuvidu tuboiano loa kenemiu moneano. Maka tibe na, mia kumemi numisidom roĥĥau vio takurano ga, ka rila kamiu kuvijikia kuvijog rivu bogo nonovio, kuvisikili kuvitu sikili rivu ea kenemiu viekouoiano.

2

¹ Jibe na napano nebereĥio, nua na nebinimeĥi beamu, tenalo tai napano monoka noĥi van kamiu rivorio, napano mila kamiu kumijog bova. Mia vonganei maka nosidom noviedu nala kamiu kuvijog rivova ve vaarakurano bereio, a jidomiano na naruei mila maka neviedu noyotuba kean kamiu na vo. ² Ver neviedu neĥi van kamiu, nala kamiu kuvijog rivova,

mia kiniou bunu monoka nojog rivova, ana bogo napano kito roviniu rojog rivova tibe na, mia maka bunu tai napano mijikia rijai tai ka rijog rivu bereio.

³ Jidomiano na naruei neberialio ea m̄esi tinene na napano nemijiano biedu beamu ruei. Kiniou nojidom ka kuvila von vovaiano nalo na rimemedu beamu ka rila ka verver bogo napano neviedu, mia maka bunu tenalo tai tu iviso kean kamiu napano mia monoka nojog rivova ka kamiu riviorio. Ana ver kamiu kuvila kenemiu im̄auano rimemedu, mia nemijikia neviedu neialio napano kubinimei bo bereio ruei, mia tibe na, nasaaro laka, a mia kiaku saariano nene rila kenemiu saariano bunu rive toru laka.

⁴ Neber jibe na bior napano bogo na nebitau biedu ban kamiu nua na, nomijog bova laka garuei. Nomijog jibe kiaku iviso vaatara vuru kokorovio, a jogumiraku aju ajibiribil. Ilano na jikirkili nalo napano neber ka kamiu ea m̄esi nei, maka nala rivior napano nojidom ka nala kamiu bunu kuvijog rivova, mia nojidom nala ka kamiu kuvitilubar ka kiniou nojo tinieku jii laka kamiu bogo nonovio.

⁵ Naruei jibe napano kito nonovio romijikia, toro tai jo iviso ka kamiu napano naio mila burum̄ara jaleleano nei. Nojidom never ka jaleleano napano naio milao,

mila kiniou nomijogio bova, mia maka kiniou ga, mila kamiu miroano kumijog bova bunu. Mia maka nosidom never ka kamiu monoka kuvijev vironiano laka van naio bereio, ⁶ bior napano nemijikia ka kamiu nonovio kumil ban naio ruei. ⁷ Kamiu kumil ban naio bare bo naruei, mia vonganei be kenemiu bogo ka kamiu kuviekokoaio, tiniemiu rii naio bereio. Ver makanio, mia naio rijog rivova laka bereio, rivano-o rivova ka naio. ⁸ Ee, nejikili ka nebika den kamiu jibe na, ka kamiu kuvila meravo rivu van naio ka kamiu tiniemiu jii naio keano vo.

⁹ Kiniou nejirii m̄esi dolu nei nua na, nojidom nevitii veveio ka mia kamiu kumisaaro ka kumonea kiaku ilano nalo napano juaio, p̄eli makanio. ¹⁰ Bogo napano neber bo ka kuviekokoa toro tai, nomonea ka mia kuvilaio, a nana napano kubiekokoaio, kiniou bunu nebiekokoaio. A maka nejikia, p̄eli naio mila vite nalo tai bova kean kiniou bunu, mia kiniou najaaro ka noverial ea Kristo mirano ka nebiekokoa naio, a tibe na, rijai kamiu bunu ka kuvisaaro ka kuviekokoa toro dolu. ¹¹ Kito monoka rovitikar vatitig bior napano romijikia ruei Sim̄aro kiano jidomiano va nalo ka rila bulag kito, ana ver rotu roviekokoa kito bogo nonovio, mia naio maka rijikia tuvulu kito leleio.

Pol berii kiano m̄arabo ka

rivan yako Troas bija Masetonia

¹² Ana bogo napano maka bunu neviedu kean kamiu yako Korin, naba nomioliolu ka Kristo kiano Ioluanu Vou ea komeli na Troas, a ea vio na, nemial jibe m̃aratavo betavo bo ban kiniou ka nala Tubo kiano iṃauano.

¹³ Ana vite va tai ea bogo na, nojidomiio ka mia neial kuruaku nei Taitas ea vio nene, mia naio maka to. Ana kiaku jidomiano jidom dede laka ka naio, mila na maka vesiou nojuvan nalo nei, nojoa kiaku m̃arabo bereio nemijaka ea tanobuku na Masetonia.

¹⁴ Kiaku ieliano ban jibe nei naruei, mia siva toru ban Atua, bior napano bogo nonovio naio ji Kristo ju ka vuriṃarabo ka kito. Beamu, kito robe kiano uolu ga, mia naio buru bulag kito ruei, ana rotakisor naio ravan ea vio nonovio, ana bogo na tomu nalo aial kito, mia avitilubario ka Kristo naio be kiado Tubo. Peli nemijikia never tibe na, kito rojibe ka bonotanunu novo tai napano amisebi, napano jo miou janea vio reraio, ana bogo na tomu nalo amijugunio, mia amijugun lubario ka Kristo jo moluo ealo.

¹⁵ Atua mila bonoti nene ban ea tomu nonovio, ba bokar nalo napano aju aban ea m̃arabo na ioruriano, a ba bokar nalo napano aju aban ea m̃arabo na nakovioiano.

¹⁶ Ana ea nalo napano aju aba kovio, bonoti nene bova

jibe vite tai na m̃aro joono, mia ea nalo napano aju amijev meuliano, naio jibe bonoti novo na tanunu na meuliano.

Nina naruei romial ka iṃauano na numitu numilaio, naio be iṃauano na toru tai, bior numioliolu ka Atua kiano iliano napano rijikia rila ka toro rijev meuliano p̃eli rijev m̃ariano. ¹⁷ Verialiano tealó dolu maka asidomiio ve temi ka iṃauano nei, nalo aju amioliolu ka Atua kiano iliano amila von ka ajev veru eaio ga, mia kumemi maka tibe na. Atua bitiri bulag kumemi, a nimiṃau ea vio medave kamu ea mirano, nuberloglog Kristo kiano ilirianiano nalo, ban tomu dolu nalo maluvo ea moroano napano naio jian ban kumemi.

3

Kumemi nube tomu na nuvila iṃauano na verikariano vou

¹ Kiniou neberii kenememi iṃauano na toru mave nei, maka rivu ka kuver p̃eli numitu numil m̃arou jibe naverloglogiano sibilisibiano dolu nalo nei. Nalo na abinimei ea kamiu bija m̃esi nalo napano aberiilo ana aber ka monoka kuvivitau ea m̃esi nalo tealó bereio ka averii kialo iṃauano, napano amijikia avario avano. Mia ver kumemi nuvisidom nuvan ea vio dolu tai, maka nuvisidom m̃esi ninio tai na jibe na ka verial kumemi.

² Ver toro tai jidom rijikia

ka kumemi jum̃abe, bo ka rimeĩ rĩal m̃arati na kene-memi im̃auano ea kenemiu meuliano nalo ga. Kamiu na jibe m̃esi tai ruei, napano Kristo ga bivitaui berial kenememi im̃auano. Tomu dolu nalo amijikia amei avulukuio, ka ajikiaio venia napano naio jirio ea kene-memi iviso nalo. ³ Mia aial kamiu jibe kamiu m̃esi tai napano Kristo jianio, a kumemi nubario binimeĩ, a mia ajikia avitilubario ka be riano, numila im̃auano ea kamiu bo laka. Mia m̃esi nei maka m̃esi napano uei na vovojulu jirio ea m̃ati niosi, mia be m̃esi napano Atua kiano Niununo jirio ea toro kiano iviso.

⁴ Jibe na, kiaku iliano nalo nei maka ave ilimoruioiano, mia kumemi numijikia nuvil tibe na bior napano Kristo ga naio mila napano nubalea ga Atua toru laka. ⁵ Verver kumemi ga, mia maka nuvijikia nuver ka nubare ka nuvila vite tai, bior napano vite nonovio na numilaio, Atua ga mila na nubare ka nuvilaio. ⁶ Naio naruei jian moroano a jikiaiano ban kumemi, mila kumemi nubinimeĩ nube tomu nalo na kiano im̃auano ea tivelinio na verikariano vou napano naio mila bija kito tomu nalo na yetemeriba. Verikariano na beamu, ajiri bulag kiano iliano nalo ea niosi lu nalo na Mosis kiano tuboiano, mia iliano nalo nene amijija kija kito telisu mia maka rivare. Nalo abo, mia venia napano amilaio, amilaio

meravo ga ka kito tomu nalo na lakoroviano na tuboiano, napano mia monoka ro-viviuo m̃ariano riviorio. Mia verikariano vou, kiano iliano nalo amaluvo ea Niununo Lu, a Niununo nene naruei mila kito romijikia rojev ioruriano.

⁷ Marabo moruo re nua nene, napano aje kiano tuboiano nalo ea subaveru nalo, naio jo berkar m̃ariano ga ban kito, mia be vite lu tai laka. Bogo napano Mosis ba bar subaveru nalo nei, Atua kiano mermerano binimeĩ eaio, ana bogo napano bar veru nalo nei ban tomu nalo na Israel, moroano na mermerano nei jo bavatove ruei, mia nalo maka ajikia avitii mirano bior napano merera mia merera kilkil laka. ⁸ Jibe na, ver Atua kiano mermerano mim̃au kirisikili ea bogo napano aberial m̃arabo na avokar m̃ariano, mia rim̃au tum̃abe ea bogo napano mia averial m̃arabo na avokar meuliano? ⁹ Mia Atua kiano mermerano monoka rim̃au ve toru laka garuei ea bogo na, a kito roju romial ruei napano miamoiano na m̃arabo vou jo merera janea vio, jo juvulu miamoiano na m̃arabo moruo nei napano jo batove ruei. ¹⁰ Ee, miamoiano na m̃arabo moruo nei merera vatitig nua, mia vonganei, romialio ka kiano miamoiano jibe ka maka bunu merera vatitig leleio, bior miamoiano na m̃arabo vou mijedulu, jo merera toru laka ea

vio nalo. ¹¹ Miamoiano napano jo batove nei, be riano ka naio binime beamu, binime bija kiano burum̃ara mermerano. Mia vongañei, miamoiano vou napano binimei vonga iorou, mia naio to tulaka, a kiano mermerano toru laka garuei.

¹² Ver kito rosidomii nina, mia rila kiado jidomiano sikili vatitig, a romerou re ka rala Tubo kiano miamoiano rimerera ea vio reraio. ¹³ Mia rosidomii

bunu tormoruo Mosis, napano bavin ea burusuku, ana Atua binimei vaataro kanio, mila mirano merera laka. Mia maka rivu ka rotibe ka naio, bior bogo napano naio batove binimei bereio ea tomu nalo na Israel, naio jovuko mirano bija kulum̃arauo ka aialio re, vano-o rivokar bogo na kiano miamoiano to rivatove rivano-o ribisi. ¹⁴ Ea bogo na, makalele aial miamoiano nene, bior napano pariparilo kirisikili laka, mia romial bokar banei, ajibe na kia bunu. Nalo aju abuluku iliano nalo na niosi moruo napano aju, mia jibe napano kulum̃arauo nene jo keano, jo joko kialo jidomiano. Mia ver amonea Kristo ga, mia naio mijikia ridular kulum̃arauo nene ka ajikia avitilubar kiano miamoiano vou. ¹⁵ Bogo napano abuluku Mosis kiano Tuboiano, jibe napano vite tai jo jeta-voko pariparilo, ¹⁶ mia bogo napano toro tai binimei ea Kristo, amidular vite na napano joko kiano jidomiano,

ana naio mijikia rivitilubar vite. Jibe ga iliano na Vivitauiano Lu nalo napano berii tormoruo Mosis nene, berinavo “Bogo napano Mosis bilig naio bitikar Tubo, kulum̃arauo nene jaluvo den naio bereio.” ¹⁷ Ana bogo napano iliano nei ber ka Mosis bilig naio bitikar Tubo, iliano nei Tubo jo ber ka nina napano Atua kiano Niununo Lu. A kito romijikia ka vio vabe Atua kiano Niununo joaio, tomu nalo amijikia ataluvo den moroano na vovaiano, ana amijikia ajev meuliano.

¹⁸ Jibe na, kito nonovio napano romonea ruei, maka bunu kulum̃arauo tai to toko mirado, mia roju robittii memedu burum̃ara Atua kiano mermerano. A bogo napano roju robittiio, Atua kiano mermerano nene jo binimei bujovujo ea kito bano napano robinimei jibe mermerobi ka merera bulag kiano miamoiano van tomu dolu nalo. Mia miamoiano nene maka taluvo den kiado meuliano, miyotuba den kiado Tubo, napano naio be Niununo na napano joa kito.

4

Pol naliko atevi nalo amiololu ka miamoiano na Ioluanou Vou

¹ Kumemi numitu numerera bulag Atua kiano miamoiano jibe na, naio be kenememi iñauano na toru tai ka nuviija tomu dolu nalo. Atua kiano iviso bujo ka tinievuiano, a naio

naruei jian iñauano nei ban kumemi, a bogo napano numisidomii nina, mila na maka lele tiniememi maro ka nuvilaio. ² A bogo napano numiñau, numitu numiñau memedu bo bogo nonovio. Tomu tealo amijikia amimñau lukluk bena ga na amila sibisibiano ga ka avuru tomu nalo kialo jidomiano, a amijikia bunu aviligvilig Atua kiano iliano riva rive dolu, mia kumemi maka nuvila bajago kinkin nalo na jibe na. Kumemi numijikia ver bogo na numitu numiñau, numitu numila ea Atua mirano, ana monoka nuvila vatitigio. Tomu nalo dolu bunu aju abitivitii kenememi iñauano, a aju amijog bo kanio, bior napano aju abitilubario ka numitu nuberial Atua kiano ilirianiano nonovio nalo me-medu ga.

³ Kumemi numioliolu jibe nei, maka toro tai napano mijikia river ka naio maka rijikia rijogkar Ioluano Vou napano numitu nuberialio. Mia ver tai river ka maka meravo ka naio, nina maka tai napano jo barlaka ka legiano, mia monoka tai napano jo barlaka ka melijokouo ga, napano monoka ve vite tai ka toko kiano jidomiano, jibe kulumñarauo neibano roberiio ruei. ⁴ Ea tivelinio na nalo napano maka amonea vo, tubo va na yetemeriba nei naio jetavoko kialo jidomiano ruei, naio milalo jibe abe merebono, bior napano naio maka sidom ka avitii burumñara miamoiano na

Kristo kiano Ioluano Vou. Kristo nene kiano mermerano merera laka, bior napano naio bar mirano Atua ga memedu. ⁵ Kumemi numitu numioliolu ka nina naruei, ninei Yesu Kristo, kiado Tubo. Maka nuvitu nuvidular kumemi ka kamiu bereio, mia kumemi tomu na iñauano na kenemiu ga, ka nuvioliolu ka Yesu van kamiu ka kuvijikiaio.

⁶ A vite nonovio nei be Atua kiano iñauano ga. Ea tiiano, Atua ber jibe nei, berinavo “Mia miamoiano rimei mereralii melijokouo napano jo,” a jo mila jibe na kea ban kito. Nina ga Atua nei napano jo miñau vonganei, mila kiano miamoiano merera ba joomo nonio ea kito, mila robakar miamoiano nei napano jo merera binimei den Kristo mirano, napano miyotuba nonovio ea Atua kiano mermerano napano joaio.

⁷ Jikiaiano nalo na miamoiano na Atua kiano mermerano joa kito jibe na, be vite novo tai napano be lu laka. Ea kumemi napano numila Tubo kiano iñauano, numial jibe kumemi nube vite kurano tai ga, a maka nuvare ka kiano tolu novo nalo nei ajua kumemi, mia Atua naio bo, jo misonio ea kenememi meuliano julaka. A nina mila ka ver bogo tai nuviñauka vite tealo na bo, ana mia nuvitilubar ga ka moroano ve toru ka nuviñauka vite nalo nei maka moroano tai na yetemeriba nei napano maluvo

den kumemi, mia be moroano tai na tiniabene napano maluvo den Atua ga.

⁸ Naruei numitu numimāu bija moroano nene mijai kumemi toru, bior napano numitu nubiviuo bogokouo telabo, ana maka nuvitibir-bil vo. Vite telabo amila kumemi numisidomii von-von laka, mia kenememi jidomiano maka riva kovio.

⁹ Tomu telabo amila bulag vatitig kumemi, mia Atua bitikar kumemi julaka. Kumemi nubar jaleleano nalo, mia maka ajikia aue bulag kumemi, numeul kia vo.

¹⁰ Be riano, bogokouo ban kumemi jibe na naruei, rivano-o jogviano na māriano nalo ajua mokotenememi nalo jibe napano Yesu bario ea kiano māriano. Mia kumemi numituvanio ga, bior napano ver Yesu kiano māriano joa kumemi, mia kiano meuliano toa kumemi bunu.

¹¹ Kumemi numimāu Yesu kiano jibe na, mila na bogo napano numitu numeul ea yetemeriba nei, mia bogo nonovio numitua ga juluvati māriano, ana mia mila ka kamiu bunu kumijikia kuvitii ka Yesu kiano meuliano jo malmaluvo toru ea mokotenememi na māriano nalo. ¹² Be riano numitu nuban ka nuvokar kenememi māriano, mia numila jibe na ka kamiu kuvijikia kuva kuvokar kenemiu meuliano.

¹³ Iliano tai joa Niosi na Iouano Lu nalo, napano toro tai mil, ber

“Kiniou nomonea ruei, naruei mila na kiniou nemi-jikia neverial iliano,”

Sam 116:10

a numialio jibe niununo na vie-kouoiano napano joa toro na, vonganai binimej toru ea kumemi bunu. Kumemi numitibe ka naio ga, napano kumemi bunu numonea, a vite venia napano numonmoneaio, nina naruei numijikia nuverialio.

¹⁴ Mia maka numerou ka nuverial leleio, bior napano numijikia vatitig ka kiado Atua napano mila Tubo Yesu meul bereio den namāriano, mia naio mila kumemi bunu numeul bereio jibe Yesu, a mia kamiu bunu kumeul bereio tibe kumemi, ana mia naio rivuru kito nonovio ravan rotu vijaio.

¹⁵ Ee, kumemi nubardulu bogokouo telabo jibe na, mia bo ga, bior napano naio be kenememi māarabo tai ka nuvijikia nuvijia kamiu. Kumemi numisidom ga ka Atua kiano tinjememiano monoka to rivanvano-o tulaka ea tomu nalo ea vio nonovio, ka rila aiaia Atua bogo nonovio, atu aver siva ka naio rivano-o rila kiano mermerano to rimej ve toru lie.

¹⁶ Jidomiano novnovo nalo nei mila buriakurano napano bova ban kumemi jumābe, mia numitu jikili bo ga numitu. Ea tivelinio na mokotenememi, jo binimej be kulu moruo, jo binimej burukokorovio, mia tivelinio na niunumemi, Atua jo mila binimej be terivou, jikili vatitig ea bogoti nonovio

ga. ¹⁷ Bogo kouo tertelisu nalo na yetemeriba nei nalo abe tena bogo bulati ga, mia aju amila kito roju vatitig ka ravar dulu ka rotua mermerano na tiniabene, napano toru laka, bo laka juvulu loa, napano mia rotu rojog rivu kanio to toboto. ¹⁸ Vonganei kiado jidomiano maka toa vite nalo napano mirado jo bitikario, mia kiado jidomiano toa vite nalo napano mirado maka rijikia aialio, kario napano vite na mirado mijikia rialio, nalo abe tena ga bogo bulati ea yetemeriba nei, mia vite na mirado maka rijikia rialio, nalo abe tena tu damariga ea vio mave.

5

Kiado vio ea vio mave

¹ Kito romijikia ruei ka mokotenado ea yetemeriba nei, maka rijikia to tulaka. Naio jibe tabobo tai na telisu napano roju rojuluku eaio, napano mia bogo tai monoka momavu garuei, peli tomu dolu nalo amijikia amei aue bulagio. Mia romijikia bunu ka kunuado dolu tai na jikili toru jo, napano maka aimaukanio ea vio yetemeriba nei, mia Atua ga mila vatitigio ju be kiado ea vio mave, ana iorou romijikia rava rotuaio. ² Yetemeriba nei jibe vio na tegiano ga, a rajaaro ga ka rataluvo denio, rojidom rava rotoluku ea kunuado na mave. ³ A bogo napano mia rava rotuaio, mia

maka bunu rojog ka maka ve kunuado tai, mia roialio navo ka kiado vio memedu jo.

⁴ Ee, mokotenado jibe tabobo tai napano rojuluku eaio ea yetemeriba nei, be riano ga, bogo napano roju jibe na roju rejerjermi julaka bior jidomiano kokouro nalo na bogokouo nalo napano roju rabarduluio. Peli bova ka amei auebinvin bulag mokotenado, mia jidomiano tai monoka toa kito ka ver alaio, bo ga na, bior napano bo laka ka rotaluvo den tabobo nene, rava rotua yimo novo tai beamu. Monoka rovitilubar ka bo laka mokotenano na mariano nei ribisi, ana mia mokotenano vou tai na meuliano mijikia rimei ridu jeleigio. ⁵ Bogobe ruei, Atua jo mima ka rila vatitig kito ka ravan ea kiano vio tibe na naruei. Naio midu Niununo joa kito ka rila rosidomial tulaka ka kiano verikariano ka rila tibe na ka kito mia rimei ve riano ga.

⁶ Kito roju rojidomial nina, mila na bogo nonovio ga kito rojikili. Romijikia ka vonganei, roju romila kiado vonuo ea tabobo nene, napano be mokotenado, mia maka rotua kiado vonuo novo na vija Tubo vo. ⁷ Tibe na, bogo napano roju kia ea yetemeriba nei, monoka rola von re rotu rotua venia napano mirado ga mijikia rialio, mia monoka rotu sikili ea viekouoiano. ⁸ A ea tivelinio na kumemi, numitu kirisikili vatitig kea

ka nuvitua yetemeriba nei
 ka nuvila kiano iñauano,
 mia nubitii ka bo lie bunu
 ver nuvijikia nuvituvan
 mokotenememi na yete-
 meriba nei, nuva nuvitua
 kenememi vonuo memedu
 vija Tubo. ⁹ Jibe na, ver
 kito rotua yetemeriba nei,
 ĩeli rotu mave, mia tulaka
 monoka rola von ka rola
 venia napano mia naio saaro
 kanio. ¹⁰ Monoka rosidomii
 ka bogo napano Kristo
 riva totano mave ea kiano
 jobaro lu na tibureiano, mia
 kito ve terakurano monoka
 rava rosikili rotua mirano.
 Naruei ea bogo na, mia naio
 ga rila ka mia rivu van kito,
 ĩeli rivova van kito, takii ga
 venia napano roju romilaio
 bogo na rojua mokotenado
 na yetemeriba nei.

*Kristo mila kiado mere-
 vuiano bija Atua*

¹¹ Bogo napano tiniememi
 maio ka Kristo tibure tomu
 nalo, numerou, a numial
 jibe bo ka nuviñau sikili
 ka nuvuru tomu nalo ka
 avakovio re. Atua bitilubar
 batitig bajago na kenememi
 iñauano nalo nei, a neber
 ĩeli kami bunu kubitilubar
 ka numiñau jibe na ga
 napano naio jaaro kanio.
¹² Kiniou nojo neberii vite
 nalo nei, maka nala rivor
 napano nojidom ka kami
 kuvidular kumemi bereio,
 mia bo ka kuvijikia ku-
 visaaro ka venia napano
 numitu nubereno. Ver
 kubakar vatitig kenememi il-
 iano nalo, mia rila na il-
 iano nalo nene amijikia atua

kamiu, ana mia kumijikia
 kuverdoĥe nalo napano aju
 aber ĩeli abo ruei. Mia nalo
 aju amil vavavin ealo ka ve-
 nia napano aju amilaio ea
 tomu nalo miralo, mia maka
 tiniel maio ka venia na ju
 joomo ea kialo meuliano.

¹³ Nemijikia ka bogo
 napano neber iliano nene,
 mia ve tealo napano atu
 vija kami napano monoka
 aver nomiavovu, mia nina
 bo ga na. Ver be riano ka
 numiavovu, numiavovu bior
 napano numila Atua kiano
 iñauano nalo mñlea, mia
 ver numitu parimememi
 bo ga, parimememi bo
 ga bior napano tiniememi
 maio ka kami, ana kami
 monoka kuviagago ka
 kumemi. ¹⁴ Vite takurano
 ga jo jilanvuu ka kenememi
 meuliano ka nuvila Kristo
 kiano iñauano novo nalo,
 naina kiano tinietiano.
 Kumemi numonea jikili
 ka kiano mñariano naio
 takurano mijikia rilarrur
 kiado meuliano nonovio,
 ver ĩeli, mia kito nonovio
 monoka romñarmñaro ga, mia
 maka kito tai na rijikia
 rimeul. ¹⁵ A naio mñaro
 kar kito nonovio jibe na,
 naio jidom ka kito napano
 romonea naio a roju romeul
 kea ea yetemeriba nei, maka
 bunu roiñau kiado ga,
 mia roiñau kiano napano
 naio mñaro ka rilarrur kiado
 meuliano nalo, karina Atua
 bitirilarrur naio bereio.

¹⁶ Jibe na, bo ka rovitii re
 bunu tomu nalo takii jido-

miano na yetemeriba nei. Beamu, bogo napano Kristo joa yetemeriba nei, tomu nalo aju abitii naio jakii jidomiano na yetemeriba nei, ana vonganei, rovitii re bunu naio tibe na, a maka rivu rotu rovitii tomu dolu nalo takii jidomiano na yetemeriba nei bunu.

¹⁷ Nina bior napano toro kei napano ver rimonea Kristo, naio rimeii tibe toro terivou tai garuei. Kiano meuliano moruo na re nua ba kovio, a vonganei, kiano meuliano vou maluvo ruei. ¹⁸ Atua ga rila ka romijikia rovilig kiado meuliano tibe na, bior napano naio miila Kristo binimeii ea yetemeriba ka rila kiado m̃arabo ka romei bereio ea naio, a jidom ka kito monoka rovuru tomu dolu nalo bunu amei eaio.

¹⁹ Jibe na, Atua mĩmau jel ea Kristo ka rivuru tomu nalo na yetemeriba amei ka ave takurano vija naio bereio, napano maka bunu sidomii ka sian vironiano vanlo bior kialo kariano. A bija nina, naio jidom ridu kiano iliano toa jum̃ado, ka rodu rivan ea kulo dolu nalo ka nalo bunu amei bere eaio. ²⁰ Vite na naruei mila na kumemi nubinimeii nube Kristo kiano tomu nalo ka nuvar Atua kiano iliano rivano. Tibe na, bogo napano nuberial iliano ban kamiu, jibe napano Atua ga jo mil, ana numisidom laka ka nuvika sikili van kamiu nonovio bereio nuber bo, ea Kristo siano, kamiu monoka kumei bereio eaio. ²¹ Naio naruei tinien miia laka

kito, ana midu kenerinio nei Kristo, napano maka leleio rila kariano, miila naio binimeii jibe toro na bar kiado kariano nonovio robiniu. Atua mila jibe na ban naio ka rila kito tomu na romila kariano, romijikia romei rove tomu memedu nalo ea Atua mirano.

6

Meuliano jikili ban Atua kiano naim̃auano

¹ Kumemi numim̃au jibe tomu nalo na amim̃au vei bija Atua, a numijikia jum̃abe ka naio be tinievu laka ban kito robiniu. Tibe na, numisidom nuvika sikili van kamiu, ka kiano tinievu novo napano binimeii ea kamiu, maka rivu ka rimeii kurano ga. Kamiu monoka kuviduio, a monoka kuvituvan rila kiano im̃auano ea kenemiu meuliano. ² Iliano tai napano joa Niosi Moruo ber jibe na ruei, napano Atua ber jibe nei, berinavo.

Memedu ea bogo napano bo ka kamiu, kiniou nomiagago ka kenemiu tegiano nalo,

a memedu ka bogoti na ioruriano, kiniou nemei neiija kamiu. Ais 49:8

Naruei ea kenememi vitariano, numijikia nuverial ka vonganei be kenemiu bogo memedu naruei, vonganei naruei be bogoti na kenemiu ioruriano.

³ Ea tivelinio na kenememi im̃au-ano, numitu numila von kirisikili ka nuvim̃au kanio rimemedu tulaka, ka nuvituko m̃arabo

re ka tomu ninio napano ajidom amei. Maka nuvisidom ka kulo dolu aver ka numila vite tai kirivova, p̄eli numilaluvu iñauano tai kovio. ⁴ Numitu numila vite nonovio ga ka riverial ka numitu numiñau memedu jibe tomu novo nalo na Atua kiano iñauano, naruei numitu numijamo ka nuviviuo vite ve miroano. Numitu nubakar kumemi ka nuvar dulu ka nuvila nono vatitig iñauano nalo, kumemi nubinua jaleleano nalo, bogokouo nalo, a jogvaiano nalo.

⁵ Nalo ajumolu amilkuei kumemi, a abitiv kumemi, a abuku kumemi ea nalakoiano. Bogo miroano, numiñau mia numiñau, maka numonmelio rivu, a maka simemi sinaniano rivu.

⁶ Bova laka ka kumemi jibe na, mia numitu numiñau memedu ga, a numitu numiñau bija jikiaiano, bija jidomiano na tebievi, a bija tinievuiano. Tomu nalo amial ka kenememi meuliano bujo ka Niununo Lu, a kenememi bajago bujo ka tinietiano na be riano, ⁷ napano nuberial iliano nalo napano maka ave sibiano, napano numiñau ea Atua kiano moroano, a napano ea jumememi nalo, ea vameruo a vamali, nubokar vite nalo na mira ka rila memeduanu tovulu nonio vovaiano. ⁸ Tomu tealo amidular kumemi, a tealo amidu kumemi numitu yetano garuei, tealo aberii vatitig kumemi, a

tealo aberii kumemi bova laka, mia kumemi maka nuvisidomialio, nuban ga. Maka nuvila sibilili toro tai, mia aju amial kumemi jibe maka nuve riano leleio. ⁹ Nalo amijikia vatitig kumemi ruei mia aju amila jibe maka asidom ajikia kumemi lele. Kumemi numeul vatitig bo numitu keano, mia aju ajidom ver numarnaro garuei.

Nina naruei jo ban jibe na ea kumemi vonganei, mia be iakurano napano nubar vironiano nalo, maka ajikia adular kea kenememi meuliano. ¹⁰ Be iakurano napano jogvaiano nalo abujo laka, mia kenememi iviso jaaro julaka ga. Be iakurano napano bogo nonovio jumememi beteauo, mia numitu numila tomu dolu nalo abar vite miroano. A be iakurano napano maka ve kenememi titai, mia nubitii ka vite nonovio be kenememi ga.

¹¹ Bilbilu nalo na Korin, kumemi maka jidomiano va tai bere ea kamiu napano numila luku ju. Nuberial nonovio jidomiano ban kamiu ruei, a tiniememi maio ka kamiu laka. ¹² Maka numila vite tai napano mia p̄eli tukovio ka kiado bilbilu novo, a ver tukovio ea vio tai, nina bior napano kamiu ga kubakakar jidomiano va tealo ea kumemi aju. ¹³ A ver tibe na, kiniou monoka noil van kamiu tibe keneriku nalo ga naruei. Nojidom novika den kamiu tibe nei,

neber bo, kamiu kuvilavan re bunu kenemiu jidomiano luklukuano tai bereio, mia kuvila von ka kuvila kenemiu iviso rivetavo ka kumemi.

Kuvitikar vatitig ka nalo napano maka amonmonea

¹⁴ Kiniou nojidom never ka kamiu mia kuvitu re kuvila von ka kumei ve takurano vija nalo napano maka amonmonea. Bo ka kuvisidomii kario ka bajago na memedu bija bajago na kariano, naljuo maka ajikia amei avuron vio takurano, a legiano maka jikia rila bilbilu vija melijokouo.

¹⁵ Kristo maka rijikia rive kiano jidomiano tai vija Simaro, a toro napano monmonea maka lele kiano vite tai vija toro napano maka monmonea. ¹⁶ Tavoru sibilibi nalo maka ajikia atu joomo ea Atua kunuano Lu bogo tai, a iliano nei be nioti nene bior napano Kunuano Lu naio maka ve yimo tai ga, mia naio be kito, Atua na meul kiano namoneano nalo. Nina jakii ga kiano iliano teal, napano naio berenio jibe nei, berinavo

“Kiniou mia notoalo, ka mia naiel iviso kalo.

Kiniou mia neve kialo Atua, mia amei ave kiaku torogio nalo rimemedu. Lev 26:12

¹⁷ *Jibe na, jibe kialo Tubo, neber ka kiaku nalo nei ka monoka ataluvo den nalo dolu.*

Monoka atiburei nalo den tomu va nalo.

Monoka amei aveli vatitig, a monoka atu re vaataro ka niamiamo nalo, tibe na mia nemijikia nojamo kalo ka amei atu vija kiniou.

¹⁸ *Mia kiniou, jibe Atua Soŕi, nemijikia never kalo never*

‘Kamiu kumei ka neve karamemiu, a ka kamiu kuve keneriku nalo rimemedu.’”

7

¹ Bilbilu nalo, naina naruei Atua kiano verikariano novo nalo napano ber ka mia rivuru kito tibe kiano maratavo nalo. Naio mila jibe na ka kito bo laka, ana bo ka kito ravatove ka naio tulaka, a monoka rolakon niamiamo ea kiado meuliano. Kariano teal, romila ea mokotenado, a teal, romila joomo ea kiado iviso ga, ana monoka robisi kalo nonovio, a monoka romei roveli vatitig mia roveli vatitig, tibe napano naio jidomio.

Pol jaaro laka ka Atua miŕau ealo

² Kiniou nojidom nevika bereio den kamiu ka tiniemiu ser re kumemi, mia kuvidu kenememi vio tai ea kenemiu iviso nalo, ka nemijikia never vite teal van kamiu bereio. Bo ka kuvila tibe na, bior napano maka kamiu tai napano numila bova kanio, ŕeli numila bulagio, ŕeli nubilivilig lelar naio. ³ Ana bogo na neber iliano nalo na, ŕeli kamiu kuberiamŕa

nojo nojidomii va ea kamiu, ħeli nojidom neil niegeniege kamiu, mia maka tibe na leleio. Makanio, jibe ga napano neber ka kamiu ruei, nuber kumitua kenememi iviso ruei, a roju robinimeĭ takurano riva rivokar napano jibe roĭua meuliano takurano ga, ka verenio tai riviviuo mĕriano, mia roĭog jibe robinĭu romĕarmĕaro.

⁴ Ee, nemĭjĭkia never tibe nei never kiniou nojo ban kamiu toru laka mia toru laka, nobe mĕrou laka ka kamiu, a bogo napano nojidomii kenemiĭu imĕauano novo nalo, aĭu amĭjakar laka kiaku jidomiano. Be riano napano nobiviuo jaleleano laka, ana kumĭtu kumĭla ban kiniou napano jogvuiano a saariano buĭo laka ea kiaku iviso.

⁵ A jibe na ga bunu nanua na, bogo napano nubano numoluo ea tanobuku na Masetonia. Ea vĭo na, nubĭniua bereĭo baravoiano nalo na ĭĭĭrikĭli, mila na numerou kĭja, a mokotene-memi maka bogo ka ĭilimebi leleio. ⁶ A kiado Atua be Atua na duĥĭliĥĭli nalo napano amĭjog ĭirivova ea kialo iviso, ana naio tinien maio ka kumemi, mila bilbilu novo nei Taitas maluvo kean kumemi, a bogo napano numĭal naio bereĭo, numĭjog bo laka. ⁷ A bogo napano naio ĭukunu ban kumemi, naio berĭal tonovno nalo napano kumĭlaio, mĭkurukar kumemi toru laka. Naio berĭi ĭumĕbe napano

naio bunu, bogo napano maluvo kean kamiu, mileal vite miroano ea kamiu napano mĭkurukar naio, a berealio ka kamiu kumĭla merevuiano bior kenemiĭu iliano nalo nanua na, napano vonganei, kubilig kenemiĭu jidomiano, kumĭtu kumĭsikĭli ea tivelinĭo na kiniou. Berĭalio ka kumĭsidom laka monoka novĭedu neadu ka kamiu, mia banalo, bogo napano nomĭjog nina nomĭjog bo mia nomĭjog bo.

⁸ Bogo napano nobivitauia mĕsi dolu nei biedu kean kamiu, neĭuvan bano ana maka vesĭou noĭidomiĭkar bereĭo, noĭidom ver notuvanio re ga. Nina bior napano nemĭjĭkia ka kiaku iliano nalo ajĭĭrkĭli, mia monoka ala kamiu kuvĭjog rivova kĭja. A bogo napano nomĭjog Taitas kiano verĭiano, nomĭalio ka be riano, kiaku mĕsi mila bulag kenemiĭu jidomiano nalo. Ana nina tena bogo bulati ga, ĭorou kamiu kuvĭlig kamiu bereĭo, ana mila na tinĭeku jaaro bereĭo napano neĭuvan mĕsi neĭbano biedu. ⁹ Jibe maka neverenio ka nejaaro napano mĕsi neĭbano mila kamiu kumĭjog bova, mia nejaaro ga napano jogvaiano nei mila kamiu kubilig kamiu. A kenemiĭu jogvaiano nei, maka kumemi napano nuĭilaio rimaluvo kean kamiu, mia Atua naruei milao maluvo. ¹⁰ Tibe na, jogvaiano nei naio be jogvaiano novo tai napano

binimei mave, napano mila toro bilig naio ka rijikia rijeve ioruriano. Mia jogvaiano dolu, napano jogvaiano na yetemeriba nei, naio be jogvaiano va tai napano mia rila toro rijog rivova ga riva rivokar m̃ariano. ¹¹ Kamiu bunu kuvijikia kuvitilubar ka jogvaiano napano Atua jianio maluvo kean kamiu, naio mila im̃auano novo tai. Mila kamiu kumisidomii temi laka ea kenemiu meuliano, a kumila vonvon laka ka kuvila siemiu amei rivu bereio. Beamu, tiniemiu mimi napano aberii vovai-iano napano jo iviso kean kamiu, a bogo napano nomil ban kamiu biorio, kumial von m̃arabo ana kumerou. Kamiu ga kuvitumormolu kuvil van kamiu bereio, a kuvisian vironiano van nalo napano amila bova, ka vovaiiano tai re bunu toa kamiu.

¹² Nojidad never ka m̃esi neibano, nejuvanio bior napano nojidad noil van naljuo napano amila bova, a tinieku m̃iaa bunu tormoruo nei napano naljuo amila bulag laka naio. Nejuvanio bunu bior napano nojidad ka monoka kuvitilubar ka be riano, kamiu tiniemiu jii kumemi, ana bogo napano nuvil van kamiu ea Atua siano, kamiu kuvisaaro ka kuvamenea venia napano nubereno. ¹³ Bogo napano Taitas binimei berial ban kumemi ka kumila jibe na ruei, mijalar kenememi

jidomiano toru laka.

Kumemi numisaaro laka ka nina ruei, mia bogo napano Taitas jukunu lie ka ban kumemi, berii jum̃abe ka kumila bo laka kanio, numisaaro lie vo garuei. Naio berii napano jo bija kamiu, kumiija naio, a kumila naio jaaro laka bereio. ¹⁴ Kiniou neberii kamiu ban naio beamu ruei, neber ka nabarvar ka kiniou laka ka kenemiu bajago novo nalo, mia bogo napano naio maluvo kean kamiu, naio milealio ka maka nala sibi, mia neber be riano ga. Jibe nanua, nojo neber vite na be riano ga ban kamiu bogo nonovio, a vonganee kumila napano kiaku iliano ban Taitas ea tivelinio na kamiu binimei be riano vatitig bunu. ¹⁵ Naio maka rijikia tiniene bobogia ka bogo napano naio biedu, kamiu kumerou laka a kumemebiju, mia bogo napano naio mil ban kamiu, kumiagago kanio, kubatove vatitig ka kiano iliano. Kenemiu bajago novo jibe na mila ka bogoti na naio binimei bereio, jo jidomii laka ka kamiu bogo nonovio ga. ¹⁶ A ea tivelinio na kiniou, neber ga ka kiniou najaaro mia najaaro, a vonga nei nemial jibe ka mia nemijikia notuvan kamiu vatitig ea vite ninio ea bogo ninio ga.

8

Bo kanio asian jidomiano

¹ Bilbilu nalo na Korin, kumemi numisidom kamiu kuvijog ioluano na vite novo tai napano jo malmaluvo ea yimo lu nalo na buruñara tanobuku na Masetonia, napano Atua jo miñau ea kiano tiniememiano. ² Ea vio na, nalo abar dulu kija bogokouo nalo napano vite miroano amila von niegelo, a ba bokar napano maka bunu ve kialo vite tai, mia nalo na, maka lele abisi ka asaaro ga ka venia napano abiniuaio. Juñalo yauo ga, mia numiilo laka ka bogo napano amijog ka namoneano dolu nalo na Yerusalemo abiniua bogokouo bunu, ana tiniel miialo a jibe ka juñalo nalo na abinimei abujo vatitig bija vite nalo na ajianio jibe kialo jidomiano tai ban kulo dolu nalo nei. ³ Maka toro tai napano river ka monoka ala tibe na, mia nalo ga aberii ka alaio, a nomijikia vatitig ka ajian vite nonovio napano amijikia asianio, bano-o napano tealó ajan jovulu venia napano amijikia asianio. ⁴ A bogo napano abar bulag nonovio kario, abar jua jumememi, nalo ajikili ka nuvial mñarabo tai ka nuvituvan jidomiano nei rivano, bior napano aber ka ver ve bogo tai ka ajikia aija namoneano lu dolu nalo tibe na bereio, mia rive vite novo tai laka kalo, na-pano mia asaaro laka kanio. ⁵ Nalo abo laka, bior napano beamu nalo amidu momou kialo meuliano

jibe jidomiano tai ba ban Tubo, amidulo aju yetano ka kenememi iliano, ana iorou, amidu vite venia napano be kialo jibe jidomiano tai binimei ka namoneano dolu nalo. Nalo amila bo lie jovulu venia napano kumemi numisidomii ka mia alaio, a be riano, amilaio memedu ga ka Atua kiano tinieiiiano.

⁶ Ana bogo napano numial ka tomu dolu nalo na Masetonia amila jibe na, nuber ðeli bo ka nuviila Taitas rimei bereio ea kamiu, ka rikurkar kamiu ka kuvila tibe na bunu. Numijikia ka bogo napano naio binimei nua, naio jo mil ban kamiu, a kumitakar ka kuvila iñauano novo na tinievuiano na naruei, mia bo ka naio rimei rila nonovio vatitig vija kamiu.

⁷ Numial napano iñauano dolu nalo, kumitu kumi-laio vatitig ruei, napano kenemiu viekouoiano toru laka, kumitu kuberial iliri-aniano bo laka, kumijikia vite miroano ruei, kumitu kubarvar vatitig kamiu ka iñauano, a kumitu tiniemi-ujii kumemi namoneano dolu nalo toru laka. Kamiu kumila iñauano nalo na ba jovulu venia napano numisidomii nuber bare ka kuvilaio, ana bo kuvila tibe na bunu ea tivelinio na iñauano na asian jidomiano nene.

⁸ Kiniou neber jibe na, mia iliano na naio maka tibe ka tuboiano tai napano mia monoka atakiio. Vite na joa ga kamiu, ðeli bo ka noverii

nalo dolu tealo van kamiu tibe na, neverial vite novo nalo napano amilaio ruei. A bogo napano mia kuvijogio, mia rila kamiu kuvitii kija kamiu bereio, kuver kenemiu tinietiiano toru bunu, beberare ka nana kanalo, ħeli na makanio? ⁹ A bo ka rosidomii bogo nonovio Yesu Kristo kiado Tubo kanano burumara tiniememiano, napano beamu, naio jibe ka be kiano vite nonovio, ana tinien maio ka kito ea yetemeriba, naio binimej jibe napano maka ve kiano titai, ka rila romijikia romei tibe napano be kiado vite nonovio. ¹⁰ Bo ga, nina naruei kiaku jidomiano tai ea tivelinio na. Kiniou neber ga ka nemial jibe ka vite na, kumisidom kuvilaio ka yuka na barlaka ruei, a kumitika ka kuvilaio, mia bo lie ka kuvitumolu bereio ka kuvila nonio vatitigio. ¹¹ Bogobe ruei, kenemiu jidomiano ka kuvila tibe na naio jikili batitig bo, mia vonganei bo ka kuvisikili vatitig ka kuvimaukanio, a ka kuvimaukanio rivoru ea juluvati napano kamiu kubare kanio. ¹² Atua maka river ka monoka reje jidomiano todovul venia napano joa jumado ka rosian, mia jidom ga ka rosaaro ka roija toro dolu, a reje jidomiano rimemedu ea venia napano rabare ka rosianio.

¹³ Ana bogo napano nobika kamiu ka kuvisaaro ka ijaiano tibe na, maka nosidomii ka nala ka mia

imauano rimei ve temi ka kamiu mia rimei rimonmaio ga ka kulo dolu nalo. ¹⁴ Kiniou nojo nojidomii ga bo ka kito nonovio roveverare ga. Ea bogo na, kenemiu vite miroano, mia nalo maka kialo tai, mia tibe na, bo ka kenemiu vite torogio riva rila ka nalo ve kialo vite nalo ve telisu, a ħeli bogo tai ver kamiu kuvokar jogviano ea yuka nalo napano ju ka rimei, kialo vite torogio mijikia rimei rila ka kamiu kenemiu ve telisu. Bogo napano roju romijaijai kito jibe na bo, mila na kito nonovio roju beberare, ¹⁵ a mia tibe iliano tai na Niosi Moruo napano ber jibe nei, berinavo

“Toro napano bar sinaniano miroano binimej, naio jenio ba binu koko, mia iorou kanio maka bunu sano sinaniano tai to, a nina napano ba bar sinaniano telisu ga, napano mialio ka bare ga, mia maka jumano ve bulati ka vite tai.” Eks 16:18

Mia Taitas rivan bereio Korin

¹⁶ Beamu ruei binimej, nojo nojidomii laka kamiu, a vonganei, neber siva laka ban Atua ka naio mila ban Taitas ka vonganei, jidomiano na jikili novo tai joa naio ruei, ka naio monoka riviedu rijai kamiu. ¹⁷ Ana bogo napano kumemi nubika naio ka riviedu riyotuba kean kamiu, naio jaaro ga, bior napano jidomiano tai ka rila tibe na

joa naio ruei. ¹⁸ A maka naio ga ve takurano, mia nuviila kumemi dolu tai rimei vija naio, napano be kuruado tai napano namoneano lu nalo ea vio miroano amijikia vatitig naio, bior napano naio be toro na bo tai na mioliolu ka Ioluano Vou. ¹⁹ Namoneano lu nalo ajaaro ka kiano iñauano, ana nalo abijauialar naio ka to riel seliviv vija kumemi ea kiado tanobuku nalo, bogo napano numitu nubar biji veru na jidomiano nei napano ka rijai namoneano nalo ea vio Yerusalemo. Kumemi numila iñauano nei bior napano tiniememi jiilo laka, a bogo napano mia avokar jidomiano nei mia aiilo vatitig ka bajago novo na ijaiano napano rolaio vanlo, mia adular Tubo siano rivavin. ²⁰ A numisaaro laka ka kuruado dolu nei jakisor kumemi, bior napano naio mijikia rijai kumemi ka vitikar veru na toru nei napanoaju ajuvanbijio. Numisidom nuyitakar kanio takii kiano m̄arabo novo nalo ga, maka nuvisidom nuvijog iliano ninio rimei iorou. ²¹ Numisidom nuvila iñauano nei tibe napano mia rimemedu vatitig ka Tubo kiano vitiiano, a mia rimemedu vatitig ka tomu dolu nalo kialo vitiiano bunu.

²² Ana ea tivelinio na Taitas naljuo nei, mia nuviila kuruado dolu tai bereio rimei ka rial kamiu. Naio bunu be toro tai napano nubar vite miroano ajua

juñano ruei, a numila von naio jibe na bano-o numialio ka naio biekoou vatitig ea vite nonovio. Naio be toro na bo tai ka riñau, a bogo napano kiniou nojo neberii kenemiu bajago novo nalo banio, naio monea kamiu laka ka ver rimei kija riñau vija kamiu mia rivu laka.

²³ Tibe na, ea tivelinio na kiaku bilbilu novo nei Taitas, kamiu monoka kuvitii naio kuver kumemi juo naruei numiñau vio takurano ka nuviija kamiu, a ea tivelinio na kuruado juo dolu napano mia amei vija naio, monoka kuvitiilo kuver nalo abinimei ka kamiu ea namoneano lu dolu nalo na tanobuku nei sialo, a abinimei ea Kristo siano napano kialo meuliano jo berial kiano bajago novo nalo.

²⁴ Naruei nojidom nover ka kamiu ka bogo napano nalo nei amei ayotuba kean kamiu, kenemiu meuliano nalo monoka atu averial bunu kenemiu bajago novo nalo. Kiniou nojo nomioliolu kamiu ka nalo ruei, ana bo ka mia avitilubar vatitig ka miralo ka kiniou neber beriano ga, ka kenemiu tinietiano toru laka, a mia ajikia asian veriiano novo tai napano riverii kamiu riva van namoneano lu dolu nalo.

9

Jidomiano na ijaiano ban namoneano dolu nalo

¹ Kiniou nebivitaui bulag iliano miroano ruei ea tivelinio na ijaiano na veru napano roju robarbijio ka

rijai Atua kiano namoneano dolu nalo nei, a neber ĩeli kamiu kumitu kumisidomii vite nalo na kia ga vo.

² Nemijikia vatitig ruei ka kumisaaro ka kuviadol ea imauano na abarvar veru na ijaiano nei bior napano ka yuka na barlaka ruei, kumitu kumila bijii vite ka kuvijev kiano veru ve telisu. A bogo napano naban ea tanobuku nei Masetonia neberii kamiu banlo, neber kamiu kulo Akaia, kumitikario ruei, a bogo napano amijogio jibe na mikurlo kija, mila na kialo jidomiano ajevijo ka nalo monoka asikil lie ka ala kialo togio.

³ Nojo neberii kamiu ban tomu dolu nalo ruei, neber kamiu kumiĩau bo jibe nei jibe na, ana ver maka kuvilaio, mia kirivova ga! Naina naruei mila kiniou nojidom nejila kuruado tolu nei ka aviedu avitii vatitig kamiu, bior napano neber banlo neber monoka kuvarvar veru nalo nei ruei, naruei amijikia amei alealio ka jibe napano neberenio ĩeli na makan vo.

⁴ Ver makan vo, monoka kuvila sopeli ka kuvilaio, bior napano vaataro mia kiniou bunu noviedu, a mia noviedu vija tomu tealoo na Masetonia, napano neberii kamiu banlo ruei. Naruei ver nuviedu a aialio ka napano maka kuvila vite rivu vo, mia ve burumĩara imouiano van kiniou, a van kamiu bunu, mia nalo monoka averii kiniou nomila sopeli laka ka nomiaia kamiu banlo.

⁵ Nina naruei nemialio ka monoka nevika Taitas nalo ka aviedu beamu ka kiniou, ana amijikia aimĩau vija kamiu ka kuvarvar veru nalo napano kuberkaroo ka kuvario, kuvarbijii vatitigio tu, ana kario numei nuvar nuvano. Kiniou neber jibe nei, ana kamiu kuvisidomii re kuver nojo nomiyuku kamiu ka monoka kuvar jidomiano nene. Ijaiano na jidomiano jibe nei, naio be vite tai napano kube tinievuiano, mia kenemiu jidomiano ga asaaro ka alaio.

Ilivuiano nalo na bajago na asian vite

⁶ Mia iliano tai napano nemijikia never sikili van kamiu jibe nei, ber toro napano mebijo telisu, mia naio rivar ve telisu, mia toro napano mebijo toru, mia naio rivar ve toru.

⁷ Ea tivelinio na reje jidomiano van toro dolu, kito terakurano monoka rosian venia ga napano kiado jidomiano berkario ka ralaio, mia maka rivu ka kosian napano maka kosaaro ka kosiano, ĩeli kosian bior napano toro dolu miyukuso ka monoka kosiano. Atua maka sidom nina, mia naio jidom laka toro napano jian vite miyotuba ea tinievuiano a ea kiano jidomiano naio takurano.

⁸ Naruei ver jau tai napano kojo kojian jidomiano bano, jau kosidomial re kanio, bior napano Atua mijikia sian kean jidomiano novo nalo amei easo, ve miroano mia ve miroano.

Naio mijikia rila napano bogo nonovio ga kovar vare ea vite nonovio napano koidomio, a mave ka naina vare ka kosian bereio ka ijaiano na iñauano novo dolu nalo. ⁹ Nina jibe iliano tai na Niosi na Iouano Lu nalo, napano berii Atua kanano tinievuiano, berinavo.

*Naio jo jikian bulag jidomiano
novo nalo ban tomu
nalo napano jumalo
beteauo,*

*kiano bajago novo aju julaka.
Iouano 112:9*

¹⁰ A Atua, naio naruei napano jian kurukuti ka romebija ea borotano, a naio naruei napano mila kurukuti bar m̄arati ka roim̄auka sinaniano eaio, a jibe nei, mia naio jian venia napano kumisidom ka kuvim̄au eaio, a mia rila kenemiu saba nalo amei ve miroano, a mia rila ka kenemiu iñauano nalo rimemedu ka avar m̄arati ve miroano. ¹¹ Mia naio rivitilubar vatitig kenemiu bajago novo nene, napano bogo nonovio kumisaaro ka kuvisian vite, naruei mia naio sian kean meran vite ve miroano rimeĩ van kamiũ, a bogo napano nuvar kenemiu ijaiano rivan ea nalo dolu nei, mia rila napano kito nonovio rosian sivaiano tai na toru van Atua bior ilivuiiano novnovo nalo napano naio jo jianio binimeĩ ban kito. ¹² Jidomiano nene napano mia kuvituvanio rivano, mia rijai ve toru namoneano lu dolu nalo nei napano aju abiniua bogokouo, a mia rila aiaia

Atua ve toru bunu, aver siva laka vanio. ¹³ Mia aiaia Atua tibe na bior napano mia aialio ka kamiũ maka kuvitu kuviololu ka Kristo kanano Ioluanu Vou ga, mia kumitu kumijogkar bunu ka venia napano naio beriio, a mia aial ka jidomiano napano kumijianio bano toru laka, napano mia mijikia rijai nalo ve toru a rijai nalo dolu bunu. Naruei bogo napano amialio vite juo nei, mia abitilubar von bunu ka kenemiu iñauano jo berialio ka kenemiu viekouoiano kirisikili vatitig ga a be riano jo. ¹⁴ Mia nalo aial napano Atua kiano tiniememiano bujo lou laka ea kenemiu iviso jibe na, naruei mia tiniei maio ka kamiũ bano-o, mia tiniei miia kamiũ, mia aju abolkouo ka kamiũ julaka.

¹⁵ Bo ka aver siva ka kamiũ bior kenemiu jidomiano novo na jibe na, mia bo bunu ka kito nonovio rover siva laka van Atua tulaka bior jidomiano novnovo napano naio jianio ban kito, napano kenerinio nei, Yesu Kristo.

10

*Pol berdoŋe nalo napano
amil niege kiano iñauano*

¹ Bilbilu nalo, kamiũ kumijikia ka kiniou nei Pol ga nojo nobivitau biedu, mia nojidom kamiũ kuvijev kiaku iliano ea bajago na bev-erare ka Kristo kiano bajago, napano naio be tum̄aro bo a melokloko bo. Naina naruei bajago napano nojo

nomila von ka nala van kami u nua, mia nemijikia ka tomu tai napano aju amilkue kiniou biorio. Nalo aju aber bogo napano nojo bija kami u, kiniou nomelmeloko laka, a nomerou ka noil, mia nalo aber bogo napano nobivitaui a mēsi biedu, nomila kiniou jibe toro tai napano nomijikia nomil jikili, bior napano ga nojo koalabo den kami u. ² Nina bo ga na, mia kami u monoka kuvijikia ka bogo napano namaluvo kean kami u, ver neial ka bo noil sikili, nomijikia nala ga. Mia vite na naruei nojidom never ka kami u, a neber bo ban kami u, nebika jikili den kami u ka kuvila von vovaiano nalo nei amei rivu kija, bogo napano maka nomaluvo kean kami u vo. Ver tibe na, bogo napano neviedu, mia ve re vite tai napano monoka noil sikili riviorio, ana ver makanio, maka nomerou ka novuku iliano tealo napano jikirkili mia jikirkili van nalo napano aju joomo ea vovaiano nalo nei, a napano aju amil niegeniege kumemi, aber ka kumemi numitu numimāu jakii jidomiano na yetemeriba ga.

³ Ee, kito nonovio rojua yetemeriba nei, mia kumemi maka nuvitu nuvitakii kiano bajago. A be riano, numitu numila mira tai ea yetemeriba nei, mia mira nene maka na vio na. ⁴ Kumemi numitu numiasol ea mira tai napano moroano nalo na vio mave aju amila die moroano nalo na vio na

jogvaiano, a tenalo na mira napano numitu nubokario, nalo maka tena yetemeriba nei, mia numitu numila mira ea moroano na Niununo Lu napano mijikia riolkon bulag vio na jikirkili nonovio napano vite va nalo aju ajuluku eaio. ⁵ Ver nalo aver ilivovaiano nalo die Tubo kiano imāuano, mia kumemi numijikia nuvituvulu lo ga. Ver abe mārrou, amila von ka atukovio ka kanano imāuano, mia kumemi numijikia nuvar dulu ka nuvila tomu nalo ajikia naio ea kialo meuliano. Ver nalo atumolu vija kialo jidomiano va nalo, mia kumemi numijikia nuvilig tomu nalo nei amei napano kialo jidomiano rimej sikili ka atakisor Kristo ga. ⁶ Numijikia nuvila tibe na ka kami u rivano-o kuvilig kami u, kuvijamo ka kuvidu kami u kuvitu yetano ka Tubo kiano iliano, a iorou mia nuvila rivan ea vio dolu nalo napano tomu nalo na jukujukuano ajuaio.

⁷ Naruei ea tivelinio na toro nei napano be burupati na jaleleano nei, pēli kami u kumitu kuberiamā vite nonovio bo ga, bior napano toro nei naio ber be namoneano tai. Mia neber bo ka kami u kuvitii re ea kuluniabene ga, kuvila von ka kuvitii vatitigio ea vite napano be riano napano joa miremiu ruei. Naio ber ka be namoneano, mia bo ga, mia naio jo mila bova, a bo ka naio rivitii vatitigio kiano meuliano

bereio. Kumitu kumisidom kuviagago ka naio kia ga, mia jumabe, kiniou bunu nebe namoneano, ana bior vaio maka kuvisidom kuviagago ka kiniou? ⁸ Kiniou neber jibe na, p̃eli mia kamiu tealo ailkue ka kiniou bereio, averinavo kiniou nojidom notovulu lie ga, mia maka tibe na. Peli be riano ka bogo tealo nebe m̃arou laka, p̃eli nojo noberii laka ka kumemi naruei numitu nubitika kamiu, mia maka nala titai rivova napano monoka noimou riviorio. Kiniou nojo neberii jibe na bior napano Tubo ga midu kamiu kumitua jumememi nua ruei ka nuvila kenemiu meuliano rivija naio rimeĩ mave. Ver kamiu kuberka kumemi numitu numil ban kamiu ka nuvila bulag kenemiu meuliano bereio, maka tibe na lelejo. ⁹ A ver kamiu kuberiam̃a kiniou nebe toro na tiniemimiano napano nojo nobivitaũia ea m̃esi nalo biedu ka rila kamiu monoka kumerou ka kiniou, nina bunu maka rimemedu.

¹⁰ Kiniou nomijikia ka tealo aju aberii kiniou jibe na ruei, aberinavo “O Pol na, kiano m̃esi nalo abujo ka iliano na teremi nalo napano ajikili laka, mia ver koial naio, jibe toro ninio tai na melukluku ga, a ver kojog naio mil, melala ga.” ¹¹ Mia nojidom never ka nalo na never bo ka avitilubario ka venia napano nojo nobivitaũia bulag ea m̃esi, bogo napano maka nuvitu vija kamiu, naio bare

ga ka venia napano mia nuvitu nuvila ea miremiu, bogo napano numitu bija kamiu. ¹² Neber jibe nei, mia maka nosidom never m̃elea vite ka ridular siememi bereio. Maka nosidom ka nomei tibe tomu dolu nalo, napano aju abe m̃arou laka ka averial kialo vite novo nalo bereio. Tomu kinkin nalo nei aju abitii veve kialo bilbilu nalo, p̃eli aju abitii veve tomu dolu nalo, ana aber p̃eli nalo abo lie ajovulu lo, mia nina be im̃auano tai na vovuiano ga, bior napano p̃eli nalo nonovio na abova beberare ga.

¹³ Tibe na, mia neverii re laka ka kumemi riva lie laka, mia monoka noverii vite tealo van kamiu napano amemedu ka im̃auano nalo napano Atua midu joa jumememi, a joomo eaio, ba bokar vite tealo ea tivelinio na vitikariano na kamiu napano kumemi numitu numilaio. ¹⁴ Kumemi maka nuvisidom ka nuva laka ka nuvila von ka nuvitu mave ka kamiu, mia memedu ka numial ka numijikia nuvisian iliano tealo napano monoka kuvatove kanio, bior napano monoka tiniemiu ribobogia re ka kumemi naruei nube moti ka numidu Kristo kiano Ioluanu Vou binimeĩ lilian bokar kamiu. ¹⁵ Ver tealo dolu nalo abinimeĩ ruei ea kamiu beamu, mia maka nuvisidomii ka nuvisirarago ka kamiu p̃eli ka nuvisian iliano van kamiu tibe nei. Mia kar napano numitika im̃auano bija kamiu,

11

monoka nuva lie vija kamiu. Numisidom ga ka kenemi u viekouoiano to riluo bogo nonovio, a numisidom laka ver tanobuku na vio na kenememi iṁauano mijikia rimei ve toru lie, maka ea kenemi u vio ga, ¹⁶ a mia kumemi nuvisaaro ṁlelea ver kuvijikia kuvija kumemi ka rila ka kito rava lie roioliolu ka Ioluano Vou ea venuo dolu nalo tivelinio ka kenemi u ban lie, ka ravan roteṁpe viomoru o ea vio nalo napano tomu dolu nalo maka avan aioliolu eaio vo. Tibe na, ver bogo kito roverii iṁauano nalo napano mia rola ea vio nalo na, mia maka ajikia averii niegeniege kito ka roju rabarvar kito ka ṁarati napano miyotuba ea toro dolu kiano tiniavio! Ea bogo na, mia amijikia ka roju roberii ṁarati napano miyotuba ea kiado tiniavio napano kito ga roba romebijaio.

¹⁷ Jidomiano nalo nei abo laka, ana bova ver robe ṁarou ka vite tai napano romilaio, bior napano Niosi Lu berenio ruei, berinavo

Toro napano jidom ve ṁarou ka vite tai, monoka ve ṁarou ka venia ga napano Atua milaio. Jer 9:24

¹⁸ A bova kito roiaia kito bereio, bior toro na bo be riano, maka nina napano naio bereio ga ber ka naio bo, ana naio be naina napano Atua ga ber ka naio bo.

Tomu na Korin ajakisor atevi sibusibiano nalo

¹ Peli kami u kubuluku iliano teal o napano nobivitaui a ruei, kuber ṁeli nomil vovu, mia nojidom kuvila kenemi u jidomiano rive terebievi kija van kiniou, ana mia nala von never teal o lie bereio. ² Monoka never iliano nalo nei bior napano bogo nonovio nojo nojidomii laka ka kami u. Mia never tibe nei, never nemial kami u jibe kube kiaku niatira novo tai, napano neberkarikoio ka risoro ka koano napano Kristo. Nomijog jibe nomijukua vatitig ka kami u, nojidom novitika r vatitig kami u ka kuve riano ea verikariano nei, a nina jibe bunu Atua, napano naio mijukua vatitig ka kito, maka sidom ka rotuvan naio rava iorou bereio. ³ Mia kiniou bunu nomerou kija ver toro dolu rimei rivuru kenemi u jidomiano riva ve dolu bereio. Jibe nua na, maro nei binime i mila sibilili tira nei Iv, mila vonvon vatitig naio mila mijoru ea kariano, naruei maka nosidom leleio ka bogo tai kami u kuve riano re bunu ea Kristo, tiniemi u tii vatitig re bunu naio ga ve takurano.

⁴ Neber jibe na bior napano nobitilubar pariparimiu kija ruei. Bogo napano verialiano tai binime i berii Yesu dolu tai napano maka Yesu na kito romioliolu kanio, a vonganei ga kami u kumoneaio. A

bogo napano niununo dolu tai maluvo ea kamiu napano maka Niununo na Atua jianio, kamiu kuviako kirisofeli ka kuviduio. Peli bogo na mia Ioluano Vou dolu tai rimalmaluvo ea kamiu, nemijikia ka mia kuvisaaro ka kuvijogkar naio tibe na ga. ⁵ Atevi dolu nalo aju amila sibi vatitig ban kamiu ka vite nalo nei, mia nemial ka kumitu kumisidomii mave laka kalo. Kamiu kumila jibe napano nalo ga abe atevi na kiado yetemeriba nei, a kumitu kumidu kiniou nojo yetano, naruei maka nosidomii ka nina naio memedu. ⁶ Ee, nemijikia ka tomu tealo aber ka kiniou maka nejikia noioliolu rivu laka, ana nemijikia ka maka tai napano mijikia vite laka lie ka kiniou, mia neberiamia kamiu kubitilubar vite na ruei, bior jo maluvo binimej meravo bo ea imauano nonovio napano nomiñaukanio ea miremiu.

⁷ Kiniou nemijikia ka ea tivelinio na abarvar veru nei, tomu tealo maka asaaro kanio leleio, mia maka nejikia bior vaio jibe na. Peli nalo aberiamia nobika veru nei ka ve kiaku ga? Mia makanio, bior bogo napano nebinimej nomioliolu ka Atua kiano Ioluano Vou ban kamiu, maka lele never ka kamiu kuvisian vite tai van kiniou. Nomidu kiniou nojo yetano garuei, ka nemijikia nodu bulag kamiu rivavin, mia peli kamiu tealo tiniemi jer kiniou ka

nomila jibe na? Peli kuber kiniou namila bova ka maka novika vite ninio den kamiu ea bogo na? ⁸ Nemijikia never rimemedu van kamiu ka bogo na, namoneano dolu nalo aju ajian jidomiano binimej ka aija kiniou, a nojo nojen veru nene ga bogo napano nomiñau ea kamiu. Mia maka nala vite novo tai vanlo ea bogo na, naruei nomijog jibe ka nobena ka kialo veru ga. ⁹ A bogo napano nojo bija kamiu, jumaku bulati o-o, mia kuruaku nalo juo na abinimej Masetonia abitilubarjo napano nojo nemije jaleleano jibe na, ana abitikar vatitig kiniou. Maka lele nemej neteg van kam tai rivior vite tai, a neberkar ka mia maka lele nejikia nala niegeniege kamiu napano nomiyuku kamiu ka monoka kuvila tibe nei peli tibe na van kiniou.

¹⁰ Neberkar jibe nei bior napano tinieku m̃aro ka tomu nalo aju amil niegeniege aber ka jijer kiniou bior kialo veru, a mia neverial kiaku verikariano nei ea vio nonovio nalo ea tanobuku na Akaia. Maka lele numerou, bior neber kar ea Kristo siano napano kiano ilirianiano joa kiniou ka mia nala garuei. ¹¹ Naruei bogo napano neber jibe na, peli tomu tealo mia aver ka kiniou nojidom nala niegeniege siemi ga, peli aber ka maka tinieku tii kamiu, mia maka tibe na leleio. Atua mijikia vatitigio ka tinieku jii kamiu

toru laka. ¹² Mia monoka nosikili ga ka verikariano napano nojo neberio, mia monoka nala ga, bior napano nojidom nouebin nalo dolu nei kialo sebi napano aju abarvar kalo janea vio jibe na. Nalo aju amila von ka aber ban kami u aber nalo amiñau vio takurano bija kumemi, aju amila iñauano napano bare ga ka nana numitu numilaio, mia maka tibe na.

¹³ Tomu nalo na jibe na, abe atevi sibisibiano nalo ga, amiñau maka rimemedu leleio, mia aju amila vonvon kami u namoneano nalo, jibe abar Kristo kiano ateviano nalo miralo. ¹⁴ Mia monoka roiilo re napano amila jibe na, bior ka kialo toro na toru nei napano Simaro, naio bunu jo mila jibe na ruei. Naio mijikia rila ka nailiano novo tai na yulu, ¹⁵ naruei romialio ka tomu nalo na kiano iñauano abilivilig tomu nalo bunu, amila lo jibe tomu nalo na iñauano na bajago memedu. Mia bogo na, romijikia ka mia avano ga abisi ea vio napano memedu ga ka kialo iñauano va nalo.

¹⁶ Mia jibe na napano neberenio ruei, maka nosidom ka noil tibe na ana mila na tealo aber ka nomiavovu, mia ver asidom averenio, kuvituvanlo averenio. Mia ver tibe na, bo ka ala ka kiniou tibe napano amila ka vovu nalo, ka atukovio re ka kiniou beamu, mia atuvan kiniou ka never venia

napano nojidom neverenio. ¹⁷ Bogo napano nojo noberii kenememi iñauano, ver nojo nomil mñarou laka kanio, rila ka be riano ka nojo nomil vovu ga na, a mia Tubo saaro re kanio. ¹⁸ Maka rivu roil mñarou laka, mia kiniou maka netibe ka kulo dolu nalo napano aju amil mñarou ea kialo vite nalo na yetemeriba nei, bior napano ver noil mñarou, nojo neberii vite novo nalo ga. ¹⁹ A nomialio napano kami u kumitu tiniemi u jii tomu dolu nalo napano kuber ðeli abe vovu, bior napano kubitiilo abe dolu, nalo maka avokar masouano rivu nei napano kumisidomiio kuber kuvitoaio. Mia ver kuvisidomii kuver kiniou bunu nomiavovu, bior vaio kami u maka kuvijikia kuvila kenemi u jidomiano ve tebievi kija ea kiniou bunu?

²⁰ Kiniou nomial ka kami u kumituvan ban atevi sibisibiano dolu nalo nei ka ala vite va ve miroano van kami u. Amila jibe ka kami u kialo tomu nalo na iñauano, nalo amila niegeniege kami u, abar kenemi u saba nalo, amidulo aju mave ka kami u, a ver asidom amijikia ajuba miremi u. Kami u kumitu kumituvanlo amila jibe na, mia juñabe? Bogo napano neber iliano tai ga, bior vaio maka kuvisidom kuvijog leleio? ²¹ Peli bo kanio ver kiniou bunu nojo ga nomila bajago ninio nalo jibe nei ban kami u, ðeli mia rila kami u kuvisaaro ga

ka kiniou? Mia aua, ĩeli nomelukluku laka, maka navare ka nala nina na.

Bo ga, nober iliano na, nomijikia ka tomu tealo mia aver ka nojo nomil vovu bereio. Mia nejidom never ka verver atevi dolu nalo nei ajidomii aber amijikia ailivarvar bior napano aber vite tealo ea tivelinio na nalo abo, mia kiniou bunu nomijikia noilivarvar ka vite nalo na. ²² Ver atu adu bulaglo mave ka abe Ipru, mia kiniou bunu nobe Ipru. Ver avitiri bulaglo aver nalo abe tomu na tanobuku na Israel, mia kiniou bunu tena vio na. Ver adulo atu mave bior napano aber ka nalo memedu ka Epraamo kanano taara, mia kiniou bunu nobe taara nene. ²³ A mia novika vikadeniano van kamiu vonganei, neber nalo na amĩau Kristo kiano ba bokar imauano napano kiniou nomimaukanio? Makanio, neber ĩeli kiniou nomila bo lie loa ka nalo. Maka rivu noto noverii kiniou bereio tibe na, mia pariparimiu kirisikili laka mila na kiniou bunu vaataro paripariku rive vovu, ana nojumolu nomil jibe na. Mia vite na be riano laka, napano nomila imauano na tortoru nalo loa kalo, tomu na tortoru abuku kiniou ea nalakoiano va miroano jovulu lo, abitiv kiniou va vio maka nejikia novolukuio, a bogo miroano bunu napano ka mia namaro ga. ²⁴ Kiniou

nemijikia ka va jimo ruei, tomu na tortoru na kulo Ju nalo abitiv kiniou napano ea va terakurano ea va jimo nei, teli jaburu ea niabeku va duelimo va rolu ba koveri [39]. Maka ajamo ka alaio riva rivokar va duelimo va veri [40], bior verver makanio, nina tena marioano ga. ²⁵ Mia va rolu amue kiniou ka iesi nalo, a bogo tai bereio ajuba kiniou banbano-o vaataro ka namaro. Va rolu ruei nojoa tei uako madudu, a ea bogo nalo na tai, nojo nemialalo ea tei bogiano momou tai a legiano momou bereio. ²⁶ Kiaku ieliano nalo terebievi miroano laka, a ea bogo nalo na nobinua bogokouo telabo na marioano. Uei nalo na bolu nalo vaataro ka adular kiniou, tomu na amue van toro amijil kiniou, kiaku tomu nalo ga jibe Ju nalo amilkuei kiniou, a nalo napano maka ave Ju amila bulag kiniou bunu. Kiniou naban ea vio vabe, jibe ea komeli, ĩeli yeturu, ĩeli ea tei, mia nubinua bogokouo, a bogo nonovio, kuruado sibilibiano nalo nei aju amilkuei kiniou. ²⁷ Bogo nonovio nabano bija imauano kouo a bogokouo, napano maka nejikia nomonmelio, napano midoujer laka kiniou a jijer kiniou napano sinaniano maka leleio, a naban napano maka noial vio na notoluku eaio ka burumara vio menini.

²⁸ A mave ka bogokouo nalo nei, bogo nonovio ga nojo nojidomii laka ka kiaku imauano bija namoneano lu nalo, napano jibe vite tai napano teremi mia teremi ka kiaku meuliano. ²⁹ A nojo nojidomii kamiu laka bunu, napano ver neial ka kamiu namoneano tai rime melmeluku, mia mila napano tinieku m̄aro laka garuei, a ver nojog ka tai mijoru ea kariano, mia rila napano tinieku mijalele laka.

³⁰ Naina naruei vovaiano ninio nalo napano nojo nobinuaio, a nomialio ka nomelmeluku laka ka nola Tubo kiano imauano, a maka nola vite novo tai ka noilivarvar kanio, mila na noilivarvar ka bogokouo nalo nei napano nebinuaio. ³¹ A kiado Atua, napano naio be Yesu Tubo karam̄ano, napano mia roiaia siano to toboto naio, mijikia ka maka nala sibi, vite nalo na napano nojo neberenio aberiano nonovio ga.

³² A jogvaiano toru dolu tai bereio napano nobinuaio, napano maka noverio mave ea vio nei, nina ea bogo napano naban ea komeli na toru nei Damaskas. Ea bogo na, parinio tubo na tanobuku nei naio be toro nei Aretas, a kiano toro na toru napano bitirilar naio ka vitikar komeli nei, jidom rivakar kiniou, naruei miila kiano menumia nalo aba ajuko morouo nonovio na vio na ka maka

nejikia novuro. ³³ Vaataro ka avokar kiniou, mia bilbilu tealo amiija kiniou amiduvan kiniou joomo ea burum̄ara basaro tai, ana amiorkar teli eaio ajikili aju mave ea burum̄ara basio na vio na, ajuvarvanio melmelumu tavio ka basio, batove bokar yetano ana nomoluo den basaro nei noburo denlo nabano.

12

Vite nalo napano Pol bitii ea monovovuano

¹ Bo ga, nemial ka ver nojo noberii kiniou jibe nei kia ga vo, mia maka nejikia nevilig kenemiu jidomiano rime rivu ka kiniou bereio, mia bo ga na, nomijog jibe nojidom neiasol iliano bereio ka neverii vite nalo napano nemialio a vite nalo napano Tubo jiloglogio ka kiniou ea monovovuano nalo. ² A mia nojukunu ka Kristo kiano toro tai beamu, napano nomijikia vatitig naio, napano yuka duelimo ba veri [14] barlaka ruei bokar vonganei, naio jo mia jabujo ka aburu naio ba miyotuba mave ea vio sofi tai mave. Maka nejikia ka naio ban bija mokotenano nonovio p̄eli ga mijikiaio. ³ Buriakurano napano ver naio rivan ea mokotenano p̄eli rivan ea niununo ga, nomijikia ka beriano, toro na ba mijaka bitii joomo ea kiado vonuo novo ea vio na. ⁴ Naio mijog vite miroano napano maka

ka averialio bereio, napano maka bunu iliano nalo na yetemeriba nei tai napano vare ka averiio.

⁵ Naruei bogo napano neberii toro nei, Ɔeli kumilo, kuber ka toro nei, be riano ga na, nina toro tai na. Mia jumabe, ver never ka maka toro dolu, mia nojo noberii kiniou ga, Ɔeli mia kamiu kuver von ka nina maka vite tai ga na? Tibe na, nomial ka ver nojidom noil mēlea ka vite na tortoru tealō van kamiu, bo ka neverii ea toro dolu siano ga, ka kuvisaaro ka kumoneaio, mia ea siaku, noverii vonvon kiaku vite nalo na tertelisu ga. ⁶ A mia ver nojidom noil m̃arou ka vite na tortoru nalo napano nomilaio, mia toro tai re rijikia river ka kiniou nojo nomil vovu, bior vite nalo abiniu aberiano. Mia maka nosidom noil laka ka vite nalo na tibe na, bior napano bova nomila von ka nala kamiu kuvidu kiniou noto mave rivor vite tealō napano maka kuvialio kija a maka kuvijogio kija, mia kiniou ga nojo noberii. Kiniou nojidom ka kuvitu kuvitii kiniou ea im̃auano venia napano kumial nomilaio ka kamiu, a ea iliano venia napano neberio ka kamiu.

⁷ A nemial jibe Atua bunu maka sidom ka kiaku jidomiano rimei to mave laka ea monovovuano nalo a vite nalo napano naio jo berialio ban kiniou, ana naio jian jaleleano tai joa mokotenaku napano nomijog jibe nionoti

molu tai napano Sim̃aro jo julu kiniou bijaio julaka, napano jo mila mokotenaku mijalele, a jo mila kiaku jidomiano jo ga yetano. ⁸ Kiniou nebika den Tubo ka ridular vite nei den mokotenaku, ana maka rilaio, kario valuo nene nobolkouo ka naio biorio, kario varolu nene bereio, mia maka garuei, ⁹ naruei naio m̃il ban kiniou ga, ber jibe nei ber “Mia kiaku tinietiiiano ga bare ka rivokar vatitigso, bior napano kiaku moroano mijikia rim̃au ve toru lie bogo napano rim̃au rivija kiamo meluklukuano.” Iliano nei naruei mila na kiniou nojaaro ka noverii kiniou lie bereio, mia noverii kiaku meluklukuano nalo ga, ka rila na Kristo kiano moroano mijikia rim̃au lie ve toru ea kiniou, jibe napano naio berenio. ¹⁰ Tibe na, ka rila na siano rimei ve toru lie, nomijamo ga ka neber nojaaro ka meluklukuano nalo ajua mokotenaku, Ɔeli ka avitii kiniou rivova, Ɔeli nobinua bogokouo nalo, Ɔeli amila bulag kiniou, Ɔeli nubar-dulu jaleleano nalo, bior napano nomijikia ka bogo na nomelmeluku, Kristo naruei mia rila kiniou nesikili.

¹¹ Banalo! Nojidomii iliano nalo napano neber bulaglio ban kamiu ea vio nei, nomialio ka be riano, nojo nomil jibe nomiavovu laka. Kamiu kuviekokoa kiniou, mia bo ka kuviti-lubar bunu ka kamiu naruei kumila kiniou jibe na. Neber Ɔeli

mia kamiu naruei kuvitu ku-verii vatitig kiniou, napano kumisaaro ka vite novnovo nalo napano nomila ban kamiu ruei, mia makanio, kumitu kuberii niegeniege kiniou ga. Nemijikia ka kiniou nebe iakurano ga, mia neber ĩeli maka nobova loa atevi sibisibiano dolu nalo, naruei bior vaio kamiu kumitu kumiaia laka nalo?

¹² Bo ka kuvisidomii bereio vite nalo napano nomilaio iviso kean kamiu, napano aberialio ka kiniou naruei nobe atevi riano. Bogo nonovio ga, kiaku jidomiano tebievi bo ka noimāu melmelumu vija kamiu, a nomila kamiu amial vremesiano nalo, bija vite nalo na iloiano, bija kijokijo nalo na Atua kiano moroano.

¹³ Nemila vite nonovio ban kamiu bo laka, beberare ga ka venia napano nomila ban namoneano lu dolu nalo, naruei maka ail muĩio, mia kamiu kumil muĩio. Vite tai ga napano nomilaio banlo, a maka nala van kamiu, maka nevika ka kuvitu kuvitakar kiniou ĩeli kuvijai kiniou, jibe napano nalo amila ruei, mia ĩeli ea vio na naruei nomila bova? Ver tibe na, kamiu kuviekokoa kiniou, bior napano ĩeli ver kiniou novika vite ve miroano ruei den kamiu mia kamiu, kuvisaaro ga ka kiniou naruei?

¹⁴ Bo ga, vonganei naruei nojo ka noviedu noial kamiu bereio, napano varolu nene naruei. Kiniou neberkar ka mia nola re burimāuano van

kamiu, bior napano maka noviedu ka kenemiu vite nalo na aija kiniou, mia neviedu ka kiniou naruei neijia kamiu. Nina jibe teta nalo a nena nalo bija kialo kiritete nalo, napano maka kiritete likiliki nalo kialo imāuano ka avitakar kialo tormoruo nalo, mia tomoruo nalo naruei monoka avitakar vatitig kialo kiritete nalo.

¹⁵ Naruei jibe na, kiniou najaaro ga ka nesian kiaku vite nonovio, vija kiaku meuliano bunu, ka rijai kamiu. Nemijikia nala tibe na bior napano tinieku jii kamiu laka, mia nomijog kirivova bior napano nomial ka bogo napano kiaku tinietiiiano ea kamiu jo bavin lie, mia kenemiu tinietiiiano ea kiniou jo batove ga.

¹⁶ Kiniou neber jibe na bior napano nomijog kenemiu iliano dolu tai ruei. Kamiu kubitilubar ka bogo napano nojo bija kamiu, maka nala burimāuano ka kamiu ka kuvitakar kiniou, a maka nesen kenemiu veru leleio, mia jidomiano tai joa kamiu kia ga. Kuber kiniou nebe masou vatitig ka bajago nalo na ala sibilili toro, naruei kumitu kuber nojo nomila lukua mārabo tai ka nola sibilili kamiu bior kenemiu togogo nalo. ¹⁷ Mia maka tibe na leleio. Kamiu kuvila von kuvisidomii vatitigio ka nalo napano nojo nomiilalo ka aviedu kean kamiu. Kumial napano amila niegeniege kamiu ka vite tai, ĩeli abar kenemiu vite nalo tealó be kiaku?

Neber ĉeli makanio. ¹⁸ A ĵumabe bunu bogo napano nojikili ka Taitas ka naio naliko kuruado dolu nei, nalĵuo monoka ayotuba kean kamiŭ? Kumialio ka amila sibilisibi ka kamiŭ ka kenemiŭ veru tealo? Maka leleio, bior napano kumemi ĵibe taara takurano ga, napano Niununo takurano ga joa kumemi, a kumemi numitu numitakii mĉarabo tai na imĉauano ga, napano maka leleio nuvisodomii ka nuvila Tubo kiano imĉauano ka nuvar saba ve kenememi.

Pol ĵidomii laka ka bogo napano riva Korin mia tumĉabe?

¹⁹ Kiniou noĵo noberii kiaku imĉauano ĵibe na, ĉeli kamiŭ kuber ĉeli noĵo nomila von ka nodular siaku mave ea miremiŭ ka rila kamiŭ kuvisidomii re rivova ka kiniou. Mia makanio, maka noto tinieku maio ka kiniou, mia noĵo tinieku maio ga ka kamiŭ, a iliano nalo napano neberio, neberenio ĵibe Kristo kiano toro tai, ea Atua mirano, ka rijai kenemiŭ meuliano nalo.

²⁰ Neber iliano nalo nei bior napano nomerou laka ka maka rivu kiniou namaluvo kean kamiŭ, ana noial ka kamiŭ kumitu ea vio tai napano maka rivu leleio ea kiaku ĵidomiano, a nomerou bunu ka maka rivova ka kamiŭ maka kuvisidom kiniou. Ver tibe na mijikia rila ka kito rala baravo ka kito, ĉeli rosidomii rivova kean kito, ĉeli tiniedo seri kito, ĉeli rosidomii re toro dolu mia rosidomii kito ga

veve terakurano bereio. Ea bogo na ĵibe na toro mijikia rioliolu, mijikia ril ea toro dolu, mijikia ril varvar, a mijikia rila yotubaiano laka. Ver rivan tibe na, bova ga ruei. ²¹ A nomerou laka bunu ka bogo napano noviedu bereio ea kamiŭ na mia nomial napano kiaku imĉauano nalo ea kamiŭ ajibirbil vatitig garuei. Ver tibe na, mia rila noimou laka ea Atua, rila kiniou noĵog ka naio burudobi kiniou toru ea miremiŭ. Mia nomial ka mia monoka tibe na ga, bior napano burumĉara kariano napano kamiŭ tealo aĵu amilaio, naio be bajago va tai na siakaiano napano amila korov tuboiano na Atua midu jo ka toro a tira monoka atakiio, a nalo maka aviliglo kanio leleio, a kuvitu kuvituvanlo ga ka nalo atu alaio rivano.

13

Iliano maaro na rilabonlo

¹ Bilbilu nalo, ĵibe napano neberenio, nina naruei ieliano varolu napano mia nala ka neviedu ea kamiŭ, a ĉeli mia bogo varolu na monoka noil van kamiŭ ka jaleleano nei. Nina mila kiniou noĵidomii iliano tai ea Vivitauiano Lu nalo napano berenio ĵibe nei, ber

“Bogo napano amil ban toro tai ea komeli ka kariano tai,

monoka ve ĵuo ĉeli ve tolu napano amijikia averial kiano kariano,

*ka rila avitii ve riano.”
Tiut 19:15*

² Kiniou nojidomiikar nina bior ka bogo na nomaluvo kean kami u ea bogo valuo nene nua na, nomil ban kenemi u tom juo napano amila kariano nei, naina naruei bogo moti napano nomil banlo jibe na. A vonganei nojo nomil valuo nene bereio ea mēsi nei, a ver nomei noil bereio, nina mila varolu nene. A kiniou nojidom never ka nalo nei, vija nalo dolu napanoaju tivelinio na nalo, ver nomei noil bereio, nina mia tinieku tii re lo, mia notiburelo ka vironiano na jikili tai. ³ Kamiu kumitu kuber bo ka kiniou noverial kija kiniou ka beriano ka Kristo jo mil riano ea kiaku iliano nalo, ana ver kami u kuvisidom tibe na, bo ka kami u kumei kuviagago ka kiniou ea bogo na, naruei mia kami u kuvi-alio. Mia kuvitii ka bogo napano Kristo jidom rila kiano iñauano ea kami u, naio maka lele melmeluku, a mia mijikia riñau vija kiano moroano nonovio. ⁴ Bogo napano ajukar naio ñaro ea ñakolkolo, romial ka mokenano binime melukluku garuei, mia bogo napano naio jumolu meul bereio, naio bujo vatitig ka Atua kiano moroano nonovio. A kumemi numelmeluku bunu javukia naio, mia bogo na numila kiano iñauano ka rijai kami u, numitu numiñau bija moroano napano Atua mijamo ka ban kumemi.

⁵ Kiniou nojidom nover

bunu ka nomial napano kumitu kumitibure kiniou laka, ana jumabe, kami u maka kuvijikia kuvitibure kija kami u bereio, ka kenemi u viekouoiano jo jikili vatitig kiano pēli jumabe? Kuvitii vatitig kami u, kumitu ku-bitilubar ka Yesu Kristo jo miñau ea kenemi u meuliano kiano, pēli makanio? Verenio makanio, pēli teaload aju meuliano napano Tubo maka leleio toaio, a nalo maka ave namoneano napano abe riano. ⁶ A ver bogo tai kuvisidom kuvitii veve kenememi meuliano bunu, mia bo ga, a nojidom laka ka mia kuvitilubar ka Tubo jo miñau ea kenememi meuliano, naruei maka nuvila luvu niati nene tai. ⁷ A kumemi numitu nubolkouo ban Atua ka riñau ea kenemi u meuliano ka kami u bunu maka kuvilaluvu vite tai. Ver kami u tibe na, mia mijikia rila siememi rivu bunu, bior napano kumemi naruei nuberloglog kami u, mia kumemi maka nubolkouo ka kami u bior siememi ga. Ver tomu nalo aial ka kumemi numiñau bova jumabe, nina naio bo ga, mia kenememi jidomiano na toru, numisidom ka kami u monoka kuvitu kuvila rimemedu bogo nonovio. ⁸ A kumemi bunu, numisidom ka kenememi iñauano nonovio bunu monoka memedu ga ea Tubo kiano ilirianiano, maka nuvisidom nuvila vite tai napano riuedom kiano ilirianiano nei bereio. ⁹ Kumemi numitu

numiñau kiano ga, naruei ver bogo tai rila numei numelmeluku, numisaaro ga, bior napano numijikia ka bogo napano numelmeluku, a kamiu kumitu kubinimei jikili. Numitu nubolkouo bior nina ga, ka mia kuvitu kumei rivu lie bogo nonovio.

¹⁰ Jidomiano nei naruei mila nobivitauiã m̃esi nei biedu ban kamiu vonganei ea bogo na nojo koalabo den kamiu kia ga. Kiniou nojidom kamiu kuvijogkario, a ver kuvilaio, mia bogo na noviedu, noil sikili re bunu van kamiu. Tubo midu kamiu kumitua jum̃aku ka novitkar kamiu, maka ka rila bulag kamiu, mia ka rila kamiu kuvavin maye. A ver noviedu a noial jum̃abe, mia monoka nala sikili van kamiu ka venia ga memedu ka nalaio.

Pol berenio bogiano bo kalo

¹¹ Bilbilu nalo, nebinimei ea kiaku iliano maaro naruei, nober bogiano bo ga ban kamiu. Neber bo, kamiu kuvila von ka kuvila kenemiu m̃arabo rivu vatitigio. Kumonea vatitigio ea vite nalo napano nobika den kamiu. Kamiu nonovio kuberakkar jidomiano novo tai ga. Kuvitu bo ga ea bajago na tum̃aro, naruei mia Atua na tiniememiano a tum̃aroiano to vija kamiu.

¹² Bogo napano kumitu kubiviuo kamiu, kuvan jumemiu vatitig van kamiu, kuviniom babibiniomiu ea saariano lu. ¹³ Namoneano lu nalo na vio nei aber kialo

bogiano bo binimei ban kamiu bunu.

¹⁴ Naruei kiaku volkouano ka mia kiado Tubo Yesu Kristo kiano tiniememiano, bija Atua kiano tinietiano, bija voroniano na Niununo Lu, atu vija kamiu nonovio.

Kiniou, Pol.

Mesi Napano Pol Bivitauiaio Ban Namoneano Lu Nalo Na KALESIA Verialiano Moti

Tukunuano bulati na niosi nei

Kalesia, naio be tanobuku tai napano jo yetano ka Parinio Tubo na Romo, a joa venuo nei napano banei siano Teki.

Ea bogo na napano Yesu kiano tomu nalo ajikar ka aba aberiel ioluanu vou nei, tomu telabo na maka ave kulo Israel, ajaaro toru laka kanio. Mia tomu tealu aju, napano ea kialo jidomiano, nalo aberinavo ver toro sidom rimei ve namoneano riano, naio monoka rimonea tuboiano napano Atua jianio ban Mosis. Naruei Pol milkuei kirsikili kean jidomiano na, berinavo bajago na maka rimemedu leleio. Naio berinavo ver toro sidom rivokar meuliano ea Kristo, burupati vite nei, naio monoka rimonea Kristo. Ea bajago na ga, tomu nalo amijikia amei memedu ea Atua mirano.

Mia ea yimo lu nalo na tanobuku nei Kalesia, tomu tealu abinimei, aju amilkuei Pol, nalo aberinavo ver toro jidom rimei rimemedu ea Atua mirano, naio monoka takisor Mosis kiano tuboiano nalo.

Mesi nei Pol jirio ba ban tomu nalo napano aju ajakisor verloglogiano va nalo nei, ka rivurulo amei bereio ea moneano napano be riano a ea bajago napano memedu. Ea kiano tikariano na mesi nei, naio berial ka naio be kiano meruoiano ka tomu nalo avio naio, ka Yesu Kristo kiano atevi. Naio judu berinavo tomu nalo maka adu meruoiano van naio ka naio rimei ve atevi, Atua naruei bitirilar naio, bio naio ka verial ioluanu vou van tomu nalo napano maka ave taara na Israel. Mia naio jokia milkuei keano verloglogiano va nei, berinavo toro kiano moneano ga mijikia rila naio rimei memedu ea Atua mirano. Ea mirano nalo maariano na mesi nei Pol berial ka bajago novo napano namoneano nalo ajumia ami-laio, miyotuba ea bajago napano toro tinien jii kuruanu a kuvivinienu nalo, bior napano naio monea Kristo.

*Torogio nalo na niosi nei
Iliano moti 1:1-10*

Pol be kiano meruoiano
bior napano naio be atevi tai 1:11—2:21

Atua jo miija kito ea kiano
tinievuiano 3:1—4:31

Tomu nalo na moneano abinimei bo, mia imauano jo kiaga 5:1—6:10

Iliano maariano 6:11-18

*Pol jikar kiano iliano
banlo*

¹⁻² Kiniou Pol nebivitaui mesi nei biedu ban bagaro na moneano nalo

ea tanobuku na vio Kalesia, mia kumemiliko kuruado nalo na vio nei, kumemi nubika den kamiu ka kamiu kumitu bo ga, ħeli na kumitu ĵumabe? Kiniou nei naruei napano Yesu Kristo naljuo Atua karamado, napano naio bitirilar Yesu bereio ea namariano, naljuo nei abitirilar kiniou nebe atevi, jibe na ana mia maka ve toro napano bio kiniou, ħeli na bitirilar kiniou jibe nei. Nao, mia monokanio kamiu kuviagago ka iliano nalo napano mia kiniou never ka kamiu.

³ Neĵidom mēlea ka mia Atua karamado naljuo Tubo Yesu Kristo, nalo ve juo amidu tiniememiano bija tuñaroiano ban kamiu.

⁴ Nao, Yesu Kristo naio mila memedu ga jibe ka napano Atua karamado ĵidomio, ka napano naio rijamo ka mia naio riñaro ka rila bulag kiado kariano nalo, ka mia naio mijikia rivuru bulag kito den bajago na bova na bogo nei napano kito roĵuaio vonganei. ⁵ Mia tibe na, bo ka kito rodular Atua siano rivavin medave tulaka, rivano-o mia ribisi deio, ee mia tibe na.

Ioluano Vou takurano ga

⁶ Kiniou nomiilo toru ka kamiu, napano Atua bio kamiu, a Kristo mila bo laka ban kamiu ruei, ana mia maka vesiou ga ana kuburo den Atua bereio ana kubokar iliano tai napano jibe ka Ioluano Vou dolu tai bereio. ⁷ Mia maka rijikia

ve Ioluano Vou dolu bereio, mia be ga ioluano takurano ga na jo. Kiniou neberii jibe na, bior nomijog ka tomu tai aĵumā amila bilivilig kene-miu iviso nalo ka mia, nalo aĵidom avilig Ioluano Vou na Kristo kiano rimei ve dolu. ⁸ Ana verenio kito tai, ħeli na nailiano na vio mave, ħeli na toro kei bereio, naio river lua lilianiano tai napano maka riveverare vija nana kumemi nuber lua ban kamiu nanua ruei, memedu ga ka toro nene avukuio rivan ea jeleig vio na jog-vaiano. ⁹ Nao, neber iliano nei vaarakurano bereio ban kamiu, ka verenio toro tai kei napano rioliolu ka iliano tai napano be dolu ka ioluano napano kamiu kumiduio jukamu ruei, mia toro na aviron naio rivova laka ea sebi.

¹⁰ ? Nemijikia ka tomu tai aber niegeniege kiniou, aber neĵidom ga tomu nalo ajog rivu ka kanaku iliano, mia kamiu kumijog kanaku iliano napano ĵikili nei ĵumabe? Ĥeli mia, tomu tai tiniel ser kiniou koviobo! Mia bo ga, bior venia napano noĵidomio, kiniou neĵidom ga ka Atua naio saaro ka kanaku iliano, ka napano ver kiniou noto never lua ga ka mia tomu nalo aiaia kiniou kanio, jibe na maka buñu neve Kristo kiano toro na imāuano ve riano.

Pol berii ka napano Atua bio naio

¹¹ Kuruaku nalo a kuvivinioku nalo, monoka neverii rimeravo van kamiu,

ka Ioluano Vou na nojomã neberii luaio, naio maka ve iliano tai napano toro ga to tikario. ¹² Kiniou maka nejevio den toro tai, a maka toro tai riverloglog kiniou kanio, mia Yesu Kristo ga, naio jiloglog Ioluano Vou nei meravo ban kiniou.

¹³ Nina jibe ka napano kami kumi-jog ruei, ka beamu kanaku meuliano jumabe, ka bogo napano nojo joomo ea kenememi nalotuano kumemi kulo Ju. Ka bogo na kiniou tinieku jer bagaro na namoneano nalo na Yesu kiano toru laka bogo nonovio, ana nemijil lo nemila lelanlo napano mia maka leleio bunu tinieku riialo, bior nejidom ka mia namoneano nalo ta re bunu to. ¹⁴ Ka bogo na, najakii vatitig bajago na nalotuano napano kenememi kulo Ju, juvulu tomu dolu nalo na kumemiliko kenememi terati takurano ga, mia kiniou nabokar jikili iliano moruo nalo napano korobimemi nalo kanalo, napano tomu nalo aju ajakiio binimei batove bokar banei.

¹⁵ Kiniou nojomã nemila jibe na bano-o mia maka nejikia ka Atua naio berkar kiniou ruei, bogo na maka nomoluo vo. Naruei ea ga kiano tiniememiano, naio bio kiniou ka neve kanano, a ea kiano jidomiano novo ¹⁶ naio miila kenerinio Yesu, maluvo ka kiniou ka nemijikia novitilubarío, ka

nava noioliolu kanio van nalo napano maka ave kulo Ju. Ka bogo na, maka nava neial kulo dolu nalo ka mia novokar jikiaiano tai denlo tivelinio ka Ioluano Vou nei. ¹⁷ A maka navavin Yerusalemo bunu ka neial atevi nalo napano nalo abe atevi jukamu ka kiniou, ka nevika denlo, ka mia kiniou neioliolu ka venia, ðelina kiniou neverial iliano tumãbe? Makanio, maka nava nevika tibe na, bior Kristo naio mila vite nonovio meravo ban kiniou ruei. Ka bogo na, najaluvo soðeli ga, naban yako laka ea buruvenuo na vio Arapia, mia iorou kanio ana nebinime bereio, nemijaka garuei naban ea komeli na vio Tamaskas. ¹⁸ Karina iorou kanio napano yuka tolu barlaka bano, naruei ka bogo na ga, ana nabavin bereio Yerusalemo naba nemiadu ka Pitere, mia maka noto vija naio vesiou, nojo bogoti duelimo ba jimo [15] ga. ¹⁹ Mia ka bogo na maka neial atevi dolu nalo bunu, mia takurano ga na nemialio, nina kialo navurimãaraboiano napano Yemesi ga, napano naio be kiado Tubo kuruano. ²⁰ Nina naruei mia venia napano nojo neberii ka kami naio be riano. Kiniou maka nala sibi, Atua naio mijikiaio.

²¹ Tenene na naruei, nojo Yerusalemo jibe na maka bogo vesiou leleio. Ana karina nejeliviv ea vio nalo

napano ea tanobuku juo napano Siria bija Silisia, ²² mila na ka bogo na, namoneano nalo na tanobuku dolu na mave ea vio Yutea, bija kiano komeli labo napano Yerusalemo, nalo na maka ajikia vatitig kiniou vo. ²³ Nalo amijog ga vaio napano tomu nalo aju aberenio, aber “Toro nanua jomã mijil lelan kito vururua na, vonganei naio jomã mioliolu jikili ka kiado moneano nanua naio jomã milavio jikili ka ruedomio.” ²⁴ Ana bior vite na, nalo aju amidular Atua toru kario napano naio jo bilig kiaku meuliano jibe nei.

2

Atevi dolu nalo abirokar naliko Pol

¹⁻² Bogo na yuka duelimo ba veri [14] barlaka bano, ana Atua jiloglog ka kiniou ber monoka navavin ea vio Yerusalemo bereio. Nomijog Atua mil jibe na ana kiniou Barnabas nubano, mia noburukar Taitas bunu binimeĩ bija kumemi.

Kumemi nuboru Yerusalemo, ana numitutano ea vioriano tai napano kumemi liko ga tomu na tukamuano na tuñaro ga abinimeĩ joomo eaio. Ea vioriano nei, neber bisivisii iliano nalo napano mña nojo nomioliolu kanio ban tomu nalo na maka ave kulo Ju. Neber bisivisii vatitig vite nalo nonovio nei napano nojomã nemilaio banlo, bior maka nesidom

ka aver kiniou nemimãu maka rimemedu, ka mia nalo aitava re ea kanaku imãuano binimeĩ bokar bogo nei, mila ana kanaku imãuano rimeĩ ve iakurano bereio. ³ ?Beamu neberiamã mia nalo ail sikili ka kiniou, ka mia never tomu nalo na maka ave kulo Ju, monoka nalo bunu ava joomo, mia vioriano nei naio ber venia? Tivelinio ka kiaku bilbilu nei Taitas, naio maka ve toro Ju tai, naio be toro na vio Kris tai, napano naio maka riva joomo, mia maka nalo atutua naio ka aver naio monoka riva joomo. ⁴ Ea vioriano nei naio beve terakurano napano nalo ajidom ka Taitas riva joomo, ana mia namial nalo nei jibe ka napano aberenio nalo abe kuruado, mia nalo amila sibi ga. Nalo na abinimeĩ joomo ea vioriano kar ga ajidom atuluku ga avitiv kumemi ga. Ajidom avitivitii kumemi tibe na bior nalo maka asaaro ka napano numitu nuberloglog ka kumemi numijurukar bija Yesu Kristo ruei, ana na bajago moruo re nua maka bunu avokario mñlea kumemi, mia kumemi nubisi kalo. Mia nalo nei maka asaaro ka kenememi iliano nalo, mia ajidom ala ka napano ka tuboiano na nalotuoano na kulo Ju nalo kanalo monokanio rivokar kito nonovio sikili damãriga. ⁵ Mia kumemi numisidom nuvakar vatitig ilirianiano na Ioluanu Vou, ka mia kamiu kumijikia

kuvakario rimemedu ga, naruei nuberburelo, ana maka nuvijamo kalo leleio, napano aju ajidom ayuku kinimemi iliano rivatove.

⁶ Ea vioriano nene, tomu nalo tai napano aberenio nalo abe navurim̃araboiano nalo, mia kiniou maka neial lerinio ealo ver abe tomu na tortoru nalo p̃eli na maka ave tomu na tortoru. Nina buriakurano ga na, bior Atua naio maka lele tovon sio nalo na jibe na. Mia navurim̃araboiano nalo na, maka lele averloglog kiniou ka vite vou tai leleio ka noioliolu kanio.⁷⁻⁸ Makanio, maka tibe na. Nalo abitilubar ka Atua, ea ga kiano sikiliano, naio bitirilar kiniou ka mia neve atevi tai, ka mia neverial ioluano vou nei van nalo na maka ave kulo Ju nalo, jibe kanio napano ea kiano moroano bunu napano naio bitirilar Pitere ruei, ka naio bunu rive atevi tai ka naio riverial Lillianiano Vou van nalo napano abe kulo Ju nalo.⁹ Naruei Yemesi naio Pitere a Jone, napano tomu nalo aberenio ka nalo ve tolu nei abe kialo navurim̃araboiano, nalo abitilubar ka Atua midu im̃auano maraiu nei joa jum̃aku ea kiano tiniememiano. Ana nalo tolu nei abinimei abanjum̃alo kumemliko Barnabas, jibe ka napano kumemi nube taara takurano kumemliko nalo, mia nubiniu numijamo ka nuvitibure im̃auano nalo, jibe ka napano mia kumemi ve juo nuva nuvioliolu ea

vio nalo na tomu nalo napano maka ave kulo Ju, a mia nalo avan aioliolu ea kulo Ju nalo kialo vio.¹⁰ Mia nalo na amijev iliano takurano ga ban kumemi juo, aber monoka kumemi juo tiniememi rimaio ka kanalo talim̃asa nalo yako Yerusalemo, ka mia nuvijailo, mia nina be titai napano nejidomii bogbe ruei ka mia neim̃aukanio tibena.

Pol berbure Pitere jikili

¹¹ Iorou ka nina, kiniou nabatove bereio, naba nojoa komeli napano Antioko, naruei ka bogo na Pitere naio malivo ka kumemi ea vio na, ana kiniou nejikil noju kamu ea namoneano nalo miralo, neberbure naio, bior meravo batitig ka vaio napano naio mila maka memedu.¹² Beamu, Pitere naio mila memedu ga, kanio napano naio jo jinan ga naliko kuruado nalo napano nalo maka ave kulo Ju, mia iorou kanio, Yemesi miila kiano tomu tai abinimei Yerusalemo, ana nalo amil ban Pitere, nalo ajum̃a aber jibe nei aberinavo "Nalo napano maka ave kulo Ju, nalo bunu monoka avakuveulo, ver p̃eli, mia Atua maka rijikia rilururlo." Iliano nei maka takii vaio napano vioriano na toru nei berenio beamu, mia mila lelan Pitere kiano jidomiano, mila naio merou, ana kario naio maka bunu saaro ka sinan vio takurano naliko namoneano nalo na napano maka avakuveulo.

¹³ Mia maka Pitere naio ve takurano, mia kuruado dolu nalo na vio na, napano nalo abe kulo Ju, binimeí bokar Barnabas bunu, nalo na ajakisor Pitere ea jidomiano na merouano nei.

¹⁴ Mia bogo napano nemial napano nalo aju amiel jibe na ea ñarabo tai napano maka rimemedu tibe ka napano Lilianiano Vou naio berenio, nemil jikili ban Pitere ea nalo na miralo, neber jibe nei, neberenio “Pitere, be riano ka napano jau kobe toro re Ju, mia bo laka napano beamu ruei, jau kojo kojaaro ka nalo napano maka ave kulo Ju kialo bajago ruei, napano jau kojinan vio takurano kamlika ruei. ?Mia jumabe naruei, ana jau kojidomii kotutua bereio nalo ka monoka atakii kiado bajago kulo Ju, napano jau kober nalo monoka avakuveulo?”

Kei napano verenio rimonea Yesu, Atua rilarur naio

¹⁵ A ka bogo na, kiniou neber vatitig ka nalo jibe na neberinavo “Kito romiyotuba ea bajulukuti na kulo Ju, kito maka ve kulo dolu nalo, tibe ka nalo napano kulo Ju nalo aju ajidomii aber nalo amiagiago ga.”

¹⁶ Makanio, kito robe kulo Ju memedu nei, mia vonganei, kito romijikia ruei, ka toro maka rijikia rimemedu vija Atua, napano naio jo mijogkar vatitig ga Mosis

kanano tuboiano. Toro napano monea Yesu Kristo, naio ga mijikia rimemedu rivija Atua. Jidomiano nei naruei mila kito kulo Ju kito monoka romonea Yesu ga bunu, ka kito romemedu vija Atua. Kamiu monoka kuvijikia vatitig iliano napano Atua kiano iliano lu berenio, napano berinavo maka toro tai leleio napano rimemedu vija Atua bior naio jakii batitig tuboiano na.

¹⁷ Mia kito kulo Ju nalo, kito roju rojidomii roberiamña tuboiano nei mila kito romemedu kitoliko Atua ruei na, mia maka tibe na. Mia verenio be riano ka kito kulo Ju bunu, monoka romonea ga Yesu Kristo bunu ka romemedu kitoliko Atua, neber ñeli tomu tealó amijog bova ka iliano nei. Peli nalo alavon ka aver iliano na mila ana kito kulo Ju robinimeí robe tomu na kariano beberare ga tomu nalo napano maka ave kulo Ju. ?Ana ñeli nalo amila von ka aver bunu ka tibe na, nina sano nene berenio Kristo nei naruei mila kito kulo Ju robinimeí robe tomu na kariano ga? Mia makanio, nina maka tibe na leleio garuei. ¹⁸ Nina bior nanua, kiniou nojorña nomue dodom bajago moruo na tuboiano na ruei, mia verenio vonganei nevitirilar bereio bajago na takiiiano na tuboiano moruo na, napano neberenio monoka ravakuveu a monoka rala tibe na tibe na ka romemedu vija

Atua, nina mila ka beamu na, kiniou bunu nebe toro na nemilakorov tuboiano ruei. ¹⁹ Ee, tuboiano na naio jidom rila ka kiniou nañaro, mia vonganei tuboiano na naio javukia tasiñaro tai ga ea kiniou, kiniou nebisi eaio ruei. Kiniou nojuvan tuboiano na ruei, kanio kanaku meuliano toa ga Atua. ²⁰ A vonganei, maka bunu ve kiniou napano nojo nemeul, mia Kristo naio jo meul ea kiniou, mia kanaku meuliano na vonganei, naio moluo bior napano nomonea Atua Kenerinio, napano naio tinien miia kiniou toru laka, naio mijamo ka kiano meuliano, naio ñaro kar kiniou. ²¹ Ea bajago na, romial Atua kiano tiniememiano toru laka, naruei maka nejikia nala kiano tiniememiano nei rimei rive vite kurano ga tai, bior ver toro mijikia rimei memedu vija Atua bior ga naio mijogkar tuboiano, nana jibe na jibe Kristo naio ñaro kar iakurano ga.

3

Kulo Kalesia amilaluvu ñarabo

¹ Kiniou nemial kamiu kulo Kalesia jibe ka pariparimiu amiavovu ga. ? Peli tomu nalo tai amila mali ea kamiu bo, tenene kamiu kubano kumilaluvu ñarabo? Neberial meravo ea miremiu ruei, ka jumabe ana Yesu Kristo naio ñaro ea makolkolo, mia voniganeĩ kamiu kuba kube dolu

bereio. ² Kiniou nejidom nevika vikadeniano tai van kamiu beamu vo. Vikadeniano nene jibe nei “?Kamiu nanua kumijev Niununo Lu ruei, kumijevio kar vaio? ? Kumijevio bior kumonea Mosis kiano tuboiano nalo na?” Makanio, kamiu kumijevio kar ga kumijog Ioluanou Vou ana kumitu kumoneaio. ³ ?Kamiu kubitikar kenemiu meuli-ano vou bija Kristo ea moroano na Atua kiano Niununo Lu, mia vonganeĩ ana kumisidom ka kuvila nonovio ea kenemiu moroano ga? Maka leleio, kamiu kumiavovu tanea ga ruei. ⁴⁻⁵ Ea kenemiu meuliano vou nene, vite novo telabo amaluvo ka kamiu ruei, jibe ka napano Atua mijev kanano Niununo Lu ban kamiu, mia naio jo mila jamerijiano nalo ea miremiu, mia jumabe, ðeli kamiu maka kuvitilubar vo ka vite nalo na abinimeĩ ea kamiu kar venia? Monoka kuvijikia vatitig ka Atua mila jibe na, maka rivior kumitakii tuboiano, mia kar ga beamu kamiu kumijog Ioluanou Vou, mia bogo napano kumijogio ana kumoneaio.

*? Vaio naio bo? ?
Tuboiano, ðeli viekouoiano
ea Kristo?*

⁶ Kamiu kuvisidomii von tormoruo Epraamo napano Atua kiano Iliano Lu berii naio, ber

*“Bior ka napano naio
barkar tinieno ea Atua,
ana na naio binimeĩ
memedu bija Atua.”
Jen 15:6*

⁷ Mia tomu nalo na abinimei iorou napano abarkar tinielo ea Atua jibe na, nalo abe tormoruo Epraamo kiano bajulukuti nalo memedu.

⁸ Bior Atua kiano Iliano Lu berial Ioluanu Vou nei nuanua laka ruei, napano naio berii Epraamo berenio

“Ea jau mia Atua rilivu ka yati na tomu nalo nonovio na vio yetemeriba nei.”

Takii iliano nei, Iliano Lu berkario bunu ruei berinavo mia Atua to rila nalo na maka ave Ju mia amemedu naliko, verenio avarkar tinielo ea naio. ⁹ Ana na nalo napano abarkar tinielo ea Atua jibe na, mia naio jo milivu kalo vonganei, jibe kanio napano naio milivu ka tormoruo Epraamo re nua, ka naio barkar tinieno eaio.

¹⁰ Mia nalo napanoaju ajidom kavulio ka amijikia avokar meuliano bior amila von ka amonea tuboiano nalo, nalo na ajutan ka vironiano tai ruei, bior maka toro tai napano naio ridukar vatitig tuboiano nalo nei riviniu, ana Atua kiano iliano lu berenio,

“Tomu nalo napano maka amonea vite nalo nonovio napano ajua niosi na tuboiano, mia nalo monokanio avokar vironiano.”

¹¹ Tenene na meravo vatitig ban kito ka napano maka toro rijikia rimei rimemedu vija Atua kar ga naio monea tuboiano na, mia jibe ka Atua kiano

Iliano Lu berenio, napano berinavo

“Toro napano memedu bija Atua kar ga barkar tiniene ea Atua, naio ga mijikia rimeul.”

¹² Iliano nei naruei naio berii bajago na viekouoiano, mia romijikia reial bajago na viekouoiano nei vija bajago na moneano na tuboiano, naljuo maka aveverare leleio. Nina bior bajago na moneano na tuboiano, naio jumolu jua tivelinio vite nalo napano toro ga mijikia mirñaukanio, jibe ka napano Iliano Lu berenio berinavo

“Toro napano mila saba nalo nonovio napano tuboiano berenio, mia naio mijikia rivokar meuliano eaio.”

¹³ Mia maka ve kito tai napano rila nonovio vite nalo napano tuboiano berenio, ana tuboiano berkar vironiano bija mñariano ban kito robiniu. Mia Kristo naruei naio binimei buru bulag kito ruei den tibureiano nene, mijamo ka naio midu jeledo, ana naio ba jotan yetano kanio. Nina jibe ka napano Iliano Lu berenio, napano berinavo

“Toro napano amiorkario jaklele ea iesi mave ka riñaro, amiorkar naio bior napano naio jotano yetano ka Atua kiano tibureiano.”

¹⁴ Kristo naio mijamo ka naio jibe na, ka tomu nalo napano maka ave kulo Ju, nalo amijikia avokar bunu

ka ilivuiano nalo napano Atua berkario ban Epraamo, ana vite nei mila ana von-ganei, kito napano robiek-ouo ea Kristo, romijikia re-jev Niununo Lu napano Atua berkario ka mia rije van tomu nalo.

Atua kiano verikariano binimej jukamu, tuboiano binimej iorou

¹⁵ Kuruaku nalo a kuvinioku nalo, mia kiniou neverii tukunu tai ea kiado meuliano ga napano sano nene vaatara ka ga ea Atua kiano verikariano ban Epraamo. Verenio toro tai riverial kiano ilimaariano river bogo napano naio mia rimaro, mia kanano saba nalo monoka atibe nei atibe nei, naruei naio rila mesi tai ka river verikariano nei ka mia ver naio maro, mia toro dolu maka rijikia rudular kanano iliano, a maka rijikia tusolio. ¹⁶ Ana Atua mila kiano verikariano ea Epraamo, bija kiano bajulukuti. Iliano nei maka river ga ea tomu nalo napano ea kiano bajulukuti nalo, napano naio ber toro takurano ga, mia toro nene naruei naio be Kristo. ¹⁷ Kanaku iliano ea vio nei sano nene jibe nei. Beamu Atua birakar kialo virakariano nei jikili, naruei iorou kanio yuka duelimo toromomou veri duelimo va rolu [430] barlaka na tuboiano na Mosis kanano naio maluvo. Mia tuboiano nei naio maka rijikia rila korov verikariano nei, a maka rijikia rilolkon bulag Atua kiano il-

iano. ¹⁸ Verenio ramijikia ravokar Atua kiano ilivuiano kar ga roju rajakii tuboiano napano naio binimej iorou, nina jibe ka ber Atua kiano verikariano na jo jukamu naio bekurano ga. Mia romial Epraamo bokar Atua kiano ilivuiano nalo bior ga naio bokar Atua kiano verikariano bo, maka rivor tuboiano.

Tubeiano naio be kiano imauano jo

¹⁹ Bo ga, ana peli vikadeniano tai jo, napano berinavo “? Jibe na, Atua jian Mosis kiano tuboiano na kar vaio peli bior vaio?” Boga, kiniou neverenio ka kamiu voniganei, ber Atua naio mijeduka bereio tuboiano nei mave ea kiano virakariano, ka rijai kito tomu nalo ka rovitilubar kiado kariano. Atua naio midu tuboiano nei ka tumolu tu rivano-o rivokar bogo napano toro napano naio be yati na Epraamo kiano bajulukuti, napano Atua berkario, rimoluo ea kito.

Mia romial napano tuboiano be kiano imauano novo tai jo, mia kito monoka rosidomiikar tuboiano nei, ver bogo naio rimaluvo, naio rimej ea nailiano nalo tukamu, karina ajianio ban toro tai, naina be Mosis, ana naio bario binimej ban tomu nalo. Mia bogo napano Atua mila virokariano na bija Epraamo, nina makatibe na. ²⁰ Bogo na naliuo nei aju vio takurano, maka nailiano tai peli toro dolu

tai napano jo iviso ka naljuo ka rivar iliano, mia Atua naio takurano ga berial kiano verikariano memedu ea Epraamo mirano.

²¹ A nina maka river ka tuboiano rilavio ka riverbure Atua kiano verikariano, makanio. Ver Atua naio mijikia sian tuboiano dolu tai bereio napano ver kito rojogkar nonovio, ana mijikia rila kito romeul, ĩeli naio jian tuboiano nene ban kito ruei ka romijikia romemedu vija naio naruei. ²² Mia maka titai tibe na, bior Iliano Lu naio berenio ruei ber kito nonovio rojutano ka moroano na kariano, kito roju romila korov tuboiano ga. Mia Atua kiano ilivuiiano nalo napano berkar ka mia sianio, nalo amijikia amaluvo ea kito bior napano ga kito rabarkar tiniedo ea Yesu Kristo.

Bogo na ravarkar tiniedo ea Kristo naio miyotuba ruei

²³ Nanua ruei, binimeĩ bokar vonganei napano romijikia rabarkar tiniedo ea Kristo, Mosis kiano tuboiano na naio jomĩ miadikar mĩlea kito, jibe ka napano rojua yimo na lakoiano ruei. ²⁴ Tuboiano na naio jibe kanio jo bitikar kito, jibe kanio kiado naverloglogiano tai, binimeĩ bokar bogo napano Kristo naio binimeĩ, ka ea bogo na, romijikia ravarkar tiniedo ea naio ana romijikia romei romemedu vija Atua. ²⁵ Mia

vonganei, tuboiano na maka bunu rivitikar kito, bior bogo na napano ravarkar tiniedo ea Kristo miyotuba ruei.

Kamiu nonovio kube takurano ea Kristo naruei

²⁶ Ana bior napano kamiu kubarkar tiniemiũ ea Kristo Yesu, kamiu nonovio kamliko naio kube Atua kenerinio nalo. ²⁷ Abaruei ea kamiu ruei, ana kubinimeĩ kube takurano bija naio, jibe kanio napano kumijev ko bajago novo nalo napano Kristo kiano ea kamiu jibe kanio kumiya kuluniabemiũ ko mokotenemiũ. ²⁸ Mia kamiu nonovio kubinimeĩ kube takurano ga ea Kristo Yesu, mia jibe na naruei, kamiu nonovio kube veverare. Bokanio kito monoka rotiburevure re tomu nalo, rover ninei be toro Ju, mia nina be toro dolu ga, ĩeli na rover ninei naio be toro na toru, mia nina be toro na iĩauano ga, ĩeli na rover ninei be tubo, mia nina be toro na iĩauano ga, ĩeli na rover nina be sumĩano, ana ninei be tira ga. Mia bajago na monoka toa re bunu kamiu. ²⁹ Mia bior kamiu kube Kristo kanano jibe na, kamiu naruei kube Epraamo kiano bajulukuti memedu, mia tibe na, ilivuiiano nalo napano Atua naio berkario ka Epraamo kanano bajulukuti nalo, mia kamiu naruei kuvarilo.

4

Kito robe Atua kenerinio nalo

¹ Naruei mia neil ta bunu vo ea bajago na kito ka nevisivisii lie vo ea tivelinio ka tuboiano na. Verenio toro tai, ana naio riñaro, mia kenerinio mijikia rivar kiano saba nalo. Mia ver kiritete nene naio telisukia ga vo, mia naio makarijikia rivitika saba nalo nei. Mia jibe ka naio be karamāno kanano toro na iñauano ga, ² ka mia naio monoka totano ka kulo dolu nalo ga jumalo, jibe ka karamāno dolu nalo, rivano-o rivokar bogo memedu napano karamāno berialio nua ruei ka mijikia rivitika saba nalo na. ³ Ea kito naio jibe na bunu, napano beamu, rojibe ka kiritete nalo, napano kiado jidomiano jutano ka siñaro nalo na jukamu ea vio yetemeriba nei. ⁴ Mia binime i bokar bogo nene memedu, Atua miila kenerinio binime i, napano tira tai bario, naio moluo ea vio yetemeriba nei, a napano naio moluo yetano ka kulo Ju nalo kialo tuboiano. ⁵ Naio moluo yetano ka tuboiano na, naio miluo eaio, ka naio mijikia rivuru bulag kito napano rojutano ka tuboiano nei naruei, ka mia Atua rivuru bulag kito romei rove kenerinio nalo.

⁶ Mia vonganei, jibe napano robe kenerinio nalo, naio juvan kenerinio kiano Niununo binime i ea kiado

iviso, napano naio mila na kito romijikia rovio Atua, rover “Teta, Teta.” ⁷ Bior vite na, kami u maka bunu kuve tomu na iñauano nalo ga, mia kami u kube Atua kenerinio nalo riano, napano mia naio sian van kami u vite novo nalo, napano naio berkar berinavo mia kenerinio nalo avario.

Pol tinien miia kulo Kalesia

⁸ Nua na, ka bogo napano kami u maka kuvijikia Atua vo, kumitutano ka moroano na siñaro nalo napano maka ave atua leleio, ⁹ mia vonganei, kumijikia Atua ruei, ðelina bo ka never tibe na, never voniganei, Atua mijikia kami u. Mia kiniou nejidom nevika den kami u, nenerinavo “? Kar vaio ana kumisidom kuva iorou bereio ea siñaro nalo nanua na, napano maka ve kanalo moroano tai, a napano maka ajikia avijuku rivu ka kami u bogo tai? ?Kar vaio ana kumisidom kuvitutano ka kialo moroano bereio? ¹⁰ ?Jumābe ana kami u kumitu kumisidomika kanalo legiano lu nalo, a kanalo siberio lu nalo, a kanalo bogo lu nalo, a kanalo yuka lu nalo jibe na? Kami u kuberiamā mia Atua saaro ka kami u kario?” ¹¹ Tomnei, kiniou nemerou ka kami u toru bior kami u? !Nemialio jibe ka nomimāu toru laka ka kurano!

¹²⁻¹³ Kuruaku nalo a kuvivinioku nalo, nanua beamu kami u maka kuvitutan ka tuboiano, ana na

ka bogo napano nobinimei nojo bija kamiu, nomila kiniou bunu najavukia ga kamiu. Mia vonganei, nomijogio ka napano kumisidom ka kuvan bere ea bajago na tuboiano bereio, tenena nebika jikili den kamiu ka kumei tibe ka kiniou bereio ga, napano kiniou maka bunu nototan yetano ka tuboiano. Kamiu kuvisidomii vonio bogo napano nomioliolu beamu ban kamiu, napano kiaku mieiano ga mila napano be kiaku bogo ka noto vija kamiu, mia bekurano ka nemie ka bogo na, kamiu maka kuvila kiniou nojog rivova. ¹⁴ Makanio, mia kanaku mieiano nei mila lelan kamiu toru laka, mia maka kuvijog rivova ka kiniou, maka kuvisidom va ea kiniou, makanio, kuburu kiniou naban ea kunuemi, jibe ka napano ver kiniou nebe nailiano tai na Atua kanano, pelina nejibe napano nebe Yesu Kristo ga. ¹⁵ Nanua kumisaaro mēlea ka kiniou, nomial jibe kanio napano ver kumijikia kuvila, peli kumisaaro ka kuvurular miremiu ka riveri ka miraku ka rijai kiniou, mia jumabe vonganei? ¹⁶ Peli vongane, kanaku ilirianiano nalo nei, nalo amila kiniou nebinimei jibe ka kenemi bilbilu va tai bereio. ?Mia venia na?

¹⁷ Kulo dolu nalo na napano nomijog aber aju kamlika vonganei, nalo na aju abilvilig Kristo kiano Ioluanou Vou, nalo na aju abiju-

rukar kamiu ka ave bilbilu rivu kamlika, mia kamiu kuvisidom sofi ealo, mia nina be tena aju kubijukubin kamiu ga, bior ajidom ga ka avuru bulag kamiu den kiniou. ¹⁸ Mia maka never tibe na ka mia kiniou ga ve takurano nomijikia noto vija kamiu, peli na kiniou ve takurano ga ka kito rove bilbilu vatitig rivu, bior bajago na bilbilu vu rivija toro dolu naio bo bogo nonovio, mia bo ga verenio ka ga rila vite na bo.

¹⁹ Keneriku nalo, kiniou nejavukia tira tai napano mabono mijalele ka naio rivar tete, napano nojo nomijog bova toru ka kamiu, ka kamiu kuvijev Kristo vija kiano bajago na bo nalo ea kenemi meuliano nalo. ²⁰ Riano, ver nomijikia noto kitoliko vonganei, mia nojog rivu laka. Verenio tibe na, mia nevilig kanaku iliano rivatove kija ve telisu, mia vonganei napano nojo laka ka kamiu jibe nei, maka bunu nejikia ka kamiu jumabe naruei.

Viginiano na Ekara naio Sera

²¹ Nalo na kamiu napano ajidom ka kito monoka rodukar kiado tuboiano rimemedu vija Atua, nejidom ka nalo averdope kanaku vikadeniano tai, ka “?Tuboiano nei napano ajumā aberiio, nalo aju amijoglubar venia na tuboiano nei jomā berenio, pelina maka ajoglubarario?” ²² Iliano

Lu nei berii tormoruo Epraamo, napano naio be kenerinio tete suñano juo, napano tinene, tira na Ekara, napano miñau ea koano, naio bario jukamu, mia tinene, koano memedu, napano Sera, naio bario iorou. ²³ Nana napano moluo iorou, naio be Aisak, naio moluo bior Atua berkario, mia dolu napano moluo beamu, napano Ismael, naio moluo jibe na ga. ²⁴⁻²⁵ Naruei mia romijikia reial viginiano nei jibe kanio jamerijiano tai, napano tira juo nei, a jibe ka verikariano napano Atua milaio.

Tira nei Ekara naio jibe ka virakariano napano Atua milaio ea burusuku na toru na Sinai, nina ea buruvenuo na Arapia, vio na naruei napano Atua jian tuboiano ban Mosis eaio. Ekara nene, naio be tira na iñauano ga, mia kenerinio nalo, nalo bunu abe tomu na iñauano ga. Tenene na Ekara naio bunu jibe kanio komeli labo na Yerusalemo, napano tomu nalo nene abokar tuboiano nene nalo jikili, mia nalo abe tomu na iñauano ga bunu, bior nalo ajutan ka tuboiano nene naruei.

²⁶ Mia tira dolu nene naio be Sera, napano naio maka toro rivokar naio kanano iñauano naio ga jo, mia nina javukia Yerusalemo dolu napano naio be Yerusalemo na mave. Sera kenerinio nalo, nalo bunu maka toro na toru tai rivokarlo ka iñauano mia nalo bunu aju ga jibe

na, tenene na milaio ana na Sera nene jibe ka be keniedo napano rabarkar tiniedo ea Kristo. ²⁷ Iliano Lu naio ber vite nalo nei kija ruei, berenio

“Tira nei napano beamu jau maka kejikia kavar tete bogo tai, jau kajog rivu, kasaaro, koioi.

Jau na koamo naio juvanso, vonganei kenerimo nalo amei ve telabo,

tovulu nalo na tira nana koano jo bija ga naio julaka bario.” Ais 54:1

²⁸ Iliano nei javukia napano Atua berkar berinavo mia kenerinio nalo ve miroano, a kamiu kuruaku nalo a kuvivinioku nalo, kito naruei kito robe tete nalo na Atua kiano verikariano nei, jibe kanio kiano verikariano re nua mila Sera nene bar kenerinio nei napano Aisak. ²⁹ Ana bogo na Aisak nene moluo, tete dolu nei Ismael napano naio moluo ga jibe na, mia naio jo mila titig kiritete napano Aisak, napano naio moluo ea Atua kiano Niununo Lu. Mia binimei bokar banei, kito romial tomu nalo ajumña amila bajago na jibe na kia ga vo. ³⁰ ? Mia Iliano Lu naio berenio venia? Naio berenio Atua mil ban Epraamo, berenio “Jau monoka kovukular nana napano be tira na iñauano ga, naljuo kenerinio, bior kenerinio nei maka rimemedu ka mia rijikia rivar kanamo saba tai. Saba nalo na mia riviniu

rivan ea kiritete na tira napano naio jo ga jibe na, napano be koamo memedu.”

³¹ Nao, banalo, Atua naio ber jibe nei, ana kiniou neber ka kamiū naruei neber kito maka rove kenerinio tira na iñauano na, napano rojutan ka Mosis kanano tuboiano mia ĩeli ga, mia kito robe kenerinio tira napano jo ga jibe nei, jibe ka napano romonea Yesu, a vite nalo napano Atua berkar ban kenerinio nalo memedu, mia nei naruei mia kito rovokario.

5

Yesu buru bulag namoneano nalo ruei

¹ Bogo napano Kristo buru bulag kito, naio mila jibe na ka mia rataluvo na mia rataluvo batitig garuei, maka ka mia ravan bereio ka rovan rotutan ka tuboiano napano Mosis kiano bereio. Tibena, kamiū monoka kuvitu sikili, ka nalo atutua re kamiū ka kumei tibe tomu nalo na iñauano bereio, napano tuboiano nei riadikar vatitig kamiū sikili bereio.

² Kamiū kuviagago vatitig ka iliano napano kiniou Pol nojo nober ka kamiū. Verenio kamiū kuvijamo ka nalo avututua kamiū napano monoka kuvakuveu, mia iñauano napano Kristo miñaukanio ruei naio maka rijikia rijai kamiū leleio.

³ Ee, tenene napano neber bereio iliano na jikili nei ka kamiū, ka toro napano verenio naio rijamo ka naio

rivakuveu, naio jo midu naio jo yetan ka tuboiano nei bereio, a mia toro napano naio jotan ka tuboiano nei jibe ka naio monoka rivi-tikar vatitig ka rijogkar vite nonovio napano tuboiano nei berenio, ver ĩelina mia rije vironiano.

⁴ Kamiū tealō napano kumiturnā kumila vio ka kumonmonea tuboiano na ga ruei, ka kamiū kumemedu vija Atua kanio, kamiū na kumitu kumite bulag kamiū ruei den Kristo, kamiū kubilig takaamiū ka Atua kanano tinievuiano ruei.

⁵ Mia kito roju rojidom mēlea laka ka mia Atua naio rila kito romemedu rivu vija naio, bior ga napano kito rabarkar ga tiniedo ea naio, ana Niununo Lu jo mijai kito romonea jikili ka bogo napano roju rorea kia ga vo, mia Atua monoka rila tibe na van kito.

⁶ Bogo napano robinimeī takurano kitoliko Kristo Yesu jibe na, bekurano ka toro be pakuveu, ĩeli maka rive pakuveu mia tena burutomoruo loa laka nina be kiado viekouoiano ea Kristo, napano viekouoiano nei naruei naio mila kito rojidom Atua a bija tomu dolu nalo bunu.

⁷⁻⁸ Beamu kiniou nemial kamiū kumitikiti bo laka, ana vonganei, maka bunu tibe na. Atua naio bio kamiū beamu ruei, ana nejidom nevika ka keinia toro napano naio berbure m̃arabo ka kamiū bereio, mila ana maka bunu ku-

monea ilirianiano? !Kiniou nemijikia maka ve Atua na! ⁹ Verloglogiano na bova napano naio jomā mila lelan kenemiu jidomiano, naio jibe ka iliano tai napano berinavo “Soromi tai napano naio kiritelisu ga ana naio mijikia mila lelan niamoiou reraio amijea.” ¹⁰ Ana jibe kanio kamiu kamliki kiniou kito robe takurano ea Atua, kiniou nojo nomonea kamiu jikili kiano vo ka mia kiado jidomiano ve takurano ga, ka kito monoka rovtua re namoneano nalo napano maka ave kulo Ju, ka monoka nalo ave pakuveu. Mia nojo nabarkar tinieku jikili ea kamiu bunu ka toro napano naio jomā mila lelan kamiu jibe na, bekurano ka naio be toro kei mia Atua rudu vironiano vanio.

¹¹ Kuruaku nalo a kuvivin-ioku nalo, be iliano nalo tai napano ber ka kiniou bunu, najo mā nomiolu kia ga vo neber namoneano nalo monoka ave pakuveu bunu ka mia Atua naio mijikia rilarurlo, mia iliano na naio maka rive riano. Verenio kiniou noto noioliolu tibe na, mia tomu nalo napano aju kamliki nalo asaaro ka kiniou ga na. Ana kamiu kuvial, nalo aju tiniel jer kiniou kia navo, bior kanaku ilivisivisiano na mākolokolo napano Kristo kanano, naio jo miolkon bulag kanalo verloglogiano nalo. ¹² Kiniou nojo nojidom ka tomu nalo napano ajunā

amila bilvilig kamiu, a mila tiniemiu memebiju kanio ajidomii toru ka monoka kuve pakuveu, bo ka nalo adu iobogu ana nalo ga ativi kalo bereio ka mia ala niegeniegelelo.

¹³ Mia kamiu kanaku bilbilu nalo, Atua naio buru bulag kamiu ruei, riano ga ka maka bunu kuvitan ka Mosis kiano tuboiano na. Mia kamiu kuvisirarago vatitig rivu, mia kuvisidomii re bunu ka kuver “Bo na, kiniou najaluvo ruei den tuboiano nei ruei, kiniou ga naruei. Ana kiniou nemijikia nala vite nonovio nalo napano kanaku jidomiano naio jidomiio.” Kamiu kuver re bunu tibe na, ana mia monoka bajago na kenemiu tinievuiano naio monoka rila kamiu kuvisaaro ka kuvijaija toro dolu bunu. ¹⁴ Bajago na jibe na jakii iliano tai na tuboiano, napano naio barko vatitig iliano dolu nalo na tuboiano, napano naio berenio “Mia kosidomii tomu nalo napano aju vaataro kaso, jau kovijuku rivu kalo rive verare kanio napano jau kojidomiiso.” ¹⁵ Mia vere kamiu kuvitunā kuvilivil ea kamiu, a kuvitunā kuviser niegeniege kamiu tibe ka tededen nalo, mia monoka kuvitikar vatitig kamiu rivu, kenemiu bajago na jibe na naio mijikia rila lelan kamiu nonovio bereio.

Bajago na Niununo Lu a

bajago na toro

¹⁶ Kiniou nejidom never iliano nei van kamiu. Kamiu na monoka Niununo Lu tukamu ka kamiu, a kamiu kuvitu re kuvitakii bajago moruo na kenemiu ga napano kumoluo bijaio.

¹⁷ Bior bajago napano romoluo bijaio, naio miilkue ka bajago na Niununo Lu kiano, a nana napano na Niununo Lu nene, naio maka saaro leleio ka nana napano kito romoluo bijaio. Vite nei naruei jibe ka napano bajago juo nei, abe juo ajumã amila baravo ka naljuo. Tenene na jibe na ver Niununo Lu jo jukamu ka kamiu, maka bunu kuvijikia kuvila ga vaio napano kenemiu jidomiano milavio kanio. ¹⁸ Mia monoka tiniemiu ribobogia re bunu ka ver Niununo Lu to tukamu ka kamiu, mia kamiu maka bunu kuvitutan ka tuboiano nei.

¹⁹ Imãuano nalo na bajago na tomu nalo amoluo bijaio naio meravo ga. Imãuano nalo nene, ajibe ka tomu nalo amila nasiakiano, nalo amila vite nalo na imouiano, a bajago na kiriniagiago nalo, ²⁰ bija volkouano na tavoru, a bija navarsemeiano. Bereio, be navilviliano, tukurukuano, jokuano, tiniemimiano, buruvitiano, vuru vurevureiano, ilidieiano kean tomu nalo, ²¹ na tinietukuniano, a bija nalo nei be namunu mēlea uei, bija namaduano, bija vite dolu

nalo na jibe nei. Naruei nomidu tiniemaiano bereio ban kamiu, javukia napano neberii ka kamiu nua ruei, ka kamiu kuvitakar kamiu, bior toro napano mña jo mila bajago nalo na, mia naio maka lele rijikia toa Atua kanano navenatuboiano bogo tai.

²² Naruei kurukuti napano Niununo Lu mila miluo ea toro kanano meuliano jibe nei: tinietiiano, nasaaroiano, tumãaroano, jidomiano tebieviano, natinievuiano, nanovoiano, niabetitiano, navatoveiano, a natelan vuuiano. ²³ Bajago nalo na abo laka, mia maka iliano tai pēli na tuboiano tai napano riverbure kamiu ka kuvila re vite nalo nei. ²⁴ Ana bajago napano romoluo bijaio, bija kiano nasidom vovaiano nalo, rojukukakarlo ea mākolkolo ruei. Nina kito nalo napano robe Kristo kanano, kito rojuvan saba nalo na ruei.

²⁵ Bior kito romeul ea Niununo Lu mia bo ka kito reiel ea kiano bajago na bo bunu. ²⁶ Maka rivu ka kito rotumã ravarvar ka kito, pēli na kito ga rotumã rotulutulu kito, pēli na rojoku ka kito.

6*Kamiu nonovio monokanio kuvijaijai kamiu*

¹ Kiaku bilbilu nalo, averenio kamiu tai rijoru ea kariano mia bo ka kamiu napano Atua kiano Niununo Lu joa kamiu, kamiu monoka

kuvijai naio ka kuvuriri naio bereio. Mia monoka kuvil m̃asosou ga vanio tibe ka tiniemiu m̃iaio, mia monoka kuvitkar vatitig kamiu bunu ka mia vite napano kumila vatitig toro dolu kano naio rimei re bunu ka rilavon kamiu bereio. ² Monoka kamiu kuvijaija kamiu tibe na naruei, ka kuvar bitiraviran toro dolu kano bagaro nalo napano teremi. Tibe na, ana kamiu kumitu kumonea venia napano Kristo kiano tuboiano naio berenio. ³ Ana mia kamiu kuvarvar ka re kamiu tibe ka toro tai napano naio jo jidom naio ga ber “Kiniou riano, kiniou nebe toro tai.” Ver tibe na, toro nene naio jo mijubolibolili naio bereio, bior naio maka rivitilubar ka naio be toro kurano ga. ⁴⁻⁵ Mia kamiu monoka kuveve terakurano kuvitii veve kenemiu iṃauano nalo napano kumĩaukanio. Ver tibe na, toro tai maka rijikia rilavon ka rivitii veve von kanano iṃauano nalo abo loa tomu dolu nalo kialo ana monoka naio rivitii veve ga naio ga kanano iṃauano. Ver kiano iṃauano bo mia naio mijikia saaro ga kar kiano iṃauano novo nei. Bior tomu nonovio maka ave verare, bior nalo kialo vite dedade nalo napano teremi napano abario ea kialo meuliano.

⁶ Kamiu napano ajum̃a aberiloglog kamiu ka iliano na moneano, mia ver bogo tai kamiu kuvileal vite na kiritavaso tai, bo ka mia kuvio kano kamliko kenemiu

naverloglogiano nalo.

⁷ Mo ana kamiu kuvitkario, ka kuvila sibilili re kamiu bereio. Jau maka kejikia kala dovorovon Atua. Mariesi vaio napano komebija ea kanamo tiniavio, m̃arati nene ga napano mia jau kesenio. ⁸ Mia toro napano mebija kanano bajago napano naio moluo bijao jibe ka kurukuti tai ea kanano meuliano, mia naio rivar kurukuti tai napano menunū bova ga ea kanano bajago nene, be na maariano, ana ver naio rimebija bajago na Niununo Lu ea kiano meuliano, Niununo Lu naio mijikia rivar sinaniano novo nalo napano meruo bo ea naio, be meuliano napano maka rijikia ribisi deio. ⁹ Ana mia kito romijikia ravar sinaniano novo nalo rimemedu ka bogo na marimeuano nene, ver rotuvan re iṃauano. Tibe na ana mia kito tiniedo rimaro re ka rala bajago novo nalo na bo, ¹⁰ ana mia monoka rovijuku rivu ka tomu nalo bogo nonovio, ana monoka tiniedo vu rivu lie vo van nalo napano robe m̃aratavo takurano kitoliko ea Kristo.

Pol kanano iliano na maaro banlo

¹¹ Mo, mia kiniou nevitauia kanaku ilim̃ariano nalo ka jum̃aku ga, tenene nei mia kumijikia kuvial kanaku m̃arati iliano nalo ave tomormoruo tibe nei. ¹² Nejidom never ka nalo napano ajidom avututua kamiu ka kuve pakuveu,

nina jibe ka nalo ajidom avarvar kalo ga rivor vite na kuluniabene toro ga. Ana nalo ajidom ala tibe na kar vite takurano ga, napano amila von ka atuvan ioluioluiio napano Kristo kanano ñakolkolo ga mijikia rilarur kito. Iliano na nalo maka asidomio, bior nalo amerou ka napano ver aioliolu ka Lilianiano nabo ka Yesu kiano ñariano rimemedu tibe na, mia kulo dolu nalo ajil lo. ¹³ Nalo napano ajidom ka kami monoka kuve pakuveu, nalo ajidom tibe na bunu ka mia amijikia ail vevan ka aver nalo ajudovulu kami ruei, ka nalo aburu kami kubano iorou bereio jeltan ka kulo Ju nalo kialo tuboiano. Mia kami kuvitii vatitig, bior napano nalo na bunu maka atu adukar vite nalo nonovio napano tuboiano naio jo berenio.

¹⁴ Naruei ea kiniou, maka bunu ve titai ka nesidom navarvar ka kiniou kanio, mia kiado Tubo Yesu Kristo kiano ñakolkolo ga napano nabarvar kiniou kanio, bior kiano ñariano mila bajago nalo na vio yetemeriba nei nalo abinimei jibe ka vite nalo napano añaño ga ea kiniou ruei, ana mila kiniou bunu nebinimei nejibe ka toro na ñaro tai ea bajago na tibolboiano nalo na vio yetemeriba nei ruei.

¹⁵ Ka toro tai rimei rimemedu vija Atua, bekurano ka toro nene be pakuveu ðeli na maka rive pakuveu, ana ver Atua naio

tii toro nene rimei rive toro vou bereio tukamu vo, karina toro nene naio mijikia rimei rimemedu vija naio. ¹⁶ Naruei kiniou nobolkouo ka nalo napano mia adukar iliano nei, napano mia amei ave Atua kiano kulo Israel nalo garuei rimemedu, neberenio mia Atua kiano tumaroano a natinieiano to vijalo.

¹⁷ Ninei naruei be kanaku iliano. Mia kiniou maka nesidom ka napano toro tai rila yebekavo ka kiniou tibe na bereio, bior kiniou nabar niajebijo kar Kristo ea mokotenaku ruei, jibe ka napano ajuba kiniou a abitiv kiniou.

¹⁸ Nao kuruaku nalo a kuvivinioku nalo, kiniou nobolkouo ka mia kiado Tubo Yesu Kristo kiano tiniememiano naio to rivija niunumi nalo nonovio,

Mm tenene na.

Mesi Napano Pol Bivitauiaio Ban Namoneano Lu Nalo Na EVESO Verialiano Moti

Tukunu bulati na niosi nei

Burupati jidomiano napano Pol berio ea mēsi nei napano naio jirio ba ban namoneano nalo na Evesas, nina iliano na mirano takurano togio duelimo (1:10) napano berii Atua kiano tiiano. Naio berinavo Atua jidom ka vite nalo napano naio jiilo, mia amei vio takurano. Naio jidom ka vite nalo na tiniabene a na yetemeriba mia amei aiasol lo ea Kristo, napano naio jibe ka be parinio ka vite nalo nonovio. Mia Pol berii burumara Atua kiano tiiano, napano tiiano nene be tomu nalo na vio nonovio ka nalo aiasol vatitigio ea voroniano ve takurano ga, a amijikia ala tibena ver amonea Yesu Kristo. Mia naio ber vatitigio bo ban Atua kiano tomu nalo ka averial tiiano nene ea kialo meuliano.

Ea mēsi nei togio na beamu, Pol berii mārabo napano Atua Karmado mila ka tomu nalo amei ve takurano. Naio berii bajago nei napano Atua bijauia bulag kiano tomu nalo, a berii napano ea Yesu Kristo Atua Kererinio, Atua nai biekokoa kanano tomu nalo, ana barbulag kialo kareano nalo, milalo

amilala. Mia naio berii bunu napano Atua jian Niununo Lu ban kiano tomu nalo, ka averial napano naio mia sian vite nalo vanlo, tibe napano naio berkario ka rilaio. Ea mēsi nei togio juo [2] nene, Pol ber ka tomu nalo ka mia avuluku mēsi nene, ka nalo monoka averial ka abe takurano bija Kristo, ea bajago na mia amijikia aiasol vatitig vija namoneano dolu nalo.

Pol berii jamerijiano nalo, ka verial bajago na Atua kiano tomu naloaju amiasol vatitig ea Kristo. Naio berinavo yimo lu naio jibe mokotenado napano Kristo be parinio kanio, a jibe yimo napano Kristo be martea novo na sudu nene, a jibe tira napano Kristo be koano. Atua tinien miia laka tomu nalo na yetemeriba, a tomu nalo amial tinietiano nei ea Kristo. Atua kiano burumara tinietiano nei julu Pol kiano jidomiano, naruei naio berial kiano moneano ea mēsi nei. Mesi nei berial Kristo kiano bajago napano naio tinien miia kito, mārō ka rivulu bulag kito, a jo miija kito ea kiano tiniese-seiano ka kito romemedu vatitig ea Atua mirano.

Torogio nalo na niosi nei

Iliano moti 1:1—2

Kristo bija kiano yimo lu

1:3—3:21

Meuliano vou ea Kristo 4:1

—6:20

Iliano maariano 6:21-24

*Pol jikar kiano iliano
banlo*

¹ Kiniou Pol, napano Atua naio bitirilar kiniou ka neve kiano toro tai napano no-joŋa ber bulag Ioluanou Vou nei, napano nebe Kristo Yesu kiano atevi, kiniou nejirii mēsi nei viedu ban kamiū namoneano nalo na komeli labo na vio Eveso, napano kamiū na kubiekouo ea Kristo Yesu.

² Kiniou nobolkouo ka kamiū ka mia tiniememiano a tumāro na Atua karamādo kiano a na kiado Tubo Yesu Kristo, to vija kamiū bunu.

Atua milivu ka kito ea Kristo

³ Bo kanio kito reiaia Atua, napano naio be Atua ka kiado Tubo Yesu Kristo, a napano naio be karamāno bunu, bior kito napano robe takurano bija Kristo, Atua naio mila vatitig kito bo laka ka ilivuiāno novo nalo ea vio mave. ⁴ Nina jibe bogo na vio yetano nei naio makanio vo, ana Atua naio berko kito ruei kan romei rove takurano kiteaku Kristo, ka rove kanano, a kan kiado meuliano naio rimeravo rivu ea mirano, napano mia maka niamiamo tai toaio. ⁵ Beamu laka, bior kiano burumāra tinietiano, ana Atua naio midu kito roju kanio mia naio riv-iobulag kito rove kenerinio nalo ea Yesu Kristo. Vite na, Atua naio mila memedu ka nana naio mialio ber bo ka mia naio rilaio, a naio jaaro toru bunu ka rilaio. ⁶ ! Reiaia Atua rivior kiano burumāra tiniememiano nei, a ka kiano ijaiano novo nei na

naio jian kurano ga kanio ban kito, miyotuba ea kenerinio na naio jidom mēlea naio!

⁷ Ja na kenerinio naio miou, mia kario vite na kito napano robe takurano kitoliko Kristo nene, ana Atua naio buru bulag kito, napano naio biekokoa kiado kariano nalo. ! Riano ga, Atua kanano tiniememiano ka kito naio toru laka, ba lie vo! ⁸ Atua naio be masou laka, mia naio bitilubar vite nonovio, ⁹ ana naio jaaro ka rijamo ka kito rejikia kiano jidomiano tai napano beamu naio be navigivaniano tai ka kito. Naio mila jidomiano nene binimei meravo batitig bo ka kito, a kiano jidomiano ka riŋauka vite novo nalo ve telabo ea Kristo ga. ¹⁰ Ea jidomiano nei naruei, mia Atua naio riasol vatitig vite nalo napano naio jiilo atu vio ve takurano, nina ea vio mave a ea vio yetano, nalo amei yetano ka Kristo, a mia Atua naio riŋauka batitig vite nonovio rimemedu ka kiano jidomiano, rivano-orila nono batitig rivu ea bogo nene rimemedu.

¹¹ Vite nalo nonovio monoka amalmaluvo rimemedu ga ka na Atua naio jidomkakar ka rilaio. Mia jakii kiano jidomiano nei nanua beamu, naio berkar berinavo kumemi kulo Israel ka kumemi nuve kiano, ka kumemi nuve takurano kumemi liko Kristo. ¹² Kumemi nei naruei, Atua bitiri bulag

kumemi ka mia nuvitu tukamu ka mia nuvidu kenememi jidomiano to sikili ea Kristo, tenene na, bo ka kumemi monoka nuviaia Atua bogo nonovio, bior naio bo laka.

¹³ Mia kamiu kulo dolu nalo bunu, napano kamiu maka kuve kulo Ju nalo, kamiu kumijog iliano riano nei ruei, napano be Ioluano Vou napano kubokar kenemiu ioruriano eaio. Kamiu kumonea Kristo ruei, ana kubinimei kube Atua kiano tomu nalo ruei. Ana bior kamiu kube kiano, Atua naio midu tovo na vite na monea kamiu, napano naio jian Niununo Lu ban kamiu, jibe ka napano naio berkario.

¹⁴ Ana Niununo Lu nene, naio jibe ka Atua kiano verikariano togio na jukamu nene ban kito, ka mia kito rejikia vatitigio ka mave ka Niununo napano, kito ro-vokar nono jajumano na be kiado, nina ea bogo na mia Atua naio rivuru bulag tomu nalo avan eaio, nina nalo ga napano naio bul bulaglo ruei abe kiano. !Kito reiaia Atua, bior naio bo laka!

Pol kiano volkouano

¹⁵⁻¹⁶ Bior ka vite nalo na, bogo nonovio, ea kanaku volkouano, kiniou nojo no-jidomial kamiu, a nojo nobersiva toru ban Atua bior kamiu. Bajago na, nejikar ea bogo napano nomijog ka kamiu kumonea jikili Yesu, kiado Tubo, a kumisidomii toru namoneano lu dolu nalo, naruei binimei bokar

banei, kiniou nojo nobolkouo jibe na. ¹⁷ Bogo nonovio na nojomna nobolkouo ban Atua, napano naio be Atua ka Yesu Kristo kiado Tubo, a napano naio be karamado na mermerano na toru, nojo nobika denio ka naio rudu Niununo na masouano a Niununo na verialiano van kamiu, ka kuvijikia Atua ve toru lie vo.

¹⁸ Ana na nojomna nobika denio ka naio rivetavo ea kenemiu jidomiano, ka mia kuvitilubar kiano yulu, a ka kuvijikia vite nalo napano Atua naio bio kamiu kanio, a ka kenemiu jidomiano naio monoka sikili lie vo ka mia kuvokar vite nalo na. Vite nalo napano, naio be kenemiu jajumano, jibe ka vite na bo telabo napano Atua mila batitigio ju, ka ve namoneano lu nalo kanalo. ¹⁹ A vija naio bunu, kamiu monoka kuvitilubar a monoka kuvijikia batitigkanano burumara moroano na toru, napano naio jo mimau ea kiado meuliano napano romonea naio.

²⁰ Nina burumara moroano nene kia ga navo napano Atua naio mimau eaio, bogo napano naio bitirilar Kristo naio meul bereio den namariano, karina, naio buru naio ba midu naio jotano ea vameruo na naio ea vio mave. ²¹ Moroano nene, naio mave loa ka moroano dolu nalo, a vite dolu nalo na jikirkili, a tomu na tortoru dolu nalo, a navurinmaraboiano dolu nalo na mave. Mia Kristo siano naio jo mave laka laka

loa sio dolu nalo, maka ea vio yetano nei ga, mia ea yetemeriba dolu bunu na mia rime. ²² Atua naio midu vite nalo nonovio aju yetano ka Kristo jaano, a naio bitirilar Kristo ea tumāro lu na kiano, ka mia naio ve parinio ka saba nonovio. ²³ Mia kiano tumāro lu nei, naio jibe ka tati na Kristo, napano bujo batitig ka Kristo, napano naio bujo batitig ea saba nalo ea vio nonovio.

2

Vonganei kito romeul ea Kristo

¹ Nanua beamu, jibe ka kamiū kumārmāro ga bior kenemiū vovaiano nalo a kenemiū kariano nalo, ² naruei ea bogo na, kamiū kumiel ea bajago va nalo na yetano nei. Beamu, kamiū kumitakisōr tubo na moroano nalo na vio yauo, kumonmonea naio ga, napano naio be niununo napano jo mila kiano imāuano ea nalo napano mā maka amonmonea Atua. ³ A nanua beamu, kumemi kulo Israel nalo bunu, kumemi nubare ga ka kulo dolu nalo, napano numitumā numiel jakii ga kenememi tinietiiāno nalo na bajago va na toro ga. Kumemi bunu, numitumā numila ga vite nalo napano kenememi jidomiano jidomio, vite nalo napano mā numijog bo kanio. Bior saba nalo na, numitavukia tomu dolu

nalo na, napano Atua tinien ser kumemi bunu, rivan rivano bisi ana mia naio maka rijikia rila vite tai ea kumemi nei, ana monoka sian vironiano van kumemi bunu.

⁴ Mia Atua, kiano tiniememiano a kiano jidomiano naio toru laka ban kito, ⁵ ana bogo na naruei jibe ka napano ramārmāro ruei kar kiado vovaiano nalo, mia naio mila kito romeul bereio kitoliko Kristo. Be riano ga, Atua naio milarur kito ea ga kiano tiniememiano.

⁶ Ana jibe ka kito romeul kitoliko Kristo, mia Atua naio bitirilar kito bija naio bunu, a naio midu kito rojutano bija naio ea vio mave.

⁷ Atua naio mila jibe na bior bogoti nalo napano ju ka rime, mia tomu nalo amijikia avitilubar kiano tiniememiano nei naio toru laka, naio jidom kito jibe na miyotuba ea Kristo Yesu.

⁸ Atua naio milarur kamiū ea ga kiano tiniememiano, bior kamiū kubarkar tiniemiū ea naio. Vite na maka rimaluvo ea kenemiū imāuano novo tai, makanio, mia Atua ga naio jian kurano ka ga ban kamiū. ⁹ A vite na maka ve vite tai napano mia toro mijikia rimāu riviorio, bior ver tibe na mia ravarvar kito kanio, reil vevavin rover “O kiniou,

kiniou ga nemilarur kiniou ea kiaku imāuano.” ¹⁰ Mia kito rajavukia tonovo tai napano Atua miimāukanio

bo laka, ka napano naio ji kito robinimei robe kulo vou nalo ea Kristo Yesu, a Atua naio mila jibe na ka mia kito bunu rala kiano imauano novo nalo, napano naio bijauialo kar beamu ruei, ka kito roimaukanilo ea kiado meuliano nalo.

Kito robe takurano ea Kristo

¹¹ Mia kamiu monoka tiniemi rimaio ka bogo na kumoluo, kamiu maka kuve Atua kiano tomu nalo tavukia kulo Ju nalo, kamiu kube kulo dolu nalo ga. Kanio tena, kulo Ju, nalo napano aber nalo abe kulo lu, bior nalo abokar pakuveu jikili, amiyotel ea kamiu, aberenio “Kulu momou” ea kamiu. Mia pakuveu na, naio be vite kurano ga tai ea kuluniabene toro ga. ¹² Mo, ana nanua beamu, kamiu kumitibe na ruei. Kamiu tiniemi ribobogia re nanua, kumitu koalabo ka Kristo, kumitu tavio ka taara na kulo Israel nalo, a kube valauo ga, mia maka kuvijikia kuvokar vite nalo napano Atua naio berkario ban kiano tomu nalo. Kamiu kumitua vio yetano nei, kube iakurano ga liki, a maka kuvijikia Atua leleio. ¹³ Mia kamiu, napano beamu kumitu koalabo, mia vonganei kubinimei vaataro ruei ea Kristo kiano burukija, vonganei ana kube takurano kamliko naio.

¹⁴ Kristo naio be kiado tumarano, naruei naio mila kiado taara juo nei

abinimei abe takurano. Beamu kumemi kulo Ju bija kamiu tomu dolu nalo, rojuma tiniedo jer kito bogo nonovio, jibe ka burumara tagvoru tai jibure kito, mia Kristo naio mila bulag vite nei ea kiano namariano. ¹⁵ Naio berbure kulo Ju nalo kialo tuboiano bija yati nene nalo, naio mila jibe na ka mia rila kiado taara juo nei amei ve toro takurano ea naio, tibe kanio naljuo amei ave vite vou tai. Jibe na naruei, Kristo naio mila tumaro bija kito. ¹⁶ Ea kiano mariano napano ea makolkolo, naio muekorov kiado tiniemimiano, ana naio burubiron kiado taara juo nei abinimei abe tomu takurano, ana naio mila robokar jumado bereio kitoliko Atua, mila kito robe merevu bereio bija naio. ¹⁷ Mo, ea bajago na naruei, Kristo naio binimei, berial Ioluanu Vou na tumaro nei ban tomu nalo, nina kamiu napano maka kuve kulo Ju, napano kumitu koalabo ka Atua, bija kumemi bunu kulo Ju nalo napano numitu vaataro ruei. ¹⁸ Ana bior vite nalo nei napano Kristo naio mila ruei, vonganei kito nonovio robe kiado marabo tai ea Niununo tai ga, ka romei ea karamado mirano.

¹⁹ Jibe na, ana kamiu maka bunu kuve valauo, a maka bunu kuve toro na maka ve kiano vio tai, makanio. Mia vonganei kamiu kube matatoko bija

namoneano lu dolu nalo ea Atua kiano vio, ana kumitua kiano m̃aratavo. ²⁰ Kamiu kumitavukia m̃arte na yimo tai, napano atevi nalo a kulo naverialiano nalo, nalo ajibe ka m̃arte na sudu na yimo nene. A ea yimo nei, Yesu Kristo naio jibe ka m̃arte siyovo napano kirisikili bo napano ju iviso, ²¹ napano naio jo bokar jikili batitig m̃arte dolu nalo nei. Naio bokarlo naruei, ana nalo ajumolu aju jikili, ana na yimo nei naio jo binimej jibe ka Atua kiano yimo lu tai. ²² Atua naio jo miñauka kamiu jibe na naruei, ka ea Kristo kamiu tomu namoneano riano nalo, kamiu kuvitu kumei kuvitibe ka yimo tai, napano naio mijikia riva to joomo bogo nonovio eaio ea kiano Niununo.

3

Pol naio jo mila iñauano na Tubo kiano banlo ruei

¹ Mia ka vite nalo napano neberenio ruei, kin-iou Pol, nojo nobolkouo ban Atua bior kamiu. Mia vonganei nojoa yimo na tetavokoiano, bior nojom̃a nemila iñauano napano Kristo Yesu kiano ban nalo napano maka ave kulo Ju, jibe ka kamiu, mia nojom̃a nobolkouo kia ga vo ka kamiu ban Atua. ² ? Peli kamiu kubitilubar ruei ka nojom̃a nomim̃au jibe na kar kamiu, p̃eli na makanio? Iñauano na kiaku ka rijai kamiu, Atua

naio jianio ban kiniou ea kiano tiniamemiano, ³ ana naio jibe ka kiano jidomiano tai napano beamu naio bigivania, avona kario ana naio jiloglogio ka kiniou.

A vite na kiniou nejiriio ruei, ⁴ a ver kamiu kuvulukuio, mia kumijikia kuvokar kiaku jikiaiano tivelinio nene ea jidomiano na Atua kiano, napano vonganei naio jo binimej malmaluyo meravo ea Kristo. ⁵ Ea terati nalo na beamu, tomu nalo maka ajikia vite nalo na jibe ka vonganei, napano Atua naio jiloglog vonganei ban atevi lu nalo bija kiano naverialiano nalo maluyo ea Niununo Lu. ⁶ Mia iliano napano binimej meravo nei jibe na naruei, napano naio ber jibe na berinavo, kulo dolu nalo bunu naliko kulo Ju nalo, abe juo abokar Atua kiano ilivuiiano nalo, napano ajibe ka torogio na tati takurano ga, a ka Atua kiano naverikariano nalo abe kialo bitiraviriano abe juo. Saba novo nalo na amaluyo bior Kristo Yesu kiano Ioluano Vou.

⁷ Mia Atua naio mila kiniou nobe atevi na iñauano na Ioluano Vou nei, a iñauano nei naio be ijaiano novo tai napano Atua jianio ban kiniou, napano kiano moroano nene naio jo miñau maluyo ea kiniou.

⁸ Kiniou kiritavaso loa namoneano lu dolu nalo, mia najaaro toru laka napano ea tiniamemiano napano Atua kiano, naio mije monea

juñaku ka kiniou noioliolu ka Ioluano Vou nei van nalo napano maka ave kulo Ju. Jibe na naruei, na kiniou neber lualua banlo vite novo nalo napano be Kristo kiano, napano mia maka ajikia avulukuio, ⁹ mia nojo nejiloglog bunu banlo juñabe napano Atua naio mila kiano jidomiano nei maluvo. Jikario ea bogo napano Atua naio ji saba nonovio, binimei bokar bogo nalo napano abarlaka ban ruei, Atua naio bigivanio kiano jidomiano nei jo. ¹⁰ Ana ea kiado bogo nei naruei, Atua mila nailiano nalo bija moroano nalo napano vio mave, amijikia avitilubar kiano masouano dolu nalo ea vite nalo napano naio miñaukanio ea Yesu kiano nalotuno. ¹¹ Saba nalo na, amemedu ga ka Atua kiano jidomiano, napano naio jomña jidomii kakarlo beamu, ka bogo na vio yetano nei naio makanio vo, a naio mila saba nalo nei amalmaluvo ruei binimei ea Kristo Yesu, kiado Tubo. ¹² Mia bior kito rabarkar tiniedo ea Kristo, a robe takurano kitoliko naio, naruei romijikia romei rotumolu rotukamu ea Atua mirano, a maka rejikia romemebiju, a kiado iviso sikili ea naio ka mia naio saaro ka kito. ¹³ Tenene na, kiniou nojo nobika jikili den kamiu, nober bo ka kamiu tiniemiu rijoru re rivatove bogo tai, napano kumijog bova toru ea kiniou ea jaleleano nalo

napano nojomña nabokario bior kamiu ea yimo na tetavokoiano nei, napano ajumña amilavon kiniou toru. Saba nalo nei, nalo abe tena rijai kamiu ka mia kuvokar mermerano na Atua kiano.

Pol kiano volkouano

¹⁴ Jibe na, bior vite nalo napano nojomña neberenio, na kiniou neminie, nobolkouo ka kamiu ban Karamado, ¹⁵ napano naio be Karamado riano garuei memedu, a napano karamalo dolu nalo na maratavo nalo na ea vio mave a ea vio yetano, nalo ajumña abar kialo bajago novo a sialo novo nalo ea naio ga.

¹⁶ Kiniou nojomña nobika den Atua, napano kiano mermerano naio toru laka, ka mia naio rudu kiano moroano toa kenemiu iviso nalo riyotuba ea ga kiano Niununo, ka kenemiu iviso nalo atumolu atu sikili vatitig damariga. ¹⁷ Nojo nobolkouo bunu ka mia Kristo naio to kamliko damariga bogo nonovio ea kenemiu iviso nalo rimei ea kenemiu viekouoiano nalo, a nobolkouo ka kamiu bunu bajago na jidomiano, naio rimei tibe ka burupati na kenemiu meuliano nalo. ¹⁸ Jibe na, ana kamiu kamliko namoneano lu dolu nalo, mia kamiu kuvare ka mia kuvijikia kuvitilubar burumñara jidomiano na toru napano Yesu kiano, pñeli jagati, pñeli tebievi, pñeli vaviniano, pñeli na bululuoiano nene tumñabe. ¹⁹ Riano

ga na, kiano tinietiiano nene naio toru, mia maka garuei, kito maka rejikia rover romijikia batitig naio ruei. Mia bekurano, kiniou nobolkouo ga ka mia kamiu kumijikia kuvial kiano jidomiano nene ea kenemiu meuliano nalo, rivano-o mia Atua kiano bajago novo, a kiano meuliano novo, avujolou batitig ea kamiu.

²⁰ Mia vonganei, kito reiaia Atua, bior ea kiano burumara moroano napano jo miñau ea kiado iviso nalo, naio mijikia rimau tovulu venia napano romijikia rovika denio, ðeli venia na mia romijikia rosidomiio. ²¹ Mia vonganei, Atua kiano lotuano reraio aiaia naio rivior Kristo Yesu, vonganei, a bunu ea terati nalo nonovio napano ea bogo nalo na aju abinimei, rivano-o mia ribisi deio. Mm.

4

Kito rojibe ka tati takurano ea Kristo

¹ Jibe ka kiniou nojoa yimo na tetavokoiano, bior kiado Tubo kiano iñauano, nejikili ka kamiu, ka kenemiu meuliano nalo monoka rimemedu ka bajago nalo napano Atua naio bio kamiu kanio, mia kamiu kuviel eaio. ² Tibe na ana mia kamiu kuvatove ga ka kamiu, a kumelumu ga bogo nonovio. A kenemiu jidomiano monoka rimelokloko ka kamiu, napano mia

tiniemiu rimimi soðeli re van kamiu. Nina naruei naio be bajago na tinietiiano.

³ Kamiu kuvilavio sikili ka kuvokar batitig tumaro nei napano riasol kamiu, tibe na ana kumijikia kuvitigar batitig burukutiano napano Niununo Lu naio jo jianio ban kamiu.

⁴ Kamiu kumitibe ka tati takurano ga, a be Niununo takurano ga bunu joa kamiu, mo ea bajago nene, be verikariano takurano ga napano kenemiu jidomiano naio mijikia tu sikili eaio, napano Atua bio kamiu biorio.

⁵ Ana Tubo Yesu takurano ga, a kiado moneano ea naio be takurano ga, a varueiano bunu be takurano ga, ⁶ a Atua takurano ga napano jo, napano naio be kulorinio nonovio karamalo, a naio mije tuboiano ka vite nonovio, a naio mila kiano iñauano miyotuba ea vio nonovio, a naio joa kulorinio nonovio kialo meuliano.

⁷ Mia ea kito nonovio robeve terakurano, Kristo jian ijaiano dedade nalo ban kito ea kiado meuliano, napano nalo kirinovo laka, memedu ka kiano tini-amemiano napano toru nei. ⁸ Nina javukia napano Iliano Lu berenio nanua ruei, berinavo

“Bogo napano naio jo bavini ea vio mave na bavini laka,

naio burukar kiano uolu nalo napano naio jovululo ruei, nalo iorou ka naio,

a naio jian ijaiano ban tomu nalo napano abe kiano.” Iouano 68:18

⁹ ?Mia iliano napano bere-nio berinavo “naio bavini,” naio berii venia? Iliano na naio berenio beamu, naio batove laka ruei, napano naio binimeia ea vio yetano nei, naio batove ea kiano vio bululuo nene nalo. ¹⁰ Mia toro napano beamu naio binimeia yetano, toro nene kia ga na vo napano mia iorou kanio ana naio bavin laka mave, a bereio, naio bavini lie bereio vo, ka naio mijikia rison batitigio rivujo vio nalo na Atua naio mila vatitigio aju. ¹¹ Mia naio naruei toro nene kia ga na vo napano naio joña jian ijaiano ban kiano tomu nalo, napano tealoo, naio bitiri lualua nalo abe atevi, a tealoo, naio bitiri lualua nalo abe naverialiano, a tealoo, naio bitiri lualua nalo abe naieliano ea Iouano Vou, a dolu nalo, naio bitiri lualua nalo abe tomu navitikariano na namoneano nalo, a tealoo, ka averlogloglo. ¹² Kristo naio mila jibe na ka mia namoneano lu nalo amijikia ala kiano inãuano, ka taara na namoneano nalo na vio yetano nei, napano ajavukia tati na naio, mijikia riluo lie vo a rimeia sikili lie vo. ¹³ Tibe na, ana mia kito nonovio romijikia romeia ve takurano ga ea kiado viek-ouoiano ea Atua kenerinio, a romeia rove takurano ga bunu ka robitilubar batitig naio ea kiado meuliano nalo.

Tena naruei, ana romijikia rotu romeia rotibe ka toro na naio meruo, riva rivokar napano mia romeruo tibe ka Kristo, napano mia romeia rove toro na toru riano tibe ka naio.

¹⁴ Tibe na, mia kito rotibe ka re bunu kiritete, napano naverloglogiano dolu nalo na tomu na sibiano nalo aburu kiado jidomiano aba be dolu, kialo jukujukuano nalo abilvilig kito, jibe ka napano jega naio joña miuvuvu kito, ñeli na tei joña buku bilvilig kito janea vio reraio, makanio. ¹⁵ A kito monoka rovokar ilirianiano ea bajago na tinietiano, a ea kiado m̃arabo nonovio nalo, monoka reiluo ka mia romeia rove Kristo kiano tomu nalo, napano naio be parinio ka bagaro na namoneano nalo na kiano. ¹⁶ Mia kito rojibe ka torogio nalo na tati na naio, napano naio jo mila torogio nalo nei abinimeia abe takurano ga ea naio, ka kiano meribuku nalo atu aiasosol vatitig torogio nalo nei van ea pariparinio. Mia bogo na torogio na tati nei nalo atakii vatitig kialo inãuano nalo rimemedu, mia nalo atunãa tinielo tiilo bereio, mia tati nene naio mijikia riluo, mijikia rimeia sikili lie vo.

Meuliano vou ea Kristo

¹⁷ Ea kiado Tubo siano, nejikili ka kamiu bereio, ka kamiu kuvitikar kamiu, mia kuvitakii re bunu bajago napano nalo na maka

amonea Atua. Nalo na, kialo jidomiano kirivova ruei, a be mñadati ruei, ¹⁸ a joa melijokouo ga. Tenene na, nalo aju koalabo laka den meuliano napano Atua naio jianio, bior pariparilo kirisikili laka, jibe kanio puruveru, maka ajikia ajoglubar vite. ¹⁹ Tinielo maka bunu rijikia rimou ka kialo vovaiano nalo, naruei nalo ajidel dolu ga ea siakaiano, a bajago nalo na kiriniagiago, napano maka asidomialio leleio.

²⁰ Mia ea Kristo, maka averloglog kamiu ka bajago na jibe na tai leleio, makanio. ²¹ Mia aberii kiano saba novo nalo telabo ban kamiu ruei, napano kamiu kumitakisorio, mia aberloglog vatitig kamiu ka ilirianiano nei napano jua Yesu. ²² Tenene na, kamiu monoka kuvilar bajago moruo na kumoluo bijaio. Bajago na naio jomña mila kenemiu meuliano re beamu abova, mia nanua, kenemiu sidomvovaiano nalo na bajago nene, nalo ajumña amiju bolbo lili kamiu, a nalo aju amila lelan kenemiu meuliano nalo toru toru laka. ²³ Mia vonganei, kenemiu iviso nalo a kenemiu jidomiano nalo monoka amei ave terivou nonovio, ²⁴ ana mia kamiu monoka kuviya bajago vou nalo na kenemiu meuliano vou ea Yesu napano Atua naio jiio ea kamiu, javukia kiano, ka mia tomu nalo amijikia aialio ka

naio memedu riano, a be lu.

²⁵ Tibe na, ana sibiano re bunu, bior kito robe torogio na tati na Kristo, monoka rove riano ga van kiado na vaataro nalo bogo nonovio.

²⁶ Mia ver bogo tai tiniemiu rimimi, mia kuvila re ka tiniemimiano na rivuru kamiu kuvan ea kariano, mia kenemiu tiniesereiano monoka rivatove beamu vo, karina mñerenio rijoru. ²⁷ Mia kamiu monoka kuvijamo ka re buluvio van Siñaro ka rimei rilaso kovova laka.

²⁸ Toro napano beamu naio be toro na vinauano, naio monoka tuvan vin-auano. Naio monoka rimau mñele ka jumñano ea bajago na memedu, ana mia naio mijikia rivitikar naio, a rijai talimñasa nalo bunu.

²⁹ Ea kenemiu iliano nalo, kamiu kuve re ilimenunuano, mia kuverenio iliano nalo napano mia rijikia rijalar kialo jidomiano nalo, ka nalo amijog kenemiu iliano nalo, napano jasonu bare, a memedu bo, a ka rijailo. ³⁰ Kamiu kuvila re Niununo Lu riumou, a rijog rivova, ea kenemiu ilivovaiano nalo, bior Niununo Lu napano, Atua midu joa kamiu jibe ka kiano tovo, napano naio berial berinavo kamiu kube kiano, a ka riverial bunu, ka mia naio rivuru bulag kamiu ea bogo na tagaþiano. ³¹ Mo tibe na na, bo ka tiniemiu rimimi re bunu, ala re bunu siniabu, a tiniemiu ajea re

bunu. Kamiu kuvituvan bajago na pepeiano, a bajago na ilivovaiano, a bajago na bilbilu vaiano.

³² Mia kamiu kuvijuku rivu ka kamiu, tiniemi rimelokloko van kamiu, a kamiu kuviekokoa kamiu tavukia napano Atua naio biekokoa kamiu maluvo ea Kristo.

5

Kamiu kuviel ea miamoiano

¹ Bior kamiu kube Atua kenerinio novo nalo, kamiu kuvilayon ka kuvar nonovio kiano bajago. ² Monoka kuviel ea jidomiano, tibe ka napano Kristo naio jidom kamiu, ana naio mijamo ka kiano meuliano kar kamiu, jibe ka bonotanunu novo tai ban Atua, a sida tai napano Atua naio jaaro kanio.

³ Bior kamiu kube Atua kiano namoneano lu nalo, maka rimemedu leleio ka bogo tai saba nalo tai amalmaluvo ea kamiu tibe ka siakaiano, p̃eli vite na imouiano, p̃eli na bajago na sidomii vite ta bunu, mia vite nalo na maka ve tena kuva kuvitum̃a kuvil sosol kanio. ⁴ Maka rimemedu ka kamiu kuver ilivovuiano nalo p̃eli iliniagiagoano nalo, p̃eli iliserevaiano nalo. Memedu ka kamiu kuvitum̃a kuver siva ga van Atua.

⁵ Kiniou nejidom never rimeravo van kamiu, ka nalo napano ajum̃a amila siakaiano, a nalo napano ajum̃a amila vite nalo na imouiano, a nalo napano

ajum̃a ajidom aiobua saba ta bunu ta bunu bogo nonovio, nalo na mia ava kovio. Toro napano naio jidom m̃elea saba bogo nonovio, naio jibe ka toro napano milotu ka atua dolu nalo. Kamiu kumijikia kumonea iliano nei ruei, napano berinavo nalo napano ajum̃a abokar bajago va, mia maka leleio ajikia ava jouro ea navenatuboiano napano Kristo naio Atua kanalo.

⁶ Kamiu kuvijamo re ka tomu nalo avuru kamiu kuvan ea m̃arabo dolu nalo, napano nalo amijubolbolili kamiu ea kanalo iliseseiano nalo. Vite nalo nei naruei, mila ana Atua tinien jerlo ruei, jibe ka napano nalo maka amonmonea naio ruei, ana na mia naio rudu vironiano vanlo. ⁷ Mia kamiu kuva kuve re taara ve takurano leleio vija tomu nalo na jibe na.

⁸ Nanua beamu, ana kamiu kube tomu nalo na melijokouo ga, mia vonganei, napano kumitua kiado Tubo, kamiu kumitua kiano miamoiano bunu. Tibe na, monoka kuviel tulaka ga tibe ka kamiu kube tomu na miamoiano nene nei ruei, ⁹ bior ea miamoiano nei, mia naio mijikia rila kenemi meuliano rivu, rimemedu, a naio rive riano, ana mia naio rijikia rivar m̃arati novo nalo ve telabo. ¹⁰ Kamiu monoka kuvilavio sikili ka kuvileal bajago vaio napano kiado Tubo naio jaaro kanio. ¹¹ Mia kamiu liko re tomu

nalo na amila vite nalo na bova, napano abe iñauano kurano na melijokouo ga. Mia bo verenio kami u kuvar saba nalo nene amei ea miamoiano.¹² Kito romimou kija ga ka rover vite nalo napano mña aba amila luklukuaio,¹³ mia bogo napano Atua naio rivetavo ka vite nalo nonovio amei ea miamoiano, mia miamoiano nei naio rila bajago nalo nei amalmaluvo.¹⁴ Mia bogo na miamoiano mila vite nalo amalmaluvo medave jibe na, vite nene nalo bunu amijikia amei tibe ka miamoiano. Vite nei javukia iou napano berii jibe nei, berenio

“Jau napano komonmelio ruei,

ketevijo, kotumolu ea namariano, komeul bereio,

ana mia Kristo naio rimereraliso.”

¹⁵ Bior tena ana kami u monoka kuvitika vatitig kami u rivu, ka mia kami u kuviel tumñabe. Mia kuvitibe ka re nalo na maka ve pariparilo, mia kuvila bajago nalo na tomu nalo na abe masou bo.¹⁶ Kami u monoka kuvisel ea buluvio nonovio napano kuvilealio, ka kuvila iñauano na bo ea, bior kito rojua bogo na vovaiano nei.¹⁷ Mia kami u kuviavovu re, ana monoka kuvilavon ka kuvijikia vite nalo napano kiado Tubo naio jidom kami u ka kuvilaio.¹⁸ Mia kami u kumunu re bunu mñarjumlñelu rivano-o mia mña kuvilaluv pariparimiu,

ka bajago na naio mijikia rila bulag kenemiu meuliano vodolu bereio. Mia kami u monoka kuvujo ga ka Niununo Lu.¹⁹ Bo ka kami u kuvitukunu van kami u ea iliano nalo napano ea Niosi na Iouano Nalo, vija iouano lu nalo, a iou navameneano van kiado Atua, mia kami u monokanio kuviou ka iouano lu nalo nene, ka kuvamenea kiado Tubo, ea kenemiu iviso vodolu.²⁰ Mia bior vite nonovio, tulaka ga kami u kuvitumña kuver siva van Atua karamñado, ea kiado Tubo Yesu Kristo siano.

Bajago na soriano

²¹ Kami u nalo napano abe namone-ano, sumñano nalo a tire nalo, kami u monoka kuvatove ka kami u, tibe ka ga napano kami u kubatove ka Kristo.

²² Kami u tire nalo napano kumisoro, monoka kuvatove ka kouemiu nalo, tibe kanio napano kami u kubatove ka kiado Tubo,²³ bior ka sumñano naio be parinio ka koano, jibe ka Kristo naio be parinio ka kiano nalotuanano napano kiano, napano be tati na naio napano naio milarurio.²⁴ Bior vite na, tire nalo monoka avatove ka koalo nalo ea vite nonovio, tibe ka Yesu kiano nalotuanano jo batove ka naio.

²⁵ Mia kami u sumñano nalo napano kumisoro, monoka kami u kuvisidom mñlea kouemiu nalo, tibe ka napano Kristo naio jidom mñlea kiano nalotuanano, ana

naio mijamo ka kiano meu-
 liano biorio. ²⁶ Naio mila
 kiano nalotuano meravo, a
 naio je ka uei a ka kiano
 iliano, naruei naio miokoio
 ban Atua. ²⁷ Kristo naio
 mila jibe na, ka naio mijikia
 riyuru kiano nalotuano nei
 rimeĩ ea naio, napano naio
 rive lu mia rive lu batitigio
 to, tibe ka niatira sesa
 napano naio ju rorea ka mia
 soro, naio meravo bo, maka
 vite tai rila niegeniege naio,
 a amiovovua batitig naio bo
 mia bo. ²⁸ Ea bajago nene
 ga, toro monoka to sidom
 m̃lea koano, naio rivitika
 batitigio tibe ka napano naio
 jo bitika vatitig niabene.
 Sum̃ano napano jidom
 m̃lea koano, naio jo jidom
 m̃le naio bereio. ²⁹ Maka
 toro tai to rivitii va kanio
 taniabene, p̃eli na rila
 lelanio bereio, mia tomu
 nalo aju abagan batitiglo, a
 aju abitika vatitig taniabele
 nalo. Nina jibe kanio
 napano Kristo mila ban
 kiano nalotuano, ³⁰ mia
 kito romijikia batitig vite
 nei, bior kito robe torogio
 na kanano taniabene nalo.
³¹ Iliano Lu naio beriio bunu
 ruei napano sum̃ano bija
 koano, naljuo abe taniabele
 takurano ga, napano naio
 berenio, berinavo “Bior vite
 na, mia sum̃ano naio tuvan
 karam̃ano naio kenieno, riva
 rivijuru kar koano. Naruei
 mia nalo ve juo ameĩ tibe ka
 taniabene takurano ga.”

³² Iliano Lu nei, be iliano
 na temi tai joaio, napano

beamu naio be navigivani-
 ano ga tai, mia vonganei,
 nemijikia ka iliano nei naio
 jo berial Kristo bija kiano
 nalotuano. ³³ Mia kamiu
 kuvisidomii re iliano nei
 kuver naio maka to riverii
 kamiu bunu, makanio,
 naio jo berenio na. Riano
 ga, kamiu sum̃ano nalo
 nonovio, monoka kuvisidom
 m̃lea kouemiu nalo, tibe
 ka na kamiu kumisidom
 kamiu ga, a kamiu tire nalo
 nonovio, monoka kuvatove
 ka kouemiu nalo.

6

*Bajago na kiritete nalo
 naliko karam̃alo nalo a ke-
 nielo nalo*

¹ Kiritete nalo, kamiu kube
 nataki na Tubo kanano,
 kamiu kumonea karamemiu
 bija koniomiu nalo, vite nei
 naruei naio memedu ka
 kamiu kuvilaio. ² Tuboiano
 tai ea Iliano Lu napano Atua
 kiano naio berenio jibe nei,
 napano naio berinavo,

“Kamiu kuvatove ka
 karamemiu a ko-
 niomiu nalo,”

mia nina naio be
 natuboiano jukamu napano
 be verikariano mave ea
 naio, napano naio berinavo,

³ “Verenio kamiu kuvila tibe
 na,

mia vite nalo na ken-
 emiu meuliano nalo
 amijikia avuro rivu,
 a mia kenemiu meu-
 liano nalo ea borotano
 nei ve tebievi.” *Tiut*
 5:16

⁴ Kamiu karam̃alo nalo a
 kenielo nalo, tiniemiu riv-
 iluludie re kenerimiu nalo

tulaka, rivano-o mia ajikia tiniel ser kamiu bereio. Mia kamiu monoka kuvisavoriri batitiglo rimemedu rivu, ku-verlogloglo, a kuvisiloglog vanlo m̃arabo nalo na kiado moneano ea Kristo.

Bajago na tomu na iṃauano, naliko kialo tubo nalo

⁵ Kamiu tomu na iṃauano, kamiu kuvitovon ka kenemiu tubo nalo na vio yetano nei, tibe ka napano kumerou kalo, a kuvatove kalo, mia monoka kuvila tibe na ea kenemiu iviso momou nalo, tibe kanio kamiu kumitu kumiṃau Kristo kiano. ⁶ Maka rivu ka kamiu kuvitu kuvila tibe na ea bogo napano ga nalo aju kamlika, ka mia kuvilavon ka kuvilalo asaaro ka kamiu, mia monoka bogo nonovio kuvila vite nalo napano Atua naio jidomio, vija kenemiu iviso rianiano nalo, tibe ka napano kube Kristo kiano tomu na iṃauano nalo. ⁷ Monoka kuvisaaro ka kenemiu iṃauano, mia bo ka kuvila re bunu iṃauano na tavukia napano kumiṃau toro kanano ga, mia kuvila tibe ka kumiṃau kiado Tubo kanano. ⁸ Kamiu kuvisidomii von, toro tai naio be tubo, p̃eli na naio be toro na iṃauano ga tai, be kurano, mia Atua sian meran bereio van rimemedu ka kiano iṃauano novo nalo.

⁹ Mia kamiu tubo nalo na tomu na iṃauano nalo kanalo, kamiu bunu kuvila rimemedu van kenemiu tomu na kenemiu iṃauano nalo, mia kuvil re ka

tiniesereiano tulaka vanlo. Monoka kuvitu tiniemiu rimaio ka kamlika nalo, kubiniu kenemiu Tubo takurano ga, napano joa vio mave, a napano naio jom̃a mila be verare ga ban tomu nalo.

Kito roju romila mira ka Siṃaro

¹⁰ Vaataro kanio nala nonovio kiaku iliano naruei, mia nejidom never ka kamiu, ka kamiu kuvilavio sikili ka mia kuvisikili ea kiado Tubo, vija kiano burum̃ara moroano na toru nene. ¹¹ Kamiu kuviya kuluniabemiu kouo nalo na mira napano Atua jianio ban kamiu, ka mia kuvijikia kuvitu sikili, a ka kuvituko vio ka buruniavo nalo napano Siṃaro kiano, vija kiano juboluboiano va

nalo napano naio jom̃a mijukujuku kamiu kanio. ¹² Nalo napano m̃a kito roju romila mira kalo, ea kiado meuliano, nalo maka ave kulorinio. Mia roju romila mira ka moroano dolu nalo, a siṃaro nalo kialo tomu na tortoru nalo, a kialo tubo nalo napano abe burupati na melijokouo na vio yetano nei vonganei, ana rojum̃a romila mira die semei va nalo na telabo napano aju janea vio. ¹³ Mo bo kanio kamiu kuviya vatitig saba nonovio nalo na tena mira na Atua nei kiano naruei, mia bogo nonovio ga a ea legiano nonovio ga napano Siṃaro naio rimei ka rila mira ka kito, mia romijikia

rala mira ka uolu nalo na, rivano-o mia roto vululo, rivano-o riviniu, mia kito rotumolu rotu sikili kia na vo rotu.

¹⁴ Bogo napano kami kumitumolu ka kuvila mira tibe na, kenemiu vite na mira nalo ajibe nei naruei. Kulubue napano kuburukario ea m̃ariṣimiu nalo, nina jibe kanio napano kubokar bajago na ilirianiano. Kuluniabemiu kouo napano juko vio ka mokotenemiu nalo ka buruniavo, nina jibe kanio kubokar bajago na memed-uano ea kenemiu meuliano vodolu nalo.

¹⁵ Kulubue na toru tena ieliano na jaamiu, nina jibe ka kumitu vatitig ka kuva kuverial Ioluano Vou na tum̃aroano. ¹⁶ Burum̃ara selap napano kumidukario ka kuvituko vio ka buruniavo nalo na Sim̃aro kiano, napano sebi bilvili ealo, nina jibe ka kenemiu viekouoiano na jikili ea Atua. ¹⁷ Basaro na mira na pariparimiu, nina javukia ioruriano napano Atua jianio ban kami, a iobogu na mira na Niununo Lu napano kubokario, nina naio javukia Atua kiano Iliano Lu.

¹⁸ A vija vite nalo na, kami monoka kubolkouo bunu, monoka kuvika den Atua ka rijai kami. Bogo nonovio ga, monoka kuvitur̃a kubolkouo ea mo-roano na Niununo Lu, mia kuvitu tiniemiu rimaio ka namoneano lu dolu nalo tulaka ea kenemiu volkouano

nalo, napano mia miremiu nalo ve temi re bogo tai.

¹⁹ A bereio, monoka kubolkouo rivior kiniou bunu, ka mia Atua naio sian bogo na iliano van kiniou, ka nesidomdeio re ka mia neverial Ioluano Vou na Kristo kiano, napano beamu, naio joluku ka tomu nalo, mia vonganei, mia nesikili ka neverialio vanlo. ²⁰ Kiniou nobe toro na berial iliano na Ioluano Vou nei, mia nojoa yimo natetavokoiano, mia monoka kubolkouo ka mia kiniou nesidomdeio re kanio mia neverial Ioluano Vou nei ea vio nei, tibe napano memedu ga ka nalaio.

Pol kiano iliano na maaro

²¹ Kiniou nejidom ka kami kuvi-jikia kanaku lilianiano nalo, naruei ka tena nemiila kiado bilbilu novo nei, Tikikas, biedu ea kami. Naio jom̃a be niabene ea iṃauano nalo na kiado Tubo kiano ea vio na, ²² ana mia naio riverial van kami ka kumemi numitu jum̃abe, ka mia kumijikia kuvijog rivu ea kumemi bereio.

²³ Ana tum̃aroano, a jidomiano, a viekouoiano binime den Atua Karam̃ado a Yesu Kristo kiado Tubo, aju bija kito a namoneano nalo nonovio. ²⁴ A tiniamemi-ano napano Atua kiano naio toa kami, a ea kito bunu, napano kito nonovio rosidom m̃lea kiado Tubo Yesu Kristo, napano mia kito

rosidom naio rivano-o ribisi
deio.
Kiniou, Pol.

Mesi Napano Pol Bivitauiaio Ban Namoneano Lu Nalo Na VILIPAE Verialiano Moti

Tukunuano bulati na niosi nei

Pol jiri mēsi nei ba ban yimo lu na Vilipae napano abe tomu moti na Yurop napano Pol mioliolu banlo, ana abinimei abe namoneano. Vilipae na buruvenuo na toru tai na tanobuku na Masetonia napano jo yetano ka Parinio Tubo na Romo nua. Pol jiri mēsi nei ea bogo tai napano naio joa nalakoiano, a ea bogo nene namoneano tealō napano aju amilkuei keano naio. Mia naio mijog bova bunu ka kialo verloglogiano sibilibiano napano jo joomo ea yimo lu na Vilipae. Mia mēsi nei berial ka Pol monēakar Atua, a jaaro mia jaaro, ana kito romijikia ka naio mila jibena bior napano naio monea Yesu Kristo kirsikili.

Pol bivitauia mēsi nei ka river sivaiano van namoneano nalo na Vilipae napano ajumā amija naio ka kiano sidomiano nalo. Nalo na ajumā ajuvan veru tealō ba ban naio ka rijai naio. Mia naio jiri mēsi nei ba banlo, ka ridular kialo jidomiano, ka atu amonea Yesu Kristo sikili. Naio mila jibena bior napano maka rivu ka ajog napano naio

joa nalakoiano, naruei mia ajog rivova laka riviorio. Naio ber kalo ka monoka ala kialo jidomiano vatove, jibe Yesu Kristo kiano jidomiano. Maka rivu atu ave mārrou, a atu asidomii nalo ga. Naio ber kalo ber meuliano vou nei napano amijevio ea Yesu Kristo, naio be vite napano Atua jian ga banlo ea kiano tinieseseiano, a abokario ga ea kialo moneano. Maka avokario rivior napano amonea tuboiano na kulo Israel kialo, makanio, abokario bior napano amonea Yesu Kristo. Pol jidom ka namoneano nalo na Vilipae monoka avokar Kristo kiano bajago. Naio berinavo nalo napano amiasol vatitig ea Yesu Kristo amijev tumāro na be riano a aju ajaaro bogo nonovio, bior napano Atua ga jian tumāro nei banlo, a mila lo ajaaro.

Vite burtumoruo tai napano Pol beriio ea mēsi nei, nina napano namoneano nalo monoka aiasol vatitig ea Kristo, a napano monoka asaaro, a napano kialo jidomiano bija kialo moneano monoka atu sikili ea naio bogo nonovio. Mesi nei berial ban kito napano Pol tinienmiia laka namoneano nalo na yimo lu na Vilipae.

*Torogio nalo na niosi nei
Iliano moti 1:1-11*

Vite nalo napano aju amaluvo ea Pol 1:12-26
Namoneano nalo kialo meuliano monoka takii Kristo kiano meuliano 1:27—2:18

Pol mila tiiano ka riila
Timoti rivan ea tomu
nalo na Vilipae a riila
Epavrotaitas rivan berei
vonuo 2:19-30

Namoneano nalo na
Vilipae monoka avitikar
vatitig ka kialo uolu nalo
3:1—4:9

Pol bija kiano bilbilu nalo
na Vilipae 4:10-20

Iliano maariano 4:21-23

Iliano na be moti

¹ Mesi nei, tomu juo
naña amĩau kurano ga
Yesu Kristo kanano, naina
be kumemi juo kiniou
Pol bija Timoti, kumemi
juo nubivitaui biedu ban
kamiu, napano kamiu kumi-
tua komeli na vio Vilipae,
nina kamiu naña kenemiu
meuliano naio jo bo bija
Kristo, jibe ka kamiu kube
namoneano lu nalo, bija
kenemiu navagadeano nalo
a kenemiu ijaiano nalo.

² Kumemi juo numisaaro
ka nuviuiuo kamiu bereio ea
mesi nei, ea Atua karamado
siano, a ea kanado Tubo
Yesu Kristo siano, a kumemi
juo nubika nalo abe juo ka
mia adu tiniememiano vija
tuñaroano toa kamiu von-
ganeĩ.

Pol kanano volkouano biorlo

³⁻⁴ Kiniou nojomña tinieku
maio ka kamiu julaka ga
ea kanaku volkouano nalo,
a najaaro toru ka notomña
nobolkouo ka kamiu van ki-
ado Atua, a ka naver siva ve
toru vanio ka kamiu. ⁵ Nojo
tinieku maio ka kenemiu

vitikariano nalo ea kiniou,
bija bunu kiado imĩauano vei
nalo na Ioluano Vou na bo,
jikario ea bogo na kiniou
nejikar kanaku imĩauano ea
kamiu, binimeĩ bokar von-
ganeĩ, mia nober siva toru
biorio. ⁶ Kiniou nomonea
ka Toro na Toru, na naio
jika kanano imĩauano na bo
tai ea kamiu ruei, mia naio
mijikia rimĩau rivanvano-o
rila nonovio batitigio riviniu
ea bogo na maaro, nina
ea Yesu Kristo kanano bu-
rumara legiano nene. ⁷ Tibe
na naruei ana kamiu kuvi-
alio ka kiniou nojo nojidomii
kamiu toru, mia nomialio ka
nina naio memedu ga, bior
kito raba jouro vio takurano
ea Atua kanano tiniememi-
ano ruei, naruei kamiu ki-
toliko ruei ea vite miroano,
ea bogo na bo a bogo na
bova. Vonganeĩ, kiniou
nobokar batitig kamiu ku-
mitu jouro ea kiniou, naruei
mila na vonganeĩ na nojoa
nalakoiano, naio javukia na
kam liko kiniou. Mia ver
avuru kiniou nava komeli ka
ail van kiniou rivior Ioluano
Vou na bo na nojomña nebe-
rialio, mia kam bunu kuvitu
vija kiniou keano vo. ⁸ Naina
be riano na, mia Atua naio
mijikia bunu ka nejidom
toru ka neial miremiu nalo
bereio. Aue, kiniou tinieku
jii kamiu na toru ea tinieti-
iano nonovio na Yesu Kristo
kanano. ⁹ Kiaku volkouano
na ka kamiu naio jibe nei,
neberinavo kenemiu tinieti-
iano mia naio monoka to
riluo damariga, mia ver jiki-

aiano na bo a m̃asosouano a vitii veveiano bunu nalo atua kami, nalo mijikia rijai kenemiu tinietiano nei rimei ve toru lie vo. ¹⁰ Mia ver kami kuvitibe na, mia kumijikia kuvitu kuvidu ga bajago nonovio na naio bo laka, a kuvituvan nana naio bova, ana mia kenemiu meuliano mijikia to rimeravo rivu, mia ve re titai na naio toa kami ea Legiano na Kristo kanano na jo binime. ¹¹ Ana mia kenemiu meuliano nalo amijikia avar na memeduan m̃arati nene napano Yesu Kristo naio jian biedu, na naio jibe ka m̃arabo tai nam̃a kito romijikia rovamenea Atua kanio, a napano Atua bunu naio rimerera kanio.

*Pol naio joa nalakoiano
mia naio m̃im̃au Tubo
kanano*

¹² Kuruaku nalo a kuvivinieku nalo, kiniou nojidom neverial vite nei van kami, ka bogo va nalo na amiyotuba ka kiniou, nalo maka atokovio ka kanaku im̃auano, makanio. Mia aju amijai toru ka rila Ioluano Vou na bo nei rivan lie ea vio telabo dolu nalo. ¹³ Ea tivelinio na vio nei na kiniou nojoaio, neialio ka tomu na mira nalo amijog Ioluano Vou na bo nei ruei, a naio ba bokar nalo na mira na ea yimo na parinio tubo Sisa kunuano, bija tomu dolu nalo bunu. Vonganei, nalo nei abitolubar ruei ka nojom̃a nabar m̃arimieni nei

bior Kristo ga. ¹⁴ Mia kiniou najaaro toru bunu ka nemial ka bogo na abokar kiniou ea nalakoiano jibe na, mia vite nei naio maka rila namoneano dolu nalo na vio nei amerou, mia mila nalo aju ajumolu ajikili lie vo ea Tubo, mia nalo aju ajidel dolu ka ga aberial Atua kanano iliano.

¹⁵ Nalo amioliolu ka Atua kanano iliano, naio be vite novo tai, mia vite tai ga, kiniou nemijikia ka nalo teal amioliolu ka Naverikariano Kristo ea jidomiano na bo, mia teal amioliolu kanio ea jidomiano na jokuano a ea jidomiano na varvariano. ¹⁶ Nalo nam̃a amim̃au bo, nalo abitolubar ka kiniou nojoa nalakoiano nei bior ka na nemim̃au ea Ioluano Vou na bo, naruei tinielo miia kiniou a tinielo miia nalo na maka ajogio vo, naruei amioliolu bija jidomiano na bo. ¹⁷ Mia nalo dolu na, amioliolu ka Kristo mia maka averiano ga, abe m̃arou m̃ele, naruei ajidom ka ala ka nalo na kija avavin. Jidomiano na bova na jibe na naio joalo, naruei bogo na amial ka amior batitig kiniou ka m̃arimieni nene na nojoa vio nei, mia amial ka vonganei kanalo bogo na ala bulag niegeniege vatitig siaku ea mirano tomu nalo, ka ala sialo rimei rivavin. ¹⁸ Mia kei naio mijikia, vede naina maka ve vite tai. Vede kanalo jidomiano na bo ga p̃eli nana bova, p̃eli na aberiano, p̃eli na amila sibi, mia

vite na toru, Kristo siano naio monoka riva rivatavio lie vo dañariga.

Pol berinavo naio rimeul vede na rin̄aro, mia jidom Yesu ga

¹⁹ Naina naruei, bogo na kiniou nomijog ka siano jo batavio ruei, najaaro toru, a ver bogo tai nojog ka kanano iṁauano naio jo jidel dolu bo kiano vo, mia nojog rivu lie vo eaio. Vonganei nojoa vio tai na namial jibe ka amidu kiniou nojoa juluvati na naṁariano, mia maka ve kanaku ṁarabo na nemijikia nataluvo den bereio, mia bogo na nomijog ka kanano iṁauano jo bavin jibe na, miiĵalar kanaku jidomiano bereio, mila na nabarkar tinieku lie ea kenemiu ilivolkouano nalo, bija iĵaiano nalo na Niununo na Tubo Yesu Kristo kanano, ka mia rivu van kiniou keano na vo. ²⁰ Tibe na, vonganei kiniou nojoṁa nomonea jikili ka ala venia ka kiniou, mia maka ajikia ala kiniou nala titai na maka rimemedu, ṗeli never iliano tai napano karina mia noimou kanio ea Atua mirano bereio. Ver kiniou nemeul ṗeli na namaro, mia maka notovon, ana tibe ka bogo nonovio, nejidom ga ka nesikili ka Kristo siano naio mijikia rivavin lie vo, ea venia na mia riyotuba ka kiniou ṗeli na ea mokotenaku.

²¹ Venia na joa kiniou naio jibe nei, berinavo ver kiniou nemeul, mia Kristo

kiano meuliano na bo naio to vija kiniou, mia ver kiniou naṁaro, nava noto vija naio, naio bo lie vo bereio. ²² Ver kanaku ka nemeul ea yetemeriba nei keano vo, naina nioti nene ber be kanaku iṁauano novo keano vo ka mia naio rijikia rivar sano ṁarati na bo nene. Tibe na, namial jibe ka ver kiniou noto, mia rivu ga, mia nemial bunu ka ver navano, naio bunu bo. Naruei maka bunu nejikia ka mia rivu lie ka navan ea na vabe. ²³ Kirisikili laka ka neviti veve kanaku ṁarabo juo ka nevijauia tinene, bior ea tivelinio nene, tinieku jii toru ka kiniou nemijikia notuvan yetemeriba nei, ka nava noto vija Kristo, naio rivu laka keano vo, ²⁴ mia nemial bunu jibe ka monoka noto kija bereio ea vio nei keano vo, ka neiija kamiu lie vo.

²⁵ Jidomiano na jibe na naio jo jikili vatitigio ea kiniou ruei, mila na vonganei nemial jibe nemijikia neverikar van kamiu ka mia noto vija kamiu bereio kija vo, ka rila na kuvijikia kuvijog rivu ve toru ea kenemiu viekouoiano ea Kristo Yesu, ka mia kumijikia kuan lie vija naio. ²⁶ Tibe na, ver bogo tai nemijikia noyotuba ka kamiu, nomonea ka mia naio rila ka kamiu kuvisaaro lie ea Kristo, a mia naio rivu laka van kamiu, rila ka mia kenemiu saba ta bunu lie vo bereio ka kuver siva van naio, a ka kuvamenea naio riviorio.

Kito monoka raiasosol

*kito, rove takurano ea mira
die uolu nalo*

2

Bajago na bo napano rola

van kito

27 Mia kito maka rejikia rimemedu vo ka mia tumabe ka kiniou, naruei nojidom ka mia kuvisidomial re kiniou, mia kuvisidomial ga kamiu. Kuviel ea m̃arabo na bo naio memedu ka kamiu tomu na Ioluano Vou na bo na Kristo. Vede nemijikia noyotuba ka kamiu, p̃eli na maka nejikia neviedu, mia bo ka lilia-niano naio bokar burutilin-iekū ber kumitum̃a kumitu jikili bo, ka niunumiū nalo be takurano, kenemiū jidomiano takurano ga ka kuvitumolu kuvitu vio takurano ga, kuvila vio sikili ka namoneano na Ioluano Vou na bo naio monoka tovulu.

28 Mia kamiu kumerou re, tiniemiū ribobogia venia na vede mia uolu nalo ala van kamiu. Ver nojog ka na kamiu kumitu kumila jibe na, mia rivu mia rivu, bior ka mia naio be kijokijo na Atua rivan uolu nalo ka riuedomlo, a ve kijokijo na Atua rivan kamiu ka mia naio rilarur kamiu. 29 Nao-o, mia kamiu monoka kuvila mira ka uolu nalo na jibe na, bior ka bogo na Kristo buru kamiu abe kanano, naio maka ka kumonea ga, mia ka kuvijikia kuvar jogvaiano rivior naio bunu.

30 Naio monoka tibe na, bior vonganei kito rojum̃a rabarbitiran burum̃ara mira na nanua kumial ka na kiniou nabario, a napano p̃eli kumitu kumijog ka nojo nabarkeano vo.

1 Kiniou nojidom ka kamiu kuvisidomial von kanado meuli-ano na bo kitoliko Kristo. Kanano bajago naio jo miiĵalar kanado jidomiano, a! Kanano tinieruru naio mila kito romijog bo laka, a! Niununo naio mila kito roju bo bija kito, a! Ana naio mila melmeloko a tinieĵiano naio bujo ea kito, a! 2 Naruei bior naio mila bo laka ban kito jibe na ruei, nejidom notusol iliano, nebika den kamiu ka kuvan lie vo. Neber bo ka kamiu, kuvijamo ka kenemiū bajago na rivan kamiu, mia naio rive verare ka Kristo kanano bajago na rivan kamiu. A mia kamiu tiniemiū titii kamiu naio rive verare ka na naio tinien ĵii kamiu, a mia kenemiū iliano vija kenemiū jidomiano ve takurano. Ver neial ka kuvila tibe na, mia nojog rivu, nasaaro mia nasaaro.

3 Tibe na, mia kito roim̃au re bunu ea bajago na ve vitiano, mia rala re bunu vite vija jidomiano vevavin nalo, mia romomavo, rala kito rotutano, reial kulo dolu nalo avu loa ka kito. 4 Kito rosidomial re ga kito, vija venia na be kanado, mia rosidomial kulo dolu nalo bunu, vija venia na be kanalo. 5 Bo ka jidomiano na bo a bajago na bo naio toa kito tulaka, rivior naina nam̃a kito romial ea Kristo Yesu ruei, napano bo mia bo.

6 Naio jibe ka na iouano nei na naio ber, napano berinavo,

Naio be tovorovo na Atua, jibe ka nono Atua, mia naio maka sikili ka rivare ka naio tulaka.

7 Naio juvan kanano mermerano joa vio mave, naio binimei jibe ka vite batoravavo tai ga, naio miyotuba ea yetemeriba nei be kulorinio, binimei jibe ka toro na iñauano tai na maka ve siano.

8 Toro na vio mave naio binimei be toro na yetemeriba, naio mila naio batove, naio jotano yetano ka sidomiano na Atua kanano, banbano-o na naio bokar māriano ea mākolokolo.

9 Naio monmonea Atua, naruei Atua bitirilar naio bereio, mila kanano sio naio bavin loa laka lie ka sio dolu nalo nonovio.

10 Nalo na vio mave, nalo na yetemeriba, a nalo na vio yetano, mia aviniu avatove ka sio nei, mia anie ka naio

11 mia niolo nalo nonovio avamenea Atua Teta, averial ea miralo, aver ka Yesu Kristo naio takurano be Tubo.

12 Banalo, ea vio nei romialio jibe ka namā Yesu naio monmonea karamāno, a kamiū bunu, nanua kiniou namial jibe ka kumitu kumonea naio bo bunu ruei, bo mia bo. Mia maka kumila

ga ka bogo na kiniou nojo bija kamiū, mia vonganei, maka bunu noto vija kamiū, maka bunu neial ka kamiū jumābe naruei, mia nojidom ka kuvitu kuvisikili dolu ga ka rila rivano-o rivu lie tibe na.

Kamiū kubokar ioruriano ruei, tibe na naio maka rivu ka kuvitutano kule vijiao, mia monoka kuvisidomii rivu laka ea naio. Monoka kuvitilubar vatitig burumāra iñauano novo namā Atua naio mila, naruei monoka kuvimāuka kija ka iñauano novnovo nalo na meuliano vou namā naio jian ban kamiū.

13 Mia kiniou nomonea ka romijikia ralaio, bior ka Atua ga na naio jo mināu ea kiado meuliano terakurano, naio jo miija batitig kito ka rila kanado sidomiano nalo ajaaro ka rila kanano sidomiano, mia naio rila kito ravare ka rala tenene.

14 Tibe na, venia namā naio joa jumāmo ka mia kala, jau kala ka mia keil mumii re, peli kover re bunu iliano tai riviorio.

15 Mia kito roju iviso ka tomu nalo namā amilaluvu mārabo, kanalo jidomiano nalo abe dolu, mia monoka roimāuka kanado iñauano nalo avu a rimemedu. Kito robe Atua kenerinio nalo namā bo ka ve re niamiamo toa kito, mia monoka rotibe ka yulu na mereralii mārabo ka tomu nalo na yetemeriba nei.

16 Kamiū kuvar batitig iliano na meuliano rivanlo, rivan rivano-o rivokar burumāra legiano na mia Kristo rimei

bereio. Tibe na, mia nemijikia neial ka netikiti kule re, mia nemijikia neve m̃arou ka kamiū, na nasaaro ka kamiū tibe ka abe buruñara m̃arati na kanaku im̃auano. ¹⁷ Vede mia naio rivano-o rivokar na mia kanaku burukija monoka riiou rivior kamiū, mia ver tibe na, nemialio bo-o ga. Neber jibe na bior ka nemial jibe ka na m̃a kamiū kubarkar tiniemiū ea Yesu, kumila kamiū jibe ka jokoluolu tai ban naio ruei, mia bo ka mia kiniou bunu nasaaro ka najamo ka kiaku meuliano rivior Tubo kanano im̃auano. ¹⁸ Naina naruei neber ka mia nasaaro ka tibe na, mia naio bo ka kamiū bunu kuvisaaro kanio, bior ver Atua naio saaro ka nemijikia nalaluvu kiaku meuliano rivior toro dolu, naio be tena bo laka tai neibano naio mila ka kiniou.

Pol naio jidom riila Timoti rivan keanlo

¹⁹ Kiniou nojidom neverial van kamiū bunu ka ea tivelinio na kuruado nei Timoti, kanaku jidomiano naio jikili ea Tubo Yesu ka mia vesiou re, mia nemijikia neiila naio riviedu ea kamiū. Tinieku jii toru ka naio mijikia riviedu rial kamiū, karina mia naio rivar kenemiū iliano rimeĩ bereio van kin-iou ea vio nei, nina ka mia rila nejog rivu ve toru laka.

²⁰ Nemialio ka maka bunu ve toro dolu tai toa vio nei napano naio bo jibe ka naio ka mia nemijikia neiila riviedu kean kamiū. Be kiano

jidomiano takurano bija kin-iou, naruei nemijikia ka ver naio to vija kamiū, nabarkar tinieku ea naio ka mia naio to sidomii ve toru ka rila rivu lie van kamiū tulaka. ²¹ Nalo dolu aju keano, mia nalo maka atavukia naio. Kiniou nobitilubar nalo ruei, ka venia napano naio toru ea kanalo jidomiano, nina vite nalo nam̃a be kanalo ga, mia vite nalo na be Kristo kanano, ajidom be iakurano ga, maka atu asidomii naio ve temi. ²² Mia Timoti kito romijikia vatitig ka naio bo laka.

Kumijikia ruei jum̃abe ka napano kumemi juo numim̃au burukuti vio takurano ea Ioluanu Vou na bo banbano-o na m̃a kin-iou namial naio jibe keneriku, naio bio kiniou tata. ²³ Jibe na, namial naio be toro na memedu ka neiila naio riviedu kean kamiū, mia maka rijikia riviedu vo. Nojidom ka neial von ka mia tum̃abe ka kiniou ea vio nei beamu vo, ana naio mijikia riviedu riverial van kamiū.

²⁴ Verenio mia rimeĩ rivu ka kiniou ea vio nei, nemijikia never ka mia naio re ga ve takurano napano mia riviedu riyotuba ka kamiū, mia nodu joa kanaku volkouano, nomonmonea Atua ka mia vesiou re ana mia kumijikia kuvial miraku bunu neyotuba ka kamiū.

Pol naio mial bo ka Epavrotaitas naio rivan bereio ealo

²⁵ Vite dolu tai bereio ka neverial van kamiū, ka kuruado nei Epavrotaitas

naio mie toru laka banbano-o na namial jibe bo ka neiila riviedu bereio rial kamiu beamu vo. Kumiila binimej tibe ka kenemiu ijaiano tai ban kiniou, naruei numiñau burukuti bo, numisikili numitu vio takurano na bo mia bo ea mira. ²⁶ Mia vite takurano ga mieiano nei bokar naio milalelan naio batitigio, mila jidom toru ka riviedu vonuo ea kamiu bereio. Mia bogo na naio mijog ka lilian na kiano mieiano nei bokar burutiliniemiu ruei, mila na mijog bova kija, tiniene ka jidom rial kamiu. ²⁷ Riano ga, mieiano nei mila naio bova banbano-o kumemi numial ka mia tovulio, mia Atua tinien miia naio, naruei naio maka rimaro. Mia nojo nojidomiio ka maka Atua tinien riia naio ga, mia naio tinien miia kiniou bunu, bior ver naio rimaro mia sikili laka van kiniou, mia naio rijedu ka burumara jogvaiano mave ka jogvaiano na mña kiniou nojo nabar ruei. ²⁸ Mia bogo na mña naio jo mie jo bija kiniou ea vio nei kia ga vo, nojoniña nojidom birovion toru ka naio. Tenena nojidom nober bo ka neiila naio riviedu rial kamiu bereio vo, mia nomonea ka mia kamiu bunu kuvisaaro ve toru ka kuvial mira bereio. ²⁹ Kiniou nojidom ka kamiu kuvila kanano ilivorvoruano ea Tubo siano, kuvitkar vatitig naio tibe ka na kubitilubar naio bija imñauano nalo na mña naio mimñaukanio ea vio

nei. Tomu nalo na jibe na, bo ka rovitii veve batitiglo rivu, pñeli kito rotovonlo, ³⁰ bior ka mña nalo amila Kristo kanano imñauano naio bo laka. Epavrotaitas naio jibe na naruei, napano jidomii mñlea imñauano nei, mila na maka bunu sidomial kanano meuliano, vaataro ka rimaro. Naio mila jibe na bior ka naio jidom ka monoka tiniene ka rila venia na mña kamiu kumidu joa jumano. Kamiu maka kuvijikia kumei kuvija kiniou, mia kumiila naio ju jeleig kamiu, binimej mimñau bija kiniou. Naina naruei kuvuru naio kuvila rur naio.

3

Kiniou nejidom nejikia vatitig Kristo lie vo vija kanano moroano

¹ Mo kuruaku nalo a kuvivinioku nalo, nejidom netikar ka netetavoko kanaku iliano naruei. Iliano na maaro tai na naio bo ka never ka kamiu naio jibe nei, berinavo kamiu kuvisaaro tulaka ea meuliano na bo napano Tubo naio jian ban kamiu ruei.

Vede iliano nene neber ka kamiu bogo telabo ruei, mia tiniemiu ser re kiniou, maka nasidom rivova ka never vite na bo van kamiu ve vatelabo. Naio bo ga ka kiniou, mia nejidom jibe ka naio mijikia rijai kamiu ve burutomoruo bunu.

² Mia be iliano vou tai na tinieku maio kanio ka never ka kamiu naio jibe nei, berinavo monoka kuvitkar batitig nalo na

mña aju amioliolu mñele ka pakuveuano. Nina kario aju ajikili aberinavo pakuveuano nei naruei, naio ga be mñarabo ka toro mijikia riasol Atua kanano mñaratavo, mia nina maka ve riano. Kiniou maka lele nasaaro kalo, namial lo jibe ka aju abior janea vio jibe ka kuli deden nalo ga.

³ Venia napano kito rojuaio, naio maka tibe na leleio. Kito maka rotu rovitii venia namña joa kuluniabedo riverinavo naina naruei naio mila kito robo ea Atua mirano, kar kito roju romilotu ka naio ea ni-unudo, mia rajaaro julaka ka tiniedo rimaio ka Kristo Yesu ga naio mila batitig kanado mñarabo. !Ver nalo atumña asidom aver ka pakuveuano naio mila Atua jaaro ka kulorinio, mia monoka rover roverinavo naina be kanalo tena mokotenalo ga, mia nana be riano nene, naio nei naruei kito rojuaio, napano rojumña reje bulag bajago a jidomiano na bova nalo den kanado meuliano!

⁴ Mia ver nalo atu sikili averinavo mia Atua naio saaro ka kito ea venia ga na mña joa kito, vede kiniou nemijikia neverial kanaku mia naio rivu tovulu kanalo bereio. ⁵ Ver never bulag kanaku tukunu, mia kuvialio ka abiniu nono naio jakii ga venia napano bajago na memedu a tuboiano aju aber aberinavo naio bo laka. Vite na jukamu, ea kanaku yati nalo, nomiyotuba

memedu ea burumñara yati na kulo Israel, nebe jameul na memedu ea yati na tormoruo buo na Beniamen. Teta naio nena naljuo abe kulo Ju, mila na kiniou bunu nebe Ju riano. Ta bunu, kiniou nomiyotuba bokar sude takurano nene amila pakuveu ea kiniou. A dolu, ea tivelinio na kulo Ju kanalo tuboiano, kiniou nebinimei toru, nebe Varisis nene, nojomña neberloglog ka kulo dolu. ⁶ Mia beamu, ea tivelinio na ikurukar nalotuano na kulo Ju sikili, kiniou naruei kiniou loa ka nalo nonovio, nojo namila namoneano nalo amijikia. A na maariano nene na nemijikia neverenio, ea tivelinio na bajago kirimemedu, maka ve iliano na tuboiano tai na kulo Ju kanalo leleio napano namila korovio pñeli na namilaluvio.

⁷ Mo vite nalo nene, amila na amial kiniou bo laka, amidu kiniou nojo mave laka. Mia bogo na Kristo bio kiniou, maka bunu neial vite nalo na never ave tena bo tai ea kiniou, namial abe tena vakovio ga, naruei nojuvan nonovlo aju, najakisor naio. ⁸ Nao-o, nemijikia never tibe nei naruei, neverinavo nojo namial vite dolu nalo nonovio abe tena vakovio ga, mia nojidom ga ka nejikia vatitig Kristo Yesu tibe ka tubo na kanaku meuliano, riva lie tibe na. Vite takurano na ga na namial naio bo, napano bo

lie vo jovulu vite dolu nalo nonovio, naruei naina ga nojidomio. Kiniou nojidom toru ka novokar naio ea kanaku meuliano, mia namilaluv kanaku saba dolu nalo nonovio bior ruei, mia naio bo ga, kiniou namial vite nalo na jibe soro ga ea kin-iou.

9 ! Ver kanaku meuliano naio mijikia riasol vatitig ea kanano meuliano mia rivu mia rivu! Nina, kiniou takurano maka nejikia noimāu kanio, bior ka ver nomonmonea tuboiano, mia tuboiano naio maka jikia rila ka navare ka nememedu ea Atua mirano. Mia kanado māarabo dolu ka rovokar memeduo nei naio jo. Nene be viekouoiano ea Kristo, a naio be māarabo na memeduo takurano napano Atua ga naio betavo ea ban kito napano romonea kenerinio.

10 ! Ver namijikia nejikia vatitig naio ga rivu, vija Atua kanano buruñara moroano napano mila naio meul bereio den māriano, mia naio rivu mia! Kiniou najaaro ka navar burovuron jogvaiano na mā naio bario, mia ver kiniou nejikia rivare ka mia namāro ea māriano tai na jibe ka kanano māriano, mia naial rivu laka van kiniou. 11 Vite kouo venia na jibe na na mia monoka noiopdulu eaio, rivu ga, mia monoka nala venia namā nemijikia ka rila ka novokar meuliano vou ka notumolu bereio den māriano.

Vite na mā rojumā romilaii von damariga

12 Kiniou nojomā neberii kiniou bereio jibe na, mia maka nosidom ka kuverinavo be tinieku ka nojo neber ka kiniou nebinimei nobo nonovio, pēli na nobokar buruka ruei. Kiniou bunu kiniou maka vo, mia bior nemijikia ka Kristo Yesu naio buru kiniou ruei nebe kanano, mia nojo nojidom nalaii damariga bogo nonovio ka mia novokar vio tai napano mia naio mijikia saaro kanio. 13 Mo kuruaku nalo a kuvivinieku nalo, monoka never vatitig van kamiu ka namial kiniou jibe ka maka novokar vio nene vo, mia be imāuano tai ga na naio joa kanaku jidomiano julaka, ka mia monoka tinieku ribobogia venia napano naio ju iorou ka kiniou, a monoka nesikili damariga dolu ka notovulu venia napano jo kamu ka miraku. 14 Vite nei na mā nojomā nejikili kanio, naio jibe nei, berinavo kanaku meuliano naio jo bo bija Kristo Yesu damariga, rivanvano-o na mia kiniou bunu tai na mia nojog vioano novo na bo na Atua kanano nei na mia naio river ka kiniou, riverinavo “!Mo, jau komei mave koto vija kiniou naruei!” Vite na naio jibe ka jidomiano na sereano tai na mā amidu batitig naio jo ana na kito rojumā rojikiti biorio, ka rotovalu ve kanado. 15 Ver kito tealō, kanado jidomiano naio meruo ruei, bo ka

rotuŋa roimau tibe na naruei, ŋeli na ver ea vite tealo, mia kito tealo kialo jidomiano maka rimeruo tibe na vo, kiniou nomonea ka mia Atua naio rila vite nalo na ameravo rivu vanlo. Vede ea vite telabo na maka romei rivu ea vo, mia naio rijai kito kanio na vo. ¹⁶ Mia kito monoka rovokar batitig naina napano robinime i robo eaio ruei, kanio maka rivu ka rojoru retitiravolar denio bereio.

Kuvitakii jaaku

¹⁷ Kuruaku nalo a kuvivinieku nalo, neber bo ka kami u ka kuviasosol vatitig kami u, ka kuvilavon kuviel takii jaaku ea m̄arabo na kanaku meuliano. Ver kuvitilubar ka kami u tealo ajuŋa amila bo jibe na ruei, mo kami u dolu nalo kija, kuviel takii jaalo. ¹⁸ Kiniou neberial iliano na ban kami u va telabo ruei, mia vonganei neverial ve varakura bereio napano nomijog kirivova laka, jogumiraku na jo jibirbili. Nina kario nojo nemial kam tealo napano abar sio ka abe namoneano nalo, mia kanalo meuliano nalo naio jiloglog berinavo nalo abe Kristo kiano uolu nalo ga vija sano m̄akolkolo nene. ¹⁹ Kanado uolu nalo nei, vite na amilotu kanio, naio be mabolo ga. Kanalo vovaiano nalo bo ka aimou kanio, mia abarvar kalo laka. Vite na m̄a bujovujo ea kanalo jidomiano nalo, abe tena yetemeriba nei, mia

kanalo jukuti, naio avakovio rivova.

²⁰ Mia kito maka rove tomu na vio yetemeriba nei, kiado buruvenuo memedu, naina tiniabene mave. Toro na toru na vio na, nina be Tubo Yesu Kristo, kanado Ioruriano, mia rojua yetemeriba nei, roju rorea keano, a roju rojirarago kuku ka mia naio rimei bere vesiou re rivior kito. ²¹ Mia bogo na ver naio rimei, mia rimau vija kanano buruŋara moroano napano bare ka rila vite nonovio atu yetano ka kanano tuboiano, naruei naio mia rivilig kito. Vonganei, roju bija kuluniabedo moruo nalo na yetemeriba nei, napano amenunu, aburu kokorovio, abe tena m̄ariano ga, mia naio sian kuluniabedo vou tai, na naio bo jibe ka niabene, napano naio meravo, naio merera, naio jikili, naio jobo to tobo to.

4

¹ Ver tibe na, kuruaku nalo a kuvivinieku nalo, bo ka kami u kuvitumolu kuvitu sikili tibe na ea kanado Tubo. Neber jibe na bior ka tinieku jii kami u, nojidom kami u toru, kami u kumila kiniou najaaro laka, nabarvar toru ka kami u, tenene na nojidom ka mia rivu van kami u tulaka.

Iliano tai na tomu nalo tai kanalo

² Kiniou nomijog bova ka namialio ka monoka neil ve telisu van kanado tira

juo nei, Yuotia naio Sintike. Naljua ajuma abilvili ealo toru laka, tenene na neber ka kamiu ka nojidom ka naljuo monoka ala kanalo jidomiano rivatove, rimei ve takurano ea kanado Tubo. ³ Tira juo nei, nanua numinau vio takurano kumemi liko bo laka, bija bunu tom nei Kleman a tomu na imauano dolu nalo, na numinau jikili bior Ioluanu Vou na bo banbano-o na nubiniu nube jidomiano takurano ga. Kin-iou nemijikia ka tomu na imauano nalo nene sialo abiniu abivitaui bulagio jua niosi na meuliano ruei, mia bogo na be vuruvureiano jo iviso kalo bereio, nomijog bova toru. Jibe na, kanaku vikadeniano tai biedu banso, kanaku bilbilu na robe juo robe tomu na rominau vio takurano nua ruei binime. Nebika denso ka jau naruei kajai tira juo nei ka amei ave bilbilu na bo bereio.

Iliano nalo na tunukakar-iano

⁴ Naruei kanaku iliano tai van kam nonovio bereio, neberinavo kamiu kuvisaaro ea Tubo, kuvisaaro ea naio tulaka. ⁵ Bogo na ma kamiu kubiniua bogokouo, kumelumu, kuvila ka tomu nalo ajikia ka avitilubario ka kenemiu jidomiano naio tebievi bo. Kuvisidomii von tulaka ka vesiou re ga mia Tubo rimei bereio. ⁶ Kamiu kuvila re kenemiu jidomiano rivova tulaka ea vite nalo, mia ea vite venia na mia naio riyotuba ea

kenemiu meuliano, kuversiva van Atua riviorio. Kamiu kuverial ka naio vite venia na jumemiu bulatikanio, kubolkouo kanio, kuviteg vanio riviorio, a nina monoka kuvila vija jidomiano na sivaiano tulaka.

⁷ Naruei ver kamiu kuvidu vite nonovio toa jumano tibe na, mia kuvial ka na mia Atua rudu kanano tumaro loa kamiu, naio rijai kamiu. Kanano tumaro nene naio burutomoruo laka, mijikia rila rivu laka van kito tovulu venia nama romijikia rosidomio, rivanvano-o rila napano mia rivokar vatitig kanado iviso peli kiado jidomiano naio to sikili ea Tubo Yesu.

⁸ Kuruaku nalo a kuvivinieku nalo, vede vaataro ka nala nonovio kanaku iliano van kamiu naruei, mia nojidom notunukakar kamiu ka kuvila kenemiu jidomiano naio rivujo ga ea vite nalo nama Atua naio jidomii. Vite venia na beriano, peli vite venia na naio loa, peli vite venia na naio memedu, peli vite venia na naio meravo bo, peli vite venia na naio kirinovo, peli vite venia na naio be navijukuvuiano, peli vite venia na naio ka aiaia, peli vite dolu venia na naio bo, naina naruei be vite kinkin nalo naruei napano bo ka atua kanado jidomiano tulaka. ⁹ Naina naruei be bajago nalo na nojoma namila vio jikili ka naverloglog ka kamiu,

ĥeli kuvokar den kiniou, ĥeli mave ka nina, kamiu kuvial ea kanaku meuliano. Naruei ver kamiu kuvial ka be riano ka bajago na bo nalo nene tealo na ajua kanaku meuliano, neber bo ka kamiu neberinavo kamiu bunu kuvije batitiglo amonea kenemiu meuliano nalo. Mia ver kuvila tibe na nomonea ka mia kanado Atua na tunaro mia naio to vija kamiu, rijai kamiu.

Siva ka ijaiano

¹⁰ Kiniou nojidom never ka kamiu never burumara saariano na ea kiniou, ka kirisioi kija maka naial vite tai, mia nobokar ijaiano telisu nei ga kamiu kumituvan binimei. Nomonea ka kamiu kumitu tiniemiu maio ka kiniou, mia nemijikia ka maka ve kenemiu marabo ka kuvila vite rimei rivokar kiniou ea vio nei. Mia bogo na nemial ijaiano nei binimei vonga, namial jibe ka na kenemiu jidomiano na ijaiano na ea kanaku imauano naio meul vatitig bereio, nabamenea Atua biorio. ¹¹ Kiniou neber jibe na, mia maka ve tena noto nala vukuleleano ka maka ve kanaku titai, bior vite na namila kakario mugaruei, ka vite venia na mia riyotuba ka kiniou, ĥeli na kiniou noto tunabe, mia nasaaro ga. ¹² Kiniou noto tano ĥeli noto mave, siseri kiniou ĥeli na saku sinaniano ve telabo, jumaku ve teau ĥeli jumaku rivujo, kiniou nomiovo dulu ea vite

nalo nonovio ruei. Bogo na bova vede bogo nabo mia Atua kanano marabo ka noiopdulu ea naio bo jo, mia naio berloglog kiniou kanio, mila na namila kakar vite nalo na ea naio ruei. ¹³ Tibe na, vonganei namial jibe nemijikia notovulu vite nonovio napano mijikia rimei ea kiniou, naina ea burumara moroano na Kristo naio jo mila nejikili eaio.

¹⁴ Kiniou nojidom neverinavo kamiu kulo Vilipae, kumisidomii ka kuvijai kiniou ea kanaku bogokouo tibe na, kamiu kumijuku bo toru laka. ¹⁵ Jibe ka napano kamiu kubitilubarioruei, ka bogo na nejikar nemiel bior Ioluano Vou nei, bogo na najaluvo ea vio Masitonia nabano, maka ve lotuano tai napano naio rijai kiniou leleio, mia kamiu ga. Nejian vite nalo na telabo banlo, mia maka nalo tai napano naio ve tiniene ka sian vite rimei ka rijai kiniou ea kanaku marabo ĥeli na kanaku imauano. ¹⁶ Mia kamiu kubo laka, kumitu kumijai kiniou ea bogo na jumaku bulati, kumitunja kumituvan ijaiano binimei ban kiniou va telabo kija, bano-o bokar bogo na naba nojo nomimau laka yako Tesalonaika. ¹⁷ Nojomja nemil jibe na, maka ka noto nosidom navar ijaiano tulaka, mia bior ka nojidom neial ka lotuano nalo atu aija Tubo

kanano iñauano. Naina bior napano ver kuvila rivu van toro dolu tibe na, ana kenemiu bajago novo nene mia naio rivar marati nene rila vite nonovio rivu lie van kamiu bunu. ¹⁸ Tibe na, neber siva toru laka ka ijaiano nalo namã kamiu kumiila Epavrotaitas naio bar binimeï, nobokar nonovio ruei. Ijaiano nalo na binimeï, naio ba loa ka napano nojidom, ana nemial ka vonganei naio bo laka ban kiniou. Kenemiu ijaiano nalo nei, ajibe ka bonotanunu tai napano naio be sano bonoti nene bo laka, ajibe ka jokoluolu tai na ña kumisian ban Atua napano naio mial bo laka, naio jaaro toru kanio. ¹⁹ Mia nemijikia ka ver jumemiu rive bulati bogo tai, mia kanaku Atua naio rivitii ea kamiu tulaka, bior ka Kristo Yesu naio mila ruei Atua kanano mermerano na mave nalo burutomoruo laka. ²⁰ Tibe na, mia rotu rodular karamãdo Atua siano tulaka, mia ravamenea naio rivan rivano-o mia maka rijikia ribisi bogo tai, Mm.

Iliano namãaro

²¹ Kuver lilian kanaku iliano nei van namoneano lu nalo namã aju na, a kuverial vanlo ka nojo tinieku maio ka nalo bogo nonovio. A kuruaku a kuvivinieku dolu nalo namã aju bija kiniou ea vio nei, nalo bunu ajidom aver kavijo bo vede na bogiano bo van kamiu. ²² Nalo ta bunu ka atuvan iliano tibe na van kamiu, naina be namoneano lu nalo abiniu ea

vio nei, bija bunu nalo namã amimãu parinio tubo nei Sisa kanano ea kunuano na toru. ²³ Kanaku volkouano, ka Tubo Yesu Kristo kanano tiniememiano naio toa niunumiu nalo, naio to iviso ka kamiu bogo nonovio.

Kiniou, Pol.

Mesi Napano Pol Bivitauiaio Ban Namoneano Lu Nalo Na KOLOSIA Verialiano Moti

Tukunuane bulati na niosi nei

Kolosi be bulukomeli tai na tanobuku nei Esia napano nua jo nuayetano ka Parinio Tubo na Romo, ea venuo nei napano banei siano Teki. Bulukomeli nei jo tevelinio yetano na Evesas ea tivelinio na ban kamu kean kito. Mesi napano Pol jirio ba ban namoneano nalo na Kolosia, naio juvan ba ban tomu nalo na yimo lu na vio na. Paul nai maka tikario yimo lu na vio Kolosi, mia vio na joa ga tanobuku na vaataro ka Evesas napano be burupati bulukomeli na tanobuku nene, ana Pol naio jo miñau ea vio na bogo nonovio. Mia bogo napano Pol jo Evesas, naio jo miila kiano tomu nalo abanvan ka averial ioluano vou ea vio nalo ea tanobuku nei, a Kolosi be vio nalo nene tai. Naruei bior vite na, naio mialio ka be kiano iñauano ka vitikar nalo na Kolosi bunu.

Pol mijog verioiano ka be naverloglogiano nalo na yimo lu ajua vio nei napanoaju aber ilisibisibiano nalo aaju aberinavo tomu nalo monoka alotu kanio tomu tortoru a vija simaro nalo kialo navurumñaraboiano nalo, ka ajikia ajikia vatitig

Atua, a ka ajikia avokar meuliano napano bujo batitig ka vite nonovio. Mia atu averloglog tomu nalo ka monoka atakii tuboiano moruo ea tivelinio na siniano, a vite tealobereio, a monoka ave pakuveu.

Naruei Pol jiri mēsi nei ka rilikuei keano jidomiano va nalo nei, a berial kalo Yesu Kristo kiano ilirianiano nalo. Burupati jidomiano napano naio berenio jibenei, ber Yesu Kristo mijikia sian meuliano van kito napano bujo vatitig ka vite nonovio, a verloglogiano dolu nalo nei ber Yesu Kristo naio mijikia ridu meuliano van kito napano robujo vatitig ka vite nonovio, a verloglogiano dolu nalo amijikia avurbulag tomu nalo den meuliano nene. Kristo miñau Atua kiano ka rila yetemerba nei, a naio miñau Atua kiano ka rivuru tomu nalo amei bereio ea naio. Toro monoka riasol ea Kristo ka rijikia rijeve meuliano, a maka bunu mñarabo dolu tai bereio. Iorou Pol berial banlo vite nalo na amijikia ajevio ea kialo meuliano bior napano amonea Yesu a amiasol vatitig eaio.

Bo kito romjikia ka toro nei Tikikas, napano Pol jian mēsi nei banio ka ridu riva van namoneano nalo na Kolosi, naio be toro nene kiaga napano ban bija Onesimas, buru bereio naio ban ea kiano vio. Onesimas, naio be toro na iñauano kurano tai, a naio be toro nene kiaga napano Pol beriio ea kiano

m̃esi napano juvan ba ban Vailimon a bika den Vailimon ka viekokoa naio.

Torogio nalo na niosi nei

Iliano moti 1:1-8

Kristo kiano bajago, bija kiano iṃauano 1:9 — 2:19

Meuliano vou ea Kristo 2:20—4:6

Iliano maariano 4:7-18

Pol jikar kiano iliano banlo

¹⁻² Kiniou Pol, kiniou nebe atevi napano Kristo Yesu kiano, napano Atua naio bitiri lar kiniou, najaaro ka neviviuo kamiū ea m̃esi nei, napano nejiriio biedu ban kamiū namoneano lu nalo na Kolosia, napano kamiū kuruaku nalo a kuvivinioku nalo ea Kristo, napano kumitu jikili eaio.

Kumemi juo Timoti, napano naio jo bija kiniou, nubolkouo ka mia Atua karaṃado kanano tini-e-vuiano a tum̃aroano to vija kamiū.

Pol naio berenio siva ban Atua kar nalo

³ Bogo nonovio ea kene-memi volkouano, kumemi juo nuber siva bior kamiū ea Atua, Yesu Kristo kanado Tubo karaṃano. ⁴ Nina bior kumemi juo numisaaro toru ka kamiū, bior lilianiano bokar kumemi ber kamiū kumitu kubiekouo jikili ea Yesu Kristo, a kumitu tiniemiu jii namoneano dolu nalo. ⁵ Bajago novo na jo maluvo ea kenemiu meuliano bior kumitu

kumisidomii m̃lelea ka kumijikia kuvokar saba novo nalo napano Atua bar batitiglo aju tiniabene ka ve kenemiu. Saba nalo na jibe na, kumijog Ioluanou Vou berenio ruei. ⁶ Mia Ioluanou Vou nei biedu ban kamiū ruei, a vonganei, jo ba tavio keano vo ea vio dolu na yetemeriba. Naio jo ba tavio jibe na, naruei jo miluo a bar m̃arati novo nalo, jibe ka napano mila ea kamiū, jikario ea bogo napano kumijog beamu, napano kubitilubar ka Atua kiano tiniememiano ea kito burutomoruo a be riano laka. ⁷ Vite nalo na, Epavras naio berloglogio ka kamiū ruei, ea bogo napano naio midu jelememi biedu berial ioluanou vou nei ka kamiū na be moti. Naio be toro tai napano numiṃau biju vio takurano, a naio biekouo vatitig ea Kristo kiano iṃauano novo nalo. Kumemi numisidom naio toru, ⁸ mia vonganei, naio binimei bereio ea kumemi ruei, jian veriiano novo tai ban kumemi, napano berii burum̃ara tinietiano napano Niununo Lu midu joa kenemiu meuliano nalo.

⁹ Kanio tena, bogo napano kumemi juo numijog Epavras kiano iliano, kumemi juo numitu nubolkouo ka kamiū julaka ga binimei bokar vonganei, a numitum̃a nubika den Atua ka Niununo naio sian m̃asosouano a jikiaiano vu van kamiū, ka mia

kumijikia kuvijikia nonovio Atua kanano tinieiano nalo. ¹⁰ Tibe na ana mia kumijikia kuviel rimemedu ea m̃arabo napano bo ka tomu nalo na Tubo kanano amiel eaio, a mia kumijikia kuvilaio ka mia naio rijikia saaro m̃ele ea kenemiu bajago nonovio nalo. A

mia bo ka kurukuti na bo mijikia rimaluvo ea kenemiu meuliano nalo a ea kenemiu im̃auano nalo bunu, a mia kenemiu jikiaiano ea Atua mijikia riva ve toru lie vo.

¹¹ Kumemi juo nubolkouo ka mia Atua kanano moroano na toru rila kamiu kuvokar moroano bunu, ka mia kumijikia kuvitumolu kuvitu sikili ea bogokouo, a mia kenemiu iviso nalo amijikia ave tebievi, a asaaro ga ka bogo nalo na tibe na. ¹² Monoka rover siva van Karam̃ado, napano naio mila kito bunu, kitoliko namoneano lu dolu nalo, romijikia ravar kiano jajum̃ano, jouro ea kiano navenatuboiano na miamoiano, ¹³ bior naio buru bulag kito ruei den moroano na melijokouo, naio mijian bulag batitig kito raban ea navenatuboiano na kenerinio kiano, napano tinien jii naio bo laka.

¹⁴ Nao-o, Atua naio buru bulag kito ruei, napano naio biekokoa kito bior kanado kariano nalo.

Kristo naio be parinio ka vio nonovio yauo

¹⁵ Nina be kenerinio na, naio be Kristo nene,

napano naio be tovorovo tai napano romijikia reialio, ka Atua napano maka rojikia roialio,

napano naio be motoru ka vite nonovio nalo na Atua jiilo.

¹⁶ Ea Kristo nene, Atua naio jii vite nonovio,

na vio mave a na vio yetano,

napano romijikia reialio p̃eli na nana maka re-jikia reialio,

bija vite nalo napano abe natuboiano ea vio yauo, jibe ka parinio tubo nalo, moroano nalo, a tomu na tortoru nalo, a nailiano nalo.

Atua jii vite nonovio ea Kristo,

a Atua jii vite nonovio be Kristo kanano.

¹⁷ Kristo naio jo ruei jukamu ea vite dolu nalo nonovio,

mia naio bar batitig saba nalo nene ajum̃a amim̃auo bo ea jelelo memedu. ¹⁸ Kristo naio be burupati na meuliano na torogio nalo na kiano nalotuanano,

a naio be parinio ka lotuano nene jibe ka lotuano nene tibe moko-tenano.

Naio be toro na jukamu ka nalo na ameul bereio ea m̃ariano, ana jibe na mila ka vonganei naio jo mave lie vo

loa vite dolu nalo nonovio.

19 Kristo naio jo mave laka jibe na, bior Atua naio mijamo ka kiano mermerano joaio, javukia meuliano a moroano na kanano joaio.

20 Ea Kristo nene kia ga vo, Atua bar bereio vite nalo na vio mave bija na vio yetano abinimeia eao.

Ana na naio mila nonovio yauo amijikia ave merevuiano rivija naio bereio, nina ea Kristo kiano burukija napano miou ea mākolkolo.

Kamiu kuve merevuiano bereio kamliko Atua

21 Nanua beamu, kamiu kube valauo ga, a kumitu koalabo ka Atua, a kube kiano uolu, bior jidomiano va nalo a bajago va nalo na kenemiu. 22 Mia vonganei, napano Kristo binimeia jibe ka kito, kiano māriano mila kito robe merevuiano kitoliko Atua bereio. Atua naio mila jibe na, ka mia naio mijikia rivuru kamiu kumei keano naio napano kuve lu batitig rivu, kumeravo vatitig rivu, a napano maka niamiamo va tai toa kamiu leleio. 23 Mia nina naio mijikia tibe na, verenio ga kamiu kuvitumolu kuvitu sikili kia ga vo ea Kristo, a ver kumonea naio kia ga. Bo verenio kamiu kumelukluku re ka kuvokar sikili mononeo na Atua kiano verikariano nalo, monoka kumonea

ka mia naio monoka sian vite nalo van kamiu napano kumijogio ruei ea Ioluanou nei, napano tomu nalo na vio yetano nalo ajunā amijogio ruei, a napano kin-iou Pol nebe toro na mioliolu kanio.

Pol naio miñau jikili bior ka namoneano nalo

24 Vonganei kiniou nojo nomijog jaleleano ea mokotenaku bior kamiu, mia najaaro ga kanio. Nina jibe ka napano nojo nomimāu nonovio kanio ea jogvaiano na mokotenaku nalo, napano Kristo berlua ka mia navario, jibe ka ga napano naio barioruei, ka najai taara na namoneano nalo ka atusikili. 25 Atua bitiri lar kiniou ka mia nemei neve toro na imāuano tai na bagaro na moneano nalo, mia vonganei nemijikia najai kamiu ea imāuano napano Atua naio miduio joa junaku, nina ka neverial iliano na kiano van tomu nalo ka mia ajikia nonovio eao. 26 Kiano iliano nene nei, jibe ka iliano tai rebogo be nua, joluku ga ea tormoruo nalo, napano nalo maka ajikia leleio, mia vonganei Atua mila meravoban kiano namoneano luno. 27 Kiano jidomiano ka rila tibe na naruei, berinavo iliano na napano kiano tomu nalo, kulo Ju, maka ajoglubarior, mia naio riverial kiano vite novo nalo, napano abo laka, ea nalo

napano maka ave kulo Ju. ? Mo ana ililuklukuanu nei naio ber venia? Naio ber jibe na naruei, berinavo Kristo naio mijikia toa kenemiu iviso nalo, ana kamiu kumijikia kumonea kuver mia Kristo mijikia rila kamiu kuvitusol ea meuliano novo na Atua kiano ea vio mave.

²⁸ Kumemi juo numitu numiololu ka Kristo nene ban tomu nalo, a numitu numil banlo nuber nalo monoka avitikarlo rivu, ana numitu nuberlogloglo ka masouano nalo. A ver tomu tai napano kialo jidomiano a kialo mon-eano rimej rimeruo vatitigio, amijikia amei atumolu atu kumemi liko ea Atua mirano. ²⁹ Kiniou nojo nobukudeli bijonio bior vite na, mia bogo nonovio nojoma nemimau ea moroano na toru napano Kristo naio jo misonio ban ea kiniou.

2

Monoka kumonea Kristo sikili

¹ Nao-o, javukia na kiniou neberenio, ka napano nobukudeli toru bior kamiu, a bior nalo na vio Leotesia bija tomu dolu nalo bunu napano maka aial miraku kija bogo tai vo. ² Nejidom ka nala kialo jidomiano nalo atu sikili, a ka kialo tinetiano mijikia rila aiasol kialo iviso nalo amei ve takurano ga. Nejidom mēlea ka mia avokar burumara ilirianiano na vite luku nei napano beamu nalo maka ajikiaio, napano naio be

Kristo memedu, naruei mia kialo jidomiano nalo maka rijikia to veve juo. ³ Nina bior ea Kristo, tomu nalo amijikia aleal vite novo nalo na Atua kiano masouano a jikiaiano, napano naio bar vanio jua Kristo.

⁴ Kiniou nojo neber iliano na ban kamiu, ka mia tomu nalo tai re ave niosesei van kamiu rivano-o avuru kenemiu jidomiano riva rive dolu, ea kialo masouano lubolubo nalo. ⁵ Nemil jibe nei bior kanaku jidomiano joa kamiu jikili damariga. Bekurano ka mokotenaku jo koalabo ka kamiu, mia kanaku iviso naio jo miasol kamiu damariga ruei. Mia najaaro toru ka kamiu bunu, napano nomijog ka maka kuve dedade ga, mia kubiekouo jikili buronio damariga ea Kristo.

Kiado meuliano monoka sikili tu ea Kristo

⁶ Jibe na, bior kito romidu Kristo Yesu be kanado Tubo ruei, bogo nonovio mia reiel damariga ea naio ga, ⁷ mia naio monoka tibe ka pelilikiti na kanado meuliano, pēli na yimo na kanado meuliano, monoka sikili tu mave ea naio. Tibe na ana na kiado viekouoiano ea Kristo naio mijikia rimej sikili lie bogo nonovio, tavukia napano aberloglog kito kanio ruei. Mia bogo nonovio, kito monoka rotu rover siva vanio. ⁸ Kamiu monoka mia kuvitikar rivu, ka mia tomu tai re amei ka mia aiadikar kamiu ka iliano nalo na jelea masouano

na toro ga kanano, ħeli ka verloglogiano nalo napano abujo ka masouano na yetemeriba nei ga. Ilikuraniano nalo na be tena sibiano ga, a nalo aju amaluvo ea tomu nalo kialo jidomiano moruo, a maluvo ea tivelinjo na siġaro nalo a semei nalo, nalo mia maka amaluvo ea Kristo.

Kristo naio be parinio ka vite nalo nonovio

⁹ Atua naio midu kiano meuliano a moroano nonovio nalo ajua mokenano toro nei Kristo, ¹⁰ napano naio be parinio ka vite nonovio, a naio loa ka moroano dolu nalo. Ana ea bajago nene, Atua midu kiano tonovo nalo napano kiano ajua kenemiu meuliano nalo, kamiu napano kumitua Kristo. ¹¹ Mia bior kamiu kumitua Kristo, naio je bulag bajago va nalo a jidomiano va nalo den kamiu, jibe ka naio mila pakuveu ea kamiu, mia maka never pakuveu na tomu nalo ajumġa amilaio, nojo neber pakuveu dolu tai napano Kristo naio milaio, jibe ka napano naio jo bar bulag vovaiano den kenemiu meuliano nalo. ¹² Naruei ka bogo napano abar uei ea kamiu, jibe ka ga napano Atua jivinko kamiu kamliko Kristo, a ka naio mila kamiu bunu kumeul bereio kamliko Kristo, nina bior kamiu kubarkar tiniemiu ea Atua kanano burumġara moroano

napano naio mila Kristo meul bereio ea namġariano. ¹³ Ana kamiu na, beamu Atua naio mial kamiu jibe ka kenemiu kariano nalo amila kamiu kumġaro ruei. Maka kamiu kuve pakuveu tavukia kulo Ju nalo, mia Atua mial kamiu jibe ka kenemiu meuliano maka rive pakuveu bunu, jibe ka napano kenemiu meuliano maka rijulukon vatitigio vo, a bajago va nalo aju kiano ea kamiu vo. Mia vonganei, napano kamiu kumijuru kamiu bija Kristo, Atua jian meuliano vou ban kamiu ruei. Kito robokar meuliano vou nei bior Atua biekokoa nono kito bior kiado kariano nalo, ¹⁴ a naio miolkon bulag ruei kanado jabue nalo. Beamu, jabue nalo nei ajua niosi napano Atua kanano tuboiano nalo napano kirisikili ajuaio, napano amiadikakar kito mġele, mia Atua naio bar bulag vite nalo na bija niosi nene ruei, jibe ka napano naio jukkakar nonovio ea mġalkolo naliko Kristo, ana na maka bunu ve jabue nalo nene. ¹⁵ Ea mġalkolo nei, Kristo jovulu vite jikili dolu nalo, naio mila kokorov siġaro nalo kialo buriu kouo nalo, jibe ka napano naio jovulu nalo ea burumġara mira tai, naruei naio mila kiano uolu nalo nene abinimeġi abe iakurano ea mirado kito tomu nalo, ka mia rosidomii yebekavo re bunu mave ealo.

Kristo naio be parinio ka

kamiu

¹⁶ Tibe na, ana mia kamiu kuvijamo re ka toro tai riverbure kamiu river kuvisen re tena p̃eli na kumunu re tena. Mia kamiu kuvijamo re ka toro tai riyuku kamiu ka kuvitakii kialo bajago moruo nalo ea tivelinio na vite nalo tibe legiano lu nalo na yuka, p̃eli na ea tivelinio na jokoluolu na siberio vou, p̃eli na ea tivelinio na bogoti aluo.

¹⁷ Tuboiano nalo na jibe na, tomu nalo aber ka ala vonio ka aleal m̃arabo na memedu, mia nalo ajavukia ga vamelu na vite na maka rimaluvo vo, mia burupatiriano na vite nonovio nene, naio be Kristo ga. ¹⁸ Be tomu tealó ajidomii aber nalo abo loa kamiu, bior nalo ajum̃a amial vite telabo ea kanalo monvovuoano nalo, ana nalo ajidomii aber ka amijikia lie vo tivelinio na nailiano nalo. Mia nalo ajidom aber nalo abo, ajum̃a amilakialo jidomiano nalo, jotano dobi, jovulu kulo dolu nalo, mia maka leleio, nalo na ajibe ka sieso. Nalo ajum̃a abarvar ga ka kanalo iliano nalo, napano nalo ga ajum̃a aberii nalo m̃ele bereio, mia kialo jidomiano nalo bujo ka varvariano ga bija jidomiano kurano dolu nalo, banbano-o bokar napano nalo ajum̃a amiaialo bereio. Jibe na mia kamiu kuvijamo ka re nalo na atibure kamiu aver kamiu maka kuvokar vite nalo napano ajua ruei, ¹⁹ bior nalo

na ajuvan Kristo ruei, nalo maka bunu avokar vatitig naio sikili rivu napano naio be parinio kalo. Mia Kristo naio jo bitikar batitig ga nalo napano ajibe ka niabene torogio nalo, a naio jo baganlo, jo jelanvuu batitigio ka burubuku nalo a kiano vaiu nalo, naruei tati nei naio mijikia rim̃au rivu a mijikia riluo rivu tibe ka napano Atua naio jidomio.

Kuvijev meuliano vou ea Kristo

²⁰ Kiniou nemijikia Kiniou nemijikia never ka jibe ka Kristo naio m̃aro nanua ruei, kamiu bunu kum̃aro bija naio, mila napano ea tivelinio na bajago va, kum̃aro eaio ruei, mia maka rimemedu ka bajago va ritokol kenemiu meuliano bereio. Mia Kristo naio buru bulag kamiu ruei bunu den moroano nalo na jukamu na vio yetano nei, bija sim̃aro nene nalo. Jibe na naruei ana na nejidom nevika den kamiu, ka: ?Jum̃abe kamiu kumitu kumiel kia ga jibe kamiu kube na vio yetano nei kia ga vo? ?A ka venia ana kamiu kumitum̃a kumonmonea tuboiano moruo napano aberloglogio ka kamiu nua, napano aberenio ²¹ “Kamiu kuvokar re vite na,” p̃eli na “Kamiu kuviniomo von re tena,” p̃eli na “Kamiu kovitokol re vite na?” ²²⁻²³ Naruei be riano ka napano tomu nalo amijog iliano nalo nei, ana na nalo ajidom aber tuboiano nalo

na jibe na abe masou bo, mia tuboiano nalo na amiyotuba ea toro ga, maka ave Kristo kiano verloglogiano. Aberiio vite nalo na vio yetano nei ga, jibe kanio sinaniano, peli vite na munuiano, mia vite nalo na maka ajikia ajai kamiu, a maka ajikia ala bulag kenemiu meuliano bunu, bior bogo napano komiduio peli na komilaiio, karina abiniuviniu bereio ruei.

Peli tomu nalo abitiri bulag tuboiano nalo nei ka ala von ka ala iñauano novo nalo tai, napano aberenio toro monoka rivolkouo tibe na peli tibe nei, a napano aberenio ka toro monoka rilavon ka rila kiano jidomiano vatove tibe na peli tibe nei, a napano aberenio toro monoka rilavon ka telanivuu batitig ka tini-abene tibe na peli tibe nei ka vite nalo napano jikili ka naio.

Mia kiniou neberii ka kamiu, ka tuboiano nalo na jibe na, maka leleio ve kanalo moroano ka tokovio ka jidomiano na bova nalo a bajago na bova nalo napano ña ajua toro kanano iviso.

3

Meuliano napano naio meravo a be lu bo

¹ Kamiu na Atua naio bitiri bulag kamiu kumeul bereio ea nañariano bija Kristo, ana tibe na monoka kuvilavio sikili ka kuan ka vite nalo na vio mave ga, ea vio napano Kristo naio jotano tivelinio vameruo ea

Atua. ² Monokanio mia kuvisidomkar vite nalo na vio na ga, mia kuvisidomi re bunu vite nalo na vio yetano nei, ³ bior jibe ka napano kamiu kuñaro ruei ea naio. Vonganei kene-miu meuliano vou joluku bija Kristo ea Atua, ⁴ bior ka Kristo naio naruei be burupati na kiado meuliano vonganei, mia iorou kanio, bogo napano mia naio riyotuba ea tomu nalo miralo, mia kito bunu royotuba vija naio ea kanano buruñara mermerano.

Kenemiu meuliano moruo naio monoka ribisi

⁵ Monoka kamiu kuvuekon bulag bajago nalo na vio yetano den kenemiu meuliano nalo, jibe kanio nasiakaiano, vite nalo na imouiano, nasidomvaiano, natitii kariano nalo, a natitiiano. Bajago nalo na bova, a natitiiano jibe na, naio jibe ka napano toro mila saba nalo na naio jidom ñealealo abinimej jibe ka kanano atua dolu nalo. ⁶ Bior bajago nalo nei naruei Atua tiniene mimi ñeale, ana kanano natibureano jo binimej ea nalo napano maka amonmonea naio. ⁷ Beamu kenemiu meuliano jibe na naruei, napano kamiu kumituña kumiel ea bajago nalo na, ⁸ mia vonganei, be bogo na kuvituvan bajago nalo na, be bogo na abisi ea kenemiu meuliano nalo. Tibe na, ana mia tiniemiu rimimi re, a kuvilvilea re toro dolu, a kuvitu re ña kuve nabilbiluvaiano van

kamiu. Mia kamiu kuvil die re a kuvitu re m̃a kuvila nailimum̃iano va ka toro dolu, a kuvila re iliniamiamoiano nalo. ⁹ Mia kuvitum̃a kuvila sibilili re kamiu bunu, nina bior ku-bielar ruei kenemiu bajago moruo napano kumoluo bijaio, ¹⁰ mia kuvidu bajago vou tai ea kamiu tibe ka meuliano vou tai napano Atua naio jiio ea kamiu. Mia bogo nonovio, Atua jo mila meuliano na binimei be terivou bereio, ka rila kamiu kuvijikia naio ve riano, a ka rila kumei lie vo tibe ka kube kanano natovorovoiano na naio. ¹¹ Bior vite nalo na, kito maka bunu rejikia retiburevure tomu nalo, ka mia rover tealo abe kulo Ju, mia tealo abe tomu na vio dolu nalo ga, p̃eli na tealo abe navakuveuiiano, mia tealo maka atibe na, p̃eli tomu tealo abe tubo, a tealo abe tomu na im̃auano na tubo kiano ga. A maka rejikia rover tom tealo roverinavo aberloglog batitiglo tenene na amijikia vite, a nalo tealo abe kulo yeturu ga napano maka ajikia vite. Mia be burum̃ara vite tai ga napano mia romijikia rovitii toro kanio, rober naio rimonea Kristo p̃eli maka rimoneaio, bior Kristo naio joa vite nonovio a ea tomu nalo nonovio.

Kamiu kuviya meuliano vou nei ea kamiu

¹² Mm, jibe ka napano Atua naio jidom m̃elea

kamiu, ana naio bijauia bulag kamiu ka kuve kanano kulo lu nalo, monoka kuviya bajago vou nei ea kamiu tibe ka napano naio jidomio. Bajago vou nei jibe ka vite nalo nei ajua kenemiu meuliano, javukia tinieiano ban toro, tinievuiiano, navatoveiano, namom̃avoiano a namelumulumuano. ¹³ Kamiu monoka kuvitu re tiniemiu rivavavin soṑeli ka kamiu, mia bogo napano verenio kamiu ve juo nene ala titai iviso bure naljuo nei, mia naljuo nei monokanio avieviekokoalo ave juo. Kamiu monoka kuvieviekokoa kamiu, ea bajago na ga m̃a kiado Tubo naio jom̃a biekokoa kito. ¹⁴ Mia vija bajago dolu novo nalo na napano monoka kuviyaio ea kamiu, mia monoka kuviya bunu tinietiiiano ea kamiu, bior tinietiiiano naio mijikia rivitirasol batitig bajago novo nalo na mia aim̃au bijuviju rivu, ka mia amei ave takurano. ¹⁵ Mia tum̃aro napano Kristo janio naio mijikia rivitikar kenemiu iviso nalo, bior Atua naio bio burovuron kamiu kanio mia kumei ve takurano, napano mia kuviniu kuvijurukar rivu vija naio ea tati ve takurano napano naio be parinio kanio, ka mia tum̃aro neibano naio mijikia to vija kamiu. Ana bogo nonovio kamiu kuver siva ka vite nonovio nalo.

¹⁶ Mia bogo nonovio

Kristo kanano iliano novo nalo monoka ameul ea kenemiu iviso nalo, bior kiano iliano nalo abo tanea. Kamiu monoka kuvitu kuverloglog kamiu ka naio, mia kamiu ga kuvitu kuvuriri kamiu bereio ea kenemiu masosouano novo nalo. Bo ka kuvitu kuviau van Atua ea Iouano nalo, a iouano lu nalo, a iou nalo na vameneano ban Atua, ka napano ea bogo na kumituña kumiau jibe na, mia kenemiu iviso nalo avujo lou ka sivaiano vanio. ¹⁷ Mia vite nonovio napano kumilaio, mia iliano nonovio napano kuberenio, mia monokanio kuvilaio ea Yesu kanado Tubo siano, mia bogo nonovio monoka kuver siva sel ea naio van Atua karamado.

Tomu nalo kialo meuliano vou

¹⁸ Kamiu tire nalo na mña kumisoro, monoka kuvatove ga ka kouemiu nalo, tibe na kanio mia rimemedu ka tira napano naio be namoneano naio milaio.

¹⁹ Mia kamiu sumano nalo na mña kumisoro, monoka tiniemiu riia tanea kouemiu nalo, mia kuvila re kenemiu bajago nalo ajea mñele vanlo bogo nonovio.

²⁰ Kamiu kalse nalo, monokanio mia kuvijogkar karamemiu a koniomiu nalo, bior kanado Tubo naio jaaro ka bajago na.

²¹ Mia kamiu teta nalo a nena nalo mia tiniemiu nalo avilulu re van kenerimiu

nalo tulaka, bior ver kuvila tibe na, ala lelanlo, ala kialo jidomiano nalo atibirbili.

Tubo nalo a kialo tomu na imauano nalo

²² Kamiu tomu nalo na mña kumimau tubo nalo kanalo, ea bogo nonovio monoka kuvidu kenemiu tomu na tortoru nalo nei niolo. Mia kuvila re tibe na ga ea bogo napano nalo aju bija kamiu, ka mia kuvilavon ka mia nalo asaaro ka kamiu, mia bogo nonovio monoka kuvimauka mia kenemiu jidomiano nalo ave riano batitigio, tavukia napano ea imauano na kumitu kumitovon kanado Tubo julaka. ²³ Ea imauano vaio napano kumituña kumimaukanio, monoka kuvilaio napano mia kuvisaaro kanio, tavukia napano kumituña kumimau Tubo kanano, mia ka re tomu nalo ga. ²⁴ Bo ka mia tiniemiu rimaio ka Tubo nei naruei mia naio sian kiano jajumano van kamiu, tibe kanio kenemiu vuliano, bior toro na toru riano napano kumimau eaio, naio be Tubo Kristo. ²⁵ Mia toro napano naio jomña mila maka rimemedu, mia naio rivar meran bereio rimemedu takii kanano vijuku vovaiano nalo, bior Atua naio bitii tomu nalo nonovio kanalo imauano ga memedu.

4

1 Mia kamiu tomu nalo

na tortoru, kamiu bunu monoka kuvila rimemedu rivu van tomu nalo napano mña aju amimñau kenemiu, bior kamiu bunu kenemiu Tubo na toru tai joa vio mave napano mia naio tibure kenemiu bajago nalo.

Pol berloglog nalo

2 Kamiu kuvisikili ka volkouano bogo nonovio, mia monoka kubolkouo napano mia kuvisidomii vatitig vite nalo ka kuvarenio ea volkouano, a ka mia kenemiu iviso river sivaiano van Atua. ³ Kiniou nejidom bunu ka monoka kubolkouo ka kumemi, ka mia Atua naio rivetavo ea mñarabo ka numijikia nuvioliolu ka vite novo nei napano beamu naio joluku, napano Kristo kiano iliano, napano vonganei nojoa nalakoiano biorio. ⁴ Neber bo, nejidom bunu ka kubolkouo ka mia nemijikia neil rivu, ka mia rila iliano nalo nei rimeravo, rimemedu tibe ka ga na mia monokanio nalaio. ⁵ Ea bajago nalo na mña kumitumña kumilaio ea tomu nalo miralo napano maka amonea Kristo, monoka kuve masou rivu ka kuvitakii kenemiu buluvio nalo, ka mia kuvurulo amei ea Kristo. ⁶ Monoka kuvil rivu vijalo, ea iliano nalo napano ga be nailitinievuiano a ajese bo, ana mia ajog rivu ka iliano nalo nene, a monoka kuvijikia mñarabo ka kuvisian verdopeiano vanlo

napano avika vikadeniano ninio ea tivelinio na kenemiu viekouoiano.

Pol miila tomu juo aban keanlo

⁷⁻⁸ Kuruado novo nei Tikikas napano naio jo bija kiniou, mia neiila naio rudu mñesi nei riviedu kean kamiu ka naio riverial ka kumemi numitu jumabe, ka kumijikia kuvijog rivu. Kiniou najaaro toru ka kuruado nei, ka napano bogo nonovio naio jikili ka mijai kiniou ea Tubo kanano imñauano. ⁹ Mia kuruado dolu nei napano kiado bilbilu novo nei Onesimas, mia naio bunu takisor Tikikas riviedu kean kamiu. Onesimas, naio be kamiu tai na kenemiu vio, a naio bunu jomña monea Kristo. Mia naljuo averial van kamiu vite nalo napano amalmaluvo ea vio nei.

Pol kanano ilimaariano banlo

¹⁰⁻¹¹ Arestakas napano naio joa yimo na nalakoiano bija kiniou, a toro napano Mak napano naio be Barnabas kuruano, a Jisas napano abio naio ka Jastas, nalo tolu aberinavo aju ajidomial kamiu toru. Mak nei, kubokar iliano ea tivelinio ka naio ruei, ka ver naio riviedu sel ea kenemiu vio mia monoka kuvisaaro ka kuvuru naio tusol kamiu.

Ea kulo Israel nalo napano amonea Kristo ruei, nalo tolu nei ga naliko kiniou kumemi numimñauka

iñauano nalo na Atua kanano navenatuboiano, mia nalo tolu nei nalo ajidel ka amijai kiniou toru laka ea bogo na jikirkili nalo.

¹² Epavras nei napano naio bunu be kamiui tai, naio be toro vu tai na miñau Kristo Yesu kanano, a naio bunu berenio kavijo bo a bogiano bo ban kamiui, berenio bogo nonovio naio joñña bolkouo jikili damariga bior kamiui, ka kumijikia kuvitu sikili, ka kumeruo rivu tibe ka siyovo ea Kristo, a ka kuvitu sikili ka kuvila ga vite nalo napano Atua naio jidomio.

¹³ Kiniou nejidom never rimemedu ka kamiui ka toro neibano Epavras jo miñau jikili laka bior kamiui, a kulo Leotesia a kulo Ierapolisi bunu.

¹⁴ Kiado bilbilu novo nei, nakulekuleano nei Luka, bija kuruado dolu nei Timas, naljuo bunu aju aberenio naljuo aju ajidomii bijon kamiui toru laka.

¹⁵ Kiniou nejidom kamiui kuvisian lilian kanaku iliano riva van kuruado a kuviviniedo nalo napano ajua Leotesia, vija tira napano Nemeva naliko bagaro na namoneano nalo napano aju abior ea kunuano, ka kiniou nojo nejidomiilo toru laka.

¹⁶ A mia bogoti napano kamiui kuvuluku kanaku ñesi nei ribisi, ana neber bo, kamiui kuvituvan rivan ea kulo Leotesia, ka mia avulukuiio van bagaro na namoneano nalo ea

vio na, a kamiui monoka kuvuluku kanaku ñesi dolu bunu napano nalo na vio Leotesia atuvan rimeñi rivan kamiui.

¹⁷ Mia kanaku iliano tai ba ban Akipas, neberenio “Jau kovitika vatitig rivu iñauano napano Tubo miduio joa juñamo, koiñauka nonovio batitig garuei.”

¹⁸ Mia vonganei, kiniou nodular vovojulu den toro nañña jo bivitauia ñesi, naruei kiniou Pol nejirii kanaku iliano na maaro biedu ban kamiui ka juñaku ga, neber kavijo bo ñeli na bogiano bo ban kamiui. Kamiui tiniemiui ribobogia re marimieni nalo na amiadika kiniou kanio, mia Atua kanano tiniamemiano naio to vija kamiui nonovio.

Kiniou, Pol.

**Mesi Moti Napano
Pol Bivitauiaio
Ban Namoneano
Lu Nalo Na
TESALONAIKA
Verialiano Moti**

Tukunuano bulati na niosi nei

Bulukomeli nei Tesalonaika be parinio komeli na tanobuku na Masetonia, napano jo yetano ka Parinio Tubo na Romo nua. Bogo na Pol jalivo yako Vilipae, naio ban yako Tesalonaika berial ioluano vou ea vio na, naruei yimo lu jikario ea vio na. Mia iorou maka vesiou, taara na Israel tealo amilkuei naio. Nalo amijalukua naio bior napano amial ka tomu miroano na maka ave taara na Israel, napano beamu aju amiagago ka kialo ver-loglogiano nalo, amijog ioluano vou napano Pol berialio, ana amonea Yesu.

Naruei taara nalo na Israel nei tiniel jer Pol, a amijilario ea vio nei, ana naio ban ea bulukomeli nei Berea. Iorou, naio ba boru yetano Korin, naio mijog verioiano na namoneano nalo na Tesalonaika ea kiano bilbilu Timoti, napano jo miñau bija naio.

Naruei Pol jiri mēsi nei beamu ba ban namoneano nalo na Tesalonaika ka ridular kialo jidomiano, a ka verial van namoneano nalo na vio na ka naio jo jidomiilo, a Atua jo bijalo. Naio ber siva ban Atua bior napano mijog

ka aju amonea Atua kirisikili, a aju tiniel miia tomu nalo, a ber kalo ka asidomii bereio kiano bajago novo ea bogo na naio jo bijalo.

Mia naio berdoŋe kialo vikadeniano nalo napano abika denio, aber mia Yesu rime i bereio tumabe. Nalo ajidom aialio ka toro napano m̄aro beamu be Yesu maka rime i bereio vo, mia mijikia rivokar meuliano napano maka rijikia bisi, ŋelina makanio. Mia ajidom ajikia ka mia Yesu rime i bereio ea bogo vaio. Mia Pol ber vatitigio banlo, ber monoka aim̄au jaka, ka kialo jidomiano ju jurmaro, a ka aburu kialo jidomiano ju jikili ea Yesu ka aturorea naio vano-o naio mia rime i bereio.

Torogio nalo na niosi nei

Iliano moti 1:1

Pol jaaro kalo bija ber sivaiano ban Atua bior nalo 1:2—3:13

Pol berlogloglo ka Namoneano kiano bajago 4:1-12

Pol berlogloglo ka mia Kristo rime i bereio 4:13—5:11

Pol mila nonovio kiano verloglogiano 5:12-22

Iliano maariano 5:23-28

Iliano na be moti

¹ Kiniou Pol bija Sailas a Timoti, kumemi tolu numisaaro laka ka nuvivitaui niosi nei riviedu ea kamiu taara na namoneano na ea komeli na Tesalonaika. Kumemi numonea ka kenemiu meuliano nalo

aju vatitig ea karamado Atua bija kiado Tubo Yesu Kristo, naruei kumemi nubolkouo ka tiniememiano a tumaroano to vija kamiu nonovio.

*Pol nalo ajaaro bior viek-
ouoiano novo na kulo Tesa-
lonaika nalo kialo*

² Nao, bogo nonovio kumemi numitu nubolkouo ban Teta Atua, monoka nuver siva van naio rivior kamiu. ³ Kumemi numitu tiniememi maio ka kamiu ea kenememi volkouano jibe nei, maka nuvijikia tiniememi ribobogia kenemiu moneano, napano kumiñau jikili jakiiio, a napano kenemiu tinietiano, jo miyoyotuba ea kenemiu bajago novo nalo, a napano kenemiu jidomiano tebievi, naio mila kamiu kumitu jikili batitig ea kiado Tubo Yesu Kristo.

⁴ Banalo, kumemi numijikia ruei ka Atua naio maka tinientii ga kamiu, a naio bijauia bulag kamiu bunu ka kamiu kuve kanano riano, ⁵ bior bogo napano kumemi numioliolu nuber lilianiano vou na bo ka kamiu, naio maka tibe toro kiano iliano kurano, a naio binime i ea kamiu jibe iliano na temi tai na jikili. Sikiliano na Niununo Lu kiano joaio, a naio julio kenemiu iviso rivanvano-o kamiu kumoneaio.

Kumijikia kenememi bajago nalo bogo na numitu bija kamiu, numijog bin laka ka nuviñauka saba nalo riviniu nina numijikia

nuviñaukanio ka rijikia rijai kamiu ka kumonea, ⁶ a iorou, kamiu kuvijevio, kumei tibe ka kenememi natakisoriano nalo, a maka ve tena ga kenememi, mia kumei kuve Tubo kiano natakisoriano nalo. Bekurano ka ver nalo dolu amila buruñara jaleleano ban kamiu a ajian bogokouo laka ban kamiu ka bogo nei, a mia kumila borvorua ka ioluano, naruei Niununo Lu midu kiano buruñara saariano joa kamiu. ⁷ Ea kenemiu bajago novo nalo na, maka kumisidomii vovaiano nalo, kuvitu kamu ka kuburu mñarabo ka namoneano dolu nalo ea tanobuku na Masetonia a Kris. ⁸ Tubo kiano lilianiano vou nabo naio jo jaluvo ea kamiu bano, maka ea vio juo nei ga, a ea vio dolu nalo na laka bunu, mila tomu nalo amijog kenemiu viekouoiano ea Atua ruei.

Nina naio bo laka, a vonganei jibe ka ea vio be na nuvan ea bereio, a maka bunu kenememi titai ka nuvijikia nuver kalo, bior ka napano iliano nonovio biedu ea kamiu ruei ba bokar nalo ruei. ⁹ Kumemi maka bunu nuvitukunu rivan kulo dolu nalo na, mia nalo ajukunu binime i ban kumemi bereio, ajukunu jumabe ka napano kamiu na vio Tesalonaika kuburu kumemi numitu bija kamiu, a jumabe na kubilig kamiu, kubuku bulag kenemiu tavoru nalo na mñarmaro, kumei tibe tomu nalo na Atua na meul riano

kiano. ¹⁰ A bija nina, nalo aju ajukunu bunu napano kumitu jikili, kuvitu rorea Atua kenerinio nei, Yesu. Naio riyotuba ka kito bereio, bior napano Atua bitiri lario meul bereio ea nañariano ruei, a mia naio riila riyotuba bogo ve valuo nene, ka naio toko kito ka bogo na tibureiano.

2

Pol jukunu ka kiano iñauano, bogo napano jo Tesalonaika

¹ Banalo, kumemi numijog iliano tai aber numiñau kirivova, mia be tinieku ka kubitilubar ka kenememi yaduiano ea kamiu bar mñarati moroano na bo.

² Beamu laka, bogo na numitu numiñau Vilipai, nalo aju amil bova jibe na ka kumemi ruei, aju amila bulag laka kumemi, a jibe na kumijikia ruei, bogo na numiyotuba ea kamiu, nalo amil ea kumemi laka bereio bunu. A numial ka Atua naio jo mija kumemi, naruei maka bunu numerou ka vovaiano, numiñau dolu ka ga ka nuverial kiano lilianiano vou nei van kamiu.

³ Kumemi numioliolu ban kamiu, a nemijikia never ka kiano iliano nalo maka tibe tomu nalo tai na aju aber. Nalo maka ayotuba ea kenememi labeleiano tai ga, ðeli ea kenememi jidomiano va tai, a naio maka ve titai na kumemi nuvilavon nuvatete ka kamiu, maka leleio.

⁴ Maka lele tibe na, a ea bogo nei, kumemi numitibe ka tomu nalo na Atua bitiri bulag kumemi, naio midu kiano lilianiano vou na joa jumememi, ana nubinimei nuberial kiano iliano riano ban kamiu. Kumemi maka nuviñau ka tomu nalo aial kumemi tumabe, a numisidom ga ka Atua rijikia saaro ka venia na numila, bior naio ga mijikia rivitii venia na joa kiado iviso terakurano. ⁵ Kamiu kumijikia batitigio ka maka numei ka nuvuku iliseseiano ðeli na ilivevaviniano ka kamiu, a Atua mijikia batitigio bunu ka maka tiniememi ka kenemiu saba nalo, ðeli nuvila sibilili kamiu kanio. ⁶ A ea bogo na bunu, maka lele kenememi jidomiano tai ka rila kamiu ðeli tomu dolu nalo kuvidular siememi mave.

⁷ Be riano ka kumemi numaluvo ea kamiu jibe naiagagoano na Kristo kiano, na ðeli memedu ga ka kuvila saba ve miroano ka kuvitika kumemi, a maka numisidomial saba nalo na. Nubinimei numidomdom ga, numila ka kamiu jibe nena tai bagan kenerinio domdomu.

⁸ Kumemi numisaaro mñele ka kamiu jibe na, numisidom mñele ka nuververial Atua kiano lilianiano vou na ka kamiu, a numijog numisidom mñelea kamiu, banbano numitumña numijamo ka kenememi meuliano ka nuvijai kenemiu meuliano nalo.

⁹ Banalo, neber jibe na

maka nalasibi, bior kumijikia jumabe numinonou ka imãuano nalo na jikili ka jumememi ka bogo na. Kumemi numimãu legiano a bogiano, ka rila bogo na kumemi nuvitu vija kamiu ka nuviololu ka lilianiano vou na Atua kiano, maka numila ve temi van kamiu. Kumemi ga numitumã nubitika kumemi, maka bunu kam tai bereio vitika kumemi leleio.

¹⁰ Kumemi numisidomii ka ea miremiu, a ea Atua mirano, numijikia nuverial ka ea bogo na numitu iviso ka kamiu na moneano nalo, maka lele titai rivova ka kumemi kenememi meuliano memedu ga, a be lu vatitigio. ¹¹ Peli kamiu kumitu kumisidomii kia ga, napano numila ka kamiu jibe teta tai napano jo mila batitig laka ka rijai vatitig kenerinio nalo kialo meuliano. ¹² Kumemi numila kenemi iviso nalo melumu bo, nubar iliano nalo na ilivituniano ban kamiu, a numidular kenemi jidomiano bavin ka monoka kuvila kenemi meuliano rime rimemedu rivu ea kiado Atua kiano bajago, na naio naruei bio kamiu ka kumei jouro ea miamoiano na bo ea kiano navenatuboiano.

¹³ Titai dolu bunu nuber siva ban Atua bogo nonovio biorio, naina kenemiu bajago na bogo na lilianiano miyotuba ea kamiu. Kumijog, a maka lele kuvukulario

ka kuver toro ga kiano iliano, a kumitu kubitii kuber be riano, be Atua kiano iliano memedu. Mia kamiu na kumonea, kubetavo ea kenemi iviso ka mia naio to rimãu ea kenemi meuliano rivoka banei.

¹⁴ Kuruaku a kuviviniekou nalo, nemi-jikia ka iorou ka kumonea, maka vesiou tomu nalo na kenemi vio bereio ga ajumolu amila bova ban kamiu, kubiviuo bogokouo laka. Jibe na bova, a ea vio nei kuvitu kuviel ea m̃arabo na ga moneano na Yesu Kristo kiano nalo na ea Atua kiano yimo lu nalo na ea tanobuku na Yutea nalo amiel ea nua ruei. Nalo bunu, bogo na amoneaio, ana kulo Ju nalo aju amila bulaglo toru laka! ¹⁵ A bajago na, Ju nalo aju amila nua ruei binime. Beamu, maka asidom naverialiano nalo, a iorou, nalo naruei amila amuebin kiado Tubo Yesu m̃aro, a nalo bunu ga na aju amijil kumemi bogo miroano ruei. Saba nalo na aju amila na, Atua maka tiniene saaro kalo leleio, ka nalo aju amilkuei bogo nonovio ga. ¹⁶ Kumemi numitu numiololu ka lilianiano vou na ban tomu nalo dolu na maka ave Ju, be iakurano ka be bogo ka ajikia ala vatitigio kialo meuliano, a Ju nalo nene aju amila vonvon ka atukovio ga ka kumemi, maka asidom ka nuverial kalo.

Kialo bajago va nei misonson bavin laka bija

kialo kariano na amila nua ruei binimeĩ, mila vonganẽi kialo vovaiano bavin jovulu laka. Amila jibe na banbano-o maka asidomial titai, a remijikia ka Atua kiano tiniemimiano bujo jo binimeĩ kalo ruei.

Pol jidomii toru laka ka rial lo ve vaarakurano bereio

¹⁷ Banalo, kumemi numisidom nuverial ka kamiũ, numituvan kamiũ bogo nua ga na, nubano teliki ga, nuber aua toru ka kamiũ, numisidom nuvial miremiũ bereio. Be riano ka robeve terakurano ka mokotenado, a ea kiado iviso, kito roju robe takurano ga.

¹⁸ Kumemi numitu jibe nei, numisidom ka nuvial m̃arabo ka nuviedu nuvial kamiũ bereio, a kiniou Pol nojo nomilavon vatelabo laka, mia toro va nei Siṃaro, naio jo jokoko vio julaka ga.

¹⁹ Ana ka venia numisidom laka ka nuvial bereio kamiũ? Nina ka kei bereio numijikia nuvar tiniememi ealo? Kei bereio na mijikia rila kumemi nuvisaaro? Kei bereio nalo abe m̃arati na bo na kenememi im̃auano, napano nuvijog rivu kanio ea bogo na kiado Tubo Yesu riyotuba bereio? Maka toro dolu tai, mia kamiũ na ga!

²⁰ Be riano, kamiũ jibe ka kenememi jidomiano na sereano novo tai napano numitovulio, kubinimeĩ jibe burum̃ara burupati na jogvuiano na meuliano na kenememi.

3

Pol beriio jum̃abe miila Timoti ba miyotuba kalo beamu ruei

¹ Kumemi numitu tiniememi maio ka kamiũ jibe nei banbano, numial jibe maka, kumemi tai monoka riviedu riyotuba ka kamiũ bereio. Ana nuber mia monoka kumemi juo Sailas numitu Atenisi beamu vo, ² mia Timoti mijikia riviedu bereio ea kamiũ. Kuruado nene, kumemi numim̃au Atua kiano vio takurano bija naio, ka rila lilianiano vou na Kristo kiano rivanvano-o tavio, ana namial jibe naio be toro na bo tai ka riyotuba ea kamiũ. Namijikia ka mia naio mijikia riilikakar kamiũ, a mia mijikia rijai kamiũ ka kenemiũ moneano to sikili bogo nonovio, ³ ka mia maka kuvijikia kumermerou laka ka bogokouo nalo na kumitu kubiviuo. Bogo kouo nalo jibe na, remijikia batitig ka abe togio tai na kiado meuliano kito namoneano nalo na maka rejikia rataluvo denio.

⁴ A verver kumitu tiniemiũ maio ka kia ga vo, kumijikia bogo na kumemi numitu bija kamiũ, numitu nuberial bogo nonovio ka kamiũ nuber numial ruei ka mia vesiou re, ana mia monoka ala vova ka kito. A vonganẽi, tenalo nei miyotuba jibe na ga ruei, na kamiũ naruei kumitu kubokar toru laka.

⁵ Nina naruei mila nomi-jog ka maka nejikia noto

tibe na ga, a monoka nala titai ka nojog iliano tai river kumitu jumabe. Kiniou nemerou kija ka toro va na rila vonvon toro nei, peli naio mial kiano m̃arabo tai ka rila kamiu kuvijoru ruei, mia nojidom nojog kamiu kumitu jikili kia ga vo peli na jumabe, bior maka rivu ka kenememi im̃auano novo nalo napano ea kamiu rime i rive iakurano bereio. Jibe na naruei, nomiila Timoti biedu.

Timoti binime i bereio ea Pol bija veriiano novo nalo na ea tivelinio na kulo Tesalonaika nalo

⁶ Timoti biedu mial kamiu, a vonganei ga naio binime i bokar kumemi. Bogo na binime i, bar iliano nalo na bo laka, berial jumabe kenemiu moneano bija bajago na tinietiano na kenemiu jo kia ga toru, ju bo ga ju, ana mila tinieku jaaro toru laka. Naio midu kenemiu iliano binime i ban kumemi, ka kumitu tiniemiu maio ka kumemi julaka, a kumisidom m̃ele ka kuvial mirememi bereio, jibe ka ga kumemi numisidom nuvial miremiu. ⁷ Mia be iakurano ka numitu numijog jaleleano laka ea vio nei ka tenalo na bova amila ka kumemi, mia bogo na numijog lilianiano na kenemiu moneano kuruememi nalo, numijog jibe midular kenememi jidomiano bereio. ⁸ Kumemi numijog ka kumitu jikili bija

Tubo, ana mila jibe na numijog jibe numeul vatitigio bereio.

⁹ Bogo na numitu nubolkouo ka kamiu, numial jibe maka kumemi nuvila titai na bo laka ka kamiu, a kamiu naruei kumitu kumila tena bo tai ka kumemi, bior kumila kumemi nubar jogvuiano ea kenememi iviso, banbano kumemi maka bunu iliano vare ka nuver siva van Atua kanio. ¹⁰ Naruei mila numitu numisidom laka ka nubolkouo legiano a bogiano, ka verver nuvijikia nuvial kamiu bereio ga, ver vio tai na kenemiu moneano mijoru eaio kija ga, nina mia numisaaro laka ka nuvija ka rime i to sikili vatitigio bogo nonovio.

¹¹ Nina naruei be tena nojo nobolkouo jikili kanio vonganei, ka mia karam̃ado Teta Atua bija kiado Tubo Yesu, nalo avetavo ea m̃arabo ka kumemi ka numei bereio nuvial kamiu. ¹² Bano bokar bogo na, nojo nobolkouo ban Tubo, nebika ka mia naio rila kenemiu tinietiano to riluo rivan tibe nei, rison vatitig kenemiu meuliano rivanvano-o rivokar bunu tomu nalo dolu, rime i ve toru laka rive verare ka kenememi tinietiano ea kamiu.

¹³ A bija nina, nobolkouo ka mia naio ridu jidomiano tai na bo a jikili vatitig ea kamiu, ka kuvijikia kuvokar vatitig kenemiu meuliano nalo vanvano vokar bogo na kiado Tubo Yesu riyotuba vija kiano kulo lu

nalo, ana bogo na mia kuvijikia kuvisikili kuvitu ea Atua Karamñado mirano na kamiu kumeravo rivu, kube lu vatitigio ga kumitu.

4

Bajago na meuliano napano Atua naio jidomio

¹ Banalo, bogo na numitu bija kamiu, kumemi nuberloglog vatitig kamiu jumñabe ka kuviluo lie ea bajago na meuliano na Atua naio jidomio, a numitu numijog kumila kija ruei, naio bo laka. A ea Tubo Yesu siano, nubika numisikili den kamiu ka kuvitu van re, kuvitu kuvijedu ka rila rivan lie bogo nonovio. ² Tubo Yesu midu kiano verloglogiano nalo joa jumememi ka nuverial ka kamiu, mia kumijikia batitiglo ruei. Tibe na, bo ka kuvitakiio.

³ Bo ga, ninei naruei saba tealoo napano Atua jidom kiano tomu nalo monoka alaio. Kiado meuliano monoka ve lu rivu, jibe monoka rala re bajago na bova ea tivelinio na sumñano bija tira. ⁴ Kito nonovio monoka retakisoor vatitig mñarabo na memedu na soriano, ka toro rijikia to vija koano tira memedu ea bajago na meravo bo, na maka rijikia rila bulag nalo ve juo sialo bereio. ⁵ Jibe na, bova ka toro soro soñeli, jakiiio kiano tinietiiiano jikili ea tira ga, bior nina naio be bajago tai na tomu nalo na melijokouo ga, napano maka ajikia Atua leleio.

⁶ Verenio tomu nalo na aju amila bajago na bo laka bogo nonovio ea vio nei, mia bo laka, ka mia nalo maka avina ala bulag re saba novo na kurualo kialo. Kamiu monoka kuvitilubar vio na, ka Atua jo midu vironiano bogo nonovio ban tomu nalo na amijoru ea kariano kinkin nalo jibe nei, jibe na nuberial ban kamiu bija iliano tiniemaiano na jikili ruei.

⁷ Kuvilavon ka kuvisidomii ninei vonio. Bogo na Atua rivio kito ka rove kiano tomu nalo, naio maka la ka kiado meuliano rimej rivujo ka bajago nalo na maka rimeravo, a naio mila ka kiado meuliano rimej rivujo ka bajago nalo na be lu vatitigio. ⁸ Tibe na, toro napano maka tinien saaro ka verloglogiano nalo nei, naio monoka rivitilubarior ka maka toro kiano iliano ga na naio jo bukular, a naio jo bukular Atua kiano iliano ga na, nina napano midu kiano Niununo joa kito, napano naio be Niununo napano be Lu.

⁹ Titai bereio napano nojidom neveriio ka kamiu, kito namoneano nalo kiado bajago, napano monoka rosidom kito tibe na robe mñaratavo takurano ga. Tena kumijikia vatitigio ruei, maka tena ka nevivitauia bulagio bereio van kamiu, bior Atua naio berloglog kito robiniu ruei ber nina naio be tena bo tai na bo kirinovo laka. ¹⁰ Nemijikia ka kumitu kumila jibe na

ruei ka namoneano nalo na Masetonia bo laka, a nojidom never bereio, ka kuvokar vatitig bajago na bo nei, kuvila rimei ve toru lie iviso ka kamiu.

¹¹ Vonganei nojidom nevivitaui saba nalo tealó bereio na bo ka kuvisikili ka kuvilaio. Na beamu, jau katanea re vio, jau koto melumu ga damariga. Juo nene, koyuku re sunumo rivan ea re toro dolu kiano burusio, a kovitii ga kiamo meuliano. A tai bereio, koyovo re, a koiñauka kiamo iñauano na joa juñamo sikili rivu, tibe ka na nuberial ka kamiu nanua ruei. ¹² Verver kala tibe na ea kiamo meuliano bogo nonovio, mia nalo dolu napano maka amonea, nalo amijikia avitii vatitigso, avitilubario napano maka nalo dolu ka abitikarso, mia jau ga koiñau kobitika vatitigso.

Tubo kiano liliuano

¹³ Mia banalo, nemial bo ka kuvijikia kija saba nalo tealó ea tivelinio na nalo na kito na amonmelio ruei, jibe abano kovio ea yetemeriba. Tomu nalo telabo na maka ave namoneano, amerou laka ka mñariano, aber ñeli tomu nalo abano kovio mia rivova laka ka nalo, ana mila ka bogo na nalo tai bakovio, nalo ajegi toru kanio.

¹⁴ A kito maka tibe na, bior romonea ka iorou ka Yesu naio mñaro ea mñakolkolo, naio jumolu meul bereio, a

ea bajago na naruei, kito na romonea bunu ka nalo na abinimei takurano bija naio amñarmñaro, mia Atua naio rilalo amei ave takurano vija naio ameul bereio, a mia amei bereio vijaio.

¹⁵ Nemijikia never riano ka kamiu, ka iliano tai na Tubo ga naio berenio nua, kito na roju remeul kia ga rivokar bogo na naio mia rimei bereio, kito maka rejikia ravavin beamu ka nalo na abano kovio ruei. ¹⁶ Makanio, a venia mia rimoluo ea bogo na jibe na. Mia parinio nailiano na tiniabene rivio souo vija verialiano tai na toru, a mia Atua kiano simeduo riolu, a mia kiado Tubo taluvo ea tiniabene mave rivatove nei. Naio rivatove, mia namoneano nalo na amñarmñaro aju, mia atumormolu bereio beamu. ¹⁷ Iorou ana mia kito na remeul roju kia ea vio yetano, mia naio rivuru kito bunu ravavin mave vija nalo rovinu, ravan bure melijo nalo na mave ea tiniabene, ravan roviviuo kiado Tubo mave ea vio yauo. Rovan tibe nei, a mia rotu vija naio maka rijikia ribisi bogo tai.

¹⁸ Verikariano na bo laka, mia bo ka kito rotu reijaja kito bogo nonovio ea jidomiano novo nalo nei.

5

Kito monoka rotevijo rotu batitigio, vesiou re ga naio rimei

¹ Banalo, nemijikia ka tomu miroano nalo ajidom

ajikia ka saba nalo nei mia riyotuba ea bogoti vabe, ħeli ea bogo venia. A nina maka kiaku ka novivitau kanio van kamiu na, ² bior kumijikia ruei ka tena maka toro kiano ka rijikiaio. Mia tibe ka ga toro na vinauano mila kiano iġauano bogiano. Naio maka rijikia verial beamu bogo venia ana mia naio riyotuba!

³ Vede naio rimei ea bogo tai na tomu nalo aju aberver kalo, aberinavo "O, vonganei be bogo na tumaro ruei" ħeli aber "O, vonganei rojua bogo tai na bo!" Nalo maka ajikia, ana tenei jibe tira tai na vaarakurano ga mijog ka mia kenerinio rimoluo naruei. Mia bogo na naio rimei bereio mia tibe ka ga, napano tomu nalo amiilo kanio, maka asidomiio, mia burumara bogo na jaleleano riyotuba kalo, nina maka ajikia avuro den leleio.

⁴ A kamiu bilbilu nalo, maka bunu kuvitua melijok-ouo, a ver bogo na toru nei riyotuba, neber ħeli mia kuvijikia kuviilo kanio re, jibe ka naio be toro na vinauano tai binimei ka kene-miu saba nalo. ⁵ Kito maka bunu rove tomu na melijok-ouo na bogiano, a rove tomu na miamoiano na legiano ruei. ⁶ Tibe na naruei, mia kiado jidomiano ritevijo vatitigio rivu bogo nonovio, rovokar vatitig rivu kiado meuliano, ka rotibe ka re

tomu nalo dolu na melijok-ouo. ⁷ Iġauano nalo na aju amimaukanio, aju amun uei amun banbano-o muelo, karina aju ga amonmonmelio ga, ⁸ a kito na miamoiano, monoka rala kiano iġauano rimemedu. Mia kito rala kiado meuliano rimemedu rivu, mia reiako niabedo ea bajago na viekouoiano a bajago na tinietiano, a rosovko parido ea moneano na jikili, ber ka mia Atua monoka rilarrur kito.

⁹ Nina maka rivu ka kiado jidomiano veve juo ka mia Atua rilarrur kito, ħeli mia rilarrur re kito, bior ka maka kiano jidomiano ka kiano moneano nalo mia avokar vironiano, a naio bijauia kito ruei ka rovokar ioruriano napano Tubo Yesu Kristo naio jovulu be kiado. ¹⁰ Naio maro kar kito, mila ka ver bogo na naio rimei bereio, be iakurano napano romonmelio, jibe na rabakovio ruei, ħeli rotu rotevijo, tibe na romeul keano roju, a kiado meuliano mia to vatitigio vija naio bogo nonovio.

¹¹ Iliano nalo na naruei bo ka kuvitu kuerver ka ridular kenemiu jidomiano mave, kuvitu kuvijaija kamiu ka kuviġauka kenemiu moneano rimei sikili rivu, tibe napano nemijikia ka kumituma kumila ruei.

Iliano na maaro

¹² Banalo, nojidom nevika kamiu bunu ka kuvisikili kuvitilubar vatitig nalo na amimau mēle ka iġauano na Tubo kiano iviso ka

kamiu. Nina bior napano naio midulo aju ka aje tuboiano van kamiu, averloglog kamiu. Kamiu monoka kuvamenealo rivu, ¹³ a kuvidulo atu mave ea kenemiu jidomiano, tiniemiu tiilo, ka iñauano na nalo aju amiñaukanio. A bunu, kuvitu re kuvila baravo, a monoka tiniemiu memi ka kamiu bogo nonovio.

¹⁴ Nebika jikili ban kamiu kuruaku nalo a kuvivinieku nalo, verver kamiu tai amiy-ovo, bo ka kuvil vanlo ka avarlo kija. Ver kamiu tai amerou, kuvil vanlo ka rila nalo atu asikil. Ver kamiu tai niabelo mave, kuvil vanlo ka riijailo. A ea nalo abiniu, kuvila ka kenemiu jidomiano rive tebievi vatitigio rivu.

¹⁵ Kamiu kuvisikili ka kuvila ka ver toro tai rila vova ka kamiu, mia kuvila kean re bunu vanio. Kito monoka resikili ka rala ka rove tiniememi vatitig ka kito, a rove tiniememi vatitig ka tomu nalo dolu bunu.

¹⁶ Bekurano ka venia na mijikia riyotuba ka kito, a monoka rasaaro bogo nonovio, ¹⁷ robolkouo bogo nonovio, ¹⁸ rover siva ka Atua bogo nonovio. Nina naruei kiano sidomiano ka kito roimñaukanio, ea tivelinio na kito robe Yesu Kristo kiano.

¹⁹ Bereio, verver sebi na Niununo na Atua kiano jo bilvili bo ea vio tai, mia kuvuebin re riñaro, ²⁰ a verver toro tai jo berial verialiano nalo, mia kuviyotel ea re

naio, ²¹ a kuvitivitii veve saba nalo riviniu vatitigio rivu. Vite na bo, kuvokar sikili, ²² a vite na bova, kuvituvanio.

²³ Ana nobolkouo ka Atua ga, napano be Atua na tuñaro, rila kenemiu iviso vija jidomiano a meuliano bunu rive lu mia rive lu vatitigio. Nojidom laka ka bogo na kiado Tubo Yesu Kristo rimei bereio, mia niunomiu, tiniemiu, vija mokotenemiu nonovio maka lele kiri soro tai toalo. ²⁴ Naio napano bio bulag kamiu, naio be viekouoiano riano, a mia naio riñauka tibe na ga rivano.

²⁵ Tena maariano na neverial ka kamiu bilbilu nalo, nebika ka kamiu tiniemiu ribobogia re kumemi ea kenemiu volkouano nalo. ²⁶ Kuver kavijo bo a bogiano bo ka namoneano lu nalo dolu na aju, ²⁷ a ea Tubo siano, never niosi nei, kamiu kuvuluku bulagio ea miralo.

²⁸ Kiado Tubo Yesu Kristo kiano tiniememiano jo bija kamiu.

Kiniou, Pol.

Mesi Juo Napano Pol Bivitauiaio Ban Namoneano Lu Nalo Na TESALONAIKA Verialiano Moti

Tukunu bulati na niosi nei

Tomu nalo na yimo lu na Tesalonaika ajua jaleleiano bior amijog iliano telabo, aber Yesu binime i bereio ruei, a maka ajikia ka iliano vabe naruei na be riano. Ana Pol jiri kiano mēsi juo nene ba ban namoneano nalo na Tesalonaika ka verial ilirianiano vanlo. Naio berinavo Yesu mia rime i bereio, mia beamu bajago va nalo monoka rime i rivova laka yetano ka tuboiano na toro tai napano mia rimaluvo, napano siano “Toro na lakorov Tuboiano,” a naio mia rilikuei ka Yesu.

Pol berial meravo ber tomu nalo napano abuluku mēsi nei monoka atu sikili ea kialo moneano, ver vaio pēli mia ajevio jaleleiano ve telabo, a ajog rivova laka. Mīa naio berinavo monoka aimāu sikili tulaka ka ajevio. Vite nalo napano maka ajevio ea kialo meuliano, jibe napano naio bija tomu nalo na amimāu bija naio aju amilaio, a monoka ala ga imāuano novo nalo.

Torogio nalo na niosi nei

Iliano moti 1:1-2

Pol jaaro kalo bija naio miaia lo 1:3-12

Pol berloglog tomu nalo ka Yesu mia rime i bereio tumabe 2:1—17

Pol berlogloglo ka namoneano kiano bajago 3:1-15

Iliano maariano 3:16-18

Iliano na be moti

¹ Taara na namoneano nalo na karamādo Atua kiano a kiado Tubo Yesu Kristo, napano kumitua komeli na Tesalonaika, kumemi tolu Pol, Sailas a Timoti, kumemi numisaaro toru laka ka nuviviuo kamiua niosi nei. ² Tiniememjano a tumaroano na karamādo Atua kiano bija kiado Tubo Yesu Kristo to vija kamiua.

Pol jikar kiano vivi-tauiano bija volkouano ka ver sivaiano

³ Titai napano bo ka nuvila bogo nonovio, monoka nuver siva ka Atua ka kamiua nalo na kenememi bilbilu nalo. A vonganei, kumemi numisaaro toru ka nuvila tibe nei, bior kumemi numijog lilianiano nalo na kenemiu, aber kenemiu moneano binime i bavin laka bogo nonovio, a kamiua tomu nalo biniu aju tinielo jiilo bavin toru lie. ⁴ Nina bo laka, ana bogo na numitu numiselviv ea taara nalo dolu na Atua kiano namoneano, numitu numiaia kamiua toru banlo. Kumemi numitu nubisivisii banlo ka kumitu kubar bajago nalo na jikili na uolu nalo kialo, a kumitu kumidu ruru bogokouo tai na mila bulag kamiua laka, a

kamiu kuvikulkul re, kene-miu moneano rijoru leleio re.

⁵ Bogo na kumitu jikili jibe na, ana numial ka bogo na Atua bijauia ga kami naio miñauka memedu batitigio, bior mijikia ka kamiu kube tomu nalo napano maka kuvijikia kuvijoru. Vonganei, naio mijikia ruei ka kamiu kumitu kubar jogviano nalo bior kiano nave-natuboiano, a iorou, mia naio vititii kamiu ka kubare ka kuva joomo eaio.

⁶ Naio, bogo nonovio naio miñauka memedu ga, a mia naio rila meran vovaiano van nalo na aju amila bova ban kamiu. ⁷ Nalo amila kamiu kumitu kubar bogokouo laka, a mia naio rila ribisi, mia naio rijai kamiu yako, a rijai bunu kumemi ea vio nei napano kumemi bunu numitu nubinua saba tealoo. Bogo na reial ka burumñara sebi vilivili ea vio yauo, remijikia ka mila mñarabo na Atua kiano ka rila Tubo Yesu taluvo ea tini-abene rimei ea yetemeriba, vija kiano nailiano nalo na jikili, ka mia naio rivuru bulag kito den jaleleano nalo na yetemeriba. ⁸ Naio riyotuba, mia naio tibure nalo na maka asidom ajikia Atua, maka asidom ajogkar Ioluanou Vou na kiado Tubo Yesu kiano.

⁹ Kialo vironiano na mia nalo avario, mia nalo avakoviobo garuei, mia nalo atukovio kalo maka ajikia atu vija Tubo bogo tai ea vio

novo napano kiano moroano miñaukanio bo jo ruei. ¹⁰ Ea bogoti napano mia naio rimaluvo, mia kiano tomu lu nalo aiaia naio ve toru laka, mia nalo na amonea naio aial naio tibe naio bo bo laka, a mia kamiu bunu vialo, kuvitakisior naio. Kumijikia kuvila tibe na bior kumonea kenememi Ioluanonalo, mia nalo dolu napano na, mia maka ajikia atakisior naio leleio.

¹¹ Kumemi numitu numisidomii saba nalo na banbano-o, ana mila numisikili vatitigio bo ka nubolkouo bogo nonovio bior kamiu. Numitu nubikaden kiado Atua ka riijaja kamiu, kubare ka meuliano lu nei napano naio bio kamiu kanio. Nubolkouo ka kenemiu verkariano novo nalo napano kumitu kumisidomii ka kuvitakii, bija iñauano nalo na bo napano kenemiu viekouoiano mijikia rila, mia Atua rimau ea kiano sikiliano ka mia monoka avar mñarati. ¹² Numitu nubolkouo jibe na ka kamiu kuviaia kiado Tubo Yesu siano rimei ve toru bure kamiu, a ka kuviluo lie vija kiano bajago nalo na bo. Ver kumijikia kuvila tibe na rivan rivano-o rive verare ka tiniememiano novo napano Atua kiado Tubo kiano, nina be Yesu Kristo, mia rivu mia rivu.

2

Toro va na, Uolu na tuboiano, mia rimei

¹ Kiniou nojidom neverii bereio Tubo kiano liliuiano bereio, bijaio jumabe ka mia rivuru kito rotu vija naio. Banalo, ea vio nei, nojidom never tibe nei, ² mia niukniuku rivie re kamiu laka, kumerou re. Nemijikia ka iliano tai jo jeliviv ber tomu tai aju aberial ruei pēli aju amioliolu ka legiano na Tubo kiano liliuiano maluvo ruei, a nalo dolu aberverial aber kumemi naverloglogiano nalo naruei nuberial tena ea kenememi niosi tai ruei. A kamiu kumonmonea re iliano nalo na, ³ kuvijamo kalo re ala sibilili kamiu tibe na.

Venia na nalo aju aber, maka jikia tibe na leleio, bior burumara naili-dieiano van Atua monoka rimeī mave beamu vo. Mia iorou kanio toro va na rivakovio nei, napano abio ka Uolu na Tuboiano, naio bunu monoka riyotuba medave. ⁴ Toro na naio bova laka, naio jo mil die tenalo na bo, a naio jo midu naio jo mave ka tenalo abiniu na Atua siano joalo bija tenalo lu dolu na tomu nalo ajovon vatitigio. Mia naio rila tibe na rivan rivano-o, naio ga takurano ridular naio bereio toa vio lu joomo ea Atua kunuano, naio riverial naio river naio be Atua ruei. Mia bogo na naio rila tibe na, nina bogo na naruei mia romijikia roytotuba ea legiano na maaro.

⁵ Ver kumitu tiniemiumaio kia ga vo ka bogo na nojo bija kamiu, nojo neberial

vite nei va miroano ban kamiu ruei. ⁶ A jakii venia na nebisivisii vonganei, kumijikia kuvitilubar ka toro na, kiano bogo memedu ka riyotuba jo, a nalo aju koko vio ka naio bior kiano bogo nene na makam vo.

⁷ Mia be iakurano ka Uolu na tuboiano na naio maka riyotuba vo, a kiano sikiliano jojomā miñau luku-luku kiano bajago va nalo ea vio yetemeriba nei ruei. Naio maka rijikia riyotuba medave ea kiano sikiliano nonovio vo, ka Niununo Lu joko vio ka naio, a bogo na Niununo Lu taluvo bereio rivano, ⁸ mia naio tumolu vija kiano sikiliano nonovio. Mia naio rila mira rivan riva vaataro ka tovulio, a iorou Tubo Yesu mia rimaluvo, mia jegi na kiano iliano naio riyuvu lar toro va nei ve vaarakurano, mia mia-moiano na toru na binimeī bija, rijilar toro nene riva kovio ea melijokouo.

⁹ Bogo napano Uolu na Tuboiano nene maluvo, mia naio riñau vija Siñaro kiano sikiliano, a mia naio rila vremesiano nalo vija tovo nalo vija vite nalo na iloiano, a abe sibiano nalo ga. ¹⁰ Mia naio rila tibe na bior jidom rijukujuku tomu nalo nei kialo jidomiano, ka nalo avakovio. A mia naio rila bunu bajago va na ajikia avurudom kialo jidomiano ve dolu, bior nalo abe tomu na maka asidom Atua kiano ilirianiano, nalo maka asidomii leleio ka mia

naio rijikia rivuru meul ealo.

¹¹ Ana bogo na Atua mial kialo jidomiano jikili jibe na, mia naio tuvanlo ga, mia naio mijamo ka ga burumbara sibiano nalo ka tovulu kialo jidomiano tibe nei ga, mia amonea vatitig sibiano nalo na. ¹² Ana iorou, mia naio tiburelo memedu garuei, ber abe tomu na maka amonea kiano ilirianiano, mia venia na ajaaro kanio, naio be bajago va nalo namã aju amila ruei.

Kamiu kuvitu sikili vatitigio rivu bogo nonovio

¹³ Vite tai napano monoka nuvila bogo nonovio, kumemi monoka nuver siva ka Tubo Atua rivior kamiu kuviniu kuruememi a kuviviniememi nalo, napano naio jidom kamiu toru laka. Jikar nua ruei, naio bijauia bulag kamiu ka mia kuve mbarati moti ka kumonea kiano ilirianiano, a Niununo miñau ea kenemiu meuliano, kumei kumeravo ea mirano, ana mia naio rijikia rilarur kamiu.

¹⁴ Naio bio kamiu ea lilianiano vou na napano kumemi numidu binimej, bior ka naio jidom ka kamiu bunu kувiasol miamoiano na toru ka ridular kiado Tubo Yesu Kristo siano mave. ¹⁵ Jibe na banalo, maka rivu ka kam tai rila luvuio. Monoka kuvitu sikili vatitig bogo nonovio, a monoka kuvokar vatitigio verloglogiano na nuberial ban kamiu ruei ea kene-memi iliano nalo peli ea niosi nalo nei.

¹⁶ Karamãdo Atua tiniene jii kito, kiano tiniememiano ka kito midular kiado jidomiano ea kiano verikariano tai na bo, ka kito rotu rivu vija naio bogo nonovio maka rijikia ribisi bogo tai. Ana nobolkouo ka naio, ka mia kenerinio, kiado Tubo Yesu Kristo, ¹⁷ naio tunukakar kenemiu iviso, rila kamiu kuvisikili vatitigio rivu ea iliano nonovio nalo na bo a iñauano nonovio nalo na bo laka.

3

Pol bika ka abolkouo ka naio

¹ Kulou nalo, beamu ka navokar juluvati na kiaku iliano nojidom nevika den kamiu nonovio ka kamiu tiniemiu bobogia re kumemi ea kenemiu volkouano nalo, ka nuvijikia nuviñau sikili lie, ka Tubo kiano iliano rijikia rivanvano-o tavio soḡeli ea vio nalo. Verver tibe na, mia tomu nalo bunu amijikia ajog kiano ilirianiano, amijikia adular siano, jibe na ga kamiu kumila bogo na naio miyotuba ea kamiu beamu nua. ² A bogo na kubolkouo, bo ka tiniemiumaio ka bunu ka maka tomu nonovio na amonea, a tomu va nalo tai na kialo jidomiano dolu, ana kubolkouo ka Atua tokovio vatitig ka kumemi ka nalo ajikia re atokol kumemi.

³ Remijikia ka remijikia ravarkar tiniedo ea Tubo bogo nonovio, ana be iakurano peli Parinio Toro Va na naio jidom rila venia ka

kito, a nomonea ka Tubo mia rila kito resikili vatitigio rivu, mia vitikar kito rivu laka. ⁴ Be tinieku ka mia naio saaro ve toru ka rijai kamiu tibe na, bior tenalo na kumemi nuberial ka kamiu, nomonea ka kamiu kumitu kumila ruei, a nomonea ka mia kuvitu kuvila tulaka ea bogoti nalo na ju ka rime. ⁵ Kamiu kumila jibe na bo laka, mia kiaku volkouano ka mia Kristo kiado Tubo tukamu ka kamiu riva rivokar na kenemiu jidomiano rime. ⁶ Kamiu kumila jibe na bo laka, mia kiaku volkouano ka mia Kristo kiado Tubo tukamu ka kamiu riva rivokar na kenemiu jidomiano rime. ⁷ Kamiu kumila jibe na bo laka, mia kiaku volkouano ka mia Kristo kiado Tubo tukamu ka kamiu riva rivokar na kenemiu jidomiano rime. ⁸ Kamiu kumila jibe na bo laka, mia kiaku volkouano ka mia Kristo kiado Tubo tukamu ka kamiu riva rivokar na kenemiu jidomiano rime. ⁹ Kamiu kumila jibe na bo laka, mia kiaku volkouano ka mia Kristo kiado Tubo tukamu ka kamiu riva rivokar na kenemiu jidomiano rime. ¹⁰ Kamiu kumila jibe na bo laka, mia kiaku volkouano ka mia Kristo kiado Tubo tukamu ka kamiu riva rivokar na kenemiu jidomiano rime. ¹¹ Kamiu kumila jibe na bo laka, mia kiaku volkouano ka mia Kristo kiado Tubo tukamu ka kamiu riva rivokar na kenemiu jidomiano rime. ¹² Kamiu kumila jibe na bo laka, mia kiaku volkouano ka mia Kristo kiado Tubo tukamu ka kamiu riva rivokar na kenemiu jidomiano rime. ¹³ Kamiu kumila jibe na bo laka, mia kiaku volkouano ka mia Kristo kiado Tubo tukamu ka kamiu riva rivokar na kenemiu jidomiano rime. ¹⁴ Kamiu kumila jibe na bo laka, mia kiaku volkouano ka mia Kristo kiado Tubo tukamu ka kamiu riva rivokar na kenemiu jidomiano rime. ¹⁵ Kamiu kumila jibe na bo laka, mia kiaku volkouano ka mia Kristo kiado Tubo tukamu ka kamiu riva rivokar na kenemiu jidomiano rime.

Ilano na tivelinio na yoviano a bajago napano aju kurano janea vio

⁶ Banalo, ea Tubo Yesu Kristo siano nojidom neverial ka kamiu ka ver kuruado tai maka rimau vatitig peli naio maka takii verloglogiano nalo na kumemi numisian, bo ka kuvitu koalabo kija ka naio. Tomu na yoviano na jibe na, kamiu kuan re vaataro kalo, ⁷ bior bogo na kumemi numitu iviso ka kamiu, maka numitu kurano tibe na. Kumemi nuberial marabo na bo ka kamiu, a kumijikia vatitig ka bo ka kuvitakiio. ⁸ Bogo na verver numidu sinaniano tai, a kumemi nubul ga, bior napano numimau legiano a bogiano ka nubar veru ve teliki ka nubul venia na numisidom. Kumemi numinonou jibe nei ka rila nuvila re buru imauano van kamiu ka kuvitikar kumemi.

⁹ Peli memedu ga ka monoka kuvitikar kumemi ve teliki, a numisikili ka nuvitikar kumemi ga, ka nuverloglog kamiu ka bajago tai na bo nina kuvijikia kuvitakiio. ¹⁰ Bogo na numitu bija kamiu, kumijog numitu nuberial tenei ruei, jibe ka kenememi tuboiano tai, napano numisian bunu ban kamiu, ver toro na maka sidom rimau, mia naio maka rijikia sinano.

¹¹ Nemil jibe nei bior iliano telisu tai binime. ¹² Kenememi iliano ban nalo na jibe na ban jibe na, ber kamiu maka bunu tena kuvitan ea vio tibe na, kuvilavon ka kuvitarmaro ga ve telisu beamu, a kuvisikili ka kuvila imauano kija vare ka kuvokar semiu sinaniano na kumisen ka bogoti bogo nonovio. ¹³ Ana iliano ban kamiu kuruememi nalo a kuviviniememi nalo abiniu, ver maka kito tai na river ka naio rijog tinienon maro ka imauano novo nalo na ju ka roimaukanio.

¹⁴ Kumemi nuber saba nalo miroano ea niosi nei, ana ver toro tai maka tinienon saaro kano, bo ka kuvitilubarioro na. Mia kuvitu re kuvila vonvon ka kuvimau vija toro na beamu, ka rila naio rimou ve telisu, naio rivitilubar kiano beleiano. ¹⁵ A mia kuvila re titai vanio tibe kenemiu uolu

tai, a kuvila bon naio tibe na
ka naio rimei rive kuruemiu
novo tai.

Iliano na maaro

¹⁶ Kiaku iliano na maaro,
nobolkouo ka mia Tubo na
tuñaro rudu kiano tuñaro
to vija kamiu ea kenemiu
m̃arabo nalo riviniu, nobolk-
ouo ka naio rivija kamiu ku-
vinu bogo nonovio.

¹⁷ Vio nei telisu yetano nei
mia keial ka kiniou ga nobiv-
itauia iliano nalo ka juñaku.
Nojidom ka nala tibe nei ea
kiaku niosi nalo ka kuvitu
kuvitilubar juñaku ka kin-
iou naruei nojuvan niosi nei
biedu. Naio naruei kiaku
vivitauiano jo, beriio:

¹⁸ Kiado Tubo Yesu Kristo
kiano tiniememiano jo bija
kamiu nonovio.

Kiniou, Pol.

Mesi Moti Napano Pol Bivitauiaio Ban TIMOTI Verialiano Moti

Tukunu bulati na niosi nei
Timoti, naio be namoneano vou tai napano naio tena komeli nei Listra. Kenieno tena taara na Israel a karmano be toro Kris. Timoti be Pol kiano bilbilu tai napano jo ban bija naio ea vio nalo na jo ban ea ka verial kiado Tubo Yesu Kristo kiano ioluanou. Pol jiri mēsi nei ea bogo napano naio ba joa tanobuku na Masetonia, a Timoti jo yako Evesas.

Pol jiri mēsi nei ban Timoti berkanio ka vitikar ka verloglogiano sibisibi nalo napano amijikia amei joomo ea yimo lu. Verloglogiano sibisibi nei miyotuba ea jidomiano ga tai napano berinavo vite nonovio ea yetemeriba abova nonio. Tomu nalo na aberloglog tomu nalo ea iliano na sibisibiano nalo, aberinavo toro mijikia rivokar meuliano, verver ga naio mijikia verbulag kialo ililukuano nalo, a ajuvan sinaniano tealou a ajen sinaniano tealou ga napano memedu ka asenio, a mia naio maka soro, a vite tealou dolu jibena bereio.

Mia ea mēsi nei Pol berii bajago novo nalo napano namoneano nalo amijikia atakio ka ala lotuano, a ka

avitikar yimo lu. Mia naio ber bajago novo nalo napano navurum̃araboiano na yimo lu nalo a namoneano dolu nalo monoka atakio. Mia vite maariano napano Pol berenio, naio ber ka Timoti ber naio monoka rimei ve toro novo tai na Yesu Kristo kiano im̃auano. Naio berial bajago napano naio monoka toa naio bogo na naio to rivija taara dolu ninio na namoneano nalo napano naio to verlogloglo.

Tukunu nalo na niosi nei
Iliano moti 1:1-2

Verloglogiano ea tivelinio na yimo lu bija kialo navurum̃araboiano nalo 1:3—3:16

Iliano nalo na ijaiano ban Timoti ea kiano im̃auano 4:1—6:21

Iliano na be moti

¹ Nao Timoti, kiniou atēvi Pol nei nebivitauiā ea mēsi nei biedu banso, napano Atua na Ioruriano na kiado bija Kristo Yesu kiado siraragkuiano abitirilar kinioi ka noiṃau ka Ioluanou Vou na bo. ² Kiniou najaaro toru ka nevitavo easo bereio ea vio na, bior nabano nemialso jibe ka napano jau kobe keneriku riano tai joomo ea m̃aratavo na viekouoiano na kiado. Nojo nobolkouo biorso, ka Atua karam̃ado, bija Kristo Yesu Tubo na kiado, mia nalo aje tiniememiano, a tinieiano, a tum̃aro na kanalo to rivijaso.

Kotokovio von ka verloglogiano na sibilibiano nalo

³ Kiniou nojidom neverial bereio vanso vite nei napano kito roberiio beamu, bogo napano nojo bijaso yako Eveso, beamu ka napano nojo najaluvo ka navan ea Masetonia. Ka bogo na, roju remial ka napano veribinio tealoaju, romijikia batitiglo, tenene na neberinavo bo ka jau koto ga ea vio na beamu vo, ka kalavon ka koverbu-relo. Vite na naruei nojidom neverial vanso bereio, ka kotoa vio na beamu vo, bior napano nalo na, ajumña aberloglog vite nalo napano maka amemedu ga. ⁴ Bogo nonovio kialo jidomiano nalo ju bujo ka kialo tukunu moruo nalo, aaju tinielo jii ka averii ga torogio na kialo buo nalo re nuanua laka, mia bo ka atuvan vite nalo na tu. Iliano kinkin nalo na jibe na ju mila tomu nalo kialo jidomiano beve juo bereio, a maka ajikia aijalo leleio ka avokar meuliano na bo napano Atua naio jidom, napano romijikia rovokar ea moneano ea naio ga.

⁵ Tibe na bo ka kito roverburelo, ka rila na mia kido tomu nalo, kialo iviso mijikia rimeravo rivu, kialo jidomiano mijikia memedu rivu, a kialo viekouoiano veriano to, bior napano ver tibe na, mia bajago novo na tinietii kito naio mijikia rimei rive toru laka bure

kito bereio.

⁶ Mia vonganei naio bova, bior napano nalo na vio na tai, ajitiravo ajaluvo den mñarabo na bo nei, amiel ban ea mñarabo na ilivovuiano nalo. ⁷ Nalo abarvar kalo, a ajidom ka amei ave naverloglogiano na tuboiano lu, miaaju aber bulavulag sano iliano nalo na jikili nene, a maka ajikia vatitig rivu venia napano nalo ga bereio ajumña aberenio, maka ajikia aver bisivisii vatitiglo leleio.

Atua kiano tuboiano naio be tena venia?

⁸ Nalo naaju amila baravo ka Atua kiano tuboiano, mia kito romijikia ka tuboiano, ver kito ralaio rimemedu, naio be kiano burumñara imñauano nene. ⁹ Kito monoka rejikia ka tuboiano, maka avitirilar ka rijai tomu nalo napano amemedu ruei, mia ka rila kulo dolu nalo amemedu, tibe ka nalo namña amila korovio, bija nalo napano maka asidom aiagago kanio. Nalo na be nalo napano maka tiniel tii Atua, napano amila vite nalo napano naio maka sidomio, napano ajidom be iakurano ea vite lu nalo, napano pariparilo kirisikili ga, a napano amuebinvin karamñalo bija kenielo, ðeli na amuebinvin tomu dolu nalo. ¹⁰ Bija nalo nei, abe nalo namña amila siakiano, bija namña sumñano buru sumñano bereio ðeli tira buru tira bereio, bija nalo tai napano abina ka kiritete ka

añilñil kanio rivanu, a nalo na tena sibiano, bija bunu nalo napano aju amilavan kanalo beleano va nalo. Tuboiano nei naruei be kanalo, bija nalo napano ajuña amila bajago dolu nalo na bova na jibe na, bior napano nalo abijukudie toru laka ka kiado verloglogiano na bo. ¹¹ Nalo maka atakii leleio lilianiano novo napano kiado Atua lu novo kiano, napano naio mije monea kiniou ka neverial van kamiu.

Yesu kiano tiniememiano ban Pol

¹² Iñauano nei naio joa jumaku ka nala, mia nojidom never burumara siva van Kristo Yesu kiado Tubo. Naio naruei bitii kiaku meuliano, mialio ka nemijikia nebiekouo ea iñauano nei, naruei naio bitirilar kiniou ka nalaiio, mia monoka neverial ka naio ga jo mije moroano ban kiniou damariga ka neimauka tavukia napano naio jidomio. ¹³ Beamu, kiniou nebe toro tai napano ña nojo nomiuluolu niege-niegeio ea sio lu nei Yesu, a nojo nomila lelan naio toru, napano nojo nomila bova laka ea namoneano nalo na kanano, napano memedu ga ka naio rije mauo van kiniou riviorio. Mia makanio, naio bitilubario ka nojomña nemiel ea melijokouo ga, maka nomonea naio, maka nejikia vite venia napano ña nojo nemila, naruei

naio mila bo laka, be tiniememiano ka kiniou.

¹⁴ Jibe na, nemial ka napano kiado Atua naio mije kanano tiniememiano novo ban kiniou burutomoruo laka, mison kanaku meuliano ka viekouoiano a tinietiano napano be kiado robiniu napano robe takurano bija Yesu Kristo.

¹⁵ A iliano tai jo, napano romijikia ravarkar tiniedo eaio, napano bo ka aviniu ajev ea kialo meuliano, napano ber jibe nei, berinavo

Kristo Yesu naio batove yetano ea yetemeriba nei ka rilarur nakariano na vabe kiano meuliano.

Mia ea tomu nalo na ña amila kariano jibe na, nemial jibe ka kiniou nebe natukamuano kalo, kiniou nobova loa ka nalo abiniu, ¹⁶ mia siva ban Atua napano tinien miia kiniou. Nemial jibe ka maka nememedu ka naio viekokoa kiniou tibe na, napano nebe natukamuano na tomu na kariano nalo. Mia naio mila jibe na ka kiniou, ka mia tomu nalo amijikia avitilubario ka Yesu Kristo, kiano jidomiano tebievi laka ka naio rijikia tinien riia tomu nalo na bova. Naruei bogo napano nalo na aju ka amei iorou aialio ka napano Atua naio jaaro ka rivuru kiniou tibe na, mia rila nalo avitilubario ka nalo bunu amijikia amonea naio ka avokar meuliano napano maka ve jukuti nene.

¹⁷ Nojidomial kanano bajago novo nei mila nemi-aia naio, neberinavo naio be parinio Tubo ka bogo nalo re nua, a naio meul jobo jo. Naio joa vio nonovio mia toro maka rijikia rialio, naio takurano ga be Atua a maka dolu tai bereio. Tibe na, bo ka ravatove ka naio, rodu-lar siano rivano-o rijikia re ribisi bogo tai, mm.

Jau kotu sikili kojorjoru re

¹⁸ Timoti, nojo nemialso jibe kobe keneriku, a nojo nojidomial verialiano napano aberiiso beamu kiana, napano aberialso ban kiniou. Amila nebitilubarso ka jau kobe toro tai napano nemijikia navar tinieku easo. Tibe na, iliano tealó na teremi þeli verloglogiano tealó na tortoru ju, napano nojidom nesian moneaso. Iliano nalo na mia amijikia ala jau kesikili mēle ea mira lu na Atua napano rojuña romila, ¹⁹ bior napano mia aijaso ka kavakar vatitig bajago na viekouoiano, a amijikia ala napano kanamo jidomiano mijikia meravo tulaka.

Tomu tealó, jibe kaaju ajelan vuu ka uako, naruei kialo jidomiano na bo berial kalo ber mñarabo ninei, mia nalo maka asidom aiagago ka naio, ana amilaluvio, kanalo viekouoiano riva rivavin ea baraaña tai. ²⁰ Peli komijikia tomu juo nei Aemeneas bija Aleksada, naruei kiniou neberaia ka neverial ka tomu juo

nei ajibe na ruei. Amila bova banbano, maka asidom aiagago, ana nobuku bulaglo aban bereio ea Simñaro juñano, ana vede naljuo abitilubarío kiana vo ka atu re bunu ala bulag lu na Kristo siano tavukia napano ajumña amila.

2

Verloglogiano tealó ea tivelinio na amila lotuano

¹ Mo, kiniou neverial naverloglog-iano nalo nei naruei. Na be moti, nojunu kakar kamiú ka ea bogo na volkouano nalo, monoka aver siva van Atua riviorlo dolu nalo, a monoka kuvolkouo sikili rivior nalo, a monoka kuvika sikili den Atua ka riijailo. ² Nina monoka kuvila bunu ea tivelinio na tomu nalo na tortoru, jibe ka parinio tubo nalo bija navurimñaraboiano nalo napano aju mave ka kito, bior napano ver nalo aimñau rivu, mia rivu lie van kito. Mia romijikia rotua meuliano nabo, napano momavo a tuñaro joaio, a romijikia rala imñauano lu nonovio na Atua kanano, ea bajago novo jibe ka napano naio jidomio. ³ Bajago nalo na jibe na abo laka, naio be bajago napano Atua na ioruriano na kiado naio jaaro ka vitiio ka mirano, ⁴ bior napano naio jidom ka tomu nonovio avokar kiano ioruriano, naio jidom ka tomu nonovio ajikia kiano ilirianiano. ⁵ Maka ve mñarabo dolu, bior napano

naio takurano ga be Atua naio jo, a toro takurano ga naio mijikia rila kiado merevuiano rivija naio, nina be Kristo Yesu, ⁶napano naio binime i be toro, karna naio mijamo ka kiano meuliano bereio, midu jeleig kito, bul bulag tomu nonovio na yetemeriba den toro na bova juṁano.

Iṁauano nei napano Yesu naio miṁaukanio, naio mila Atua kanano verikariano nalo na beamu abinime i abe riano, amaluvo ea bogo nene memedu, ⁷naruei naio mijoru ea kinio u naruei ka neverial van tomu nalo. Vede tealo be tinielo ka nojo nemila sibi, mia makanio, neber be riano ga. Abitirilar kinio u jibe toro tai na bar iliano ṽeli na atevi tai, ka neverloglog taara na tomu nalo ea bajago na viekouoiano a ea ṁarabo na ilirianiano.

⁸ Bior jidomiano nalo na, nojidom ka tomu nalo monoka atu abolkouo tulaka ea vio nonovio, a bogo napano atumolu ka avolkouo monoka ave lu rivu, napano tiniemimiano maka toalo, siniabu maka to iviso ka nalo rivija tomu dolu.

Tire nalo kialo bajago

⁹ Ea tivelinio na tire nalo, kinio u nojidom ka bogo napano amei joomo ea yimo na lotuano, bo ka nalo ayovovu vatitigio ve kirinovo, mia maka rivu ka ava loa, monoka rivare ga ea vio lu napano aju aba joomo

eaio. Maka nosidom ka ala ṁlelea vijulo veve dolu nalo, ṽeli na atelan ṁlelea niogo nalo tanea niabelo nalo, a maka rivu ka avarvarlo ṁlelea kulumārauo napano abululo ka burumāra puruveru.

¹⁰ Vite takurano ga naio mijikia riovovualo rivu laka, nina be kanalo iṁauano novo nalo, napano amemedu ga ea tira kiano meuliano napano milotu ka Atua. ¹¹ Tire nalo monoka avatove rivu, atu melumu ka aiagago ka verloglogiano nalo napano aju aberialio ban tomu nalo.

¹² Maka noto najamo ka tire nalo averloglog sumano nalo, ṽeli na aje tuboiano mave loa nalo, mia monoka atu melumu ga. ¹³ Nina naio memedu ga, bior napano Atua jii toro na jukamu be Atam, karina tira nei Iv, ¹⁴ a maka ve Atam napano Siṁaro mijukubin naio, mia be Iv, naio be moti napano milakorov tuboiano.

¹⁵ Siṁaro mijukubin Iv, mia Atua tinien mija tira nalo keiano vo, jian iṁauano novo tai banlo, ka avar kiritete vou nalo amoluo ea yetemeriba nei. Ana ver tira tai, naio ve kiano viekouoiano, kiano bajago rivujo ka tinietiiiano, kiano meuliano rive lu vatitigio, a kiano jidomiano to tano, mia Atua naio risaaro ka rilario.

3

Navuriṁaraboiano nalo

na tum̃aro

¹ Ver toro tai, jidomiano tai toaio ka tiniẽno ka rudu sio na navurim̃araboiano, naio bo na, bior be riano, naio be im̃auano novo tai laka nei napano naio jo jidomiio ka rila. Naruei kanado navurim̃araboiano nalo, mia kiniou neverial ka nalo monoka ave toro na jum̃abe.

² Vite na jukamu, navurim̃ara-boiano naio monoka ve toro tai napano maka ve vite tai na bova toa kiano meuliano.

Mia naio monoka rivuru tira ve takurano ga, a rive riano tu laka vijaio.

Mia naio monoka telan vuu vatitig ka kiano bajago nalo, mia naio monoka ve masou, mia tomu nalo monoka aialerinio eaio, mia naio saaro ka rivitikar toro dolu ea kunuano, a mia monoka naio rijikia vatitig bajago na verloglogiano.

³ Bija vite nalo na, monoka ve toro napano maka tom̃a munu uei m̃elea mijorjoru tatei, mia naio maka tom̃a tukuruku, mia kiano jidomiano tebievi, mia kiano iviso melokloko. Naio monoka rila siniabure, mia monoka tinientii m̃elea re puruveru.

⁴ Mia tai bunu jibe nei, monoka rive tubo vatitig ka kiano vonuo,

napano kenerinio nalo aialerinio eaio, avatove kaio ea vite nonovio, ⁵ bior napano ver toro tai tibe na rijikia re rivitikar vatitig kiano vonuo, tum̃abe mia rijikia rivitikar vatitig Atua kiano tum̃aro?

⁶ Mia toro nene monoka rimeruo ve teliki, tibe ka naio rudu Kristo ea kiano meuliano jioi kija teliki ruei, ver makanio mia parinio rimei rivujo ka m̃arouano, rila naio rilaluvu m̃arabo, rijoru ea bulukuṽili napano Sim̃aro naio mijoru ban ea beamu.

⁷ Mia navurim̃araboiano na tum̃aro nalo monoka ave tomu napano tomu nonovio, riva rivokar nalo napano maka ave namoneano, nalo aberinavo nalo abe tomu na amemedu, bior napano Sim̃aro naio jo mila vio jikili ka rijukubino, naio jidom rila napano tomu nalo na be tinielo ka vovaiano tai joalo.

⁸ Ninei be navurim̃araboiano nalo, mia vonganei navan tivelinio ka ijaiano nalo. Toro napano naio bokar im̃auano na ijaiano, mia kiano jidomiano monoka rivamenea rivu,

mia naio be toro na beriliano na memedu ga, mia maka to ve minano ve juo.

Mia naio monoka to re

rimunu m̃arjum̃elm̃elu
bogo nonovio,
mia monoka naio sidom
m̃elea re vite nalo,

9 a mia naio monoka
rivokar sikili ga bajago
na viekouoiano ea
kanano iviso, jovulio
napano tomu dolu nalo
abokario.

10 Mia toro napano ka mia
naio rivokar iṃauano
na ijaiano, monoka avi-
tilubar naio rivu, alavon
naio beamu vo, mia ver
naio riṃau rivu, kiano
bajago bare ka iṃauano
nei, mo amijikia adu
siano ka riṃau.

11 Mia ijaiano koano bunu,
kiano jidomiano nalo
monoka rimelumu rivu,
a monoka to re m̃a
ilisol m̃ele rivan kulo
dolu nalo, mia monoka
ve tira na mijikia telan
vuu vatitigio ka kiano
bajago nalo, a monoka
viekouo ea iṃauano
nonovio.

12 Mia ijaiano nalo
monoka avuru tira ve
takurano ga, a ave riano
tu laka vijaio,

mia monoka ave tomu
nam̃a amijikia avuru
m̃arabo rivu ka keṇer-
ilo nalo, a amijikia
avitikar vatitig kialo
vonuo.

13 Mia ijaiano nalo nam̃a
abarlo vatitig bo ka kialo
iṃauano mia aialio
ka napano tomu nalo
asaaro ve toru kalo, a
mia ajog tibe ka Kristo
Yesu naio jo mijailo
ka mia amerou re ka
atumolu atu sikili ea

kialo iṃauano nei.

*Burum̃ara jidomiano
lukuano na kiado moneano
jo*

14 Timoti, nojidom
noviedu nealso vesiou re
ka noverial vite nalo na
rivanso, mia nomial jibe ka
bede ga, monoka novivitaui
ga rivanso beamu vo.

15 Vede vite tealō abokar
kiniou ea vio nei kiana
vo, mia nejidom ka jau
monoka kovokar soṑeli
verloglogiano nalo nei, ka
kojikia vatitig rivu bajago
nalo napano amemedu ka
alaio joomo ea m̃aratavo lu
na Tubo kanano. Maratavo
lu nei, be Atua napano meul
kiano namoneano nalo,
napano avokar sikili kiano
ilirianiano tulaka, tibe ka
burupati ivoniano na yimo
tai naio bokar jikili m̃arte
nalo nene. 16 Nao, kiado
lotuano naio jikili juaio ea
moneano tai napano naio
jibe ka vite na lukuano tai
napano bululuo bo, naio
temi batitigio laka. Kito rojo
roberial kiado moneano na
jibe na, roberinavo

Yesu, naio be Atua na-
pano miyotuba ea
yetemeriba nei ea
mokotenano toro,

Niununo kiano mo-
roano miṃau toru ea
naio, a nailiano nalo
aju bijaio,

aberial naio ba bokar
taara dolu na tomu
nalo, mila na amon-
monea naio janea vio
reraio ea yetemeriba,
karina Atua buru naio
bavin bereio ea kiano

burum̃ara mermer-
ano ea vio mave.

4

*Kovitikarso ka naver-
loglogiano nalo na jubol-
uboiano*

¹ Niununo Lu naio berial iliano tai naio meravo laka, napano naio berinavo ea bogo nalo na maaro, mia nalo tealo kalo nam̃a amonea beamu ruei, mia nalo aiagago ka niununo nalo na juboluboiano, mia atakisior siṃaro nalo kialo verloglogiano, ana rila avuro avan ea meuliano na maka memedu.

² Verloglogiano nalo na kiri niagiago tibe na, mia amalmaluvo ea tomu na jubolubo na m̃a be tinielo ka aber amijikia vite, mia kialo jidomiano nalo kiri bobogio jibe ka vovojulu. ³ Vite tealo napano mia averenio naio jibe nei, ka toro maka bunu rijikia soro, a mia ala veliano lu ve telabo ea sinaniano novo nalo napano Atua naio jiilo be sado ka romijikia rasaaro ka rejevio. Bior kito napano romonea a romijikia vite napano be riano, kito roju rejen julaka, roju reber siva ban naio biorio.

⁴ Naina bior napano vite nonovio nam̃a Atua jiio, maka rejikia rover naio bova, mia romial ka naio bo mia bo. Maka ve vite tai napano robitisaia naio, mia rajaaro ka rejev vite nonovio, rover siva van Atua rivior. ⁵ Ana bogo napano romila jibe na, mila na napano vite nalo nei

abinimei abe lu. Atua kiano iliano bija kiado volkouano mila ameravo ruei.

⁶ Verloglogiano nalo na, ver jau koverial naio rimeravo rivu van namoneano nalo, naio jibe ka napano jau koberialso ka jau toro novo tai a toro na viekouoiano na im̃auano Naverikariano Yesu. Tilikiti napano amial ka napano jau komim̃au jibe na, mia ajikia ka kobinimei mave ruei jibe ka toro tai napano naio meruo bo ea ilirianiano nalo na kiado viekouoiano. Mia avitulubarso ka napano jau bunu kojo kajakii vatitig verloglogiano novo nalo nei napano kojo koberial banlo, naruei mia nalo asaaro ve toru.

⁷ Ea tivelinio na tukunu moruo vovuiano nalo na beamu, napano aberii vite dedade nalo, maka ve kanamo vite tai toalo. Jau kotuvanlo atu bo, mia monoka kalakakarso kosikili rivu ea meuliano lu. ⁸ Tomu nalo tinielo jii ka alakakar niabelo asikil, mia nina naio bo ka tivelinio tealo, mia bogo napano jau kojo komilakakarso kosikili rivu ea meuliano lu, naio mia rila rivu lie vo ea tivelinio nonovio. Ea tivelinio na meuliano na baneĩ, meuliano lu naio mijikia rijaiso, a ea tivelinio na meuliano vou napano naio jo binimei iorou, mia meuliano lu naio rila kiamo m̃arabo ka kojikia kava jouro eaio.

⁹⁻¹⁰ Vite na kito roju robukudeli toru, romila bijon toru biorio, bior napano romije kiado jidomiano

monea Atua na meul naio takurano ga, napano naio be ioruriano na tomu nalo abiniu, jibe nalo napano amoneaio. Iliano nei naio be riano toru ga, komijikia komonea naio ka tiniemo momou.

¹¹ Kanaku iliano nalo nei napano nojo neber ka jau nei, naina naruei vite nalo napano jau monoka koverloglog ka kulo dolu nalo, kesikili kalo ka monoka ajogkario. ¹² Ver tomu tealo atu avitso rivova bior napano jau kobe mēaku ga, mia komerou re, koiṁau pīlinio ga. Lerinio jau kobe mēaku ga, mia jibe ka napano koje komila, monoka kesiloglog mārabo ka namoneano dolu nalo. Mia bo ka aue jaamo, napano koberloglog vatitiglo bo ea meuliano kirinovo, ea tivelinio na iliano, ea tivelinio na bajago novo, a ea tivelinio na tinietiano, viekouoiano, a meravoiano.

¹³ Rivan rivakar napano ver kiniou nemijikia namaluvo ka jau, kovakar sikili bogo na lotuano nalo. Kovuluku bulag iliano lu ea tomu nalo miralo, koioliolu, koverloglogio vanlo.

¹⁴ Jau tiniemo bobogia re moroano lu naṁa Atua jian banso ea bogo napano taara na vurimāraboiano nalo amioa parimo. Naverialiano tai ka bogo na, kiano iliano naio berial moroano nei be kanamo, naruei monoka kesikili ka koiṁau vija. ¹⁵ Jau monoka koto kalakakarso ea imauano napano mijoru joa

juṁamo, monoka kalavio sikili tulaka ka kalaio, naruei mia tomu nalo aviniu amijikia avitilubario ka koje kabano lie bija Atua ea kiamo meuliano. ¹⁶ Monoka kovitkar vatitigso rivu, a jau bunu monoka katakii batitig verloglogiano nalo naṁa koje kejian ban tomu dolu nalo. Ver jau kovokar rivu, mia kala napano jau kamlika nalo napano ajuṁa amiagago ka jau, kam nonovio kuvijikia kuvokar ioruriano.

5

Bajago na bo ka ala van namoneano nalo

¹ Timoti, ver jau keial tor-moruo tai rila vite tai na maka rimemedu, jau keil siniabu re rivanio. Jau komelokloko ga van naio, kala vanio tibe ka napano naio be karamāmo. Bo ka kala tibe na van nalo dolu bunu. Keial mēaku nalo atibe ka napano abe kuruamo, ² keial tiramoruo nalo atibe ka napano abe koniomo, a keial niatira nalo atibe ka napano abe kuviviniomo. Ver jau kala tibe na, mia kanamo jidomiano rimeravo rivu damariga.

Taanou nalo

³ Ea tivelinio na taanou nalo, kito na tumāro monoka roviaa vatitigio vanlo, monoka rovitikar rivu nalo napano aju abe terakurano ga, maka ve koalo tai ka rijailo. ⁴ Mia ver taanou tai keṁerinio nalo atu, pēli na kumābinio

nalo, mia nalo na naruei monoka avitikar naio. Ea marabo na, amijikia ala meran van naio vitikariano novo nalo a ijaiano napano naio mila banlo ea yuka nalo napano barlaka ruei. Nalo monoka avitilubario ka nina be imauano na memedu tai, p̃eli vite lu tai, ka ala van tai kalo napano memedu ka kialo m̃aratavo ga, a naio be bajago na bo tai napano Atua tiniene jii toru.

⁵ Taanou napano maka toro dolu tai rivitikar naio, napano nalo am̃arm̃aro nonio den naio banbano naio takurano ga jo, monoka naio jo bar tiniene ea Atua naio ga takurano. Naio mijikia to tiniene rimaio ka Atua legiano a bogiano ka rivolkouo rivanio naio ka riviti naio rivior vite venia napano naio jidom. ⁶ Mia ver taanou tai ver naio to sidomii ga ka seseiano na meuliano na yetemeriba nei, naio tibe ka napano naio m̃aro den Tubo ruei, javukia ga koano m̃aro den naio beamu ruei.

⁷ Nomijog ka kamiu namoneano nalo kumiṭu kumisidomii ka kuvila m̃arabo tai ka rijai taanou nalo. Nina bo laka, mia nomerou ka vede tealo avilvil ealo riviorio, mia nojidom nesian iliano nalo tai van kamiu ea tivelinio nei beamu vo.

⁸ Iliano na beamu, naio ber jibe na, berinavo ver namoneano nalo tai naio maka to vitikar batitig nalo na ea kiano yati, na toru nene, naio maka vitikar vatitig

nalo na ea kanano m̃aratavo memedu, toro na naio jibe ka napano naio maka ve toro tai na ve Kristo kiano. Naio kirivova laka, a kin-iou nemial naio jibe ka naio bova laka jovulu nalo napano maka amonmonea vo.

⁹ Mo juo nene, ea tivelinio na taanou nalo, naio jibe nei. Taara na taanou nalo napano mia tumaro naio rivitikarlo, taanou napano jidom ka siano riva joomo, monoka be tiramoru ga, jibe ka napano kiano yuka jikar ka bakar duelimo va ari [60] jo bavin.

Dolu nene, be tire napano mijoro vaarakurano ga, buru sum̃ano takurano ga, a be riano tu laka bi-jaio. ¹⁰ Bereio, naio monoka ve tira napano tomu nalo abitilubario ka naio mila im̃auano nalo bo laka, napano naio mia berloglog batitig kenerinio nalo, naio be tai napano naio jaaro ka rivitikar rivu toro dolu ea kunuano. Tilikiti napano namoneano lu dolu nalo abinimei amiadu ka naio, naio jekon jaalo, a naio jo bitiri bulag nalo napano amijoru ea jogvaiano tedade nalo. Tiramoru taanou napano naio mim̃au jikili ea im̃auano novo nalo na jibe na, naio naruei siano mijikia riva jouro.

¹¹ Mia ver taanou tealo atu napano maka ave tiramoru vo, bo ka jau kodu re sialo vo. Naina bior napano amijikia averikar van Kristo ka mia atu tibe na ga

vija naio rivokar jukuti na kialo meuliano, mia karina, maka vesiou, vede sidomiano na soriano binimej jikili laka bereio, naruei mia ailo ka taanou nei naio jumolu buru sumano tai bereio. ¹² Ver naio rila tibe na mia aial rivova kanio, bior napano naio milaluv kiano verikariano, naio mila korovio bereio. ¹³ Mo bija naina, mia taanou meaku nalo na amijikia aiovo, peli maka atu ala imauano na bo, miaaju amidu nono vio jeliviv, ajumia amalmaluvo ea tomu nalo kunualo, a mave ka nina ajumia amil ea kulo dolu nalo, ajumia amiyuku sunulo ban ea vite napano maka ve kanalo iliano naio to joomo eaio.

¹⁴ Naruei ea kiaku vitiiano, kiniou neber ka taanou napano nalo abe niatira kia ga vo, naio bo laka ka rajamo ka nalo asoro bereio ga, bo ka nalo avar kiritete, avitakar kialo vonuo nalo, naruei mia ve re titai napano tomu nalo amijikia atu ail rivova kalo riviorio. ¹⁵ Kiniou neber nina bior napano nalo tealo amilaluv marabo ruei,aju ajakii marabo na mariano napano aban kean Simaro.

¹⁶ Tibe na, ver kito tai naio ve namoneano tai, mia taanou tai joa kanano maratavo, naio ga monoka rijai batigio. Ver naio rila, mia tumaro naio rila bijon re naio bunu, mia naio mijikia rivitii ga taanou dolu nalo

napano maka ve toro tai ka rijailo.

Navurimaraboiano nalo na tumaro kialo veru

¹⁷⁻¹⁸ Ea tivelinio na ijaiano teliki napano rojumia rejian ban kiado navurimaraboiano nalo, kiniou neberii ban ea iliano juo na Iliano Lu. Tai berii bue marauo nalo napano roburulo amiel jeliviv mave ea bagaro na boboseru ka riviebove bulag kurukuti nene. Iliano na naio ber jibe nei berinavo

Jau koyorko re kanamo bue marauo niono napano naio jo biebove bulag kanamo boboseru, jau kajamo ka naio sen ve tertelisu rivano. Tiut 25:4

A iliano juo nene ber jibe nei
Toro napano naio mi mau, memedu ka naio rial titai rimej ea jumano rivior. Luka 10:7

Tibe na, bo ka kito rala bunu van navurimaraboiano na tumaro. A nalo napano mia amimau bo, a amimau jikili ka amioliolu ka Ioluanou na bo a ka aberloglog tomu nalo, bo ka nalo avar ve toru likiliki, rivan ve valuo.

¹⁹ Ver toro tai rimej riverial navuri-maraboiano tai, ver naio mila vite tai na bova napano monoka ail van naio ea komeli riviorio, iliano na toro takurano ga kanano naio maka rivare ka ver ala tibe na. Iliano na jibe na, monoka tomu

ve juo ĵeli ve tolu ka aikurukario, naruei amijikia adu rivan komeli. ²⁰ Mia ver navurim̃araboiano tai naio to rimom̃on rila kariano, mia jau monoka koverbure naio sikili ea taara na namoneano nalo miralo, naruei bogo napano navurim̃araboiano dolu nalo aialio, merouano rivokar vatitiglo ka maka rivu ka nalo bunu ajoru tibe na.

²¹ Kito juo remijikia ka Atua bija Kristo Yesu bija nailiano lu nalo na kanalo ajum̃a amial kito, naruei ea miralo kiniou neber ka jau ka kovokar vatitig kanaku iliano nalo na. A neber bunu ka bogo napano jau kojo komila vite nalo nei, jau kovitii re tomu nalo aveve dolu, mia monoka kala rive verare ga ka nalo aviniu.

²² Majigidulu tealo jibe nei, berinavo jau kala soĝeli re ka koyoa toro ka rimej ve navurim̃araboiano, mia kovitii kiano meuliano rivu beamu vo. Maka rivu ka mia kavan re vaataro ka kariano napano toro dolu naio joŃa mila, mia koto kuku ka kanamo iviso naio rimeravo, ve lu dam̃ariga.

²³ Javukia napano nojo nomijog, nemijikia ka jau kojoŃa komiemie tertelisu, naruei never ka jau komijikia kovelikar re na munuiano na m̃arjuŃelm̃elu. Jau koto komunu uei re ga, m̃ia kalavon ka komunu m̃arjuŃelm̃elu ve tertelisu

bogo tai, naruei vede naio mijikia rijai mabomo.

²⁴ Tai bunu jibe nei, berinavo tomu tealo, amila napano kialo kariano naio joa mirado medavo ga, naruei robitilubar ka mia avar vironiano riviorio. Mia tomu dolu nalo, amila napano kialo kariano naio joluku vatitigio jo, mia karina, naio bunu mia rimaluvo ea vio meravo iorou.

²⁵ A im̃auano novo nalo bunu ajibe na. Tealo ajua mirado kirimeravo bo, a tealo, ajoluku vatitigio bo, maka rejikia. Mia naio napano joluku jo, naio maka rijikia toluku bo kanio, mia naio bunu monoka rimaluvo ea mirano tomu nalo miralo.

6

Tomu nalo nam̃a amim̃au kurano ga toro tai kanano

¹ Nobivitau naruei ea tivelinio na kanado tomu nalo napanoaju napano maka ve kanalo titai, dam̃ariga ajua toro na toru tai ka aim̃au kanano kurano ga.

Meuliano na jibe na naio jikili, naio jibe ka napano vite na temi tai naio jorimaro ga ea taakalo, mia monoka aserni re ka kialo toro na toru, monoka aial naio tibe ka memedu ka avatove kanio. Ver ala tibe na, mia kialo toro na toru maka rijikia rivitii vova ea Atua siano napano joalo.

² Kiniou nemijikia ka tomu tealo napano amim̃au kurano ga jibe na, kialo tomu na tortoru bunu

amonmonea. Jibe na, toro na iñauano bija toro na toru naljuo abe kurualo ea Kristo, mia nina naio maka riverenio toro na iñauano naio mijikia sereserei ka toro na toru kiano iñauano. Peli monoka aimñau rivu lie vo tibe na, monoka asaaro ka aija toro namña aju amimñau kanano, bior napano naio be tai ea kialo taara na namoneano javukialo, a naio bunu be tai napano monoka tinielo tiio.

Verloglogiano lubolubo

Naina naruei be verloglogiano tai ka mia kotuvan rivan nalo dolu, napano mia monoka kotunukakarlo ka mia atakii vatitigio rivu.

³ Toro napano naio berloglog jakii jidomiano dolu, naio juvan iliano novo nalo na kiado Tubo Yesu Kristo, kiano iliano maka vare bija verloglogiano napano mijikia ridu toro kiano bajago binimej jibe ka Atua kiano bajago.

⁴ Toro napano naio jakii kiano jidomiano ba be dolu jibe na, kito romial naio, naio barka naio, naio parinio toru laka, mia naio maka rijikia titai leleio. Mia naio mila jibe ka toro tai na jidom mñlea baravoiano nalo, bija bajago kilkil, mia maka tonovo tai rimaluvo ea vio nene. Mia bajago na bova nalo amalmaluvo ea naio, jibe ka jokuano, juñe iliano, ilidieiano, bija jidomiano sorosoro na bova ka tomu dolu nalo. ⁵ Tomu nalo napano amila nina

aju abilvil ealo janea vio, napano jidomiano napano bo a iliano napano be riano naio maka bunu toalo leleio. A abano bova kitkiti lie vo, bior napano aju ajidom verver aiasol tumaro naio be mñrabo na bo ka avuru veru. ⁶ Mia maka tibe na, bior napano toro na kanano bajago naio bo jibe ka Atua kanano, a naio jaaro ga ka venia napano Atua jian banio ea kiano meuliano, toro na naruei naio buru vite novo tai napano naio bo laka ruei.

⁷ Bogo na kito romiyotuba ea yetemeriba nei, niabedo yauo ga robinimej, jumñado be teau ga, mia rotuvan bereio vare ga, maka ve titai napano romijikia ravarkario ravano. ⁸ Mia bogo napano roju romeul ea yetemeriba nei, ver releal sinaniano ve teliki vija kulumñarauo ve teliki rotukuloko kito, nina naio bare ruei, romijikia rasaaro ga, rojidom venia bereio?

⁹ Mia nalo napano ajidom mñlea vite nalo, ajidom ka ave sanibaiano, vede nalo maka avitulubario, mia ajua vio na juboluboiano ruei, Siñaro naio jo bokarlo ea kiano jukujukuanano nalo ruei.

Mia sidomsearoiani nalo napano amila lelan toro kiano meuliano amei ve telabo ealo, rivanvano adulo avan rivova laka, mia alaluv vite nonovio, a ava amadudu ea vio na vakovioiano.

¹⁰ Nao, bajago na sidom mñlea puruveru naio be bu-

rupati tai napano bajago va kinkin dolu nonovio mijikia maluvo eaio. Sidom mēlea ka rivar veru ve telabo naio jen kito tealo kialo iviso, a naio burulo amiel tertelisu abano, naruei amiilo napano amolmoluo nonovio den m̄arabo na viekouoiano ruei. Karina, abar jaleleano miroano biorio, a mila jogvaiano nalo bokarlo, naruei abitilubario vonga, ajido-mial bereio mia bova ga.

Bajago na bo

¹¹ Mia Timoti, jau kojibe ka Atua kiano toro tai riano, mia monoka kovilig taakamo ka juboluboiano nonovio na jibe na. Venia napano naio bo ka jau kodu toa meriniamo tulaka, naio be bajago na memeduardano, bajago napano toro naio rimej rivu tibe Atua, bajago na viekouoiano, bajago na tinietiano, bajago na vokar vatitig iñauano, a bajago na melumuiano.

¹² Jau monoka kotumolu kotu sikili ea mira lu na kanado moneano. Tiniemo bobogia re bogo napano kojumolu ea namoneano nalo telabo miralo, napano koberial kanamo verikariano novo na beamu nei. Atua naio bioso ka kodu meuliano nei napano maka rijikia ribisi, ana naio jian banso ea bogo nene, naruei monoka kovokar sikili rivu rivan rivano-o mia rijoru den re bereio jumamo.

¹³ Atua naio be burupati na meuliano na vite nonovio, a

Kristo Yesu, tilikiti napano abur naio ba ban toro na toru nei Pontas Pailat, mia naio maka rimerou, naio jikili ka ga berial kiano verbulagiano novo, naruei jibe ka napano kito juo rojua naljuo miralo, nojidom nesian burum̄ara iliano dolu tai vanso.

¹⁴ Kiniou neber jibe na, nejikili kaso ka jau monoka kovokar sikili vatitig Atua kiano iliano nalo, napano maka ve kanamo niamiamo tai p̄eli na kanamo beleano tai, riva vokar napano kiado Tubo Yesu Kristo naio riyotuba bereio. ¹⁵ Kiano yotubaiano na, mia naio riyotuba ka kito ea kiano bogo nene rimemedu, tibe ka napano Parinio Tubo Lu na mave naio jidom, bior napano Parinio Tubo Lu nene, naio takurano ga be tubo ka tubo kinkin nalo, naio be yoro na toru ka tomu na tortoru nonovio. ¹⁶ Naio takurano ga meul jo jobo jo nam̄ariga, napano naio jo joomo ea kiano burum̄ara mermerano napano joko naio ka toro rijikia re riva vaataro kanio, napano maka lele toro rial naio vo, a maka lele toro rijikia rial naio bogo tai. Kiado Atua nene, kito ravatove ka naio, a bo ka navenatuboiano ka vite nonovio na be kanano naio takurano ga, rivan rivano-o rijikia re ribisi bogo tai.

Namoneano nalo napano be kialo saba miroano

17 Be riano napano kito tealo, kialo veru nalo miroano, jumalo nalo bujovujo vatitig ka saba nalo. Nina naio bo ga, mia jau monoka koverlogloglo sikili ka avarvarlo mēle re, ave m̃arou re kalo bereio riviorio. A maka rivu ka avarkar tinielo ea ga kialo veru nene, napano vede bogo tai aiilo, aial riva kovio nonovio, mia monoka avarkar tinielo ea ga Atua. Naio ga be burupati na tonovo nalo nene, naio jo bar ijaiano toru ga amalmaluvo ka kito, miroano laka, ka ajai kito rasaaro mēle ea kiado meuliano.

18 Nalo napano jumalo bujo ka veru, kialo meuliano naio monoka rivujo vatitigio ka iñauano novo na aju amila bijaio. Maka asidomii ve toru ka monoka avokar vatitig veru nei na be kialo ga, mia bo ka asaaro ka avio ka van toro dolu napano kiano maka vare. 19 Verenio ajian ba jibe na, mia Atua mila napano aju amiyobijii kialo ilivuiano mave, jibe ka napano aju abitiri kunualo novo tai ju ka bogo na rimei. Ea m̃arabo na, aju aba amiyotuba ka avokar meuliano na be riano.

Iliano na maaro

20 Nao Timoti, kovokar vatitig rivu iliano novo nonovio napano neber biedu banso, napano nomidu joa jumamo ka kesian rivan lie vo.

Jau kava joomo re ea iliano nalo napano maka ajikia aija kanamo meuliano vija Atua. Tomu telabo aberloglog ka jikiaiano na yetemeriba ga, karina aberinavo kiado moneano, bija Atua kiano iliano lu, vite nalo napano maka ave riano ajuaio. Mia kialo jikiaiano na naio naruei maka rive riano ga, naio jubon lili kialo jidomiano bereio.

21 Tealo abokar vatitig masouano na yetemeriba nei, aju amioliolu vatitig janea vio, mia be vite tai ga, amilaluv m̃arabo na moneano napano amilaluv batitigio.

Kanaku iliano bisi ea vio na, naruei jibe ka bogo nonovio, kiniou nobolkouo ka Atua kiano tiniememiano naio to vijaso.

Kiniou, Pol.

Mesi Juo Napano Pol Bivitauiiao Ban TIMOTI Verialiano Moti

Tunukuano bulati na niosi nei

Mesi juo nene napano Pol jirio ba ban Timoti naio bujo ka iliano novo nalo ka rijai Timoti napano naio be kiano bilbilu mēaka napano jo mijai naio. Burumāra jidomiano ea mēsi nei, Pol ber ka Timoti ka sikili tu sikil ka riverial Yesu Kristo kiano ioluano vou. Mia naio ber kano, ber naio monoka rivakar sikili verloglogiano riano na ioluano vou nei, vija Verikariano Moruo. Naio ber ka Timoti ka to rila imāuiano nei bogo nonovio ka verloglog tomu nalo, bija rimāu ka rivur tomu nalo amei, be iakurano ga aver aiili rivova ka naio bija imāuiano na yimo lu na nai jo milaio.

Pol jidom Timoti ka rivan re riasol iliano vovu nalo bija baravoiano nalo na maka ajikia ala vite novo tai leleio, mia be tena rilabulag tomu nalo ga.

Ea mēsi nei bunu Pol ber ban Timoti taki bajago novo na kiano meuliano. Nine Pol kiano bajago na moneano a kiano bajago napano kiano jidomiano tebievi, a kiano bajago na tinienmiia tomu nalo, a kiano bajago napano naio bardulu bogokouo nalo

na tomu nalo amila naio mijog kirvova laka ea mokotenano, mia naio jokea berial ga Yesu Kristo kiano ioluano vou.

Torogio nalo na niosi nei Iliano moti 1:1-2

Pol miaia Atua bior Timoti bija mil ka verloglog naio 1:3—2:13

Pol jian ilikakariano ban Timoti 2:14—4:5

Pol berii naio bija kiano imāuano 4:6-18

Pol kiano iliano maariano 4:19-22

Iliano moti

¹ Koig keneriku Timoti, kiniou Pol nojo nebivitauia mēsi nei biedu banso, napano jibe ka Atua kiano sidomiano, naio bitirilar ruei kiniou nebinime i nebe atevi na Kristo Yesu kiano. Kristo Yesu nene naio be bulapati na meuliano nene napano Atua berkar ka nalo napano amonea naio.

² Timoti, kiaku volkouano ka mia karamādo Atua a Yesu Kristo kiado Tubo, naljuo adu burumāra tiniememiano, tinieiiiano a tumāroano to vijaso damāriga.

Iliano na sivaiano ban Atua

³ Jibe na napano korobiku nalo amila nua ruei binime i, kiniou nojomā nomila Atua kiano imāuano damāriga, nojomā nomilotu ka naio ea kiaku iviso momou. Ana ea legiano a bogiano, ea aura na volkouano nalo, nojo tinieku maio kaso, nojo

neber siva toru laka banio kaso. ⁴ Nojo nojidomii jogumiramo nalo na jogvaiano, ana mila na nojidom m̃lea ka monoka nevedu namaluvo kaso bereio. Ver nejikia neial bereio miramo ga, mia kiaku iviso saaro mia saaro! ⁵ Nojo nejidomii bunu kiamo viekouoiano riano, napano joa korobimora napano tiramoru Loes, karina joa koniomo na Yunis, a jibe napano nebitilubarioruei, vonganei mia joaso.

⁶ Naina naruei nojo nojidomii bunu ijaiano napano Atua mije banso bogo napano nomidu jum̃aku joa pariparimo ka nomioakoso. Nojidom never kaso mia kola re sebi na ijaiano nei rivatove, a mia jau monoka kala vilivili vatitigio rivu dam̃ariga. ⁷ Monoka tiniemo rimaio ka Niununo napano Atua jian ban kito, naio maka ve Niununo na morouano na kulorinio, a naio be Niununo na meroano, be Niununo na tiniememiano, a be Niununo na mila kulorinio naio rila vatitig kiano meuliano rimei memedu.

⁸ Verver be riano ka Niununo nei naio joa kiamo meuliano, jau koimou leleio re ka koverial Tubo kiano Ioluanu van tomu nalo, a koimou re ka koverial kalo ka be riano, ka jau kobe kiaku bilbilu novo tai. Nalo abuku kiniou ea yimo na tetavokoiano bior kiano im̃auano, mia koimou re ka kiniou kanio. Vite na mia kala, mia jau

monoka tiniemo saaro vija kiniou rivior jogvaiano na Ioluanu Vou, rivanvano-o rivokar venia na Atua kiano moroano milaso kobe verare ka koimaukanio. ⁹ Atua, naio milarur kitojuro ruei, a bio kitojuro ka reiel ea kiano m̃arabo na meuliano lu, mia bogo nonovio naio mijikia rijai kito. Nina maka bior ka kitojuro romim̃au kiano bo p̃eli kitojuro romila venia, mia naio mila miyotuba ea kiano jidomiano bija kiano tiniememiano novo ban kito. Kiano tiniememiano na, naio mila vatitigio jo bija Kristo Yesu beamu ruei, nua ea bogo na tikariano na kito tomu nalo na yetemeriba. ¹⁰ Mia tiniememiano nene jo jibe na banbano bokar vonganei kia navo, napano naio binime miyotuba ea yetemeriba, maluvo ea mirado jelea kiado naioruriano Kristo Yesu. Naio binime ea yetemeriba, naio mila nonovio moroano na m̃ariano binime be tekurano tai, a kiano Ioluanu Vou mila napano bogo na rojua yetemeriba kia navo, remijikia rejev meuliano na bo. A mila ka iorou, ana mia romijikia rava jouro bunu ea meuliano na mia maka rijikia ribisi bogo tai.

¹¹ Ioluanu nene, naio nei naruei napano Atua bitirilar kiniou nebe kiano naverialiano, nebe kiano atevi, nebe kiano naverloglogiano.

¹² Kiaku im̃auano nei naruei mila na kiniou nojo nabar bogo nalo napano jikirkili

joomo ea yimo na teta-vokoiano nei kanio, mia naio bo ga, naio maka ve titai ea kiniou. Maka noimou, bior nemijikia ka naina nomoneaio, naio be riano, a kiaku moneano ea naio jikili vatitigio ka venia na nomidu joa jumano, mia naio bokar vatitigio vokar bogoti na maaro.

¹³ Tibe nei Timoti, kiniou nojidom never kaso ka jau monoka katakii vatitig m̄arabo na iliano na memedu nalo na nejian banso, monoka kesikili kotu sikili ea Yesu Kristo bogo nonovio, a monoka kodu vatitig kiano tinietiano to rivujo ea kiamo meuliano. ¹⁴ Niununo Lu naio jo bujolou vatitig ea kiado iviso, mia kotuvan re ilivuiano nalo na naio midu jo vatitig ea kiamo meuliano ruei, a koto kovitkar vatitigio.

Pol berii Onesiporas

¹⁵ Kiniou nemijikia ka jau komijog ruei lilianiano tai na bova, napano namoneano nalo na tanobuku na toru ea vio Esia, nalo abilig taakalo ka kiniou ruei, a bija nalo na abe kiado bilbilu nalo, Paekelus bija Emojenis.

¹⁶ Mia kuruado novo nei Onesiporas, naio mila bo laka. Be iakurano ka nalo amiorkar kiniou ka m̄arimieni nalo na lakoiano nei, mia naio maka rimou ka rimei riyotuba ka kiniou, naio bitikar kiniou ea saba nalo miroano, ana nobolkouo ban Tubo ka naio rilivu ka naio rive toru rivija kiano bajulukuti nalo.

¹⁷ Naio binime i miyotuba Romo nei, maka vesiou lele vo mia naio milavio ka rial kiniou, banbano na naio binimei bokar kiniou ea vio nene. ¹⁸ Ana naio jo mila tenalo na bo ban kiniou bereio ea vio Romo nei, jibe ka ga napano naio mijai vatitig kiniou beamu ruei ka bogo napano nojo Eveso nua kia ga vo, jibe ka napano kumijikia vatitigio ruei. Naio bo ka kiniou jibe na, namonea ka mia Atua naio tinien tii naio ka bogoti maaro.

2

Yesu kiano toro na mira naio monoka rivar jogvaiano

¹ Keneriku Timoti, nojidom never kaso, bo ka kodu tiniememiano na Kristo Yesu kiano ve toru ea kiamo meuliano, a mia komijikia kosikili vatitig ka kotu bogo nonovio. ² Bogo telabo ruei jau komiagago ka kiaku iliano nalo na nojom̄a nober ea mirano tomu nalo, ana vonganei monoka keial tomu nalo tai na nalo abe viekariano ka im̄auano, kavar iliano nalo nei rivanlo, a iorou, ana nalo bunu amijikia averloglog lilian riva rivan tomu dolu nalo. ³ Kito tomu nalo na mira na Kristo Yesu kanano, mia kito rove terakurano, kanado bogo napano monoka roviviuo vija bogokouo to. Mia ver vonganei kiamo bogo, jau kajamo ka ga tibe ka togio na kiamo im̄auano tai.

⁴ Kalavon ka kosidomii vatitig tomu na mira. Kialo

iũaauano ka aue kialo toro na toru kiano uolu kanano moroano rivatove ga, mia maka atu aiasol lo ea iũaauano ninio nalo tibe napano tomu dolu nalo aju amila.

⁵ A kalavon ka kosidomii bunu m̃eaku nalo napano amila tikitiano. Nalo amilavon jikili ka atovulu, ka avokar kialo ijaiano tai, mia ver nalo amilakorov tuboiano, mia avuku bulaglo, maka ajikia avokar titai leleio.

⁶ Mia kosidomii bunu tomu nalo na amim̃auka tiniavio. Toro na mim̃au jikili mebijo toru, nina naruei toro napano bo ka naio rivar sinaniano eaio.

⁷ Saba nalo na kiniou nojom̃a neberenio, verver jau kosidomii vatitigio rivu kalo, mia Tubo riijaso ka kovokar kiano masouano nalo na bo a kiano jikiaiano nalo eaio.

Bo ka namoneano nalo asidomii Yesu tulaka

⁸ Ana nana monoka jau kosidomii loa kanio bogo nonovio, naio be Yesu Kristo. Naio miyotuba ea vio yetemeriba, miyotuba ea Tormoruo Parinio Tubo Teviti kiano yati, a iorou, amuebinio, karina naio meul bereio, jibe napano Ioluano Vou berenio. Nina Ioluano Vou napano nojo nomioliolu kanio, ⁹ a nina Ioluano Vou na nobokar jogvaiano toru kario ea vio na, nina mila na vonganei amiorkar niabeku nalo ka m̃arimieni nalo, jibe ka kiniou nebe toro tai na

bova na lakoroviano na tuboiano nalo. Mia be titai napano tomu nalo maka ajikia aiorkario, naio be Atua kiano iliano lu, ka naio jo kia jaluvo ba maka ajikia atukovio kanio.

¹⁰ Kiniou nojo tinieku miia toru tomu nalo napano Atua bijauia bulaglo, ka nalalo amei avokar meuliano selia Kristo Yesu. A jidomiano nei naruei mila na bogokouo ninio na nojo naban ea, nina nojo nobokar kiniou jikili ga ka noto nala vite nonovio, ka nalo bunu ajikia avokar mermerano na vio mave na maka rijikia ribisi bogo tai.

¹¹ Iouano tai berii tenei, kiano iliano nalo be riano laka, napano ber jibe nei, berinavo

“Verver ravan ea m̃ariano vija naio,
mia romeul vija naio.

¹² Verver rotu sikili ea bogokouo,
mia roje tuboiano vija naio.

Verver rovilig taakado ka naio,
mia naio tuvan kito,

¹³ a verver ralaluv kito rojoru,
mia naio to rivokar kito sikili to,

bior naio midular kito be kiano, ana naio maka rijikia rila sibi, naiomaka rijikia rivuklar kito bereio.”

Toro na bo ka rim̃au Atua kiano monoka rivokar sikili ilirianiano

14 Namoneano nalo napano aju, monoka koto koverlogloglo ka nalo tinielo ribobogia re tenalo nei. A jau monoka keil sikili vanlo ea Atua siano, ka mia nalo avilvil ea re bunu lo. Nalo aju tinielo jerlo ka nioti na iliano nalo jibe ka na nalo aju amila, maka atu ala titai na bo, a maka atu aija lele nalo dolu na aju amiagago.

15 Venia nalo na mā jau komijikia kala tibe ka toro na bo tai na imāu-ano na Atua kiano, monoka kala nonovio aviniu ka rivu laka ea kiano siraragiano. Verver koiṃau rivu tibe na naruei, ana mia maka kejikia koimou ka mārati na kiamo imāuano bario, a komijikia komei kove toro tai na naverloglogiano na ilirianiano na Atua kanano van tomu nalo, rimemedu a rivu.

16 Kovitkar vatitig rivu ka ilikurani-ano na tomu nalo ajumā aberverenio janea vio. Iliano nalo na jibe na maka ve tena toa namoneano nalo kialo jidomiano, bior amijikia avurulo avan lie vo ea bajago nalo napano Atua naio maka sidomiio. Bo ka kavan re vaataro ka tomu nalo na ajumā amila jibe na, 17 bior kialo iliano nalo na jibe na, naio jibe ka menko va tai, napano jo jer toro mokotenano maka rijikia rimei rivu bogo tai.

Nemial jibe monoka never ka tomjuo nei Aemeneas bija Vaelitas, naljuo jibe na kija ruei, 18 bior nalo ajaluvo den

mārabo na ilirianiano ruei, aju amioliolu ka kialo namoneano tai napano maka rive riano leleio. Nalo aju aber ka bogo maaro na yetemeriba, mia meuliano bereio den maariano to re bunu, bior ea kialo jidomiano, aber pēli Atua naio jo mila ruei, nina ea bogo na naio miṃau ea kiado meuliano. Mia bogo na aju amioliolu ka kialo sibiano nei, nalo aju amila niegeniege tomu nalo miroano kialo moneano, mila na kialo jidomiano beve juo bereio. 19 A jau bunu monoka komemebiju re, bior yimo napano Atua naio jo miṃaukanio, kiano bulapati burupati nalo ajikili aju jikili bo aju. Iliano nalo na ea Atua kiano Vivitauiano Lu aju, mia naljuo na memedu ka tivelinio napano nalo na ajuvan kito nei. Tai naio ber jibe nei, berinavo

Atua naio mijikia vatitigio kei nalo napano abe kiano,

mo juo nene, ber jibe nei, ber

Toro na midu Tubo ea kiano meuliano,

naio monoka tuvan bajago va nalo na mārabo na laiano na kariano kanano.

20 Kalavon ka kosidomii tomu na saba toru kialo yimo nalo na tortoru. Joomo ea yimo nalo nene, remijikia reial baju na sinaniano nalo, napano tealó, amiṃau kalo ea niogo pēli puruveru na miuvu, a tealó, amiṃau kalo

ea borotano ĵeli ea iesi ga. Nalo na amial lo bo, aju abio ka sinaniano ban ea kialo burumara jokoluolu nalo, a nalo dolu, aju ajinan janea vio ga. ²¹ Mia kito tomu nalo jibe na ga. Toro na mila kiano meuliano meravo bo, a be lu, a maka rimauka imauano na bova, mia kiano toro na toru rudu naio ka rimauka kiano imauano ve telabo napano bo ea mirano tomu nalo.

²² Verver kosidom ka jau kotibe na, monoka kotokovio ka tiniekariano nalo na jikili a tinieiano nalo na bova napano meaku nalo kialo jidomiano mijikia rivujo kanio. Jau monoka kalavio sikili ka kiamo meuliano rivujo ka memeduanu, a viekouoiano, a tinietiano, a tumaro, mia tibe na mia rivu laka vanso vija nalo dolu napano kene-miu jidomiano takurano, napano kumitu kubolkouo ka Tubo ka kiano ijaiano.

²³ Bogo telabo, tomu nalo amijikia ala baravo ka nalo ka kialo vite vovuiano ĵeli kialo jidomiano kinkin nalo, jibe ka maka ajikia vite. Bogo tai baravoiano nalo nei amijikia ava avokar napano nalo atuktuklo, ava dedade bereio, ana mia bo laka ka jau kava joomo re ea iliano nalo na jibe na. ²⁴ Toro na mimau kiado Tubo kiano imauano, naio monoka ve re toro na rila baravo ka toro dolu, mia monoka rivijuku rivu kalo, monoka rijikia marabo nalo na verlogloglo riva melmelumu. Naio monoka re tinieno mimi

soĵeli, a kiano jidomiano ve tebievi rivu kalo.

²⁵ Peli bogo tai mia nalo tealo tinielo ail die naio, ana ver naio rilavio ka rila kialo jidomiano to rimemedu, mia naio rimelumu rivanlo ga. Ea marabo na naruei ĵeli mia Atua mijikia rudu bogo ve telisu kalo ka avilig kialo jidomiano bereio, amijikia avokar kiano ilirianiano. ²⁶ Nalo napano jibe nei, Simaro jo bokarlo jikili ruei, naio jo mikurlo ka ala venia na naio jidom, ana ver amijikia avokar bereio kialo jikiaiano na bo, mia amijikia avuro den kiano saba a kiano sibiano nalo.

3

Bajago nalo na parilo jikili ka bogo na maaro

¹ Timoti, monoka tiniedo bobogia re ka ea bogo maaro nalo na, mia monoka bogokouo ve miroano ayotuba.

² Mia monoka tibe na ga, bior ka bogo na mia tomu nalo kialo bajago riva rivova lie vo. Ea bogo na, mia nalo tibe nei:

mia ave tomu na asidomii nalo ga bereio

mia asidomii ve toru ka veru

mia avarvar kalo a ave marou

mia ave tomu na baravo mia maka ajikia ajogkar iliano na korobido nalo kialo

mia maka ajikia aver siva ka vite tai

mia ajidomii be iakurano ga ka vite nalo na be lu

³ mia maka tiniel tii tomu nalo dolu

mia parilo jikili laka

mia amioluolu a amil bova ka vite nalo na bo

mia tiniel jer tomu nalo, atukulo

mia maka asidom tenalo na bo

⁴ mia ala sibilili kialo bil-bilu nalo

mia maka asidomial ka titai

mia ajidomii ka aber nalo ga abo

mia maka tiniel tii Atua, a tiniel jii meuliano novo venia na ajidomio,

⁵ a verver alavon ka avokar kija iñauano nalo na tertelisu na Yimo Lu, nina ea kuluniabelo ga, bior ka napano kialo meuliano berial ruei ka moneano ea Atua, kiano moroano riano na maka toalo leleio.

Nina naruei bajago nalo na tomu na bogoti na maaro kialo, a monoka koto rava vaataro re kalo.

⁶ Kiniou neber aua laka bunu ka tire nalo napano naverloglogiano nalo na sibiano nei aju ajeliviv ea kunualo. Tire nalo nene, tealo aju abar temiano na kialo kariano ruei, a tealo, jidomiano dolu nalo na jualo, mila mia bogo na tomu nalo abinimei bina ga jibe na, tire nalo nene tiniel ñaro laka, maka kialo moroano ka tokovio kalo.
⁷ Venia na tomu nalo nei aberiio, mia nalo amonea ga vonganei, a aju amila jibe na banbano mia maka lele

avokar jikiaiano na bo na Atua kiano ilirianiano.

⁸ Tomu nalo na aju abinimei nei, kiniou nemial lo ajibe ka uolu na ilirianiano memedu, jibe tormoruo Mosis kiano bogo re nua, napano naljuo nei Sanesi bija Sampres, abinimei aber-loglog niegeniege tomu nalo miroano kialo jidomiano. Iñauano na naruei tomu nalo na aju amila kia navo, napano kialo jidomiano bilig ba bova, maka bunu avokar kiado viekouoiano, a ajaluvo aban ea dolu.
⁹ Venia napano nalo amila, naio bova laka, mia bogo na avar vironiano nene mia riyotuba bogo tai navo, tibe ka na miyotuba ka naljuo na neber vonganei. Bogo tai, nalo aiilo ka kialo sibiano nalo riyotuba ea vio medave, mia tomu nalo avitulubario.

Pol kiano bajago novo nalo

¹⁰ Timoti, roju vio takurano bogo be ruei, mia nemi-jikia ka jau kobitikua vatitig kiniou. Jau komijikia kiniou jibe na, napano:

komijikia vatitig venia na nojomña neberloglog ka tomu nalo

komijikia vatitig kiaku bajago

komijikia vatitig venia na nojidom ka noimñauka ea kiaku meuliano

komial ka kiaku viekouoiano ea Kristo naio toru jumabe

komijikia ka kiaku jidomiano tebievi

komial ka tinieku jii toru
tomu dolu nalo

komijikia ka bogokouo na
vabe na binimei ea kin-
iou, mia nejikili noju ga

¹¹ komijikia vatitig vova-
iano nalo na kiaku uolu
nalo amila ban kiniau,
jibe ka ea komeli tolu
na tortoru nei Antioko,
Aekoniam, bija Listra

ana komijikia niabe jalele
na nabar ea juñalo ea
bogo nene.

Jogvaiano nalo nei ajikili
laka, mia nobokar kiniau
ga banbano nemial ka Tubo
naio binimei burular kiniau
den bogo na jogvaiano nalo
nei nonovio.

¹² Nao, kito nonovio
nalo napano rojidom Kristo
Yesu ka toa kito, ĩeli roje
meuliano na bo vija naio,
monoka rejikia ka mia ravar
jogvaiano ea kulo dolu nalo.

¹³ Nina naio bo ga, mia
jogvaiano dolu na jo na
bova, nina napano tomu
nalo na kirivova bija tomu
nalo na sibiano mia avario.
Vonganei aju amila bova
laka ruei, a mia ala rivova
tibe na rivan riva rivova
lie vo, rivan riva rivova
nonovio.

¹⁴ Mia jau Timoti, koiñau
ga vija jikiaiano nalo na
bo napano kobokar ruei, a
koiñau rivan tibe na vija
moneano nalo nabo napano
kejikili koju jikili vatitigio
eaio ruei. Tiniemo bobogu
ea re ka kumemi kei na-
pano nuberloglogso, ¹⁵ jikar
ea bogo napano jau telisu kia

ga vo ea kanamo vonuo, bin-
imei bokar banei, mia mila
na komijikia vatitig Niosi Lu,
na naio berloglog mñarabo
na ioruriano na tomu nalo
napano amonea Kristo Yesu.

¹⁶ Vivitauiano Lu nalo
nei, Atua Niununo joalo,
mia amijikia aija kito ve
toru laka. Nalo averloglog
vatitig kito rivu, alabon
kiado jidomiano, ala vatitig
kiado bajago, a ala kiado
meuliano rimei rimemedu
rivu, ¹⁷ rivanvano-o mia kito
Atua kiano tomu nalo romei
rovu a reve verare ka rala
kiano iñauano novo nalo.

4

*Pol mila ilivituniano ban
Timoti*

¹ Timoti, jibe ka kitojuo ro-
jua Atua mirano, a ea Kristo
Yesu siano, nebika denso ka
jau kovar vatitig tenalo tai
na nojidom nover kaso. Ki-
tojuo remijikia ka be kiado
Tubo, mia naio tibure nalo
na añarmñaro ruei vija nalo
na ameul, a kitojuo roju ro-
jidom temi laka ka kiano
liliuano bereio, vija kiano
navenatuboiano napano mia
naio rivitiri lario, naruei mia
monoka kojog vatitig iliano
nei rivu.

² Venia na ka jau kala
naio jibe nei: bogo nonovio
monoka jau koioliolu ka
Iliano Lu. Verver bogo
rivu ĩeli bogo rivova, mia
monoka kesikili kotu ka
koverialio. Monoka kalavon
ka kovuru tomu nalo,
monoka kovururiri nalo

napano aban ea m̃arabo dolu, a monoka kotunukakar nalo napano amonea.

Mia bogo na kala iṃauano nalo na, bogo nonovio kiamo jidomiano monoka rive tebievi rivu, mia maka lele kejikia tiniemo riṃaro ka koverlogloglo. ³ Bogo nalo aju abinimei ka mia tomu nalo maka asidom ka ajog verloglogiano nalo nabo, a mia tilinielo rivilulu bior jidomiano doldolu nalo, a mia atu avuru naverloglogiano ve miroano ka ṣeli mia amijikia aver tenalo na bo kalo ka ajog rivu kanio. ⁴ Mia nalo atuvan jog kariano na ilirianiano, a mia alaluvuio m̃arabo, ava atakisor tukunuano nalo na tomu nalo ga amiṃaukanio. ⁵ Mia jau monoka tibe na re, a kala kiamo jidomiano to melumu ga, kovokarso ea bogokouo, kala kiamo iṃauano ka koioliolu ka Ioluano Vou, a koiṃau takii venia na Atua bioso ka koiṃaukanio.

Pol mial vaataro ka auebin naio riṃaro naruei

⁶ Ea tivelinio na kiniou, nomijog jibe vonganei nebinimei vaataro ea juluvati, nebinimei ea vio tai na mia monoka nala sida ka kiaku meuliano rivior Ioluano Vou, nemial jibe kiaku bogo ka notuvan vio na naio jo binimei kiana ruei. ⁷ Mia naio bo ga, ka nemijikia ka kiniou nojo

nemila mira, nejikili vatitig bo; kiniou nejikiti, nejovulu nono bo; a kiniou nobokar moneano, maka notuvan bogo tai.

⁸ Tomu na memedu nalo na Tubo kiano mia nalo avokar batubatu lu, a be tinieku ka kiaku naio midu vatitigio jo mave ruei, ka mia rudu van kiniou ea legiano na maaro.

Ea bogo na, naio tibure tomu nalo rive memedu, a mia naio sian jidomiano van kito rovinu napano kido jidomiano naio jikili ka rasirarago kuku ka kiano rimeiduluiano.

Iliano na maaro

⁹ Timoti, kiniou nojidom laka ka kalavio sikili ka kalasopeli komei kean kiniou ea vio nei. ¹⁰ Kiniou nojidomso laka, kuruado nei Dimas, vite nalo na vio yetemeriba abur kiano jidomiano banbano buro ba Tesalonaika. Ea kiado dolu nalo, Kresens bunu jaluvo ba Kalesia, a Taitas maka bunu to vija kiniou, naio ba Telmasia. ¹¹ Bilbilu tai ga naio jo bija kiniou vonganei, nina be Luka. Ana verver jau komijikia keleal Mak, mia kovuruio rimei vijaso, bior nemial ka naio jo miija kiniou toru ea iṃauano na Tubo kiano napano nojidom nala. ¹² Tikikas, kiniou nemiila naio ba Eveso ruei.

¹³ Mia never kiaku tenalo tai, ver bogo na komei ea

vio nei, mia jau kovarlo amei. Kiaku kulukoti na niavo, nabar ju bija Karpas bogo na nojo Troas, a kiaku niosi nalo bunu a kiaku mēsi nalo, saba nalo na nojidom verver jau kavarlo amei.

¹⁴ Jau komijikia toro na miñauka tano ģili marau nei Aleksada, naio mila iliano bova telabo laka ban kiniou. Mia Tubo ga naio rivitii ka rila venia ka naio, ¹⁵ a monoka neverial ka kojikia ka naio jo mil die toru kiado Ioluano Vou, vonganei monoka kovitkar vatitigso ka naio.

¹⁶ Tomu nalo na tortoru na vio Romo nalo amila vioriano ka kiniou ea komeli vaarakurano ruei. Ea bogo na, bilbilu dolu nalo abiniu aburovuro, maka lele tai rimei to ka tivelinio na kiniou. Mia nina bo ga, bo verver Atua naio rila siniabu re kalo rivior. ¹⁷ Ea bogo na, Tubo naio takurano bija kiniou, mia nomijog jibe naio midu moroano toru ban kiniou, ana nejikili ka neberial vite nonovio na Ioluano Vou ea tomu nalo miralo, mila taara na nalo napano maka amonea Atua amijog. Ea bogo na, be riano, kiniou nojo joomo ea niono laeon ruei, mia naio midular kiniou denio bereio.

¹⁸ Maka nejikia mia noviniua venia na bova bereio, mia nomidu kiniou nojoa Tubo jumñano, ka naio mia rilarrur kiniou ka noto vija naio ea kiano vio na bo mave ea tiniabene, a bogo

nonovio mia kiniou neje bereio kanano mermerano vanio, rivano-o mia maka rijikia ribisi bogo tai. Mm.

¹⁹ Vite tealó bereio ka never, aua kover kavijo bo ģeli bogiano bo ka tira nei Prisila bija koano Akuila, a bunu van nalo na Onesiporas kiano torogio nalo.

²⁰ Erastas naio maka bunu rimei ea vio nei, naio jo Korin ga, a bogo na kumemi numitu nubinimei, nuboru Maelitas, ana Trovimas naio mie, nojuvan naio jobo ea vio na.

²¹ Timoti, nojidom laka vonganei ka jau komei soģeli ea vio nei, bior bogo na niavo jo binimei vaataro.

Nalo na vio nei aberinavo neverial kaso ka nalo aju tinielo maio kaso laka, nina Yubulus, Putensa, Linas, Klotia, bija bilbilu nalo dolu.

²² Namaaro ea vio na, neber Tubo to vija niunumo, kiano tiniememiano to vija kamiu kuviniu.

Kiniou, Pol.

Mesi Napano Pol Bivitauiāio Ban TAITAS Verialiano Moti

Tukunuano bulati na niosi nei

Taitas, naio be toro mēaku tai napano maka ve taara na Israel, mia naio bin-imei be namoneano, naruei jo jakisor Pol ka rijai naio ka imāuano na aberial Yesu Kristo kiano ioluano vou. Pol midu Taitas joa uleule nei Krit ka vitikar imāuano na yimo lu ea vio na, a naio bivitauiā mēsi nei ba ban naio ka verii vite tolu.

Nana be moti, Pol ber ban Taitas ka sidomkar bajago na navuri-māraoboiano nalo na yimo lu monoka atakiio. Naio ber jibena, bior ka tomu miroano na Krit, kialo bajago bija kialo meuliano maka rimemedu. Mia juo nene Pol berial māraobo ban Taitas napano naio monoka takiiō ka verloglog tomu nalo ea taara dolu nalo joomo ea yimo lu. Nina tormoruo nalo a tiramoruo nalo a mēaku nalo bija naimāuano kurano nalo. Mia naio berinavo tiramoruo nalo monoka averloglog tira mēaku nalo.

Mia maariano nene, Pol berial ban Taitas verloglogiano nalo napano naio monoka sian van tomu nalo, napano memedu ka namoneano nalo atakiio. Nalo monoka atu rivu vija tomu dolu nalo, a monoka ave bilbilu vatitig

vijalo napano maka atu ala baravo, bija tomu na yimo lu nalo monoka ave re terakurano.

Torogio nalo na niosi nei

Iliano moti 1:1-4

Navuri-māraoboiano nalo na yimo lu 1:5-16

Taara dolu nalo kialo imāuano joomo ea yimo lu 2:1-15

Iliano na verloglog tomu nalo 3:1-11

Iliano maariano 3:12-15

Pol ber ilivorvoruano ban Taitas

¹ Keneriku Taitas, kiniou Pol, najaaro laka ka nebiviuoso bereio ea mēsi nei, ea Atua siano, napano nebe toro na kiano imāuano, a ea Yesu Kristo siano, napano nebe kiano atevi.

Nojoa vio nei, nojo nomimāu kia ga vo bija tomu nalo napano Atua bijauia bulaglo ruei abe kiano, kar napano nojidom ka kialo viekouoiano rimei sikili lie, a kialo jikiaiano ea ilirianiano rimei ve toru lie vo. Verver tibe na, mia kialo bajago mijikia rimei memedu tibe ka bajago na Atua kiano tomu lu dolu nalo, ² a mia amijikia avokar meuliano napano maka rijikia ribisi bogo tai.

Kiado jidomiano ju jikili ruei ka mia kito rovakar meuliano na, kar napano Atua berkar nua beamu ka mia naio rila tibe na, a romijikia ka naio maka leleio rila sibi bogo tai. ³ Naio be kiado Atua na Ioruriano, ana bogo napano naio mial ka kiano

bogo memedu, naio midu kiano iliano maluvo ka rila kiado m̃arabo na meuliano, a vonganei midu joa kiniou ka nava noioliolu tanea vio.

⁴ Ana Taitas, nina naruei kiaku m̃esi bango. Nemi-also jibe jau kobe keneriku memedu napano kitojuo kiado viekouoiano ve takurano ga, mia kiaku volkouano karso naio ban jibe nei, ka Atua karam̃ado bija kiado Kristo Yesu na Ioruriano kialo tiniememiano a tum̃aroano to vijaso.

Taitas kiano im̃auano ea venuo nei Krit

⁵ Nebivitu biedu, nojidom nala iliano vitunu vanso ea im̃auano napano kojo komila ea Krit kia ga vo. Beamu laka, kitojuo naruei robe moti ka romidu ioluan binimeĩ ea vio nei, a bogo napano najaluvo, im̃auano na togio toru jo kiano vo, ana nomiduso kojo ka kala im̃auano nalo rimeĩ rivu lie beamu.

Jibe napano neber kaso ea bogo na, nojidom koselviv ea komeli nalo, koiousa tomu tealo ka nalo amei ave navurim̃araboiano lu.

⁶ Nalo na, monoka ave tomu napano maka tokoriano tai toa kialo meuliano, monoka asoro ka koalo tira ve takurano ga, napano aberiano tulaka bijaio, a kenerilo nalo, nalo bunu monoka amonea Yesu, maka lele rimemedu kito reial parilo nalo sikili, p̃eli atu atupe kialo tormoru juo kialo iliano. ⁷ Monoka tibe na bior

napano tomu na tortoru na tum̃aro, abe tomu na vitikariano na Atua kiano im̃auano lu, ana nalo monoka ave tomu na memedu. Nalo asidom̃i re ka aver nalo abe toro tai, nalo monoka tinielo mimi sopele re, nalo monoka amun m̃elea re uei na jikili, nalo ave re toro na tukurukuan, a nalo monoka asidom m̃elea re saba, maka leleio.

⁸ A ver tibe na, mia navurim̃ara-boiano kiano meuliano naio monoka mia tum̃abe? Bo ka naio vitikar valauo nalo ea kunuano, bija bajago novo nalo dolu na jibe nei. Bo ka naio rivuru vatitig im̃auano nalo, naio be masou laka, kiano jidomiano meravo bo, a naio jilanzuu bo ka kiano meuliano. ⁹ Ilirianiano nalo napano aberloglog ka naio, naio monoka rivakario sikili rivu, ka rila ka naio kija mijikia riverloglog lilie kanio rivano.

Kuvitkar ka namoneano sibilisibiano nalo

Tomu tealo aber p̃eli kiado moneano be sibi, mia kiado verloglogiano novo nalo mijikia rila kialo iliano nalo maka rijikia sikili tu rivu leleio.

¹⁰ Tomu telabo nalo aju napano maka asidom ajog kito, ana aju amil miroano laka, ana aju amila dede ga ka avuru tomu dolu kialo jidomiano rive dolu. Ea Krit na, kitojuo rajaaro toru ka tomu miroano na

Ju napano roburulo abin-
imei abe Yesu kiano tomu
nalo, mia vonganei nalo dolu
nei ajidom ka avurulo avan
rivova bereio. ¹¹ Jibe na,
bo ka titai tokovio ka niolo,
napano nalo aju amila bulag
nono m̃aratavo tealo ruei.
Nalo aju aberloglog tenalo
napano maka amemedu ka
averiio, a nalo aju amila
dede ga laka ka alaio, maka
rivior jidomiano novo, a kar
jidomiano va nei ga ka p̃eli
nalo ajikia avar veru ve
telisu kario.

¹² Ver p̃eli tomu nalo na
Krit, kialo bajago jibe nei ga,
bior toro tai ka rivivitau ea
tukunuano re nua, napano
naio be toro tai na kialo
vio memedu, bogo tai naio
beriilo, berinavo

Tomu na Krit nalo abe
tomu na sibiano, nalo
abova jovulu kiribue,
nalo abe tomu na
yoviano, nalo abe
tomu na ajidomii
mabolo ga.

¹³ Toro nene, kiano il-
iano na jikili kija, a nemial
jibe p̃eli be riano ga na,
ana bo ver koil sikili vanlo,
ver p̃eli, mia kialo moneano
maka leleio rijikia rime
rimemedu rivu bogo tai.

¹⁴ Vonganei, nalo aju abokar
jikili kulo Ju re beamu kialo
tukunuano moruo nalo, a
nalo aju ajaaro ka tomu
tortoru dolu nalo kialo il-
iano napano nalo aju abuku-
lar ilirianiano, a kar venia
nalo maka asidom amon-
monea Atua kiano iliano lu
novo nalo napano roju re-
jian banlo?

¹⁵ Toro napano kiano
jidomiano meravo bo laka,
tenalo napano miagiago
maka rijikia rila kiano
jidomiano rime riagiago,
mia saba nonovio meravo
bo ka naio. Ana toro napano
maka rimonmonea, napano
kiano jidomiano miagiago,
p̃eli titai meravo, mia maka
rila kiano jidomiano rime
meravo, mia maka bunu
titai napano meravo bo ka
naio. Nina bior napano
kiano jidomiano a kiano
iviso nalo aba abova ruei.

¹⁶ Tomu nalo napano nojo
nebivitaui nei, nalo aju
aberial ka nalo amijikia
Atua, a kialo im̃auano
nalo na amila meravo ban
kito ka nalo maka ajikia
leleio. Kialo iviso minunu
a mijalele, parilo kirisikili
laka, nalo maka avare ka ala
im̃auano novo tai leleio.

2

*Verloglogiano novo mila
bajago novo miyotuba*

¹ A Taitas, nemijikia
ka mia kotibe na re, a
mia monoka koto koverial
kalo iliano nalo napano
amemedu ka verloglogiano
na memedu nalo.

² Iliano tealo na resian
van tormoruo nalo jibe nei,
ber nalo monoka aikulkul re
atu sikili m̃ariga, a bo ka
asidomii ve temi ka kialo
meuliano, bija kialo jidomi-
ano ve masou vatitigio. Ea
tivelinio na amonea Yesu, ea
tivelinio na tinietii toro dolu,
a ea tivelinio na sikili tu
ea im̃auano, monoka avujo

ka bajago na memedu bogo nonovio.

³ Tiramoruo nalo bunu kialo iliano tealo jibe nei ju, ber monoka avujo ka bajago na abatove ka Atua, nalo maka atu ail vova tanea vio van nalo dolu, a jidomiano ka amun uei na jikili maka rivakar m̃elealo. Im̃auano napano bo ka ala naio tibe na, monoka averloglog ka nalo dolu tenalo venia na bo ka aim̃aukanio. ⁴ Toru ea telikiti na tira m̃eaku nalo napano ajojoro vonga, nalo monoka averlogloglo ka m̃arabo vu nalo ka asidom vatitig koalo nalo vija kenerilo nalo. ⁵ Tiramoruo nalo nei, kialo jidomiano nalo monoka ave masou, kialo meuliano nalo monoka rimeravo, monoka avitkar vatitig kunualo nalo, kialo iviso abe tiniememi, a nalo aju abatove ka koalo nalo. Verver nalo ala tenalo nei, mia tomu nalo avitilubar ka Atua kiano iliano napano berial m̃arabo novo nalo nei, naio be vivitauiano lu tai napano bo laka.

⁶ Ea bajago nei kia ga vo, nojidom ka kosikili ka tete m̃eaku nalo, ka monoka atilanvuu vatitig ka kialo meuliano. ⁷ Bo ver bogo nalo aialso, nalo aial napano kojo komieliel beamu ka nalo ea m̃arabo na meuliano napano bo, napano bujo ka im̃auano novo nalo, ana nalo amijikia aue jaamo ea jaalo.

Venia napano koverloglog ka nalo, monoka toa kiamo meuliano ruei, a monoka amijikia avitilubar ka jau

bunu kojo kojidomii temi bereio eaio.

⁸ Venia napano amijog ka kojo koberial, monoka iliano nalo napano mia nalo maka ajikia ail vanso bereio kario. Ver tibe na, tomu nalo napano aserm̃i ka kito, mia nalo alavon ka atukovio ka kito, ana mia nalo ava ave vovu ga, mia maka bunu kialo iliano nalo napano mijikia sikili tu.

⁹ Ea tivelinio na nalo napano amim̃au kurano toro na toru kiano, monoka kala ajikia vatitigio ka nalo monoka avatove ka naio, a nalo monoka asikil ka ala napano naio mijikia saaro ka im̃auano napano amila be kiano. Nalo maka ajikia ailkuei van naio bereio, ¹⁰ a maka rivu nalo asidomii ka amijikia avina van kiano tenalo tertelisu tai rive kialo. Nalo monoka ave riano vu laka, ka ala napano kialo toro na toru mijikia rimonmonealo ka kiano tenalo nonovio. Bogo napano namoneano nalo aim̃au memedu rivu tibe na, amijikia ala kiado verloglogiano ea telikiti na kiado Atua na Ioruriano binimei mave toru laka ea kulo dolu nalo kialo vitiiano.

¹¹ Bo ka tomu nalo avitilubar kiado moneano, bior napano Atua naio be tiniememi ea yetemeriba nei, jian ioruriano maluvo ea taara nalo na tomu nonovio nalo.

¹² Naruei kito napano robakario, robitilubar napano Atua jo berloglog kito ka kiado meuliano,

ka monoka rotuvan bajago va na tomu napano maka ajikia naio, a monoka rovilig taakado ka sidom vovaiano nalo na yetemeriba nei. Yetemeriba nei naruei naio be vio napano romeul rojuao, a kiado meuliano monoka melumu rivu, monoka memedu, monoka rivare ka Atua kiano tomu nalo. ¹³ Monoka rotu tibe na ga, monoka rotu rorea ga bogo na bo napano kiado jidomiano joaio, napano kiado burumbara Atua, kiado Naioruriano Yesu Kristo mia maluvo eaio, bija kiano burumbara miamoiano. ¹⁴ Naio naruei napano mijamo ka kiano burukija miou kar kito, buru bulag kito den moroano na vovaiano, jekon kito romeravo robinimei robe taara lu tai ka rovar ka kito ka imauano novo nalo jibe napano naio jidomio.

¹⁵ Iliano nalo na naruei mia koto koverialio. Toro napano bo ka atunukakar naio, jau kotunukakario, a toro napano bo ka ail van naio, jau koil vanio. Bogo nonovio jau koimau vija moroano a sikiliano, a jau kotuvan re ka ailkueso p̄eli asidomii iakurano easo.

3

Bajagvuiano na toro napano naio monea Yesu Kristo

¹ Bo jau koverloglog namoneano nalo ka asidomii bogo nonovio bajagvuiano ka alaio. Ea tilikiti na tubo nalo kialo, bija kialo tomu na tortoru nalo, napano

aju, nalo monoka avame-nealo, amonealo, a asaaro ka ala kialo imauano novo nonovio. ² Mia jau monoka koverlogloglo bunu, ka nalo na, nalo maka ka atu averii niegeniegelo bereio, a maka rivu ka ava jouro ea baravoiano nalo. A bajago napano nalo monoka ala ka toro dolu naio jibe nei, ka nalo monoka amelumu, nalo ala re bajago napano ajikili, a monoka ala burumbara vameneano bogo nonovio.

³ Iliano nalo jibe na abe kiado robiniu, kar napano maka nalo dolu ga, ana beamu nua, kito bunu rojua meuliano va. Kito romila vovu ban Atua, a kito romila parido jikili ka naio. Bajago va buru bova kito banbano-o robinimei robe toro na jo yetano ka moroano na sidomivaiano nalo a saariano va na yetemeriba. Ea bogo na, sado sinani-ano na bogoti bogo nonovio naio be tiniemimiano bija tiniekakariano nalo. Kiado iviso jermii tomu dolu nalo, a mave kanio, roju rejermi kito bereio.

⁴ Kito rojua meuliano va jibe nei banbano-o, a iorou, Atua kiado Naioruriano, kiano tinievuiano a tinietiano novo maluvo ea kito, ⁵ naio milarur riano ga kito. Naio milarur kito jibe nei, maka kar kiado imauano tealoo na memedu napano p̄eli kito romilaio, mia bior ga kiano tiniememiano lu ea kito.

Naio tinien miia kito, ana naio jekon kito, mia Niu-nuno Lu mila kito romoluo bereio ea meuliano vou.
⁶ Yesu Kristo kiado Ioruriano kiano burukija miou jovuko kito.

⁷ Naina naruei m̃arabo na kiano tiniememiano, kito robinimeĩ romemedu bo ruei ea mirano. Mia maka naina ga, mia mave kanio, naio mila kito robinimeĩ robe kenerinio nalo, napano mia romijikia rovar buron kiano jajum̃ano napano mia jian ban kito, naina meuliano napano maka rijikia ribisi.

⁸ Siva toru kanio, iliano nalo na be riano laka.

Pol junukakar Taitas

Nojidom ka jau kosikili ka Atua kiano namoneano nalo ka nalo avokar vatitig iliano nalo nei, a monoka nalo alavon sikili bogo nonovio ka avokar iñauano novo nalo, napano amemedu, a napano amijikia aija kulo dolu nalo. ⁹ Bogo tai aju aberver iliano kurano nalo napano maka ajikia aija toro kiano meuliano, jibe napano aju amila baravo vovu ea jidomiano nalo napano maka ve sinaniano tai toaio, p̃eli aju amila baravo kar korobilo kialo saba nalo napano abokar vatitig sialo ju. Bogo tai aju amiolualo, banbano-o bokar napano kialo jidomiano mijikia tiburevure bunu ea iliano nalo napano Atua kiano tuboiano berenio. Mia bo ka

kover ka namoneano nalo ka avuron re lo vija iliano nalo na jibe nei.

¹⁰ Ver toro tai to riasosolio, jo jupe iliano bogo nonovio, amijikia ail vanio ea bogo tai, ver makanio bogo ve valuo, a ver naio maka sidomial, jo mila duio ka mila, bo ka nalo avior re bunu vija naio ea tenalo tai.

¹¹ Kito romijikia tomu nalo jibe na ruei, ka kialo meuliano nalo bilig bova, a kialo jidomiano nalo bujo ka kariano. Maka kito napano rober ka naio bova, mia kiano iñauano nalo ga berial kiano vovaiano ea mirado robiniu.

Iliano maariano nalo

¹² Taitas, nojidom nov-erenio kaso ka ver jau keial napano neiila tomjuo nei Atemas a Tijikas nalo tinene rimaluvo easo, ea bogo na naruei jau komijikia kataluvo ea vio na, komila vio jikili ka komei keial kiniou ea Nikopolis. Nina bior napano maka ve sio, mia nataluvo den vio nei, nojidom nava notoa vio na riva rivokar bogo na niavo rivar laka ruei.

¹³ Naljuo dolu nei napano aju bijaso vonganei, naina toro na tuboiano neibano Sinas, bija Apolos, mia kolavon ka naljuo amijikia adu kialo m̃arabo ave juo bereio ve sio re, ka avan lie ea vio dolu nalo. Aua, jau kojai naljuo ka vaio napano jum̃alo bulati kanio.

14 Joaso bunu ka ko-tunukakar kiado tomu nalo tibe napano neber vonga, nalo monoka alavon sikili ka avar in̄auano novo nalo. Verver tibe na, bogo napano titai na iloiano, a nalo be kialo vite nalo ruei napano mijikia riijailo, a mila bunu napano kialo meuliano mijikia rivar m̄arati lie vo tibe napano Atua jidomio.

15 Nalo napano aju bija kiniou vonganei aberenio kavijo bo p̄eli bogiano bo banso. A bilbilu nalo napano aju bijaso napano aju ajidomii kumemi ka kito roviniu ea taara na kiado moneano ve takurano, aua kover kalo ka kumemi bunu numitu numisidomiilo.

Kiaku volkouano ka mia Atua kiano tiniememiano to vija kamiu kuviniu tulaka.

Kiniou, Pol.

Mesi Napano Pol Bivitauiaio Ban VAILIMON Verialiano Moti

Tukunuano bulati na niosi nei

Vailimon naio be namoneano tai, napano tomu miroano ajidom naio be toro tai na yimo lu na rove Kolosi, a naio be tubo na naimāuano tai na siano Onesimas. Onesimas buro nua den kiano tubo Vailimon, ba jo yako Romo, bururvenuo na Pol joa nalakioano eaio na naio biviuo Pol, a bogo na naio binime be namoneano. Pol jiri mēsi tai ba ban Vailimon, bika naio ka monoka rivuru Onesimas rivan bere to vija naio bereio. Pol ber ban Vailimon, ber vonigane Onesimas binime be namoneano ruei, mia bo ka naio tinien ser re naio, mia viekokoa naio a rivuru bere naio ka ve kiano naimāuano kurano bereio. A mia naio ve re ga naimāuano kurano, rime be kurano riano tai bior napano naljuo amiasol ea Yesu Kristo.

*Torogio nalo na niosi nei
Iliano moti 1-3*

Pol miaia Vailimon bior
kiano imāuano 4-7

Pol bika kirisikili ban Vailimon ka rivuru bereio
Onesimas 8-22

Iliano maariano 23-25

*Pol jikar kiano iliano ban
Vailimon*

¹ Kiniou Pol, nojomā ne-jirii mēsi nei biedu banso, Vailimon. Vonganei kiniou nojoa komeli labo na vio Romo, mia bior nojomā nemila imāuano napano Yesu Kristo kiano, tenene na nalo amila kiniou nojoa yimo na tetavokoiano ea vio nei. Kuruado nei Timoti naio jo bija kiniou ea vio nei, naruei kumemi juo nuber kavijo bo pēli na bogiano bo banso, napano kito tolu romimāu ea ga Tubo takurano ga, ² a kumemi juo kenememi iliano nei jibe nei naio rivan bunu kuviviniedo na, Niavia, a van bunu toro na kiado bagaro na, Akipas, napano naio be toro kouo na mira na Tubo kiano imāuano, bija bagaro na namoneano dolu nalo napano ajumā abior ea kunuamo.

³ Naruei kumemi juo nubolkouo ka mia Atua Karamādo, a kiado Tubo Yesu Kristo, nalo ve juo adu kialo tiniememiano a tumaroano to vija kamiū ea vio napano kumituaio.

*Vailimon kiano tinietiano
a viekouoiano toru laka*

⁴ Kuruaku Vailimon, bogo napano nojomā nejidomialso ea kanaku ilivol-kouano nalo, bogo nonovio nojomā nober siva damariga ban Atua biorso. ⁵ Nina bior nomijog ruei ka napano ajumā aberii kanamo bajago novo, napano kanamo viekouoiano ea Tubo Yesu naio jikili vatitigio bo, a kanamo tinietiano ban

namoneano nalo bunu, naio toru laka. ⁶ Ana nojomā nobolkouo kaso ka bogo napano kojomā kobiovio bulag kiamo viekouoiano ban kulo dolu nalo, mia rila nalo ajikia ve telabo lie vo ilivuiano novo nalo napano romijevio, napano romidu Kristo ea kiado meuliano. ⁷ Nao, Vailimon, kanamo tinjetiiiano novo na naio jomā mila namoneano lu nalo, kialo iviso amijog bo o mia, mia bogo napano nomijog vite nei mila kiniou nomijog bo bereio, a mila najaaro toru kanio.

Pol balea Vailimon ka naio rivuru bereio kiano toro na iñauano nei Onesimas

⁸ Nao Vailimon, kiniou nejidom novika titai denso. Ea burumāara iñauano na Kristo kiano napano nojomā nemilaio, pēli memedu ga ka mia kiniou never batitig ga ka jau ka mia jau kala tibe na tibe na, ⁹ mia takii bajago na tinjetiiiano, maka nesidom neil sikili tibe na vanso. Vonganei nebinimeinei nebe tormoruo ruei, nojoa yimo na tetavokoiano bior Yesu Kristo, naruei nejidom nevika denso ga, verenio jau kajaaro ka kajamo ka vite napano ver nevika denso.

¹⁰ Mia toro tai joa vio na, ka bogo napano nojoa yimo na tetavokoiano jibe na naruei ana nobur toro nene binimeinei ea Kristo, mia vonganei nojo nemial naio jibe ka keneriku tai. Toro nene, Onesimas ga, napano beamu

naio be toro napano jomā miñau kanamo, karina naio buro binimeinei ea vio nei. ¹¹ Nao, toro nene, siano nioti nene be “Rila iñauano na bo,” mia nemial jibe ka nanua beamu, naio maka tomā rimāu batitig kanamo rivu laka. Mia vonganei, napano kiano meuliano mijulio ruei, mia kiniou nomononea naio ka mia naio mijikia rila iñauano novo nalo ka mia riijaso, a naio mijikia rila iñauano ka mia rijai kiniou bunu.

¹² Mo, vonganei nejidom neila bereio Onesimas riviedu rialso bereio naruei, jibe ka nomidular kiaku meuliano togio ga nemiila biedu banso. ¹³ Najaaro ver naio toa vio nei vija kiniou ga, ka rijai kiniou ea bogokouo nei, napano kiniou nojoa yimo na tetavokoiano bior Ioluano Vou, mia ver naio rila tibe na, javukia napano naio midu jelemo, naio mila iñauano tai napano memedu ka mia jau kala van kiniou. ¹⁴ Mia maka rivu ka mia nesikili kanio ka mia naio to vija kiniou tibe na, bior jau maka kejikia. Nejidom ka vere jau kala iñauano novo tai tibe na van kiniou, mia nina maka bior notutuaso kanio, mia bior kanamo jidomiano novo a kanamo tinievuiano ga. Venia napano mia Onesimas naio rilaio, ve kanamo ga ka mia jau koverialio.

¹⁵ Riano ga ka napano Onesimas naio buro denso, ana mia kei rijikia, pēli Atua

ga mila naio jaluvo denso ka bogo na bulati tai jibe na, ka vere naio riviedu easo bereio, mia naio ve kiamo bo kanio naruei, rivano-o mia to toboto. ¹⁶ Nina bior vonganei, mia naio riviedu easo bereio maka bunu tibe ka toro na kiamo im̃auano ga, mia naio riviedu bereio tibe kanio kuruamo tai ea Yesu, napano jibe na naruei naio bo laka. Tinieku jii naio toru ruei, jibe ka kuruaku tai, ana nomonmonea ka mia jau tiniemo tii naio riva lie riva lie vo laka, bior naio be kanamo toro ruei, ana mave kanio, vonganei naio binimeis be kuruamo bunu.

¹⁷ Vite na naruei nojom̃a nobika denso. Ver jau komial nejibe ka kuruamo, a ka robe juo robe tomu na romila im̃auano takurano ga, nejidom ka mia kovuru bereio Onesimas riviedu easo, rive verare ga ka napano ver neviedu easo, mia jau kasaaro ve toru laka ka mia kovuru kiniou neviedu ea kunuamo. ¹⁸ Mia vero Onesimas bina ka kiamo titai, p̃eli na naio mila bulag kiamo vite tai, p̃eli na vaio, mia kiniou ga nevitiis vite nalo nene.

¹⁹ Iliano nei kiniou Pol nei nojom̃a nejiriii ka jum̃aku ga, javukia kanaku verikariano tai banso, ka ver kosidomii, mia kiniou novulu bulag nonovio kiano jabue denso. Mia p̃eli jau kotom̃a kosidomii ve dolu kia ga ka jau bunu be kiamo

jabue tai napano toru joa kiniou, napano be kanamo meuliano vodolu, bior kiniou nemilaso kobokar meuliano nei ea bogo napano nomioliolu ka Ioluano Vou banso. ²⁰ Tibe na, ana mia nejidom ka jau kala im̃auano novo na rivan kiniou napano nojom̃a nebika denso ea Tubo siano. Kuruaku liki, ver kala tibe na, mia nojog rivu ve toru laka bereio ea kiaku iviso, napano Kristo kiano meuliano novo naio jom̃a mĩm̃au ea kiado meuliano nalo jibe na.

²¹ Maka nemerou ka netiri iliano nalo nei vanso tibe na, bior nemijikia batitig ruei ka napano mia kala takii napano nebika denso. Nao, nemijikia bunu ka p̃eli mia kala rivu lie bunu, rivano-o mia tovulu kanaku vitiiano.

²² A nejidom nevika vite dolu tai denso bunu, ka neber bo kaso ka kala batitig kiaku vajoomo tai ea kunuamo, bior kiniou nebe kiaku jidomiano kouo tai ka vesiou re, mia Atua naio rijamo ka neviedu ea kamiu bereio, javukia napano kumitur̃a kubika denio ea kenemiu volkouano nalo.

Pol kiano iliano maaro ban Vailimon

²³ Epavras nei, napano naio bunu kumemi juo numitua yimo na tetavokoiano ea vio nei bior Yesu Kristo, naio berenio Atua riilivu ka jau. ²⁴ Ana nalo dolu

na, Mak a Arestakas a
Timas a Luka, napano nalo
ajuña amijai kiniou toru ea
iñauano, nalo bunu aber
ajuña tinielo maio kaso ea
kanalo volkouano nalo.

²⁵ Mia vonganei, kanaku
volkouano jibe nei, ber
tiniememiano napano Tubo
Yesu Kristo kanano, naio toa
kenemiu iviso nalo nonovio.

Kiniou, Pol.

Mesi Napano Ban Namoneano Nalo Na ABE KULO JU Verialiano Moti

Tukunuano bulati na niosi nei

Toro napano jiri mēsi nei, naio jirio ba ban taara tai na namoneano nalo napano aju abiniua bogokouo ea kialo meuliano, bior napano tomu nalo na maka ave namoneano aju amilkueilo. Bajago nei napano tomu nalo na aju amilkuei ealo laka mila na nalo amial jikili, a vaataro atuvan kialo moneano ea Yesu Kristo. Naruei toro nei ber kalo ber monoka asikil atu sikili ea kialo moneano nene. Naio ber kalo ber Yesu Kristo ga naio be toro napano jiloglog Atua ban kito. A ka verial vite nei, naio berii vite tolu.

Vite na be moti, Yesu be Atua Kenerinio riano, a mia naio to bogo nonovio rivano maka rijikia ribisi. Mia be riano laka napano be Atua Kenerinio, mia naio mila kakar nioniag na bajago nei napano naio monea Atua, ea vite nalo na amila mijog bova eaio. Naruei bior napano naio be Atua Kenerinio, naio jo loa liei naverialiano nalo, a agelo nalo, bija bunu Mosis.

Vite juo nene, Atua berial ruei ka Yesu, naio be Parinio toro lu napano mia to o-o maka rijikia ribisi. Naio be

Parinio Toro Lu napano loa laka ka toro lu nalo re nua.

Mia vite tolu nene, ea Yesu kiano imauano napano naio be Parinio Tubo naio m̃aro ka rilarur tomu nalo, bar bulag kialo kariano nalo milalo maka bunu amerou, a jian meuliano napano maka rijikia ribisi banlo. Sida nalo re nua abe kijokijo ga na sida napano Yesu Kristo milaio.

Ea mirano duelimo ba tai [11] toro na jiri mēsi nei, naio berii tomu tealo na Verikariano Moruo napano amonea Atua kirisikili. Mia naio ber ka tomu nalo napano bivitauia mēsi nei ba banlo, ber boka atakii kialo kijokijo nei, ka ajikia atu sikili bogo nonovio. Mia ea mirano duelimo ba juo [12], naio ber banlo, ber monoka asikil atu sikili ea kialo moneano, rivano-o rivokar juluvati na kialo meuliano. Mia bogo nonovio monoka aviti Yesu, ka amijikia avardulu bogokouo nalo, napano nalo aju abokario ea tomu nalo na aju amila jikili laka banlo. Mia ka rila nonovio kiano iliano, naio mil vatitig ban kiano tomu nalo, berkakar banlo ka monoka avitigar vatitig kialo meuliano.

Torogio nalo na niosi nei
Iliano moti, Kristo berial
Atua ban kito 1:1-3
Kristo loa laka ka agelo
nalo 1:4—2:18
Kristo loa laka ka Mosis
naio Yosua 3:1—4:13
Kristo loa laka ka parinio
toro lu nalo 4:14—7:28
Verikariano vou loa laka
ka verikariano moruo
8:1—9:28

Sida napano Kristo mila
loa laka ka sida re nua
nalo 10:1-31

Bajago na moneano bo
laka 11:1—12:29

Iliano nalo napano ka rila
tomu nalo asikil atu sik-
ili, bija iliano maariano
13:1-25

*Yesu naio loa laka ka
naverialiano nalo*

¹ Bilbilu Ju nalo, beamu
beamu laka binime, ea
m̄arabo telabo a ea bajago
kinkin nene nalo, Atua
na naio jom̄a berial kiano
iliano vatelabo ban kiado
tormoru nalo, binime ea
kiano naverialiano nalo.

² Mia voniganei, ea legiano
na maaro nalo na kito
rojua nei, naio mil ban kito
jel ea kenerinio memedu
Yesu. Kenerinio nene naruei
napano beamu, ea tiiano na
yetemeriba nei, Atua miñau
eaio, ana na nalojuo ajii
bogo nalo a vio nonovio,
avona iorou kanio ana na
Atua naio bitirilar kenerinio
nei, naio mije vite nonovio
monea jum̄ano be parinio
kalo.

³ Kenerinio nene
nei, Atua kiano mermerano
mereralii kiano meuliano,
jibe ka napano naio bar
nonovio Atua mirano-o mia
memedu garuei, naio be
tovorovo na Atua kiano
bajago. A moroano na kiano
iliano naio jikili laka, naio
ga bokar masosoua vite
nonovio nalo na yetemeriba
nei bija vio dolu nalo bunu
aju bo. A bereio, naio naruei
mijamo ka naio binime
milakon nono kiado kariano
nalo biniu, mia bogo na mila

nonovio kiano iñauano na
yetemeriba nei, ana naio
bavin bereio tiniabene, ba
jotano tivelinio vameruo na
karam̄ano jum̄ano, napano
be Barago na tiniabene.

*Yesu naio loa laka ka nail-
iano nalo*

⁴ Yesu jotano jibe na, naio
toru mave loa ka nailiano
nalo napano m̄a aju, bior
siano na midu bior kiano
iñauano naio bo laka loa
sialo. ⁵ Verver kito reial ea
vivitauiano lu nalo, iliano
miroano napano ju na m̄a
aberenio Atua mila kener-
inio naio loa lie vo ka nail-
iano nalo. Ea iliano nalo
nei tai kalo, Atua mil ban
kiano Naverikariano, naio
berinavo

*“Jau na, kiniou namial jibe
ka banei jau kobinime
kobe keneriku riano, a
kiniou nebe karam̄amo
riano.” Iouano 2:7*

A tai bereio jibe na bunu,
naio berinavo

*“Mia kiniou nemei neve
karam̄ano, a mia naio
rive keneriku.” 2Sam
7:14*

Iliano juo nei, Atua maka
lele river ka kiano nailiano
nalo nei tai, river naio be
kenerinio lu, mia ber ka Yesu
ga. ⁶ Ana be iliano tai bereio,
na naio berii bogo na Atua
jidom riila kenerinio motoru
nene rime, ea yetemeriba
nei, ana na naio berenio

*“Mo bo ka nailiano
nonovio alotu ka
naio.” Tiut 32:43*

⁷ Mo tivelinio ka nailiano
nalo, nalo amila iñauano na
bo telabo, naruei Iliano Lu
beriilo berenio

“Atua kiano nailiano nalo, abar kiano iliano, ajibe ka jegi, amirñau Atua kanano, ajibe ka sebi.” Iouano 104:4

⁸ Mia bogo na Iliano Lu ber Atua kenerinio, ber naio loa laka ka nailiano nalo, beriio jibena ka naio bevirare ka Atua, bio naio ka Atua. Berii naio berinavo

“Atua o, kanamo vio lu na mña kojojo tanea mia naio ritobo to. Nasitogo na kiamo navenatuboiano, na bajago memedu.

⁹ Jau kajaaro mñele ka bajago na bo, mia maka kosidom keial bajago na kirivova, naruei na kanamo Atua Soñi midu larso kojo mave kojo loa ka kanamo bilbilu nalo,

naio mila buruñara saariano banso jibe ka amiovovuaso batitig ka bonotanunu maraiu tai.” Iouano 45:6-7

¹⁰ Ana ea iliano tai bereio, romial ka napano Atua Soñi bio kenerinio berenio Tubo, a naio berii vite nalo na mña naio milalo, berinavo

“Tubo, jau na naruei jau kobitirilar burupati na yetemeriba, juñamo ga mirmñauka vio iauo mave.

¹¹ Vite nalo nei, mia amdagdago, rivanvano-o mia avavakovio, mia jau kotobo koto.

¹² Tavukia mñadayebe moruo tai, mia jau kojukilo a keyabulaglo, a tavukia kanamo mñada

kulumñarauo tai, mia jau kovarvar bulaglo, ana mia jau koto kove terivou damñariga, mia kanamo yuka nalo mia ribisi re bogo tai.”

Iouano 102:25-27

¹³ Mia bereio, Atua kiano iliano dolu tai naio jo, napano maka leleio river ka kiano nailiano tai, mia naio berka kenerinio naio takurano ga, naio berinavo

“Jau koto tano ea jumñaku tivelinio vameruo, jau koto tibena, rivanvano-o mia nala kiamo uolu nalo amei atavukia mñadayebe tai na mña kovijankon jaamo eaio.” Iouano 110:1

¹⁴ Naina naruei be iliano na maaro ea tivelinio nei, na mña berii jumñabe ka Atua kiano nailiano nalo na aimñau kanano ga, nalo abe niununo nalo na mña abar kanano iliano, a nalo na ka mña ajai kito na mña rojev ioruriano, mia be toro tai jo napano naio loa lievo kalo, nina naio be Kenerinio Lu na Yesu, napano Atua mil maariano ban kito eaio.

2

Ioluano Vou na bo na Yesu kanano naio loa lie ka Mosis kiano tuboiano moruo

¹ Ver tibena, iliano riano novo nalo na Ioluano Vou na bo na mña kito rojuñna romijogio ruei, mia monoka rosidomii vetemii lievo kalo, monoka rovokarlo sikili rivu, ver pñeli na, mia vier rivuru kito reielalo denlo bereio. ² Tivelinio na

tuboiano moruo re nua, nailiano nalo ga amidu binimej, mia iliano nene nalo amemedu ga bo, a ajikili. Nalakokoroviano na iliano nene nonovio, a jog volvoliano nonovio nene, sano mauo nene memedu jo ruei.

3 Mia voniganei, Ioluanou Vou na bo na terivou naio binimej bokar kito ruei, mia naio toru lie loa ka Tuboiano moruo na beamu. Jibena, ver kito rosidomii kurano ea marabo na kiado ioruriano napano joaio, mia maka rejikia rovuro den kanano vironiano leleio. Kanado Tubo nene naruei naio mila Ioluanou Vou na bo naio miyotuba jukamu, mia nalo na ma amijog naio ka ma berialio ea tilinielo nalo, nalo kija aberial sosolio binimej boru ea kito, amila meravo ka be riano.

4 Mia Atua bunu miija iliano nei, napano ma mila vremesiano ninio nalo, a vite na vameneano nalo, a imauano nalo na kiano moroano, mia mave ka nina, naio biovio ka bulagio Niu-nuno Lu kiano ijaiano nalo ban kito kei napano naio jidom rudu vanio. Ana na kito romial vite nalo nei ana romijikia ka Ioluanou Vou na bo na Yesu Kristo kiano naio be iliano tai napano bo-o laka loa ka tuboiano moruo na kito kulo Ju kiado.

Yesu be tubo ka yetemeriba na mia rimej navo

5 Kito romijikia ka Yesu naio loa lie ka nailiano nalo

bior ea tivelinio na yetemeriba na to rimej keano, mia Atua rudu re kiano nailiano nalo ka ave tubo eaio, mia naio rudu totano yetano ka kenerinio. ⁶ Vite na nios moruo berenio bunu, ea Barago Teviti kiano iliano tai napano berka Atua, naio berinavo

“?Vite novo venia na joa toro, mila na jau kojidomii melea naio jibe na?”

?Pelina venia mila na jau kojoma komiyotuba ka kulorinio kenerinio?

7 *Beamu, jau komidu naio jotano ka nailiano nalo, mia nina naio be tena bogo bulati ga, mia voniganei, jau kobitirilar naio bereio ruei,*

jau komidu naio joa vio na loa laka tai mave bija kiano burumara mermerano a kiano marouano,

8 *jau kabar vite nonovio ajutano ka kiano moroano.” Iouano 8:4-6*

Mia bogo na Atua mila kiano toro be parinio ka vite nonovio, mila na maka ve titai leleio napano naio maka rive tubo kalo. Naio mila ka mia tibena, mia binimej bokar vonganei, mia maka reial ka mirado vo ka vite nonovio nalo na yetemeriba nei naio rivokar jeleigio na Atua naio jidomii kanio. ⁹ Mia vite nalo naio makanio vo, mia damariga kito rotu resirarago ka Yesu, napano Atua bitirilar naio loa loa laka. Beamu, Atua naio tinien miia kito toru

laka, ana na naio miila Yesu naio batove telisu ka bogo tai ga, mila naio batove yetano ka nailiano nalo, ana mila naio jen tanea jogvaiano napano m̃aro ka kito nonovio, mia iorou kanio, ana naio bitirilar naio bereio, miyovovua batitig naio bo bija mermerano na vio mave.

Yesu naio be kiado ioruriano, naio be kiado parinio toro lu

¹⁰ Atua kiano bajago na iṃauano na ka naio rilarur kito naio memedu, bior naio jii vite nonovio, a vite nonovio be kiano, naruei naio jidom ka mia naio tovulu meran bereio burum̃ara taara na kenerinio nalo ataluvo den yetemeriba nei, amei ave kiano bereio. Naio jidom ka rila tibena, mia ka riṃauka tibena naio kirisikili laka, naruei naio mial m̃arabo tai ga ka rilaio, naio jibenei: be Yesu kiano m̃arabo na jogvaiano, napano mia Atua mila naio binime i be toro, naio be toro na m̃a je dulu m̃arabo ka tovulu kiado ioruriano.

¹¹ Yesu naio mijikia tukamu ka kito tibena bior naio na m̃a milakon kito romeravo, mila na naio jaaro ka rial kito tibe ka robe m̃aratavo takurano ga kitoliko naio.

¹² Kiano iliano tolu ban Atua ber jibenei. Tai joa niosi na Iouano, naio ber jibenei, naio berinavo

“Mia kiniou naverial siamo na bo van kuruaku nalo, mia kiniou navameneaso

tukamu ka kulorinio nalo.” Iouano 22:22

¹³ Mia dolu nene naio berial ka Yesu naio monea Atua jibeka na kito romonea naio, be iliano na joa naverialiano Aisea, naio berinavo

“Kiniou nei, kanaku monmoneano nomidu joa naio.” Ais 8:17

Mia nana maariano, iliano tai bereio ea Aisea, naio ber Yesu bija kuruano nalo, naio berinavo

“Ninei be kiniou nene nei nojo nei kumemliko Atua kenerinio dolu nalo napano naio barlo ajua juṃaku.” Ais 8:18

¹⁴ Mia kito robiniu robe Atua kenerinio nalo kia nei, kito robiniu robe kulorinio, bija niabedo a kiado burukija, mia ka Yesu rime i rive kuruado be riano, naio binime i ea yetemeriba nei, midu niabene a kiano burukija jibe ka kito ga. Tibena, mia bogo na naio mijamo ka bereio, naio m̃aro bior kito, naruei kiano m̃ariano nei naio muelar moroano na parinio tubo na kirisikili na m̃ariano kiano, nina be Siṃaro.

¹⁵ Naio muelar Siṃaro kiano moroano, ana naio mijubar bulag teli nalo na merouano na m̃ariano na amiorkakar tanea niegeniege kito, napano mila kito romijog bova biorio ea kiado meuliano momou.

¹⁶ Riano ga na, Yesu kiano iṃauano novo na ijaiano nene, naio maka rila rivan nailiano nalo na vio mave, mia naio mila ban kito tomu na yetemeriba nei.

Iliano telabo na m̃a aber vite na jibena, aberinavo

“Naio jom̃a miija batitig tormoruo Epraamo kiano bajulukuti nalo.”

Ais 41:8-9

¹⁷ Naina naruei be Atua kiano jidom-iano naio jibenei. Naio mial bo ka mia Yesu naio rimei tibeka ga kito kuruano nalo ea vite nonovio, rivanvano-o mia mijikia rijikia vatitig kito rivu, naio mijikia tinien riia kito. Ana mia kito ravarkar tiniedo ea naio, ka mia naio riviekouo ea iṃauano na mia naio rila van Atua rivior kanado kariano nalo, napano naio mila kiado merevuiano bija Atua, jibeka naio be kiado parinio toro lu. ¹⁸ Naio mial burum̃ara lavoniano na miyotuba ka kiano meuliano, naio mijog bova bano-o na naio jovulio, mila naruei naio mijikia rijai vatitig kito bereio rivu ka bogo na lavoniano naio binimej jikili bunu ka kito.

3

Yesu naio loa laka ka tormoruo Mosis

¹ Kuruaku a kuvivinioku lu nalo, na m̃a kamiu kumonea vioano na mave ruei, kiniou neber ruei ka kamiu ka Yesu naio mijikia rijai vatitig kito rivu, mia naruei nejikili ka kamiu, nejidom na ver bo ka kuvilavon ka kuvisidomial naio lie vo, tibeka na naio be atevi a naio be parinio toro lu na kanado moneano.

² Ralavon ka revitii vatitig

Yesu naljuo tormoruo Mosis re nua nei. Tormoruo Mosis re nua, naio biekouo laka ea kiano iṃauano ea Atua kiano m̃aratavo, a Yesu bunu naio biekouo laka ea kiano iṃauano, na m̃a Atua bitirilar naio ka rilaio. ³ Nalo abe juo abiekouo ea iṃauano, mia Atua bitirilar Yesu naio loa lie laka ka Mosis, bior naio jibeka na Mosis naio jo joomo ea Atua kunuano naio jom̃a mila kiano iṃauano sesa nalo eaio, mia iṃauano na toru ka avitirilar yimo nei, Yesu naio takurano miṃaukanio.

⁴ Yimo nonovio, monoka ve toro tai na ka m̃a riim̃aukanio, ana Yesu nene naruei naio miṃauka Atua kunuano, mia Atua naio be parinio ka iṃauano na ga. ⁵ Jibena, Mosis naio be toro na iṃauano, na kirimemedu bo ea kiano iṃauano nonovio na jouro ea Atua kiano m̃aratavo, rivanvano-o rivokar ka na m̃a naio be toro na m̃a berverial Atua kiano iliano nalo na burutomormoruo na m̃a ajum̃a aberial lilianlo binimej bokar voniganei, ⁶ mia Kristo naio mila lievo, bior ka naio biekouo ka rivitikar iṃauano na burutomoluo nonovio ea yimo nei, jibeka na naio be kenerinio motoru kar garuei ka naio be napano boru na yimo nene.

?Ana yimo nei naio jom̃a ber venia, p̃elina ber kei? Naio jo ber kito ga, bior ka na ver romerou re, a ver rajaa-ro ka kiano verikariano nalo, rovokar

vatitig rivu kiado verikario
ealo, mia kito rove kiano
m̃aratavo lu memedu.

*Yesu naio loa ka Mosis,
a kito monoka romonea van
lievo tuvulu nalo na Mosis
jukamu kalo*

⁷ Be iliano tai joa vivi-
tauiano lu, napano naio be
iliano na Niununo Lu ka
labon kito, napano naio ber
jibenei, naio berinavo

*“Banei, ver kamiu kuvijog
joono,*

⁸ *maka rivu ka kenemiu
jidomiano rimeĭ sikili
bereio, tavukia na ken-
emiu tormoruo nalo
amilaio.*

*Beamu ea vio iauo, ajua
bogo tai na lavoni-
ano toru laka,aju
banbano-o karinaaju-
molu amila pariparilo
bereio.*

⁹ *Naruei Atua mial lo, ana
naio ber jibenei, beri-
navo.*

*Ea kialo ieliano ka yuka
duelimo va ver [40]
nei, daĵariga kiniou
nojo bijalo, amial
kanaku ijaiano novo
na banlo, mia kialo
bajago nalo naaju
amilavon kiniou laka.*

¹⁰ *Kialo veribinio nei naio
mila tinieku bilulu
m̃ele, ana namial
jibe makanio, nalo
na julaka ga ajum̃a
aburvuru dedade ealo
ajanea vio ajum̃a
ajaluvo den kiaku
m̃arabo na memedu
nalo.*

¹¹ *Tinieku m̃aro ka nalo na
jibe na ruei, tinieku
kiri seri tanealo,*

*naruei nojumolu
namila verikariano tai,
neberinavo buruvenuo
na jilimebiano novo na
kiniou namila batitigio
bo jo kalo, mia maka
ajikia ava jouro ea
bereio.” Iouano
95:7-11*

¹² Kuruaku nalo bija ku-
vivinieku nalo, bior vite nalo
na mia bo ka mia kamiu
kuvitigar kamiu rivu. Maka
rivu ka mia kamiu tai, jido-
miano na bova toa naio,
ĵeli kiano iviso rimonea re
bunu, ka mia rila naio ri-
van bereio taluvo den meu-
liano nabo na Atua na meul
kiano. ¹³ Maka rosidom ka
mia kito tai rijoru tibena,
naruei monoka rotunukakar
kito daĵariga ka legiano
nonovio, ka mia ve re tai
ka kito napano bajago na
kariano atum̃a atubolbolili
lelan naio rivano-o mia ri-
menini nonovio. Iliano na
mave na ber “Banei, ver
kamiu kuvijog joono Atua,”
mia naio be iliano na beamu
tai, mia naio ju jikili kia
ga vo, joono naio jom̃a
bio kiaga vo, kito rojua
legiano nalo na jogvaiano
kiaga vo. ¹⁴ Bokanio kito
rovokar vatitig sikili kiado
moneano ea naio tavukia ga
na m̃a rojum̃a romonmonea
jukamu, bo ka kito rotu sikili
rivanvano-o rivokar jukuti.
Ana vere rotum̃a ralala ga
tibena, mia kitoliko Kristo,
kito tomu nalo na m̃a ravar
bitiran Atua kiano mermer-
ano novo nalo rivija naio.
¹⁵ Rian ga na, iliano lu na
mave naio ber jibenei ber
maka rivu ka kenemiu jido-

miano rimei sikili bereio, tayukia nanua mña kene-miu tormoruo nalo amilaio ea kialo bogo na lavoniano beamu ea vio iauo, napano ajumolu bereio amildie Mosis.

¹⁶ ? Mo nalo na mña amila parilo jikili jibena, nalo abe kenia? Nalo na mña amila jibena, nalo na mña beamu ajaaro ka mña amidu Atua joono ruei, abatove ka kialo tor na toru Mosis, naio jukamu kalo ajaluvo den Ijivi. Naio jukamu kalo abatavio, mia maka vesiou, ana amildie naio bereio.

¹⁷ ? Mia nalo na mña amilavon Atua, ajuljulu tiniene ka yuka duelimo va veri [40] nei ea kialo burutili mñarabo nei, banbano-o na naio tinien jerlo toru, nalo nene kiaga nei vo, a? Ee nalo na mña amila jibe nei, nina nalo kiaga nene kiana vo na, napano naio milarurlo, mia iorou kanio ana ajumña amila kariano damñariga ea mirano, mia iorou kanio ana naio milalo napano amñarmñaro ga, salo buriu nalo abe dedade ea vio iauo.

¹⁸ ? A nalo na mña naio berkar ber mia nalo ajikia lele re ka mia ava jouro ea kiano buruvenuo novo na jilimebiano napano naio mila batitigio be kanalo, nalo abe tomu na ajumñabe? Nalo na maka ajikia avano, nina nalo na mña amila pariparilo, a nalo na mña maka adu niono.

¹⁹ ? Mia venia na mila napano maka ajikia ava jouro ea vio novo na

jilimebiano nene? Maka ajikia avano, bior maka amonea kar Atua, maka avarkar tinielo ea naio.

4

Jilimebiano lu na Atua kanano tomu nalo kialo

¹ Naruei beamu, Atua naio mila batitig kiado tormoruo nalo kanalo vio novo na jilimebiano tai, mia voniganei naio mila batitig ber ga bunu kiado jilimebiano lu tai ruei jibe na. Verikariano na jilimebiano na naio meul batitig bo jo kiana vo, naruei maka rivu ka kito rotibe ka kiado tormoruo nalo nei, napano amilaluvu kialo jilimebiano nene, nalo miroano maka ava jouro eaio. Peli bo ka kito rotu rovitii vatitig kito rivu, maka rivu ka rotu ga o-o mia kito tealoo nalo bunu alaluvu kialo bogo, avitiilo ka maka ajikia avokar kialo jilimebiano. ² Nina bior kito rabare ga ka kiado tormoruo nalo nei, ka lilianiano na bo na Atua kiano binime i bokar kito, javukia napano bokarlo, mia nalo amila jibe ka amijogio, mia maka ajedu moneano mave kanio. Nalo maka aje batitigio rimon ea kialo meuliano, naruei iliano nei maka rivar mñarati ealo. ³ Naruei ea tivelinio na nalo na maka amonea naio jibe na ana na Atua mil jikili ruei, naio berenio iliano na kiniou nebivitaui mave vaarakurano garuei. Iliano nene naio berinavo

"Nalo na amila mña tinieku jerlo toru laka, naruei neberkar ka

*mia ajikia re avokar
kanaku jilimebiano
nei.” Iouano 95:11*

Mia kito na ga kito romonea naio riano, jilimebiano nei naruei naio be kiado, ka rava jouro eaio.

Atua kiano jilimebiano nene, naio mila batitigio bogobe ruei jo be kiado, bior ka bogo na tiiano, naio miñauo ea legiano ari nei o-o biniu, ⁴ ana jibe ka Iliano Lu naio ber kovio tai navo, ka legiano aluo, mia naio mijilimebi ka kiano iñauano nalo, maka bunu riñaukalo bereio.

⁵ Ana vite takurano bereio, be iliano na mave naio berii Atua ka naio berinavo mia tomu tealo ajikia re avokar kanano jilimebiano, ⁶ ana na iliano nei mila kirimeravo ka monoka ve tomu nalo na vio dolu tai bereio na mia Atua naio rijamo kalo ava jouro eaio. Nalo na beamu, amijog Atua kiano lilianiano vou na bo, bija buruvenuo na berkario ka ve kialo, mia maka atu sikili, maka amonmonea, mia nalo amilaluvu tanea garuei, maka ava jouro eaio. ⁷ Mia kiado jilimebiano jo kiano vo, a Atua jekar legiano nene memedu ka mia rovokario, bior yuka miroano barlaka ruei, avona bisi, ana na parinio tubo Teviti naio berial iliano nalo na aju mave ruei, napano naio ber jibe nei, berinavo

“Banei, ver kamiu kovijog joono, maka rivu ka kenemiu jidomi-

ano nalo amei sikili bereio.” Iouano 95:7,8

Bo ka rovitilubar ka “banei” napano naio berenio ea vio nene nainei naruei kito rojua nei ruei, napano Atua jekar ka ber bogo nene memedu ka rovokar ioruriano eaio.

⁸ Kuvisidomii von tormoruo Yosua nei nua. Naio jukamu ka kiado tormoruo nalo nei togio abano jouro ea buruvenuo novo napano Atua berkario, a ver naina naruei naio be Atua kiano jilimebiano na amijeveio ruei, mia Atua maka bunu rijikia riverii bogo dolu tai bereio ka Teviti, ka river be legiano na va jouroiano ea kiano jilimebiano. ⁹ Ana makanio, naio jomña ber be jilimebiano lu tai naio jo keano be kiano tomu nalo kanalo, ¹⁰ mia ver kei na riva jouro eaio, mia rivu mia rivu ka naio, naio mijikia rijil mebi ka kiano iñauano nonovio, tavukia na Atua naio mijilimebi ka kanano.

¹¹ Ver tibena, bo ka kito resikili ka ravokar jilimebiano lu novo na, maka rivu ka mia kito tai bunu rimonmonea re Atua, ka mia rilaluvuio.

Atua kiano Iliano na bo laka

¹² Kito rojutano ka Atua kiano iliano, bior kiano iliano naio meul, naio jomña miñauo jikili laka, naio mijikia julu dulu toro kiano meuliano, naio mali laka jovulu iobogu na mira napano mali ea ikiti be juo.

Atua kiano iliano naio mijikia riovodulu riva joomo ea kito, riva tibure venia napano joa kiado jidomiano, ħeli vitii venia napano joa niunudo. ¹³ Nao, naina mia rivitii kiado meuliano, mirano joa vite nonovio, maka kito tai napano mijikia toluku ka naio.

Yesu be kiado parinio toro lu

¹⁴ Atua mijikia vite nonovio ea tivelinio na kito, mia siva ga kano ka napano kenerinio, kiado parinio toro lu na toru na Yesu, naio juvan vio nei naio mijaka ban ea kiano vio mave niogovu, naio ba mila merevuiano ban Atua kar kito bereio. Mo bior naio jomā mila batitig kito bo bija Atua jibe na, mia bo ka rovakar sikili kiano moneano, bo ka rotuvan re naio bogo tai leleio.

¹⁵ Kiado parinio toro lu nei, naio maka ve tai na mā maka rijikialubar kiado mijikikiano, mia naio mijikia vatitig ka kito maka mā rotumolu rotu sikili laka. Naio tinien miia kito, mia naio rijai kito, bior beamu naio bunu, juboluboiano nalo abinimei kirisikili laka ban naio ka tivelinio nonovio, jibe ka ga napano mā ajumā abinimei ea kito. Naio javukia ga kito, mia vite takurano ga, juboluboiano maka rivuru naio rijoru ea kariano leleio kija garuei.

¹⁶ Jibena, ana kito romial ka napano robe kiado mārabo naruei napano romijikia

ralavon ka rojian kija kito romei vaataro ka Atua kanano jobaro lu, napano be burupati na tiniememiano. Kito romerou re bunu, rasaaro ga ka romei ea Atua, ana na mia rovokar kiano tinieiano ea kiado meuliano, rovitio ka kiano tinievuiano naio mijai kito ea bogokouo vaio na rojoaio.

5

Yesu be parinio toro lu na mā tinien miia ea toro

¹ Nalo namā abokar imāuano na parinio toro lu, abitiri bulaglo den kulo lu dolu nalo ka aimāu tibena naruei. Parinio toro lu naio be toro tai na mia tumolu to iviso ka tomu nalo a Atua, ka mia sian ijaiano nalo ħelina sida nalo na kialo riva naio, ka naio mijikia riviekokoa kialo kariano nalo. ² Parinio kulo lu nei naio bitilubar batitig bo ka na mā tomu nalo amimāu bova, ajumā amiel belbele amilaluvu mārabo, bior naio bunu be sunbue, mijikia jikia, naruei naio mijikia tinien miia tomu dolu nalo riano, mijikia melokloko vanlo. ³ Naio a javukia ga tomu dolu nalo, naruei bogo na mā mila jokoluolu nalo, monoka rila, maka ka tomu nalo ga kialo kariano, mia bior kiano kariano bunu. ⁴ Bior vite na, maka rivu ka tor tai ga rivijauia naio bereio ka naio river bo ka naio rimei rive parinio toro lu, makanio, mia Atua ga mijikia rivijauialar toro na mia mijikia rudu sio na

toru na jibena, jibeka naio bijauialar tormoruo Erono re nua naio be kiado parinio toro lu na be moti garuei.

⁵ Ana tivelinio na Kristo kanano naio jibena bunu. Naio be kiado parinio toro lu na toru, mia maka rivevavinia naio ka river naio jibena, mia Atua ga bitirilar naio. Atua kiano iliano na mña ber jibena naio jikili jua vivitauiano lu moruo nalo re nua, napano tai ber jibe nei, naio berinavo

*“Jau na, kiniou nemial jibeka banei jau kobin-ime i kobe keneriku riano, a kiniou nebe karamano riano.”
Iouano 2:7*

⁶ Mia dolu naio ber jibe nei ber

“Kiniou nomiduso koju javukia tormoruo Melkeseteki, jau kobe parinio toro lu na maariano na ea kiano bajulukuti, ka na mia jau kovokar imauano nei rivan mia ribisi deio.” Iouano 110:4

⁷ Atua midu imauano nei ban Yesu, naruei romial ka bogo na kiano meuliano na ea yetemeriba nei, naio milaiio ruei. Damariga naio jomña jidom yetemeriba nei toru laka, naruei naio jegi ban Atua, sano jogumirano miou biorio. Naio jomña biekouo jikili ea Atua ka ver kiano meuliano rivakovio, mia Atua rila naio rimeul bereio, naruei naio jikili lie ka mña bolkouo bior kito ban naio.

Ana na Atua naio tinien miia, bitii kiano bajago novo na namelumano a navatoveiano na Yesu kiano, ana na mijog kiano viiano. ⁸ Be riano ka Yesu be Atua kenerinio ruei, mia Atua naio mijamo ka jogvaiano na jikili nalo amiyotuba kanio, jidom ka riverloglog Yesu ka rivokar vatitig rivu bajago na monmoneano ea kiano meuliano. ⁹⁻¹⁰ Naio batove ka karamano kanano sidomiano nalo abiniu, bano-o na mila nonovio imauano na Atua midu banio, mila na Atua bitirilar naio javukia tormoruo Melkeseteki. Jibena, Yesu binime i be Atua kiano parinio toro lu, binime i be burupati na meuliano na maka rijikia ribisi, na kiado robiniu napano romijogkar naio.

Bo ka romei romeruo rivu ea Kristo

¹¹ Naruei sio nei Melkeseteki, naio be kiano tukunu moruo na bo naloaju, napano amijikia ala rimeravo rivu van kamiujumabe ka tete na bija kanano imauano. Kirisikili ka avisivisii rivan kamiubior be bogo tai napano mña burutiliniemiu nalo abonvono kija. Mia ver kamiukuvilavon ka kuvi-joglubarbario, ¹² mia rivu, bior kamiukumonea bogbe ruei, mia memedu ka kumeikuve naverloglogiano na iliano lu na Atua kanano ruei. Ana makanio, kumitujibena ga, ka mia averloglog

ka kamiu bereio, tikar bereio ea burupati na iliano nalo na kiano.

!Riano ga na, kamiu na ka mia kuvisen sinaniano na jikili ruei, mia jibeka napano kumitumã kumisidom kumunu yu kia ga vo! ¹³ Kulo be na mña ajumã ajidom amunu yu jibena kia ga vo, nalo abe kiritete kia ga vo, tenene na maka ajikia ave masou rivu ka iliano na m̃arabo na memedu, ¹⁴ mia nalo na mña ajumã ajen sinaniano nalo na kirisikili, na ameruo bo ruei. Nalo na ajibe nei, kialo jidomiano nalo amim̃au bo bano-o abitii lubarbar vite nalo nonovio, naruei amiluo abinimei abo bokar nana abitulubar vatitig vite venia nalo na bo a vite venia nalo na bova.

6

Bo ka rovitikar vatitig kito ka rava iorou re bunu

¹ Bior jidomiano nalo na, mia bo ka kito rotuvan bajago na kiritete naio to, rava lie rivija Kristo kiano verloglogiano na jikirkili jibe na, napano amemedu ka jidomiano nana mermeruo bo. Kito robilig kito den im̃auano va nalo na m̃ariano ruei, kito robokar viekouoiano ea Atua ruei, ana maka rivu ka rotumã rajajaloa bereio. Naio jibe ka na romilakon jeleig yimo ruei, mia be bogo na rotu rovitirilar tu sikili naruei. ² Ajiloglog kito ruei ka varueiano, a ajokol pariparido ruei, romonea

ruei ka mia rotumolu bereio den m̃ariano, a romijikia ruei ka tibureiano tai jo bija kiano vironiano napano mia tomu na bova mia avokar rivano-o mia rijikia re ribisi bogo tai. Mia vite nalo na kito romiovo dulu ealo ruei, mia maka rivu ka rotumã rataki jaado ka mña reseliviv ea vite nene dam̃ariga, mia bo ka rotu rava lie vo vija kiado Tubo. ³ Vite na kirisikili, mia ver Atua naio rijamo ka ga rivan kito, mia romijikia ga ka roim̃aukanio. ⁴ Nao, mia kito monoka ralavon ka rotu rava lie vo rivija naio dam̃ariga, mia tum̃abe ka nalo na amijoru, aban bereio ruei? Nalo na beamu amiel bo ea miamoiano, a ajumã ajinan ea tiniavio na vio mave ruei, a Niununo Lu binimei ealo bunu, mia bogo na mña aban bova bereio jibe na, mia maka bunu ajikia aviliglo amei bereio ea meuliano na bo. ⁵ Atua kiano Iliano Lu naio miija batitiglo bo ea kialo meuliano, ana abokar kija moroano na navenatuboiano napano jo binimei, ⁶ mia bogo na mña abilig bereio taakalo, amila pariparilo jibe na, mia tum̃abe ana ajikia amei bereio rivu? Makanio, mia rivova laka vanlo, bior ajumã amila jibe ka napano ajukukakar Atua kenerinio mave ea m̃akolkolo bereio, ka jum̃alo nalo, tibe ka napano ajumã amidular naio ea tomu nalo miralo ka aiolua searia siano bereio.

⁷ Kuvisidomii von ninei. Borotano na m̃a jo munu yuo na m̃a jibirbili julaka eaio, mia naio bar m̃arati miroano ka nalo napano aim̃au eaio, ana mia Atua jaaro toru kanio, kiano ilivuiano joaio.

⁸ Mia borotano na na maka rivar tena bo, bar ga soro na bova, naio jibe ka napano aberkar m̃ariano ga banio, mia maka ajikia ala tena bo tai eaio, mia aisebio ga. ⁹ Be riano laka banalo, iliano nalo na jibe na ajikili laka, mia tivelinio ka kamiu, maka rosidomii ka kumitibena. Peli ga, kiniou nabarkar tinieku ea kamiu, ka m̃arati na bo nalo na meuliano vou ajum̃a amiluo bo ea kenemiu meuliano kia navo.

¹⁰ Kiniou nomonea Atua ka mia naio tiniene ribobogia re kenemiu im̃auano na bo nalo ka mia naio sidomii ve iakurano re ea kenemiu bajago na bo na tinietiano a auaiano ka na kumila banio, ka bogo na m̃a kumijai kiano namoneano lu dolu nalo. Kamiu kumim̃au bo jibe na mila na Atua jaaro toru laka kanio, mia naio bunu rila rimemedu a rivu ka kamiu.

¹¹ Tibe na, ana mia nojidom notunukakar kamiu bereio, ka kamiu kuan re bunu, kuvisikili ka kuva lie vo rivano-o rivokar jukuti nene, ka mia monoka kuvokar vatitig vite nonovio na m̃a kenemiu jidomiano joaio. ¹² Kamiu kuviovo re, niabemiu rimelukluku re, mia kuvim̃au sikili rivare ka kiado tormoruo novo nalo nanua m̃a abokar

masosoua im̃auano nalo, napano kialo jidomiano nalo terebievi bano-o na abokar vite nonovio na Atua berkario beamu ruei banlo.

Atua kiano verikariano beriano laka

¹³ Verikariano tai na jibe na, Atua mila ban Epraamo, napano naio berkar jikili banio ea tivelinio na yati nalo na mia ayotuba eaio. Maka ve sio dolu napano Atua naio mijikia river ka rila kiano verikariano nei naio sikili, bior siano naio loa laka ka sio dolu nalo, naruei Atua berkar ea siano bereio, naio berinavo

¹⁴ “Kiniou Atua, kiniou neilivu kaso ve toru, ka mia nala kiamo bajulukuti amei ve miroano laka ea yetemeriba nei.”

¹⁵ Mia vaataro ka Epraamo rimonea re iliano nei, mia naio mial ka napano Atua mila kiano verikariano nei jikili bo laka, mia be kurano Epraamo bokar bogokouo miroano, mia naio maka tuvan verikariano nei, naio bokario bo bano-o na naio jikar ka bokar venia na m̃a Atua berkar banio.

¹⁶ Ka tivelinio na bajago na ala verikariano jikili, tomu nalo ajum̃a aberii tor lu tai siano pelina vite lu tai. Mia bogo na tomu dolu amijogio, monoka amonea ga, maka bunu ajikia ail mum̃ii ka bereio, bior sio na aber naio mila iliano nene tu sikili. ¹⁷ ? Mia jum̃abe ka Atua? Naio bunu tinien jii ka rila kiano iliano ea kito

sikili rivu, ka mia romon-monea, maka rejikia rovitovitonia naio kanio. Kito rojibe ka kiritete nalo na mia ravar kiano jajurano, naruei naio jidom ka rejikia rive riano ka kiano jidomiano na bo ka kito naio maka rijikia ribisi bogo tai, naruei naio milakar verikariano nei ban kito naio jikili bo laka. ¹⁸ Atua kiano verikariano ka kito jibe na naio bo, naio jikili ruei, bior naio maka rila sibi bogo tai, kiano iliano maka rijikia rive dolu bogo tai, mia mave ka kiano verikariano, berkar bija siano lu bereio. Ana vite juo nei, kiano verikariano bija siano, naljuo amimau biju ka rila kito rotumolu rotu sikili ea kiano iliano. Kito roburo den vio na bova nanua ma rojua mugaruei, rojuma rojiravo vio na tolukuano, naruei Atua kiano verikariano na bo nalo amila kiado jidomiano rime rive tebievi rivu. Tibena mia kito romijikia rava ro-vokar vatitig rivu vio novo nei napano Atua naio mila batitigio bo midu jo kamu ea mirado.

¹⁹ Mia kiado moneano kouo nene, napano rober ka mia Yesu rilarur kito, naio be jidomiano tai napano jibe ka veru na ma bokar batitig uako jo. Mia naio rivokar vatitig kiado meuliano rivu, ka mia ve re titai napano mia rijikia rivurular kito bereio, rivano-o rivokar bogo na kito rava resel iorou ka burumara jagidago joomo ea vio Lu napano

be Lu laka. Ea Vio na, mia rotumolu rotua Atua mirano rimemedu, mia kiado jidomiano mijikia sikili rivu kianavo ka mia rivu ga van kito. ²⁰ Nina bior Yesu naio jukamu ka kito ban ea vio lu nene ruei, naio ba mila kiano imauano jibe ka parinio toro lu na kiado, ka rila kiado merevuiano rivija Atua.

Jibe ka na ma kito roberiio beamu ruei, naio javukia parinio toro lu na maariano na yati na tormoruo toro lu na Melkeseteki, naruei naio bulu bulag nono kiado kariano nalo ruei, ana mia rimonmon bo ka kiano imauano na kar kito rivano-o mia maka rijikia ribisi bogo tai.

7

Melkeseteki re beamu naio loa laka ka toro lu dolu nalo

¹ ? Ana tormoruo Melkeseteki nene, naio be kei, a sano tukunuano nene jumabe? Niosi na Tikariano berii naio, berenio naio jo ka bogo na tormoruo Epraamo re nua, na naio be parinio tubo ka komeli lu moruo na Salemo, mia naio be toro lu na toru na Atua kiano. Ana ka bogo tai, ana tormoruo Epraamo ba mila mira ka kiano uolu nalo, ka parinio tubo dolu nalo, karina naio jo binimei bereio, ana naio biviuo naljuo Melkeseteki mia naio batove kanio, ana Melkeseteki mialio, ana milivu kanio. ² Ana Epraamo mije ijaiano

banio, duelimo jaluvo den tormomou ea vite nonovio nalo na naio mijevilo ea mira, napano naio jom̃a bar ban bere ea kiano vio. Mia burum̃ara toro lu nei naio be toro tai, na jibe ka siano juo nei aberenio. Siano na na jukamu nene, be Melkeseteki, nioti nene ber “Parinio tubo na memedu,” ana, siano juo nene naio ber jibe nei ber “Parinio tubo na tuñaro,” bior naio be parinio tubo na komeli na Salemo, napano nioti nene ber tuñaro. ³ Kema na, kiano tukunuano naio be dolu, bior ka maka romijog ka napano m̃a aberenio ka kiano tormoruo juo nei ajum̃abe, p̃elina korobinio nalo yati re be. Maka averenio ka kiano meuliano naio jikar jel jum̃abe, a tukunuano na kiano m̃ariano maka tai. ! Jibe napano naio maka rim̃aro kulio, mia naio jom̃a bokar dolu ka ga kiano im̃auano vo! Jibe na naio jibe ka Atua kenerinio, napano naio be kiado toro lu riva vano-o mia ribisi re bogo tai. ⁴ Bior vite nalo na, romial ea Atua kiano iliano moruo, ka napano sio nei Melkeseteki naio be sio tai na loa laka, banbano-o na korobido tormoruo Epraamo, na m̃a ajidom sopeia naio ruei, naio bunu batove kanio, naio jian ijaiano banio ea togio na vite nalo na barlo ea bogo na jovulu mira.

⁵ Mia bajago na asian ijaiano na jibe na, naio be

bajago tai na m̃a tuboiano berenio berinavo kulo Israel monoka ala tulaka. Nalo na abe tomu lu na kanalo yati na Livai, monoka ava avitikar vatitiglo, monoka asian duelimo taluvo den tormomou na kanalo saba nalo nonovio vanlo, bior nalo ajibe ka m̃aratavo takurano ga, abe bajulukuti na Epraamo. ⁶ Mia Melkeseteki nene, naio maka ve m̃aratavo na Epraamo, mia tormoruo Epraamo naio bitilubar ka naio be toro lu tai, ana naio bio ka togio na ijaiano banio. Tormoruo Epraamo nei naruei nanña Atua berkar tonovo nalo banio, mia naio batove ka Melkeseteki.

Mia bogo na Melkeseteki bokar ijaiano nei, naio jaaro milivu ka Epraamo, a nina naio mila kirimeravo ban kito ka naio loa lie kanio, ⁷ bior toro na bare ka rilivu ka toro dolu, naio monoka loa lie ka toro nene. ⁸ Mo na Melkeseteki naliko kulo lu dolu nalo nei, nalo nonovio abokar ijaiano na bevirare ga, mia abe dolu ka titai. Vite na jibe na, aber kulo lu nalo abokar kanalo, iorou kanio ana am̃arm̃aro, mia Melkeseteki naio bokar kiano, aberinavo naio jo bano-o na maka rim̃aro kulio. ⁹ Mo na jibe ka napano Melkeseteki naio loa lie ka tormoruo Epraamo, naio loa lie bunu ka sio dolu na tortoru napano Livai. Be riano ka na Livai naio be korobido moti garuei na yati na kulo lu memedu, mia naio bunu miyotuba ea

yati na Epraamo, ana bogo na Epraamo naio batove ka Melkeseteki, naio jian ijaiano banio, jibeka ga na m̃a Livai bunu batove ka Melkeseteki jian ijaiano banio.
¹⁰ Vite na jibe na javukia bogo na Epraamo biviuo Melkeseteki, mila banio, Livai naio maka riyotuba ea korobinio nei navo, mia jibe ka napano naio bunu milaio.

Yesu maka moluo ea yati na kulo lu nalo, mia moluo ea yati vou tai

¹¹ Ana iliano nalo na mave nei aberial burum̃ara vite tai. Amila kirimeravo ka na Atua midular bajulukuti na kulo lu na Livai nalo, naio bitirilar bajulukuti dolu tai na kulo lu nalo, midu jo jeleig naio. Tormoruo Erono bunu naio bitirilar im̃auano na bajulukuti na kulo lu nalo, a Mosis naio bar kiano tuboiano miyotuba, mia ver Atua rial ka vite juo nei bevire ka rila kito romemedu rivu vija naio, mia naio tuvan tobo. Mia makanio, naio mijebukua, naio miila parinio toro lu vou tai miyotuba ka kito, napano naio be bajulukuti na tormoruo dolu nei Melkeseteki.
¹² Ana bior Atua bitirilar parinio toro lu vou nei, memedu bunu ka ver rivitirilar kiano tuboiano nene.
¹³ Naio monoka tibe na, bior vio nei naio berii kiado Tubo, napano naio miyotuba ea yati tai napano maka lele tai ka nalo sikili tu ea boda ka rila toro lu kiano im̃auano.
¹⁴ Yati napano Yesu naio miyotuba eaio, romijikia ka naio

be yati na Yuta, ana bogo na Mosis berial sio na bajulukuti na tomu lu nalo, naio maka riverial leleio sio na Yuta.

¹⁵ Mia Yesu, be yati dolu na toro lu jo napano naio miyotuba eaio, naina naruei be Melkeseteki kiano bajulukuti nene napano rojum̃a roberenio. Vite na naruei mila na romial ka Yesu maka tavukia kulo lu dolu nalo, mia naio jibe ka Melkeseteki garuei.
¹⁶ Nalo dolu nei, abinimei abe kulo lu bior ka ga ajakii jameul na kiano bajulukuti, jibe ka na tuboiano moruo naio berenio, mia Yesu naio binimei be kiado parinio toro lu ea burum̃ara moroano na kiano meuliano nei na maka ajikia ala lelanio, napano mia naio to tobo to.
¹⁷ Kito romijikia ka mia naio toboto tibe na, bior Atua kiano iliano naio berenio ruei, napano naio berinavo

“Kiniou nomiduso koje jibe ka tormoruo Melkeseteki, jau kobe toro lu na maariano ea kiano bajulukuti, ka na mia kovokar im̃auano rivano-o mia maka rijikia ribisi.” Iouano 110:4

¹⁸ Ea vio na, binimei meravo bo ban kito ka Atua biebukua marabo na kiano im̃auano. Marabo moruo, na be Mosis kiano tuboiano re beamu, napano jumolu ju bogo be ruei, mia javukia napano maka rijev moroano tai ka mia rila vite novo tai van kito.
¹⁹ Naio bijuku deio ka rila kito romei

romemedu, tenene na Atua juvan m̃arabo moruo nene jobo garuei, ana mila jido-miano vou tai binimei medave, midu jeleigio. Marabo vou nei naruei romijikia romonea sikili ka naio be m̃arabo na be riano, napano mia naio mijikia rivuru m̃arabo ka kito ka mia romei vaataro ka Atua.

²⁰ Ana m̃arabo vou nei, Atua kanano verikariano tai naio mila jumolu ju jikili ju. Kulo lu dolu nalo re beamu, bogo na ajokol parilo, amioakolo ka kialo im̃auano nalo, maka ve verikariano tai tibe na. ²¹ Mia bogo na Atua bitirilar Yesu be kiado parinio toro lu, naio milakar bija kiano verikariano na jikili tai. Javukia napano iliano tai ea niosi lu na iouano naio berenio, napano naio berinavo

“Atua soṽi naio berkar ruei, mia naio maka rijikia river bukua kanano iliano bereio, naio berinavo

‘Jau mia kovokar im̃auano na parinio toro lu na kanaku tomu nalo, rivano-o mia jau kobisi ka re bogo tai.’” Iouano 110:4

²² Mia Yesu naio bokar batitig kiano im̃auano jibe na, be kijokijo na verikariano vou na Atua kanano bija kito, napano naio bo lie vo loa ka nana beamu, a naio be tikariano na vite dolu nalo na Atua berkario ban kito, mia na rila nonovio ea kito iorou.

²³ Kulo lu nalo na beamu nalo miroano, bior nalo

tai mim̃au bano-o bakovio, ana na dolu midu jum̃ano, mim̃au banbano-o, naio bunu bakovio, nalo amila jibe na naruei. Nalo maka ajikia avokar tobo to, ²⁴ mia Yesu, naio be na toboto nam̃ariga, mia naio ga ve takurano na mia rivokar kiano im̃auano tibe ka kiado parinio toro lu rivanvano-o mia rimebi re bogo tai. ²⁵ Jibe na naio jo dam̃ariga ea Atua mirano, naio jo bolkouo dam̃ariga banio ka kito, mila na kito na voniganei, ṽelina kito tomu na romei iorou, mia naio naruei mijikia rilarur nono kito na m̃a rejelea naio robinimei vaataro ka Atua.

Yesu naio be parinio toro lu kar garuei

²⁶ Kito rajaaro toru ka na Atua mial bo ka tuvan parinio toro lu tai na naio bo laka jibe na rimei rivior kito. Naio be toro tai na be lu laka, napano maka vijukubeleano tai rimonea naio leleio, naio meravo nonovio, kiano bajago naio maka tibe ka tomu na m̃a amila kariano leleio, siano jo mave loa laka ka vite nonovio nalo na tiniabenei. ²⁷ Mia kulo lu dolu nalo nei, nalo monoka atuṽa ala sida na meravoiano tulaka ea legiano nonovio. Beamu, monoka ala rivior kialo kariano nalo bereio, ana iorou, amijikia ala rivior kariano na tomu dolu nalo kanalo, mia Yesu naio maka tibe na. Naio mila sida na meravoiano na kariano na yetemeriba nei reraio ve

vaarakurano ga, nina, ka bogo na naio mila jokoluolu ka mokotenano bereio kar kito. ²⁸ Be riano ka tuboiano moruo binimeĩ beamu, mia kiano parinio kulo lu be kulorinio ga, melokloko ga, mia verikariano vou na binimeĩ iorou, kiano parinio toro lu naio memedu dañariga, be Yesu Atua kenerinio.

8

Virakariano vou: Iñauano na parinio toro lu kanano naio bo lie vo

¹ Naruei verloglogiano nalo nei aber vite telabo ea tivelinio na parinio toro lu nalo. Mia buruñara burupati iliano tai na naio jo, napano temi bo ka rosidomii ve temi eaio, napano berenio kiado parinio toro lu novo tai jo ruei. Naio be Yesu na naio ban bere mave tiniabenei, naruei toro na toru na vio mave naio midu naio jotano tivelinio na jumano meruo. ² Naio joa vio na, naio mila kiano iñauano lu, javukia napano parinio toro lu nalo re beamu amila lotuano joomo ea yimo lu panpano nei ea vio yauo. Mia vio na lotuano nei, tomu nalo ga amirñaukanio, mia kiado parinio toro lu Yesu, naio joña miñau joomo ea vio na lotuano na bo laka, nana be riano, napano Atua ga miñaukanio. ³ Mia parinio kulo lu dolu nalo nei, kialo iñauano nalo, napano dañariga abitiribulaglo ana ña ajumña ajan ijaiano ban

Atua, a napano ña amila sida banio, mia bo ka rovika rover kiado toro lu nei, ñeli naio bunu midu ijaiano ban Atua, mila sida kanio? ⁴ Verver yetemeriba nei ga, mia naio maka aial naio tibe toro lu tai, bior naio maka riyotuba ea yati na Livai, na ña tuboiano mije moroano banlo ga ka amijikia asian ijaiano rivan Atua. Jibe na, kiado parinio toro lu nene naio joña miñau ea vio lu na mave ga.

⁵ Vio lu na yetemeriba nei, bija iñauano na na ña amirñau kalo eaio, naio javukia melukuti nene ga, ñelina kijokijo ga, mia na na ea vio mave, naio be telerinio nene. Atua bunu ber jibe na ga, tilikiti na naio berlubarbario ban Mosi, naio berkanio ber mia tumabe ka mia naio rimñauka yimo panpano lu nei, naio berinavo mia naio monoka rimñauka takii tiñano nene rimmedu ka na ña naio mialio bogo napano naio bavin ea burusuku. ⁶ Mo jibe na na kito romial ka Yesu kiado parinio toro lu naio be riano, a kanano iñauano nonovio nalo abo lie vo. Naio jotano iviso ka kito bija Atua, naio miñauka virakariano vou tai ea kito bija naio napano bo lie vo, napano jikili jua Atua kanano verikariano napano abo lie vo, ooa na nalo romial naio jo mave mila iñauano tai ea vio lu napano naio bo lie laka. ⁷ Verver virakariano na beamu naio rivu kia ga vo, mia ve re bunu tinene

bereio, mia makanio, milao
ana na Atua bitirilar virakar-
iano vou bija kito napano
naio bo bo laka garuei.

*Virakariano vou: Atua
naio berkario beamu ruei*

⁸ Virakariano na jukamu,
Atua naio jo mial ka maka
rimāu rivu, ana naio maka
rivare vo ea kiano jidomi-
ano, mila na naio berkar na
na terivou dolu bereio. Naio
berial jibe nei ea iliano tai
nanua jian ban naverialiano
Jeremaia ka naio riverialio.
Ea iliano nene, Atua berkar
jibe nei, berinavo

*“Kamui kuvije tiliniemiu
vatitig rivu. Kiniou no-
jidom never ka kamui
ka bogo tai jo binime
kiana, ka mia kiniou
nala virakariano vou
tai vija kamui kanaku
tomu nalo, kamui na
kuba bajulukuti na
Yuta bija bajulukuti na
Israel.*

⁹ *Mia virakariano nei naio
rivevirare re ka nanua
namila kar bija ko-
robimiu nalo re nua.
Virakariano moruo
nene, nina ea bogo
na kiniou tinieku
miialo, kiniou noburu
bulaglo den bogokouo
ea vio Ijivi, mia iorou
kano, ana maka bunu
asidomial virakariano
nene, a maka bunu
amonmoneaio, mila
na kiniou bunu nobilig
taakaku kalo.*

¹⁰ *Mia vonganei, kiniou nevi-
tirilar virakariano vou
tai vija kenemiu baju-
lukuti nalo bereio. Ea*

*virakariano nene, mia
kiniou nala tibe nei:*

*mia nevitiri bulag vatitig
kiaku tuboiano nalo
tua kialo jidomiano
nalo,*

*mia nevivitauia kanaku
iliano nalo tua kialo
iviso nalo,*

*mia nemei neve kialo
Atua riano,*

*mia nalo na amei ave
taara na kanaku tomu
nalo.*

¹¹ *Ka tilikiti na, mia alavon re
bunu ka mā averver-
logloglo bereio, ka na
mia tai river ka kiano
bilbilu riverinavo ‘E,
mārabō naio nei,’
pēlina tai river ka
kuruano, riverinavo
‘Atua, naio jibene
jibene.’*

*Makano, mia ala re
bunu tibe na, bior
mia aviniu ajikia
vatitig kiniou ea kialo
meuliano nalo aviniu
koko, tikar ea nalo
na tertelisu laka, riva
rivokar kialo tomu na
tortoru nalo.*

¹² *Kiniou neberkar ka kialo
vovaiano nalo, mia
nevie kokoalo ga,
a kialo kariano nalo, mia
nosidomialo re bunu.*

*Naina naruei be kanaku
virakariano vou bija
kanaku tomu nalo.”*
Jeremaia 31:31-34

¹³ *Ana ea kanano iliano
nene nei, Atua berii virakar-
iano vou nei, mila kito ro-
bitilubar ka naio jo mial
virakariano na beamu nei
naio be termoruo ruei. Mia
jidomiano tai na jo ber vite
na mā Atua ber be termoruo*

ruei, vonganei jo batove lilie ka mia riviniuviniu nonovio.

9

Virakariano vou: Kiano jeleig na lotuano naio bo lie vo

¹ Mia kito romijikia ruei bo ka virakariano moruo, naio be kiano m̃arabo nalo ka rila kanano lotuano eaio, a be bunu vio tai na rila kanano lotuano nei eaio, napano joa ga yetemeriba nei. ² Vio na lotuano nene, be kiano yimo panpano lu nene, napano aburuko ka burum̃ara jagidago eaio, a amuebure togio juo. Ea togio, na abio ka Vio Lu, be burupati na yulu tai jum̃ano aluo, bija barobaro na joko duelimo ba juo napano abio ka "Joko na asiloglog ka Atua."

³ Ana iorou ka jagidago nei, togio na bano ba yesobi nene, naina abio ka vio Lu na be Lu Laka.

⁴ Joomo ea Vio nei, naio be boda na bonotanunu na m̃a amim̃auka niogo, bija basidobidobi na tuboiano nei. Basidobidobi nei, abijan niogo ea kulukuti, vajoomo a tavio bunu, mia vajoomo nene, be vite tolu napano abar batitiglo ajuio. Nana jukamu, naio be baju na niogo tai napano niati sinaniano na vio iauo na abio ka mana naio joaio, a vite juo nene, naio be tormoruo Erono kiano nasitogo napano toti barboŵeio nua, a vite na maariano najo be puruveru na mierivin juo napano Atua bivitauia

kiano tuboiano ealo. ⁵ Ana mave ea basidobidobi na tuboiano nei, naio be sikmirano, napano abio ka vio na totaniano na Atua kanano tinieiiiano. A be tovorovo na nailiano juo ajumolu aju mave eaio, napano sibialo amiaveveko tivelvelinio vio na m̃a Atua kiano mermerano jom̃a batove eaio. Naruei vio lu na lotuano na virakariano termoruo nene naio be vite novo nalo nei naruei, mia maka rejikia rover vite ve miroano bere vo ea tivelinio na nalo. Mia vite takurano ga na roverenio, ka vio na lotuano nene, vija kiano saba nalo, nina amim̃auka ga ea tenalo na yetemeriba, naio maka rijikia tobo to kanio ga, naio maka rivu tibe ka vio na lotuano na virakariano vou.

Virakariano vou: Jokolu-olu nene naio bo lie vo

⁶ Vite nalo na mave nei, naina naruei vite nalo na m̃a abar batitiglo aju joomo ea yimo panpano lu na beamu nei, mia bogo na kulo lu nalo aba joomo, amim̃au bi-jalo. Mia dam̃ariga, ajum̃a aba joomo ea ga vio lu na jukamu nene, ⁷ ana ea vio lu juo nene, na be vio na mia be lu laka, kulo lu nalo maka leleio ava joomo eaio. Vio nei, toro takurano ga mijikia ba joomo eaio, nina be kialo parinio toro lu, a naio maka m̃a to riva joomo tulaka, mijikia ban vaarakurano ga ka yuka takurano. Ana bogo na m̃a ver naio bano, maka rijikia

riva juṁṁano yauo ga tibe na, mia monoka takii ṁarabo nene. Beamu ka naio rivano, monoka ala jokoluolu ka temeul tai, ka mia naio monoka rivar basidobidobi tai na burukija nene riva joomo tibe ka ijaiano tai, naina ea tivelinio na kiano kariano, a bija tomu nalo kanalo. ⁸ Mia bogo na ajumṁa amila jibe na, javukia kijokijo na Niununo Lu napano mila meravo ban kito ka bogo na ver yimo panpano lu naio tumolu tu kia ga vo, mia kito tomu ninio kito ve re kiado ṁarabo tai leleio ka ravan rovokar vio na ṁa Atua naio joaio.

⁹ Panpano na yimo lu nei, bija sano jagidago nene napano jakilele jo joomo, a sano vite nalo, abe tena vio beamu ruei, mia aber burumṁara titai ban kito banei. Amila kito robartilubar ka ijaiano nalo na ṁa kulo lu nalo ajiajian ban Atua a jokoluolu nalo na ṁa ajumṁa amilaio, nalo abo ga, mia vite nalo nei maka ajikia ala tomu nalo ajog ka kialo iviso meravo reraio ea vitiano na Atua kiano.

¹⁰ Amila vite nalo na, bija venia napano tuboiano sesa nalo aberenio ea tivelinio na ṁarabo na amimṁauka sinaniano bija munuiano, a ea tivelinio na bajago na sekoniano na saba. Mia vite nalo na naio be tena vio tavio ea toro niabene ga, mia maka atokol toro kiano iviso peli kiano jidomiano. Mia kiado tormoruo nalo ajumṁa abokar bajago nalo jibene bano-o, abe na-

vokariano nalo ga rivano-o rivokar bogo na Atua mila kiado ṁarabo vou, napano naio be kiano virakariano vou napano maluvo ruei.

Yesu kiano burukija naio jekon batitig kito ruei

¹¹ Mo bogo na Kristo miyotuba, naio binimei jibe ka kiado parinio toro lu, napano naio maka ve tena bajago moruo, mia naio be tena ṁarabo vou, ka rila napano romijikia rovokar ilivuiiano na kirinovo nalo na Atua bar batitiglo boaju. Naio maka riva rimṁau joomo ea yimo panpano lu na beamu, mia naio mimṁau ea tai napano bo lie vo, a loa lie vo. Vio lu napano naio jomṁa mila imṁauano eaio, maka ve toro juṁṁano napano milαιο, mia maka toa yetemeriba nei, mia naio joa vio medave kamu ea Atua mirano mave. ¹² Ana bogo na Kristo ba joomo ea vio lu nei, naio banbano bokar vio nana be lu mia be lu laka kanio, mia naio ba vaarakurano ga, maka ka mia naio riva ve vaarakurano bereio. Ana bogo na naio ba joomo, burukija na bario naio maka ve burukija na nani, pelina burukija na kirikiti bue ṁarauo, mia be kiano burukija ga napano miou ea ṁakolkolo. Naruei kiano burukija nei naio joa Atua mirano jibe na, naio bokar vulbulagiano na kiado kariano ka rito-boto. ¹³ Monoka tibe na, bior ea bajago moruo, ka ver toro tai mila titai na

bova, ana amidu burukija na nani þelina bue m̃arauo, bija bulum̃aroro na kirikiti bue m̃arauo napano amisebio, amidu ban ea vio lu. Ana ea bogo na, ajidom aber ka ijaiano na jibe na mijikia rila toro neibano naio rimeravo bereio ea Atua mirano. ¹⁴ Mo na ver burukija na temeul ga mijikia rila tibe na, mia Kristo kiano burukija naio mijikia rila riva lie vo ve toru laka. Kristo naio be toro lu tai, naio meravo nonovio, maka ve niajebijo tai toaio, naruei naio mijamo ka kiano meuliano ka Niununo Lu mijikia rudu van Atua tibe ka ijaiano tai, ana naio binimei be kiado naioruriano. Tibena na mia burukija na Kristo mijikia rila tiniedo rimeravo, rivurular kito den kiado iṃauano na m̃ariano nalo rivitiri bulag kito, ka romila Atua na meul kiano iṃauano.

Yesu kiano ja mila verikariano vou jikili ju jikili

¹⁵ Ana bior Yesu mila iṃauano na bo nalo jibe na, romijikia reial naio, naio be toro na m̃a bar tenalo novo na virakariano vou nalo amaluvo ka kito. Nina naio milaiio ea kiano m̃ariano, napano be m̃ariano tai napano bular meuliano nonovio na tomu nalo na lakokoroviano na tuboiano na virakariano na beamu. Ana bior naio bulbulag kito jibe na, mila na kito kei napano Atua bio ka kito, romijikia rovokar kiado jajum̃ado neibano mia maka

rijikia ribisi bogo tai. ¹⁶ Ver Yesu riṃaro re, mia kito maka rejikia rovokar kiado jajum̃ado nene, mia bogo napano be riano ka naio m̃aro, verikariano nonovio na virakariano nei binimei jibe ka Yesu kiano iliano na maaro, naruei vite nonovio binimei ea jum̃ado. ¹⁷ Bior ver toro tai riverkar vite tai tibe na naio kiano iliano na maaro, ka bogo na naio meul kia ga vo, ajum̃a abokar batitigio bo kanano verikariano nei jo, mia maka alaiio tibekovio kanio bano-o bokar bogo na ver naio riṃaro, ana mia alaiio. ¹⁸ Naio jibe ka ga ea virakariano na beamu na Atua mila bunu, napano burukija na jokoluolu miou, ana na iliano nalo na virakariano na atumolu atu.

¹⁹ Tena Mosis bunu mila, napano Atua jian tuboiano banio mave ea burusuku, ana naio batove berial iliano nonovio na kanano ban tomu nalo, ana ka bogo na naio berialio bisi, naio muebinivin sida nalo, ka rila ka iliano nalo na tuboiano nei ameul, atumolu atu. Amuebinvin kirikiti bue marauo bija nani nalo, naruei naio midu kija kialo burukija telisu, mion kija uei telisu ban ea, ana midu jaiesi tai na telisu, abio ka isop, bija vijinio sipsip na bilvil, ana budomio ban ea burukija nene, bukio tertelisu mave ea niosi na tuboiano nene, a bukio bunu ea tomu nalo, karina naio berial banlo, naio berinavo

²⁰ *“Naina naruei be burukija*

*na temeul napano naio
m̃aro ka rila Atua
kiano tuboiano rimeul.
Naruei kito rotovonio,
kito romonmoneaio.”
Eks 24:8*

²¹ Ana jibe ka napano
p̃iligṽilig burukija nei ealo,
naio p̃iligṽilig bunu tertelisu
ea yimo panpano nei, bija
vite nalo na aju joomo eaio
napano m̃a abar amila kialo
lotuano bijaio. ²² Marabo na
im̃auano na tuboiano moruo
nei naio jibe na naruei,
napano mia vaataro ka vite
nonovio na m̃a amim̃au
bijaio, monoka ap̃iligṽilig
burukija eaio dam̃ariga ka
rilalo ave lu. Nina jiloglog
burum̃ara titai na rivan
kito, ka ver burukija riou
re, viekokoano na kariano
maka tai.

*Virakariano vou: Jokolu-
olu nene naio bar bulag
nonovio kariano na yete-
meriba*

²³ Tibe na, vite nalo na m̃a
kulo lu nalo amim̃au bijaio,
bogo nonovio monoka ala
bunu rimeravo ea m̃arabo
sesa nalo nene. Mia yimo
panpano lu nene, bija sano
tenene nalo, nalo abe tena
yetemeriba nei ga, ana
jum̃abe ka vio lu nana be
riano, napano Atua joaio
ea vio mave? Naio bunu
monoka ve jokoluolu tai na
viekokoano na naio? Nao,
naio bunu monoka burukija
riiou ka rila kiano saba nalo
riviniu rive lu, vija bunu
nalo na m̃a aju aban eaio.
Mia jokoluolu na vio lu na
tiniabene naio maka tibe ka
temeul nalo na m̃a amila

jokoluolu kalo ea vio lu
na yetemeriba nei, naio be
jokoluolu tai na toru lie vo,
a bo lie vo laka. ²⁴ Ana
burukija na jokoluolu nei
naio joa Atua mirano ruei,
bior kiado parinio toro lu
Kristo naio ban ea vio lu
nei ruei, napano maka ve
vio lu na tomu nalo ga
amim̃aukanio, mia be vio
lu na be riano, nina ea vio
mave tiniabene. ²⁵ Mia bogo
na mila kiano jokoluolu jibe
na, naio maka tavukia nalo
na m̃a parinio kulo lu dolu
nalo amilaio. Nalo amila
jokoluolu ka burukija na
temeul nalo, mia naio mila
jokoluolu ka kiano burukija
bereio. Mia nalo, aba amila
ea vio lu vaarakurano ga ka
yuka nonovio, monoka mia
ala tibena rivan dam̃ariga,
ana naio mir̃au ka nonovio
varakurano ka bogo tai na
ga, bisi, ana maka ka mia
aim̃au ka bereio. ²⁶ Ver
Yesu monoka tom̃a rila
kiano jokoluolu tulaka rivior
kariano nalo na m̃a tomu
nalo ajumon ka m̃a amilaio,
nina jibe ka ber jikar ea
tikariano na yetemeriba
binimei bokar vonganei,
naio jo jaklele ea m̃akolkolo
ga, naio mijog bova ka
napano kiano burukija jom̃a
miou bogo nonovio ga.

Mia ea tiiano na Atua bitir-
ilar naio maka tibe na. Naio
mial jukuti na bogo nei ro-
jua voniganei naio binimei
lilie vaataro, ana na mila
napano Yesu binimei miy-
otuba ka kito maka vesiou.
Naio maluvo ka kito naruei
naio mila jokoluolu ka nono

kiano meuliano, mijil lar bajago na kariano. ²⁷ Ea tivelinio na kito tomu nalo, Atua mila ka kito romeul ea yetemeriba, karina rava kovio denio karina romeul bereio ka ravan ea tibu-reiano, ²⁸ mia ea tivelinio na Kristo, naio jibe na bunu. Naio binimeí miyotuba ea yetemeriba nei, karina mila jokoluolu ka naio ka rivar vironiano na kiado kariano nalo, karina mia riyotuba bereio ve valuo nene, maka ka mia rivulu bulag kariano bereio, mia ka rivuru bulag kito den vironiano na kariano na kiado, na ña rabarkar tiniedo eaio, ro-jidom ka mia naio rimeí ril-larur kito.

10

Jokoluolu na Yesu kanano naio bo laka

¹ Kito rosidomii von bereio tuboiano moruo na Mosis kanano. Naio ber saba novo nalo tealó tai, ana mia naio maka riverial nonovio ilivuiiano novo nalo na ña Atua naio jidom ka Kristo rila riyotuba ka kito, mila na tuboiano nei naio jibe ka vaiunu ga, maka ve niosunbue riano nene. Tuboiano moruo nei naio joña beve torogio mugaruei jibe na, naio jiloglog ka kanano jokoluolu nalo, napano ña ajumña amilaio ka yuka nonovio, maka avare, maka ajikia ala rimeravo vatitigio rivu nonovio nalo na ña amila lotuano bijaio. ² Aver tibe na, mia nalo namña amila

lotuano jibena, ñeli mia nalo amei ameravo nonovio ruei na, ajog re bunu ka kariano joalo, ka na mia asidomii re bunu ka mia ala jokoluolu, mia makanio, amonmon ga amila jibe na. ³ Jokoluolu nalo na monoka ala ka ajog ka nalo maka ve kariano tai, mia makanio, yuka nonovio amialio ka napano jokoluolu nalo nei amila nalo ajidomial bereio vovaiano nalo na kanalo, ana amijog ealo ka niamiamo na kariano jo kia ealo vo napano ba bova lie vo. ⁴ Ajumña amijog jibe na bior kialo jidomiano tai jo, aber burukija na buruolu bue marauo ñelina burukija na nani naio mijikia sekon bulag kialo kariano tunñabe? Vite na, ajidom bitovitonia toru laka kanio, ban bano-o na abitiidieio, kialo kariano jo keano vo.

⁵ Ana bior tenalo na, bogo na Kristo riyotuba ka kito ea yetemeriba nei, naio berial kiano ñarabo vou naruei. Naio midu iliano tai napano joa niosi na Iouano Lu, naio ber ka karamñano Atua, naio berinavo

“Jau maka bunu kosidom jokoluolu nalo a ijaiano nalo, mia jau komiñauka batitig mokotenaku ka najamo ka vanso.

⁶ Vite nalo na ña aju amisebio jijenio ba biniu-viniu, jau komial bova ga,
a ijaiano nalo na mer-avoiano na kariano,

maka lele tiniem tiio.

⁷ *Karina, kiniou nojumolu
neberial batitig banso,
neber*

*'Atua, kiniou najaaro ka
nala kanamo sidomi-
ano,*

*nina ga kiniou nebinime
biorio,*

nina tibe ka ga napano

*Niosi Moruo naio bere-
nio ber mia kiniou
nalaio.'"*

Iouano

40:6-8

⁸ Mo bo ka kito rovitii vatitig rivu iliano na Kristo berenio nei. Vite na jukamu napano naio berenio, ber napano jokoluolu nalo bija ijaiano doldolu nalo na mña ajumña amilaio, be kurano ka na mña tuboiano naio berenio ber monoka alaio, mia Atua naio maka tomña rijog rivu kalo, mia naio maka bunu sidom ka mia alaio. ⁹ Karina, vite juo na mña Kristo berenio, berinavo naio mijamo ka naio naruei, ka naio rimeiri rila Atua kiano sidomiano.

Ea vio na, romial napano mñarabo na jukamu na mña amila jokoluolu bior kariano, Atua midu lario ruei, kanano mñarabo juo nene, naio jakiiio. ¹⁰ Ea mñarabo vou nei naruei, Kristo naio mila jibe ka na Atua kiano sidomiano naio berenio, naio jian nonovio mokotenano, ana mila napano kito robinimeiri romeravo a robe lu ea Atua mirano, naio jo jibe na damñariga.

*Jokoluolu na Yesu kiano
naio toboto*

¹¹ Kulo lu nalo na mña ajumña amimau ea bajago moruo, monoka ve tealoo na mña legiano nonovio ga atumolu atua Vio Lu. Nalo ajumña amila jokoluolu sesa nalo damñariga, napano abe vevirare ga bogo nonovio. Jokoluolu nalo nei ajumña amila bior kariano na tomu nalo ajumña amilaio, mia maka lele ajikia avare ka avar bulag bajago na kariano den tomu nalo kialoo meuliano.

¹² Mia kiado parinio toro lu nei Kristo, kiano jokoluolu naio maka tibe na. Naio mila jokoluolu ka kiri vite takurano ga bior kariano nalo nonovio, mia naio mila vaarakurano ga, ana bogo napano mila bisi, ana naio ba jotano mave ea tivelinio vameruo na Atua. ¹³ Atua naio mial Yesu ka mila jibena, berenio ber mia rivar Yesu kiano uolu nalo, rudulo atutano ka naio tibe ka yebe tai napano bijankon jaano eaio. ¹⁴ Maka ver imñauano dolu tibe na ka Yesu monoka rila, bior ka napano naio jian ijaiano ruei, kiano burukija mila kito romeravo, vonganei robo ea Atua mirano ruei, rivanvano-o mia ribisi deio. ¹⁵ Niununo Lu bunu naio miasol iliano ban kito ea vio na, ea iliano tai nanua binimeiri ea naverialiano Jeremaia. Ea iliano nene Atua naio ber jibe nei berinavo

¹⁶ *"Ana vonganei mia kiniou
nevitirilar virakariano
vou tai vija kanaku
tomu nalo bereio.*

*Ea virakariano nei,
mia nala tibe nei.
Mia nodu vatitigio
kanaku tuboiano nalo
atoa kanalo jidomiano
nalo, mia nevivitaui
kanaku iliano nalo
toa kanalo iviso nalo.”
Jeremaia 31:33*

17 Atua naio ber jibe nei, ana
ba lie telisu ga naio miasol
bereio, naio ber jibe nei beri-
navo

*“Mia kialo kariano nalo, vija
kialo vovaiano nalo,
mia nosidomiale re
bunu.” Jeremaia
31:34*

18 Iliano nei naio berial bu-
rumāra viekokoano napano
Atua naio mila ban kito
ruei, ana ver tibe na, ve re
ijaiano dolu bereio napano
romijikia resian ka rivokar
viekokoano rivior kiado kar-
iano ŗelina kiado vovaiano
nalo, bior ka napano Atua
naio mila batitigio bo ruei.

*Kito romerou re ka rava
vaataro kean Atua*

19 Kuruaku nalo a ku-
vivinieku nalo, jibe ka na
mā iliano nalo nei aberenio,
Yesu kiano burukija betavo
ea kiado mārabo ruei,
naruei bo ka romerou re
ga, mia resel ea naio rava
joomo ea Vio Lu napano
Atua joaio. 20 Beamu,

burumāra jagidago na
jaklele ko kanado mārabo,
mia Yesu mokotenano naio
buruŗe, jagidago nei bunu
buruŗe niati juo, naruei
naio betavo ka kito rava
joomo. Vonganei kito rojua
mārabo novo nei naruei,
napano be mārabo vou tai,
a be mārabo na ban kar

meuliano. 21 Naruei Yesu
naio mila kiado mārabo
ba joomo ea vio lu jibe
nei, naio binimei be kiado
burumāra toro lu, napano
bitikar kito nonovio ea
māratavo na Atua kanano.

22 Kiano burukija naio
milakon niamiamo na bova
napano ju joomo ea kito,
kiano uei na meravo novo
naio jekon niabedo binimei
meravo nonovio, ana maka
bunu roimou, mia romijikia
rava joomo. Romijikia rava
vaataro kean Atua napano
kiado iviso be riano, rotu
sikili laka ea naio rober mia
naio rivuku bulag kito re, ka
na mia naio rila vorvoruano
van kito ga. 23 Kito romijikia

romonmonea rivu vatitig
ka mia Atua rila rivu tibe
na van kito, bior damāriga,
naio jomā mila memedu ga
ea venia napano mā naio
berkario. Kito maka bunu
rosidom dede kano, mia
robokar batitig imāuano
na ka roverial van kulo
dolu nalo vite novo nei
na mā naio milaio ban
kito. 24 Ana ea tivelinio

ka kito bereio, bo ka rotu
rosidomii vatitig rivu, roser-
avo mārabo na tutuliano
na kiado jidomiano nalo ka
tiniedo tii kito rivu lie, a
ka ralala imāuano novnovo
nalo van kito rivan lie tibe
na. 25 Maka rivu ka kito
rotuvan bajago na reiasosol
vatitig kito rivu, tavukia
na tealo ajumā amila ruei,
mia bo ka na kito rotumā
rotunukakar kito tulaka
damāriga. Bajago novo nalo
nei monoka rotumā rala van
kito damāriga, ana ver bogo
tai kito reial ka bogokouo

na legiano na maaro atu vaataro, bo ka rovu ka kito tibe na damariga lie vo.

Kito rosidomii kurano re ka Atua kiano tibureano

²⁶ Bo ka kito rovika vikadeniano ea tivelinio na kito napano robokar jikiaiano nalo na ilirianiano ruei. Rovika tibe na, rover ver kito roto von re, rotumolu rotumã rala tanea kariano lie, mia tumãbe ka kito? Sano verdoŝeiano nene, naio jibe nei, ka kariano nalo na jibe na, maka bunu ve jokoluolu tai napano mijikia rivar bulagio bereio. ²⁷ Venia na-

pano ga jo, nina Atua kiano verikariano ka mia sian vironiano na jikili riviorio, vija burumãara jeleig sebi napano mia sisen nonovio kiano uolu nalo. Naina be vite na merouano toru laka na. ²⁸ Ea tuboiano moruo na Mosis kanano beamu, ver toro tai rila korov iliano nei tai, mia tomu ve juo ŝelina ve tolu bereio avirokarlo ka be riano, ka toro na mila jibe na jibe na, mia ve re bunu m̃arabo na tinieiano bereio, mia toro nene mia atelar kiano meuliano ve vaarakurano ga. ²⁹ Ver ala tibe na ka toro na mila korov Mosis kiano tuboiano, mia tumãbe ka toro na bilig taakano ka Atua kenerinio? Mia kanano vironiano naio ve burutomoluo laka na, bior naio mila lelan burukija na virakariano vou napano beamu mila naio meravo ruei ea Atua mirano. Mia Niununo na tiniememiano naio rijog rivova ka bajago na mia naio tinien ser m̃elea

toro na m̃a mila. ³⁰ Mia monoka naio rudu vironiano nene bior Atua naio berkario jibe na ruei. Kiano iliano lu tai naio joa niosi na tuboiano moruo, napano naio ber jibe nei, naio berinavo

“Ka tibureiano na kariano, be kanaku kiniou ga takurano.

*Nesian meran sikili mia sikili rivior kialo vovai-
iano nalo.” Tiut 32:35*

Ana ea vio nene kia ga vo iliano dolu naio ber jibe nei bereio, naio berinavo

“Mia Atua soŝi naio tibure kanano tomu nalo.” Tiut 32:36

³¹ Kito monoka rovitikar vatitig rivu, bior toro na m̃a milala kariano, ka bogo na adu naio toa Atua jumãano ka rivitii naio, naina maka ve tena telisu tai, mia naio be tena merouano memedu.

Bo rotu sikili ka roviniua venia na mia rijikia rimaluvo iorou

³² Kito maka rejikia ka mia tumãbe ea legiano nalo na aju abinimei, mia bo ka rotu rosidomial m̃arabo novnovo nalo namã Atua mijaja kito kanio ea legiano nalo napano abarlaka ban ruei. Bogo na kito romiyotuba ea miamoiano nanua beamu na, maka vesiou ana romidu bogo na jikili laka, napano aju amila kirivova ban kito napano romonea Yesu. ³³ Bogoti tealó, kamu ea tomu nalo miralo, abuku iliano na bova ban kito, bogo tealó aŃele tanea kito ea bajago va

nalo napano kirivova-o mia kirivova. Ana bogo tealo, maka rivan kito mia amila ban kanado bilbilu nalo, ana robano rejikili roju bijalo, romijailo.

³⁴ Kito tealo, abukulo aban ea yimo na lakoiano, ana tiniedo miialo toru laka, roju raba romilavon ka rejailo ka ravar bulag kanalo burumñara jogvaiano napano aju abiniua ea vio nene. Ana bogo tealo bereio, nalo na mña ajermñi ka kito abinimej kar kiado saba nalo, ka avar bulavulag lelan kito, be burumñara laluvuiano ea kito laka. Ana ka bogo na, mia tiniedo serlo re, rajamo ka ga, bior be saariano tai napano joa kito, ka vite nalo na abar bulagio abe tena yetemeriba nei ga, mia kanado tonovnovonalo napano abo laka aju, napano maka ajikia avakovio bogo tai, mia ave kiado bo kanio.

³⁵ Naina naruei burumñara kanado vulaviano napano mia Atua naio sian van kito, ana bior ka ijaiano novo nei naio jokamu ea mirado, maka rivu ka ralaluv bereio burumñara jikiaiano riano napano joa kito ruei, ³⁶ mia monoka rotu sikili damñariga ea Atua. Kiado jidomiano monoka ve tebievi rivu ka rotu rala naio kiano sidomiano nalo, ka mia romijikia rovokar vite nalo na mña naio berkario ban kito. ³⁷ Ana bogo na ka rovokario, ðeli mia ve sio re ga na mia naio riyotuba ka kito, tavukia na

Atua kanano iliano tai napano naverialiano Abakuku naio berialio, napano naio berinavo

“Bogo ve telisu kija bereio, ve sio re ga na, mia toro na toru nei napano ka mia rimej naio maka rijikia tuliliei va lie vo, ana mia naio riyotuba.

³⁸ *Ka bogo na, kanaku tomu na memedu nalo mia amijikia ameul rivu ga, bior ka na mña amonmonea kiniou,*

mia ver neial nalo tai kalo na maka asidom kiniou, vurudidig naio, mia kanaku iviso risaaro re ka naio leleio.”
Apakuk 2:3-4

³⁹ Ana naina maka ve kito nei. Kiniou Maka ve tinieku ka kiato ka kito tomu kinkin na mña romerou ka Atua. Nalo na mña aburu didiglo jibe na, mia monoka ava kovio mia kito, tomu na mña roju jikili ea naio, mia monoka ravokar meuliano.

11

?Viekouoiano naio be venia?

¹ *?Kiado viekouoiano nei, mia roverenio naio be vite venia? Romijikia roverenio naio be bajago na romonmonea vatitig Atua rivu sikili, ka naio mijikia rila kiado jidomiano riluo rivu ea naio ga, mia mijikia rila kiado moneano tu sikili ka rover vite nalo na mña maka rejikia reialio, abe riano aju.* ² *Viekouoiano naio be burumñara vite laka ea Atua kiano vitiano. Jikario*

ea kanado tormoruo nalo na beamu binimej, nina be m̃arabo takurano ga napano Atua mila ka naio rijikia saaro ka tomu nalo. ³ Bajago na viekouoiano nene naio naruei mila kito robitilubar ka be riano, Atua kanano iliano ga naio jii vite nonovio, a naio mila kanado yetemeriba miyotuba. Kiano moroano naruei midu vite napano toro maka rijikia rialio, miñauka vite nonovio na m̃a roju robitii joaio.

⁴ Bo ka kito rosidomial korobido nalo tealó, ka jum̃abe nalo bunu abalea Atua bogo na beamu.

Nalo tai be tormoruo Epel. Ea kiano viekouoiano ea Atua, naio milotu ban naio ka ijaiano tai napano memedu, ana Atua jaaro ka rijeio, naio mial bo loa ka ijaiano na kuruano Ken naio jiano. Mia Ken tinieno mimi, ana naio muetañaria kuruano nene, mia Epel kiano bajago bo na viekouoiano ea Atua, mila Atua mial naio be toro na memedu tai, mia vite nei mijikia rija kito rimej rivokar banei keana vo.

⁵ Tormoruo dolu, naio be Inok. Ea kanano viekouoiano ea Atua, naio maka rivokar m̃ariano. Naio be tormoruo laka ana Atua ga naio binimej burulario jaluvo den yetemeriba nei, naio bavin mave, ana ajiravo naio mia maka alealio. Atua mila jibe na ka naio bior jibe ka na m̃a aju aber, ka bogo na naio joa yetemeriba nei, naio be toro

novo tai na m̃a Atua naio jaaro toru laka kanio. ⁶ Be riano, ver viekouoiano ea Atua naio toa re kito, maka rejikia rala ka na mia Atua naio saaro ka kito. Toro kei napano naio jidom rijikia Atua ea kiano meuliano, jidom rimej vaataro ka naio, monoka riviekouo sikili ea naio tibe na. Naio monoka rimom̃onea ka be riano laka, Atua naio jo, a monoka rivarkar tinieno eaio ka mia naio rila riyu laka van nalo na m̃a ajum̃a abitikar naio.

⁷ Tormoruo tai bereio naio be Noa. Ea kiano viekouoiano ea Atua, naio mila venia na m̃a naio berkanio. Atua berial burum̃ara ueimiya nei banio, ana bogo na Noa naio maka rial kijokijo na tenei tai leleio vo, mia naio mila ga venia napano Atua naio ber kanio, miñauka burum̃ara kanalo uako ka sano m̃aratavo nene amijikia ameul eaio.

Noa kiano viekouoiano na ea Atua milarur nalo nene, mia mila bunu burum̃ara vironiano maluvo ka nalo dolu nonovio ea yetemeriba nei, bior nalo maka amonea. Mia Noa be nalo tai ea taara nei na m̃a amonea Atua, ana Atua milalo amemedu ea mirano.

⁸ Dolu, naio be tormoruo Epraamo. Ea kanano viekouoiano ea Atua, naio monea naio batitig bo, naio jumolu den vio nanua naio joaio, naio ban ea vio dolu tai, napano Atua berkario ka mia rudu vanio. Naio

jo miel ban ea vio nene, maka rijikia ka naio jo ba be na, mia bior Atua bio naio, naio ban ga. ⁹ Naio miel banbano-o mia bogo na naio miyotuba keanio, mia naio javukia ga valauo tai, mia buruvenuo nei naruei napano Atua berkario ban naio. Ana naio joŉa buru kunuano panpano ea vio nene, naio joaio naliko kanano m̄aratavo nalo, jibe ka kenerinio nalo napano Aisak nalo bija kumabinio sesa nalo, napano Yakovo nalo, napano nalo bunu aborkar borotano nei nanua m̄a Atua naio jian banlo ka ve kanalo tobo to. ¹⁰ Ana Epraamo naio boru ea vio nene, naio joaio, mia naio maka rim̄auka m̄ano yimo na toru tai, naio joŉa mon ea ga yimo panpano nei ga. Naio ga bior ka napano naio monmonea ka maka ve kiano vonuo riano vo, mia naio jo ga jibe na, ka mia riva jouro ea burum̄ara komeli na Atua kanano, napano Atua naio bitirilario a mir̄aukanio bija kanano burupati na jikili napano mia maka ajikia avurukorov bereio bogo tai.

¹¹ Tai bereio, naio be tiramoru Sera. Ea kiano viekouoiano ea Atua, naio be m̄abono ka kenerinio motoru neibano Aisak. Beamu, naio maka rijikia rivar kiritete banbano-o binimej be tiramoru, mia naio biekouo ju jikili ea Atua ka mia Atua rive riano ea kanano verikariano van naio vija kanano tormoru

Epraamo, ka mia naljuo avar kenerilo tai. ¹² Mia tormoru Epraamo nene bunu, jibe ka m̄erenio batove ruei, mia kiritete neibano naio bario mila na kanano m̄aratavo nalo binimej telabo. Karina abar sosolilo batove binimej jibe na banbano-o na kanano yati nalo abinimej miroano javukia m̄arvitano nalo na vio iauo, maka bunu ajikia avulukulo ajavukia kurukuti yono na koyou ea tei. ¹³ Mia tormoru nalo nonovio nei na m̄a amonmonea Atua jibe na, mia Atua naio berkar tonovno nalo banlo, mia nalo amijev togio telisu ga, mia am̄arm̄aro ajaluvo den yetemeriba nei. Mia nalo amijikia ka mia Atua rijev togio ga vanlo, mia sian nonovio togio na toru nene vanlo iorou, naruei naio mila abitilubar ka nalo abe valauo ga ea vio nene. ¹⁴ Vio yetemeriba nei naio maka ve kialo vio rimemedu, mia kialo jidomiano jua kialo vonuo riano tai. ¹⁵ Ana ver vio neibano ajum̄a ajidomii m̄lea, naio be buruvenuo nei napano beamu ajuvanio abinimej, ver nalo asidom, amijikia avarp̄iliglo avan ea naio bereio ga. ¹⁶ Ana makanio, mia nalo maka atu tinielo rimaio ka naio bereio, nalo ajum̄a ajidomii ka mia avokar vio dolu tai napano naio bo laka, ajidom vonuo na vio mave ga. Atua naio mila batitig kanalo komeli novo nene ruei, ana naio tinien jiilo toru ka rijog ka na mia atum̄a averenio

ka naio be kialo Atua riano, a napano ajuña aber kiano vonuo, naio be kialo vonuo dañariga. ¹⁷ Ana ea tivelinio na tormoruo nalo nei keana vo, kito rover tormoruo Epraamo bereio, naina ea lavoniano kouo napano naio biniuaio. Ea kanano viekouoiano ea Atua, naio mijamo ka kenerinio takuranolar ga nei Aisak, naio mijamo ka mia rila jokoluolu ka naio bereio. Naina be Aisak nene nanua beamu, Atua naio berkar jikili ban karamãano, naio berinavo

¹⁸ *“Riyotuba ea kenerimo na mia kanamo bajulukuti nalo amei ve miroano.” Jen 21:12*

¹⁹ Ana ka bogo napano Aisak vaataro ka naio rimãaro, Epraamo naio maka vitovtonia ea Atua kanano verikariano nei, mia naio jo monmonea ga ka ver naio monoka ruebin kenerinio nene rimãaro, mia Atua mijikia rila naio rimeul bereio. Ana Atua mial kiano viekouoiano ea naio be riano jibe na, ana Aisak naio maka bunu mãaro, mia karamãano naio mial ka napano Atua mila kenerinio kiano meuliano ban ea juãano bereio.

²⁰ Mo be tormoruo nene tai bereio, naio be Epraamo kenerinio Aisak. Ea kiano viekouoiano ea Atua, naio jian kiano iliano na maaro ban kenerinio juo nei Yakovo naio Isau, naio monmonea ka mia iorou ana mia ilivuiano rimei ea

naljuo tibe ka ga napano naio berkario banlo.

²¹ Ana Yakovo nei bunu naio jibe na. Ea kiano viekouoiano ea Atua, mia naio barkar tiniene ea naio ka mia naio rila rivu van kiano bajulukuti nalo na mia amei iorou. Naio bar kenerinio nei Yoseve, ana Yoseve nene naio bar kenerinio nalo juo. Ana ka bogo titai, bogo napano vaataro ka korobilo tormoruo Yakovo nene rivakovio, mia naio jumolu ka kiano nasitogo naio jurubanini ka parinio naio milotu ka Atua, ana naio berial kanano verikariano na ilivuiano ban kumãabinio sesa nalo abiniu.

²² Karamãalo tormoruo nei Yoseve, naio bunu bo ka rosidomial naio. Ea kiano viekouoiano ea Atua, naio monmonea jikili ka mia Atua tuvan re kulo Israel atubo ea vio Ijivi, mia naio rivuru bulaglo avan bereio ea kialo buruvenuo rimemedu. Naio berial jibe na, ana bogo napano kiano meuliano vaataro ka ribisi, naio ber bunu ber, ver naio rimãaro mia ativin re naio to Ijivi, mia monoka adu riva ativin toa kanalo vio.

²³ Tai bereio be tormoruo Mosis, kanano tormoruo juo nene. Ea kanalo viekouoiano ea Atua, naljuo maka amerou ka parinio tubo Vero kanano tuboiano na kirisikili nei, mia bogo na naljuo nene kenerilo Mosis naio moluo, amial naio kirinovo tai vo, ana maka ajamo ka naio ka auebinio, mia amidu van batitig naio

jo banbano-o bokar siberio tolu.

²⁴ Ana Mosis nene, naio bunu, bogo napano naio miluo bavin naio toru ruei, naio bunu be toro na moneano. Ea kiano viekouoiano ea Atua, naio maka sidomii m̃lea ka sio novo na amidu banio jibe ka parinio tubo Vero kenerinio vevinio kenerinio, ²⁵ mia naio jidomii temi laka ka kiano bajulukuti dolu nalo, tomu nalo na abe Atua kanano m̃aratavo. Naio juva vonuo na tor na toru kanano, bija yetemeriba nei kiano bajago nene nalo, napano kanano saariano nene naio be tena banei ga, ana naio ba miasol kanano tomu nalo, ea meuliano na bogokouo napano m̃a kulo Ijivi nalo ajuṃa amila banlo. ²⁶ Ea bogo na, naio joṃa bitikuku ilivuiano nalo napano rijikia rimaluvo kano, ea bogo na jo binime iorou. Naio bitii ka ver naio jo bar jogvaiano bijalo bior Naverikariano kiano im̃auano, naio bo loa ka naio rivar kanano tonovno nalo ea kiano meuliano na monmaio ea tor na toru na Ijivi kunuano. ²⁷ Ea kiano viekouoiano ea Atua, naio maka rimerou ka venia napano parinio tubo Vero mijikia rila vanio, mia juvan vio Ijivi, jibe ka napano Atua ber kano. Naio maka bitikar Atua mirano, mia naio joṃa monmonea ka ga jibe ka napano naio joṃa bitikar naio ka mirano memedu ga. ²⁸ Bereio bunu, ea kiano viekouoiano ea

Atua naio bokar batitig m̃arabo na ioruriano napano Atua ber kano, ana naio mila kiano tomu nalo apiligvilig burukija na nunu ea kialo m̃aratavo, ana bogo napano Atua naio miila kiano nailiano na m̃ariano binime ka rudu vironiano van Vero, naio bar laka jel mave ka kialo vonuo nalo, mia naio ba muebinvin nonovio kiritete motoru ea vonuo nonovio na ea vio Ijivi.

²⁹ Ana iorou ka naina kulo Israel nalo aburo den Vero, amiel aba abokar tei napano be Teimia. Ea kialo viekouoiano ea Atua, abarkor aba tivelinio ea burum̃ara tei nei, amiel aba jibe ka ga na m̃a amiel ea borotano ga. Mia nalo na Ijivi aju abinime iorou kalo, naruei nalo amilavon ka aiel avarkor tibe na bunu, mia burum̃ara tei nei naio binime miasol bereio, miladomdomlo am̃arm̃aro nonovio. ³⁰ Ana bogo napano kulo Israel nalo amiel aba lie vo, aba aboru ea burum̃ara komeli na vio Jeriko, bija kiano kulo na mira nalo napano aju jouro ea kanano burum̃ara tagvoru napano burutomormoruo napano amivon be puruveru jeliviv. Ana ea kialo viekouoiano ea Atua, kulo Israel nalo amiel abulan jaalo jeliviv ea komeli nei ba bokar bogoti ari, banbano-o bogoti aluo nene, amialio ka napano Atua mila tagvoru nalo nei ajibirbili vaarakurano. ³¹ Ana na jouro ea komeli

nene, be tira tai napano jo, napano beamu naio be tira na m̃arabo, siano be Reavo. Beamu tomu juo na Israel amiilalo ka ava aviti venalulua kulo Jeriko kialo vio, nalo abano ajoluku jouro Jeriko, ana bogo napano ajuaio, tira nei milavanlo ajua kunuano, naio miija tomu juo nei toru. Mia nalo, aba amila ea vio lu vaarakurano ga ka yuka nonovio, monoka mia ala tibena rivan dam̃ariga, ana naio miñau ka nonovio varakurano ka bogo tai na ga, bisi, ana maka ka mia aiñau ka bereio.

³² Naina naruei be kiado tormoruo tealo napano abe burupati toro na viekouoiano re nua. Mia romijikia rava lie vo, bior ka sio miroano ju keano vo, javukia tormoruo nalo nei Kition, Barak, Samson, Javta, bija parinio tubo Teviti bunu a Samuel bija naverialiano dolu nalo, mia namial jibe ka bare beamu vo, maka bunu ve bogo na rovivitaui bulag kialo tukunuano nalo riviniu riveve terakurano.

³³ Be riano keana, ver romijikia rojog tukunuano nalo nei ga, nalo bo mia bo. Ea kialo viekouoiano na ea Atua kiado tormoruo nalo amila burum̃ara vite nalo telabo. Reialio ka napano amila mira, ajovulu buruvenuo dolu na jikili, amila napano tomu na vio ga nalo monoka aiñau takii tuboiano memedu, mia ajikili ka avokar venia napano amijikia ka Atua

naio berkario banlo. Kulo dolu nalo abukulo aban ea bulukuñili na laion ka aserlo, mia maka ajikia aserlo. ³⁴ Mia abukulo aban ea burum̃ara kenieno sebi na, ana mia maka rijikia sisenlo leleio. Bogo tai ana abiniua iobogu na mira, mia aburo denio bo ga, mia bogo tealo uolu nalo amila kikilo banbano-o na kialo moroano batove, vaataro ka ribisi. Ana iorou kanio, ana amial ka napano abavin bereio, abinimei jikili laka, naruei amila mira ka kialo uolu na ea buruvenuo dolu nalo, banbano-o na ajovulu lo, amijil bulaglo aban bereio.

³⁵ Nalo tealo kalo am̃arm̃aro ea bogokouo nei, naruei koalo nalo ajum̃a ajiglo toru, mia amiilo ka napano Atua jian bereio niunulo banlo, bar bulaglo ameul bereio. Nalo tealo bereio, uolu nalo amila jaleleano telabo ea mokotenalo, a amilavonlo ka ver aber maka bunu amonea ga Atua, mia nalo atuvanlo avan bereio. Mia verver nalo aber kaaju amonmonea, mia ala kilkil ealo liei vo.

Mia ea bogo na, Atua kiano tomu nalo aberver ver nalo ala sikili liei kalo, mia bo ga, mia nalo maka ajikia atuvan kialo Tubo. Nalo tinielo maio ga ka bogo na mia naio rilalo asikil atu bereio, nalo ajidom asikil atua mirano napano asaaro, a nalo aimou re bunu kanio. ³⁶ Nalo tealo amiorakarkarlo ana abitivlo ea vio medave kamu ea tomu nalo na m̃aaju amilkuei

kalo m̃elei. Mia nalo tealo, bogo na amiorkarlo, nina ea m̃armieni na teremi, naruei abukulo bijaio ban ea nalakoiano. ³⁷ Tai bereio, ajubabinvinlo ka puruveru, a tealo abijikokorov mokotenalo beve juo ka so, a tealo ajebinvinlo ka iobogu na mira. Nalo napano ver maka am̃aro, nalo bunu vite nonovio kirisikili banlo. Nalo maka ve kialo titai, jum̃alo bulati laka, naruei amijulu bulag kulukuti nani p̃elina nunu bunu ka mia mila niabele bitunu, mia vite nonovio bova ga banlo julaka ga, mia tomu dolu nalo maka aialerinio ealo, amila lelanlo toru laka. ³⁸ Nalo na maka ve kialo vonuo, maka ve kialo vio na mia avan eaio, naruei amiel janea vio nalo na be teauo p̃elina ea burusuku,aju janea buluvai nalo.

Nina be tomu na viekouoiano nalo, nalo ajibe na naruei. Yetemeriba nei naio bijuku bova toru kalo, jibe ka napano romijikia roverenio roverinavo yetemeriba nei naio maka bunu rivare ka kulo novo nalo na jibe nei atuaio, tomu nalo nei bo ka atua ga kanalo vonuo na jo mave. ³⁹ Romial ka nalo nonovio napano roberilo ruei, abiniua bogokouo telabo laka mia maka ajoru,aju jikili dam̃ariga, mila kito robitii kialo viekouoiano ea Atua naio burutomoruo, a be riano. Nalo abe tomu na virakariano moruo na beamu ga, ana ajum̃a amijog Atua kanano verikar-

iano novo nalo, ka mia naio rila m̃arabo na ka mia ajikia avokar meuliano napano maka ve jukuti nene tai, mia maka aial m̃arati na verikariano nene maluvo keanlo.

⁴⁰ Mia Atua naio jo bitii boka rila m̃arabo vou tai van kito. Mia naio mila Yesu binimei mila kiano im̃auano bisi, mila na nalo na beamu nei, bija kito, kito nonovio robar m̃arati na Atua kanano verikariano nei ea m̃arabo takurano ga a ea bogo takurano ga.

12

Rovitii Yesu ga, ka naio jikili juvulu bogokouo nalo

¹ Mia nalo nonovio napano roberilo ruei, nalo ajibe ka burupati tormoruo nalo na burum̃ara viekouoiano, napano be kialo burum̃ara taara na ajumolu ajum̃a amial kito, naruei ajum̃a abitii kanado viekouoiano ka kito rejikiti jum̃abe. Vite venia na m̃a monko kiado m̃arabo, monoka rovukulario, a kariano nalo na m̃a abivikakar tanea kito, monoka ravar bulagio, ka mia ve p̃irido ka retikiti ea burutili m̃arabo na tebievi na jokamu ea mirado, ka na jidomiano na tuvaniano maka toa kito leleio, mia kiado jidomiano ve tebievi ga rivu.

Sirarago ka Yesu ga

² Kito rovuku mirado ea Yesu sikili, napano m̃a jikili ju ea juluvati m̃arabo iako. Naio be burupati m̃arabo

na viekouoiano, a naio be jukuti nene, mia bogo na tiniedo maio ka naio, mia naio rije moroano van kito. Romijikia rosidomii jumabe ka bogo na mña naio jomña bar niabejalele nalo a mijog kirivova mave ea mñakolkolo, naio jidom bea ga ka bogokouo na naio jo biniuaio. Naio midu kiano jidomiano jo jikili ea burumñara saariano napano jokamu ea mameriniano, rivano-o mia naio tovulio, napano vonganei naio jomña jotano ea Atua jumñano vameruo, ea kanano vio lu napano loa laka tiniabene. ³ Mia bo ka rotu tiniedo rimaio ka Yesu, ea bogo na tomu na bova nalo nei ajumña ajuba naio ka iliano na bova nalo, a tinielo jer mñelea naio jibe na, mia naio mijamo ka naio ga ba bokar jukuti nene. Jibe na, kito bunu bo ka tiniedo rimaro re soþeli ka inñauano, maka rejikia romerou, maka rosidomii ka mia rovuro ka venia napano monoka ralaiio. ⁴ Peli robe-riamña romijog bova ka mña romila mira ka bajago na bova bare, tiniedo mñaro, mia kito maka rovokar vo venia nanña Yesu milaiio, maka rotuko vio ka kariano-o mia sado burukija riio lele niabedo kario. ⁵ Mia bo bunu ka maka tiniedo ribobogia iliano na tunukakariano na karamado Atua naio ber ka kito, na naio bio kito jibe ka robe kenerinio, napano naio berinavo

“Keneriku, ver kiniou neial rivu ka jogvaiano tai

rimei rivokarso, mia jau keiakurano ea re, þeli na ver bogo tai neial ka monoka nodu vironiano vanso, mia kanamo jidomiano rioru re,

bior kanaku bajago na mia mña noverloglogso kanio naio jibe na naruei.

⁶ *Ver nalo na mña kiniou tinieku jiilo, bogo tealó monoka nalalo ajog rivova,*

a nalo na mña nebe karamñalo, mia bogo tealó monoka nevitivilo.” Ilimasou 3:11-12

⁷ Tibe na, ver bogo tai jau keial ka jibe nei banso, mia monoka kodu ga tibe ka mñarabo tai napano Atua naio jidom ka mia riverloglogso kanio, naio jidom rivuririi kanamo meuliano. Kito nonovio na mña robe teta, roju mña romila jibe na ka kenerido nalo, naruei ver Atua rial kito tibe ka kenerinio, naio monoka rila tibe na ka kito bunu. ⁸ Tena be kiado ka mia kito rovinu rovokar, mia ver rila re ka kito tai, tibe na mia naio rial toro na tibe ka maka bunu memedu ka ve kenerinio, mia be tete nalo na karamñalo toro dolu na kovio tai bereio. ⁹ Mia beamu, kito robiniu, bogo na karamñano ajumña amila vironiano ban kito, maka rosidomio, be riano, voniganei robitilubarío ka nalo amemedu ga, mia mila na rabamenealo loa laka. Tibe na ana bo ka ravatove ka niunudo na naio

be karamālo, rasaaro ka venia na naio mila miyotuba ka kito, bior naina naruei be m̄arabo na meuliano.

¹⁰ Karamādo nalo ajum̄a amije vironiano ban kito ka yuka nalo na m̄a robe kiritete kia ga vo, amila jibe na ka ajidom aber mia rivu kalo bereio, mia bogo na Atua midu vironiano ban kito, naio mila ka mia rivu lie van kito vo, ka mia kito bunu rojikia rovokar kiano meuliano lu. ¹¹ Vironiano naio be titai na ka bogo na ravario, mia naio maka sese leleio, naio mijeaa laka. Mia iorou kanio, ver kito rajamo ka naio riverloglog vatitig rivu kiado meuliano, mia naio rivar sano m̄arati na bo, napano bajago na melumuiano vija tum̄aroano, vija bajago na be lu a memeduano. ¹² Tibe na, be kurano ka venia na m̄a kubiniualo, mia kamiu kuvila von ka kuvila tavukia na m̄a naverialiano Aisea naio ber beamo ruei, na m̄a naio berinavo

“Kuvitiri bulag jumemiu na m̄a melukluku jaklele, kuvilalo aikulkulu bereio,

a sudu jaamiu na m̄a aju amemebiju na, kuvilalo asikil bereio.” Ais 35:3

¹³ Jibe na, kamiu bunu kuvila kenemiu m̄arabo nalo amemedu rivu, ana kene-miu jaba nalo napano amiel jakio, mia jaalo riva rivova lie re, mia amijikia amei asikil bereio.

¹⁴ Vite juo na m̄a ratam̄i ka rovokar tulaka atibe na.

Tai, naio bajago na bilbilu na bo vija kulo dolu nalo, a tinene, naio be bajago na meuliano lu na m̄a toro monoka toaio ver naio jidom rial Atua na loa laka mirano. ¹⁵ Ana monoka kuvim̄auka im̄auano m̄ele ka mia ve re kamiu tai tikiti mia rijoru rimebi ea m̄arabo togio, napano maka rivokar Atua kanano tiniememiano vo. Kuvitigar vatitig bunu rivu ka kiri pati na mijeaa tai na telisu ga rimei re ka rivijurukar kiamo iviso. Verver makanio, bisi mia riluo rivar m̄arati na bova nalo ve telabo ea kiamo meuliano, a napano niamiamo nene rila niegeniege namoneano lu dolu nalo kanalo meuliano na bo nalo. ¹⁶ Monoka ve re bajago va na sum̄ano vija tira rimonea kamiu, a monoka ve re bajago na tiniel ribobogia batitig Atua, tibe ka Isau re nua naio milaio. Isau nene, Atua bijauialario be motoru na karamāno ka mia mijikia rivar nonovio kiano jajum̄ano, mia ka bogo tai ana naio jijerio, mijugun bonoti vaatei na bo, napano kuruano maratoru Yakovo naio jonio, ana naio p̄iliv̄ililar ka Atua kanano tiiano na kiano meuliano, berika kuruano ber “Ei kodu vaatei nei van kiniou voniganeii ga, a teta jajum̄ano napano kanaku, mia nesian vansom̄.”

¹⁷ Ana jibe ka kito romijikia ruei, ka iorou kanio ana Isau naio berenio mia rivar bereio kiano jajum̄ano nene, mia aberbureio ga, bior ka naio p̄iliv̄ililaro ka

ruei. Mia naio mijog bova o-o jidom riviligio, jegi mia kiride ga. Naio jidomii bereio, ber ver naio rila re ga, ana bo, mia voniganeî bano bisi.

Sinai burusuku na yetemeriba, bija Saion burusuku na tiniabene

¹⁸ Bo ka kito rosidomii ve telisu kija bereio ka tivelinio na tuboiano moruo na beamu vo, rivija Ioluano Vou na bo na Yesu kanano napano binimeî voniganeî. Vite juo nei abe dolu laka garuei, mia vite nei kito romijikia rovitilubar ea salo burusuku nene ve juo.

Burusuku na tuboiano moruo, nina naio be burusuku Sinai, napano ea yetemeriba nei ga. Kiado tormoruo Ju nalo amijikia amialio ka miralo, naruei amial ka naio be burum̃ara jeleigio vio na miroano, napano sebi joaio, a be bolu nene napano vio nene kiri bobogio ga, bija kiano suku nalo napano melijokouo jovukoio jo, mia jegi tai napano jom̃a miuvuvu jan eaio. ¹⁹ Mia kiano burum̃ara pasimeduo miaga m̃eleia, mia amijog joono tai mil napano kiri temi kar ga jo, m̃ila amerou mia amerou m̃a ajegi aber mia naio river re bunu titai vanlo. ²⁰ Nalo amial ka vio nene be lu laka, ajerako jikili mia kirisikili, ka temeul venia nam̃a ban vaatara ka burusuku nei, tokol luvlulu ga, mia monoka atubabinio ka rim̃aro. ²¹ Mia tormoruo Mosis naio mial vite nalo

nene, mia naio bunu merou, naio berinavo “Lerinio, kiniou nememebiju ka nam̃aro.”

²² Naina naruei be burusuku lu na tuboiano moruo re beamu, mia vonganeî kito maka bunu m̃a ravan eaio, robinimeî ea burusuku lu na Ioluano Vou na bo burusuku Saion nei. Naina jo tiniabene, napano be burum̃ara bulukomeli na Atua na meul kanano naio joaio, naio be Yerusalemo vou na vio mave. Naio bujo magmago ka nailiano nalo, miroano mia miroano napano maka ajikia avulukulo, napano abitiri bijiilo aju janea vio ka ala iouano na saariano. ²³ Mia iviso kalo, kito taara na namoneano lu nalo rotu vio takurano, napano rojibe Atua kenerinio motoru nalo, napano romidu jajum̃ano ruei. A bija kito bunu, niununo na kanado m̃ariano nalo aju, nina nalo napano amemedu bo ruei ea yetemeriba nei, ana bogo na m̃a am̃aro, abur bulaglo aba aboru ea jukuti na m̃arabo na ioruriano, napano aju bo ea vio nei. Mia toro na tibureiano tai bunu naio jom̃a jotano mave ea vio nene, nina be Atua na vite nonovio. ²⁴ A bija vite dolu na bo nene nalo napano ajua kiado burusuku lu na Ioluano Vou na bo nei, mia romijikia reial Yesu, vija kiano burukija na miou, napano m̃a aṗiligṽilig ea kiado iviso nalo ka rila romeravo. Kiano burukija nei, naio maka tibe ka

burukija na tormoruo Epel re beamu, na mña ajumña aber naio be burukija na mña wemaren toro, aber bunu be burukija na riuemeran na bova, mia Yesu kiano naio be burukija na milarur toro a naio be burukija na viekokoano. Yesu mila tanea keana, ka naio jikili ju iviso ka Atua bija toro, naio mila virakariano vou ka tom juo nei ju jikili bo, naio milalo aja burukuti bo bereio.

Iagago Vatitig ka Atua joono

²⁵ Tuboiano moruo re beamu, naio jibe ka ililaboniano tai napano miyotuba ea yetemeriba nei, a ioluano vou na bo, naio jibe ka ililaboniano tai na miyotuba ea vio tiniabene. Nalo na mña abilig taakalo ka tuboiano moruo, maka ajikia avuro ka kialo vironiano leleio, naruei ver tibe na, mia tumñabe ka nalo na mña abilig taakalo ka ioluano na bo? Mia nalo avuro kulu kija re na. Tibe na, mia bo ka raiagago vatitig ka Atua joono, bo kito roduio. ²⁶ Ka bogo na mña Atua mil ban nalo nanua na, kiano iliano kiritemi tanea naio mila borotano mikulkulu, avona bisi, ana kiano verikariano tai naio berenio bavin lie ka naio bereio, naio berinavo

“Bogo tai bereio mia kiniou noikulkulu vatitig ka vio nalo, maka yetemeriba nei ga, mia vija rera garuei mave vaarakurano.” Akai 2:6

²⁷ Mia iliano na ea vio nei na ber “Vaarakurano bereio,” naio ber titenia. Naio berenio Atua mikulkulu ka vio vaarakurano ruei, ana kiano jidomiano jikili ka mia rikulkulu vitii bereio saba nalo. Ka legiano na maaro mia naio rijagdag boŵeio ka yetemeriba nei, vija vite nalo nonovio na mña jiilo ajuaio, naruei mia vite na mña maka rijikia rijagdag boŵeio kanio mia naio tumolu tu sikili tubo tu. ²⁸ Titai ga naio mijikia tu sikili tubo tu jibe nei, naina be kiado Atua kiano navenatuboiano nene, a siva toru laka ka na mña naio midu kiado meuliano jo bo joomo eaio. Bo ka bogo nonovio rodu lotuano na bo tai vanio ka mia naio mijikia saaro kanio, mia robitilubar ka naio be lu laka, a rotovon naio. ²⁹ Bior kanado Atua naio be sebi napano jumano nalo amijikia asisen nonovio vite nalo rivano-o riviniu kokoio.

13

Bajago nalo na mña Atua naio jaaro kanio

¹ Iliano tealó bereio ka rijai kamiú ajibe nei. Bo ka kamiú kuvitumña tiniemiú riia kamiú damariga, tibe ka na mña kamiú kube m̄aratavo takurano ga bija Kristo. ² Mia kamiú tiniemiú riia re kamiú ga, mia tiniemiú riia bunu valauo nalo, kuvisaaro ka kuvitikarlo ea kenemiú vonuo nalo. Bo ka kuvila tibe na, bior ka na mña bogo tealó, maka ajikia,

mia valauo nalo na m̃a kumitu kubitikarlo, nalo abe Atua kanano nailiano nalo. ³ Kuvisidomial nalo na m̃a ajua nalakoiano, kuvar bitiran kanalo jogvaiano nalo, na tavukia ga napano abuku kamiu bunu kumitu bijalo. Mia kamiu tiniemi ribobogialo re bunu nalo na m̃a kulo dolu nalo amila lelanlo, bior ka kito robiniu rojua vio yetemeriba nei ga, monoka rajai kito ka ravar bitiran bogokouo nalo nam̃a robiniuaio. ⁴ Bo ka rovinu rovitii vatitig bajago na soriano naio be kirinovo tai a be vite lu, ana bior vite na, maka rivu ka niamiamo tai rimei rila niegeniege jogu novo napano aboeio ban naljuo neibano ajoro, bior napano aberkar ka mia nalo avuru re bunu dolu. Mia Atua rije tibureiano van nalo na m̃a amiel janea vio, jibe nalo napano ajoro amila siakaiano p̃elina m̃eiaku bija niatira amila siakiano. ⁵ Kuvitkar vatitig ka kodu re veru naio to tukamu ka kanamo meuliano. Bo ka mia kala jau kasaaro ga ka venia na telisu napano naio joa jum̃amo ruei, bior verikariano na Atua kanano napano naio jom̃a ber jibe na, berinavo

“Mia kiniou notuyanso re bogo tai, maka nejikia novilig taakaku kaso.”
Tiut 31:6

⁶ Ana bogo na m̃a tiniedo maio ka nina, naio mije mo-roano ban kito bereio, ka romijikia roverial iliano na niosi na Iouano, na binimei

be kiado iliano, roberinavo
“Toro na m̃ija batitig kiniou naio be Atua sofi ga naruei,

mia kiniou nomerou re bunu, toro dolu naio mijikia rila venia na vova van kiniou bereio?”
Iouano 118:6

⁷ Vite dolu, bo ka kamiu kuvitu tiniemi rimaio ka kenemiu navu-rimaraboiano nalo, napano ajukamu ka aberial Atua kanano iliano beamu ban kamiu. Kuvilavon ka kuvitii vatitig m̃arati napano naio miyotuba ea kialo bajago novo na kialo meuliano, a kuvilaii kialo moneano na jikili ea kenemi meuliano nalo. ⁸ Nalo amonmonea bo, ana kito bunu romijikia romonea, bior Tubo Yesu Kristo naio rive dolu re bogo tai, naio bare ga ka naniovo, a banei, a beni bunu rivano-o mia maka rijikia ribisi.

⁹ Bo ka rover bunu ka kamiu, ka kuvitkar vatitig kamiu rivu, ka iliano dedade nalo a verloglogiano vovu nalo amei re avuru bulag kamiu den burusio na bo neibano kumituaio ruei. Tomu tealoo ajidomii m̃elei ka jokoluolu lu nalo, bija salo bajago lu likiliki nalo, mia m̃arabo nalo na amim̃auka sinaniano nalo nei maka ajikia ajai kialo meuliano nalo. Vite takurano ga na naio mijikia rila kiado iviso nalo sikili rivu vatitig, nina be Atua kiano tiniememiano na bo ban kito. ¹⁰ Sinaniano nalo tai na jibe na, nina be sunbue na jokoluolu napano kulo lu nalo ajurña

abuku jua boda. Abolkouo kanio, amila iñauano bisi ana iorou kanio ana ajen jibe ka salo sinaniano nalo. Kulo lu nalo nei nalo ameul, ea sinaniano na boda nei, mia kito na mña romonea Yesu, maka rotumña rosinan ea boda nene, mia be kiado boda dolu tai na naio jo, napano romeul ea jokoluolu napano abuku joaio, napano kulo lu nalo maka avitilubarario, mia maka ajikia asinan eaio.

¹¹ Nalo ajumña amila kialo jokoluolu nalo nene, naruei tai naio be dolu kija, jibe ka napano jidom rila tovorovo na Yesu kiano mñariano. Jokoluolu nene naio na mña aberenio be ijaiano na viekokoano rivior kariano, naruei bogo napano parinio toro lu mila nina, naio maka rudu momon temeul niabene riva joomo ea vio na be lu laka, mia naio bar ga burukija nene ba jua boda nene. Mia niabene temeul nei, abar ba tavio ea komeli bereio, ana amisebio.

¹² Nina jibe ka ga na mña Yesu milaio, napano naio bunu amidu naio ba tavio ea burusio na komeli, amila naio mijog bova banbano-o na kanano burukija miou dabo nonovio, napano maka riou kurano, mia miou ka rila kito kiano tomu nalo romei rove lu rivu kamu ea Atua mirano. ¹³ Ana bior Yesu naio jaaro ka rila tibe na rivior kito, kito bunu monoka rasaaro ka ravavin vija naio ea vonuo tavio, napano tomu nalo ajumña

abitiidie kito jibe ka na mña ajumña abitidie naio, mia kito ravar jogvaiano jibe ka na mña naio bario bunu. ¹⁴ Verver rivova van kito ea yetemeriba nei tibe na, mo bo ga, bior maka rotumña rosidomii ka mia rotua komeli tai ea vio nei napano jo julaka ga, mia rojumña romidu kiado jidomiano joa kiado vonuo memedu ea komeli vou napano roju raban ka keana.

¹⁵ Jibe na, bo ka rosidomial ka Yesu, naio bijuku bo laka ban kito, naio betavo ea kiado mñarabo, mia rodular Atua siano tulaka kanio. Rala re sida ka temeul nalo vanio, tibe nalo re nua, ana iliano nalo na amiyotuba ea niado ka rudular naio ajibe ka mñarati tai napano jesei bo laka banio. ¹⁶ Ana kito tiniedo ribobogia re ka rala iñauano na bo nalo, bior nalo ajibe ka sida napano romijikia ravar van Atua. Mia tai napano naio jo jaaro toru kanio naio jibe ka ver kito rala rivu damñariga van kulo dolu nalo, rasaaro ratan ka kiado saba nalo vijalo.

¹⁷ Vite ta bunu bereio, na naio bo ka kito monoka romonmonea kiado navurimñaraboiano nalo, a monoka rasaaro ka rotutano ka kanalo iliano nalo. Naloaju amila vio jikili ka abitikar batitig kito bo, bior kanalo tomu na tortoru nalo na mave kalo ajumña abitii kialo iñauano nalo a kialo bajago nalo bunu. Verver kiado navurimñaraboiano nalo, kialo jidomiano nalo amñarmñaro, ana mia

im̃auano nonovio rivoa, mia ver romonmonea nalo rivu, ana mia rila im̃auano ve temi laka re vanlo. Mia asaaro kanio ana mia rivu lie bunu rivan kito tomu na im̃auano nonovio.

¹⁸ Bo ga, ana vaataro ka iliano nonovio riviniu-viniu naruei, mia kumemi numisidom nuvika bunu den kamiu ka kuvisidomial kumemi ka kenemiu volkouano nalo, rivior vio na kirisikili nei na m̃a kumemi numituaio voniganei. Kumemi maka nuvial kar ka torokoriano naio joa kumemi, mia kenememi jidomiano naio meravo bo ga, ana numitum̃a numisikili ga numitua bajago na bo napano memedu ea tomu nalo miralo. ¹⁹ Mia kiniou nojidom laka ka kuvolkouo ka ala iliano nalo nei amemedu vatitig soṑeli, ka mia nejikia notumolu den vio nei neviedu kean kamiu rivesiou re. ²⁰ Kiniou nojom̃a nobolkouo ka kamiu bunu, ka mia Atua rijai kamiu. Naio be Atua na tum̃aro, a be Atua na tinien miia kito kiano nunu nalo, naruei naio miila kiado Tubo Yesu naio binimeei ea yetemeriba nei, naio binimeei be kiado toro na toru na bitikar nunu nalo, kiano burukija naio miou ka rivitirilar virakariano vou nei napano mia naio to toboto. Naio be Atua nene kiaga vo bunu napano Yesu mijamo ka kiano meuliano banio, naruei naio burulario den m̃ariano, bitirilaro meul bereio. ²¹ Ana kiniou nabarkar tinieku ea naio ka mia naio sian vite novnovo

nalo riviniu napano kamiu kuvisidom ka kuvila kanano im̃auano ea yetemeriba nei tibe ka na naio jidomio. Naio jo mim̃au ea kanado meuliano nalo beve terakurano ea ga Yesu Kristo, ana naio jo mim̃auka batitig kanado bajago binimeei jibe ka na naio jaaro kanio, ana mia kito reiaia naio ve toru laka riviorio, rivanvano-o na mia rijikia re ribisi, Mm.

²² Kanaku m̃aratavo nalo na ea Kristo, nebivitaui m̃esi nei biedu ban kamiu, be kurano ka maka ve tebievi laka, mia ver kuvial tum̃abe ana mia tiniemiu ser m̃elea re kiniou, mia kuvidu tibe ka kanaku iliano na ijaiano ka rijai kamiu ga.

²³ Kiniou nojidom neverial van kamiu ka kuvijog ka kuruado nei Timoti, amijamo ka naio batavio bereio ruei den nalakoiano, ṑeli mia naio rimeei sel ea vio nei vesiou re ga, mia kumemi ve juo nuviedu ka nuviadu ka kamiu.

²⁴ Kumemi numisidom ka kuverial van kenemiu navurim̃araboiano nalo, vija Atua kanano tomu dolu nalo, ka kumemi numitum̃a nubika ka nalo ajum̃abe na,aju bo ṑelina jum̃abe, a nalo na vio Italia napano m̃a ajua vio nei nalo ajidom aver bogiano bo van kamiu bunu. ²⁵ Kanaku iliano na maaro ea vio nei naruei, neberinavo mia Atua kanano tiniememiano novo a kanano tinievuiano naio to vija kamiu nonovio.

Mesi Napano YEMESI Naio Bivitauiaio Verialiano Moti

Tukunuano bulati na niosi nei

Yemesi kiano mēsi, naio bar iliano novo nalo napano ka verloglog Atua kiano tomu nalo napano aju beve terakurano ea vio nalo ea yetemeriba nei. Yemesi ber jamerjiano miroano ka rijai tomu nalo, ka ajev jidomiano a jikaiano novo bunu. Ea mēsi nei naio berii vite miroano napano namoneano nalo monoka asidomkario a monoka alaio. Naio berinavo napano be taliñasa, naio monoka saaro bogo na Atua midular naio binimei mave, a namoneano napano be sanibaiano, naio monoka saaro bogo na Atua midu naio jo yetano. Naio berii bajago novo napano toro monoka rilaio, a naio berinavo namoneano moneano bija iñauano monoka ava vio takurano. Naio berinavo toro napano jo mila bajago novo nalo ka rijai tomu dolu nalo, mia kanano moneano jikili. Mia Yemesi berii vite nalo na amila vonvon toro, a naio berinavo toro napano vite nalo abinimei amila vonvonio jo ana naio bokar bajago memedu, naio mijikia rijog rivu. Mia naio berii bajago napano namoneano monoka

re rila ea niono ka river vite va nalo, mia naio monoka rila ka riiaia Atua. Mia naio berii masouano napano Atua jianio, a bajago napano tomu nalo aju amila baravo, a bajago napano tomu nalo abe m̄arou laka, a bajago napano toro kiano jidomiano tebievi, a berii volkouano napano be kiano veridoŋeiano.

Vite burtumoruo napano Yemesi berii ea mēsi nei, nina iñauano bija moneano, napano naljuo monoka avior biju ea namoneano nalo ka amijikia ala vite ka atakii Atua kiano jidomiano.

Torogio nalo na niosi nei

Iliano moti 1:1

Bajago na moneano bija

na m̄asouano 1:2-8

Taliñasa nalo bija saniba-
iano nalo 1:9-11

Vite nalo na lavonvoniano
na toro kiano moneano
1:12-18

Toro monoka rijog
Atua kiano iliano vija
monoka rila vite nalo
napano iliano nei bere-
nio 1:19-27

Iliano na tukovio ka toro
napano bitii va ka toro
dolu 2:1-13

Moneano bija iñauano
novo 2:14-26

Namoneano monoka vi-
tikar vatitig ka kiano il-
iano 3:1-18

Namoneano bija bajago
nalo na yetemerba 4:1—
5:6

Vite dolu nalo napano
Yemesi berenio 5:7-20

Iliano na be moti

¹ Kiniou Yemesi, kiniou nobe toro na ña nemila Atua kiano imauano, a kiado Tubo Yesu Kristo kanano, napano nejirii ñesi nei biedu ban kamiu, napano ña kube bajulukuti duelimo ba juo [12] na Israel, napano ña kumitua taara dedade nalo ea vio yetemeriba nei. ?Kiniou nebika neber jumabe, kamiu kumitu bo ga ñeli na kumitu jumabe?

Viekouoiano bija ñasouano

² Kuruaku nalo a kuvivin-ioku nalo, mia bogo na vite na lavonvoniano nalo amei ea kamiu ka alavon kamiu, mia kumijikia kuvial lo tibe ka vite na jogvuiano ga. ³ Nina jibe ka kamiu kumijikia, ver bogo namã vite milavon kenemiu viekouoiano, mia kumitu jikili damariga, nina rila kenemiu viekouoiano sikili lie vo ka mia kuvitumolu kuvitu bogo nonovio. ⁴ Mia bogo na ña kamiu kumitumolu kumitu jikili jibe na, nina mijikia rila kenemiu meuliano rimemedu rivu vatitigio, a rimeruo vatitigio, mia rivujo ka vite maraiu nonovio na abo, mia maka bajago novo tai na mia naio toa re.

⁵ Mia ver kamiu tai napano naio river kiano ñasouano telisu ga mia monoka naio rivika den Atua ea kanano volkouano, ana mia Atua mijikia sian vanio. Bior ea Atua, kanano bajago maka rivitisa ea toro napano jomã bika vite nalo denio, naio jo jian ijaiano novo julaka ban tomu nalo

ea kiano tinievuiano. ⁶ Mia ver bogo na ña toro naio jomã bika vite na jibe na ea kanano volkouano, monoka naio rimonea sikili, ka mia naio sidomii dede re bereio, bior toro na kiano jidomiano jibe na naio jibe ka tei napano ña bieveluo, napano ña jegi jomã jubon titigio janea vio reraio ga. ⁷⁻⁸ Toro na jibe na, kanano jidomiano beve juo, a kanano bajago nalo maka ajikia avu ga. Toro na jibe na maka rijikia sidom river mia naio rivokar tonovo tai ea Tubo.

Tomu na ña abe talimãsa a tomu na sanibaiano

⁹ Kuruado nalo tealó, abe talimãsa, maka ve kialo saba, mia nalo amijikia avarvarlo ñele bior Atua naio midular kialo jidomiano abavin mave. ¹⁰ A kuruado tealó bunu, nalo kialo saba toru, mia bo ka nalo avarvarlo ñele bunu, nina bior Atua mila kialo jidomiano ajutano ga. Amijikia asaaro tibe na bior abitilubar ka toro na be kanano saba toru, naio javukia niaiesi napano be tena bogo bulati ga. ¹¹ Bogo napano ñerenio bavin, naio bitunu ñele, mia naio tunu niaiesi nalo nei mia amekekeu, atibirbil, naruei niabene na bo avakovio. Mia ea bajago nene kia ga vo, ea bogo napano tomu na saba nalo ajumã amimauka abarbiji kanalo veru nalo kia ga vo, mia nalo ajoru avakovio.

*Vite nalo napano mā
amila lili kito*

¹² Toro napano jumolu ju jikili ea nalavonvoniano nalo napano abinimei eaio, ilivuiano joaio, bior ka bogo napano naio jovulu vite nalo nei ruei, mia Atua riyovovua vatitig naio ka ijaiano na bo laka, nina be meuliano napano Atua naio berkar ban kito ruei, ka kito napano tiniedojii naio toru. ¹³ Ver nalavonvoniano nalo nei amei ea kami, ana nalo ajukujuku kami, mia kami kuver re “Uerei, najukujukuano nei amaluvo ea Atua.” Mia maka kuvijikia kuver tibe na, bior maka vite tai naio mijikia rijukujuku Atua, a bajago na milavonvon toro, nina maka ve kiano bajago. ¹⁴ Najukujukuano nalo nei abinimei jikili ea toro ea ga bogo na ga kanano sidomvovaiano ga mijubolbolili naio ana buru naio bano. ¹⁵ Karina sidomvovaiano nei naio riluo rimei ve toru ana naio rivar kenerinio vijuku vovaiano, karina bogo napano vijuku vovaiano naio bunu riluo rimei ve toru, mia naio bunu rivar kenerinio be māiano.

¹⁶ Kuruaku novo nalo, bo ka kami kuvitakar kami rivu ka kuvijamo ka re tomu nalo amei ka ajubolbolili kami. ¹⁷ Monoka kuvijikia ka vite novo nalo nonovio a ijaiano marai nonovio nalo, ajumolu den vio mave abinimei ea kito. Ajumolu den Atua napano

mā jo jii yulu nalo namā aju mave tiniabene, a yulu nalo nei, amijikia ajumā amijiajianilo julaka. Atua kiano bajago maka lele rivilig ve dolu bogo tai, bior naio maka lele rijikia rivierenio rivilig taakano ka kito bogo tai leleio, ka mia tuvan kito ea melijokouo. ¹⁸ Ninei be Atua nene ga napano ea kiano jidomiano ga, naio mila kito robinimei robe kenerinio, bior kito romonea kiano iliriani-ano, ka kito rojibe ka māriesi na be moti garuei jukamu ka tomu telabo napano mia nalo amonea Kristo iorou.

*Kito monoka romon-
monea Atua kanano iliano*

¹⁹ Kuruaku a kuvivinioku novo nalo, mia kami tiniemi ribobogia re iliano nei, ka tomu nonovio monoka ala soḡeli ka aiagago ka tomu nonovio monoka ala soḡeli ka aiagago kanio, ana monoka aviju kiki ka aili. Ana ala sopeli re ka tinielo rimimi, ²⁰ bior toro kiano tiniemimiano maka rijikia rila bajago na Atua kanano rimaluvo leleio. ²¹ Ver tibe na, kami monoka kuvuku bulag bajago va nalo a iḡauano va nalo den kenemi meuliano, a monoka kuvidu kenemi jidomiano ritotano yetano ka Iliano Lu napano naio mijikia rivurumeul ea kami, napano Atua mebija kar ea kenemi iviso nalo ruei.

²² Kami monoka kuvila vaio napano Iliano Lu na

2

naio berenio, maka rivu ka kuvitu kuvijubolbolili bereio kamiu ga a kamiu napano kumitu kumiagago kurano ga ka Iliano Lu nei, karina maka kuvila vite nalo napano naio berenio. ²³ Nina javukia toro tai napano naio joña bitii mirano ea mermerobi, ²⁴ mia bogo napano naio barlaka bano, ka bogo bulati ga, mia naio tinieno bobogia bereio mirano juñabe. ²⁵ Mia toro napano naio joña bitii veve vatitig va joomo ea tuboiano novo nei napano mijikia rivuru bulag kito den kariano nalo, a naio riagago vatitig ka mia naio riagago re ga ka mia tinieno ribobogia, mia naio rimonmonea a naio riimāukanio, toro na naruei mia Atua riilivu ka naio ea kanano imāuano nonovio.

²⁶ Verver toro tai river naio be toro na moneano napano memedu, mia naio telanivuu vatitig re ka buruminano, naio joña mijubolbolili naio ga bereio, mo kanano moneano be iakurano ga. ²⁷ Ana bajago na moneano na memedu bo, a napano be riano bo ea Atua mirano, jibe nei: mia jau keiel selivivi ka keija kirikiou nalo a taanou nalo ka keijalo ea kialo meuliano kouo nalo, a kovokar kouo rivu kiamo meuliano, ka napano niamiamo nalo a bajago na kiri niagiago nalo na vio yetemeriba atokol lelanso re.

Kamiu Kuvitisaia Re Tomu Nalo

¹ Kuruaku nalo a kuvivin-ioku nalo, jibe ka napano kamiu kumonmonea kiado Tubo Yesu Kristo, napano naio be Tubo na mermerano, mia kamiu kuvitisaia re tomu tealó ka ave dolu, napano kuvila rivu ga ka tealó, a kuvila rivova ka nalo tealó. ² Jibe ka ver tomu ve juo amei joomo ea kenemiu yimo na volkouano, tinene naio be kiano saba telabo napano kiano kuluniabene minieg bo a naio miya ñejelinio na mñarjukujumñalo napano amimñaukanio ea niogo joa mñarjukujumñano, a tinene naio be talimñasa, napano mñano kuluniabene buruboñeio, mia kamiu kuvila re ve dolu ka naljuo nei. ³ Maka rivu ver kamiu kuviaia nana naio miya kuluniabene maraiu mia kuvudu naio toa vio napano bo laka be sudoyu ana kuverkanio kuver “Barago, ninei be jelemo na bo nei, kumemi numisidom nuver bo kaso kototano ea vio nei,” mia kanio dolu nene ana mia kuverkanio ga kuver “Mia jau kotumolu kotu iorou yako, aver maka ana jau koto tano yetano ga.” ⁴ Bogo napano kumitumñ kumila bajago na jibe na, kumitu kubitii tomu tealó abova a tomu tealó abo, nina bior ga vite napano nalo amiyaio, mia vitiiiano na kenemiu na maka lele riyotuba ea jidomiano na bo.

⁵ Kuruaku nalo, kuvia-gago ka kiniou. Tomu nalo na yetemeriba nei napano abe talim̃asa, mia Atua naio buru bulagio abe kanano, ka rila nalo ave kialo saba novo nalo ea tivelinio na kialo moneano. Ana Atua mila jibe na bunu ka nalo amijikia ava jouro ea kialo jajum̃alo napano Atua kiano tuboiano berkar ruei ban nalo napano tiniei jii naio.

⁶⁻⁷ Mia kamiū kumitum̃a kubitii tomu na jum̃alo yauo napano abe talim̃asa ajibe ka tena miagiago ga tai. Mia kamiū kuvisidomii vonio. ?Kulo be nalo na m̃a aju amijil kamiū vururu napano m̃a aju abur kamiū kuba komeli? ?A bunu kei nalo napano ajum̃a amiolua kamiū ea sio novo na tortoru napano m̃a Atua midu joa kamiū? Nina maka ve tomu nalo napano jum̃alo beteauo abe talim̃asa, mia nina tomu nalo napano be kialo saba telabo.

⁸ Kenemiū m̃arabo napano memedu ka kuvitakii ea vio nei naio jibe ka burupati tuboiano na Atua kanano navenatuboiano naio berenio, napano berinavo "Mia kovijuku rivu van tomu nalo napano m̃a aju vaataro kaso, rive verare ka napano jau kojom̃a kojidomiiso."

⁹ Mia ver kamiū kuvitisaia ga tomu nalo ave dolu tibe na, nina kumila kariano ga na, mia Atua kanano tuboiano naio tibure kamiū river kamiū kube tomu na m̃a amila kokorov tuboiano.

¹⁰ Bior toro napano mila korov iliano takurano ga ea

tuboiano nei, naio mila kariano ea Atua kiano vitiano, jibe ka napano naio mila korov nonovio iliano nalo ea tuboiano biniu kokoio.

¹¹ Bior Atua naio berenio berinavo "Mia kamiū kuvila re siakaiano," nina Atua nene kia ga navo napano naio berenio berinavo "Mia kamiū kuvuebin re toro." Ver maka kuvila siakaiano mia kumue toro, mia kube tomu napano m̃a amila kokorov tuboiano ruei.

¹² Ea bogo na tibureiano, mia Atua naio ridu re vironiano van kamiū, tibe ka napano mia naio rudu van tomu na bova nalo, mia naio rivuru bulag kamiū den vironiano nei ga. Ka vite nei naruei, kenemiū iliano nalo, a kenemiū im̃auano nalo, monoka tibe ka napano maka kuvila vite tai napano memedu ka kuvar vironiano rivorio. ¹³ Nina bior Atua tinien miia kamiū, a kanano tinieiiano nene, mia riolkon bulag tibureano napano memedu ka mia kuvokario. Mia bogo napano mia Atua tibure tomu nalo napano maka tiniei riia toro dolu, mia naio bunu maka rijikia tinien riia nalo.

Viekouoiano bija im̃auano novo nalo

¹⁴ ?Kuruaku nalo jum̃abe, ver toro tai tom̃a river naio biekouo ea Kristo, karina naio maka rila bajago nalo napano abo? ?Mia kanano viekouoiano nene naio mijikia rilarur naio? !Peli ga! Nina maka lele titai napano bo rijikia riyotuba ea toro na kiano viekouoiano libolibo

na jibe na. ¹⁵ ?Mia jum̃abe bunu ver ve kuruado tai a kuviviniedo tai napano nalo abe talim̃asa ka kuluniabelo a amijubavio ka sinaniano?

¹⁶ ?Ve re kamiu tai ril sini-abu vanlo riverinavo "Atua riilivu ka kamiu, ka mia ni-avo sen re kamiu, a siser re kamiu," mia naio maka sian vite tai lele vanlo ka riijailo, nina jibe na na bo p̃eli maka rivu? Peli ga, kiano iliano napano jibe naio mil kurano ga. ¹⁷ Kanado viekouoiano naio jibe nei naruei, ver naio ga ve takurano to, a ve re im̃auano nalo na bo tai to vija naio, viekouoiano nei naio rim̃aro ga.

¹⁸ Peli mia tomu tai ajog iliano nei, ana mia alavon ka averdoṽeio averenio "Bo ga, mia naio maka tibe na. Naio jibe ka ga napano tomu tealó, abe tomu na viekouoiano, a tomu tealó, abe tomu na amila im̃auano novo nalo." Mia kiniou neverdoṽelo neverinavo "Ver kiniou neialso napano koberenio kober jau kobe toro na viekouoiano ga, tibe na mia maka nejikia neial kijokijo tai ka river kanamo viekouoiano naio be riano. Mia ver komial napano kiniou nojom̃a nemila bajago vu nalo, nina mijikia rila rimeravo vansom̃ ka kiaku viekouoiano be riano." ¹⁹ Nao, nemijikia ka jau komonea ka napano be Atua takurano ga naio jo, nina bo laka. Ana neber kaso, neberinavo sim̃aro nalo bunu amonea jibe na, a nalo ajum̃a amemebiju

toru kanio. ²⁰ Javukia napano rojum̃a roberenio, toro napano naio jom̃a ber be kiano viekouoiano, mia naio maka rila bajago nalo na memedu, kiano viekouoiano naio be tena iakurano ga, toro na jibe na naio miavovu ga na. ? Mia kamiu kumisidom ka nalavon never vite nei rimei rimeravo vatitig? ²¹ Boga kamiu kuvisidomii von korobido na nanua Epraamo. ?Atua naio mila Epraamo memedu bija naio jum̃abe? Nina bior Epraamo midu kenerinio Aisak, naio miorikario ea boda, naruei naio mijamo ka risebi kenerinio Aisak ve sida van Atua. ²² Kamiu kuvialio, ea vio nei romial ka Epraamo kanano viekouoi-ano, a kanano im̃auano nalo na m̃a mim̃aukanio, vite juo nei amim̃au biju vio takurano ga. Kanano im̃auano, mila ana kiano viekouoiano be riano mia be riano batitigio. ²³ Naruei vite nei naio mila ana Iliano Lu nei naio be riano bunu, napano naio berinavo "Epraamo naio biekouo ea Atua, a kar vite na ana Atua mila Epraamo naio binimei memedu bija naio." Mo vonganei, rojum̃a robio Epraamo kia ga vo roberenio naio be Atua kiano bilbilu. ²⁴ Bior vite nalo na, romijikia ka releal ka Atua naio mila toro memedu bija naio bior kiano bajago novo na kanano meuliano bunu, a maka ka ga kiano viekouoiano ga.

²⁵ Mo kamiu kuvisidomii

von Reavo nei, na nanua beamu naio be tira na jomā jaano jeregii ga ea m̄arabo. ? Mia Atua mila naio memedu bija naio jum̄abe? Nina bior naio bitikar batitig tomu juo na vio Israel nei, napano naljuo abinimei benalukluku ga ka avitilubarbar vio Jeriko. Naio buru van tomu juo nei ea kunuano, avona bisi ana iorou ana naio jiloglog m̄arabo dolu ka naljuo ka amijikia avuro avan bereio.

²⁶ Mo bo ga, jibe ka napano tati na toro napano maka niununo toaio, naio m̄aro, viekouoiano bunu, napano maka ve bajago novo nalo aim̄au biju vio takurano viaio, naio bunu m̄aro.

3

Monoka kito retelanvuu vatitig ka buruminado

¹ Nao kuruaku nalo a kuvivinioku nalo, maka rivu ka kamiu ve telabo kuvilavon ka kuvokar im̄auano tavukia naverloglogiano ea yimo nalotuano, bior jibe ka napano kumijikia, ea bogo na tibu-reiano, mia Atua naio tibuare kumemi naverloglogiano nalo sikili laka.

² Ver toro tai maka lele rilaluvu kanano iliano bogo tai, toro na naio bo mia bo, naio mijikia telanvuu vatitig ka kiano meuliano momou. Mia p̄eli ga, kito nonovio roju romila kokorov kanado iliano julaka ga. ³ Bo ka rosidomii m̄aributoto napano romidu joa bue

kulorinio niono. Bogo napano romidu joaio, romijikia romila bue kulorinio nei monmonea kito, mia romijikia robilig kiano burum̄ara tati nei ban ea vio napano rojidom naio rivan eaio.

⁴ Mia kito tiniedo rimaio ka uako bunu, bekurano ka naio kiritemi laka, a p̄eli na jegi na toru jo jidom riuvio a jubon titigio bano, mia sano vuu nene kiritavasuga, ana mijikia rila burum̄ara uako nei rivan ea vio na vabe na toro napano bokar vuu naio jidom ka rivan eaio.

⁵ Buruminado nalo ajibe na naruei, napano nalo abe vite na kiritavasuga, mia amijikia amil vevavin m̄ele laka.

Kamiu kuvisidomii von, ka napano morogo na sebi kiri tavasuga, mia naio mijikia sisen iesi nalo napano tomormoruo ea burum̄ara vio yeturu.

⁶ Nao, be riano, buruminado javukia sebi tai. Buruminado nei naio be torogio na mokotenado napano vite va nalo nonovio na yetemeriba nalo abujo magmago vatitig eaio, mia kanano vovaiano nalo ajum̄a amila lelan kanado meuliano momou garuei. Mene nei naio jo mijev sebi ea vio na jogvaiano, ana naio jo mila sebi nei naio bilvili janea nonovio kanado m̄arabo na meuliano nalo. ⁷ Mia romial napano toro naio mijikia milalup̄ilup̄i tededen nalo amom̄avo, jibe ka temeul nalo napano yeturu, menu

nalo, maro nalo, a niado nalo, ⁸ mia maka toro tai rijikia rila buruminano to damariga. Buruminado nalo abova laka, mia maka rejikia roverbureo, a kanalo iliano nalo ajavukia maro semei napano mijikia muebin toro. ⁹ Kito rojuña romil ka buruminado romilivu ka Atua Lu napano naio be karamado, mia iorou kanio ana romil kanio bereio ka romiolua kulo dolu nalo, napano maka rosidomial ka Atua naio jילו jibe ka tovorovo na naio. ¹⁰ Naruei ea nido takurano ga, rojuña romil bo a rojuña romil bova bunu. Kuruaku nalo, vite nei naio be vovu laka. ¹¹ Maka bulukuei tai ga to napano ea bulukuei ve takurano ga mia uei vija tei nalo ve juo amoluo eaio. ¹² Mia jibe na bunu napano buruviki maka rijikia rivar m̄arolivi, a telikrevi maka rijikia rivar m̄arati buruviki. Jau maka kejikia kava kovioviou uei ea buluniogovu.

Masouano novo napano Atua jianio

¹³ Ver kamiu tealo napano nalo abe masou, a nalo amijikia batitig vite, bo ka mia nalo ala vite nei rimaluvo rimeravo rivu, tavukia kanalo meuliano, monoka naio rimemedu, kialo jidomiano, monoka naio totano, a kialo bajago monoka rimeruo rivu. ¹⁴ Mia ver kuvituña kuvisidomii kuver kube masou, mia kenemiu iviso

nalo abujovujo ka jokuano, bija varvariano bunu, jibe na kumituña kumila sibi ga. Kamiu kuvil vevavin re bunu ka masouano libolibo na kenemiu, bior nina maka lele ve bajago na masouano na leleio. ¹⁵ Nina naio maka ve masouano na mave, mia naio be masouano na yetemeriba nei ga, a naio be tomu va ga kialo, a naio be masouano na miyotuba ea Setano memedu. ¹⁶ Bior bogo napano tomu nalo ajum̄a amijoku, a abarvar kalo, mia ka vite nonovio maka bunu ajikia aiasol rivu, naruei bajago va nalo ajum̄a amaluvo. ¹⁷ Mia toro napano mije masouano na mave, kanano bajago naio be dolu. Loa ka vite dolu nalo, kanano meuliano meravo batitig, mia naio be bunu toro tum̄aroano, a naio be toro namelumulumuano naio bijuku bo ka kulo dolu nalo. A bunu be toro naio na tinien miia toro dolu. Naio be bunu toro na bar m̄arati na bo ea kiano meuliano, a maka naio rivitisa ea tomu dolu nalo, mia kanano jidomiano maka veve juo. ¹⁸ Toro na jibe na, vite nonovio ea kiano meuliano naio memedu bo laka, mia javukia bunu rivan tomu nalo nonovio napano abe tomu na tum̄aroano, napano amim̄au ea bajago na tum̄aro.

4

Toro napano jidom rila bilbilu vu vija yetemeriba

¹ ?Mo ver tum̃aro nei naio toa re kamiu, mia kuvitum̃a kuvila mira ka kamiu ga, a kuvitum̃a kuvilivili ea kamiu, mia venia naruei naio be burupati nene? Nina naio miyotuba ea kenemiu sidomiano nalo, napano ajum̃a amila ana kumitum̃a kumim̃au m̃ele ka kuvilavon ka mia kuvijog rivu ka vite nonovio na yetemeriba nei.

² Mia kumisidom m̃elea vite nalo napano m̃aaju yetemeriba nei, mia maka kuvijikia kuvokarlo. Tenene na, milaio ana kumisidom kuvue toro riviorio. A kamiu kumitum̃a tiniemiu jii m̃elea toro dolu kanano saba nalo, mia maka kuvijikia kuvarilo bunu, tenene na milaio ana kubilivili ea kamiu a kumila mira biorio. Kamiu maka kuvokar vite nalo nei tealo napano kumisidomio, bior maka kuvika den Atua.

³ Mia bogo tealo napano kubika den Atua, mia ka bogo na maka kuvar bunu, a nina bior kubika belea ga. Kamiu kumitu kubikano ga ka rila ka kenemiu sidomiano nalo amijikia avar venia napano ajidomio ka mia ajog rivu kanio.

⁴ Kamiu kumitavukia tomu nalo napano maka avijuku rivu ka koalo nalo, javukia napano maka bunu kuvijuku rivu ka kenemiu Atua, napano maka bunu kuver riano vanio. Toro napano naio jidom ka rila bilbilu rivija yetemeriba nei a rivija kanano bajago nalo, naio jom̃a mila bilbilu va naljuo Atua, jibe ka naio

be Atua kanano uolu ruei.

⁵ Iliano riano tai napano joa Iliano Lu naio berenio “Niunudo napano Atua midu joa kito naio jo jidom ka riel bele bogo nonovio ea kiano sidomiano va nalo.” Mia nina maka ve iliano kurano na, ⁶ mia Atua naio jom̃a mijai kito toru ea kiano tiniememiano ka mia rotibe na re bunu. Nina jibe ka napano Iliano Lu naio berenio berinavo “Atua naio juko vio ka navarvariano mia naio tinien jii toro napano kanano jidomiano batove.”

⁷ Bior vite na, monoka kamiu kuvidu kamiu totano yetano ka Atua jum̃ano. Monoka kuverbure Setano ana mia naio rivuro den kamiu.

⁸ Monoka kuvitu lie rimei vaatara ka Atua ka naio to lie riviedu vaatara ka kamiu, a kamiu kulo va nalo, mia kuvisekon jumemiu nalo, a kamiu napano kenemiu jidomiano beve juo, monoka kuvila kenemiu iviso nalo ameravo rivu.

⁹ Vonganei be kenemiu bogo na tiniemiu riia kamiu rivior kenemiu kariano nalo, napano kumijog bova kanio, napano kumitum̃a kumiaga ka tegiano. Bo ka kuvila kenemiu vitaliano rimei ea kenemiu tegiano, a kenemiu saariano rimei ea kenemiu tinieiano.

¹⁰ Ana monoka kuvila kenemiu jidomiano rivatove ea Atua mirano napano mave laka, naruei mia naio rivitirilar kamiu.

Kamiu kuvitibure re kuruemiu nalo

¹¹ Kuruaku nalo a kuvivin-ioku nalo, maka rivu ka

kuvitumña kuver niegeniege kamiu a kuvitiburevure re kamiu bereio. Bajago na, Atua kanano tuboiano naio berbure ruei, naruei toro napano naio jo mila jibe na ka kuruano naio jo mila niegeniege tuboiano nei bunu, a naio jo jiburevure tuboiano nei ber naio bova. Mia bogo napano kumitu kubitii tuboiano nei kuber naio bova jibe na, kumitu kumidular kamiu jo mave loa naio, maka bunu kuvitu yetano ka naio. ¹² Atua nene naio ga mijikia rivurumeul ea toro a mijikia rila toro rivakovio, naio ga takurano memedu ka naio sian tuboiano to a tigure toro. ? Mia kamiu kuberiamña kamiu kube Atua ka mia kuvitiburevure ku ruemiu nalo tibe na?

Kamiu kuvitika vatitig kamiu riva, kuvarvar ka re kamiu

¹³ Mia kamiu tealó ami-jikia aver “Banei p̄eli na beni mia kumemi nuvan ea m̄arkomeli dolu tai. Naruei ea vio na mia nuvitu yuka vodolu, mia nuviñauka iñauano napano mia nuvokar puruveru ve telabo.” Mia kamiu kuviagago ka kiniou. ¹⁴ Kamiu maka lele kuvijikia venia napano mijikia riyotuba ka kenemiu meuliano beni. Kenemiu meuliano javukia mavo na burusuku napano naio miyotuba ka bogo bulati ga mia iorou kanio ana naio ba kovio bereio. ¹⁵ Iliano na memedu ka mia kamiu kuver, kuver tibe nei “Ver

Atua napano jo mave laka naio sidom tibe na, mia numijikia numeul nuvitu kija bere vo, ana mia numijikia nuvila tibe na nuvila tibe na.” ¹⁶ Mia maka kamiu kumitumña kumil vevavin ga a kubarvar ka kamiu kurano laka, mia nina bova ga na. ¹⁷ Toro napano naio mijikia batitig vite novo nalo napano memedu ka mia naio rila, mia naio maka rilaio, naio jomña mila kiano kariano ga na.

5

Kamiu kuvitika kamiu riva, kamiu napano kube tomu na saba

¹ Tomu na saba toru, bo ka kamiu bunu kuviagago ka kiniou. Bo ka kamiu kuviaga ka nategiano ka bogo na jikili nalo napano ajumña abinimei ka mia avokar kamiu. ² Ea Atua mirano, naio jomña mial kenemiu saba novo nalo jibe ka amenunu ruei, a kenemiu kulumñarauo novo nalo bunu jibe ka sivinia nalo ajer dudulilo ruei. ³ Ana kenemiu veru nalo bunu, ajibe ka abijauialo ruei, bija mokotenemiu bunu abijauialar lo ruei, jibe ka sebi jijenio, mia nina mila meravo ber kamiu kumiñau bova bija kenemiu puruveru nalo. Kito rojua legiano na maaro nalo, mia kamiu kumitu kubiobijii kenemiu puruveru nalo bavin lie vo. ⁴ Tomu na iñauano amiñau ruei ea kenemiu tiniavio nalo, mia kamiu

maka kuvulu lo. Mia kanalo vuliano napano kubokario ju, jibe ka napano miaga jikili ka berial ka kamiu kumitumã kumila saba nalo na bova. Tomu na imãuano nei bunu ajumã ajegi, mia kanalo tegiano bano-o bokar Atua na sikiliano tilinieno.⁵ Ea vio yetemeriba nei kenemiu meuliano monmaio ga, kumijikia kuvul ga vite nonovio napano kumisidomiilo ka kuvijog rivu kanio. Kamiu kumisen sinaniano novo nalo bogo nonovio, mia kiniou neber ka kamiu, kamiu kumitibe ka temeul nalo napano tomu nalo abaganilo bano m̃a amijabojabo kirinovo, ana temeul nalo nei amijog bo, mia maka ajikia ka bogo na mia auelo jo binimej vaatara. ⁶ Kamiu kumitumã kubitisa ea nalo napano abe talimãsa, jumãlo yauo, kumisian tibureiano nalo napano kiri sikilikili banlo, bekurano ga ka ver nalo amemedu ga. Kamiu kumila kikilo mia kumuebinvinlo amarmãro garuei. Vite nalo na, kamiu kumila ban nalo napano maka ajikia averbure kamiu leleio.

Kamiu monoka kumelumu ga

⁷ Kuruaku nalo, kamiu monoka kuvitu melumu ga ka mia kuvitu rorea kiado Tubo-o mia naio rimei bereio. Nina javukia toro na tiniavio napano naio jo melumu rorea bogo napano memedu ka mia naio rila imãuano ea kiano tiniavio, a

ka yuo rimei rivovo eaio, a ka naio rivar sinaniano na meruo eaio. ⁸ Ana kamiu monoka kumelumu ga tibe na bunu naruei ka kuvitu rorea kiado Tubo naio rimei bereio. Mia kenemiu jidomiano naio monoka tu sikili, bior mia naio rimei bere vesiou re ga na.

⁹ Kuruaku nalo, mia kamiu kuvil mum̃ii re van kamiu tulaka, ka mia Atua naio tibure re kamiu rivorio. Bior naio be toro na tibureiano nene, a jibe ka naio jumolu ju ea m̃aratavo ka mia naio rimei joomo.

¹⁰ Kuruaku nalo, bo ka kito tiniedo rimaio ka Atua kiano naverialiano nalo re nua. Nalo aberloglog m̃arabo napano bo tai ka kito, ka bogo napano tomu nalo amila kikilo nalo amelumu ga, a kanalo jidomiano nalo maka rijoru. ¹¹ Nalo aju jikili bano-o ana nalo ajovulu vite nalo nei, ana tenene na kito romial ka Atua naio milivu kalo toru laka. Toro nei Jov naio bunu ga be nalo tai napano naio ju jikili ea bogo na jikili jibe na, mia romijikia ruei vite novo nalo napano Atua naio mila banio iorou kanio. Nina riano, Atua naio be tiniememi toru ka tomu nalo a tinien miãlo toru laka.

Bajago napano aber iliano napano be riano

¹² Kuruaku nalo a kuvivin-ioku nalo, mave ka vite dolu nalo, bogo napano kuberkar ea vite tai, p̃eli na kuber iliano na toru tai, mia kamiu

kuvijekakar re rivija mave siano, yetemeriba nei siano, p̃eli na vite dolu siano kanio rila ana kenemiu iliano sikili. Verenio kamiu kuver “Mo” mia monoka kamiu kuver “Mo” ga. Mia ver kuver “Makanio” mia monoka kuver “Makanio” ga. Ver kenemiu iliano be riano bo jibe na, mia Atua naio maka rijikia tibure kamiu riviorio.

Volkouano napano be verdoŋeiano nene miyotuba eaio

¹³ Ver kamiu tai napano naio mijog bova ka vite tai, bo ka naio rivolkouo, a ver kamiu tai naio saaro, bo ka naio riilivu ka Atua ea iouano. ¹⁴ A ver kamiu tai rimie, nina memedu ka naio rivio navagadeano na lotuano ka amei aialio, naruei mia nalo amijikia abolkouo kanio, a amijikia aion titikivaka ve telisu ea parinio ea kiado Tubo siano. ¹⁵ Ana bior m̃a aju jikili ea kialo Atua, ana abolkouo koio bija viekouoiano, mia Atua rilarur toro na mieiano nei, rila naio rivu bereio. Ana ver mieiano na m̃a bokario toro na bior kiano kariano tai, ana ver toro nene naio river bulag kariano nene, mia Atua naio riviekokoa naio ka kariano na bunu.

¹⁶ Bior vite na, bo ka kuvitu kuver bulavulag kene-miu kariano nalo van kamiu, mia bo ka kuvitu kubolkouo ka kamiu, ka mia Atua naio rila kamiu kuvu bereio. Bogo na toro na memedu naio bolkouo jikili, kanano volkouano naio mijikia rivar

m̃arati ve telabo. ¹⁷ Elaija naio be toro tai jibe ka kito ga, mia naio bolkouo jikili ka mia yuo rivovo re, naruei ka yuka tolu a togio bereio [3½] maka yuo tai leleio ea kiano vio. ¹⁸ Ana iorou kaŋo ana naio bolkouo bereio, ana yuo bovo bereio, ana tiniavio nalo abar sinaniano bereio.

Rovuru nalo napano amielibele amei bereio

¹⁹ Kuruaku a kuvivin-ioku nalo, ver kamiu tai jaluvo den nailirianiano, karina kamiu tai ba burio binimei bereio, nina naio be im̃auano novo tanea. ²⁰ Monoka kuvisidomii kario, ver toro tai bilig toro va tai jaluvo den m̃arabo na bova binimei bereio ea m̃arabo na memedu, naio milarur toro na bova neibano kiano meuliano, ana na mia toro na bova nei maka rijikia rivakovio. Ana ea bajago na, toro dolu nei naio mila jibe na ka mia Atua mijikia rivuku bulag nonovio kariano na toro na bova nei kiano.

Kiniou, Yemesi.

Mesi Moti Na PITERE Naio Bivitauiaio Verialiano Moti

Tukunuano bulati na niosi nei

Pitere kiano mēsi moti, naio bivitau ba ban tomu nalo napano abe namoneano ruei, napano naio biolo, ber “Atua kiano tomu nalo, napano naio ga bijauia bulaglo.” Nalo nene aju beve terakurano janea vio jibe valauo ga ea tanobuku nalo ea vio nei napano banei binime i be buruvenuo nei Teki. Burumāra jidomiano ka mēsi nei ka ridular namoneano nalo kialo jidomiano napano tomu nalo aju amila kirisikili laka banlo, a napano abiniua bogokouo nalo bior ka amonea Yesu. Naio ber banlo ka asidomii ioluano vou nei, napano Yesu Kristo māro kar kito, a meul bereio, a mia naio rime i bereio ka rivuru kiano tomu nalo. Jidomiano nei mijikia rija kialo jidomiano ka ajikia asikil atu sikili, a kialo moneano mijikia to sikili ea Yesu Kristo. Mia bior ka vite na, bogo na ver avakar bogokouo, ana tomu nalo mia ala sikili vanilo, amijikia asikili atu damāriga, kialo jidomiano maka rijikia rijoru, be iakurano ver ala rivova vanilo. A ver ala tibe na, mia berial ka amonea riano Yesu, a mia avakar vite novnovo nalo nei napano Atua bar vatitig bo jua

tiniabene, ber kiano tomu nalo kialo, ea “Bogoti nene napano Yesu Kristo mia rimaluvo eaio.” Bija iliano nalo na ka ridu bulag kialo jidomiano, naio ber kirisikili banlo bunu, ber monoka ala kialo meuliano rimemedu rivu, bior napano abe Kristo kiano tomu nalo.

Torogio nalo na niosi nei

Iliano moti 1:1-2

Marabo napano Atua midu ka rilarur kanano tomu nalo 1:3-12

Namoneano kanano meuliano monoka ve lu 1:13—2:12

Namoneano nalo kialo imāuano bogo na ajua jaleleiano 2:13—4:19

Namoneano kiano jidomiano monoka to rimelumu 5:1-11

Iliano maariano 5:12-14

Iliano na be moti

¹ Banalo, kiniou Pitere neber kavijo bo a bogiano bo ban kami u ea Yesu Kristo siano, napano nebe kanano atevi.

Mesi nei biedu ban kami u Atua kanano tomu nalo, napano nanua kumitua kenemiu vio na Yerusalemo, a karina amijil dedade ea kami u banbano vonganei kube valauo ga kumitu janea vio ea tanobuku nalo na tortoru nei Pontas, Kalesia, Kapatasia, Esia, bija Pitinia.

² Kami u kumijog bova bio-rio, mia nojidom neverial van kami u, ka karamādo Atua naio mijikia mārabo nonovio na kenemiu meuliano na beamu beamu ruei. Naio bijauia bulag kami u

beamu ruei, naruei Niununo naio miñau ea kamiu, mia kuvijogkar Yesu Kristo kuvidu naio ea kenemiu iviso, kiano burukija jekon kamiu kumeravo, a naruei kubinimej kube kanano kulo lu nalo tai.

Kanaku volkouano ka mia naio rudu tiniememiano a tumaroano na kanano atu ajai kamiu ve toru lie damariga.

Ioruriano napano mña namoneano nalo abokario

³ Bo ka kito rosidomii jumñabe ka napano Atua na Yesu Kristo kiado Tubo karamano, naio mila bo laka ban kito. Kito romiaia naio toru laka, bior napano naio tinien miia kito, mila kito romoluo rebe terivou bereio jouro ea kiano maratavo. Naruei jibe ka napano naio mila kenerinio Yesu Kristo naio meul bereio den namariano, romijikia rejikia vatitig ka vite napano naio jukamu kean kito, maka bunu rive namariano, mia naio be nameuliano napano maka ribisi bogo tai. ⁴ Nina naio javukia Atua kanano jajumano novo napano mia ravario iorou. Naio mila batitig ju ruei, naio bar batitigio ju mave tiniabene, napano mia maka rijikia rimenunu, a maka rijikia rimej rivova, maka rijikia riva kovio bereio bogo tai. ⁵ Vite nei kito maka rovokar vo, mia romonea Atua ka mia kanano moroano toko batitig kito, rivokar vatitig kito rivan riva rivokar legiano na maaro. Ana ka

bogo na, mia naio rivetavo ea mirano kulo dolu nalo ka rilarur kito.

⁶ Nemijikia ka vonganei, kamiu kumitu kubar vite teremi na jogvaiano nalo ea juboluboiano napano mña kubokario, a pñeli jo jibe ga na bunu ea bogo tealó napano naio rimej kia navo. Mia jidomiano nalo napano neberenio ruei na, naio bo ka rila kamiu kuvisaaro, kenemiu iviso nalo ajog rivu bereio. ⁷ Juboluboiano nalo na, abinimej ga ka ala kenemiu viekouoiano atevijo kija, amej asikil lie. Nina naio jibe ka vite nalo tai javukia niogo, ka napano ver asidom rimej rimeravo rivu, monoka ajie ea sebi ka sisen bulag niamiamo napano joaio, pñeli na rojie tilibuemia ka meravo a memedu, mia kito bunu rabare kanio. Juboluboiano nalo nei napano robokario, ajavukia sebi tai ka sisen kon kiado viekouoiano rimeravo rivu, a sikili rivu. Ver bogo napano Yesu Kristo riyotuba bereio, naio rial kiado viekouoiano rimeravo rivu tibe na, naruei mia kito nonovio romijikia rasasaaro-o mia, romijikia rovitii vatitig kito, rojog rivu laka.

⁸ Nojo neberii Yesu na, tinieku maio bereio ka nanua, nojo bija naio, nemijikia batitig naio, mia kamiu makanio. Be riano ka napano kamiu maka kuvija naio nua, bekurano, vonganei tiniemiu jii naio toru laka, a maka lele

kuvial naio ka miremiu leleio, mia kuvitu kumonea naio jikili bo, a kenemiu iviso nalo ajaaro kanio ka burum̃ara saariano tai napano toru laka, iliano maka rive verare ka riverii vatitigio. ⁹ Kenemiu saariano nei, naio be m̃arati novo tai ea kenemiu moneano napano kuvijikia kuvisenio vonganei, mia maka ve nina ga, bior bija naio, ea bogo napano jo binime, mia kuvijikia kuvisen tai napano jesei lie vo, nina ioruriano na kenemiu meuliano.

¹⁰ Vite na napano roberio, ioruriano na tom nalo kanalo meuliano, naio be vite tai napano m̃a naverialiano nalo re nua amila vio jikili ka ajikia. Amijikia vatitig Atua kanano verikariano, ka mia naio tinien riia kanano tomu nalo, ka mia rilarurlo, a atu averial tibe na. ¹¹ Aju m̃a aberenio, mia maka ajikia batitig ka mia naio rim̃auka tum̃abe, p̃eli mia naio rim̃auka ea bogo na vabe. Amijog ga ka napano Niununo na Naverikariano na kanano naio jo betavo ea banlo ka beamu, mia nalo ala kiki naio ve toru, mia iorou, ilivuiiano novo nalo amijikia amalmaluvo, mia ajikia re ka mia Naverikariano naio ve toro na jum̃abe, p̃eli naio be kenia. ¹² Beamu be tinielo ka naio be toro na toru tai ea kialo bogo ga, avona iorou, abitolubar ka vite nalo nei napano aju aberialio, maka ve kialo bogo, mia ka ve kiado na iorou. Naruei

kamiu bunu kubitolubar ka vite nalo nanua m̃a naverialiano nalo ajuma aberialio beamu binime, nina naruei abinime abe riano ea iliano nalo na Ioluanu Vou nabo napano kumemi numiololu ka ban kamiu ea Niununo Lu na mave kanano moroano ruei.

Mia maka ve naverialiano nalo ga, mia nailiano nalo bunu ajidom ajikia vite nalo nei, mia makanio, maka ve kialo ka ajikia. Tenalo nei amalmaluvo vonga meravo ea kiado bogo ga.

Kito monoka rove lu rivu bogo nonovio

¹³ Naruei bior napano Yesu Kristo miyotuba ea yetemeriba monloglog kiado bogo, kito naruei monoka rala vatitig kiado jidomiano ka resikili vatitig ka rala kanano im̃auano. Monoka rotulan vuu vatitig ka kiado meuliano, a rosidomial re yetemeriba nei, mia rosidomkar ga ilivatitigiano na bo napano rejikia ro-vokar ka bogo na mia Yesu rime, riyotuba ea yetemeriba nei ve vaarakurano bereio. ¹⁴ Mia monoka romei rotibe ka kiritete novo nalo na m̃a aju amonea batitig karam̃alo nalo, a mia sidomiano va na kulo vovu kialo, maka rivu ka rajamo kalo ka ave tubo ka kiado meuliano tibe ka na beamu, ea bogo na maka rojikia vite tai leleio.

¹⁵ Karam̃ado, naio naruei bio kito, mia monoka rovitilubar ka naio napano jidom romei vaataro kean

naio, naio be lu laka, naruei kito bunu monoka rove lu vatitig ea m̄arabo nonovio nalo na kiado meuliano.
¹⁶ Atua kanano iliano tai ea kanano Tuboiano moruo naio ber jibe nei ruei, naio berinavo

Kiniou nebe lu, kamiu monoka kuve lu bunu.
Lev 11:44,45

¹⁷ Ana bereio, Karam̄ado, vatelabo rojuṃa robio ban naio ka rijai kito, mia monoka rovitilubar ka naio jo bitii veve tom nalo memedu ga ka kialo iṃauano beve terakurano, naruei monoka reiel ea yetemeriba nei napano kiado jidomiano rivatove ka naio, romerou kanio. Naio midu kito rojua vio nei ka bogo telisu ga, rojibe ka valauo nalo ga eaio, mia monoka tiniedo rimaio ka karina, mia rava rotumolu rotu ea mirano rimemedu.

¹⁸ Nanua beamu, kiado kulo moruo nalo maka ajikia Atua, tenena ajian lilian kanalo meuliano na melijokouo batove ba bokar bogo na Yesu Kristo naio binimej buru bulag kito denio. A jibe ka napano kumijikia, naio mila jibe nei, maka rivulu bulag kito ka tena yetemeriba tibe ka puruveru ṗeli niogo ṗeli vite venia bereio tibe na napano mia mijikia rivakovio.
¹⁹ Maka leleio, naio bul bulag kito ka kanano burukija lu memedu, bior ka napano naio jian kiano meuliano jo jeleig kito, mijamo ka naio javukia kirikiti nunu

solbouo tai napano maka ve niajebijo eaio ka ala jokoluolu kanio.

²⁰ Atua naio bijauia Yesu ka rijai kito tibena nanua beamu ruei. Beamu ka bogo na naio jii yetemeriba, mia naio bokar kenerinio nei bija naio jibe na ba tinien miia kito laka, naruei naio miila naio miyotuba vonganei ga ea legiano nalo na maariano nei.
²¹ Naio miyotuba, naruei ea kanano m̄ariano naio betavo ea kiado m̄arabo ka rovan bereio ea Atua naio bo laka. Mia bogo napano romial ka Atua mila naio meul bereio, midu naio jo mave bijaio ea kiano mermerano, kito be tiniedo ka Atua nei naruei, bo ka romonea naio, resikili rotuaio, a ravarkar tiniedo eaio.

²² Jikario ea vio nei naruei kamiu kumonea ilirianiano na Atua kanano, a kenemiu meuliano jo binimej memedu bo, a kumitu tiniemiumaio lie vo ka kuruemiu dolu nalo. Mia kamiu kuveve re torogio ea naio, monoka kuvila vio sikili ka tiniemiuriia kamiu kuviniu ea kenemiu iviso nalo ka rimej ve toru lie laka.

²³ Kamiu kumoluo kube terivou bereio, kumidu meuliano vou tai ruei, mia nina maka tibe nena nalo abar tete. Kiado meuliano vou nei, naio miyotuba ea Atua ka iliano ga, iliano napano meul, iliano napano mia rijikia re rivakovio bogo tai.
²⁴ Kulorinio kiano meuliano maka rijikia to vesiou, bior ka napano miluo bo javukia ṃaiesi, mijikia rimej

ve novo laka tibe niaiesi, mia iorou kanio m̃aiesi nei mijikia rijeli, a niati mijikia tibiribili. ²⁵ Mia vite tai ga naio mijikia tobo to, nina be Tubo kiano iliano.

A iliano nei naruei, naio ga napano numioliolu ka ban kamiu jikar nua ruei binime i bokar banei.

2

¹ Naruei bior ka napano iliano vou na bo bokar kamiu ruei, monoka kuvituvan bajago na bova nalo. Iviso va nalo, sibiano nalo, kariano luklukuano nalo, jokuano nalo, ililelaniano nalo, bajago nalo na jibe na monoka kuvila bulaglo den kenemiu meuliano nalo. ² Jibe ka napano tete domdomu ajidom m̃lea m̃alo yu ka amijikia ameul eaio, kamiu bunu monoka kuvisikili ka kuvakar sinaniano a munuiano novo napano mijikia rila ni-unumiu riluo rimei rimeruo rivu, rimemedu ka bajago na tomu nalo napano Atua milarurlo. ³ Kamiu kuvisen vonvon Tubo sano sinaniano telisu ruei, a ver kumisen kumijog bo, bo ka kuvisen bogo nonovio, mia mabomiu rivujo vatitig dam̃ariga eaio.

Yesu naio be burupati puruveru na tagvoru napano meul

⁴ Atua naio jidom rivitirilar yimo lu tai, naruei naio bijauialar puruveru tai napano naio meul tena tagvoru na yimo nei, napano naio mial bo laka, nina be Yesu. A kulo dolu nalo maka asidom naio, abukulario, mia kito

tiniedo jii naio toru, rotakiiio. ⁵ Naruei Atua naio buru kito, naio bitiri bulag kito mave ea puruveru nene, naio miasosol kito jibe ka puruveru nalo napano ameul ea kanano yimo lu nene. Naio mial kito jibe ka taara na kulo lu nalo ka roim̃au kanano, napano romijikia ravar novo nalo van naio napano mia naio saaro kalo, napano romijikia resian vanio rivior im̃auano ga napano Yesu Kristo naio mila ruei. ⁶ A javukia ga iliano tai joa niosi na tormoruo naverialiano Aisea kanano nua ruei, napano Atua naio ber berinavo

Kamiu kubitilubar ruei p̃eli makanio?

Kiniou nemijauialar puruveru na bo tai tena tagvoru na kunuaku ruei, napano tiniekujii naio toru.

Mia nevitiri naio memedu ea kanaku komeli lu na, Saion.

Toro kei napano rivitirilar kanano meuliano ea naio, mia naio rijikia re rijoru rimei rivova bogo tai. Ais 28:16

⁷ Mia kito na m̃a romonea puruveru nene, rober naio bo laka ea kanado vitiiiano, mia tealoka maka asidom, abukular naio ga bano. Mia iliano dolu tai na Atua kanano ea tivelinio nei joa Niosi na Iouano nalo, napano naio berinavo

Bekurano ka napano tomu nalo na amim̃auka

*yimo aberenio puru-
veru nei naio bova,
abukulario,
mia kiniou nomidu pu-
ruveru nene, nemila
naio be burupati pu-
ruveru na tagvoru na
kunuaku yimo lu. Ais
8:14*

⁸ A ea Niosi na Aisea bereio,
be Atua kanano iliano tai
naio berii puruveru nei
keano vo, naio ber jibe nei,
berinavo

*Puruveru nei, mia tom ve
telabo jaalo nalo ser
baŕeia naio, rila aiel
vovu.*

*Naio be puruveru tai na-
pano mia rila tom nalo
na yetemeriba nei ati-
birbil. Ais
8:14*

Ver revika venia milalo na
ajibirbil jibe na, nina bior
ga maka amonea ilirianiano
nei napano amijogio, a mia
atibirbil avatove laka ea vio
na vakovioiano napano naio
jo mon kalo.

⁹ Mia tibena re van kito,
bior napano robe taara
takurano napano Atua naio
bitirilario, robe taara taku-
rano na parinio kulo lu tai
na rovitikar kiano vio, roju
jouro ea kanano buruvenuo
lu, robe tom nalo na kanano
maratavo memedu. Kito
naruei napano robe tomu na
memedu nalo ka ravamenea
naio, ka roverial kanano
tinienovoiano na mila ban
kito, napano naio buru
bulag kito den melijokouo,
ana jii kito rojua kiano
miamoiano na bo laka.
¹⁰ Beamu nua robe tomu

ŕiliŕili, mia vonganei robin-
imei robe taara takurano
na Atua kanano. Beamu
nua kito maka rovokar
kanano luŕiluŕiano, mia
vonganei kiano luŕiluŕiano
naio bujolou ea kanado
meuliano.

¹¹ Banalo, ver tibe na, bo
ka kamiu kuvitilubar ka
yetemeriba nei naio maka
ve kiado vonuo rimemedu.
Kito rojibe ka tomu na
vio dolu nalo, rojibe ka
valauo nalo ga, naruei
monoka rotuvan bajago
natiniekakariano nalo na
yetemeriba nei kanano, bior
ka napano kanano vovaiano
nalo abe uolu memedu
ka niunudo. ¹² Damariga
roju iviso ka nalo napano
ma maka asidom amon-
monea, ka napano ma
aju abijukudie kito, mia
bogo napano rojua miralo,
kanado meuliano monoka
rivu mia rivu. Ver tibe na,
mia amijikia avitilubarario
ka venia na ma roju ma
romila naio memedu, mia
nalo bunu ver amonmonea,
mia amijikia avija ka kito,
roviniu ravamenea Atua ea
bogo na mia naio riyotuba
ka kito bereio.

*Bajago novo na na-
moneano nalo bogo na ajua
yetemeriba nei*

¹³ Jibe ka kito robe na-
moneano nalo ea Tubo ruei,
kiado bajago, bogo napano
rojua yetemeriba nei naio
monoka rimemedu ea naio
siano na ma roju romiololu
kanio.

Namoneano nalo monoka atovon tomu na tortoru nalo napano abitiri bulaglo ka avitakar vatitig tomu nalo. Vede tubo nalo, ĩeli navurim̃araboiano na tortoru nalo, ¹⁴ ĩeli na parinio tubo nalo, mia kito monoka rovitilubarlo ka Atua naruei naio mije monea jum̃alo ka atibure tomu nalo, ka asian vironiano van na m̃a mila maka rimemedu, a ka aiaia na m̃a miĩau bo. ¹⁵ Atua naio jidom ka kanano tomu nalo monoka ala rivu, bior ka napano ver rotu rala tibe na tulaka, mia tomu nalo na m̃a maka ajikia vite, napano ajum̃a abuku iliano vovu die kito, mia ajikia re bunu ka aver titai leleio.

¹⁶ Ka tivelinio, be riano ka kito romijikia romila venia ga na m̃a kito rojidom, mia ka tivelinio nene, toro na m̃a be namoneano naio maka rijikia sidom m̃elea tibe na. Vede naio jidom ka river tibe na, ver O, vite na naio joa kiniou ga na, kiniou nemijikia nala vite va venia napano kanaku jidomiano ga naio jidom. Mia maka tibe na leleio, bior ka napano monoka rovitilubar ka kito namoneano nalo robe tomu na amĩau Atua kanano, mia monoka rala venia ga na m̃a naio jidomio. ¹⁷ Namoneano

nalo monoka atovon kulo dolu nalo, monoka tiniel tii kurualo dolu nalo a kuvivinielo nalo na ea Atua kanano m̃aratavo. Monoka amerou ka Atua, avame-neao, a monoka avatove bunu ka kialo tubo nalo.

¹⁸ Ea taara na namoneano nalo, tealo abe tom na tortoru kanalo, ka aim̃au kanalo kurano ga. A kanalo tomu na tortoru tealo amijuku bo, mia tealo ajikili laka, naruei bekurano ka napano toro na toru bijuku bo ĩeli bijuku bova jibe na, mia toro na miĩau kanano monoka tovon naio rivu. ¹⁹ Bogo tealo, vede toro na im̃auano naio miĩau bo ga, mia kanano marauo naio mijikia rila siniabu vova kanio, naio mijikia rila vova kanio dolu ga. Toro nei mia naio rijog rivova rivior kanano marauo kanano bajago napano maka rimemedu, mia bo laka ka naio river bare ka rijamo ka ga, napano kanano iviso jo bar tiniene ea Atua ga, ana mia naio rijikia rijoglubar ka napano Atua jo bija naio ka riiaio. ²⁰ Mia ver toro na im̃auano mila vite na bova telabo, ĩeli mia kanano toro na toru monoka river asian vironiano vanio. Mia ver bogo napano aje vironiano van toro nei, ana naio jo buru ga, mia kito rover re ka naio jo buru bior ka napano naio be toro novo tai, mia romijikia ka naio maka ril bior ka napano naio bitilubar kiano vovaiano.

Mia ver jau kotom̃a kala ga vite nalo na bo tibe ka napano Atua naio jidom, naruei nalo ajumolu amila siniabu kaso, ajian vironiano na kirisikili tai banso biorio, ana jau koto buru ga, nina naruei bajago na bo nanm̃a Atua naio tinien jii

m̃lelea laka.

²¹ Vite na napano toro na bo naio mijog bova bior ka napano amila bova kanio, naio monoka ve yati tai na kiado meuliano na m̃a Kristo bio kito robinimei eaio, bior ka napano beamu naio jibe na ruei ban naio. Naio maka rila titai, ana amila naio bar jogvaiano laka, mia naio mijamo ka ga, bior kito. Naruei jibe ka m̃arabo na m̃a kiado Tubo naio miel ban ea beamu ruei, mia kito roue jaano iorou kanio.

²² Iliano Lu moruo berii naio beamu ruei, napano ber jibe nei, berinavo

Naio maka lele rila kariano bogo tai,

iliano na sibiano maka lele riyotuba ea niono.

Ais 53:9

²³ A jibe ka bunu napano kito romijikia, bogo na m̃a abuku iliano na bova nalo banio, naio maka bimerano, a bogo na amue niegeniege niabeno, mia maka naio river titai leleio vanlo. Naio jo buru ga, naio midu vite nonovio joa Teta Atua jum̃ano napano dam̃ariga kanano tibureiano nalo memedu batitig bo ga.

²⁴ Bogo napano Yesu naio jaklele ea m̃akolkolo, viro-niano na kanado kariano nonovio mijoru ea niabene, a kiano m̃ariano mila na bajago na lakariano naio m̃aro den kito, mila napano bajago na mila memedu naio meul bo naio joa kiado meuliano. Ierinio, kiano niabejalele nalo amila kiado ni-

abejalele nalo amije ioruriano na bo.

²⁵ Beamu, kito roju romiel vovu jibe ka nunu nalo napano m̃a amilaluvu kanalo m̃arabo, mia vonganei toro na m̃a bitikar nunu naio mileal kito bereio ruei, vonganei robinimei ber roju batitig bija naio napano jukuku ka kiado meuliano.

3

Nalo na m̃a ajoro ruei monoka atovon koalo nalo

¹ Jibe ka napano kito namoneano nalo monoka roto-
to-
von parinio tubo na buru-
ruvnuo, kito na m̃a ro-
joro monoka roto-
von bunu koado nalo.

Nemil beamu ban kamiu tire nalo, ka kamiu monoka kuvitovon vatitig kouemiu nalo. Vede tira tai koano naio maka rimonmonea iliano lu, naio maka sidom rijog kanano tira nei verii kanio, mia ver kanano tira rila rivu ka naio dam̃ariga, p̃eli mia mijikia rivuru naio bunu rimei rive namoneano tai. ² Iliano telabo maka rijikia to-
vu-
lu toro nei, mia bogo napano naio bitii vatitig koano kiano bajago lu na tovoniano na meuliano nei, mia naio saaro ka rimonea.

³ Tire nalo, bo ka kuvi-
tilubar ka burupati na yovovuano na kenemiu, maka rivior na m̃a kuvi-
jukon vijumiu tibe na tibe na, p̃eli na m̃a kumive yomu niogo nalo, p̃eli na m̃a kuviya kulum̃arauo

nalo na bo. ⁴ Vite na, naio maka rivor napano mña kumiyovovua batitig niabemiu nalo jibe na, mia venia na mña mila kamiu kumadigdig bo riano, naio be bajago na bo na joomo ea kamiu. Nao, kenemiu tiniememiano a kenemiu iviso na melumu, nina naruei naio be kenemiu novonovoiano riano, a mia nina naio maka rijikia rimei ve terimoruo bogo tai, naina naruei be bajago napano Atua naio mial bo laka.

⁵ Korobido tire nalo re nua, nalo bunu kanalo bajago jibe na ga. Nalo abarkar tinielo ea Atua, naruei amonea ka naio ga mijikia rijailo ka amei ave novo laka ea mirano a ea mirano na kulo dolu nalo. Bogo napano koalo nalo bunu amial ka napano kanalo tire nalo nei abatove batitig jibe na, nalo amial bo laka. ⁶ Tira tai napano naio jonña mila jibe na, naio be tiramoruo Sera, napano naio jaaro ka tovon batitig koano tormoruo Epraamo, banbano naio jo bio ka naio be kiano tubo. Tiramoruo Sera nene, roju romial naio jibe ka kiado nena novo tai, naruei kamiu tire nalo re banei, ver kamiu kuvitu kuvila memedu van kouemiu nalo, tibe ka napano naio milαιο, kamiu kumei kuvitibe ka kenerinio niatira nalo memedu. Vede tealó amerou ka ver ala tibe na van koalo nalo aver mia tumabe ka nalo, mia makanio, kamiu monoka

kuvatove kalo tibe ka na mña Atua naio jidomio.

⁷ Mia iliano rimei ka kamiu sumano nalo, ber ka kamiu monoka kuvisidom bukua kouemiu tire nalo ve toru. Vere toro tai toa kanano vonuo vija koano, naio monoka rivitilubar ka naio be sumano, naio jikili bo, mia koano naio be tira, maka sikili laka tibe ka naio. Naio monoka tinieno maio tulaka ka Atua naio jian meuliano novo maka van sumano ve takurano ga, mia naio jian banlo abe juo, sumano bija tira abe veverare ga.

Mia ver toro tai rila re sikili mēle van koano tira, mia kanano jidomiano rivatove kanio, melmeloko rivu vanio, mia naljuo kialo volkouano nalo maka ajikia ava avoru ea mñarabo togio ga, mia amijikia ajaka ava avoru ea vio na mña Atua naio jojoaio.

Kamiu monoka kuvatove ka kamiu ka kenemiu jidomiano nalo mia amei ave takurano

⁸ Iliano na maaro tai ea tivelinio na, kiniou neber bo ka kamiu kuvidu jidomiano nalo napano nebere-nio mave ruei. Kamiu kuviniu, monoka kuvila vio sikili bogo nonovio ka kuvitu batitig vija kamiu napano kenemiu jidomiano ve takurano ga. Kamiu tiniemiu riiaia kamiu, kamiu tiniemiu titi kamiu tibe ka kube mñaratavo takurano ga, kuvijuku rivu, kuvidu kamiu kuvitutano ka kamiu bereio.

⁹ Nana ña mila lelanso, mia jau kovimerano re vanio, a nana ña mioluaso, mia jau koyolua merano re naio. Venia napano vede rimeiaso, mia koto kesian merano ilivuiano na bo ga rivanio. Bajago na bo jibe na naruei napano Atua naio bio kito biorio, ka rala tibe na dañariga, a ver resian ilivuiano rivan toro dolu, mia Atua naio rudu kanano ilivuiano toa kiado meuliano. ¹⁰ Verikariano na Atua kanano na jibe na naio joa Niosi na Iouano nalo ruei, napano naio ber jibe nei, berinavo

Toro na ña tinien jii ka toa yetemeriba nei rivu, ðeli naio jidom ka kiano meuliano mia rivuro rivu, ve tebievi, naio monoka riverbure ilivovaiano nalo amei re amolmoluo ea niono, monoka rivitkar vatitig ka naio toña rilasibi re.

¹¹ Naio monoka rituvan na bova, rila na bo ga.

Naio monoka ritakisor tuñaro, monoka rilavio sikili tulaka ka rivuru rimeí vaataro ka iviso na tomu nalo.

¹² Tubo mirano naio jo bamere jikili vatitig ea toro na ña jo mila vite memedu, naio jo mije tiliniene ka volkouano na tomu nalo na bo jibe na.

Mia tomu nalo napano ña aju amimauka vovaiano, mirano jikili ealo, bilig taakano

*kalo.
34:12-16*

Iouano

Bogo na ña amila bova ban Atua kanano tomu nalo na bo

¹³ Ver kito rotu rala vio sikili ñele ka rala vite nonovio naio rivu mia rivu, mia rover re ka mia tomu tai amijikia ala siniabu ka kito riviorio. ¹⁴ Mia vede bogo tai aial kito roju romila bo jibe ka napano Atua naio jidomio, naruei romiilo ka napano ajumolu amila bova ban kito biorio. Ana ver tibe na, monoka reial jogviano nei naio maka ve vite tai, naio be ilivuiano tai ga napano Atua naio mije ban kito. Romijikia rosidomial iliano tai na niosi na tormoruo naverialiano Aisea, napano naio ber jibe nei, naio berinavo

Atua kanano toro, jau komemebiju re, jau monoka komerou ka re venia na ña tomu nalo na yetemeriba amijikia amerou kario. Aesaea 8:12

¹⁵ Iliano na ber ka mia kito romerou re, mia venia napano mia monoka rala, ea kiado iviso, monoka rodu Kristo naio loa vite nonovio, naio takurano be kiado tubo. A bogo nonovio monoka rotu batitig rivu, jibe ka napano ver vikadeniano tai rimeí rivika ka bior vaio romonea, a bior vaio ana rabar tiniedo ea Yesu, naruei monoka rejikia vatitig tuñabe mia romijikia resian verdoþeiano na bo rivano. ¹⁶ Mo bogo napano

verdoŝeiano bano, naio monoka rivan vija bajago na melumuiano, a nana tovoniano na toro. Nalo na m̃a tinielo jii ka m̃a ala lelan Kristo kiano namoneano nalo, amijikia avuku iliano na bova ve miroano rimei ea kami, mia kuvitikar, maka rivu ka kuvuku bereio iliano na bova nalo rivan ealo bereio. Ver kuvila tibe na, mia iorou kumijikia kuvimou ve toru laka ea ilisikiliano nalo na kenemiu bereio, mia ver kumelokloko ga kalo, mia nalo naruei monoka aimou rivior kanalo iliano nalo na jikiriki m̃a na.

¹⁷ Ver Atua kanano sidomiano naio rijamo ka bogo tai jogvaiano naio mijikia riyotuba ka kito, mia maka rivu ka jogvaiano nei naio rimaluvo rivior vite tealogo na bova na m̃a kito ga romilaio. Mia bo lie ver jogvaiano nei naio riyotuba ka kito rivior ga im̃auano novo nalo na m̃a kito roju romilaio. ¹⁸ Kamiu tiniemiu maio ka Kristo, napano naio jibe na. Naio be toro na memedu laka tai, mia naio mijog jaleleano burutomoruo laka bior tomu nalo napano maka amemedu. Kariano na kito tomu nalo na yetemeriba kiado telabo laka, mia ea kanano m̃ariano takurano nei, naio mila vite nonovio bo ruei ka rila ka ve kiado m̃arabo ka mijikia rivuru kito rava vaatara ka Teta Atua. Amila lelan Yesu niabene jibe na bano naio m̃aro garuei, mia bo laka ka napano iorou, naio binimei meul bereio ea moroano na

Atua Niununo.

¹⁹ Beamu ka naio meul bereio jibe na, napano naio joa vio na m̃ariano kia ga vo, moroano na Niununo na Atua kanano nei binimei bujo magmago eaio, mila na naio ba mioliolu memedu ban niununo dolu nalo napano ajua vio nei, ka vonganei naruei Atua naio jovululo ruei, ana Sim̃aro naio bijukude garuei. ²⁰ Niununo nalo nei, naio be tomu nalo na m̃a maka asidom amonmonea Atua, ajavukia nalo na ea bogo na toromoruo Noa re nua. Ea bogo na, Atua naio jororealo ka aviliglo, naio midu bogo tebievi banlo. Aju jibe na, bano na Noa naio jo mim̃auka burum̃ara kanano uako nei banbano, mia maka asidomio ga, naruei bogo napano ueimiya jovukolo nalo amadudu. Nalo miroano aba kovio ka bogo na, mia tomu telisu ga amije ioruriano joomo ea uako, nina be Noa nalo arolu ga.

²¹ Naruei burum̃ara uei nei napano burulo ameul ea kialo uako nei, naio be nioti venia ban kito banei? Naio mila kito rojidomii uei dolu, uei na kanado ioruriano, naina be uei na m̃a amila varueiano ea kito eaio. Uei na varueiano nei, naio maka ka rila ka niabedo rimeravo, mia naio jekar vatitig kito ka Atua biekokoa kariano nalo na kiado, naruei kito maka bunu roimou ea naio riviorio.

Varueiano naio midu kiado meuliano jo bo bija Atua jibe na, mia bo ka

kito rosidomii bunu ka kei naio mila kiano māarabo jibe na? Yesu Kristo ga na naio milaio, binime i ea kanano tumoluano bereio den namariano.²² Mia iorou ka nina, naio bavin bereio ea vio mave, naio ba jo jotano mave bija Atua ea jumano tivelinio vameruo nene, napano nailiano nalo, kulo kouo nalo na tortoru, bija moroano nalo, abiniu ajutano ka kanano navenatuboiano.

4

Atua kanano sidomiano naio to tukamu ka kiado meuliano

¹ Jibe ka na neberenio ruei, Kristo naio mijamo ka naio bar jogvaiano miroano ea mokotenano, mia kito bunu monoka rala kiado jidomiano riveverare ga. Toro na mā naio rijog vova ea mokotenano, monoka naio river re river bova, bior ka bogo napano naio miyotuba ea jogvaiano jibe na, mijikia rila naio sikili lie vo ka naio ribisi vija bajago na kariano nalo.

² Toro na jibe na, naio maka bunu todū ka kanano meuliano na yetemeriba nei, napano tinieiano va nalo na bajago na tomu, nalo ve toru laka ea kiano jidomiano, mia naio jidom ga vite na memedu nalo na mā Atua naio jidomio.

³ Burumāra togio na kanado meuliano, kito romila kule laka bogo be ruei napano roju rejeliviv bija bilbilu nalo nei na mā maka

amonmonea. Kitoliko nalo ea meuliano va napano bujo ka veribinio nalo, najiliano na tire nalo, namunuiano na uei ba parilo jeliviv, tinielo mimi a ajukuruku, amila uetubaiano janea vio bokar viomijeni, amila korov tuboiano, bija amila lotuano ea tavoru sibusibiano nalo.

⁴ Nina kiado meuliano na beamu na, mia vonganei bilbilu nalo na maka bunu ajikia ka kito roju jumabe. Amial ka napano maka bunu ga rosidom ka ratakisiorlo ka ravan rovdomdom kiado meuliano ea kialo bulumirano bulukinia, mia maka asaaro leleio, mila na tinielo jer kito toru laka.

⁵ Mia kito rosidom dede re, tomu kinkin nalo na jibe na mia atumolu kia navo kamu ka Atua mirano, napano mia naio tibure tomu nalo na ameul vija bunu nalo napano amarmāro beamu ruei. Mia monoka nalo averial kialo veriano vanio, naruei ea bogo nei, mia avitilubar kanalo torokoriano nalo.

⁶ Mia tibe na re van namoneano nalo. Vede tomu nalo na yetemeriba atiburelo asian vironiano na yetemeriba van mokotenalo, mijikia riva rivokar napano mia alaluvu kialo meuliano, mia bogo na napano atumolu ea mirano Atua, mia naio sian ijaiano na meuliano rivan niunulo. Mia meuliano nei naruei naio be burumāra vite na mā mila kito roju romiololu ka Ioluano Vou na bo ban tomu nalo.

Bajago na namoneano

nalo kanalo ka bogo na maaro vaataro ka rimei

⁷ Kiniou nojidom never tibe nei, ka vonganei vaataro ka kito rovokar jukuti na vite nonovio. Ea bogo na jibe na, namoneano nalo monoka atumolu batitig rivu ka napano kialo jidomiano nalo ameravo rivu, ka amelukluku re ka volkouano. ⁸ A mave ea vite nonovio dolu nalo, monoka tinielo titiilo bereio ve toru laka, bior ka napano bogo na tiniedo jii toro tai, mila na romijikia robiekokoa kiano kariano monmaio ga. Iliano tai naio ber jibe na ruei, berinavo kariano toru laka, mia tinietiano naio mijikia rivariko nonovlo.

⁹ Vite dolu, namoneano nalo monoka asaaro ga ka avitiikarlo bereio ea kunualo nalo. ¹⁰ A bunu, nalo veve terakurano monoka ajikia vatitig veve moroano a jikiaiano nalo napano Niununo jian banlo, a monoka aimāu rivu vija ka rijai batitig kanalo bilbilu dolu nalo. Ver aviekouo rivu, amijikia ala ka napano mia tiniememiano novo na Atua kanano riyotuba kalo. ¹¹ Toro napano jikiaiano na iliano joa naio, naio monoka ril rivu tibe ka napano Atua kanano iliano na memedu ga naio jo moluo ea niono. Toro napano jikiaiano na ijaiano na imāuano joa naio, naio monoka rila rivu vija sikiliano nonovio napano Atua jian banio. Ver bogo nonovio rala vite nonovio rivu laka tibe na,

mia tomu nalo amijikia avamenea Atua ve toru rivorio, avamenea naio ka Yesu Kristo siano, napano mermerano nalo a moroano nalo abe kanano ga rivan riva ribisi re bogo tai.

Jogvaiano na nalo na mā amonea

¹² Banalo, nemijikia ka vonganei kamiu kumitu kubiniua bogo tai na jaleleano napano naio mila kamiu kumijog bova toru. Mia nejidom never ka kamiu, ka kuviilo mēle re kanio, maka kuvial vite na tibe vite tai napano be tiniemiu ka kuver maka rijikia riyotuba ka kamiu bogo tai. ¹³ Mia venia ka ala, kuvisaaro ga ka napano kuvijikia kuvitu burukuti vija Kristo ea jogvaiano nalo na kanano. Ver tibe na, mia iorou kanio ve burumāra kenemiu saariano, napano kuvijikia kuvitu burukuti vija naio bereio ea bogo napano naio rimaluvo vija kanano mermerano. ¹⁴ Ver dolu nalo amijikia ka Kristo siano joaso, mia amijikia avuku ioluoliano va amei easo, mia kosidomii mēlea re kanio. Mia burumāra ilivuiano na Atua kanano naio toaso ga, bior Niununo na mermerano na Atua na mave naio jo joa kanamo meuliano.

¹⁵ Ver ala vironiano tai pēli jogvaiano tai rimei easo, maka rivu ver ala rivior napano jau kobe toro tai na mue toro, pēli kobe toro na vinauano tai, pēli kobe toro na mila korov tuboiano,

þeli kobe toro tai na mila
jaleleano. ¹⁶ Mia ver ala
rivior napano ga amijikia
ka komonmonea Kristo, mia
kala re tibe ka na jau komi-
mou, mia monoka kovame-
nea Atua napano naio mi-
also kabare ka Yesu Kristo
siano naio toaso.

¹⁷ Vonganei bogo na tibu-
reiano naio jikar ruei, a mia
riva rivokar na moti Atua
kanano m̃aratavo. A ro-
mial ka napano naio mijikia
rijamo ka bogokouo tealo
amaluvo ea meuliano na
kenerinio nalo kanalo, mia
ver naio rila tibe na van
nalo napano amonea, maka
rejikia ka mia tum̃abe ka
nalo napano maka asidom
amonmonea kiano Ioluanu
Vou? ¹⁸ Nina naio javukia
iliano tai na niosi moruo
na Ilimasouano nalo na m̃a
naio berenio jibe nei, naio
berinavo

*Toro na ajidomii aber
naio memedu ruei, be
vite jikili tai ka Atua
mijikia rilarur naio.*

*Mia ver tibe na,
kuvilavon kuvisidomii
nalo na m̃a maka
asidom Atua, abe
tomu na kariano ga.
Mia tum̃abe kalo?
Ilimasou 11:31*

¹⁹ Mo, ea vio nei never
iliano telisu tai van kamiu
napano Atua mijamo ka
jogvaiano maluvo ka kamiu.
Neber kamiu kuvitu bogo
nonovio ka kuvila rivu
van tomu nalo nonovio,
a kamiu kuvidu kenemiu
meuliano toa Atua jum̃ano.
Naio naruei be Atua na

jii vite nonovio, naio be
Atua na biekouo laka, naio
be Atua napano romijikia
rovarkar tiniedo rivu ea
naio dam̃ariga.

5

*Iliano ba ban navurim̃araboiano
nalo*

¹ Mo vonganei nojidom
neverial jidomiano tealo
rivan kamiu navagadeano
nalo na lotuano. Kiniou
be tinieku ka nabare ka
neil van kamiu tibe nei,
bior kiniou bunu nebe
navagadeano tai, a mave ka
naina, nobe nalo tai na m̃a
numial Kristo ka mirememi
bogo na naio bar jogvaiano
nalo mave ea m̃akolkolo. A
nemijikia batig bo ka kiniou
bunu nove tai napano mia
noto jouro ea mermerano
nalo napano mia amolmoluo
iorou, tenene na nemial bo
ka nesian iliano nalo nei ka
rijai kamiu.

² Nebika jikili ban kamiu
jibe na, ka kuvitikar rivu
taara na nunu nalo napano
Atua barlo aju yetano ea vi-
tikariano na kenemiu. Nina
be burum̃ara im̃auano tai
na, mia riano, maka rivu
ka ver kuvitu kuvila napano
kenemiu iviso maka sidom
rilaio. Mia bo ka kuvi-
laiio vija jidomiano na saar-
iano, jibe ka na Atua naio
jidomio. Mia im̃auano venia
na m̃a kuvila, maka kuvila
rivior ga ijaiano telisu tai
napano vede kuvijikia ku-
vario, mia monoka kuvila
rivior ga jidomiano tai joa
kamiu ber bo laka ka ala

imãuano nalo na rijai tomu
dolu nalo. ³ A nalo na-
pano m̃a ajua jumemiu ka
kuvitikarlo, kuvila re ka ku-
vitu kuvilavon kuve boru
na jikili vanlo, mia monoka
kuvitukamu rivu kalo, ku-
visiloglog m̃arabo vanlo, ka
mia amijikia aue jaamiu.
⁴ Ver kamiu kuvim̃au rivu
tibe na rivano, mia parinio
toro na bitikar Atua kanano
nunu nalo mia naio saaro
rivior kamiu. Bogo na mia
naio riyotuba bereio, mia
naio rivitiri bulag kamiu
tibe ka kiano parinio tubo
nalo, mia naio riyovovua
vatitig kamiu napano mia
kiano burum̃ara miamoiano
na kiano mermerano mer-
meralii kamiu napano maka
rijikia rivatove bogo tai.

*Iliano ba ban kulo dolu
nalo*

⁵ Vonganei iliano biedu
ban kamiu m̃eaku nalo.
Nebika jikili den kamiu ka
monoka kumisaaro ka kuva-
tove ka tormoruo nalo vija
kenemiu navurim̃araboiano
nalo. Iliano na jibe na kamiu
kuviniu monoka kuviduio,
bior ka napano naio bo
ka bogo nonovio monoka
rola bajago na vatoveano
van kito. Naina jibe ka
iliano tai napano Niosi na
Ilimasouano naio ber nua
ruei, napano berinavo

*Atua naio berbare bajago na
m̃arouano,
mia naio miija bajago na
vatoveano. Ilimasou
3:34*

⁶ Tibe na, bo ka kito rala
kiado jidomiano totano ka

Atua bogo nonovio. Rodu
kito rotua jum̃ano, naruei
ea kanano moroano mia
naio mijikia vitiri bulag kito
bereio bogo tai. ⁷ Kito
ravar kiado bagaro nalo tua
taakano, bior napano naio
jidom kito toru laka, naio
jaaro ka rijai kito.

Kuvitokovio ka Sim̃aro

⁸ Kiniou nojidom nover
bunu iliano tai ka rilabon
kamiu, ka monoka kuvitikar
vatitig kamiu, monoka kuvi-
tilubar m̃arabo kija. Kiado
uolu nei Sim̃aro, naio jom̃a
jeliviv ea kito dam̃ariga, naio
javukia burum̃ara temeul
deden tai napano jijer naio
toru kar namoneano nalo ka
tumolu ser niadualo. ⁹ Mia
kamiu kuvijamo ka re naio
ka rila tibe na, monoka ku-
viekouo sikili ea kenemiu
viekouoiano ka kuvitoko vio
vatitig ka naio. A maka ve
kamiu ga napano naio jom̃a
milavon kamiu, mia kumi-
jikia ruei ka kiado bilbilu
dolu nalo miroano naaju
jeliviv ea yetemeriba, a jog-
vaiano naloaju amiyotuba
ealo bunu, naruei bo ka kito
rovinju rotumolu rotu sikili
ka Sim̃aro naio tovulu re kito
tai.

¹⁰ Ierinio ka napano kamiu
kumitu kumijog jaleleano
kija ea bogo na, mia kanado
Atua na tiniememiano
nonovio mia rijai kamiu.
Naio naruei napano bijauia
bulag kamiu ruei ka mia
kamliko Kristo joomo ea
kiano mermerano, mia
naio naruei napano mia

ridururu kamiu vonganei. Mia kumemebiju re bunu, mia kuvikulkul re, ana ea kiano moroano, mia kuvijikia kuvitumolu vatitig bereio.

¹¹ Tibe na, kito rovame-neia kiado Atua, bior ka napano kanano moro-ano naio jo jovulu nono vite nalo, a mia naio to tovulu vanvan rijikia re bisi bogo tai, tibe na naruei.

Iliano na maaro

¹² Kiniou nojoa vio nei bija kuruado novo nei Sailas, nojo nabalea naio ka vite miroano, a naio naruei miija kiniou bivitauia kar bulag kenemiu m̃esi nei. Nemijikia ka m̃esi nei naio bulati laka, neber vite telisu ga, mia venia napano naio joa vio nei, nemijikia ka naio berial bajago novo nalo na tiniememiano na Atua kiano be riano, napano naio memedu ka kamiu ea vio napano kumituaio vonganei. Tibe na, kuvulukuio, kuvidu ka rijai kenemiu jidomiano, kuvitu sikili eaio dam̃ariga.

¹³ Nalo namoneano nalo na vio nei Romo, bija bunu Mak, napano nobur naio jibe ka keneriku ruei, aber kavijo bo p̃eli bogiano bo ban kamiu. Numitua vio na, numial bova kija, numijog jibe napano numitua burum̃ara komeli va na beamu nei napano abio ka Bapilon. Mia naio bo ga, bior napano numijikia ka Atua bijauia bulag

kumemi ruei, nubija kamiu, kito rove kanano.

¹⁴ Kanaku iliano maaro ga ea vio nei, neber bogo na kamiu kubinimei vio takurano, kuvila vorvoruano bo van kamiu, kuviniomniom kamiu tibe napano tiniemiu jijii kamiu.

A kanaku volkouano, ber tum̃aroano novo na Yesu Kristo kanano naio jo bija kamiu kubiniu napano kube kanano.

Kiniou, Pitere.

Mesi Juo Na PITERE Naio Bivitauiiao Verialiano Moti

Tukunuano bulati na niosi nei

Pitere kiano mēsi juo nene, Pitere bivitau ba ban namoneano nalo ea kiano bogo. Ea bogo na naverloglogiano nalo aju, napano kialo verloglogiano nalo maka rimemedu, a tomu nalo napano ajakisorlo aju ajibirbili ea kariano. Naruei Pitere berkakar ban namoneano nalo nei ka monoka avitakar vatitig ka tomu nalo na jibenei avilgivilgilo re.

Mia ka atukovio ka bajago va nei, toro monoka rijikia vatitig Atua, a monoka rijamo ka Yesu Kristo, napano be kiado Tubo, rimeitokukamu ea kiado meuliano. Namoneano nalo ea bogo na, ajog ioluano vou ea tomu nalo napano amial Yesu ka miralo, a napano amijog kiano iliano, bogo na naio jo berloglog tomu nalo.

Pitere bivitaui mēsi nei ka ridu bulag namoneano nalo kialo jidomiano, bior napano ea bogo na, naverloglogiano nalo nei napano kialo verloglogiano maka rimemedu, aju aberial aber Yesu mia maka rijikia rimeibereio. Mia Pitere berinavo Yesu maka rimeivo bior napano Atua “maka sidom toro tai rivakovio. Naio jidom rudu bogo rivan tomu

nalo nonovio ka amijikia avilgilo.” (3:9) A mia naio monoka rimeibereio vesiou re.

Torogio nalo na niosi nei

Iliano moti 1:1-2

Namoneano nalo kialo meuliano 1:3-21

Naverloglogiano nalo bija kialo verloglogiano na maka memedu 2:1-22

Yesu mia rimeibereio 3:1-18

Iliano na be moti

¹ Mesi nei, kiniou Saimon Pitere nebivitaui, jibe ka nebe Yesu Kristo kiano naimauano, a nebe kiano atevi. Nojo nebivitaui biedu ban kamiu napano kubokar viekouoiano ea naio bo laka, be verare ga ka kumemi nanua, nubakar beamu ruei. Naio naruei be Atua a be ioruriano na kiado robiniu, naio jo mila memedu bo ban kito damariga. ² Jibe na, nojidomial kamiu, kanaku volkouano ka mia kuvijikia vatitig Atua kiado Tubo napano Yesu na riva lie tibe na, vanvan rila napano kiano tiniememiano a tumaroano to rivujo ve toru ea kenemiu meuliano nalo.

Yesu bio kito ka rove kiano

³ Yesu naio bijuku bo laka ban kito, napano ea moroano na mermerano a tinievuiano na kanano, naio bio kito ka rejikia vatitig naio tibe na. A bogo napano romijikia vatitig naio, naio ga rila vite nonovio ea kanano moroano lu nene ka rila Atua kanano meuliano a

kanano bajago lu avujo lou ea kito. ⁴ Yesu naio mila ka napano roju robokar ijaiano novo nalo nei napano kirinovo laka, romial ka jakii memedu ga kiano verikar-iano nalo. A ea m̃arabo nene, romial ka napano naio mila kiado meuliano jo misol meuliano lu na Atua kiano, a naio jo jian ban kito ka rovuro den niamiamo na sidomvoaiano nalo na yetemeriba nei.

⁵ Bior vite na, kamiu monoka kuvukdeli ka rila kenemiu meuliano rimei rivu lie tibe na. Ea viekouoiano napano naio joa kamiu ruei, bo ka kuvijedu ka tinievuiano bereio. Ea tinievuiano nei, bo ka kuvijedu ka jikiaiano a masosouano. ⁶ Ea jikiaiano a masosouano nei, bo ka kuvijedu ka telanvuiano, a ea telanvuiano nei, bo ka kuvijedu ka jidomiano na tebievi, a ea jidomiano na tebievi nei, bo ka kuvijedu ka bajago lu. ⁷ Ea bajago lu nei, bo ka kuvijedu ka sidomiano, a ea sidomiano nei, bo ka kuvijedu ka tinietiano.

⁸ Bajago novo nalo nei, ver atua kamiu, a ver atu ailuo lie dañariga, mia kenemiu meuliano mijikia rivar m̃arati ve miroano napano ajesei laka. Peli kamiu kumijikia kiado Tubo Yesu Kristo ruei, mia ver bajago nalo nei atua re kamiu, mia kamiu maka kuvijikia kuvila kanano iñauano na bo tai leleio. ⁹ Toro na jibe na, mirano miunu, maka rijikia

rivitilubar vite, a kanano jidomiano bulati ga. Naio tiniene bobogia vatitig ka ajekon bulag kiano kariano moruo nalo, a maka bunu tinien rimaio ka naio joa meuliano vou tai ruei.

¹⁰ Kiaku bilbilu nalo, maka rivu ka toro tibe na, mia nejikili ka kamiu kuveve terakurano monoka kuvukdeli dañariga ka kuvila iñauano nalo na bo ka riverial ka Yesu naio bio kamiu ka kuve kanano, naio maka ve tena sibiano tai, a maka ve tena seresereiano ga tai, mia naio be tena riano tai. ¹¹ Ver kamiu kuvitu kuvila tibe na, mia kuvijikia re kuvijoru bogo tai, a m̃aratavo na riva joomo ea Yesu Kristo kiano navenatuboiano napano naio be Tubo a Ioruriano na kiado, mia naio rivetavo ea batig van kamiu. Mia ala vorvoruano na bo van kamiu ka kuva kuvitu vija naio to toboto.

¹² Kiniou nemijikia ka iliano nalo nei, maka rive terivou van kamiu, bior kumitu kubokar batig bogo tebievi kija ruei. Mia maka nejikia notuvan ka napano monoka noto neververial ilirianiano nalo nei rivan kamiu ve vatelabo bogo nonovio. ¹³ Nina naio be iñauano na kanaku meuliano, ka neila kamiu ka tiniemiu ribobogia re, a nemijikia ka napano mia monoka nala tibe na riva rivokar jukuti na kanaku meuliano. ¹⁴ Tubo Yesu Kristo naio berial ban kiniou ruei ber rivesiou re, mia notuvan niabeku nei

navano, ¹⁵ mia beamu ka nina, nojidom nevivitaui bulag vite nonovio batitig ruei tu. Tibe na, ver navano, mia m̃arabo naio jo ka kuvijikia kuvisidomiikar iliano nalo nei dam̃ariga.

Pitere kiano iliano bija at-evi dolu nalo be riano

¹⁶ Kumemi atevi nalo nuberloglog kamiu ka kiado tubo Yesu Kristo mia naio rimei bereio vija kanano burum̃ara moroano. Tealo aberii verloglogiano nalo nene, aberinavo nina be iliano nalo na jidomiano na tomu nalo ga, p̃eli na aberinavo nina javukia tukunuano moruo re nua nalo, mia kumemi numijikia nuver memedu nuver maka tibe na, bior napano Yesu kanano moroano naio be vite na be riano napano kumemi numial ka mire-memi ruei. ¹⁷ Nanua na, kumemi numitu bija naio memedu ka bogo na napano Atua Teta jian mermerano nalo na vio mave ajuaio, abamenea naio, napano kanano iliano tai jaluvo mave batove, berii naio berinavo

“Nina naio be kener-iku memedu napano tinieku jii naio toru laka, napano najaaro toru ka naio.”

¹⁸ Kumemi naruei numijog joono na vio mave naio berial iliano nei, nina ea bogo na m̃a kumemi numitu bija Tubo mave ea burusuku lu napano na.

¹⁹ Ana bior vite nalo nei napano numial p̃eli numijog, numijikia vatitig bo napano meravo bo ea kene-memi jidomiano, ka nina be vite memedu nalo napano naverialiano moruo nalo na beamu aberialio. Kanalo iliano nalo ajibe ka yulu na bo tai ka merera ea vio na bobogio napano rojuaio, naruei bo ka rotu rovulukuio a roduio. Tibe na mia vetavo ea m̃arabo van kito riva rivokar bogo na legiano vou naio riyotuba ka kito, a Mejegi na kavijo rivavin rijivi ea kiado vio yauo ka rimererali kiado jidomiano.

²⁰ Mia kiniau nojidom never vite tai bereio ea tivelinio na verialiano nalo na naverialiano moruo nalo kialo, napano abivitaui joa niosi lu. Naio jibe nei, berinavo verialiano nalo nei, toro maka rijikia tumolu riverial river naio ga takurano mijikia vatitig nioti nene nalo. ²¹ Nina bior napano verialiano nalo nei, maka lele amaluvo den toro kiano jidomiano, mia Atua kiano Niununo naio mim̃au ea tomu nalo, naio jukamu kalo ka averial Atua kanano verialiano.

2

Naverloglogiano na juku-jukuano nalo

¹ Mia jibe ka na m̃a kito romijikia, ea bogo na naverialiano na bo nalo na beamu nei, bogo tealo naverialiano sibisibi nalo bunu ajum̃a amalmaluvo

ea mirano Atua kanano tomu nalo. A mia mijikia tibe na ga van kito banei bunu, napano bogo tai, ŷeli mia naverloglogiano sibisibi nalo amijikia ayotuba. A naverloglogiano na jibe na, mia avar parinio verloglogiano napano maka rive riano amei, mia amijikia averinavo amonea Tubo na vio mave, ka aver naio milarurlo, mia kialo verloglogiano nalo ajumŷa amildie naio bereio. Verloglogiano nalo nei amijikia ala lelan namoneano nalo kialo viekouoiano, mia verloglogiano sibisibi nalo nei maka ajikia avitilubar ka kanalo vironiano naio jo binimei soŷeli biorlo ruei. ² Nalo abova laka, a romimouo ka roveri venia na mŷa nalo ajumŷa amilaio. Naloaju aberenio aberinavo abe namoneano, mia amila ka bogo napano tomu dolu nalo abitilubar kialo bajago, ajumŷa amiyotel toru ea kiado mŷarabo na ilirianiano. ³ Tomu nalo na sibiano nei, ajidom vite nalo toru, naruei amijikia avuku iliseseiano ve miroano van kamiu. Mia alavon ajukubin kamiu ea tukunuano nalo napano abujo ka vite nalo napano maka rive riano. Mia naio bo ga, Atua naio maka to rimonmelio. Naio jiburelo, naio mila batitig kanalo vironiano jororealo bogbe ruei ju.

⁴ Bo ka kito rovitilubar Atua kiano bajago na tibure tomu a na milarur toro ea meuliano na nanua beamu.

Moti, kuvilavon ka kuvisidomial Atua kiano nailiano nalo na beamu, napano tealo ajumolu amilavon ka atu loa naio. Naio maka riverenio maka ve titai, mia naio jumolu buk bulaglo vaarakurano abatove ea bulu joomo nalo na melijokouo ea sebi na lakoiano, ka atua vio na riva rivokar burumŷara legiano na tibureiano na maariano.

⁵ A kuvisidomii bunu tomu nalo na beamu nua laka nei, nina ea tormoruo Noa kiano bogo. Bogo napano naio jomŷa mioliolu ka Atua kanano bajago na memedu banlo, mia parilo jikili laka, maka asidom leleio ga. Naruei Atua mila burumŷara ueimiya binimei buru bulaglo, mia Noa ga bija kanano mŷaratavo aluo, naio milarurlo.

⁶ A bereio, kuvisidomial burumŷara komeli juo na Sotomo bija Komora. Atua mial kialo vovaiano nalo naruei naio misebikolo abe burumaroro ga naruei, a nina naio betavo ea venia na mia naio rila ka nalo nonovio napano ajua meuliano na bova.

⁷ A na maariano ka rosidomial nalo nanua beamu, nina toro nei Lot. Naio betoro na memedu tai, a naio jo mijog bova damŷariga ea bajago na kiriniagiago nalo na tomu na mŷa amila korov tuboiano, napano naio jo iviso kalo. ⁸ Legiano nonovio ga naio jo mial kanalo meuliano va nalo, a naio jo mijog kanalo ioluoliano nalo, mia Atua naio mila juŷabe?

Naio mije mauo ban kulo va nalo nei, mia naio milarur meuliano na kanano toro na bo nei, Lot.

⁹ Naruei ver kito rosidomii vatitig ka nalo na, mia realeal Atua kiano bajago tai, napano jibe nei. Naio mijikia batitig jumabe ka rivuku bulag kiano tomu nalo na bo ataluvo den lavoniano nalo, a naio mijikia rivokar sikili tomu na bova ka avar kanalo vironiano nalo. Mia naio rila avar ve tertelisu vonganei beamu vo, mia ea legiano na tibureiano mia avokar nonovio nana ju nene.

¹⁰ Iliano nei ba ban tomu nonovio, mia jokol batitig nalo napano aju ajakii sidomvovaiano nalo na bajago na kariano napano amoluo bijaio, a jokol bunu nalo napano maka asidom aiagago, parilo jikili laka. Tomu kinkin na jibe na abe m̃arou ka kialo veribinio nei, a parilo toru laka ea kanalo vovaiano nalo, banbano maka bunu amerou ka vite tai, mia aju amil niegeniege Atua kanano kulo sofi nalo.

¹¹ Nailiano nalo na vio mave ajikili lie loa tomu nalo na, mia amijikia ka aju jukamu ea Atua mirano ea vio mave, mia amerou m̃ele ka ail niegeniege tomu nalo na, mia nalo na maka atibe nei, maka aial lerinio.

¹² Vite miroano napano kito romial ka abe lu p̃eli abe sofi m̃ele, mia tomu nalo na maka avitilubar leleio, aju amila lelan tolu nalo na. Kialo bajago nalo ajibe na, mila na ajibe ka temeul deden nalo

ga, napano amila pariparilo ga, mia maka ala tonovo tai. Aju amiel janea vio jibe na banbano tomu nalo amiliyi kalo amuebinvinlo, a mia tibe ga na bunu ban tomu nalo nei ga, aiilo ga ka aial kanalo m̃ariano.

¹³ Tomu nalo na jibe na, ajidom ka ala kialo jokoluolu nalo na parilo selivivi ea vio nonovio legiano ga, a ea bogo na kuvila sinaniano lu nalo na kenemiu, nalo amei atu jouro napano kialo jidomiano nalo rivujo ka jogvuiano na kialo vovaiano nalo ga. Nalo ajibe ka tukei nalo p̃eli menko nalo napano amila lelan mokotemiu novo nalo, mia maka asidomial leleio ka kialo vovaiano nalo mia ala nalo bereio ajog rivova m̃elea iorou.

¹⁴ Miralo nalo bujo ka tira ka ala siakaiano, a ajum̃a ajidom asen kariano nalo rivan rivano maka niabelo mave bogo tai kanio. Ba loa, ajum̃a abur kamiu dolu nalo napano amijikiki aban bijalo, a abe tomu na aberlogloglo bunu bereio ka m̃arabo nalo na tinietii m̃elea vite nalo. Ierinio, nalo na abe taara tai napano Atua kanano siniabu na jikili mia naio riakonlo vatitig n avo!

¹⁵ Ajuvan m̃arabo na memedu ruei aba ajum̃a ajakisor m̃arabo na tertelisu nalo na m̃a romijikia rover ka be m̃arabo nalo na toro nei Palam Peor kanano, napano Iliano Lu berii naio jibe toro tai nanua beamu

be naverialiano tai, mia
 ba tinien jii m̃lea ka sen
 m̃ariesi nalo na vovaiano.
¹⁶ Mia kolvare ga, naio miilo
 manenea ka napano Atua
 miila togki na telisu tai
 mil ban naio bior kanano
 vovaiano nalo. Togki nalo
 maka ajikia ail, mia ninei
 naio mil jel ea toro joono,
 buriri kija kiano bajago vovu
 nalo nei.

¹⁷ Tomu na bova nalo na
 m̃a nojo neberiilo na, ne-
 mijikia never bunu ka nalo
 ajibe ka bulumirano uei na-
 pano naio jabo ruei, napano
 toro na m̃a midoujer naio
 maka rijikia rileal uei eaio.
 Peli nalo ajibe ka mavo p̃eli
 vio melijokolo napano ro-
 jaaro kanio, reberiam̃a yuo
 rivovo, mia makanio, jegi
 miuvu bulagio bano. Mia
 tomu nalo na, kanalo vio
 na memedu tai napano be
 burumelijo laka jo kia na
 vo, nina ea vio na jogva-
 iano. ¹⁸ Mia monoka avar
 vironiano tibe na, bior ka
 napano niolo bujo ka sibiano
 nalo a ilivevaviniano nalo,
 napano jo buru m̃lea tomu
 dolu nalo kialo jidomiano.
 Tomu dolu nalo nei, aburo
 den yetemeriba vonga abin-
 imei jouro maka vesiou, mia
 vonganei tomu na bova nalo
 nei ajum̃a aber iliano nalo
 na vaganiano na tinieiano
 va na bajago na kariano
 napano joalo, mila binime
 burutomoruo lie vo, naruei
 ea m̃arabo na aju aburvuru
 bulaglo bereio.

¹⁹ Kanalo meuliano jo
 yetano ka moroano na toro

na toru nalaiano na kariano
 kanano ruei, ana jum̃abe
 ajum̃a amila sibilili tomu
 nalo ka aver atakisorlo,
 mia aleal meuliano na bo?
 Maka rijikia tibe na, bior
 napano moroano na jum̃abe
 naio jo be tubo ka kanamo
 meuliano, mia jau kobe
 kanano toro na im̃auano
 kiana, javukia nalo na,
 napano vonganei abinime
 ajibe ka tomu na im̃auano
 na moroano na kariano
 kanano ruei.

²⁰ Ver be riano ka amileal
 Tubo Yesu Kristo kiado
 Ioruriano ea kialo meuliano
 nalo, abitulubar ka napano
 bajago na yetemeriba nalo
 ajum̃a amila lelanlo, mila
 aburo den naio abinime,
 nina naio bo laka. Mia
 ver bogo telisu ga na
 naruei aban bereio ea kialo
 meuliano napano ajaluvo
 denio ga abinime, nina
 naruei bova lie laka. ²¹ Ver
 maka lele ajikia bajago na
 m̃arabo na memedu p̃eli bo
 kija ve telisu banlo, mia bogo
 napano amijikia batitigio
 bo ruei, amiel ea kija bogo
 bulati, kar na iorou kanio
 abar p̃iliglo aban bereio,
 naina bova laka. Atua
 kanano iliano lu nalo na
 m̃a ajan banlo, beamu
 ruei ajaaro ka adu ea kialo
 meuliano, mia vonganei aju
 abilig taakalo ka naio bereio.

²² Tomu nalo na jibe na,
 iliano juo naio jo beriilo na-
 pano tai, naio ber jibe nei,
 berinavo

*“Kuli ga naio mijikia ba
 jen bereio sano julu-
 oiano,” Ilimasou*

26:11

a juo nene naio ber jibe nei, berinavo

“Ver jau kesekon batig kanamo bue, mia naio monoka rijaka riva rijokolke ea bulukinia bereio.”

3

Tubo kiano bogo na toru ka naio rimei bereio

¹ Banalo, jibe ka napano kamiu kubitilubar ruei, nina naio be kanaku mēsi juo nene nei na biedu ban kamiu. Venia napano joa kanaku jidomiano ka nevivitaui buron mēsi juo nalo nei, nojidom neverial iliano novo tealo napano mia amijikia avavavin ea kenemiu jidomiano tulaka ka rijai kenemiu meuliano nalo. ² Nojidom never bo ka kamiu kuvitu tiniemiu maio damariga ka iliano nalo na naverialiano lu nalo re nua, bija bunu tuboiano vou napano kiado Tubo Naioruriano naio jian ban kumemi kenemiu atevi nalo, ka kumemi nuver lilian van kamiu.

³ Titai na be moti ka napano nojidom nover naio jibe nei, ber kamiu monoka kuvijikia ka ea bogo na maaro nalo, mia tomu na amiyotel ea Atua kiano imāuano amijikia amaluvo. Tomu nene kanalo bajago nalo, ajumā ajidom venia ga napano nalo tinielo jiio, miaaju amiakurano ea toro dolu kanano jidomiano. ⁴ Vite

tai napano mia amijikia atu avital ea kito rivor, naio be tivelinio na tubo kanano iliano napano naio berenio mia naio rimei bereio rivor kito. Mia atumā avivika aver “Ana liliuano bereio nei napano kenemiu toro na toru berkario ban kamiu, nibe? Jikar ea bogo na korobido nalo binimei, vite nonovio ea yetemeriba aju aba bavarare damariga. Kumemi maka numial vite tai leleio kija vo, pēli kamiu ga kumialio?”

⁵ Telikiti na mā aber iliano na, maka asidom tiniel rimaio ka napano Atua kiano verikariano nalo abe riano damariga, a kanano iliano be kiano burumāra moroano eaio. Javukia bogo na tiiano na yetemeriba, kanano iliano ga mila vio tiniabene jo, a mila yetemeriba bija borotano nene nalo a tei nene nalo. ⁶ Mia iorou ka nina, kanano iliano bereio naio mila burumāra ueimiya jovuko yetemeriba nei bereio, napano burukon vatitig vite nonovio napano ajuaio ka bogo na. ⁷ A kanano iliano nene naio jo mirāu vonganei kiana, naio jo bokar vatitig vio tiniabene a borotano na yetemeriba, ka atu rivan riva vokar bogo na sebi na toru ea legiano na tibureiano mia naio rimei ka sisen bulag meuliano na tomu nalo na mā maka asidom Atua ea kanalo meuliano. Nina naruei be moroano na Atua kanano iliano, mia tomu

nalo nei maka asidom ajikia.

⁸ Mo bilbilu nalo, ea tivelinio na verikariano na Tubo kiano bogo na rimei ea bereio, bo ka kito tiniedo ribobogia re ka Atua naio maka vuluku yuka nalo p̄eli legiano nalo tibe ka kito.

Ea Atua kanano vitiiano, yuka menu takurano bija legiano tai abe veverare ga.

⁹ Peli tomu tealo be tinielo ka aber Atua jo jii liliano laka ka rila venia na naio berkario, mia naio maka tibe na. Naio maka rivijuku kiki, mia jo mila kiano jidomiano ba tebievi laka, bior napano maka sidom toro tai rivakovio. Naio jidom rudu bogo rivan tomu nalo nonovio ka amijikia aviliglo.

¹⁰ Be riano, bogo tai mia burum̄ara legiano na Tubo kiano riyotuba ea yetemeriba. Mia rimei tavukia toro na bina, napano yetemeriba maka rijikia ka naio jo binimei, mia riilo ka ga napano binimei bokar vio ruei. Ea bogo na, ea vio yauo nalo na tiniabene asaraburuburu tavukia tubaalo, ana avakovio nonovio, a mia sebi sisen vite nonovio rivan riva vokar napano yetemeriba vija vite nonovio napano ajua naio, abisi.

¹¹ Naruei bior napano yetemeriba nei mia naio rimei kurano tibe na, kiniou nojidom nevika den kamiū, ka bogo napano kuvitu kea eaio, bo ka kuve tomu nalo na jum̄abe,

a bo ka kamiū kuve lu p̄eli kuvim̄au Atua kanano tum̄abe? ¹² Kamiū monoka kuvisaaro ka legiano na rimei, a ver kamiū kuvu, a kuvitu kuvim̄au sikili, mia kuvijikia kuvila riyotuba soṗeli.

Bogo napano naio rimei, mia sebi rivilvili ea vio mave, sisen kokoa nonovio, mia naio sisen vite nonovio na yetemeriba riioū bulagio.

¹³ Mia kito rotumolu rotu sikili ea kiano verikariano, napano naio berenio berinavo ve kiado vonuo vou tai, nina vio mave vou a yetemeriba vou, napano naio be burupati vio na bajago na memedu nonovio.

¹⁴ Bilbilu nalo, nina naruei roju rorea naio ka rimei rivuru kito ravan ea vio nene, mia bogo napano maka rovokar vo, monoka ralavon ka rove lu, rotu romeravo, a rotua tum̄aro.

¹⁵ Be riano ka Tubo naio maka rimei vo, mia kito ve tiniedo re ka naio bova, monoka rasaaro ka napano naio midu bogo ban kito ka rovilig kito, a jian buluvio ban bilbilu dolu nalo bunu ka amijikia avokar ioruriano. Jidomiano na, kuruado novo nei Pol naio bunu ber ka kamiū ea m̄esi tai beamu ruei, napano bivi-tauia bija masouano na bo nalo napano Atua jo jian banio. ¹⁶ Mia nina iliano nene kia ga napano naio jo jian ea kanano m̄esi dolu nalo, bogo napano ver naio

berii liliuano bereio na Tubo kanano.

Kiano m̃esi nene nalo kirinovo laka, mia bogo tai kiano verloglogiano nalo teremi kija, mila na iliano tealo napano naio bivitauiaio, tomu tai maka ajikia avuluku vatitigio. A bogo tai, tomu nalo napano maka ve parilo rivu, p̃eli napano maka ajikia vite nalo, abuluku abilivilig kiano verloglogiano ba be dolu bereio, javukia na m̃a aju amila ea iliano dolu nalo telabo ea Vivitauiano Lu nalo na. Mia bogo napano amila jibe na, mia ve re toro dolu napano mia naio rijog eaio, naio mila nalo ga aju aban ea m̃arabo na laluvuiano.

¹⁷ Kanaku bilbilu nalo, bior vite nalo na kiniau nojo tinieku maio ka kami ju-laka. Nemijikia ka kumijikia batitig vite nalo nei ruei, tenene na nojidom nesian iliano na jikili van kami bereio, ka monoka kuvitkar batitigio. Kuvijamo ka re jidomiano na sibiano na tomu nalo napano maka atakii Atua kanano tuboiano ka mia amei avuru bulag kami bereio. Maka rivu ka kuvijoru bereio den vio na bo napano kumitua jikili eaio ruei.

¹⁸ Kanaku iliano na maaro, ber kami kumiluo kumei kumeruo bo ea bajago na bo nalo na tinie-memiano a masouano na Tubo Yesu Kristo kanado Ioruriano kanano. Ana kito rejian meran mermerano van naio, vonganei,

a ea bogo nalo napano aju abinimei, rivan riva ribisi deio, Mm.

Kiniou, Pitere.

Mesi Moti Na JONE Naio Bivitauiaio Verialiano Moti

Tukunuano bulati na niosi nei

Jone kiano mēsi moti, naio be kiano buruñara jidomiano juo. Nana beamu, ka ridu bulag namoneano nalo kialo jidomiano napano abuluku mēsi nei, ka bogo nonovio atu aiasol lo vatitig ka kialo jidomiano ve takurano ga, a ka aiasol lo vatitig vija Atua, a kenerinio Yesu Kristo.

Mia juo nene ka ilikakarlo ka atakisor re naverloglogiano nalo napano kialo verloglogiano nalo maka rimemedu, bior napano naverloglogiano nalo nei amijikia ala bulag yimo lu ea kialo ilisibiano nalo, ana mia namoneano nalo maka bunu ajikia aiasol lo vatitig ea jidomiano ve takurano ga.

Naverloglogiano nalo na aju aberloglog tomu nalo, aber bajago va nalo amaluvo bior napano tomu nalo ajua yetemeriba, a aju amila vite nalo na yetemerba nei, a vite na berial ka Yesu, napano Atua kenerinio, naio maka ve toro kario tibe kito. Nalo aju aberinavo ver Atua rilarur toro, toro nene mia maka bunu rijikia tinienmaio ka meuliano na yetemenba nei bereio, a buru iakurano ver toro jibe na

rila kariano pēli rila re kariano, a buru iakurano ver naio tinienmīia toro dolu pēli maka tinien riiaio, mia vite nalo na barei ga. Jone bivitauia mēsi nei, berial meravo napano Yesu Kristo be toro kario jibe kito. Mia naio ber kirisikili ber tomu nalo napano amonea Yesu, a tinielo Atua, nalo monoka tinielo titiilo bunu.

Torogio nalo na niosi nei

Iliano moti 1:1-4

Miamoiano bija meljokouo 1:5—2:29

Atua kenerinio nalo bija Siñaro kenerinio nalo 3:1-24

Niununo na burupati ilirianiano bija niununo na burupati ilisibisibiano 4:1-6

Toro kiano bajago na tinien jii toro 4:7-21

Bajago na moneano na mijikia tuvulu tulaka 5:1-21

Toro na berial Atua kiano meuliano ban kito naio jo binimei ruei ea yetemeriba nei

¹ Vite tai, re nua ea bogo na tiiano, mia vonganei ga na kiniou nomijog, a nemial ka miraku, nobitii batitig bo banbano-o na nojokol ka juñaku, vite nene siano jibe nei berinavo Burupati Meuliano na Maka Rijikia ribisi bogo tai, mo tenene na kiniou nejidom novivitauiiao van kamiu. ² Tenei, na nanua kito maka rejikia naio, naio jo ga naljuo

Atua Teta o-o, mia von-ganei ana miyotuba medave ea mirado ea yetemeriba nei ruei, naruei kumemi miroano numialio, ana numitumã nuberialio ka tomu nalo. ³ Numijog memedu ka burutiliniememi, a numialio memedu ka mirememi, naruei numisidom nuverial ka kamiu ka mia kamiu bunu kuvijikia kumoneaio. Ver kamiu kumonea, mia kuvijikia kumei ve takurano rivija kumemi, tibe ka kumemi nube takurano bija Atua teta a bija kenerinio Yesu Kristo ruei. ⁴ Tena mila burumãara saariano joa kumemi damãariga nei, a ver kamiu kuvidukar batitig iliano nei na mĩa nojidom nover ka kamiu ea mĩesi nei, mia burumãara saariano nei toa kamiu bunu, ana mia rila kito rovinu rojog rivu ve toru laku.

Atua naio be burubati na miamoiano

⁵ Iliano na Atua kenerinio midu ban kumemi, ber monoka kumemi nuverial ka tomu dolu nalo, naio jibe nei berinavo. Atua naio be burupati na miamoiano, maka lele kiri melijokouo tai ritoaio. ⁶ Tibe na, ana ver kito rotumã roverial ka kito robe takurano bija Atua, mia rojumã romila bajago na melijokouo keano vo, nina rojumã romila sibi ga na, kito maka rotumã rala tena be riano. ⁷ Mia ver rotumã reiel damãariga ea miamoiano na mĩa Atua naio joaio, mia naio rila ka rotua natinie takuraniano na bo tulaka vija kito, ana

mia reial ka kenerinio Yesu, kiano burukija naio mijikia to sekon kito romeravo ka kiado kariano nalo.

Ieliano ea miamoiano na Atua kiano: Monoka rotuvan nonovio bajago na kariano

⁸ Toro na mĩa jo mila bonua, ka ber maka ve na bova tai toa kiano meuliano, kiano iliano nei naio maka rive riano leleio, naio jomã mila sibilili naio bereio. ⁹ Mia ver kito roverial ga kiado kariano nalo, mia Atua naio riviekokoa kito, mia naio rivar bulag kiado vovaiano nalo den kito, rila kito romeravo. Naio ga mila batitig mĩarabo ka mia naio rila tibe na ruei, a romijikia ravarkar tiniedo ea naio ka mia naio rila van kito rivare ga napano naio berkario. ¹⁰ Mia ver kito rotumã rala bonua, roverinavo kito maka mĩa rala kariano tai, nina jibe ka rober Atua naio be sibiano ga, a romila jibe ka napano kanano ilirianiano novo, maka bunu rodu to vatitig ea kiado meuliano leleio.

2

¹ Keneriku nalo, nojidom novivitauiã iliano nalo nei van kamiu ka riija kamiu ka kuvitilubar ka bo ka mia kamiu monoka kuvila re bunu kariano bereio. Mia ver bogo tai, toro tai rila tena bova tai, kito monoka tiniedo rimaio ka Yesu Kristo naio ju rorea ju, jibe ka toro lu tai ka rivar kiado iliano. Naio kiri memedu, a naio meravo, ka mia naio mijikia

riva sikili tua Atua Teta mirano rimemedu, ka mijikia rivika denio ka naio tinien riia kito, a riviekokoa kito. ² A m̃arabo na ka mia Atua riviekokoa kito naio jibe nei, nina be Yesu ga na, bior naina be jokoluolu ka mia rivar bulag kiado kariano nalo, kito tomu nalo nonovio na yetemeriba nei.

Ka reiel ea Atua kiano miamoiano: monoka romonmonea kanano tuboiano nalo

³ A ver toro tai rivika tibe nei, riverinavo: ? Kiniou maka najikia, kiniou nojo nomijikia batitig Atua, p̃eli na maka noto nojikia batitig naio rivu? ? Kiniou nobe kanano, p̃eli na maka nove kanano? Ver tibe na, bo ka rovika den naio bereio, roverinavo: ? Jurnabe, jau kjojña komonmonea kanano iliano nalo, p̃eli na maka kotom̃a komonmoneaio? ⁴ Nina bior ver toro tai naio riverenio river naio mijikia batitig Atua, a naio be kanano, mia naio maka tom̃a rila vite nalo na m̃a Atua kanano tuboiano nalo aberenio, toro na naio maka to river riano na, naio mila sibi ga na. ⁵ Mia toro na m̃a jo monmonea batitig Atua kanano iliano nalo bo, naio jo berial ka naio jom̃a tinien jii naio riano, tinien jii naio jo binimeilie vo bogo nonovio. Naruei ea m̃arabo nalo na jibe na naruei, kito romijikia rejikia batitig ka kito robe Atua kanano riano. ⁶ Toro na ber naio be Yesu kanano, mia kito monoka

rejikia reial ka naio miaia Yesu ea kiano meuliano.

⁷ Banalo, ea tivelinio tai, tuboiano na m̃a nojo nobivitaui ban kami naio maka ve iliano na terivou na vonganei ga na, mia naio be iliano tai na beamu mugaruei, naio be Atua kanano iliano na m̃a kumijogio mugaruei. ⁸ Mia ea tivelinio dolu nene, be riano bunu, ka tuboiano nei, naio jibe ka naio be terivou laka ban kito, bior rojña romial kanano miamoiano naio jo mila melijokouo naio jom̃a buru didig naio bano, ana naio jo buru yulu riano binimeil ruei. Naio jibe ka ga ea Yesu kiano meuliano ruei, a vonganei naio jo binimeil jibe na bunu ea kiado meuliano nalo, ana naio jo mila kito robitilubar ka iliano vou nei naio riano mugaruei.

⁹ A verver toro tai naio tom̃a river naio jom̃a miel ea miamoiano ruei, mia romial ka naio jom̃a jerñi ka kuruano, jom̃a mila bova kanio, toro na naio jo keano vo ea melijokouo. ¹⁰ Mia toro na tinien jii kuruano, mila bo kanio julaka, toro na naio jo miel ea miamoiano ruei, naio maka bunu riel vovu ea melijokouo mia naio to rijoru re bereio bogo tai. ¹¹ Mia naio na m̃a jo jerñi ka kuruano, naio maka tibe na. Naio jo keano vo ea melijokouo, melijokouo mila jibe ka mirano miunu, naruei naio jom̃a miel vovu ea vio bobogio dam̃ariga, naio maka ri-

jikia rivitilubar batitig kiano m̃arabo, naio maka rijikia vio na mia riagago sel eaio.

Ka reiel ea Atua kiano m̃iamoiano: maka rejikia tiniedo tii yetemeriba nei

¹² Kamiu keneriku nalo, kamiu kanaku solbouo nalo ea kiado moneano, kiniou nojom̃a nobivitauia iliano nalo nei biedu ban kamiu bior kamiu naruei napano Atua karam̃ado naio biekokoa kenemiu kariano nalo kar Yesu Kristo siano, mila kumijikia naio.

¹³ Kenemiu kulovu nalo, kiniou nojo nobivitauia iliano nei ban kamiu bior kamiu naruei kumijikia batitig naio lie ruei, napano naio meul jo beamu mugaruei, beamu ka tiiano na yetemeriba nei.

¹⁴ Kenemiu m̃eaku nalo, kiniou nojom̃a nobivitauia iliano nalo nei ban kamiu bior kamiu naruei na m̃a kumisikili bo, kamiu kumidu batitig Atua kanano iliano joa kenemiu meuliano ruei, a kumitovulu toro na kirivova na ruei.

¹⁵ Kiniou nojidom never tibe nei ka kamiu nonovio, ka mia tiniemiu tii m̃ealea re yetemeriba nei, bija kanano saba nalo. Toro na m̃a tibena, naio maka rijikia tinientii vatitig karam̃ado.

¹⁶ Naina bior saba nalo na yetemeriba nei, p̃eli na kiano bajago nene nalo, abe kiri dolu, maka atibe ka saba nalo na karam̃ado Atua kanano vija kiano bajago nene nalo. Vite nalo na yetemeriba nei nalo ajibe nei,

abe burupati na nasidom m̃ealea vite nalo, abe burupati na m̃a abur mirado, a abe burupati na varvariano na kiado meuliano nalo.

¹⁷ Yetemeriba nei, vija kanano saba nene nalo na m̃a tomu nalo ajum̃a ajidom m̃ealea julaka, naio jo barlaka ban ka mia rivakovio ga mia toro na m̃a jo mila memedu ka Atua kanano sidomiano, naio to tobo to.

Ka reiel ea Atua kiano m̃iamoiano: monoka rovitikar rivu uolu nalo

¹⁸ Keneriku nalo, vonganei kito rojua bogo maariano nei ruei, mia jibe ka na m̃a kumijog ruei, toro napano siano Jerñiii ka Kristo, naio mijikia riyotuba ea bogo nene. Maka reial naio vo, ana kito rojkar ka romial serm̃iano s̃esa ea Yesu nalo telabo ruei, naruei mila na robitilubar̃io ka mia vesiou re, mia legiano na maaro rime. ¹⁹ Uolu nalo na m̃a nojom̃a noberiilo na, kamiu kumijikia kiana. Beamu, nalo aju bija kito iviso ka kito, mia iorou ana ajumolu, ajuvan kito aburo den kito bereio. Vonganei, robitilubar batitiglo, ka nalo maka amei ve takurano rivu vija kito, bior ver maka, mia atu rivu vija kito kia navo. ²⁰ Mia kamiu na m̃a kumitu bo kia navo, Toro Lu Kristo naio mioako kamiu ruei, naruei kamiu kubitilubar kanano iliriani-ano, mia maka kuvijikia kuvitaluvo den naio bereio. ²¹ Kamiu kuver re ka kiniou nojidom neil van kamiu

rivor jidomiano tai na berinavo kamiū maka kuvijikia vite, bior naio maka tibe na. Kiniou nomial ka kamiū kumijikia kuvitii veve masosoua ilirianiano a iliano na be sibiano mugaruei, kumijikia batitig ruei ka ilisibiano maka rijikia riyotuba ea ilirianiano, naruei kiniou nojidom neil van kamiū ka notunukakar kamiū ga.

22 ? Ana venia naruei be ilisibiano na māa dolu nalo na māa ajumā aberialio? Naina be iliano namāa berenio jibe nei, ber Yesu naio maka ve Naverikariano na Atua mila naio binimei ka rilarrur yetemeriba nei. Iliano nei naio be iliano na toro na siano Jermii ka Kristo ga, a toro na māa ber iliano nei jibe na, naio jomā miitava ea Atua Teta, a jomā miitava ea kenerinio. 23 Toro na māa bilig taakano ka Atua kenerinio, Atua maka rijikia toa naio, mia toro na māa berial batitig bo ka ber naio midu Atua kenerinio ea kiano meuliano, mia Atua bunu rimonmon ga to vija naio damāariga.

24 Ioluanu Vou na bo nanua kamiū kumijog be moti ruei beamu, naina naruei be iliano na bo a be riano, naruei bo ka kuvidu batitigio to rivu ea kenemiu meuliano. A ver tibe na, mia kenemiu meuliano mijikia to rivu vija Atua a kenerinio bogo nonovio, 25 naina naruei kumijikia kuvokar meuliano na māa naio berkario ka mia

sian van kito, na mia maka rijikia ribisi bogo tai.

26 Naina ga nojidom nover ka kamiū ea tivelinio ka nalo na māa aju amila sibilili kamiū, napano ajidom avuru kamiū kuan ve dolu bereio. 27 Kristo naio mioako kamiū ruei, a Niununo Lu na kumijevio ruei ka bogo na naio jo kia ga kamliko vo. Naio mijikia riverloglog kamiū ka saba nonovio na be riano a memedu, mo kamiū kuvilavon re ka kuvisirago toro dolu ka riverloglog kamiū ka saba tai bereio. Mia kamiū kuvilavon ga tibe ka na Niununo Lu naio berloglog ka kamiū ruei, na māa naio ber bo ka na kamiū kuvidu batitig kenemiu meuliano to rivu ea Kristo tulaka.

28 Naina naruei, keneriku nalo. Verenio kiado meuliano naio to rivu ea Kristo namāariga, mia maka rejikia rojog rivova ka bogo na ver mia naio riyotuba ka kito bereio. Mia ver maka, mia ve burumāara kenieno imouiano, mia rosidom rodu van mirado ka bogo na ralia naio to rimei. 29 Kito romijikia ka Kristo, kiano bajago nonovio naio bo a kirimemedu tanea, naruei toro na naio bunu jibe na, romijikia rover ka kema na bunu naio be Atua kenerinio javukia Kristo.

3

Kito robe Atua kenerinio

1 Kamiū kuvisidomii von tinietiano na Atua Teta kanano na ban kito tomu

na bova. Naio tinien jii kito toru laka-o mia, banbano-o na mila ban kito jibe ka na kito romial kito robe kenerinio nalo ga. Mia maka ve kito ga na ramial kito jibe na, bior naio bunu, naio buru kito robinimei jouro ea kiano m̄aratavo ruei, jibe ka kenerinio nalo memedu ga. Nalo dolu nalo na yetemeriba nei nalo maka ajikia batitig karam̄ado vo, jibe ka na m̄a kito romijikia naio, naruei vite na mila na nalo maka ajikia kito bunu, ka kito robe kenerinio nalo. ² Kanaku bilbilu nalo, romijikia rover vonganei kito robe Atua kenerinio nalo, mia maka rejikia vo, ka iorou kanio, mia naio rila kito romei rove vaio ga bereio. Mia be titai ga romjikia batitigio. Bogo na Tubo Yesu Kristo rimei bereio, mia rovitikar naio ka mirado rimemedu, mia rovitilubar naio garui memedu, mo bogo na reial naio tibena, mia romei rotibe ka naio ga. ³ Naruei toro na sidom ka mia naio tai na mia rimei tibe ka Tubo Yesu tibe na, naio monoka to rivokar vatitig rivu kiano meuliano rimeravo a rive lu, tavukia Yesu ga.

Kito Atua kenerinio nalo: monoka rotuvan bajago na kirivova

⁴ Toro na m̄a mila kariano, naio jom̄a mila korov Atua kanano tuboiano, bior burupati na bajago va, naio be bajago na

maka sidom rimonmonea tuboiano. ⁵ Mia bogo na Yesu naio binimei ea yetemeriba nei, naio binimei napano maka kariano toa naio leleio, naruei naio binimei ka rivar bulag kiado kariano nalo.

⁶ Tibe na, toro na m̄a kiano meuliano jo bo ea Yesu, mia ve re bunu kariano tai toaio, mia naio rivijuku rivova re bunu. Mia toro na m̄a kariano joa naio julaka, naio maka rivitii Yesu vo, naio maka rijikiaio vo. ⁷ Kanaku kiritete sesa nalo, maka rivu ka mia nalo ala sibilili kamiu. Toro na ver kiano meuliano bo, naio be tor memedu javukia Kristo.

⁸ Toro na kanano meuliano bova, naio be Sim̄aro kiano toro, na naio be burupati na kariano ea yetemeriba nei jikar ea kiano tiiano binimei bokar vonganei. Bajago

va na Sim̄aro nei kiano naio mila na Atua kenerinio miyotuba ea yetemeriba nei, ka ruekon bulag kanano im̄auano na bova nalo a ka rila kanano burum̄ara moroano naio ribisi. ⁹ Toro na jo jouro ea Atua kanano m̄aratavo, mia naio rila re bunu kariano, bior Atua kiano meuliano joaio ruei. Naio be Atua kenerinio, naruei monoka naio rivar karam̄ano kiano bajago na bo nei, ana naio maka bunu rijikia rila na bova.

¹⁰ Ea m̄arabo nei naruei kito romijikia ka rovitilubar batitig ga kei na be Atua kenerinio, a kei naio be Sim̄aro kenerinio. Toro na maka rila rimemedu p̄eli na

toro na maka tinien tii kiano m̃aratavo, toro na jibe na naio maka ve Atua kenerinio leleio.

Kito Atua kenerinio nalo: Monoka romonmonea tuboiano na tinietii toro dolu

¹¹ Ioluano navm̃a kamiu kumitum̃a kumijog mugaruei jikar ea burupati binimei, naio jibe nei, na m̃a naio berenio ber kito monoka tiniedo titii kito rivu bogo nonovio ga. ¹² Kuvisidomii Sim̃aro kanano toro na nanua beamu na, Ken, na naio maka tinien tii batitig kuruano kar garuei Epel, naio muebinio m̃aro. Maka rivu ka kito rala tibe na, mia bo ka rosidomii ka venia na naio mila jibe na? Nina bior kanano im̃auano nalo, Atua mialio abova ga, mia kuruano kanano, nalo amemedu bo, mia Atua naio jaaro kanio, tenene na mila na Ken mijoku m̃ele ka kuruano nei Epel, naio tinien jerio, ana naio muebinio m̃aro.

¹³ Kiaku bilbilu nalo, bajago bova na jibe na, tomu nalo ajum̃a amilala mugaruei binimei bokar banei, naruei maka rejikia reiilo ver reial ka nalo amijoku ka kito bunu, a ajerm̃i ka kito bior Atua kiano im̃auano novo nalo na ver romim̃aukanio. ¹⁴ Mia kito na m̃a kito maka m̃a reserm̃i ka toro, mia tiniedo tii kiado m̃aratavo nalo rivu, nina be m̃arabo na mila meravo ka rojuvan m̃ariano, robinimei ea meuliano ruei.

Mia toro na tinietiiiano maka toa naio, naio jo keano ea m̃ariano vo. ¹⁵ Toro na m̃a jerm̃i ka kiano m̃aratavo tai, naio jibe ka toro na muebin toro m̃aro ruei, a jibe ka na romijikia ruei, ka toro na m̃a muemue toro, meuliano na maka ve jukuti nene naio maka toa naio leleio.

¹⁶ Peli kito tai naio jom̃a bika ber, ana tena m̃a ajum̃a aber, tinietiiiano, na naio be tena jum̃abe? Mo kito romijikia tinietiiiano na be riano jibe na: Yesu Kristo mijamo ka momou kiano meuliano bior kito, a ver tinietiiiano na toa kito, mia kito bunu rajamo ka kiado meuliano rivior kuruado nalo. ¹⁷ Toro tai, naio jum̃ano bujo ka saba novnovo nalo, mia kuruano tai naio maka ve kiano saba tai, naio jum̃ano bulati liki. Mia naio bitilubar kia ka kuruano nei jibe na, mia naio mila kiano iviso jikili lie vo kanio, naio maka sidom riijaio, Toro na jibe na, Atua kanano tinietiiiano maka toa naio leleio.

¹⁸ Kanaku tete nalo, kiado tinie-tiiiano naio monoka ve re iliano ga. Tinietiiiano na be riano, naio maka ve tena ververenio ga, mia be tena roim̃aukanio a ve tena ralaiio. ¹⁹ Ana ver kiado tinietiiiano rivokar batitig jeleigio nene tibe na, naio mila m̃arabo na rejikia ka Atua kanano iliano naio bar m̃arati ea kiado meuliano. Ana tibe na, romijikia rojog rivu ga ka rava vaataro ka Atua, romerou ka naio re bunu. ²⁰ Mia

bogo tai ana mia romerou ka naio, bior kiado jidomiano ga tibure kito bereio, rila na rotumã rosidomial bere kanado vovaiano, mia Atua naio mijikia nonovlo biniu ruei, a kiano viekokoano naio buru tomoruo laka, naio bar bulaglo den kito ruei.

²¹ Banalo, a ver tiniedo nalo ameravo rivu, mia nalo maka ajikia atibure kito bereio, rila na maka lele romerou ka romei rotumolu rotua Atua ka rovika vite den naio. ²² Ver romonmonea naio, a rotumã rala tena naio ga jidomio, mia romijikia rovokar vite venia na mã robika denio.

²³ Atua kanano tuboiano ea kito naio jibe nei, ka ber: kito monoka romonea kenerinio Yesu Kristo siano, amonoka tiniedo titii kito bogo nonovio, tibe ka na naio, ber ka kito. ²⁴ Toro na mã naio monmonea Atua kiano tuboiano, naio joa Atua, mia Atua naio joa kanano iviso. ?Mia romijikia rejikia ka naio joa kiado iviso jumãbe? Tena, Niununo na naio jian ban kito, naio mila romijoglubar ka vite nei be riano laka.

4

Kito Atua kenerinio nalo: monoka ravitkar uolu nalo na Kristo kanano a bajago nalo na yetemeriba

¹ Banalo, ver toro tai ver Niununo Lu joa naio, mila na naio jomã berial kanano iliano, bo ka kamiu kuvitii veve vatitig niununo

neibano joaio, be riano ka be Atua kanano, ðeli na maka ve Atua kanano. Kito monoka rovitii vatitig rivu, bior be naverialiano sibisibi miroano aju aban janea yetemeriba nei ruei. ² ?Ana mia kito romijikia rovitii niununo na tumãbe? Romijikia rovitilubar Atua Niununo bior naio jomã berial ber Yesu Kristo naio binimeĩ be toro, naio binimeĩ miyotuba ea yetemeriba nei.

³ Mia ver niununo tai tonã river re tibe na, niununo na naio maka ve Atua kanano. Niununo na jibe na naio miyotuba ea uolu na Kristo kanano, na mã kamiu kumijog mugaruei ka naio jo binimeĩ, ðeli naio joa yetemeriba vonganei ruei. ⁴ Mia keneriku nalo, mia kamiu kumerou ka re naverialiano sibisibi nalo na, bior kumitu tivelinio ka Atua, kumijikia kuvituvul ga. Be riano ka mugaruei, naina joa kamiu naio jikili lie loa ka na naio jo yetemeriba nei. ⁵ Tomu na sibiano na, nalo abe tomu na yetemeriba nei, a iliano nalo namã aju aberenio amolmoluo ea jidomiano na yetemeriba nei, a kulo dolu nalo na yetemeriba nalo ajomã amiagago kalo. ⁶ Mia kito namoneano nalo, kito maka rove tomu na yetemeriba nei, robe Atua kanano. Toro na naio mijikia batitig Atua, naio jaaro ka riagago ka kito, ana na nana naio maka ve Atua kanano, naio maka sidom riagago ka kito. Ea

m̃arabo nalo na naruei romijikia rovitii lubar ka niununo na iliano na be riano, a niununo na ilisibiano.

Bajago na tinietiiiano

⁷ Banalo, bo ka kito tiniedo riia ea kito tulaka ga, bior ka tinietiiiano naio be Atua kanano bajago. Toro na tinien jii toro, naio be Atua kenerinio, naio bar bajago na Atua kanano memedu, a naio mijikia batitig Atua bo ea kiano meuliano. ⁸ Toro na m̃a maka tinien tii toro, naio maka rijikia Atua vo, bior ka Atua naio be burupati na tinietiiiano. ⁹ ?Ana kito romial Atua kanano burum̃ara tinietiiiano nene ea bogo na vabe? Kito romial kiano tinietiiiano nene ka bogo na naio m̃ila kenerinio takurano m̃anono garuei naio binimeia ea yetemeriba nei, ka mia rila ka mia kito romeul. ¹⁰ Naina naruei be tinietiiiano na naio be riano laka. Naio maka na m̃a kito tiniedo jii Atua, mia nina na naio tinien jii kito, banbanoo na mijamo ka kenerinio binimeia mila sida ka rila merevuiano ka kanado kariano nalo.

¹¹ Banalo, jibe ka nam̃a Atua naio tinien jii kito, naio bijuku bo ka kito julaka, bo ka kito bunu monoka tiniedo titii kito tulaka, roviuku rivu ka kito. ¹² Toro maka lele rial Atua, mia ver rotum̃a tiniedo titii m̃ilea kito, mia reial ka na Atua naio joa kiado iviso, a bajago na kanano tinietiiiano mia naio to rimeia ve toru

lie vo tulaka ea kanado iviso momou nalo.

¹³ Kito romijikia ka Atua naio joa kiado iviso, a kito roju bo ea kanano iviso, bior naio jian Niununo memedu ban kito, ka rila ka rojoglubar ka teneia be riano. ¹⁴ Ana robitilubar bunu ka be riano ga ka Atua Teta naio m̃ila kenerinio nene naio binimeia ka rive ioruriano na yetemeriba nei, jibe ka na romial ruei ka mirado a bunu ka na m̃a rojum̃a roberial janea vio nonovio. ¹⁵ Toro na m̃a jo berial ber Yesu naio be Atua kenerinio memedu, Atua joa kanano iviso, a naio joa Atua kanano iviso bunu. ¹⁶ Kito ramijikia rejikia vatitig ka Atua naio tinien jii kito, bior ka romijikia rojog batitig ea kiado meuliano nalo, mia kito romijikia romonea kanano iliano na m̃a naio berial ban kito.

Atua naio be burupati na tinietiiiano, mia toro na bajago na tinietiiiano binimeia mison batitig kiano iviso, naio joa Atua kanano iviso, ana Atua bunu joa kiano iviso. ¹⁷ Atua naio jidom rila bajago na tinietiiiano to rimeia ve toru lie tulaka ea kanado meuliano, ka rila ka kiado bajago na yetemeriba nei na tavukia Kristo kanano na nanua na. Naruei ver kanado bajago naio rimeia rivu tibe na, mia naio rivu laka rivan kito, bior ka mia kito romerou re a roimou re ka legiano na tibureiano na naio jo binimeia. ¹⁸ A ver

toro tai rimerou, naina bior naio mial kanano vironiano tai jo binime, mia naio maka rijoglubar ka na mña Atua kiano tiniitiano naio mila batitig kanano meu- liano ruei. Mia bajago na tiniitiano na bo naio mijikia rijil deven merouano na bu- rutomoruo nei, rivanvano-o ribisi.

¹⁹ Verenio kito rotumña tiniedo tii toro dolu, naina bior Atua naio tinien jii kito beamu ruei. ²⁰ Toro na mña jo ber naio tinien jii Atua, mia naio jo kia ga mña jermñi ka kanano mñaratavo tai, naio jomña milasibi ga. A ver naio maka tomña tinien tii kiano mñaratavo neibano naio mial ka legiano nonovio ga, naio maka rijikia tinien tii Atua na naio maka lele rial kija naio. ²¹ Kristo kiano tuboiano napano ban kito naio jibe nei, ber toro na mña jidom ka naio be toro na mña tinien tii Atua, naio monoka tinien tii vatitig bunu kanano mñaratavo.

5

¹ Mia toro napano naio monea ka Yesu naio be Naverikariano, toro na naio be Atua kenerinio riano. Ana verenio Atua kenerinio nei naio riverenio riverinavo naio tinien jii Atua kiano Teta, ana na naio monoka tinien tii Atua kenerinio dolu nalo bunu. ² ?Mia naio rijikia ka naio tinien jii batitig nalo tumñabe? Verenio naio tinien tii Atua, a naio rimonmonea kanano tuboiano nalo, mia

naio rial ka na mña naio jomña tinien jii Atua kenerinio nalo memedu ga. ³ Bajago na tiniedo tii Atua naio jibe nei: kito robokar batig kiano iliano. Kanano tuboiano nalo maka ave temi laka van kito ka ralaio, ⁴ bior kito rabe kiritete nalo namña romiy- otuba ea Atua, mia ver kito rotumolu rotu sikili ea kiado viekouoiano, kito robe tomu na ratovulu yetemeriba nei ruei. ⁵ Kiniou nebika den kamiu bereio: ? Toro na mia tovulu yetemeriba nei, naio be kei? ? Naina ga napano naio jumolu jo jikili ber ka Yesu naina be Atua kenerinio memedu.

⁶⁻⁸ ? Mia jumñabe ka kito romijikia ka Yesu naio be Atua kenerinio? Tomu tolu aberial iliano nei ban kito: tai naio be Niununo Lu, tai naio be uei, a tai naio be burukija, a nalo tolu nene, aberial jibe ka iliano taku- rano ga. Uei naio berenio bajago na Yesu Kristo kiano, ka napano naio miyotuba yetemeriba nei jibe ka ve- nia, a naio bokar varueiano jumñabe, mia romijikia rovi- tilubario ka naio be Atua kenerinio. Mia maka naina ga, mia burukija bunu naio ber bajago na Yesu kanano bereio, napano naio mñaro jumñabe, mia romijikia rovi- tilubario ka naio be ri- ano. Ana mave ka naio bereio, Niununo Lu, na- pano kanano iliano naio be riano julaka, naio beri- alio kiri meravio ban tomu nalo re nua ea miralo bunu ruei. ⁹ Mia iliano nalo namña

Niununo Lu berialio nalo temi laka, tibe na monoka romoneaio, bior naina naio maka ve kulorinio kanano iliano, mia naio be Atua kiano ilivervisivisiano, ka naio mial kenerinio jibe venia. ¹⁰ Toro na m̃a monea Atua kenerinio riano, mia iliano nalo nei aju jikili bo-o ea kiano jidomiano napano naio maka sidom dedeio ka bereio, mia toro na maka rimonea Atua kenerinio, naio maka rimonea vite napano Atua ber bisivisii ban kenerinio, naio jibe ka napano naio mial Atua, ber naio mila sibi ga. ¹¹ Ana iliano napano mia kito monoka rotumolu rotu sikili ea bogo nonovio, naio jibe nei, ber: Atua naio jian meuliano napano maka ve jukuti nene ban kito, ana burupati na meuliano nene miyotuba ea kenerinio ga. ¹² Toro na m̃a Atua kenerinio joa kanano meuliano, naio bokar meuliano ruei, mia naina Atua kenerinio maka toa kanano meuliano, naio maka rivokar meuliano nene vo.

Iliano na maaro: Meuliano na maka ve jukuti nene

¹³ Kiniou nojo nebitauiā m̃esi nei biedu ban kamiū na na m̃a kamiū kumonea Atua kenerinio siano ruei, ka rijai kamiū ka kenemiū jidomiano veve juo re, mia ka kuvijikia rivu ka kubokar meuliano napano maka ve jukuti nene. ¹⁴ Bogo na maka tiniedo veve juo, romijikia rotumolu rotu sikili ea naio, naruei vite venia na rovika

den naio rimemedu ka kiano sidomiano, mia naio rijog kito. ¹⁵ Naruei ver kito romijikia batitig ka naio mijog kito ruei, romijikia rejikia vatitig bunu ka vite napano kito robika denio, robokar ruei.

¹⁶ Ver kito reial kuruado tai napano naio jom̃a mila kariano, napano kariano nene maka ve toru laka, maka ka toro rim̃aro riviorio, p̃eli ka rivuru bulag tomu den Kristo bereio, romijikia robolkouo van naio, ana mia Atua mijikia jaamo ka naio to joomo ea meuliano ga. Mia maka kiniou never bo ka kiō robolkouo ka toro na m̃a mila burum̃ara kariano bova, bior ka napano kariano tealo abe tena m̃ariano ga, ana ver toro tai rila, mia maka rejikia rever titai bereio. ¹⁷ Vite nonovio na amila bova naio be kariano, mia kariano tealo ga abe tena m̃ariano, mia tealo maka ave tena m̃ariano.

¹⁸ Mia kito romijikia ruei ka toro napano naio binimei be Atua kenerinio ruei, p̃eli kariano na maka ve tena m̃ariano p̃eli be tena m̃ariano, maka ka mia naio rila bereio. Mia toro na jibe na monoka naio rivitika batitig naio, naio rivel ea vatitig kiano meuliano, naruei Toro na Bova nei naio maka rijikia rila bulag naio bereio. ¹⁹ Yetemeriba momou nei naio jotano ka moroano na Toro na Bova nei kanano, mia kito namoneano nalo, romijikia ka

robe Atua kanano ga. ²⁰ Kito romijikia ka Atua kenerinio naio binime, naio jian vitilubariano ban kito ka mia rejikia Atua napano naio be riano, ana kito rojua ga naio naruei, vija kenerinio nene nei, Yesu Kristo. Kanado Atua nei naio be riano, mia meuliano na naio jian ban kito naio maka ve jukuti nene.

²¹ Keneriku nalo: Kamiu kuvitika vatitig kamiu rivu, mia kuvilotu ka Atua nei naio takurano ga tulaka, kuvijamo ka re tavoru dolu nalo amei ka adu jeleig naio ea kenemiu jidomiano nalo.

Kiniou, Jone.

Mesi Juo Na JONE Naio Bivitauiaio Verialiano Moti

Tukunuano bulati na niosi nei

Jone kiano mesi juo nene, naio bio bere naio ber naio be “Navagadeano,” ana naio bivitauia ba ban “tira tai na Atua bijauialar naio” a bija “kenerinio nalo”, mia romijikia ka naio berenio ga “yimo lu bija kiano namoneano nalo.” Mesi nei ber kalo ka nalo tinielo titiilo, a berkakar banlo ka monoka avitakar vatitigio, ka naverloglogiano nalo na kialo verloglogiano maka rimemedu amei re ala bulaglo ka kialo verloglogiano sibisibi nalo.

*Torogio nalo na niosi nei
Iliano moti 1-3*

Namoneano nalo monoka
tinielo tii tomu nalo 4-6
Iliano na ilikakariano ban
namoneano nalo 7-11
Iliano maariano 12-13

Iliano na be moti

¹ Kiniou tormoruo nava-gadeano, nebivitauia mesi nei biedu banso, javukia tira tai napano Atua bitirilarso, a ea kenerimo lu nalo. Kiniou najaaro toru laka ka neviviuo kamii ea mesi nei, bior ka kiniou tinieku jii kamii toru laka, mia maka kiniou ga ve takurano, mia namoneano dolu nalo bunu nalo aju tinielo maio ka kamii damariga. ² Kito roju

tiniedo titii kito jibe na bior Atua kiano ilirianiano naio joa kanado meuliano ruei, a mia naio toa kito rivano-o na maka rijikia ribisi bogo tai.

³ Kiniou nobolkouo ka kamii, ka tiniememiano, tinieiano, a tumaroano binime den Atua karamado, vija Yesu Kristo na naio kenerinio, a joa kito, mila na bajago na ilirianiano a tinietiano naio jo binime burutomoruo lie ban kito damariga.

Takii bajago na tinietiano damariga

⁴ Kiniou nejidom neverial vansom, ka namial kenerimo tealoo ea vio nei ruei, mia najaaro toru laka ka nemial ka nalo aju amiel ea bajago na ilirianiano bo laka, javukia na Teta naio ber ka kito. ⁵ Nena, kiniou nemial tenei, naruei nojidom notunukakar kamii bereio, ka kumonmonea kanano tuboiano nei napano robokario nua ea burupati nene ruei. Tibe na, maka never vite vou tai van kamii, neberial iliano tealoo ga, ka kito monoka tiniedo titii kito damariga. ⁶ Ver kito rosidom rala tibe na, marabo nene naio jibe nei: monoka romonmonea Atua kanano iliano. Ana kanano burumara tuboiano napano naio jo beamu ruei binime bokar vonganei, romijog naio ber jibe nei ber: kito monoka reiel damariga ea bajago na tinietiano.

⁷ Tomu na juboluboiano miroano, aju aban ea vio yetemeriba nei ruei ka avilig tomu nalo kanalo jidomiano. Nalo ajumã aberinavo Yesu naio be toro tai ga jibe ka kito, maka ajidom ka tomu nalo amonmonea ka Yesu naio be Naverikariano na naio binimei ea Atua ka rilarur kito. Tomu nalo na jibe na, abe tomu na mã amilavon tomu, a nalo abe tomu nalo na Kristo kiano uolu kanano. ⁸ Tibe na, ana mia kamiu monoka kuvitakar vatitig kamiu rivu ka iliano kinkin nalo na jibe na, ka mia kuvilaluvu re bereio meuliano na bo napano numila vio jikili ka ban kamiu. Monoka kuvitumolu kuvitu sikili damãariga, ka na mia kumijikia kuvokar momou ijaiano novo nonovio na kenemiũ iorou. ⁹ Toro na tumolu, riviako loa rivatavio den burusio, rimonea re bunu verloglogiano nalo na Kristo, naio maka bunu ve Atua kanano. Mia toro na jo bo damãariga jouro ea ilirianiano na kiado, Atua Teta bija kenerinio ajoa naio.

¹⁰ A vere kamiu kuvial ka nalo tai rimei riyotuba kean kamiu, mia naio maka toũa riverenio iliano nalo na memedu takii kanado, kamiu kuviilalar naio rivan bereio. Kamiu kuvuru re naio riva joomo ea kunuemiũ, a kuviluku re naio to vija kamiu, ¹¹ ver þeli, na kuvitu kuvijakar naio ka rila kanano imãauano na bova nei rivavin na.

¹² Iliano miroano na jo ka neverenio, mia maka nosidom nodu toa m̃esi. Mia nalavon ka neviedu ga neial kamiu ka mia rejikia reil vatitig van kito ea mirado ga. Ver naio tibe na mia naio rivu laka, mia rila kito nonovio romijikia rojog rivu ve toru laka.

¹³ A kuluemo dolu na, napano Atua bitirilar naio jibe ka jau, a kenerinio nalo bunu ajua vio na, ajumã aberenio aberinavo Atua miliyu ka kamiu.

Peli naina ga na kiniou nejidom neverenio, iliano bisi ga ea vio na.

Mesi Tolu Na JONE Naio Bivitauiāio Verialiano Moti

Tukunuano bulati na niosi nei

Jone kiano mēsi tolu nene, naio bio bere naio ber naio be “Navagadeano” ana naio bivitauiā ban toro tai, siano Kaeas, napano be navurumāraboiano tai ea yimo lu. Naio miaia Kaeas bior napano naio jo mijai namoneano nalo, a berkakar banio ka takisor re bajago na toro va tai napano siano Diotreves.

Torogio nalo na niosi nei

Iliano moti 1-4

Navagadeano miaia Kaias 5-8

Navagadeano milkuei ka Tiotrivis 9-10

Navagadeano jaaro ka Dimitrius kiano bajago 11-12

Iliano maariano 13-15

Iliano na be moti

¹ Kiniou tormoruo navagadeano, nebivitauiā mēsi nei ka riviedu vāso, kuruaku Kaias. Peli kito tealo ajumā amiliaso kija, mia kiniou nojidom nover kaso never kiniou najaaro toru ka neviviūso ea mēsi nei, bior kiniou tinieku jiiso toru, jakii bajago novo na ilirianiāno na Tubo kanano.

² Kanku bibilu novo, nemijikia ka jau kojomā komijog bo dañariga napano

kanamo meuliano naio jo bo ea Atua jumāno ruei, mia nojomā nobolkouo kaso jula, ka kanamo imāuano nalo atu aiel rivu, a ka vere mieiano tai ka rila bulag mokotenamo. ³ Vonganei maka vesiou laka vo, ana kuruado nalo tealo abinimeī aboru ea vio nei, ana nalo ajukunu ban kiniou jumābe ka jau kojomā jakii Tubo kanano ilirianiāno, a jau kojomā komila kanano imāuano novo nalo banbano-o na tomu nalo abitilubar ka kanamo meuliano naio memedu rianoga. Kanalo veriiano nei naio mila tinieku jaaro-o mia jaaro toru laka. ⁴ Maka ve todolu tai napano mia mijikia rila kiniou nojog rivu tibe nei, mia bogo na ga nomijog ka keneriku nalo aju ajumolu aju jikili ea Tubo kanano ilirianiano, naina naruei namial bo laka.

Kaias naio be toro tai na mā amijikia ka abarkar tinielo ea naio

⁵ Kiaku bilbilu na bo, siva toru banso ka imāuano nalo na mā jau komila ka mijai nalo na mā aju amial bija Ioluano Vou na bo, na abiedu aboru ea kamiū. Nalo abiedu jibe ka na nalo abe valauo ga, naruei tealo maka asidom avitikarlo, mia jau komijuku bo toru laka banlo. ⁶ Nalo abinimeī aberialio ea mirano namonea nalo na lotuano na vio na ruei, aju ajukunu ka kanamo imāuano na bo na kanamo tinietiano. Naruei tomu

ta bunu abiedu bereio aju kamliko vonganai, naruei nebika denso ka jau kajailo bunu. Ana vere ala nonovio imauano ribisi, mia bo ka ver kamiu kuvitii kiri titai ve telisu ka riijailo ea kanalo marabo, tibe ka na memedu ka ala van toro na mila Atua kanano imauano.⁷ Nalo na, amiel bior vite na ga, ana bogo na ma aju aba amio-liolu ban nalo na ma maka amonea vo, nalo maka atu asidom ka nalo na monoka avitikarlo ka vite tai, bior nalo maka ave namoneano vo.⁸ Mia kito namoneano nalo, tenei joa kito ka rajailo. Bo ka kito rotunukakarlo, a roikurkarlo, ka rila ka mia kito bunu reiasol vijalo, kito nonovio robe tomu na romimau vei ka Tubo kanano ilirianiano.

Tiotrivis naio bitikar lotuano maka rimemedu

⁹ Peli jau komijikia ka kin-iou nebitauiia mesi tai bior vite na ban namoneano nalo ea lotuano ruei, mia Tiotrivis nei, napano naio jidom ka naio rive tubo kalo, naio maka rivitilubar kin-iou, naio maka sidom riiagago ka kanaku iliano, naio jokovio ka Tubo kanano imauano napano ma kumemi numitu numila.¹⁰ Naio joma mil mele, a joma ber iliano telabo na bova ii kumemi, naio mila sibi niegeniege kumemi toru laka. A maka ve iliano na bova ga, mia be imauano na bova bunu, bior bogo na ma Atua kanano tomu nalo amiyoyotuba ka kamiu, naio maka sidomlo, naio ber avan bereio ga.

Mia mave ka naina, bogo na kam tealo ka kamiu, kubitikar nalo, kumijailo ka ala imauano na abinimei kario, mia kema nei naio jumolu buk bulag kamiu den lotuano bunu. Vite nalo nei na ma naio jo mila nei naio maka rimemedu na, mia bogo na kin-iou neviedu nomiyotuba kean kamiu, mia rovinu rava vio takurano ka roverii ka mia rala venia van naio.¹¹ Kanaku bilbilu, nojidom never kaso ka kema nei mila kirivova kaso mia maka rivu ka rila jau bunu, jau kala rivova van naio bereio. Monoka kito rovijauia re bajago na bova ga, mia bo ka rovijauia bajago na bo. Toro na ma mila bo ban toro dolu, naio be Atua kiano toro riano, mia toro na ma mila bova ban toro dolu, naio maka rial Atua vo, naio jo koalabo kia ga vo.

Dimitrias naio be toro na bo laka tai

¹² Mia Dimitrias nei, naio mia riijaso. Tomu nalo tinielo ea naio, nalo aberenio aberinavo naio mimau bo laka, mia Atua kanano iliano naio joma berii bajago na joa kanano meuliano, berinavo abo laka. Mia kin-iou bunu nemial naio be toro na bo tai, ana nemijikia ka jau komonmonea kanaku iliano, ka monoka never ve riano ga vanto.

Iliano na maaro

¹³ Vite miroano na ka never kaso aju kiano vo, mia maka nosidom nevivitauiia toa mesi vonganai.¹⁴ Mia

nojidom ka mia neviedu
neial kamiu rivesiou re,
naruei mia romijikia rovitii
mirado, reil van kito.

¹⁵ Tumñaro to vija jau
Kanado bilbilu nalo na
ea vio nalo nei aberen
aberinavo Atua milivu kaso.
Aiou koig, jau kover ka
kanado bilbilu nalo aviniu
na mña kumitu na, ka mia
Atua riilivu bunu ka kamiu.

Peli naina ga na kiniou no-
jidom noverenio, iliano bisi
ea ga vio na.

Mesi Napano JUT Bivitauiaio Verialiano Moti

Tukunuano bulati na niosi nei

Jut kiano mēsi, naio jirio ea bogo na naiolioliano miroano bija naverloglogiano nalo aju, napano aberinavo amonea Yesu, kialo verloglogiano maka memedu mia. Naruei bior vite nei naio milikakar namoneano nalo, ka monoka avitakar vatitigio ka tomu nalo na jibena ala sibilililo re. Mesi bulati nei, kiano jidomiano vaataro varei ka Pitere kiano mēsi juo nene, napano ber namoneano nalo monoka avokar sikili bajago nei na moneano napano Atua jian banlo, na mia to tobo rivano-o maka rijikia ribisi.

Torogio nalo na niosi nei Iliano moti 1-2

Bajago bija verloglogiano na Naverloglogiano nalo napano maka rimemedu, vija vironiano napano mia avokario 3-16

Iilaboniano na Moneano nalo 17-23

Iliano maariano 23-25

Iliano na be moti

¹ Kiniou Jut, nebe toro na mā nemimāu Yesu Kristo kanano, a nebe Yemesi kuruano, kiniou nebivitauia

mēsi nei biedu. Nojuvan binimei ban kamiū, tomu nalo na mā Atua karamādo naio bio kamiū ruei kube kanano, napano naio tinien jii kamiū toru, ka napano kumitutano ka Yesu Kristo kanano vitikariano novo. ² Kanaku volkouano ber tinieiiiano, tunāroano a tinietiiiano amei avujo lou ea kamiū, atu amei ve toru lie danāriga.

Mesi nei naio ka tivelinio na nalo na mā abilig niege-niege Atua kanano iliano

³ Banalo, beamu kiniou nejidom nevivitauia mēsi tai van kamiū ka neverial jidomiano tealō ea tivelinio na ioruriano novo na mā kito nonovio robokario, mia vonganei ga iliano tai binimei bokar kiniou jelea kamiū, naruei namial ka monoka nevivitauii vite dolu naruei.

Kiniou nomijog jibe vite tealō abova kija, tenena nejidom never ka kamiū ka kuvitumolu kuvitu sikili, kuvisikili ka pīrimiu rivalo ka kuvokar vatitig kiado moneano. Kiado moneano nene, Atua naio jian binimei ban namoneano lu re nuā vaarakurano ruei, naruei maka ve tena aje bukua pēli aiasol dolu tai mave kaniō bereio. ⁴ Ana vite na mā nomijog, namial jibe ka tomu nalo na mā abinimei ajusol ka kamiū, nalo amijejebukua kiado moneano ruei. Nalo na, maka amemedu ka atusol kamiū, abinimei bena ga, maka asel ea morouo, mia vonganei

aju bija kamiū ruei. Nalo na abe uolu na kanado lotu-ano, nalo maka asidom Yesu Kristo napano naio takurano be toro na toru, a naio be kanado Tubo. Atua bere-
nio berinavo, ea kanano tiniememiano, naio jaaro ka riviekokoa kito ka kanado kariano nalo, mia nalo nei abilig kiano iliano bereio, aju aberinavo ver tibe na, amijikia ala kariano venia napano ajidom, naio maka ve titai na, mia Atua riviekokoa nalo ga na. Iliano na kiriniagiago laka, mia nalo na m̃a ajum̃a aberenio, Il-iano Lu berkar kanalo viro-
niano beamu ruei.

Tomu na bova nei monoka aje vironiano

⁵ Bo ka kamiū kuvisidomii von nalo tealo na m̃a amila kirivova jibe na, naruei Atua mije batitig kanalo vironi-
ano banlo. Tukunuano nalo na aberloglog batitig kamiū kanio ruei, mia p̃eli tiniemiu bobogia ruei, ana mia never bereio van kamiū.

Nana be moti nene, naio be kulo Israel nalo napano m̃a amiñau kurano ga Ijivi beamu. Atua naio milarur burum̃ara taara nei, naio buru bulaglo ea vio Ijivi, mia karina nalo miroano abilig taakalo kanio, mia naio mue bulaglo ga am̃arm̃aro.

⁶ Ana juo nene, naio be nailiano nalo na m̃a ajua vio mave beamu. Atua midulo ajua vio novo tai na naio loa laka ruei, mia nalo maka asidom, ajidom ka atua jeleigio bereio, ana

mila na naio miorkakarlo ka m̃arimieni nalo napano maka ajikia ataluvo denlo bogo tai. Naio mila batitig jelelo dolu tai ea burumelijo, naio buk bulaglo aba ajuaio banbano bokar bogo na bu-
rum̃ara vironiano na legiano na maaro.

⁷ Mia tolu nene, naio be kulo Sotomo, bija kulo Komora, bija tomu nalo na komeli dolu nalo na vaataro kalo. Nalo bunu ajavukia nailiano nalo na, kanalo jidomiano nalo bavavin laka. Nalo maka atakii bajago na memedu na m̃a Atua naio midu joa kito, mia ajum̃a amila napano sum̃ano nalo ga aju abur sum̃ano bereio, ana sidomiano kiriniagiago nalo na jibe nei naio bavavin toru ealo bogo nonovio. Mia monoka rosidomii vatitig rivu ka venia napano naio miyotuba ka nalo. Burum̃ara sebi na jijenlo, naruei aju abokar vironiano vo ea sebi dolu napano maka rijikia rivatove bogo tai.

Tomu va nalo nei nalo aban kirivova tanea

⁸ Ana tomu na bova nalo na abinimei aju kamlika na, nalo na bunu aju amila kar-
iano na jibe na. Nalo m̃a aju amial vite na bova nalo ea kanalo monovovuano, mia venia na m̃a amialio, ajidom aim̃aukanio. Nalo amila vite na bova nalo ka nia-
belo, nalo abukular ga il-iano na toro na m̃a jidom ril vanlo, ajum̃a abital bova ea moroano novo dolu nalo

na mña maka rejikia reialio.
⁹ Mia moroano dolu nei naio
 maka ve tena royotel riv-
 ijaio. Mia remijikia reial
 ka napano parinio nailiano
 Maikel, bogo na mña jo mila
 baravo bija Simaro ka ber
 kei ka naljuo nei mia rudu
 Mosis mokotenano, mia naio
 maka ril vova vanio. Vede
 tiniedo ka mia memedu ka
 river iliano na jikirkili p̃eli
 na iliano siniabu nalo, mia
 maka riverenio, berenio ga
 ber "Atua na loa laka mia
 naio ril vanso navo."

¹⁰ Mia tomu nalo nei, amil
 kirivova a amil siniabu ea
 vite nonovio ga. Vite na mña
 amijikia p̃eli na mña maka
 ajikia, mia aberiio kirivova
 ga. Jikiaiano na mña nalo
 amijev, naio be verare ga ka
 jikiaiano na temeul, ka na-
 pano vite venia namña naio
 mijog ka rila, bo p̃eli na
 bova, mia naio mila ga. Ba-
 jago bova nalo namña ajumña
 amila, naio mila kanalo ver-
 loglogiano nalo abe tena sib-
 iano ga, maka amemedu,
 maka ajikia atumolu leleio.

*Tomu va nei nalo amila
 niegeniege imauano nalo na
 lotuano*

¹¹ Nalo ajumña amiel ea
 m̃arabo na m̃ariano nei na-
 pano Ken re nua naio miel
 eaio, bior napano naio jerm̃i
 ka kuruano. Ana tomu na
 bova nei, amidulo ajua vio
 va nei napano Naverialiano
 Pelama na beamu naio midu
 naio joaio, bior ka napano
 naio ber iliano napano maka
 rimemedu ka rijeve puruveru
 eaio, naruei kanano iliano

nei mila Atua kanano tomu
 nalo aba amilotu ka atua
 dolu. Mo tai bereio, amijoru
 abatove abakovio ea p̃ili na
 borotano nei napano Kora
 re beamu ba bakovio eaio.
 Nina ea bogo na borotano
 napano naio jo jikili jua
 naio burupe, bior naio mil
 die navurim̃araboiano na-
 pano Atua naio bitirilario.

¹² Bogo na kamiu kubin-
 imei vio takurano ka kuvila
 sinaniano na tinietakurani-
 ano nalo, mia tomu nalo na,
 nalo aju jibe ka baraaña tai
 napano naio joluku yetano
 ea tei, napano ver uako tai
 va vaataro laka kanio mia
 riva rivavin eaio. Nalo amila
 bulag ga semiu sinaniano
 nalo, napano ajen m̃elea
 janea vio reraio, amun ba
 amilaluvu pariparilo, amila
 uetubaiano toru laka, a
 maka asidomial toro dolu,
 maka aialerinio ea titai.

Tomu na jibe na nalo
 ajibe ka melijo na mña jegi
 midulo miuvio barlaka ga
 bano, naio maka sian yuo
 ea kiado tiniavio nalo. Nalo
 ajavukia buruiesi tai na-
 pano ajelar menunu naio jo,
 bior napano naio maka rivar
 m̃arati. ¹³ Nalo ajibe ka tei
 napano naio jo mikulkulu
 toru, karina naio jo buk ni-
 amniag bija soro nalo abavin
 ea vio medave. Ajavukia
 m̃arvitano nalo na mña aburo
 ea buluniogovu yauo mave,
 napano aju bogo bulati ga
 karina aba kovio bereio,
 aban bo kovio ea burum̃ara
 melijokouo ea vio na bobo-
 gio.

Naverialiano nei Inok re nua naio joma berii ruei tomu nalo na jibe na

¹⁴ Kuvisidomii von naverialiano tai bunu na tormoru Inok re nua nua laka, napano naio be togio na terati aluo napano amoluo ea Atam. Naio berii tomu nalo na jibe na naruei, napano ber jibe na, ber “! Kamiu kuvitikarlo! Mia Atua na loa laka naio rimei rivija taamaka na nailiano lu nalo na kanano, ¹⁵ ka atibure kulo va nalo na amila kariano napano maka amonmonea naio. Mia sjan viro niano vanlo rivior imauano va nalo na kanalo veribinio, a bior kanalo ilisiniabu va napano abuku ea mirano.”

¹⁶ Nalo na na ma abinimei aju bija kamiu, iliano na naio memedu ga ka nalo, bior ka napano abe tomu na vukuleleano, abe tomu na amilidie vite nonovio, abe tomu na ma ajidom nalo ga, a abe tomu na ma amil vevavin ka iliano nalo na tortoru. Mia ver nalo asidom ka avokar vite tai ea kamiu, monoka kuvitikar vatitiglo, bior abe tomu na niosesei, a abe tomu na ilinovoiano bunu.

Naiagagoano nalo bunu ajuma aberii tomu nalo na jibe na

¹⁷ Mia kamiu, kanaku bilbilu nalo, bo ka kamiu kuvituma kuvisidom bunu venia napano ma naiagagoano nalo na Tubo Yesu Kristo kanano ajuma aberenio ka mia riyotuba iorou. ¹⁸ Nalo ajuma aber

ka kito aberinavo “Ea bogo na maaro, mia tomu nalo ayotel rivova ea imauano na Tubo kanano rivija kanano tomu nalo. Mia ala pariparilo, mia ala ga venia napano kanalo sidomiano va nalo ajidom.” ¹⁹ Tomu nalo na jibe na ajuma aber aberinavo kanalo taara ga naio bo, aberinavo nalo ga amima ea Niununo, mia kiniau nejidom neverial van kamiu ka nalo amima ea ga jidomiano na yetemeriba nei ga, Niununo Lu naio maka toalo leleio.

Iliano na tunukakar namoneano riano nalo

²⁰ Mia kamiu, kanaku bilbilu nalo, bo ka kenemiu imauano nalo ea kanado moneano lu naio jo bavin lie damariga. Monoka kubolkouo damariga ka moroano na Niununo Lu. ²¹ Kuvidu vatitig kamiu to damariga yetano ka Atua kanano tinietiano, kuvitu melumu ka kuvisirarago ka Tubo Yesu Kristo ga, rivan napano naio, ea kanano tinieiano, rivuru bulag kamiu kuan ea meuliano napano maka ve jukuti nene.

²² Toro na ma jo tiniene beve juo, kuvija naio ka kanano jidomiano rimei sikili rivu bereio. ²³ Telabo na jibe na ajuma ajua tivelinio ka bulukusebi, vaataro ka atibirbil ea ruei, mia kuvila sopei ka kuvuru bulaglo, kuvilrurlo. Bo ka tiniemiu riia tomu nalo, mia tealo napano abova

laka mia kumerou kija kalo.
 Kariano nalo a niamiamo va
 nalo na kanalo naio jokol
 kialo meuliano momou a
 mila bulag kanalo bajago
 nonovio, a jua niabelo
 reraio, mia monoka kuvja
 kalo, kuve bilbilu re vijalo.

*Iliano na maaro: Volk-
 ouano na vameneia Atua*

²⁴ Kito ravameneia Atua,
 ka napano naio mijikia ri-
 vokar batitig kito ka mia
 rojoru re, rivan rivano-o
 naio rivuru kito rava rotu-
 molu rotu ea kanano mer-
 merano lu, napano kanado
 meuliano naio meravo bo
 ea mirano, mia rovokar bu-
 rumñara jogvuiano.

²⁵ Kumemi nubameneaso
 Atua, napano jau ga taku-
 rano kobe naioruriano. Nu-
 midular siamo, bior mo-
 roano, sikiliano, a tuboiano
 abe kanamo ga. Numia-
 iaso maluvo jelea Yesu Kristo
 Tubo na kenememi, jikar ea
 bogo nalo na beamu ruei
 binimeia bokar vonganei, ri-
 van rivano-o to tobo to, mm.

Kiniou, Jut.

NAVISIŔEIANO Napano Jone Mialio Ana Bivitaualario Verialiano Moti

Tukunu bulati na niosi nei

Niosi nei, vite nalo na Kristo bisipeio ban Jone, napano siano na bulati nene “Navisiŕeiano,” Jone bivitaualario. Naio berii visiano nalo napano Yesu berialio ban naio. Naio bivitaualario ka bogo napano tomu na Romo amila kirisikili laka ban namoneano nalo, a aju amuebivino, bior ka amonea Yesu Kristo. Jone bivitaualario niosi nei ka ridular kialo jidomiano nalo, ka asikil atu sikili ea bogokouo nei.

Ea niosi nei, be visiano nalo na Yesu berialio ban Jone. Naio berii jamerijiano nalo ka namoneano nalo ea bogo na amijikia ajoglubar nioniag nalo nene. Mia tomu dolu nalo maka ajikia avokar nioniag nene. Kialo burupati jidomiano na jamerjiano nei jibenei. Yesu Kristo, naio be Atua Soŕi, a be kiado Tubo, a ea juŕano, Atua mia vudobi vatitig Simaro vija kiano uolu dolu nalo. Bogo na naio rila nonovio iŕauano nei, mia naio sian vuliano van kiano tomu nalo napano ajikili aju kirisikili ea kialo moneano. Mia naio rivurulo ava atu vija naio ea tiniabene vou bija ea yetemeriba vou napano naio mila vatitigio ruei aju.

Torogio nalo na niosi nei

Iliano moti 1:1-8

Visiano moti bija mŕesi nalo napano ban ea yimo lu aluo 1:9—3:11

Niosi napano be lu ka toro visio bija niajebijo aluo 4:1—8:1

Simeŕuo nalo aluo 8:1—11:19

Mermu bija temeul juo napano naljuo abova 12:1—13:18

Visiano dolu nalo napano Jone mialio 14:1—15:8

Dise aluo napano abujo ka Atua kiano tiniamimiano 16:1-21

Atua mila bulag bulukomeli nei Babilon a juvulu temeul nei napano bova, a naio-lioliano simsibi, bija Simaro 17:1—20:10

Atua jibure tomu nalo ea legiano maaro 20:11-15

Tiniabene vou bija yetemeriba vou, bija Yerusalemou vou 21:1—22:5

Iliano maariano 22:6-21

Verivisivisiano na niosi nei

¹ Niosi na be visiŕeiano ka venia napano mia naio riyotuba ea legiano nalo napano mia amei navo. Atua naio jidom ka kanano tomu na iŕauano nalo na yetemeriba monoka amer-avo rivu ka vite nalo nene, naruei, jian jikiaiano nene ban Yesu Kristo, karina Yesu naio miila kiano nailiano tai miyotuba ka kanano toro na iŕauano nei Jone, naio mila vite nalo nene amiyotuba ka

naio ea kanano visiŕeiano tai.

² Jone naio mial nailiano nene bisi, naruei naio bitilubar ka naina be Atua kanano iliano riano, be iliano na be riano tai memedu ka aver visivisii venia napano mia Yesu Kristo naio rimauka iorou, mila na naio bivitauia bulagio vatitig bo jua niosi nei vite nonovio napano naio mialio, ka kito na iorou romijikia rovlukuio.

³ Naruei toro kei napano mia naio rivuluku iliano nalo na verialiano nei, ŕeli mije tilieno kanio, mije vatitigio joa kanano iviso, mia Atua kanano ilivuiano ve burutomoruo toa kiano meuliano, bior ka napano burumara legiano nene naio jo binimei vaataro laka naruei.

Jone jikar kiano verialiano na kiano moneano ea iliano na ilivuiano ban Atua

⁴ Kiniou Jone, nebivitauia bulag iliano nalo nei ka riviedu rivan kamiu taara aluo na namoneano nalo napano kumitua komeli nalo na ea tanobuku na toru na vio nei Esia. Kiniou najaaro ka neviviuo kamiu ea siano napano naio jo beamu beamu laka, a naio jo vonganei, a mia naio to toboto. Nojomā nobolkouo vonganei ka kamiu ka burumara tiniememiano vija tumaroano toa kenemiu meuliano tulaka, napano mia rijikia rimaluvo ka kamiu den kiado Atua nei

vija kanano niununo aluo napano ajumolu ajukamu ka kiano jobaro, ⁵ a mijikia rimaluvo ka kamiu den Yesu Kristo bunu, naina napano naio biekouo banbano mia kiano burukija miou, karina naina be moti napano naio jumolu meul bereio, napano vonganei naio be burumara parinio tubo ka parinio tubo nalo na yetemeriba.

Riano, Yesu Kristo nene napano naio tinien miia kito toru, banbano mijamo ka kanano burukija miou ka rivulu bulag kito den vironiano na kiado kariano nalo, ⁶ naruei naio bitiri bulag kito ka romei rove m̄aratavo ve takurano ea yati na kanano tubo sesa nalo, a ka naio bijauia bulag kito ka rajai naio rotibe ka tomu lu na karamano kanano imauano nalo, naio ga be Atua Soŕi.

Yesu mila bo ban kito toru jibe na ana bo ka reilivu ka siano, rodular naio to medave laka, rivan rivan mia maka rijikia ribisi bogo tai, tibe na.

⁷ Kamiu kuvitii vatitig rivu! Naio naruei jomā mijian burevure melijo nalo na mave, naio riyotuba rime. Mia kito nonovio reial naio ka mirado memedu, a vija bunu nalo nanua mā ajukukakar naio ea mākolokolo, nalo bunu avitilubar naio bereio. A mia ve burumara jogvaiano a tegiano riyotuba ea tomu nalo na yetemeriba, tinielo rimaio ka venia napano

amila ban naio ea bogo nanua beamu. Mia monoka tibe ga na, neber “Ee” ban naio kanio.

⁸ Bo ka kito rovatove ka Tubo Atua, Atua Soŕi na moroano, naio napano jo beamu, naio jo banei, a mia naio tobo to, napano kiano ilitemiano tai naio ber jibe nei, berinavo

“Kiniou nei nebe burupati, kiniou nei nebe juluvati!”

Jone mial kijokijo na Yesu

⁹ Kiaku bilbilu nalo, kiniou Jone nebe kuruemiu tormoruo, napano neberial vite nalo nei ban kamiu. Nojidom neverial van kamiu bior kito naruei napano robe Yesu kiano, ktio naruei rojutano ka kiano tuboiano, kito naruei rojuŕa rabar bitiran jogvaiano na bogokouo nei, ana kito naruei rojuŕa rojamikar kito bija jidomiano na tebievi.

Mo kanaku tukunuano naio ban jibe nei, berenio nua beamu kiniou nojomŕa neberial Atua kanano iliano, nojo nomioliolu ka Yesu Kristo banbano na kulo Romo amije vironiano ban kiniou, amila kiniou nebinimei nomiŕau kurano ea uleule na telisu nei, siano Patimos. ¹⁰ Naruei ea Legiano Lu tai nojo jibe na ana nomijog jibe Niununo binimei ea kiniou, nomijog jooa tai ju iorou ka kiniou, mil burutomoluo jibe ka pasimeduo miolu, mil ber jibe nei, berinavo:

¹¹ “Venia napano mia jau kealio,

keial kovivitauia bulagio rivan ea niosi tai,

karina jau kotuvan rivan tanea lotuano nalo na tanobuku na vio Esia,

ka ajikia avulukuio.

Lotuano nalo na, nalo aluo, be Eveso, Simena, Pekamam, Taitera, Satisi, Vilatelia bija Leotesia.”

¹² Jooa na mil ban kiniou jibe na ana nejidom neial kenia, nabarŕilig kiniou nemial burupati na yulu nalo ga aju, napano amimŕauka niogo ea nalo aluo.

¹³ Burubati yulu nalo nene ajumolu aju jibe na, karina iviso kanio nemial toro tai jumolu jikili ju, napano naio jibe ka naio napano aber Kulorinio Kenerinio. Naio miya burutili soto tai, bija miya kulumŕarauo napano amiyako ka niogo, ajelan barkor iarene. ¹⁴ Vijinio miuvu mia miuvu, jibe ka vijinio nunu bija mavo, mia tiamirano merera jibe ka minano sebi. ¹⁵ Jaano kirisikili bo, javukia mŕarbutoto napano amijie ea sebi ka rila sikili rivu, mia bogo napano naio mil, jono miolu jibe ka tei napano jaburu ea baraaŕa. ¹⁶ Naio jumolu jikili ju jibe ka napano ea juŕano meruo naio bokar mŕarvitano aluo, mia iobogu na mira tai napano naio mali

ea ikít tivelinio juo naio jo moluo ea niono. Mirano bunu, riano, naio merera, mia merera naio javukia mŕerenio napano naio jikili mia jikili.

¹⁷ Nemial toro nene jibe na, tomnei, mila kiniou jibe ka namŕaro garuei, nomijoru yetano ea jaano. Mia naio jian juŕano meruo binimej jokol kiniou, naio berinavo “Jau komerou re ka kin-iou, kiniou nei nebe natikariano mia nebe najuluvatiano.

¹⁸ Naio napano be burupati na meuliano be kin-iou nei, bior napano kiniou nemeul, karina namŕaro, karina nemeul bereio, nemeul to toboto.

Kiniou nei naruei napano vulariano na mŕariano a vulariano na bulukusebi kirivova nei na tomu na mŕariano, nalo ajua juŕaku.

¹⁹ Mia jau komerou re, jau kotovon re, kovivitauia bulagio vatitig ga venia na jau kojomŕa komialio, napano tealo abe tena vonganei, bija tealo abe tena bogo nalo na amei na vo.

²⁰ Mia kiniou never titai vansom beamu vo, ka tivelinio na mŕarvitano aluo nanua jau komialio joa juŕaku, bija burupati yulu aluo na mŕa amimŕaukalo ea nioĝo na.

Vite nalo nei ajavukia jikiaiano tai napano naio joluku, mia nioti nene jibe nei, ber mŕarvitano aluo nalo nei napano, abe nailiano aluo na mia avitakar lotuano aluo nalo nei, a burupati yulu aluo, naina be lotuano aluo nene neibano.”

2

Mesi nalo naina ban lotuano aluo

¹ Naruej Yesu mil dolu kia ga ban kiniou, naio berinavo “Vonganei mia kiniou neverial venia napano mia jau komijikia kovivitauia riva rivan lotuano aluo aveve terakurano.”

Mesi na jukamu, riva rivan lotuano na vio Eveso, lotuano napano maka ve tinietiiano toaio

“Beamu, jau kovivitauia mŕesi tai riva rivan nailiano na lotuano na komeli na vio Eveso, jau kovivitauia tibe nei, koverinavo Tliano napano biedu ban kamiu binimej den naio napano bokar mŕarvitano aluo ka juŕano meruo, napano jo miel jelliviv iviso ka burupati yulu aluo nei.

² “Naio berial ka kamiu jibe nei, berinavo “Kiniou nemijikia kamiu ruei, bior nemial kenemiu imŕauano novo nalo, nemial ka napano kumila vio toru, nemial ka napano kumitutua kamiu bija jidomiano na

tebievi naio bo bo laka. Kin-iou nemial bunu bo laka jibe napano kamiu maka kuvijamo ka tomu na bova amei ala niegeniege kamiu, bior tealo, bogo napano amiyotuba ka kamiu, ana aberinavo nalo abe atevi nalo, mia kamiu kuvial vonlo, kuvijikia vatitiglo rivu, ana mia kamiu kuvileal lo ka nalo amijubolbolili kamiu ga.

3 ““Bior siaku ga napano kamiu kumiduio, naruei kubiniua bogokouo, a amila bova ban kamiu, mia nemijikia ka maka kuvituvan kin-iou vo, kumitumña kubokar jikili bo kia ga vo, mia jidomiano napano ber tiniemiu mñaro laka, þeli na kamiu kumijog kuber bare, nina naio maka toa kamiu leleio.

4 ““Kenemiu bajago nalo nei kiri-novo laka, a be riano, vite tai jo napano kumitumña kumila napano maka nasaaro lele kanio, mia bo ka neverialio van kamiu memedu. Naio jibe nei, ber burumñara tinietiiiano napano naio joa kamiu be moti, vonganei naio binime melukluku laka, maka bunu tavukia beamu. ⁵ Kuvisidomii bereio von ea burumñara bajago na tinietiiiano novo na beamu, napano tiniemiu jii kiniou toru, a tiniemiu jii kamiu ga toru bija kulo dolu nalo. Ea bogo na naio bo mia bo, mia vonganei, naio batove mia batove laka. Mia bo ga, mia monoka kuvilig kamiu ga, a monoka kuan bereio ea

vio novo nei nanua kumitua beamu. Mia ver kuvilig re kamiu, nemijikia never mia neyotuba ka kamiu, navar bulag burupati yulu na ju merera iviso ka kamiu vonganei.

6 ““Riano, nina be burumñara tena bova tai na kenemiu napano neber vonga, mia nojidom neverial van kamiu bunu ka kumitumña kumila burumñara vite novo tai bunu, napano nejaaro toru kanio. Vite nene napano kumitumña kumijuku die nalo nei napano ajumña amila vite dolu vovu nalo, napano toro nei Nikolas naio mioliolu kanio be moti. Abova ga, a kiniou bunu maka nosidom leleio.

7 ““Toro napano be tiliniene, bo ka naio rijoglubar venia napano Atua kanano Niununo Lu naio jo berialio ban taara na namoneano nalo. Toro napano naio tu sikili rivanvano tuvulu na bova, mia nemijikia najamo ka naio ka mijikia riva to jouro rimemedu ea tiniavio novo na Atua kanano, naio riva to sen mñarati iesi na buruiesi na meuliano.””

Mesi juo nene, riva rivan lotuano na Simena, lotuano napano mña tomu nene nalo ajumña ajermñi kalo

8 “Jau monoka kovivitauiamñesi tai riva rivan nailiano na lotuano na komeli na vio Simena, kover tibe nei, koverinavo ‘Iliano na napano biedu ban kamiu binime den naio napano be

moti a ve na maariano, napano amuebin m̃aro, kar na meul bereio.

9 “Naio berial ban kamiū jibe nei, berinavo “Kiniou nemijikia vatitig bogokouo nalo napano m̃a kumitum̃a kubiniua, a nemijikia ka jumemiū nalo abeteau. Mia nojidom ka monoka kuvi-jikia ka maka kuve talim̃asa, mia kube na sanibaiano laka! Riano ga, nemijikia ka nalo nei napano ajum̃a aber abe kulo Ju, nalo ajum̃a abuku iliano nalo na bova miroano laka ban kamiū, mia maka kuvisidomialio, nemial nalo maka atibe ka Ju nalo leleio, makanio, nalo ajakisor Siṃaro memedu.

10 ““Mia be riano, ŋeli mia vesiou re kamiū tealo monoka avar burum̃ara jogvaiano nalo rivior napano kumonea kiniou, mia kumerou re. Peli Siṃaro naio mijikia rila ka mia avuku kam tealo avan ea nalakoiano, ka naio to rila vonvon kamiū, mia nemijikia never ka mia naio rijikia rila lelan kamiū ea jogvaiano nalo riva rivokar legiano ve duelimo ga. Ver tibe na, monoka kuvitu sikili riva rivokar bogo na mia adular kenemiū jegi, mia ver kuvijoru re ea bogo na, mia bogo na koviyotuba kean kiniou, mia nesian burum̃ara ijaiano van kamiū, nina be batubatu niogo na meuliano.

11 ““Toro napano be tiliniene, bo ka naio rijoglubar venia napano

Niununo na Atua kanano naio jom̃a berialio ban taara na namoneano nalo. Toro napano jovulu bajago va ea meuliano nei, mia naio riyotuba ea re m̃ariano juo napano mia naio rimeiorou.””

Mesi tolu nene, riva rivan lotuano na Pekamam, lotuano napano mijamo ka ver-loglogiano va nalo abinimei jouro eaio

12 “Tai bunu bereio, jau monoka kovivitauiā m̃esi tai riva rivan nailiano na lotuano na komeli na vio Pekamam, kover tibe nei, koverinavo ‘Iliano napano biedu ban kamiū naio binimei den naio napano jo mudu iobogu na mira napano mali ea ikiti be juo.

13 “Naio berial ban kamiū jibe nei, naio berinavo “Nemijikia vatitig bo ka vio napano kamiū kumituaio, naio be tanobuku tai iviso memedu ea vio napano Siṃaro naio jo be tubo eaio! Kanano vio nalo aju janea kamiū, mia kamiū kubokar siaku jikili bo dam̃ariga. Beamu, jouro ea kenemiū komeli na, ŋeli romijikia rover komeli na Siṃaro kanano, amuebin kuruemiū nanua Antipas, naruei ajikili ka kamiū monoka kuvituyan kenemiū moneano ea kiniou. Mia makanio, jibe ka napano naio biekouo ea kiniou bokar m̃ariano, kamiū bunu, maka kam tai aburo den kiniou.

14 ““Nina naio be tivelinio na bo nene, mia be saba tai nojidom neverial van kamiu bunu. Vite na be moti, jouro ea kenemiu taara, be tomu tealu aju napano ajumã ajakii jidomiano tai napano be verare ka Naverialiano Pelama re nua. Ver kamiu tiniemiu maio kanio, naio naruei napano berii m̃arabo tai ban Parak, naruei maka vesiou ana Parak kija buru naio bano berijio ban kulo Israel nalo, mila na maka vesiou, ana ajikar ka ajen sinaniano lu napano kulo dolu nalo amila jokoluolu kanio ban kanalo tavoru nalo, ana nalo ajumã ajidel ka amila siakiano. Aju amila kariano jibe na naruei, mia jakii iliano napano amijog ruei, nalo aber naina bo ga.

15 ““Mia juo nene, be ta bunu na-pano kumijamo kalo aju jouro ea kenemiu taara na namoneano nalo. Nina nalo napano ajumã ajakii verloglogiano vovu dolu nalo nei, napano toro nei Nikolas naio jomã mioliolu kanio beamu.

16 ““Tibe na, monoka kuvilig kenemiu jidomiano taluvo den vovaiano nene! Ver makan, mia noyotuba ka kamiu vesiou re, ana mia iliano napano mia riyotuba ea nioku never kalo ea bogo na, mia naio tavukia iobogu na mira tai napano naio tekitekti rilalo ajikia.

17 ““Toro napano be tiliene, bo naio rijoglubar venia napano Niununo na Atua

kanano naio jomã berial ban taara na namoneano nalo. Naio napano bare ka tovulu na bova, mia naio ve kiano ijaiano novo, mia nesian sinaniano tai vanio, tavukia sinaniano napano kulo Ju nalo ajenio ea vio yauo, mia nina be sinaniano tai napano maka toro tai rialio vo. A mia nodu puruveru na mivu tai vanio, napano aje sio vou tai joaio, napano naio riduio, naio ga mia rijikia nioti riano nene.””

Mesi veri nene, riva rivan lotuano na Taitera, lotuano na mijamo ka bajago na bova jo jouro eaio

18 “Tai bunu bereio, jau monoka kovivitauia m̃esi tai riva rivan nailiano na lotuano na komeli na vio Taitera, kover tibe nei, koverinavo Tliano nei napano biedu ban kamiu naio binimeiden Kulorinio Kenerinio, napano mirano merera bilvili javukia menano sebi, a jaano kirisikili jibe ka butoto.

19 ““Naio berial ban kamiu jibe nei, berinavo “Kiniou nemijikia vatitig bo kenemiu inãuano nalo, kenemiu tinietiano bija viekouoiano, a kenemiu inãuano kouo nalo a jidomiano na tebievi na kenemiu, a mave lie kanio nomijikia vatitig bo ka kumitumã kumila ba lie von-ganei, jovulu nanua m̃a kumitumã kumilala beamu.

20 ““Nina be tivelinio na bo nene, mia be vite tai na monoka kiniou never rimeravo van kamiu. Nina

be tivelinio na tira va nei Jesebel, napano kubitilubar kanano vovaiano nalo, mia kumijamo ka naio jidel dolu ka ga kiano iñauano vovu nalo napano naio jomña milala. Naio berenio naio be tira na verialiano tai, a þeli, kamiu kumonea naio, mia naio mila sibilili ga kamiu. Ea kanano verloglogiano, naio jo buru tomu na kanaku iñauano aba be dolu laka, napano vonganei amijoru ea siakiano, ajumña ajen sinaniano na tavoru nalo kanalo, a ajidom aber bajago nalo na naio bo ga.
²¹ Kiniou nodu bogo ban tira nei ka naio tinieno maio ka bereio, rivilig naio taluvo den niamiamo na mña milao, mia naio maka sidomio.
²² Mo, kiaku jidomiano naio jo ruei, ka mia nala naio rimon ea jog tai na mieiano na jikirkili nalo, a mia nala nalo napano mña amila siakiano bijaio, ver aviliglo re ka kanano bajago na bova, mia nalo bunu ajog rivova ve toru laka.

²³ ““Tira nei mia ve re kenerinio tai meul, mia kanaku siniabu tokol nonovlo aviniu. Naruei bogo napano nalo na taara na namoneano nalo aial vite nei, mia avitilubar ka kiniou naruei, kanaku vitiiano jo jeliviv bakar venia napano jo joa toro kanano iviso, a jikia leal venia na joa kiano jidomiano. A mia avitilubar bunu ka kiniou naruei, nojo nejian meran ban tomu nalo, memedu ga ka bajago na vite

nalo napano ajumña amila ea kialo meuliano nalo.

²⁴ ““Naruei ea tivelinio na kamiu nalo dolu na ea vio Taitera, nemijikia ka maka kuvitakii verloglogiano nalo na tira nei kanano. Naio milavon ka buku iliseseiano nalo ban kamiu, ka ber mia naio rivetavo ea jidomiano lukuluku nalo napano abe teremi bo van kamiu, mia kamiu kubitilubar ka Simñaro ga naio ga be burupati na iliano nalo nene. Mia kin-iou never re bunu kiri titai ve dolu van kamiu, ²⁵ mia neber ga ka kamiu kuvokar sikili ilirianiano nei napano kubakar ruei, kuvituvan re rivan rivano, mia kiniou nemeie bereio.

²⁶ ““Naio napano juvulu na vovaiano, naio rila ga takii kiaku tinieiiiano riva rivokar juluvati na bogo nei, mia kiniou nesian burumñara ijaiano vanio. Mia najamo ka vanio ka rije tuboiano ea venuo nalo, ²⁷ tibe ka napano niosi na iouano naio beriio, napano naio ber

Naio mia rije tuboiano ka tomu nalo, napano kanano iesi napano na bokar ka jumñano, naio be mñarbutoto na kirisikili tai,

a nalo napano parilo jikili, mia naio rivukulo avan ea borotano, avurukokorov aveve niati tavukia tanopili na amimaukanio ea borotano. Iouano 2:9

““Moroano na rila tibe nei, Teta naio mijamo ka ban kiniou ruei, naruei mia najamo ka rivan toro na be

kanaku. ²⁸ A maka naina ga, mia toro nene, mia nodu m̄arivitano napano Mejegi toa jum̄ano.

²⁹ ““Toro napano be tiliniene, bo ka naio rijoglubar venia napano Niununo na Atua kanano naio jo berial ban taara na namoneano nalo.””

3

Mesi jumo nene, riva rivan lotuano na Satisi, lotuano napano joŋa monmelio kurano daŋariga

¹ “Mo jau monoka kovivitaia m̄esi tai riva van nailiano na lotuano na komeli na vio Satisi, kover tibe nei, koverinavo ‘Iliano nei biedu ban kamiū naio binimei den naio napano bitikar niununo aluo na Atua kanano bija m̄arivitano aluo napano kiano.

“Naio berial ban kamiū jibe nei, naio berinavo “Kinioū nemijikia batitig kenemiū iŋauano nalo. Tomu nalo ajuŋa amiaia kamiū m̄ele janea vio, aberinavo kamiū kube lotuano tai napano meul bo, mia makanio, kinioū nemijikia batitig ka napano kamiū kuŋarm̄aro ga kumitu. ² Vonganei be kenemiū bogo na kuvitevijo kija. Kenemiū iŋauano nalo, nemilealio ka Atua kiano vitiiano, kamiū maka kumila nonovio riviniū rivu, mia maka kuvila rimemedu leleio. Kenemiū sebi maka riva kovio vo, mia naio jo ban vaataro ka riŋaro dobi

nonovio, mia bior vite na, neber vatitig bo ban kamiū neberinavo monoka kuvila vatitig rivu ka mia naio rimei sikili lie bereio.

³ ““Tibe na, monoka kuvisidomial bereio iliano novo nalo napano m̄a kumijogio a napano kumijevio ruei. Kumonmonealo bo daŋariga, a kuvilig kenemiū meuliano rimei bereio, bior ver kuvitevijo re, mia nemijikia never vatitig rivu van kamiū ka mia nemijikia namaluvo ka kamiū tavukia toro na vinauano tai, napano mia kuvijikia lele re. ⁴ Beriano, nemijikia ka kamiū maka m̄arati ve telabo na vio Satisi aju bo ga, napano maka aia niegeniege m̄alo kulum̄arauo tavukia nalo dolu. Nalo ameravo bare bo ruei, ka na mia aia kulum̄arauo na miuvu, aiel rivija kinioū nuvan ea kiaku vonuo. ⁵ Toro kei napano jovulu vovaiano, naio bunu mia ayovovua vatitig naio rivu ka kulum̄arauo na miuvu jibe na. Mia naio siano, maka nejikia noiolkon bulag den niosi na meuliano bogo tai, mia kinioū nesiloglog naio ka karan̄aku rivija kanano nailiano nalo, never, kema na naio be kanaku toro tai riano.

⁶ ““Toro na be tiliniene, bo ka naio rijoglubar venia napano Atua kanano Niununo joŋa ber bulavulag ban taara ninio na namoneano nalo.””

Mesi ari nene, riva rivan lotuano na Vilatelia, lotuano napano bogo novo ka rila iŋauano jukamu ka mirano

7 “Bereio, jau monoka kovivitaui mēsi tai riva van nailiano na lotuano na komeli na vio Vilatelia, jau kover tibe nei, koverinavo ‘Iliano na napano biedu ban kamiū, naio binimeiden naio napano be lu, a naio be riano, napano naio naruei naio midu vukariano na vetavoiano na m̄aratavo napano Parinio Tubo Teviti re nua kiano. Venia napano naio betavo eaio, maka toro tai rijikia tetavoko bereio, a venia napano naio jetavokoio, maka toro tai rijikia rivetavo ea bereio.

8 “Naio berial ban kamiū jibe nei, naio berinavo “Kiniou nemijikia batitig kenemiū iŋauano nalo ruei. Naruei monoka kuvitii vatitig, nebetavo ea m̄aratavo tai ban kamiū napano maka toro tai rijikia tetavoko bereio. Kiniou nemijikia ka kenemiū moroano naio telisu ga, mia najaaro toru ka napano kumituŋa kubokar vatitig kanaku iliano, a maka kuvila lelan siaku napano joa kamiū.

9 Nalo napano ajakisor Siŋaro, aju aba vio takurano ka avitirilar kialo taara, ana nalo ajum̄a aber nalo abe kulo Ju memedu, mia maka tibe na, nalo amila sibi ga na. Mia iorou kanio mia nala nalo nei amei anie yetano ka jaamiū ka avitilubar ka

kiaku jidomiano maka toalo, joa kamiū ga.

10 ““Kiniou neber ka kamiū nua ruei neberinavo monoka kuvitu sikili vija jidomiano na tebievi tulaka, naruei nemial jibe kubokar vatitig kanaku iliano nei. Bior vite na naruei, nemijikia neverikar van kamiū never burum̄ara jogvaiano na mia rimei ea yetemeriba nei, ka rilavon nalo napano ajaio, ana mia kiniou notokovio batitig ka kamiū kanio, mia vite na naio maka rijikia tokol kamiū.”

11 ““Vesious re, kiniou nemei ka kamiū bereio. Venia napano kumituŋa kumitutua mugaruei, monoka kuvokar sikili rivu-oa ka kiniou nomaluvo, ana mia kamiū kumijikia kuvijev kenemiū ijaiano, mia maka toro dolu rijikia rivarlar kenemiū batubatu niogo den parimiu. 12 Toro napano jovulu jukujukuano nonovio riva rivokar bogo na nemei, mia novuru naio rimei tibe m̄arte na toru tai joomo ea yimo lu na Atua kiano, mia toro nene to joomo ea toboto. Mia netekar sio nalo napano mia netiri eaio, tibe sio na kiado Atua kiano, bija bija sio na kiano komeli na toru, naina Yerusalem̄o novo, napano naio jo batove ea vio mave binimeiden napano kiado Atua kanano, a bija nalo napano, mia nevivitaui siaku vou toa naio bunu.

13 ““Toro napano be tilin-

iene, bo ka naio rijoglubar venia napano Atua kiano Niununo naio jomā berialio ban taara ninio na namoneano nalo.””

Mesi aluo nene, riva rivan lotuano na Leotesia, lotuano napano ba bova ruei, maka sidomial vite tai

14 “Na maaro, jau monoka kovivitauiā mēsi tai riva van nailiano na lotuano na komeli na vio Leotesia, kover tibe nei, koverinavo ‘Iliano napano biedu ban kamiū naio binimei den naio napano naio be parinio ka vite nonovio, napano naio ga mijikia river “Tibe na.” Naio biekouo be riano ea Atua va vokar napano kiano burukija riou, a naio rive tubo ka yetemeriba nonovio napano Atua naio jiio.

15 “Naio berial ka kamiū jibe nei, naio berinavo “Kinioū nemijikia batitig bo kenemiū imāuano nalo, mia nebitilubar ka kenemiū jidomiano nalo ea kinioū maka rimenini laka, a maka rivotunu rivare. Bo laka ka ver jau kosidom komenini, mo jau komenini bo kanio, ŗeli na ver jau kosidom kovitunu, jau monoka kovitunu vatitig rivu, mia naina napano kenemiū iviso beve torogio ga jibe na, bajago na kinioū maka nosidom leleio.

16 Mia bior kamiū naruei kumisidom kumenini, a kumisidom kuvitunu tibe na, kinioū nojo ruei ka novule bulag kamiū den nioku. 17 Kamiū kumitunā kuberinavo kubiobijii saba

novo nalo miroano na be kenemiū, tenene na kamiū be tiniemiū ka kuber maka toro tai napano rijikia sian vite tai van kamiū, bior be kenemiū telabo ruei. Mia makanio, ea kanaku vitiiano naio maka tibe na. Kamiū maka kuvijikia kuvitilubar kamiū, mia kamiū maka ve kenemiū vite novo nalo leleio, kube kulo kurano ga, kube merebono, a niabemiū yauo ga kumitu.

18 ““Mo kinioū neber ka kamiū, ka bo ka kumei bereio ea kinioū, kumei kuvar niogo nei napano sebi jijenkon niamiamo nene ruei, ka kumijikia kuvakar vite novo tai ea jumemiū. Bo ka kumei kuvar kulumārauo na miuvu bo, ka kuvisalvoko kamiū, ka mia kuvimou re bunu, a bo kumei kuvar vaŋesi na kuvia ea miremiū, a na mia kumijikia kuvial vite bereio.

19 ““Toro kei napano tinieku jii naio, monoka neil vanio ka nala kanano meuliano rimemedu, tibe na, kuvidu kiaku iliano nei rivu, ka mia kuvilig kamiū. 20 Kamiū kuviniagago vatitig rivu! Kinioū nejikili noju neminia tavo na kanamo meuliano. Jau napano kojog jooku bio, kovetavo ka kinioū, mia nemei joomo ka kito ve juo rotukunu, kito ve juo rosinan vio takurano.

21 ““Naio napano ju jikili ba jovulu na bova, mia najamo ka naio rijikia totano biju vija kinioū ea jobaro lu na kanaku, javukia ga

napano kiniou bunu nojuvulu kanaku uolu, a na iorou kanio karamaku buru kiniou nojotano biju bija naio ea jobaro lu na kanano.

22 ““Toro napano be tilinene, bo ka naio rijoglubar venia napano Niununo na Atua kanano naio jo berial ban taara na namoneano nalo.””

4

Vio mave na Atua kanano ea tiniabene

¹ Iorou ka napano kiniou nemial vite nalo nei, nemial bereio m̄aratavo tai ka ava joomo ea vio mave naio juvavo jo ea miraku. Ana nomijog bereio jooa na mil ban kiniou beamu, naio mil burutomoruo javukia pasimeduo, ana naio ber ka kiniou, berinavo “Jau komei mave nei beamu vo, mia kiniou nelaso keial vite nalo napano mia amaluvo iorou.”

² Naio ber jibe nei, ana vaarakurano ga, nomijog jibe ka Atua niununo midular niunuku, naio midu kiniou nojo mave tiniabene, naruei nejerarago ban ea burum̄ara jobaro lu tai napano jokamu ka miraku, napano toro na toru tai naio jotano eaio. ³ Nemial naio jibe ka napano naio merera, naio bar yovovuano na veru maraiu nalo, a kanano yulu nene jeliviv eaio javukia subovivi tai.

⁴ Burum̄ara jobaro lu nei naio jo iviso, a jobaro dolu nalo bunu ajelivivi eaio,

nobulukulo bokar duelimo valuo ba veri [24]. Ea nalo abeve terakurano, toro tai jotano ealo, mila nalo bunu abe duelimo valuo ba veri [24], napano nalo na abe navagadeano nalo na tiniabene. Nalo na amiya kulum̄arauo na miuvu laka, abar batubatu niogo jua pariparilo. ⁵ Nojo nejiraravo jibe na, nomiilo bunu ka napano vijaniano naio miyotuba iviso ea vio lu nei, bija bunu burum̄ara uetubaiano na tubaalo naio jom̄a jara. Kamu ea mirano, yulu aluo amiuvu, napano nalo abe Atua kanano niununo aluo nene, ⁶ a nalo ajumolu aju ea vodobi tai, banbano laka jibe tei, naio mieg meravo bo javukia mermerobi.

Ana iviso ka vio nene bereio, tom meul veri aju, napano ea kamu kalo a iorou kalo, abe miralo nalo vio bujo laka, a nalo aju vaataro, aju jeliviv ea burum̄ara jobaro lu.

⁷ Toro meul na jukamu nene naio javukia laeon, tinene naio javukia bue m̄arauo buruolu, tolu nene naio bar kulorinio mirano ga, mo nana maariano naio javukia bebekumo. ⁸ Nalo abiniu, be sibialo ari, napano miralo jovukoio vatitig bo sibialo bunu, ba bokar yetano kalo.

Nalo nei kanalo im̄auano, legiano bogiano, maka ajilimebi bogo tai, ajum̄a aberial dam̄ariga jibe nei aber,

“Atua na moroano na mave, naio jo beamu, naio jo vonganei, naio mia to toboto. Naio be lu mia be lu, naio be lu laka.”

⁹ Ea iliano nalo na jibe na, nalo aju amidular naio siano napano naio jotano iviso kalo ea vio lu, aju abatove kanio, ajumña aber siva banio ka napano naio meul toboto. Bogo napano ajumña aberenio, ¹⁰ navagadeano nalo bunu abatove kanio, amilotu ka naio napano mia naio maka rijikia rimaro bogo tai. Ana kario, abar bulag kanalo batubatu niogo nalo den pariparilo, abar jutano ea jaano, aberinavo

¹¹ “Tubo kenememi Atua, memedu ka mermerano, vatoveano vija moroano nonovio aje vanso, ve kanamo jau ve takurano ga.

Jau naruei kojii vite nonovio, ea kanamo jidomiano ga abokar kanalo meuliano.”

5

Niosi napano amijukuio, bija nunu na telisu, napano naljuo aju tiniabene

¹ Karina kiniou nemial bereio toro na toru nanua jotano mave ea vio lu, ka napano midukar vite tai ka jumano meruo, naio be niosi tai, napano abivitauia tivelinio be juo karina amijukuio, karina abukario bija sano vukariano aluo nene.

² Naruei nomijog nailiano na toru tai miaga jouo, naio bika ber “Toro kei naio bare

ka rilakorov vukariano nalo nei? Be toro tai napano naio jo mijikia vetavo ea niosi nei þeli na makanio?”

³ Naio to tibena vano, vedeio, maka ve toro tai na tiniabene þeli na yetemeriba, þeli na yetano ka yetemeriba, napano naio mijikia rivetavo ea niosi nei, maka tai napano rivare ka sirarago joomo eaio. ⁴ Nemial jibena naruei nomijog bova, nejegi mia nejegi, napano maka toro tai rijikia rila.

⁵ Naruei navagadeano nalo tai mil ban kiniou, naio berinavo “Ei, jau keteg re bunu! Koialio, laeon yako napano miyotuba ka tomu nalo na Yuta, naina napano abio ka yati na Teviti, naio jovul vite nonovio ruei. Naio naruei mia rilakorov vukariano aluo nei, naio naruei mia rivetavo ea niosi neibano.”

⁶ Naruei nejirarago bano, mia maka rive laeon, mia nemial kiritete solbouo na nunu tai jumolu jikili ju iviso ka toro meul veri bija navagadeano nalo, kamu ea vio lu nei. Naio be nunu na telisu ga, mia kiano pasimedu aluo na jikili, bija mirano aluo ajua parinio. Naio jikili ju jibe na, naio jibe ka amila sida ka naio ruei, mia naio meul bo ga jo.

⁷ Ana naio miel binimej, midular niosi nei den toro na toru nei jumano meruo, napano naio jotano mave ea burumara jobaro lu. ⁸ Naio midu ruei, ana toro meul

veri nei bija navagadeano
 duelimo valuo ba veri [24]
 amijoru ea jaano. Nalo
 be kialo nioragrago nalo
 janealo a be kialo baju
 niogo nalo, napano abujo
 magmago ka m̃aatei napano
 ajonio, mia bonoti tanunu
 nene napano jo bavin, naio
 be volkouano nalo na na-
 moneano lu nalo kanalo.
 9-10 Mo nalo amijev iouano
 vou tai napano ban jibe nei,
 berinavo

“Amila sida kaso,
 naruei ea kanamo burukija
 jau kobulu bulag tomu
 nalo abe Atua kanano,
 napano amoluo ea taara
 nonovio na tomu nalo,
 ea iliano doldolu nalo
 nonovio,
 ea uleule nonovio nalo
 na tortoru,
 a ea uleule na tertelisu
 nalo bunu.

Jau komiasosol lo abinimei
 abe taara takurano
 ajutano ka parinio
 tubo takurano ga,
 nalo abinimei abe kulo
 lu na Atua kanano
 iṃauano, ka napano
 mia ave tubo ka yete-
 meriba nei.

Mo bior ka napano jau
 komila jibe na,
 memedu ka jau ga ve
 takurano naruei kodu
 niosi nei, ka kelelar
 vukariano nalo nene,
 ana kovetavo eaio.”

¹¹ Nojo nejirarago jibe na
 ana nomijog nailiano nalo
 amiou, nalo miroano mia
 miroano mia miroano, nalo
 jovulu taam̃aka [1,000,000]

bano na jibe na. Aju aje-
 liviviko jobaro lu bija tomu
 na ameul bija navagadeano
 nalo nei, ¹² ana aju amiou
 jouo, aber jibe nei, aberi-
 navo

“Nunu domudomu, napano
 amila sida ka naio,
 naio ga takurano bo mia
 bo.

Moroano nonovio, tovuiano
 nonovio,
 masouano nonovio, sik-
 iliano nonovio,
 vameneano nonovio,
 mermerano nonovio,
 miaiano nonovio,
 memedu ga ka ala rivan naio
 ga ve takurano.”

¹³ Iorou ka nina, nomi-
 jog bereio ka napano temeul
 nalo nonovio bunu amiou,
 nina be temeul nalo na-
 pano aju mave ea tiniabene,
 bija nalo napano ajua yete-
 meriba, þeli ea borotano,
 þeli ea tei, kanalo iouano
 naio ber jibe nei, berinavo

“Miaiano, vameneano,
 mermerano bija
 moroano riva van
 Toro na Toru napano
 jotano mave ea jobaro
 lu, bija bunu nunu
 solbouo, rivan rivano-
 o to tobo to.”

¹⁴ Ana tom meul veri
 nei aberial “jibe na, mm”
 kar iliano nalo nei, ana
 navagadeano nalo amijoru,
 aminie, amilotu kalo abe juo.

6

*Vukariano aluo na niosi
 napano amijuku*

Vukariano na beamu: Toro na toru na bajago na mila mira, napano naio midu bue kulorinio na miuyu

¹ Kiniou nojo najirarago bano, ana nemial ka napano kirikiti nunu naio milakorov vukariano na be moti na niosi nei. Naio mila kario ana temeul veri nei nalo tai naio miaga ka joono jibe ka tubaalo, naio berinavo “Komei!”

² Vaarakurano ga bue kulorinio tai napano miuvu jikili jua miraku. Ana nemial toro tai jotano mave eaio, naio midu viu, ana nalo amidu parinio tubo kanano batubatu joa parinio, ana naio midu kanano bue kulorinio nene, jikiti batavio javukia toro na mira tai ban ka tovulu kanano uolu nalo.

Vukariano juo nene: Toro na toru na bajago na toro muebin toro, napano naio midu bue kulorinio na bilvili

³ Karina, nunu solbouo milakorov vukariano juo nene. Naio mila kario naruei nomijog temeul juo nene naio bio, naio bunu berenio berinavo “Komei!”

⁴ Vaarakurano ga bue kulorinio dolu tai binimei, napano naio bilvili. Toro napano joaio, amijamo ka ban naio ka riva ridular tumaro napano jo yetemeriba nei, ka mia tomu nalo atumã auebinvinlo amãrmãro. A amidu burumãara iobogu na mira joa jumãano, naruei naio bunu batavio bano.

Vukariano tolu nene: Toro na toru na bajago na vitu ea yetemeriba nei,

napano naio midu bue kulorinio na bobogio

⁵ Karina, nunu solbouo naio mila korov vukariano tolu nene. Naio mila kario ana nomijog temeul tolu nene naio bio, naio bunu berenio berinavo “Komei!”

Vaarakurano ga bue kulorinio dolu tai jumolu jua miraku, naio bobogio. Toro napano naio miduio, midukar skel tai ka jumãano, ka naio rivitii tomu nalo na yetemeriba nei salo sinaniano nalo.

⁶ Ana nomijog iliano tai maluvo iviso kean temeul veri [4] nei, naio berinavo “Jau kavano, amijamo ka banso ka jau komijikia kala ka mia vitu toa vio nonovio, ka napano mia monoka avulu ve burumãara veru ve toru mia sinaniano ve telisu ga. Mia maka kejikia kalalelan burupati buruolivi napano mãa amimãuka titikivaka ea mãarati nene, a maka kejikia kalalelan burupati telikrevi napano amimãuka mãarjumẽlmẽlu eaio.” Nalo aber jibe na, ana naio bunu jikiti bano.

Vukariano veri nene: Toro na toru na bajago na mãariano, napano naio midu bue kulorinio napano niabene be yevei

⁷ Bisi na, nunu solbouo naio mila korov vukariano veri nene. Naio mila kario ana nomijog temeul veri nene naio bio, naio bunu berenio berinavo “Komei!”

⁸ Vaarakurano ga nomial bue kulorinio tai napano ni-abene be yeve, jikili joa miraku. Toro na miduio, ajisia ka sio na Mariano, mia naio, kanano bilbilu tai naio jo miel bija naio, napano siano, abio ka Bulukuti Sebi. Ana naljuo nei, amijamo ka amijikia ala rivoa van tomu ve miroano ea yetemeriba nei, ea iobogu na mira, ŋeli ea vitu, ŋeli ea mieiano, ŋeli ea temeul nalo. Jibe ka, ver tomu veri ajua yetemeriba nei, tolu nene amijikia atu rivu ga, mia veri nene kalo, nalo amijikia ala naio rijikia tibe na.

Vukariano jimo nene: Namoneano nalo na mā abiekouo batitig bo ba amuebinvinlo amarmaro

⁹ Karina, nunu solbouo naio mila korov vukariano jimo nene. Naio mila kario naruei nemial boda, bija niununo miroano na tomu nalo amivon ea burupati nene. Naina be nalo napano mā amuebinvinlo bior napano aju jikili ka ajogkar Atua kanano iliano, a aju jikili ka mā aberial ka nalo amonea Yesu. ¹⁰ Nalo nene, nemial aju ajegi ban Atua ka burunara jooa, aberinavo “Aue Tubo na vite nonovio, jau kobe lu a jau kobe riano, aioo jau kovitilubar kenememi burukija nei. Nagi ana mia jau kala mirano van tomu na bova nei nanua mā amila bova jibe nei?” ¹¹ Nalo aber jibe

nei, ana ajian kulukoti na miuvu banlo ka ayaio, ana mia aber kalo ka vite nei napano abikanio naio maka vo. Nalo aberinavo atu kija ve telisu beamu vo, bior kanalo bilbilu tealo napano nalo aju kia vo, bija bunu kurualo a kuvivinielo dolu nalo, napano mia nalo bunu monoka auebinvinlo amarmaro bior napano amonea, ana ver bogo na amei ve miroano avare ka Atua kiano jidomiano, mia naio rila venia napano abikanio.

Vukariano ari nene: Legiano na maaro

¹² Naruei, kiniou nemial ka nunu solbouo naio milakorov vukariano ari nene. Naio mila kario, ana vaarakurano ga māi mikulkulu, a maka vesiou mrenio binimei bobogio napano bobogio nonovio, a siberio naio binimei bilvili jibe burukija, ¹³ a marvitano nalo napano aju mave buluniogovu ajibirbili abatove ea borotano, javukia ga mariesi nalo na buruiesi tai na meruo, bogo na burunara jegi mikulkulu ka jaati nene. ¹⁴ Karina, amila bulunio-govu javukia yebe napano amijukuio amidu bano, a burusuku nonovio a uleule nonovio ajaraluvo den jelelo.

¹⁵ Ana bogo na tomu nalo amial vite nalo nei, amerou toru mia amerou toru. Parinio tubo na yetemeriba, tomu na tortoru, tomu na ajukamu ka tomu na mira

nalo, sanibaiano nalo, tomu na ŕirilo jikili, naliko bunu kialo tomu na imauano nalo, naliko kulo dolu nalo reraio, nalo abiniu abijauia buluvae nalo, aban ka vio nalo na mave ea suku napano mia ala vio sikili ka atuluku eaio. ¹⁶ Bogo na abokar vio nalo nene, mia miroano jo binimeĩ toru lie, ana nalo abio ban puruveru bija suku nalo, aberinavo “Aio-o, kamiũ kuvijoru kuvisovko vatitig kumemi, ka siraragiano na naio napano jotano mave ea vio lu naio rijikia re rivokar kumemi, a ka nunu solbouo kiano siniabu naio rijikia re rila lelan kumemi. ¹⁷ Legiano toru nei na naljuo kanalo siniabuiano binimeĩ ruei, a kei naio mijikia tumolu rimeul ka bogo na? Makanio, vonganei mia naio riyova laka van kito roviniiu.”

7

Atua naio bijauia burumara taara na tomu nalo tai na abe kanano

¹ Iorou ka vite nalo nei, nemial ka napano nailiano veri ajumolu ajua sudu veri na yetemeriba, aju ajukovio ka jegi veri napano mĩa ajumĩa amiuvuvu ea yetemeriba, ka rila na jegi nalo nei ajikia re bunu aiuvuvu ea tei, ŕeli ea borotano, ŕeli na mave ea buruiesi. ² Karina, nemial nailiano dolu bereio, naio binimeĩ bija tena aue tovo napano Atua na meul

kanano ea kiano tomu nalo, mia naio jaluvo ea tivelinio na jegi uro binimeĩ. Naio mijikia ka nailiano nalo veri nei, nalo abar moroano ka amijikia ala lelan borotano a amijikia ala lelan tei bunu, ana naio bio mĩele banlo, berburelo ka ala re bunu titai. ³ Naio ber jibe nei, naio berinavo “Ee to, kamiũ kuvila bulag re tei ŕeli borotano ŕeli buruiesi nalo, rivan riva rivokar bogo napano rodu tovo tai toa ea meriniano tomu na memedu nalo napano abe kiado Atua kanano.”

⁴⁻⁸ Ka bogo nei naruei nejikar nomijog ka napano aberial memedu kanalo mirano napano ajekarlo. Nalo na amoluo ea yati duelimo ba juo [12] na Israel, nalo abe yati nalo napano mĩa abar korobilo nalo sialo, naina be Yuta, Rupen, Gat, Asa, Naptali, Manase, Simion, Livai, Isaka, Sepiulan, Yoseve, a Beniamen. Naruei ea yati nalo nei abiniu, tai bokar tomu nalo menu duelimo ba juo [12,000] amoluo ea naio, mila na nalo abiniu abokar menu toromomou duelimo va veri ba veri [144,000].

Burumara tiniobi dolu napano amiya kulumarauo na miuvu

⁹ Ana iorou kanio, nejiraravo ba naruei kamu ka miraku be burumara tiniobi na tomu nalo, napano nalo miroano mia miroano, maka ajikia avulukulo, napano nalo na amiyotuba

ea yati dolu nalo. Nalo naruei abe tomu na buru-venuo dolu nalo, bija kialo iliano kinkin nalo, naruei abinimei ajumolu ajukamu ea burumŝara jobaro lu, napano nunu solbouo naio joaio. Nalo amiya kulumŝarauo novo na miuvu abiniu, a abar mŝati burumŝal,¹⁰ ana aju abio toru, aberinavo

“Kiado Atua jotano ea kiano jobaro lu,

naio ga, bija nunu solbouo,

naljuo abe burupati na ioruriano na kanado.”

¹¹ Ana bija nalo na, nailiano nalo bunu ajumolu aju jeliviv ea jobaro lu, ana amijil bunu navagadeano nalo bija temeul veri, ana nalo bunu aminie abamenea kamu ka jobaro lu, amilotu ka Atua,¹² aberinavo

“Nao, be riano!

Ilivuiano nonovio, a mi-amoiano, a masouano, a sivaiano, a vame-
neano, a sikiliano, a moroano,

nalo nonovio abe kanado Atua kanano naio takurano ga,
mia tibe na toboto.

Ilivuiano ban Atua!”

¹³ Ana ka bogo na, navagadeano tai naio bika den kinio, berinavo “Borumŝara tiniobi nei napano amiya tena miuvu na, a jau komijikia abe kei nalo na, a jau komijikia ka nalo aju be abinimei na?”

¹⁴ Ana kinio, neberinavo “Ii, maka nejikia, mia jau

kobe toro na toru tai na vio nei, ŝeli jau komijikia kovio?”

Ana naio berdoŝe beri-
navo “Ierinio, nalo na naruei napano amieldulu ea bogo na burumŝara jogvaiano nene. Mia kulumŝarauo nalo na mŝa amiya na, ajekon ka burukija na nunu solbouo nei, naruei abinimei amiuvu bo jibe ka na komialio na.¹⁵ Nalo naruei, kialo inŝauano jibe nei, ber

“Nalo ajukamu ea jobaro lu na Atua kanano,

legiano a bogiano ana aminŝau kanano joomo ea kunuano lu, a naio napano jotano mave nei, naio mia rivitikarlo.

¹⁶ Mia maka bunu ajikia siserlo bereio,

a mia ajog re midou bereio, mŝerenio maka rijikia rila bulaglo,

burumŝara sebi mia tunu re bunu lo,

¹⁷ bior nunu solbouo napano naio jo iviso ea vio lu nene mave,

mia naio rivaganlo,

rivuru mŝarabo kalo avan ea burupati uei na meu-
liano,

ana mia Atua naio ri-
olkon nono jogumi-
ralo den miralo.”

8

Vukariano aluo nene: Vio be tumŝaro nonovio

¹ Iorou ka naina, nemial ka napano nunu solbouo mila korov vukariano aluo nene. Naio mila kario, ana

vaarakurano ga vite nonovio na tiniabene maka bunu rila malioano tai, vio nonovio melumu bo jibe na banbano bokar aura togio.

Simeduo aluo nalo

² Maka vesiou ga, nemial nailiano aluo napano nalo ajumña ajumolu kamu ea Atua mirano ka ala kanano imauano, a ajian simeduo aluo banlo, abar janealo.

Basidobidobi na m̃aatei napano amim̃aukanio ea niogo

³ Ana iorou kanio, ana nailiano dolu tai naio binimeĩ. Naio midu basidobidobi na m̃aatei, napano amim̃aukanio ea niogo, a bar binimeĩ ju kean boda, napano naio bunu amim̃aukanio ea niogo, a napano naio jokamu ea jobaro lu. Naruei abar m̃aatei miroano banio ka risebilo ea boda ka rila bonotanunu rivu, a nalo ajian bunu volkouano na namoneano lu nalo kialo banio, ka rivar tumave ea boda tibe ka ijaiano tai. ⁴ Mia bogo napano sebi jo jijen m̃aatei nene, bonoti nene bija volkouano nalo na kulo lu kanalo, ajaraluvo den nailiano jum̃ano, aba abokar vio mave ea Atua mirano.

⁵ Karina, nailiano nene bar vovosebi tealo napano jua boda, mison ba joomo ea basidobidobi na m̃aatei nei, ana naio buku ba tove yetemeriba. Ana bogo na vite nei jokol yetemeriba,

naio mila napano tubaalo jaara janea vio nonovio nalo, bija utubaiano javukia bulukusebi bija vio bijaano, a m̃ii mikulkulu bunu.

Simeduo na beamu miolu: Yuo bija burukija

⁶ Ana nailiano aluo napano abar simeduo aluo nei, amila batitiglo ka aiuvlo.

⁷ Nailiano na beamu naio miuvu kanano simeduo, naruei mila na yuo napano jikili jibe kurukuveru, bija burukija napano miaja jibe ka sebi, abinimeĩ amue vio reraio ea yetemeriba. Amila vio jibe na ban bano-o sebi jijen yetemeriba tivelinio, bija sano buruiesi nene nalo, bija bunu vite nonovio napano m̃a aju amiluo eaio.

Simeduo juo nene miolu: Burusuku na sebi

⁸ Ana iorou kanio nailiano juo naio miuvu kiano sime-duo. Nina mila napano burum̃ara kenieno burusuku tai, napano sebi jo moluo eaio, abuku batove ea tei. Naio mijuba tei jibe na, ana tei togio binimeĩ jibe ka burukija, ⁹ ana sano temeul nalo am̃arm̃aro, a uako nalo na m̃a ajum̃a aburo ea burum̃ara vio reraio nei, nalo amadudu.

Simeduo tolu nene miolu: Marvitano napano jom̃a buro ea vio yauo

¹⁰ Karina, nailiano tolu nene miuvu kiano simeduo. Naio ga mila napano burum̃ara m̃arvitano tai, napano sebi jom̃a bovago eaio

merera javukia yulu, naio moluo den vio yauo, naio buro binimej bokar yetemeriba. Ana kanano sebi ba jokol uei nalo napano amieraro a burupati na uei nalo. ¹¹ Marvitano nene, siano abio ka Uei Mijea, naruei naio mila ana uei na vio nonovio abinimej amijea, ana tomu nalo maka ajikia amunio, mia midou jerlo banbano ba aŝarmaro.

Simeduo veri nene miolu: Melijokouo

¹² Bisi na, nailiano veri nene naio miuvu kiano simeduo. Naina mila ana mŝerenio tivelinio binimej bobogio, a siberio tivelinio maka bunu rimiamo, a mŝarvitano nalo miroano maka bunu aialo. Naina mila ana legiano binimej bulati laka, a maka vio rimiamo bunu, mila ana be melijokouo reraio ea yetemeriba.

¹³ Nojoŝa neŝjaravo bano, ana nemial bebekumo tai joŝa mier mave, naio jo miaga janea vio, berinavo "Vio bova ruei, mia kuluniabene kia ga navo. Nailiano tolu aju kia, ana kanalo simeduo nalo ajikili laka. Kamiu na yetemeriba, kamiu kuvitikar, buruŝara jogvaiano naio jo maluvo!"

9

Simeduo jimo nene miolu: Bulukuŝili na batove laka, na be moti ka jogvaiano na jikili na ve varolu

¹ Bisi na, nailiano jimo naio miuvu kiano simeduo.

Naina mila ana mŝarvitano dolu tai moluo ea vio yauo naio bijulu batove ea yetemeriba. Marvitano nene amidu vulariano tai banio, naina be vulariano na rivetavo ea bulukuŝili napano ba bokar sebi yetano. ² Bogo napano naio mijaglar sikmirano bulukuŝili nei, iou juru bavin jo molmoluo eaio, javukia iou na buruŝara sebi, naruei naio bavin miduko vio reraio ea vio yauo, miduko mŝerenio mirano, mila vio bobogio bereio. ³ Mia bogo na iou jo miduko vio jibe na, surubu nalo amolmoluo den iou aba tove ea borotano, mia maka bunu ave surubu, mia abinimej ajibe buruolu nalo na tortoru. ⁴ Aberburelo ka atokol re buruŝi nalo ŝeli na sinaniano ŝeli na vite nalo napano ajuŝa amiluo ea yetemeriba, mia amijamo kalo ka amijikia ala lelan tomu nalo na yetemeriba napano maka avar tovo ea mamerinalo napano Atua midu joa kanano tomu na memedu nalo. ⁵ Mo buruolu nalo nei, maka ajamo kalo ka ajikia auebinvin tomu aŝarmaro, mia amijamo kalo ga ka amijikia aikitkitilo rivanvano-o rivokar siberio ve jimo. Ana bogo napano mia atuŝa ala tibe na rivanvano, tomu nalo ajog niabele nalo ajalele reraio. ⁶ Ka bogo na, ve telabo averinavo bo ka aŝarmaro ga, mia amijikia asiravo mŝarabo na aŝarmaro eaio,

mia m̄ariano naio maka sidomlo, mia tuvanlo atu tibe na ga.

⁷ Ana surubu nalo nei, bogo na nebiti batitiglo, nalo ajavukia bue kulorinio napano tomu na mira nalo m̄a abarlo. Amiyako pariparilo bija batubatu na abieko ka niogo, ana bogo napano nebiti vatitig miralo, nemiilo ka napano ajibe ka toro ga.

⁸ Mia vijulo aburon javukia tira vijinio, mia m̄arjuvolo javukia kuli kialo parinio tubo m̄arjuvono memedu.

⁹ Amilako baerelo ka butoto, a bogo na m̄a amier janea vio, sibialo nalo amalmalio, ajavukia bue kulorinio nalo napano aburu rukuruku aburo aban ka ala mira.

¹⁰ Mia surubu nalo nei be bulajielo joalo, bija vite na be niononoti ka m̄a julu tomu nalo joaio, napano mia amijikia atulu kulorinio kanio riva rivokar siberio ve jimo. ¹¹ Nalo abe kanalo parinio tubo tai, naina be nailiano tai, mia maka ve Atua kanano nailiano, mia be nailiano napano naio bitikar m̄aratavo na bulukusebi. Toro nene siano jel ea Ipru, abio ka Abatono, a ea Krik, abio ka Apolion, napano sio juo nei nioti nene be toro na mila bulag saba.

¹² Naina naruei surubu nene nalo, napano naio be moti ea jogvaiano tolu na jikili nei. Mia nemial ka napano naio ba bar laka ruei, juo nene ju kiano vo.

*Simeduo ari nene miolu:
Naio be nailiano na m̄a mue*

tomu, napano naio be juo nene ea jogvaiano tolu na jikili

¹³ Bisi na, nailiano ari naio miuvu kiano simeduo, ana nomijog iliano tai maluvo ea sudu veri na boda lu napano amim̄aukanio ea niogo napano naio joa vio lu ea Atua mirano. ¹⁴ Iliano nene mil ban nailiano nei, ber jibe nei berinavo "Nailiano veri nalo napano aju amior vatitig nalo ajua vio na uei napano mieraro napano abio ka Yuvretis, vonganei naruei be bogo na jau kova kotuvanlo avava tavio bereio."

¹⁵ Nailiano nalo nei, nalo abokar vatitig nalo jibe na ba bokar aura nene memedu ea legiano nene memedu ea siberio nene memedu napano amijikia ataluvo bereio ka ava ala kanalo im̄auano nalo. Ana nailiano dolu naio ba juvanlo, mila na ajaluvo, aban janea buruvenuo nalo ka amue tomu nalo vaataro ka rivokar tomu na yetemeriba togio.

¹⁶ Nalo aban bija kanalo tomu na mira nalo napano abar kanalo bue kulorinio na mira, ana nomijog napano aberial kanalo mirano bokario taam̄aka toromomou juo [200,000,000].

¹⁷ Ana bogo napano nebitii bue kulorinio nalo nei bija tomu napano m̄a ajutano mave ealo, nemial napano butoto vite na amidu joko baerelo, amiyovovua bo abilvili javukia sebi, abe si javukia buluniogovu, a amijealea javukia m̄erenio.

10

Kanalo bue kulorinio nalo abe dolu, napano pariparilo bar kuli kialo parinio tubo, mia bogo napano aburu jegi nemial be sebi a iou a vijinio bulusebi amiyotuba ea niolo. ¹⁸ Vite tolu nei naruei, sebi a iou a vijinio bulusebi, amila na vaataro ka tomu nalo na yetemeriba togio rivakovio ka bogo na. ¹⁹ Moroano na bue kulorinio nalo nei ajoa venia napano miyotuba ea niolo, a ajoa bulajielo bunu, bior bulajielo mijukonkon jibe ka m̃aro, a javukia parinio m̃aro joa juluvati jielo napano naio jian burum̃ara jaleleano ban tomu nalo.

²⁰ Jogvaiano nalo nei ajikili laka jibe na, mia tomu nalo togio toru, nina nalo napano m̃a ameul kiano vo, maka asidomialio. Maka lele aviliglo ka kialo im̃auano va nalo napano jum̃alo ga jo mim̃aukanio, mia aju ajidel dolu ga ka amilotu ka sim̃aro nalo, a ajum̃a abolkouo ka tavoru nalo na kanalo atua nalo, napano maka ajikia asirarago, napano maka ajikia ajoglubar vite, napano maka ajikia aiel, napano toro ga mim̃au kalo ea niogo þeli ea veru na miuvu þeli ea butoto þeli ea puruveru þeli ea iesi. ²¹ A bija nina, maka aviliglo leleio ka kialo bajago na m̃a amuebinvin toro, þeli semei nalo, þeli amijuku bova ka tira, þeli kialo vinauano nalo, na m̃a aju amila.

Nailiano tai midu niosi telisu napano m̃a amijuku batove

¹ Karina nemial ka napano nailiano dolu tai na be þirinio juvan vio mave batove. Naio miya melijo jibe ka napano kanano kulum̃arauo, a sibovivi tai jeli-viv ea parinio, bija mirano na naio jibe ka m̃erenio, a jaano be juo ajavukia burum̃ara m̃arteia mia abe sebi. ² Mo nemial ka napano naio midukar niosi na telisu tai, napano naio bisi dea kamu kanio ea jum̃ano nalo. Ana naio midu jaano meruo biekar ka tei, mo jaano mali naio biekar ka borotano. ³ Naio jumolu jibe na ju, naruei naio juvan burum̃ara iagaiano tai napano naio jibe ka laeon, mia bogo na naio mila, tubaalo nalo amiolu meran binimeia, amil ban naio ea kanalo saburuburiano nalo. ⁴ Bogo napano tubaalo nalo ajaraburuburu jibe na, ana nojidom nevivitauiia bulag kanalo iliano nalo, naruei vaataro ka kiniou netikar nala, ana iliano dolu tai juvan vio mave binimeia ea kiniou, naio berinavo "Jau kotovo, jau kovivitauiia bulag re kanalo iliano nalo na. Vite nalo napano m̃a aju aberenio, nalo maka ave tena tomu nalo amijikia ajikia."

⁵ Iliano nalo na jibe nei, mia nailiano nei nua nemial naio biekar tei a borotano, naio jian jum̃ano meruo bavin mave. ⁶ Ana naio ber

kanano iliano na jikili tai, naio berkar ea naio napano meul jo jobo jo siano, napano m̃a naio jii vio mave bija venia na m̃a ajuaio, bija yetemeriba nei bija venia na m̃a ajuaio, bija tei, bija venia na m̃a ajuaio. Iliano na kanano naio ban jibe nei, naio berinavo “Vonganei naruei maka bunu ve bogo na kotororea! ⁷ Vaataro ka bogo na nailiano aluo nene rimei riuvu kiano simeĉuo, mia ver naio rila bisi, mia Atua kanano jidomiano vinivaiano nalo aviniu ayotuba medave, vite nonovio amalmaluvo tavukia ga napano naio berial beamu ban naveri-aliano nalo nanua m̃a ajum̃a amir̃au kanano.”

⁸ Naio ber jibe na ana kiniou bunu nomijog iliano dolu tai jel mave binimej ban kiniou, naio berinavo “Niosi telisu nei napano betavo joa nailiano nei jum̃ano napano naio jumolu jua tei a borotano, kova kodu beamu.”

⁹ Mia naban vaataro ka nailiano nei, nebika niosi telisu nei denio. Mia naio mijamo ka ga ban kiniou, berinavo “Bo ga, komijikia koduio. Ver koduio, monoka kosenio. Mia nemijikia never kaso ver bogo napano mia kosenio, mia kojog ka se-seiano nene rivu ea niomo, avona bisi, mia jau kojog rijeja ea mabomo.”

¹⁰ Ana kiniou nomidu ne-jenio, mia naio jesei bo ea

nioku. Mia nojiomo dodomu ruei, mia jibe ka ga napano naio berenio, napano vite nene mila maboku bova laka.

¹¹ Karina, iliano binimej ban kiniou vaarakurano bereio, berinavo “Tibe ga na naruei, bior ka napano verialiano dolu jo napano mia monoka kava koverialio bereio, napano aberii taara ŝiliŝili nalo, buruvenuo nalo, tomu na iliano kinkin nalo, a parinio tubo nalo napano m̃a ajua yetemeriba nei.”

11

Tomu juo na amijakar Atua kiano iliano

¹ Ana ea bogo na amidu javiniu tai joa jum̃aku, aber ka mia nava nejeteli ea vio nalo vijaio. Aberinavo “Jau kavan ea Atua kunuano Yimo Lu, kejeteli ea vatitigio burutomoruo nene jum̃abe, a kejeteli ea boda napano m̃a jo joomo eaio, a kovuluku tomu nalo na m̃aaju amilotu ea vio na, abokar vio. ² Mia burum̃ara tanobuku napano jotavio kanio, nina mia kejeteli ea re, bior naio be vio togio na Yimo Lu napano tomu nalo napano maka ave Ju mia nalo aduio. Valauo nalo nei mia amei atovulu burum̃ara komeli lu nene Yerusalemo, mia nalo amei jouro aiel tanea vio nene tibe ka kialo vio, mia nina aim̃aukanio riva vokar siberio ve duelimo va veri ba juo ga [42].

³ Mia bogo na atua vio na, mia tomu juo napano aju jikili ea ilirianiano na kanaku ayotuba. Mia naljuo aya m̃adabake ga tibe ka kialo kulum̃arauo, mia nalo averial kanaku iliano ea tikariano na siberio nalo na riva rivokar juluvati nene, napano legiano nalo nene abokar menu takurano toromomou juo duelimo va ari [1,260].”

⁴ Tom juo nene, iliano lu na Atua kanano beriilo nua ruei, naina napano berii berinavo be burupati buruolivi juo naio ju, p̃eli napano berii be m̃arte na kadel juo, napano abe juo ajumolu aju kamu ka kiado Atua mirano nei napano naio be tubo ka yetemeriba reraio. ⁵ A verenio bogo tai toro tai rilavon ka rila vite na bova tai ka naljuo nei, mia sebi mijikia riyotuba ea niolo, mia rijikia rila niadua kanalo uolu nalo. Naina naruei be m̃arabo na ver toro jidom ruebin naljuo, mia naio ga naruei sen kanano m̃ariano bereio. ⁶ Naljuo nei be kialo burum̃ara moroano, ka napano amijikia averbure vio yauo mave ka mia yuo rivovo re rimonloglog bogo napano ajum̃a aberial Atua kanano iliano, a mia amijikia ala uei nalo amei ve burukija, a amijikia ala ka napano jaleleano kinkin p̃eli bogokouo rime i rila lelan yetemeriba ea bogo na vabe ga napano naljuo ajum̃a ajidom ka alaio.

⁷ Naruei naljuo nei, mia averial Atua kiano iliano riva vokar bogo napano naljuo aim̃au tibe na ribisi. Ana ea bogo na naruei, mia burum̃ara temeul na bova napano naio jotano joomo ea bulukusebi naio riyotuba rime i ka naljuo, a mia kanano moroano tovulu naljuo, ruebinvinlo ave juo. ⁸ Mia avuku saŋo tasiñaro nalo amon ea m̃arabo iviso ea burum̃ara komeli nei napano be komeli nene kia ga vo napano kialo Tubo, naio bunu ajukukakar naio m̃aro ea m̃akolkolo eaio, ea bajago na ililuklukuano, bogo tai aber komeli nei siano abio ka komeli moruo na bova na Sotomo p̃eli vio Ijivi. ⁹ Mokotenalo be juo aju amon tavio jibe na, mia taara na tomu nalo ve miroano, p̃eli na yati nalo, p̃eli ea iliano nalo, p̃eli ea uleule nalo, amei ka aial naljuo, a mia averbure ka mia ativin re naljuo-oa bogoti ve tolu togio. ¹⁰ Mia bogo na m̃a aju abitii mokotenalo be juo banbano na, mia amiyotel ealo toru a abital niegeniegelo. Mia nalo atu asidomii jogvaiano nalo napano naverialiano juo na m̃a aju amila binime i ka tomu nalo na yetemeriba, ana mia nalo asaaro mia asaaro ka napano tomu juo nei am̃arm̃aro ruei, mia ala burum̃ara jokoluolu a mia aje jidomiano vanlo bereio riviorio.

¹¹ Ana iorou ka bogoti tolu

togio nei barlaka kario, mia maka ativinlo ave juo vo ana amiilo ka napano jegi na meuliano tai jaluvo den Atua binimej jokol tasimaro juo nei, mila naljuo ajumolu bereio ajikiliaju. Bogo na tomu nalo amialio, amerou mia amerou, ¹² a maka vesiou, amijog burumara iliano tai jaluvo ea vio mave binimej mil banlo abe juo, naio berinavo "Mo, kam ve juo kumijikia kumei mave naruei." Naruei vaarakurano ga abe juo abavin amiduburevure melijo ba aboru mave, napano kanalo uolu nalo nei ajikiliaju vovu garuei abitivitiilo bano mia maka bunu ajikia aver titai.

¹³ A monloglog bogo na, borotano mikulkulu toru, mila napano komeli tivelinio, yimo nonovio ajibirbili aburu kokorovio naruei, a tomu nalo napano amarmaro ea mii mikulkulu nei abokar menu aluo [7,000]. Nalo na ameulaju bo ga amial vite nei amerou tanea, ana amial aber bo ka ailivu ka Atua na mave rivior kanano burumara moroano nei napano abitilubarario.

¹⁴ Mii mikulkulu nei mila be burumara jogvaiano juo nene naio bar laka ruei, mia tolu nene naio maka vo, naio mia rimej vesiou re.

Simeduo aluo nene miolu: Bogo na tibureiano, napano naio maariano ka jogvaiano tolu na jikirkili

¹⁵ Bisi na, nailiano aluo naio miuyu kanano sime-duo. Nina mila napano joono miroano aber bulavulag burumara iliano nalo na mave, amilivu ka Atua, aber jibe nei

"Vonganei naruei vio nonovio napano beamuaju yetano ka tubo va na yetemeriba nei,aju yetano ka Tubo Atua na kanado, naio bija Naverikariano na kanano.

A mia naio rive Parinio tubo riva rijikia ribisi deio."

¹⁶ A bija nalo, nalo navagadeano duelimo valuo ba veri [24] nene bunu, napano ajumia ajutano ea kanalo jobaro nalo, aminie tano kamu ka Atua mirano, amilotu kanio, ¹⁷ aberinavo

"O Atua Soŝi na moroano na mave, jau nanua kojo beamu, jau na mia koto vonganei, jau napano mia koto bogo na mia jo rimej.

Kumemi nuber siva toru banso bior komidu bereio kanamo moroano na toru ruei, vonganei naruei koju jikili ea kanamo tuboiano.

¹⁸ Beamu, buruvenuo nalo na yetemeriba ajerni kaso, mia vonganei be kanamo bogo na koverial kanamo siniabuvanlo.

Vonganei be bogo napano mia jau kotibure tomu na marioano, a

mia jau kala lelan
tomu nalo nanua m̃a
amila lelan kanamo
yetemeriba nei.

Ana kanamo tomu na
iṃauano nalo, nave-
rialiano nalo, bija
kanamo namoneano
lu nalo, a nalo napano
m̃a aju abatove ka
siamo, mia avar
kanalo ijaiano novo
nalo ea bogo na,
bekurano ka napano
abe tomu na tortoru
þeli abe tomu na
tertelisu ga ea kanamo
iṃauano.”

¹⁹ Ana ea bogo na abetavo
ka Atua kunuano Yimo Lu
na mave ea siraragiano na
tomu nalo kialo, mia amial
basidobidobi lu na tuboiano
lu naio ju. Mo vaarakurano
ga, vio binimeĩ mkekeano
bior Atua kanano moroano
naio jo, napano vio bijiio
bija tubaalo joṃa jaara, vio
malmalio, m̃ii mikulkulu, a
burum̃ara kenieno kurukuti
yuo aes tai mijoru.

12

*Tira tai kirinovo bija bu-
rum̃ara kenieno niobi tai*

¹ Kiniou nojoṃa nebitii
vite nalo na mave kia ga
vo, ana nemial burum̃ara
kijokijo tai napano naio
be tena iloiano. Nina be
tira tai, napano naio midu
m̃erenio, miako ka naio jibe
kanano kulum̃arauo, a naio
jumolu ju mave ea siberio, a
kanano batubatu na parinio,
m̃arvitano duelimo ba juo
[12] juaio. ² Tira nene naio jo

be m̃abono, ana naio mijog
bova jo miaga souo, bior be
kiano bogo ruei, vaatara ka
rivar kenerinio.

³ Nojo nebiti naio kia
ga ana burum̃ara temeul
dolu tai miyotuba mave,
napano be tena merouano
laka. Nina be burum̃ara
kenieno niobi tai, naio bil-
vili, be parinio aluo napano
abar batubatu na parinio
tubo nalo kanalo, tai bar
tai, tai bar tai, be bunu
salo pasimeduo jua paripar-
ilo nalo nene, biniu be du-
elimo [10]. ⁴ Mia vaaraku-
rano ga tenei þilig jieno
mikulkulu jibe na, muebu-
lag m̃arvitano miroano ea
vio yauo, buku lo aban ea
vio nonovio na yetemeriba.
Ana tena bova neibano naio
binimeĩ ju kamu ka tira
nei mirano, kiano jidomi-
ano jororea ruei ka ver tira
neibano naio rivar kener-
inio, mia vaarakurano ga
naio serbin senio.

⁵ Naio jo jibe na bano na
tira neibano naio bar kener-
inio, bar be sum̃ano. Ana
Atua naio jidom ka kiritete
nei rimeĩ ve parinio tubo
na rivokar butoto ka jum̃ano
ka rive tubo ka tomu nalo
na yetemeriba, ana bogo na-
pano temeul na kirivova nei
naio maka rivokar kiritete
nei vo, mia amidular den
vaarakurano garuei, amidu
bavin ban Atua mave ea
burum̃ara kanano jobaro.

⁶ Mia tira nei naio merou,
naio buro ba joluku ea vio
yauo, ea vio tai napano Atua
mila batitig be kanano, mia

ba juluku ea vio nene, ajirag naio ka bogoti telabo, bokar menu takurano toromomou juo duelimo va ari [1,260].

⁷ Mia ka bogo na, be burumñara mira tai maluvo ea vio mave. Parinio nailiano napano Maekel bija kiano nailiano nalo, amila mira kean burumñara kenieno niobi napano, mia naio bunu naliko kiano nailiano nalo amila mira jikili bunu keanlo. ⁸ Nalo amila mira jibe na bano-o, bokar bogo na niobi nei kanano moroano batove, naruei naio naliko kiano nailiano nalo ajibirbili abatove. Naruei amila bulaglo laka, amije vironiano banlo, abar bulag jelelo na ea vio mave denlo. ⁹ Mo burumñara kenieno niobi nei, abukulario den vio mave vaarakurano, naio batove ea yetemeriba, naio bija kanano nailiano nalo nei.

Naruei ea bogo na mia kinjou nebitilubar ka burumñara kenieno niobi nene naina ga napano beamu nuanua laka naio midu maro mirano, naio be toro na mñ napano abio ka Simñaro, þeli Setano, napano vonganei ea kiado bogo, naio kia ga navo, naio jomña buru yetemeriba reraio ba milaluvu mñarabo julaka.

¹⁰ Mia iorou, nomijog burumñara jooa tai bio toru janea vio mave, naio berinavo

“Vonganei naruei Atua kiano ioruriano naio jumolu,

Atua kiano sikiliano naio jodovulio,

Atua kiano navenatuboiano naio miyotuba,

moroano na kanano Naveri-kariano naio jo loa laka ka vite nonovio.

Vonganei naruei toro na bova nei napano mñ jomñ mil die mñaratavo nalo na be Yesu kiano, naio bisi ruei.

Legiano a bogiano naio jumolu jukamu ka Atua mirano naio milavon ka verbulag ga tomu nalo kialo kariano nalo,

ana vonganei naruei, abukular naio ruei.

¹¹ Namoneano nalo miroano maka bunu asidomial kanalo meuliano,

nalo maka amerou ka mñariano,

mia aju jikili damñariga ba bokar bogo na ajovulu toro na bova neibano,

ana venia napano abokar ka jumñalo ka ala mira vijaio, naio be burukija na Nunu Solbouo ga, bija iliano nalo na averial kanalo moneano ea Yesu.

¹² Ajodovulu toro na bova neibano, mila na vonganei mave bija nalo nonovio napano ajuaio, amijikia asaaro mia asaaro, mia nalo napano mñ aju yetemeriba þeli ea

tei, mia ajog rivova, a monoka amerou, bior Siŋaro naio batove jo iviso kalo bija tiniene bujo ka siniabu, bior ka naio mijikia ka kiano bogo telisu ga, vaataro ka riviniu, naruei mila naio be deden lie vo.”

¹³ Ninei be iliano napano toro tai berialio ea vio mave, karina kinioi nemial ka burumara kenieno niobi neibano naio bitilubar ka napano abukular naio batove ea yetemeriba, mila na kiano siniabu bavin lie vo, naio berkar jikili ka mia naio monoka rivokar tira nei navo, napano naio bar kenerinio sumano ruei. ¹⁴ Naio ba milavio ka tira nei, mia naio miilo ka ajian sibiano juo ban tira nei, javukia sibiano burumara bebekumo, ka naio rijikia rier rivuro riva toluku ea vio tai ea vio yauo napano amila batitig ka abitkar naio eaio. Naio ba jibe na, naruei burumara kenieno niobi neibano naio maka rijikia rivokar naio ea vio nene, mia aberinavo mia naio monoka toa vio nene bogo vetebievi kija, napano ve yuka takurano, karina yuka ve juo, karina ve togio bereio.

¹⁵ Vonganei niobi naio mial tira nei jo mier bano, mijikia ka naio maka rijikia rila titai, naruei mila siniabu lie vo, jumolu mijuluo ka burumara ueimiya ka rivurular tira nei van vudodom naio. ¹⁶ Burumara

uei nei naio jo mieraro bano, vaataro ka rivokar tira nene, mia amiilo ka napano vaarakurano ga, yetemeriba tinien miia tira nei, naio miija naio ka napano borotano buruŋe, naio betavo jibe burumara niono tai, ana naio jiniomo uei napano niobi mijuluo bulagio jaluvo ea niono. ¹⁷ Niobi mialio, vonganei kiano siniabu binimej bova laka, mia naio juvan tira jo, naio berinavo mia naio rivan ka kenerinio nalo ga, nina tomu nalo na ma aju ajakii tuboiano na Atua kanano, jibe ka nalo na ma aju abokar jikili Yesu kanano iliano nalo.

¹⁸ Naio ber jibe na, ana batavio bija kanano burumara siniabu, ban ka rila mira die nalo dolu nei.

13

Temeul va na be moti, napano miyotuba ea tei, niobi mije moroano banio

¹ Burumara niobi nei miel ba jumolu jua tei tivelinio ju. Ana maka vesiou, nemial temeul tai jaluvo den tei binimej ka naio. Vite meul nei be parinio aluo, pasimeduo nene nalo bokar duelimo, a ea simeduo beve terakurano be batubatu lu na parinio tubo kanano naio jo jaklele ealo. Ana ea merinialo beve terakurano, abivitaui sio tai jualo, napano ioluoliano ka lalelan tolu na Atua kanano. ² Vite meul nene nemial be dolu

laka, napano naio jibe ka jidom tibe laeon kija, bior niono jibe kuli kialo parinio tubo memedu, mia jaano veri jibe ka temeul deden dolu javukia bea. Naruei naio binimej jikili jukamu ka niobi, ana niobi mije sikiliano banio, mila naio be parinio tubo ea kiano tanobuku nalo, juvan mo-roano nonovio banio.

³ Mia nebiti vatitig vite meul nei bija kanano pariparinio nalo, nemial napano kanano parinio tai bar niajebijo tai napano toru laka. Bogo napano naio bar menko nene, ka naio riŋaro ga riviorio, mia tomu nalo na yetemeriba amiilo ka amieliel ka binimej bo, ana mila nalo abilig kialo jidomiano amonea toro meul nei naruei,aju ajakisorio.

⁴ Jibe na, tinielo vite meul nei, ana bogo napano amial ka napano niobi mije mo-roano banio ka rimej sikili batitigio, ajaaro toru, amilotu ka niobi, a amilotu ka toro meul nei napano naio jo jukamu kalo. Aju aber jibe nei, aberinavo “Kei naio mijikia tovulu kanado toro meul ea mira bogo tai? Vonganei maka toro dolu sikili batig tibe naio.”

⁵ Mia bogo napano vite meul naio binimej jikili batig bo jibe na, naio jikar ka mila kiano vovaiano nalo. Naio jo juvan kanano ilivevavini-ano, jo mioluolu janea vio, a jo miŋau bija kanano mo-roano va, a mila ba bokar siberio duelimo va veri ba

juo [42], nina yuka tolu togio [3½]. ⁶ Ka bogo na, naio jo mil niegeniege Atua, naio jo miolua siano, a naio jo buku iliano nalo na bova ka mave a ea kulo lu napano ajuaio. ⁷ Sikiliano na amije ban naio bare ka naio rila sebi rivan ea namoneano lu nalo, riva rijikia tovulu lo, a moroano na ŋa naio jo miduio, bare ka naio rije tuboiano ea taara ninio nalo, tomu nalo, iliano nalo, vija uleule nalo. ⁸ Naio mijikia rive tubo tibe na rivano-o rivan nalo nonovio na yetemeriba mia avatove ka naio, mia nalo tealoka avatove kanio, a nina be nalo ga napano jikar ea tikariano na yetemeriba, sialo abivitaui ju joomo ea niosi na meuliano na nunu solbouo nanua amuebin ŋaro.

⁹ Jau napano ŋa komijog iliano nalo nei, ver be tilin-imo bo jo, bo jau koiagago vatitig rivu. ¹⁰ Namoneano napano mia avina ka naio ea kanano buruvenuo riva riŋau kanalo, naio monoka rivan ga na. Mia nana mia atekorov burujono ka iobogu na mira, riano, mia iobogu na mira monoka tekorov burujono ga. Ver ve bogokouo tai tibe na, mia namoneano lu nalo monoka atumolu atu sikili rivija jidomiano na tebievi, monoka aviekouo rivanvano-o avar duluio avokar juluvati nene.

Temeul va juo nene, napano naio miyotuba ea borotano

¹¹ Ana iorou nemial temeul dolu na bova tai,

mia naio mijivi mave ea borotano binimeĩ. Naio pasimeduo nene juo ga, jo ga jibe ka nunu solbouo tai, mia bogo napano naio mil, joono javukia niobi nanua beamu.

¹² Ana temeul na be moti naio mijamo ka juo nene miñau bija kanano sikiliano a kanano moroano nonovio, ana naio miñau banbano-o mila napano yetemeriba bija kanano tomu nonovio aju amilotu ka temeul na be moti, naio napano bar menko na mñariano napano amieliel kanio.

¹³ Ana juo nene naio jo miñauka jameri-jiano na tortoru bija vite na iloiano nalo, banbano-o naio miñauka tai napano mila sebi jaluvo ea vio mave binimeĩ yetano ea yetemeriba ea tomu nalo miralo napano aju abitiio.

¹⁴ Naruei ea kijokijo nalo nei napano naio jo mila ea siano temeul na be moti, naio joñia mila sibilili tomu nalo na yetemeriba, naio burulo aba amiavovu laka.

Naio berial kalo berinavo ate tavo-ru na temeul na be moti, napano iobogu na mira jeio mia naio meul bereio jo. ¹⁵ Ana amimñaukanio bisi, ana amidu moroano ban temeul juo nene ka naio rila tavoru nei mijikia rivuru jegi, a mijikia ril, a amije moroano ban naio ka rijikia ruetañaria toro kei napano naio maka saaro ka rivatove ka rilotu ka tavoru nei.

¹⁶ Mo bija nina, naio jikili ka aviniu monoka aue

toto tai tualo, ea jumñalo meruo ver makanio ana ea mamerinialo. Tomu na tertelisu bija tomu na tortoru, tomu nalo na mña abe talimñasa a tomu nalo na abe sanibaiano, tomu nalo na imñauano, bija kialo boru nalo, aviniu avar toto nei. ¹⁷ Ver makanio, maka ajikia avulu vite ea yimo na vñilivñiliano, a maka ajikia avñilivñili ka titai rivan toro dolu.

Toto napano amue jualo, naio miyotuba ea siano temeul nei, naio jibe ka mirano na kanano sio.

¹⁸ Jau napano mia kovuluku niosi nei, monoka kove masou rivu ka vio na. Ver komijikia kovitilubar vatitig rivu vite nalo nei, mia komijikia koleal merano na tomu nalo sialo, mia amijedu merano na temeul nei siano, amileal bokar toromomou ari duelimo va ari ba ari, pñeli jibe napano tomu tealos aberenio, ari ari ari [666].

14

Nunu Solbouo bija tomu nalo menu toromomou takurano duelimo va veri ba veri [144,000]

¹ Bogo tai bereio neji-rarago bano, nemial burusuku na Saion naio jo kamu ka kiniou, a mave ea jumoti levlevi ana nemial nunu solbouo naio jumolu ju, naio naliko burumñara tiniobi na tomu nalo na kanano tai. Nalo abivitauiã siano bija karamñano Atua siano joa merinialo,

nalo miroano laka, merano ba bokar menu toromomou takurano duelimo va veri ba veri [144,000].

² Ana burumþara malmalioano tai miyotuba ea vio mave, jovulu malmalioano na tei momavu ea baraaþa þeli malmalioano na tubaalo. Ana nemiagago napano be malmalioano na þi mþarauo nalo napano ajumþa amueio, ³ a nalo ajumolu aju kamu ka vio lu, kamu ka temeul veri nei bija navagadeano nalo, ajumþa amiou ka iouano vou tai. Kulo dolu nalo miroano tinielo jii iouano nene toru, nalo ajidom aiou ka bunu, mia nalo maka ajikia ala kakario. Nalo ga napano amijikia amiou kanio, nina be tiniobi na menu toromomou takurano duelimo va veri ba veri [144,000], napano abulu bulaglo den yetemeriba.

⁴ Nalo nei naruei napano maka lele avijuku vova ka tira bogo tai. Nalo abokar vatitig kanalo meuliano meravo bo julaka, a ajumþa jakisor Nunu Solbouo ban ea vio na vabe napano naio ban eaio. Tomu telabo aju, mia nalo nei naruei abulu bulaglo ajaluvo den dolu nalo, mia amila lo abinimei jibe jidomiano tai ea mþariesi na be moti ba ban Atua bija Nunu Solbouo.

⁵ Nalo nei maka lele sibiano riyotuba ea niolo, maka ve vite na bova tai toa kialo meuliano.

Nailiano nalo tolu

⁶ Ana ka bogo na, nemial nailiano dolu tai jomþa mier janea vio mave. Ajian iliano vou na bo nei napano maka rijikia rivakovio bogo tai banio, ka naio rijikia riva rioliolu tanea tomu nalo napano mþa ajua yetemeriba, ka riva rivokar venuo nonovio, taara na tomu nalo nonovio a iliano ninio nalo.

⁷ Naio jo berial janea vio bija burumþara joono, naio berinavo

“Kamiu kuvatove ka Atua, kuvidular vavin siano, bior napano aura na naio tibure yetemeriba nei naio maluvo ruei.

Kamiu kuvilotu ka naio napano naio jii tini-abene, yetemeriba, a tei, bija burupati uei nalo.”

⁸ Ana iorou ka nina, nailiano juo nene tai naio jakisor binimei napano jomþa bio jibe nei, berinavo

“Komeli kirivova na toru nei Bapilon naio mijoru ruei!

Naio ba midu atua na maka rive riano, ana buru tomu dolu miroano amiavovu bija naio, nalo ajavukia tomu nalo na mþa parilo jeliviv ga.

Mia vonganei, burumþara komeli nei naio binimei bova ruei bija kanano tavoru nalo.”

⁹ Ana bogo tai bereio, nailiano tolu nene naio jakisor naljuo binimei, berial medave berinavo

“Tomu ve telabo anie tano ka aloŕu van temeul va rivija kanano tavoru, mia nalo ve telabo ajamo ka atirikaŕ kanano toto toa mamerinialo ŕeli ea juŕalo.

10 Toro na jibe na, buruveru na bitunu ea bulukupil na mia sisen mokotenano ea nailiano lu nalo miralo, bija ea Nunu Solbouo mirano.

11 Bonoti va na kanalo jogvaiano mia naio to rimaluvo daŕariga ea sebi nei napano maka rijikia riŕaro bogo tai. Nalo napano amilotu ka temeul va nene, aturbanini ka kiano tavoru, vija nalo napano abar toto na siano ea niabelo, nalo maka ajikia avokar vio na jilimebiano na bo, mia atomon ga aial jogvaiano legiano bogiano daŕariga rivano.”

12 Vironiano nene napano nailiano naio jo berenio naio kirisikili laka, ana mila na kito namoneano lu nalo monoka rotumolu rotu sikili vija kiado jidomiano na tebievi, a monoka romonea tuboiano nalo na Atua kanano, a monoka rotu rove riano van Yesu bogo nonovio. 13 Ana kiniou nomijog iliano tai juvan vio mave, berinavo “Ninei be iliano tai ka jau kovivitaui bulagio. Naio ber, tikaŕ vonganai rivano, nalo na

mia aŕarŕaro, napano kialo meuliano naio jo bo ea Tubo juŕano ruei, mia nalo avar ilivuiano ve toru.”

Iliano nei bisi, ana nomi-jog Niununo mijamo kanio, berinavo “Nao, nalo na mia kialo iŕauano novo nalo amei mave vijalo, a vonganai, mia aiŕau re bunu, mia nalo aje kialo jilimebiano na bo.”

Nailiano tolu nalo aba abar sinaniano napano meruo ea yetemeriba nei

14 Ana nemial bereio, ana melijo na miuvu tai naio jukamu ka kiniou, ana nemileal toro tai, jibe ka Kulorinio Kenerinio, naio joŕa jotano mave ea melijo nene. Naio jotano jo bija parinio tubo kanano batubatu tai ea parinio, napano amiauka ea niogo, a ea juŕano naio midukar taŕig iobogu tai napano mali laka ka te bulag jirati ŕarati sinaniano.

15 Ana nailiano dolu tai naio miyotuba ea yimo lu, naio bio ban naio napano jotano mave ea melijo nei, berinavo “Mo, jau kotumolu, kodu kanamo iobogu, kava ketikaŕ iŕauano. Sinaniano nalo napano aju yetemeriba nei ameruo ruei, vonganai naruei be bogo na kova kete bijiilo.” 16 Mia naio napano jotano mave ea melijo naio jumolu, buku kiano iobogu janea vio yetemeriba, naio je sinaniano nalo napano amermeruo aju.

17 Ana nailiano tai bereio miyotuba ea yimo lu na mave ea tiniabene, napano

naio bunu midu taŋig iobogu tai, napano mali bo bunu. ¹⁸ Ana nailiano tai bunu binimeŋ bereio, nina be naio na m̃a bitikar bulukuti sebi, naruei naio jel ea boda binimeŋ bio ban dolu neibano naio midukar iobogu neibano, naio berinavo “Mo, jau bunu, be bogo na kava kala kanamo naruei. Jau kodu kanamo iobogu kava keselivivi ea tilikrevi selivivi ea yetemeriba, ketebijii m̃arati nalo napano ameruo ruei ajaklele aju.”

¹⁹ Naruei nailiano nei mijogio, juvan kiano iobogu ban yetemeriba, ba miobijii m̃arati krevi na yetemeriba, naio bukulo ea vio na abuŋi bulag vati nalo napano aju tavio ka komeli. ²⁰ Mia Atua kiano siniabu mila niege-niegelo, budig vatitiglo banbano m̃a burukija miyotuba, miou miou binimeŋ toru jibe ueimia, naio mison buruvenuo nonovio, bululuo bokar kulorinio burujono, banbano-o jibe na mia miralo bulati.

15

Nailiano aluo bija bogo va aluo, napano na maariano

¹ Kinioŋ nojo nebitivitii vite nalo na mave ea tini-abene kia ga vo, mia maka vesioŋ nemial burum̃ara kijokijo dolu tai napano naio be vite na iloiano laka. Nina be nailiano aluo, napano abar bogo va aluo

nalo nei napano na maariano. Nalo abe na maariano jibe na bior ver napano avar laka ruei, naina naruei mia rila Atua kiano burum̃ara siniabu ribisi ea vio nonovio. ² Ana nemial burum̃ara vodobi tai, banbano jibe ka tei, mia nina naio sebi joaio, a naio merera javukia mermerobi. Ana ea tivelinio na vio nene, nemial tomu nalo miroano ajumolu aju, a nalo nei, nina tomu nalo aviniu napano ajodovulu toro deden, ajovulu kanano moroano, ajovulu sikiliano na mirano na toto napano joaio, napano toro nene midu jibe ka kiano sio maraiu tai.

Tomu nalo na ajovulio, ajumolu aju bija kialo pii m̃arauo nalo napano Atua bar banlo, ³ mia nalo ajum̃a ajerei kanio, amijev kialo iouano tai, nina be iouano na toro na miŋau Atua kanano Naverialiano Mosis, mia vonganei naio binimeŋ napano abio aber iouano na Nunu Solbouo. Iouano nei naio jel jibe nei berinavo

“Aire Teta Atua na moroano, kanamo iŋauano nalo abe tomormoruo laka, a bo laka.

Jau kobe parinio tubo ka bogo nonovio, kanamo bajago nalo amemedu a abe riano. ⁴ Jau kobe tubo, maka ve toro tai napano rijikia rimerou re kaso, maka toro tai napano rijikia rivatove re ka siamo.

16

Jau takurano ga kobe
lu riano, mia taara
na tomu nalo monoka
amei anie tano alotu
vanso,

bior vonganei, vite na
memeđu nalo napano
komilalo, nalo amoluo
abinimei meravo bo
ea tomu nalo na yete-
meriba miralo.”

⁵ Karina, nejirarago ba
joomo bereio ea vio mave,
ana nemial ka abetavea
m̄aratavo nalo na yimo lu.
Nemial jibe ka tabobo pan-
pano napano beamu amidu
lilian ea vio yauo, napano
abar batitig Atua kiano
tuboiano juaio. ⁶ Abetavea
kario, ana nailiano aluo
nalo amiyotuba denio.
Nalo amiya kulum̄arauo na
teremi nei napano ameravo
bo, amerera, ajelan kialo ku-
lubue napano amin̄au kalo
ea niogo kario ea baerelo.
Ana amiel abinimei, bija
bogo va aluo nei napano
ajum̄a abario.

⁷ Abinimei ajumolu aju
ana temeul veri nei tai naio
jian basidobidobi niogo aluo
banlo, tai midu takurano, tai
midu takurano, abujovujo
ka siniabu na Atua kanano
nei napano naio jo jobo jo.

⁸ Nalo abario bisi, ana
bior napano burum̄ara mi-
amoiano na Atua kanano
moroano joa yimo lu nei, vio
na sebi binimei bujo laka,
mila napano maka toro ri-
jikia riva joomo eaio. Naruei
jo jibe na ga banbano bokar
napano bogo va aluo na nail-
iano aluo nalo nei kanalo
abiniuviniu kokoio.

*Basidobidobi aluo napano
abujo magmago ka Atua
kiano siniabu*

¹ Ana nomijog iliano na
jikili tai miyotuba ea vio
mave ba ban nailiano aluo
nalo nei, berinavo “Von-
ganei, be bogo na kamiu
kuvin̄auka kenemiu naruei.
Kamiu kuviyon bulag veve
terakurano basidobidobi
nalo na kenemiu Atua
kanano siniabu rivan ea
yetemeriba.”

² Naio berenio bisi, ana
nailiano na be moti naio ba
miyon bulag kiano basido-
bidobi ban ea borotano, mia
sano uei nene mieraro ba
mila menko va nalo amiyoy-
otuba ea tomu nalo napano
toto na temeul va joa nia-
belo, napano m̄a amilotu ka
kanano tavoru, mila na ami-
jog napano niabelo mijalele
m̄ilea.

³ Bisi na nailiano juo nene
naio miyon bulag kanano
basidobidobi ban ea tei, ana
sano uei nene miou ba mila
tei binimei be burukija jibe
ka toro na m̄aro kanano, ana
temeul nalo napano ajuaio
am̄arm̄aro nonovio.

⁴ Karina nailiano tolu nene
naio miyon bulag kanano
basidobidobi ban ea uei na-
pano mieraro bija burupati
uei nalo, ana sano uei nene
naio miou ba mila nalo
bunu abinimei abe burukija
garuei. ⁵ Naruei nomijog
iliano tai binimei den nail-
iano napano naio jo be boru
ka uei nalo na yetemeriba,
 berinavo

“Jau napano beamu kojo,
mia jau koto banei,
jau kobe nana be lu,

kanamo vironiano nalo
nei ajikili mĕle, mia
kanamo tibureiano
naio memedu ga.

⁶ Be riano ka tomu nalo na
yetemeriba, amuebin-
vin kanamo kulo lu
nalo,

amila burukija na kanamo
naverialiano nalo
amiou,

ana jau kojomĕa komila
meran banlo memedu
ga,

napano mĕalo uei nalo abe
burukija ga.”

⁷ Ana iliano dolu tai bunu
miyotuba ea boda, berinavo
“Atua Soŝi Na Mave, be
riano laka, kanamo
tibureiano nalo
amemedu, abe riano
laka.”

⁸ Bisi na, nailiano veri
nene naio miyon bulag
kiano basidobidobi ban ea
mĕrenio, ana sano uei nene
mila mĕrenio binimej jikili
lie vo, naio mijikia tunu
tomu nalo na yetemeriba
niabelo tibe ka sebi. ⁹ Ana
mia ajog vio rivitunu mia
rivitunu, ana mia mĕrenio
tunulo rivan rivano-o mia
atu aiolua niegeniege Atua
siano. Amijikia ka naio jomĕa
juvan vironiano nalo nei
binimej, amijikia ka naio
mijikia verbure ver naio
sidom, mia maka lele asidom
aviliglo kanio, aber nalo
maka ajikia avatove ka naio
ŝeli ailivu ka siano bogo tai.

¹⁰ Bisi na, nailiano jumo
nene naio miyon bulag

kanano basidobidobi ban
ea jobaro soŝi na temeul
va nei, ana sano uei
nene naio mĕraro ban ea
tanobuku reraio ea kanano
navenatuboiano, mila vio
bobogio laka. Tomu nalo
amijog bova ka vironiano
nalo nei, nalo ajer minalo
banbano, ¹¹ mia amiolua
niegeniege Atua na mave
bior niabele bivitunu bija
kialo menko lu nalo, na
ajumĕa amilakokoa ga, bior
maka asidom ka aviliglo ea
kanalo bajago moruo nalo.

¹² Bisi na, nailiano ari
nene naio miyon bulag
kanano basidobidobi ban ea
burumĕara uei napano mĕa
mĕraro na, siano Yuvretis,
ana sano uei nene mila uei
nei binimej jabo nonovio.
Nina mila napano parinio
tubo nalo na buruvenuo
nalo ea tivelinio na mĕrenio
mijivi eaio, be kialo mĕarabo
ka avarkor vio amei vija
kanalo tomu na mira nalo.

¹³ Ana nemial niununo va
tolu napano ajavukia niobi
na uei, napano nalo tai miy-
otuba ea burumĕara niobi
niono, a nalo tai miyotuba
ea niono temeul na kirivova
nei, a nalo tai miyotuba
ea niono naverialiano lubol-
ubo. ¹⁴ Nalo tolu nei, abe
niununo na simĕaro tolu na-
pano ajumĕa amimĕauka ki-
jokijo nalo, ajumĕa aba aje-
liviv ea parinio tubo na
buruvenuo nalo na yete-
meriba, aburulo abinimej
vio takurano ka ala batitig
vite nalo rivor burumĕara
mira napano mia naio tu-
molu ea burumĕara legiano
na maaro napano Atua Soŝi

naio berkario ruei. Atua naio beriio legiano nei ruei ea kanano iliano tai, napano naio berinavo

¹⁵ “Kamiau kuvitikar, mia kin-iou nemei vina ga ea kamiau, mia kuviilo ka kin-iou tibe ka napano ver toro na vinauano tai rimej.

Toro na ver mison vatitig kiano saba nalo, ju rorea ruei ju jevijo kia vo jororea kin-iou ka kumemi ve juo nuvano, mia rivu laka van naio.

Ana mia nalo dolu ailo ga, atikiti moma tanea vio, avar burumara imouiano ka bogo nene.”

¹⁶ Naruei nemial ka napano bogo na mira na legiano na maaro naio miyotuba, ana niununo nalo aburu burovuron parinio tubo nalo na yetemeriba nei aba vio takurano, nina ea vio na napano iliano na Ipru berii jibe nei ber Amaketen.

¹⁷ Bisi na, nailiano aluo nene naio kija miyon bulag kiano basidobidobi, mia naio miyon bulagio ba janea vio vio yauo mave. Ana iliano tai miyotuba ea jobaro lu joomo ea yimo lu na mave ka bogo na, naio miaga mave berinavo

“Vonganei naruei be bogo na juluvati vite nonovio ribisi.”

¹⁸ Ana vaarakurano ga vio jikar viobijan janea vio, bija tubaalo ajuma ajaara, abe

vioano nalo a malioano nalo. A bija nina, mii mikulkulu toru, memebiju ba bova laka jibe ka napano toro makarial kija ea tikariano na yetemeriba binimej bokar banej. ¹⁹ Ana mii mikulkulu bakuŝe borotano, mila komeli nalo na buruvenuo nalo na jeliviv ea yetemeriba ajibirbili abavatove, ana na mila napano burumara komeli nei Bapilon bakuboŝe ea niati tolu.

Atua jidomkar vio nene, bija kanano vovaiano nalo, ana naio mila naio mijikia memedu ka kiano bajago nalo napano naio joma milao, mila naio munu ea baja napano bujo ka marjunelmelu na moroano na kanano siniabu. ²⁰ Ana bija mii nei, uleule sesa nalo aburo janea vio aba kovio, a burusuku nalo nanua beamu ajumoluaju, maka bunu aial lo. ²¹ Kurukuti yuo aes nalo na mave ea vio yauo ajibirbil ajavukia puruveru na tortoru, ajuba vinvin tomu nalo napano ma ajua yetemeriba nei. Amijog bova toru biorio, amial ka napano jaleleano nei naio jikili laka, banbano ajuma abuku iliniegeeniegeiano ban Atua.

17

Tira va jotano mave ea temeul va

¹⁻² Ana ka bogo na nailiano tai binimej, nina be nailiano aluo tai napanoaju

abar basidobidobi aluo. Binimeĩ kuku ka kiniou, berial berinavo “Jau katakisor kiniou. Mia nesiloglogso ka burum̃ara komeli va nei Bapilon, napano naio joa vio nei napano burum̃ara uei nalo napano m̃a amieraro ajuaio. Komeli nei naio jom̃a miñau bova, naio javukia tira na m̃arabo ga. Naio javukia napano parinio tubo nalo na buruvenuo dolu nalo ajum̃a aba amila siakaiano bija naio, a jibe ka napano m̃ano m̃arjum̃elm̃elu bilig tomu nalo na yetemeriba aba amiavovu tanea garuei. Mia jau komei, ka mia nalaso keial venia napano mia rimaluvo kanio ea bogo napano mia rivar kiano vironiano rimemedu.”

³ Mo nailiano nene naio binimeĩ midular niunuku, midu kiniou nojoa vio yauo tai. Ana nemial tira tai naio jotano mave ea buruolu deden tai. Temeul nei naio bilvili mia bilvili reraio, naio be parinio aluo a pasimeduo nene nalo bokar duelimo, a niabeno reraio abivitaui sio va nalo ka ail niegeniege Atua. ⁴ Ana tira nene, naio miovvu bo laka, ea kulum̃arauo nalo na be si a abilvili, mia naio jelan ea niabene nonovio ka yomu, a ŕejelinio na tiliniene, a niogo nalo, a vermiromu nalo na be burum̃ara veru nene, a basabebe nalo. Naio midukar baja niogo tai ka jum̃ano, mia baja nei naio bujo ga ka kanano niamiamo nalo bija kanano

siakaiano nalo. ⁵ Karina abivitaui iliano tai joa mameriniano, naio be ililuklukuano tai. Iliano nei naio javukia sio tai, napano ber jibe nei, berinavo

“Bapilon napano buruto-moruo,
be kenieno tira nalo na m̃arabo,
be burupati bajago
na niamiamo na yetemeriba.”

⁶ Nojom̃a nebitii tira nene, nebitilubar ka napano parinio jeliviv, a maka rivor ka napano naio munu m̃arjum̃elm̃elu, mia bior naio jom̃a munu burukija na moneano lu nalo, nina nalo napano m̃a amuebinvinlo bior ka na m̃a ajakisor Yesu. Nemial tira nei jibe na, nomijog niabeku ŕili mia!

⁷ Ana nailiano naio mil ban kiniou, berinavo “Ei, venia na milaso komiilo m̃ele jibe na? Jau koto vo, mia kiniou never bisivisii batitigio navo. Tira na, bija buruolu na naio jotano eaio, napano parinio aluo nalo a sano pasimeduo duelimo, vite nalo nei nioti nene naloaju, a mia nalaso kovitilubarlo.

⁸ “Buruolu na komialio, naio jo beamu, mia maka bunu to vonganei. Ana ka bogo tai napano jo binimeĩ, mia naio riyotuba rimeĩ mave bereio den bulukuŕili napano joaio vonganei, mia rivan ka rim̃aro ea kanano vironiano. Ana ea bogo na, tomu nalo na yetemeriba napanoaju keano vo, mia

aial buruolu nene. Nina be nalo napano jikar ea tikariano na yetemeriba, sialo maka to joomo ea niosi na meuliano. Mia bogo na aial naio, mia aiilo ve toru, bior amijikia ka naio jo beamu nua, karina maka bunu to bogo kirisiou laka, karina, naio miyotuba bereio. ⁹ Ana toro napano be masou bo, mia naio mijikia rivitilubar rivu nioti na vite nalo napano mia neverenio.

“Moti nene, naio be sano parinio aluo. Nioti nene, naio ber komeli tai napano tira nei naio jo be tubo eaio, napano be sano suku aluo ajuaio. A suku nalo nei, naio be sano nioti nene nalo bunu, berinavo be parinio tubo aluo na tortoruaju. ¹⁰ Bokar banei, parinio tubo jimo nene nalo abisi ruei, a be tai na naio jumolu ju vonganei. Tai bereio napano maka riyotuba vo naio jo keano, a bogo na rime, mia monoka naio to vesiou kija vo.

¹¹ “Buruolu nei bunu napano beamu naio jo mia vonganei naio maka bunu to, beamu naio bunu be parinio tubo aluo nei tai. Naio be nalo tai ruei, mia naio rime bereio tibe parinio tubo arolu nene. Naio be toro na toru jibe na, mia bekurano, bior mia iorou naio bunu mia ribisi, naio riva rivar kanano vironiano na jikili.

¹² “Vite dolu ka aver bisivisiio, nina be pasimeduo duelimo nene. Sano nioti nene nalo, naio be parinio

tubo duelimo bereio. Nalo na maka atumolu vo ka ave tubo ea kanalo tanobuku veve terakurano, mia nalo ala kanalo inauano ea bogo napano mia buruolu neibano tumolu. Mia ave tubo ea yetemeriba vija naio, mia nina naio be bogo na kiri bulati tai, tibe aura ve takurano ga.

¹³ “Nalo duelimo nei, nalo maka ajikia ala kanalo inauano nalo, mia nalo abe tena ainau buruolu nei ga kanano, ka kanalo moroano rijai naio, ka rila naio rime ve toru lie vo. ¹⁴ Mia nalo nonovio na amei vio takurano ka alavon ka ala mira ka Nunu Solbouo, ana mia maka ajikia atovuluio. Makanio, mia naio tovulu nalo bior napano naio ga be tubo loa ka tubo nalo, naio ga be parinio tubo loa ka parinio tubo nalo, a kanano tomu novo nalo, nina nalo napano naio biolo, naio bijauia bulaglo, a nalo abiekouo ea naio.

¹⁵ “Vite dolu ka aver bisivisiio, naio be uei nalo a tei nalo napano komial tira va nei naio joma jotano mave ealo. Salo nioti nene nalo, naio be tomu nalo na ma ajua yetemeriba, bija taara nalo, a buruvenuo nalo, a iliano nalo.

¹⁶ “Ana iorou kanio, buruolu nei bija sano pasimeduo duelimo, mia asidom re bunu tira va nei. Mia atumolu ala naio rime vova laka, napano mia aya bulag maano kulumarauo nalo denio mia naio rivar moa ea mirano tomu nalo, mia

nalo asen sano sunbue na ni-
abene rivan mia avuku sano
buriu nalo rivan ea sebi sise-
nio.

¹⁷ “Ea m̄arabo nei naruei
na mia ala van tira nei, kito
romial memedu ga ka vi-
roniano napano Atua beri-
alio ea kanano iliano nua,
ber naio jidom ka tira nei
monoka rivario. Naio ga
midu joa kanalo jidomiano
bija buruolu, ka ala ka naio
tibe na.”

¹⁸ Naruei nailiano nei mila
nonovio kanano iliano ea
bogo nei, berinavo “Nina
naruei vervisivisiano na tira
nei, napano naio be bu-
rum̄ara bulukomeli napano
be tubo ka parinio tubo dolu
nalo na yetemeriba.”

18

*Bulukomeli va nei Bapilon
naio mijoru*

¹ Bisi na, nemial nail-
iano dolu tai jaluvo ea vio
mave naio binime i yetano.
Naio be nailiano na Atua
kanano na jikili tai, binime i
bija burum̄ara moroano, a
kiano mereraiano midulii
yetemeriba. ² Naio miaga
m̄erera ka burum̄ara joono,
berial

“Bukum̄ara bulukomeli
Bapilon nei mijoru
ruei.

Vonganei, vio nene bin-
ime i be vonuo tai na
sim̄aro nalo kanalo,
a vio na niununo va
nalo ajuluku eaio.

Menu kinkin nalo
na m̄a amim̄auka
bajago na miagiago
va, nalo bunu ajum̄a

amim̄auka m̄alo
niuku nalo eaio.

³ Naio ba midu atua nalo na-
pano maka ave riano,
a naio buru tomu dolu
nalo abe vovu bija
naio, ajibe ka tomu
nalo na m̄a pariparilo
jeliviv ka uei.

Jibe ka napano naio
buru parinio tubo na
buruvenuo dolu nalo,
aba amila siakaiano
bija naio, a tomu nalo
napano m̄a amim̄au
bior veru jeliviv ea
yetemeriba, amijev
veru va miroano
ea m̄asautogo va
na bulukomeli nei,
banbano na abinime i
abe sanibaiano laka.”

⁴ Nailiano nei naio mil jibe
na bisi, ana nomijog iliano
dolu tai jaluvo ea vio mave
naio binime i ber jibe nei,
berinavo

“Aire kiaku tomu nalo,
bo ka kami u kuvuro
soŋeli kuvitaluvo den
vio nei,
ver ŋeli mia kuvila biti-
ran kiano kariano vija
naio,
ver ŋeli mia kuvidu biti-
ran bunu kiano viro-
niano nalo.

⁵ Kiano kariano nalo
amivonlo ba bokar
mave, mia Atua
maka rijikia tinien
ribobogia bogo va
vio napano naio mila
korov kiano tuboiano
nalo.

⁶ Bo ka asian meran jogva-
iano van naio tibe ka

napano m̃a naio jian
ban dolu nalo,
bo ka avulu meran naio
rive valuo ka venia
napano naio mila
ruei.

Uei na mije a napano
naio mila tomu dolu
nalo amunuio, bo ka
aion rivan ea kiano
baja rivujo batitig.

⁷ Beamu, kanano jogvuiano
ea kiano meuliano
monmaio naio toru
laka, mia naio sibuku
rimei ve jogvaiano ea
niabelejalele nalo bija
tegiano nalo.

Mia nina naio maka na
vo, bior napano naio
jom̃a mila kiano jido-
miano be m̃arou laka
keano, naio jo berii
naio, berinavo

‘O, kiniou nebe tira
parinio tubo jibe nei,
nojotano batitig nojo
nei. Vite nonovio
binimei bo laka ban
kiniou, ana mia netibe
re leleio taanou tai
napano maka ve
kiano vite, mia maka
nejikia neteg rivior
jogvaiano.’

⁸ Mia naio, ea legiano tai na-
pano jo binimei, mia
jaleleano nonovio ala
tanea naio vaaraku-
rano. Mia ve m̃ariano,
vija tegiano, vija vitu-
iano, a mia sebi sisen
vatitig naio.

Naio maka to sidomial,
mia Tubo Atua na-
pano mia naio tibure
naio, kiano moroano
toru laka.”

⁹ Ana nailiano nei ber
jibe nei, berinavo “Parinio
tubo nalo na buruvenuo
dolu jeliviv ea yetemeriba
napano ajum̃a aba amilotu
ka atua nalo na burum̃ara
bulukomeli nei, mia avi-
tilubario ka napano mijoru
ruei. Nalo naruei ajibe ka
napano aba amila siakaiano
bijaio, aba abijurukario ea
kanano meuliano na bo ban-
bano, maka asidomial titai.

“Mia bogo napano naio
mijoru, sebi jo jijenio sano
iou nalo bavavin, naina
naruei mia ajog rivova
kanio ve toru, mia ateg
rivorio. ¹⁰ Mia aial vi-
roniano napano mia naio
to rivario, mia rilalo bunu
atkar ka amemebiju. Mia
nalo atumolu atu koalabo
denio, avitivitio, averinavo

‘Uerei Bapilon, burum̃ara
bulukomeli na mo-
roano,

kumemi tiniememi mi-
iaso toru.

Riano ga jau kojo bo
bano-o, mia ka aura
takurano ga nei ana
jau komial kanamo
jukuti, komijoru, jau
kobisi mia kobisi.”

¹¹ Mo bija nalo na, tomu
nalo na yimo na ṽilṽiliano
nalo jeliviv ea yetemeriba
mia ateg ajog rivova, bior
ka napano mia ve re bunu
tomu tai ka avulu kialo
saba. ¹² Beamu, amison
kanalo uako nalo bija togogo
na bo, jibe ka vite nalo
na m̃a amim̃aukalo ea
nigo p̃eli na ea verumera,
bija vermiromu napano
burum̃ara veru kanio,

bija basabebe nalo, a kulumŝarauo mkekeano napano salo niabele nalo bo, a iesi bonotanunu, a vite nalo napano amiŝauo kalo ea ŝmarjuvono bue ŝmarauo na eleven, ŝeli ea iesi nalo, butoto nalo, a puruveru nalo, mia vonganai, kanalo iŝauano nalo ka veru mia amei ajuba vio nonovio.

13 Mo ea bogo na, mia tomu nalo avulu re bunu vite nalo na amiŝauka salo sinaniano, jibe ka ŝaiesi nalo, ŝeli na ŝarsili nalo, ŝeli na niago na bilulu, yevi bija kon, bija bunu vite na munuiano jibe ŝarmjmelŝelu. Mia tomu nalo ajikia re bunu avulu vite nalo na jibe ka ŝaatei a titikivaka na ŝarolivi, ŝeli na vite nalo na ŝa ajumŝa aburu veru ealo beamu, javukia bue ŝmarauo, ŝeli na nunu, ŝeli na bue kulorinio bija kanano rukuruku namŝa jo burio. Tealo nanua beamu ajumŝa abulvulu ka tomu nalo na ŝa amiŝauo kurano ga ea boru nalo, mia maka bunu ajikia alaio, bior ka bogo napano burumŝara bulukomeli nei naio mijoru, mia ve re bunu iŝauano tai, mia toro maka bunu rijikia rileal veru ka rivitikar kanano meuliano.

14 Ka bogo na naruei, mia averii vio na, averinavo

“Jau kojidom ka jau kovar ŝariesi na tortoru ve telabo, mia maka rimeruo vatitig vo naio jibirbili ruei.

Beamu, jau kobe sani-baiano laka, kiamo saba nonovio kiri-novo laka, mia vonganai biniu bakovio nonovio, mia toro maka bunu rijikia rial tena bo tai easo bereio leleio.”

15 A tomu na ŝa aŝilvili ka vite nalo, napano ŝa aburu veru nalo telabo bior ruei, mia atu laka ga asirarago vano mia amerou ka viro-niano na mia burumŝara bulukomeli nei naio to riduio. Mia ajog rivova riviorio, 16 mia nalo ateg ve toru, averinavo

“Aiou kenememi burumŝara bulukomeli nei, aua toru banso.

Nanua jau kojomŝa komiovvu bo ka kulumŝarauo novo nalo, jau kobar yomu niogo a ŝejelenio niogo janea niabemo, mia vonganai jau kobe deio ruei, kiamo sebi ŝaro.

17 Jumabe kanamo burumŝara sanibaiano mijikia biniu kokoa ea aura takurano ga jibe na?”

A be natelanvvuiano nalo na uako nalo nanua beamu ajumŝa abarvar togogo nalo, bija kialo naimŝauano nalo, bija nalo napanoaju amieliel ea uako ŝeli abar veru ea tei, nalo bunuaju koalabo ajirarago ban ea vio nene. 18 Bogo na iou na sebi napano jomŝa miduko vio, jo bavin ea vio yauo, mia atumŝa aververii vio nene, averinavo

“Riano ga, bulukomeli na be
vio tai na,
tai re bunu tibe naio ea
yetemeriba nei.”

19 Tinielo maio ka jibe na,
mila amijog bova, abisivisii
burumaroro ea pariparilo,
ajegi, aberinavo

“Aiou, kenememi burum̃ara
bulukomeli nei, aua
toru banso.

Jau kobujo ka veru, mia
kumemi numiñau
ea uako nalo na
kenememi, nubarvar
kanamo togogo nalo,
banbano kumemi
bunu numileal veru,
mia vonganai bova ga.

Ea bogo tai na bulati ga nei,
mia jau komei kove
vio, na vakovioiano
ga.”

20 Ana bior napano bu-
rum̃ara vio va nei naio mi-
joru jibe na, iliano tai miy-
otuba mave, berinavo

“Ea vio mave, burum̃ara
saariano a jogvuiano.

Kamiu namoneano lu
nalo, a atevi nalo,
a Atua kiano nave-
rialiano nalo, kamiu
kumijikia kuvilivu ka
naio ve toru, bior
ka napano naio jibure
tira va nei ruei, jian
meran ban naio bior
vovaiano nalo nanua
m̃a mila ban kamiu
beamu.”

21 Ana ea bogo na, nail-
iano tai binimei bitirilar bu-
rum̃ara puruveru tai, naio
midular loa ka parinio, ana
naio bukuio mijoru mue tei,
madudu bakovio. Karina,
nailiano nei naio ber jibe
nei, berinavo

“Naina naruei burum̃ara bu-
lukomeli va nei Bapi-
lon,

mia avukular naio rivan
laka tibe na,

mia ala naio rijoru ka mia ri-
jikia re tumolu bereio
bogo tai.

22 A jau Bapilon, iliano biedu
banso jibe nei, ber

iouano nalo na vamele-
viu bija p̃i m̃arauo
nalo, mia toro rijog re
to easo bereio,

tomu nalo na aim̃auka
im̃auano nalo, mia ve
re tai to easo bogo tai,
a malioano nalo na abiji
ka sinaniano ve re
bunu.

23 Miamoiano na yulu nalo
ajegli re kanamo vio
nalo bereio,

mia jau kojog re ilimere-
vuiano na m̃eaku bija
tira napano naljuo
ajoro vonga.

Tomu na amim̃auka
kanamo veru, maka
dolu tai ea yetemeriba
nei tavukialo, a mo-
roano na kanamo
semei nalo a kanamo
sibiano nalo amilasos
koburu buruvenuo
dolu kialo jidomiano
ba be vovu laka.”

24 Naina naruei kito ro-
mial ka napano Bapilon nei
naio be vio tai napano be
burupati vovaiano toru mu-
garuei. A naverialiano kei,
vede namoneano lu p̃eli toro
dolu napano amuebinvinlo
bior nalo abe Atua kanano,
mia salo burukija miou ea
borotano na bulukomeli nei
naruei, naina naruei mila

napano Atua kiano tibu-
reiano a kiano vironiano mi-
joru ea naio jikili laka tanea.

19

*Burum̃ara saariano mave
bior tiniabene naio jovulu
vite nonovio*

¹ Iorou ka nina, nomijog
ka napano tiniobi toru ea vio
mave abio toru, aberinavo
“Siva ban kanado Atua!

Ioruriano, mermerano a
moroano abe kanano
naio takurano ga.

² Kiano tibureiano biniu
abe riano a amemedu
laka.

Burum̃ara kenieno tira
va na tire nalo na
m̃arabo nei, kiano
siakiano nalo amila
yetemeriba binime
miagiago laka, ana
vonganei Atua jibure
naio biorio ruei.

Naio jian burum̃ara
vironiano tai banio
bior burukija na
kanano tomu na
iñauano nalo napano
mieraro.”

³ Ajuña abio jibe nei, ana
ajusol lo bereio, aberinavo

“Siva ban Atua! Sebi
jom̃a jijen soro nalo
nene ruei, mia iou
nene naio rivavin ri-
jikia bisi re.”

⁴ Mia navagadeano due-
limo valuo ba veri [24] bija
temeul veri nalo anie yetano
kamu ka Atua mirano, na-
pano naio jom̃a jotano mave
ea kanano jobaro lu, naruei
amilotu kanio. Amiaga,
aberinavo
“Bo laka! A siva toru banio!”

⁵ A iliano tai miyotuba ea
jobaro lu bunu, napano naio
ber jibe nei, berinavo

“Kamiu tomu na Atua
kanano iñauano,
kamiu tomu na tortoru nalo
a tomu nalo reraio,
kamiu nonovio na-
pano kubatove ka
naio, vonganei bogo
memedu ka kuvilivu
ka siano.”

⁶ Naruei nomijog bereio
tiniobi toru neibano, kanalo
niagaiano mila malioano
jibe tei mom̃avu, jibe
tubaalo. Nalo aber

“Siva ban naio!

Kiado Tubo Atua Soŋi
naio jovulu vite
nonovio ruei!

⁷ Kito reiaia ea naio, reijalar
siano, rasaaro kanio.
Vonganei be bogo novo
na rala jokoluolu na
soriano na nunu sol-
bouo naruei.

Koano naio miyovovua
naio batitigio jo ruei,

⁸ amija vatitig naio ka ku-
lum̃arau vou nalo na
bo, amiuvu akirinovo
nalo.”

Ana kulum̃arau novo na
mivu nei napano nunu sol-
bouo koano naio miyao,
naio be sano nioti nene jo,
naio berenio iñauano novo
nalo napano namoneano lu
nalo na Atua kanano amila
ruei.

⁹ Ana nailiano napano ju
bija kiniou ea bogo na mil
ban kiniou, berinavo

“Mia kiniou never iliano
tai vanso kovivitauia
kar toa kanamo niosi
na. Iliano nene jibe

nei, ber toro napano mia avio ka naio tusol lo ka sinaniano na jokoluolu na soriano na nunu solbouo, mia naio rijog rivu mia rivu laka.”

Ana naio jusol iliano nei bereio, berinavo

“Naina naruei be Atua kanano ilirianiano napano be riano laka.”

¹⁰ Mia nomijog naio mil jibe na ban kiniou, neminie tano kanio, nojidom nolotu vanio, mia naio berbureio. Naio berinavo “To, jau kala re tibe na van kiniou! Jau monoka kolotu van Atua naio ve takurano ga. Kiniou nebe toro na kanano imãauano ga, nejibeso ga, nejibe bunu kuruamo dolu nalo napano mña aju jikili ea Yesu kanano ilirianiano. A bo laka ka napano kamiu kumitumña kumila jibe na, bior ka napano burupati nioti na visiþeiano nonovio na be riano napano aberial beamu binimei, naio be Yesu ga na, bija kanano ilirianiano napano kamiu kumitumña kubokar jikili.”

Toro na þirinio jikili napano naio midu bue kulorinio na mivu

¹¹ Mia ka bogo na vio mave betavo ban kiniou, nejiraravo ba joomo, nemial bue kulorinio na mivu naio jumolu ju, a toro kouo tai jotano mave eaio. Naio naruei napano mila mira die vovaiano, ana bogo napano mila kiano tibureiano, naio

miñau memedu ga. Toro nene, abio siano ka Parinio Tubo Viekouoiano na Riano, ¹² ana naio siano be dolu tai bunu abivitauiua joaio napano maka ve toro tai rikia sano nioti, naio ga takurano mijikia. Mirano naio merera jibe ka sebi napano mña bilvili, a ea parinio naio miya batubatu na parinio tubo. ¹³ Naio miya bunu kanano kulukoti tebievi napano ajekon ka burukija ka rila ve kalkal eaio, a siano dolu tai bereio, abio ka naio jibe nei, aber Atua kanano iliano Lu.

¹⁴ Ana ea bogo na, taara nalo na tomu na mira na mave, a miyovovua ka kulumñarauo na miuvuruvu nalo bo, a abar kialo bue kulorinio nalo na amiuuruvu, aba tavio ajakisor kialo navurimñaraboiano nei abano. ¹⁵ Naio burulo abano, kiano iliano jo moluo ea niono javukia iobogu na mira tai na mal ea ikiti be juo, ka napano mia tekitekti venuo nalo na yetemeriba ajoru. Iorou ka napano naio jovululo, mia naio tumolu ve tubo kalo, a kiano nia napano naio midukar ka juñano, naio be butoto na temi tai. Vironiano na jikili be venia napano Atua Soþi kiano siniabu naio midu jo ka mia tomu nalo avario, mia toro na toru nei naruei naio mia rivar riyotuba.

¹⁶ A naio be siano dolu tai kia ga vo, napano abivitauiua joa kiano kulukoti a jaano, be

“Parinio tubo na parinio
tubo nalo,
Toro na toru na tomu na
tortoru nalo.”

¹⁷ Bisi na, nemial nailiano
tai naio jumolu ju napano
m̄erenio mijegliio, naio bio
ka menu nalo napano m̄a
aju amier reraio mave. Naio
biolo, berinavo “Oi, kami
kuviniu kumei vio takurano
ea Atua kanano buruñara
jokoluolu nei. ¹⁸ Kami
menu nalo na m̄a kumisen
sunbue, mia aim̄auka semiu
sinaniano tai rive verare
ka kami vesiou re, na-
pano naio be tasiñaro nalo
na Atua kanano uolu nalo.
Parinio tubo nalo, tomu na
tortoru na mira, tomu na
p̄irilo jikili, bue kulorinio na
mira nalo bija nalo napano
ajuñā abarlo, bija tomu nalo
dedade napano abe tomu
na tortoru p̄eli abe tomu
na tertelisu na im̄auano ga,
nalo na abiniu ajumolu ka
ala mira ka Atua, ana naio
jovululo milalo am̄arm̄aro
janea vio.”

¹⁹ Ana nemial temeul va
nei, bija parinio tubo nalo
na yetemeriba, bija kanalo
taara na mira, nalo abinime
amidu buronlo vio takurano.
Amila batitiglo ka ala mira
ka naio napano midu bue
kulorinio na miuvu nei bija
kanano tomu na mira nalo.

²⁰ Ana aberinavo ala
mira naruei, ana tomu
na bova nalo nei amiilo
ka napano nalo na Atua
kanano ajumolu vaaraku-
rano aba abokar kilkil ea
navurim̄araboiano juo na
kanalo, naina be temeul

va na bija naverialiano
lubolubo napano naio be
toro na miija naio ka semei a
vite na iloiano nalo. Beamu,
naio joñā miñauka vite
nalo nei, mila sibilili tanea
tomu nalo napano naio buru
kialo jidomiano ba amijamo
ana amue toto na temeul
va nei joa mamerinialo,
aba amilotu vovu ka kiano
tavoru.

Mia nalo abokar vatitig
navuri-m̄araboiano juo na
taara va nei, ana abukulo
abe juo aban ea bulukuti
sebi napano naio joñā jum.

²¹ A dolu nalo na kanalo,
maka ala mira vo amiilo ka
napano iobogu na mira tai
miyotuba ea naio napano
midu bue kulorinio niono,
mia iobogu nene ban jibe
nei ban jibe na je kitk-
itilo am̄arm̄aro janea vio.
Mo jakii venia napano ne-
mialio, menu nalo na m̄a
ajen sunbue abinime ami-
jede boñe salo tasiñaro nalo
nei, ajenlo banbano mabolo
jouo.

20

*Amiorkar Siñaro nei jo
bokar yuka menu takurano
[1,000]*

¹ Ana kiniou nemial
nailiano tai jaluvo den vio
mave binime yetano, naio
midukar vulariano tai ka
jumano, napano vulariano
nene be tena m̄aratavo
na bulukuñili na m̄ariano
napano naio batove maka ve
togio nene, a bija vulariano
nei, bar bunu m̄arimieni

na jikili tai. ² Ana naio ban memedu ka burum̃ara kenieno niobi nei, napano be maro moruo nei Siŋaro Setano, naio ba bokar batitigio jikili bo, miorikar vatitigio bo ka m̃arimieni, berkar ber mia to tibe na rivokar yuka menu ve takurano [1,000]. ³ Ana midu naio bija sano m̃arimieni bukuio ban ea burum̃ara bulukuŋili nei napano batove bululuo laka, ana jetavoko, bukar naio jobo, ka toro kirivova nei naio rijikia re bunu rijukujuku tomu nalo na buruvenuo nalo, riva rivokar napano mia yuka menu takurano nei naio ribisi. Ana kanano moroano maka rijikia riviniu nonovio vo, bior mia iorou, ea bogo tai na ve kiri bulati ga, mia mijikia riyotuba ka rila parinio ve vaarakurano bereio.

⁴ Ana nemial vio lu nalo, bija nalo napano m̃a ajutano mave ealo, nalo na napano abijauia bulaglo ruei ka amijikia atibure tomu nalo. A bija nalo nene, nemial niununo nalo na tomu nalo vio bujoaju, nina nalo nanua beamu ajuŋa amioliolu ka Yesu bija iliano lu na Atua kanano, mia aje kokorov burujolo biorio. Nalo na maka alotu ka temeul va nei, maka anie tano ka kiano boda, a maka avar kanano toto ea mamerinialo p̃eli na ea juŋalo, mia Atua naio jaaro kalo, milalo ameul bereio ka amijikia atumolu atu vija Kristo ka aje tuboiano ea vio nonovio riva vokar jukuti na

yuka menu takurano nei.

⁵ Nina napano ameul bereio jibe na, naio be bogo moti na tomu nalo ameul bereio den nam̃ariano, mia nalo nei ga abokario. Nalo dolu napano aŋaro aju kia vo ea bogo nene, nalo amijev kanalo meuliano bereio ea valuo nene, nina bogo napano yuka menu takurano biniu. ⁶ Atua kiano ilivuiano na bo toalo napano ameul moti bereio den nam̃ariano, napano kanalo meuliano be lu vatitig bo. Mariano juo nene maka rijikia tokol lo leleio, mia nalo aiŋau tibe ka Atua kanano kulo lu nalo, ave tomu lu na Kristo kanano, mia naio rivitiri bulaglo ka aje tuboiano ea vio nalo vija naio ea yuka menu takurano nei.

Siŋaro, kanano jukuti

⁷ Ana bogo napano yuka menu takurano nei bisi, mia Siŋaro naio mijikia moluo bereio ea nalakoiano nanua naio juaio. ⁸ Ka bogo nene, mia naio rivan tanea vio nonovio ea buruvenuo nalo na yetemeriba ka rila sibilili tomu nalo bereio, a mia rivuru buron taara juo na tortoru nei amei vio takurano, nina be tomu na Koko bija tomu na Makoko, ka amei vio takurano bereio ka ala mira ka tomu nalo na Atua kanano. Mia bogo na taara juo nei abinimei vio takurano, nalo vio bujo mia vio bujo, jibe ka kurukuti yono na bayono.

9 Nalo ajibijilo jibe ka tomu na mira nalo, abulan jaalo abarkor yetemeriba abinimei aboru Yerusalemo, vio nei napano Atua jaaro toru kanio, napano naio be vio na mña kanano tomu nalo ajujuaio mugaruei. Mia nalo ajeliviviko batitig bo burumñara komeli nei, aberinavo ajidom atikar mira naruei. Mia vaarakurano ga, amiilo ka napano be burumñara kenieno sebi tai jaluvo den tiniabene binimei karlo, naio jijenlo banbano abiniuviniu. ¹⁰ Mo Simaro, naio napano mña mila sibilililo beamu ruei, abuku naio ban ea burumñara bulukuti sebi napano jomã jaraburuburu, ninei sebi napano abuku temeul va nei bija naverialiano sibilibiano abe juo ajuaio ruei. Mia nalo tolu nei mia ajog jogvaiano ea vio nei legiano bogiano, rivan riva to tobo to.

Nalo napano maka amonea kanalo tibureiano na maaro

¹¹ Naruei nemial burumñara vio tai natibureano na tomu nalo, napano miuvu mia miuvu, naliko burumñara tubo na tibure tomu nalo naio jomã jotano eajo. Kanano mermerano mison vatitig vio reraio, mila na yetemeriba a vio yauo ave juo aburo aba kovio. ¹² Mia nemial burumñara taara na tomu nalo tai, nina be nalo nanua beamu amñarmñaro ruei ea yetemeriba, tomu na tortoru naliko kulo dolu nalo reraio.

Naruei nalo amiyotuba ea vio nei ka atumolu atu kamu ka mirano na tubo na toru na tibure tomu nalo. Nemial niosi tealo abisidea kalo aju, ana aba amidu tai bereio binimei, naina abio ka Niosi na Meuliano, mia abisidea ka naio bunu. Mia abitio amileal venia napano abivitauiã joa niosi nalo nei tivelinio na maariano nalo nei, mia abeve terakurano aburu kialo vironiano jakii niosi nalo nei. ¹³ Mia bija tomu na mñariano nalo nei, nalo napano amñarmñaro ajua tei, a nalo napano mña amñarmñaro aba ajua vio na jogvaiano ruei, nalo abiniu abinimei bereio ka atiburelo memedu ka kialo inñauano.

¹⁴ Naruei ajibure tomu na mñariano nei abanbano biniu, karina ajumolu abar vite juo nei mñariano, bija bunu vio na jogvaiano nei, naruei abuku lo abe juo aba joomo ea burumñara bulukuti sebi nei. Ana mñariano na tomu nalo amijev ea vio na, nina abio ka mñariano juo nene. ¹⁵ Mia toro kei napano maka alealio siano toa Niosi na Meuliano nei, naio naruei avuku naio bunu rivatove ea burumñara bulukuti sebi nei.

21

Bulukomeli Yerusalemo vou nene

¹ Ana iorou ka naina, nemial vio mave vou bija yetemeriba vou amiyotuba, bior vio mave moruo bija yetemeriba moruo bija sano borotano a tei nene nalo,

aba kovio nonovio ruei. ² A nemial komeli lu novo nei, Yerusalemo vou, jaluvo ea Atua ea vio mave binimei yetano ea yetemeriba. Nemial ka napano amiyovovuo bo, jibe ka tira tai napano miyovovuo kirinovo laka binimei ka aiven riva rivan koano sumano ka soro kanio.

³ Mo ka bogo na kiniou nomijog iliano na bo tai juvan vio mave, berial jibe nei, berinavo

“Vonganei, Atua jidom to vija tomu nalo na yetemeriba, jidom rila kanano vonuo toalo. Mia nalo amei ave tomu nalo na kanano, bior ka napano mia naio to vijalo toboto, naio rimei ve kialo Atua riano.

⁴ Jogumiralo nonovio, mia naio riolkon bulagio, mia mŕiano ŝeli tegiano, ŝeli jaleleano, ŝeli jogvaiano atu re bunu, bior bogo moruo na beamu naio bar laka ruei bano.”

⁵ Iliano nei bisi, ana toro lu na mŕa jo jotano mave naio berial, berinavo

“Nao be riano laka kiana! Mia kiniou nala vite nonovio rimei ve terivou bereio!”

A jusol bereio berial memedu ban kiniou, berinavo

“Naina naruei mia kiniou never iliano tai vanso napano naio be riano bo, napano jau komijikia komonmoneaio rivu,

mia bo jau kovivitauia kario.”

⁶ Ana naio mil du kia ga, berinavo

“Kiaku iŕauano nonovio, nemila nonovio biniu ruei!

Kiniou nebe motoru a nebe natumaariano, kiniou natikariano a najuluvatiano.

Toro na mŕa midou jerio, mia noviov mŕano uei tai ea burupati uei na meuliano, nesian van naio rimunuio tibe na ga.

⁷ Toro na mŕa biniua bogokouo ea kiano meuliano, naio tu sikili riva tovulu na vovaiano, mia naio rivokar ilivuiano nalo tibe ka kiano jajumano. Mia kiniou noto neve kiano Atua riano, mia nodu naio rimei ve keneriku.

⁸ Mia tomu na vovaiano nalo, nalo bunu mia avokar kialo jajumano tai. Nina be tomu nalo na mŕa maka atu sikili ea kiniou, napano maka amonea, napano kialo bajago naio kirivova laka, amuebinvin tomu, abijuku bova ka tira ŝeli sumano, abar semei, amilotu ka tavoru, a abe tomu na sibiano.

Nalo nei naruei mia ava avokar mŕiano juo nene, nina ea kialo vio nene rimemedu ea bulukusebi napano bonoti kirivova, a naio maka rijikia ribisi.”

⁹ Iliano nei bisi, ana nailiano nalo nei nua tai kalo, nanua m̃a abar basidobidobi aluo na jogvaiano aluo na maariano na yetemeriba, naio binimeĩ bio kinioũ. Naio berinavo “Jau komei beamu vo, mia nalaso jau keial tira na soriano, nina be Nunu Solbouo koano.”

¹⁰ Naio burular kinioũ naban ea niunuku ga ana kumemi juo nuba nuboru mave ea burum̃ara burusuku tai. Numisikili numitua vio nene ana naio jiloglog burum̃ara komeli lu nei Yerusalemo ban kinioũ, nemialio bereio ka napano naio jo jaluvo ea Atua mave tiniabene naio jo binimeĩ yetano.

¹¹ Naio jo batove jibe na, naio jo bujo ka Atua kanano mermerano, mila naio merera laka, javukia mermerobi napano mkekeano meravo bo laka.

¹² Mia kanano tagvoru jumolu jeliuiv eaio, bavin laka, a m̃aratavo na tortoru duelimo ba juo [12] juaio, napano abe terakurano be kialo nailiano aju abitikar vatitiglo. A m̃aratavo nalo nene be terakurano be sio jualo, napano be siano yati duelimo ba juo na Israel, ¹³ napano m̃aratavo tolu ju ba tivelinio not, tolu ba tivelinio saut, tolu ba tivelinio wes, tolu ba tivelinio is. ¹⁴ A burum̃ara tagvoru nei jumolu ju ea burum̃ara m̃artea duelimo ba juo na kanano, be sialo abivitaualo beve terakurano, napano sio nalo nei abe atevi duelimo ba juo [12] na Nunu Solbouo.

¹⁵ Naruei nailiano napano

naio jom̃a jukunu bija kinioũ nei, midu burutuli toto tai tena niogo ea jum̃ano, ka riva rijeteli ea komeli nene naio toru jum̃abe, vija tagvoru nene, a sano m̃aratavo nene nalo. ¹⁶ Burusio na komeli nei, tivelinio veri nene terebievi abe verare ga, ana nailiano naio ba mijeteli ealo, jovulu sadu taam̃aka juo, ŋeli kilometa menu juo [2,000]. A mijeteli ea jikar yetano bavin bokar jumoti levlevi, naio be verare ga bereio ka tivelinio ver nene.

¹⁷ Naruei naio ba mial tagvoru, naio mijeteli ea meroroliano nene, naio buluku batitig meta nene nalo, jovulu tiijaano duelimo va ari [60] garuei.

¹⁸ A tagvoru nene nalo, maka alailo ka puruveru ŋiliŋili ga nalo, mia amim̃au kalo ka puruveru tai napano naio mkekeano na bo laka, a komeli, torogio nonovio nene nalo amim̃au kalo ka niogo ga, meravo nono bo laka, naio mieg bo mia bo laka.

¹⁹ A m̃artea tortoru nalo na tagvoru, nalo bunu amiyovovua vatitiglo bija puruveru novo nalo, napano tai amiyovovua nonovio ka puruveru tai napano mkekeano nene jibe nei, tai amiyovovua nonovio ka puruveru tai napano mkekeano nene jibe nei, banbano mila nonovio m̃artea duelimo ba juo nene. A puruveru duelimo ba juo nei sialo, ajibe nei. Na jukamu, siano sasp̃a, juo

nene naio sapaia, tolu nene naio kalseton, veri nene naio be emrol, ²⁰ jimo nene naio be satonik, ari nene naio be kaneleon, aluo nene naio be krisolaet, arolu nene naio be berol, koveri nene naio be topas, duelimo nene naio be krisopres, duelimo ba tai nene naio be sasin, a na maariano be duelimo ba juo naio be ametis.

²¹ A m̄aratavo nalo, mia abeve terakurano abe burutomoruo basabebe takurano ga. A nemial burum̄ara m̄arabo na komeli nene bunu, napano naio abijuru ka niogo nonovio, naio kirinovo mia kirinovo tanea.

²² Mia vite tai napano nomiilo kanio, be tinieku ka mia neial burum̄ara yimo lu tai to iviso ea bulukomeli lu nei, mia nebitiio mia maka neleal tai. Vio nei maka ve yimo na jibe na, bior Atua Soŋi na moroano, bija Nunu Solbouo, tomu nalo amilotu kalo ea vio nonovio dam̄ariga. ²³ A nemileal ka napano komeli nei maka ve m̄erenio a siberio amerera eaio, bior napano Nunu Solbouo naio jibe sano yulu nene, Atua kiano mi-amoiانو mila vio nonovio be burum̄ara mereraiano jo dam̄ariga. ²⁴ Buruvenuo dolu nalo mia aiel ea burum̄ara mereraiano nei napano miyotuba denio, a vite nonovio venia napano tubo nalo na tortoru na buruvenuo dolu nalo amiŋevio, mia avarlo rimei asian riva Yerusalemou vou nei, tibe ka kialo jidomiano tai. ²⁵ Vio nei mia ve re melijokouo

rimei eaio bogo tai, mila na sano m̄aratavo na tortoru nalo amijikia atum̄a avetavo dam̄ariga, ²⁶ a miamoiano a vite novo nalo na buruvenuo dolu mia atu amei joomo eaio dam̄ariga.

²⁷ Mia tivelinio ka vite nalo napano maka ameravo rivu laka, mia ve re tai rijikia riva jouro ea vio nei bogo tai, mia toro kei napano naio mila im̄auano tai napano be tena imouiano ŋeli be tena sibiano, mia naio bunu rijikia re riva jouro eaio. Nalo na ka ava jouro, nalo na ga napano sialo, Nunu Solbouo bivitaui ruei ju joomo ea kanano niosi na meuliano ruei.

22

Parinio uei na meuliano

¹ Karina, nailiano jiloglog parinio uei na meuliano ka kiniou. Nemial napano be uei novo nene, naio meravo mia meravo, naio jo mieraro miyotuba jikar ea vio lu na Atua napano Nunu Solbouo juaio. ² Uei nene naio mieraro bano, yano nene mieraro memedu jel iviso bure burum̄ara m̄arabo na komeli na Yerusalemou vou. Uei na meuliano nei naio mieraro jibe nei bano, a be burupati iesi na meuliano nalo na ajumolu aju tivelinio be juo na uei neibano. Buruiesi nalo nene abo laka, bior napano aju ajako ea siberio nonovio ga, duelimo ba juo [12] ka yuka takurano. A m̄ati nalo bunu, abo laka, bior amijikia aieliel

batig ka mieiano nalo na tomu nalo na buruvenuo na yetemeriba nei.

³ Tibe na, mia Siþaro kanano bajago va nalo, napano jidom rila bulag vurua vite nonovio, mia nalo atua re komeli nei leleio. Nunu Solbouo joa Atua kiano vio lu ea vio nene, a vio bujo ka kanano tomu nalo na ña kanalo iñauano, aju amilotu ka naio dañariga. ⁴ Nalo aju vaataro kanio, a ajirikakar siano jua mamerinialo. ⁵ Ea vio na, melijokouo re, viorijen rivu bogo nonovio, mia maka ve yulu na yulu tai þeli yulu na mñerenio. Makanio, mia Tubo Atua ga naio be burupati na yulu, napano midulii vio na, mia naio buru kiano tomu nalo nene, naio bitiri bulaglo abe tubo na tortoru ka aje tuboiano ka vite nonovio nalo.

Yesu kanano bogo na rimeĩ bereio

⁶ Ana nailiano nei naio mil ban kiniou, berinavo “Vite nalo na ña komial lo þeli komijoglo, amemedu laka, mia iorou amei ave riano nonovio. Buruñara kiado Tubo, naina be Atua nanua ña naverialiano na beamu amiñau ea moroano na Ni-ununo, naio miila kumemi kanano nailiano nalo numiyotuba kaso ka nuvisi vite nalo nei vansom. Naio mila jibe na bior napano naio jidom ka kanano tomu nalo monoka ajikia vite nalo napano mia ayotuba vesiou re.”

⁷ Mia Yesu kiano iliano ea vio nei ban kiano tomu

nalo, naio jel jibe nei, berinavo “Kamiu kuvitikar! Mia vesiou re, mia kiniou nemei noyotuba ka kamiu bereio. Toro napano bokar vatitig iliano na visiþeiano nalo na kanaku niosi nei, mia rivu laka van naio, mia naio mijikia rijog rivu ve toru.”

Jone kanano iliano na maaro

⁸ Kiniou na ña nemial vite nalo nei, nomijog iliano nalo nei, kiniou tormoruo Jone. A bogo napano nemial nonovio bisi, nomijorua tano neminie kamu ka nailiano nei jaano napano naio bisiþe vite nalo nei ban kiniou ruei, nomijog jibe nojidom nolotu kanio. ⁹ Mia naio berbureio, berinavo “To, jau kala re tibe na. Kiniou bunu nebe Atua kanano toro na iñauano tai ga, jibe ka jau kamliko kuruamo nalo naverialiano nalo re nua, bija bunu kulo dolu nalo napano abokar jikili bo iliano nalo na niosi lu nei. Bo ka kito rolotu ka kiado Atua naio ve takurano ga.”

¹⁰ A naio ber iliano dolu tai bunu ban kiniou, berinavo “Jau kodu van re visiþeiano nalo na niosi nei. Be bogo binimeĩ vaataro, naruei bo ka tomu nalo ajikia venia na ña ajuñã aberenio. ¹¹ Toro napano maka sidom riagago, mia naio rila kiano bajago va riva rivavin lie vo, mia kanano kariano na miagiago ava ve burutomoruo laka. Mia toro na ña mije tilinieno, mia kanano iñauano na memedu nalo amei avu

laka, mia kanano bajago novo nalo amei ave lu laka.”

¹² Ana Yesu kanano iliano ea vio na, naio jibe nei, ber “Kamiu kuvitkar! Kiniou nojo ka namaluvo kean kamiu vesiou lele re. Kiniou nemei vija kanaku jidomiano novo nalo, napano mia nesian van tomu nalo takii imauano nalo napano amila be kiaku. ¹³ Kiniou nebe motoru a nebe bajulkuti, kiniou nojukamu a nojo iorou, kiniou nebe natikariano bija namaroano.

¹⁴ “Vesiou re ga, mia burumara ilivuiano riyotuba ka kanaku tomu nalo rimemedu. Nalo ajekon vatitig kanalo kulumarauo nalo, amiya vatitiglo ruei, naruei amijikia ava joomo ea maratavo ka ava jouro ea komeli lu na Atua kanano, amijikia ava avokar buruiesi na meuliano. ¹⁵ Mia kulo dolu nalo miroano maka ajikia amei jouro. Nina nalo napano ajumã amiel janea ga vio jibe ka kuli nalo, bija nalo napano mã abar semei, nalo napano mã amila siakiano a siakaiano, nalo napano mã amuebinvin kulorinio, nalo napano mã amilotu ka tavoru nalo, a nalo napano mã tinielo jii ka ala bajago na sibiano.

¹⁶ “Kiniou Yesu, nemiila kiaku nailiano na biedu ka riverial iliano nalo na vansom, ka jau komijikia kava kesian van kanaku lotuano nalo. Naverikariano napano aberkar ka mia rimaluvo ea tormoru parinio tubo Teviti

re nua, kiniou nei. Kiniou nei nebe Mejegi, marivitano napano berial ka vaataro ka viorijen mermeravo.”

¹⁷ Mo Atua niununo naio mijog iliano nalo nei, naio ber ka Yesu, berinavo “Bo ga, jau komijikia komei!”

Tira na ju ka soro kanio, naio berinavo “Nao, bo ka jau komei naruei!”

A toro kei napano naio mijog iliano nalo nei, bo ka naio bunu riverialio, riverinavo “O Yesu, ver jau komei ga!”

Mia kei napano midou jer, kuvetavo ka maratavo kanio ka naio mijikia riviedu joomo. Toro napano naio jidom rime, mia naio mijikia rivokar mano uei na meuliano, jibe ka kanano jidomiano kurano tai ga.

¹⁸ Mia kiniou neber iliano na jikili tai van kamiu napano mia kuvijog iliano nalo na visiþeiano nalo na niosi lu nei. Verenio toro tai rijeve ka iliano dolu tai bere mave ka napano jo ruei, mia Atua rila naio rivar jogvaiano nalo riviniu napano niosi nei jo berialio nua ruei. ¹⁹ Peli ver toro tai rila kokoa bereio iliano nalo nei tealo napano ju ruei, mia Atua rijelar den bereio kiano jajumãano napano joa buruiesi na meuliano, mia naio rijeve re tonovo nalo jibe ka napano niosi lu nei naio berenio ka na aju jouro ea komeli lu.

²⁰ Naio napano joŋa berial
iliano nalo nei, naio beri-
navo “Naio jibe ga na naruei.
Vesious re, mia kiniou noy-
otuba kean kamiu.”

Mia tomu nalo na Atua
kanano kialo jidomiano,
aberinavo “Ver tibe na, rivu
mia rivu laka. Aiou Yesu, jau

komei soþeli!”

²¹ Mia ilimaariano na
tivelinio na tukunuano na
kanaku monovovuano, kin-
iou tormoruo Jone nobolk-
ouo ka mia kiado Tubo Yesu
kanano tiniememiano novo
to vija kamiu, Atua kiano
tomu nalo. Mm.